


Didza' cubi rucá'ana  
tsahui'



New Testament in Zapotec, Rincón (MX:zar:Zapotec, Rincón)

Didza' cubi rucá'ana tsahui'

New Testament in Zapotec, Rincón (MX:zar:Zapotec, Rincón)

copyright © 2009 Wycliffe Bible Translators, Inc.

Language: Zapotec, Rincón

Translation by: Wycliffe Bible Translators, Inc.

Zapotec, Rincón

zar

Mexico

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Rincón

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents.

For other uses, please contact the respective copyright owners.

2014-04-30

## Contents

Salmos . . . . .	1
San Mateo . . . . .	124
San Marcos . . . . .	178
San Lucas . . . . .	212
San Juan . . . . .	268
Hechos . . . . .	309
Romanos . . . . .	360
1 Corintios . . . . .	382
2 Corintios . . . . .	402
Gálatas . . . . .	415
Efesios . . . . .	423
Filipenses . . . . .	431
Colosenses . . . . .	436
1 Tesalonicenses . . . . .	441
2 Tesalonicenses . . . . .	445
1 Timoteo . . . . .	448
2 Timoteo . . . . .	455
Tito . . . . .	459
Filemón . . . . .	462
Hebreos . . . . .	464
Santiago . . . . .	479
1 Pedro . . . . .	485
2 Pedro . . . . .	491
1 Juan . . . . .	495
2 Juan . . . . .	500
3 Juan . . . . .	501
Judas . . . . .	502
Apocalipsis . . . . .	504

## YUGU' SALMO

### 1

<sup>1</sup> Bica' ba bönni' biti' runë' ca naca le ta'gú'u yöl-la' lë' nupa tu'cá'ana Dios,  
en biti' ridálenë' tsözxön nupa tun dul-la',  
en biti' runë' tsözxön le tun nupa ta'zí' quidza' Dios.

<sup>2</sup> Le raza ládxé'ë nácagaca xibá naguixjé' Xanru',  
en ca nácagaca xibá na' rëla, en te dza rulaba ládxé'ë.

<sup>3</sup> Bönni' ni náquië' ca tu yaga dxe' ga naca ra' nisa,  
le ribía sizxöni cate' ridxín dza que,

en biti' ca' rizóa gubá'ayisö.

Yúgu'të le runë' ta'rúaj dxi'a.

<sup>4</sup> Biti' raca caní quégaca nupa tuá' dö'.

Nácagaca ca bëbu zxe café ruá' le bö'.

<sup>5</sup> Que lë ni na' biti' ulu'rúajë' tsahui' bönni' tu'ë dö' cate' Dios uchi'a usöröë' quégaquië',  
en biti' ila'cu'ë bönni' dul-la' ga tu'dubë' bönni' tsahui'.

<sup>6</sup> Rapa chi'ë Xanru' Dios nöza ga ta'dé' bönni' tsahui' na',  
pero uniti tsaz nu ridá gapa ta'dá nupa tuá' dö'.

### 2

<sup>1</sup> ¿Bizx que tu'tsatsa bönachi yugu' yödzö  
en tu'pá'a nítisö le ilúngaca?

<sup>2</sup> Bönni' ta'nná bë'ë luyú ta'dá'baguë'ë Dios.

Tun tuz xtídza'gaca nupa dë lu ná'agaca

para ila'dá'baga' Xanru', en Nu na' nabö' cazë' para inná bë'ë,

<sup>3</sup> ta'nná: "Uzzuxxaj uquímajru' le ta'nná bë'enë' rë'u,  
en chú'unaru' yugu' le tu'zenë' bach rë'u."

<sup>4</sup> Dios na' zoë' yehua' yubá uzxídxisë'.

Xanru' Dios utitaj cazë' léguequi.

<sup>5</sup> N'irö lu yöl-la' rilé queë' gü'i'ilenë' léguequi didza',  
en lu yöl-la' ridzä'a queë' uzenë' bach léguequi.

<sup>6</sup> Inné': "Nuzóa caza' bönni' nabö' caza' xilatje' ga inná bë'ë.  
Inná bë'ë lu Guí'a Sión, le naca guí'a lá'ayi quia'."

<sup>7</sup> Quíxjöi'ida' libí'ili' didza' nuzóë' tsaz Dios.

Xanru' Dios gudxi cazë' neda': "Li' nacu' Zxí'ina'.

Na'a dza nuzóa caza' Li'.

<sup>8</sup> Gunábini neda', ate' guna' ga ilequi quiu' yugu' yödzö.  
Guequi ca' quiu' idútë yödzölió.

<sup>9</sup> Quitsju' léguequi len tu xiyaga guíë.

Uzzuxxju' léguequi ca run nu rilá'a tu zxiga' yö'öna."

<sup>10</sup> Que lë ni na', libí'ili' na' rinná bë'ëli', guli'tséajni'i.  
Guli'sedi cuinli', nülöli' ruchi'a rusöröli' le raca luyú.

<sup>11</sup> Lu yöl-la' ba'a ladxi' queëli' guli'gún xichinë' Xanru'.

Lu yöl-la' rizzizi queëli' buli'sí' xibé'.

<sup>12</sup> Guli'gún bal Zxí'inë' Dios para cabí ilétenë',  
en para cabí udxi queëli' la' nöza.

La' ilentë yöl-la' rilé queë'.

¡Bica' ba yúgu'të nupa tu'zxöni ladxi' Lë'!

## 3

<sup>1</sup> Xan, chinayángacada' nupa ta'lé neda'.  
Zián nupa ta'dá'baga' neda'.

<sup>2</sup> Zián nupa ta'nné quia', ta'nná:

"Biti' usölé" Dios lë'."

<sup>3</sup> Pero Li', Xan, run chí'itica'su' neda'.  
Nacu' yöl-la' ba quia', en Nu rutipa neda'.

<sup>4</sup> Bë'a zidzaj didza', bulidza'-në' Xanru',  
ate' Lë' biyönné' chi'a ga na' zoë' lataj lá'ayi queë'.

<sup>5</sup> Neda' rata', en rasia',  
ate' rubana', tu' nazõntica'së' Xanru' Dios neda'.

<sup>6</sup> Biti' gádxida' gayuá' gayuá' bönachi,  
nupa na' nagú'ugaca neda' lé'ajlö.

<sup>7</sup> ¡Guyasa, Xan! ¡Busólá neda', Dios quia'!  
Budxía huë' xága'gaca nupa tu'dí'i neda',  
en buquínnajda' nupa nácagaca xihui'.

<sup>8</sup> Xan, rusólá cazu' bönachi quiu'.  
Ben ga gaca dxi'a quégaca bönachi quiu'.  
¡Ca' gaca!

## 4

<sup>1</sup> Bubi'i didza' cate' rulidza' Li', Dios.  
Nacu' Nu ruchi'a rusöró le raca quia'.  
Cate' gurö'a böniga, bida cazu' Li' ga zoa', en gúcalenu' neda'.  
Ruhuéchi' ladxi' neda', en ruzé nagu' le rinábida' Li'.

<sup>2</sup> Rnné' Dios: "Libíili', bönachi, ¿gáca'zte ulidza dítajli' neda'?  
¿Gáca'zte caz idxí'ili' le cabí nazaca', en gü'i ládxi'li' le cabí naca?"

<sup>3</sup> Guli'tsöjné nabó' cazé' Xanru' nu radxi Lë',  
ate' riyönné' neda' cate' rulidza'-në'.

<sup>4</sup> Guli'gadxi Lë', en bíti'rö gunli' dul-la'.

Guli'sá' ladxi' ca naca lë ni cate' dëli' ga ráta'li', en guli'sóa dxisö.

<sup>5</sup> Guli'cú'u lahué' Xanru' le naca dxi'a,  
en buli'zxöni ladxi' Lë'.

<sup>6</sup> Zián nupa ta'nná: "¿Nuzxi caz gun ga gaca dxi'a queéru'?"  
Lu yöl-la' dxi'i ladxi' quiu' buyú netu', Xan.

<sup>7</sup> Runu' ga rudzéjade'eröda'  
ca tu'dzeja nupa tu'zí' xibé zxoa' za guizxi yu, en xisi lubá uva.

<sup>8</sup> Cate' rata', la' rásitia' lu yöl-la' riböza dxi ladxi' quia',  
tu' run cazu' Li', Xan, ga riböza' dxi'a tsáhui'do'.

## 5

<sup>1</sup> Ruzé nagu' didza' ruá'a, Xan.  
Buyú ca rinnëda' ládxa'a lu yöl-la' ruhui'ini quia'.

<sup>2</sup> Dios quia', Nu rinná be'e neda', ruzé nagu' cate' rinábida' Li'  
gácalenu' neda', na' gü'ilena' Li' didza'.

<sup>3</sup> Yugu' zila yönnu' chi'a.

Zílado' idxina' lo', en ciòza' didza' ubi'u.

<sup>4</sup> Nacu' Li' Dios biti' raza ládxu'u le cabí naca,  
en biti' ru'u lataj ibiga' ga zu' nu ruá' dö'.

5 Biti' ru'u lataj nupa tun ba rahui ila'dxín lo',  
 en biti' rile'enu' dxi'a nupa nátagaca xihui'.  
 6 Rusunítiu' dérö nupa ta'zi' ye'e luzé'eguequi,  
 en biti' rile'enu' dxi'a nupa tuti böñachi, en ta'zi' yë'.  
 7 Gaca tsu'a neda' lu yu'u lidxu', tu' nadxf'ide'enu' neda'.  
 Lu yöl-la' ba' a ladxi' quia' tsu'a ga naca yudo' lá'ayi quiu', en tseaj ládx'a a Li'.  
 8 Tu' nacuá' zián nupa ta'lé neda', bulu'i neda' le naca dxi'a ré'ënu' guna', Xan.  
 Busëdi neda' para gaca guna' ca ré'ënu' Li'.  
 9 Biti' gaca nu tseajl'é' didza' tu'i nupa na' ta'lé neda'.  
 Nátagaca xihui' icja ládx'i do'guequi.  
 Naca ruá'agaca ca tu yeru ba nayalaj,  
 en lu yöl-la' rizi' yë' quéguequi tu'i yulaj didza'.  
 10 Ben léguequi xiguia', Dios.  
 Ben ga biti' udxín xtídza'guequi.  
 Gurú'una léguequi tu' túntica'sö dul-la',  
 en tu' ta'dá'baga' xtídzu'u.  
 11 Ulu'dzeja nupa tu'zxöni ladxi' Li'.  
 Lu yöl-la' rudzeja quéguequi gúl-lagaca quiu' tu' rácalenu' léguequi.  
 Tu'zi' xibó' nupa nadxf'igaca Li'.  
 12 Run cazu' Li' ga raca dxi'a quégacca nupa tun ca rnna xtídzu'u, Xan.  
 Lu yöl-la' dxi'i ladxi' quiu' run chi'u léguequi.

## 6

1 Biti' uzenu' bach neda' lu yöl-la' rile' quiu', Xan.  
 Biti' gunu' neda' xiguia' lu yöl-la' ridz'a' quiu'.  
 2 Buéchi' ladxi' neda', Xan, tu' rudú ládx'a'a.  
 Bun neda', Xan, tu' rigui'i rizáca'a.  
 3 Rö'ö böñiga idútë le naca'.  
 ¿Gáca'zte caz gaca caní, Xan?  
 4 Gudá dusölö' neda', Xan.  
 Tu' nadxf'inu' neda', busölá neda' lu yöl-la' guti.  
 5 Lu lataj chul-la cuntu nu tsöjnë Li'.  
 Cuntu nu zoa ni' nu gaca cu'u Li' yöl-la' ba.  
 6 Rudú ládx'a'a tu' rinnética'sö ládx'a'a.  
 Yugu' dzö' ribisa le ráti'da' len nisa ribödxi quia'.  
 Rusubisa' xcúguia' len nisa ribödxi quia'.  
 7 Rö'ö gui guiøj lahu'a tu' ribödxitica'sa'.  
 Biti' gaca ilé'eda' tu' nőzigaca nupa tu'df'i neda'.  
 8 Guli'cuíta ga zoa', libi'ili', ruá'ali' dö',  
 tu' riyönnë' Xanru' ribödxa' neda'.  
 9 Ruzé' naguë' le rulidza', ráta'yua' lahuë',  
 en rubi'ë' didza' cate' bi rinábida' Lë'.  
 10 Ulu'tu'i nupa tu'df'i neda', en ila'bó' böñiga.  
 Lu yöl-la' rutui'i quéguequi ulu'biga' ga zoa'.

## 7

1 Ruzxöni ládx'a'a Li', gácalenu' neda', Xana' Dios.  
 Busölá neda' lu ná'agaca nupa ta'bía no neda', en gúcalen neda'  
 2 para cabí soa nu cuéaj neda' ca runba' bëdxi guixi',  
 en para cabí usuniti neda' ga cuntu nu zoa gácalen neda'.  
 3 Xana' Dios, channö caní nuna':

Channö nabága'a xiguia',

<sup>4</sup> o channö bubi'a dö' que nu gúcalen neda',  
o channö bi'a dö' que nu biti' bi ben quia' lu biti' rilé'e neda' dxia',  
<sup>5</sup> bë' lataj soa regu' neda' nu na' biti' rilé'e neda' dxia', en ucul-la neda'.  
Bë' lataj nu na' quin neda' lu yu,  
en ucá'ana neda' cá'asö.

<sup>6</sup> Lu yöl-la' rilé quiu' guyasa, Xan.

Gudá'baga' nupa na' lu yöl-la' ridzá'a quéguequi tá'baga' neda'.  
Guyasa, gúcalen neda' tu' nacu' Nu ruchi'a rusörö le raca quia'.

<sup>7</sup> Ben ga ulu'dubi quiu' yúgu'të böñachi,  
en gunná be'e léguequi ga ni' zu' xitsá'térö.

<sup>8</sup> Ruchi'a rusörö'u' quéguequi yúgu'të böñachi, Xan.

Bubéaj neda' tsahui', Xan, tsca naca le tsahui' nuna', en tu' naca' idú tsahui'.

<sup>9</sup> Ben ga udxi que le xihui' tun nupa tuá' dö',  
pero buzóa tsutsu nupa tun le naca dxia',  
tu' nacu' Li' idú tsahui', Dios, en ruchi'a rusörö'  
le ta'zá' ládx'i'gaca böñachi, en le ta'guínnaj ícjaguequi.

<sup>10</sup> Naca cazë' Dios Nu run chi'i neda'.  
Rusölë' nupa nácagaca idú ladxi'.

<sup>11</sup> Dios ruchi'a rusörö'ë' queëru' ca naca le naca tsahui',  
en richúgutica'së' quégaca nupa tuá' dö'.

<sup>12</sup> Channö cabí ulu'bí'i ladxi' böñachi, utuchë' guíë tuchi' queë'.  
Chinucözë' uxiti' yaga queë'.

<sup>13</sup> Chinupé'ë yugu' le rudí'inë' lu gudil-la,  
en nudxië' lu du uxiti' yugu' yaga túchi'do' zoa guí' láhuiguequi.

<sup>14</sup> Buyútsöca', riguínnaj icjë' bönni' ru'ë dö' le xihui' gunë'.  
Rui'i ládxë'ë le naca dö', en rizi' yë'ë.

<sup>15</sup> Nachö'önë' ga rë' tu yero zxön ga nu ibixi,  
pero lë cazë' yöjbixë' lu yero na' guchö'önë'.

<sup>16</sup> Budxín la' queézë' dö' na' bi'ë,  
en dxíë' huë' ca naca xiguia' nabáguë'ë.

<sup>17</sup> Guía'-në' Xanru': "Xclenu'" tu' náquië' tsahui',  
en gul-la' yöl-la' ba que Lë' Xanru', Nu nayépisëtérö.

## 8

<sup>1</sup> ¡Xana' Dios,  
bica' ba Lo' idútë yödzölió!

¡Xitsá'térö ca lúzxiba nayépisu' Li'!

<sup>2</sup> Túl-labi' bí'ido', enca' bi'i hué'enido' yöl-la' zxön quiu'  
sal-la' nacuá' nupa ta'dá'baga' Li'.

Uzóa dxíu' nupa na' biti' ta'lë'e Li' dxia', enca' nupa ta'dá'baga' Li'.

<sup>3</sup> Cate' ruyúa' lúzxiba quiu', le nunu' len xibón na'zu',  
enca' beu', en yugu' bólaj bení' nuzú' xilátjaguequi,

<sup>4</sup> ní'irö rmnía': ¿Bizxi caz bönni', tu' röjné cazu' lë'?

¿Bizxi caz nu naca böñachisö, tu' ruí'i ládxu'u Li' nu na'?

<sup>5</sup> Nunu' ga naquië' bönni' ia'lati' cuidi' ca naca cazu' Li'.

Nuzú' queë' yöl-la' ba quiu', en yöl-la' run bal ca  
tu le néquini oro dxia icjë'.

<sup>6</sup> Nunu' ga rinná bë'enë' yugu' le nun cazu' Li'.  
 Yúgu'të nuzú' xini'ë lë'.  
<sup>7</sup> Nuzú' xini'ë yúgu'tëba' bö'cu' zxila', en yúgu'tëba' bëdxi,  
<sup>8</sup> en lës caní nunu' ca' quégacaba' biguínido',  
 en quégacaba' böla dzö'öba' nísado',  
 enca' quégacaba' yúgu'tëba' böa' ta'dödiba' lu nísado'.  
<sup>9</sup> ¡Xana' Dios,  
 bica' ba lo' idútë yödzölió!

## 9

<sup>1</sup> ¡Idú ládex'a rigu'a Li' yöl-la' ba, Xan!  
 ¡Usiyönda' bönachi ca naca yúgu'të yöl-la' huáca nunu'!  
<sup>2</sup> ¡Udzéjada', en uzi'a xibó'!  
 ¡Gul-la' yöl-la' ba que Lo', tu' nayépisëtëru'!  
<sup>3</sup> ¡Ta'zxunnaj nupa ta'dá'baga' neda'!  
 ¡Ta'dzö'ö, en tu'niti lo' Li',  
<sup>4</sup> tu' nubéaju' tsahui' le naca dxi'a runa'!  
 ¡Rö'u ga rinná bë'u, en ruchi'a rusöröö' queétu' ca naca le naca tsahui'!  
<sup>5</sup> Bulidza zi'u yugu' yödzö, en busunítiu' nupa tuá' dö'.  
 Tsaz busulu' lu guichi quiu' gapa gula'zúaj láguequi.  
<sup>6</sup> Chigula'niti nupa gula'dá'baga' Li'.  
 Tsaz naguínnaajgaca gapa gula'cuá'.  
 Busunítiu' yugu' yödzö gapa na' gula'cuá',  
 ate' cuntu nu zoa röjnë yugu' yödzö na'.

<sup>7</sup> Zóatica'së' Xanru' Dios.  
 Naguixjé' tsaz lataj ga rö'ë rinná bë'ë en ruchi'a rusöröö' quégaca bönachi.

<sup>8</sup> Uchi'a usöröö' quégaca bönachi yödzölió lu le naca tsahui'.  
 Uchi'a usöröö' quégaca yugu' yödzö lu le nácatë.

<sup>9</sup> Gun chí'ë Xanru' Dios nupa nácagaca yechi'.  
 Gácalenë' láguequi cate' nu gun láguequi zi'.

<sup>10</sup> Ulu'zxöni ladxi' Li' nupa núnbe'gaca Lo'.  
 Caní gaca, Xan, tu' cabí nusán ládxu'u nupa tu'guilaj Li'.

<sup>11</sup> Guli'gul-la yöl-la' ba queë' Xanru', zoë' ga na' nazí'i le Sión.  
 Buli'siyón bönachi yugu' yödzö ca naca yugu' le nunë'.

<sup>12</sup> Biti' ral-la ládxë'ë nupa ta'guí'i ta'zaca' cate' tu'lidza Lë',  
 tu' röjnë láguequi Nu na' ruzí' lëbi nu rutí bönachi.

<sup>13</sup> Buéchi' ladxi' neda', Xan.  
 Buyú ca tun neda' zi' nupa tu'dí'i neda'.  
 Ruchisu' Li' neda' cate' chirequi gátia'  
<sup>14</sup> para gaca usiyönda' bönachi yöl-la' ba quiu' Li'.  
 Ga naca ga nu tsaza yödzö quiu' nazí'i le Sión,  
 udzéjada' tu' nusólö' neda'.

<sup>15</sup> Yöjbíxigaca bönachi yugu' yödzö lu yero gula'chö'öna ga tsöjbíxigaca luzé'eguequi.  
 Bila'röli ni'aguequi lu yöoxaj bulu'cachi' para ila'zón láguequi.

<sup>16</sup> Chinunë' Xanru' Dios ga núnbe'gaca bönachi Lë' tu' buchi'a busöröö' quéguequi.  
 Lu lë na' nun nu ruá' dö' zón la' cuinsi.

<sup>17</sup> Illa'yaza lataj chul-la nupa tuá' dö',

yúgu'të nupa na' nal-la ládxí'gaca Dios.

<sup>18</sup> Caléga tsaz ulu'gá'ana cá'asö nupa ta'yadzaj ta'yudxi,  
en biti' initi tsaz yöl-la' run löza quégaca nupa nácagaca yechi'.

<sup>19</sup> Guyasa, Xan.

Biti' gu'u lataj tsépisë nu naca böñáchisö.

Buchi'a busörö quégaca böñachi yugu' yödzö.

<sup>20</sup> Buxós léguequi, Xan.

Ben ga ulu'únbë' le nácgaca, tu' nácagacasö böñachi.

## 10

<sup>1</sup> ¿Bizx que zu' zi'tu', Xan?

¿Bizx que rucachi' lo' cate' bi raca quia'?

<sup>2</sup> Lu yöl-la' run ba rahui quégaca nupa tuá' dö'  
ta'bía no nupa nácagaca yechi'.

Ben ga ila' zón du yalaj na' nucáchi' gaca la' léguequisö.

<sup>3</sup> Run ba zxön cuiné' bönni' ru'ë dö' ca naca le xihui' rizé ládxë'ë.

Bönni' ruhuídi'në' rulidza ditjé' luzé'ë, en ruzóë' Dios tsölá'alö.

<sup>4</sup> Lu yöl-la' run ba zxön cuiné' bönni' huía' dö' biti' ru'i ládxë'ë Dios.

Rizá'asö ládxë'ë, rnnë': Biti' ca' zoa Dios.

<sup>5</sup> Ruzi'ë xibé yúgu'të le runë'.

Biti' ca' réquibe'enë' zoë' Dios Nu ruchi'a rusörö quégaca böñachi.

Ruzóë' tsölá'alö nupa biti' ta'lé'e lë' dxi'a.

<sup>6</sup> Rë' la' cuinsë': "Gatga ichíxida'.

Catu caz bi gaca quia'."

<sup>7</sup> Didza' ru'ë nácagaca le rudxía dö', enca' le rizi' yë', en le ruididza' yudxi yugu' luzé'ë.  
Rui'itica'së' didza' le cabí nácatë, en le naca xihui'.

<sup>8</sup> Rucachi' cuiné' yugu' lu yödzö.

Bagáchi'sö rútië' nupa biti' bi nabága'gaca.

Ruyúlanë' nu bi gaca gun que.

<sup>9</sup> Ribözë' ga na' nucachi' cuiné' ca runba' bëdxi guixi'.

Ribözë' nu gaca sönë'.

Rizònë' bönni' yechi' lu du yalaj queë', en rá'ayöje' lë' ga nagachi' queë'.

<sup>10</sup> Riguiné' luyú nu na' nazònë'.

Zián nupa rucul-lé' len næ'ë nal-la.

<sup>11</sup> Ré' la' cuinsë': "Nal-la ládxë'ë Dios.

Nucachi' lahuë', en biti' ca' rilé'enë' le runa'."

<sup>12</sup> ¡Guyasa, Xan!

¡Gulís no'o, Dios!

¡Biti' gal-la ládxu'u nupa ta'gu'i ta'zaca'!

<sup>13</sup> ¿Bizx que bönni' na' ru'ë dö' nuzóë' Dios tsölá'alö?

Gudxë' la' cuinsë': Biti' uzi' lë' Dios neda'.

<sup>14</sup> Li' bilé'e quézinu' lë ni, Xan.

Rui'i ládxu'u nu rigu'i rizáca', en nu risëbi ladxi',  
en zóatica'su' gácalenu' léguequi.

Nu naca bayechi' rigú'u cuini lu no'o, Xan,  
tu' zóatica'su' gácalenu' nu riyadza riyudxi.

<sup>15</sup> Bugúa yöl-la' unná bë' quégaca nupa tuá' dö', en nácagaca xihui'.

Bubi'i quéguequi ca naca xigua' nabága'gaca.

<sup>16</sup> Inná bë'tica'së' Xanru' Dios.

Nupa tu'béaj ícjaguequi Xanru' ulu'niti tsaz lu xiyú cazë'.

<sup>17</sup> Ruzé' nagu', Xan, le ta'nábini Li' nupa nácagaca do' ladxi'.

Rutipu' ládxi'guequi, en ruzé nagu' chí'iguequi.

<sup>18</sup> Ruchi'a rusöróo' quégaca nupa nácagaca uzëbi,  
en nupa zoa nu ribía no léguequi,  
para cabirö ulu'xösa bönachi yödzölió ni luzé'eguequi.

## 11

<sup>1</sup> Ruzxöni ládxa'a Xanru' gácalenë' neda'.

¿Naru' guíétso' neda':

"Buzxúnnaj lu guí'a ca runba' biguínnido"?

<sup>2</sup> Buyútsöca', zöngaca nupa tuá' dö' yaga uxiti'.

Nuzóagaca yágado' lahu'i tuchi' lu du rusé,  
para ilútië' bagáchi'sö nupa nácagaca dxí'a.

<sup>3</sup> Channö ila'guínnaj yugu' le tu'zóa tsutsu le naca dxí'a,

¿bizxi caz gaca gun nu naca tsahui'?

<sup>4</sup> ¡Zoa cazë' Xanru' yudo' lá'ayi queë'!

Yehua' yubá zoa ga rö'ë rinná bë'ë Xanru' Dios.

Rilé'e guiój lahuë' para uyúë' le tun bönachi.

<sup>5</sup> Rizi' bë'ë Xanru' nu naca tsahui'.

Biti' rilé'ené' dxí'a nu ruá' dö', en nu raza ladxi' ta'dá'baga' yúlahui'.

<sup>6</sup> Gunë' ga sáca'gaca nupa tuá' dö' le usuniti léguequi.

Ubi'ë quéguequi guí', en le ruquéla' guí', en tu bö' régui.

<sup>7</sup> Caní gunë' Xanru' tu' náquië' tsahui', en nadxi'inë' le naca tsahui'.

Nupa tun le nácatë ila'lé'e lahuë'.

## 12

<sup>1</sup> Busölá neda', Xan, tu' cabirö zoa nitú nu naca dxí'a,  
en biti' gaca nu idzöli nitú nu run ca rnna xtídz'a'a.

<sup>2</sup> Ta'zí' ye'e yúgu'té bönachi luzé'eguequi.

Lu yöl-la' rizi' yë' quéguequi tuí'ilen luzé'eguequi didza' yúlajdo'.

<sup>3</sup> Xan, buzúa dxissö nupa na' tuí'i didza' yúlajdo',  
en buzaga' ruí'igaca nupa tun ba zxön cuínguequi.

<sup>4</sup> Ta'nná: "Güí'iru' didza' ca rizësö ládxi'ru',  
ate' cuntu nu tá'baga' rë'u.

¿Nuzxi caz inná bë'e rë'u ca naca didza' ruí'iru'?"

<sup>5</sup> Rnné' Xanru': "Na'a guída' tu' nacuá' nupa tun zi' nupa ta'yadzaj ta'yudxi,  
ate' rinné ládxi'gaca nupa ni tu' zoa nu ribía no léguequi.

Ca ta'zësö ládxi'gaca, la' guídatea' dusölá' léguequi."

<sup>6</sup> Huáca uxöni ládxi'ru' didza' ru'ë Xanru'.

Nácagaca ca guíë plata ba nequi,  
le nudxi'a gadxi luzuí tu lu guí' lálë'e.

<sup>7</sup> Li' caz, Xan, gun chi'u léguequi,  
en usölo' léguequi lu ná'agaca nupa tuá' dö' na'a dza.

<sup>8</sup> Gáti'tës nacuá' nupa tuá' dö',  
cate' tun zxön bönachi le ruá' dö'.

## 13

<sup>1</sup> ¿Gáca'zte caz gal-la ládxu'u neda', Xan?

¿Naru' tsaz gal-la ládxu'u neda'?  
 ¿Gáca'xte caz ucache' cuinu' lahua'?  
<sup>2</sup> ¿Gáca'xte caz gun bayudxi guá' ilena' le réquida' zi'?  
 ¿Gáca'xte caz hu'inida' rëla, en te dza?  
 ¿Gáca'xte caz ucúl-lágaca neda' nupa ta'dá'baga' neda'?  
<sup>3</sup> Buyú neda', Xan, en bubí'i didza'.  
 Butipa ládex'a para cabí gátia'.  
<sup>4</sup> Ni'irö biti' gaca ila'nná nupa ta'dá'baga' neda', biti' ila'nná: "Bucúl-laru' lë'."  
 Biti' gaca ulu'dzeja tu' nötjada' ládex'a neda'.  
<sup>5</sup> Neda' ruzxöni ládex'a yöl-la' dxi'i ladxi' quiu'.  
 Rudzéjada' tu' rusölö' neda'.  
<sup>6</sup> Gul-la' queë' Xanru',  
 tu' benë' quia' le naca dxi'a.

## 14

<sup>1</sup> Lu icja ládxi'da'ahuë' rnnë' bönni' tu' canöz, rnnë': Biti' zoa caz Dios.  
 Nachixi nanítigaquië' bönni' caní, en tunë' le cabí rilé'enë' dxi'a Dios.  
 Cuntu nu zoa nu run le naca dxi'a.  
<sup>2</sup> Ga zoë' Dios yehua' yubá buyúie' luyú ni ga nacuá' bönachi  
 para ilé'enë' channö zoa nu réajni'i, nu na' riguilaj Dios.  
<sup>3</sup> Yúgu'të' nadódigäquië' tsölä'alö.  
 Nachixi nanítigaquië' tu tuë'.  
 Cuntu nu zoa nu run le naca dxi'a, nitú bönachi.  
<sup>4</sup> ¿Naru' cabí ta'yéajni'i nupa tuá' dö'?  
 Le tun nupa na' naca tsca tagu bönachi quia' ca nu ragu yöta.  
 Biti' ca' tu'lidza neda', Xángaca bönachi.

<sup>5</sup> Lu yöl-la' radxi ridzöbi quéguequi ta'zxizi  
 tu' ta'le'e Xanru' Dios, en zóalenë' bönachi tsahui'.  
<sup>6</sup> Tu'titaj xtídza'gaca nupa nácagaca yechi',  
 pero nupa ni tu'zxöni ladxi' gácalenë' Xanru' léguequi.  
<sup>7</sup> Raca ládex'a irúa' Sión Nu usölá bönachi Israel.  
 Cate' gunë' Xanru' ga ulu'dxín bönachi queë' nadzúngaca xilátjaguequi,  
 ulu'dzeja zxí'ini xi'sóë' Jacob, bönachi Israel, en ulu'zí' xibé' Dios.

## 15

<sup>1</sup> ¿Nuzxi caz bönachi tsöjsóa xilatju', Xan?  
 ¿Nuzxi caz tsöjsóa ga naca lá'ayi quiu'?  
<sup>2</sup> Nu na' naca idú ladxi', en run le naca tsahui',  
 en lu icja ládxi'da'ahuui ruí'i didza' le nácatë.  
<sup>3</sup> Nu na' biti' rizi' quidza' bönachi,  
 en biti' ruá' dö' que luzé'e,  
 en biti' ruzé' naga nu rizi' quidza' luzé'e.  
<sup>4</sup> Nu na' biti' run bal nu ruá' dö',  
 pero run bal nupa tun zxöön Dios,  
 en sal-la' bi uniti cate' chinún xtida', biti' ca' rutsá' didza' na'.  
<sup>5</sup> Nu na' biti' rizi' icja dumí cate' runödzaj dumí que tu chí'ido'sö,  
 en biti' rizi' dumí para si' yë' ca naca le nun nu biti' nabaga' xiguia'.  
 Nu na' run yúgu'të le caní biti' ca' idzá' xilataj.

## 16

<sup>1</sup> Ben chí'i neda', Dios, tu' ruzxöni ládex'a Li'.

- <sup>2</sup> Lu icja ládxi'da'ahua' gudxa'-në' Xanru':  
 "Li' nacu' Xana'.  
 Bíti'rö bi zoa quia' le naca dxi'a, pero tuzu' Li'."  
<sup>3</sup> Riyaza ládxi'lena' nupa nácagaca queë' Dios luyú ni,  
 en nupa nácagaca idú ladxi'.  
<sup>4</sup> Ila'yán le ila'gu'i ila'zaca' nupa ta'yéaj ladxi' yugu' dios izá'a.  
 Biti' ca' cu'a láhuiguequi rön ca tun böñachi na',  
 en biti' ulidza' lágaca dios na'.  
<sup>5</sup> Náquië' Xanru' Dios Nu nabánida', en Nu ruzi'a xibé.  
<sup>6</sup> Li', Xan, nuzú' xilatja'.  
 Lataj na' nuzú' quia' naca le ruzi'a xibé,  
 en lachi naca lataj na' nequi quia'.  
<sup>7</sup> Gul-la' yöl-la' ba queë' Xanru', Nu rigú'u yöl-la' neda' le naca tsahui',  
 ga ridxitné ruzéajni'inë' neda' cate' ni' rasia'.  
<sup>8</sup> Chinuna' ga zóatica'së' Xanru' lahua'.  
 Tu' zoë' cuita' biti' bi utsá' neda'.  
<sup>9</sup> Que lë ni na' budzeja ládxa'a, en buzi' xibé ládxi'da'ahua',  
 ate' gun löza le naca' cate' igách'a yeru ba,  
<sup>10</sup> tu' cabí ucá'anu' neda' lataj chul-la,  
 en biti' gu'u lataj uniti nu nequi quez quiu'.  
<sup>11</sup> Nunu' ga núnbe'a nöza iché' neda' ga soa' ibana'.  
 Ga zu' Li' gata' quia' yöl-la' rudzeja idú,  
 ate' cuitu' Li' uzítica'sa' xibó'.

## 17

- <sup>1</sup> Ruzé nagu' neda', Xan.  
 Lu le naca tsahui' quia' rulidza' Li'.  
 Bé' ladxi' le rinábida' Li' tu' cabí ca' rizi' yë'a.  
<sup>2</sup> Buchi'a busörö quia'  
 tu' runu' Li' le naca tsahui'.  
<sup>3</sup> Núnbe'u Li' le yu'u ládxi'da'ahua'.  
 Ruyú' neda' chi'i dzö'ölö.  
 Guzxi' bë'u neda', ate' burúaja' tsahui'.  
 Biti' ca' ruá'a didza' le cabí naca idú dxi'a.  
<sup>4</sup> Runa' ca rinná bë' xibá quiu',  
 en biti' ca' ruá'a dö' ca tun bal-la böñachi.  
<sup>5</sup> Ridática'sa' la' nöza tsahui' quiu',  
 en biti' ca' ridöda' tsölá'alö.  
<sup>6</sup> Rulidza' Li', Dios, tu' rubi'u didza'.  
 Ruzé nagu' yugu' didza' ruá'a.  
<sup>7</sup> Bului'i lahui yöl-la' dxi'i ladxi' quiu'.  
 Rusólá cazu' nupa tu'zxöni ladxi' Li'  
 lu ná'agaca nupa ta'dá'baga' léguequi.  
<sup>8</sup> Ben chi'i neda' ca run chi'u la' guiøj lo cazu'.  
 Bucachi' neda' cuitu' Li' ca runba' böra, rucáchi'gacaba' bőrado' zxan xílabá',  
<sup>9</sup> para cabí bi ilún quia' nupa tuá' dö',  
 nupa na' ta'lé neda', en nagú'ugaca neda' lé'ajlö.  
<sup>10</sup> Biti' ca' zóalen léguequi yöl-la' ruhuéchi' ladxi',  
 ate' tu'i didza' lu yöl-la' run ba zxön cuínguequi.  
<sup>11</sup> Gáti'tés ga ridöda' ta'gú'u neda' lé'ajlö,

en té'ëni ila'guín neda' luyú.

<sup>12</sup> Nácagaquië' ca yugu' bëdxi guíxi'do'.

Té'ënë' ulu'sunítië' neda'.

Nácagaquië' ca yugu' bëdxi guixi'.

Nucachi' cuíngaquië' para ila'zönë' neda'.

<sup>13</sup> Gudá, Xan, gudá'baga' nupa ta'lé neda', en bucul-la léguequi.

Busölá neda' lu ná'agaca nupa tuá' dö', ugunu' dxin guíë tuchi' quiu'.

<sup>14</sup> Lu yöl-la' huáca zxön quiu' busölá neda', Xan,

lu ná'agaca nupa tu'zí' xibé na'a dza,

nupa na' nuhuólaj nudzé'egaca yöl-la' tsahui' quiu'.

Nayángacabi' zxí'inigaquië',

ate' tu'cá'ané' lu ná'agacabi' le dë sizxöni quégaquië'.

<sup>15</sup> pero neda' ilé'eda' lo' tu' naca' tsahui',

en tsaza ládex'a' gaca' ca nacu' Li' cate' ubana'.

## 18

<sup>1</sup> ¡Nadxí'ide'eda' Li', Xan!

¡Li' rutipa cazu' ládex'a'!

<sup>2</sup> Ruzóë' Xanru' neda' tsutsu, en rapa chi'ë neda', en rusölé' neda'.

Náquië' Dios quia', en Nu rutipa ládex'a',

ate' ruzxöni ládex'a' Lë'.

Rácalené' neda' lu gudil-la: Rusölé' neda', en rizönë' neda'.

<sup>3</sup> Rulidza'-në' Xanru' Nu ral-la' cú'uru' yöl-la' ba,

ate' usölé' neda' lu ná'agaca nupa tu'dí'i neda'.

<sup>4</sup> Ia'láti'sö la' gútia',

ate' yöjbaga' neda' le usuniti neda', le ben ga gúdxida'.

<sup>5</sup> Ia'láti'sö la' yöjtsu'a lataj chul-la que yöl-la' guti,

tu' la' gútitia'.

<sup>6</sup> Lu le guca quia' bulidza'-në' Xanru'.

Bulidza'-në' Dios quia' para gácalené' neda'.

Ga na' zoë' lataj lá'ayi queë' biyönnë' chi'a.

Buzé naguë' le gunabi yúdxida' Lë'.

<sup>7</sup> Ni'irö gudödi budó' zxu', en guzxizi luyú.

Guzzízida' xilíbigaca yugu' guí'a sibi.

Guzzízigaca tu' gulénë' Lë'.

<sup>8</sup> Birúaj dzön zxínë'ë,

ate' birúaj guí' ru'ë le buzegui le dë idú gásibi'ilë',

ate' buguela' guí' yugu' bo' yalaj.

<sup>9</sup> Benë' ga bötaj lúzxiba, en bótaje' Lë cazë',

ate' guzóa zxan ni'ë le naca chul-la.

<sup>10</sup> Gudöde' lu bö'ös dxíë' tu le nayépisë nazí'i le querubín.

Carelö gudöde' tu lu bö' budunu'.

<sup>11</sup> Busubaga' cuinë' le naca chúl-lasö.

Lë na' naca böaj gasaj le riché'lë'e nisa.

<sup>12</sup> Lu le rëpi yösa queë' lu böaj gasaj na'

bila'rúaj bo' yalaj, en guiój bögui' yöla sunna.

<sup>13</sup> Gunné guziú' que chi'ë Xanru' lúzxiba xitsá'.

Biyón chi'ë Dios nayépisétérë',

lu dzön, en yugu' lu bo' yalaj, en lu guiój bögui' yöla sunna.

<sup>14</sup> Gusól-lë'ë yugu' yaga lahui tuchi' queë', en bësilásie' nupa na' tu'dí'i neda'.

Gusól-lë'ë yugu' yösa queë' yugu' le bulu'cul-la léguequi.

<sup>15</sup> N'irö bilá' lahui le zoa zxan nísado',  
ate' bilá' lahui xilibi yödzölió,  
cate' buzenu' bach nupa biti' ta'lé'e Li' dxi'a, Xan,  
en lu yöl-la' rilé qui' bulidza zi'u léguequi.

<sup>16</sup> Bötjë' zaca' xitsá'alö, en gudélë'ë neda'.  
Bubéaje' neda' lu nisa zili.

<sup>17</sup> Busölé' neda' lu na' nu biti' rilé'e neda' dxi'a, en nál-latérö,  
enca' lu ná'agaca nupa tu'df'i neda', en nál-lágacatérö ca neda'.

<sup>18</sup> Cate' ni' chizóa inítia' gula'zóa régu'ë neda',  
pero Xanru' gúcalenë' neda'.

<sup>19</sup> Bubéajë' neda', en buzóë' neda' tu lu lataj zxön.  
Busölé' neda' tu' guyaza ládxë'ë neda'.

<sup>20</sup> Bubi'ë Xanru' quia' tsca le tsahui' naca',  
en benë' quia' le naca dxi'a tu' cabí nabága'a xiguia',

<sup>21</sup> tu' runa' ca naca le rusédinë' Xanru' neda',  
en biti' ca' ridá'baga'a Lë'.

<sup>22</sup> Runa' ca ta'nná xibá nunë' Xanru',  
en biti' ridá'baga'a le rinná bë' naguixjë' Lë'.

<sup>23</sup> Biti' bi le naca dö' nabága'a lahuë' Lë',  
ate' ben chi'a le innía' para cabí gu'a dö'.

<sup>24</sup> Que lë ni na' bubi'ë Xanru' quia' tsca le tsahui' naca',  
en tu' cabí nabága'a xiguia' lahuë' Lë'.

<sup>25</sup> Ruhuéchi' ládxu'u nupa tu'huechi' ladxi' luzé'eguequi,  
en nacu' idú dxi'a len nupa nácagaca idú dxi'a.

<sup>26</sup> Rului'i cuinu' idú ladxi' len nupa nácagaca idú ladxi',  
pero ridá'bagu'u nupa ta'dá'baga' xtídz'u.

<sup>27</sup> Rusöló' nupa ta'gui'i ta'zaca',  
pero ruzötju' nupa tun ba rahui.

<sup>28</sup> Ruquela' cazu' guí' quia', Xana' Dios,  
en rigú'u quia' bení' cate' ridá' ga chul-la.

<sup>29</sup> Lu yöl-la' huáca queë' Dios rucul-la' bönni' guizxi yu röjáquië' gudil-la.  
Tu' zóalenë' Dios quia' neda',

rixiti'a ribixa' lu zö'ö run chi'i léguequi.

<sup>30</sup> Idú dxi'a nácagaca le runë' Dios.  
Nurúaj tsahui' xtídzë'ë.

Rapa chi'ë yúgu'të nupa ta'nábini Lë' gácalenë' léguequi.

<sup>31</sup> ¡Tuzë' Xanru' náquië' Dios!

¡Tuzë' Dios rapa chi'ë rë'u!

<sup>32</sup> Dios ni ruzalë' neda',  
en runë' ga naca' idú ládx'a'a.

<sup>33</sup> Runë' ga nácagaca ni'a ca ní'agacaba' bidxina' guixi',  
en ruzoë' neda' yugu' lu guí'a zxön.

<sup>34</sup> Rusédinë' neda' para gaca tseja' gudil-la,  
en para gaca uguna' dxin uxiti' yaga néquini guíë bronce.

<sup>35</sup> Lu yöl-la' rusölá quiu' run chi'u neda'.

Len no'o nál-la rizönu' neda',  
en lu yöl-la' dxi'i ladxi' quiu' nunu' ga nayépisëtéra'.

- <sup>36</sup> Ruchi'u nöza ga ral-la' töda',  
en runu' ga biti' cuila'.  
<sup>37</sup> Guzóa régua' nupa tu'dí'i neda', en bucul-la' léguequi.  
Biti' buéjca' ga bidxité busunítia' léguequi.  
<sup>38</sup> Gudina' léguequi luyú, ate' biti' guca ulu'huöasa.  
Gula'dzó' ö zxan ni'a.  
<sup>39</sup> Benu' neda' nál-la para tseja' gudil-la,  
en benu' ga bucul-la' nupa gula'dá'baga' neda'.  
<sup>40</sup> Benu' ga bulu'zxunnaj lahua' nupa biti' ta'lé'e neda' dxi'a,  
ate' busunítia' nupa na' bulu'dí'i neda'.  
<sup>41</sup> Bulu'lidza nu gácalen léguequi,  
pero cuntu nu zoa usölá léguequi.  
Bulu'lidza ca' Xanru', pero biti' bubí'ë didza'.  
<sup>42</sup> Buzxuzzja' léguequi ca bëchtö yu naché' lu bö'ös.  
Buliba' léguequi ca ruliba' guna' la' nöza.  
<sup>43</sup> Busöló' neda' lu ná'agaca nupa ta'dá'baga',  
en nunu' ga rinná bë'eda' bönachi zián yödzö.  
Tun ca rnna xtídz'a' bönachi biti' núnbë'a zí'alö.  
<sup>44</sup> Cate' ta'yoni neda', la' tun ca rnna xtídz'a'.  
Tadxi neda' bönachi zián yugu' yödzö izá'a.  
<sup>45</sup> Ta'cuidi' ladxi', en lu yöl-la' rizxizi quéguequi  
ta'rúaj yugu' lu yödzö tsutsu quéguequi.  
<sup>46</sup> ¡Zoë' nabanë' Xanru'!  
¡Yöl-la' ba Nu na' run chi'i neda'!  
¡Guli'gún zxön Dios Nu rusölá neda'!  
<sup>47</sup> Náquië' Dios Nu rizí' la nupa tu'dí'i neda',  
en runé' ga tadxi bönachi guizxi yu neda'.  
<sup>48</sup> Rusölé' neda' lu ná'agaca nupa biti' ta'lé'e neda' dxi'a.  
Le nácaté runé' ga rucul-la' nupa ta'dá'baga' neda',  
en rusölé' neda' lu na' bönni' ridzá'a.  
<sup>49</sup> Que lë ni na' guía' Li': Xclenu' Xan, lógaca bönachi zián yödzö,  
en gul-la' yöl-la' ba que Lo' La'ayi.  
<sup>50</sup> Rusölá cazë' Xanru' bönni' rinná bë'ë uláz queë',  
en nadxí'itica'së' nu na' nabö' cazë',  
nu na' naca David, en yugu' zxí'ini xi'sóë' ga idxinxö dza udxi.

## 19

- <sup>1</sup> Yugu' le nacuá' lúzxiba tu'lui' lo yöl-la' zxön queë' Dios,  
ate' yugu' le raca lu bö'ös nácagaca bë' le nunë'.  
<sup>2</sup> Yugu' dza tu'zéajni'i,  
en yugu' dzö' tu'lui' lo yöl-la' réajni'i.  
<sup>3</sup> Biti' zoa didza' tu'i, en biti' riýón tu le ta'nná.  
Biti' riýón chí'iguequi.  
<sup>4</sup> Le tu'zéajni'i ridxín ga naguélata' tø luyú,  
en le tu'sedi ridxín idútë yödzölió.  
Ga na' nacuá' nuzóë' Dios xilataj gubidza,  
<sup>5</sup> le naca ca tu bönni' utsaga né'ë rirúajé' yu'u,  
en naca ca' ca tu bönni' nál-la rudzéjanë' cate' zéajé' carelö lu huitaj.

<sup>6</sup> Ga naguela' lúzziba rilén gubidza,  
en ridödi ga ridxintë ga ribía.  
Biti' bi zoa le cabí rutsë' e gubidza na'.

<sup>7</sup> Tsahui' naca ca rinná bë'ë Xanru', en run ga huöáca ládxí'ru'.  
Idútë li naca didza' nuzóë' Xanru', le run ga réajni'i nu naca nöxaj ladxi'.  
<sup>8</sup> Tsahui' nácagaca xibá queë' Xanru', le tun ga rudzeja ládxí'ru'.  
Nácagaca idú dxi'a le gunná bë'ë Xanru', en ta'gú'u bení' icja ládxí'do'oru'.  
<sup>9</sup> Dxi'ado' naca gádxiru'-në' Xanru', para sóatica'siru'.  
Idú li naca ca ruchi'a rusöröë' Xanru' böñachi, en idú tsahui'.  
<sup>10</sup> Nazáca'gacatérö didza' na' ca oro, enca' ca oro ba nequi.  
Nácagacatérö zxixi ca bidxina' buz, en ca le zxixi queéba'.  
<sup>11</sup> Didza' na' tu'zéajni'i neda', huen dxin queë'.  
Uzítérö xibé nu run ca rnna xtídzë'ë na'.

<sup>12</sup> ¿Nuzxi caz gaca inöz channö richixi rinigui?  
Busölá neda' lu dul-la' nuna' le cabí gúquibe'eda' bena'.  
<sup>13</sup> Ben chi'i neda' para cabí udödi cuina' lu dul-la',  
para cabí inná be'e neda' lë na' naca dul-la'.  
Ní'irö ugá'ana' tsahui', en biti' ibága'a xiguia'.  
<sup>14</sup> Ben ga ilaca didza' ruá'a, en le rizá' ládx'a' ca raza ládxu'u Li'.  
Nacu' Xana' ruzú' neda' tsutsu, en ruhuöá'au' neda'.

## 20

<sup>1</sup> Rinábida'-në' Xanru' uzé nague' li' cate' idxín dza qui'i sacu'u.  
Dios queë' Jacob gácalenë' li'.  
<sup>2</sup> Rinábida'-në' isól-lë'ë le gácalen li' le irúaj lataj lá'ayi queë'.  
Lë na' irúaj Sión gun ga gacu' tsutsu.  
<sup>3</sup> Rinábida'-në' tsöjenenë' yúgu'të le gulú'u queë',  
en si' lu në'ë le buzégui' u lahuë'.  
<sup>4</sup> Rinábida'-në' gunnë' quiu' tsca naca le rizé ládxu'u,  
en gunë' ga gácatë yúgu'të le rizá' ládxu'u.  
<sup>5</sup> Udzéjatu' cate' usölé' li',  
en uchísatu' le gaca bë' rulidztu'-në' Dios queéru'.  
Rinábida'-në' Xanru' gunnë' quiu' yúgu'të le rinábinu' Lë'.  
<sup>6</sup> Na'a nözda' rusölé' Xanru' nu nabö' cazé'.  
Riyönnë' nu na' naböë' ga ni' zoë' yehua' yubá la'ayi queë'.  
Isól-lë'ë yöl-la' huáca idú queë' le usölá nu na'.  
<sup>7</sup> Nacuá' nupa tu'zxöni ladxi' yugu' carreta que gudil-la,  
ate' nacuá' böñachi yúbölö tu'zxöni ladxi' yugu' böä',  
pero rë'u ruzxöni ládxí'ru' Lë' Xanru' Dios.  
<sup>8</sup> Ta'cuídi'në' nupa na', en ta'dzö'ë,  
pero rë'u ni zuíru', en zóaru' tsutsu.  
<sup>9</sup> Busölá netu', Xan, tu' nacu' Nu rinná be'e netu'.  
Rinábitu' Li' uzé nagu' netu' cate' ulídzatu' Li'.

## 21

<sup>1</sup> Rudzéjanë' bönni' rinná bë'ë tu' zóalen lë' yöl-la' huáca quiu' Li', Xan.  
Tu' busölö' lë', yénni'térö rudzéjanë'.  
<sup>2</sup> Bunödzju' queë' le rizé ládxë'ë.  
Biti' gudá'bagu'u le gunábinë' Li'.

- <sup>3</sup> Tu' raza ládxu'u lë' ruzú' queë' yugu' le naca dxí'a.  
 Nudxiú' icjé' tu le néquini oro idú.
- <sup>4</sup> Gunábiné' Li' gu'u queë' yöl-la' na'bán, ate' bë'u le queë'.  
 Nunu' ga sóatica'së' ibanë' yugu' dza si' zaca.
- <sup>5</sup> Zxöntë naca yöl-la' zxön queë' tu' nusölö' lë'.  
 Nunu' lë' bal, en nunu' ga nayépisë'.
- <sup>6</sup> Zóatica'sö le naca dxí'a nuzú' queë'.  
 Runu' ga rudzéjade'enë' tu' zóalenu' lë'.
- <sup>7</sup> Caní raca queë' bönni' na' rinná bë'ë tu' ruzxöni ládxë'ë Xanru'.  
 Biti' bi utsá' lë' tu' ruhuéchi' ládxë'ë Dios nayépisëtérë' lë'.
- <sup>8</sup> Huadeli' no'o ga nacuá' yúgu'të nupa ta'dá'baga' Li'.  
 Huadeli' no'o ibëla ga nacuá' nupa tu'dí'i Li'.
- <sup>9</sup> Cate' idxín dza usiúdxu' léguequi gaca quéguequi ca tu guí' ruzegui bla'do'.

Usunítiu' léguequi, Xan, lu yöl-la' rilé quiu',  
 ate' tséguiguequi tu lu guí' zxön.

<sup>10</sup> Ucuítu' yugu' zxí'ini xi'sóagaca nupa na' luyú ni,  
 en ubéaju' yugu' zxí'iniguequi ládjagaca böñachi.

<sup>11</sup> Caní gunu' tu' gulé'ëniguequiné' ilu'ë dö' quiu'.  
 Gulún xtídza'gaquië' bi ilunë', pero biti' gaca ilunë' ca rnna xtídza'gaquië',  
<sup>12</sup> tu' gunu' Li' ga ulu'zxúnnajé'.  
 Ichisu' uxiti' yaga quiu', en gunu' léguequi huë'.

<sup>13</sup> Len yöl-la' huáca quiu', Xan, uxicju' lu gudil-la.  
 Gúl-latü', en cù'utu' yöl-la' ba que yöl-la' huáca quiu'.

## 22

- <sup>1</sup> Dios quia', Dios quia', ¿bizx que nusán no'o neda'?  
 ¿Bizz que biti' riyönnu' le rinnëda' ládx'a, en biti' rácalenu' neda'?
- <sup>2</sup> Dios quia', idú dza rulidza' Li', pero biti' bi didza' rubi'u.  
 Idú yëla rulidza', en biti' ca' rasia'.
- <sup>3</sup> Lá'ayi nacu' Li'.  
 Zu' ga riyón yöl-la' ba ta'gú'u böñachi Israel Li'.
- <sup>4</sup> Bulu'zxöni ládxë'ë xuz xtó'otu' Li'.  
 Bulu'zxöni ládxë'ë Li', ate' busölö' légaquië'.
- <sup>5</sup> Bulu'lidzë' Li', ate' gúcalenu' légaquië'.  
 Bulu'zxöni ládxë'ë Li', en biti' bulu'tui'inë'.
- <sup>6</sup> Naca' neda' ca tuba' bëla guna', en calëga bönni'.  
 Tu'dí'i böñachi neda', en tu'cá'ana neda' cá'asö.
- <sup>7</sup> Yúgu'të nupa ta'lé' e neda' tu'titaj neda'.  
 Ta'salaj ru'iguequi lu yöl-la' rutitaj, en tu'tá ícjaguequi, ta'nná:  
<sup>8</sup> "Lé' buzxöni ládxë'ë Xanru' para usölé' lë'.  
 Xanru' usölé' lë' channö tsaza ládxë'ë lë'."
- <sup>9</sup> Nacu' Li' Nu guléaj neda' lë'ënu xiná'a.  
 Benu' ga ruzxöni ládx'a Li'  
 cate' ni' gúdxa'a luchú'unu xiná'a.
- <sup>10</sup> Nagá'ana' lu no'o Li' ga gudéla'të gulja'.  
 Ga gudéla'të buzóanu xiná'a neda' nacu' Dios quia'.
- <sup>11</sup> Biti' su' zi'tu' ga ni zoa', tu' zoa gagu le gun neda' zi',  
 ate' cùnturö nu zoa nu gácalen neda'.
- <sup>12</sup> Gula'gu'ë neda' lë'ajlö ca tunba' yugu' bëdxi.

Ca yugu' bëdxi que yödzö Basán gula'bía di'ë neda'.

<sup>13</sup> Ta'salaj ruá'agaquië' lahua' neda'

ca runba' bëdxi guixi', ridunba', en ribódxi'aba'.

<sup>14</sup> Nuhuöáca' ca nisa nalalaj luyú, ate' nazángaca bëch dxita quia'.

Nuhuöáca ládxi'da'ahua' ca bidxina' buz la lu lë'a.

<sup>15</sup> Nacuidi' yöl-la' huáca quia' ca tu rö'ö nalá'a,  
ate' da' lúdx'a a chichja'.

Nuzú' neda' lu bëchtö yu que yöl-la' guti.

<sup>16</sup> Ta'gu'ë neda' lë'ajlö ca tunba' yugu' bö'cu'.

Nagú'ugaquië' neda' lë'ajlö bönni' tu'ë dö'.

Nuzóagaquië' yero blaga na'a, en ni'a.

<sup>17</sup> Nalá'gaca yúgu'të dxita néquinida'.

Ta'né'ë neda', en tu'yú yénnië' neda'.

<sup>18</sup> Ta'guísië' zxa' que queégaquië',

en tu'yúë' le gaca bë' lahuí lari' rixóa cùdza'a.

<sup>19</sup> Biti' gá'anu' zi'tu', Xan.

Gúcalentë neda', Li', Nu naca yöl-la' huáca quia'.

<sup>20</sup> Busölá neda' lu guíë tuchi'.

Busölá yöl-la' na'bán quia' lu ruá'agacaba' bö'cu'.

<sup>21</sup> Busölá neda' lu ruá'agacaba' bëdxi guixi',

en lu lúzugacaba' bëdxi gú'una.

Li' riyoñ quézinu' chi'a.

<sup>22</sup> Usiyönda' yugu' böchi' luzá'a ca naca Lo'.

Gatsaj láhui'lö ga na' tu'dubi bönochí lo' cu'a Li' yöl-la' ba.

<sup>23</sup> ¡Guli'cu'ë Xanru' yöl-la' ba, libí'ili' na' rádxili'-në'!

¡Guli'gun zxön Lë', yúgu'tëli' zxí'ini xi'soë' Jacob!

¡Guli'gadxi Lë', yúgu'tëli' zxí'ini xi'soë' Israel!

<sup>24</sup> Caní ral-la' gunli' tu' cabí bucá'anë' cá'asö,

en biti' budí'inë' nupa gula'gui'i gula'zaca',

en biti' bucachi' lahuë' para cabí ilé'enë' léguequi,

pero cate' bulu'lidza Lë', biyönnë' léguequi.

<sup>25</sup> Cu'a Li' yöl-la' ba ga tu'dubi bönochí guizxi yu lo'.

Lógaca nupa tadxi Li' usudxina' le guzxí' lu na'a guna' quiu'.

<sup>26</sup> Ilágugaca nupa nácagaca nönxaj ladxi', en ulu'huölaj ulu'dzë'e.

Nupa ta'guilaj Xanru', en ta'gú'u Lë' yöl-la' ba ulu'zí'tica'sö xibé'.

<sup>27</sup> Bönachi idútë yödzölió tsöjnégaca Xanru', en ulu'huöáca queë'.

Bönachi yúgu'të yödzö luyú ila'gú'u Lë' yöl-la' ba.

<sup>28</sup> Caní gaca tu' dë lu në'ë Xanru' inná bë'ë.

Inná bë'enë' yúgu'të bönochí luyú.

<sup>29</sup> Yúgu'të nupa dë lu ná'agaca luyú ni ilágugaca, en ila'gú'u Lë' yöl-la' ba.

Yúgu'të nupa ila'niti ulu'zechu zxí'bigaca lahuë' Lë',

nupa na'biti' ca' gaca ilún chi'i yöl-la' na'bán quéguequi.

<sup>30</sup> Zxí'ini xi'soali' ilún xichinë'.

Illa'guixjö' lë ni ca naca queë' Xanru' para ila'yöni nupa tsöjsétëgaca luyú ni.

<sup>31</sup> Ilidë', en ulu'lui'nië' lahuí náquië' Xanru' tsahui'.

Ulu'siyönnë' ca' nupa ral-la' ilalaj ca naca yugu' le benë' Lë'.

Biti' bi riyádzjada'.

<sup>2</sup> Runë' ga ruzi' ládxa'a ca túngacaba' bö'cu' zxila' tu'zí' ládxí'ba' gapa dëda' le iláguba'.

Ga naca ra' nisa rizá' tsahui' ládxí'do' riché'ë neda'.

<sup>3</sup> Runë' ga ruhuöáca ládxa'a.

Riché'ë neda' ga naca nöza tsahui' tu' nadxí'inë' neda'.

<sup>4</sup> Sal-la' ridá' ga zoa bönadxi gátia',  
biti' bi gádxida' tu' zóalen cazu' neda', Dios.

Len xiyaga quiu', en no'o rutipu' ládxa'a.

<sup>5</sup> Ga nacuá' nupa ta'zóá regu' neda', ni' rucú'u quia' le gahua'.  
Rigú'u icja' le za rilá' zxixi, en ruliru' le guíjada'.

<sup>6</sup> Le nácatë dusóalengaca neda' le naca dxí'a,  
en yöl-la' dxí'i ladxi' queë' yúgu'të dza soa' ibana',  
ate' lu yu'u lidxe' Xanru' sóatica'sa'.

## 24

<sup>1</sup> Nequi queë' Xanru' Dios luyú ni, en yúgu'të le dë lahui.

Nequi queë' yödzölio, en yúgu'të nupa nacuá' ni'.

<sup>2</sup> Naguixjë' le lahui nísado' rö'ö zxánilö,  
en nuzóë' xilibi luyú ga rë' zxan nísado'.

<sup>3</sup> ¿Nuzxi caz bönni' dë lu në'ë cuenë' guí'a lá'ayi queë' Xanru'?  
¿Nuzxi caz gaca tsaza lu lataj lá'ayi queë'?

<sup>4</sup> Huáca bönni' na' naca dxí'a ca runë', en ca rizá' ládxë'ë,  
bönni' na' biti' runë' bal budó' guiój budó' yaga,  
en biti' rizi' yë'ë cate' rizi' lu në'ë bi gunë'.

<sup>5</sup> Gunë' Xanru' ga gaca dxí'a queë' bönni' na'.

Caní gunné' Dios, Nu rusólá lë', en náquië' tsahui'.

<sup>6</sup> Caní nácabaca nupa ta'dxín lahuë' Dios,  
nupa na' ta'bíga' lahuë' Dios quégaca zxí'ini xi'sóë' Jacob.

<sup>7</sup> Guli'salaj ga nu riyaza yödzö la'ayi.

Guli'salaj ga nu riyaza xilatjë' Dios le nuzóë' tsaz,  
ate' tsázië' Bönni' unná bë' nayépisétérë'.

<sup>8</sup> ¿Nuzxi caz Bönni' unná bë' nayépisétérë' na'?  
Náquië' Xanru' nál-latérë', en nápatérë' yöl-la' huáca,  
Lë', Xanru', Nu rideli' lu gudil-la.

<sup>9</sup> Guli'salaj ga nu riyaza yödzö la'ayi.

Guli'salaj ga nu riyaza xilatjë' Dios le nuzóë' tsaz,  
ate' tsázië' Bönni' unná bë' nayépisétérë'.

<sup>10</sup> ¿Nuzxi caz Bönni' unná bë' nayépisétérë' na'?  
Náquië' Xanru' Dios quéguequi ni'a në'ë guizxi yu.  
Lë' náquië' Bönni' unná bë' nayépisétérë' na'.

## 25

<sup>1</sup> Idú ládxa'a rulidza' Li', Xan.

<sup>2</sup> Ruzxöni ládxa'a Li', Dios quia'.

Ben ga cabí utu'ida',  
en cabí ulu'dzeja nupa biti' ta'lé'e neda' dxí'a.

<sup>3</sup> Biti' ila'bó' böniga nupa tun löza Li',  
pero ulu'tu'i nupa ta'dá'baga' xtídzu'u.

- <sup>4</sup> Bului'i neda' le ré'ënu' guna', Xan,  
en buzéajni'i neda' le raza ládxu'u Li'.
- <sup>5</sup> Busedi neda' para guna' ca naca le naca idútë li quiu'.  
Tu' nacu' Dios, Nu rusólá neda'  
gúntica'sa' löza Li'.
- <sup>6</sup> Yöjné ca naca yöl-la' dxi'i ladxi' quiu', Xan,  
en yöl-la' ruhuéchi' ladxi' quiu', yugu' le nacuá'tica'sö.
- <sup>7</sup> Buniti lo neda' ca naca dul-la' bena',  
en le gudá'baga'a Li' cate' ni' zoa' iz cuidi' quia'.  
Lu yöl-la' ruhuéchi' ladxi' quiu',  
en yöl-la' dxi'i ladxi' quiu' yöjné neda', Xan.
- <sup>8</sup> Náquië' Xanru' dxi'a tsahui', en li ladxi'.  
Que lë ni na' rulu'inë' nupa tun dul-la' le ral-la' ilún.
- <sup>9</sup> Ca naca le naca tsahui' riché'ë Dios nupa nácagaca nökaj ladxi',  
en rulu'inë' nupa nácagaca do' ladxi' le ré'ëni' ilún.
- <sup>10</sup> Lu yöl-la' ruhuéchi' ladxi' queë', en yöl-la' rusudxín didza' queë',  
riché'ë Xanru' nupa tun ca rinná bë' xibá naguixjë',  
en ca naca didza' rucá'ana tsahui' nunë'.
- <sup>11</sup> Tu' nacu' dxi'i ladxi', Xan,  
buniti lo neda' ca naca dul-la' nuna', le naca dul-la' zxön.
- <sup>12</sup> Nupa tun bal Xanru'  
ului'i quézinë' léguequi le naca dxi'a le ral-la' ilún.
- <sup>13</sup> Ulu'zi' xibé le naca dxi'a gunnë' quéguequi,  
ate' guequi quégacabi' zxí'ini xi'sóaguequi luyú ni.
- <sup>14</sup> Xanru' zóalentica'së' nupa tun ca rnna xtídzë'ë,  
en ruzéajni'inë' léguequi ca naca didza' rucá'ana tsahui' nunë'.
- <sup>15</sup> Ruyútica'sa' guídë' Xanru' gácalenë' neda',  
tu' usölé' neda' lu na' nu ré'ëni sön neda'.
- <sup>16</sup> Buécja quia', Xan, en buéchi' ladxi' neda',  
tu' zoa' tuza', en nacuídi'da'.
- <sup>17</sup> Nayán le tu'qu'i tu'saca' neda'.  
Busólá neda' lu le ruúbi rugui'i ládxida'ahua'.
- <sup>18</sup> Buyú ca rigui'i rizáca'a, en rudú ládx'a'a.  
Buniti lo neda' ca naca yugu' dul-la' nabága'a.
- <sup>19</sup> Buyú ca nayán nupa tun neda' zi'.  
Buyú ca tu'dí'i neda'.
- <sup>20</sup> Ben chi'i neda', en busólá neda'.  
Biti' gu'u lataj utu'ida' tu' ruzxöni ládx'a'a Li'.
- <sup>21</sup> Ben ga ilún chi'i neda' le naca idú ladxi',  
en le naca li ladxi', tu' runa' löza Li'.
- <sup>22</sup> Buá'au' böñachi Israel,  
Dios lu yugu' le raca quéguequi.

## 26

- <sup>1</sup> Guléaj neda' tsahui', Xan, tu' runa' le naca dxi'a,  
en idú ládx'a'a ruzxöni ládx'a'a Li'.
- <sup>2</sup> Buyú lu icja ládxida'ahua', Xan, en guzxi' bë' neda'.  
Buyú le rizá' ládx'a'a, en le ribequi icja',
- <sup>3</sup> tu' riché' yöl-la' dxi'i ladxi' quiu' neda',  
ate' runa' ca naca le naca idútë li quiu'.

<sup>4</sup> Biti' runa' tsözxón nupa ta'zí' yé',  
en biti' ridálena' nupa tu'lui'sö cuínguequi tsahui'.  
<sup>5</sup> Biti' raza ládxa'a udúbilena' nupa tuá' dö',  
en biti' guna' tuz didza' len nupa nácagaca xihui'.  
<sup>6</sup> Richisa na'a lo' Li', Dios, cabí dxía dö' na'a,  
en idú ládxa'a ribíga'a lo bucugu quiu', Xan,  
<sup>7</sup> para gul-la' le guía' Li': "Xclenu"  
en usiyönda' bönachi ca nácagaca le zxön nunu'.  
<sup>8</sup> Nadxi'ida' yu'u lidxu' ga na' zu', Xan,  
enca' lataj ga na' yu'u bení' lá'ayi quiu'.  
<sup>9</sup> Biti' usunítiu' neda' tsözxón len nupa tun dul-la',  
en biti' gútiu' neda' len nupa tuti bönachi,  
<sup>10</sup> nupa na' ta'yaza ladxi' tuá' dö',  
en nacuá'tica'sö ila'guizxaj dumí para ulu'rúaj tsahui'.  
<sup>11</sup> Gúntica'sa' neda' le naca dxi'a.  
Buzá' ladxi' quia', en buá'uö neda'.  
<sup>12</sup> Nuzóë' Dios neda' ga zoa' tsutsu ladja bönachi guizxi yu  
nudúbigaca queë' para cu'a-në' yöl-la' ba Xanru'.

## 27

<sup>1</sup> Náquië' Xanru' Dios bení' quia', en Nu rusólá neda'.  
 ¿Nuzxi caz ral-la' gádxida'?  
 Rapa chíë' Xanru' Dios caz yöl-la' na'bán quia'.  
 ¿Nuzxi caz gaca gun ga gadxi idzóbida'?  
<sup>2</sup> Cate' gula'dá'baga' neda' nupa tuá' dö' para iluti neda',  
nupa na' biti' ta'lé'e neda' dxi'a, en tu'dí'i neda',  
yöjchégú'gaca, en yöjbixigaca.  
<sup>3</sup> Sal-la' ila'dá'baga' neda' bönachi guizxi yu,  
biti' ca' tsaza yöl-la' radxi ládxi'da'ahua'.  
 Sal-la' ila'díl-lalen bönachi neda',  
naca' neda' tsutsu ladxi'.  
<sup>4</sup> Tu le rinaba' lahuë' Xanru' Dios, lë na' güí'i ládxi'sa',  
le naca para sóatica'sa' lidxë' Xanru' yúgu'të dza soa' ibana',  
para gaca uyúa' yöl-la' lachi queë' Xanru' Dios,  
en para sa' ládxa'a ca naca queë' lu yu'u lá'ayi queë'.  
<sup>5</sup> Cate' idxín dza soa bönadxi quia', ucáchë'ë Lë' neda' lu yu'u lidxë'.  
 Ga nagachi' lu yu'u lidxë' ucáchë'ë neda'.  
 Uzóë' neda' tsutsu ca tu lu guijojo'o.  
<sup>6</sup> Gunë' ga ucul-la' nupa tu'dí'i neda',  
ate' lu yöl-la' rudzeja quia' códxi'atica'sa'  
cate' bi unödzja' queë' lu yu'u lidxë'.  
 ¡Gul-la' queë'! ¡Ön, gul-la' queë' Xanru' yöl-la' ba!

<sup>7</sup> Buzé nagu', Xan, cate' ulidza' Li'.  
 Buzá' ladxi' quia', en bubí'i didza' ca naca le inábida' Li'.  
<sup>8</sup> Cate' Li' gudxu' neda': "Buguilaj neda'",  
idú ládxa'a bubi'a didza', gunnia': Uguilja' Li', Xan.  
<sup>9</sup> Biti' ucachi' lo' lahua' neda'.  
 Biti' ta'bagu'u neda' lu yöl-la' rilé quiu'.  
 Li' nacu' Nu rácalen neda'.  
 Biti' ucá'anu' neda', en biti' usán no'o neda'.  
 Nacu' Dios, Nu rusólá neda'.

<sup>10</sup> Huáca ulu'sán ládxé'ë xuz xiná'a neda',  
pero uzí' cazé' Xanru' Dios neda'.

<sup>11</sup> Busedi neda' para guna' ca ré'ënu' Li', Xan.  
Bulu'i neda' para guna' le naca tsahui',  
tu' nacuá' nupa ta'dá'baga' neda'.

<sup>12</sup> Biti' usanu' neda' lu ná'agaca nupa biti' ta'lé'e neda' dxi'a  
para cabí ilún quia' le té'ëni.  
Ta'dá'baga' neda' nupa ta'zí' yë',  
en nupa té'ëni iluá' dö' quia'.

<sup>13</sup> Guzxi' lu në'ë Xanru' Dios gunë' ga ilé'eda' le naca dxi'a,  
en le naca tsahui' queë' ga nacuá' nupa nabángaca.  
La'tu' cabí réajlë'a lë ni, chibőaj ládxa'a.

<sup>14</sup> ¡Guli'gún lözé' Xanru'!  
¡Guli'gaca tsutsu, en buli'tipa ládxili'!  
¡Ön, guli'gún lözé' Xanru'!

## 28

<sup>1</sup> Rulidza' Li', Xan.

Nacu' Guiój le ruzóa neda' tsutsu.  
Ruzé nagu' chi'a, tu' channö usayju' ru'u,  
gaca' ca tu bönni' razië' lataj chul-la.

<sup>2</sup> Ruzé nagu' le rulidza' Li' cate' rinábida' Li' gácalenu' neda',  
cate' richisa' na'a zaca' Lataj Lá'ayi ga na' zu'.

<sup>3</sup> Biti' iché'u neda' tsözxón len nupa tuá' dö',  
en tsözxón len nupa nácagaca xihui',  
nupa na' tu'i didza' dxi'a lahui' lógaca dzaga yu'u quéguequi,  
pero yu'u ládxido'guequi le cabí naca tsahui'.

<sup>4</sup> Bubi'i quéguequi tsca naca le tun, en tsca naca dö' ru'igaca.  
Bubi'i quéguequi tsca naca le tun në'eguequi.  
Bubi'i quéguequi tsca ral-la' gaca quéguequi.

<sup>5</sup> Caní gaca quéguequi tu' cabí tun bal le nunë' Xanru',  
en biti' tun bal le nun në'ë.  
Uquínnajé' léguequi, en biti' ca' uchisë' léguequi.

<sup>6</sup> ¡Yöl-la' ba Xanru',  
tu' riyönnë' cate' rinábida' Lë' gácalenë' neda'!

<sup>7</sup> Xanru' caz náquië' yöl-la' huáca quia', en le run chi'i neda'.  
Ruzxöni ládxa'a Lë', ate' rácalenë' neda'.

Que' lë ni na' ruzí' xibé' ládxida'ahua',  
ate' gul-la' le guía' Lë': "Xclenu'."

<sup>8</sup> Naca cazé' Xanru' yöl-la' huáca quéguequi bönachi queë',  
en náquië' ca' Nu run chi'i Bönni' na' bubéajé' queë' para inná bë'ë.

<sup>9</sup> Busólá bönachi quiu', Dios, en ben ga gaca dxi'a quéguequi nupa néquiguequi quiu'.  
Ben chi'i léguequi ca run tu nu ruyú bö'cu' zxila', en guché'tica'sö léguequi.

## 29

<sup>1</sup> ¡Guli'cu'ë yöl-la' ba Xanru', libf'ili', nácali' zxif'inigaquië' bönni' nayépisëgaquië'!

¡Guli'cu'ë yöl-la' ba Xanru', en guli'guíë: "Napu' yöl-la' huáca idú"!  
<sup>2</sup> ¡Guli'cu'ë yöl-la' ba Xanru' le ral-la' gata' que Lë' tu' náquië' lá'ayi!  
 ¡Guli'gún bal Xanru', tu' naca lachi le naca lá'ayi queë'!  
<sup>3</sup> Riyón chi'ë Xanru' lu nísado'.  
 Riyón chi'ë Xanru' nayépisë' ca riyón guziú' rinné'.  
 Riyón chi'ë Xanru' lu nísado'.  
<sup>4</sup> Nál-latérö naca chi'ë Xanru'.  
 Nayépisétérö chi'ë Xanru'.  
<sup>5</sup> Chi'ë Xanru' rilá'a yugu' yaga zxön.  
 Ön, chi'ë Xanru' riguitsaj yugu' yaga lu guí'a Líbano.  
<sup>6</sup> Runë' Xanru' ga ta'xiti' guí'a ca tunba' bédxido'.  
 Ta'xiti' guí'a Líbano, en guí'a Sirión ca tunba' bédx guí'a.  
<sup>7</sup> Chi'ë Xanru' run ga rëpi yösa.  
<sup>8</sup> Ruxizi chi'ë Xanru' la' guixi' ga dë lataj.  
 Ruxizi chi'ë Xanru' la' guixi' nazí'i le Cades.  
<sup>9</sup> Chi'ë Xanru' run ga ta'béquiba' bidxina' guixi' böa' hué'ënido' quégacaba',  
 en run ga ta'guínnaj yúgu'té laga' dxíagaca yugu' yaga.  
 Lu yudo' queë' tu'i didza' yúgu'té le nacuá, ta'nná: "¡Yöl-la' ba Lë'!"  
<sup>10</sup> Gurö'ë gunná bë'ë Xanru' cate' gurö'ë nisa lu idútë yödzölio'.  
 Ön, rö'ë rinná bë'tica'së' Xanru'.  
<sup>11</sup> Rutipë' Xanru' ládxí'do' gaca böñachi queë'.  
 Gunë' Xanru' ga gaca dxi'a quégaca böñachi queë',  
 en gunë' ga ila'böza dxi'a tsáhui'do'.

## 30

<sup>1</sup> Guna' Li' zxön, Xan, tu' buchisu' Li' neda',  
 en biti' bë'u lataj bi ilún quia' nupa biti' ta'lé'e neda' dxi'a.  
<sup>2</sup> Rigu'a Li' yöl-la' ba, Xana' Dios,  
 tu' bulidza' Li' gácalenu' neda', ate' bunu' neda'.  
<sup>3</sup> Bubéaju' yöl-la' na'bán quia' lu yero ba, Xan.  
 Runu' ga zoa' nabana', para cabí tsu'a lataj chul-la ga dzö'ë nupa nátigaca.  
  
<sup>4</sup> ¡Guli'gul-la yöl-la' ba queë' Xanru', libí'ili' néquili' quez queë'!  
 ¡Guli'guíë: "Xclenu'" ca naca Lë' le naca lá'ayi!  
  
<sup>5</sup> Tu chí'isö rilenë',  
 pero ruzá' ládxí'tica'së' queéru'.  
 Channö códxiru' tu yëla,  
 lu yöl-la' rudzeja queéru' códxi'aru' itö' yu.  
  
<sup>6</sup> Cate' guca dxi'a quia', ní'irö gunnía':  
 "Gatga bi utsá' neda'."  
<sup>7</sup> Tu' buzá' ládxu'u quia', Xan, buzú' neda' ga zoa' tsutsu,  
 en cate' bucachi' lo', gurö' a böñiga.  
<sup>8</sup> Bulidza' Li', Xan,  
 en gúta'yua' lo'.  
<sup>9</sup> ¿Bizxi xibé uzi'tso' channö gátia', en tsöjtsázia'  
 lataj chul-la ga dzö'ë nupa nátigaca?  
 ¿Naru' huácatsö cu'a Li' yöl-la' ba channö huöáca' bëchtö yu?  
 ¿Naru' huácatsö ulu'a lo le naca idú quiu'?  
<sup>10</sup> Ruzé nagu', Xan, en ruzá' ládxu'u quia'.  
 Gúcalen neda', Xan.

- <sup>11</sup> Bu' inida', ate' benu' ga buyá'a lu yöl-la' rudzeja quia'.  
 Bugú' lari' cá'asö gúcua', en bugacu' neda' le ruzi'a xibé.  
<sup>12</sup> Bil-la bö' naca caza' yöl-la' ba quiu', en biti' soa dxisö.  
 Guéctica'sa' Li': "Xclenu'", Xana' Dios.

## 31

- <sup>1</sup> Ruzzöni ládxa'a Li', Xan.  
 Biti' gu'u lataj utu' ida'.  
 Tu' nacu' tsahui', busölá neda'.  
<sup>2</sup> Ruzé nagu' quia', en rusölo' neda'.  
 Gacu' ca tu guiójto'o ga soa' tsutsu,  
 en ca tu ga soa' dxi'a tsáhui'do' lu gudil-la.  
<sup>3</sup> Nacu' Li' guiójto'o ga zoa' tsutsu, en le run chi'i neda'.  
 Para gaca yöl-la' ba que Lo' guché' neda', en bului'i neda' le dxi'a guna'.  
<sup>4</sup> Ubéaju' neda' lu du yalaj nucáchi'gaquië' bönni' tu'ë dö',  
 tu' nacu' Li' yöl-la' nál-la quia'.  
<sup>5</sup> Rigu'a lu no'o bö' naca caza'.  
 Böá'au' neda', Xan, Dios idú.  
<sup>6</sup> Biti' rilé'eda' dxi'a nupa tun zxön budó' guiój budó' yaga,  
 pero neda' ruzzöni ládxa'a Li', Xan.  
<sup>7</sup> Udzéjada', en uzi'a xibé yöl-la' dxi'i ladxi' quiu',  
 tu' bilé'e quézinu' le gudi'i guzxáca'a.  
 Nöz quézinu' yugu' le raca quia'.  
<sup>8</sup> Biti' bucá'anu' neda' lu na' nu biti' rilé'e neda' dxi'a,  
 pero nuzú' neda' tu lataj ga zoa' tsutsu.  
<sup>9</sup> Buzá' ladxi' quia', Xan, tu' zoa tu le raca quia'.  
 Lu yöl-la' ruhu'ini quia' ribödxa', en rudú ládxa'a.  
<sup>10</sup> Riyechi' dza quia' tu' ruhu'inide'eda',  
 en tu' rinné ládxa'a, en riyechi' iz quia'.  
 Rudú ládxa'a tu' nözi dö' nu'a,  
 ate' nadxitá idútë le naca'.  
<sup>11</sup> Tu' nözi le gulún nupa ta'dá'baga' neda'  
 naca' tu le run gadxi yugu' dzaga yu'u quia',  
 ate' nupa núnbë'gaca neda' tadxi neda'.  
 Nupa ta'lé'e neda' la' nöza ta'zxunnaj ga rizá'a.  
<sup>12</sup> Nál-la ládxi'gaca neda' ca nál-la ládxi'gaca nupa chinátigaca.  
 Naca' ca tu rö'ö nayuzxaj naguinnaj.  
<sup>13</sup> Biyönda' didza' zi' ta'nné böñachi zián quia' bagáchi'sö.  
 Gáti'tës zoa le run gadxi neda'.  
 Tun xtídfa'gaca bi ilún quia'.  
 Ta'zá' ládxi'gaca nacxi iluti neda',  
<sup>14</sup> pero neda' ruzzöni ládxa'a Li', Xan.  
 Rnnía' nacu' Dios quia'.  
<sup>15</sup> Yú'ugaca lu no'o yúgu'të dza soa' ibana'.  
 Busölá neda' lu ná'agaca nupa biti' ta'lé'e neda' dxi'a,  
 en lu ná'agaca nupa ta'zóa regu' neda'.  
<sup>16</sup> Lu yöl-la' ruza' ladxi' quiu' buyú neda', huen dxin quiu'.  
 Lu yöl-la' dxi'i ladxi' quiu' busölá neda'.  
<sup>17</sup> Biti' gu'u lataj utu' ida', Xan, tu' rulidza' Li'.  
 Ben ga ulu'tui'i nupa tuá' dö'.  
 Ben ga ila'cuá' dxisö lu yeru ba.  
<sup>18</sup> Ben ga biti' gaca bi inná nu rizi' yë',

nu na' rinné zi' queë' bönni' tsahui',  
 en run ba zxön cuini, en rulidza ditaj luzé'e.  
<sup>19</sup> ¡Bica' zxön yöl-la' dxi'i ladxi' qui',  
 lë na' napu' para gácalenu' nupa tadxi Li'  
 Runu' caní quégaca nupa tu'zxöni ladxi' Li'  
 lógaca nupa tun ba zxön cuíniguequi.  
<sup>20</sup> Rucáchu'u légaquie' ga na' zu' bagáchi'sö,  
 ga biti' gaca idxín nu bönni' xihui'.  
 Run chi'u légaquie' bagáchi'sö ga biti' gaca idxín didza' bizxaj.

<sup>21</sup> ¡Yöl-la' ba Xanru' Dios,  
 tu' bulu'iñe' neda' ca nadxi'ñe' neda' cate' ni' zoa' tu yödzö  
 ga nagú'ugaquie' lë'ajlö bönni' tu'tíl-lalenë' neda'!

<sup>22</sup> Lu yöl-la' radxi ridzöbi quia' gunní'a: "Ilútië' neda' lo' Li', Xan",  
 pero biyönnu' le gunábida' Li', cate' ni' bulidza' Li'.

<sup>23</sup> ¡Guli'dxf'i-në' Xanru', libf'ili' néquili' queë'  
 Rapa chí'ë Xanru' nupa ta'yéajlé' Lë',  
 en rubi'ë ca sa'yéaj queë' bönni' run ba zxön cuinë'.  
<sup>24</sup> ¡Guli'gaca tsutsu, en buli'tipa ládx'i'li',  
 yúgu'téli' na' runli' löza Xanru' Dios!

### 32

<sup>1</sup> ¡Bica' ba bönni' na' Dios buniti lahuë' lë' ca naca dö' bi'ë,  
 en bugüë' dul-la' queë'!  
<sup>2</sup> ¡Bica' ba bönni' na' Dios rnnë' biti' nabáguë'ë xiguia',  
 en biti' zóalen lë' yöl-la' rizi' yë'!

<sup>3</sup> Cate' guzóa' dxisö ca naca dul-la' quia',  
 budú ládex'a tu' gunnética'sö ládex'a.

<sup>4</sup> Rëla, en te dza buqu'i busácu'u neda', Dios.  
 Budú ládex'a ca raca cate' rö' böchila.

<sup>5</sup> Ni'irö guxóalëpa' dul-la' nabága'a lo' Li',  
 en biti' bucách'a le xihui' bena'.  
 Gunnía': "Ixóalëpa' dö' bi'a lahuë' Xana",  
 ate' buniti lo' neda' ca naca xiguia' gubága'a.

<sup>6</sup> Que lë ni na', nútiti'ñe' nu nunbë' Li', Dios, ral-la' ulidza Li'  
 cate' dë lataj gü'ilen Li' didza'.  
 Cate' rö' nisa bach luyú ni, biti' ca' ideli' idxín ga zoa nu na'.

<sup>7</sup> Li' nacu' ga gaca ucachi' cuina' cate' zoa bönadxi quia'.  
 Li' caz gun chí'u neda' para cabí bi gaca quia'.  
<sup>8</sup> Li' gunu' ga gúl-latica'sa' quiu' Li' tu' rusölo' neda'.

Rnnë' Dios: "Neda' uzéajni'ida' li', en ulu'i'ida' li' le ral-la' gunu'.  
 Usédida' li', en uyútica'sa' li'.

<sup>9</sup> Biti' gacu' ca tu bö'a' o tu mula cabí ta'yéajni'iba'.  
 Ral-la' cu'u guíë en du rú'ugacaba' para inná bé'enu' légacaba'."

Channö cabí gunu' caní, biti' ca' ilunba' ca ré'ënu'.

<sup>10</sup> Zián le tun ga tu'hu'iñiguequi nupa tuá' dö',  
 pero bönni' ruzxöni ládxë'ë Xanru' ilé'enë' yöl-la' dxi'i ladxi' queë'.

<sup>11</sup> Buli'dzéjalenë' Xanru', en buli'sí' xibé', libf'ili' nácali' tsahui' lahuë' Lë'.  
 Lu yöl-la' rudzeja queéli' guli'códxi'a, libf'ili' nácali' idú dxi'a.

## 33

<sup>1</sup> Lu yöl-la' rudzeja queéli' guli'gul-la lahuë' Xanru',  
lib'iili' nácali' tsahui' lahuë' Lë'.  
Nupa nácagaca tsahui' ral-la' ila'gú'u Lë' yöl-la' ba.

<sup>2</sup> Guli'guíë' Lë': "Xclenu'", quínnili' lë'e bihuél-la.  
Guli'gul-la yöl-la' ba queë', quínnili' le zë chi du que.

<sup>3</sup> Guli'gul-la queë' tu le rul-la cubi.  
Guli'quinnaj dxí'ado', en lu yöl-la' rudzeja queéli' guli'códxi'a.

<sup>4</sup> Xtídzë'ë Xanru' naca idú tsahui',  
ate' idú ládxë'ë runë' yúgu'të bi runë'.

<sup>5</sup> Nadxí'inë' le naca dxí'a, en le naca tsahui'.  
Nalá' lahuï yöl-la' dxí'i ladxi' queë' Xanru' idútë yödzölió.

<sup>6</sup> Len didza' bë'ësë' Xanru', benë' lúzxiba,  
en benë' yúgu'të bólaj beni' len bö' rirúaj ru'ë.

<sup>7</sup> Rutubë' nisa rö'ö nísado' para gaca ca tu guí'a.  
Napa chi'ë nisa rö'ö zili ga na' nupé'ë xilataj.

<sup>8</sup> Yúgu'të bönachi ral-la' ila'dxí'i Xanru'.  
Bönachi idútë yödzölió ral-la' ila'cuá' nöxañ lahuë' Lë'.

<sup>9</sup> Bë'ësë' didza' Xanru', ate' la' gúcatë ca na' gunné'.

<sup>10</sup> Gunná bë'ë, ate' guca tsutsu le nunë'.

Runë' Xanru' ga tu'huöáca cá'asö didza' túngaca bönachi yugu' yödzö.

Runë' ga bití' ilaca le té'ëni ilúngaca bönachi.

<sup>11</sup> Sóatica'sö tsutsu didza' nunë' Xanru'.  
Le rizá' ládxë'ë ulu'gá'anatica'sö quéguequi zxí'ini xi'sóaru'.

<sup>12</sup> Bica' bágaca bönachi yödzö na' náquië' Xanru' cazë' Dios quéguequi,  
bönachi na' nabö' cazë' Dios para ilaca quez queë'.

<sup>13</sup> Zoa cazë' Xanru' yehua' yubá, ruyúë' ga zóaru'.  
Rilé'enë' le tun yúgu'të bönachi nacuá' idútë yödzölió.

<sup>14</sup> Ga na' zoa cazë' ruyúë' idú gásibi'ilö,  
en rilé'enë' yúgu'të nupa nacuá' idútë yödzölió ni.

<sup>15</sup> Nun cazë' Lë' ládxí'i do'gaca yúgu'tëguequi.  
Réajni'i quézinë' ca naca yúgu'të le túngaca.

<sup>16</sup> Biti' ca' ulé' bönni' unná bë' nacuá' queë' bönni' guizxi yu röjáquië' gudil-la.  
Biti' ulé' bönni' zoë' gudil-la tu' nál-latérë'.

<sup>17</sup> Biti' nazaca' gunru' löza böa' para idéli'ru' lu gudil-la,  
tu' cabí gaca usölabä' nu bönni' tu' nál-latéröba'.

<sup>18</sup> Buli'yú, ruyútica'së' Xanru' nupa tadxi Lë',  
nupa na' tun löza yöl-la' dxí'i ladxi' queë',

<sup>19</sup> para usölé' léguequi lu yöl-la' guti,  
en para ugahuë' léguequi cate' tsu'u gubín.

<sup>20</sup> Idú ládxí'ru' runru' löza Lë' Xanru'.  
Rácalen cazë' rë'u, en rapa chi'ë rë'u.

<sup>21</sup> Rudzeja ládxí'lenru' Lë',  
en uzxöni ládxí'ru' Lë', tu' náquië' lá'ayi.

<sup>22</sup> Lu yöl-la' dxí'i ladxi' quiu' gúcalen netu', Xan,  
tu' runtu' löza Li'.

## 34

<sup>1</sup> |Innética'sa' queë' Xanru' náquië' dxí'al

**1** Cú'utica'sa' Lë' yöl-la' ba!

**2** Bö' naca caza' gun zxön Xanru'.

Nupa nácagaca nöxaj ladxi' ila' yöni lë ni, en ulu'dzeja.

**3** Guli'gü' zxönë' Xanru' tsözxón len neda',

en tsözxón usiyonru' böñachi ca naca Lë' La'ayi.

**4** Bulidza'-në' Xanru', ate' bubi'ë didza' quia',

en busölé' neda' lu yugu' le gúdxida'.

**5** Nupa nácagaca queë' bila'dxín lahuë', en bulu'zí' xibé'.

Bíti'rö caz ulu'tui'i nupa na'.

**6** Bulidza'-në' Xanru', ate' biyönnë' quia' neda', bönni' yechi',

en busölé' neda' lu yúgu'të le guca quia'.

**7** Gubáz lá'ayi que ya'abá queë' Xanru' tapa chi'ë nupa tadxi Lë',

en tu'sölé' léguequi lu yúgu'të le raca quéguequi.

**8** Guli'sí' bë'ë, ate' inózili' náquië' Xanru' dxí'a.

**9** Bica' ba bönni' ruzxöni ládxë'ë Lë'!

**10** Guli'gadxi Xanru', libí'ili' nácali' quez queë',  
tu' cabí bi ila'yadzaj nupa tadxi Lë'.

**11** Ta'yadzaj ta'yúdxiba' bëdxi guixi', en ta'dunba',  
pero nupa tu'lidza Xanru' biti' ca' ta'yadzaj le naca dxí'a.

**12** Guli'dá libí'ili', bí'ido', en buli'zé nágali' xtídza'a.  
Uzéajni'ida' libí'ili' para gádxili'-në' Xanru'.

**13** Nuzxi caz bönni' ré'ënë' soë' ibanë',  
en ré'ënë' soë' iz zián para uzi'ë xibé le naca dxí'a?

**14** Ben chi'i lúdxu'u para cabí gu'u didza' xihui',  
en para cabí si' yé'enu' luzó'o.

**15** Bucá'ana le cabí naca tsahui', en ben le naca dxí'a.  
Bé' ladxi' ciòzu' dxí'a tsáhui'do',

en ben bayudxi gunu' yugu' lë ni.

**16** Ruyútica'së' Xanru' nupa nácagaca tsahui',  
en riyón quézinë' cate' tu'lidza Lë'.

**17** Uzáguë'ë Xanru' xinózgaca nupa tuá' dö',  
en gunë' ga cuntu nu tsöjnë léguequi.

**18** Nupa nácagaca tsahui' tu'lidza Xanru', ate' riyönnë' quéguequi,  
en rusölé' léguequi lu yugu' le raca quéguequi.

**19** Xanru' zóalen cazë' nupa tu'hui'ini ladxi',  
en rusölé' nupa nácagaca nöxaj ladxi'.

**20** Zián le rigui'i rizáquë'ë bönni' tsahui',  
pero Xanru' rusölé' lë' lu yúgu'të lë na'.

**21** Xanru' rapa chi'ë yúgu'të dxita yu'ë,  
ate' biti' gatsaj nitú dxita queë'.

**22** Le xihui' run nu ruá' dö' gun ga gati nu na',  
ate' ila'baga' xiguiá' nupa biti' ta'lé'e dxí'a le naca tsahui'.

**23** Xanru' caz ruhuöá'uë' bö' nácagaca caz huen dxin queë',  
ate' biti' irugu que nitú nupa na' tu'zxöni ladxi' Lë'.

- <sup>2</sup> Guzxón le gun chi'i neda' lu gudil-la,  
en gudá gácalenu' neda'.
- <sup>3</sup> Guzxón yaga tuchi' quiu' para uzagu'u xinózguequi nupa ta'zóa regu' neda'.  
Gudxi bö' naca caza' nacu' Li' Nu rusólá neda'.
- <sup>4</sup> Ben ga ulu'tui'i, en ulu'gá'ana cá'asö nupa té'ëni iluti neda'.  
Ben ga ulu'huécaj, en ulu'gá'ana cá'asö nupa té'ëni ilu'i dö' quia'.
- <sup>5</sup> Ben ga ilaca ca bëbu zxe café zeaj lu bö'ös,  
en ben ga ulaguë' gubáz lá'ayi que ya'abá quiu' léguequi.
- <sup>6</sup> Ben ga gaca chul-la näza yú'ugaca, en ga cuílagaca,  
ate' soa régu'ë gubáz lá'ayi quiu' léguequi.
- <sup>7</sup> Bulu'cachi' du yalaj le sön neda', en biti' bi nuna' quéguequi.  
Gula'chó'ona yeru ga tsöjbixa', en biti' bi nuna' quéguequi.
- <sup>8</sup> Ben ga idxín quéguequi tsálido'os le usuniti léguequi,  
en ben ga du yalaj na' bulu'cachi' sön la' cuínguequi quez.  
Ben ga ila'bixi lu yeru na' gula'chó'ona.
- <sup>9</sup> Udzeja ládxi'lena'-në' Xanru',  
en uzi'a xibé yöl-la' rusólá queë'.
- <sup>10</sup> Ila'nná dxita néquinida': "Xan, ¿nuzxi caz naca ca nacu' Li'?  
Rusól' nu rigu'i rizáca' lu na' nu nál-latérö ca le.  
Rusól' nu rigu'i rizáca', en riyadzaj riyudxi lu na' bönni' ribanë' le nequi que."
- <sup>11</sup> Ta'dá'baguë'ë bönni' xihui' neda', en ta'nné' quia'.  
Ta'nabi yúdxinë' neda' ca naca yugu' le cabí nøzda'.
- <sup>12</sup> Tu'bi'ë quia' le naca dö' cate' runa' le naca dxi'a,  
ate' ruhu'i inide'e ládxa'a.
- <sup>13</sup> Pero neda' gúcua' lari' cá'asö cate' guláquië' huë'.  
Bena' gubasa, en busaca' zi' bö' naca caza',  
en uláz quéguequi bulidza'-në' Dios zián luzuí.
- <sup>14</sup> Bui'inide'eda' tsca guca luzá'a o bi'i böchi' caza' nu na' guca huë'.  
Gurödxi yecha'a ca hu'i inide'eda' channö gátinu xiná' caza',
- <sup>15</sup> pero cate' guchixi guníguida' neda', bulu'dzéjade'e, en bulu'dubi tsözxón.  
Yugu' bönni' na' bulu'cá'anë' neda' cá'asö bulu'dubë' para ilunë' ga cö'a bagu'i'.  
Yugu' bönni' na' biti' núnbë'a gulúnnatica'së' neda'.
- <sup>16</sup> Bulu'saca' zi'ë neda', en bulu'titjë' quia'.  
Lu yöl-la' rilé quégaquië' neda' gulagu zxea láyi'gaquië'.
- <sup>17</sup> Xan, ¿gáca'xté caz uyú iná'asu' le tunë'?  
Busólá neda' lu dö' tu'ë quia'.  
Busólá neda' lu ná'agaquië' bönni' na' nácagaquië' ca yugu' bëdxi guixi'.
- <sup>18</sup> Guía' Li': "Xclenu'" lögaca bönachi zián ulu'dúbigaca quiu'.  
Cu'a Li' yöl-la' ba ga nudúbigaca ziantë bönachi.
- <sup>19</sup> Biti' gu'u lataj ulu'dzeja nupa ta'dá'baga' neda', en ta'zi' yë',  
en biti' gu'u lataj ulu'titaj quia', nupa na' tu'dí'i neda', en biti' bi nuna' quéguequi.
- <sup>20</sup> Catu caz tu'i didza' le gun ga soa dxisö didza' bizzaj.  
Lu yöl-la' rizi' yë' quéguequi ta'nné' quégaca nupa ta'bó' dxi'a tsáhui'do' yödzölió ni.
- <sup>21</sup> Bulu'salaj rui'iguequi, en gula'nné quia', gula'nná:  
"¡Ön, bilé'e quézitu' le nunë'!"
- <sup>22</sup> ¡Bilé'e quézinu' Li' lë ni, Xan! ¡Biti' su' dxisö!  
¡Biti' ucá'anu' neda', Xan!
- <sup>23</sup> ¡Guyasa, Xan! ¡Busubán ládxu'u, Xan, para uchi'a usöröu' quia'!  
¡Gúcalen neda', Xana' Dios!

<sup>24</sup> ¡Tu' nacu' tsahui', buchi'a busörő quia', Xana' Dios!  
 ¡Biti' gu'u léguequi lataj ulu'dzeja ni'a que le raca quia'!  
<sup>25</sup> ¡Biti' gu'u léguequi lataj ila'nná:  
 "Ön, bidéli'ru' le guzé ládxi'ru"!  
 ¡Biti' gu'u lataj ila'nná: "Chibucúl-laru' lë"!  
<sup>26</sup> ¡Ben ga ulu'tu'i, en ulu'gá'ana cá'asö nupa tu'dzeja cate' ruhu'i inida'!  
 ¡Ben ga ulu'tu'i, en ulu'gá'ana cá'asö nupa ta'dá'baga' neda'!  
<sup>27</sup> ¡Ben ga ila'bódxí'a lu yöl-la' rudzeja quéguequi,  
 en ulu'zí' xibé nupa tu'i ládxi'gaca urúaja' tsahui'!  
 ¡Bé' lataj ila'nnática'so: "Nayépisétérë' Xanru' Dios,  
 tu' raza ládxë'ë gunë' ga gaca dxi'a quégaca huen dxin queë"!  
<sup>28</sup> Ní'irö guna' ba nalí quiu', innía': "¡Nacu' tsahui'!"  
 en cu'a Li' yöl-la' ba idú dza.

## 36

<sup>1</sup> Le naca xihui' rui'ilen bönni' nucá'anë' Dios lu icja ládxi'da'ahuë'.  
 Biti' ca' rádxinë' Dios.  
<sup>2</sup> Tu' run ba zxön cuinë'  
 réquinë' biti' nözинë' Dios nabágue'ë lë' dul-la', en biti' ichúguië' Dios queë'.  
<sup>3</sup> Ru'ë didza' xihui', en rizí' yé'ë.  
 Biti' réajni'inë', en biti' runë' le naca dxi'a.  
<sup>4</sup> Cate' ni' dë' lu le ráti'në' rizá' ládxë'ë ca naca le xihui' gunë'.  
 Rui'i ládxë'ë gunë' le cabí naca dxi'a,  
 en biti' rusanë' runë' le naca xihui'.  
<sup>5</sup> Zxóntérö ca yehua' yubá naca yöl-la' dxi'i ladxi' quiu', Xan,  
 ate' gúntica'su' ca rnna xtídu'u, tsca zoa yehua' yubá.  
<sup>6</sup> Naca tsutsu le tsahui' nacu' ca nácagaca tsutsu yugu' guí'a zxön quiu'.  
 Ca ruchi'a rusörö' naca ca naca nísado', tu' cabí gaca nu gúnbë'e le.  
 Run chi'i cazu' bönachi, en yugu böa' guixi', Xan.  
<sup>7</sup> Nazáca'térö yöl-la' dxi'i ladxi' quiu', Dios.  
 Run chi'u yúgu'të bönachi ca runba' yøjede, run chíiba' yugu' bórado' zxan xílabá'.  
<sup>8</sup> Tu'huölaj tu'dzë'ë bönachi quiu' le nayánda' lu yu'u lidxu',  
 ate' rugui'ju' léguequi le naca yöl-la' dxi'i ladxi' quiu'.  
<sup>9</sup> Yúgu'të le nacuá' nabánigaca Li'.  
 Tu' naca cazu' bení' rilé'etu' bení'.  
<sup>10</sup> Bidxí'itica'so nupa núnbe'gaca Li',  
 en ben le naca dxi'a quégaca nupa nácagaca tsahui'.  
<sup>11</sup> Biti' gu'u lataj bi ilún quia' nupa tun ba zxön cuínguequi,  
 en biti' gu'u nupa tuá' dö' lataj ulu'laga' neda'.  
<sup>12</sup> Nadzö'ögaca nupa tuá' dö'.  
 Déguequi luyú, en biti' ca' gaca ulu'huöásä.

## 37

<sup>1</sup> Biti' ubi ugu'i ládxi'do'oli' tu' tu'zí'gaca xibé nupa tuá' dö'.  
 Biti' uzxé'eli' nupa biti' tun le naca dxi'a.  
<sup>2</sup> Huadódítë quéguequi ca raca que guixi' nacuadi,  
 en udxí quéguequi ca raca quégaca guíxi'do' narúgugaca.  
<sup>3</sup> Buli'zxöni ládxë'ë Xanru', en guli'gún le naca dxi'a.  
 Buli'gá'ana luyú queë', en guli'cöz dxi'a tsáhui'do'.  
<sup>4</sup> Buli'sí' xibé' Xanru',  
 ate' gunnë' queéli' le rizé ládxi'li'.

5 Buli'dödi cuinli' lu né'ë Xanru'.  
 Buli'zxöni ládxë'ë Lë', ate' gunë' le gácalen lib'iili'.  
 6 Gun cazë' Lë' ga urúajli' tsahui', en gácali' ca bení',  
 en cate' uchi'a usöröe' queéli', gaca queéli' ca lahui' dza.  
 7 Guli'sóa dxisö lahuë' Xanru', en guli'cöza le gunë'.  
 Biti' cuéqui ícjali' tu' nözi bönni' ruzi'ë xibé,  
 bönni' na' ru'ë dö'.  
 8 Bítirö leli', en buli'sán yöl-la' ridzá'a.  
 Biti' ubi ugui'i ládxi'do'oli' tu' gun lë ni ga guá'ali' dö'.  
 9 Dios caz uzágue'ë xinózguequi nupa tuá' dö',  
 pero nupa tu'zxöni ladxi' Xanru', guequi quéguequi luyú.  
 10 Ia'láti'sö xidzé, en bítirö soë' bönni' na' ru'ë dö'.  
 Uguíjali' xilatjé, pero bítirö soë' ni'.  
 11 Nupa nácagaca nöxaj ladxi', guequi quéguequi luyú,  
 ate' ulu'zí' xibé yöl-la' tsahui' que.  
 12 Tun didza' nupa tuá' dö' bi ilúngaca quégaca nupa nácagaca tsahui',  
 en lu yöl-la' rilé quéguequi tagu zxea láyi'guequi.  
 13 Ruzzidxi cazë' Xanru' quéguequi,  
 tu' rile'ené' dza udxi quéguequi.  
 14 Nupa tuá' dö' chigula'béaj guíë tuchi' quéguequi,  
 en nuá'gaca uxiti' yaga quéguequi  
 para ulu'xicja nupa ta'zaca' zi', en ta'yadzaj ta'yudxi,  
 en para iluti nupa tun le naca dxi'a.  
 15 Guíë tuchi' quéguequi ila'chiza la' ládxi'do'guequisö,  
 ate' ila'guítsaj uxiti' yaga quéguequi.  
 16 Dxi'atérö le do' dësö queë' bönni' tsahui'  
 ca le zián dë queë' bönni' ru'ë dö'.  
 17 Huayúzxjagaca ná'agaca nupa tuá' dö',  
 pero Xanru' caz rácalené' nupa nácagaca tsahui'.  
 18 Rui'i ladxi' cazë' Xanru' nupa biti' bi xiguia' nabága'gaca,  
 ate' guéquitica'sö xiyúgaca quéguequi.  
 19 Biti' ca' ulu'tu'i cate' idxín dza biti' gaca dxi'a,  
 en cate' tsu'u gubín, gáta'déra le ilágugaca.  
 20 Ulu'niti tsaz nupa tuá' dö',  
 ate' nupa biti' ta'lé'e dxi'a Xanru' ilaca ca yöl-la' lachi que guixi'.  
 La' tódite quéguequi, en ilaca ca dzön le rinítitë.  
 21 Ta'nábini nu bi gunna quéguequi tu chí'isö, pero biti' ca' ulu'bí'i lë na'.  
 Nu naca tsahui' ruzá ladxi' quéguequi, en runödzaj quéguequi.  
 22 Gaca luyú quégaca nupa run lá'ayé' Xanru',  
 pero ila'niti tsaz nupa rudxfé' Lë' dö'.  
 23 Le runé' bönni' dxi'a naca le nulu'iné' Xanru' lë',  
 ate' raza ládxë'ë Lë' le runé' bönni' na'.  
 24 Cate' röjtsö'ë, biti' ca' röjtsö'ë tsaz,  
 tu' röjzoné' Xanru' caz bönni' na'.  
 25 Guca' ra'bando', pero na'a nagula',  
 en catu caz bilé'eda' nusán né'ë Dios bönni' tsahui',  
 en catu caz bilé'eda' riyadzaj le ilágubi' zxí'iné'.  
 26 Yugu' dza ruzá' ládxë'ë bönni' tsahui' quéguequi luzé'ë  
 en runödzjé' le ta'nábini lë' unödzjé' tu chí'isö,  
 Nácagacabi' zxí'ini xi'sóé' tu le run ga raca dxi'a queéru'.  
 27 Buli'cá'ana le cabí nácatë, en guli'gún le naca dxi'a.  
 Channö caní gunli', sóali' tsaz,

<sup>28</sup> tu' nadxi'inë' Xanru' nu run le naca tsahui',  
en catu caz usán në'ë nupa néquiguequi queë'.  
Gun chi'itica'së' léguequi,  
pero usunítië' zxí'ini xi'sóagaca nupa tuá' dö'.  
<sup>29</sup> Guequi luyú quégaca nupa nácagaca tsahui',  
ate' ila'cuá'tica'sö luyú na'.  
<sup>30</sup> Ru'ë bönni' tsahui' didza' le napa yöl-la' réajni'i,  
ate' raca yöl-la' ruchi'a rusörö ni'a que didza' na' ru'ë.  
<sup>31</sup> Yu'u icja ládx'i'da'ahuë' le gunná bë'ë Dios.  
Que lë ni na' catu caz ichixi iníguinë'.  
<sup>32</sup> Ruyuda' nu ruá' dö' le runë' bönni' tsahui',  
en riguilaj nacxi gaca guti lë'.  
<sup>33</sup> Xanru' biti' gu'ë nu na' lataj bi gun queë' bönni' tsahui' na',  
en biti' gu'ë lataj irugu queë' cate' nu uchi'a usörö queë'.  
<sup>34</sup> Buli'zxöni ládxë'ë Xanru', en guli'gún ca ré'enë' gunli',  
ate' uchisë' libf'ili' para guequi queéli' luyú.  
Cate' udxi quégaca nupa tuá' dö', hualé'e quézili' le.  
<sup>35</sup> Bilé'eda'-në' bönni' huía' dö'.  
Gúquië' ca tu yaga zxön, en buzf'de'enë' xibé.  
<sup>36</sup> Ni'irö gudödi queë', en bíti'rö zoë'.  
Yöjdilja' lë', pero biti' ca' guca udzólida' lë'.  
<sup>37</sup> Buli'yú ca náquië' bönni' tsahui'.  
Cuntu nu gaca bi inné queë',  
tu' ila'cuá'abi' zxí'ini xi'sóë' bönni' zxön ladxi'.  
<sup>38</sup> Ulu'niti tsaz nupa tu'cá'ana le gunná bë'ë Dios.  
Usiúdxë' Xanru' yugu' zxí'ini xi'sóagaca nupa tuá' dö',  
<sup>39</sup> pero rusölá cazë' nupa nácagaca tsahui'.  
Rutipë' ládx'i'guequi cate' bi raca quéguequi.  
<sup>40</sup> Rácalenë' léguequi, en rusölé' léguequi.  
Rubéajë' léguequi lu ná'agaca nupa tuá' dö', en rusölé' léguequi,  
tu' tu'zxöni ládx'i'guequi Lë'.

## 38

<sup>1</sup> Biti' ilenu' neda', Xan, en biti' uzenu' neda' bach.  
Biti' gunu' neda' xiguia' lu yöl-la' rilé quiu'.  
<sup>2</sup> Ben zi'u neda', en budxíu' neda' huë'.  
Nuzötju' neda' len no'o.  
<sup>3</sup> Yu'a yödzöhuë' zxön tu' rilenu' neda'.  
Dxía huë' idútë le naca' tu' nözi dul-la' nabága'a.  
<sup>4</sup> Xiguia' nabága'a naca ca tu nísado' ga ruchicja' nisa.  
Naca ca tu yua' zi'i nabága'a neda'.  
<sup>5</sup> Tu' bena' yugu' le cabí naca dxí'a,  
dxía' huë' le rilá' siguti, en rudzu'.  
<sup>6</sup> Narecji' cúcza'a, en nagá'ana' cá'asö.  
Idú dza ruhuí inide'eda'.  
<sup>7</sup> Idútë le naca' yú'uda'a xilá,  
ate' nazxí xipéla'a.  
<sup>8</sup> Rudú ládx'a'a, en ricuídi'da'.  
Rinnéda' ládx'a'a tu' ruúbi ruguí'i ládx'i'da'ahua'.  
<sup>9</sup> Nöz quézinu' Li', Xan, le rizé ládx'a'a,  
en riyönnu' le rinnéctica'sö ládx'a'a.  
<sup>10</sup> Richunchu ládx'i'da'ahua', en ricuidi' ládx'a'a,

ga ridxitë richul-la guiój lahua'.

<sup>11</sup> Bíti'rö ta'dzaga neda' yugu' luzá'a, en yugu' bőcha'a, tu' nözi xihuë'a, ate' tu'biga' di'a dza quia' ga zoa'.

<sup>12</sup> Nupa té'eni iluti neda' ta'bequi le ila'zón neda', ate' nupa té'eni ulu'cul-la neda' tun xtídzaguequi nacxi ulu'suniti neda'. Idú dza ta'bequi ícjaguequi bi ilún quia'.

<sup>13</sup> Naca' ca tu bönni' nacódzue', en bíti'rö riyönda'.

Naca' ca tu bönni' narugu lúdxë'ë, en biti' risaljë' ru'ë.

<sup>14</sup> Naca' ca tu bönni' bíti'rö riyönnë', en que lë ni na' biti' bi didza' rubi'ë.

<sup>15</sup> Tuzu' Li' ruzxöni ládx'a'a, Xan.

Ubi'i cazu' didza', Xana' Dios.

<sup>16</sup> Biti' gu'u lataj ulu'dzeja ni'a que le raca quia'.

Biti' gu'u lataj ilún ba zxön cuínguequi tu' nagá'ana' cá'asö.

<sup>17</sup> Chizó'a' tsöjbixa',

en zóalentica'sö xihuë'a neda'.

<sup>18</sup> Que lë ni na' rixóalëpa' xiguia' nabága'a,

en risébida' ládx'a'a tu' nözi dul-la' nabága'a.

<sup>19</sup> Nacuá' dxi'a, en nál-lagaca nupa téqui neda' zi'.

Nayánda' nupa tu'dí'i neda', en biti' bi nuna' quéguequi.

<sup>20</sup> Ta'dá'baga' neda' nupa tu'bí'i le cabí naca dxi'a que nu run le naca dxi'a.

Caní tun tu' ruí'i ládx'a'a guna' le naca dxi'a.

<sup>21</sup> Biti' usán no'o neda', Xan.

Biti' ubigu' ga zoa', Dios quia'.

<sup>22</sup> Gudáchi gácalenu' neda', Xan,

tu' naca cazu' Li' Nu rusólá neda'.

### 39

<sup>1</sup> Gunnía': Gun chi'i cuina' ca naca le runa', en biti' guna' dul-la' ca naca didza' ruá'a.

Biti' bi didza' gu'a

cate' nacuá' nupa tuá' dö' gal-la' ga zoa'.

<sup>2</sup> Guzóa' dxisö, en biti' bë'a didza' ga bidxitë biti' gunnía' le naca dxi'a, pero biyalí' xihuë'a.

<sup>3</sup> Bubi bugui'i ládx'i'da'ahua',

en cate' guzá' ládx'a'a que, guyegui gulá ládx'i'da'ahua'.

Que lë ni na' gunábida'-në' Xanru', gunnía':

<sup>4</sup> Xan, ¿gáca'xté caz soa' ibana'?

Bulu'i neda' tsca iz soa' ibana'.

Ben ga inözda' channö chizó'a' caz gátia'.

<sup>5</sup> Nabábasö dza nuzú' quia' soa' ibana'.

Yugu' iz soa' ibana' biti' bi zeaj naca lo' Li'.

Le nácatë biti' bi nácagaca yúgu'të bönachi nacuá' luyú ni.

<sup>6</sup> Nácagacasö ca tu zxul-la rigú'u böaj.

Nítisö tu'úbi tu'guí'i ládx'i'do'guequi, en tun dxin.

Tu'tubi yöl-la' tsahui', pero biti' nözguequi nuzxi guequi que.

<sup>7</sup> ¿Bizxi caz gaca guna' löza, Xan?

Ruzxöni ládx'a'a Li'.

<sup>8</sup> Busólá neda' lu xiguia' nabága'a,

en biti' gu'u lataj ulu'titaj quia' nupa nácagaca canóz.

<sup>9</sup> Soa' dxisö, en biti' bi didza' gu'a,

tu' ben cazu' Li' ga rigui'i rizáca'a lë ni.

<sup>10</sup> Bíti'rö gunu' neda' xiguia'.

Chizóa gátia' tu' rusaca' zi'u neda'.

<sup>11</sup> Runu'-në' xiguia' bönni' dul-la', en ruzenu' lë' bach.

Ca tu'töba' bélado' que le yú'uba', rusunítiu' le ru'i ládxë'ë bönni' na'.  
Biti' bi naca cazë' bönni' dul-la' na'.

<sup>12</sup> Buzé nagu' le rulidza' Li', Xan, en le rinábida' Li'.

Biti' su' dxisö cate' ribödxa' lo' Li',  
en biti' gaca' ca tu bönni' zi'tu' lo' Li',  
en ca tu bönni' ridasë' ca guláquië' xuz xtó'otu'.

<sup>13</sup> Benna neda' lataj idipa ládxä'a  
zí'alö ca uzá'a yödzölió ni, en bíti'rö soa'.

## 40

<sup>1</sup> Lu yöl-la' riböza zxön ladxi' quia' gulöza' gácalenë' Xanru' neda'.

Ní'irö buzé naguë' quia', en biyönnë' le bulidza'-në'.

<sup>2</sup> Bubéajé' neda' ca tu lu yero ga rë', en lu guna' zili.

Buzóë' neda' tu lu guiójto'o, en guléquië' neda' tsutsu.

<sup>3</sup> Busédinë' neda' tu le cubi le rul-la' le naca yöl-la' ba queë' Dios queëru'.

Zián nupa ila'lé'eni lë ni, en ilún Lë' zxön,  
ate' ulu'zxöni ladxi'-në' Xanru'.

<sup>4</sup> Bica' ba bönni' ruzxöni ládxë'ë Xanru'.

Biti' runë' tsözxönu run ba zxön cuini, nu na' run zxön yugu' dios núngaca böñachi.

<sup>5</sup> Ziántërö naca le nunu' queëtu', Xana' Dios, yugu' le tun ga rubánitu'.

Ziántërö le yu'u icja ládxï'do'o ca naca le gunu' queëtu'.

Biti' ca' gaca nu ulaba lo' Li' tsca nácagaca.

Channö gué'ënda' nu usiyönda' tsca nácagaca,  
nayántërö tsca le gaca ulaba'.

<sup>6</sup> Biti' ré'ënu' gútigaca'-ba' böa' guixi' lo', en calëga bi cu'a lo'.

Biti' rinabu' uzégui'gaca'-ba' böa' bëdxi lo',  
en calëga tu le guna' lo' para ugúa dul-la',  
pero gusalju' naga' para yönda' le guío' neda'.

<sup>7</sup> Que lë ni na' gunnía': Ni zoa caza' neda' quiu'.

Lu guichi lá'ayi quiu' nazúaj caza naca quia'.

<sup>8</sup> Raza ládxä'a runa' ca ré'ënu' Li', Dios quia'.

Nagu'a icja ládxï'da'ahua' xibá naguixju' Li'.

<sup>9</sup> Ga tu'dubi böñachi guizxi yu quiu', Xan,  
busiyönda' léguequi nacu' tsahui'.

Biti' ca' guzóa' dxisö.

Nöz quézinu' lë ni, Xan.

<sup>10</sup> Biti' bucáchi'za' icja ládxï'da'ahua' ca ruúnu' tsahui' böñachi.

Bulu'a lahui ca runu' ca rnno', en ca rusölö' böñachi.

Ga nudúbigaca böñachi quiu' biti' guzóa' dxisö,  
pero bë'a didza' ca nacu' dxi'i ladxi', en ca ru'u didza' le nácatë.

<sup>11</sup> Biti' ugú' quia' yöl-la' dxi'i ladxi' quiu', Xan.

Yöl-la' dxi'i ladxi' quiu', en ca runu' ca rnna xtídzu'u ilún chí'tica'sö neda'.

<sup>12</sup> Zián le raca quia' nagú'ugaca neda' lë'ajlö, le cabí gaca nu ulaba.

Nabága'a yugu' dö' bi'a, en bíti'rö gaca ilé'eda'.

Nayanrō ca guitsa' icja', ate' rudú ládxa'a.

<sup>13</sup> ¡Busólá neda', Xan!

¡Gudáchi gácalenu' neda', Xan!

<sup>14</sup> Ben ga ulu'tui'i, en ila'bó' bagu'i  
nupa na' té'ëni ulu'suniti neda'.

Ben ga ulu'huécaj, en ulu'gá'ana cá'asö  
nupa na' té'ëni gaca quia' le cabí naca dxi'a.

<sup>15</sup> Ben ga ulu'dú ládxí'gaca tu' nabíxigaca  
nupa na' tu'titaj neda', ta'nná: "¡Buyútsöca' le raca queë'!"

<sup>16</sup> Ben ga ulu'dzeja, en ulu'zí' xibó' yúgu'té nupa tu'guilaj Li'.  
Ben ga ila'mnática'sö nupa ta'dxf'i yöl-la' rusólá quiu',  
ila'nná: "Nayépsétéré' Xanru'."

<sup>17</sup> Nacuídi'da', en biti' bi gaca guna',  
pero ruí'i ladxi' cazu' Li' neda', Xan.  
Naca cazu' Nu rácalen neda', en Nu rusólá neda'.  
Biti' tsenu' guídu' quia', Dios quia'.

## 41

<sup>1</sup> Bica' ba bönni' ruí'i ládxë'ë nupa nácagaca yechi'.  
Xanru' gácalen cazé' bönni' na' cate' bi gaca queë'.

<sup>2</sup> Xanru' Dios gun chi'ë lë', en gunë' ga soë' ibanë'.  
Gunë' ca' ga uzi'ë xibé xiyú cazé'.

Biti' usán né'ë lë' lu ná'agaca nupa biti' ta'lé'e lë' dxi'a.

<sup>3</sup> Xanru' utipë' ládxë'ë bönni' na' cate' ré'enë'.

Uchisë' lë' lu da'a le ráti'në', en gunë' ga soë' dxi'a.

<sup>4</sup> Gunnía': Bena' dul-la' lo' Li', Xan.  
Buéchi' ladxi' neda', en bun neda'.

<sup>5</sup> Nupa biti' ta'lé'e neda' dxi'a ta'nné quia', ta'nná:  
"¿Bátaxi gátië', en huáca gal-la ládxí'gaca bönachi lë'?"

<sup>6</sup> Channö uduyúgaquië' neda', ta'zí' yë'ë.

Ta'gúë' didza' ca naca le raca quia',  
en cate' ta'rúajë', tu'siyönné' bönachi.

<sup>7</sup> Tu'dubi nupa biti' ta'lé'e neda' dxi'a, en ta'nné quia'.  
Ta'zá' ládxí'gaca zián le naca dö' le ilún quia'.

<sup>8</sup> Ta'nné quia', ta'nná: "Yu'ë yödzöhué' le guti lë'.  
Bíti'rö' caz huöásë' ga na' dë' lu le denë'."

<sup>9</sup> Lësca' caní benë' böchi' luzá'a ruzxöni ládxa'a-në'.  
Bönni' gudágulenë' neda' tsözxón ridá'baguë'ë neda'.

<sup>10</sup> Buéchi' ladxi' neda', Xan, en bun neda',  
ate' ubí'i caza' quégaca nupa na' biti' ta'lé'e neda' dxi'a.

<sup>11</sup> Gácabe'eda' raza ládxu'u neda',  
tu' cabí ulu'xicja neda' nupa biti' ta'lé'e neda' dxi'a.

<sup>12</sup> Gáclen cazu' neda' tu' runa' le naca dxi'a.  
Gunu' ga sóatica'sa' lo' Li'.

<sup>13</sup> ¡Yöl-la' ba Xanru', Dios quégaca bönachi Israel!

¡Guli'cu'ë yöl-la' ba na'a dza, en yugu' dza si' zaca!

¡Ca' gaca!

¡Ön, ca' gaca!

## 42

<sup>1</sup> Ca rizé ládxi'ba' bidxina' guixi' nisa yégudo',  
lësca' caní rizé ládxa'a Li', Dios.

<sup>2</sup> Ribidxi ládxa'a Li' cazu', Dios.

¿Bátaxi udxina' ga dë quia', en tsu'a le yúbölö yudo' lá'ayi quiu'?

<sup>3</sup> Rëla, en te dza ribödxa', en biti' bi rahua'.

Yugu' dza nacuá' nupa ta'nábini neda', ta'nná: "¿Gazxi caz zoa Dios quiu'?"

<sup>4</sup> Risëbi ládxa'a cate' röjneda' ca guca zí'alö,  
cate' guzá'lена' böñachi guizxi yu, en yöjnörua' láhuilöguequi ra' yu'u queë' Dios.  
Lu yöl-la' rudzeja queëtu' bíl-latu', en guyéaj ládxi'tu'-në' Xanru', en bentu' laní.

<sup>5</sup> ¿Bizz que risébida' ládxa'a, en bizx que rö'a böñiga?

Uzxöni ládxa'a-në' Xanru' Dios, tu' huadxín dza cu'a-në' yöl-la' ba le yúbölö.

Náquië' Nu rusölá neda', en náquië' Dios quia'.

<sup>6</sup> Risébida' ládxa'a, Dios quia'.

Que lë ni na' tsöjneda' Li' tsanni ni zoa', ridá' rizxúnnaja' ra' yegu Jordán,  
en tsanni ni ridá' lu guí'a Hermón, en lu guí'a Mizar.

<sup>7</sup> Ca tu guziú' rinné lu nísado', en ca bö ruí'i tu budoá' nísado' queë' Dios,  
caní rinné ladxi' bö' naca caza' lu yöl-la' risëbi ladxi'.

<sup>8</sup> Rinábida'-në' Xanru' huéchi' ládxë'ë neda' yugu' dza.

Yugu' dzö' rul-la' yöl-la' ba queë' Lë',  
en rulidza' Dios, ruí'lena'-në' didza', Nu na' runna quia' yöl-la' na'bán.

<sup>9</sup> Guía'-në' Dios, Nu ruzóa neda' tsutsu, inná: ¿Bizz que nál-la ládxu'u neda'?

¿Bizz que run bayúdx quí'i sáca'tica'sa' lu ná'agaca nupa biti' ta'lé'e neda' dxí'a?

<sup>10</sup> Rutsaba yúgu'të dxita yu'a tu' tu'didza' yudxi neda'.

Yugu' dza ta'nábini neda', ta'nná: "¿Gazxi caz zoa Dios quiu'?"

<sup>11</sup> ¿Bizz que risébida' ládxa'a, en bizx que rö'a böñiga?

Uzxöni ládxa'a-në' Xanru' Dios,  
tu' huadxín dza cu'a-në' yöl-la' ba le yúbölö,  
tu' náquië' Nu rusölá neda', en náquië' Dios quia'.

## 43

<sup>1</sup> Guléaj neda' tsahui', Dios, en bë' didza' uláz quia' lógaca böñachi tuá' dö' quia'.  
Busölá neda' lu na' nu rizi' yë', en biti' naca tsahui'.

<sup>2</sup> Li' cazu' nacu' Dios, Nu rutipa ládxa'a. ¿Bizz que nusán no'o neda'?

¿Bizz que ruhuí'inida' tu' ta'bía no neda' nupa tu'dí'i neda'?

<sup>3</sup> Gusö'l-la' quia' bení' quiu', en le naca idútë li quiu' para ulu'lui'i neda' nöza.  
Ben ga ila'ché' neda' ga naca lá'ayi quiu', ga na' zoa cazu' Li'.

<sup>4</sup> Tsu'a ra' bucugu queë' Dios.

Ibíga'a lahué' Dios, Nu run ga rudzéjade'eda'.

Gúl-lalena' bihuél-la, cu'a Li' yöl-la' ba, Dios, nacu' Dios quia'.

<sup>5</sup> ¿Bizz que risébida' ládxa'a, en bizx que rö'a böñiga?

Uzxöni ládxa'a-në' Xanru' Dios,  
tu' huadxín dza cu'a-në' yöl-la' ba le yúbölö,  
tu' náquië' Nu rusölá neda', en náquië' Dios quia'.

## 44

<sup>1</sup> Biyőn quézitu' le, Dios.

Bulu'siyönnë' netu' xuz xtó'otu'  
ca naca yugu' le zxön benu' dza ni'te,  
cate' ni' gula'cu'ë légaquië' luyú ni.

<sup>2</sup> Bulaga cazu' Li' böñachi yugu' yödzö izá'a,  
en bucuásu' légaquië' luyú ni.

Busaca' zi'u böñachi izá'a na', en gurú'unu' léguequi.

<sup>3</sup> Biti' gula'déli'në' xuz xtó'otu' luyú ni rácasö quégaquië',  
en biti' bulu'sólá la' cuíngacasë',  
pero ben cazu' Li' lë na' len yöl-la' huáca zxön quiu',  
en lu yöl-la' zxön que le naca cazu',  
ate' bulú'u lahui ca nadxi'inu' légaquië'.

<sup>4</sup> Naca cazu' Li' Dios quia', en Nu rinná be'e neda'.  
Busölá böñachi quiu', yugu' zxí'ini xi'sóë' Jacob.

<sup>5</sup> Uguntu' dxin yöl-la' huáca quiu', uxícjatu' nupa ta'dá'baga' netu',  
ate' tu' zóalen cazu' netu', ucúl-latü' nupa biti' ta'lé'e netu' dxi'a.

<sup>6</sup> Biti' uzxöni ládx'a'uxiti' yaga quia',  
en biti' uzxöni ládx'a'guíë tuchi' quia' para ilácalen neda',  
<sup>7</sup> tu' rusölá cazu' Li' netu' lu ná'agaca nupa biti' ta'lé'e netu' dxi'a,  
en ruzötju' nupa tu'dí'i netu'.

<sup>8</sup> Cú'utica'stu' Li' yöl-la' ba,  
en guíetica'stu' Li': "Xclenu'."

<sup>9</sup> Pero na'a nusán no'o netu', Dios, en bë'u lataj nu buxicja netu'.

Bíti'rö réajlenu' bönni' queétu' röjáquië' gudil-la.

<sup>10</sup> Benu' ga buzxúnnajtu' lógaca nupa ta'díl-lalen netu',  
ate' gula'gúë' yugu' le nequi queétu'.

<sup>11</sup> Bé'u lataj gulútië' ziantu' ca nu rúti-gacaba' bö'cu' zxila'.  
Bésilásiu' netu' ládjagaca yödzö izá'a.

<sup>12</sup> Naca tsca bëti'u netu', en láti'do'os guzxi'u.

Biti' ca' buzi'u xibé tsca guzxi'u.

<sup>13</sup> Bönachi yugu' dzaga yödzö queétu' bila'lé'e lë na' benu' queétu',  
ate' tu'cá'ana netu' cá'asö, en tu'titaj netu'.

<sup>14</sup> Benu' ga tu'didza' yudxi böñachi yugu' yödzö netu'.  
Tu'tá ícjaguequi lu yöl-la' ruca'ana netu' cá'asö.

<sup>15</sup> Yugu' dza rutu'ida' ca raca queétu',  
en rö'a böñiga lu yöl-la' rutu'i quia',

<sup>16</sup> tu' riyönda' nupa tu'didza' yudxi neda', en tu'cá'ana neda' cá'asö,  
nupa na'biti' ta'lé'e neda' dxi'a, en tu'dí'i neda'.

<sup>17</sup> Guca queétu' yúgu'té lë ni sal-la' biti' nál-la ládx'i'tu' Li',  
en biti' nucá'anatu' didza' dzaga bénlenu' netu'.

<sup>18</sup> Biti' ca' böaj ládx'i'tu' ca réajlé'ëtu' Li',  
en biti' gudá'baga'tu' le bulu'ínu' netu' guntu'.

<sup>19</sup> pero nusán na' cazu' netu' ladaj nupa nátagaca ca yugu' böa' gui'a sínia',  
en nucá'anu' netu' ga chizóa tseajtsázatu' lataj chul-la.

<sup>20</sup> La'tu' gul-la ládx'i'tu' Li', Dios queétu',  
o la'tu' guyéaj ládx'i'tu' tu dios izá'a,

<sup>21</sup> la' gáquibe'eténu' lë ni, Dios,  
tu' nöz quézinu' le rizá' ládx'i'tu'.

<sup>22</sup> Tu' néquitu' quiu' Li' zóatica'sö nu guti netu'.  
Nactu' ca yugu' bö'cu' zxíla'do' lo nu guti légacaba'.

<sup>23</sup> ¡Bubán, Xan! ¡Bizx que rásitso' Li'?  
 ¡Guyasa! ¡Biti' usán no'o netu' chadía chacanna!  
<sup>24</sup> ¡Bizx que nucachi' lo' lotu' netu'?  
 ¡Naru' nál-la ládxu'u ca raca queétu', en ca rigu'i rizáca'tu'?  
<sup>25</sup> Naguíngaquië' netu' luyú.  
 Nadíntu' lu bëchtö yu.  
<sup>26</sup> ¡Gudáchí gácalenu' netu',  
 en lu yöl-la' dxi'i ladxi' quiu' busölä netu'!

## 45

<sup>1</sup> Rizá' ládx'a'a tu le naca dxi'a.  
 Ru'a didza' que le runé' bönni' rinná bë'ë.  
 Naca lúdxa'a ca le ruzúajlenë' bönni' nabé'ede'ené' ru'ë didza'.

<sup>2</sup> Nácatëru' Li' lachi ca yígu'të böñachi.  
 Nabé'ede'enu' ru'u didza'.  
 Que lë ni na' nuné' Dios gaca dxi'a quiu' chadía chacanna.  
<sup>3</sup> Bega' lë'u guíe tuchi' quiu', bönni' nayépisë',  
 lu yöl-la' lachi quiu', en lu yöl-la' unná bë' quiu'.  
<sup>4</sup> Lu yöl-la' unná bë' quiu' idéli'nu' lu gudil-la,  
 ugunu' dxin le naca idútë li, en yöl-la' nöxaj ladxi', en le naca tsahui'.  
 Yöl-la' huáca zxön quiu' gun ga ilá' lahui yugu' le zxöntëro.  
<sup>5</sup> Natúchi'gacada' yaga lahui tuchi' quiu'.  
 Bönachi yugu' yödzö zi'tu' ta'dzö'ö lo', nupa na' ta'dfl-lalen li'.  
 Yugu' yaga lahui tuchi' quiu' nachóza'gaca ládx'i'do'guequi.

<sup>6</sup> ¡Chadía chacanna naguixju' ga rö'u rinná bë'u, Dios!  
 ¡Ca naca le naca tsahui' rinná bë'enu' böñachi quiu'!

<sup>7</sup> Nadxi'inu' le naca tsahui', en biti' rilé'enu' dxi'a le biti' nácatë.  
 Que lë ni na' Dios quiu' nabó' cazé' li'.  
 Nachízire' icja ládx'i do'o yöl-la' rudzeja ca le nápagaca ia'zíca'rö böñachi.  
<sup>8</sup> Rilá' zxixi lari' nacu' len zi' mirra, en zi' áloe, en zi' casia.  
 Tuné' bönni' huil-la ga rudzéjanu' lu yu'u lidxu' zxön.  
<sup>9</sup> Yugu' nigula zxí'inigaquië' bönni' ta'nná bë'ë  
 nútsa'gacabi' bi'i nigula nacuá'abi' lidxu'.  
 Nigula quiu' rinná bë'enu zuínu cuitu' ibëla,  
 en nácunu le nazi'i biquitaj oro nazaca'.

<sup>10</sup> Bë' ladxi' neda', nigúlado'.  
 Bë' ladxi' neda', en biyón xtídz'a'.  
 Gul-la ladxi' böñachi yödzö quiu', en yugu' di'a dza quiu'.  
<sup>11</sup> Ni'irö së ládxë'ë bönni' rinná bë'ë yöl-la' lachi quiu'.  
 Buzóa zxibu' lahuë' tu' náquië' xanu'.  
<sup>12</sup> Ni'irö böñachi yödzö Tiro ila'dxín lo' nuá'gaca le nazáca'da' le ilunna quiu'.  
 Yugu' bönni' ta'lé'ené' yöl-la' tsahui' ila'nábinë' li' bi unödzju' quégacabie'.  
<sup>13</sup> Yugu' bi'i nigula queé' bönni' rinná bë'ë zóagacabi' lidxë', en nácatëögacabi' lachi.  
 Lari' nácubi' nadíalen du oro.  
<sup>14</sup> Ila'chë'ë-bi' lahuë' bönni' rinná bë'ë, nácubi' lari' nazáca'da'.  
 Ila'dabi' yugu' bi'i nigula ra'bando' cùdzi'löbi',  
 ate' ila'chë'ë légacabi' lahuë' bönni' na' rinná bë'ë.  
<sup>15</sup> Lu yöl-la' rudzeja, en lu yöl-la' ruzí' xibé quégacabi' ila'dxinbi',

en ila'yázabi' yu'u lidxe' bönni' na' rinná bë'ë.

<sup>16</sup> Ila'cuá'abi' bi'i bönni' quiu' uláz quégaquië' xuz xto'o.

Gunu' ga ila'nná bë'ëbi' idútë yödzölió.

<sup>17</sup> Gunu' ga tsöjnégacatica'sö bönnachi ca nacu' Li'.

Que lë ni na' yúgu'të bönnachi ilé li "Xclenu'" yugu' dza si' zaca.

## 46

<sup>1</sup> ¡Náquië' Dios Nu run chi'i rë'u, en Nu ruzóa rë'u tsutsu!

¡Zóatica'së' gácalenë' rë'u cate' bi raca queéru'!

<sup>2</sup> Que lë ni na' biti' gádxiru' sal-la' izxizi idútë yödzölió,

en ila'niti yugu' gu'a lu nísado',

<sup>3</sup> en sal-la' chasa idxía, en tsu'u bö nísado' na',

en ila'zxizi gu'ado' tu' nözi le raca.

<sup>4</sup> Zoa tu yegu le run ga tu'dzeja nupa nacuá' ladzë' Dios,

ga na' rö'ö yudo' lá'ayi ga zoë' Dios nayépisétërë'.

<sup>5</sup> Zoa cazë' Dios yödzö na', le catu caz initi.

Cate' ni' soa itó yu gácalenë' nupa nacuá' ni'.

<sup>6</sup> Tadxi ta'dzöbi bönnachi yugu' yödzö,

ate' ta'bó' bagu'i nupa ta'nná bë',

tu' ru'ë didza' Dios, ate' riniti luyú ni.

<sup>7</sup> Xanru' nayépisétërë' zóalen cazë' rë'u.

Dios quégaca zxí'ini xi'sóë' Jacob rapa chi'ë rë'u.

<sup>8</sup> Guli'dá ilé'eli' le nunë' Xanru'.

Buli'yú ca nusunítië' luyú ni.

<sup>9</sup> Ruzúa dxíë' gudil-la rácagaca idútë yödzölió.

Riguitsjé' yugu' uxiti' yaga,

en rusunítië' yugu' yaga lahui tuchi' que gudil-la.

Ruzégui'ë yugu' carreta que gudil-la tu lu gu' zxön.

<sup>10</sup> Rnnë': "Guli'sóa dxisö, ate' guéquibe'eli' naca caza' Dios.

Nayépisétëra' yugu' lu yödzö, en lu idútë yödzölió."

<sup>11</sup> Xanru' nayépisétërë' zóalen cazë' rë'u.

Dios quégaca zxí'ini xi'sóë' Jacob rapa chi'ë rë'u.

## 47

<sup>1</sup> ¡Lu yöl-la' rudzeja queéli' guli'capa' ná'ali', bönnachi yúgu'të yödzö!

¡Guli'cu'ë yöl-la' ba Dios, len yugu' le rúl-lalenli'!

<sup>2</sup> Ral-la' gunru' bal Xanru' Dios nayépisétërë'.

Náquië' Nu rinná bë' idútë yödzölió.

<sup>3</sup> Benë' ga bidéli'ru' yugu' lu bönnachi izá'a.

Benë' ga rinná bë'eru' yugu' yödzö.

<sup>4</sup> Gurö' cazë' luyú ga ni nuzóë' rë'u.

Naca tu luyú lachi quégaca zxí'ini xi'sóë' Jacob, nupa na' nadxi'i quézinë'.

<sup>5</sup> Len yöl-la' ba zxön ribenë' Dios ga rö'ë rinná bë'ë.

Le zián le tu'cödxë' cate' ribenë' Xanru' ni'.

<sup>6</sup> ¡Guli'gul-la yöl-la' ba queë' Dios! ¡Guli'gul-la!

¡Guli'gul-la yöl-la' ba queë' Bönni' rinná bë'enë' rë'u! ¡Guli'gul-la!

<sup>7</sup> ¡Rinná bë'ë Dios idútë yödzölió ni!  
 ¡Idú ládxi'li' guli'gul-la yöl-la' ba queë!  
<sup>8</sup> ¡Zoa cazë' Dios lataj lá'ayi queë' ga rö'ë rinná bë'ë!  
 ¡Rinná bë'enë' bönachi yúgu'të yödzö!  
<sup>9</sup> Tu'dubi nupa ta'nná be'e yugu' yödzö  
 tsözxñ len bönachi queë' Dios queë' Abraham.  
<sup>10</sup> ¡Nequi queë' Dios yöl-la' zxön quégaca yúgu'të yödzö nacuá' yödzölió!  
 ¡Nayépisétérë' Lë'!

## 48

<sup>1</sup> Nayépisétérë' Xanru', ate' run bayudxi cù'uru'-në' yöl-la' ba idú ládxi'ru'  
 ga zoa lu yödzö queë' Dios queëru' le zoa lu guí'a lá'ayi queë'.  
<sup>2</sup> Lachi, en sibi naca guí'a lá'ayi na',  
 ate' raza ládxi'gaca bönachi idútë yödzölió ca naca.  
 Caní naca guí'a Sión le rö'ö tsölä'alö ga za' bö' ziaga.  
 Lu yödzö na' dë ga zoa Bönni' Unná Bë' nayépisë'.  
<sup>3</sup> Rulu'ë lahui Dios sóaru' tsutsu cuitë' Lë'  
 ga zoa lu yu'u lidxë'.  
<sup>4</sup> Gula'dá'baga' nupa ta'nná bë' lu yu ni,  
 en gula'bígui'ë ra' yödzö lá'ayi na'.  
<sup>5</sup> Cate' bila'lé'enë' yödzö na' bulu'báninë'.  
 Gula'bö'ë böniga, en la' bulu'zxúnnajtë'.  
<sup>6</sup> Ra' yödzö na' gula'zxízië'.  
 Gula'zaca' zi'ë ca raca queënu nigula chizóa uzóanu-bi' bñido'.  
<sup>7</sup> Risól-lé'ë Dios tu bö' budunu',  
 le rusuniti yugu' barco zxön que yödzö Tarsis.  
<sup>8</sup> Biyönru' ca nácagaca le zxön benë' Dios,  
 ate' na'a rilé'e quéziru' le runë',  
 lu yödzö lá'ayi queë' Dios quégaca ni'a në'ë guizxi yu,  
 en náquië' ca' Dios queëru'.  
 Tsaz naguixjë' yödzö na'.  
<sup>9</sup> Ga zoa lu yudo' quiu', Dios,  
 röjnetu' ca naca yöl-la' dxí'i ladxi' quiu'.  
<sup>10</sup> Ca nayépisétérö Lo', Dios,  
 ca' ta'gú'u Li' yöl-la' ba bönachi idútë yödzölió.  
 Ca naca le naca tsahui' rinná bë'u.  
<sup>11</sup> Ulu'dzeja bönachi nacuá' yödzö Sión.  
 Ulu'zí'inu xibé nigula zxí'ini xi'sóe' Judá  
 tu' ruchi'a rusöróu' netu' ca naca le naca tsahui'.  
<sup>12</sup> Guli'dá idú gásibi'ilö ga dë yödzö Sión,  
 en buli'laba yugu' yu'u sibi tun chí'i yödzö na'.  
<sup>13</sup> Buli'yú ca naca zö'ö run chí'i yödzö na',  
 en buli'yú ca' le nuzóagaca le tsutsu,  
 para gaca quíxjöi'ili' zxí'ini xi'sóali' ca náquië' Dios zxön ni.  
<sup>14</sup> Tsaz náquië' Dios queëru', na'a dza, en dza si' zaca.  
 Ulu'inë' rë'u nöza tödi gátiru'.

## 49

<sup>1</sup> Guli'yöni lë ni, libíili', bönachi yúgu'të yödzö.

Buli'zé nágali', libí'ili', zóali' idútë yödzölió.

<sup>2</sup> Libí'ili', nayépsétéröli', en libí'ili', nácali' cá'asö.

Libí'ili', dë yöl-la' tsahui' queéli', en libí'ili', nácali' yechi'.

<sup>3</sup> Tsöjsá' ládxa'a ca naca le nápagaca yöl-la' réajni'i,  
en gu'a didza' le nápagaca yöl-la' raca yenni'.

<sup>4</sup> Gü'i ládxa'a ca naca tu le rucudzu' didza',  
en quíxjö'a ca nácagaca tsanni quinnia' lë'e bihuël-la.

<sup>5</sup> Biti' bi rádxida' cate' ridxín bi raca quia',  
cate' ta'gu'ë neda' lë'ajlö bönni' tuá' dö' biti' ta'lé'enë' neda' dxi'a.

<sup>6</sup> Tu'zxöni ládxë'ë bönni' na' yöl-la' tsahui' quégäquië',  
en tun ba zxön cuíngäquië' ca nácagaca le dë quégäquië'.

<sup>7</sup> Biti' gaca huöá'uë' la' cuinsë' nitúë' bönni' na'.  
Biti' gaca bi unödzjë' queé' Dios le gun ga usólë' lë',

<sup>8</sup> tu' naca zxöntérö le huöá'u yöl-la' na'bán que nu bönni',  
ate' catu caz gaca nu bönni' quizxjë' ca naca,

<sup>9</sup> para idéli'në' sóatica'së' ibanë',  
en cabí tsázië' yero ba ga yú'ugaquië' bönni' nati.

<sup>10</sup> Rilé'enë' tatië' ca' bönni' ta'yéajni'inë',  
en ta'nitië' tuz ca tati nupa biti' bi nözigaca, en nupa biti' ta'yéajni'i,  
ate' tu'cá'anë' yöl-la' tsahui' quégäquië' le ulu'zí' xibé bönachi yúbölö.

<sup>11</sup> Téquinë' ila'cuá'tica'sö lídxigaquië' bönni' na',  
ate' tsaz ila'cu'ë ni',  
ate' ta'gu'ë lágaca xiyúgaquië' ca naca la' lágacasë'.

<sup>12</sup> Pero yöl-la' ba zxön napë' bönni' na' biti' gun ga sóatica'së'.  
Gati cazë' ca tátiba' böa' guixi'.

<sup>13</sup> Caní naca le gaca quégäquië' bönni' tu'zxöni ládxë'ë yöl-la' tsahui' quégäquië',  
enca' quégaca zxí'ini xi'sóagaquië',  
yugu' bi'i na' ta'yaza ládxí'gacabi' didza' gulu'ë xúzgacabi' na'.

<sup>14</sup> Ilátië' ca tátiba' bö'cu' zxila',  
ate' yöl-la' guti gaca quégäquië' ca tu nu uyú bö'cu' zxila'.  
Yugu' bönni' tsahui' ila'nná bë'enë' légaquië' cate' itó' yu zila.  
Ila'niti le guta' quégäquië', ate' ila'cuá'tica'së' lataj chul-la ga dzö'ö nupa nátigaca.

<sup>15</sup> Huöá'u cazë' Dios yöl-la' na'bán quia' lu yöl-la' guti,  
tu' iché'ë neda' ga tsöjsóalena' Lë'.

<sup>16</sup> Biti' gádxinu' cate' idéli'në' nu bönni' yöl-la' tsahui' zxön,  
en cate' xön yöl-la' lachi que yu'u lidxë',

<sup>17</sup> tu' cabí bi u'ë cate' gátië',  
en biti' tséajlen lë' yöl-la' lachi que le guta' queé'.

<sup>18</sup> Sal-la' cate' ni' zoë' nabanë' buzí' xibé bö' naca cazë',  
ate' gula'gú'u bönachi lë' yöl-la' ba cate' bidéli'në' yöl-la' tsahui' na'.

<sup>19</sup> Tsázië' ga na' dzö'ë xuz xtá'ahuë',  
en bíti'rö ilé'enë' bení'.

<sup>20</sup> Náquië' bönni' napë' yöl-la' zxön, pero riyádzjanë' yöl-la' réajni'i,  
ca böa' guixi' tati cázaba'.

## 50

<sup>1</sup> Ru'ë didza' Xanru' Dios nayépisétérë'.

Nutubë' dërö nupa nacuá' yödzölió ga naguélata'ë ga rilén gubidza ga ridxitë ga ribía.

<sup>2</sup> Lu yödzö Sión rigu'ë Dios bení'.

Napa yödzö na' yöl-la' lachi idú.

<sup>3</sup> Zë'ë Dios queéru', en biti' soë' dxisö.

Tsöjnöru lahuë' tu guí' zxön,

ate' tsecja tu bö' budunu' idú gasibf'ilë'.

<sup>4</sup> Ulidzë' lúzxiba xitsá', enca' luyú

cate' uchi'a usöröö' quégaca böñachi queë'.

<sup>5</sup> Rnnë' Dios: "Guli'túbi nupa néquiguequi quez quia',  
nupa na' gulunlen neda' didza' dzaga,  
en bulu'lalaj rön lahua' le ben tsutsu didza' dzaga na'."

<sup>6</sup> Naca bë' náquië' tsahui' Dios lúzxiba xitsá',  
tu' uchi'a usöröö' Dios böñachi queë'.

<sup>7</sup> Rnnë': "Buli'zé nágali', böñachi quia', ate' gu'a didza'.

Buli'zé nágali', böñachi Israel, ate' uzégua' libf'ili' didza'.

Naca caza' Dios.

Ön, naca' Dios queéli'.

<sup>8</sup> Biti' uzégua' libf'ili' didza' ca naca le rúnnali' quia',  
en caléga ca nácagacaba' böa' bëdxi ruzégu'li'-ba' lahua'.

<sup>9</sup> Biti' riquinda'-ba' bëdxi queéli',

en caléga chivo biguiú' nacuá'aba' queéli',

<sup>10</sup> tu' néquigacaba' quia' yúgu'téba' böa' guixi',  
enca' böa'-bëdxi nacuá'aba' lu gayuá' gayuá' guí'ado'.

<sup>11</sup> Néquigacaba' ca' quia' yúgu'téba' böa' zoa xíligacaba',  
enca' yúgu'té le zoa nabán la' guixi'.

<sup>12</sup> La'tu' riduna' biti' guía' ca' libf'ili',

tu' nequi quia' yödzölió, enca' yúgu'té le nacuá' ni'.

<sup>13</sup> ¿Naru' gágutsa' xipéla'gacaba' bëdxi,

o guí'jatsa' xichöngacaba' chivo?"

<sup>14</sup> Le ral-la' unödzjali' queë' Dios naca yöl-la' rë Lë': "Xclenu'"

ate' ral-la' gunli' lahuë' Dios nayépisétérë' ca naca le guzxi' lu ná'ali' gunli'.

<sup>15</sup> Rnnë' ca': "Ral-la' ulídzali' neda' cate' bi gaca queéli'.

Gácalen caza' libf'ili', ate' gunli' neda' bal."

<sup>16</sup> Dios rë' bönni' huía' dö', rnnë':

"¿Bizx que ru'u didza' ca nácagaca xibá naguixja'?

¿Bizx que ru'u didza' ca naca didza' dzaga núnlena' böñachi?

<sup>17</sup> Biti' runnu' lataj usédida' li',

pero rucá'anu' cá'asö didza' ruá'a.

<sup>18</sup> Cate' rilé'enu'-në' bönni' gubán rácalenu' lë',

en runu' tsözxón nupa ta'guitsaj xibá que yöl-la' nutsaga na'.

<sup>19</sup> Zóatica'su' gu'u didza' xihui',

en ruí'itica'su' didza' biti' nácatë.

<sup>20</sup> Zóatica'su' uzéguiu'-në' böchi' cazu',

en rudidza' yudxu' böchi'-zan cazu'.

<sup>21</sup> Caní benu', ate' biti' bi gunnía',

ate' gúquinu' naca' ca naca cazu' li',

pero na'a uzégua' li' didza', en ulu'a lahui le nunu'.

<sup>22</sup> Buli'zé nágali' didza' ni, nülöli' ruzóali' neda' tsölä'alö.

Channö cabí, usunítia' libf'ili', ate' cuntu nu gaca usölä libf'ili'.

<sup>23</sup> Nu rë neda': Xclenu', runna quia' le run neda' bal,

ate' nu run ca rnna xtídza'a, usölä caza' nu na'."

## 51

<sup>1</sup> Dios quia', buzá' ladxi' quia' tsca naca yöl-la' dxi'i ladxi' zxön quiu', en tsca naca le zián le ruzá' ládxu'u quia', bugúa yugu' le gudá'baga'a lo' Li'.

<sup>2</sup> Buguíbitica'sö neda' tsca naca dö' bi'a.

Buchi'a neda' lu dul-la' nuna'.

<sup>3</sup> Nöz quézida' le gudá'baga'a, en röjnétiqui'sida' yugu' dul-la' nuna'.

<sup>4</sup> Lo' Li' cazu' bena' dul-la', en lo' Li' ca' bi'a dö'.

Naca bë' nacu' tsahui' cate' ru'u didza', en idú dxi'a, en tsahui' nacu' cate' ruchi'a rusöróu' queétu'.

<sup>5</sup> Buyútsöca', nabága'a dö' cate' gusí lotë gulja', en lu dul-la' zoa caza' cate' buzóanu xiná'a neda'.

<sup>6</sup> Ré'enu' soa le naca idútë li icja ládxí'do'otu'.

Guchiza icja ládxí'da'ahua' yöl-la' réajni'i.

<sup>7</sup> Buchi'a neda' len le ruchi'aninu', ate' gaca' dxi'a. Buguibi neda', ate' huöáca' zxíla'do'os.

<sup>8</sup> Ben ga yönda' le naché' yöl-la' ruzí xibé, en yöl-la' rudzeja, para huöáca ládx'a'lu le raca quia' tu' benu' ga réquibe'eda' nabága'a dul-la'.

<sup>9</sup> Biti' uyú' yugu' dul-la' nuna', en busulu yúgu'të le naca dö' nabága'a.

<sup>10</sup> Dios quia', bun dxi'a ládxí'da'ahua', en guchiza neda' tu bö' cubi le nuzú' tsutsu.

<sup>11</sup> Biti' ucuítu' neda' ga zoa' lo' Li', en biti' ugú' Dios Bö' Lá'ayi quiu' Nu zóalen neda'.

<sup>12</sup> Bunna quia' yöl-la' rudzeja que yöl-la' rusölá quiu', en ben ga guna' ca rnna xtídz'u' idú ládx'a'.

<sup>13</sup> Ni'irö usédida' nupa ta'guitsaj xibá quiu' ca nácagaca le ré'enu' ilúngaca, ate' yugu' bönni' dul-la' ulu'huécja quiu'.

<sup>14</sup> Dios quia', benna neda' lataj cabí ibága'a xiguia'. Naca cazu' Dios, Nu rusölá neda'.

Lu yöl-la' rudzeja quia' gul-la' ca naca cazu' tsahui'.  
<sup>15</sup> Xana' Dios, gusalaj ruá'a,

ate' usiyönda' böñachi yöl-la' ba quiu'.

<sup>16</sup> La'tu' raza ládxu'u-ba' böa'-bëdxi gútitu'-ba' lo', la' gúntea' caní. Biti' raza ládxu'u-ba' nu böa' uzégui'tu'-ba' lo'.

<sup>17</sup> Le ré'énë' Dios le naca ca tu le cú'uru' lahuë' naca bö' naca cáziru' le nötaj nagula ladxi'.

Dios quia', biti' ucá'anu' cá'asö ládxí'do'otu' le ruhui'ini ladxi', en le naca nöoxaj ladxi'.

<sup>18</sup> Lu yöl-la' ruzá' ladxi' quiu' ben le naca dxi'a quégaca böñachi yödzö Sión.

Buchisa zö'ö le run chi'i yödzö Jerusalén.

<sup>19</sup> Ni'irö tsaza ládxu'u yugu' le cú'utu' lo' le naca idú dxi'a, yugu' böa' guíxi'do' gútitu'-ba' lo',

en yugu' böa'-bëdrido' uzégui'tu'-ba' lo'.

Ni'irö ilútië'-ba' yugu' bëdxi biguiú'do', en ila'gu'ë-ba' lu bucugu quiu'.

## 52

<sup>1</sup> ¿Bizx que run ba zxön cuinu' ni'a que dö' ru'u, bönni' nál-la?

Zóatica'sö yöl-la' dxi'i ladxi' queë' Dios.  
<sup>2</sup> Len lúdxu'u rúnleno' luz'o didza' para usunítiu' bönnachi.  
 Naca lúdxu'u, bönni' rizi' yë', ca tu guié tuchi'.  
<sup>3</sup> Nadxi'irönu' le naca dö' ca nadxi'inu' le naca dxi'a,  
 en nadxi'irönu' le cabí nácatë ca nadxi'inu' le naca idútë li.  
<sup>4</sup> Nadxi'inu' yúgu'të didza' tun ditaj bönnachi,  
 li' na', bönni' rizi' yë'.  
<sup>5</sup> Tsaz uzötaj cazë' Dios li'.  
 Sönë' li', en ubéajé' li' lu yu'u lidxu',  
 en ucuítë' li' ga nacuá' nupa nabángaca.  
<sup>6</sup> Yugu' bönni' tsahui' ila'lé'enë' lé ni, en iládxinë' Dios.  
 Ulu'zjidxe' queë' bönni' na' rizi' yë', ila'né':  
<sup>7</sup> "¡Buli'yútsöca'! Bönni' ni biti' gú'unñë' uzxöni ládxë'ë Dios,  
 pero buzxöni ládxë'ë yöl-la' tsahui' queë',  
 en le zián le guzé ládxë'ë le cabí bi nazaca'."  
<sup>8</sup> Naca' neda' ca tu yaga olivo ya' a le rö' ra' yu'u lidxë' Dios.  
 Uzxöni ládex'a a yöl-la' dxi'i ladxi' queë' Dios yugu' iz si' zaca.  
<sup>9</sup> Guíética'sa' Li': "Xclenu'" tu' ben cazu' Li' ga naca caní,  
 ate' guna' löza Lo' le naca dxi'a lógaca nupa néquiguequi quez quiu'.

## 53

<sup>1</sup> Ta'zá' ládxë'ë bönni' canóz, ta'nné':  
 "Biti' ca' zoë' Dios."  
 Nácagaquië' xihui' bönni' caní, en núnquaquië' le nácatérö xihui'.  
 Cuntu nu bönni' zoë' runë' le naca dxi'a.  
<sup>2</sup> Ga na' zoë' Dios yehua' yubá ruyúë' gáti'tës,  
 en rilé'enë' bönnachi nacuá' idútë yödzölió,  
 para inózinë' channö zoa nu réajni'i,  
 o channö zoë' nu bönni' rui'i ládxë'ë Dios.  
<sup>3</sup> Yúgu'të bönnachi söjáquië' ga yúbölö.  
 Yúgu'të' nácagaquië' xihui'.  
 Cuntu nu zoa run le naca dxi'a, nitúë' bönni'.  
<sup>4</sup> ¿Naru' cabí nápagaquië' yöl-la' réajni'i bönni' na' tu'ë dö'?  
 Tu'sunítië' bönnachi quia' ca tu nu ragu yöta,  
 en biti' ca' tu'lidzë' neda'.  
<sup>5</sup> Tadxi ta'dzöbinë' bönni' caní, en biti' bi nuna' quégäquië'.  
 Caní raca tu' rusunítië' Dios caz nupa ta'díl-lalen lib'ili'.  
 Gunli' ga ulu'tu'íne' tu' chigurú'unë' Dios légaquië'.  
<sup>6</sup> Raca ládxi'ru' irúaj Sión Nu usólá bönnachi Israel.  
 Cate' uchisa cazë' Dios bönnachi queë' nadzúngaca,  
 ulu'dzeja zxí'ini xi'sóë' Jacob, en ulu'zí' xibé bönnachi Israel.

## 54

<sup>1</sup> Busólá neda', Dios, para gaca yöl-la' ba que Lo'.  
 Len yöl-la' huáca quiu' guléaj neda' tsahui'.  
<sup>2</sup> Ruzé nagu' le rulidza' Li', Dios.  
 Ruzé nagu' didza' ruá'a.  
<sup>3</sup> Ta'díl-lalen bönni' zi'tu' neda',  
 tu' té'ënë' bönni' zidzaj ilútië' neda'.  
 Biti' ca' tádxinë' Dios.  
<sup>4</sup> Buli'yútsöca', naca cazë' Dios Nu rácalen neda'.

Ruzóë' tsutsu Xanru' yöl-la' na'bán quia'.

<sup>5</sup> Ubi'ë quégaca nupa ta'díl-lalen neda' le usuniti léguequi.

Tu' runu' ca rnna xtídz'u, Dios, busuniti léguequi.

<sup>6</sup> Idú ládxa'a gútia'-ba' böa'-bëdxi lo'.

Guía' Li': "Xclenu'" Xan, tu' naca dxí'a Lo'.

<sup>7</sup> Busólá cazu' Li' neda' lu yugu' le guca quia',  
ate' rilé'eda' zeaj nanítitica'sö nupa ta'díl-lalen neda'.

## 55

<sup>1</sup> Ruzé nagu' le rulidza' Li', Dios,  
en biti' tá'bagu' le rinábida' Li'.

<sup>2</sup> Ruzé nagu' neda', en rubí'u didza'.

Rulidza yúdxida' Li', en rö'a böniga

<sup>3</sup> ni'a que chi'ë bönni' biti' rilé'enë' neda' dxí'a,  
en tu' tu'tsá' neda' nupa tuá' dö', en tu'saca' zi' neda',  
en lu yöl-la' rilé quéguequi ta'bía no neda'.

<sup>4</sup> Réqui zi' ládxi'da'ahua',  
ate' yöl-la' radxi que yöl-la' guti röjtsaza ládxi'da'ahua'.

<sup>5</sup> Chigula'yaza yöl-la' radxi, en yöl-la' rizxizi neda',  
ate' nabaga' yöl-la' radxi ridzöbi neda'.

<sup>6</sup> Gunnía': "Gaca ládxa'a gata' quia' xílabá' gu'dödo',  
para gaca töda' lu bö'ös, en idxina' tu lataj ga gaca uzí' ládxa'a.

<sup>7</sup> Raca ládxa'a tseja' zi'tu',  
en tsöjsóa' la' guixi' ga dë lataj.

<sup>8</sup> Uyija' carelö tu lataj ga tsöjsóa' tsutsu,  
para cabí bi gun quia' le naca ca bö' budunu'."

<sup>9</sup> Busuniti légaquië', Xan, en buxí ruá'agaquië',  
tu' bilé'eda' ta'dil-lë', en tu'tsatsë' lu yödzö.

<sup>10</sup> Rëla, en te dza ta'dödë' nöza lu yödzö.

Tu'ë dö', en tunë' le xihui' idú gásibi'ilö yödzö.

<sup>11</sup> Tu'sumítië' le nacuá' ni'.

Tu'saca' zi'ë bönachi, en ta'zí' yë'ë la' nöza que yödz.

<sup>12</sup> Calëga bönni' biti' rilé'enë' neda' dxí'a nu rüdidza' yudxi neda',  
tu' huáca guá' ilena' le gunë',  
en calëga bönni' rüdi'inë' neda' nu ridíl-lalen neda',  
tu' huáca ucachi' cuina' lahuë',

<sup>13</sup> pero nacu' li', tu bönni' ca neda'.

Nacu' böchi' luzá'a, en nacu' tuz len neda'.

<sup>14</sup> Lu yöl-la' dxí'i ladxi' queéru' gúcaru' tuz.

Ladaj bönachi zián gudaru', en bidxinru' lidxe' Dios.

<sup>15</sup> Xana' Dios, bë' yöl-la' guti lataj idxín quégäquië' bagáchi'sö.

Ben ga tsöjtsázagaquië' nabángäquië' lataj chul-la ga nacuá' nupa nátigaca,  
tu' yu'u le xihui' lídxigaquië', en lu yu'u ca' gapa tu'dubë'.

<sup>16</sup> Pero neda' ulidza'-në' Dios,  
ate' usölä caze' Xanru' neda'.

<sup>17</sup> Chi'i dzö'ölö, en zflado', en gatsaj dza ulidza yúdxida' Lë',  
en inné ládxa'a lahuë', ate' yön caze' chi'a.

<sup>18</sup> Huöá'uë' yöl-la' na'bán quia' lu na' nupa ta'díl-lalen neda'  
en uzóë' neda' lataj ga ciòza' dxí'a tsáhui'do',

tu' nayánda' nupa ta'díl-lalen neda'.

<sup>19</sup> Huayóñ quéziné' Dios, en ubi'ë quégaquié'.

Rö'ë rinná bë'tica'së' Lë'.

Caní guné' Dios tu' cabí tu'sanë' ca tunë',  
en biti' tádxiné' Dios.

<sup>20</sup> Bönni' ru'ë dö' ribía nahuë' nu riböza dxí'a tsáhui'do',  
en rucá'anë' cá'asö didza' dzaga nunë'.

<sup>21</sup> Bé'ë didza' yúlado',

pero yu'u icja ládxí'da'ahuë' yöl-la' ridzá'a.

Bé'ë didza' zxíxido',

pero didza' na' bë'ë gulaca ca guíë tuchi'.

<sup>22</sup> Gulú'u le nabágú'u lu né'ë Xanru', ate' utipa cazé' ládxu'u.

Biti' gu'ë lataj iguínnaç tsaz nu naca tsahui'.

<sup>23</sup> Chú'unë' bönni' tu'ë dö' na' lataj chul-la

ga nacuá' nupa nátigaca ga na' ila'nítigaquié'.

Biti' ila'cuá' gatsaj tsca ral-la' ila'cu'ë nabángacu'ë bönni' tutië' bönachi,  
en bönni' ta'zi' yë'ë.

Pero neda' uzxöni ládex'a'a Li'.

## 56

<sup>1</sup> Buéchi' ladxi' neda', Dios, tu' ta'dá'baga' bönachi neda'.

Yugu' dza nupa tu'dí'i neda' ta'bía no neda'.

<sup>2</sup> Yugu' dza nupa biti' ta'lé'e neda' dxí'a tuá' dö' quia'.

Zián nupa ta'díl-lalen neda' lu yöl-la' run ba zxön cuínguequi.

<sup>3</sup> Cate' radxi ridzóbida', uzxöni ládex'a'a Xanru'.

<sup>4</sup> Ruzxöni ládex'a-a-në' Dios, en rigu'a yöl-la' ba xtídzë'ë.

Ruzxöni ládex'a-a-në', en biti' bi gádxida'.

¿Bizxi caz gaca ilún quia' bönachi?

<sup>5</sup> Yugu' dza tun nigui neda' nupa biti' ta'lé'e neda' dxí'a.

Ta'zá' ládxí'tica'sö nacxi iluá' dö' quia'.

<sup>6</sup> Tu'dubé' ga nagáchi'sö, en tu'yúlanë' yúgu'të le runa',  
para gata' quégaquié' lataj ilútië' neda'.

<sup>7</sup> Bubi'ë quégaquié', Dios, ca naca dö' tu'ë,  
en lu yöl-la' rilé quiu' busuniti légaquié'.

<sup>8</sup> Nöz quézinu' Li' ca rö'a böniga.

Nurixu' Li' nisa ribödxi quia'.

¿Naru' cabí nuzú' léguequi lu guichi quiu'?

<sup>9</sup> Cate' ulidza' Li', la' dza ná'asö ulu'huécja gúz cídzu'lö nupa tu'dí'i neda'.

Nöz quézida' rácalen cazu' neda', Dios.

<sup>10</sup> Ruzxöni ládex'a-a-në' Dios, en rigu'a yöl-la' ba xtídzë'ë.

Ruzxöni ládex'a-a-në' Xanru', en rigu'a yöl-la' ba xtídzë'ë.

<sup>11</sup> Ruzxöni ládex'a-a-në', en biti' bi gádxida'.

¿Bizxi caz gaca ilún bönachi quia'?

<sup>12</sup> ¡Gunna' quiu', Dios yugu' le guzxí' lu na'a!

¡Cu'a Li' yöl-la' ba!

<sup>13</sup> Busölö' neda' lu yöl-la' guti, en nuzú' neda' tsutsu.

Ridá caza' lo' Li', Xantu' Dios, lu bení' ru'u quégaca nupa nabángaca.

## 57

<sup>1</sup> ¡Buéchi' ladxi' neda', Dios!

¡Buéchi' ladxi' neda' tu' ruzxöni ládxa'a Li' gun chi'u neda'!

Guxóa no'o neda' ca runba' böra run chi'igacaba' bórado' zxan xílabá',  
ga idxinrö tödi bönadxi raca quia'.

<sup>2</sup> Rulidza'-në' Dios nayépisétérë'.

Náquië' Dios Nu run ga raca dxi'a quia'.

<sup>3</sup> Ga zoa cazé' yehua' yubá ubi'ë didza', en usölé' neda'.

Usölé' neda' lu na' nu ribía no neda'.

Lu yöl-la' dxi'i ladxi' queë', en yöl-la' idú ladxi' queë' gácalenë' neda'.

<sup>4</sup> Naca quia' tsca zoa' lágjacacaba' bëdxí guixí'.

Yugu' bönni' zidzaj nagú'ugaquië' neda' lé'ajlö.

Nácagaca láyi'gaquië' ca yugu' yaga tuchi' que gudil-la,  
ate' nácagaca lúdxi'gaquië' ca yugu' guíë tuchi'.

<sup>5</sup> Dios quia', bulu'i lahui lúzxiba yöl-la' zxön quiu',  
en yödzölió ni bulu'i lahui yöl-la' bení' quiu'.

<sup>6</sup> Nupa tu'dí'i neda' nucáchi'gaca du yalaj le sön neda'.

Rudú ládxa'a tu' rö'a böniña.

Gula'chó'önë' yero ga tsöjbixa' neda',  
pero gula'bixë' la' légacasë' lu yero na'.

<sup>7</sup> ¡Chinabá'a quia', Dios!

¡Chinabá'a quia'!

¡Gul-la' quiu', en cu'a Li' yöl-la' ba!

<sup>8</sup> ¡Bubán, bö' naca caza'!

¡Guli'bán arpa, en bihuél-la!

¡Zílado' ubana',

<sup>9</sup> en gul-la' quiu' Li', Xan, ladaj böñachi yugu' yödzö!

¡Cu'a Li' yöl-la' ba lógaca yúgu'të böñachi!

<sup>10</sup> Zxöntérö naca yöl-la' ruhuéchi' ladxi' quiu', le ridxitë yehua' yubá,  
ate' ridxitë yöl-la' idú ladxi' quiu' lúzxiba xitsá'.

<sup>11</sup> Dios quia', bulu'i lahui lúzxiba yöl-la' zxön quiu',  
en yödzölió ni bulu'i lahui yöl-la' bení' quiu'.

## 58

<sup>1</sup> ¿Naru' ruíili' didza' idútë li, libíili' na', rinná bë'ëli'?

¿Naru' ruchi'a rusöröli' ca naca le naca tsahui'?

<sup>2</sup> ¡Biti' ca'! Rizá' ládxi'lí' yugu' le xihui',

en rusaca' zí'ili' böñachi len yugu' le cabí nácatë runli'.

<sup>3</sup> Ta'dödi tsölä'alö nupa tuá' dö' ga gudéla'të gúljagaca.

Ta'zí' yë' ga gudéla'të bulu'cuá'anu xiná'aguequi léguequi.

<sup>4</sup> Yu'u ruíiguequi le naché' yöl-la' guti ca le dxía láyi'gacaba' bëla sínia'.

Nácagaca ca tuba' bëla sínia' nacöödzuba',

<sup>5</sup> bëla na' biti' riyonba' chi'ë bönni' gudzá',  
o le rul-lé' bönni' runë' gudzá'.

<sup>6</sup> ¡Dios quia'! ¡Buzzuzxaj láyi'gaquië'!

¡Guladzu' yugu' layi' tuchi' quégacuie'  
nácagaca ca layi' tuchi' quégacaba' bëdxi guixi'!  
<sup>7</sup> ¡Ben ga ila'nitië' ca raca que nisa yegu gubó'o cate' ruhu'i!  
 ¡Ben ga ila'cuádië' ca raca que guixi' rö'ö la' nöza!  
<sup>8</sup> ¡Ben ga ila'nitië' ca yugu' bôruhuinna tu'únaba' lu gubidza,  
o ca tubi' bñ'ido' nuzóanu-bi' nigula zí'alö ca ral-la' gáljabi', en chinátitébi'!  
<sup>9</sup> Zí'alö ca gaca utsë'e yusu' tu gui' zxön,  
ugüë' Dios légaquie' lu yöl-la' ridzá'a queë',  
bönni' nabángacuie', en bönni' chizóa ilátië'.  
<sup>10</sup> Ulu'dzeja nupa nácagaca tsahui' cate' ila'lé'e  
uzí' lëbë' Dios bönni' tu'ë dö' na'.  
Ulu'zzinë' len ná'agaquie' xichöngaca nupa na' tuá' dö'.  
<sup>11</sup> Ila'nná bönachi: "Le nácatë zoa le rubi'ë Dios quégacuie' nupa nácagaca tsahui'.  
Le nácatë zoë' Dios Nu ruchi'a rusörö quégacuie' nupa nacuá' yödzölió."

## 59

<sup>1</sup> Busölá neda', Dios, lu ná'agaca nupa ta'zóa regu' neda'.  
Buzúa neda' tsutsu ga biti' gaca ila'dxín nupa ta'díl-lalen neda'.  
<sup>2</sup> Busölá neda' lu ná'agaca nupa tuá' dö',  
en guléaj neda' lu ná'agaca nupa tuti bönachi.  
<sup>3</sup> Buyútsöca', ta'bó' nisië' neda' para ilútië' neda'.  
Ta'zóa régu'ë bönni' zidzaj neda',  
caléga tu' gudá'baga' légaquie', o tu' ben zi'a légaquie', Xan,  
<sup>4</sup> en caléga tu' bétia' bönachi, pero ta'zé'ë carelö para tél-lalenë' neda'.  
Gudá gácalenu' neda', ate' ilé'enu' naca caní.  
<sup>5</sup> Xantu' Dios quégacuie' ni'a no'o guizxi yu,  
en Dios quégacuie' bönachi Israel,  
gudá dujenu' xiguiá' bönachi yúgu'të yödzö.  
Biti' uzá' ládxu'u quégacuie' nupa tuá' dö' lu yöl-la' rizi' yë' quéguequi.

<sup>6</sup> Tu'dxinë' chi'i dzö'ölö, ta'bödxi yeché'ë ca runba' bö'cu' ragu yéchi'ba' beo',  
ate' ta'dödë' idú gásibi'ilö yödzö.

<sup>7</sup> Buyútsöca', didza' tu'ë nácagaca ca le rëbigaquie'.  
Nácagaca didza' tu'ë ca yugu' guíë tuchi'.

Ta'nné': "¿Nuzxi caz yoni?"

<sup>8</sup> Ruzxidxu' ca naca le tunë', Xan.  
Rutitju' ca naca le tun bönachi yúgu'të yödzö.

<sup>9</sup> Tu' nal-la cazu' Li' guna' löza Li'.  
Nacu' Dios Nu run chi'i neda'.

<sup>10</sup> Tu' náquië' Dios quia' dxi'i ladxi', dutságuië' neda'.  
Uxicja cazë' Dios nupa ta'díl-lalen neda'.

<sup>11</sup> Biti' gútiu' nupa na' tuá' dö' para cabí ilal-la ladxi' bönachi ladza'.  
Lu yöl-la' huáca zxön quiu' bésilasi nupa tuá' dö', en buzötaj léguequi luyú.

Naca cazu' Xantu', Nu run chi'i netu'.

<sup>12</sup> Ben ga sön légaquie' yöl-la' run ba zxön cuíngacuie'  
tu' nözi dul-la' tunë' ca tu'isë' didza',  
enca' tu' tu'dxië' dö' luzá'agaquie', en ta'zi' yë'ë.

<sup>13</sup> Lu yöl-la' rilé quiu' busuniti légaquie'.

Busuniti légaquié' tsaz para cabí ila'cuá'aré',  
en para iléquibe'e bönachi Dios caz rinná bé'ené' zxí'ini xi'sóë' Jacob,  
ga ridxitë idútë yödzölió.

<sup>14</sup> Tu'dxiné' chi'i dzó'ölö, ta'bödxi yeché'ë ca runba' bö'cu' ragu yéchi'ba' beo',  
ate' ta'dödë' idú gásibi'ilö yödzö.

<sup>15</sup> Ta'dé' ta'guiljé' le ilahuë',  
ate' ta'bödxi'ë channö cabí ulu'huölaj ulu'dzé'ené'.

<sup>16</sup> Gul-la' neda' ca naca yöl-la' huáca zxön quiu'.  
Yugu' zila gul-la' lu yöl-la' rudzeja quia' ca naca yöl-la' dxi'i ladxi' quiu',  
tu' naca cazu' Li' Nu run chi'i neda',  
en nacu' Nu rácalen neda' cate' bi raca quia'.

<sup>17</sup> ¡Naca cazu' Li' Nu rutipa ládxa'a!  
¡Gul-la' quiu' yöl-la' ba,  
tu' nacu' Li' Nu run chi'i neda', Dios, en Nu nadxi'i neda'!

## 60

<sup>1</sup> Nusán no'o netu', Dios, en nuzötju' netu'.

Buécja queétu' na'a, en gúcalen netu'.

<sup>2</sup> Ben cazu' ga gudödi budó' zxu', en guyalaj luyú.

Bun luyú ni tu' chizóa iguínna.

<sup>3</sup> Sizxöni busaca' zi'u bönachi quiu'.

Le guca queétu' guca tsca bugui'ju' netu' xis uva nal-la  
le ben ga yójchégü'tu' ca tu bönni' nazúdxiné'.

<sup>4</sup> Bunödzju' quégaca nupa tadxi Li' tu lari' ulu'chisa,  
le söjácalen cate' bi raca quéguequi,

<sup>5</sup> para ulu'lágaca nupa ná' nadxi'i quézinu'.

Len yöl-la' huáca zxön quiu' busölá netu', en bubí'i didza' cate' rulidztu' Li'.

<sup>6</sup> Lu le naca lá'ayi queé' bë'ë didza' Dios, gunné':

"Uzi'a xibé, en quísia' xiyúgaca bönachi Siquem, en urixa' luyú dë cuita yegu Sucot.

<sup>7</sup> Nequi quia' xiyúgaca bönachi Galaad, enca' xiyúgaca zxí'ini xi'sóë' Manasés.

Naca ca tu le rusubín icja' xiyúgaca zxí'ini xi'sóë' Efraín.

Xiyúgaca zxí'ini xi'sóë' Judá naca ga rinná bë'a.

<sup>8</sup> Xiyúgaca bönachi Moab naca ca tu ga riguibi na'a,

ate' cu'a löla' uléaja' xiyúgaca bönachi Edom.

Códxia' tu' uxicia' bönachi Filistea."

<sup>9</sup> ¿Nuzxi caz gaca iché' neda' lu yödzö zoa zö'ö idú gásibi'ilö le run chi'i yödzö na'?

¿Nuzxi caz iché' neda' lu xiyúgaca bönachi Edom?

<sup>10</sup> ¿Naru' cabí nusán ládxu'u netu', Dios?

¿Naru' cabí tséajlenu' bönni' queétu' röjáquié' gudil-la?

<sup>11</sup> Gúcalen netu' cate' tíl-lalentu' nupa ridíl-lalen netu',  
tu' cabí gaca gácalen netu' nu naca böñachisö.

<sup>12</sup> Len yöl-la' huáca queé' Dios idéli'ru'  
tu' uxicia' cazé' Lë' nupa ta'dfl-lalen netu'.

## 61

<sup>1</sup> Ruzé nagu' le rulidza' Li', Dios.

Rui'i ládxu'u le rinábida' Li'.

<sup>2</sup> Ga ni zoa' zi'tu' ga dë ladza' rulidza' Li' tu' rudú ládex'a'a.

Guché' neda' ga zoa Nu na' naca ca tu guiójto'o, Nu na' nál-latérö ca neda'.

<sup>3</sup> Nacu' Li' Nu run chi'i neda'.

Nacu' Nu rácalen neda' cate' zoa nu ribía no neda'.

<sup>4</sup> Bë' lataj sóatica'sa' ga zoa cazu' Li'.

Bë' lataj sóalena' Li', guna' neda' ca tunba' bórado' ta'yázaba' zxan xílaba' yøjede.

<sup>5</sup> Biyón quézinu' Li' le guzxí' lu na'a guna' quiu' Li', Dios.

Benu' ga nequi quia' le runöödzju' quégaca nupa tadtzi Li'.

<sup>6</sup> Gunu' ga soë' xidzé bönni' na' rinná bë'ë uláz quiu'.

Zián iz soë' ibanë'.

<sup>7</sup> Sóatica'se' lo' Li', Dios.

Bë' queë' yöl-la' dxi'i ladxi', en le naca idútë li, yugu' le ilún chi'i lë'.

<sup>8</sup> ¡Gúl-latica'sa' yöl-la' ba que Lo',

para gaca guna' tu tu dza le guzxí' lu na'a!

## 62

<sup>1</sup> ¡Tuzé' Dios ruzxöni ládex'a'a, en rizé ládex'a'a Lë'!

¡Lë cazé' rusölé' neda'!

<sup>2</sup> ¡Tuzé' Lë' rapa chi'ë neda', en rusölé' neda'!

¡Ruzóë' neda' tsutsu, ate' biti' gaca nu uzötaj neda'!

<sup>3</sup> ¿Gáca' xte caz gü'i ládxil'i' ucúl-lali' neda'?

Ré'ënisili' uzótjali' neda' ca tu zö'ö chizóa iguínnaj,  
o ca tu lë'aj yaga le chinatébi.

<sup>4</sup> Ré'ënisili' uzótjali' neda' ga ni tunë' neda' bal.

Ruzi'il'i' xibé yugu' didza' biti' nácatë.

Rui'il'i' dxi'a didza' láhui'sö,  
pero lu icja ládxil'i' do'oli' ruididza' yúdxili' neda'.

<sup>5</sup> ¡Tuzé' Dios ruzxöni ládex'a'a,

en runa' löza Lë'!

<sup>6</sup> ¡Tuzé' Lë' rapa chi'ë neda', en rusölé' neda'!

¡Ruzóë' neda' tsutsu, ate' biti' gaca nu uzötaj neda'!

<sup>7</sup> ¡Tuzé' Dios rusölé' neda', en runë' ga naca' bica' ba!

¡Dios nuzóë' neda' tsutsu, en rapa chi'ë neda'!

<sup>8</sup> Lib'iili', böñachi, buli'zxöni ládxë'ë Dios yúgu'të dza.

Buli'siyönnë' yugu' le raca queéli', tu' run chi'i cazé' rë'u.

<sup>9</sup> Le nácatë náca gaca yúgutë böñachi ca tu bö' ridódisö,  
en biti' bi nazáca' gaca nupa na' nadéli' gaca lataj lo.

Tu lu zxigóns biti' bi nál-lí'guequinë'.

Nácagacarë' dzá'asö ca tu bö' riguélä'siru'.

<sup>10</sup> Biti' uxöni ládxil'i' bi idéli'li' len yöl-la' nál-la queézili'.

Biti' uzi'il'i' xibé le cuanli'.

Channö gata' queéli' yöl-la' tsahui', biti' gü'i ládxil'i' le.

<sup>11</sup> Tu luzuísö bë'ë didza' Dios.

Chopa luzuí biyönda' ca naca lë ni rnna:

"Nápatérë' Dios yöl-la' huáca,

<sup>12</sup> ate' zóatica'sö yöl-la' dxi'i ladxi' queë'."

Ubi'i cazu', Xan, quégaca böñachi tsca naca le núngaca.

## 63

- <sup>1</sup> Dios, nacu' Dios quia', ate' idú ládxa'a ruguilja' Li'.  
 Ribidxi ládxa'a Li', ate' idútē le naca' rizé ladxi' Li'.  
 Zoa' tu luyú bidxi ga ni rudú ládxa'a, ate' biti' bi dë nisa.  
<sup>2</sup> Ben ga ilé'eda' Li' lu lataj ga na' zoa cazu',  
 para ilé'eda' yöl-la' huáca quiu', en yöl-la' bení' quiu'.  
<sup>3</sup> Tu' nácatérö dxi'a yöl-la' dxi'i ladxi' quiu' ca yöl-la' na'bán caz.  
 Que lë ni na' cu'a Li' yöl-la' ba.  
<sup>4</sup> Guía' Li': "Xclenu'" tsanni ni zoa' nabana'.  
 Uchisa' na'a, en ulidza' Lo'.  
<sup>5</sup> Ruhuölaj rudzé'e icja ládxi'da'ahua' le nácatérö dxi'a,  
 ate' lu yöl-la' rudzeja quia' rigu'a Li' yöl-la' ba.  
<sup>6</sup> Röjneda' Li' cate' déa' lu le ráti'da'.  
<sup>7</sup> Rizá' ládxa'a ca nacu' cate' rina'sa' yëla.  
 Rácalen cazu' neda',  
 en tu' run chi'u neda', lu yöl-la' rudzeja quia' rul-la' quiu'.  
<sup>8</sup> Nazón cazu' Li' bö' naca caza'.  
 Rizón cazu' Li' neda',  
<sup>9</sup> pero ila'yaza lataj chul-la  
 nupa té'ëni iluti neda'.  
<sup>10</sup> Ilátigaca lu guíë tuchi'.  
 Ilágugaca bö'cu' zuga' léguequi.  
<sup>11</sup> Nu rinná bë' uláz queë' Xanru' udzeja ladxi' lahuë' Dios.  
 Ulu'zi' xibé yúgu'të nupa tu'zxöni ladxi' Lë',  
 tu' usayaj cazë' Lë' ruí'igaca nupa ta'zí' yë'.

## 64

- <sup>1</sup> Dios, buzé nagu' chi'a le rinabi yúdxida' Li',  
 para gun chi'u yöl-la' na'bán quia' tu' rádxida' bi gun nu ridíl-lalen neda'.  
<sup>2</sup> Bucachi' neda' para cabí bi ilún quia' bagáchi'sö nupa tuá' dö',  
 en para cabí ila'bía di'ë neda' bönni' tutie' böñachi.  
<sup>3</sup> Nácagaca lúdxi'gaquië' ca yugu' guíë tuchi',  
 ate' nácagaca didza' zi' tu'ë ca yugu' yaga lahui tuchi'.  
<sup>4</sup> Bagáchi'sö tu'zé yugu' yaga lahui tuchi' na'  
 para ilunë' huë' nupa biti' bi nabága'gaca.  
 Tsálido'os tu'zé léguequi, en biti' bi tádxinë'.  
<sup>5</sup> Biti' ca' tu'cá'anë' le naca dö' té'ënë' ilunë'.  
 Tu'ë didza' ca gaca ulu'cachë'ë yugu' du yalaj quégaquië', ta'nné':  
 "¿Nuzxi caz gaca ilé'e yugu' du na'?"  
<sup>6</sup> Tunë' didza' ca naca le naca dö' ilunë', ta'nné': "Chinabá'a le gunru'."  
 Tu'cáchí'gaquië' le ta'za' ládxë'ë, en le ta'bequi icjé'.  
<sup>7</sup> Uzal-lë' Dios tu yaga lahui tuchi' le ideli' légaquië'.  
 Tsálido'os gunë' légaquië' huë'.  
<sup>8</sup> La' didza' tu'isë' ilún ga tseajchégu'gaquië'.  
 Lu yöl-la' rubani quéguequi ulu'tá ícjaguequi nupa ila'lé'e légaquië'.  
<sup>9</sup> Ní'irö yúgu'të böñachi iladxi Dios,  
 en ulu'siyón luzé'eguequi ca naca le nunë' Dios,  
 en ila'zá' ládxi'gaca ca naca lë na' nunë'.  
<sup>10</sup> Nu bönni' tsahui' uzi'ë xibé' Xanru', en gunë' löza Lë'.

Yúgu'të nupa nácagaca idú ladxi' ulu'zí' xibé'.

## 65

- <sup>1</sup> Dios, nupa nacuá' yödzö Sión ila'gú'u Li' yöl-la' ba,  
en ilunna quiu' le gula'zí' lu né'eguequi,  
<sup>2</sup> tu' riyón quénzini' Li' cate' tu'lidza Li',  
ate' yúgu'të bönachi ila'dxín lo'.  
<sup>3</sup> Tun nigui neda' dul-la' nuna',  
pero runiti lo cazu' netu' ca naca le ridá'baga'tu' Li'.  
<sup>4</sup> Bica' ba nupa nabó cazu' quiu', en nulidzu' quiu',  
para ila'cuá' yugu' lataj lá'ayi quiu'.  
Huölaj udzé'etu' le nácagaca dxí'a yú'ugaca lidxu',  
enca' le yú'ugaca yudo' lá'ayi quiu'.  
<sup>5</sup> Tu' nacu' tsahui' rubí'u didza', en runu' yugu' le zxön le tácalen netu'.  
Naca cazu' Dios Nu rusólá netu'.  
Nupa nacuá' idútë yödzölió ulu'zxöni ladxi' Li',  
enca' nupa nacuá' zi'tu' ia'tsólá'alö nísado'.  
<sup>6</sup> Len yöl-la' huáca quiu' nucú'u yugu' guí'a zxön,  
le naca bë'gaca nál-latérö cazu' Li'.  
<sup>7</sup> Ruzúa dxí'u' le riyasa ridxía lu nísado', en le ru'u bö que.  
Ruzúa dxí'u' bönachi cate' tu'tsatsa.  
<sup>8</sup> Bönachi idútë yödzölió tadxi Li' ni'a quégaca le zxön nunu'.  
Le run cazu' Li' tun ga tu'dzeja bönachi idapa la'a yödzölió.  
<sup>9</sup> Ru'i ládxu'u luyú, en risól-lu'u nisa guiój.  
Runu' ga ruhuöáca yu ya'a.  
Nucú'u luyú na' yugu' yegu yúdzugaca nisa zila,  
le run ga dética'sö zxoa'-za, tu' caní raza ládxu'u Li'.  
<sup>10</sup> Risól-lu'u nisa guiój gapa dëgaca na, en rusubisu' gapa chinadúz.  
Ruúnu' yúludo' luyú zidzaj, en runu' ga ta'gula guixi' cuando'.  
<sup>11</sup> Runu' ga rulá' yödx yana' le nadúz luyú ni tu iz tu iz,  
en ga zóatica'sö le ilë'aj ilágugaca bönachi.  
<sup>12</sup> Nacuá'aba' böa'-bëdxi la' guixi',  
ate' tu'dzeja bönachi yugu' lu guí'ado'.  
<sup>13</sup> Gapa naca lachi' nacuá'aba' bö' cu' zxila',  
ate' dxíada' zxoa' xtila la' yëla.  
Lu yöl-la' rudzeja quéguequi ta'bódxi'a,  
en tul-la bönachi quiu' .

## 66

- <sup>1</sup> ¡Guli'gü' zidzaj didza' lahuë' Dios  
lu yöl-la' rudzeja queéli' yúgu'teli' zóali' yödzölió!  
<sup>2</sup> ¡Guli'gul-la ca naca yöl-la' ba que Lë'!  
¡Guli'cu'ë yöl-la' ba!  
<sup>3</sup> Guli'guíë' Dios: "¡Zxöntérö nácagaca le nunu'  
tu' naca zxöntérö yöl-la' huáca quiu'!"  
Nupa bití' ta'lé'e Li' dxí'a ulu'luí'i cuini  
ca nupa tun ca rnna xtídzu'u.  
<sup>4</sup> Yúgu'të nupa nacuá' yödzölió ilún Li' zxön,  
en ilúl-la yöl-la' ba quiu'.  
Ilúl-la yöl-la' ba que Lo'.

<sup>5</sup> Guli'dá ilé'eli' yugu' le nunë' Dios.  
 Nayépisétérë' Dios lu le runë' quégaca bönachi.  
<sup>6</sup> Benë' ga böáca ca luyú bidxi ga dë nísado'.  
 Gula'dödë' gatsaj láhui'lö yegu, ta'zé'esö ní'agaquië'.  
 Ni' udzéjade'eru' ca náquië' Lë'.  
<sup>7</sup> Len yöl-la' unná bë' queë' rinná bë'tica'së'.  
 Ruyútica'së' bönachi yúgu'të yödzö.  
 Biti' ral-la' ilún ba zxön cuínguequi nupa ta'dá'baga' xtídzë'ë.

<sup>8</sup> ¡Guli'gún zxönë' Dios queétu', libí'ili' bönachi yúgu'të yödzö,  
 en guli'cu'ë yöl-la' ba gáti'tës!  
<sup>9</sup> ¡Run cazé' Lë' ga zóaru' nabanru',  
 en biti' ru'ë lataj cuila ní'atu'!

<sup>10</sup> Guzxí' bë' cazu' netu', Dios.  
 Buchí'u netu' ca run nu ruchi'a guíë plata lu guí'.  
<sup>11</sup> Bë'u lataj bidzuntu' lu du yalaj.  
 Busubágú'u netu' tu yua' zi'i.  
<sup>12</sup> Benu' ga gula'libë' icjtu' bönni' dxíagaquië'-ba' böa'.  
 Gudöditu' lu guí', en lu nisa,  
 pero guché' cazu' netu' tu lataj ga bölaj budzé'etu'.  
<sup>13</sup> Tsu'a lidxu', en cu'a-ba' lo' böa'do' uzégu'a-ba' lo'.  
 Guna' lo' Li' le guzxí' lu na'a guna',  
<sup>14</sup> lë na' bë'a didza' que,  
 le gunní'a cate' ni' rigui'i rizáca'a.  
<sup>15</sup> Cu'a-ba' lo' Li' böa'-bëdxi renni' uzégu'a-ba' lo',  
 tsözxón len dzön quégacaba' chivo biguiú'.  
 Gútia'-ba' lo' yugu' bëdxi, en yugu' chivo biguiú'.

<sup>16</sup> Guli'dá uzé nágali', yúgu'tëli' rádxili'-në' Dios,  
 ate' usiyönda' libí'ili' yugu' le benë' le gulácalen neda'.  
<sup>17</sup> Len ruá' cuinsa' bulidza' Lë',  
 en bena' Lë' zxön len lúdxa'a.  
<sup>18</sup> Channö rucách'a le naca dö' lu ládxi'da'ahua',  
 biti' yönne' Xanru' Dios didza' gu'a,  
<sup>19</sup> pero le nácatë biyönnë' Dios didza' bë'a.  
 Buzé naguë' cate' bulidza' Lë'.

<sup>20</sup> ¡Yöl-la' ba Dios!  
 ¡Biti' gudá'baguë'ë neda' cate' bulidza'-në',  
 en biti' bugüë' yöl-la' nadxi'i queë' neda'!

<sup>1</sup> Xantu' Dios, buzá' ladxi' queétu', en ben ga gaca dxi'a queétu'.  
 Lu yöl-la' dxi'i ladxi' quiu' buyú netu',  
<sup>2</sup> para gaca bë' le ré'ënu' guntu' yödzölió ni,  
 en para ila'nözi bönachi yúgu'të yödzö ca naca yöl-la' rusólá quiu'.  
<sup>3</sup> Ral-la' ila'gú'u bönachi Li' yöl-la' ba, Dios.  
 Yúgu'të bönachi ral-la' ila'gú'u Li' yöl-la' ba.  
<sup>4</sup> Ral-la' ulu'dzeja bönachi yúgu'të yödzö,  
 en ilúl-la lu yöl-la' rudzeja quéguequi.

Tu' uchi'a usöróu' bönachi ca naca le naca tsahui',  
 5 ral-la' ila'gú'u Li' yöl-la' ba bönachi, Dios.  
 Yúgu'të bönachi ral-la' ila'gú'u Li' yöl-la' ba.

6 Yödxi yana' runödzaj luyú ni.  
 Dios queéru' runë' ga raca dxi'a queéru'.  
 7 Runë' Dios ga raca dxi'a queéru',  
 para iladxi Lë' yúgu'të nupa nacuá' yödzölió.

## 68

1 Raca ládxi'ru' chasë' Dios, en usulásië' nupa ta'díl-lalen Lë',  
 en gunë' ga ulu'zxunnaj nupa biti' ta'lé'e Lë' dxi'a.  
 2 Ca rulaga tu bö' recja dzön, ca' bulaga léguequi.

Ca na' ruúna' lu guí' quízxi'ba' buz,  
 ca' ila'niti nupa tuá' dö' lahuë' Dios.  
 3 Ulu'dzeja nupa nácagaca tsahui', en ulu'zí' xibé' Dios.  
 Lu yöl-la' rudzeja quéguequi ulu'zí' xibé'.

4 ¡Guli'gul-la queé' Dios!  
 ¡Guli'gul-la yöl-la' ba que Lë'!  
 Buli'pá'a nøza ga tödë' gapa dë lataj.  
 ¡Nazí'i lë' Xanru'!  
 ¡Buli'dzeja lahuë' Lë'!

5 Náquië' ca xúzgacabi' bi'i uzébido',  
 enca' Nu ruchi'a rusöró quégacanu nigula uzëbi.  
 Caní náquië' Dios ga na' zoë' lataj lá'ayi queé'.  
 6 Rucu'ë Dios nupa nagá'anagaca bayechi' tu yu'u.  
 Rubéajë' nupa nadzúngaca, en runë' ga raca dxi'a quéguequi,  
 pero ulu'gá'ana tu luyú bidxi nupa ta'dá'baga' Lë'.

7 Yöjnöru cazu' lógaca bönachi quiu', Dios,  
 cate' guchë'u léguequi la' guixi' ga na' dë lataj.  
 8 Gudödi budó' zxu' dza ni'.  
 Lésca' gula guiójsiu' lahuë' Dios.  
 Guzxizi guí'a Sinaí lahuë' Dios quégaca bönachi Israel.  
 9 Benu' ga gulaj guiójsiu', Dios.  
 Benu' ga böáca ya'a xiyú' ga ni' guca yu bidxi.  
 10 Yöjcuá' nupa néquiguequi quiu' luyú na'.  
 Lu yöl-la' dxi'i ladxi' quiu', Dios,  
 bucözu' le gácalen nupa nácagaca yechi' luyú na'.

11 Bé' cazë' didza' Xanru' Dios.  
 Ta'guísinu nigula zián didza' dxi'a queé', ta'nnanu:  
 12 "¡Ta'zxúnnajë'! ¡Ta'zxúnnajë' bönni' ta'nná bë'ë,  
 enca' bönni' rójáquië' gudil-la guizxi yu quégaquië!"  
 Nigula gula'bózanu lídxigacanu bulu'zí' inu xibé le gutá' quégaquië'.  
 13 Sal-la' bucachi' loli' gapa tun chí'ili' bö'cu' zxila',  
 gáculi' le naca lachi ca nácagacaba' gu'dödo' néquiguequiniba' guíë plata,  
 en xitúbigacaba' néquiguequinibni' guíë oro.  
 14 Cate' bësilásië' Dios bönni' na' gula'nná bë'ë lu guí'a Salmón,

benë' ga gula guiój bögui' lu guí'a na'.

<sup>15</sup> Nequi queë' Dios guí'a Basán.

Naca guí'a Basán ná' tu guí'a zxön.

<sup>16</sup> ¿Bizz que ruzxé'eli', yugu' guí'a zxön?

¿Bizz que ruzxé'eli' guí'a na' guzé ládxé'ë Dios tsöjsóë' ga na'?

Le nácatë tsaz soë' Dios ni'.

<sup>17</sup> Gayuá', en gayuá' nácagaca carreta que gudil-la queë' Dios.

Rizé'ë Xanru' lu guí'a Sinaí ga na' tseajtsazié' lataj lá'ayi queë'.

<sup>18</sup> Buëpu' yehua' yubá richë'u bönachi zián gula'dzúngaca.

Nu'u yugu' le bulu'nödzaj bönachi quiu',

en le gulunna quiu' nupa ta'dá'baga' Li',

para tsöjsóë' Dios ni' tsaz.

<sup>19</sup> ¡Yöl-la' ba Dios, Nu ruá' sua'ru' tu dza tu dza!

¡Náquië' Dios Nu rusólá rë'u!

<sup>20</sup> ¡Dios queëru' rusölé' rë'u!

¡Rusölé' Xanru' Dios rë'u lu yöl-la' guti!

<sup>21</sup> Le nácatë Dios udxíë' huë' ícjagaca nupa ta'dá'baga' Lë'.

Udxíë' huë' icje' bönni' biti' gusanë' ca naca dö' ru'ë.

<sup>22</sup> Ru'ë didza' Xanru', rnnë': "Ubéaja' léguequi lu guí'a Basán,  
en ubéaja' léguequi lu nísado',

<sup>23</sup> ate' ulíbili' léguequi ga idxintë irúaj rön quéguequi,

ate' ilé'ajba' zxículi' xichóngaca nupa ta'dil-lalen libfili'."

<sup>24</sup> Ta'lé'e yúgu'të bönachi nupa ta'dalen Li', Dios.

Lu yöl-la' run Li' zxön ta'dá lu lataj lá'ayi quiu', Dios quia', Nu rinná be'e neda'.

<sup>25</sup> Nupa tul-la, en nupa ta'guínnaj lé'egaca bihuël-la, ta'dá ni',

ate' bi'i nigula ra'bando' tunbi' léguequi tsözxón, ta'gápabi' lé'egaca guídido'.

<sup>26</sup> Buli'lidzë' Dios dxi'a tsáhui'do' gapa na' rudúbili' queë',

tu' náquië' Xanru', libfili' zxífini xi'sóë' Israel.

<sup>27</sup> Nacu'ë zxífini xi'sóë' Benjamín ga na', bönni' gúcarë' cuidi', ate' ta'nná bë'ë.

Bönni' lo quégaequië' zxífini xi'sóë' Judá nútsa'gaquië' ládjagaquië',

enca' ládjagaquië' bönni' lo quégaequië' zxífini xi'sóë' Zabulón, en Neftalí.

<sup>28</sup> Bulu'i lahui yöl-la' huáca quiu', Dios.

Bulu'i lahui yöl-la' huáca quiu', Dios, tu' chibenu' zián le gulácalen netu'.

<sup>29</sup> Tu' dë yudo' quiu' lu yödzö Jerusalén,

bönni' ta'nná bë'ë ila'chë'ë ni' le ilunnë' quiu'.

<sup>30</sup> Buzé le bach bönachi yödzö na' nácagaca ca böa' guixi',

enca' bönachi yugu' yödzö nácagaca ca yugu' bëdxi tsözxón len zxífiniguequi.

Tu'libi bönachi yechi' tu' ta'zé ládxí'gaca dumí.

Bësilási nupa na' ta'yaza ladxi' rójaca gudil-la.

<sup>31</sup> Bönni' gubáz quégaca bönachi Egipto ila'dxiné' lo'.

Bönni' Etiopía ila'chisa ná'agaquië' lo', Dios.

<sup>32</sup> ¡Guli'gul-la queë' Dios, bönachi yúgu'të yödzö!

¡Guli'gul-la yöl-la' ba queë' Xanru'!  
<sup>33</sup> Rö'ë yehua' yubá xitsá'térö, le zoa caz dza ni'te.  
 Buli'yútsöca', ru'ë zidzaj didza', en naca chi'ë ca guziú' rinné.  
<sup>34</sup> ¡Guli'gún zxönë' Dios!  
 Yöl-la' nayépisë queë' rusubaga' böñachi Israel.  
 Yöl-la' huáca zxön queë' nalá' lúzxiba xitsá'.  
<sup>35</sup> Rubániru' ca nacu' Li', Dios, lu lataj lá'ayi quiu'.  
 Runnu' quégaca böñachi quiu' yöl-la' nal-la, en yöl-la' huáca.  
 Náquië' Dios quégaca böñachi Israel.  
 ¡Yöl-la' ba Lë' Xanru' Dios!

## 69

<sup>1</sup> Busölá neda', Xana' Dios,  
 tu' raca quia' tsca nabág'a a nisa ga ridxitë ruchicja' nisa.  
<sup>2</sup> Raca quia' tsca ruhuötja' ga rë' lu guna', en biti' zoa ga gaca uliba'.  
 Zoa' ca tu lu nisa zila, en chizóa uchicja' nisa.  
<sup>3</sup> Rudú ládxa' a tu' rulidza' nu gácalen neda', ate' da' lubá'a.  
 Chirichul-la guiój lahua' tu' ruyúa' ga guídu' dusöló' neda'.  
<sup>4</sup> Nayántérö ca guitsa' icja' nupa biti' ta'lé'e neda' dxi'a,  
 en biti' bi nuna' quéguequi.  
 Nál-lagaca nupa ta'díl-lalen neda', en té'ëni iluti neda',  
 en biti' bi nuna' quéguequi.  
 Tunë' bayúdx ubi'a dumí le cabí gulana'.  
<sup>5</sup> Nöz quézinu' Li', Dios, yöl-la' canöz quia',  
 en biti' nagachi' lo' Li' dul-la' nuna'.  
<sup>6</sup> Biti' gu'u lataj nupa tu'zxöni ladxi' Li' ulu'tu'i ni'a quia' neda',  
 Xana' Dios nayépisëtérö'.  
 Biti' gu'u lataj nupa tun Li' zxön ila'gá'ana cá'asö ni'a quia',  
 Dios quégaca böñachi Israel.  
<sup>7</sup> Tu' nadx'ida' Li' tu'lidza ditjë' neda',  
 en que lë ni na' rutuf'ida'.  
<sup>8</sup> Naca' ca tu bönni' zi'tu' lógacabi' bi'i bócha'a,  
 en ca tu bönni' zi'tu' lógaquie' di'a dza quia'.  
<sup>9</sup> Tu' ru'i ládxa' a yudo' quiu' régui rilá ládxi'da'ahua'.  
 Naca ca tu'lidza ditaj neda' nupa tu'lidza ditaj Li'.  
<sup>10</sup> Ruzötaj cuina', en runa' gubasa,  
 en que lë ni na' tu'didza' yudxi neda'.  
<sup>11</sup> Rácua' lari' cá'asö ca run nu ribödxi yechi',  
 ate' tu'titaj neda'.  
<sup>12</sup> Ta'nné' quia' yugu' la' nöza,  
 ate' nupa nazúdxigaca tul-la ca naca quia',  
<sup>13</sup> pero neda' ulidza' Li', Xan.

Bubi'i didza', Dios, cate' idxín dza raza ládxu'u Li'  
 tu' nadx'ide'enu' neda',  
 en tu' guzxí' lu no'o usöló' neda'.  
<sup>14</sup> Guléaj neda' para cabí huötja' lu le naca ca guna'.  
 Ben ga ulá' lu ná'agaca nupa ta'díl-lalen neda',

en lu le naca ca nisa zila le chizóa ibaga' neda'.

<sup>15</sup> Biti' gu'u lataj ibaga' neda' lë na'.

Biti' gu'u lataj uchicja' lu le naca ca nísado',  
enca' cabí huötja' tu lu yeru ba.

<sup>16</sup> Bubí'i didza', Xan, tu' nacu' dxi'i ladxi',  
en tu' ruhuéchi' ládxu'u neda', gudá quia'.

<sup>17</sup> Biti' ucachi' cuinu' lahua' neda', huen dxin quiu'.

¡Rö'a böninga! ¡Gudáchi gúcalen neda'!

<sup>18</sup> ¡Gudá ga zoa' dusöló' neda'!

¡Ben ga ulá' lu ná'agaca nupa ta'díl-lalen neda'!

<sup>19</sup> Nöz quézinu' Li' ca tu'didza' yudxi neda',  
en ca tu'lídza ditaj neda', en tu'cá'ana neda' cá'asö.

Rilé'e quézinu' yúgu'të nupa biti' ta'lé'e neda' dxi'a.

<sup>20</sup> Rudú ládx'a'a tu' tu'didza' yudxi neda', en biti' bi gaca guna'.

Gulöza' nu huéchi' ladxi' neda', pero cuntu nu guzóa.

Gú'unida' nu huë tsahui' neda', pero cuntu nu bidzöli.

<sup>21</sup> Cate' guduna' bulu'gahue' neda' tu le silá',  
en cate' gubidxa' nisa, bulu'gui'jé' neda' nupe zi.

<sup>22</sup> Ben ga huöáca laní quégäquië' ca tu le sön légaquië',  
en ben ga huöáca le tu'zi'ë xibé ca tu le gun ga ila'chixi ila'níguinë'.

<sup>23</sup> Ben ga ichul-la guiój lógaquië' para cabirö ila'lé'enë'.

Ben ga ila'zéchutica'sö cúdzu'gaquië' zxan yua' nuá'gaquië'.

<sup>24</sup> Busubaga' légaquië' lu yöl-la' rilé quiu',  
en bë' quégäquië' yöl-la' ridzá'a quiu'.

<sup>25</sup> Ben ga cuntu nu soa ládzagaquië',  
en ga bíti'rö nu soa lu yu'u lídxigaquië'.

<sup>26</sup> Ta'zóa régu'ë nupa na' benu' léguequi xiguia'.

Tu'siyönnë' ca ta'gu'i ta'zaca' nupa na' nunu' léguequi huë'.

<sup>27</sup> Buzúaj lu guichi yugu' dul-la' tunë',  
en biti' gu'u légaquië' lataj ila'déli'në' yöl-la' rusölá quiu'.

<sup>28</sup> Busulu lágaquië' nazúajgaca lu guichi quégaca nupa nabángaca.

Biti' gu'u légaquië' lataj ila'bábalenë' nupa nácagaca tsahui'.

<sup>29</sup> Neda' rigui'i rizáca'a, en rudú ládx'a'a.

Guchisa neda', Dios, en busölá neda'.

<sup>30</sup> ¡Cu'a-në' yöl-la' ba Dios len tu le gul-la'!

¡Guna' Lë' zxön, en guía'-në': "Xclenu"!

<sup>31</sup> Chaza ládxë'ë Xanru' Dios lë ni  
ca raza ládxë'ë-ba' böa'-bëdxi rútia'-ba' lahuë',  
o ca raza ládxë'ë-ba' tuba' bëdxi zxön chinagúlaba'.

<sup>32</sup> Nupa ta'gu'i ta'zaca' ila'lé'eni lë ni, en ulu'dzeja.  
Ila'dipa ládx'i'gaca nupa tu'guilaj Dios.

<sup>33</sup> Ruzé naguë' Xanru' Dios nupa ta'yadzaj ta'yudxi,  
en biti' ral-la ládxë'ë böñachi queë' nadzúngaca.

<sup>34</sup> ¡Guli'cu'ë yöl-la' ba Dios, libí'ili' yehua' yubá, en luyú ni,  
enca' nísado', en yúgu'të le nacuá' tu tu lataj na'!

<sup>35</sup> Usölá cazë' Dios böñachi Sión,  
en uchisë' yugu' yödzö quégaca zxí'ini xi'sóë' Judá.  
Ila'cuá' böñachi queë' ga na', ate' guequi quéguequi luyú na'.  
<sup>36</sup> Zxí'ini xi'sóagaquïë' huen xichinë' ila'zí'ibi' luyú na',  
ate' ila'cuá'tica'sö ni' nupa nadxi'igaca Lë'.

## 70

- <sup>1</sup> ¡Busölá neda', Dios!  
¡Gudáchi gácalenu' neda', Xan!  
<sup>2</sup> Ben ga ulu'tu'i, en ila'bö' böñiga nupa na' té'ëni iluti neda'.  
Ben ga ulu'huécja, en ulu'gá'ana cá'asö nupa na' té'ëni gaca bi gaca quia'.  
<sup>3</sup> Ben ga ulu'huécja lu yöl-la' rutu'i quéguequi  
nupa na' tu'titaj neda', ta'nná: "Ja, ja."  
<sup>4</sup> Ben ga ulu'dzeja, en ulu'zí' xibó' yúgu'të nupa tu'guilaj Li'.  
Ben ga ilu'ítica'sö didza' nupa ta'dxi'i yöl-la' rusölá quiu', ila'nná:  
"¡Zxöntérö náquië' Dios!"
- <sup>5</sup> Neda' nacuídi'da', en biti' bi gaca guna'.  
¡Gudáchi gácalenu' neda', Dios!  
Nacu' Nu rácalen neda', en Nu russölá neda'.  
¡Biti' ca' tsenu' guídu' quia', Xan!

## 71

- <sup>1</sup> Nuzóá cazu' neda' dxi'a tsáhui'do' ga na' zu', Xan.  
¡Biti' gu'u lataj utu'ida'!  
<sup>2</sup> ¡Tu' nacu' tsahui' gúcalen neda', en busölá neda'!  
¡Buzé nagu' neda', en busölá neda'!  
<sup>3</sup> Nacu' le uzóá neda' tsutsu,  
en le gun chi'i neda' ga gaca ucachi' cuina'.  
Chigunná bé'enu' nu usölá neda' tu' nacu' Nu ruzóá neda' tsutsu,  
en Nu run chi'i neda'.  
<sup>4</sup> Dios quia', busölá neda' lu na' nu ruá' dö',  
en lu na' nu ridá'baga' Li', en run dzatsa.  
<sup>5</sup> Tuzu' Li' runa' löza, Xan.  
Ruzxöni ládxa'a Li' ga gudéla'të naca' bñido'.  
<sup>6</sup> Ruzxöni ládxa'a Li' ga gudéla'të gulja',  
tu' guzóalen cazu' neda' cate' ni' buzóanu xiná'a neda'.  
¡Cú'utica'sa' Li' yöl-la' ba!  
<sup>7</sup> Zián nupa tu'bani ca naca quia',  
tu' run chi'i cazu' Li' neda'.  
<sup>8</sup> ¡Rigú'utica'sa' Li' yöl-la' ba,  
en tu dza tu dza rulu'a lahui yöl-la' ba quiu'!  
<sup>9</sup> ¡Biti' usán no'o neda' na'a, ni naca' bönni' gula!  
¡Biti' ucá'anu' neda' na'a cate' ni rudú ládxa'a!  
<sup>10</sup> Tu'i didza' nupa biti' ta'lé'e neda' dxi'a ca gaca bi ilún quia',  
ate' tun tuz xtídza'gaca nupa té'ëni iluti neda'.  
<sup>11</sup> Ta'nná: "¡Nusán në'ë Dios lë'!"  
¡Guli'dá sönru'-në' tu' cuntu nu zoa gácalen lë'!"  
<sup>12</sup> ¡Dios, biti' su' zi'tu' ga ni zoa'!  
¡Dios quia', gudáchi gácalenu' neda'!  
<sup>13</sup> Ben ga ulu'tu'i, en ila'niti nupa té'ëni iluti neda'.  
Ben ga ulu'tu'inë', en ila'bö'ë böñiga bönni' té'ënë' ilu'ë dö' quia'.

<sup>14</sup> ¡Neda' gúntica'sa' löza Li',  
en cú'utica'sa' Li' yöl-la' ba!

<sup>15</sup> Idú dza usiyönda' böñachi nacu' tsahui',  
en rusölo' yúgu'té böñachi.  
Biti' nözda' bal-laxi luzuí busöló' neda'.

<sup>16</sup> ¡Gu'a didza' ca nácagaca le zxön benu' Li', Xana' Dios!  
¡Usiyönda' böñachi tuzu' Li' nacu' tsahui'!

<sup>17</sup> Dios, rusédinu' neda' ga gudéla'té ni' naca' bífido',  
ate' ga ridxitnë na'a dza ruá'a didza' ca nácagaca le zxön nunu'.

<sup>18</sup> Na'a naca' bönni' gula, en chinagucha'.  
¡Biti' usán no'o neda', Dios!  
Benna neda' lataj usiyönda' yugu' zxí'ini xsoa' ca naca yöl-la' huáca quiu',  
ate' quíxjöi'ida' nupa ilalaj ca naca yöl-la' nál-la quiu'.

<sup>19</sup> ¡Le tsahui' nacu', Dios, ridxitnë lúzxiba!  
¡Nunu' Li' yugu' le zxóntérö!  
¡Cúnturö nu zoa nu naca ca nacu' Li', Dios!

<sup>20</sup> Gusöl-la' cazu' quia' yugu' le guca quia' le gulún neda' zi',  
pero ruúnu' neda' tsutsu,  
en le yúbölö uchisu' neda' para cabí gátia'.

<sup>21</sup> Gunu' ga tsépisea',  
en huë tsahú'u neda' le yúbölö.

<sup>22</sup> ¡Le nácatë cu'a Li' yöl-la' ba, en gul-la' tu bihuél-la, Dios!  
¡Gul-la' ca runu' ca rnno', en nacu' Nu naca lá'ayi lógaca böñachi Israel!

<sup>23</sup> ¡Lu yöl-la' rudzeja quia' códxia' cate' gul-la' quiu',  
en idú ládexa' a gul-la' tu' busöló' neda'!

<sup>24</sup> ¡Idú dza gu'a didza' ca nacu' tsahui'!  
¡Tu'tu'i, en ta'bó' bagui'i nupa gulé'ëni iluá' dö' quia'!

## 72

<sup>1</sup> Dios, buzájn'i inë' bönni' rinná bë'ë  
para gaca uchi'a usöröö' ca ruchi'a rusöröö' Li'.  
Ben ga ilácagacabi' tsahui' zxí'inë' ca nacu' Li' tsahui'.

<sup>2</sup> Bë'ë lataj uchi'a usöröö' quégaca böñachi quiu' ca naca le naca tsahui',  
enca' quégaca böñachi quiu' ta'gui'i ta'zaca'.

<sup>3</sup> Ben ga ila'cuá' dxia' tsahui'do' böñachi quiu' yugu' lu guí'a,  
en ilácagaca tsahui' yugu' lu guí'ado'.

<sup>4</sup> Bë'ë lataj ubéaje' tsahui' nupa ta'gui'i ta'zaca' ladaj böñachi quiu',  
en usölé' yugu' zxí'inigaca nupa ta'yadzaj ta'yudxi,  
en ucul-lé' nu ribía no léguequi.

<sup>5</sup> Ben ga iladxi böñachi quiu' Li' tsanni ni' soa gubidza,  
enca' tsanni ni' soa beo' ga idxintë dza udxi.

<sup>6</sup> Ben ga gáquië' bönni' rinná bë'ë ca nisa guiój ribixi lu guíxi'do',  
en ca yugu' guiój gúpa'do' tu'subisa luyú.

<sup>7</sup> Ben ga gaca dxia' quégaca nupa nácagaca dxia' yugu' dza inná bë'ë lë',  
en ila'cuá' dxia' tsahui'do' ga idxintë bíti'rö soa beo'.

<sup>8</sup> Ben ga inná bë'ë idapa la'a yödzölió,

ga naguela' ra' yegu Eufrates ga idxintë idútë luyú.

<sup>9</sup> Ben ga ulu'zechu zxibigaca lahuë' lë' nupa nacuá' luyú bidxi, en iladxi lë' nupa ta'díl-lalen lë'.

<sup>10</sup> Ben ga ila'dxiné' lahuë' bönni' ta'nná bë'ë luyú Tarsis en yugu' lu yödzö, nuá'gaquië' yugu' le ulu'nödzjë' queë'.

Bönni' ta'nná bë'ë luyú Sabá, en luyú Seba ilá'dxiné' bi ulu'nödzjë' queë'.

<sup>11</sup> Ben ga ulu'zechu zxibigaquië' lahuë' yúgu'të bönni' ta'nná bë'ë, en ilúngaca xichiné' bönachi yúgu'të yödzö.

<sup>12</sup> Usölé' nu riyadzaj riyudxi cate' ulidza lë', enca' nu rigui'i rizaca', en nu biti' zoa nu gácalen nu na'.

<sup>13</sup> Huéchi' ládxë'ë nupa nácagaca yechi', en nupa ta'yadzaj ta'yudxi, en gun chi'ë yöl-la' na'bán quégaca nupa nácagaca yechi'.

<sup>14</sup> Usölé' léguequi lu ná'agaca nupa tun léguequi zi', en lu ná'agaca nupa tuá' dö',

en güí'i ládxë'ë léguequi cate' nu gué'ëni guti léguequi.

<sup>15</sup> Soé' ibanë', ate' iluá'gaca bönachi queë' oro que lu xiyúgaca bönachi Sabá.

Ben ga ulu'lidza Dios bönachi, ila'nabitica'sö Li' gácalenu' lë'.

Ben ga ulu'lidza lë' dxi'a tsáhui'do' idú dza.

<sup>16</sup> Ben ga unödzjada' zxoa' luyú queë', enca' yugu' lu guí'ado', le unödzaj yödxi yana' xiyúë' ca run guí'a Líbano.

Ben ga ila'yán nupa nacuá' ladzë' ca rö'ö guíxi'do' lu xiyúë'.

<sup>17</sup> Ben ga tsöjnégaca le lë' ga idxintë dza udxi.

Ben ga gaca yöl-la' ba que lë' tsanni ni' soa gubidza.

Ben ga ila'nabi bönachi Li' yúgu'të yödzö

gunu' ga gaca dxi'a quéguequi ca benu' queë' lë'.

Ben ga ila'gú'u lë' yöl-la' ba bönachi yúgu'të yödzö.

<sup>18</sup> ¡Yöl-la' ba Xanru' Dios, Dios quégaca bönachi Israel!

¡Tuzé' Lë' runë' le túngaca ga rubániru'!

<sup>19</sup> ¡Yöl-la' ba Lë' le naca lachi ga idxintë dza udxi!

¡Rizé' ládxí'ru' ilí idútë yödzölió le naca bení' queë'!

¡Ca' gaca! ¡Ön, ca' gaca!

<sup>20</sup> Chibudxi le rinábida'-né' Dios neda', David, zxí'iné' Isaí.

### 73

<sup>1</sup> Le nácatë runë' Dios ga raca dxi'a quégaca bönachi Israel, nupa na' naca dxi'a tsahui' ládxí'do'guequi.

<sup>2</sup> Ia'láti'sö guchixi guníguida'.

Ia'láti'sö tsöjdöda' tsölä'alö,

<sup>3</sup> tu' buzxé'eda' nupa tun ba zxön cuínguequi, en tu' dëda' yöl-la' tsahui' quégaca nupa tuá' dö'.

<sup>4</sup> Biti' ca' téquinë' zi' bönni' tu'ë dö' na'.

Nácagaquië' tsutsu, en nacu'ë dxi'a.

<sup>5</sup> Biti' ta'guí'i ta'záqué'ë ca ta'guí'i ta'zaca' ia'zíca'rö bönachi.

Biti' ca' raca quégagaquië' ca raca quégaca bönachi yúbölö.

<sup>6</sup> Naca yöl-la' run ba zxön cuini quégagaquië' ca tu le néquini oro dxía ícjagaquië'.

Yöl-la' rutsatsa quégagaquië' naca ca zxágaquië' nácugaquië'.

<sup>7</sup> Tu'zi'ë xibé le ta'dödi bë'ë të'aj tahuë', en ta'zá' ládxí'gaquië' quégaca le zián le ila'déli'në'.

<sup>8</sup> Tu'titjë' ia'zíca'rö bönachi,  
en tu'ë didza' lu yöl-la' run ba zxön cuini quégaquië'.  
Tun ba zxön cuíngaquië',

en té'ënë' ila'bía nahuë' ia'zíca'rö bönachi.

<sup>9</sup> Ta'nné' queë' Dios zoë' yehua' yubá,  
en tu'didza' yudxë' nupa nacuá' yödzölió.

<sup>10</sup> Que lë ni na' ta'dá' bönachi queë' Dios légaquië',  
en ta'yéajlë' didza' tu'ë.

<sup>11</sup> Ta'nné': "Biti' ca' nőzinë' Dios,  
en biti' ilë'e lë ni Nu na' zoa xitsá'alö."

<sup>12</sup> Caní nácagaca nupa tuá' dö'.  
Dëda' yöl-la' tsahui' quéguequi, en ta'zítica'sö ia'lati'.  
<sup>13</sup> ¿Naru' nítisö ben chi'i cuina' para gaca' dxia'  
en para cabí ibág'a'a dul-la'?

<sup>14</sup> Dios, benu' ga gudi'i guzxáca'a idú dza.  
Yugu' zila benu' neda' zi'.

<sup>15</sup> La'tu' bë'a didza' ca nácagaca lë ni  
guzxi' yéeda' bönachi quiu'.

<sup>16</sup> Que lë ni na' bë' ládxa'a tséajni'ida' lë ni,  
sal-la' gúcada' böniga

<sup>17</sup> ga bidxitë dza guyu'a yudo' quiu'  
en guyéajni'ida' ca gaca quégaca nupa tuá' dö'.

<sup>18</sup> Le nácatë nuzú' léguequi ga ta'chixi ta'nigui,  
en runu' ga ila'niti tsaz.

<sup>19</sup> La' ila'nítitë,  
en ila'yaza ga udxi quéguequi.

<sup>20</sup> Nácagaca ca tu le rinetu' yëla le ridödi que cate' ritö' yu.  
Cate' chasu', Xan, la' udöditeu' léguequi tsölä'alö.

<sup>21</sup> Cate' yöjdín icja' le nácagaca ca tu le silá',  
en guzá' ládxa'a yugu' le gúquida' zi',

<sup>22</sup> guca' tu' canóz, en biti' bi guyéajni'ida'.  
Guca' ca tuba' böa' guixi' lo' Li'.

<sup>23</sup> Zóatica'sa' lo' Li',  
ate' rizón cazu' neda'.

<sup>24</sup> Rigú'u yöl-lu'u neda' le rugú'u neda' nöza quiu',  
en ga údxitë uzi'u neda', en gunu' neda' bal.

<sup>25</sup> ¿Núzxirö zoa yehua' yubá nu gácalen neda'?  
¡Tuzu' Li'!

Tu' rácalenu' neda' cúnturö nu zoa yödzölió nu riquinda'.

<sup>26</sup> Ricuidi' le naca', en rudú ládxa'a.

Le ruzúa tsutsu ládxi'da'ahua',  
en le ruví'tica'sa' xibé naca cazu' Li', Xan.

<sup>27</sup> Le nácatë ila'niti nupa tu'cá'ana Li'.

Usunítiu' yúgu'të nupa tu'zóa Li' tsölä'alö.

<sup>28</sup> Raca dxia' quia' cate' ribiga' ga zu' Li', Dios.

¡Naca cazu' Li', Xana' Dios, Nu run chi'i neda'  
para ulu'a lahui yúgu'të le nun cazu'!

## 74

- <sup>1</sup> Dios, ¿naru' tsaz nusán ládxu'u netu'?  
 ¿Riléde' enu' netu', bö'cu' zxila' queë cazu'?
- <sup>2</sup> Yöjné netu', bönachi tu'dubi quiu', nupa böá'u cazu' dza ni'te,  
 nupa böá'u cazu' para gácatu' bönachi queë cazu'.  
 Yöjné guí'a Sión, ga ni guzóa cazu' Li'.
- <sup>3</sup> Gudá tödu' ga ni naguínnajdérö yödzö lá'ayi quiu'.  
 Bulu'sunítidérö nupa gula'dá'baga' Li'  
 yúgu'té le gula'cuá' lataj lá'ayi quiu'.
- <sup>4</sup> Tu'tsatsa nupa na' gula'dá'baga' Li'  
 idú gásibi'ilö ga ni budúbitu' quiu'.  
 Nucuá'gaquië' ni le naca bé'gaca  
 nuxícjagaquië' yödzö lá'ayi quiu'.
- <sup>5</sup> Nalá' lahui yödzö ni ca nalá' tu guí'a cate' nu gulú'u le bidín,  
 en nurixi nu na' yugu' yaga gula'cuá' lu guí'a na'.
- <sup>6</sup> Bulu'zxuzxjé' le nácagaca lachi lu yödzö ni  
 len yugu' guíé huága quégäquië', en yugu' yaga zidzaj.
- <sup>7</sup> Bulu'zégui'ë idútë lataj lá'ayi quiu'.  
 Nucá'anagaquië' cá'asö lataj ga benru' bal Lo'.
- <sup>8</sup> Lu icja ládxido'gaquië' gula'né': "Nuxícjadérötu' bönachi ni."  
 Idútë lu xiyutu' bulu'zégui'ë yúgu'té yu'u ga na' budúbitu' lo'.
- <sup>9</sup> Bítirö caz riléetu' yugu' le bulu'subán ládxitu' gulísatu' lu xiyutu'.  
 Bítirö zoa nu bönni' ru'ë didza' uláz quiu'.  
 Bítirö zóalen netu' nu bönni' nőzinë' gáca xte caz gaca caní queëtu'.
- <sup>10</sup> Dios, ¿gáca'xté caz ulu'lidza ditaj netu' nupa ta'díl-lalen netu'?  
 ¿Gáca'xté caz ulu'cá'ana ditaj Lo' nupa ta'dá'baga' Li'?
- <sup>11</sup> ¿Naru' cabí gácalenu' netu'?  
 ¿Bizz que nucáchu'u yöl-la' huáca zxön quiu'?
- <sup>12</sup> Rinná be'e quézinu' netu' Li', Dios, dza ni'te quez,  
 en rusólá cazu' bönachi idútë yödzölió.
- <sup>13</sup> Len yöl-la' huáca zxön quiu' bubéaj cazu' choplö nísado'.  
 Gulá'a cazu' ícjagacaba' böá' zxön nacuá'aba' nísado'.
- <sup>14</sup> Bzxuzxja cazu' ícjagacaba' böá' sínia' lëba' Leviatán.  
 Ben cazu' ga guláguba' yugu' böá' guixi' xipéla'ba' böá' sínia' na'.
- <sup>15</sup> Gusalaj cazu' yugu' beaj nisa, en gapa rálajda' nisa.  
 Busubidxi cazu' yugu' yegu nisa gula'yúdzutica'sö nisa.
- <sup>16</sup> Nequi queë cazu' lahui' dza, en nequi ca' quiu' chi'i dzö'ölö.  
 Ben cazu' Li' bení', enca' gubidza.
- <sup>17</sup> Naguixaj cazu' Li' yúgu'té buzá' nacuá' yödzölió.  
 Nun cazu' Li' beo' la, en beo' ziaga.
- <sup>18</sup> Yöjné lë ni, Dios. Nupa ta'dá'baga' Li' nucá'anagaca ditaj Lo',  
 ate' nupa nácagaca canöz nucá'anagaca cá'asö Lo'.
- <sup>19</sup> Biti' usán no'o nupa nadxi'inu' lu ná'agaca nupa nácagaca ca yugu' böá' guixi' sínia'.  
 Biti' gal-la ládxu'u tsaz nupa néquiguequi quiu', en ta'guí'i ta'zaca'.
- <sup>20</sup> Yöjné didza' dzaga na' núnlenu' netu',  
 tu' nacuá' nupa tuti bönachi gapa naca chul-la lu xiyutu'.
- <sup>21</sup> Biti' gu'u lataj ulu'gá'ana cá'asö nupa nácagaca bayechi'.  
 Ben ga ila'gú'u Li' yöl-la' ba nupa ta'guí'i ta'zaca', en ta'yadzaj ta'yudxi.
- <sup>22</sup> ¡Guyasa, Dios, en ben ca rnna xtídzu'u!  
 ¡Ruzé nagu' ca rulidza ditje' Li' bönni' canöz idú dza!

<sup>23</sup> Biti' gal-la ládxu'u didza' zi' tu'i nupa ta'dá'baga' Li'.  
Yöl-la' dzatsa tun nupa tu'cá'ana Li' cá'asö riyóntica'sö.

## 75

<sup>1</sup> ¡Rëtu' Li': "Xclenu', Dios"!  
¡Rëtu' Li': "Xclenu'",  
tu' zóatica'su' gal-la' ga zóatu'!  
¡Tui'i didza' böñachi ca nácagaca le zxön nunu'!

<sup>2</sup> Rnné' Dios; "Nuzóá' dza cate' uchi'a usöróá' böñachi.  
Uchi'a usöró caza' léguequi ca naca le nácaté.

<sup>3</sup> Tu'suniti yödzölió, en nupa nacuá' ni',  
pero tsaz nuzóá caza' le."

<sup>4</sup> Gudxa' nupa tun ba zxön cuínguequi, gunnía': "Biti' gun ba zxön cuinli",  
en gudxa' nupa tuá' dö': "Biti' huë tsahui' cuinli".

<sup>5</sup> Biti' huë tsahui' cuinli',  
en biti' gü'ili' didza' lu yöl-la' run ba zxön cuinli'."

<sup>6</sup> Caléga ga rilén gubidza, en caléga ga ribía gubidza,  
en caléga la' guixi' ga dë lataj irúaj le huë tsahui' böñachi,

<sup>7</sup> pero uchi'a usöró cazé' Dios böñachi.  
Uzötje' tuë' bönni', en uchisë' ia'tué'.

<sup>8</sup> Nuá' cazé' Xanru' lu né'ë tu zxiga' yudzu xisa le ribía lubá uva le ribixi rilébi.  
Chinugútsi'dérë' le, ate' rigu'ë le para ilé'aj le nupa tuá' dö' yödzölió ni,  
ate' ilé'jadérö le silá' que.

<sup>9</sup> Neda' usiyóntica'sa' böñachi lë ni,  
en gul-la' yöl-la' ba queë' Dios queë' Jacob.

<sup>10</sup> Ugúë' yöl-la' unná bë' quégaca nupa tuá' dö'.  
Quíxje' tsaz yöl-la' unná bë' quégaca nupa nácagaca tsahui'.

## 76

<sup>1</sup> Zxi'ini xi'sóë' Judá núnbe'gaquië' Dios.  
Nayépisë le lë' ladaj böñachi Israel.

<sup>2</sup> Zoa caz lataj lá'ayi queë' lu yödzö Jerusalen,  
ate' nazí'i le Sión lataj ga na' zoa cazé'.

<sup>3</sup> Ni' guditsjë' yugu' yaga lahui tuchi' zoa gui' láhuiguequi,  
enca' yugu' guië' la, en yugu' le ta'díl-lalen böñachi lu gudil-la.

<sup>4</sup> ¡Yöl-la' ba Li', Dios!  
¡Nayépisétëru' ca yugu' gui'a zxön!

<sup>5</sup> Buxicju' bönni' nál-lagaquië'.  
Gudödi yëla guiój lógaquië' bönni' röjáquië' gudil-la,  
en biti' guca ila'chisa ná'agaquië'.

<sup>6</sup> Cate' Li', Dios queë' Jacob, gudíl-lalen cazu' légaquië'  
gulátiba' böa', ate' gulati ca' nupa dxíagaca légacaba'.

<sup>7</sup> Li' caz ral-la' gádxitu',  
tu' cabí gaca nu soa lo' cate' ilenu'.

<sup>8</sup> Ga zu' Li' yehua' yubá gunnó' uchi'a usöróu' böñachi.

Ní'irö guladxi nupa nacuá' lu yu, en gula'cuá' dxisö,

<sup>9</sup> cate' guzuínë' Dios para uchi'a usöróe' quégaca böñachi,

para usölé' nupa nácagaca nöxaj ladxi' yödzolio ni.  
<sup>10</sup> Sal-la' ta'léde'e bönachi, gaca yöl-la' ba queë' Lë'.  
 Uzi'ë xibégaca nupa ulu'gá'ana ládjaguequi.  
<sup>11</sup> Guli'sí' lu ná'alí' bi gunli' lahuë' Xanru' Dios,  
 en guli'gún ca na' innali'.  
 Yúgu'të nupa nacuá' ga na' zoë' ral-la' bi ulu'nödzaj queë',  
 tu' náquië' Nu ral-la' gádxiru'.  
<sup>12</sup> Ubéaj cazé' bö' nácagaca caz nupa nadéli'gaca lataj lo.  
 Bönni' ta'nná bë'ë luyú ni tádxinë' Lë'.

## 77

- <sup>1</sup> Rulidza'-në' Dios, en ruá'a zidzaj didza'.  
 Rulidza'-në' Dios, ate' riyyönnë' chi'a.  
<sup>2</sup> Cate' bi guca quia' bulidza'-në' Dios.  
 Chi'i dzö'ölö guchisa na'a lahuë', en biti' busana' rulidza'-në'.  
 Biti' guca nu huë tsahui' neda'.  
<sup>3</sup> Cate' röjneda'-në' Dios, rö'a böninga.  
 Cate' rinné ládex'a'a, ní'irö rudú ládex'a'a.
- <sup>4</sup> Bubéaj cazu' yëla guiój lahua'.  
 Tu' ribö'a böninga biti' gaca gu'a didza'.
- <sup>5</sup> Chiguzá' ládex'a'a ca guca dza ni'te,  
 ca guca yugu' iz chigula'dödi.  
<sup>6</sup> Tsöjneda' le bulá' chi'i dzö'ölö,  
 en tsöjsá' ládex'a'a ca naca que, ate' rinábini cuina':  
<sup>7</sup> ¿Naru' tsaz nusán Xanru' neda'?  
 ¿Naru' cabirö uzá' ládex'ë quia'?  
<sup>8</sup> ¿Naru' cabirö gáquië' dxi'i ladxi'?  
 ¿Naru' cabirö tsöjenenë' le guzxí' lu në'ë gunë'?  
<sup>9</sup> ¿Naru' nál-la ládex'ë Dios tu' cabirö ruzá' ládex'ë queëru'?  
 ¿Naru' bíti'rö huéchi' ládex'ë rë'u tu' rilenë'?  
<sup>10</sup> Ní'irö gudxi cuina': Raca caní quia' tu' risébida' ládex'a'a,  
 en que lë ni na' réquida' nadzá' yöl-la' unná bë' queë' Dios nayépisë'.
- <sup>11</sup> Tsöjneda' yugu' le nun cazu' Li', Xantu'.  
 Tsöjneda' yugu' yöl-la' huáca benu' dza ni'te.  
<sup>12</sup> Sa' ládex'a'a ca nácagaca le nunu',  
 en cuéqui icja' ca nácagaca le runu'.  
<sup>13</sup> Naca lá'ayi ca run cazu' Li', Dios.  
 Cúnturö nu zoa naca dios ca nacu' Li', Dios queëtu'.  
<sup>14</sup> Naca cazu' Li' Dios, runu' yugu' yöl-la' huáca zxön.  
 Bulú'u lahui yöl-la' huáca quiu' lógaca bönnachi yúgu'të yödzö.  
<sup>15</sup> Len yöl-la' huáca zxön quiu' busölö' bönnachi quiu',  
 nupa nácagaca zxí'ini xi'sóagaquie' Jacob, en José.  
<sup>16</sup> Bila'lé'e yugu' nísado' Li', Dios.  
 Bila'lé'e yugu' nísado' Li', en gula'bó' böninga.  
 Gula'zxízilë'e yugu' nísado'.  
<sup>17</sup> Bulu'lalaj böaj lúzxiba nisa.  
 Lúzxiba xitsá' gunnëda' guziú'.  
 Guyëpi yösa ca yugu' yaga lahui tuchi'.

<sup>18</sup> Lu bö' budunu' biyón guziú' quiu' gunnëda'.  
 Yösa gula'yépi bulu'zení' luyú.  
 Gudödida' budó' zxu', en guzxizi luyú.  
<sup>19</sup> Bilá' lahui nöza quiu' gatsaj láhui'lö nísado',  
 ate' guzóa nöza ga gudödu' gatsaj láhui'lö nisa zila.  
 Biti' nalá' lahui na'a ga na' bulibú'.  
<sup>20</sup> Guché' cazu' bönachi quiu' ca runé' bönni' riché'ë-ba' bö'cu' zxila' hué'ënido'.  
 Guché'u léguequi lu ná'agaquië' Moisés, en Aarón.

## 78

<sup>1</sup> Buli'zé nágali' le uzéajni'ida' libí'ili', bönachi quia'.  
 Buli'zé nágali' didza' gu'a.  
<sup>2</sup> Usalja' ruá'a, en ucúdzu'a didza'.  
 Gu'a didza' tu le nagachi' dza ni'te quez,  
<sup>3</sup> tu didza' chibiyónru', en núnbe'ëru',  
 le gulé' xuz xtó'oru' rë'u.  
<sup>4</sup> Biti' ucáchi'ru' didza' na' lógacabi' zxí'iniru'.  
 Usiyónru' yugu' zxí'ini xi'sóaru' yöl-la' ba queë' Xanru',  
 ca naca yöl-la' huáca queë', en yugu' le zxön benë'.  
<sup>5</sup> Gudixjé' tu didza' naca bë' queë' Jacob,  
 en nuzóë' le rinná bë'ë quégaca bönachi Israel,  
 le gunná bë'enë' yugu' xuz xtó'oru'.  
 Ulu'zéajni'iné' zxí'inigaquië' ca naca,  
<sup>6</sup> para ilúnbë'gacabi' le, bi'i si' zá'gacabi', enca' bi'i si' iláljabi',  
 para ulu'luíibi' ca' zxí'inigacabi' ca naca lë na' gunná bë'ë Dios.  
<sup>7</sup> Ulu'zxöni ládzi'gacabi' Dios,  
 en biti' gal-la ládzi'gacabi' yugu' le nunë' Dios.  
 Ilunbi' ca nácagaca le gunná bë'ë,  
<sup>8</sup> en biti' ilácagacabi' ca guláquië' xuz xtó'ogacabi'.  
 Guláquië' zidzaj ladxi' tu' gula'dá'baguë'ë xtídzë'ë Dios,  
 en biti' guláquië' nöxaj ladxi',  
 ate' lu icja ládzi'do'gaquië' biti' gula'yéajlé'ë Dios.  
<sup>9</sup> Yugu' zxí'ini xi'sóë' Efraín guluá'gaquië' yaga uxiti',  
 pero bulu'zxúnnajé' lu gudil-la.  
<sup>10</sup> Biti' gula'dá'gaquië' didza' dzaga Dios bénlenë' légaquië',  
 en biti' gulunë' ca naca le gunná bë'enë' légaquië'.  
<sup>11</sup> Gulal-la ládzi'gaquië' yugu' le benë' Dios,  
 en yugu' yöl-la' huáca zxön benë' lógaquië'.  
<sup>12</sup> Benë' Dios le gulún ga bulu'báninë' xuz xtó'ogaquië'  
 luyú Egipto, en luyú Zoán.  
<sup>13</sup> Gusaljé' nísado', en benë' ga gula'dödë' gatsaj láhui'lö nísado' na'.  
 Benë' ga guca nísado' na' ca yugu' gu'ado' tsölä' a huéaj.  
<sup>14</sup> Bulu'iné' légaquië' nöza lahui' dza, bugunë' dxin tu böaj,  
 ate' chi'i dzö'ölö bugunë' dxin tu böaj ruzen' ca gu'í.  
<sup>15</sup> Bulé'ë tu guiój ga naca la' guixi' ga dë lataj,  
 en bë'ë le gulé'ajé' le guca ca tu nísado'.  
<sup>16</sup> Gulé'ajé' nisa yegu le gulén lu guiójto'o.  
 Benë' ga birúaj nisa ca tu yegu zxön lu guiójto'o na'.  
<sup>17</sup> La' ní'isö gulunë' dul-la' lahuë' Lé',  
 en gula'dá'baguë'ë Dios nayépisétérë' la' guixi' na'.  
<sup>18</sup> Lu icja ládzi'do'gaquië' gula'zí' bë'ë Dios quégaquië',

cate' gula'nábinë' Lë' ugahuë' légaquië' ca gula'zësö ladxí'gaquië'.

<sup>19</sup> Ni'irö gula'nnë' queë' Dios, gula'nnë':

"¿Naru' huáca cu'ë Dios le gáguru' la' guixi' ni ga dë lataj?

<sup>20</sup> Buli'yútsöca', bë'ë guiójito'o, ate' birúajda' nisa,  
le guca ca nisa yegu gubó'o zxön.

¿Naru' huáca gunnë' ca' queéru' yöta gáguru'?

¿Naru' gaca ugahuë' bönachi queë' le naca bëla'?"

<sup>21</sup> Biyönnë' Xanru' Dios didza' ni, en guléde'enë',  
ate' gulén tu guí' le buzegui zián zxí'ini xi'soë' Jacob,  
tu' guléde'enë' bönachi Israel,

<sup>22</sup> tu' cabí gula'yéajlé'ë Dios,  
en biti' bulu'zxöni ladxí'gaquië' Lë' usölé' légaquië'.

<sup>23</sup> Gunná bë'enë' Lë' yugu' böaj lúzziba,  
en gusalje' yehua' yubá.

<sup>24</sup> Gusól-lë'ë yöta maná le ilahuë',  
en bugahuë' légaquië' la' huagu que yehua' yubá.

<sup>25</sup> Gulahuë' bönni' ni' yöta tahuë' gubáz que yehua' yubá.

Gusól-lë'ë guizxi yu le ilahuë'.

<sup>26</sup> Benë' ga guyecja bö' birúaj ga rilén gubidza,  
ate' len yöl-la' huáca queë' gunná bë'enë' bö' recja  
le birúaj tsölä'alö ga ridödi gubidza beo' ziaga.

<sup>27</sup> Benë' ga böxaj bëla' ca bëchtö yu ladjalö ga na' nacu'ë,  
le naca böa' zoa xíligacaba' gurö'öba' ca yuzxi dë tu ra' yegu zxön.

<sup>28</sup> Benë' ga böxjagacaba' gatsaj láhui'lö ga na' nacu'ë,  
en ladjagaca yugu' yu'u guídido' quégäquië'.

<sup>29</sup> Ca' guca, gulahuë', en bulu'huólaj gula'dzé'enë',  
tu' bë'ë quégäquië' le gula'zësö ladxí'gaquië'.

<sup>30</sup> Zí'alö ca budxi bulu'huólaj gula'dzé'enë',  
tsanni ni' yu'u ruá'agaquië' le tahuë',

<sup>31</sup> gulénë' Dios légaquië',  
en bëtië' bál-lagaquië', bönni' nál-latérögaquië' ladjagaquië',  
en bucül-lë' bönni' Israel nayépisétérögaquië'.

<sup>32</sup> Sal-la' guca caní, gulunré' dul-la',  
en biti' gula'yéajlé'ë Lë' ni'a quégaca le zxön benë'.

<sup>33</sup> Que lë ni na' benë' ga böáca nítisö dxin gulunë',  
ate' lu yöl-la' radxi gula'zöe' yugu' lu iz quégäquië'.

<sup>34</sup> Cate' bëtië' ziángaquië', ni'irö bulu'lidzé' Lë'.  
Bulu'bí'i ladxí'gaquië', en yöjtá'gaquië' Dios.

<sup>35</sup> Ni'irö yöjnéguequinë' náquië' Dios Nu run chi'i légaquië',  
en náquië' Dios nayépisétérë' Nu böá'uö légaquië'.

<sup>36</sup> Gula'zí' yé'enë' Lë' len didza' gulu'ë,  
tu' gulu'ë diza' biti' nácatë lahuë' Lë' len ruá'agaquië'.

<sup>37</sup> Biti' gudá'gaquië' Lë' idí' ladxí'gaquië',  
en biti' gulunë' ca rnna didza' dzaga na' bénlenë' légaquië'.

<sup>38</sup> Tu' buéchi' ladxé'ë Dios légaquië',  
bunuti lahuë' ca naca xigüia' gulunë', en biti' busunítië' légaquië'.  
Bubequi lahuë' quégäquië', en bítirö gulénë' légaquië',  
en biti' benë' ca sa'yéaj yöl-la' ridzá'a queë'.

<sup>39</sup> Ca' guca, yöjenenë' nácagaquië' bönáchisö.

Nácagaquië' ca tu bö' recja le ridódísö, en biti' rudxín.

<sup>40</sup> Zián luzuí gula'dá'baguë'ë Lë' ga na' naca la' guixi',  
en bulu'suhuï'inë' Lë' lu yu bidxi na'.

<sup>41</sup> Zián luzuí gula'zí' bë'ë Dios,  
en guluné' zi' Dios Lá'ayi quégaca böñachi Israel.

<sup>42</sup> Biti' yöjnéguequiné' yöl-la' huáca zxön queë',  
le bulu'e lahui dza ni' böá'uë' légaquië'  
lu ná'agaca nupa biti' bila'lé'e légaquië' dxí'a,  
<sup>43</sup> cate' ni' bené' le gulaca bë' luyú Egipto,  
en bené' yugu' yöl-la' huáca queë' luyú Zoán,  
<sup>44</sup> cate' bené' ga böáca nisa rön yugu' lu yegu luyú Egipto,  
enca' nisa yugu' lu beaj quégagaquie' para cabí guca ilé'ajé' le.

<sup>45</sup> Gusól-lë'ë lágjagaquie' bôtsugayu guizxi yu,  
böa' gula'guídxiba' légaquië'.  
Gusól-lë'ë ca' riu bulu'sunítiba' le nequi quégagaquie'.

<sup>46</sup> Budödë' le naz nuzóagaquie' lu ruá'agacaba' böchi' zu,  
ate' guláguba' böchi' zu na' le rö'ö yugu' la' yëla quégagaquie'.

<sup>47</sup> Busunítië' yugu' lubá uva quégagaquie' len nisa guiój yöla sunna na',  
en busunítië' yugu' yaga higo quégagaquie' len bögui'.

<sup>48</sup> Bétië'-ba' böa'bëdxi quégagaquie' len nisa guiój yöla sunna na',  
en lu yösa gula'yëpi.

<sup>49</sup> Lu yöl-la' rilé queë' gusól-lë'ë quégagaquie' yugu' lë ni,  
en lu yöl-la' ridzä'a queë' busaca' zi'ë légaquië',  
en gusól-lë'ë quégagaquie' gubáz que yehua' yubá para bulu'sunítië' légaquië'.

<sup>50</sup> Biti' bubequi lahuë' quégagaquie' para cabirö lenë' légaquië',  
en biti' buniti lahuë' légaquië' para cabí ilátië'.  
Budödë' légaquië' lu yöl-la' guti,

<sup>51</sup> en bëtië' yúgu'tëbi' bi'i bönni' lo quégagaquie' bönni' Egipto,  
yugu' bi'i bönni' lo quégagaquie' zxí'ini xi'soë' Ham.

<sup>52</sup> Guché'ë böñachi queë' ca yugu' bö'cu' zxíla'do',  
en bulu'inë' légaquië' nöza la' guixi' ga dë lataj.

<sup>53</sup> Guché'ë légaquië' lu në'ë para cabí bi iládxinë',  
pero gubaga' nísado' nupa biti' bila'lé'e légaquië' dxí'a.

<sup>54</sup> Ca' guca, guché'ë légaquië' ga zoa luyú lá'ayi queë',  
luyú ni bidéli'në' uláz quégagaquie' len yöl-la' huáca queë'.

<sup>55</sup> Bulágui'ë böñachi izá'a luyú ni lógaca böñachi queë',  
en burixë' que queégaquie' xiyúgaquie' ga ila'cu'ë,  
en bené' ga gula'cu'ë böñachi Israel yugu' lu yu'u guídido'.

<sup>56</sup> Le yúbölö gula'zí' bë'ë Lë', en gula'dá'baguë'ë Dios nayépisétérë',  
en biti' gulunë' yugu' le gunná bë'enë' légaquië'.

<sup>57</sup> Bulu'huóa lágjagaquie', en bulu'cá'anë' Lë' ca gulunë' xuz xtó'gaquie'.  
Gula'dödë' tsölá'alö ca run tu yaga lahui tuchi' biti' nácatë li.

<sup>58</sup> Gulún lenë' Lë' tu' gulunë' xilátjagaca budó' guiój budó' yaga yugu' lu guí'a,  
en gulunë' ga budúl'në' légaquië' ni'a quégaca budó' na'.

<sup>59</sup> Cate' bilé'enë' lë ni Dios, guléde'enë',  
en budí'inë' böñachi Israel.

<sup>60</sup> Ni'irö buca'anë' xilatjë' lu yödzö Siló,  
ga na' guzóa yu'u lá'ayi queë' lágjagaquie' bönni' ni'.

<sup>61</sup> Bë'ë lataj gula'ché'ë bönni' zi'tu' guí'ina lá'ayi queë',  
guí'ina na' bulu'i lahui yöl-la' zxön queë'.

<sup>62</sup> Budödë' böñachi queë' lu ná'agaca nupa bétigaca léguequi,

- <sup>63</sup> en gúquinë' zi' nupa nácagaca quez queë'.  
 Buzegui tu guí' zxön yugu' bi'i bönni' quégäquië',  
 ate' cuntu nu bugá'ana nu ulu'tsaga na'lenbi' yugu' bi'i nigula ra'bando'.  
<sup>64</sup> Yugu' bixúz quégäquië' gulátië' lu guí'e tuchi',  
 ate' biti' guca ila'bödxinu nigula uzëbi quégäquië'.  
<sup>65</sup> Ni' irö gúquië' Xanru' ca tu bönni' rubanë' lu yöl-la' rasi.  
 Gúquië' ca bönni' rejé' gudil-la gudödi bë'ë gu'ë xisi lubá uva nál-la.  
<sup>66</sup> Bulágui'ë yugu' bönni' gula'díl-lalenë' böñachi queë',  
 en tsálido'os burixé' légaquië'.  
<sup>67</sup> Lësca' budödë' tsölä'alö yugu' zxí'ini xi'sóë' José,  
 en biti' guroë' yugu' zxí'ini xi'sóë' Efraín.  
<sup>68</sup> Guröë' yugu' zxí'ini xi'sóë' Judá,  
 en yödzö Sión le nadxi'i quézinë' Lë'.  
<sup>69</sup> Ni' benë' tu lataj lá'ayi queë' le naca ca tu guí'a zxön,  
 le zoa tsutsu ca yödzölió ni nuzóë' tsaz.  
<sup>70</sup> Guroë' ca' David, huen dxin queë',  
 en bubéajé' lë' ga na' zoë' ruyúë'-ba' yugu' bö'cu' zxila'do'.  
<sup>71</sup> Bubéajé' lë' ga na' rapa chi'ë-ba' yugu' bö'cu' zxila' guná',  
 nacuá'aba' böa' hué'ënido' quégacaba',  
 para gáquië' nu uyú böñachi queë', yugu' zxí'ini xi'sóë' Jacob,  
 en böñachi Israel, nupa na' nácagaca quez queë'.  
<sup>72</sup> Ca' guca, idú ládxé'ë buyúë' David böñachi na',  
 en lu yöl-la' rácada' queë' guché'ë légaquië' lu né'ë.

## 79

- <sup>1</sup> Dios, nacuá' böñachi izá'a lu xiyúgaca böñachi quiu'.  
 Nucá'anagaca cá'asö yudo' lá'ayi quiu',  
 en nusunítigaca yödzö Jerusalén.  
<sup>2</sup> Bulu'cá'anë' böñachi quiu' nátigaca luyú para iláguba' bíchulab léguequi,  
 en bëla' rön quégaca huen xichinu' ga iláguba' böa' guixi' le.  
<sup>3</sup> Bulu'laljé' xichöngaca böñachi quiu' ca nisa idútë lu yödzö Jerusalén,  
 ate' cuntu nu bugá'ana nu ucache' léguequi.  
<sup>4</sup> Böñachi yugu' dzaga luyú queétu' tu'titaj netu'.  
 Tu'zxidxé', en tu'didza' yudxi netu'.  
<sup>5</sup> ¿Naru' tsaz ilenu' netu', Xan?  
 ¿Naru' sóatica'sö yöl-la' rilé quiu' ca tu guí' ruzegui netu'?  
<sup>6</sup> Gulégaca böñachi yugu' yödzö zi'tu' biti' tun Li' bal,  
 enca' böñachi biti' tu'lidza Li'.  
<sup>7</sup> Bétingaca böñachi quiu' nácagaca zxí'ini xi'sóë' Jacob,  
 en nusunítigaca xiyutu' ga zoa cazu' Li'.  
<sup>8</sup> Biti' gunu' netu' xiguia' tu' nözi dul-la' gulunë' xuz xtó'otu'.  
 Buéchi' ladxi' netu' na'a, tu' rudú ládxí'tu'.  
<sup>9</sup> Gúcalen netu', Dios, Nu rusólá netu', para guntu' bal Lo'.  
 Busólá netu', en buniti lo netu' ca naca dul-la' nabága'tu' para idxí'itu' Lo'.  
<sup>10</sup> ¿Bizz que ta'nabi böñachi yugu' yödzö izá'a netu',  
 ta'nná: "Gázxitë zoa Dios queéli"?  
 Bé' lataj ilé'etu', en ben ga gaca bë' lógaca yúgu'të böñachi  
 rizi' lo' nupa tu'lalaj xichöngaca huen xichinu'.  
<sup>11</sup> Buzé nagu' ca ta'nné ládxí'gaca nupa nadzungaca.

Len yöl-la' huáca zxön quiu' busölá nupa na' narugu quéguequi ilátigaca,  
<sup>12</sup> en bubí'i quégaca bönachi yugu' dzaga yödzö queétu'  
 ia'gadxi cö'lö ca' tsca naca didza' zi' gula'nné quiu' Li', Xan.  
<sup>13</sup> Netu', bönachi quiu', enca' bö'cu' zxila' ruyú cazu' Li',  
 guiéctica'stu' Li': "Xclenu'",  
 en cù'utica'stu' Li' yöl-la' ba na'a dza, en dza si' zaca.

## 80

<sup>1</sup> Ruzé nagu' netu', Dios, Nu rapa chi'i bönachi Israel.  
 Nacu' Nu ruyú yugu' zxí'ini xi'sóe' José ca nu ruyú yugu' bö'cu' zxila'.  
 Buzení' queétu', Li' na' rö'u rinná bë'u ga nacuá'  
 nupa nál-lágacatérö quiu' lágaca querubín.  
<sup>2</sup> Bulu'i yöl-la' huáca quiu' lágaca zxí'ini xi'sóagaquië' Efraín, en Benjamín, en Manasés.  
 Gudá queétu', en busölá netu'.

<sup>3</sup> Ben ga huécjatu' quiu' Li', Dios.  
 Bulu'i netu' nadxí'nu' netu', ate' ulatu'.

<sup>4</sup> Xantu' Dios quéguequi ni'a no'o guizxi yu,  
 ¿gáca'zte caz ílenu' netu', en biti' yönnu' le rulidztu' Li'?

<sup>5</sup> Rugagu' netu' nisa ribödxi queétu',  
 en rugui'ju' netu' sizxöni nisa ribödxi.

<sup>6</sup> Nunu' ga bönachi dzaga yödzö queétu' tu'zxidxi queétu',  
 ate' nupa biti' ta'lé'e netu' dxi'a tu'titaj netu'.

<sup>7</sup> Ben ga huécjatu' quiu' Li', Dios quégaca ni'a no'o guizxi yu.  
 Bulu'i netu' nadxí'nu' netu', ate' ulatu'.

<sup>8</sup> Guléaju' tu lubá uva le nácatu' netu' luyú Egipto.  
 Bulagu' bönachi izá'a yugu' lu yödzö luyú ni, en budó'o lubá na' ni.

<sup>9</sup> Buchi'u lataj ga guzxón lubá na'.

Benu' ga ben luí ga rë', ate' bulí idútë luyú ni.

<sup>10</sup> Gulú'u zxul-la lubá na' yúgu'të lu guí'ado',  
 ate' ni'a né'e gula'baga' yugu' guí'a zxön.

<sup>11</sup> Gula'tunna ni'a né'e ga bidxitë ra' nísado',  
 enca' ga bidxitë ra' yegu Eufrates.

<sup>12</sup> ¿Bizz que buquínnaju' yugu' lë'aj gulún chi'i lubá na',  
 en ru'u lataj nupa ta'dódísö ta'bán le ribía lubá uva na'?

<sup>13</sup> Tu'líbigacaba' cuchi guixi' le,  
 ate' táguba' böa' guixi' le.

<sup>14</sup> Buécja queétu', Dios quégaca ni'a no'o guizxi yu.  
 Ga ni' zu' yehua' yubá buyú ca raca que lubá quiu', en busölá netu'.

<sup>15</sup> Gudá dusölo' lubá ni budá' cazu',  
 le naca ca tu lubá hué'eni buxón cazu' Li'.

<sup>16</sup> Nupa biti' ta'lé'e netu' dxi'a gula'chugu ni'a né'e lubá na', en bulu'quela' le guí'.  
 Buyú ca tun, en lu yöl-la' rilé quiu' busuniti léguequi.

<sup>17</sup> Gúcalen bönni' na' guró cazu' quiu',  
 netu', bönachi na' nuzóa cazu' tsaz quiu'.

<sup>18</sup> Caní gaca, bíti'rö ucá'anatu' Li'.

Bunna queétu' yöl-la' na'bán, ate' uzxöni ládzi'tu' Lo'.

<sup>19</sup> Ben ga huécjatu' quiu' Li', Dios quégaca ni'a no'o guizxi yu.  
Bulu'i netu' nadxi'inu' netu', ate' ulatu'.

## 81

<sup>1</sup> Lu yöl-la' rudzeja queéli' guli'gul-la queë' Dios.  
Lë' náquië' yöl-la' nál-la queéli'.

Lu yöl-la' rudzeja queéli' guli'códxi'a lahuë' Dios queë' Jacob.

<sup>2</sup> Guli'gul-la tu le gúl-lali', cápa'li' lë'e guídido'.

Guli'quinnaj lë'egaca bihuël-la.

<sup>3</sup> Guli'códxi luzu chivo cate' zoa beo' hué'ëni,  
en cate' zoa beo' nál-la, en cate' raca laní.

<sup>4</sup> Lë ni naca tu xibá quégaca bönachi Israel,  
le naca tu le gunná bë'enë' Xanru' Dios zxí'ini xi'sóë' Jacob.

<sup>5</sup> Gudixjé' le para gaca tu le gun ba nalí queë' lógaca zxí'ini xi'sóë' José,  
le gudixjé' cate' gudödë' luyú Egipto,  
ga ni' biyönda' didza' izá'a biti' guyéajni'ida'.

<sup>6</sup> Rnnë' Dios: "Gudúa' yua' zxoa ya'zxícjagaquië',  
en bucuita' le nuá'gaquië' le bulu'subaga' légaquië'  
nupa biti' bila'lé'e légaquië' dxí'a.

<sup>7</sup> Bulídzali' neda' cate' bi guca queéli', ate' busölá' libí'ili'.

Bubi'a didza' cate' bi gunábili' neda', ni' nucachi' cuina' tu lu böaj gasaj.  
Guzzi' bë'a libí'ili' ga zoa nisa na' lë Meriba.

<sup>8</sup> Buli'zé nágali', libí'ili', bönachi quia', ate' uxösa' libí'ili'.

Raca ládex'a' uzé nágali' neda', bönachi Israel.

<sup>9</sup> Biti' ral-la' soa tu dios izá'a ga na' zóali',  
en biti' gunli' zxön tu dios quégaca bönachi zi'tu'.

<sup>10</sup> Neda', Xanli', naca' Dios queéli'.

Guléaja' libí'ili' luyú Egipto.

Guli'salaj ruá'ali', ate' cu'a ruá'ali' le gáguli'.

<sup>11</sup> Biti' bulu'zé nágagaca bönachi quia' chi'a.

Biti' gulún bönachi Israel ca rnna xtídz'a'a.

<sup>12</sup> Que lë ni na' busán ládex'a' léguequi  
para gulún ca sa'yéaj yöl-la' ridá'baga' quéguequi,  
en para gulún ca gula'za'sö ládzi'gaca.

<sup>13</sup> Guzá' ládex'a' ulu'zé nágagaca bönachi quia' xtídz'a'a,  
para ilún bönachi Israel ca ré'ënda' neda'.

<sup>14</sup> La'tu' ilún caní, uxicja caza' nupa biti' ta'lé'e léguequi dxí'a,  
en tíl-lalena' nupa ta'díl-lalen léguequi.

<sup>15</sup> Ulu'lui' cuínguequi nupa biti' ta'lé'e neda' dxí'a,  
ca nupa tun ca rnna xtídz'a'a,  
pero tsaz guna' léguequi xiguiá'.

<sup>16</sup> Lësca' ugahua' libí'ili', bönachi quia', zxoa' xtila dxí'ado',  
en guna' ga huölaj idzé'eli' le zxixi que buz, le irúaj lë'e guiój."

## 82

<sup>1</sup> Zuínë' Dios ladaj nupa tu'dubi queë' ni' yehua' yubá.

Ruchi'a rusöröe' nupa ta'nná bë'.

<sup>2</sup> Rnnë': "¿Gáca'zte caz uchi'a usöröli' quégaca bönachi  
lu yöl-la' biti' naca tsahui' queéli'?

Caní naca tu' rubéajli' tsahui' nupa tuá' dö'.

<sup>3</sup> Buli'béaj tsahui' nupa ta'cuidi', en yugu' bi'i uzëbi.

Guli'gún le naca tsahui' quégaca nupa ta'gui'i ta'zaca',  
en quégaca nupa ta'yadzaj ta'yudxi.

<sup>4</sup> Buli'sólá nupa ta'cuidi', en nupa nácagaca yechi'.  
Buli'sólá láguequi lu ná'agaca nupa tuá' dö'.

<sup>5</sup> Biti' nőziguequi, en biti' ta'yéajni'i.  
Ta'dá ga chul-la.

Rizxizi xilibi yödzölió."

<sup>6</sup> Rnna caza' neda': "Nácali' ca yugu' dios.  
Nácali' yúgu'téli' zxí'iné' Dios nayépisétérë',  
<sup>7</sup> pero gátili' ca tati bönachi,  
en ibíxili' lu gudil-la ca ta'bixi zxí'iné' bönni' lo."

<sup>8</sup> Guyasa, Dios, en buchi'a busörö quégaca bönachi yödzölió ni,  
tu' nácagaca queë cazu' yúgu'té yödzö bönachi.

## 83

<sup>1</sup> Biti' ugá'anu' dxisö, Dios.

Biti' su' dxisö, Dios, en biti' usayaj ru'u,

<sup>2</sup> tu' tu'tsatsa nupa ta'dá'baga' Li',  
ate' nupa biti' ta'lé'e Li' dxi'a tun ba zxön cuínguequi.

<sup>3</sup> Tun tuz xtídza'guequi bi ilún quégaca bönachi queë cazu',  
en tu'pá yugu' le ilún quégaca nupa nadxí'i quézinu', ta'nná:

<sup>4</sup> "Guli'dá, usunítiru' láguequi para cabirö ilaca tu yödzö bönachi,  
en para cúnturö nu tsöjnë bönachi Israel."

<sup>5</sup> Núngaca tuz xtídza'guequi.

Nuzóagaca tsutsu xtídza'guequi ta'dá'baga' Li'.

<sup>6</sup> Yugu' bönni' Edom, en yugu' bönni' Ismael,  
en yugu' bönni' Moab, en yugu' bönni' Agar,

<sup>7</sup> en yugu' bönni' Gebal, en yugu' bönni' Amón, en yugu' bönni' Amalec,  
en yugu' bönni' Filisteo, en yugu' bönni' Tiro,

<sup>8</sup> enca' yugu' bönni' Asiria núnquaquië' légaquië' tsözxöñ.

Rácalengaquië' yugu' bönni' zxí'ini xi'sóë' Lot.

<sup>9</sup> Ben quégagaquië' ca benu' quégaca bönachi Madián, nupa na' busunítiu' dërö,  
en ca na' benu' queë' Sísara, en ca na' benu' queë' Jabín ra' yegu Cisón,

<sup>10</sup> nupa na' busunítiu' lu yödzö Endor,  
ate' gulaca ca xiqué'ëba' bëdxi luyú ni'.

<sup>11</sup> Ben quégagaquië' bönni' lo quéguequi  
ca benu' quégagaquië' Oreb, en Zeb,  
en ben quégagaquië' bönni' ta'nná bé'enë' láguequi  
ca benu' quégagaquië' Zeba, en Zalmuna,

<sup>12</sup> nupa na' gula'mná: "Ilequi queérü'  
yugu' lataj gapa na' gulequi queë' Dios."

<sup>13</sup> Dios quia', ben ga ilácagaquië' ca bëchtö yu le riché' bö',  
en ca bëbu zxe café le ruá' bö' budunu'.

<sup>14</sup> Ca run tu gui' zxön, ruzegui' yugu' yaga zxön,  
o ca run tu gui', ruzegui' tu gui'a zxön,

<sup>15</sup> gusí regu' láguequi tu lu bö' budunu',  
en ben gadxi láguequi tu lu nisa guiójsiu' zili.

<sup>16</sup> Ben ga ulu'tui'i  
para ulu'guilaj Li', Xan.

<sup>17</sup> Ben ga ulu'tui'i, en ila'bö' tsaz böniga.

Ben ga ulu'gá'ana cá'asö, en tsaz ila'niti,  
<sup>18</sup> para iléquibe'e nayépisétetu' tuzu' Li' idútë yödzölió  
 en ulu'zoa zxíbiguequi lo', Xantu' Dios.

## 84

<sup>1</sup> ¡Bica' lachi gapa zoa cazu' Li', Dios!  
 ¡Nacu' Xángaca ni'a no'o guizxi yu!

<sup>2</sup> Rizé ládxa'a soa' lu yu'u lidxu', Xana' Dios.  
 Lu yöl-la' rudzeja quia' idú ládxa'a rul-la' quiu' Li', Dios ban.  
<sup>3</sup> Bidzóliba' biguínny chulí' lataj ga nuzóaba' lídxiba',  
 en bidzóliba' xiguichi guziú' ga budxíaba' xicá'aba',  
 ga na' rigú'uba' biguínndo' queéba',  
 gala' ga dë lu bucugu quiu' Li', Xángaca ni'a no'o guizxi yu.  
 Nacu' Nu rinná be'e neda', en nacu' ca' Dios quia'.

<sup>4</sup> ¡Bica' ba nupa ta'yaza lu yu'u lidxu'!  
 ¡Ta'gú'utica'sö Li' yöl-la' ba!  
<sup>5</sup> ¡Bica' ba bönni' nápagaquië' yöl-la' nál-la le nequi queë cazu',  
 en ta'zé ládxi'gaquië' ila'yü'ë nøza le ridxín yödzö Sión!

<sup>6</sup> Cate' ta'dödë' lu yu bidxi tunë' ga ruhuöáca gapa ralaj nisa beaj.  
 Tun ga rizi' xibé yu bidxi na' yugu' nisa guiój ta'dxín bayön.  
<sup>7</sup> Lu yöl-la' huáca quégaquië' röjáquië', en tu'zí'rönë' yöl-la' huáca.  
 Ta'dxinë' yúgu'tëgaquië' lo' Li', Dios, lu yödzö Sión.

<sup>8</sup> Ruzé nagu' le rulidza' Li', Dios, Xángaca ni'a no'o guizxi yu.  
 Ruzé nagu' neda', Dios queë' Jacob.

<sup>9</sup> Buyúë' bönni' rinná bë'enë' netu', Dios.  
 Buyúë' bönni' na' nabó cazu'.  
<sup>10</sup> Nácarö dxí'a soa' tu dza lu yu'u lidxu' ca le soa' idú chi gayuá' dza ga yúbölö.  
 Cöa' zí'alö gaca' huen dxin ga nu riyaza yu'u lidxe' Dios  
 ca le soa caza' tu yu'u zxön ga biti' zoa Dios.

<sup>11</sup> Náquië' Xanru' Dios ca gubidza, en le rusubín rë'u.  
 Xanru' caz runnë' queëru' yöl-la' ruzá' ladxi' queë', en yöl-la' zxön queë'.  
 Biti' ugúë' nitú le naca dxí'a gapa nacuá' nupa tun le naca tsahui'.

<sup>12</sup> ¡Li', Xángaca ni'a no'o guizxi yu,  
 bica' ba bönni' ruzxöni ládxe'ë Li'!

## 85

<sup>1</sup> Buzá' ládxi'u quégaca böñachi quiu', Xantu' Dios.  
 Buchë'u Li' zxí'ini xi'sóë' Jacob gula'dzunë'.  
<sup>2</sup> Buniti lo' böñachi quiu' ca naca xiguiá' gula'baga'.  
 Bucáchu'u yugu' dul-la' gulúngaca.  
<sup>3</sup> Buzúa dxí'u yöl-la' rilé quiu'.  
 Bugú' yöl-la' ridzá'a quiu'.  
<sup>4</sup> Buzúa netu' xilátjatu' le yúbölö, Dios, Nu rusölá netu',  
 en bíti'rö lenu' netu'.  
<sup>5</sup> ¿Naru' tsaz ilenu' netu'?

<sup>5</sup> Naru' tsaz ilenu' yugu' zxí'ini xsoatu'?  
<sup>6</sup> Naru' cabí usubanu' ládxí'tu' le yúbölö,  
 para udzeja ládxí'lentu' Li' netu', böñachi quiu'?  
<sup>7</sup> Lu yöl-la' dxi'i ladxi' quiu' gúcalen netu',  
 en busölä netu', Xan.

<sup>8</sup> Uzé naga' didza' gu'ë Xanru' Dios.  
 Le guíë' böñachi queë' gun ga gaca dxi'a quéguequi,  
 nupa na' nácagaca quez queë',  
 pero run bayúdx biti' ulu'huóa ládxí'gaca.  
<sup>9</sup> Le nácatë chizóë' usölé' nupa tun Lë' bal,  
 para soa yöl-la' ba queë' luyú queëtu'.  
<sup>10</sup> Dzágagaca yöl-la' dxi'i ladxi', en le naca idútë li.  
 Tagu zxixi luzé'eguequi nu naca tsahui', en nu riböza dxi'a tsahui'do'.  
<sup>11</sup> Luyú caz rilén le naca idútë li,  
 ate' yehua' yubá rirúaj le naca tsahui'.  
<sup>12</sup> Le nácatë Xanru' unödzjë' queëru' le naca dxi'a,  
 ate' xiyuru' unödzaj le uláparu'.  
<sup>13</sup> Le naca tsahui' röjnöru lahuë' Xanru',  
 en gun ga soa nöza gáti'tës ga ulibë'.

## 86

<sup>1</sup> Ruzé nagu', Xana' Dios, en rubí'u didza',  
 tu' zoa nu rusaca' zi' neda', ate' riyadzaj riyúdxida'.  
<sup>2</sup> Ben chí'i bö' naca caza', Dios, tu' naca' quiu' Li'.  
 Busölá neda', huen dxin quiu', Dios quia', tu' ruzxöni ládx'a'a Li'.  
<sup>3</sup> Buzá' ladxi' quia', Xan,  
 tu' rulidza' Li' idú dza.  
<sup>4</sup> Ben ga udzeja ládx'a'a neda', huen dxin quiu',  
 tu' rigu'a lu no'o bö' naca caza', Xan.  
<sup>5</sup> Nacu' dxi'a, Xan, en chizú' uniti lo' böñachi quiu'.  
 Nadxf'itica'su' yúgu'të nupa tu'lidza Li'.  
<sup>6</sup> Ruzé nagu' le rulidza' Li', Xan,  
 en ruí'i ládxu'u gunu' yugu' le inábida' lo'.  
<sup>7</sup> Cate' bi gaca quia' ulidza' Li',  
 tu' ubí'i cazu' didza' bi gunu' quia'.  
<sup>8</sup> Cúnturö nu zoa ládjagaca dios nu naca ca nacu' Li', Xan,  
 en biti' zoa ia'tú nu run ca nácagaca le runu' Li'.  
<sup>9</sup> Ila'dxín böñachi yúgu'të yödzö naguixju' Li', Xana' Dios,  
 en ila'yéaj ládxí'gaca Li', en ilún zxön Lo'.  
<sup>10</sup> Nayépisétérösü' Li', en tuzu' Li' runu' yugu' yöl-la' huáca zxön.  
 Tuzu' Li' nacu' Dios.  
<sup>11</sup> Busëdi neda' ca naca le ré'ënu' guna', Xan.  
 Guna' ca naca le naca idútë li naguixju' Li'.  
 Ben ga gádxida' Lo' idú ládx'a'a.  
<sup>12</sup> Idú ládx'a'a guía' Li': "Xclenu'", Xana' Dios,  
 en guna' zxön Lo' yugu' iz si' zaca.  
<sup>13</sup> Nadxf'ide'enu' neda',  
 en chibusölö' bö' naca caza' lu lataj chul-la ga nacuá' nupa chinátigaca.  
<sup>14</sup> Dios quia', nupa ta'dá'baga' neda' ta'díl-lalen neda',  
 ate' yugu' bönni' zidzaj ladxi' té'ënë' ilútie' neda',  
 yugu' bönni' na' biti' tunë' Li' bal.

<sup>15</sup> Nacu' Dios ruhuéchi' ládxu'u netu', Xan, en ruzá' ládxu'u queétu'.  
 Ridzenu' para ilenu' netu', en nadxi'ide'enu' netu', en runu' ca rnna xtídzu'u.  
<sup>16</sup> Buyú neda', en buzá' ladxi' quia'.  
 Butipa ládex'a neda', huen dxin quiu',  
 en busólá neda', zxí'ininu nigula huen dxin quiu'.  
<sup>17</sup> Bulu'i neda' tu le gaca bë' gaca dxi'a quia',  
 para ila'lé'e le nupa biti' ta'lé'e neda' dxi'a.  
 Ulu'tui'i, tu' gúcalenu' neda',  
 en buë tsahú'u neda', Xan.

## 87

- <sup>1</sup> Nuzóë' Dios xilibi zö'ö que yödzö queë' lu guí'a lá'ayi.  
<sup>2</sup> Nadxi'irónë' Xanru' lataj ga na' tu'chi'a tu'sörö bönachi Sión  
 ca nadxi'iné' ia'zíca'rö lataj gapa nacuá' bönachi Israel.  
<sup>3</sup> Zián le lachi ta'nná bönachi ca naca  
 yödz na' nequi queë' Dios.  
<sup>4</sup> Cate' ulidza' bönachi núnbë'gaca neda', Dios,  
 ulidza' bönachi nníta'gaca Egipto, en Babilonia.  
 Ca naca quégaca bönachi Filistea, en Tiro, en Etiopía  
 inníá' nabábagaca yödzö lá'ayi na'.  
<sup>5</sup> Cate' gu'a didza' que yödzö Sión inníá':  
 Bönachi ni, en bönachi izá'a ni nabábagaca le,  
 ate' neda', Dios nayépisétérë', uzó'a tsutsu yödzö na'.  
<sup>6</sup> Cate' ulabë' Xanru' nupa nácagaca queë' inné':  
 "Bönni' ni nababë' yödzö quia'."  
<sup>7</sup> Ni'irö ilui'i didza' nupa tul-la, en nupa tu'cödxi gui, ila'ná:  
 "Ruz'itu' xibé tuzi yödzö ni."

## 88

- <sup>1</sup> Xana' Dios, Nu rusólá neda',  
 rulidza' Li' réla, en te dza.  
<sup>2</sup> Bë' lataj idxín lo' le rulidza' Li'.  
 Ruzé nagu' le rinaba yúdxida' Li'.  
<sup>3</sup> Ruúbi rugu'i ládxí'da'ahua',  
 en chizóa tsöjtsázia' lataj chul-la.  
<sup>4</sup> Chinabábalena' nupa chinátigaca.  
 Naca' ca tu bönni' nudú dërö ládxë'ë,  
<sup>5</sup> en nagá'ané' cá'asö ladaj nupa chinátigaca,  
 en ca nupa dégaca yeru ba,  
 nupa na' bíti'rö röjnenu',  
 en nusán no'o léguequi.  
<sup>6</sup> Nuzú' neda' tu lu yeru zila,  
 ga naca chul-la, en le nácada' zila.  
<sup>7</sup> Rilenu' neda',  
 en rusaca' zi'u neda' tu lu nísado' quiu'.  
<sup>8</sup> Nucuásu' yúgu'të nupa núnbë'a.  
 Nunu' neda' ca tu le ta'guti bönachi.  
 Nadzuna', en biti' gaca irúaja'.  
<sup>9</sup> Tu' rigu'i rizáca'a nudú guioj lahua'.  
 Tu dza tu dza rulidza' Li', Xan.  
 Richisa na'a zaca' ga na' zu'.

<sup>10</sup> ¿Naru' guntso' yugu' yöl-la' huáca zxön para gácalenu' nupa chinátigaca?  
 ¿Naru' ulu'yasa nupa yú'ugaca lataj chul-la,  
 en ila'gú'u Li' yöl-la' ba?  
<sup>11</sup> ¿Naru' ulu'luí'i lahui yöl-la' dxi'i ladxi' quiu'  
 nupa nagáchi'gaca yeru ba?  
 ¿Naru' ulu'luí'i lahui nupa yú'ugaca lataj chul-la  
 ca runu' ca rnna xtídz'u'u?  
<sup>12</sup> ¿Naru' gaca bë' le zxön runu' ga na' naca chul-la?  
 ¿Naru' gaca bë' nacu' tsahui' ga na' cuntu nu bi röjné?

<sup>13</sup> Rulidza' Li' neda' para gácalenu' neda',  
 ate' yugu' zila ridxín lo' le rinábida' Li'.  
<sup>14</sup> ¿Bizz que nusán ládxu'u neda', Xan?  
 ¿Bizz que rucachi' lo' lahua' neda'?  
<sup>15</sup> Riguí'i rizáca'a, en chizóa gátia' ga gudela' naca' bñido'.  
 Réquida' zi' tu' ruxösü' neda', en rudú ládxu'a.  
<sup>16</sup> Nabág'a neda' yöl-la' rilé quiu',  
 ate' chizúa usuniti neda' le ruxösü' neda'.  
<sup>17</sup> Idú dza naca quia' ca nabaga' neda' nisa.  
 Nagú'ugaca neda' lé'ajlö yugu' nisa.  
<sup>18</sup> Nucuásu' ga zoa' nu nadxi'i neda', enca' luzá'a.  
 Zóalensö le naca chul-la neda'.

## 89

<sup>1</sup> Gúl-latica'sa' ca naca yöl-la' dxi'i ladxi' quiu', Xan.  
 Usiyönda' zxí'ini xsoatu' ca runu' ca rnna xtídz'u'u.  
<sup>2</sup> Gunnía': "Sóatica'sö yöl-la' dxi'i ladxi' quiu'.  
 Tsaz naca bë' yehua' yubá ca runu' ca rnna xtídz'u'u."

<sup>3</sup> Rnnë' Dios: "Naguixja' tsaz didza' dzaga núnlena' nupa nabó caza' quia'.  
 Bena' tsutsu xtídz'a ca guna' queë' David, huen dxin quia'.  
<sup>4</sup> Gunnía': Ucuá'a tsaz zxí'ini xi'sú'.  
 Guna' ga sóatica'sö nu inná bë' uláz quiu'."

<sup>5</sup> Nupa nacuá' yehua' yubá quiu' ila'gú'u yöl-la' ba le nunu' le tun ga rubánitu', Xan.  
 Ga nudúbigaca nupa nácagaca quez quiu' ila'gú'u yöl-la' ba ca runu' ca rnna xtídz'u'u.  
<sup>6</sup> ¿Nuzxi caz zoa ni' yehua' yubá naca ca nacu' Li', Xan?  
 ¿Nuzxi caz zoa ladaj nupa nayépiségaca naca ca nacu' Li', Xan?  
<sup>7</sup> Nupa nácagaca lá'ayi tun Li' bal, Dios.  
 Ral-la' gúnröru' Li' bal ca tun nupa nacuá'len Li'.  
<sup>8</sup> Dios, Xángaca ni'a no'o guizxi yu, ¿nuzxi caz naca ca nacu' Li', Xantu' nayépisëtéröu'?  
 Naca bë' rúntica'su' ca rnna xtídz'u'u.  
<sup>9</sup> Rinná be'e quézinu' le riyasa ridxía que nísado'.  
 Cate' riyasa ridxía nísado', ruzúa cazu' le dxisö.  
<sup>10</sup> Busuniti cazu' bönachi Egipto, ate' gulaca ca nupa chinátigaca.  
 Bësilásiu' léguequi len no'o nál-la.  
<sup>11</sup> Nequi quiu' yehua' yubá,  
 en nequi ca' quiu' luyú ni, tu' nuzúa cazu' léguequi.  
<sup>12</sup> Naguixaj cazu' le dë tsölä'a ga za' bö' ziaga,  
 en le dë tsölä'a ga ridödi gubidza beo' ziaga.  
 Lu yöl-la' rudzeja quéguequi ta'bödxi'a guí'a Tabor,  
 en guí'a Hermón cate' ta'yöni Lo'.

<sup>13</sup> ¡Nál-latérö naca no'o!  
 ¡Nápatérö no'o yöl-la' huáca!  
 ¡Nayépisétérö no'o ibëla!

<sup>14</sup> Le naca dxi'a, en le naca tsahui' tun tsutsu le rinná bë'u.  
 Nacuá'len Li' yöl-la' dxi'i ladxi', en le naca idútë li.  
<sup>15</sup> Bica' bágaca nupa ta'yóni didza' que yöl-la' rudzeja.  
 Ta'dá lu bení' que lo', Xantu' Dios.  
<sup>16</sup> Idú dza tu'dzeja tu' zóalen Lo' léguequi,  
 en tu' zóalen léguequi le naca tsahui' quiu', le nayépisétérö.  
<sup>17</sup> Naca cazu' Li' yöl-la' zxön que yöl-la' huáca quéguequi,  
 en tu' ruzá' ládxu'u queétu' nazxönda' yöl-la' nál-la queétu'.  
<sup>18</sup> Nequi queé' Xanru' le run chi'i rë'u,  
 ate' néquiné' queé' Dios bönni' rinná bë'ené' rë'u.  
 Dios na' náquié' lá'ayi ladaj böñachi Israel.

<sup>19</sup> Dza ni'te bë'lenu' nupa néquiguequi quiu' didza'  
 lu yugu' le bulu' inu' léguequi,  
 gunnó': "Gúcalena' tu nu nayépisétérö.  
 Nuchisa' tu nu guró caza' quia' ladaj böñachi.  
<sup>20</sup> Budzólidá -në' David, huen dxin quia'.  
 Gulu'a-në' le za le naca lá'ayi quia'.  
<sup>21</sup> Len na' caza' naguixja' lë',  
 ate' len na'a ca' utipa' ládxë'ë.  
<sup>22</sup> Biti' si' ye'e lë' nu rilé lë',  
 en biti' usaca' zi' lë' nu ruá' dö'.  
<sup>23</sup> Uquínnaja' lahuë' nupa ta'díl-lalen lë',  
 en gu'a nupa biti' ta'lé'e lë' dxi'a.  
<sup>24</sup> Sóalena' lë' lu yöl-la' run ca rnna xtídza'a,  
 en lu yöl-la' dxi'i ladxi' quia',  
 ate' tu' ulidzé' La', uxöna' yöl-la' nál-la queé'.  
<sup>25</sup> Guna' ga inná bë'ë ga naguela' ra' nísado',  
 ga idxintë ra' yegu Eufrates.  
<sup>26</sup> Ulidzé' neda', inné: Li' nacu' Xuza', en Dios quia',  
 enca' Nu run chi'i neda', en Nu rusólá neda'.  
<sup>27</sup> Gun caza' neda' ga gáquié' ca bi'i lo queé caza',  
 ate' tsépisétérö' ca yugu' bönni' ta'nná bë'ë yödzölió.  
<sup>28</sup> Lu yöl-la' dxi'i ladxi' quia' gun ch'itica'sa' lë',  
 en uzó'a' tsaz queé' didza' dzaga quia'.  
<sup>29</sup> Ucuá'a tsaz zxí'ini xi'sóë',  
 ate' sóatica'sö lataj ga inná bë'ë, tsca soa yehua' yubá.  
<sup>30</sup> Channö ulu'cá'ané' zxí'ini xi'sóë' xibá quia',  
 en cabí iluné' ca naca le buchi'a busöró'a',  
<sup>31</sup> en channö ila'guitsjé' xibá que le gunná bë'a,  
 en cabí iluné' ca nácagaca le gunná bë'eda' légaquié',  
<sup>32</sup> ní'irö guna' légaquié' xiguiá' ca sa'yéaj le ta'dödi bë' tuné',  
 en gu'a léguequi ca naca xiguiá' nabága'gaquié'.  
<sup>33</sup> Pero biti' ugúa' queé' yöl-la' dxi'i ladxi' quia',  
 en biti' usana' guna' ca rnna le guzxí' lu na'a guna'.  
<sup>34</sup> Biti' ucá'ana' cá'asö didza' dzaga nuna',  
 en biti' utsá'a didza' bë'a.

<sup>35</sup> Tu le nuzoa' tsutsu, en nuna' ba nalí que le naca lá'ayi quia'.  
Biti' ca' si' yé'eda' David.

<sup>36</sup> Gunnía' ila'cuá'tica'sé' zxí'ini xi'sóë',  
en ga rö'ë rinná bë'ë sóatica'sö lahua' ca gubidza.

<sup>37</sup> Naguixja' le tsaz ca nuzoa' tsaz beo',  
ate' nacuá'tica'sö lúzxiba le tun ba nalí."

<sup>38</sup> Pero nuzú' tsölä'alö, en nusán ládxu'u,  
en riléde'enu' nupa na' gurö cazu' quiu'.

<sup>39</sup> Nuzú' tsölä'alö didza' dzaga bénlenu' huen dxin quiu'.  
Nuzötju' luyú yöl-la' unná bë' queë'.

<sup>40</sup> Nuquínnaju' zö'ö gulún chi'i lë',  
en nusunítiu' yugu' lataj tsutsu queë'.

<sup>41</sup> Yúgu'të nupa ta'dödisö ta'bán le nequi queë',  
ate' bönni' dzaga yu'u queë' tu'cá'ana lë' cá'asö.

<sup>42</sup> Nuchisu' nupa ta'dá'baga' lë',  
en runu' ga tu'dzeja nupa biti' ta'lé'e lë' dxí'a.

<sup>43</sup> Runu' ga biti' sequi' idéli'në' lu gudil-la,  
ate' cuntu nu sequi' ucul-lë' lu gudil-la na'.

<sup>44</sup> Bugú' yöl-la' lachi queë',  
en nuzötju' yöl-la' unná bë' queë' lu yu.

<sup>45</sup> Benu' ga chinagulë' sal-la' ni zoë' iz cuidi',  
en nunu' ga rutu'inë'.

<sup>46</sup> ¿Gáca' xte caz gunu' caní, Xan?  
¿Naru' tsaz nucachi' lo'?

¿Naru' gácatica'sö yöl-la' rilé quiu' ca tu guí réguide'e?

<sup>47</sup> Yöjnë nabábasö iz soa' ibana',  
en tu chí'isö nacuá'bönachi yödzölió ni.

<sup>48</sup> ¿Nuzxi caz bönni' gaca sóatica'sé' ibanë', en cabí gátië'?

¿Naru' huáca usólá cuin cazë' lu yöl-la' unná bë' que lataj chul-la?

<sup>49</sup> ¿Gázxitë zoa yöl-la' dxí'i ladxi' quiu' guzóa zí'alö, Xan,  
lë na' buzú' tsutsu xtídzu'u gunu' queë' David,  
len yöl-la' run ca rnna xtídzu'u?

<sup>50</sup> Yöjnë ca tu'cá'ana cá'asö netu', huen dxin quiu', Xan,  
enca' ca tu'cá'ana neda' cá'asö bönnachi zián yödzö izá'a.

<sup>51</sup> Tu'cá'ana neda' cá'asö nupa biti' ta'lé'e Li' dxí'a, Xan.  
Tu'cá'ana cá'asö yugu' le runa' neda', bönni' gurö cazu' quiu'.

<sup>52</sup> ¡Yöl-la' ba Xanru' Dios iz si' zaca!  
¡Ca' gaca! ¡Ön, ca' gaca!

## 90

<sup>1</sup> Naca cazu' Li', Xan, ca yu'u lidxa'.

<sup>2</sup> Zí'atëlö ca gulata' yugu' guí'a, o ca guta' yödzölió,  
ga naguela' cate' gusí lo ga idxintë dza udxi, tsaz naca cazu' Dios.

<sup>3</sup> Runu' ga tu'huöáca bönnachi bëchtö yu cate' rnno':  
"Guli'huöáca le néquinili', bönnachi."

<sup>4</sup> Quiu' Li' chi gayuá' iz nácagaca  
ca dza neje le chigudödi que,

o ca tu chí'isö chí'i dzö'ölö.

<sup>5</sup> Bugacu' bönnachi ca tu lu yegu gubó'o, ate' gúcagaca ca tu yéla rineru'.

Cate' naca zila zéaj naca ca tu guíxi'do' rilentë luyú.  
<sup>6</sup> Cate' naca lahui' dza rizxón, en rö' ni'a næ'e,  
 pero cate' chiral-la, ricuadi', en ridödi que.  
<sup>7</sup> Rinítitu' tu' rilenu' netu',  
 ate' tu' ridzó'o ruúbi rugu'itu'.  
<sup>8</sup> Nuzú' lo' xiguia' nabága'tu',  
 en nubéaju' lu bení' quiu' dul-la' yu'u ládxi'do'otu'.  
<sup>9</sup> Tu' riléde'enu' netu' ridödi quégaca dza queétu',  
 ate' chibú'u iz queétu' ca tu le rinné ládxi'tu'.  
<sup>10</sup> Tsónnalalaj yu' chi ízisö zóatu' nabantu',  
 o channö nál-latu', huazóatu' idú tápalalaj iz,  
 pero runtu' dxin bayudxi, en ruhu'initu' yugu' iz na',  
 tu' ridöditë quéguequi iz na', ate' uzá'atu'.  
<sup>11</sup> ¿Nuzxi caz réajni'i tsca naca yöl-la' rilé quiu'?  
 ¿Nuzxi caz näzi ca naca tsöbi yu'u nu na' rilenu'?  
<sup>12</sup> Que lë ni na' busédi netu' para guéquibe'etu' tsca gácagaca iz zóatu',  
 para gácatu' böñachi ta'yéajni'i lo' Li'.  
<sup>13</sup> ¿Gáca'xte caz biti' huéchi' ládxi'u netu', Xan?  
 Buéchi' ladxi' netu', yugu' huen dxin quiu'.  
<sup>14</sup> Tu zila tu zila bulu'i netu' ca naca yöl-la' dxi'i ladxi' quiu',  
 para gúl-latu' lu yöl-la' rudzeja queétu', en uzí'itu' xibé yugu' dza na'.  
<sup>15</sup> Ben ga udzéjatu' tsca chigulaca dza busaca' zi'u netu',  
 en tsca gulaca iz biti' guca dxi'a queétu'.  
<sup>16</sup> Bulu'i netu', yugu' huen dxin quiu', ca naca le nunu',  
 en bulu'i zxí'initu' ca naca yöl-la' zxön quiu'.  
  
<sup>17</sup> ¡Buzá' ladxi' queétu', Xantu' Dios,  
 en ben ga irúaj dxi'a dxin runtu'!  
 ¡Ön, ben ga gaca dxi'a lo' dxin runtu'!

## 91

<sup>1</sup> Nu bönni' ruzxöni ládxë'ë Dios para gun chi'ë lë',  
 en rizi'ë Dios Nu napa idúte yöl-la' huáca, para gácalenë' lë',  
<sup>2</sup> gaca guië' Xanru': "Nacu' Nu run chi'i neda', en Nu ruzúa neda' tsutsu.  
 Nacu' Dios quia', ate' ruzxöni ládxa'a Li'."  
<sup>3</sup> Usólá cazé' Dios Li' lu du yalaj que nu rizón böñachi,  
 en lu yödzöhué' le rusuniti.  
<sup>4</sup> Usubágüe'ë li' ca rusubága'ba' böra yugu' bórado' queéba',  
 ate' gaca chi'u lu né'ë ca raca quégacaba' bórado' zxan xílabá' yøjede.  
 Le run chi'i rë'u, en le ruzúa rë'u tsutsu naca yöl-la' run ca rnna xtídzë'ë cheë'.  
<sup>5</sup> Biti' gádxinu' le run gadxi böñachi chi'i dzö'ölö,  
 en biti' gádxinu' yaga lahui tuchi' tu'sé böñachi lahui' dza,  
<sup>6</sup> en biti' gádxinu' yödzöhué' le rilén ga naca chul-la,  
 en biti' gádxinu' le naca xihui' le rutí böñachi lahui' dza.  
<sup>7</sup> Ilátigaca chi gayuá' böñachi cuitu' li',  
 en ia'chí cö' chi gayuá' cuitu' ibéla,  
 pero biti' bi gaca quiu' li'.  
<sup>8</sup> Le nácatë uyú iná'asu',  
 en ilé'enu' le rubí'i quégaca nupa tuá' dö'.  
<sup>9</sup> Tu' nuzú'-në' Xanru' Nu run chi'i li',  
 nuzú'-në' Dios nayépisétérë' Nu gácalen li',

10 biti' bi gaca quiu' le cabí naca dxí'a,  
 en nitú le naché' yödzöhué' biti' tsu'u lidxu',  
 11 tu' cu'u cazé' Dios li' lu ná'agaquië' gubáz lá'ayi queë',  
 para ilún chi'ë li' gáti'tés ga ridó'.  
 12 Lu ná'agaquië' ila'ché'ë li',  
 para cabí tsöjchégú'u guiój.  
 13 Uléaj ulibu' bëdxi guixi', en bëla sínia'.  
 Usunu' lë'e labu' bëdxi guíxi'do', en bëla xitsini'.  
 14 Rnné' Dios: "Nadxi'iné' neda', ate' que lë ni na' usölá' lë'.  
 Uzóa'-në' tsaz xitsá'térö tu' núnbe'ë La'.  
 15 Ulidzé' neda', ate' ubi'a didza'.  
 Sóalena' lë' cate' bi gaca queë'.  
 Usöla' lë', en guna' lë' bal.  
 16 Uzánda'a dza soë' ibanë',  
 en ulu'ida'-në' ca gaca usölá' lë'."

## 92

1 ¡Bica' tsahui' naca rigú'utu' Li' yöl-la' ba, Xan,  
 en rúl-latu' le tun Li' bal, Dios nayépisétérë',  
 2 en rusiyöntu' bönachi yugu' zila ca ruhuéchi' ládxu'u netu',  
 en rului'itu' lahui yugu' dzö' ca runu' ca rnna xtídzu'u!  
 3 Rúl-latu' len yugu' bihuél-la,  
 en rúl-latu' yugu' le lachi ca tul-la.  
 4 Le zxön nunu' Li', Xan, run ga rudzéjatu',  
 ate' ruzi'tu' xibé le núngaca lu no'o.  
 5 Bica' zxön nácagaca le nunu' Li', Xan.  
 Zxóntérö le rizá' ládxu'u gunu'.  
 6 Zoa tu le cabí gaca inózinë' bönni' nazxí icjë',  
 en biti' gaca tséjní'iné' bönni' canóz le.  
 7 Nupa nucá'anagaca Dios ila'yán ca ta'yán guíxi'do',  
 en ulu'zí' xibé le tun nupa tuá' dö', pero ila'niti tsaz,  
 8 tu' nayépsétérü' Li' tsaz, Xan.  
 9 Naca bë' le gaca quégaca nupa biti' ta'lé'e Li' dxí'a, Xan.  
 Naca bë' ila'niti nupa biti' ta'lé'e Li' dxí'a.  
 Ulu' gá'ana cá'asö yúgu'té nupa tuá' dö'.  
 10 Nunu' ga nácatéra' nal-la ca nácabá' bëdxi.  
 Nagú'u neda' le za le run ga rudzéjada'.  
 11 Ilé'e quézida' cate' uxicju' nupa biti' ta'lé'e Li' dxí'a,  
 en yönda' cate' ila'bödxi yechi' nupa tuá' dö', nupa na' ta'díl-lalen neda'.  
 12 Ila'yán nupa nácagaca tsahui' ca ta'yán yaga zina' ca'.  
 Ila'zxón ca ta'zxón yaga ró'gaca lu guí'a Líbano.  
 13 Nácagaca ca yaga nudá'gacu' ra' yu'u lidxu', Xan,  
 le ta'zxón lu lö'a lataj quiu', Dios queétu'.  
 14 Cate' ni' yú'ugaca iz zián ila'bía le zxixi quéguequi.  
 Ilácagaca tsutsu, en ila'cuá'tica'sö ya'a.  
 15 Caní gaca para gaca bë' náquië' tsahui' Xanru', Nu run chi'i neda'.  
 Biti' bi zóalen Lé' le cabí naca tsahui'.

## 93

1 ¡Rinná bë'ë Xanru'!  
 ¡Nácuë' yöl-la' ba zxön queë'!  
 ¡Nácuë' zxë' Xanru', en núguië' lë'ë yöl-la' unná bë'!

¡Nuzóë' tsutsu yödzölió, ate' biti' utá cuini!

<sup>2</sup> ¡Tsaz nuzú' tsutsu ga rö'u rinná bë'u, Xan,  
en zóatica'su' Li'!

<sup>3</sup> Riyasa ridxía nisa yugu' lu nísado', Xan.

Riyasa ridxía nisa, en ru'u bö que.

Riyasa ridxía nisa yugu' lu nísado', en yugu' lu yegu.

<sup>4</sup> Xanru' Dios yehua' yubá nápatérë' yöl-la' unná bë'  
ca bö ru'u lu nísado' le riyoñ ca guziú' rinné,  
enca' ca le riyasa ridxía nisa lu nísado'.

<sup>5</sup> Tsaz naguixju' xibá quiu', Xan,  
ate' idú lá'ayi naca ga zoa cazu' Li'.  
Caní zóatica'sö na'a dza, en dza si' zaca.

## 94

<sup>1</sup> Nacu' Dios, Xan, Nu ruzí' lëbi bönachi.  
Bulu'i cuinu', Dios, Nu ruzí' lëbi.

<sup>2</sup> Ruchi'a rusörö' cazu' yúgu'të bönachi.

Guzé, ate' len yöl-la' huáca zxön quiu' bubí'i quégaca nupa tun ba zxön cuínguequi.

<sup>3</sup> ¿Gáca'zte caz ulu'zí' xibé nupa tu'cá'ana Li', Xan?

¿Gáca'zte caz ulu'zí' xibé?

<sup>4</sup> ¿Gáca'zte caz ilún ba zxön cuínguequi, en ilu'i didza' zi'?

¿Gáca'zte caz ilún ba zxön cuínguequi ni'a que dö' tuá'gaca?

<sup>5</sup> Tu'sunítië' nupa néquiguequi quiu', Xan.

Tu'saca' zi'ë nupa néquiguequi quez quiu'.

<sup>6</sup> Tútigaquië' nigula uzébi, enca' yugu' bi'i uzébido',  
en tunë' le naca xihui' ladaj bönnachi zi'tu'.

<sup>7</sup> Ta'nné': "Biti' ilé'enë' Xángaquië' rë'u,  
en biti' rui'i ládxë'ë Dios queë' Jacob lë ni."

<sup>8</sup> Guli'tséajni'i, bönnachi biti' nözguequi,  
ate' libí'ilí, bönnachi catún bal, ¿bátaxi tséajni'ili'?

<sup>9</sup> Benë' Dios guídi nágaru'. ¿Naru' cabí riyoñ quézinë'?

Benë' Dios guíoj loru'. ¿Naru' cabí rilé'e quézinë'?

<sup>10</sup> Ruzéajni'i quézinë' Dios bönnachi yúgu'të yödzö.

¿Naru' cabí gunë' léguequi xigua'?

Ruchiza cazë' icja ládxí'do'oru' yöl-la' réajni'i.

¿Naru' cabí réquibe'enë' bi runli'?

<sup>11</sup> Nöz quézinë' Xanru' yugu' le ta'zá' ládxí'gaca bönnachi.

Nözinë' canóz naca le ta'zá' ládxí'gaca.

<sup>12</sup> Bica' ba bönni' na' ruzéajni'i quézinu'-në', Xan,  
en rusedi quézinu'-në' ca naca xibá naguixju' Li'.

<sup>13</sup> Gunu' ga uzi' ládxë'ë cate' bi gaca queë',  
ga idxinrö dza tsú'ugaca yero ba nupa tuá' dö'.

<sup>14</sup> Biti' usán në'ë Xanru' bönnachi queë',  
en biti' ucá'anë' nupa néquiguequi quez queë'.

<sup>15</sup> Ca naca le naca tsahui' uchi'a usöröë' rë'u le yúbölö,  
ate' ulu'zí' xibé nupa nácagaca tsahui'.

<sup>16</sup> ¿Nuzxi caz tfl-lalen nupa tuti bönachi para gácalen neda'?

¿Nuzxi caz gácalen neda' cate' nacuá' nupa tuá' dö' quia'?

<sup>17</sup> La'tu' cabí gúcalené' Xanru' neda',

la' yöjtsú'utea' lataj chul-la que yöl-la' guti.

<sup>18</sup> Gunnía': "Chizóa' ibixa"

ate' lu yöl-la' dxi'i ladxi' quiu' guzxönu' neda', Xan.

<sup>19</sup> Cate' ruúbi rugu'i ládxi'da'ahua',

ruhué tsahú'u neda', en runu' ga rudzéjada'.

<sup>20</sup> Biti' ca' gunu' tsözxón nupa tu'chi'a tu'sörö netu' ca naca le cabí naca tsahui',

nupa na' tu'béaj tsahui' le cabí naca tsahui'.

<sup>21</sup> Tu'dubë' tsözxón para ilútië' nupa nácagaca tsahui',

en ta'chúguië' quégaca nupa biti' bi nabága'gaca ilátigaca,

<sup>22</sup> pero run chi'i cazé' Xanru' Dios neda'.

Nuzoë' neda' tsutsu, ate' ruzxöni ládxa'a lë'.

<sup>23</sup> Ubi'ë quégaquië' ca naca dö' tu'ë,

en usunítië' légaquië' tu' nözi xigui'a nabága'gaquië'.

Usunítië' dërö Xanru' Dios légaquië'.

## 95

<sup>1</sup> Guli'dá, gúl-laru' queë' Xanru' lu yöl-la' rudzeja queëru'.

Lu yöl-la' rudzeja queëru' códxi'aru' que Nu na' naca ca tu guiójto'o ga nuláru'.

<sup>2</sup> Uyéajru' lahuë', en guiéru'-në: "Xclenu'."

Lu yöl-la' rudzeja queëru' códxi'aru' lahuë', gúl-laru' yugu' salmo.

<sup>3</sup> Xanru' Dios náquië' Dios nayépisétëre'.

Nápatérë' yöl-la' unná bë' ca yúgu'të dios izá'a.

<sup>4</sup> Lu na' cazé' yu'u le dë ga rë' zxan luyú,

ate' néquiguequi ca' queë' guí'a sibi.

<sup>5</sup> Nequi queë' nísado', tu' nun cazé' le,

en len ná'asë' benë' luyú bidxi.

<sup>6</sup> Guli'dá, gunru'-në' zxön, en uzóa zxíbiru' lahuë'.

Uzóa zxíbiru' lahuë' Xanru' Nu ben rë'u.

<sup>7</sup> Naca cazé' Lë' Dios queëru',

ate' nácaru' bönachi rugagu cazé', en ca bö'cu' zxila' riché' cazé'-ba' lu në'ë.

Rnna cazé' Dios: "Na'a, channö rë'ënili' yónili' chí'a,

<sup>8</sup> biti' gunli' zidzaj icja ládxi'do'oli' ca guluné' xuz xtó'oli' lataj na' lë Meriba,

en caléga ca guluné' la' guixi' ga dë lataj lë Masa,

<sup>9</sup> cate' ni' gula'zí' bë'ë xuz xtó'oli' neda'.

Gula'zí' bë'ë neda' sal-la' bila'lé'enë' yugu' le bena'."

<sup>10</sup> Idú choá' iz gúquida' zi' bönachi gula'cuá' dza ni',

ate' gunnía': "Ta'chixi ta'níguiné' lu icja ládxi'do'gaquië',

en biti' nözguequiné' le rë'ënda' iluné'."

<sup>11</sup> Que lë ni na' lu yöl-la' rilé quia' bena' tsutsu xtídfa'a,

gunnía': "Biti' ca' ila'yázië' ga ulu'zí' ládxë'ë tsözxón len neda'."

## 96

<sup>1</sup> ¡Guli'gul-la queë' Xanru' tu le cubi!

¡Guli'gul-la queë' Xanru', yúgu'téli' zóali' yödzölió!

<sup>2</sup> ¡Guli'gul-la queë' Xanru'! ¡Guli'gún zxön lë'!

Tu dza tu dza buli'siyón bönachi didza' dxi'a ca rusólé' rë'u.

<sup>3</sup> Buli'siyón bönachi yúgu'té yödzö yöl-la' ba queë'.  
 Buli'siyón yúgu'té bönachi le nácagaca zxön nunë'.  
<sup>4</sup> Zxóntérö náquië' Xanru', ate' ronda' bayúdx cú'uru'-në' yöl-la' ba.  
 Ral-la' gádxítéru' Lë' ca tadxi bönachi izá'a dios quéguequi.  
<sup>5</sup> Yugu' dios quégaca bönachi izá'a nácagacasö budó' guiój budó' yaga,  
 pero Xanru' Dios nunë' lúzxiba xitsá'.  
<sup>6</sup> Nacuá' yöl-la' bení', en yöl-la' ba lahuë' Lë'.  
 Nacuá' yöl-la' huáca, en yöl-la' lachi ga zoa cazë'.

<sup>7</sup> ¡Guli'cu'ë Xanru' yöl-la' ba, bönachi yúgu'té yödzö!  
 ¡Guli'cu'ë yöl-la' ba, en yöl-la' huáca!  
<sup>8</sup> ¡Guli'cu'ë Xanru' yöl-la' ba ni'a que Lë'!  
 ¡Guli'guá' le unórdzjali', en guli'dá lahuë'!  
<sup>9</sup> ¡Guli'gún Lë' zxön, náculi' le naca ba'a!  
 ¡Guli'zxizi lahuë', bönachi idútë yödzölió!

<sup>10</sup> Guli'nná lógaca bönachi yúgu'té yödzö: "Rinná bë'ë Xanru'.  
 Naguixjé' tsaz luyú, ate' biti' utá cuini.  
 Ca naca le naca tsahui' uchi'a usöröë' quégaca yúgu'té bönachi."

<sup>11</sup> Ral-la' udzeja lúzxiba, en ulu'zí' xibé luyú.  
 Ral-la' códxi'a nísado', en ila'bödxi yúgu'té le nacuá' lu nísado'.  
<sup>12</sup> Ral-la' udzeja guixi' caz, en yúgu'té le nacuá' la' guixi'.  
 Lu yöl-la' rudzeja quéguequi ilúl-la yaga  
<sup>13</sup> lahuë' Xanru', tu' si' ulé'.

Guídë' duchi'a dusöröë' nupa nacuá' yödzölió.  
 Ca naca le naca tsahui' uchi'a usöröë' quégaca yúgu'té bönachi,  
 enca' quégaca bönachi yúgu'té yödzö para ilunë' ca rnna xtídzë'ë.

## 97

<sup>1</sup> ¡Rinná bë' cazë' Xanru' Dios!  
 ¡Ral-la' ulu'dzeja bönachi idútë yödzölió!  
 Buli'sí' xibé', libí'ili' zóali' yúgu'té yödzö izá'a.  
<sup>2</sup> Rö'gaca böaj, en le chul-la idú gásibi'ilö ga na' zoë'.  
 Le naca dxi'a, en le naca tsahui' tu'zóa tsutsu le rinná bë'ë.  
<sup>3</sup> Rinöru tu guí' zxön lahuë',  
 le uzegui' nupa ta'dá'baga' Lë'.  
<sup>4</sup> Tu'zení' le ta'yépi yösa yödzölió.  
 Rilé'e luyú lë ni, en rizzizi.  
<sup>5</sup> Tu'úna' guí'ado' ca ruún bidxina' buz lahuë' Xanru'.  
 Náquië' Xani idútë yödzölió.  
<sup>6</sup> Lúzxiba xitsá' naca bë' náquië' tsahui',  
 ate' ta'lé'e bönachi yúgu'té yödzö yöl-la' zxön queë'.  
<sup>7</sup> Tu'tu'i yúgu'té nupa tun zxön budó' guiój budó' yaga,  
 nupa na' tun ba zxön cuínguequi ni'a quégaca budó' quéguequi na'.  
 Ulu'gá'ana cá'asö yúgu'té dios quégaca bönachi izá'a lahuë' Xanru'.  
<sup>8</sup> Bila'yöni bönachi Sión, en bulu'dzeja,  
 enca' yugu' zxí'ini xi'sóë' Judá.  
 Tu'dzéjanë' ca ruchi'a rusöröu' netu', Xan.

<sup>9</sup> Nayépisétérö cazu' Li', Xan, ca yúgu'të nupa nacuá' yödzölió.

Nayépisétérö cazu' Li' ca yúgu'të dios quégaca bönachi izá'a.

<sup>10</sup> Núloli' nadxi'ilí'-në' Xanru', guli'guequi zi' le naca dö'.

Run chi'i cazë' bö' nácagaca caz nupa néquiguequi queë'.

Rusölé' léguequi lu ná'agaca nupa tuá' dö'.

<sup>11</sup> Ruzenítica'sö bení' queë' nupa nácagaca tsahui',

ate' tu'zí' xibé' nupa nácagaca dxi'a.

<sup>12</sup> ¡Buli'sí' xibé' Xanru' núloli' nácali' tsahui'!

¡Buli'subán ládxi'ilí' ca nunë' Dios Lá'ayi, en guli'cu'ë yöl-la' ba!

## 98

<sup>1</sup> ¡Guli'gul-la queë' Xanru' tu le cubi,  
tu' nunë' le tun ga rubániru'!

Len yöl-la' unná bë' zxön queë', en yöl-la' huáca lá'ayi queë' nadéli'në' lu gudil-la.

<sup>2</sup> Nunë' Xanru' ga naca bë' le nadéli'në'.

Nulu'iné' bönachi yúgu'të yödzö náquië' tsahui'.

<sup>3</sup> Len yöl-la' dxi'i ladxi' queë', en yöl-la' li ladxi' queë'

benë' ca rnna xtídzë'ë le guzxi' lu në'ë gunë' quégaca bönachi Israel.

Bila'lé'e bönachi idútë yödzölió ca busölé' rë'u Dios queëru'.

<sup>4</sup> ¡Lu yöl-la' rudzeja queéli' guli'gul-la queë' Xanru', yúgu'téli' zóali' yödzölió!

¡Idú ládxi'ilí' guli'cu'ë yöl-la' ba, en guli'gul-la queë' le naca lá'ayi!

<sup>5</sup> ¡Guli'gul-la queë' Xanru' yugu' salmo, en guli'quinnaj yugu' bihuél-la!

¡Guli'quinnaj lë'egaca arpa, en guli'gul-la yöl-la' ba queë'!

<sup>6</sup> ¡Guli'cödxi lúzugacaba' chivo, en lúzugacaba' bëdxi

lahuë' Xanru' Dios, Nu rinná bë'!

<sup>7</sup> ¡Buli'lidza zidzaj, nísado', en yúgu'të le nacuá' nisa na'!

¡Guli'gul-la yödzölió, en yúgu'të nupa nacuá' ni'!

<sup>8</sup> ¡Guli'capa' ná'ali', yugu' yegu,

ate' lu yöl-la' rudzeja queéli' guli'gul-la lahuë' Xanru', libí'ili', guí'ado',

<sup>9</sup> tu' zë'ë duchi'a dusöröö' quégaca bönachi yödzölió!

Ca naca le naca tsahui' uchi'a usöröö' quéguequi,  
en ca naca le naca dxi'a tsahui' inná bë'enë' yúgu'të bönachi.

## 99

<sup>1</sup> ¡Rinná bë'ë Xanru' Dios! Ta'zxizi yúgu'të bönachi.

Rö'ë rinná bë'ë ladaj nupa nápagacatérö yöl-la' huáca,  
légaca Querubín, ate' rizxizi luyú.

<sup>2</sup> Nayépisétérö' Xanru' lu yödzö Sión,

ate' rinná bë'enë' bönachi yúgu'të yödzö izá'a.

<sup>3</sup> Ral-la' ila'gú'u Lë' yöl-la' ba yúgu'të bönachi,  
tu' caní sa'yéaj, en le run ga runru' Lë' bal.

¡Lá'ayi náquië' Lë'!

<sup>4</sup> Nadxi'i quézinu' le naca tsahui', Li', Bönni' unná bë' nayépisë.

Tsaz naguixju' le naca dxi'a tsáhui'do',

en nuzú' quégacu'ë zxí'ini xi'sóë' Jacob le naca tsahui', en le naca idútë li.

**5** ¡Guli'gún zxönë' Xanru' Dios!  
Buli'zechu zxibili' lahuë' Lë' ga rö'ë rinná bë'ë.  
¡Lá'ayi náquië' Lë'!

**6** Guláquië' Moisés, en Aarón bixúz queë',  
ate' benë' Samuel tsözxón nupa gula'yéaj ládzi'gaca Lë'.  
Bulu'lidzë' Xanru', ate' bubí'i cazë' didza'.  
**7** Tu lu böaj bë'lenë' légaquië' didza'.  
Gulunë' ca ta'nná bë' xibá queë', en yugu' le gunná bë'enë' légaquië'.

**8** Bubi'u didza' lógaca bönachi quiu', Xantu' Dios.  
Bulu'inu' légaquië' nacu' Dios, en runuti lo' bönachi,  
pero rubi'u quégaquië' ca sa'yéaj dö' tu'ë.

**9** ¡Guli'gún zxönë' Xanru' Dios!  
¡Buli'zechu zxibili' lahuë' lo guí'a lá'ayi ga zoa cazë',  
tu' náquië' lá'ayi Xanru' Dios!

### 100

**1** ¡Lu yöl-la' rudzeja queéli' guli'gul-la queë' Xanru',  
lib'ili' zóali' idútë yödzölió!  
**2** ¡Lu yöl-la' rudzeja queéli' guli'cu'ë yöl-la' ba Xanru'!  
¡Guli'dá lahuë' Lë', en lu yöl-la' rudzeja queéli' guli'gul-la queë'!  
**3** ¡Guli'tsöjné Xanru', náquië' Dios!

Buzá' cazë' rë'u, en caléga rácasö queéru' zóaru'.  
Nácaru' bönachi queë', en nácaru' ca bö'cu' zxila' queë'.  
**4** Guli'tsaza zaca' ra' yu'u queë', guiéli'-në': "Xclenu'."  
Guli'tsaza gapa naca lö'a queë', cú'uli'-në' yöl-la' ba.  
Guli'guíe': "Xclenu'", en guli'gunë' zxön.

**5** ¡Náquië' dxi'a tsahui' Xanru' Dios, ate' zóatica'sö yöl-la' dxi'i ladxi' queë'!  
¡Zóatica'sö yöl-la' run ca rnna xtídzë'ë queë'!

### 101

**1** ¡Gul-la' ca runu' ca rnna xtídzu'u, en ca nacu' tsahui'!  
¡Gul-la' yöl-la' ba quiu' Li', Xan!

**2** Gü'i ládex'a' guna' le naca idú dxi'a.  
¿Bátaxi huécju' quia' neda'?  
Lu yu'u lidxa' guna' le naca idú ladxi'.  
**3** Biti' gu'a lataj sóalen neda' nitú le naca xihui'.  
Biti' rilé'eda' dxi'a le tun nupa tu'cá'ana Li'.  
Biti' ca' guna' léguequi tsözxón.

**4** Biti' ca' gaca' chopla ladxi'.  
Biti' ca' guna' le naca dö'.  
**5** Usunítia' dërö nu bönni' rinné' que luzé'ë balando'os.  
Biti' ca' guá' ilena' nu run ba zxön cuini.  
**6** Uyúa' dxi'a tsáhui'do' nupa tun ca rnna xtídz'a'guequi luyú ni, para ila'cuá'len neda'.  
Nu biti' bi xiguia' nabaga' huáca gun xichina'.  
**7** Biti' ca' tsöjsóa lidxa' nu rizi' yë'.  
Biti' gu'a lataj ugá'ana lahua' nu ru'i didza' le cabí naca.

<sup>8</sup> Yugu' zila usunítia' yúgu'té nupa tuá' dö' luyú ni,  
para ucuita' lu yödzö queë' Xanru' yúgu'té nupa tuti böñachi.

## 102

<sup>1</sup> ¡Buzé nagu' le rulidza' Li', Xan!  
¡Bë' lataj idxín lo' le rinaba yúdxida' Li'!  
<sup>2</sup> Biti' ucache' cuinu' lahua' cate' bi rusaca' zi' neda'.  
Buzé nagu' neda', en gudáchi ubi'u didza' cate' rulidza' Li'.

<sup>3</sup> Yöl-la' na'bán quia' ruúlu ca dzön,  
ate' régui rilá lu dxita lu bin quia' ca tu guí'.  
<sup>4</sup> Rudú ládex'a ca raca que guixi' nabidxi,  
en bíti'rö rizé ládex'a bi gahua'.  
<sup>5</sup> Tu' rinnëda' ládex'a nadxítalë'a.  
<sup>6</sup> Naca' ca tuba' biguínni zóaba' luyú bidxi,  
o ca tuba' cuturú dxíaba' tu lu yu'u nadachi.  
<sup>7</sup> Nabéaj yëla guiój lahua',  
ate' naca' ca tuba' biguínndo' dxíaba' túziba' ícjo'o yu'u.  
<sup>8</sup> Yugu' dza nupa biti' ta'lé'e neda' dxi'a tu'didza' yudxi neda'.  
Nupa tu'titaj neda' tu'gún dxin la' cate' nu tu'dxía dö'.  
<sup>9</sup> Naca le rahua' ca dödo'sö,  
en nutsi' nisa ribödex'a le ré'ja'.  
<sup>10</sup> Caní raca quia' tu' rilenu' neda', en réquinu' neda' zi'.  
Gulisu' neda', en gurú'unu' neda' tsölá'alö.  
<sup>11</sup> Naca yöl-la' na'bán quia' ca tu zxul-la rilá' cate' ribía gubidza,  
en rudú quia' ca raca que guixi' ricuádi.

<sup>12</sup> ¡Li', Xan, zóatica'su',  
en zóalentica'sö Lo' böñachi!  
<sup>13</sup> ¡Chasu', en huéchi' ládxu'u böñachi yödzö Sión!  
¡Chibidxín dza gü'i ládxu'u léguequi!  
¡Ön, chibidxín dza na'!

<sup>14</sup> Netu', huen dxin quiu', nadxi'itu' yugu' guiój nacuá' lu zö'ö run chí'i yödzö Sión,  
en rui'i ládxu'tu' ga ridxitö bëchtö rö'ö la' nöza que.  
<sup>15</sup> Bönachi yugu' yödzö izá'a iladxi Lë' Xanru',  
ate' nupa ta'nná bë' yödzölio iladxi yöl-la' zxön queë'.

<sup>16</sup> ¡Nuchisë' Xanru' caz yödzö Sión,  
ate' ulu'i lahuë' ni' lu yöl-la' zxön queë'!  
<sup>17</sup> Riyönnë' le tu'lidza Lë' nupa ta'yadzaj ta'yudxi.  
Biti' ca' uzóë' tsölá'alö le tu'lidza yudxi Lë'.

<sup>18</sup> Buli'zúaj lë ni lu guichi para ulu'laba zxí'ini xi'sóali' le,  
ate' nupa si' ilalaj ila'gú'u Xanru' yöl-la' ba.  
<sup>19</sup> Ga ni' ribözë' Xanru' xitsá' lu lataj lá'ayi queë',  
ga ni' zoë' Xanru' yehua' yubá, ruzé naguë'.  
<sup>20</sup> Riyönnë' le ta'nné ladxi' nupa nadzúngaca,  
en usanë' nupa narugu quéguequi ilátigaca.  
<sup>21</sup> Soa nu usiyöni böñachi yödzö Sión ca naca Lë' Xanru',  
ate' ila'gú'u Lë' yöl-la' ba lu yödzö Jerusalén,  
<sup>22</sup> cate' ulu'dubi tsözxón böñachi yugu' yödzö izá'a,

en bönachi yugu' luyú,  
ate' tsözxőn ila'gú'u yöl-la' ba Xanru'.

<sup>23</sup> Benë' Xanru' ga gucuídi'da' la' nöza,  
en nunë' ga soa' nabábasö dza.

<sup>24</sup> Gunnía': Dios quia', biti' gútiu' neda'  
cate' ni zoa' gatsaj iza ral-la' soa' ibana'.  
Zóatica'sö cazu' Li'.

<sup>25</sup> Dza ni'te gudixju' yödzölió,  
ate' len na' cazu' benu' lúzziba.

<sup>26</sup> Huadödi quéguequi, pero Li', tsaz idiu'.  
Ilexu' yúgu'téguequi ca riyexu' lari',  
en ca tu lari' utubu' léguequi, en utsó'o léguequi.

<sup>27</sup> Li', biti' ca' utsá' cuinu', en biti' ca' guexu'.

<sup>28</sup> Zxi'inigaca huen dxin quiu' ila'böza dxi'a tsáhui'do',  
ate' ucú'u tsutsu zxifini xi'sóagaquie' lo'.

### 103

<sup>1</sup> ¡Bil-la yöl-la' ba queë' Xanru', li', bö' naca caza',  
ate' idútë le naca', bil-la yöl-la' ba que Lë' lá'ayi!

<sup>2</sup> ¡Bil-la yöl-la' ba queë' Xanru', li', bö' naca caza',  
en biti' gal-la ládxu'u yúgu'të le ruzi'u xibé'!

<sup>3</sup> Runiti lo cazë' neda' ca naca yúgu'të dul-la' nabága'a,  
en rugüë' yúgu'të xihuë'a.

<sup>4</sup> Ruhuöá uë' neda' lu lataj chul-la,  
en ruzá' ládxë'ë quia' yöl-la' dxi'i ladxi', en yöl-la' ruhuéchi' ladxi'.

<sup>5</sup> Rigu'ë xinöza' yugu' le naca dxi'a,  
lë na' run ga ruhuöáca' ca tu bönni' zoë' iz cuidi' queë',  
ca na' raca queéba' bisiá'.

<sup>6</sup> Runë' yugu' le naca dxi'a,  
en ruchi'a rusöröö' quégaca yúgu'të nupa zoa nu rusaca' léguequi zi'.

<sup>7</sup> Buzéajni'inë' Moisés yugu' le gun cazë' Lë',  
en bulu'inë' bönachi Israel yugu' le zxön runë'.

<sup>8</sup> Xanru' ruhuéchi' ladxi' cazë' bönachi, en ruzá' ládxë'ë quéguequi.  
Biti' riletenë', pero nadxi'itiqu'sinë' léguequi.

<sup>9</sup> Biti' ruzétiqui'sinë' rë'u le bach,  
en biti' riletiqui'sinë'.

<sup>10</sup> Biti' runë' rë'u xiguia' ca sa'yéaj dö' nuá'aru',  
en biti' rubi'ë queëru' ca naca le xihui' nabága'ru'.

<sup>11</sup> Naca caní tu' ca na' naca xitsá'térö lúzziba ca luyú ni,  
la' canísö naca zxön ca nadxfi'inë' Xanru' nupa tadxi Lë'.

<sup>12</sup> Tsca nácatérö zi'tu' ga rilén gubidza ga ridxitë ga ribía,  
la' canísö rucuitë' yugu' le ta'bága'ru' Lë'.

<sup>13</sup> Ca na' ruhuéchi' ládxë'ë xúzgaca cázabi' yugu' zxifinë',  
la' canísö ruhuéchi' ládxë'ë Xanru' nupa tadxi Lë'.

<sup>14</sup> Caní runë' tu' nözinë' le nácaru'.  
Röjnenë' néquiniru' bëchtö yu.

<sup>15</sup> Tsca nácagaca dza zóaru' nabanru',  
nácagaca ca raca que xiyija guíxi'do'.

<sup>16</sup> Cate' recaj bö', ruúlu runítisö xiyija na',  
en biti' naca bë' ga na' guzóa.

- <sup>17</sup> Xanru', tsaz nadxf'iné' nupa tadxi Lë',  
en runé' quégaca zxí'iniguequi le naca dxi'a.
- <sup>18</sup> Caní runé' quégaca nupa tun ca rnna xtídzé'ë,  
en quégaca nupa tun ca rinná bë' xibá queë'.
- <sup>19</sup> Naguixje' Xanru' xilatjé' yehua' yubá ga na' rö'ë rinná bë'ë.  
Rinná bë'enë' yúgu'të le dë.
- <sup>20</sup> ¡Guli'cu'ë yöl-la' ba Xanru', libí'ili', gubáz lá'ayi queë',  
nápatéröli' yöl-la' huáca zxön, en runli' ca rnna xtídzé'ë,  
libí'ili' na' runli' ca rnna didza' ru'ë!
- <sup>21</sup> ¡Guli'cu'ë yöl-la' ba Xanru', libí'ili' nácali' ni'a né'ë guizxi yu,  
libí'ili', huen dxin queë' na', runli' ca ré'ëni quézinë' Lë'!
- <sup>22</sup> ¡Guli'cu'ë yöl-la' ba Xanru', yúgu'teli' na' nucu'ë libí'ili',  
libí'ili' zóali' yúgu'të lataj ga na' rinná bë'ë Lë'!  
¡Bil-la yöl-la' ba queë' Xanru', li', bö' naca caza'!

## 104

<sup>1</sup> ¡Gulu'ë yöl-la' ba Xanru', li', bö' naca caza'!

- ¡Nayépisétetu' Li', Xana' Dios!  
¡Zxo' nacu' naca yöl-la' zxön, en yöl-la' ba!
- <sup>2</sup> ¡Nusubaga' cuinu' bení' ca zxo' nacu cazu',  
ate' naguixaj cazu' lúzxiba ca tu lari' zxön!
- <sup>3</sup> Naguixju' xilataj lidxu' lahui nisa dë xitsá'alö.  
Dxía cazu' lu böaj ca tu lu carreta, en ridó' lu bö'ös.
- <sup>4</sup> Rugunu' dxin bö' raca ca tu gubáz quiu',  
enca' yugu' guí' ca huen dxin quiu'.
- <sup>5</sup> Nuzú' tsutsu luyú ni lu xilibi,  
en biti' ca' gaca nu utsá' xilataj.
- <sup>6</sup> Gudixju' nisa zxön luyú ni ca tu lari' nabaga' le,  
ate' yöjbaga' nísado' na' yugu' guí'a.
- <sup>7</sup> Buzenu' le bach nisa na', ate' burúaj,  
en cate' biyón chi'u, bayúdx buzxunnaj nisa na'.
- <sup>8</sup> Gurén yugu' lu guí'a, en bötaj ga naca ra' yegu,  
ga bidxité yöjsóa ga nupo'o que nisa na'.
- <sup>9</sup> Gudixju' buzá' que nísado' ga biti' gaca tödi.  
Bíti'rö caz tseajbaga' nisa na' luyú bidxi.
- <sup>10</sup> Runu' ga ralaj beaj yugu' lé'e guí'ado',  
enca' ga ta'dödi yegu ga rö'ögaca röga'.
- <sup>11</sup> Yudzu yugu' yegu na' nisa té'ajba' böa' guixi',  
le rugúa yöl-la' ribídx quégacaba' burro ta'dásiba' la' guixi'.
- <sup>12</sup> Yugu' ra' yegu rö'ögaca yaga ga tu'dxíaba' biguínnido' xcá'agacaba',  
en túl-laba' yugu' lu ni'a né'eguequi.
- <sup>13</sup> Rigú'u nisa guijo' quiu' yugu' lu guí'a,  
en runu' ga tu'huöla tu'dzé'e yugu' le dzö'ö luyú.
- <sup>14</sup> Runu' ga rizxón yö le táguba' böa' bëdx,  
en yugu' cuan guixi' tu'gún dxin bönachi,  
le ilagu ni'a que le nudó'o luyú,
- <sup>15</sup> en xisi uva le run ga tudzeja ládxí'guequi,  
en za olivo le ta'gú'u láhuiguequi lu yöl-la' ruzí' xibé quéguequi,  
en yöta le nabániguequi.

- <sup>16</sup> Tu'zí' xibé nisa guiój yaga cedro dzö'ö lu guí'a Líbano,  
yugu' yaga na' budó'o, Xantu'.
- <sup>17</sup> Ni' tu'dxiaba' biguínni xcá' agacaba',  
ate' tunba' biyúz lídxigacaba' ni'.
- <sup>18</sup> Nunu' Li' yugu' guí'a sibi ga dzó'öba' bdxina' guixi',  
enca' yugu' zxan bulóaj gapa tapa chi'i cuíngacaba' bizxidxu'.
- <sup>19</sup> Benu' beo' le naca bë' yugu' beo' que iz,  
ate' ribía gubidza ga ral-la' cuía.
- <sup>20</sup> Benu' chi'i dzó'ölö, en cate' naca chul-la  
ta'rúajba' ta'daba' böa' guixi'.
- <sup>21</sup> Ta'bódxí'aba' bëdxi guíxi'do', ta'zóa régu'ba' le ila'zönba'.  
Tu'guílajba' le nuzóe' Dios iláguba'.
- <sup>22</sup> Cate' rilén gubidza tu'dxinba' lídxigacaba',  
en röjóxagacaba' yugu' lu zxan bulóaj quégacaba'.
- <sup>23</sup> Ni'irö ta'rúaj bönachi söjaca huen dxin,  
en tun caz dxin ga ridxitë ribía gubidza.
- <sup>24</sup> Xan, ziánterö yugu' le nunu' Li'.  
Len yöl-la' réajni'i zxön quiu' nunu' yúgu'të.  
Nalí luyú yödzölió ni yugu' le dxi'a nunu'.
- <sup>25</sup> Ni' zoa nisa nácatérö zxön,  
ga na' nacuá'aba' böa' guizxi yu,  
böa' cuidi', enca' böa' zxön.
- <sup>26</sup> Ni' ta'dödi barco zxön,  
enca' böa' zxön lëba' leviatán, böa' na' nuzoa cazu'.
- <sup>27</sup> Yúgu'tëba' ta'bózaba' Li',  
cate' idxinrö ugagu' légacaba'.
- <sup>28</sup> Rugagu' légacaba', ate' táguba'.  
Runödzju' le iláguba', ate' tu'huólaj ta'dzé'eba'.
- <sup>29</sup> Cate' ruhuecju' quiu', tádxiba',  
en cate' ruzi'u bö' quiu', tátiba',  
en ruhuöáca yu le néquinigacaba'.
- <sup>30</sup> Cate' rigú'u légacaba' bö', nabángacaba'.  
Rucubu' yúgu'të le nacuá' yödzölió.
- <sup>31</sup> ¡Ral-la' gácatica'sö yöl-la' ba queë' Xanru'!  
¡Ral-la' ila'yaza ládxitica'sö bönachi le nun cazë' Lë'!
- <sup>32</sup> Ruyúë' Xanru' luyú, ate' rizzizi.  
Riganë' yugu' guí'a, ate' rirúaj dzön.
- <sup>33</sup> ¡Gul-la' queë' Xanru' yúgu'të dza soa' ibana'!  
¡Gul-la' yöl-la' ba queë' Dios tsanni ni zoa' nabana'!
- <sup>34</sup> ¡Zxixi naca le rizá' ládx'a' ca naca queë'!  
¡Udzéjalenda'-në' Xanru'!
- <sup>35</sup> Ila'nítië' bönni' dul-la' nacu'ë yödzölió ni,  
en bíti'rö ila'cuá' nupa tuá' dö'.  
¡Gulú'u yöl-la' ba Xanru', li', bö' naca caza'!  
¡Yöl-la' ba Lë' Xanru'!

**¡Buli'lidzé' Lé'!**

**¡Buli'siyón bönachi ca nácagaca le benë'!**

**2 ¡Guli'gul-la queë'! ¡Guli'gul-la yöl-la' ba queë'!**

**¡Guli'güi' didza' ca nácagaca le zxön nunë'!**

**3 ¡Buli'sí' xibé Lé' lá'ayi!**

Ral-la' ulu'dzeja ladxi' yúgu'të nupa ta'guilaj Xanru'.

**4 Guli'guiljé' Xanru', enca' yöl-la' huáca queë'.**

Guli'güi' ládxi'tica'sö idxinli' lahuë'.

**5 Guli'tsöjné le nácagaca zxön benë' Lé',**

lë na' tun ga rubániru', enca' ca nácagaca didza' bë'ë cate' buchi'a busöröe' bönachi,

**6 libí'ili', zxí'ini xi'sóë' Abraham, huen dxin queë' Dios,**

en libí'ili', zxí'ini xi'sóë' Jacob, nácali' nupa gurö' cazë' queë'.

**7 Lé' náquië' Xanru' Dios.**

Idútë yödzölió naca bë' ca buchi'a busöröe' bönachi.

**8 Röjnétiqui'sinë' didza' dzaga nunë',**

didza' na' gunná bë'ë ila'zí' lu ná'agaquië' chi gayuá' cö' zxí'ini xi'sóë' Abraham,

**9 didza' dzaga na' bénlenë' Abraham,**

le naca didza' na' benë' tsutsu Dios ca gunë' queë' Isaac.

**10 Ní'irö benë' tsutsu didza' na' lahuë' Jacob,**

le naca tu le rinná bë'enë' lë' gunë',

para gaca quégaca bönachi Israel tu didza' dzaga le zoa tsaz.

**11 Gunné': "Gunna' queéli' xiyágaca bönachi Canaán,**

le guequi tsaz queéli', en quégaca zxí'ini xi'sóali'."

**12 Caní gunné' Dios cate' ni' gula'cu'ë nabábaguacië' bönni' Israel.**

Tu chópasë' guláquië', en guláquië' bönni' zi'tu' luyú.

**13 Gula'dé' tu ia'tú yödzö izá'a.**

Bulu'zé'ë tu ga nu gunná bë', en bila'dxínë' ga nacuá' bönachi izá'a,

**14 pero biti' bë'ë lataj Dios nu usaca' zi' bönachi queë' na',**

en buzenë' le bach bönni' gula'nná bë'ë para gulácalenë' bönachi queë'.

**15 Gunné': "Biti' bi gunli' quégaca bönachi nabö' caza' quia',**

en biti' bi dö' guá'alí' quégacië' bönni' tu'ë didza' uláz quia'."

**16 Benë' ga guyú'u gubín yödzölió,**

en benë' ga biyadzaj yöta ilahuë'.

**17 Gusól-lë'ë tubi' bi'i bönni', bi'i bidxinbi' ni' zí'alö ca légaquië',**

tu' gulúti'ë-bi' José para gácabí' bi'i nadó'o.

**18 Gulúgië' bönni' Egipto ní'abi' len du guíë,**

en bulu'dé'ë yen ná'abi' bregui' guíë,

**19 ga bidxité dza budxín xtídzé'ë Xanru',**

tu' guzxi' bë'ë Xanru' Dios José na'.

**20 Ní'irö gusól-lë'ë bönni' gunná bë'ë luyú Egipto nu busán-bi'.**

Bönni' na' gunná bë'enë' yödzö izá'a zián busölé'-bi'.

**21 Benë' ga gúcabi' xan yu'u queë',**

ate' guta' lu ná'abi' yúgu'të le dë queë' bönni' na' rinná bë'ë.

**22 Guta' lu ná'abi' gulú'ubi' lidxi guíë bönni' ta'nná bë'ë tsca rë'ëni quézibi',**

para busédibi' bönni' gula queë' yöl-la' réajni'i.

**23 Ní'irö bila'dxín ca' bönachi Israel luyú Egipto.**

Caní guca, guzóë' Jacob lu xiyágaca zxí'ini xi'sóë' Ham.

**24 Benë' Dios ga gula'yánterö bönachi queë' luyú ni',**

ate' guláquië' ziánterë' ca nupa gula'dfl-lalen légaquië'.

- <sup>25</sup> Benë' Dios ga gulunë' zi' bönni' Egipto bönachi queë'.  
 Lu yöl-la' banís quégaquië' gula'zi' yé'enë' nupa na' nácabaca huen dxin queë' Lë'.
- <sup>26</sup> Ni'irö gusól-lë'ë Moisés, huen dxin queë', lógaquië',  
 enca' Aarón, bönni' na' nabó cazë' Lë'.
- <sup>27</sup> Gulunë' chopë' ni zián yöl-la' huáca zxön queë' Dios lógaca bönachi Egipto na'.  
 Gulunë' zián yöl-la' huáca que yehua' yubá lu xiyúgaca zxí'ini xi'sóë' Ham.
- <sup>28</sup> Gusól-lë'ë Dios le naca chul-la, ate' böáca chul-la lahui' dza,  
 en biti' guca ila'dá'baguë'ë xtídzë'ë.
- <sup>29</sup> Benë' ga nisa yegu nacuá' lu yegu quégaquië' böáca rön,  
 en benë' ga gulátiba' böla dzö'öba' yugu' yegu na'.
- <sup>30</sup> Gula'yanba' riu lu xiyúgaquië',  
 ga bidxitnë gula'yázaba' yu'u lidxë' bönni' rinná bë'enë' légaquië'.
- <sup>31</sup> Bë'ë didza' Dios, ate' gulátsjaba' bötsugayu guizxi yu,  
 en gulátsjaba' ca' bō'iyudo' idútë lu xiyúgaquië'.
- <sup>32</sup> Benë' ga guró'ö guiój bögu' yöla sunna uláz que nisa guiój,  
 ate' böxaj ca' guí' lu xiyúgaquië'.
- <sup>33</sup> Guditsjë' yugu' lubá uva quégaquië', en yugu' yaga higo,  
 en busunítië' yaga rö'gaca lu xiyúgaquië'.
- <sup>34</sup> Bë'ë didza', ate' bila'dxinba' bōchi'zu guizxi yu,  
 enca' bōchi'zu hué'ënido', cuntu nu gaca ulaba légacaba',
- <sup>35</sup> ate' guláguba' idútë guixi' cuan rö'ö lu xiyúgaquië',  
 en guláguba' ca' idútë le naz nudá'agaquië' lu xiyúgaquië'.
- <sup>36</sup> Benë' ga gulátibi' yúgu'tëbi' bi'i bönni' lo idútë lu xiyúgaquië'.  
 Bi'i lo na' quégaquië' bönni' nál-la.
- <sup>37</sup> Ni'irö bubéajë' Dios yugu' bönni' Israel luyú na', nuá'agaquië' dumí plata, en oro,  
 ate' cuntu nu yöjcwegu' nu nutsa' légaquië'.
- <sup>38</sup> Bulu'dzeja bönachi Egipto cate' bulu'zé'ë bönni' Israel lu xiyúgaquië',  
 ate' guladxi gula'dzöbi tu' nőziguequinë' bönni' Israel na'.
- <sup>39</sup> Gusól-lë'ë Dios tu böaj le gulú'u bönachi queë' zxul-la,  
 ate' chi'i dzö'ölö gusól-lë'ë guí' le buzení' quégaquië'.
- <sup>40</sup> Gula'nábinë' Lë', ate' gusól-lë'ë böra guíxi'do' zián le ilahuë',  
 en benë' ga bulu'huólaj gula'dzé'enë' yöta que yehua' yubá.
- <sup>41</sup> Bulu'ë lahui tu guiójto'o, ate' gulalaj nisa yégudo'.  
 Gudödi nisa na' luyú bidxi ni' ca tu nisa yegu gubó'o.
- <sup>42</sup> Caní benë' Dios tu' yöjenenë' didza' lá'ayi queë',  
 le guzxi' lu né'ë gunë' queë' Abraham, huen dxin queë'.
- <sup>43</sup> Bubéajë' bönachi queë' lu yöl-la' rudzeja quéguequi,  
 ate' lu yöl-la' rudzeja quéguequi gula'bódxi'a bönachi guró' cazë' queë'.
- <sup>44</sup> Bunödzjë' xiyúgaca bönachi yugu' yödzö izá'a quégaquië'.
- Bulu'zi'ë xibé le ilá' luyú ni'a que dxin gulún bönachi izá'a na'.
- <sup>45</sup> Caní benë' Dios para ilunë' ca rnna le gunná bë'enë' légaquië' ilunë',  
 en ilunë' ca rinná bë' xibá gudixjë' Lë'.

¡Guli'cu'ë yöl-la' ba Xanru'!

## 106

- <sup>1</sup> ¡Guli'cu'ë yöl-la' ba Xanru'!  
 ¡Guli'guíë' Xanru': "Xclenu'" tu' náquië' idú dxi'a!  
 ¡Zóatica'sö yöl-la' dxi'i ladxi' queë'!

<sup>2</sup> ¿Nuzxi caz gaca quixjö' ca nácagaca le zxön nunë' Xanru',  
en ului'i lahuí ca naca yöl-la' ba queë'?

<sup>3</sup> ¡Bica' ba nupa tun le naca tsahui',  
nupa na' túntica'sö le naca dxi'a!

<sup>4</sup> Yöjnë neda', Xan, cate' ruzá' ládxu'u quégaca böñachi quiu'.  
Buzá' ladxi' quia' yöl-la' rusölá quiu',

<sup>5</sup> para gaca ilé'eda' gata' yöl-la' tsahui' quégaca nupa narö cazu' quiu',  
en para gaca udzéjalenda' böñachi quiu' cate' tu'dzeja,  
en para gaca uzi'lена' xibé nupa néquiguequi quiu'.

<sup>6</sup> Nuntu' dul-la' ca gulunë' xuz xtó'otu'.

Biá'atu' dö', en bentu' le naca xihui'.

<sup>7</sup> Cate' gula'cu'ë xuz xtó'otu' luyú Egipto,  
biti' gula'yéajni'inë' le nácagaca zxön benu'.

Biti' yöjnéguequinë' yugu' le benu' quégacië' lu yöl-la' dxi'i ladxi' quiu',  
pero gula'dá'bagüe'ë xtídzu'u cate' gula'cu'ë ra' nísado' lë Nísado' Xiná.

<sup>8</sup> Busölé' Xanru' Dios légaquië' para gaca bë' runë' ca rnna xtídzë'ë,  
en para ulu'e lahuí yöl-la' huáca zxön queë'.

<sup>9</sup> Caní guca, buzenë' le bach Nísado' Xiná na', ate' la' gubídxite.  
Guché'ë légaquië' ga rë'do' lu nísado' na',  
ate' gula'dé' lu yu bidxi ga na' gurö'ö nisa.

<sup>10</sup> Caní guca, busölé' légaquië' lu na' nu na' benë' légaquië' zi',  
en buá'uë' légaquië' lu na' nu na' gudíl-lalen légaquië'.

<sup>11</sup> Ni'irö gubaga' nísado' na' nupa gula'sí regu' légaquië'.  
Cuntu nu bugá'ana nu bidzaga léguequi.

<sup>12</sup> Ni'irö gula'yéajlë' böñachi queë' xtídzë'ë,  
ate' gulul-la yöl-la' ba queë'.

<sup>13</sup> Pero la' gulál-latë ládxí'gaquië' yugu' le benë'.

Biti' gula'nábinë' Lë' ului'inë' légaquië' le ral-la' ilunë'.

<sup>14</sup> Zián le gula'zé ládxë'ë cate' ni' gula'cu'ë la' guixi' ga dë lataj,  
en gula'zí' bë'ë Dios la' guixi' na'.

<sup>15</sup> Ni'irö bë'ë Dios quégacië' le gula'nábinë' Lë',  
pero gusól-lë'ë quégacië' tu yödzöhué' le bëti ziángacië'.

<sup>16</sup> Cate' bulu'zxé'enë' Moisés ga ni' gula'cu'ë tsözxón,  
en bulu'zxé'enë' ca' Aarón, bönni' nubéaje' Xanru' quez queë',

<sup>17</sup> la' ná'asö guyalaj luyú, en bucachi' Datán.

Bucachi' ca' nupa gulún tsözxón Abiram.

<sup>18</sup> Gulaj tu guí' zxön ga na' nudúbigaquië',  
en buzegui' nupa na' guluá' dö'.

<sup>19</sup> Lu guí'a Horeb gulunë' tu bëdxido' néquiniba' oro,  
en gula'yéaj ládxë'ë budó' oro na'.

<sup>20</sup> Caní guca bulu'cá'anë' Dios nayépisétérë',  
para gula'yéaj ládxë'ë budó' oro le naca ca tu bëdxí ráguba' guixi'.

<sup>21</sup> Gulal-la ládxë'ë Dios Nu busölá légaquië'.

Lë' benë' zián le zxön le gulácalen légaquië' luyú Egipto.

<sup>22</sup> Benë' zián le tun ga rubániru' lu xiyúgaca zxí'ini xi'sóë' Ham,  
en zián le tun ga rádxiru' Lë' le benë' ra' Nísado' Xiná.

<sup>23</sup> Que lë ni na' gunné' Dios usunítië' légaquië', ate' la' cá'asö gunë'  
la'tu' cabí guzuínë' Moisés, bönni' rö queë', lahuë' Lë',  
en buzóá dxíë' yöl-la' rilé queë' para cabí usunítië' légaquië'.

<sup>24</sup> Ní'irö biti' gulé'ënë' ila'yázië' luyú dxi'a na' dë lógaquië'  
tu' cabí gula'yéajlë'ë xtídzë'ë Dios.

<sup>25</sup> Gula'nné zi'ë queë' Dios gapa naca lu yu'u guídi quégäquië',  
en biti' bulu'zé náguië' chi'ë Xanru'.

<sup>26</sup> Que lë ni na' benë' tsutsu Dios xtídzë'ë le bë'lenë' légaquië',  
gunnë' gunë' ga ilátië' ga na' naca la' guixi' ga dë lataj.

<sup>27</sup> Gunné' gunë' ga ilasi lásië' zxí'ini xi'sóagaquië' ladaj zián yödzö izá'a,  
en gúsië' légaquië' gapa nacuá' böñachi zi'tu'.

<sup>28</sup> Ní'irö bulu'dödi cuíngäquië' lu na' budó' guïë lë Baal-peor,  
en gulahuë' xipéla'gacaba' böa' guixi' gulútië'-ba'  
para gulunë' zxön yugu' dios nati.

<sup>29</sup> Ca' guca, gulún lenë' Dios ni'a que le gulunë',  
ate' gulén tu yödzöhuë' zxön ládjagaquië'.

<sup>30</sup> Ní'irö guzuínë' Finees, en benë' le raza ládxë'ë Dios,  
ate' guzóa dxi yödzöhuë' zxön na'.

<sup>31</sup> Buzoë' Dios queë' Finees na' náquië' tsahui' ni'a que  
lë na' benë' le nuzoë' tsaz ca naca queë'.

<sup>32</sup> Lësca' gulún lenë' Dios ga na' zoa nisa lë Meriba,  
ate' Dios gulénë' Moisés tu' nözi lë na' gulunë'

<sup>33</sup> tu' gula'dá'baguë'ë xtidxë'ë Bö' Lá'ayi queë',  
ate' Moisés, lu yöl-la' ridzá'a queë', gunnë' lizë'.

<sup>34</sup> Biti' bulu'sunítië' böñachi tuá' dö' gula'cuá' lu yu ni,  
ca na' gunná bë'enë' Xanru' légaquië' ilunë'.

<sup>35</sup> Gulunë' léguequi tsözxöön  
en bila'zédë' ilunë' ca gulún böñachi na',

<sup>36</sup> ate' gula'yéaj ládxë'ë budó' guïój budó' yaga quégäuequi,  
le guca quégäquië' ca tu du yalaj le guzxöön légaquië'.

<sup>37</sup> Gulútië'-bi' zxí'inigaquië' lögaca bö' xihui',  
yugu' bi'i bönni', en nigúlado',

<sup>38</sup> en bulu'laljë' xichöngaca nupa biti' bi nabága'gaca  
tu' bulu'laljë' xichöngacabi' bi'i bönni' quégäquië', en bi'i nigula quégäquië',  
yugu' bi'i na' gulútië'-bi' lögaca budó' guïój budó' yaga nacuá' luyú Canaán,  
ate' gúcada' xihui' luyú ni tu' nözi rön na' bulu'laljë'.

<sup>39</sup> Ca' guca, guláquië' xihui' ni'a que le gulunë'.  
Guláquië' ca tu nigula udá dzaga tu' bulu'cá'anë' Dios quégäquië'.

<sup>40</sup> Que lë ni na' guléde'enë' Xanru' Dios böñachi queë',  
en biti' bilé'enë' dxi'a nupa na' néquiguequi queë'.

<sup>41</sup> Ní'irö budödë' légaquië' lu ná'agaca böñachi zián yödzö izá'a,  
ate' nupa bulu'dí'i légaquië' gula'nná be'e légaquië'.

<sup>42</sup> Nupa na' biti' bila'lé'e légaquië' dxi'a gulunda' légaquië' dxin,  
en bulu'zxicaj légaquië' lu yöl-la' unná bë' quégäuequi.

<sup>43</sup> Zián luzuí gú'unë' Dios usölé' légaquië',  
pero gula'dá'baguë'ë le ré'ënë' ilunë',  
ate' guzxöntérö xigua' nabága'gaquië'.

<sup>44</sup> Bilé'enë' Dios yöl-la' bayechi' quégäquië'  
en biyönnë' ta'bödxi yeché'ë.

<sup>45</sup> Yöjenenë' didza' dzaga núnlenë' légaquië',  
ate' bubequi lahuë' quégäquië' tu' nazxöntérö yöl-la' dxi'i ladxi' queë'.

<sup>46</sup> Benë' Dios ga bulu'huéchi' ladxi' légaquië'

nupa na' gula'ché' légaquië' nadzúngaquië'.

<sup>47</sup> ¡Busólá netu', Xantu' Dios!

Guléaj netu' lágagaca yödzö izá'a  
para guíetu' Li': "Xclenu'" ni'a que Lo' lá'ayi,  
en lu yöl-la' rudzeja zxön queétu' cù'utu' Li' yöl-la' ba.

<sup>48</sup> ¡Yöl-la' ba Lé' Xanru', Dios quégaca bönachi Israel  
na'a dza, en yúgu'té dza si' zaca!

Ral-la' ila'nná yúgu'té bönachi: "¡Ca' gaca!  
¡Guli'cu'ë yöl-la' ba Xanru' Dios!"

## 107

<sup>1</sup> ¡Guli'guië' Xanru': "Xclenu'" tu' náquië' dxi'a,  
en tu' zóatica'sö yöl-la' dxi'i ladxi' queë'!

<sup>2</sup> Ral-la' ila'nná caní nupa na' buá'uë' Xanru',  
nupa na' buá'uë' lu ná'agaca nupa gulún léguequi zi',

<sup>3</sup> en nubéajë' léguequi zián lu yödzö izá'a,  
saca' ga rilén gubidza, en saca' ga ribía,  
saca' ga za' bö' ziaga, en saca' ga ridödi gubidza beo' ziaga.

<sup>4</sup> Bal-lë' gula'dé' nanítigaquië' la' guixi' ga dë lataj,  
en ga ni'biti' zoa nöza.

Biti' guca ulu'dzölinë' tu yödzö ga gaca tsöjcu'ë.

<sup>5</sup> Gula'dunë', en gula'bidxë' nisa,  
en gudú ládxi'gaquië'.

<sup>6</sup> Ni'irö lu lë na' raca quégagaquië' bulu'lidzë' Xanru',  
ate' busölë' légaquië' lu zián le gula'gu'i gula'záquë'ë.

<sup>7</sup> Guché'ë légaquië' tu la' nöza tsahui',  
en guché'ë légaquië' tu lu yödzö ga tsöjcu'ë.

<sup>8</sup> Ral-la' ilé' Xanru': "Xclenu'" tu' nadxi'inë' légaquië',  
en tu' benë' yugu' le zxön, gúcalenë' légaquië'.

<sup>9</sup> Rugui'jë' nupa ta'bidxi ladxi',  
en rugahuë' nupa ta'dún le nácagaca dxi'a queë'.

<sup>10</sup> Bal-lë' gula'cu'ë ga chul-la, en ga zoa bönadxi ilátië'.  
Gula'dzunë' yugu' lu du guíë, en gula'gu'i gula'záquë'ë

<sup>11</sup> tu' gula'dá'baguë'ë xtídzë'ë Xanru' Dios,  
en bulu'zóë' tsölä'alo le rigu'ë icja ládxi'do'gaquië'.

<sup>12</sup> Tu' gulunë' bayúdx dxin, gudú ládxi'gaquië'.  
Gula'dzö'ë lu yu zxan yua' nuá'agaquië',  
ate' cuntu nu zoa gácalen légaquië'.

<sup>13</sup> Ni'irö lu lë na' raca quégagaquië' bulu'lidzë' Xanru',  
ate' busölë' légaquië' lu zián le gula'gu'i gula'záquë'ë.

<sup>14</sup> Bubéajë' légaquië' ga na' gula'cu'ë ga chul-la,  
en ga guzóa bönadxi ilátië',  
ate' guditsjë' yugu' du guíë núga'gaquië'.

<sup>15</sup> Ral-la' ilé' Xanru': "Xclenu'" tu' nadxi'iné' légaquië', en tu' bené' yugu' le zxön, gúcalené' légaquië'.

<sup>16</sup> Ruquínnajë' le tá'baga' gapa nu riyaza lidxi guíë le néquiniguequi guíë bronce, en ruzxuzxjë' yugu' vara néquiniguequi guíë.

<sup>17</sup> Bal-lë' gula'guí'i gula'záquë'ë tu' gula'dá'baguë'ë Dios, en tu' nözi dö' gulu'ë.

<sup>18</sup> Gula'gúti'në' bíti'tës la' huagu, en gula'zóa ilátië'.

<sup>19</sup> Ni'irö lu lë na' raca quégaquië' bulu'lidzë' Xanru', ate' busölé' légaquië' lu zián le gula'guí'i gula'záquë'ë.

<sup>20</sup> Gusól-lë'ë quégaquië' xtídzë'ë, en buné' légaquië', en busölé' légaquië' lu yöl-la' guti.

<sup>21</sup> Ral-la' ilé' Xanru': "Xclenu'" tu' nadxi'iné' légaquië', en tu' bené' yugu' le zxön, gúcalené' légaquië'.

<sup>22</sup> Ral-la' ilé' Dios: "Xclenu'", en bi ulu'nödzjë' queë', en lu yöl-la' rudzeja quégaquië' ilul-lë' ca nácagaca le nuné'.

<sup>23</sup> Bal-lë' gula'dödë' lahui nísado' yugu' lu barco zxön, en guluné' dxin yugu' lu nísado'.

<sup>24</sup> Bila'lé'enë' yugu' le nuné' Xanru', en yugu' le zxön nucu'ë lu nísado'.

<sup>25</sup> Bé'ësë' didza', ate' guyecja bö' budunu', ate' guyasa gudxía nísado'.

<sup>26</sup> Gula'yasa barco ca tu lu guí'ado' nisa, en la' böttjatë ga rö'ö röga' lu nisa na'. Tu' guzóale'e bönadxi ilátië' gudú ládzi'gaquië'.

<sup>27</sup> Gula'zxízië', en yójchégü'gaquië' ca bönni' ta' zúdxiné', ate' nítisö guca yöl-la' rácada' quégaquië'.

<sup>28</sup> Ni'irö lu lë na' raca quégaquië' bulu'lidzë' Xanru', ate' busölé' légaquië' lu zián le gula'guí'i gula'záquë'ë.

<sup>29</sup> Bené' Dios ga guzóa dxisö bö' budunu' na' recja, ate' guzóa dxi le rasa ridxía lu nísado'.

<sup>30</sup> Bulu'dzéjanë' tu' guzóa dxi lu nísado', en tu' guché'ë Dios légaquië' dxi'a tsáhui'do' ga na' söjáquië'.

<sup>31</sup> Ral-la' ilé' Xanru': "Xclenu'" tu' nadxi'iné' légaquië', en tu' bené' yugu' le zxön, gúcalené' légaquië'.

<sup>32</sup> Ral-la' ulu'lü'ë lahui yöl-la' zxön queë' ga nudúbigaca böñachi queë', en ila'gu'ë Lë' yöl-la' ba ga nudúbigaquië' bönni' gula tu'chi'a tu'söröë'.

<sup>33</sup> Runë' Xanru' Dios ga tu'hui'i dërö yugu' yegu, enca' yugu' beaj nisa.

<sup>34</sup> Ga naca yu ya'a runë' ga ruhuöáca yu bidxi, ni'a que le xihui' nabága'gaca nupa nacuá' ni'.

<sup>35</sup> Ga naca yu bidxi runë' ga ruhuöáca yu nabisa,

ate' ralaj nisa ga biti' bi nisa guzóa.

<sup>36</sup> Ni' ru'ë lataj ila'cuá' nupa ta'dún para ilunë' ni' yödzö ga ila'cu'ë.

<sup>37</sup> Tazé' yugu' le tazé', en tu'dé'ë yugu' lubá uva, yugu' le ta'bía yödxi yana'.

<sup>38</sup> Runë' Xanru' ga raca dxi'a quégaquië', en ga ta'cuá'bi' ziánbi' bi'i quégaquië', en runë' ga ta'yanba' böa' bëdxi quégaquië'.

<sup>39</sup> Cate' yugu' bönni' unná bë' zi'tu' tu'zxicjë' bönachi queë', en tu'zötjë' léguequi,

en tu'saca' zi'ë léguequi, en tu'ë dö' quéguequi,

<sup>40</sup> rucá'anë' Dios bönni' na' dë lu ná'agaquië' cá'asö,

en runë' ga ta'dé' la' guixi' ga dë lataj, en tu luyú bidxi.

<sup>41</sup> Rusölé' yugu' bönni' yechi' lu le ta'gu'i ta'záquë'ë, en runë' ga ta'yanbi' zxí'inigaquië' ca ta'yánba' bö'cu' zxíla'do'.

<sup>42</sup> Ta'lé'e lë ni nupa nácagaca tsahui', en tu'dzeja, pero biti' bi ta'nná nupa tuá' dö'.

<sup>43</sup> Nupa ta'yéajni'i ral-la' sa' ládx'i'gaca ca nácagaca lë ni, ate' iléquibe'e náquië' Xanru' Dios dxi'i ladxi'.

## 108

<sup>1</sup> ¡Chinabá'a quia', Dios!

¡Gul-la' quiu'! ¡Ön, idú lágda'a gul-la' yöl-la' ba quiu'!

<sup>2</sup> ¡Guli'bán, libí'ilí' riguínnali' bihuél-la!

¡Gúl-laru' cate' ni' ritó yu!

<sup>3</sup> ¡Guía' Li': "Xclenu'" Xan, lágdagaca bönachi yugu' yödzö izá'a!

¡Gul-la' yöl-la' ba quiu' lógaca yúgu'të bönachi!

<sup>4</sup> ¡Zxóntérö naca yöl-la' dxi'i ladxi' quiu', le ridxitë lúzxiba xitsá'!

<sup>5</sup> Bulu'i lahui lúzxiba yöl-la' zxön quiu', Dios, ate' lahui yödzolió ni bulu'i lahui yöl-la' bení' quiu',

<sup>6</sup> para usölö' netu', bönachi quiu', nupa nadxi' inu'.

Len yöl-la' huáca zxön quiu' busölá netu', en bubí'i didza'.

<sup>7</sup> Lu lataj lá'ayi queë' bë'ë didza' Dios, gunné':

"Uzi'a xibé, en quísia' xiyúgaca bönachi Siquem, en urixa' luyú dë cuiti yegu Sucot.

<sup>8</sup> Nequi quia' xiyúgaca bönachi Galaad, enca' xiyúgaca zxí'ini xi'sóë' Manasés.

Naca ca tu le rusubín icja' xiyúgaca zxí'ini xi'sóë' Efraín.

Naca ga rinná bë'a xiyúgaca zxí'ini xi'sóë' Judá.

<sup>9</sup> Naca ca tu ga riguibi na'a xiyúgaca bönachi Moab,

ate' lu xiyúgaca bönachi Edom chú'una' löla'.

Códxi'a tu' uxicja' bönachi Filistea."

<sup>10</sup> ¿Nuzxi caz gaca iché' neda' lu yödzö

dë zö'ö idú gásibi'ilö le run chi'i yödzö na'?

¿Nuzxi caz gaca iché' neda' lu xiyúgaca bönachi Edom?

<sup>11</sup> ¿Naru' cabí nusán ládxu'u netu', Dios?

¿Naru' cabí tséajlenu' bönni' queëtu' röjáquië' gudil-la?

<sup>12</sup> Gúcalen netu' cate' tíl-lalentu' nupa dutfl-lalen netu',  
tu' naca dádusö gácalen netu' nu naca bönáchisö.

<sup>13</sup> Len yöl-la' huáca queë' Dios idéli'ru'  
tu' uxicja cazë' Lë' nupa ta'dfl-lalen rë'u.

## 109

<sup>1</sup> Rigu'a Li' yöl-la' ba, Xana' Dios.

Biti' su' dxisö,

<sup>2</sup> tu' ta'nná quia' nupa tuá' dö', en ta'zí' yë'.

Lu yöl-la' rizi' yë' quéguequi tu'i didza' le tu'zegui' neda'.

<sup>3</sup> Nagú'ugaca neda' lé'ajlö,

en lu yöl-la' biti' rilé'e neda' dxi'a tu'itica'sö didza'.

<sup>4</sup> Sal-la' nadxi'ida' léguequi, tu'zegui' neda' didza',  
pero neda' rulidza' Li'.

<sup>5</sup> Bena' quéguequi le naca dxi'a, pero bulu'bí'i quia' le naca dö'.  
Nadxí'ida' léguequi, pero biti' ta'lé'e neda' dxi'a.

<sup>6</sup> Buzóa tu bönni' huía' dö'

para uchi'a usöróe' que nu na' biti' rilé'e neda' dxi'a.  
Ben ga soa gagu nu uzegui' nu na' didza'.

<sup>7</sup> Cate' nu uchi'a usöró bönni' na', biti' gu'u lataj urúajë' dxi'a.  
Buyú le rinábinë' Li' tsca naca dul-la' nabáguë'ë.

<sup>8</sup> Ben ga ilaca nabábasö dza soë' ibanë'.  
Ben ga tsu'u nu yúbölö uláz queë'.

<sup>9</sup> Ben ga ilácabi' zxí'inë' bi'i uzébi,

en ga gácanu nigula queë' nigula uzébi.

<sup>10</sup> Ben ga ila'dásobi' zxí'inë' ila'nábibi' nu bi unödzaj quégacabi'.  
Ben ga ila'guíljabí' le ilágubi' zi'tu' ga zoa lídxigacabi' le nadachi.

<sup>11</sup> Ben ga ugúa nu bi benna lé' tu chí'isö idútë le dë queë',  
en ben ga ila'banë' bönni' zi'tu' le rulá' dxin runë'.

<sup>12</sup> Ben ga biti' soa nu huéchi' ladxi' lé',  
en biti' soa nu uzá' ladxi' quégacabi' zxí'inë' nácagacabi' bi'i uzébi.

<sup>13</sup> Ben ga udxi quégaca zxí'ini xi'sóë',  
en ga idxín dza bíti'rö soa nu si' la ca guzxí'i lé'.

<sup>14</sup> Yöjnética'sö le xihui' gula'báguë'ë xuz xtá'ahuë', Xan,  
en biti' gal-la ládxu'u dul-la' bennu xiné'ë.

<sup>15</sup> Ben ga ila'cuá'tica'sö dul-la' na' lo' Li', Xan,  
para cabirö nu soa yödzölió nu tsöjnë lé'.

<sup>16</sup> Biti' buéchi' ládxë'ë luzé'ë,  
pero gudxía nahuë' nupa gula'guí'i gula'zaca',  
en nupa gula'yadzaj gula'yudxi,  
enca' nupa gula'sébi ladxi', ate' bëtië' léguequi.

<sup>17</sup> Bidxfí'inë' le rüdxía luzé'ë dö'.  
Ben ga ulu'bí'i ca' queë'.

Biti' raza ládxë'ë gaca dxi'a que luzé'ë.  
Ben ga biti' gaca dxi'a queë'.

<sup>18</sup> Gulaca ca zxë' nácuë' didza' xihui' bë'ë,  
ate' gula'yaza le nayá' nabanë' ca nisa,  
en gula'yú'u ca' dxita queë' ca le za.

<sup>19</sup> Ben ga ilaca queë' ca tu lari' rixóa cídzë'ë,  
en ca xipanë' rúgui'ë lé'ë.

<sup>20</sup> Bubí'i caní quégaca nupa tu'zegui' neda' didza', Xan,

enca' quégaca nupa tu'i didza' zi' que bö' naca caza'.

<sup>21</sup> Li', Xana' Dios, ben quia' le naca dxi'a  
para gaca bë' runu' ca rnna xtídzu'u.  
Tu' naca dxi'a yöl-la' dxi'i ladxi' quiu', busölá neda'.  
<sup>22</sup> Rigu'i rizáca'a, en riyadzaj riyúdxida',  
en raca zi' ládxi'da'ahua'.

<sup>23</sup> Ridödi quia' ca raca que tu zxul-la cate' ribía gubidza.  
Naca' ca tuba' bóchi'zu, riché' bö' recja lëba'.

<sup>24</sup> Ta'cudi' zxiba' tu' runa' gubasa.  
Nadxita', en bíti'rö rö'ö za lu bëla' rön quia'.

<sup>25</sup> Nupa biti' ta'lé'e neda' dxi'a tu'titaj neda'.

Cate' ta'lé'e neda', tu'tá ícjaguequi.

<sup>26</sup> Gúcalen neda', Xana' Dios.  
Lu yöl-la' dxi'i ladxi' quiu' busölá neda'.

<sup>27</sup> Ben ga iléquibe'e rácalen cazu' neda'.

Nun cazu' Li' lë ni, Xan.

<sup>28</sup> Tu'dxía neda' dö', pero Li', ben ga gaca dxi'a quia'.

Cate' ila'yasë', ulu'tu'fínë',  
pero udzéjada' neda', huen dxin quiu'.

<sup>29</sup> Ben ga ulu'gá'ana cá'asö nupa tu'zegui' neda' didza',  
en ben ga gaca yöl-la' rutu'i quéguequi ca tu lari' nabaga' lèguequi.

<sup>30</sup> Len ruá' cuina', zián luzuí guía'-në' Xanru': "Xclenu'",  
en ladaj bönachi zián cu'a Lë' yöl-la' ba,

<sup>31</sup> tu' zuínë' cuita lë'e ibëla nu riyadzaj riyudxi  
para usölé' nu na' lu ná'agaca nupa tu'siúdxı bö' naca caz nu na'.

## 110

<sup>1</sup> Xanru' Dios gudxe' Xana': "Gurö'i cuita lë'a ibëla  
cate' gunra' ga ulu'zechu zxíbigaca lo'  
nupa biti' ta'lé'e Li' dxi'a."

<sup>2</sup> Ga zoë' yödzö Sión gusól-lë'ë Xanru' yöl-la' unná bë' quiu',  
gunné': "Gunná be'e nupa biti' ta'lé'e Li' dxi'a."

<sup>3</sup> Ulu'dödi cuínguequi lu no'o bönachi quiu'  
cate' si'u yöl-la' unná bë' quiu'  
tu' napu' yöl-la' lachi que le naca lá'ayi."

Illa'cuá' bi'i bönni' ga zu' ca ribó'ö buzén zílado'.

<sup>4</sup> Runë' tsutsu xtídzë'ë Xanru', en biti' utsé'ë le, rnnë':  
"Tsaz nacu' bixúz ca na' gúquië' Melquisedec bixúz."

<sup>5</sup> Zoa caze' Xanru' cuita lë'u ibëla.  
Ucul-lë' bönni' ta'nná bë'ë cate' idxín dza usiúdxë' luyú.

<sup>6</sup> Uchi'a usöröe' quégaca bönachi yúgu'të yödzö izá'a,  
ate' ilí yödzölió len bëla' rön quéguequi.  
Uzötje' nupa ta'nná bë' zián lu yödzö izá'a.

<sup>7</sup> Gui'jë' nisa beaj ra' nöza,  
en ni'a que lë ni huöáca ládxë'ë.

## 111

<sup>1</sup> ¡Guli'cu'ë yöl-la' ba Xanru'!

Idú ládxa'a rea'-në' Xanru': "Xclenu'."

Runa' caní tsazxón len bönni' tsahui' zián ga na' nudúbigaca bönachi queë'.

<sup>2</sup> Zxon nácagaca le nunë' Xanru'.

Yúgu'të nupa ta'yaza ládxí'gaca lë na' benë' tu'sëda ca nácagaca.

<sup>3</sup> Idútë dxi'a nácagaca, en nayépisétérögaca le nunë' Lë',  
ate' idía'tica'sö le naca tsahui' queë'.

<sup>4</sup> Chinunë' ga tsójneru' yugu' le benë', le tun ga rubániru'.  
Náquië' Xanru' dxi'i ladxi', en ruí'i ládxë'ë ré'u.

<sup>5</sup> Rugahui' nupa tadxi Lë'.

Röjnética'së' didza' dzaga núnlenë' bönnachi queë'.

<sup>6</sup> Buzéajni'inë' bönnachi queë' ca naca yöl-la' huáca quégaca le nunë',  
le benë' ga gula'déli'në' xiyúgaca bönnachi izá'a.

<sup>7</sup> Tsahui', en idútë li nácagaca le núngaca lu né'ë.

Nácagaca tsutsu yúgu'të xibá gunná bë'ë.

<sup>8</sup> Rucuá'tica'së' tsutsu xibá queë',  
en rusudxinë' léguequi lu le naca idútë li, en le naca tsahui'.

<sup>9</sup> Gusól-lë'ë Nu buá'uö bönnachi queë'.

Tsaz nuzóë' didza' dzaga nunë'.

Lá'ayi, en ba'a ladxi' naca Lë'.

<sup>10</sup> Lu yöl-la' radxi queéru' Lë' risí loru' ridéli'ru' yöl-la' réajni'i.

Yúgu'të nupa tun ca ta' nná bë' xibá queë' nápagaca yöl-la' réajni'i.  
Ila'cuá'tica'sö nupa ila'gú'u Lë' yöl-la' ba.

## 112

<sup>1</sup> ¡Guli'cu'ë yöl-la' ba Xanru'!

¡Bica' ba bönni' na' rádxinë' Xanru',  
bönni' na' raza ládxë'ë runë' ca gunná bë'ë Dios!

<sup>2</sup> Tsépiségaca zxí'ini xi'sóë' bönni' na' yödzölió ni.

Gáquië' bica' ba bönni' na' runë' le naca dxi'a.

<sup>3</sup> Lu yu'u lidxë' gata' yöl-la' tsahui',  
ate' idía'tica'sö le naca tsahui' runë'.

<sup>4</sup> Gulén beni' ga ridé' bönni' tsahui' ga na' naca chul-la.

Ruzá' ládxë'ë que luzé'ë, en ruí'i ládxë'ë lë', en runë' le naca dxi'a.

<sup>5</sup> Gaca dxi'a queë' bönni' ruzá' ládxë'ë que luzé'ë,  
en runnë' que tu chí'isö le riyadzaj que.

Urúajé' dxi'a cate' nu uchi'a usörö queë'.

<sup>6</sup> Catu caz gaca nu utsá' bönni' na',  
ate' sóatica'sö nu tsójné lë'.

<sup>7</sup> Biti' gádxinë' cate' nu usiyöni lë' le cabí raca dxi'a.

Ridipa ládxë'ë tu' ruzxöni ládxë'ë Xanru' Dios.

<sup>8</sup> Dios rutipë' ládxë'ë, ate' biti' gádxinë'  
cate' idinxrö dza ilé'enë' nuhuótjagaca nupa ta'díl-lalen lë'.

<sup>9</sup> Idú ládxë'ë runödżje' quégaca bönnachi yechi'.

Idía'tica'sö le naca dxi'a runë'.

Dios uchisë' lë' ga tsépisë'.

<sup>10</sup> Ila'lé'e lë ni nupa tuá' dö', en ila'bó' bagu'isö.

Ilagu zxe láyi'gaca, en ila'niti cuínguequi.

Tsaz initi le ta'zé ládxí'gaca nupa tuá' dö'.

## 113

<sup>1</sup> ¡Guli'cu'ë yöl-la' ba Xanru'!

¡Guli'cu'ë yöl-la' ba, libí'ilí huen dxin queë' Xanru'!

¡Guli'cú'u yöl-la' ba Lë' Xanru'!

<sup>2</sup> ¡Cú'uru' yöl-la' ba Lé' Xanru',  
 cate' risí lo na'a, en yugu' iz si' zaca!  
<sup>3</sup> ¡Ga naguela' ga rilén gubidza ga ridxintë ga ribía,  
 cú'uru' yöl-la' ba Lé' Xanru'!  
<sup>4</sup> ¡Nayépisétérë' Xanru' Dios ca yúgu'të yödzö izá'a!  
 ¡Nazxöntérö yöl-la' zxön queë' ca naca lúzziba!  
  
<sup>5</sup> ¿Nuzxi caz zoa naca ca náquië' Xanru' Dios?  
 Rö'ë rinná bë'ë ga na' nayépisétérë'.  
<sup>6</sup> Ruzötaj cuinë' para uyúë'  
 le dë lúzziba, en le dë luyú ni.  
<sup>7</sup> Ruchisë' nupa nátagaca yechi', rubéajë' léguequi lu bëchtö yu.  
 Ruchisë' nupa ta'yadzaj, rubéajë' léguequi lu dö bëbu.  
<sup>8</sup> Runë' ga ta'bö'len nupa ta'nná bë'.  
 Ta'bö'len nupa ta'nná be'e bönachi queë'.  
<sup>9</sup> Runë' ga zóanu nigula huödx yu'u lídxinu.  
 Rudzeja ládzi'nu tu' runë' ga nacuá'abi' zxí'ininu.  
  
 ¡Guli'cu'ë yöl-la' ba Xanru'!

## 114

<sup>1</sup> Cate' bila'rúaj bönachi Israel luyú Egipto  
 bila'rúajë' zxí'ini xi'sóë' Judá ladaj nupa tu'i didza' izá'a.  
<sup>2</sup> Zxí'ini xi'sóë' Judá guláquië' ca lidxë' Xanru' Dios,  
 ate' gulaca bönachi Israel nupa rinná bë'enë' Dios.  
<sup>3</sup> Lahuë' Dios bubiga' nísado',  
 ate' bubí'i nisa yegu Jordán.  
<sup>4</sup> Gula'xiti' guí'a zxön ca yugu' bö'cu' zxila' biguiú',  
 ate' gula'xiti' ca' guí'ado' ca yugu' bö'cu' zxila'do'.  
  
<sup>5</sup> ¿Bi raca quiu', nísado', tu' rubigu'?  
 ¿Bi raca quiu', yegu Jordán, tu' rubí'i nisa quiu'?  
<sup>6</sup> ¿Bi raca queéli', guí'a zxön, tu' rixíti'li' ca yugu' bö'cu' zxila' biguiú'?  
 ¿Bi raca queéli', guí'ado', tu' rixíti'li' ca yugu' bö'cu' zxila'do'?  
  
<sup>7</sup> Guzxizi lahuë' Xanru', yödzölió.  
 Guzxizi lahuë' Dios queë' Jacob.  
<sup>8</sup> Benë' Dios ga gulaj nisa tu lë'e guiójto'o,  
 en benë' ga böáca le guca guiój jara tu ga rilén nisa.

## 115

<sup>1</sup> Calëga queétu', Xan, calëga queétu',  
 pero que lo' gaca yöl-la' ba  
 tu' nacu' dxi'i ladxi', en le naca idútë li.  
  
<sup>2</sup> ¿Bizz que ta'nná bönachi yugu' yödzö izá'a:  
 "Gazxi caz zoë' Dios quégaquie""?  
<sup>3</sup> Zoë' Dios queéru' yehua' yubá.  
 Runë' le raza ládxë'ë gunë'.  
<sup>4</sup> Néquiguequini plata, en oro budó' quégaca bönachi izá'a na',  
 yugu' le núngaca lu ni'a lu na' bönachi.  
<sup>5</sup> Nacuá' ruí'iguequi, pero biti' gaca ilui'i didza'.

Nacuá' guiój lógaca, pero biti' gaca ila'lé'e.

<sup>6</sup> Nacuá' nágagaca, pero biti' gaca ila'yöni.

Nacuá' zxíniguequi, pero biti' gaca ila'lé'e.

<sup>7</sup> Nacuá' ná'agaca, pero biti' bi gaca ila'gán.

Nacuá' ní'agaca, pero biti' gaca ila'zá'.

Biti' gaca ilún bö lubá'agaca.

<sup>8</sup> Nupa tun budó' guiój budó' yaga ilaca ca nácagaca budó' na',  
núti'tës nu ruzxöni ladxi' budó' guiój budó' yaga.

<sup>9</sup> Libí'ili', bönachi Israel, buli'zxöni ládxë'ë Xanru' Dios.

Rácalen cazë' libí'ili', en rapa chi'ë libí'ili'.

<sup>10</sup> Libí'ili', zxí'ini xi'sóë' Aarón, buli'zxöni ládxë'ë Xanru' Dios.  
Rácalen cazë' libí'ili', en rapa chi'ë libí'ili'.

<sup>11</sup> Libí'ili' na' rádxili'-në' Dios, buli'zxöni ládxë'ë Xanru' Dios.  
Rácalen cazë' libí'ili', en rapa chi'ë libí'ili'.

<sup>12</sup> Xanru' Dios ruí'i ládxë'ë rë'u, en gunë' ga gaca dxí'a queéru'.

Gunë' ga gaca dxí'a quégaca bönachi Israel.

Gunë' ga gaca dxí'a quégaca zxí'ini xi'sóë' Aarón.

<sup>13</sup> Gunë' ga gaca dxí'a quégaca nupa tadxi Lë',  
nupa na' nácagaca cá'asö, en nupa na' nayépisëgaca.

<sup>14</sup> Gunë' Xanru' Dios ga tsan le nequi queéli',  
lë na' nequi queéli', en le nequi quégaca zxí'inili'.

<sup>15</sup> Raca ládex'a gunë' Xanru' ga gaca dxí'a queéli'.

Náquië' Nu ben lúzxiba, en luyú ni.

<sup>16</sup> Nequi queé' Xanru' Dios lúzxiba xitsá',  
pero nudödë' lu ná'agaca bönachi luyú ni.

<sup>17</sup> Nupa chinátigaca biti' gaca ila'gú'u Xanru' yöl-la' ba,  
en calëga nupa nacuá' dxisö lataj chul-la que yöl-la' guti.

<sup>18</sup> ¡Cú'uru' yöl-la' ba Xanru' Dios

na' dza, en yúgu'të dza si' zaca!

¡Guli'cu'ë Xanru' yöl-la' ba!

## 116

<sup>1</sup> Nadxi'ida'-në' Xanru' Dios, tu' riyönnë'  
le rulidza' Lë', en le rinábida'-në'.

<sup>2</sup> Ruzé nagüe' chi'a.

Que lë ni na' ulidza' Lë' tsanni ni zoa' nabana'.

<sup>3</sup> Guzóa bönadxi quia' gátia',  
en guyu'a tsöbi que lataj chul-la que yöl-la' guti,  
ate' gusébi ládex'a, en bu'ínide'eda' ládex'a.

<sup>4</sup> Ni'irö bulidza'-në' Xanru' Dios, gunníá':

“Ráta'yua' lo', Xan, usölo' neda'.”

<sup>5</sup> Xanru' Dios ruzá' ládxë'ë queéru', en náquië' tsahui'.

Dios queéru' ruí'i ládxë'ë rë'u.

<sup>6</sup> Rapa chi'ë Xanru' nupa nácagaca do' ladxi'.

Bulu'xicja bönachi neda', ate' busölé' neda'.

<sup>7</sup> Buzí' ladxi' bö' naca caza',  
tu' runë' Xanru' Dios ga raca dxí'a quia'.

<sup>8</sup> Busöló' bö' naca caza', Xan, lu yöl-la' guti.  
Benu' ga buí'i nisa ribödxi guiój lahua',  
en ga bíti'rö cuílagaca ni'a.

<sup>9</sup> Ta'a lahuë' Xanru' Dios  
ga nacuá' nupa nabángaca.

<sup>10</sup> Guyéajlé'a Lé' cate' gunnía':  
“Zoa le rusaca' neda' zi'.”

<sup>11</sup> Lu yöl-la' rö' böniga quia' gunnía':  
“Ta'zi' yé' yúgu'të bönachi.”

<sup>12</sup> ¿Bizxi caz gu'a-në' Xanru' Dios  
ni'a que yugu' le runë' le ruzi'a xibé?

<sup>13</sup> Si' lu na'a yöl-la' rusólá queë' Xanru',  
en ulidza'-në' Xanru' Dios.

<sup>14</sup> Unödzja' queë' Xanru' le guzxi' lu na'a unödzja'.  
Raca ládxa'a gaca guna' caní lógaca yúgu'të bönachi queë'.

<sup>15</sup> Rúndë'ë Xanru' bal  
yöl-la' guti quégaca nupa néquiguequi quez queë'.

<sup>16</sup> Le nácatë naca' huen dxin quiu', Xan.  
Naca' huen dxin quiu', enca' zxí'ininu nigula huen dxin quiu'.  
Busedxu' le biröli neda'.

<sup>17</sup> Cu'a lo' le unödzja' quiu', en guía' Li': “Xclenu'”,  
en ulidza' Li', Xan.

<sup>18</sup> Unödzja' queë' Xanru' le guzxi' lu na'a unödzja'.  
Raca ládxa'a gaca guna' caní lógaca yúgu'të bönachi queë'.

<sup>19</sup> Ga zoa lö'a que yu'u lidxe' Xanru',  
lu yödzö Jerusalén guna' caní.

¡Guli'cu'ë yöl-la' ba Xanru' Dios!

### 117

<sup>1</sup> ¡Guli'cu'ë yöl-la' ba Xanru' Dios, libí'ili', bönachi yúgu'të yödzö izá'a!  
¡Guli'cu'ë yöl-la' ba yúgu'tëli',

<sup>2</sup> tu' buxönë' queéru' yöl-la' dxi'i ladxi' queë',  
en zóatica'sö le naca idú ladxi' queë'!

¡Yöl-la' ba Lé'!

### 118

<sup>1</sup> ¡Guli'guië' Xanru': “Xclenu'”, tu' náquië' dxi'a!  
¡Zóatica'sö yöl-la' dxi'i ladxi' queë'!

<sup>2</sup> Ral-la' ila'nná bönachi Israel:  
“¡Zóatica'sö yöl-la' dxi'i ladxi' queë'!”

<sup>3</sup> Ral-la' ila'nná zxí'ini xi'sóë' Aarón:  
“¡Zóatica'sö yöl-la' dxi'i ladxi' queë'!”

<sup>4</sup> Ral-la' ila'nná nupa tadxi Xanru' Dios:  
“¡Zóatica'sö yöl-la' dxi'i ladxi' queë'!”

<sup>5</sup> Cate' gudí'i guzxáca'a bulidza'-në' Xanru',  
ate' bubí'ë didza', en busölë' neda'.  
<sup>6</sup> Zoë' Xanru' cuita' neda', ate' biti' bi gádxida'.  
¿Bizxi caz gaca ilún bönachi quia'?  
<sup>7</sup> Zoë' Xanru' cuita' neda' ladaj nupa tácalen neda'.  
Que lä ni na' idéli'da' láhuigaca nupa biti' ta'lé'e neda' dxi'a.

<sup>8</sup> Nácarö dxi'a uzxöni ládxa'a-në' Xanru',  
en biti' uzxöni ládxa'a nu naca bönáchisö.  
<sup>9</sup> Nácarö dxi'a uzxöni ládxa'a-në' Xanru',  
en biti' uzxöni ládxa'a nupa ta'nná bë'.

<sup>10</sup> Bönachi yúgu'të yödzö izá'a gula'gú'u neda' lé'ajlö.  
Len yöl-la' huáca queë' Xanru' buxicja' léguequi.

<sup>11</sup> Gula'gu'ë neda' lé'ajlö. Ön, gula'gu'ë neda' lé'ajlö,  
pero len yöl-la' huáca queë' Xanru' buxicja' léguequi.

<sup>12</sup> Gula'gu'ë neda' lé'ajlö ca yugu' buzú' rön,  
pero gula'nítië' ca tu lu gui' guixi' yötsi' bidx.  
Len yöl-la' huáca queë' Xanru' buxicja' léguequi.  
<sup>13</sup> Bulu'dxiguë'ë neda' ga bidxitë guzóa tsöjtsö'a,  
pero gúcalenë' Xanru' neda'.

<sup>14</sup> Naca cazë' Xanru' yöl-la' huáca quia', en le rul-la'.  
Naca cazë' yöl-la' rusölá quia'.

<sup>15</sup> Lu yu'u lídxigaca nupa nácagaca tsahui'  
ru'u bö que nupa ta'bödxi'a lu yöl-la' rudzeja quéguequi tu' nulágaca.

¡Runda' dxin në'ë ibëla Xanru'!

<sup>16</sup> ¡Nayépisétérö në'ë ibëla Xanru'!  
¡Runda' dxin në'ë ibëla Xanru'!

<sup>17</sup> Biti' ca' gátia', pero soa' ibana',  
ate' usiyönda' bönachi le nunë' Xanru'.

<sup>18</sup> Xanru' bénđë'ë neda' xiguia',  
pero biti' budödë' neda' lu yöl-la' guti.

<sup>19</sup> Guli'salaj quia' ga ta'yazë' bönni' tsahui'.  
Tsu'a ni', en guía'-në' Xanru': "Xclenu'."

<sup>20</sup> Naca lataj ni ga riyaza cazë' Xanru' Dios.  
Ila'yazë' ni bönni' tsahui'.

<sup>21</sup> ¡Guía' Li': "Xclenu'" Xan, tu' bubí'u didza' quia',  
en tu' nacu' Nu rusölá neda'!

<sup>22</sup> Zoa tu guiój bulu'zóë' tsölä'alö bönni' tu'cu'ë zö'ö.  
Na'a naca guiój na' guiój len squin zö'ö.

<sup>23</sup> Benë' Xanru' Dios ga naca caní.  
Naca tu le run ga rubániru'.

<sup>24</sup> Dza ni naca dza nunë' Xanru' Dios.  
Udzéjaru', en uzi'iru' xibé.

<sup>25</sup> Ráta'yutu' lo', Xan, usölk' netu'.

Ráta' yutu' lo', Xan, gunu' ga gaca dxi'a queétu'.

<sup>26</sup> Bica' ba bönni' na' zë'ë uláz queë' Xanru'.  
Guntu' Li' zxön lu yu'u lidxe' Xanru'.

<sup>27</sup> Dios náquië' Xanru', ate' bennë' queéru' bení'.  
Buli'nödzaj queë' Dios yugu' bëdxi renni' uzégu'ru'-ba' lahuë' lu bucugu queë'.

<sup>28</sup> Naca cazu' Li' Dios quia', ate guía' Li': "Xclenu'."  
Naca cazu' Li' Dios quia', ate' guna' Li' zxön.

<sup>29</sup> ¡Guli'-guië' Xanru' Dios: "Xclenu'" tu' náquië' dxi'a!  
¡Zóatica'sö yöl-la' dxi'i ladxi' queë'!

## 119

### *Le run le gunná bë'enë' Xanru' rë'u*

<sup>1</sup> ¡Bica' ba nupa nácagaca idú dxi'a tsahui'do',  
nupa na' tun ca rnna xibá naguixjë' Xanru'!

<sup>2</sup> ¡Bica' ba nupa tun ca nácagaca le benë' ba nalí,  
en idú ládxi'gaca ta'zé ladxi' Lë'!

<sup>3</sup> Biti' bi le cabí naca tsahui' tun,  
pero tun ca nácagaca le nulu'ë lahui.

<sup>4</sup> Nuzú' queétu' xibá quiu', Xan,  
para idú ládxi'tu' guntu' ca ta'nná.

<sup>5</sup> Raca ládxa'a gúntica'sa' ca ral-la' guna',  
en guna' yugu' le gunná bë'u.

<sup>6</sup> Ni'irö biti' ca' utu'ida'  
channö gapa chi'a yugu' le gunná bë'u.

<sup>7</sup> Lu yöl-la' ba'a ladxi' quia' guía' Li': "Xclenu'"  
cate' chinazi'a le buchi'a busöröu' le naca tsahui'.

<sup>8</sup> Guna' ca ta'nná le gunná bë'u.

Biti' usán no'o neda' tsaz.

### *Ral-la' gunru' ca gunne'* Dios

<sup>9</sup> ¿Nacxi gaca gunbi' tu bi'i bönni' ga ugá'ana tsahui' ládxi'do'obi'?  
Ral-la' gunbi' ca rnna xtídz'u'u.

<sup>10</sup> Idú ládxa'a rizé ládxa'a Li', Xan.  
Biti' gu'u lataj ucá'ana' yugu' le gunná bë'u.

<sup>11</sup> Lu icja ládxi'da'ahua' runa' ca rnna xtídz'u'u,  
para cabí guna' dul-la' lo' Li'.

<sup>12</sup> ¡Bica' xibó', Xan!

Busedi neda' yugu' le gunná bë'u.

<sup>13</sup> Len ruá' cuina' ru'a didza'  
ca nácagaca yúgu'të le rusedi quézinu' netu'.

<sup>14</sup> Rudzéjada' ca nácagaca le nunu' ba nalí  
ca nu rudzeja tu' dë yöl-la' tsahui' que.

<sup>15</sup> Sa' ládxa'a ca nácagaca xibá quiu'  
en gü'i ládxa'a yugu' le nulú'u lahui.

<sup>16</sup> Udzéjada' ca nácagaca le gunná bë'u.  
Biti' gal-la ládxa'a xtídz'u'u.

### *Rudzéjade'eru' runru' le rnna cazë' Dios*

<sup>17</sup> Ben ga gaca dxi'a quia' neda', huen dxin quiu', Xan,  
para soa' ibana', en guna' ca rnna xtídz'u'u.

- <sup>18</sup> Gusalaj guiőj lahua' para gaca ilé'eda'  
le tun ga rubánitu' nazúajgaca lu xibá naguixju' Li'.
- <sup>19</sup> Zoa' yödzölió ca tu bönni' ridasö.  
Biti' ucachu'u yugu' xibá nunu' ga biti' gaca ilé'eda' léguequi.
- <sup>20</sup> Yúgu'të dza ruhu'ini ládxa'a tu' rizé ládxa'a  
yugu' le nusédinu' netu' ca ral-la' guntu'.
- <sup>21</sup> Ruzenu' le bach nupa tun ba zxön cuínguequi, en nupa nudxíagaca dö',  
nupa na' tu'zóa tsölá'alö yugu' xibá gunná bë'u.
- <sup>22</sup> Biti' gu'u lataj nu guequi neda' zi' o nu ucá'ana neda' cá'asö,  
tu' runa' ca ta'nná le nunu' ba nalí.
- <sup>23</sup> Sal-la' ta'bó' nupa ta'nná bë', en ta'nné quia',  
rizá' ládxa'a neda', huen dxin quiu', ca nácagaca le gunná bë'u.
- <sup>24</sup> Raza ládxa'a yugu' le nunu' ba nalí.  
Nácagaca le tu'zéajni'i neda'.

- Idú ládxi'ru' gunru' ca gunná cazé' Dios*
- <sup>25</sup> Nadinni lu yu bö' naca caza'.  
Busubán ládxa'a, ugunu' dxin xtídz'u.
- <sup>26</sup> Bului'ida' Li' yugu' le nuna', ate' bubi'u didza'.  
Busedi neda' yugu' le gunná bë'u.
- <sup>27</sup> Buzéajni'i neda' ca nácagaca xibá quiu',  
ate' sa' ládxa'a ca nácagaca le nunu', le tun ga rubánitu'.
- <sup>28</sup> Ribödxi bö' naca caza' tu' risébida' ládxa'a.  
Butipa ládxa'a, ugunu' dxin xtídz'u.
- <sup>29</sup> Ben ga biti' guna' le cabí sa'yéaj,  
en buzá' ladxi' quia' xibá naguixju' Li'.
- <sup>30</sup> Guróo' le naca idútë li para guna' ca rnna.  
Nuzúa' lahua' yugu' le nusédinu' netu'.
- <sup>31</sup> Nazi' lu na'a yugu' le nunu' liná' lo.  
Biti' gu'u lataj bi gun ga utui'ida', Xan.
- <sup>32</sup> Guna' ca ta'nná xibá gunná bë'u,  
tu' rutipa cazu' ládxa'a.

- Ré'ëniru' tséajni'iru' xtídzë'ë Dios*
- <sup>33</sup> Busedi neda', Xan, ca ta'nná le gunná bë'u,  
ate' gun chi'a léguequi ga idxinrö dza udxi.
- <sup>34</sup> Benna quia' yöl-la' réajni'i para gun chi'a xibá quiu',  
en para idú ládxa'a guna' ca ta'nná.
- <sup>35</sup> Ben ga guna' ca ta'nná le gunná bë'u,  
tu' raza ládxa'a guna' ca ta'nná xibá na'.
- <sup>36</sup> Ben ga gü'i' lädxa'a yugu' le nunu' ba nalí,  
para cabí gü'i' lädxa'a yöl-la' ruhuidi'.
- <sup>37</sup> Buchi'a guiőj lahua' para cabí uyúa' le cabí nazaca'.  
Butipa ládxa'a para guna' le ulu'ínu' netu'.
- <sup>38</sup> Ben tsutsu didza' bë'lenu' neda', huen dxin quiu',  
para gádxida' Li'.
- <sup>39</sup> Bucuita ga zoa' nu ruididza' yudxi neda', lë na' rádxida'  
tu' nácagaca dxi'a tsahui' le nusédinu' netu' ca guntu'.
- <sup>40</sup> Buyútsöca', rizé ládxa'a yugu' xibá quiu'.  
Busubán ládxa'a, ugunu' dxin le tsahui' quiu'.

- Ruzxöni ládxi'ru' xtídzë'ë Dios*
- <sup>41</sup> Lu yöl-la' dxi'i ladxi' quiu' buyú neda', Xan,

en busólá neda' ca rnna xtídz'u gunu'.

<sup>42</sup> Ubi'a didza' bi guía' nu run ga rutu'i da', innía':  
"Ruzxöni ládx'a a xtídz'u", Xan.

<sup>43</sup> Biti' ucuítu' tsaz didza' idútë li lu ru'a  
tu' runa' löza yugu' le nusédinu' netu'.

<sup>44</sup> Gúntica'sa' ca ta'nná xibá naguixju' Li'  
yúgu'të dza, en yúgu'të iz si' zaca.

<sup>45</sup> Lu yöl-la' rusólá quiu' soa' ibana'  
tu' bë' ládx'a a guna' ca ta'nná bë' xibá quiu'.

<sup>46</sup> Gu'a didza' que le nunu' ba nalí lógaquië bönni' ta'nná bë'ë  
en biti' ca' utu'i da'.

<sup>47</sup> Tsaza ládx'a a yugu' xibá gunná bë'u,  
yugu' lë na' nadxíida'.

<sup>48</sup> Guna' ca' ca ta'nná xibá nunu', lë na' së ládx'a a,  
en sa' ládx'a a ca nácagaca le gunná bë'u.

#### *Zóatica'so xtídzë'ë Dios*

<sup>49</sup> Yöjné didza' na' bë'lenu' neda', huen dxin quiu',  
tu' benu' ga runa' löza le.

<sup>50</sup> Didza' na' ruhuë tsahui' neda' cate' rigu'i rizáca'a,  
tu' tu'subán ládx'a a didza' bë'u.

<sup>51</sup> Tu'títjalë' e neda' nupa tun ba zxön cuínguequi,  
pero biti' ca' usana' xibá naguixju' Li'.

<sup>52</sup> Röjneda' yugu' le busédinu' netu' dza ni'te, Xan,  
ate' lë na' ruhuë tsahui' neda'.

<sup>53</sup> Lu yöl-la' ridz'a a quia' rö'a böniga ni'a quégaca nupa tuá' dö',  
nupa na' tu'cá'ana xibá naguixju' Li'.

<sup>54</sup> Rul-la' ca nácagaca le gunná bë'u.

Zoa' ni ca tu bönni' ride' zi'tu'.

<sup>55</sup> Chi'i dzö'ölö röjneda' Lo', Xan,  
en run chi'a xibá naguixju' Li'.

<sup>56</sup> Nacuá'len neda' le ruzi'a xibé  
ate' runa' ca rnna yugu' xibá quiu'.

#### *Raza ládx'i ru' xtídzë'ë Dios*

<sup>57</sup> Nacu' Li', Xan, le ruzi'a xibé.  
Chigunnía' guna' ca rnna xtídz'u.

<sup>58</sup> Idú ládx'a a inábida' Li' sóalenu' neda'.  
Buéchi' ladxi' neda' ca rnna xtídz'u gunu'.

<sup>59</sup> Guzá' ládx'a a ca nácagaca le runa',  
ate' bubí'i ládx'a a para guna' ca rnna le nunu' liná' lo.

<sup>60</sup> Bénda'a bayúdx, en biti' gudzeda'  
para guna' ca rinná bë' xibá quiu'.

<sup>61</sup> Bönachi zián bönachi tuá' dö' gula'gú'u neda' lë'ajlö,  
pero biti' gul-la ládx'a a xibá naguixju' Li'.

<sup>62</sup> Gulahuéla riyasa', en rigu'a Li' yöl-la' ba  
tu' nácagaca tsahui' yugu' le nusédinu' netu'.

<sup>63</sup> Runa' tsözxón nupa tadxi Li',  
enca' nupa tun ca rnna xibá quiu'.

<sup>64</sup> Ridxfín idútë yödzölio yöl-la' dxi'i ladxi' quiu', Xan.  
Busedi neda' yugu' le gunná bë'u.

#### *Naca le saca' le gunná cazë' Dios*

<sup>65</sup> Benu' quia' neda', huen dxin quiu', le naca dxi'a,  
ca rnna xtídz'u gunu', Xan.

- <sup>66</sup> Busedi neda' yöl-la' réajni'i idú, en yöl-la' raca yenni', tu' réajlë'a yugu' xibá gunná bë'u.
- <sup>67</sup> Zí'älö cate' buzötju' neda' gudá' nanitia', pero na'a runa' ca rnna xtídzu'u.
- <sup>68</sup> Idú dxi'a tsahui' nacu', en runu' le naca dxi'a. Busedi neda' yugu' le gunná bë'u.
- <sup>69</sup> Nupa tun ba zxön cuínguequi ta'zí' yë' ca naca quia', pero idú ládxa'a guna' ca rnna xibá quiu'.
- <sup>70</sup> Chul-la niti naca icja ládxi'do'guequi, pero raza ládxa'a neda' xibá naguixju' Li'.
- <sup>71</sup> Naca dxi'a buzötju' neda' para bizédida' yugu' le gunná bë'u.
- <sup>72</sup> Nácagacarö dxi'a quia' xibá rinná bë'u ca nácagaca gayuá' gayuá'sö dumí oro, en plata.

*Naca tsahui' le gunná cazé' Dios*

- <sup>73</sup> Len no'o benu' neda', en buzú' neda'. Buzéajni'i neda' para gúnbë'a xibá gunná bë'u.
- <sup>74</sup> Nupa tadxi Li' ila'lé'e neda', en ulu'dzeja ládxi'guequi, tu' runa' löza xtídzu'u.
- <sup>75</sup> Nözda' naca tsahui' ca ruchi'a rusöróu' quia' neda', Xan, ate' lu yöl-la' li ladxi' quiu' busaca' zi'u neda'.
- <sup>76</sup> Na'a, lu yöl-la' dxi'i ladxi' quiu' buë tsahui' neda', ca rnna didza' chibé'lenu' neda', huen dxin quiu'.
- <sup>77</sup> Gudá duhuechi' ládxu'u neda' para soa' ibana', tu' raza ládxa'a xibá naguixju' Li'.
- <sup>78</sup> Ben ga ulu'tui'i nupa tun ba zxön cuínguequi, tu' gula'nné quia', en biti' bi bena' quéguequi, pero neda' sa' ládxa'a ca naca xibá quiu'.
- <sup>79</sup> Ral-la' udxín quia' nupa tadxi Li', nupa na' núnbë'gaca le nunu' ba nalí.
- <sup>80</sup> Ben ga udxín ca rnna le gunná bë'u, para cabí utu'ida'.

*Runë' Dios ca rnna xtídzë'ë*

- <sup>81</sup> Rudú ládxa'a tu' riböza' yöl-la' rusölä quiu', pero runa' löza xtídzu'u.
- <sup>82</sup> Chirequi ichul-la lahua' tu' rizëda' ládxa'a xtídzu'u, rnnia': "¿Bátaxi huë tsau'u neda'?"
- <sup>83</sup> Caní raca tu' naxú'unida' ca tu buzudi guídi nal-la' lahui guí', pero catu caz gal-la ládxa'a yugu' le gunná bë'u.
- <sup>84</sup> ¿Bál-laxi dza soa' ibana' neda', huen dxin quiu'? ¿Bátaxi usiúdxu' nupa ta'bía no neda'?
- <sup>85</sup> Nupa tun ba zxön cuínguequi gula'chó'öna tu yeru ga tsöjbixa', nupa na' biti' tun ca rnna xibá naguixju' Li'.
- <sup>86</sup> Idútë li nácagaca yúgu'të xibá gunná bë'u. Lu yöl-la' rizi' yë' quéguequi ta'bía no neda'. ¡Gúcalen neda'!
- <sup>87</sup> Gula'zóa ulu'sunítië' neda' lu yödzölió ni, pero biti' busán na'a xibá quiu'.
- <sup>88</sup> Lu yöl-la' dxi'i ladxi' quiu' busubán ládxa'a, para gapa chi'a le nunu' ba nalí len ruá' cuinu'.

<sup>89</sup> Rulidza' Li', Xan.

Tsaz naguixju' xtídz'u' yehua' yubá.

<sup>90</sup> Gunu' ca rnna xtídz'u' quégaca bönachi na'a dza, en yúgu'të dza si' zaca.

Gudixaj cazu' yödzölió, ate' idía'tica'sö.

<sup>91</sup> Ni'a que le gunná bë'u nacuá' caz yúgu'të ga ridxintë na'a dza, tu' tun xichinu' yúgu'të lë na'.

<sup>92</sup> La'tu' cabí raza ládxa'a xibá naguixju' Li', chigunítia' lu le busaca' zi' neda'.

<sup>93</sup> Catu caz gal-la ládxa'a yugu' xibá quiu', tu' busubanu' ládxa'a ni'a quéguequi.

<sup>94</sup> Néquida' quiu'.

¡Busölá neda', tu' ruí'i ládxa'a xibá quiu'!

<sup>95</sup> Nupa tuá' dö' ta'bö' nisi neda' para ulu'suniti neda', pero neda' güí'i ládxa'a le nunu' ba nalí.

<sup>96</sup> Chibilé'eda' ruúdxi que yúgu'të le naca idútë yödzölió ni, pero catu caz udxi que le gunná bë'u guntu'.

### *Nadxí' iru' xtídzë'ë Xanru'*

<sup>97</sup> Nadxí'ide'eda' xibá naguixju' Li'.

Idú dza rizá' ládxa'a ca naca que.

<sup>98</sup> Réajni'iröda' ca nupa ta'dá'baga' neda' tu' ruí'i ládxa'a yugu' le gunná bë'u, en tu' dá'tica'sa' léguequi.

<sup>99</sup> Réquibe'eröda' ca yúgu'të nupa tu'sedi neda', tu' rizá' ládxa'a le nunu' ba nalí.

<sup>100</sup> Réajni'iröda' ca yugu' bönni' gula, tu' rapa chi'a xibá quiu'.

<sup>101</sup> Gudapa chi'i cuina' para cabí guna' le cabí naca tsahui', en para guna' ca rnna xtídz'u'.

<sup>102</sup> Biti' ca' nucá'ana' yugu' le nusédinu' netu', le nusedi quézinu' neda'.

<sup>103</sup> Bica' zxixi nácagaca xtídz'u'.

Ön, nácagacarö zxixi ca le zxixi que buz.

<sup>104</sup> Tu'zéajni'i xibá quiu' neda'.

Que lë ni na' réquida' zi' yúgu'të le cabí naca.

### *Xtídzë'ë Dios ruzeni' lu icja ládxido'oru'*

<sup>105</sup> Ca tu bení' naca xtídz'u' ga ridá', en le ruzeni' nöza ga ral-la' töda'.

<sup>106</sup> Guzxí' lu na'a bi guna', en nuna' tsutsu xtídz'a. Gapa chi'a le nusédinu' netu' le naca tsahui'.

<sup>107</sup> Zoa le rusaca' zi' neda'.

Busubán ládxa'a, Xan, ugunu' dxin xtídz'u'.

<sup>108</sup> Guzxí' yöl-la' ba rigu'a Li' len ru'a, Xan, en buzájní'i neda' yugu' le nusédinu' netu'.

<sup>109</sup> Zóatica'sö bönadxi gátia', pero biti' ral-la ládxa'a xibá naguixju' Li'.

<sup>110</sup> Nupa tuá' dö' bulu'zé tu du yalaj le sön neda', pero biti' bucá'ana' xibá quiu'.

<sup>111</sup> Tsaz nazi' lu na'a le nunu' ba nalí, ate' run ga rudzeja ládxa'a.

<sup>112</sup> Ruí'i ládxa'a gúnica'sa' ca ta'nná le gunná bë'u. Guna' caní ga idxintë dza udxi.

### *Nagá'anaru' dxi'a ni'a que xtídzë'ë Dios*

- <sup>113</sup> Réquida' zi' nupa nácagaca chopá ladxi', pero nadxi'ida' xibá naguixju' Li'.
- <sup>114</sup> Nacú' ca tu ga rucachi' cuina', en le run chi'i neda'. Runa' löza xtídz'u.
- <sup>115</sup> Guli'cuítá ga zoa', libíili' ruá'ali' dö', tu' guna' ca ta'nná le gunná bë'ë Xana' Dios.
- <sup>116</sup> Buzóá neda' tsutsu, uguru' dxin xtídz'u, ate' soa' ibana'. Biti' gu'u lataj utui'ida' ca naca le runa' löza.
- <sup>117</sup> Buzóá neda' tsutsu, ate' ulá', en güí'itica'sa' ládxa'a le gunná bë'u.
- <sup>118</sup> Nusán no'o yúgu'të nupa nusángaca le gunná bë'u, tu' naca yöl-la' sina' quéguequi le cabí nazaca'.
- <sup>119</sup> Ugú' nupa tuá' dö' luyú ni ca nu rugúa bëbu. Que lë ni na' nadxi'ida' le nunu' ba nalí.
- <sup>120</sup> Rixxizi idútë le nayá' nabana' tu' rádxida' Li', en rádxida' le gaca cate' usiúdxu' böñachi.

#### *Ral-la' gunru' ca rnna xtídzë'ë Dios*

- <sup>121</sup> Bena' le naca tsahui', en le naca li. Biti' usán no'o neda' lu ná'agaca nupa tu'saca' zi' neda'.
- <sup>122</sup> Nacú' quia' neda', huen dxin quiu', le naca bë' gaca dxi'a quia'. Biti' gu'u lataj ulu'saca' zi' neda' nupa tun ba zxön cuínguequi.
- <sup>123</sup> Richí guiój lahua' tu' riböza' yöl-la' rusólá quiu', enca' didza' tsahui' quiu'.
- <sup>124</sup> Lu yöl-la' dxi'i ladxi' quiu' ben quia' neda', huen dxin quiu', ca ré'ëni quézinu' gunu'. Busedi neda' yugu' le gunná bë'u.
- <sup>125</sup> Naca' huen dxin quiu'. Benna quia' yöl-la' réajni'i para gaca gúnbe'a le nunu' ba nalí.
- <sup>126</sup> Chibidxín dza bi gunu', Xan, tu' gula'guítsjë' xibá naguixju' Li'.
- <sup>127</sup> Que lë ni na' nadxi'iröda' xibá naguixju' Li' ca nadxi'ida' oro. ¡Ön, ca oro banéquiní,
- <sup>128</sup> en réquida' nácagacarö dxi'a xibá quiu' ca yúgu'të le dë! Biti' rilé'eda' dxi'a yúgu'të le cabí naca.

#### *Raca ládxi'ru' gunru' ca rnna xtídzë'ë Dios*

- <sup>129</sup> Run ga rubánida' le nunu' ba nalí. Que lë ni na' bö' naca caza' nazi' lu næ'e le.
- <sup>130</sup> Cate' nalá' lahui xtídz'u, ruzení' queétu'. Run ga ta'yéajni'i nupa nácagaca nöxaj ladxi'.
- <sup>131</sup> Gusalja' ru'a, en gunné ládxa'a, tu' guzé ládxa'a xibá gunná bë'u.
- <sup>132</sup> Buyú neda', en buzá' ladxi' quia', ca run cazu' quégaca nupa ta'dxi'i Li'.
- <sup>133</sup> Buzóá neda' tsutsu para guna' ca rnna xtídz'u. Biti' gu'u lataj le naca xihui' inná be'e neda'.
- <sup>134</sup> Buá'u neda' lu na' nu rusaca' zi' neda', para gaca guna' ca naca xibá quiu'.
- <sup>135</sup> Ben ga gaca bë' nazi' lu no'o neda', huen dxin quiu', en busedi neda' yugu' le gunná bë'u.
- <sup>136</sup> Raca nisa ribödxí guiój lahua' ca tu yegu gubó'o, tu' cabí tun böñachi ca rinná bë' xibá quiu'.

- Idutë li naca le rnna cazë' Xanru'*
- <sup>137</sup> Nacu' Li' tsahui', Xan.  
 Dxi'a tsahui' naca le ruchi'a rusörō'u' queetu'.  
<sup>138</sup> Nugú'u lu na'tu' le nunu' ba nalí.  
 Naca tsahui', en tsaz zoa.  
<sup>139</sup> Tu' riböza' le naca quiu' run ga régui rilá ládxi'da'ahua',  
 ate' gulal-la ladxi' xtídzu'u nupa ta'dá'baga' neda'.  
<sup>140</sup> Idú dxi'a tsahui' naca xtídzu'u.  
 Que lë ni na' neda', huen dxin quiu', nadxi'ida' le.  
<sup>141</sup> Nöxaj ladxi' naca', ate' tu'cá'ana böñachi neda' cá'asö,  
 pero bití' ral-la ládxa'a le gunná bë'u.  
<sup>142</sup> Zóatica'sö le naca tsahui' quiu',  
 en idútë li naca xibá naguixju' Li'.  
<sup>143</sup> Ba bidxín le raca quia', en le rusaca' zi' neda',  
 pero raza ládxa'a xibá gunná bë'u.  
<sup>144</sup> Nácatica'sö tsahui' le nunu' ba nalí.  
 Buzéajni'i neda' para soa' ibana'.

- Ral-la' ulaba ládxi'ru' le gunná cazë' Dios*
- <sup>145</sup> Idú ládxa'a rulidza' Li'.  
 Bubí'i didza', Xan, ate' guna' ca naca le gunná bë'u.  
<sup>146</sup> Rulídzatica'sa' Li'.  
 Busölá neda', ate' guna' ca naca le nunu' ba nalí.  
<sup>147</sup> Riyasa' zi'alö ca ritö' yu zila, en rulidza' Li' para gácalenu' neda'.  
 Riböza' yugu' didza' gu'u.  
<sup>148</sup> Chi'i dzö'ölö rubéaja' yëla guioj lahua',  
 para ulaba ládxa'a ca naca xtídzu'u.  
<sup>149</sup> Lu yöl-la' dxi'i ladxi' quiu' buzé nagu' chi'a.  
 Busubán ládxa'a, Xan, ca naca le nusédinu' netu'.  
<sup>150</sup> Ta'biga' nupa tuá' dö' ga zoa' para ila'bía no neda'.  
 Nucá'anagaca xibá naguixju' Li'.  
<sup>151</sup> Zu' gala' ga zoa', Xan,  
 ate' idútë li naca le gunná bë'u.  
<sup>152</sup> Dza ni'te quez núnbë'a le nunu' ba nalí,  
 en nözda' tsaz nuzú' le.

- Le gunná cazë' Dios run rë'u tsahui'*
- <sup>153</sup> Buyú le rusaca' zi' neda', en busölá neda',  
 tu' cabí ral-la ládxa'a xibá naguixju' Li'.  
<sup>154</sup> Bubí'i didza' uláz quia', en buá'u neda'.  
 Busubán ládxa'a ca naca xtídzu'u.  
<sup>155</sup> Zi'tu' zoa yöl-la' rusölá ga nacuá' nupa tuá' dö',  
 tu' cabí tu'i ládxi'gaca le gunná bë'u.  
<sup>156</sup> Zxóntérö naca yöl-la' ruhuéchi' ladxi' quiu', Xan.  
 Busubán ládxa'a ca naca le nusédinu' netu'.  
<sup>157</sup> Zíangaca nupa ta'bía no neda', en ta'dá'baga' neda',  
 pero bití' nucá'ana' le nunu' ba nalí.  
<sup>158</sup> Bití' rilé'eda' dxi'a nupa nucá'anagaca Li',  
 en bití' tun ca rnna xtídzu'u.  
<sup>159</sup> Buyú ca nadxf'ida' xibá quiu', Xan.  
 Lu yöl-la' dxi'i ladxi' quiu' busubán ládxa'a.  
<sup>160</sup> Idútë li nácagaca yúgu'të xtídzu'u,  
 en tsaz nacuá' yúgu'të le nusédinu' netu' le nácagaca tsahui'.

*Ral-la' udödi cuinru' lu në'ë Dios*

- <sup>161</sup> Ta'bía no neda' nupa ta'nná bë', en biti' bi bena' quéguequi,  
pero runa' bal xtídz'u lu icja ládzi'da'ahua'.
- <sup>162</sup> Rudzéjalenda' xtídz'u u,  
ca rudzeja nu rudzöli tu yöl-la' tsahui' zxön.
- <sup>163</sup> Réquida' zi', en biti' rilé'eda' dxi'a le cabí nácatë,  
pero nadxi'ida' xibá naguixju' Li'.
- <sup>164</sup> Gadxi luzuí tu dza rigu'a Li' yöl-la' ba,  
ni'a que le nusédinu' netu', le naca tsahui'.
- <sup>165</sup> Ta'böza dxi'a tsáhui'do' nupa nadxi'igaca xibá naguixju' Li',  
en biti' bi run ga röjchégú'gaca.
- <sup>166</sup> Runa' löza yöl-la' rusölä quiu', Xan,  
en runa' ca rnna xibá nunu'.
- <sup>167</sup> Yugu' le nunu' ba nalí tun chí'i bö' naca caza',  
ate' nadxi'ide'eda' léguequi.
- <sup>168</sup> Runa' ca ta'nná xibá quiu', en yugu' le nunu' ba nalí  
tu' rilé'e quézinu' yúgu'té le runa'.

### Rudzéjalenu' xtídzë'ë Dios

- <sup>169</sup> Ruzé nagu' le rulidza' Li', Xan.  
Ruzéajni'i neda' ca rnna xtídz'u u.
- <sup>170</sup> Ruzé nagu' le rinábida' Li',  
en busölä neda' ca rnna xtídz'u gunu'.
- <sup>171</sup> Bë' neda' lataj cu'a Li' yöl-la' ba,  
tu' rusédinu' neda' le gunná bë'u.
- <sup>172</sup> Bë' lataj gul-la lúdxa'a ca naca xtídz'u u,  
tu' nácagaca tsahui' yúgu'té xibá nunu'.
- <sup>173</sup> Guzóatë gácalenu' neda',  
tu' nabó'a xibá quiu'.
- <sup>174</sup> Rizé ládxá a yöl-la' rusölä quiu', Xan,  
en raza ládxá a xibá naguixju' Li'.
- <sup>175</sup> Bë' lataj soa ibán bö' naca caza' para cu'a Li' yöl-la' ba,  
en ben ga gácalen neda' le nusédinu' netu'.
- <sup>176</sup> Ridöda' tsölä'alö ca tuba' bö'cu' zxila' nanítiba'.  
Gudá dudilju' neda', huen dxin quiu', tu' cabí ral-la ládxá a xibá nunu'.

### 120

- <sup>1</sup> Cate' gudi'i guzxáca'a bulidza'-në' Xanru',  
ate' Lë' bubi'ë didza'.
- <sup>2</sup> Busölä bö' naca caza', Xan, lu na' nu rizi' yë',  
en lu na' nu biti' run ca gunná caz.
- <sup>3</sup> ¿Bizxi gunë' quiu' Dios, en bizxi ubi'ë quiu', li' na' rizi' yë'u?
- <sup>4</sup> Ichizé' li' yugu' yaga lahui tuchi' que nu reaj gudil-la,  
en cu'ë icju' bo' yalaj que ya' yórido'.
- <sup>5</sup> Bica' bayechi' neda' tu' zóasa' yödzö Mesec,  
en zoa' tu lu yu'u guídi quégaca bönachi Cedar.
- <sup>6</sup> Xidzélë'ë chiguzóa bö' naca caza'  
len nupa tu'suniti yöl-la' riböza dxi'a tsáhui'do'.
- <sup>7</sup> Ré'ënda' köza' dxi'a tsáhui'do', pero cate' ruá'a didza'  
té'ënnë' ila'díl-lalen neda'.

### 121

- <sup>1</sup> Uchisa icja' uyúa' le raca yugu' lu guí'a.  
¿Gazxi za' le gácalen neda'?

<sup>2</sup> Le gácalen neda' za' lu né'ë Xanru'.  
 Lë' benë' lúzxiba, en luyú.  
<sup>3</sup> Biti' gu'ë lataj cuilu' ga ridó'.  
 Biti' ca' gasi Nu na' run chi'i li'.  
<sup>4</sup> Buyútsöca', biti' ridödi yéla guiój lahuë',  
 en biti' rásië', Lë' na' rapa chi'ë böñachi Israel.  
<sup>5</sup> Run chi'ë Xanru' Dios li'.  
 Zoë' Xanru' Dios cuitu' ibéla, rigu'ë li' zxul-la.  
<sup>6</sup> Biti' uzegui' gubidza li' lahui' dza,  
 en biti' bi gun beo' quiu' chi'i dzö'ölö.  
<sup>7</sup> Gun chi'ë Xanru' Dios li' ga rizó'o, en ga rudxinu',  
 dza ni zóaru' na'a, en yugu' dza si' zaca.  
<sup>8</sup> Xanru' Dios gun chi'ë li' ga rizó'o, en ga rudxinu',  
 dza ni zóaru' na'a, en yugu' dza si' zaca.

## 122

<sup>1</sup> Budzéjada' cate' gulé böñachi neda', gula'nná:  
 "Uyeajru' yu'u lidxë' Xanru' Dios."  
<sup>2</sup> Na'a zuíru' ni  
 ga nu riyaza yödzö Jerusalén.  
<sup>3</sup> Dxi'ado' gulunë' yödzö Jerusalén,  
 ate' naca lachi, en tuz ca röjlözgaca yu'u zxön que.  
<sup>4</sup> Ta'yaza yugu' cö' böñachi queë' Xanru' ga ni  
 ca na' nusédinë' Dios böñachi Israel,  
 para ila'gú'u yöll-la' ba Xanru' Dios.  
<sup>5</sup> Ta'bó' nupa tu' chi'a tu'sörö' queëru' ga ni,  
 ga ta'bó' ta'nná bë' zxí'ini xi'söe' David.  
<sup>6</sup> Guli'nábinë' Dios gunë' ga gaca dxi'a que Jerusalén,  
 en ga ulu'zí' xibé nupa ta'dxi'i yödzö ni yöll-la' tsahui'.  
<sup>7</sup> Dios gunë' ga ila'böza dxi'a tsahui'do' nupa nacuá' yödzö ni,  
 en ga ulu'zí' xibé nupa ta'nná bë' yöll-la' tsahui'.  
<sup>8</sup> Tu' nadxí'ida' yugu' böch'a'a, en yugu' böchi' luzá'a,  
 rinnia': "Gaca yöll-la' riböza dxi ladxi' lu yödzö ni."  
<sup>9</sup> Tu' nadxí'ida' lidxë' Xanru' Dios,  
 rinábida'-në' gunë' ga gaca dxi'a que yödzö ni.

## 123

<sup>1</sup> Uchisa lahua' uyúa' ga zu' Li',  
 rö'u rinná bë'u yehua' yubá ni'.  
<sup>2</sup> Ca runë' bönni' nadó'o, ruyúë' bi ulu'ë xanë',  
 ate' ruyubi' bi'i nigula nadó'o bi ulu'unu nigula xanbi',  
 lësca' caní ruyuru' rë'u bi ulu'ë Xanru' Dios,  
 ga idxinrö dza uzá' ládxë'ë queëru'.  
<sup>3</sup> Buzá' ladxi' queëtu', Xan. Buzá' ladxi' queëtu',  
 tu' nacuá' nupa tu'cá'ana netu' cá'asö.  
<sup>4</sup> Rudú ládxí'tu' tu' tu'titaj netu' nupa tu'zí' xibé yúgu'të le dë,  
 en tu' tu'cá'ana netu' cá'asö nupa tun ba zxön cuínguequi.

## 124

<sup>1</sup> "La'tu' cabí gúcalenë' Xanru' rë'u",  
 ral-la' ila'nná böñachi Israel:  
<sup>2</sup> "La'tu' cabí gúcalenë' Xanru' rë'u  
 cate' nupa biti' ta'lé'e rë'u dxi'a gula'díl-lalen rë'u,

<sup>3</sup> la' gulútítë rë'u  
tu' gula'léde'e rë'u.

<sup>4</sup> Guca queéru' ca la' usubága'të rë'u nisa,  
en la' uchícjatëru' lu nisa na'.

<sup>5</sup> La' uchícjatëru' tu lu nisa zila."

<sup>6</sup> ¡Bica' lá'ayi Xanru' Dios  
tu' cabí bi'ë lataj nupa biti' ta'lé'e rë'u dxi'a ulu'suniti rë'u!

<sup>7</sup> Bularu' ca rulaba' biguínnido' tu lu le zön lëba'.  
Naröza' du yalaj, ate' nuláru'.

<sup>8</sup> Le rácalen rë'u za' lu né'ë Xanru' Dios.  
Lë' benë' lúzxiba, en lu yu.

## 125

<sup>1</sup> Nupa tu'zxöni ládxi'gaca Xanru' Dios nácagaca ca guí'a Sión,  
tu' cabí bi gaca utá guí'a na', pero tsaz zoa caz.

<sup>2</sup> Ca rô'gaca guí'a idú gásibi'ilö yödzö Jerusalén,  
la' canísö zoë' Xanru' Dios idú gásibi'ilö böñachi queë',  
na'a dza, en yúgu'të dza si' zaca.

<sup>3</sup> Biti' ral-la' ila'nná bë' nupa tuá' dö' lu xiyúgaca böñachi tsahui',  
para cabí iún ga ilu'ë dö' bönni' tsahui' na'.

<sup>4</sup> Xan, ben ga gaca dxi'a quégaca nupa nácagaca dxi'a,  
en quégaca nupa idú ládxi'gaca tun ca rnna xtídzu'u.

<sup>5</sup> Nupa tu'dödi cuínguequi lu le cabí nácatë,  
ben léguequi xigüia' tsözxöñ len nupa tuá' dö'.  
Ben ga ila'cuá' böñachi Israel dxi'a tsáhui'do'.

## 126

<sup>1</sup> Cate' Xanru' Dios buché'ë böñachi yödzö Sión  
nupa gula'dzún zi'tu', gúquiru' yélaso rineru'.

<sup>2</sup> Ní'irö idú ládxi'ru' buzxídxiru',  
en lu yöl-la' rudzeja queéru' guródxí'aru'.  
Ní'irö gulu'i didza' böñachi yugu' yödzö izá'a, gula'nná:  
"Dios, Xángaquië", benë' le nácagaca zxöñ, gúcalenë' légaquië".

<sup>3</sup> Xanru' Dios benë' le nácagaca zxöñ, gúcalenë' rë'u,  
ate' ruzí'iru' xibé'.

<sup>4</sup> Buché' netu', irúajtu' ga ni nadzuntu', Xan,  
para gácatu' ca nisa rudxín lu yegu nuhu'igaca.

<sup>5</sup> Lu yöl-la' rudzeja ila'bödxí'a cate' ila'lapa  
nupa lu yöl-la' ribödxí' quéguequi röjözägaca.

<sup>6</sup> Nu bönni' lu yöl-la' ribödxí' rizé'ë, nu'ë binnedo' röjözë',  
lu yöl-la' rudzeja cödxí'ë cate' udxinë', nu'ë le nulapë'.

## 127

<sup>1</sup> Channö cabí runë' tsutsu Xanru' Dios tu yu'u,  
nítisö tunë' dxin bönni' tunë' yu'u na'.

Channö cabí run chi'ë Xanru' Dios tu yödzö,  
nítisö ruyúë' bönni' na' yu'u lu né'ë yödzö na'.

<sup>2</sup> Nítisö naca rubanu' zílado', en röjözü' cate' chigúl-lada',  
en ragu' le guzxi'u ni'a que le busaca' zi' cuinu',

tu' runnë' Xanru' Dios que nu nadxi'inë' cate' ni' rasi nu na'.  
<sup>3</sup> Buli'yú, nácagacabi' zxí'iniru' le runnë' Xanru' Dios queéru',  
 ate' bñido' tu'cuá'anu nigula queéru'  
 nácagacabi' le rubi'ë Xanru' Dios queéru'.  
<sup>4</sup> Ca nácagaca yaga lahui' tuchi' lu na' nu bönni' rejë' gudil-la  
 nácagacabi' zxí'inë' bönni' zoë' iz cuidi' queë'.  
<sup>5</sup> Bica' ba bönni' nacuá'abi' queë' ziántéröbi'.  
 Biti' ca' utu'inë' cate' ru'ë didza' láhui'gaquië'  
 bönni' tu'chi'a tu'söröö' queë', en lógaca nupa ta'dil-lalen lë'.

## 128

<sup>1</sup> Bica' ba yúgu'të nupa tadxi Xanru' Dios,  
 nupa na' tun ca ré'ëni quézinë' Lë'.  
<sup>2</sup> Cate' gagu' le gata' quiu' ni'a que dxin nun cazu',  
 uzi'u xibé lë na', en gaca dxi'a quiu'.  
<sup>3</sup> Gácanu nigula quiu' ca tu lubá uva dxía ga naca lö'a lidxu',  
 ate' ilácabi' zxí'nu' ca yugu' yaga olvodo' ta'bó'öbi' ga ni' ráguli'.  
<sup>4</sup> Buli'yútsöca', caní gáquië' bica' ba  
 bönni' na' rádxinë' Xanru' Dios.  
<sup>5</sup> Xanru' Dios zoë' Sión gunë' ga gaca dxi'a quiu',  
 en gu'ë li' lataj ilé'enu' le dxi'a gaca que yödzö Jerusalén  
 yúgu'të dza su' ibanu'.  
<sup>6</sup> Dios gu'ë li' lataj ilé'enu' yugu' zxí'ini xi'sú',  
 en gunë' ga ila'böza dxi'a tsáhui'do' bönachi Israel.

## 129

<sup>1</sup> "Zian luzuí gula'bía no netu' ga gudela' nácatu' ra'bando",  
 huáca ila'nná bönachi Israel:  
<sup>2</sup> "Zian luzuí gula'bía no netu' ga gudela' nácatu' ra'bando',  
 pero biti' gula'deli' ulu'xicja netu'.  
<sup>3</sup> Guca tsca bulu'gá'ana-ba' bëdxi lu bëla' cùdzu'tu',  
 en gulún tunna ga gudödi xiyágaba' bëdxi quégacië'."  
<sup>4</sup> Tsahui' náquië' Xanru' Dios.  
 Chinachúguë' du quégaca nupa tuá' dö' le gulúgui'ni netu'.

<sup>5</sup> Ben ga ulu'tui'i, en ulu'huécja guz cùdzu'lö  
 yúgu'të nupa biti' ta'lé'e dxi'a netu', bönachi Sión.  
<sup>6</sup> Ben ga ilácagaca ca guíxi'do' da' ícjo'olö yu'u,  
 le ribídxitë cate' ni' naca hué'ënido'.  
<sup>7</sup> Biti' gaca ulí næ'e nu tsöjchugu le,  
 en biti' gaca nu gachi tsölén guizxi que,  
<sup>8</sup> en biti' ta'nná nupa ta'dödi ni':  
 "Rinábitu'-në' Xanru' Dios gunë' ga gaca dxi'a quiu'.  
 Lu Lë' Xanru' rinábitu' Lë' gunë' ga gaca dxi'a quiu'."

## 130

<sup>1</sup> Ga ni nötjada' rulidza' Li', Xan.  
<sup>2</sup> Ruzé nagu' chi'a, Xana' Dios.  
 Ruzëda' nagu' le rinábida' Li'.  
<sup>3</sup> La' nnaru' tsöjnenu' xiguiá' nabága'gaca bönachi,  
 ¿nuzxi caz urúaj tsahui' lo', Xan?  
<sup>4</sup> Runiti lo cazu' netu', Xan,

para guntu' Li' bal.

<sup>5</sup> Runa' löza Li', Xana' Dios. Run löza bö' naca caza' Li', ate' runa' löza gaca ca rnna xtídzu'u.

<sup>6</sup> Bö' naca caza' runrö löza Li', Xan, ca tuné' bönni' tapa chi'ë yödzö chi'i dzö'ölö ta'bözë itó yu zila, ca tuné' löza itó yu zila yugu' bönni' na'.

<sup>7</sup> Guli'gún löza Xanru' Dios, libí'ili', böñachi Israel, tu' náquië' dxi'i ladxi' Xanru', en ruhuá'uë' böñachi Israel.

<sup>8</sup> Xanru' Dios huöá uë' böñachi Israel lu yúgu'të xiguia' nabága' gaca.

## 131

<sup>1</sup> Biti' run ba zxön cuina', Xan, en biti' rigú'u cuina' yöl-la' ba, en biti' ulapa' na'a le nácagaca zxön, en le nácagaca böñiga.

<sup>2</sup> Idú ládx'a'a nuzúa cuina' nöxaj, en zoa' dxisö. Ca runbi' bi'i hué'ëni ruzí' ládx'i'bi' cuítanu xiná'abi', ca' riböza bö' naca caza' lu icja ládx'i'da'ahua'.

<sup>3</sup> ¡Libí'ili', böñachi Israel, guli'gunë' löza Xanru' Dios ga naguela' na'a dza, en yúgu'të dza si' zaca!

## 132

<sup>1</sup> Rinábida' Li', Xan, uláz queë' David tsöjnénú' yúgu'të le gudí'i guzxáquë'ë,

<sup>2</sup> en ca benë' tsutsu xtídzë'ë, Xan, en guzxi' lu né'ë bi gunë' lo', nacu' Nu nál-latérö láhuigaquië' zxi'ini xi'sóë' Jacob, gunné':

<sup>3</sup> "Biti' ca' tsu'a lidxa', en biti' gáta'a le ráti'da',

<sup>4</sup> en biti' gu'a lataj tödi yëla guiöj lahua', en biti' utsudi' lahua',

<sup>5</sup> ga idxinrö dza ucöza' tu lataj ga soë' Xanru' Dios, le gaca yu'u lidxi Nu na' nál-latérö láhuigaquië' zxi'ini xi'sóë' Jacob."

<sup>6</sup> Biyöñitu' didza' que guí'ina lá'ayi queë' Dios cate' ni' zóatu' Efrata, ate' budzöllitu' le lu xiyúë' Jaar.

<sup>7</sup> Uyéajru' ga na' zoa caze' Xanru' Dios.

Tseaj ládx'i'ru'-në' ga naca xilibi ni'ë.

<sup>8</sup> Gudödi, Xan, ga na' soa cazu' Li'.

Gudá tsözxón len guí'ina lá'ayi que yöl-la' zxön quiu'.

<sup>9</sup> Ben ga sóalen le naca tsahui' yugu' bixúz quiu' ca tu lari' ta'xóë' cùdzu'gaquië'.

Ben ga ilül-la böñachi quiu' lu yöl-la' rudzeja quéguequi.

<sup>10</sup> Uláz queë' David, huen dxin quiu', rinábida' Li' cabí ucá'anu' bönni' na' gurö cazu' Li'.

<sup>11</sup> Xanru' Dios benë' tsutsu xtídzë'ë bi gunë' queë' David, le naca idútë li, ate' Lë' biti' unítië' xtídzë'ë na', gunné':

"Uzóa' tuë' zxi'ini xi'sú' xilatju' ga inná bë'ëbi'.

<sup>12</sup> Channö ilunbi' zxi'ini xi'sú' ca rnna didza' dzaga quia', en le nuna' ba nalí para uzéajni'ida' légacabi', ila'nná bë'ëbi' ga rö'u rinná bë'u yúgu'të dza si' zaca."

<sup>13</sup> Xanru' Dios nabō' cazē' queē' yödzö Sión.

Raca ládxē'ë gaca Sión ga soa cazē' Lē'.

<sup>14</sup> Rnnē': "Nácatica'sö lataj ni ga soa caza' neda'.

Soa' ni tu' raca ládxa'a soa' ni.

<sup>15</sup> Guna' ga gátada' le ilágugaca böñachi ni,

en guna' ga ulu'huólaj ila'dzé'e yöta xtila

nupa ta'yadzaj ta'yudxi lu yödzö ni.

<sup>16</sup> Guna' ga sóalen yöl-la' rusólá yugu' bixúz quia'

ca tu lari' ila'xóa cúdzu'gaquie',

ate' ilúl-la böñachi quia' lu yöl-la' rudzeja quéguequi.

<sup>17</sup> Guna' ni ga ilá'lahui yöl-la' unná bë' queē' David.

Guna' ga sóatica'sö nu inná bë' xilatjë' bönni' na' nabō' caza'.

<sup>18</sup> Guna' ga sóalen nupa biti' ta'lé'e lë' dxi'a yöl-la' rutu'i

ca tu lari' ilácuguequi, pero tsépi yösa bení' le dxía icjé'."

### 133

<sup>1</sup> Buli'yútsöca': ¡Bica' dxi'a tsahui' naca

cate' nupa nácagaca böchi' luzé'e

ta'böza lu yöl-la' tuz quéguequi!

<sup>2</sup> Naca ca le za ta'gú'u ícjaguequi böñachi,

le ridzún lu guitsa' láhuiguequi,

en bidzún lu guitsa' lúzxuë' Aarón,

le bidzún ga ridxitnë lu yeni zxë'.

<sup>3</sup> Naca ca buzén le ridinni lu guí'a Hermón,

en ca le ribö'a lu guí'a Sión,

tu' gunná bë'ë Xanru' gaca dxi'a queëru' lu guí'a na',

en gata' yöl-la' na'bán idú queëru'.

### 134

<sup>1</sup> ¡Buli'yútsöca'!

¡Guli'cu'ë Xanru' Dios yöl-la' ba, yúgu'tëli' runli' xichinë' Xanru',

yúgu'tëli' na' zóali' yu'u lidxë' Xanru' chi'i dzö'ölö!

<sup>2</sup> ¡Guli'chisa ná'ali' ga zóali' lataj lá'ayi queë',

en guli'nná dxi'a queë'!

<sup>3</sup> Xanru' Dios, zoa cazé' yödzö Sión, gunë' ga gaca dxi'a queëli'.

Naca cazé' Nu ben yehua' yubá, en yödzölió ni.

### 135

<sup>1</sup> ¡Guli'cu'ë yöl-la' ba Xanru' Dios!

¡Guli'cú'u yöl-la' ba La la'ayi queë' Xanru' Dios!

¡Guli'cu'ë yöl-la' ba, libí'ilí' runli' xichinë' Xanru',

<sup>2</sup> libí'ilí' na' zuflí' yu'u lidxë' Xanru',

ga na' zóali' lö'a que yu'u lidxë' Dios queëru'!

<sup>3</sup> ¡Guli'cu'ë yöl-la' ba Xanru' Dios tu' náquië' dxi'a!

¡Guli'gul-la yöl-la' ba que La la'ayi queë', tu' naca lachi!

<sup>4</sup> Nabō' cazé' Xanru' zxí'ini xi'sóë' Jacob para ilaca quez queë'.

Guröë' böñachi Israel para ilequi queë'.

<sup>5</sup> Nözda' nayépisë' Xanru' Dios.

Nayépisëtérë' ca yugu' dios quégaca böñachi izá'a.

<sup>6</sup> Run cazé' Xanru' ca riyaza ladxi' cazé' yehua' yubá ni',

en luyú ni, en lu nísado', en zxan lu yu.

<sup>7</sup> Runë' ga rö' böaj gáti'tës luyú ni,  
en runë' ga rëpi yösa cate' ralaj guiój.  
Rubéajé' bö' recja ga rapa chi'ë le nequi queë'.  
<sup>8</sup> Bétië' yugu' bi'i bönni' zí' alö quégaca bönachi Egipto,  
zxí'inigaca bönachi, en böa' hué'ënido' quégacaba' böa' guixi'.  
<sup>9</sup> Benë' yugu' yöl-la' huáca zxön le gulaca bë' luyú Egipto,  
yugu' lë na' gulaca queë' Faraón, en quégaca huen xichinë'.  
<sup>10</sup> Busunítië' Dios bönachi zián yödzö izá'a,  
en bëtië' bönni' lo ta'nná bë'ë.  
<sup>11</sup> Bétië' Sehón, bönni' gunná bë'enë' bönachi Amorreo,  
en Og, bönni' gunná bë'enë' bönachi Basán,  
en bönni' gula'nná bë'enë' bönachi yödzö nacuá' luyú Canaán.  
<sup>12</sup> Budödë' xiyúgaquië' bönni' na'  
lu ná'agaquië' bönni' Israel, bönachi queë' cazë'.

<sup>13</sup> Tsaz zoa caz Lo', Xan.  
Ila'cuá'tica'sö nupa tsöjnégaca Li', Xan,  
<sup>14</sup> tu' uchi'a usöröö' bönachi queu', Xantu' Dios,  
en huéchi' ládxu'u nupa tun xichinu'.

<sup>15</sup> Budó' quégaca bönachi yugu' yödzö izá'a néquiniguequi  
plata, en oro, yugu' le núnigaca lu ni'a lu ná'agaca bönachi.

<sup>16</sup> Zóagaca ruí'iguequi, pero biti' bi didza' tu'i.

Zóagaca guiój lóguequi, pero biti' bi ta'lé'e.

<sup>17</sup> Zóagaca nágagaca, pero biti' bi ta'yöni,  
en biti' ta'guela' bö' ruí'igaca.

<sup>18</sup> Nupa tun léguequi ilaca ca nácagaca budó' na',  
en caní ilaca yúgu'të nupa tu'zxöni ladxi' léguequi.

<sup>19</sup> Libí'ili', bönachi Israel, guli'guië' Xanru' náquië' dxí'a.  
Libí'ili', zxí'ini xi'söe' Aarón, guli'guië' Xanru' náquië' dxí'a.  
<sup>20</sup> Libí'ili', zxí'ini xi'söe' Leví, guli'guië' Xanru' náquië' dxí'a.  
Libí'ili', núloli' rádxili'-në' Xanru', guli'guië' Xanru' náquië' dxí'a.  
<sup>21</sup> Núloli' zóali' yödzö Sión ral-la' guiéli'-në' Xanru' náquië' dxí'a,  
tu' zoa cazë' Xanru' Dios yödzö Jesusalén.

¡Guli'cu'ë yöl-la' ba Xanru'!

## 136

- <sup>1</sup> ¡Xclenë' Xanru' Dios tu' náquië' dxí'a!  
Zóatica'sö yöl-la' dxí'i ladxi' queë'.
- <sup>2</sup> ¡Xclenë' Dios nayépisétérë' ca yugu' dios izá'a!  
Zóatica'sö yöl-la' dxí'i ladxi' queë'.
- <sup>3</sup> ¡Xclenë' Xanru', nayépisétérë' ca yugu' xángaca bönachi!  
Zóatica'sö yöl-la' dxí'i ladxi' queë'.
- <sup>4</sup> ¡Xclenë' Dios, tuzé' Lé' runë' yugu' yöl-la' huáca zxön!  
Zóatica'sö yöl-la' dxí'i ladxi' queë'.
- <sup>5</sup> ¡Xclenë' Dios, len yöl-la' rácada' queë' benë' lúzxiba!  
Zóatica'sö yöl-la' dxí'i ladxi' queë'.
- <sup>6</sup> ¡Xclenë' Dios, gudixje' luyú láhuilö nísado'!  
Zóatica'sö yöl-la' dxí'i ladxi' queë'.
- <sup>7</sup> ¡Xclenë' Dios, benë' gubidza, en beo'!

Zóatica'sö yöl-la' dxi'i ladxi' queë'.  
<sup>8</sup> ¡Benë' Dios gubidza para tsení' lahui' dza!  
Zóatica'sö yöl-la' dxi'i ladxi' queë'.  
<sup>9</sup> ¡Benë' Dios beo', en yugu' bólaj para ulu'zení' chi'i dzö'ölö!  
Zóatica'sö yöl-la' dxi'i ladxi' queë'.  
<sup>10</sup> ¡Xclenë' Dios, bétie' yugu' bi'i bönni' lo quégaca bönachi Egipto!  
Zóatica'sö yöl-la' dxi'i ladxi' queë'.  
<sup>11</sup> ¡Bubéajé' bönachi Israel ladaj bönachi Egipto na'!  
Zóatica'sö yöl-la' dxi'i ladxi' queë'.  
<sup>12</sup> ¡Len yöl-la' huáca zxön queë', en lu yöl-la' nadxf'i queë' benë' caní!  
Zóatica'sö yöl-la' dxi'i ladxi' queë'.  
<sup>13</sup> ¡Xclenë' Dios, bubéajé' choplö Nísado' Xiná!  
Zóatica'sö yöl-la' dxi'i ladxi' queë'.  
<sup>14</sup> ¡Benë' ga gula'dödi bönachi Israel gatsaj láhui'lö nísado' na'!  
Zóatica'sö yöl-la' dxi'i ladxi' queë'.  
<sup>15</sup> ¡Lu nísado' na' busunítië' Faraón, en bönni' queë' rójáquië' gudil-la!  
Zóatica'sö yöl-la' dxi'i ladxi' queë'.  
<sup>16</sup> ¡Xclenë' Dios, guché'ë bönachi queë' la' guixi' ga ni' naca yu bidxi!  
Zóatica'sö yöl-la' dxi'i ladxi' queë'.  
<sup>17</sup> ¡Xclenë' Dios, bétie' bönni' gula'nná bë'ë, guláquië' nal-la!  
Zóatica'sö yöl-la' dxi'i ladxi' queë'.  
<sup>18</sup> ¡Bétie' bönni' gula'nná bë'ë, dëda' lu ná'agaquië' yöl-la' unná bë'!  
Zóatica'sö yöl-la' dxi'i ladxi' queë'.  
<sup>19</sup> ¡Bétie' Sehón, bönni' gunná bë'enë' bönachi Amorreo!  
Zóatica'sö yöl-la' dxi'i ladxi' queë'.  
<sup>20</sup> ¡Bétie' Og, bönni' gunná bë'enë' bönachi Basán!  
Zóatica'sö yöl-la' dxi'i ladxi' queë'.  
<sup>21</sup> ¡Budödë' xiyúgaquië' lu ná'agaca bönachi queë'!  
Zóatica'sö yöl-la' dxi'i ladxi' queë'.  
<sup>22</sup> ¡Budödë' le lu ná'agaca bönachi Israel, bönachi tun xichinë'!  
Zóatica'sö yöl-la' dxi'i ladxi' queë'.  
<sup>23</sup> ¡Yöjnenë' rë'u cate' ni' bugá'anaru' cá'asö!  
Zóatica'sö yöl-la' dxi'i ladxi' queë'.  
<sup>24</sup> ¡Busölé' rë'u lu ná'agaca nupa gula'díl-lalen rë'u!  
Zóatica'sö yöl-la' dxi'i ladxi' queë'.  
<sup>25</sup> ¡Rugahuë' yúgu'të bönachi!  
Zóatica'sö yöl-la' dxi'i ladxi' queë'.  
<sup>26</sup> ¡Xclenë' Dios, zoa cazë' yehua' yubá!  
Zóatica'sö yöl-la' dxi'i ladxi' queë'.

## 137

- <sup>1</sup> Ra' yegu nacuá' lu yu Babilonia guró'ötu',  
en gurödxi yéchi'tu', cate' yöjnetu' yödzö Sión.  
<sup>2</sup> Lu yaga rö'gaca yugu' ra' yegu ni'  
bugála'tu' yugu' le rúl-lalentu'.  
<sup>3</sup> Caní bentu' tu' gula'nabi yudxi nupa gulaché' netu' nadzuntu' ni' gúl-latü'.  
Nupa bulu'saca' zi' netu' gula'naba queëtu' yöl-la' ruzxidxi, gula'nná:  
"Guli'gul-la queëtu' tu le rul-la que yödzö Sión."  
<sup>4</sup> ¿Nacxi caz gaca gúl-latü' le rul-la queë' Xanru'  
ga ni nadzuntu' tu lu yödzö izá'a?

<sup>5</sup> Channö gal-la ládxa'a yödzö Jerusalén,  
rinábida'-në' Dios ugúë' yöl-la' raca que na'a ibëla.  
<sup>6</sup> Rinábida'-në' gunë' ga ta' lúdxa'a chichja'  
channö cabí tsöjneda' ladza',  
en channö cabí huí' zxönra' yödzö Jerusalén ca ia'tú le ruzí'ida' xibé.

<sup>7</sup> Yöjné le gulunë' zxí'ini xi'sóë' Edom, Xan,  
le gulunë' dza busiúdxu' yödzö Jerusalén,  
ca na' gula'nné': "Guli'quínnaj dëra.  
Guli'quinnaj dëra ga idxintë xilibi zö'ö yödzö na'."

<sup>8</sup> Lib'ili', böñachi Babilonia, lib'ili' rusuníteli',  
bica' ba nu ubí'i queéli' ca na' benli' queétu'.  
<sup>9</sup> Bica' ba nu quela' yugu' b'ido' queéli'  
en uzzuzzaj légacabi' yugu' lu guiój.

## 138

<sup>1</sup> Idú ládxa'a guía' Li', "Xclenu'" Xan.  
Gul-la' yöl-la' ba quiu' lógaca le tun zxön böñachi yugu' yödzö izá'a.  
<sup>2</sup> Uzóa zxiba' saca' yudo' lá'ayi quiu', en guía' Li', "Xclenu'"  
ni'a que Lo', tu' nacu' dxi'i ladxi', en runu' ca rnna didza' bë'u,  
tu' benu' ca naca lu xtídzu'u, en lu le naca ca nazf'i lo.  
<sup>3</sup> La' dza ná'asö cate' bulidza' Li', bubi'u didza'.  
Tu' butipu' ládxa'a, guca' rugu ladxi'.

<sup>4</sup> Yúgu'të bönni' ta'nná bë'ë ilé' Li': "Xclenu'" Xan,  
cate' ila'yönnë' didza' ru'u.

<sup>5</sup> Ilul-lë' ca nácagaca le runë' Xanru' Dios,  
tu' nácatérö zxön yöl-la' ba queé' Xanru'.  
<sup>6</sup> Sal-la' nayépisétérë' Xanru' Dios  
rui'i ládxë'ë nupa nácagaca cá'asö,  
pero zi'tu' zí'tu' sö ruyúë' nupa tun ba zxön cuínguequi.

<sup>7</sup> Sal-la' ridá' ga zoa böñadxi quia', Li' utipa cazu' ládxa'a.  
Tí'lalen cazu' nupa ta'dí'lalen neda',  
ate' len yöl-la' huáca quiu' usöló' neda'.

<sup>8</sup> Xanru' gun cazé' quia' ca chinuzóa cazé' gunë'.

Zóatica'sö yöl-la' dxi'i ladxi' quiu', Xan.  
Biti' usán no'o le nun cazu' len na' cuinu'.

## 139

<sup>1</sup> Ruyú cazu' le yu'u icja ládxí'da'ahua', Xan, en nunbë' cazu' neda'.  
<sup>2</sup> Nöz quézinu' cate' ribö'a, en cate' riyasa'.  
Nözinu' le rizá' ládxa'a ni' zu' zí'tu'.  
<sup>3</sup> Ruyú cazu' neda' cate' bi runa', en cate' rasia',  
en nözinu' yúgu'të le runa'.  
<sup>4</sup> Zí'atélö ca bi didza' ru'a,  
chi nöz quézinu' bi innía', Xan.  
<sup>5</sup> Röjnörü cazu' lahua', en za' cazu' cùdza'a,  
en naxóatica'sö no'o neda'.  
<sup>6</sup> Run ga rubánida' tu' nöz quézinu' Li'.

Biti' séqui'da' tséajni'ida' ca naca.

- <sup>7</sup> ¿Naru' huáca tseja' ga biti' idxín Bö' quiu'?  
 ¿Naru' huáca izxúnnaja' ga biti' zoa cazu' Li'?  
<sup>8</sup> La'tu' huabena' lúzxiba, ni' soa cazu' Li',  
 en la'tu' huötja' lataj chul-la, ni' zoa cazu' ca'.  
<sup>9</sup> La'tu' uyija' ga rilén gubidza,  
 o la'tu' huadöda' ia'tsölá'alö nísado',  
<sup>10</sup> ni' caz ichë'u neda',  
 ate' len no'o ibëla sön cazu' neda'.  
<sup>11</sup> La'tu' innía': "Ucachi' neda' le naca chul-la",  
 en la'tu' huöáca chul-la bení' zóalen neda',  
<sup>12</sup> biti' gaca chul-la lo' Li' lë na' naca chul-la quia',  
 pero chi'i dzö'ölö gaca quiu' ca lahui' dza.  
 Tuz ca nácagaca lo' Li' le naca chul-la, en le naca lahui' dza.  
<sup>13</sup> Nun cazu' Li' le zoa icja ládzi'da'ahua'.  
 Benu' ga guyá' lë'ënu xiná'a le naca caza'.  
<sup>14</sup> Guía' Li': "Xclenu'" tu' run ga rubánida' ca nun cazu' neda',  
 ate' rádxida' Li' tu' tun le nunu' ga rubánida',  
 ate' bö' naca caza' nözi caz naca caní'.  
<sup>15</sup> Biti' bigachi' lo' le naca caza' cate' ni' si' galja',  
 cate' ni' yu'a lë'ënu xiná'a.  
<sup>16</sup> Bilé'e quézinu' neda' cate' ni' si' galja',  
 tu' chinuzúajgaca lu guichi quiu'  
 yugu' dza ral-la' soa' ibana',  
 sal-la' biti' ridxini nitú dza na'.  
<sup>17</sup> Nazáca'térögaca quia' le rizá' ládxu'u, Dios.  
 Ziánterö nácagaca lë na' rizá' ládxu'u.  
<sup>18</sup> La'tu' huáca nu ulaba léguequi,  
 ilácagaca ziánterö ca nácagaca guiój yuzxi.  
 Cate' rubana', ni' zóalena' Li'.  
<sup>19</sup> Raca ládxa'a usuníti' nupa tuá' dö', Dios.

Que lë ni na', guli'cuíta ga zoa', nülöli' rútili' bönachi.

- <sup>20</sup> Tu'i didza' zi' ca nacu' Li', Dios,  
 ate' nupa ta'dá'baga' Li' ta'nné liz que Lo'.  
<sup>21</sup> ¿Naru' cabí rileda' nupa ta'lé Li', Xan?  
 ¿Naru' cabí ruzóá' tsölá'alö nupa ta'dá'baga' Li'?  
<sup>22</sup> Idú ládxa'a biti' rile'eda' léguequi dxi'a.  
 Nuzóá' léguequi ca nupa ta'díl-lalen neda'.  
<sup>23</sup> Buyú neda', Dios, en gúquibe'e le zoa icja ládzi'da'ahua'.  
 Guzxi' bë' neda', en gúquibe'e le rizá' ládxa'a.  
<sup>24</sup> Buyú channö zóalen neda' le naca dö',  
 en bulu'i neda' nöza tsahui' quiu' zóatica'sö.

## 140

- <sup>1</sup> Busölá neda', Xan, lu ná'agaca nupa tuá' dö'.  
 Ben chi'i neda' para cabí bi iluné' bönni' zi' quia'.  
<sup>2</sup> Ta'zá' ládxë'ë le nácagaca xihui' ilunë',  
 en tunë' ga ila'díl-lalen bönachi luzé'eguequi.  
<sup>3</sup> Didza' tu'ë tun ga nácagaca lúdzi'gaquië' ca yugu' bëla sínia'.

Yu'u ruá'agaquië' le naché' yöl-la' guti ca le dxía lu láyi'ba' bëla na'.

<sup>4</sup> Ben chi'i neda', Xan, para cabí bi iluné' bönni' tu'ë dö' quia'.

Ben chi'i neda' para cabí bi iluné' bönni' zidzaj quia',

bönni' na' té'ënë' iluné' ga ichixi iníguida'.

<sup>5</sup> Nupa tun ba zxön cuínguequi nucáchi'gaca le sön neda',  
enca' du yalaj iröli neda'.

Nucáchi'gaca du yalaj ga ral-la' töda'.

Nucózagaca le ila'zón neda'.

<sup>6</sup> Gudxa'-në' Xanru': "Nacu' Dios quia'.

Ruzé nagu', Xan, yugu' le rinábida' Li'.

<sup>7</sup> Xana' Dios, naca cazu' Nu rusólá neda' len yöl-la' huáca quiu'.

Ben chi'i cazu' icja' cate' ni' zoa' lu gudil-la.

<sup>8</sup> Biti' gu'u lataj, Xan, gaca quia' le ré'ënë' gunë' bönni' ru'ë dö'.

Biti' gu'u lë' lataj idéli'në' le rizá' ládxë'ë, para cabí tsépisë'.

<sup>9</sup> Nacuá' nupa nagú'ugaca neda' lé'ajlö.

Busubaga' ícjagaquië' dö' té'ënë' ilu'ë quia'.

<sup>10</sup> Ben ga ila'bixaj bo' yalaj lahui ícjagaquië'.

Bé' lataj tsöjtsázagaquië' tu lu gu'zxön,

en yugu' lu yero zila ga biti' ila'zéqui'në' ulu'rúajé'.

<sup>11</sup> Biti' gu'u lataj soë' bönni' riz' yé'ë luyú ni.

Ben ga udxín queë' bönni' zidzaj dö' ru'ë."

<sup>12</sup> Nözda' gunë' Xanru' ga ulu'rúaj tsahui' nupa ta'gui'i ta'zaca',  
en uchi'a usöröö' quégaca bönachi yechi'.

<sup>13</sup> Le nácatë ilé Li': "Xclenu'" nupa nácagaca tsahui' tu' tu'lidza Lo'.  
Ila'cuá' ga zoa cazu' Li' nupa nácagaca dxi'a.

## 141

<sup>1</sup> Rulidza' Li', Xan. Gudáchi ga zoa'.

Ruzé nagu' chi'a cate' rulidza' Li'.

<sup>2</sup> Buyú le rulidza' Li' ca dzön yalaj le ridxín lo',  
en cate' richisa na'a, buzí' le ca tu böa'do' uzégui'a-ba' lo'.

<sup>3</sup> Ben chi'i ruá'a, Xan,  
en gudapa chi'i guídi ruá'a para cabí gu'a didza' zi'.

<sup>4</sup> Biti' gu'u lataj gaca ládx'a'le cabí nácatë,  
para cabí guna' le naca xihui'  
len yugu' bönni' tutié' bönachi.

Biti' gu'u lataj guna' léguequi tsözxöön.

<sup>5</sup> Bé' lataj gu'ë neda' bönni' tsahui' lu yöl-la' nadxf'i queë'  
para uzéajni'inë' neda'.

Le gunë' gaca quia' ca le za cu'ë icja'.

Biti' gu'u lataj tá'baga' icja' le ilún nupa tuá' dö'.

Rinábida' Li' uzagu' xinózguequi.

<sup>6</sup> Ila'ládzu'gaquië' bönni' lo quéguequi lë'e guí'a guiöj,  
ate' iléquibe'e gulaca dxi'a didza' bë'a.

<sup>7</sup> Ca raca cate' nu rugá'ana-ba' bëdxi, en rulá'a yu,  
ca' gaca que dxita yú'ugaquië',

le gulásilasi ra' ba que xilátjagaca nupa nátigaca.

<sup>8</sup> Richisa lahua' ruyúa' ga zu' Li', Xantu' Dios.

Rucachi' cuina' ga na' zu'. Biti' usán no'o neda'.

<sup>9</sup> Ben ga biti' tsöjbixa' lu le sön neda', lë na' nucáchi'gaca,  
en ga biti' tsöjtsaza' lu du yalaj nucózagaca nupa tuá' dö'.

<sup>10</sup> Bé' lataj ila'yaza la' cuíngacasö lu du yalaj bulu'cachi' nupa tuá' dö',  
pero benna lataj tódisa' neda' ga na' nagachi' du yalaj na'.

## 142

<sup>1</sup> Rulidza'-në' Xanru', ru'a zidzaj didza'.

Rátayua' lahuë' Xanru' uzá' ládxë'ë quia'.

<sup>2</sup> Rudöda' lahuë' yöl-la' rinaba yudxi quia',  
en rusiyönda' Lé' le rácagaca quia'.

<sup>3</sup> Cate' budú ládxa'a,  
gunözi quézinu' Li' le guca quia'.

La' nöza ga ridá' neda'  
bulu'cachi' le sön neda'.

<sup>4</sup> Buyú cuita' ibëla  
tu' cuntu nu zoa nu rui'i ladxi' neda'.

Biti' bi zoa le gácalen neda'.

Cuntu nu run chi'i bö' naca caza'.

<sup>5</sup> Gurödxi'a lo' Li', Xan, gunnía':  
Run chi'i cazu' neda' Li',  
en naca cazu' Nu rácalen neda' ladaj nupa nabángaca.

<sup>6</sup> Ruzé nagu' le rulidza' Li',  
tu' nagá'ana' cá'asö.  
Busölá neda' lu ná'agaca nupa ta'zóa regu' neda',  
tu' nácatérögaca nál-la ca neda'.

<sup>7</sup> Guléaj bö' naca caza' lu yu'u lidxi guié,  
para gaca guía' Li': "Xclenu'" tu' rulidza' Lo'.  
Nupa nátagaca tsahui' ulu'dubi idú gásibi'ilö ga zoa',  
tu' gunnu' sizxöni quia' le riquinda'.

## 143

<sup>1</sup> Ruzé nagu' le rulidza' Li', Xan.

Ruzé nagu' le rinabi yúdxida' Li'.

Tu' runu' ca rnna didza' bë'u, en nacu' tsahui' gunníu'

<sup>2</sup> biti' iché'u neda' lo' ga uchi'a usöröu' quia', huen dxin quiu'.

Cuntu nu zoa naca tsahui' lo' Li'.

<sup>3</sup> Nu biti' rilé'e neda' dxi'a zoa regu' bö' naca caza'.

Nuzötje' yöl-la' na'bán quia' lu yu.

Benë' ga zoa' lataj naca chul-la ca raca quégaca nupa gulati dza ni'te.

<sup>4</sup> Que lë ni na' rudú ládxa'a, en rö'a böniga.

<sup>5</sup> Röjneda' dza chigula'dödi.

Rizá' ládxa'a ca nátagaca le benu' Li'.

Ribequi icja' ca nátagaca le nun no'o.

<sup>6</sup> Richisa na'a zaca' ga zu' Li'.

Rizé ládxa'a Li' ca tu luyú bidxi rizé ladxi' nisa guiój.

<sup>7</sup> Bubí'itë didza', Xan, tu' rudú ládxa'a.

Biti' ucachi' lo' lahuá' neda',  
para cabí gaca' ca tu bönni' ru'ë lataj chul-la ga nacuá' nupa nátigaca.

<sup>8</sup> Ben ga yönda' yugu' zila ca naca yöl-la' dxi'i ladxi' quiu',

tu' ruzxöni ládxa'a Li'.

Busëdi neda' ca ral-la' guna',

tu' ruchisa' lo' Li' bö' naca caza'.

<sup>9</sup> Busölá neda', Xan, lu ná'agaca nupa biti' ta'lé'e neda' dxi'a.

Nacu' Nu ruzúa neda' tsutsu.

<sup>10</sup> Busedi neda' para guna' ca ré'ënu' Li',  
tu' naca cazu' Li' Dios quia'.

Bé' lataj iché' Bö' Lá'ayi quiu' neda' lu nöza tsahui'.

<sup>11</sup> Butipa ládxa'a, Xan, para gaca yöl-la' ba que Lo'.

Tu' nacu' tsahui' busölá neda' lu le raca quia'.

<sup>12</sup> Lu yöl-la' dxi'i ladxi' quiu' guchugu quégaca nupa biti' ta'lé'e neda' dxi'a.

Busuniti yúgu'té nupa tu'saca' zi' bö' naca caza',

tu' naca' huen dxin quiu'.

## 144

<sup>1</sup> ¡Yöl-la' ba Lë', Xanru' Dios!

¡Náquië' ca tu guiój ga zoa' tsutsu!

Rutipë' na'a para gaca tseja' gudil-la,

en rutipë' ca' xibón na'a para gaca tñl-lalena' bönni' nácagaquië' nál-la.

<sup>2</sup> Naca cazé' Xanru' yöl-la' dxi'i ladxi' quia',

enca' ca tu ga zoa' tsutsu lu gudil-la.

Rusölë' neda', en náquië' ca tu ga zoa' tsaz.

Náquië' ca tu le run chi'i neda' lu gudil-la, ate' rucachi' cuina' ga na' zoë'.

Runë' ga tun nupa rinná bë'eda' ca rnna didza' ru'a.

<sup>3</sup> ¿Bízxatë caz náquië' bönni' tu' runu' lë' ba lá'ana, Xan?

¿Bízxatë caz náquië' bönni' tu' ruí'i ladxi' cazu' lë'?

<sup>4</sup> Naca cazé' bönni' na' ca tu bö'do' recja,

ate' yugu' dza zoë' nabane' nácagacasö ca tu zxul-la le rigú'u tu böaj ridödisö.

<sup>5</sup> Buzötaj lúzxiba, en bdinne ni, Xan.

Gudán yugu' guí'a, ate' irúaj dzön lë'eguequi.

<sup>6</sup> Ben ga tsépi yösa quiu', en bésilasi léguequi.

Busé yugu' yaga lahui tuchi', en ben ga ila'bö' bagu'isö.

<sup>7</sup> Bulí no'o ga na' zu' xitsá'alö.

Busölá neda', en guléaj neda' lu ná'agaca böñachi zi'tu',

le gaca ca rubéaju' neda' lu nisa zila.

<sup>8</sup> Ta'zí' yë' böñachi na',

ate' le cabí nácatë naca yöl-la' unná bë' quéguequi.

<sup>9</sup> ¡Gul-la' quiu' Li', Dios, tu le cubi!

¡Gul-la' quiu' yöl-la' ba, en quínnia' bihuël-la nuá' chi du que!

<sup>10</sup> Rusölá cazu' bönni' ta'nná bë'ë.

Busölö' David, huen dxin quiu', lu guíë tuchi' queë' bönni' ru'ë dö'.

<sup>11</sup> Gúcalen neda', en busölá neda' lu ná'agaca böñachi zi'tu'.

Ta'zí' yë' böñachi na',

ate' le cabí nácatë naca yöl-la' unná bë' quéguequi.

<sup>12</sup> Ben ga ilácabi' bi'i bönni' queétu' ni yu'ugacabi' iz cuidi'

ca yugu' yaga nazxóngaca,

en ben ga ilácabi' bi'i nigula queétu'

ca nácagaca ya'zxén que tu yu'u nazaca'.

<sup>13</sup> Ben ga ilígaca yu'u queétu' zxoa' za utúbitu',  
en ben ga iláljaba' gayuá' gayuá'aba' chibodo',  
en bö'cu' zxíla'do' ga nucuá'atu'-ba'.

<sup>14</sup> Ben ga ulu'cuá'aba' böa' hué'ënido' quégaca böa' guixi' queétu',  
en ga biti' bi gaca quégacaba' bëdxí zxön, en bëdxido' ca'.  
Biti' gu'u lataj soa nu cödxí yechi' la' nöza que ládzatu'.

<sup>15</sup> ¡Bica' bágaca bönachi raca caní quéguequi!  
¡Bica' bágaca bönachi na' Xanru' Dios náquië' Dios quéguequi!

## 145

<sup>1</sup> ¡Guna' Li' zxön, Dios!

¡Nacu' Nu rinná be'e neda'!

¡Gádxitica'sa' Lo', Xana' Dios!

<sup>2</sup> ¡Tu dza tu dza cu'a Li' yöl-la' zxön,  
en cú'utica'sa' Lo' yöl-la' ba!

<sup>3</sup> ¡Nayépisétérë' Xanru' Dios, ate' cú'uru'-në' yöl-la' ba!  
¡Biti' ca' gaca gúnbë'ëru' ca naca yöl-la' zxön queë'!

<sup>4</sup> Yúgu'të bönachi ila'gú'u yöl-la' ba le nun cazu' Li',  
para ulu'siyón zxí'inigaca,  
en ulu'lui'i lahui le nácagaca zxön benu'.

<sup>5</sup> Sa' ládx'a'ca naca yöl-la' zxön que yöl-la' unná bë' quiu',  
en ca nácagaca yöl-la' huáca zxön runu'.

<sup>6</sup> Ilu'i didza' yúgu'të bönachi ca naca yöl-la' zxön  
quégaca yöl-la' huáca runu'.

Usiyönda' bönachi ca naca yöl-la' zxön quiu'.

<sup>7</sup> Idú ládx'i'gaca ilu'i didza' cate' tsöjnégaca yöl-la' dxi'i ladxi' zxön quiu'.  
Lu yöl-la' rudzeja quéguequi ila'bödxí'a tu' nacu' tsahui'.

<sup>8</sup> Xanru' Dios ruzá' ládxë'ë queëru', en ruhuéchi' ládxë'ë rë'u.

Biti' ilética'së', ate' zxóntérö naca yöl-la' dxi'i ladxi' queë'.

<sup>9</sup> Runë' Xanru' Dios le naca dxi'a quégaca yúgu'të bönachi,  
en ruhuéchi' ládxë'ë yúgu'të le nunë'.

<sup>10</sup> Yúgu'të le nunu' ilé Li': "Xclenu'" Xan,  
ate' nupa néquiguequi quez quiu' ilún Li' zxön.

<sup>11</sup> Ilu'i didza' ca naca yöl-la' zxön que le rinná bë'u,  
en ulu'lui'i lahui yöl-la' zxön quiu',

<sup>12</sup> para ulu'siyón bönachi ca nácagaca le zxön runu',  
en ca naca yöl-la' zxön que le rinná bë'u le nayépisétérö.

<sup>13</sup> ¡Zóatica'sö le rinná bë'u,  
ate' idía'tica'sö yöl-la' unná bë' quiu'!

¡Lu le naca idú ladxi' queë' runë' Dios ca rnmágaca yúgu'të didza' ru'ë,  
en lu yöl-la' dxi'i ladxi' queë' runë' yúgu'të le runë'!

<sup>14</sup> ¡Röjzönë' Xanru' yúgu'të nupa röjtsö'ögaca,  
en ruchisë' yúgu'të nupa ndínnegaca!

<sup>15</sup> ¡Yúgu'të bönachi tu'yú Li', Xan,  
ate' runödzju' le ilágugaca cate' ridxín dza que!

<sup>16</sup> ¡Rusalaj cazu' no'o  
en rugagu' yúgu'të le nacuá' nabángaca!

<sup>17</sup> Náquië' tsahui' Xanru' Dios ca naca yúgu'të le runë'  
en náquië' ca' dxi'i ladxi'.

<sup>18</sup> Zoë' Xanru' gala' ga nacuá' yúgu'të nupa tu'lidza Lë',  
nupa na' tu'lidza Lë' idú ládxi'guequi.

<sup>19</sup> Gunnë' le ta'zé ládxi'gaca quégaca nupa tadxi Lë'.  
Riyönnë' cate' tu'lidza Lë', en rusölë' léguequi.

<sup>20</sup> Run chi'i cazë' Xanru' yúgu'të nupa nadxi'igaca Lë',  
pero usunítië' nupa tuá' dö'.

<sup>21</sup> Len ru'a cuina' cu'a-në' Xanru' yöl-la' ba,  
ate' yúgu'të böñachi ilúntica'sö Lë' zxön.

## 146

<sup>1</sup> ¡Guli'cu'ë yöl-la' ba Xanru'!

¡Li', bö' naca caza', gulu'ë yöl-la' ba Xanru'!

<sup>2</sup> ¡Cu'a-në' Xana' yöl-la' ba tsanni ni zoa' nabana'!

¡Gul-la' yöl-la' ba queë' Dios quia' tsanni ni zoa bö' naca caza'!

<sup>3</sup> Biti' uzzöni ládxi'li' bönni' ta'nná bë'ë,  
en calëga bönni' tati cazë', bönni' biti' ca' gaca ulu'sölë' rë'u.

<sup>4</sup> Rurúaj bö' yu'ë nu bönni', ate' ruhuöáquië' yu.  
La' dza ná'asö riniti le rizá' ládxë'ë gunë'.

<sup>5</sup> Bica' ba bönni' rácalenë' Dios queë' Jacob lë',  
bönni' na' runë' löza Xanru' Dios.

<sup>6</sup> Nunë' Xanru' Dios lúzziba, en luyú ni,  
enca' nísado', en yúgu'të le nacuá' yugu' lataj na'.

Rúntica'së' Lë' ca rnna didza' bë'ë,

<sup>7</sup> en ruchi'a rusörö' nupa zoa nu rusaca' zi' léguequi.  
Rugagu cazë' nupa ta'dún.

Rusanë' Xanru' Dios nupa nadzungaca.

<sup>8</sup> Rusaljë' Xanru' Dios guiój lögaca nupa nácagaca lo chul-la.

Ruchisë' Xanru' Dios nupa nadzö'ögaca.

Nadxi'inë' Xanru' Dios nupa nácagaca tsahui'.

<sup>9</sup> Rapa chi'ë Xanru' Dios yugu' bönni' zi'tu'.

Rácalenë'-bi' yugu' bi'i uzëbi, enca' yugu' nigula uzëbi,  
pero ruzaguë' xinözguequi nupa tuá' dö'.

<sup>10</sup> Inná bë'tica'së' Xanru' Dios.

Náquië' Dios queéli', böñachi Sión.

¡Guli'cu'ë yöl-la' ba Xanru'!

## 147

<sup>1</sup> ¡Guli'cu'ë yöl-la' ba Xanru'!

¡Tsahui' naca gúl-laru' yöl-la' ba queë' Dios queéru'!

¡Naca lachi, en le ral-la' gunru', cú'uru'-në' yöl-la' ba!

<sup>2</sup> Runë' Xanru' Dios ga rizzön yödzö Jerusalén.

Rutubë' bönni' Israel násilasigaquie'.

<sup>3</sup> Ruúnë' bönni' nácagaquie' yechi' ladxi',

en rudé'ë lari' ga dxíagaquië' huë'.  
<sup>4</sup> Rulabë' tsca nacuá' bólaj lúzxiba.  
 Nucu'ë lágacaba' tu tuba' yúgu'të bólaj na'.  
<sup>5</sup> Nayépisétérë' Xanru' Dios, en nál-latérë'.  
 Ga rë'ë dzu réajni'inë' yúgu'të.  
<sup>6</sup> Xanru' Dios rácalenë' nupa ta'gu'i ta'zaca'.  
 Ruzötjé' nupa tuá' dö' lu yu.

<sup>7</sup> ¡Guli'gul-la queë' Xanru' Dios, guiéli'-në': "Xclenu"!  
 ¡Guli'gul-la yöl-la' ba queë' Xanru', quínnili' lé'egaca bihuél-lado'!

<sup>8</sup> Riguísië' yugu' böaj lúzxiba,  
 en risól-lë'ë nisa guiój luyú.  
 Runë' ga rilén yö yugu' lu guí'ado'.  
<sup>9</sup> Rugahuë' yugu' böa' guíxi'do',  
 enca' bóiquiajdo' ta'bódxi'aba'.  
<sup>10</sup> Biti' raza ládxë'ë yöl-la' nál-la queéba' böa',  
 en biti' ruzi'ë xibé yöl-la' nál-la queë' bönni'.  
<sup>11</sup> Raza ládxë'ë Xanru' Dios nupa tadxi Lë',  
 nupa na' tun löza yöl-la' dxi'i ladxi' queë'.

<sup>12</sup> ¡Guli'cu'ë yöl-la' ba Xanru', libí'ili' zóali' Jerusalén!  
 ¡Guli'cu'ë yöl-la' ba Dios queéli', libí'ili' zóali' Sión!

<sup>13</sup> Bucu'ë tsutsu le tu'baga' gapa nu riyaza yödzö queéli',  
 en runë' ga raca dxi'a quégaca zxí'inili' ga na' zóali'.  
<sup>14</sup> Runë' ga ribózali' dxi'a tsáhui'do',  
 en runë' ga ruhuölaj ridzé'eli' zxoa' xtila dxí'atérö.  
<sup>15</sup> Rinná bé'enë' yödzölió ni,  
 ate' xtídzë'ë ridóditë gáti'tës.  
<sup>16</sup> Risól-lë'ë guiój bögui' ca zxila',  
 en riguísië' buzén ca dö.  
<sup>17</sup> Riguísië' bögui' ca yugu' guiój ruaj.  
 ¿Nuzxi caz gaca guá' ilén le naca ziaga queë'?  
<sup>18</sup> Risól-lë'ë xtídzë'ë, ate' ruúna' bögui' na'.  
 Runë' ga recja bö', ate' ruhuöáca nisa.  
<sup>19</sup> Rui'lenë' zxí'ini xi'sóë' Jacob didza',  
 en riguixjé' xibá queë' para ilún bönachi Israel ca rnna.  
<sup>20</sup> Biti' benë' caní ni'a quégaca bönachi ia'tú yödzö izá'a,  
 ate' biti' nőzigaca ca nácagaca le gunná bë'ë.

¡Guli'cu'ë yöl-la' ba Xanru'!

## 148

<sup>1</sup> ¡Guli'cu'ë yöl-la' ba Xanru'!  
 ¡Guli'cu'ë yöl-la' ba, libí'ili' zóali' yehua' yubá!  
 ¡Guli'cu'ë yöl-la' ba, libí'ili' zóali' xitsá'alö!  
<sup>2</sup> ¡Guli'cu'ë yöl-la' ba, libí'ili' gubáz lá'ayi queë'!  
 ¡Guli'cu'ë yöl-la' ba, libí'ili' tscalí' dá'ali' Lë'!  
<sup>3</sup> ¡Guli'cu'ë yöl-la' ba, libí'ili' gubidza, en beo'!  
 ¡Guli'cu'ë yöl-la' ba, libí'ili' bólaj bení'!

<sup>4</sup> ¡Guli'cu'ë yöl-la' ba, libí'ili' zóali' zxan lúzxiba!  
 ¡Guli'cu'ë yöl-la' ba, libí'ili' nisa, zxóali' láhuilö lúzxiba!  
<sup>5</sup> ¡Guli'cú'u yöl-la' ba La la'ayi queë' Xanru', yúgu'tëli',  
 tu' bë'ësë' didza', en canísö benë' libí'ili'!

<sup>6</sup> Naguixjé' tsaz libí'ili'.  
 Naguixjé' xtídzë'ë le catu caz tödi que.

<sup>7</sup> ¡Guli'cu'ë yöl-la' ba Xanru' idútë yödzölió,  
 en libí'ili' böa' ridali' lu nísado', en nísado' caz,  
<sup>8</sup> en libí'ili' guí', en guiój bögui' yöla sunna, bögui', en böaj,  
 enca' li', bö' budunu', runu' ca rnna xtídzë'ë,  
<sup>9</sup> en libí'ili' yugu' guí'a, en yúgu'të guí'ado',  
 en libí'ili' yaga dxíagaca le ta'bía, en yugu' yaga dxí'a,  
<sup>10</sup> en libí'ili' böa' guixi', en böa' bëdxi,  
 böa' tá'ayöj lé'ëba' lu yu, en böa' zoa xíligacaba',  
<sup>11</sup> enca' libí'ili' rinná bë'ëli' yödzölió, en bönachi yugu' yödzö izá'a,  
 yugu' zxí'inigaquië' bönni' ta'nná bë'ë, en bönni' ruchi'a rusöröli' yödzölió,  
<sup>12</sup> enca' libí'ili' bi'i bönni', en bi'i nigúlado',  
 yugu' bönni' zxön, en yugu' bë'ido'!  
<sup>13</sup> ¡Guli'cú'u yöl-la' ba La la'ayi queë' Xanru'  
 tu' nayépisëtérö tuzë' Lë'!  
 ¡Nayépisëtérö yöl-la' ba queë' ca luyú ni, en ca lúzxiba xitsá'!

<sup>14</sup> Nuchisë' tu le nuzóa tsutsu bönachi queë',  
 le naca yöl-la' ba ta'gú'u Lë' nupa néquiguequi queë',  
 yugu' zxí'ini xi'sóë' Israel, nupa na' nadxí'inë'.

¡Guli'cu'ë yöl-la' ba Xanru'!

## 149

<sup>1</sup> ¡Guli'cu'ë yöl-la' ba Xanru'!  
 ¡Guli'gul-la queë' Xanru' Dios tu le cubi,  
 en guli'gul-la yöl-la' ba queë' ga nudúbigaca nupa néquiguequi quez queë'!

<sup>2</sup> Ral-la' ulu'zí' xibë' Xanru' Dios bönachi Israel,  
 tu' náquië' Nu ben léguequi.  
 Ral-la' ulu'dzéjalen Dios nupa nacuá' Sión,  
 tu' náquië' Nu rinná bë'e léguequi.  
<sup>3</sup> Ral-la' ila'gú'u yöl-la' ba La la'ayi queë',  
 en lu yöl-la' rudzeja ulu'yá'a lahuë'.  
 Ral-la' ilúl-la yöl-la' ba queë', ila'capa' lë'e guídi,  
 en ila'quínni lé'egaca bihuél-lado',  
<sup>4</sup> tu' raza ládxë'ë Xanru' Dios bönachi queë'.

Uchisë' nupa ta'guí'i ta'zaca', en usölë' léguequi.  
<sup>5</sup> Nupa néquiguequi quez queë' ral-la' ulu'dzeja ládxigaca lu bení' queë'.  
 Lu yöl-la' rudzeja quéguequi ral-la' ilúl-la queë' cate' ni' dégaca lu le ráti'gaca.

<sup>6</sup> Yöl-la' ba queë' Xanru' Dios ral-la' sóatica'sö ru'iguequi,  
 en tu guíë tuchi' natuchi' iropa la'a lu ná'agaca,  
<sup>7</sup> para ulu'zí' lëbi bönachi yugu' yödzö izá'a,  
 en ilún xiguia' bönachi izá'a na',  
<sup>8</sup> para ilúguë'ë bregui' guíë ná'agaquië' bönni' ta'ná bë'enë' bönachi yödzö izá'a na',

en ulu'cu'ë bregui' guíë yen ná'agaquië' bönni' lo quégaquië',  
<sup>9</sup> para ilunë' quéguequi ca nachuguë' Dios gaca quéguequi.  
 Naca lë ni le run bal nupa néquiguequi quez queë' Dios.

¡Guli'cu'ë yöl-la' ba Xanru'!

## 150

- <sup>1</sup> ¡Guli'cu'ë yöl-la' ba Xanru'!
- ¡Guli'cu'ë yöl-la' ba Dios lu lataj lá'ayi queë'!
- ¡Guli'cu'ë yöl-la' ba ga dëda' lataj queë'!
- <sup>2</sup> ¡Guli'cu'ë yöl-la' ba ca nácagaca le zxön nunë'!
- ¡Guli'cu'ë yöl-la' ba ca naca yöl-la' zxön queë'!
- <sup>3</sup> ¡Guli'cu'ë yöl-la' ba, ucódxili' lúzugacaba' chivo!
- ¡Guli'cu'ë yöl-la' ba, quínnili' lé'egaca bihuél-la ca'!
- <sup>4</sup> ¡Guli'cu'ë yöl-la' ba, cápa'li' lë'e guídi, en uya'ali'!
- ¡Guli'cu'ë yöl-la' ba, quínnili' lé'egaca bihuél-la, en ucódxili' gui!
- <sup>5</sup> ¡Guli'cu'ë yöl-la' ba, útil-lali' guíë lë'e luzé'e!
- ¡Guli'cu'ë yöl-la' ba, útil-lali' guíë zxön lë'e luzé'e!
- <sup>6</sup> ¡Guli'cu'ë yöl-la' ba Xanru', tscalí' rizí'ili' bö'!
- ¡Guli'cu'ë yöl-la' ba Xanru'!

## DIDZA' DXI'A BUZÚAJÉ' MATEO

*Yugu' xuz xiné'e gudödi queë' Jesús  
(Lc. 3:23-38)*

<sup>1</sup> Ni ruzúaja' lágaquië' xuz xiné'e gudödi queë' Jesucristo. Nabábaguacië' David, enca' Abraham xuz gudödi queë'.

<sup>2</sup> Abraham gúquië' xuzë' Isaac.  
Isaac gúquië' xuzë' Jacob.

Jacob gúquië' xúzgaquië' Judá, en yugu' bönni' böchë'ë.

<sup>3</sup> Judá gúquië' xúzgaquië' Fares, en Zara, ate' Tamar gúcanu xiná'agaquië'.

Fares gúquië' xuzë' Esrom.

Esrom gúquië' xuzë' Aram.

<sup>4</sup> Aram gúquië' xuzë' Aminadab.  
Aminadab gúquië' xuzë' Naasón.

Naasón gúquië' xuzë' Salmón.

<sup>5</sup> Salmón gúquië' xuzë' Booz, ate' Rahab gúcanu xiné'ë.

Booz gúquië' xuzë' Obed, ate' Rut gúcanu xiné'ë.

Obed gúquië' xuzë' Isaí.

<sup>6</sup> Isaí gúquië' xuzë' David.

David na' gunná bé'ené' bönnachi Israel, ate' butsaga ná'alené'-nu nigula na' gúcanu zí'alo nigula queë' Urías, ate' David, en nigula ni guláquië' xuz xiné'ë Salomón.

<sup>7</sup> Salomón gúquië' xuzë' Roboam.

Roboam gúquië' xuzë' Abías.

Abías gúquië' xuzë' Asa.

<sup>8</sup> Asa gúquië' xuzë' Josafat.

Josafat gúquië' xuzë' Joram.

Joram gúquië' xuzë' Uzías.

<sup>9</sup> Uzías gúquië' xuzë' Jotam.

Jotam gúquië' xuzë' Acaz.

Acaz gúquië' xuzë' Ezequías.

<sup>10</sup> Ezequías gúquië' xuzë' Manasés.

Manasés gúquië' xuzë' Amón.

Amón gúquië' xuzë' Josías.

<sup>11</sup> Josías gúquië' xúzgaquië' Jeconías, en yugu' bönni' böchë'ë.

Yugu' bönni' ni gula'cu'ë dza ni' cate' yugu' bönni' Babilonia gula'chë'ë bönnachi Israel nadzúngaca lu xiyúgaquië'.

<sup>12</sup> Jeconías gúquië' xuzë' Salatiel.

Salatiel gúquië' xuzë' Zorobabel.

<sup>13</sup> Zorobabel gúquië' xuzë' Abiud.

Abiud gúquië' xuzë' Eliaquim.

Eliaquim gúquië' xuzë' Azor.

<sup>14</sup> Azor gúquië' xuzë' Sadoc.

Sadoc gúquië' xuzë' Aquim.

Aquim gúquië' xuzë' Eliud.

<sup>15</sup> Eliud gúquië' xuzë' Eleazar.

Eleazar gúquië' xuzë' Matán.

Matán gúquië' xuzë' Jacob.

<sup>16</sup> Jacob gúquië' xuzë' José.

José ni gúquië' bönni' queénu María, ate' María ni gúcanu xiné'ë Jesús, lë' ca' Cristo, Bönni' na' tun löza bönachi judío guídë' idinná bë'enë' légaquië'.

<sup>17</sup> Caní naca, gulaca chidá' cö' di'a dza ga gusí lo zoë' Abraham ga bidxitë zoë' David, ate' gulaca ca' ia'chidá' cö' di'a dza ga gusí lo zoë' David ga bidxitë dza yugu' bönni' Babilonia gula'ché'ë bönachi Israel nadzúngaca, ate' gulaca ca' ia'chidá' cö' di'a dza ga gusí lo dza ni' gula'ché'ë léguequi ga bidxitë dza guljë' Cristo.

*Yugu' le guca cate' guljë' Jesucristo  
(Lc. 2:1-7)*

<sup>18</sup> Caní guca cate' guljë' Jesucristo. Cate' ni' chinazi' lu ná'abi' María, xiné'ë Jesucristo utsaga ná'alenbi' José, en zí'atëlö cate' si' utsaga ná'alenë'-bi', en cabí ne sóalenë'-bi', guyú'ubi' tubi' bï'ido' lë'ëbi' María na'. Guca caní ni'a que yöl-la' huáca queë' Dios Bö' Lá'ayi. <sup>19</sup> Náquië' José na', bönni' queébi' María, bönni' tsahui', pero biti' gú'unne' uzéguïë'-bi' didza' lógaca bönachi. Gú'unne' ulá'alenë'-bi' bagáchi'sö. <sup>20</sup> Tsanni ni' rizá' ládxë'ë José ca na' gunë', bulu'i lahuë' gubáz lá'ayi queë' Xanru' lahuë' José lu yëla bëchigal, en gudxë' lë':

—José, zxí'ini zxí'sóë' David. Biti' gádxinu' si'u-bi' María, para gácabi' nigula quiu', tu' yú'ubi' bi'i bönni'do' lë'ëbi' ni'a que yöl-la' huáca queë' Dios Bö' Lá'ayi. <sup>21</sup> Gáljabi' tubi' bi'i bönni'do' queébi', ate' gu'u labi' Jesús, tu' usólabi' bönachi queébi' lu dul-la' nabága'gaca.

<sup>22</sup> Caní guca yúgu'të lë ni para gaca lë na' gunné' Xanru' lu ru'ë bönni' bë'ë didza' uláz queë' Dios, gunné':

<sup>23</sup> Buli'yútsöca', tu nigula ra'bando',  
tsú'ubi' bï'ido' lë'ëbi',  
ate' gáljabi' tubi' bi'i bönni'do',  
ate' ilu'ë labi' Emanuel.

Emanuel naca tu didza' hebreo le rnna: Len rë'u Dios.

<sup>24</sup> Cate' bubanë' José lu yëla bëchigal, benë' ca na' gudxë' gubáz lá'ayi queë' Xanru' lë', ate' guzxi'ë-bi' María, ate' gúcabi' nigula queë'. <sup>25</sup> Biti' guzóalenë'-bi' cate' bidxinrö dza chigúlajbi' bi'i bönni'do' queébi', bi'i zí'alö queébi', ate' gulu'ë labi' Jesús.

## 2

*Bönni' ta'yéajni'inë' ridiyúgaquië' bï'ido' Jesús*

<sup>1</sup> Cate' gúljabi' Jesús lu yödzö Belén, luyú Judea, rinná bë'ë Herodes luyú ni', ate' bila'dxinë' bönni' ta'yéajni'inë' Jerusalén, narúajgaquië' tu yödzö dë saca' ga rilén gubidza. <sup>2</sup> Gula'nabë' bönni' ni, ta'nné':

—¿Gazxi zóabi' bï'ido' na' ral-la' inná bë'ebi' bönachi judío, bï'ido' na' si' gúljabib? Cate' ni' zóatu' ga rilén gubidza bilé'etu'-ba' bólaj bení' naca bë' chigúlajbi', ate' za'tu' ni para tseaj ládxı'tu'-bi'.

<sup>3</sup> Cate' gúquibe'enë' Herodes, bönni' rinná bë'ë, lë ni, gurö'ödë' böninga, en lësca' caní gula'bö' böninga yúgu'të bönachi nacuá' Jerusalén. <sup>4</sup> Ní'irö Herodes na' bulidzë' yúgu'të bixúz unná bë', len bönni' yudo' tu'sédinë', ate' gunábinë' légaquië' gazxi ral-la' galjë' Cristo, bönni' na' tunë' löza bönni' judío ilá' lahuë' para inná bë'enë' légaquië'. <sup>5</sup> Të' lë':

—Lu yödzö Belén luyú Judea. Caní naca tu' buzúajë' tu bönni' bë'ë didza' uláz queë' Dios le rnna caní:

<sup>6</sup> Biti' nácarö cá'asö yödzö Belén luyú Judá lahuë' Dios ca nácagaca yödzö gapa nacuá' nupa ta'nná bë' luyú ni, tu' irúajë' tu bönni' yödzö Belén, en gáquië' lo, bönni' na' gun chi'ë bönachi Israel quia'.

<sup>7</sup> Ní'irö Herodes bulidzë' bagáchi'sö bönni' ta'yéajni'inë' na', en gunábinë' légaquië' para inózinë' dxi'a gáca'xté chiguca bulu'i lahui bólaj na' bila'lé'enë'. <sup>8</sup> Ní'irö gusól-lë'ë légaquië' tsójáquië' Belén. Rë' légaquië':

—Guli'tséaj ni', en guli'tsöjnaba dxi'a nacxi naca queébi' bí'ido' na'. Cate' chibidzólili'-bi', ididíxjöi'ili' neda', para tseja' ca' neda', tseaj ládxa'a-bi'.

<sup>9</sup> Gudödi bila'yönnë' didza' bë'ë Herodes na', söjáquië' bönni' ta'yéajni'inë' na', ate' bólaj na' bila'lé'enë' cate' ni' nacu'ë lágzagaquië' söjnöruba' lógaquië' ga bidxitnë yöjsóa ga na' débi' bí'ido' na'. <sup>10</sup> Cate' bila'lé'enë' bólaj na', bulu'dzéjade'enë'. <sup>11</sup> Cate' gula'yázíi' yu'u, bila'lé'enë'-bi' bi'i bönni'do' na', zóalenbi'-nu María, xiná'abi'. Bulu'zóa zxíbigaquië' lobi', en gula'yéaj ládzi'gaquië'-bi'. Gudödi na' gula'saljë' yugu' yoxaj quégaquië', ate' bulu'nödzje' queébi' oro, en yalaj, en nörido' rilá' zxixi que yaga mirra. <sup>12</sup> Tu' chibuzéajni'inë' Dios légaquië' lu yëla béchigal para cabí tsöjhuójquië' ga zoë' Herodes na', que lë ni na' yöjhuójquië' ládzagaquië' nöza yübölö.

### *José, en María, ta'ché'ë-bi' Jesús luyú Egipto*

<sup>13</sup> Gudödi bulu'zé'ë yugu' bönni' ta'yéajni'inë' ni', bulu'i lahuë' tuë' gubáz lá'ayi queë' Xanru' lu yëla béchigal, ga na' dë' José, en rë' lë':

—Guyaschi. Guché'-bi' bí'ido' ni, enca' xiná'abi', ate' buzxunnaj ni. Guyéaj luyú Egipto, ate' ugá'anu' ni' cate' guiéra' li' ia'tú. Caní gunu' tu' uguiljë' Herodes bí'ido' ni para gútië'-bi'.

<sup>14</sup> Ní'irö guyasë' José, en ni' naca chi'i dzö'ölö, guché'ë-bi' bí'ido' na', enca' xiná'abi', ate' yöjáquië' luyú Egipto. <sup>15</sup> Bulu'gá'anë' ni' cate' gútirë' Herodes. Caní guca para gaca lë na' gunné' Xanru' Dios lu ru'ë tu bönni' bë'ë didza' uláz queë', gunné': "Ga naca luyú Egipto bulidza' Zxi'ina'."

### *Risól-lë'ë Herodes bönni' ilútië'-bi' bi'i hué'ënido' nacuá'abi' yödzö Belén*

<sup>16</sup> Cate' gúquibe'enë' Herodes biti' gulunë' bönni' ta'yéajni'inë' ca rnnë', gulénë', ate' gunná bé'enë' bönni' tsöjáquië' ni' para ilútië'-bi' yúgu'tébi' bi'i bönni'do' nacuá'abi' yödzö Belén, en idú gásibi'ilö ga dë Belén na', yugu' bí'ido' chiyú'ugacabi' chopa iz, en bí'ido' nahué'ënigacaröbi'. Caní benë' ca busáquië' queë' Herodes na', tsca chiguca dza bulu'i lahuë bólaj na', dza na' bulu'zéajni'inë' bönni' ta'yéajni'inë' na' lë'. <sup>17</sup> Caní guca, bidxín lë na' gunné' Jeremías, bönni' bë'ë didza' uláz queë' Dios, gunné':

<sup>18</sup> Lu yödzö Ramá riyón chí'igaca  
nupa ta'bödxi, en nupa ta'bödxi yechi'.

Raquel ribödxinu ni'a quégacabi' zxí'linu.

Biti' gaca nu huë tsahui' lënu, tu' chinátigacabi'.

<sup>19</sup> Gudödi gútië' Herodes na', ní'irö bulu'i lahuë' gubáz lá'ayi na' queë' Xanru' lu yëla béchigal lahuë' José ga ni' zoë' luyú Egipto, ate' rë' lë':

<sup>20</sup> —Guyasa. Guché'-bi' bi'i bönni'do' ni, enca' xiná'abi', ate' böaj luyú Israel, tu' chigulátië' bönni' ni' gulé'ënnë' ilútië'-bi' bi'i bönni'do' ni.

<sup>21</sup> Ní'irö guyasë' José, ate' guché'ë-bi' bi'i bönni'do' na', enca' xiná'abi', ate' yöhuójquië' luyú Israel. <sup>22</sup> Cate' gúquibe'enë' José rinná bë'ë Arquelao luyú Judea tu' chigutië' Herodes, xuzë' Arquelao na', que lë ni na' gúdxinë' José huojë' ni'. Cate' buzéajni'inë' Dios lë' lu yëla béchigal, guyijë' luyú Galilea. <sup>23</sup> Cate' bidxinë' ni', yöjsöë' lu yödzö Nazaret. Caní guca para gaca lë na' gula'nnë' yugu' bönni' gulu'ë didza' uláz queë' Dios ca ral-la' gaca queë' Jesús, si' Lë', Bönni' Nazaret.

### *Juan, bönni' ruquilë' böñachi nisa runë' libán lu lataj cá'asö*

(Mr. 1:1-8; Lc. 3:1-9, 15-17; Jn. 1:19-28)

<sup>1</sup> Yugu' lu dza ni' bulu'i lahuë' Juan, bönni' na' buquilë' böñachi nisa, en runë' libán lu lataj cá'asö luyú Judea. <sup>2</sup> Juan na' rnnë':

—Buli'bí'i ládzi'li', tu' chizóa idxín dza idinná bë' Nu na' zoa yehua' yubá luyú ni.

<sup>3</sup> Ca naca queë' Juan na', buzúajé' Isaías, bönni' bë'ë didza' uláz queë' Dios dza ni'të, le rnna caní:

Riyón chi'ë bönni' rulidzë' lu lataj cá'asö, rmnë':

"Buli'pá'a nöza para idxín Xanru' ga zóali'.

Guli'béaj li yugu' nöza lasi tödë' lu icja ládxido'oli'."

<sup>4</sup> Nácuë' zxë' Juan lari' néquini lítsa'ba'böa', ate' núguë'ë lë'ë le néquini guídi. Rahuë'-ba' bôchi'zu, en re'jé' bidxindo' que buzzdo'. <sup>5</sup> Yugu' bönni' yödz Jerusalén len bönachi narúajgaca idú luyú Judea, en idú gásibi'ilö ga dë yegu Jordán bila'dxinë' ga zoë' Juan na'. <sup>6</sup> Cate' gula'xóalépë' dul-la' nabága'gaquië', Juan na' buquilé' légaquië' nisa lu yegu Jordán na'.

<sup>7</sup> Cate' bilé'enë' Juan ta'dxinë' zián bönni' yudo' fariseo len yugu' bönni' yudo' saduceo ga zoë' para ila'dilë' nisa, gudxë' légaquië':

—Libi'ili', di'a dza quégacaba' bëla sínia'. ¿Zoa nu buzéajni'i libi'ili' para izxúnnajli' yöl-la' rusiúdxi na' si' gaca quégaca bönachi? <sup>8</sup> Guli'gún le gaca bë' chibub'i ládxí'li'.

<sup>9</sup> Biti' cuéqui ícjali', biti' innali' nácali' tsahui' tu' naca Abraham xuz gudödi queéli'. Rea' libi'ili', huáca gunë' Dios ga ulu'huöáca yugu' guiój nacuá' ni di'a dza queë' Abraham.

<sup>10</sup> Chizóa riböza guíe huága para ichugu yugu' yaga le rulu'i ca gaca queéli'. Yúgu'të yaga biti' ta'bía le naca dxi'a, irúgugaca, ate' ila'gu'ë léguequi lu guí'. <sup>11</sup> Le nácatë neda' ruquila' libi'ili' nisa lu nisa, nóloli' chibub'i ládxí'li', pero Bönni' na' ral-la' guídë' cate' tödi quia' neda', Lë' gunë' le rulu'i isö yöl-la' ridila nisa ni, uchízië' libi'ili' Dios Bö' Lá'ayi len guí' queë'. Bönni' ni nácatérë' lo ca neda', ate' neda' biti' naca' lesaca' ilecja' xiráchuë' nudé'ë. <sup>12</sup> Zónë' lu në'ë böcö' queë', le ulúbinë' ga ridxi'a zxoa' xtila queë'. Cu'ë zxoa' xtila queë' lu yu'u ga ni' gun chi'ë le, pero uzégui'ë bëbu que lu guí', ate' guí' na' biti' ca' ulu.

### *Ridile' nisa Jesús*

(Mr. 1:9-11; Lc. 3:21-22)

<sup>13</sup> Ni'irö buzé'ë Jesús luyú Galilea, ate' bidxinë' ra' yegu Jordán ga na' zoë' Juan, para idilë' nisa lu në'ë Juan na'. <sup>14</sup> Juan buzáguë'ë xinözë', en rë' Jesús:

—Neda' ral-la' idila' nisa lu no'o Li'. ¿Za'tso' Li' quia' neda'?

<sup>15</sup> Bubi'ë didza' Jesús, rë' lë':

—Benna lataj na'a, tu' caní ral-la' gunru' idútë le naca tsahui'.

Ni'irö Juan bë'ë Lë' lataj. <sup>16</sup> Cate' chinadilë' Jesús nisa, la' burúajtë' lu nisa. Ni'irö guyalaj lúzxiba lahuë' Jesús, ate' bilé'enë' ruhuötje' Dios Bö' Lá'ayi, en bidxinë' ga na' zoë', riné'ë ca riná'aba' gu'dödo'. <sup>17</sup> Ni'irö biyón chi'i nu ruí'i didza' yehua' yubá, rnna:

—Bönni' ni náquië' Zxf'ina'. Nadxf'ida' Lë', en raza ládex'a' Lë'.

## 4

### *Ré'eni Satanás tu' xihui' ibaga' Jesús dul-la'*

(Mr. 1:12-13; Lc. 4:1-13)

<sup>1</sup> Ni'irö la' guchë'të' Dios Bö' Lá'ayi Jesús lu lataj cá'asö para gata' lataj si' bë' Satanás tu' xihui' Lë'.

<sup>2</sup> Idú choá' dza choá' yëla biti' bi gudahuë' Jesús, ate' gudödi ni' ridunë'. <sup>3</sup> Ni'irö tu' xihui', nu na' run ga tá'baga' bönachi dul-la', bidxín ga zoë' Jesús, en rë Lë':

—Channö nacu' idú Zxf'inë' Dios, gunná na'a ulu'huöáca guiój nacuá' ni yöta xtila.

<sup>4</sup> Bubi'ë didza' Jesús, rë' le:

—Nazúaj lu guichi lá'ayi le rnna: "Calégasö yöta xtila nabánigaca bönachi, pero lëscá' yúgu'të didza' ru'ë Dios nabánigaca bönachi."

<sup>5</sup> Ni'irö tu' xihui' guchë' Jesús lu yödzö lá'ayi Jerusalén, ate' budxía Lë' ga naca xitsá' ícjo'olö yudo'. <sup>6</sup> Ni'irö tu' xihui' rë Lë', rnna:

—Channö nacu' Li' idú Zxf'inë' Dios, busuladzu' cuinu' ni, tu' nazúaj lu guichi lá'ayi le rnna:

Dios isól-lë'ë gubáz lá'ayi queë' para ilún chi'ë Li',

ate' ulu'chisé' Li' lu ná'agaquié',  
para cabí tsöjchégu'u guiőj, en cabí gunu' zi' ni'u.

<sup>7</sup> Bubi'ë didza' Jesús, rë' le:

—Ia'stú nazúaj lu guichi lá'ayi, le rë bönachi, rnna: "Biti' ugunu' dxin Xanu' Dios."

<sup>8</sup> Ní'irö tu' xihui' guché' Jesús ga naca tu lu gu'a sibi, ate' ni' bulu'i Lë' yúgu'të yödzö  
nacuá' yödzölió ni, en yúgu'të yöl-la' tsahui' quéguequi. <sup>9</sup> Ní'irö rë' Lë':

—Yúgu'të lë ni udöda' lu no'o channö uzóa zxibu' lahua', en gunu' neda' zxön.

<sup>10</sup> Jesús rë' le:

—Böaj quiu' li', Satanás tu' xihui', tu' nazúaj lu guichi lá'ayi le rë netu', rnna: "Xanu'  
Dios tseaj ládxu'u, en udödi cuinu' lu na' tuzé' Lë'."

<sup>11</sup> Ní'irö buzá' Satanás tu' xihui' ga na' zoë' Jesús, ate' gubáz lá'ayi queë' Dios bila'dxiné'  
ga zoë', en gulácalené' Lë', en gula'gu'ë le gudahuë'.

### Risí lahuë' Jesús runé' libán luyú Galilea

(Mr. 1:14-15; Lc. 4:14-15)

<sup>12</sup> Cate' biyönni' Jesús nadzuné' Juan lidxi guíë, guyijé' luyú Galilea. <sup>13</sup> Buzé'ë yödzö  
Nazaret, ate' yöjsóé' lu yödzö Capernaum ga naca ra' nísado', lu buzá' quégaca bönachi  
Zabulón, en bönachi Neftalí. <sup>14</sup> Caní guca, bidxín lë na' gunnë' Isaías, bönni' bë'ë didza'  
uláz queë' Dios, gunnë':

<sup>15</sup> Luyú Zabulón, en luyú Neftalí,  
la' nöza ra' nísado' ia'tsölá'a yegu Jordán saca' ga rilén gubidza.  
Luyú Galilea, ga nacuá' bönachi biti' nácagaca judío.

<sup>16</sup> Bönachi chul-la niti ni' bila'lé'e bení',  
ate' bönni' ni' nácagaquié' ca nupa chinátigaca, gulén quégagaquié' bení'.

<sup>17</sup> Cate' ní'irö gusí lahuë' Jesús runé' libán, en rë' bönachi ni':

—Buli'bí'i ládxílli', tu' chizóa idxín dza idinná bë' Nu na' zoa yehua' yubá luyú ni.

### Jesús rulidzé' tapé' bönni' uzxón böla para tsöjtá'gaquié' Lë'

(Mr. 1:16-20; Lc. 5:1-11)

<sup>18</sup> Cate' gudé' Jesús ra' nísado' que Galilea, bilé'ené' chopé' bönni'. Tuë' lë' Simón, en  
zoa ia'tú lë' Pedro, ate' dzáguié' Andrés, bönni' bóchë'ë, lë'. Chopé' ni ta'chiljé' yözxaj böla  
quégagaquié' lu nísado' na' tu' nácagaquié' uzxón böla. <sup>19</sup> Jesús rë' légaquié':

—Guli'dutá' neda', ate' guna' ga iché'ëli' bönachi quia', gunli' ca runli' rizönli'-ba' böla.

<sup>20</sup> Chopé' ni la' bulu'cá'anaté' yugu' yözxaj böla quégagaquié', ate' söjácalené' Jesús.

<sup>21</sup> Cate' gudödë' Jesús ia'latí' ní'ilö, bilé'ené' ia'chopé' bönni'. Tuë' lë' Jacobo, ate'  
dzáguié' Juan, bönni' bóchë'ë lë'. Nácagaquié' zxí'iné' Zebedeo. Nacu'ë lë'e bárcodo'  
dzágagaquié' Zebedeo, xúzgaquié', en tu'úné' yözxaj böla quégagaquié'. Ní'irö Jesús bulidzé'  
chopé' ni para tsöjtá'gaquié' Lë'. <sup>22</sup> La' bulu'cá'anaté' bárcodo' na', enca' xúzgaquié', ate'  
söjácalené' Jesús.

### Jesús rusédiné' bönachi zián

(Lc. 6:17-19)

<sup>23</sup> Gudé' Jesús idú luyú Galilea, rusédiné' bönachi gapa naca lu yu'u ga tu'dubë' bönni'  
judío, en tu'sëdë' queë' Dios. Bené' libán ni' que didza' dxi'a ca si' idinná bë'ë Dios luyú  
ni', en buné' yúgu'të nupa te' e tsca naca yödzöhué' té'eguequi. <sup>24</sup> Guzé' didza' que yöl-la'  
huáca queë' Jesús, ate' bila'yöni bönachi idú luyú Siria, ate' dujuá'gaquié' yúgu'të bönni'  
té'ené' zián yödzöhué' que queégaquié', en ta'gu'i ta'zaquié', ga zoë' Jesús. Dujuá'gaquié'  
ca' yugu' bönni' yúugaquié' bö' xihui', en yugu' bönni' té'ené' huë' xjote', en yugu' bönni'  
nacú'unigaquié' bin ni'a ná'agaquié', ate' Jesús buné' yúgu'të bönni' na'. <sup>25</sup> Bönachi  
zián bila'rúajgaca luyú Galilea, en yugu' yödzö Decápolis, en yödzö Jerusalén, enca' luyú  
Judea, en yugu' yödzö nacuá' ia'tsölá'alö yegu Jordán saca' ga rilén gubidza, ate' rójácalen  
Jesús.

*Libán bené' Jesús ga naca lu guí'ado'*  
*(Lc. 6:20-23)*

<sup>1</sup> Cate' bilé'ené' Jesús bönachi zián söjácalen Lë', ní'irö gurené' tu lu guí'ado' ga naca xitsá'alö, ate' guro'ë lu guí'a ni'. Ní'irö bulu'dubë' bönni' usëda queë' ga zoë'. <sup>2</sup> Gusí lahuë' rusédiné' légaquië', rnné':

<sup>3</sup> —Bica' ba yugu' bönni' téquibe'ené' ta'yádzjané' le naca queë' Dios, tu' nadéli'gaquië' lataj ga rinná bë'ë Bönni' na' zoë' yehua' yubá.

<sup>4</sup> 'Bica' ba yugu' bönni' tu'huí'ini ládzi'gaquië' tu' nabága'gaquië' dul-la', tu' huë tsahuë'ë Dios caz légaquië'.

<sup>5</sup> 'Bica' ba yugu' bönni' nácagaquië' nöxaj ladxi' lahuë' Dios, tu' gata' quégaquië' luyú ni.

<sup>6</sup> 'Bica' ba yugu' bönni' ta'zé ládzi'gaquië' le naca tsahui' lahuë' Dios, ate' raca quégaquië' ca raca quégaca nupa ta'dún, en ta'bidxi nisa, tu' gunë' Dios ga ulu'zi'ë xibé lë na' ta'zé ládzi'gaquië'.

<sup>7</sup> 'Bica' ba yugu' bönni' tu'huechi' ládzi'gaquië' luzá'agaquië', tu' huéchi' ládxé'ë Dios légaquië'.

<sup>8</sup> 'Bica' ba yugu' bönni' naca tsahui' icja ládzi'do'gaquië', en biti' bi dul-la' nabága'-gaquië', tu' ila'lé'ené' Dios.

<sup>9</sup> 'Bica' ba yugu' bönni' ta'bequi dxíé' didza' bizxaj, tu' ila'zí' lágaquië' zxí'ini cazë' Dios.

<sup>10</sup> 'Bica' ba yugu' bönni' ta'zaca' ta'gui'ë lu le ta'bía ládzi'gaca bönachi légaquië' cate' tuné' le naca tsahui', tu' dë lataj quégaquië' ga rinná bë'ë Bönni' na' zoë' yehua' yubá.

<sup>11</sup> 'Bica' ba libí'ili' cate' tu'lidza bönachi libí'ili' zi', en ta'bía ládzi'gaquië' libí'ili', ate' lu yöl-la' rizi' yë' ta'nné' queéli' le xihui' tu' dá'ali' neda'. <sup>12</sup> Buli'dzeja, en guli'chaza ládzi'li', tu' uzí'da'ali' xibé yehua' yubá. Ca raca queéli', guca quégaquië' bönni' gulu'ë didza' uláz queë' Dios, en gula'cu'ë zí'atëlö ca libí'ili', tu' gula'bía ládzi'gaca ca' bönachi légaquië'.

*Bönachi dá'gaca Cristo ilaca ca zödi', en ca bení'*

*(Mr. 9:50; Lc. 14:34-35)*

<sup>13</sup> Gunné' ca' Jesús:

—Libi'ili' nácali' ca zödi' luyú ni, pero channö initi zödi' na' yöl-la' siná'a que, biti' gaca gunru' ga huöáca siná'a. Bíti'rö naca lesaca', pero chinaca tu le chú'unaru', ate' ulu'libi bönachi le.

<sup>14</sup> 'Libí'ili' nácali' ca bení' yödzölió ni para ulu'ili' lahui le naca queë' Dios. Ral-la' gácali' ca tu yödzö rö'ö tu lu guí'a, tu' cabí gaca igachi' yödzö na'. <sup>15</sup> Cate' ruquéla'ru' guí', biti' rigú'uru' le tu zxan guí'ina, pero ruzóaru' le ga liná' para uzení' yúgu'të nupa nacuá' lu yu'u. <sup>16</sup> Ca na' run bení', ral-la' gunli' ca' libí'ili', güí'ili' lataj gaca bë' le nácali' lögaca yúgu'të bönachi, para cate' ila'lé'e le naca tsahui' runli', ila'gú'u-në' Xúzili' Dios zoë' yehua' yubá yöl-la' ba.

*Rusédine' Jesús que le gunná bë'ë Dios lu né'ë Moisés*

<sup>17</sup> Gunné' ca' Jesús:

—Biti' guéquili' bida' para usunítia' yugu' le gunná bë'ë Moisés, o xibá na' bulu'sédiné' bönni' gulu'ë didza' uláz queë' Dios. Bida', caléga para usunítia' yugu' lë na', pero para ulu'a lahui idútë le tu'sedi lë na'. <sup>18</sup> Le nácatë rea' libí'ili'. Tsanni nacuá' lúzziba, en yödzölió ni, biti' tödi cá'asö nitú dídz'a'do', en nitú le rinná bë' xibá na', cate' gácarö yúgu'të le ral-la' gaca. <sup>19</sup> Que lë ni na', nútì'tës bönni' quitsjé' tu xibá cuídi'do'os le zoa lu xibá na', en usédiné' bönachi para ilún caní, bönni' ni gácatëre' cuídi'do'os ca yúgu'të nupa ila'cuá' ga rinná bë' Bönni' na' zoë' yehua' yubá, pero nútì'tës bönni' gunë' ca rinná bë' xibá na', en usédiné' bönachi para ilún ca' caní, bönni' ni tsépisétëre' ga rinná bë' Nu na' zoa yehua' yubá. <sup>20</sup> Rea' ca' libí'ili': Channö cabí gunli' le nácatërò tsahui' ca le tuné' bönni' yudo' usedi, enca' ca tuné' bönni' yudo' fariseo, biti' ca' tsú'uli' ga rinná bë'ë Dios yehua' yubá.

*Rusédiné' Jesús ca naca que nu rilé luzé'e  
(Lc. 12:57-59)*

<sup>21</sup> Gunné' ca' Jesús:

—Chibiyónili' ca gula'nné' bönni' guta' lu ná'agaquié' le gulé' xuz xtó'oli': "Biti' gútili' bönachi. Nu bönni' gútië' bönachi, nabáguë'ë xíguia', ate' huadxiné' ga uchi'a usöröe' Dios lë." <sup>22</sup> Na'a, neda' rea' libí'ili': Nu bönni' rilené' böchi' luzé'ë, nabáguë'ë xíguia' huadxiné' ga uchi'a usöröe' Dios lë'. Lësca' caní, nu bönni' inné zí'ë queë' böchi' luzé'ë nabáguë'ë xíguia' ulu'chi'a ulu'söröe' bönni' lo tu'chi'a tu'söröe' lë', ate' nu bönni' guíë' luzé'ë: "¡Böa' canóz!" nabáguë'ë xíguia' tsöjtsu'ë lu guí' gabilia.

<sup>23</sup> 'Caní naca, channö chizóa cu'u tu le unödzju' lu bucugu lá'ayi, ate' tsöjnenu' ni' zoa bizx que rilené' böchi' luzó'o li', <sup>24</sup> bucá'ana lë na' unödzju' lu bucugu ni', en böaj lidxu'. Zí'alö yójca'ana tsahui' le benu' queë' böchi' luzó'o, ate' ní'irö gudá unödzju' lë na' nu'u.

<sup>25</sup> 'Channö zoa nu bönni' rinábiné' li' bi ubi'u queë', en iché'ë li' ga uchi'a usöröe' tu bönni' li', budzágatë tsahui' bönni' na' tsanni ni' yú'ulenu' lë' nöza, para cabí udödë' li' lahuë' bönni' ruchi'a rusöröe', ate' bönni' ni udödë' li' lu në'ë bönni' rusayjë' lidxi guíë, ate' lë' cu'ë li' lidxi guíë na'. <sup>26</sup> Le nácatë rea' li', biti' ca' uruju' ni' cate' idxinrö dza quizzju' ga buitë le ral-lu'u.

*Rusédiné' Jesús ca naca que nu riguitsaj xibá que yöl-la' nutsaga na'*

<sup>27</sup> Gunné' ca' Jesús:

—Chibiyónili' ca na' gula'nné': "Biti' gunu' dul-la' le riguitsaj xibá que yöl-la' nutsaga na'." <sup>28</sup> Na'a, neda' rea' libí'ili': Núti'tës bönni' ruyúë' tu nigula len yöl-la' rizé ladxi' le ruá' dö', chibené' dul-la' len lënu lu icja ládxi'da'ahuë'.

<sup>29</sup> 'Que lë ni na', channö guiój lo' ibëla gun ga gunu' dul-la', guléaj le, en gurú'una le. Gácarö dxi'a quiu' unítiu' tu guiój lo', en caléga idúteo' tsöjtsu'lu guí' gabilia. <sup>30</sup> Channö no'o ibëla gun ga gunu' dul-la', guchugu le, en gurú'una le. Gácarö dxi'a quiu' unítiu' tu no'o, en caléga idúteo' tsöjtsu'lu guí' gabilia.

*Rusédiné' Jesús ca naca que nu bönni' rulá'alené' nigula queë'*

*(Mt. 19:9; Mr. 10:11-12; Lc. 16:18)*

<sup>31</sup> Gunné' ca' Jesús:

—Lësca' gula'nné': "Núti'tës bönni' rusané'-nu nigula queë', ral-la' unödzjé' queënu tu guichi le rnna rulá'alené'-nu." <sup>32</sup> Na'a, neda' rea' libí'ili', channö zoë' nu bönni' rusané'-nu nigula queë', en biti' zoa le ruá' dö' runnu, gunë' bönni' na' ga gunnu dul-la' le riguitsaj xibá que yöl-la' nutsaga na' channö utsaga ná'lennu bönni' yúbölö, ate' bönni' na' si'ë-nu nigula na', lësca' gunë' dul-la' le riguitsaj xibá que yöl-la' nutsaga na'.

*Rusédiné' Jesús ca naca que nu ruzötaj La la'ayi queë' Dios*

<sup>33</sup> Gunné' ca' Jesús:

—Lësca' biyónili' ca yugu' bönni' guta' lu ná'agaquié' gulé' xuz xtó'oli', gula'nné': "Biti' si' yë'u cate' run tsutsu xtídzu'u ni'a queë' Dios, en ral-la' gunu' lahuë' Xanru' Dios idútë lë na' run tsutsu xtídzu'u ni'a queë' Lë'." <sup>34</sup> Na'a, neda' rea' libí'ili', biti' ca' gun tsutsu xtídzalí'. Biti' gun tsutsu xtídzalí' ni'a que yehua' yubá, tu' naca ga rö'ë rinná bë'ë Dios. <sup>35</sup> Biti' gun tsutsu xtídzalí' ni'a que luyú ni, tu' naca luyú ni ca xilibi ni'ë Dios, en caléga ni'a que Jerusalén, tu' naca ladzé' Bönni' nayépisëtérë' rinná bë'ë. <sup>36</sup> Biti' gun tsutsu xtídzu'u ni'a que icju', tu' cabí gaca gunu' ga huöáca chiguichi o gasaj nitú guitsa' icju'. <sup>37</sup> Ral-la' innásili': "Ön", o innásili': "Biti'", tu' naca que tu' xihui' le nadödi bë' ca nácagaca didza' ni.

*Rusédiné' Jesús ca naca que nu ruzí' lëbi luzé'e*

*(Lc. 6:29-30)*

<sup>38</sup> Gunné' ca' Jesús:

—Chibiyónili' ca naca le gunná bë'ë Moisés, gunné': "Nu bi run que guiój lahui luzé'e, ubí'i ca' que, enca' nu bi run que layi' luzé'e, ubí'i ca' que." <sup>39</sup> Na'a, neda' rea' libí'ili': Biti' tá'baga'li' nu guá' dö' queéeli', ate' channö nu capa' xagu' ibëla, bë' lataj capa' ca' ia'tú xagu' yögöla. <sup>40</sup> Channö zoa nu gun ga uchi'a usöröe' tu bönni' li', en cuë' xzo', bë' ca' queé' lari' rixóa cùdzu'u. <sup>41</sup> Channö zoa nu gun bayudxi gu'u yua' que tu chi'i, guyéajlen nu na' chopá chi'i. <sup>42</sup> Nu bi rinábini li', bunödzaj que, en nu bi gué'ëni gunnu' que tu chi'i, biti' tá'bagu'u lë na' inabi li'.

*Rusédiné' Jesús ca ral-la' idxí'iru' nupa biti' ta'lé'e rë'u dxi'a  
(Lc. 6:27-28, 32-36)*

<sup>43</sup> Gunné' ca' Jesús:

—Lësca' caní biyónili' lë na' gula'nné': "Ral-la' idxí'iniu' nu nadxi'i li', en udí'iniu' nu biti' rilé'e li' dxi'a." <sup>44</sup> Na'a, neda' rea' libí'ili', guli'dxi'i nupa biti' ta'lé'e libí'ili' dxi'a. Guli'nábiné' Dios gácalené' nupa tu'lidza libí'ili' zi'. Guli'gún le naca tsahui' quégaca nupa tu'dí'i libí'ili', en buli'lidzé' Dios inábili'-në' guné' ga gaca dxi'a quégaca nupa ta'nné queéeli', en tuá' dö' queéeli'. <sup>45</sup> Channö gunli' caní, gácali' zxí'ini cazé' Xúziru' Dios, zoë' yehua' yubá, tu' runé' Lë' ga ruzen' gubidza queé' ga nacuá' bönnachi tuá' dö', enca' ga nacuá' bönnachi tsahui'. Risöl-lë'ë tu nisa guiój lu yu quégaca bönnachi tsahui', enca' lu yu quégaca bönnachi biti' nácagaca tsahui'. <sup>46</sup> Channö nadxi'isili' bönni' nadxi'iguequiné' libí'ili', ¿nuzxi caz cu'u libí'ili' yöl-la' ba? Lësca' caní tuné' bönni' biti' nácagaca tsahui' na', bönni' tu'quizxjé' uláz que yödzö zi'tu', nadxi'iguequiné' luzá'agaquié'. <sup>47</sup> Channö rugápali' Dios tuzé' böchi' luzá'ali', ¿bizxi caz runli' le nácatérö dxi'a? Lësca' caní tuné' bönni' biti' núnbe'gaquié' Dios. <sup>48</sup> Pero libí'ili', guli'gaca idú tsahui', ca na' náquié' Xúziru' Dios, zoë' yehua' yubá, náquié' idú tsahui'.

## 6

*Rusédiné' Jesús ca ral-la' gácalenru' bönnachi*

<sup>1</sup> Gunné' ca' Jesús:

—Guli'gü' ládxí'li' gaca idú ca reaj ládxí'li'-në' Dios. Biti' gúnsili' lë ni lógaca bönnachi para ila'lé'e ca na' runli'. Channö runli' caní, biti' bi gunné' Xúziru' Dios zoë' yehua' yubá queéeli'. <sup>2</sup> Cate' bi unödzju' que nu bi riyatdzaj, biti' gunu' ga ilá' lahui lë na' runu' ca tuné' bönni' tu'lui'sö tsahui' cuíngaquié' ga naca lu yu'u ga tu'dubé' bönni' judío, en tu'sedé' queé' Dios, enca' ga naca lu yé'ëyi. Caní tuné' para ila'gú'u bönnachi légaquié' yöl-la' ba. Le nácaté rea' libí'ili', cá'asö naca yöl-la' ba gata' quégagaquié'. <sup>3</sup> Pero li', cate' bi unödzju' que nu bi riyatdzaj, biti' ca' gu'u lataj nu inözi. <sup>4</sup> Na'a, lë na' unödzju', bagáchi'sö ral-la' unödzju', ate' Xúziru' Dios, Nu rilé'e ca na' runu' bagáchi'sö, Lë' ubi'ë quiu'.

*Rusédiné' Jesús ca ral-la' ulídzaru'-në' Dios  
(Lc. 11:2-4)*

<sup>5</sup> Gunné' ca' Jesús:

—Cate' ulídzali'-në' Dios, biti' gunli' ca tuné' bönni' tu'lui'sö tsahui' cuíngaquié', tu' ta'yaza ládxí'gaquié' ta'zuíné' tu'lidzé' Dios gapa naca lu yu'u ga tu'dubé' tu'sedé' bönni' judío queé' Dios, en gapa naca lu yé'ëyi para ila'lé'e bönnachi légaquié'. Le nácaté rea' libí'ili', cá'asö naca yöl-la' ba gata' quégagaquié'. <sup>6</sup> Pero libí'ili', cate' ulídzali'-në' Dios guli'tsaza lídxili', en buli'sayaj yu'u. Buli'lidzé' Dios inábili'-në' Xúziru' Dios, zóalené' libí'ili' ga na' zóali' queézili', ate' Xúziru' Dios, Nu rilé'e ca runli' bagáchi'sö, Lë' ubi'ë queéeli'.

<sup>7</sup> 'Cate' ulídzali'-në' Dios biti' gunli' la' yé'ëyi la' lez ca na' tuné' bönni' biti' núnbe'-gaquié' Dios, tu' téquiné' huayönné' Dios légaquié' tu' tu'lidzé' la' yé'ëyi la' lez. <sup>8</sup> Biti' gunli' ca na' tuné' légaquié'. Xúziru' Dios, zi'atélö cate' si' inábali'-në', chinöz quéziné' le riyatdzaj queéeli'. <sup>9</sup> Que lë ni na', ral-la' ulídzali'-në' Dios innali' caní:

Xuz netu', zu' yehua' yubá, gaca zxön Lo'.

<sup>10</sup> Gudá inná bë'u luyú ni.

Ben ga gaca luyú ni ca raza ládxu'u Li'  
ca na' raca yehua' yubá.

<sup>11</sup> Benna le gágutu' na'a dza.

<sup>12</sup> Buniti lo netu' le huiá' dö' bentu' Lo' Li'  
ca runtu' netu', runiti lotu' nupa bi tun queétu'.

<sup>13</sup> Biti' gu'u lataj si' bë' tu' xihui' netu',  
pero busölá netu' lu na' nu ruá' dö'.

Nequi quiu' ga rinná bë'u, en yöl-la' unná bë', en yöl-la' ba.

Caní ré'ënitu' gácatica'sö. ¡Ca' gaca!

<sup>14</sup> 'Channö uniti loli' luzá'ali', nupa tuá' dö' queéli', uniti lahuë' Xúziru' Dios, zoë' yehua' yubá, libf'ili'. <sup>15</sup> Channö cabí uniti loli' luzá'ali', biti' uniti lahuë' Xúziru' Dios libf'ili' ca naca dul-la' nabága'li'.

### *Rusédiné' Jesús ca ral-la' gunru' gubasa*

<sup>16</sup> Gunné' ca' Jesús:

—Cate' gunli' gubasa, biti' gunli' bayechi' loli' ca tuné' bönni' tu'lui'isö tsahui' cuíngaquié', tu' tuné' bayechi' lógaquié' para iléquibe'e böñachi tuné' gubasa. Le nácatë rea' libf'ili', cá'asö naca yöl-la'ba gata' quégaquié'. <sup>17</sup> Libf'ili', cate' gunli' gubasa, buli'pá'a ícjali', en guli'quibi loli', <sup>18</sup> para cabí iléquibe'e böñachi runli' gubasa. Bagáchi'sö ral-la' gunli' gubasa, ate' Xúziru' Dios, zóalené' libf'ili' ga na' zóali' queézili', Lë' ubi'ë queéli'.

### *Yehua' yubá ral-la' utúbiru' yöl-la' tsahui' queéru'*

(Lc. 12:33-34)

<sup>19</sup> Gunné' ca' Jesús:

—Biti' utúbili' yöl-la' tsahui' luyú ni, ga ni bélado' que tu'töba' le, ate' raca ditaj, en ga ni ta'yaza gubán, ta'bané'. <sup>20</sup> Buli'tubi yöl-la' tsahui' yehua' yubá, ga ni' bélado' que biti' ulu'töba' le, en biti' gaca ditaj, en ga ni' biti' ila'yázië' bönni' gubán, en biti' ila'bané'.

<sup>21</sup> Ga ni' dë yöl-la' tsahui' queéli', ni' gü'i' ladxí'li' idxinxli'.

### *Le rigú'u bení icja ládxido'oru'*

(Lc. 11:34-36)

<sup>22</sup> Gunné' ca' Jesús:

—Guiój loru' naca ca tu le rigú'u bení icja ládxido'oru'. Que lë ni na', channö guiój loli' naca tsahui', idúteli' tsépili' yösa bení'. <sup>23</sup> Channö guiój loli' biti' naca tsahui', idúteli' nachúl-lali'. Que lë ni na', channö bení' zóalen libf'ili' nuhuöáca le naca chul-la, yénni'térö nachúl-lali'.

### *Dios, en dumí*

(Lc. 16:13)

<sup>24</sup> Gunné' ca' Jesús:

—Cuntu nu bönni' gaca gunë' xichíngaquié' chopá xanë', tu' uzóë' tuë' tsölä'alö, ate' ia'tüë' na' idxí'inë', o ugá'analené' tuë', ate' ia'tüë' na' usán ládxë'ë. Biti' gaca gunli' xichinë' Dios, enca' dumí.

### *Dios rapa chi'ë nupa néquiguequi queë'*

(Lc. 12:22-31)

<sup>25</sup> Gunné' ca' Jesús:

—Ia'stú rea' libf'ili': Biti' ubi ugu'ili' ni'a que le gáguli' o ni'a que le guíjali', yugu' le nabánili', o ni'a que lari' gáculi'. Nazáca'térö yöl-la' na'bán queéli' ca le gáguli', ate' nácatérö lesaca' le nácali' ca lari' gáculi'. <sup>26</sup> Buli'yú ca raca quégacaba' biguínnido' ta'daba' lúzxiba. Biti' bi taz tu'zóaba', en biti' tu'lápaba', en biti' tu'túhiba' ga bi ila'gú'uba' quégacaba', pero Xúziru' Dios zoë' yehua' yubá, rugagu cazé' légacaba'. Nazáca'téröli'

libí'ili' ca yugu' biguúnnido' na'. <sup>27</sup> ¿Nuzxi caz bönni' nútsé'ë ládjali' gaca gunë' ga soë' ibanë' ia'túz dza tu' ruúbi rugui'iné' para gaca caní queë'?

<sup>28</sup> ¿Bizx que ruúbi rugui'ili' ni'a que le gáculi'? Buli'yútsöca' ca raca quégaca yöjdo' rö'gaca la' guixi' ca ta'zxöön. Biti' tun dxin, en biti' tun du lari'. <sup>29</sup> Neda' rea' libí'ili', Salomón, bönni' ni' gunná bë'ë, sal-la' gúta'da' yöl-la' tsahui' queë', lari' gúcuë' biti' gunná'térö lachi ca rinná'gaca yöjdo' na'. <sup>30</sup> Dios caz runë' lachi yöj guíxi'do', le rö'gaca la' guixi', le nacuá' na'a dza, ate' cuxó huidzaj ila'yegui lu guí'. Channö caní ruf'i ládxë'ë yöj guíxi'do', runë' léguequi lachi, gúnda'arë' ca' queëli', sal-la' biti' réajlé'ëli'-në' idú ládx'i'li'. <sup>31</sup> Que lë ni na', biti' ubi ugu'ili', en biti' innali': "¿Bizxi gágutsatu?" o "¿Bizxi guíjatsatu?" o "¿Bizxi lari' gácutsatu?" <sup>32</sup> Bönachi yödzölió ni tu'ubi tu'guí'i ni'a que yúgu'të lë ni, pero zoë' Xúziru' yehua' yubá, ate' Lë' nőzinë' naquínili' yúgu'të lë ni. <sup>33</sup> Na'a, guli'gü'irö ládx'i'li' inná bë'enë' Dios libí'ili', en gunli' le naca tsahui' lahuë' Lë', ate' Lë' cu'ë xinózali' yúgu'të lë ni. <sup>34</sup> Que lë ni na', biti' ubi ugu'ili' ni'a que le ral-la' gaca cuxó huidzaj, tu' huáca gü'i ládx'i'li' cuxó huidzaj le gaca queëli' dza na'. Tu tu dza ilaca le ral-la' gü'i ládx'i'li' dza na'.

## 7

*Biti' ral-la' ichugu bë'ëru' böchi' luzá'aru'*  
(Lc. 6:37-38, 41-42)

<sup>1</sup> Gunné' ca' Jesús:

—Biti' ichugu bë'ëli' böchi' luzá'ali', para cabí ichugu bë'ë Dios queëli', <sup>2</sup> tu' ichugu bë'ë Lë' queëli' la' leze ca na' richugu bë'ëli' queë' böchi' luzá'ali', ate' ca na' rurixi rudödili' que luzá'ali', la' cá'asö urixi udödë' Dios queëli'. <sup>3</sup> ¿Bizx que ruyú' bëbudo' yu'u guiój lahuë' böchi' luzó'o, en biti' réquibe'enu' yu'u le zxöntérö guiój lo' li'? <sup>4</sup> ¿Guíetso' böchi' luzó'o: "Gulöz, cueja' bëbudo' yu'u guiój lo'", ate' li', le zxöntérö ca' yu'u guiój lo' li'? <sup>5</sup> Li', bönni' rulu'isö tsahui' cuinu'. Guléaj zí'alö le zxön yu'u guiój lo' li', ate' ní'irö ilé'enu' tsáhui'do' para gaca cueju' bëbudo' yu'u guiój lahuë' böchi' luzó'o.

<sup>6</sup> Biti' gü'ili' quégacaba' bö'cu' le naca lá'ayi, para cabí ulu'huécjaba', en iláguya'aba' libí'ili', en biti' chú'unali' le naca lesaca' queëli' láhuigacaba' cuchi, para cabí ulu'zadi' ní'aba' le.

*Guli'naba, guli'guilaj, en buli'lidza ra' yu'u*  
(Lc. 11:9-13; 6:31)

<sup>7</sup> Gunné' ca' Jesús:

—Guli'naba, ate' Dios gunnë' queëli'. Guli'guilaj, ate' gunnë' lataj idzöli queëli'. Buli'lidza ra' yu'u, ate' Lë' isaljë' queëli'. <sup>8</sup> Núti'tés bönni' rinabë', ridéli'në', ate' bönni' riguiljë', ridzöli queë', ate' bönni' rulidzë' ra' yu'u, ralaj queë'.

<sup>9</sup> Channö zoë' nu bönni' ládjali' libí'ili', ate' zóabi' bi'i queë', channö inábibi' lë' yöta xtila, ¿naru' unödzjë'-bi' guiój? <sup>10</sup> Channö inábibi' lë' tuba' böla, ¿naru' unödzjë'-bi' bëla?

<sup>11</sup> Libí'ili' nácali' huiá' dö', pero nőzili' unödzjali' zx'linili' le naca tsahui'. Nácatérö löza, Xúzili' zoë' yehua' yubá unödzjë' nupa ta'nábini Lë' le naca dxia'.

<sup>12</sup> Que lë ni na', ca na' ré'ënili' ilún bönachi queëli', lësca' caní guli'gún quégacië'. Lë ni naca le rinná bë' xibá queë' Moisés, enca' le gula'nné' bönni' gulu'ë didza' uláz queë' Dios.

*Tu ga ral-la' tsú'uru' le naca tsúpi'do'*  
(Lc. 13:24)

<sup>13</sup> Gunné' ca' Jesús:

—Guli'tsáz ga nu riyaza le naca tsúpi'do'. Blaga' naca ga nu riyaza, en yalaj naca nöza le röjácalenë' bönni' ga ni' ila'nítie', ate' ta'yázië' bönni' zián ni'. <sup>14</sup> Tsúpi'do' naca ga nu

riyaza, en lárido'os naca nöza le röjácalen bönachi ga ni' ila'deli' yöl-la' na'bán idú, ate' nabábasö nupa ta'dzöli le.

*Le runru' naca bë' le nácaru'*  
(Lc. 6:43-45)

<sup>15</sup> Gunné' ca' Jesús:

—Guli'gún chi'i cuinli' para cabí ila'zí' yé'enë' bönni' ta'zí' yé'ë libi'ili', ta'nné' tu'ë didza' uláz queë' Dios. Ilá'dxiné' bönni' caní ga zóali', en ulu'lui'i cuíngaqüi' nöxaj ládxi'do' ca nácagacaba' bö'cu' zxíla'do', pero lu icja ládxi'do'gaqui' nácagaqui' ca bö'cu' guí' a sínia'. <sup>16</sup> Yugu' le tunë' ilaca bë' le nácagaqui'. Biti' ruchíbiru' le ribía lubá uva lu yaga yötsi', en biti' ruchíbiru' le ribía yaga higo lu guixi' legui lárido'. <sup>17</sup> Caní naca, yúgu'të yaga dxi'a ta'bía le naca dxi'a, ate' tu yaga cabí naca dxi'a ribía le cabí naca dxi'a. <sup>18</sup> Yaga dxi'a na' biti' gaca cuía le cabí naca dxi'a, ate' yaga na' biti' naca dxi'a biti' gaca cuía le naca dxi'a. <sup>19</sup> Yúgu'të yaga biti' ta'bía le naca dxi'a ila'rugu, ate' ila'gu'ë léguequi lu guí'. <sup>20</sup> Caní naca, yugu' le tunë' bönni' na' ilaca bë' le nácagaqui'.

*Nupa biti' ila'yázië' ga rinná bë'ë Dios*  
(Lc. 13:25-27)

<sup>21</sup> Gunné' ca' Jesús:

—Zian nupa të neda': “Xan, Xan”, pero caléga yúgu'të' ila'yázië' ga rinná bë'ë Dios yehua' yubá. Ila'yázasë' ni' bönni' tunë' ca ré'enë' Xuza' Dios, zoë' yehua' yubá. <sup>22</sup> Cate' idxín dza údxi que yödzölió ni, bönni' zián ilé' neda', ila'nné': “Xan, Xan, bentu' libán que xtídzë'ë Dios, buguntu' dxin Lo', en buguntu' ca' dxin Lo' para bubéajtu' yugu' bö' xihui', en buguntu' ca' dxin Lo' bentu' zián yöl-la' huáca zxön.” <sup>23</sup> Ní'irö neda' guía' légaqui'ë: “Biti' ca' núnbë'a libi'ili'. Guli'cuítá ga zoa', libi'ili' ruá'ali' dö'.”

*Chopa ca gaca udxíaru' xilibi zö' ö*  
(Lc. 6:47-49; Mr. 1:22)

<sup>24</sup> Gunné' ca' Jesús:

—Ia'stú ca', nu bönni' riyönné' xtídz'a ni, en gunë' ca rnna, bönni' ni náqui'ë' ca tu bönni' réajni'inë', budxíe' lidxë' ga naca lu guijoj. <sup>25</sup> Cate' gulaj guijojsiu', en guzxón yegu gubó'o, en guyecja bö', gudibi nisa cuita yu'u na', pero biti' gubixi, tu' dxía xilibi lu guijoj. <sup>26</sup> Na'a, nu bönni' riyönné' xtídz'a ni, en biti' runë' ca rnna, bönni' ni náqui'ë' ca tu bönni' biti' réajni'inë', budxíe' lidxë' lu yu dzöbi. <sup>27</sup> Cate' gulaj guijojsiu', en guzxón yegu gubó'o, en guyecja bö', ní'irö gudá'a nisa cuita yu'u na', ate' gubíxitë, en tsaz biguinnaj.

<sup>28</sup> Cate' Jesús budxi bë'lenë' légaqui'ë' didza' ni, bulu'bani bönachi zián nacuá' ni' ca naca le rusédinë', <sup>29</sup> tu' rusédinë' légaqui'ë' ca tu bönni' dë lu né'ë, en caléga ca tunë' bönni' yudo' usedi quégäqui'ë'.

## 8

*Ruhuöáqui'ë' tu bönni' ré'enë' huë' nudzu' ruzödi*  
(Mr. 1:40-45; Lc. 5:12-16)

<sup>1</sup> Cate' böjtje' Jesús lu guí'a na', söjácalen bönachi zián Lë'. <sup>2</sup> Bidxiné' tu bönni' ré'enë' huë' nudzu' ruzödi ga zoë' Jesús, ate' buzúa zxibë' lahuë' Jesús, en ré' Lë':

—Xan, channö ré'ënu', huáca unu' neda'.

<sup>3</sup> Ní'irö Jesús la' bulité né'ë, en gudanë' lë'. Rë' lë':

—Ré'ënda'. Huöácu' dxi'a.

La' bunítitë xihuë'ë bönni' huë' na'. <sup>4</sup> Ní'irö Jesús gudxë' lë':

—Buyú, cuntu nu guío' caní, pero guyéaj, yöjlui'i cuinu' lahuë' bixúz, ate' yöjnödzaj le gunná bë'ë Moisés le ulu'i bönachi chiböácu'.

*Jesús ruúnë' bi'i huen dxin queë' tu bönni' rinná bë'ë lu gudil-la*  
(Lc. 7:1-10)

<sup>5</sup> Cate' guyázië' Jesús yödzö Capernaum, bidxinë' tu bönni' ga zoë', bönni' rinná bë'enë' tu gáyu'ë bönni' rójáquië' gudil-la, ate' gúta'yuë' lahuë' Jesús, <sup>6</sup> en rë' Lë':

—Xan, bi'i huen dxin quia' dëbi' yu'u, rë'ebi' huë' nacú'unibi' bin, ate' rigu'i rizáca'da'abi'.

<sup>7</sup> Jesús rë' lë':

—Neda' guída' una'-bi'.

<sup>8</sup> Bubi'ë didza' bönni' na' rinná bë'enë' bönni' rójáquië' gudil-la, en rë' Jesús:

—Xan, biti' naca' zi tsáziu' lidxa', pero tsa innasu' quia', ate' huöácabi' bi'i huen dxin quia'. <sup>9</sup> Lësca' neda', zoa nu rinná be'e neda', en nacu'ë ca' bönni' rójáquië' gudil-la rinná bë'egacada'-në'. Cate' rea'-në' tuë': "Guyéaj ni'", rejë'. Cate' rea'-në' ia'túë': "Gudá ni", ridë'. Cate' rea'-në' bönni' huen dxin quia': "Ben dxin ni", la' runtë' dxin na'.

<sup>10</sup> Cate' biyönnë' Jesús didza' ni, bubáninë', ate' gudxë' bönni' söjácalenë' Lë', rnnë':

—Le nácatë rea' libi'ili', ga nacuá' bönachi Israel, cuntu nu bönni' rójxéqui'da'-në' réajlë'ë neda' ca runë' bönni' ni. <sup>11</sup> Ia'stú rea' libi'ili': Ila'rúaj bönachi zián saca' ga rilén gubidza, en saca' ga ribía gubidza, ate' ila'bö'len tsözxón Abraham, en Isaac, en Jacob, yehua' yubá ni' ga rinná bë'ë Dios, <sup>12</sup> pero yugu' bönni' na' guró cazë' Dios para ila'yázië' ga na' rinná bë'ë Lë', chú'unë' légaquië' ní'ilö ga na' naca chul-la, ate' ni' ila'bödxë', en ulu'til-la láyë'ë lu yöl-la' ruhui'ini quégaquië'.

<sup>13</sup> Ni'irö Jesús gudxë' bönni' na' rinná bë'enë' bönni' rójáquië' gudil-la, rnnë':

—Böaj lidxu'. Ca na'réajlë'u, ca' gaca quiu'.

La' ná'asö böácatëbi' bi'i huen dxin queë' na'.

### *Jesús ruúnë' xiná'anu nigula queë' Pedro*

(Mr. 1:29-31; Lc. 4:38-39)

<sup>14</sup> Bidxinë' Jesús lidxë' Pedro, ate' ni' bilé'enë'-nu xiná'anu nigula queë', dënu lu da'a, en yú'unu tu xilá. <sup>15</sup> Gudanë' Jesús ná'anu, ate' la' burúajtë xilá na' yú'unu. Ni'irö böásanu, en bunödzjanu le gulahuë'.

### *Jesús ruúnë' zián nupa te'e*

(Mr. 1:32-34; Lc. 4:40-41)

<sup>16</sup> Cate' chiridzö' dza na', dujuá'agaquië' zián bönni' yú'ugaca bö' xihui' légaquië' ga zoë' Jesús, ate' len yöl-la' rinnësö queë' bubéajë' yugu' bö' xihui' na', en bunë' ca' yúgu'të nupa te'e. <sup>17</sup> Caní guca para gaca ca na' gunné' Isaías, bönni' bë'ë didza' uláz queë' Dios, gunné': "Lë' bu'ë yugu' le rizáca'ru', en bu'ë ca' yugu' yödzöhuë' queéru'."

### *Nupa gulé'ëni tsöjácalen Jesús*

(Lc. 9:57-62)

<sup>18</sup> Cate' bilé'enë' Jesús nacuá' bönachi zián gásibi'ilë', gunná bë'enë' yugu' bönni' usëda queë' ila'dödë' ia'tsölá'a nísado' ni'. <sup>19</sup> Bidxinë' tu bönni' yudo' usedi ga na' zoë' Jesús, en rë' Lë':

—Bönni' Usedi, sá'lena' Li' gáti'tës ga tseju'.

<sup>20</sup> Jesús rë' lë':

—Yugu' böza' nacuá' zxan guiój quégacaba', ate' yugu' biguínnido', nudxíagacaba' xicá'agacaba', pero neda', Bönni' Guljë' Bönachi, biti' dë ga quíxaj icja'.

<sup>21</sup> Ia'túë' bönni', náquië' bönni' usëda queë' Jesús, gudxë' Lë':

—Xan, benna neda' lataj huöja' ga idxinrö dza chibucácha'a-në' xuza'.

<sup>22</sup> Jesús gudxë' lë':

—Gudá' neda'. Bë' lataj yugu' bönni' tati cazë' ulu'cáchë'ë nupa ilátigaca quégaquië'.

### *Jesús ribequi dxíë' bö' budunu'*

(Mr. 4:35-41; Lc. 8:22-25)

<sup>23</sup> Gurenë' Jesús lë'e bárcodo', ate' dzágagaquië' Lë' bönni' usëda queë'. <sup>24</sup> Ni'irö guyecja bö' budunu' lu nísado' na', ate' riyasa ridxíada' nísado' na' ga bidxitë riyaza

nisa lë'e bárcodo' na'. Dë' rásië' Jesús lë'e barco na'. <sup>25</sup> Ní'irö bila'dxinë' bönni' usëda queë' Jesús ga na' zoë', ate' bulu'subanë' Lë', en të' Lë':

—Xan, busölá netu'. Chirigáchi'ru' lu nisa.

<sup>26</sup> Bubi'ë didza' Jesús, en rë' légaquië':

—¿Bizz que rádxili'? Láti'do'os réajlë'eli'-në' Dios.

Ní'irö guyasë' Jesús, en bulidzë' bö' na' recja, en nísado' na', ate' la' guró'ötë dxi.

<sup>27</sup> Bulu'báninë' bönni' na', ta'nné':

—¿Nuzxi caz bönni' ni? Ruí'isë' didza', ate' bö' recja, en nísado' tun ca rnnë'.

*Yugu' bönni' Gadara yú'ugaca bö' xihui' légaquië'*

(Mr. 5:1-20; Lc. 8:26-39)

<sup>28</sup> Cate' bidxinë' Jesús ia'tsölá'a nísado' ga na' naca lu xiyú yödzö Gadara, bila'rúajë' chopë' bönni' ga nacuá' ba quégaca nupa nátigaca, dutságagaquië' Jesús. Nácagaquië' sínia', ate' cuntu nu gaca tödi la' nöza ni'. <sup>29</sup> La' gulü'itë' zidzaj didza' chopë' ni, ta'nné':

—¿Bizzi ral-la'tu' quiu', Jesús, Zxf'inë' Dios? ¿Naru' bidxintso' ni dusaca' zi'u netu' zi'alö ca idxín dza queétu'?

<sup>30</sup> Ga ni' nacu'ë nacuá'aba' cuchi zián ta'daba' táguba', nacuá'aba' láti'do' ga naca zi'tu'.

<sup>31</sup> Gula'naba yechi' bö' xihui' na' Jesús, en të' Lë':

—Channö ubéaju' netu', benna lataj tsöjtsú'ugacatu'-ba' cuchi zián ni'.

<sup>32</sup> Ní'irö Jesús gudxë' léguequi:

—Guli'tséaj.

La' bila'rúajtë bö' xihui', en yöjcházagaca cuchi zián ni'.

Ní'irö yúgu'téba' cuchi zián na' yöjbíxitëgacaba' ga naca lë'e guiój, en yöjcházagacaba' lu nísado', ga ni' gula'yépiba' nisa, en gulátiba'.

<sup>33</sup> Guládxinë' bönni' tu'yüé'-ba' cuchi na', ate' bulu'zxúnnajë'. Cate' bila'dxinë' lu yödzö, gula'guíxjö'ë yúgu'të lë na' guca quégagaquië' bönni' ni' gula'yú'u bö' xihui' légaquië'. <sup>34</sup> Ní'irö bila'rúaj bönachi lu yödzö ni', yöjtságagaquië' Jesús. Cate' bila'lé'enë' Lë', guláta'yuë' lahuë' uzë'ë lu xiyúgaquië' na'.

## 9

*Jesús ruúnë' tu bönni' nacú'unië' bin*

(Mr. 2:1-12; Lc. 5:17-26)

<sup>1</sup> Ní'irö bubenë' Jesús lë'e bárcodo', en gudödë' ia'tsölá'a nísado' ni', ate' budxinë' ga naca ladzë'. <sup>2</sup> Ní' dujuá'gaquië' tu bönni' nacú'unië' bin ga zoë' Jesús, zxoë' lu da'a yaga. Cate' bilé'enë' Jesús ca na' ta'yéajlë'ë bönni' ni Lë', gudxë' bönni' na' nacú'unië' bin, rnnë':

—Butipa ládxu'u, zxí'ina'do'. Chibuníti lahua' dul-la' nabágu'u.

<sup>3</sup> Nacu'ë ca' bönni' yudo' tu'sédinë' ni', ate' ta'nné' lu icja ládzi'do'gaquië', ta'nné': “Didza' ru'ë bönni' ni ruzóa Dios tsölá'alö.”

<sup>4</sup> Cate' réquibe'enë' Jesús le ta'zá' ládzi'gaquië', rë' légaquië':

—¿Bizz que rizá' ládzi'li' caní le cabí naca tsahui'? <sup>5</sup> Bitti' naca böniga nu guiésö bönni' ni: “Yugu' dul-la' nabágu'u chibuníti lahua”, pero naca böniga nu gun ga huöásë', en uzé'enë'. <sup>6</sup> Na'a, ulu'ida' lib'iili' neda', Bönni' Guljë' Bönachi, dë lu na'a yöl-la' unná bë' uniti lahua' dul-la' luyú ni.

Ní'irö Jesús gudxë' bönni' na' nacú'unië' bin, rnnë':

—Guyása. Buchisa da'a yaga quiu', en böaj lidxu'.

<sup>7</sup> Ní'irö la' guyásatë' bönni' na' nacú'unië' bin, en böajë' lidxë'. <sup>8</sup> Cate' bila'lé'enë' bönni' nacu'ë ni' lë ni, bulu'báninë', ate' gula'gu'ë Dios yöl-la' ba tu' bunödzjë' yöl-la' huáca caní quégaca bönachi.

*Jesús rulidzë' Mateo*

(Mr. 2:13-17; Lc. 5:27-32)

<sup>9</sup> Cate' buzé'ë Jesús ni', bilé'enë' bönni' lë' Mateo, rö'ë ga na' ruquízxjë' uláz que yödzö zi'tu', ate' Jesús gudxë' lë':

—Gudá' neda'.

Ní'irö la' guyásatë' Mateo na', ate' sa'yéajlenë' Jesús.

<sup>10</sup> Ia'tú le guca, cate' ni' rö'ë Jesús rahuë' ga naca lidxë' Mateo, zián bönni' tu'quízxjë', en yugu' bönni' cá'asö bila'dxinë' ga zoë', ate' gula'bó'lenë' Jesús tsözxón len yugu' bönni' usëda queë'. <sup>11</sup> Cate' bönni' yudo' fariseo bila'lé'enë' lë ni, gula'nábinë' yugu' bönni' usëda queë' Jesús, ta'nné':

—¿Naru' bönni' rusédinë' lib'ili' rágulentsë' tsözxón bönni' tu'quízxjë', en iá'zíca'rë' bönni' dul-la'?

<sup>12</sup> Cate' biyönnë' Jesús lë ni, rë' légaquië':

—Biti' naquíniguequinë' bönni' nácagaquië' dxi'a nu un bönachi, pero bönni' té'enë' naquíniguequinë' nu un bönachi. <sup>13</sup> Guli'tséaj, en buli'sëda le rnna lë na' nazúaj lu guichi lá'ayi, le rnna caní: "Ré'énda' ulu'huéchi' ládx'i'gaquië' bönni' luzá'agaquië', en calëga ilútië'-ba' böa' bëdxi lu bucugu lá'ayi quia'." Bida' ni, calëga para ulídzagaca'-në' bönni' tsahui', pero bida' para ulídzagaca'-në' bönni' dul-la' para ulu'bí'i ládx'i'gaquië'.

### *Rusédinë' Jesús ca ral-la' gunru' gubasa*

(Mr. 2:18-22; Lc. 5:33-39)

<sup>14</sup> Ní'irö bönni' dá'gaquië' Juan, bönni' na' buquilë' bönachi nisa, bila'dxinë' ga zoë' Jesús, ate' gula'nábinë' Lë', ta'nné':

—¿Bizz que na' netu', enca' yugu' bönni' yudo' fariseo, zián luzuí runtu' gubasa, pero yugu' bönni' usëda quiu' Li' biti' tunë' gubasa?

<sup>15</sup> Bubi'ë didza' Jesús, en rë' légaquië':

—¿Naru' huácatsö ila'sëbi ládx'i'gaca nupa nacuá' laní que yöl-la' rutsaga na' tsanni ni' bönni' rutsaga në'ë zóalenë' légaquië'? Za' dza cate' idúë' bönni' na' rutsaga në'ë ga nacu'ë. Dza ní'irö ilunë' gubasa.

<sup>16</sup> Bucúdzu'ë didza' Jesús, rnnë':

—Cuntu nu un tu lari' tëbi len lari' cubi, tu' uxú'uni lari' cubi na' nugu'ë lari' tëbi na', ate' ichóza'rö lari' tëbi na'. <sup>17</sup> Lësca' caní, cuntu nu bönni' riguë'ënë' xisi uva cubi tu lu buzudi guídi gula, tu' galaj ilëbi xisi uva cubi na', en uzxuzxaj buzudi guídi gula na', ate' gaca ditaj xisi uva na', ate' initi ca' buzudi guídi na'. Rigá'aru' xisi uva cubi tu lu buzudi guídi cubi, ate' irópatë taca chi'i.

### *Rubanbi' bi'i nigula queë' Jairo, en ruhuöácanu tu nigula gudannu lari' nácuë' Jesús*

(Mr. 5:21-43; Lc. 8:40-56)

<sup>18</sup> Tsanni ni' Jesús rui'ilenë' légaquië' didza' ni, tu bönni' rinná bé'enë' bönachi judío bidxinë' ga zoë', ate' buzóa zxibé' lahuë' Jesús, en rë' Lë':

—Bi'i nigúlado' quia' la' gútitébi'. Gudá ixóa no'o lëbi', ate' ubanbi'.

<sup>19</sup> La' guzuítenë' Jesús, en sa'yéajlenë' lë'. Dzágagaquië' bönni' usëda queë' Lë'.

<sup>20</sup> Ní'irö bidxinnu tu nigula zaca' cídu'lë' Jesús, chiguca chinnu iz ré'enu, biti' ruhu'i rön queénu que huë' quégaca cázanu nigula, ate' gudannu lari' nácuë' Jesús. <sup>21</sup> Caní bennu tu' rizá' ládx'i'nu, rnnnanu: Channö cansa' zxë', huöáca'. <sup>22</sup> Ní'irö buécjë' Jesús, en ruyúë' lënu, ate' rë'ë-nu:

—Butipa ládxu'u, zxí'ina'do'. Chiböácateu' tu' réajlé'u neda'.

La' ná'asö böácaténu.

<sup>23</sup> Cate' bidxinë' Jesús lidxë' bönni' unná bë' na', bilé'enë' nacu'ë ni' bönni' tu'cödxë' gui, en nupa ta'bödxi yechi'. <sup>24</sup> Jesús rë' légaquië':

—Guli'cuita ni, tu' cabí nátibi' bi'i nigúlado' ni. Rásisibi' na'.

Ní'irö nupa nacuá' ni' bulu'titaj Lë'.

<sup>25</sup> Cate' chinubéajë' Jesús bönachi na' ní'ilö, guyázië', en gudélë'ë ná'abi' bi'i nigula na', ate' la' guyásatëbi'. <sup>26</sup> Guzé' didza' ca guca lë ni, ate' bila'yöni bönachi nacuá' idútë luyú na'.

*Jesús ruúnë' bönni' nachul-la guiój lógaquië'*

<sup>27</sup> Cate' Jesús burúajë' ni', chopë' bönni' nachul-la guiój lógaquië' söjácalenë' Lë'. Tu'ë zidzaj didza', ta'nné':

—Zxí'ini xi'sóë' David, buéchi' ladxi' netu'.

<sup>28</sup> Cate' bidxinë' Jesús ga naca lu yu'u, bila'dxinë' chopë' bönni' na' nachul-la guiój lógaquië' ga zoë'. Jesús gunábinë' légaquië', rnnë':

—¿Ba réajlë'ëli' neda', huáca una' libí'ili'?

Légaquië' ta'nné':

—Ön, Xan.

<sup>29</sup> Ní'irö Jesús gudanë' guiój lógaquië', ate' rnnë':

—Ca réajlë'ëli', ca' gaca queéli'.

<sup>30</sup> La' böáljatë guiój lógaquië'. Ní'irö Jesús buzenë' bach légaquië', rnnë':

—Guli'gü'i itica'sö ládxi'li' cuntu nu inözi lë ni.

<sup>31</sup> Cate' bulu'rúajë' ni', la' bulu'zétë' didza' idútë luyú ni' ca naca lë na' benë' Jesús.

*Jesús ruúnë' tu bönni' biti' ru'ë didza'*

<sup>32</sup> Cate' Jesús, en yugu' bönni' usëda queë' bulu'rúajë' tu lu yu'u, bila'dxinë' bönni' ga zoë' Jesús naché'gaquië' lahuë' tu bönni' biti' ru'ë didza', tu' yu'u lë' bö' xihui'. <sup>33</sup> Cate' bubéajë' Jesús bö' xihui' na', la' gunnëtë' bönni' na' biti' guca gu'ë didza'. Bulu'báninë' bönni' nacu'ë ni', ta'nné':

—Catu caz rilé'etu' le caní ladaj bönachi Israel.

<sup>34</sup> Ní'irö bönni' yudo' fariseo gula'nné' queë' Jesús, ta'nné':

—Bönni' ni rubéajë' yugu' bö' xihui', rugunë' dxin yöl-la' unná bë' que xángaca bö' xihui' na'.

*Jesús ruhuéchi' ládxë'ë bönachi zián*

<sup>35</sup> Gudé' Jesús idú gásibi'ilö gapa nacuá' yödzö zxön, en gapa nacuá' yödzödo', ate' gapa naca lu yu'u ga tu'dubë' tu'sédë' bönni' judío queë' Dios. Rusédinë' Jesús bönachi nacuá' ni', en runë' libán que didza' dxi'a ca rínná bë'ë Dios. Bunë' yúgu'të nupa bi ta'gui'i ta'zaca' yugu' lu yödzö na'. <sup>36</sup> Cate' Jesús bilé'enë' bönni' zián ni', buéchi' ládxë'ë légaquië', tu' ta'gui'i ta'záquië', en nudú ládxi'gaquië' ca raca quégacaba' bö'cu' zxila' biti' zoa nu ruyú légacaba'. <sup>37</sup> Ní'irö Jesús re' yugu' bönni' usëda queë', rnnë':

—Le nácatë dëda' yöla, pero nabábasö nupa tu'lapa. <sup>38</sup> Que lë ni na', guli'gáta'yu lahuë' Dios, náquië' Xan yöla na', inábili'-në' isól-lë'ë bönni' huen dxin ulu'lapë' yöla queë'.

## 10

*Jesús riböë' bönni' ilácagaquië' gubáz queë'*

(Mr. 3:13-19; Lc. 6:12-16)

<sup>1</sup> Ní'irö bulidzë' Jesús idxínnutë' bönni' usëda queë', en budödë' lu ná'agaquië' yöl-la' unná bë' para ulu'béajë' bö' xihui' yú'ugaca bönachi, en ulu'únë' yúgu'të nupa te'e, en yúgu'të nupa bi ta'gui'i ta'zaca'.

<sup>2</sup> Caní naca lágagaquië' idxínnutë' gubáz na' nasö'l-lë'ë Jesús:

Simón, (lë' ca' Pedro),

Andrés, (bóchë'ë Simón na'),

Jacobo, (zxí'inë' Zebedeo),

Juan, (bóchë'ë Jacobo na'),

<sup>3</sup> Felipe, Bartolomé, Tomás,

Mateo, (bönni' uquízxaj),

Jacobo, (zxí'inë' Alfeo),

Lebeo, (lë' ca' Tadeo),

<sup>4</sup> Simón, (bönni' rui'i ládxë'ë yödzö queë'),

Judas Iscariote, (bönni' udödë' Jesús lu ná'agaquië' bönni' ilútië' Lë').

*Jesús risól-lé'ë gubáz queë' tsójéngaquië' libán  
(Mr. 6:7-13; Lc. 9:1-6)*

<sup>5</sup> Ní'irö Jesús gusól-lé'ë idxínnutë' bönni' ni tsójéngaquië' libán, ate' gunná bé'enë' légaquië', rnnë':

—Biti' tséajli' ga nacuá' bönachi biti' nácagaca judío, en biti' tsú'uli' ládzagaca bönachi nacuá' luyú Samaria. <sup>6</sup> Guli'tséaj ga nacuá' bönachi Israel, nácagaquië' ca bö'cu' zxila'do' nanítigacaba'. <sup>7</sup> Guli'tsójén libán, innali': "Chibidxín gala' dza Dios, Nu na' zoa yehua' yubá, inná bë'ë luyú ni." <sup>8</sup> Buli'ún nupa te'e. Buli'ún dxi'a nupa te'e huë' nudzu' ruzödi. Buli'subán nupa chinátigaca. Buli'béaj bö' xihui' yú'ugaca bönachi. Bénnasa' queéli' yöl-la' unná bë' ni. Buli'gún dxin le, en biti' bi uquízxjali'.

<sup>9</sup> 'Biti' bi guá'ali' lu buzudi queéli', caléga dumí oro, en caléga dumí plata, en caléga dumí lárido'. <sup>10</sup> Biti' guá'ali' yoxaj yöta queéli' le gáguli' la' nöza. Tuz lari' ixóa yenli', en biti' guá'ali' xiráchuli' o xiyyaga queéli', tu' idzöli quézinë' bönni' huen dxin le gahuë'.

<sup>11</sup> 'Gáti'tés yödzö zxön o yödzödo' ga idxinli', guli'naba nuzxi naca idú ladxi' lu yödzö ni', ate' ugá'anali' lidxi nu na' cate' gála'rö dza urúajli' yödzö na'. <sup>12</sup> Cate' tsú'uli' tu lu yu'u, buli'gapa Dios bönachi nacuá' lu yu'u na', inábili'-në' Dios unödzje' quégaquië' le cuéqui dxi icja láxi'do'gaquië'. <sup>13</sup> Channö bönachi nacuá' lu yu'u ni' nácagaca lesaca', ugá'analen le ribequi dxi ladxi' na' léguequi, pero channö bönachi na' cabí nácagaca lesaca', inábali' cabí ugá'ana lë na' ribequi dxi ladxi' len léguequi. <sup>14</sup> Gáti'tés ga idxinli' ga bönachi ni' biti' ilún libi'il'i bal, en biti' ulu'zé nagui xtídzi'li', buli'rúaj lu yu'u ni' o yödzö ni', ate' guli'cuibi bëchtöd da' lë'e lábalí', le ulu'i léguequi nabága'gaca xíguia'. <sup>15</sup> Le nácatë rea' libi'il'i, cate' idxín dza ichúguië' Dios quégaca bönachi, ila'gui'i ila'záca'rö bönachi yödzö na' ca ila'gui'i ila'zaca' bönachi gula'cuá' yödzö Sodoma, en yödzö Gomorra, nupa ni' busunítië' Dios.

*Nupa biti' ta'yéajlé' ulu'saca' zi' nupa dá'gaca Cristo*

<sup>16</sup> Gunné' ca' Jesús:

—Buli'yútsöca', neda' risól-la'a libi'il'i, ate' gácali' ca bö'cu' zxila'do' ta'daba' ga dzö'öba' bö'cu' guí'a sínia'. Guli'gaca sina' ca nácagacaba' sına' bëla sínia', pero guli'gaca ca' nöxañ ladxi' ca nácagacaba' gu'dödo'. <sup>17</sup> Guli'gún chi'i cuinli' quégaca bönachi, tu' ulu'dödë' libi'il'i lu ná'agaquië' bönni' yúlahui', en ila'guinë' libi'il'i gapa naca lu yu'u ga tu'dubë' tu'sedë' bönni' judío queë' Dios. <sup>18</sup> Lësca' caní, ila'ché'e libi'il'i lógaquië' bönni' lo, en lógaquië' bönni' ta'nná bë'ë, tu' dä'ali' neda'. Caní gaca para gaca gunli'ba nalí quia' lógaquië' bönni' ni', en lógaquië' bönni' biti' nácagaquië' judío. <sup>19</sup> Ní'irö cate' ulu'dödë' libi'il'i lu ná'agaquië' bönni' unná bë' na', biti' cö'öli' böniga nacxi innali', tu' ichizë' Dios icja láxi'do'oli' didza' gü'i'il'i, en ca innali' la' dza ná'asö. <sup>20</sup> Caléga libi'isili' na' innali', pero Dios Bö' Lá'ayi, Nu na' risól-lé'ë Xúziru' Dios queéli', Lë cazë' sóalene' libi'il'i, en gu'é didza'.

<sup>21</sup> 'Ila'cuá' bönachi ulu'dödi böhchi'guequi lu ná'agaquië' bönni' ilútië' légaquië', en lësca' caní, bönni' nácagaquië' xuz ulu'dödë' zxif'inigaquië', ate' ila'cu'abi' bi'i ila'dä'ba-ga'bi' xúzgacabi', en ilunbi' ga ilatië' xúzgacabi' na'. <sup>22</sup> Yúgu'të bönachi ulu'zóa libi'il'i tsölä'alo tu' dä'ali' neda', pero nu ugá'ana tsutsu ga idxinrö dza údxí, nu ni ulá. <sup>23</sup> Cate' ulu'saca' zi' bönachi libi'il'i tu lu yödzö, buli'zxunnaj ni', ate' tséajli' ia'tú yödzö, tu' rea' libi'il'i, huöda' neda', Bönni' Gulje' Bönachi, zi'alö cate' údxí gunli' libán gapa nacuá' yugu' yödzö quégaca bönachi Israel.

<sup>24</sup> 'Núti'tés bönni' náquië' bönni' usëda biti' nácarë' lo ca nu rusëdi lë', en lësca' caní, nu bönni' náquië' huen dxin biti' nácarë' lo ca xanë'. <sup>25</sup> Nu na' naca bönni' usëda ral-la' udzéjanë' channö huadéli'në' gáquië' ca naca nu rusëdi lë', ate' bönni' huen dxin na' ral-la' udzéjanë' channö gáquië' ca naca xanë'. Channö ta'nné' quia' neda', bönni' xan yu'u, ta'nné' naca' Belzebú tu' xihui', ila'nné zí'irë' quégaca bönachi tá'gaquië' neda'.

*Nu ral-la' gádxiru'*  
(Lc. 12:2-9)

<sup>26</sup> Gunné' ca' Jesú:

—Que lë ni na', biti' gádxili' bönachi. Hualá' lahui yúgu'té le raca bëdxi länd'o's, ate' huáca bë' yúgu'té le nagachi'. <sup>27</sup> Yugu' didza' ru'ilena' lib'ili' ga naca chul-la, guli'quixjö' ga naca lu bení', ate' le rea' lib'ili' ga nagachi', guli'nné zidzaj ga naca lahui' lógaca bönachi. <sup>28</sup> Biti' gádxili' nupa tuti le nácagaca caz bönachi, pero biti' gaca ulu'suniti bö' naca cázaru'. Guli'gadxi Dios, Bönni' na' gaca gútië' idútë le nácali', en chú'uné' bö' naca cázali' lu guí' gabilia.

<sup>29</sup> 'Ta'dá'uba' chónpaba' biguínnido' len tu dumí lárido', pero biti' ibíxiba' tuba' lu yu channö cabí ru'ë Xúziru' Dios lataj gaca caní. <sup>30</sup> Lësca' caní, nabábagaca yúgu'té guitsa' ícjali' lahuë' Dios. <sup>31</sup> Que lë ni na', biti' gádxili'. Ru'ítérö ládxë'ë Dios lib'ili' ca ru'i ládxë'ë-ba' zianba' biguínnido'.

*Yugu' bönni' ta'zí lu ná'agaquië' Cristo lógaca bönachi*  
(Lc. 12:8-9)

<sup>32</sup> Gunné' ca' Jesú:

—Nu bönni' si' lu në'ë neda' lógaca bönachi, neda' si' lu na'a bönni' na' lahuë' Xuza' zoë' yehua' yubá. <sup>33</sup> Bönni' ta'dá'baguë'ë lógaca bönachi, ila'nné' biti' ta'dé'ë neda', lësca' caní neda' tá'baga'a légaquië' lahuë' Xuza' zoë' yehua' yubá.

*Jesús náquië' le run ga ila'rúaj choplö bönachi*  
(Lc. 12:51-53; 14:26-27)

<sup>34</sup> Gunné' ca' Jesú:

—Biti' guéquili' za'a idigu'a le ribequi dxi bönachi yödzölió ni. Biti' za'a idigu'a le ribequi dxi, pero za'a idigu'a le gun ga ila'rúaj choplö bönachi. <sup>35</sup> Za'a ni, ate' guna' ga ila'dá'baga' bönachi xúzguequi, ate' yugu' nigula ila'dá'baga'nu ca' xiná'agacanu. Lësca' caní, yugu' nigula zxoa' lídxigacanu ila'dá'baga'nu xto' zxí'ininu. <sup>36</sup> Caní gaca, la' di'a dzasö quégaca bönachi ulu'saca' zí' luzé'eguequi.

<sup>37</sup> 'Nu nadxi'irö xuz xinë'e ca nadxi'i neda', biti' naca bachi nu na' ta' neda', ate' nu nadxi'irö bi'i bönni' que o bi'i nigula que ca nadxi'i neda', biti' naca bachi nu na' ta' neda'.

<sup>38</sup> Nu biti' si' lu në'ë gaca ca tu bönni' söjté'ë le'e yaga cruz, en ta' neda', biti' naca bachi guequi quia' neda'. <sup>39</sup> Nu ru'i ladxi' gun chi'i yöl-la' na'bán que, uniti le, pero nu uniti yöl-la' na'bán que tu' da' neda', ulá nu na'.

*Yugu' le ubi'ë Dios queéru'*  
(Mr. 9:41)

<sup>40</sup> Gunné' ca' Jesú:

—Nu gun lib'ili' bal, neda' ca' gun bal, ate' nu na' gun neda' bal, gun bal ca' Dios Xuz nasól-lë'ë neda'. <sup>41</sup> Nu gun bal tu bönni' ru'ë didza' uláz queë' Dios tu' ru'ë didza' uláz queë' Dios, huadeli' nu na' lu në'ë Dios la' leze na' idéli'në' bönni' ru'ë didza' uláz queë' Dios. Lësca' caní, nu gun bal tu bönni' tsahui' tu' náquië' bönni' tsahui', huadeli' nu na' lu në'ë Dios la' leze na' idéli'në' bönni' tsahui'. <sup>42</sup> Núti'tés nu unödzaj queë' tu bönni'do' ni tu zxibíndo'os nisa tu' náquië' bönni' usëda quia' neda', le nácatë rea' lib'ili', biti' uniti nu na' le ral-la' si' lu në'ë Dios.

*Ta'dxinë' bönni' nasól-lë'ë Juan ga zoë' Jesú*  
(Lc. 7:18-35)

<sup>1</sup> Cate' Jesú budxi buzéajni'inë' yugu' bönni' usëda queë', buzé'ë ni', sa'yéajë' röjsédinë' bönachi, en röjenë' libán yugu' lu ládzagaca bönachi na'.

<sup>2</sup> Juan, bönni' buquilë' bönachi nisa, ni' yu'ë lidxi guíë, ate' biyönnë' ca nácagaca le runë' Jesús. Ní'irö Juan na' gusöl-lë'ë chopë' bönni' dá'gaquië' lë', ate' bila'dxinë' ga na' zoë' Jesús. <sup>3</sup> Chopë' ni gula'nábinë' Jesús, të' Lé':

—¿Nacu' Li' Cristo, Bönni' na' ral-la' idxinë' yödzölio ni, o ral-la' köztu' dza idxinë' ia'tué' bönni'?

<sup>4</sup> Bubi'ë didza' Jesús, rë' légaquië':

—Guli'tséaj tsöjtíxjöi'ilí'-në' Juan lë ni riyonili', en rile'eli'. <sup>5</sup> Guli'tsöjödxë' ca raca, tu'lé'enë' bönni' guchul-la guiój lógaquië', ate' tu'zé'ë bönni' biti' guca ila'dé'. Nuhuöáaca-gaquië' bönni' gü'i quequinë' huë' nudzu' ruzödi, ate' ta'yönnë' bönni' gula' códzuë'. Nnita' nabángaquië' bönni' gulatië', ate' raca libán que didza' dxia' lógaca bönachi yechi'.

<sup>6</sup> Bica' ba nu bönni' biti' gáquië' chopa ládxë'ë, biti' ubéaj ládxë'ë neda'.

<sup>7</sup> Cate' yugu'bönni' na' dá'gaquië' Juan bulu'zé'ë söjhuójgaquië', ní'irö gusí lahuë' Jesús ruí'ilenë' bönachi nacuá' ni' didza' ca naca queë' Juan na'. Rë' légaquië':

—¿Bizxi gú'unili' ilé'eli' cate' ni' guyéajli' lu lataj cá'asö? ¿Naru' gú'unili' ilé'eli'-në' tu bönni' náquië' ca tu gui ruzeçaj bô' recja le? <sup>8</sup> Channö cabí, ¿bizxi gú'unili' ilé'eli'? ¿Naru' gú'unili' ilé'eli'-në' tu bönni' nácuë' lari' dxia'ado'? Nöz quézili' bönni' nácugaquië' lari' dxia'ado' nacu'ë lídxigaquië' bönni' ta'nná bë'ë. <sup>9</sup> Channö cabí, ¿bizxi gú'unili' ilé'eli'? ¿Naru' gú'unili' ilé'eli'-në' tu bönni' ru'ë didza' uláz queë' Dios? Ca' naca, réquida'. Rea' lib'ili', bilé'eli'-në' tu bönni' nácatérë' lo ca ia'zíca'rë' bönni' gulu'ë didza' uláz queë' Dios. <sup>10</sup> Caní naca, tu' náquië' Juan bönni' na' ruí'i didza' le nazúaj lu guichi lá'ayi ca naca queë', le rnna:

Buyú, risól-la'a bönni' gubáz quia', inóruë' ca Li'.

Lë' upé'ë nöza ga tödu'.

<sup>11</sup> Le nácatë rea' lib'ili'. Idútë yödzölio ni, cuntu nu zoa nácarö lo ca Juan, bönni' ni' buquilë' bönachi nisa, pero nu naca cuídido'os ga rinná bë' Nu na' zoa yehua' yubá nácatérö lo ca Juan na'.

<sup>12</sup> 'Cate' ni' gusí lahuë' buquilë' Juan bönachi nisa, ga ridxitë na'a dza, bayudxi túngaca bönachi para ta'yaza ga rinná bë'ë Bönni' na' zoë' yehua' yubá, ate' nupa tunsö bayudxi ta'deli' le. <sup>13</sup> Ga bidxitë dza na' blé'ë Juan, le rinná bë' xibá queë' Moisés, en le bulu'zúajë' lu guichi yúgu'te bönni' gulu'ë didza' uláz queë' Dios gulu'i didza' ca rinná bë'ë Bönni' na' zoë' yehua' yubá. <sup>14</sup> Channö ré'ënili' si' lu ná'ali' lë ni, ral-la' inózili' Juan na' náquië' Elías, bönni' ni' bë'ë didza' uláz queë' Dios, bönni' na' Dios gunné' ral-la' ilá' lahuë' leyúbölö dza ni zóaru' na'a. <sup>15</sup> Nu zoa nagui, en riyöni ral-la' uzé' nagui.

<sup>16</sup> '¿Bizxi ubéqui'tseda' ca nácagaca bönachi nacuá' dza ni zóaru' na'a? Nácagaquië' ca yugu' bñ'ido' ta'bó'öbi' lu yé'ëyi. Zidzaj tu'lídzabi' luzá'agacabi', <sup>17</sup> ta'nnabi': "Rucödxitu' queéli' gui. ¿Bizz que biti' ruyá'ali'? Rul-la yéchi'tu' queéli'. ¿Bizz que biti' ribödxi yéchi'li'?" <sup>18</sup> Caní nácali', tu' bidé' Juan, ate' tu' cabí gü'i gudahuë' ca ráguli' lib'ili', gunneli' queë', gunnali': "Tu' xihui' dzágui lë'." <sup>19</sup> Ní'irö bidxina' neda', Bönni' Guljë' Bönachi, ate' re'aj rahua', ate' rnnéli' quia', rnnali': "Náquië' bönni' huágulë'ë, en bönni' re'jé'. Náquië' luzá'agaquië' bönni' uquízxaj, en ia'zíca'rö huen dul-la'." Yöl-la' réajni'i queë' Dios naca bë' ni'a que le tun nupa ta'zí' lu né'eguequi le.

*Le gaca que nu biti' run ca rnna xtídzë'ë Dios  
(Lc. 10:13-15)*

<sup>20</sup> Ní'irö gusí lahuë' Jesús ruzenë' bach bönachi nacuá' yugu' yödzö gapa ni' benë' zián yöl-la' huáca, tu' cabí tu'bíini ládxí'guequi. <sup>21</sup> Gudxë' léguequi:

—Bica' bayechi' lib'ili', bönachi Corazín. Bica' bayechi' lib'ili', bönachi Betsaida. La'tu' gulaca lu yödzö Tiro, en lu yödzö Sidón yugu' yöl-la' huáca bena' ga zóali', dza ní'télo ulu'bñ'i ládxí'gaca bönachi yödzö Tiro, en yödzö Sidón na', en ilácugaca lari' tébi, en ulu'dxía dö ícjaguequi, le ulu'lui'i tu'bñ'i ládxí'gaca bönachi na'. <sup>22</sup> Na'a, neda' rea' lib'ili', cate' idxín dza ichúguië' Dios quégaca bönachi, qui'i sáca'röli' lib'ili' ca ila'gu'i

ila'zaca' bönachi yödzö Tiro, en yödzö Sidón, nupa na' busunítié' Dios. <sup>23</sup> Libí'ili', bönachi Capernaum, guca queéli' ca bidxínteli' ga nu riyaza yehua' yubá. Huótjali' lu guí' gabilia. La'tu' gulaca yugu' yöl-la' huáca bena' ga zóali' lu yödzö Sodoma, ulú'gá'ana bönachi yödzö ni' ga ridxinté na'a dza. <sup>24</sup> Na'a, neda' rea' libí'ili', cate' idxín dza ichúguié' Dios quégaca bönachi, qui'i sáca'röli' libí'ili' ca ila'guí'i ila'zaca' bönachi Sodoma na'.

*Rnnë' Jesús: "Guli'dá ga zoa', uzi' ládxí'li"*  
(Lc. 10:21-22)

<sup>25</sup> Dza na' bë'ë didza' Jesús, rnnë':

—Xuza', nacu' Xani yehua' yubá, en Xani luyú ni. Rigu'a Li' yöl-la' ba, tu' bucáchu'u lë ni, para cabí ila'lé'ené' bönni' ta'yéajni'ide'ené' le, pero bului'nu' nupa nácagaca ca yugu' bñ'ido' le. <sup>26</sup> Ca' gaca, Xuza', tu' caní guyaza ládxu'u Li'. <sup>27</sup> Yúgu'té nudödë' Xuza' lu na'a. Cuntu nu nunbë' neda', Zxf'inë' Dios, pero tuzé' Dios Xuz, en cuntu nu nunbë' Dios Xuz, pero tuza' neda', Zxf'inë' Dios, enca' nupa na' ré'ënda' ulu'ida' léguequi Dios Xuz. <sup>28</sup> Guli'dá ga zoa' yúgu'téli' röjxéqui'li' tu' rúntica'sili' dxin que yöl-la' yudo', en nuá'ali' yua' zi'i quégaca xibá que, ate' neda' guna' ga uzi' ládxí'li'. <sup>29</sup> Lu yöl-la' nöxaj ladxi' queéli' guli'gún xichina', gácali' ca bëdxi ta'zí'iba' yugu' quégacaba'. Guli'sëda lu na'a neda', tu' naca' nöxaj ladxi', en do' ladxi', ate' idzöli' yöl-la' ruzí' ladxi' queéli', le cuéqui dxi ládxí'li'. <sup>30</sup> Yugu' na' ugu'a libí'ili', le naca le inná bë'eda' libí'ili', biti' naca böninga, ate' yua' ugu'a libí'ili' le naca le rusédida', dzá'do'os naca.

## 12

*Ta'lecjé' do bönni' usëda queé' Jesús dza lá'ayi*  
(Mr. 2:23-28; Lc. 6:1-5)

<sup>1</sup> Dza ni', le naca dza lá'ayi quégacié' bönni' judío, gudödë' Jesús gapa dë yöla zxoa' xtila, ate' ta'duné' bönni' usëda queé', en gusí lógaquié' ta'lecjé' do ga dxía zxoa' xtila, en tahué' zxoa' xtila na'. <sup>2</sup> Cate' bila'lé'ené' bönni' yudo' fariseo lë ni, té' Jesús:

—Buyútsöca', tunë' bönni' usëda quiu' le cabí ral-la' gunru' dza lá'ayi.

<sup>3</sup> Ní'irö Jesús gudxé' légaquié':

—¿Naru' cabí nulábanili' lu guichi lá'ayi bi benë' David cate' guduné', ate' gula'dún ca' nupa gula'cuá'len lë'? <sup>4</sup> Guyu'ë lu yu'u queé' Dios, en gudahué' yugu' yöta xtila nagú'ugaquié' lu bucugu lá'ayi, le cabí ral-la' gahuë' lë', en biti' ral-la' ilahuë' bönni' gula'cuá'len lë', pero légaçsë' bixúz dë lataj ilahuë' le. <sup>5</sup> ¿Naru' cabí nulábanili' le rinná bë' xibá queé' Moisés ca tunë' bixúz yugu' dza lá'ayi? Tunë' dxin lò'a yudo' yugu' dza lá'ayi, en biti' ta'báguë' xíguia'. <sup>6</sup> Na'a, neda' rea' libí'ili', zoa' neda' ni, en naca' bönni' nácaré' lo ca yudo'. <sup>7</sup> Biti' réajni'ili' lë na' nazúaj lu guichi lá'ayi, le rnna: "Ré'ënda' huéchi' ládxí'li' luzá'ali', en caléga gútigacali'-ba' bö'ä' bëdrido' ruzégui'gacali'-ba' lu bucugu lá'ayi quia'." La'tu' réajni'ili' lë ni, biti' ichúguli' quégaca nupa biti' nabága'gaca xíguia'. <sup>8</sup> Ca' naca, tu' naca' neda', Bönni' Guljé' Bönachi, Xani dza lá'ayi.

*Jesús ruúnë' tu bönni' narequi' né'ë*  
(Mr. 3:1-6; Lc. 6:6-11)

<sup>9</sup> Ní'irö buzé'ë Jesús ni', ate' guyu'ë lu yu'u ga tu'dubé' bönni' judío, en tu'sëdë' queé' Dios. <sup>10</sup> Lu yu'u na' zoë' tu bönni' narequi' né'ë, ate' tu' té'ënné' bönni' judío unná bë' ila'dzöliné' bi ulu'zégu'ë Jesús didza', que lë ni na' gula'nábiné' Lë', ta'nné':

—¿Naru' dë lataj unru' nu re'e cate' naca dza lá'ayi?

<sup>11</sup> Bubi'ë didza' Jesús, ré' légaquié':

—Nu bönni' nútsë'ë ládjali', channö zóaba' tuba' bö'cu' zxila' queé', en channö ibíxiba' lu yero cate' naca dza lá'ayi, ¿naru' cabí tsöjxöné'-ba', en tsöjléajé'-ba'? <sup>12</sup> Nazáca'térë' tu bönni' ca tuba' bö'cu' zxila'. Que lë ni na', dë lataj gunru' le naca dxi'a quégaca bönachi cate' naca dza lá'ayi.

<sup>13</sup> Ní'irö Jesús gudxé' bönni' huë' na':

—Bulí no'o.  
 Cate' bulí nē'ë, la' böácatë dxí'a ca naca ia'tsölá'a nē'ë.  
<sup>14</sup> Ní'irö bulu'rúajë' bönni' yudo' fariseo na', ate' gulún xtídza'gaquië' para gaca ilútië' Jesús.

*Le gunné'* tu bönni' bë'ë didza' uláz queë' Dios ca ral-la' gaca queë' Jesús  
<sup>15</sup> Cate' réquibe'enë' Jesús lë ni, buzé'ë ni', ate' söjácalen bönachi zián Lë'. Jesús bunë' yúgu'të nupa te'e ladaj bönachi na', <sup>16</sup> en gunná bë'enë' léguequi biti' usiyönguequi bönachi Nu náquië'. <sup>17</sup> Caní gunné', para gaca lë na' gunné' Isaías, bönni' bë'ë didza' uláz queë' Dios, gunné':  
<sup>18</sup> Buli'yútsöca', Bönni' ni náquië' Huen Dxin quia', na' guró caza' neda' Lë'.  
 Nadxi'ida' Lë', en raza ládxa'a Lë'.  
 Ichiza' Lë' Bö' Lá'ayi.  
 Lë' usiyönnë' yúgu'të bönachi ca guna', uchi' a usöróo' quéguequi.  
<sup>19</sup> Cuntu nu tíl-lalenë' didza', en biti' ulidzë' zidzaj.  
 Cuntu nu yöni chi'ë ga naca zi'tu'.  
<sup>20</sup> Tu guído' zoa bö biti' quitsjë' le, ate' guí' chizóa ulu, biti' usúluë' le, cate' uzóarë' le naca tsahui' queë'.  
<sup>21</sup> Yúgu'të bönachi ilún löza Lë'.

*Ta'nné'* bönni' judío unná bë': "Dzaga Jesús tu' xihui"  
 (Mr. 3:19-30; Lc. 11:14-23; 12:10)  
<sup>22</sup> Ní'irö dujuá'gaquië' tu bönni' ga zoë' Jesús, nachul-la lahuë', en biti' raca gu'ë didza', tu' yu'u bö' xihui' lë', ate' Jesús bunë' bönni' na'. Caní guca, rilé'enë', en ru'ë didza' bönni' na' guchul-la lahuë', en biti' guca gu'ë didza'. <sup>23</sup> Que lë ni na' bulu'bani yúgu'të bönachi nacuá' ni', ta'nná:  
 —¿Naru' nácatsë' bönni' ni Zxí'ini Xi'sóë' David, Bönni' na' ral-la' guídë?

<sup>24</sup> Cate' bila'yönnë' bönni' yudo' fariseo lë ni, ta'zá' ládxë'ë, ta'nné': Bönni' ni rubéajë' yugu' bö' xihui' tu' dzaga Beelzebú tu' xihui', xángaca bö' xihui', Lë'.  
<sup>25</sup> Réquibe'enë' Jesús lë na' ta'zá' ládxí'gaquië', ate' rë' légaquië':

—Gáti'tës ga ta'nná bë' bönachi, channö bönachi ni' ila'rúaj choplö, en ila'díl-lalen luzé'eguequi, initi yöl-la' unná bë' quéguequi. Lësca' caní, channö ila'rúaj choplö bönnachi nacuá' tu yödzö o tu yu'u, en ila'dil-la, biti' gaca ila'día' bönnachi nacuá' yödzö na' o yu'u na'. <sup>26</sup> Lësca' caní, channö ubéaj Satanás tu' xihui' la' luzé'esö, ate' yugu' bö' xihui' na' ila'díl-lalen la' léguequisö, ¿naru' idía' yöl-la' unná bë' que tu' xihui'? <sup>27</sup> Rnnali' quia' rubéaja' yugu' bö' xihui' tu' dzaga Beelzebú tu' xihui' neda'. Channö runa' caní, ¿nuzzxi dzaga nupa dá'gaca libí'ili' cate' tu'béaj yugu' bö' xihui'? Que lë ni na' le túngaca caz naca bë' nachíxili'. <sup>28</sup> Na'a, channö neda' rubéaja' yugu' bö' xihui' tu' zóalen yöl-la' huáca queë' Dios Bö' Lá'ayi neda', le nácatë chibidxín le rinná bë'ë Dios ga zóali'.

<sup>29</sup> ¿Naru' huácatsö nu bönni' tsu'ë lidxë' bönni' nal-la, en cuéajé' yöl-la' tsahui' dzö'ö lidxë' channö cabí gúguë'ë bönni' nal-la na' zí'alö? Ní'irö gaca tsu'ë, en ulatjë' lidxë' bönni' nal-la na'.

<sup>30</sup> 'Nu biti' run neda' tsözxón, ridá'baga' neda', en nu biti' rutubi tsözxón len neda', rusilasi nu na'.

<sup>31</sup> 'Que lë ni na' rea' libí'ili', ca naca yúgu'të dul-la' tun bönnachi, en yugu' didza' xihui' ta'nná, uniti lahuë' Dios léguequi, pero nu bönni' inné' zi'ë queë' Dios Bö' Lá'ayi, biti' ca' uniti lahuë' Dios lë'. <sup>32</sup> Lësca' caní, nu bönni' inné' quia' neda', Bönni' Guljé' Bönachi, Dios uniti lahuë' lë', pero nu bönni' inné' queë' Dios Bö' Lá'ayi, biti' ca' uniti lahuë' Dios lë'. Biti' uniti lahuë' lë' dza ni zóaru' na'a, en biti' uniti lahuë' lë' dza si' za'.

*Le runru' naca bë' le nácaru'*  
(Mt. 7:15-20; Lc. 6:43-45)

<sup>33</sup> Gunné' ca' Jesús:

—Channö naca dxi'a tu yaga, cuía le naca dxi'a, pero channö naca cá'asö yaga na', cuía ca' le naca cá'asö. Caní naca, le ribía tu yaga naca bë' yaga na'. <sup>34</sup> Libí'ili' nácali' di'a dza quégacaba'bela sínia'. ¿Nacxi gaca güí'ili' dxi'a didza', channö cabí nácali' dxi'a? Ca naca le ta'zá' ládxi'gaca bönachi, lësca' caní tu'i didza'. <sup>35</sup> Tu bönni' tsahui' ru'ë didza' tsahui' tu' yu'u le naca tsahui' icja ládxi'da'ahuë', pero tu bönni' huiá' dö' ru'ë didza' biti' naca tsahui' tu' yu'u le cabí naca tsahui' icja ládxi'da'ahuë'. <sup>36</sup> Que lë ni na' rea' libí'ili', cate' idxín dza ichúguië' Dios quégaca bönachi, uchi'a usöröë' tu tu bönni' ca naca yúgu'të didza' gula'nnazë' ca'. <sup>37</sup> Ca naca didza' ru'u, uchi'a usöröë' li', ate' uruju' tsahui' o ibágu'u xíguia' ni'a que didza' na' bë'u.

*Ta'nábinë' Jesús gunë' le gaca bë' nu náquië'*

(Mr. 8:12; Lc. 11:29-32)

<sup>38</sup> Ni'irö bulu'bí'ë didza' yugu' bönni' yudo' fariseo, en yugu' bönni' yudo' tu'sédinë', en të' Jesús:

—Bönni' Usedi, ré'ënitu' ilé'etu' tu le gunu' le gaca bë' dë lu no'o yöl-la' unná bë'.

<sup>39</sup> Bubi'ë didza' Jesús, en ré' légaquie':

—Yugu' bönni' tuá' dö' ni, biti' zoa idú ládxi'do'gaquie', ta'nábinë' neda' guna' tu le gaca bë' nu naca'. Biti' bi le gaca bë' ila'lé'enë', pero le naca bë'sö na' ca guca queë' Jonás, bönni' bë'ë didza' uláz queë' Dios. <sup>40</sup> Ca na' guca queë' Jonás na', bugá'anë' lé'ëba' tu böla zxön idú tsonna dza tsonna yëla, lësca' caní gaca quia' neda', Bönni' Gulje' Bönachi, tsonna dza tsonna yëla ugá'ana' zxan yu. <sup>41</sup> Ila'yassë' bönni' gula'cu'ë yödzö Nínive dza ichúguië' Dios quégaca bönachi cate' uchi'a usöröë' bönachi nacuá' dza ni zóaru' na'a, ate' le gulunë' usubaga' bönachi ni xíguia' tu' bulu'bí' i ládxi'gaquie' bönni' Nínive na' cate' ni' busiyönnë' Jonás légaquie' xtídzë'ë Dios, ate' na'a zoa' ni neda', en nácatëra' lo ca Jonás na'. <sup>42</sup> Lësca' caní, nigula ni' gunná bë'enu yödzö dë saca' ga ridödi gubidza beo' ziaga chásanu dza ichúguië' Dios quégaca bönachi cate' uchi'a usöröë' bönachi nacuá' dza ni zóaru' na'a, ate' le bennu usubaga' légaquie' xíguia', tu' birúajnu nigula na' ga nácatëro' zi'tu' para yőninu didza' réajni'i bë'ë Salomón, ate' na'a zoa' ni neda', en nácatëra' lo ca Salomón na'.

*Cate' rüdxín tu bö' xihui' xilataj*

(Lc. 11:24-26)

<sup>43</sup> Gunné' ca' Jesús:

—Cate' rirúaj tu bö' xihui' yu'u bönni', ridá gapa nabidxi, riguilaj ga uzí' ladxi'. Channö cabí idzöli ga na' uzí' ladxi', <sup>44</sup> ni'irö inná: "Huöja' xilatja' ga ni' birúaja'." Cate' rüdxín ga ni' birúaj, tsöjxaca' bönni' na', náquië' ca tu yu'u nadachi', en nalúaj, en chinabá'a para nu tsöjsóa ni'. <sup>45</sup> Ni'irö tseaj, tsöjzxí' ia'gadxi bö' xihui' nácacatëro' xihui' ca le, ate' ila'yaza yúgu'të, en ila'cu'ë icja ládxi'da'ahuë' bönni' na', ate' ga údxi huayáli'térö ca gaca queë' bönni' na' ca guca queë' zí'alö. Lësca' caní gaca quégaca bönachi tuá' dö' ni.

*Xiné'ë Jesús, en yugu' bönni' bōchë'ë*

(Mr. 3:31-35; Lc. 8:19-21)

<sup>46</sup> Cate' ni' ruf'ilenë' Jesús bönachi didza' ni, xiné'ë, en yugu' bönni' bōchë'ë bila'dxinë' ni'. Gula'cu'ë ló'alö, en gulé'ëniguequinë' ilu'ilenë' Jesús didza'. <sup>47</sup> Ni'irö tu bönni' busiyönnë' Jesús, en ré' Lë':

—Buyútsöca', nacu'ë xinó'o, en yugu' bönni' bōchu'u ló'alö, en të'ënnë' ilu'ilenë' Li' didza'.

<sup>48</sup> Bubi'ë didza' Jesús, en ré' bönni' na' busiyönnë' Lë' caní, rnnë':

—¿Nózili' nuzxi caz xiná'a, en nupxi caz bönni' bōcha'a?

<sup>49</sup> Ni'irö bulí né'ë, en bulu'e yugu' bönni' usëda queë', en rnnë':

—Buli'yútsöca', bönni' ni nácagaquië' ca xiná' caza', en yugu' böchi' caza'. <sup>50</sup> Núti'tés nu run ca ré'ëni quézinë' Xuza' zoë' yehua' yubá, nu ni naca bi'i böchi' caza', en bi'i zan caza', en xiná' caza'.

## 13

*Rucúdzu'ë didza' Jesús ca naca queë' tu bönni' guz*  
*(Mr. 4:1-9; Lc. 8:4-8)*

<sup>1</sup> La' dza n'isö birúajé' Jesús niu' yu'u, ate' yöjchö'ë ra' nísado'. <sup>2</sup> Tu' bila'dxín bönachi zián ga zoë' Jesús, gurenë' tu lë'e bárcodo', en gurö'ë ni', ate' bönachi zián na' gula'cuá' luyú bidxi ra' nísado' na'. <sup>3</sup> Níirö Jesús bé'lénë' légaquië' didza', zián le busédinë' légaquië'. Bucúdzu'ë didza', rnnë':

—Buli'yútsöca', birúajé' tu bönni' guz, söjésie' xisedo'. <sup>4</sup> Tsanni ni' söjésie', bal-la xisedo' na' gulasi ra' nøza, ate' bila'dxinba' biguínnido', en gulé'ajba' xisedo' na'. <sup>5</sup> Gulasi ia'zíca'rö xisedo' na' luyú ga rö'ö guiój, ga na' rö'ö láti'sö yu, ate' la' gula'lentë, tu' cabí rö'öda' yu ni'. <sup>6</sup> Níirö cate' budzá'a gubidza, lë na' bësië' la' gula'cuáditë, en gula'bidxi, tu' cabí dë ga ilún luí. <sup>7</sup> Gula'lén ia'zíca'rö xisedo' na' ga bulu'lén lubá yötsi', ate' gula'zxón lubá yötsi' na', en bila'röli lë na' bësië', en gulún ditaj le. <sup>8</sup> Gulasi ia'zíca'rö xisedo' na' ga naca luyú bëbu, ate' bulu'nödzaj. Bal-la lë na' bësië' bulu'nödzaj ia'tú gayuá'térö ca'. Ia'zíca'rö bulu'nödzaj ia'tsónnalalaj ca', ate' ia'zíca'rö bulu'nödzaj ia'chí uruá' ca'. <sup>9</sup> Nu zoa nagui, en riyöni, ral-la' uzé nagui.

*Le té'ëni ilún le bucúdzu'ë Jesús didza'*  
*(Mr. 4:10-12; Lc. 8:9-10)*

<sup>10</sup> Níirö bila'dxinë' bönni' usëda queë' Jesús ga zoë', en gula'nábinë' Lë', ta'nnë':

—¿Bizx que ru'ílenu' bönachi didza' yugu' le rucúdzu'u didza'?

<sup>11</sup> Bubi'ë didza' Jesús, en rë' légaquië':

—Dios ru'ë libi'ili' lataj tséajni'ili' le nagachi' ca rinná bë'ë Lë' yehua' yubá, pero bönachi ni biti' té'ëni ila'yéajni'i. <sup>12</sup> Nu si' xtídzë'ë, Dios unödzjë' que ia'lati', ate' gáta'da'arö que, pero nu biti' si' le, la's dui le dë que udúa. <sup>13</sup> Que lë ni na' ruí'ilena' légaquië' didza' yugu' le rucúdzu'a didza', tu' tu'yúë' pero biti' ta'lé'enë'. Ta'yönnë' pero biti' tu'zé' nágagaquië', en biti' ta'yéajni'inë'. <sup>14</sup> Caní raca quégaquië' para gaca ca na' gunnë' Isaías, bönni' bë'ë didza' uláz queë' Dios, gunnë':

Le nácatë yónili' pero biti' tséajni'ili'.

Uyuli' iná'ali' pero biti' ilé'eli'.

<sup>15</sup> Caní raca tu' nazidi ládxí'do'gaca bönni' ni, en biti' bi riyaza icja nágagaquië'.

Nadzudi' guiój lógaquië', para cabí ila'lé'enë' len guiój lógaquië' na'.

Biti' ulu'zé' nágagaquië', en biti' ulu'zéajni'i ládxí'gaquië', en biti' ulu'huöáquië' quia' neda' para gaca una' légaquië'.

<sup>16</sup> 'Na'a, bica' ba libi'ili', tu' rilé'e guiój loli', en riyöni nágali'. <sup>17</sup> Le nácatë rea' libi'ili', zián bönni' gulu'ë didza' uláz queë' Dios en yugu' bönni' tsahui' gulé'ënnë' ila'lé'enë' le rilé'eli' libi'ili' pero biti' bila'lé'enë' le. Gulé'ënnë' ila'yönnë' le riyónili' libi'ili' pero biti' bila'yönnë' le.

*Riguíxjö'ë Jesús le bucúdzu'ë didza'*  
*(Mr. 4:13-20; Lc. 8:11-15)*

<sup>18</sup> Gunnë' ca' Jesús:

—Buli'zé nágali' ca naca le bucúdzu'a didza' que bönni' guz. <sup>19</sup> Núti'tés nu riyöni didza' ca rinná bë'ë Dios yehua' yubá, en biti' réajni'i le, raca que didza' riyöni nu na' ca guca que xisedo' na' gulasi ra' nöza. La' za'të tu' xihui', en rugúa didza' na' guyú'u icja ládxí'da'ahué' bönni' na'. <sup>20</sup> Xisedo' na' gulasi luyú ga rö'ö guiój rulu'i ca raca queë' bönni' riyönné' didza' na', en la' ruzëtë náguië' lu yöl-la' rudzeja queë', <sup>21</sup> pero ca na' biti' ridía' xisedo' na' tu' cabí dë ga gun luí, lëscá' caní raca queë' bönni' ni. Cate' idxín tu le usaca' zi' lë', ate' ila'bía ná'gaca bönnachi lë' tu' nazí' lu në'ë didza' na', la' gácatë chopa ládxé'ë. <sup>22</sup> Xisedo' na' gulasi ga na' bulu'lén lubá yötsi' rulu'i ca raca queë' bönni' na' riyönné' didza' na', pero ruí'i ládxé'ë yugu' le dë yödzölió ni, ate' nazí' yë'ë bönni' na', tu' ruí'i ládxé'ë yugu' yöl-la' tsahui' que. Yugu' lë ni ta'röli didza' na', en tun ga biti' gun dxin lu icja ládxí'da'ahué'. <sup>23</sup> Xisedo' na' gulasi luyú bëbu rulu'i ca raca queë' bönni' riyönné' didza' na', en réajni'inë' le, ate' run dxin didza' na' lu icja ládxí'da'ahué'. Nácagaca bal-la bönnachi ca xisedo' na' bulu'nödzaj ia'tú gayuá'térö ca'. Nácagaca ia'zíca'rö bönnachi ca xisedo' na' bulu'nödzaj ia'tsónnalalaj ca', ate' nácagaca ia'zíca'rö bönnachi ca xisedo' na' bulu'nödzaj ia'chí uruá' ca'.

### *Tu guíxi'do' cané le nalá' ca rilá' yöla zxoa' xtila*

<sup>24</sup> Ia'tú le bucúdzu'ë didza' Jesús, ate' rë' légaquië':

—Ca gaca cate idxín ni le rinná bë'ë Dios yehua' yubá naca ca guca que xisedo' dxi'a le guzé' tu bönni' ga naca lu xiyúé'. <sup>25</sup> Tsanni na' tasië' bönni' nacu'ë lidxé', bidxín tu nu biti' rilé'e xan yu'u na' dxi'a, ate' yöjöza lu xiyúé' xisedo' guíxi'do' cané le nalá' ca naca yöla zxoa' xtila, ate' böaj xilataj. <sup>26</sup> Cate' gulén zxoa' xtila na', en gurö'ö do que, ga na' dxia xui'i, ní'irö gulaca bë' guíxi'do' cané na'. <sup>27</sup> Ní'irö bila'dxinë' bönni' huen dxin ga zoë' bönni' xan la' yëla na', en të' lë': "Xan, channö guzu' xisedo' dxi'a lu yu quiu', ¿nacxi guca gula'lén guíxi'do' cané na'?" <sup>28</sup> Xan yu na' gudxé' légaquië', rnnë': "Tu bönni' biti' rilé'enë' neda' dxi'a benë' caní." Ní'irö gula'nábinë' huen dxin queë' lë', ta'nné': "¿Ba ré'ënu' tséajtu' tsöjólajtu' guíxi'do' cané na'?" <sup>29</sup> Xángaquië' rë' légaquië': "¡Biti' ca! Nadx ca' cate' iládzu'li' guíxi'do' cané na', iládzu'lentëli' ca' yöla zxoa' xtila. <sup>30</sup> Gácarö dxi'a güi'ili' lataj ila'zxöngarö tsözxön cate' idxinrö dza tsöjtúbiru' le, ate' ní'irö guía' nupa ulu'tubi le: Buli'tubi zí'alö guíxi'do' cané na', en guli'guga' tsöjxili huéaj para uzégu'ru' le, ate' ní'irö utúbili' zxoa' xtila lu yu'u quia'."

### *Rucúdzu'ë didza' Jesús ca naca que xisé mostaza*

(Mr. 4:30-32; Lc. 13:18-19)

<sup>31</sup> Ia'tú le bucúdzu'ë didza' Jesús, ate' rë' légaquië':

—Ca gaca ga idxín le rinná bë'ë Dios yehua' yubá, gaca ca raca que tu xisé mostaza, le guzé' tu bönni' ga naca lu xiyúé'. <sup>32</sup> Le nácatë xisé mostaza na' nácatérö cuidi' ca yúgu'të xisedo' ia'zíca'rö, pero cate' chinadúz, rizxöntérö ca yúgu'të guixi' cuan, en rizxön ca naca tu yaga, ate' ta'dxinba' biguúnnido', en tunba' xicá' agacaba' lu ni'a né'e.

### *Rucúdzu'ë didza' Jesús que cúa zi que yöta xtila*

(Lc. 13:20-21)

<sup>33</sup> Ia'tú le bucúdzu'ë didza' Jesús, ate' rë' légaquië':

—Ca gaca ga idxín le rinná bë'ë Dios yehua' yubá gaca ca le run cúa zi que yöta xtila, le buchíxinu tu nigula len tsonna libixi yöja zxoa' xtila, ate' guyazxa idútë cúa na'.

### *Le rë'ëni gun le rucúdzu'ë didza' Jesús*

(Mr. 4:33-34)

<sup>34</sup> Yúgu'të lë ni bucúdzu'ë didza' Jesús, le bë'lenë' bönnachi nacuá' ni' didza', en biti' bi didza' bë'lenë' légaquië' le cabí bucúdzu'ë didza'. <sup>35</sup> Caní benë' para gaca lë na' buzúaje' lu guichi tu bönni' bë'ë didza' uláz queë' Dios, gunné':

Gu'a didza' yugu' le ucúdzu'a didza'.

Innía' yugu' le nagachi' cate' ni' gusí lo si' guta' yödzölió.

*Riguíxjö'ë Jesús le bucúdzu'ë didza' que guíxi'do' cané*

<sup>36</sup> Ní'irö buzenë' Jesús bönachi nacuá' ni' didza', en gusól-lë'ë légaquië', ate' guyu'ë yu'u. Ní'irö bila'dxiné' bönni' usëda queë' ga zoë', en té' Lë':

—Gudíxjö'i netu' le ré'ëni inná lë na' bucúdzu'u didza' que guíxi'do' cané le nalá' ca naca yöla zxoa' xtila.

<sup>37</sup> Bubi'ë didza' Jesús, ate' ré'ë légaquië':

—Bönni' razé' xisedo' dxi'a naca' neda', Bönni' Guljë' Bönachi. <sup>38</sup> La' yëla na' naca yödzölió ni, ate' xisedo' dxi'a na' tu'lui'i ca nácagaca nupa nabábagaca ga rinná bë'ë Dios. Guíxi'do' cané na' le nalá' ca naca yöla zxoa' xtila tu'lui'i ca nácagaca nupa néquiguequi que tu' xihui'. <sup>39</sup> Nu na' biti' rilé'e dxi'a xan la' yëla na', en yöjöza guíxi'do' cané na', tu' xihui' caz naca. Dza ulu'tubé' na' rulu'i ca gaca dza údxi que yödzölió ni, ate' nupa na' tu'tubi nácagaca gubáz lá'ayi queë' Dios. <sup>40</sup> Ca na' guca, bulu'tubé' guíxi'do' cané na', en bulu'zégui'ë le lu guí', lësca' caní gaca cate' údxi que yödzölió ni. <sup>41</sup> Neda', Bönni' Guljë' Bönachi, isö'l-la'gaca'-në' gubáz lá'ayi quia', ate' ulu'béajé' ga rinná bë'ë Dios yúgu'të nupa tun ga tun dul-la' luzé'eguequi, enca' nupa tuá' dö'. <sup>42</sup> Yugu' gubáz lá'ayi na' ila'gu'ë bönni' tuá' dö' na' lu guí' gabilia. Ni' ila'bödxë', en ulu'tíl-la láyi'gaquië'. <sup>43</sup> Ní'irö ila'yëpi yösa bení' bönachi tsahui', en ilácagaquië' ca gubidza ga ni' rinná bë'ë Dios yehua' yubá. Nu zoa nagui, en riyöni ral-la' uzé nagui.

*Rucúdzu'ë didza' Jesús que tu yöl-la' tsahui' nagachi'*

<sup>44</sup> Lësca' caní bucúdzu'ë didza' Jesús, rnnë':

—Le rinná bë'ë Dios yehua' yubá naca ca tu yöl-la' tsahui' nagachi' tu la' yëla. Cate' bidzöliné' tu bönni' le, bucächë'ë le leyúbölö ga na' bigachi', ate' lu yöl-la' rudzeja queë' guyijë', yöjéti'ë yúgu'të le dë queë' ate' gú'uë' la' yëla na' para gata' yöl-la' tsahui' na' queë'.

*Rucúdzu'ë didza' Jesús que tu bugá le nazáca'da'*

<sup>45</sup> Gunné' ca' Jesús:

—Ca ral-la' së ládzi'li' le rinná bë'ë Dios yehua' yubá naca ca benë' tu bönni' rá'uë', en ruúti'ë, en riguilty'ë bugá nazáca'gaca. <sup>46</sup> Cate' bidzöliné' tu bugá le nazáca'da', guyijë', yöjéti'ë yúgu'të le dë queë', ate' gú'uë' bugá na'.

*Rucúdzu'ë didza' Jesús que tu yöxa'böla*

<sup>47</sup> Lësca' caní gunné' Jesús:

—Ca gaca ga ridxín le rinná bë'ë Dios yehua' yubá, gaca ca run tu yöxa'böla le ta'chiljë' bönni' lu nísado', le rójxi' zián böla izá'a. <sup>48</sup> Cate' chibidzá' yöxa'böla' le luyú bidxi ra' nísado' na', ate' gula'bö'ë ni', en gula'gu'ë-ba' yugu' böla dxi'a tu lu ga'böra, pero gula'rú'unë'-ba' yugu' böla cá'asö. <sup>49</sup> Lësca' caní gaca cate' údxi que yödzölió ni. Ilá'rúajë' gubáz lá'ayi queë' Dios, ate' ulu'béajé' quez yugu' bönachi tsahui', ate' ulu'cuítie' légaquië' ladaj bönachi tuá' dö'.

<sup>50</sup> Ní'irö ila'gu'ë bönachi tuá' dö' na' lu guí' gabilia. Ni' ila'bödxë', en ulu'tíl-la láyë'ë.

*Yöl-la' tsahui' le naca gula, en le naca cubi*

<sup>51</sup> Ní'irö Jesús gunábinë' yugu' bönni' usëda queë', rnnë':

—¿Ba réajni'ili' yúgu'të lë ni?

Bulu'bí'ë didza', té' Lë':

—Ön, Xan.

<sup>52</sup> Jesús gudxë' légaquië':

—Cate' tu bönni' yudo' usedi chinazi' lu në'ë le rinná bë'ë Dios yehua' yubá, náquië' ca tu bönni' xan yu'u, rubéajé' ladaj yöl-la' tsahui' queë' le naca cubi, en le naca gula, le nácagaca tsahui' le ruzi'ë xibé.

*Le benë' Jesús lu yödzö Nazaret*

(Mr. 6:1-6; Lc. 4:16-30)

<sup>53</sup> Cate' budxi bucúdzu'ë Jesús yugu' didza' ni, buzé'ë ni'. <sup>54</sup> Cate' budxiné' ladzé', busédiné' bönachi nacuá' lu yu'u ga tu'dubé' bönni' judío, en tu'sédé' queë' Dios, ate' bulu'bániné', ta'nné':

—¿Gazxi caz guzéddé' bönni' ni yöl-la' réajni'i ni? ¿Nacxi caz naca, runé' yugu' yöl-la' huáca ni? <sup>55</sup> Náquië' bönni' ni zxí'iné' bönni' gubéddxi yaga, ate' xiné'ë lénú María. Náquië' bóchi'gaquië' Jacobo, en José, en Simón, en Judas. <sup>56</sup> Lésca' nigula zané' nacuá'lennu rë'u ni. ¿Gazxi caz guzéddé' yúgu'té lë ni?

<sup>57</sup> Que lë ni na' gulaca chopá ládxí'gaquië', ate' bulu'cá'ané' Lë'. Ní'irö Jesús gudxé' légaquië':

—Yúgu'té bönachi tun bal tu bönni' ru'ë didza' uláz queë' Dios, pero bönachi uládz queë', en bönachi nacuá' lidxé' biti' tun lë' bal.

<sup>58</sup> Que lë ni na' biti' bené' Jesús zián yöl-la' huáca ni', tu' cabí ta'yéajlë'ë Lë'.

## 14

### *Ca bétgaquie' Juan, bönni' buquilë' bönachi nisa*

(Mr. 6:14-29; Lc. 9:7-9)

<sup>1</sup> Lu dza ni', biyönné' Herodes, bönni' rinná bë'ë luyú Galilea, ca nácagaca yugu' yöl-la' huáca runé' Jesús. <sup>2</sup> Herodes na' gudxé' yugu' ni'a né'ë, rnné':

—Bönni' na' Juan, bönni' buquilë' bönachi nisa. Chibubanë' lu yöl-la' guti. Que lë ni na' dë lu né'ë yöl-la' huáca zxön na'.

<sup>3</sup> Caní gunné' Herodes tu' gusól-lë'ë lë cazé' bönni' gula'zöné' Juan, en gulúgui'ë lë' du guíë, ate' gula'gu'ë lë' lidxi guíë tu' gú'uninu Herodías iluné' caní. Herodías na' gúcanu nigula queë' Felipe, bóchë'ë Herodes na'. <sup>4</sup> Caní bené' Herodes, tu' gudxé' Juan na' lë': “Biti' ral-la' sóalenu'-nu.”

<sup>5</sup> Que lë ni na' gú'unné' Herodes gútië' Juan, pero gúdxiné' ila'dá'baga' bönachi lu yödzö ni' lë', tu' téquiguequi bönachi náquië' Juan na' tu bönni' ru'ë didza' uláz queë' Dios. <sup>6</sup> Ní'irö cate' guca laní que dza guyé'ené' iz Herodes, birúajbi' bi'i nigula queénu Herodías na', en buyá'abi' lógaca nupa nacuá' laní na', ate' guyaza ládxé'ë Herodes le benbi'. <sup>7</sup> Guzxi' lu né'ë Herodes, en bené' tsutsu xtídzé'ë unödzjë' queébi' bíti'tës bi inábibi' lë'. <sup>8</sup> Tu' chibusédinu-bi' zí'alö xiná'abi', gúdxibi' lë':

—Benna quia' na'a icjé' Juan, bönni' buquilë' bönachi nisa. Gulú'u le tu lu zxiga' zxön.

<sup>9</sup> Ní'irö buí'inné' Herodes, pero tu' chibené' tsutsu xtídzé'ë, en tu' bila'yöni nupa te'aj tágulen lë', que lë ni na' gunná bë'ené' nu tsöjnödzaj icjé' Juan na' queébi'. <sup>10</sup> Caní guca, gusól-lë'ë nu tsöjríxi yené' Juan ga ni' yu'ë lidxi guíë. <sup>11</sup> Bönni' na' nasól-lë'ë bu'ë icjé' Juan na', zxoa lu zxiga' zxön, ate' bunödzjë' le queébi' bi'i nigula na', ate' lëbi' buá'abi' le queénu xiná'abi'.

<sup>12</sup> Ní'irö bila'dxiné' bönni' gula'dé'ë Juan na', ate' bulu'ú'ë lë', en bulu'cáchë'ë lë'. Gudödi ni', yöjtíxjöi'iguequiné' Jesús ca gulaca lë ni.

### *Jesús rugahuë' ziánrö ca chi-un gayuá' bönachi*

(Mr. 6:30-44; Lc. 9:10-17; Jn. 6:1-14)

<sup>13</sup> Cate' réquibe'ené' Jesús lë ni, buzé'ë ni', ate' gurené' tu lë'e bárcodo', en sa'yéajé' la' queézé' tu lataj cá'asö. Cate' bila'yöni bönachi zéajé' ni', bila'rúaj yugu' yödzö ni', en yöjacá ga ni' idxiné' Jesús, ta'zë' e ní'aguequi. <sup>14</sup> Cate' burúajé' Jesús lë'e barco, bilé'ené' nacuá' bönachi zián ni', ate' buéchi' ládxé'ë léguequi, en buné' nupa te'e, nútsa'gaca ládjaguequi. <sup>15</sup> Cate' chiridzö' dza na', bila'dxiné' yugu' bönni' usëda queë' Jesús ga zoë', en té' Lë':

—Chiridzö' na'a, ate' cá'asö naca lataj ni. Busöl-la' bönachi ni para tsöjacá gapa dë yödzödo' para gá'ugaca bi ilagu.

<sup>16</sup> Ní'irö Jesús gudxé' légaquië':

—Biti' run bayudxi tsöjáquië'. Buli'nödzaj libí'ili' le ilahuë'.

**17** Ní'irö tē' Lë':

—Gáyu'sö yöta xtila dë, en chópasöba' böla dëba' queétu' ni.

**18** Jesús rë' légaquië:

—Buli'dödi le lu na'a.

**19** Ní'irö Jesús gunná bë'enë' böñachi na' ila'bö' ga yu'u daca'. Gudödi na' gudélë'ë gayu' yöta xtila na', en chópaba' böla na', ate' guchisa lahuë', ruyúë' zaca' yehua' yubá. Gudxë' Dios: "Xclenu'." Ní'irö buzxuzxjë' yöta xtila na', en budödë' le lu ná'agaquië' bönni' usëda queë', ate' légaquië' gula'guísië' le lögaca böñachi zián na'. **20** Gulahuë' yúgu'tëgaquië', en bulu'huöljanë'. Ní'irö bulu'tubë' yugu' bizxaj nagá'anagaca, en bulu'líë' chinnu ga'böra. **21** Bönni' ni' gulahuë' guláquië' idú chi-un gáyu'ë, pero cuntu nu bulaba yugu' nigula, en bï'ido'.

*Jesús rizë'e ni'ë lu nísado'*

(Mr. 6:45-52; Jn. 6:16-21)

**22** Ní'irö la' bentë' Jesús ga gula'benë' bönni' usëda queë' lë'e bárcodo', en tsójáquië', ila'nóruë' lahuë' Lë', para ila'dödë' ia'tsölá'a nísado' ni', tsanni na' uzenë' Lë' böñachi nacuá' ni' didza'. **23** Cate' chibusól-lë'ë Jesús böñachi na', gurenë' tu lu guí'ado' ga ni' yöjsóë' tuzë'. Ni' bulidzë' Dios. Cate' chigul-la, tuzë' zoë' ni'. **24** Bárcodo' ga na' nacu'ë bönni' usëda queë' ridödi gatsaj láhui'lö nísado' na', ate' riyasa bárcodo' na' tu' riyasa ridxía nísado' na', ate' ruzaga' bö' recja barco na'. **25** Gudödi guluhuëla, gubígui'ë Jesús gala' ga na' nacu'ë, rizë'e ni'ë lu nísado'. **26** Cate' yugu' bönni' usëda queë' bila'lé'enë' Lë', rizë'e ni'ë lu nísado', gula'bö'dé'ë böñiga tu' tádxinë'. Gula'bödxi'ë, ta'nné':

—Tu' ridasö na'.

**27** Ní'irö Jesús la' bulidzë' légaquië', rnnë':

—Buli'zxöni ládxí'li'. Neda' ni. Biti' gádxili'.

**28** Ní'irö bubí'ë didza' Pedro, rë' Jesús:

—Xan, channö nacu' Li', gunná bë'e neda' guída' ga na' zu' lu nisa.

**29** Jesús gudxë' lë':

—Gudá.

Ní'irö bötjë' Pedro lë'e bárcodo' na', en guzë'e ni'ë lu nísado', sa'yéajë' ga na' zoë' Jesús.

**30** Ní'irö cate' bilé'enë' Pedro ca bö' na' recja rutá nisa, gúdxinë'. Ní'irö gusí lahuë' rötje' lu nisa, ate' gurödxi'ë. Bulidzë' Jesús, rnnë':

—Xan, busölá neda'.

**31** Jesús la' bulitë né'ë. Buguélë'ë lë', en rë' lë':

—Láti'sö réajlë'u neda'. ¿Bizx que guca chopa ládxu'u?

**32** Cate' bulu'benë' lë'e bárcodo' na', gurö'ö dxi bö' na' recja. **33** Ní'irö bönni' nacu'ë lë'e bárcodo' na' gula'yéaj ládxí'gaquië' Jesús, ta'nné':

—Le nácatë, Zxí'inë' Dios nacu'.

*Jesús ruúnë' yugu' bönni' huë' nacu'ë yödzö Genesaret*

(Mr. 6:53-56)

**34** Cate' chigula'dödë' ia'tsölá'a nísado' na', la' bila'dxintë' lu xiyú yödzö Genesaret.

**35** Cate' bulu'únbe'ë bönni' yödzö ni' Jesús, gula'sól-lë'ë didza' idútë luyú ni', ate' dujuá'gaquië' yúgu'të nupa te'e ga na' zoë' Jesús. **36** Guláta'yuë' lahuë' Jesús gu'ë légaquië' lataj ila'gansë' ru'i lari' nácuë', ate' la' bulu'huöácatë yúgu'të nupa na' bila'gán lari' na'.

*Le tun ga biti' nácaru' tsahui' lahuë' Dios*

(Mr. 7:1-23)

**1** Ní'irö yugu' bönni' yudo' fariseo, en bönni' yudo' tu'sédinë', narúajgaquië' Jerusalén, bila'dxinë' ga zoë' Jesús, ate' të' Lë':

**2** —¿Bizx que tunë' bönni' usëda qui' le ridödi bë' ca naca le nulaga loru' runru' ca gulunë' xuz xtó'oru'? Biti' ta'guíbi né'ë ca naca que yudo' cate' si' ilahuë'.

<sup>3</sup> Bubi'ë didza' Jesús, en gunábinë' légaquië', rnnë':

—¿Bizx que libí'ili' ca' rucá'analí' cá'asö xibá queë' Dios para gunli' le nulaga loli' runli'?

<sup>4</sup> Caní raca, tu' gunná bë'enë' Dios libí'ili', gunnë': "Ben bal xuz xino'o", en gunnë' ca': "Nu inné'zi' que xuz xiné'e, tsaz gati nu na'." <sup>5</sup> Pero libí'ili' rmnali': "Channö nu guíë xuz xiné'e: Biti' bi gaca gunna' qui' tu' chiguzxi' lu na'a gunna' yúgu'të queë' Dios, <sup>6</sup> bíti'rö bi run bayudxi gun nu na' que xuz xiné'e." Caní runli', rucá'analí' cá'asö le gunná bë'ë Dios, para gunli' le nulaga loli' runli'. <sup>7</sup> Libí'ili', bönni' rulu'isö tsahui' cuinli', idú ca nácali' gudíxjö'ë Isaías, bönni' bë'ë didza' uláz queë' Dios, gunnë':

<sup>8</sup> Bönni' ni, len rú'agacsë' tunë' neda' bal, en caléga idú ládx'i'gaquië'.

<sup>9</sup> Nítisö naca le ta'yéaj ládx'i'gaquië' neda', tu' tu'sédinë' yugu' le gula'nná bë' bönnachi.

<sup>10</sup> Ni'irö bulidzë' Jesús bönnachi nacuá' ni', en rë' léguequi:

—Buli'zé nágali' le guía' libí'ili', en guli'tséajni'i. <sup>11</sup> Caléga le riyaza ru'ë nu bönni' run ga biti' náquië' tsahui' lahuë' Dios, pero le rirúaj ru'ë, lë ni run ga biti' náquië' tsahui' lahuë' Dios.

<sup>12</sup> Ni'irö yugu' bönni' usëda queë' Jesús gula'bígui'ë ga zoë', en të' Lë':

—¿Naru' nóztsenu' gula'lenë' yugu' bönni' yudo' fariseo cate' bila'yönnë' didza' ni bë'u?

<sup>13</sup> Ni'irö bubi'ë didza' Jesús, en rë' légaquië':

—Yúgu'të le nadúz, le cabí guzë' Xuza' zoë' yehua' yubá, huadúljagaca idú luí.

<sup>14</sup> Buli'cá'ana légaquië'. Chinachúl-la lógaquië', en ta'chë'ë nupa nachul-la lógaca. Channö tu bönni' lo chul-la iché'ë ia'tué' bönni' lo chul-la, iropë' ila'bixë' tu lu yeru.

<sup>15</sup> Ni'irö bubi'ë didza' Pedro, en rë' Jesús:

—Buzéajni'i netu' lë ni rucúdzu' u didza'.

<sup>16</sup> Jesús rë' légaquië':

—¿Naru' cabí réajni'itseli' ca' libí'ili'? <sup>17</sup> ¿Naru' cabí réajni'itseli' riyaza lë'ëru' yúgu'të le riyaza ruá'aru', ate' rurúaj lë'ëru'? <sup>18</sup> Na'a, le rirúaj rúa'ali', lu icja ládx'i'do'oli' za', ate' lë ni run ga biti' nácali' tsahui' lahuë' Dios. <sup>19</sup> Caní raca, tu' ta'lén lu icja ládx'i'do'oli' yugu' le rizá' ládx'i'li' le ruá' dö', le ilún ga gútili' bönnachi, en le ilún ga quítsjali' xibá que yöl-la' nutsaga na', en le ruá' dö' runli', en yugu' le rizé ládx'i'li' cuanli', en yugu' le rinnëli' que luzá'ali' le cabí nácate, en yugu' le rinné xíhui'li'. <sup>20</sup> Yugu' le caní tun ga biti' náquië' tu bönni' tsahui' lahuë' Dios, pero channö cabí nayari né'ë ca naca que yudo' cate' bi gahuë', biti' gun ga biti' náquië' tsahui' lahuë' Dios.

### Tu nigula izá'a réajlë'ënu Jesús

(Mr. 7:24-30)

<sup>21</sup> Ni'irö buzé'ë Jesús ni', en guyéajë' lu xiyú yödzö Tiro, en yödzö Sidón. <sup>22</sup> Tu nigula nabábanu luyú Canaán birúajnu yödzö ni', ate' bë'ënu zidzaj didza', rënu Jesús:

—Xan, zxí'ini xi'sóë' David, buéchi' ladxi' neda'. Bi'i nigúlado' quia' rigu'i rizáca'-da'abi' tu' yu'u bö' xihui' lëbi'.

<sup>23</sup> Biti' bi didza' bubi'ë Jesús. Ni'irö gula'bígui'ë bönni' usëda queë' ga zoë', ate' gulé' Lë', ta'nnë':

—Busó'l-la'-nu, tu' zá'anu cídzu'ru' ribódxí' anu.

<sup>24</sup> Ni'irö bubi'ë didza' Jesús, ate' rë'ë-nu:

—Dios nasó'l-lë'ë neda' gácalena' bönnachi Israel, nupa nácagaca ca bö'cu' zxíla'do' nanítigacaba'.

<sup>25</sup> Ni'irö gubíga'nu nigula na' ga zoë' Jesús, en guyéaj ládx'i'nu Lë', ate' rënu Lë':

—Xan, gúcalen neda'.

<sup>26</sup> Bubi'ë didza' Jesús, rnnë':

—Biti' naca dxí'a ugúaru' yöta quégacabi' bíido', en chú'unaru' le lógacaba' bö'cu'do'.

<sup>27</sup> Ní'irö nigula na' rënu Jesús, rnnanu:

—Ön, Xan, pero táguba' bő'cu'do' na' le bizxaj tu'huóxaj ga tagu xángacaba'.

<sup>28</sup> Ní'irö bubi'ë didza' Jesús, rnnnë:

—Nigúlado'. Idú naca ca réajlë'u neda'. Gaca quiu' ca ré'ënnu'.

La' ní'isö böácatëbi' bi'i nigúlado' queénu.

### *Jesús ruúnë' zián nupa te'e*

<sup>29</sup> Ní'irö buzé'ë Jesús ni', en gudödë' ga naca ra' nísado' que Galilea. Gurenë' tu lu gu'ado', ate' gurö'ë ni'. <sup>30</sup> Bönachi zián dujuá'gaquië' nupa biti' guca ila'zá', en nupa nachul-la guiój lógaca, en nupa biti' guca ila'nné, en nupa narugu ni'a né'eguequi, en ia'zíca'rö zián nupa te'e, ate' gula'guíxaj léguequi xini'ë Jesús, ate' Lë' bunë' léguequi. <sup>31</sup> Bulu'bani bönachi ni' ca naca le benë' Jesús, tu' bila'lé'e tu'nné nupa biti' guca ila'nné, ate' nuhuöácagaca nupa gurugu ni'a né'eguequi, ate' tu'zá' nupa biti' guca ila'zá', ate' tu'lé'e nupa guchul-la lógaca. Que lë ni na' gula'gu'ë yöl-la' ba Dios quégaca bönachi Israel.

### *Jesús rugahuë' ziánrö ca choá' gayuá' bönachi*

(Mr. 8:1-10)

<sup>32</sup> Ní'irö Jesús bulidzë' yugu' bönni' usëda queë', en rë' légaquië':

—Ruhuechi' ládexa'a bönachi zián ni, tu' chiguca tsonna dza zá'lenguequi neda', en biti' bi dë le ilagu. Biti' ré'ënda' usól-la'gaca'-në' tsöjhuóajgaquië' lídxigaquië' ta'dunsë' ca', nadxi ca' udú ládzi'gaquië' la' nöza.

<sup>33</sup> Ní'irö yugu' bönni' usëda queë' të' Lë', ta'nné':

—¿Gazxi caz idzólıtu' yöta xtila zián lu lataj cá'asö ni, le ugágutu' bönachi zián ni?

<sup>34</sup> Gunábinë' Jesús légaquië', rnnnë':

—¿Bal-laxi yöta xtila dë queéli?

Bulu'bi'ë didza', ta'nné':

—Gadxi, ate' nabábasöba' böla cuidi' dëba' queétu' ni.

<sup>35</sup> Ní'irö Jesús gunná bë'enë' bönachi zián na' ila'bö' lu yu. <sup>36</sup> Gudélë'ë gadxi yöta xtila na', en yugu' böla na', ate' gudxe' Dios: "Xclenu'." Ní'irö buzxuzxjë' iroptë na', en bunödzjë' quégaquië' bönni' usëda queë', ate' légaquië' gula'guísië' le lógaca bönachi zián na'. <sup>37</sup> Gulahuë' yúgu'të', en bulu'huóljane'. Gudödi ni' bulu'tubë' le bizxaj nagá'anagaca, ate' bulu'líë' gadxi ga'böra. <sup>38</sup> Yugu' bönni' na' gulahuë' nácagaquië' choá' gáyu'ë, pero cuntu nu bulaba yugu' nigula, en bñido'. <sup>39</sup> Ní'irö busöl-lë'ë Jesús bönachi na' tsöjhuóajgaquië' lídxigaquië', ate' gurenë' lë'e bárcodo' ni', en sa'yéajë' lu xiyú yödzö Magdala.

## 16

### *Ta'nábinë' Jesús gunë' tu le gaca bë' nuzxi náquië'*

(Mr. 8:11-13; Lc. 12:54-56)

<sup>1</sup> Ní'irö yugu' bönni' yudo' fariseo len yugu' bönni' yudo' saduceo bila'dxinë' ga zoë' Jesús para ila'zí' bë'ë Lë', ate' gula'nábinë' Lë' gunë' tu le gaca bë' ga za' yöl-la' unná bë' queë'. <sup>2</sup> Bubi'ë didza' Jesús, en rë' légaquië':

—Cate' ridzö', rnnali' caní: "Gun dxi'a cxuxó, tu' rö'ö böaj xiná lúzxiba." <sup>3</sup> Cate' naca zílado', rnnali' caní: "Biti' gun dxi'a na'a dza tu' rö'ö böaj xiná, en ruchul-la lúzxiba." Libí'ilí', bönni' rulu'isö tsahui' cuinli'. Raca inné ya'ali' naca gun lúzxiba, pero biti' gaca tséajni'ilí' le tu'sedi le taca dza ni zóaru' na'a. <sup>4</sup> Yugu' bönachi tuá' dö' ni, en biti' zoa idú ládzi'gaca ta'nábini neda' guna' tu le gaca bë' Nu naca', pero biti' bi le gaca bë' ila'lé'enë'. Ila'lé'esinë' lë na' guca bë' ca guca queë' Jonás, bönni' bë'ë didza' uláz queë' Dios.

Ní'irö Jesús bucá'anë' légaquië', söhuójë'.

*Le tu'sédinë' bönni' yudo' naca ca cúa zi que yöta xtila  
(Mr. 8:14-21)*

<sup>5</sup> Cate'bila'dxinë' ia'tsölá'a nísado' ni', guléquibe'enë' bönni' usëda queë' Jesús gulál-la ládxi'gaquië' ilu'ë le ilahuë'. <sup>6</sup> Ní'irö Jesús gudxë' légaquië':

—Buli'yútsöca'. Guli'gún chi'i cuinli' que le naca ca cúa zi que yöta xtila quégaquië' bönni' yudo' fariseo, en quégaquië' bönni' yudo' saduceo.

<sup>7</sup> Ní'irö la' légacasë' gulún xtídza'gaquië' bönni' usëda queë', ta'nné':

—Rnné' caní tu' cabí nuá'aru' yöta xtila.

<sup>8</sup> Réquibe'enë' Jesús lë ni, ate'rë' légaquië':

—¿Bizx que run xtídza'lí' la' lib'isili' tu' cabí nuá'ali' yöta xtila? Láti'do'os réajlë'ëli' neda'. <sup>9</sup> ¿Naru' cabí réajni'itseli', en biti' röjnëtseli' ca guca quégaca gayu' yöta xtila ni', lë na' gulahuë' chi-un gáyu'ë bönni', ate' tsca xö ga'böra butúbili'? <sup>10</sup> ¿Naru' cabí röjnëtseli' ca' ca guca quégaca gadxi yöta xtila ni', lë na' gulahuë' choá' gáyu'ë bönni', ate' tsca xö ga'böra butúbili'? <sup>11</sup> ¿Naru' cabí réajni'ili'? Biti' bë'a didza' que yöta xtila cate' gudxa' lib'ili' gun chi'i cuinli' que le naca ca cúa zi que yöta xtila quégaquië' bönni' yudo' fariseo, en quégaquië' bönni' yudo' saduceo.

<sup>12</sup> Ní'irö gula'yéajni'inë' biti' gudxë' Jesús légaquië' ilún chi'i cuíngaqüie' que cúa zi que yöta xtila, pero ral-la' ilún chi'i cuíngaqüie' que le tu'sédinë' yugu' bönni' yudo' fariseo, en yugu' bönni' yudo' saduceo.

*Pedro rnné' Jesús náquië' Cristo*

*(Mr. 8:27-30; Lc. 9:18-21)*

<sup>13</sup> Cate' bidxinë' Jesús lu xiyú yödzö Cesarea, ga na' rinná bë'ë Filipo, gunábinë' yugu' bönni' usëda queë', rnné':

—¿Bizxi ta'nná bönachi nu naca' neda', Bönni' Guljë' Bönachi?  
<sup>14</sup> Bulu'bi'ë didza', ta'nné':  
—Bal-lë' ta'nné': “Juan nacu', bönni' ni' buquilë' bönachi nisa.” Ia'zíca'rë' ta'nné': “Elías nacu', bönni' ni' bë'ë didza' uláz queë' Dios dza ni'te.” Ia'zíca'rë' ta'nné': “Jeremías nacu', o ia'tué' bönni' bë'ë didza' uláz queë' Dios.”

<sup>15</sup> Ní'irö Jesús gudxë' légaquië':

—Naru' lib'ili', ¿nuzxi rnnali' naca' neda'?

<sup>16</sup> Bubi'ë didza' Simón Pedro, en rë' Lë':

—Li' nacu' Cristo, Zxí'inë' Dios ban.

<sup>17</sup> Bubi'ë didza' Jesús, rë' lë':

—Bica' xibó' li', Simón, zxí'inë' Jonás, tu' cabí bulu'inië' nu bönni' li' lë ni. Xuza' zoë' yehua' yubá bulu'inië' li' lë ni. <sup>18</sup> Neda' rea' li', li' nacu' Pedro, ate' lu guiój ni ucuá'a nupa ulu'dubi quia', ate' yöl-la' unná bë' que tu' xihui' biti' sequi' uzaga' xinózgaquië'.

<sup>19</sup> Gunna' quiu' yugu' zxí'ini güié que lataj ga rinná bë' Nu zoa yehua' yubá. Le inná bë'u luyú ni, chigunná bë' ca' Nu na' zoa yehua' yubá, ate' le gu'u lataj gaca luyú ni, chibé' lataj gaca lë na' Nu na' zoa yehua' yubá ni'.

<sup>20</sup> Ní'irö Jesús gunná bë'enë' yugu' bönni' usëda queë' cuntu nu ilé'ë náquië' Lë' Cristo.

*Jesús riguíxjö'ë ca si' ilútië' Lë'*

*(Mr. 8:31-9:1; Lc. 9:22-27)*

<sup>21</sup> La' dza n'isö gusí lahuë' Jesús riguíxjö'iñë' yugu' bönni' usëda queë' run bayudxi tsejë' Jerusalén, ga ni' yugu' bixúz unná bë' en bönni' gula tu'zéajni'ñë', en bönni' yudo' tu'sédinë' ulu'saca' zi'ë Lë', ate' ní'irö ilútië' Lë', pero cate' gaca tsonna dza ubanë' lu yöl-la' guti. <sup>22</sup> Ní'irö Pedro guché'ë Jesús quez, en gusí lahuë' ridil-lë' Lë' didza', rnné':

—Xan, biti' gu'ë Dios lataj. Biti' ca' gaca quiu' ca rnno'.

<sup>23</sup> Ní'irö buécjë' Jesús, en rë' Pedro:

—Gucuita ga zoa'. Runu' ca run Satanás, tu' xihui'. Runu' ga gaca chopá ládxa'a tu' cabí naca le rizá' ládxu'u li' ca rizá' ládxë'ë Dios, pero ca ta'za'sö ládxi'gaca bönachi.

<sup>24</sup> Ní'irö Jesúś gudxë' yugu' bönni' usëda queë', rnnë':

—Channö zoë' tu bönni' ré'ënë' të'ë neda', ral-la' uzóë' tsölá'alö yugu' le ré'ëni quézinë', en gáquië' ca tu bönni' sa'yéajë' zeajté'ë lë'e yaga cruz, ate' ní'irö gaca të'ë neda'. <sup>25</sup> Nu bönni' gué'ënnë' gun chi'ë yöl-la' na'bán queë', unítië' le, pero bönni' unítië' yöl-la' na'bán queë' tu' dë'ë neda', gata' yöl-la' na'bán idú queë'. <sup>26</sup> ¿Naru' uzi'tsé' xibé tu bönni' channö utubë' yúgu'të le dë yödzölio ni pero unítië' yöl-la' na'bán idú queë'? Biti' bi gaca unödziejë' tu bönni' para gata' yöl-la' na'bán idú queë'. <sup>27</sup> Caní rnnía', tu' huöda' neda', Bönni' Guljë' Bönachi, en idzaga yöl-la' unná bë' queë' Xuza' Dios neda', ate' idzágagaquïë' gubáz lá'ayi quia' neda'. Ní'irö ubi'a que queë bönnachi tsca naca le núngraca. <sup>28</sup> Le nácatë rea' libí'ili': "Biti' ca' ilátigaca bal-la nupa nacuá' ni cate' ila'lé'erö idinná bë'a neda', Bönni' Guljë' Bönachi."

## 17

*Ridzá' ca nalá' lahuë' Jesúś  
(Mr. 9:2-13; Lc. 9:28-36)*

<sup>1</sup> Gudödi xopa dza, Jesúś gudélë'ë Pedro len Jacobo, en Juan, böchë'ë Jacobo na', en guché'ë légaquïë', ate' yójáquië' quez tu lu guí'a sibi. <sup>2</sup> Ni' bidzá' ca nalá' lahuë' Jesúś lógaquïë'. Guyépi yösa bení' lahuë' Jesúś ca ruzen' gubidza, ate' lari' nácuë' böáca chiguichido'os ca bení'. <sup>3</sup> Ní'irö bila'lé'enë' bönni' usëda queë' bulu'i lógaquïë' Moisés, en Elías, ate' tu'ilenë' Jesúś didza'. <sup>4</sup> Ní'irö Pedro rë' Jesúś:

—Xan, naca dxi'a zóaru' ni. Channö ré'ënu', guna' ni tsonna yu'u lága'do', tu quiu', ia'tú queë' Moisés, en ia'tú queë' Elías.

<sup>5</sup> Tsanni ni' ru'ë Pedro didza' ni, la' guró'ötë tu böaj bení' le guzxóa légaquïë', ate' lu böaj na' biyón chi'i nu rnna:

—Bönni' ni Zx'ini caza'. Nadxí'ida'-në', en raza ládx'a'a Lë'. Buli'zé nágali' didza' gu'ë.

<sup>6</sup> Cate' bila'yönnë' bönni' usëda queë' chi'i na', gula'dzö'ë gusurú'alö, en guladxi bila'dzöbinë'. <sup>7</sup> Ní'irö gubígui'ë Jesúś ga na' nacu'ë, ate' gudanë' légaquïë', rnnë':

—Guli'chasa. Biti' gádxili'.

<sup>8</sup> Cate' gula'chisa lógaquïë', en bulu'yúë', cúnturö nu bila'lé'enë', pero tuzë' Jesúś.

<sup>9</sup> Cate' ni' tu'dínnië' lu guí'a na', Jesúś gunná bë'enë' légaquïë', rnnë':

—Cuntu nu guiéli' ca guca lë ni bilé'eli' cate' ubanra' lu yöl-la' guti neda', Bönni' Guljë' Bönachi.

<sup>10</sup> Ní'irö yugu' bönni' usëda queë' gula'nábinë' Lë', ta'nnë':

—¿Bizz que ta'nnë' bönni' yudo' usëdi run bayudxi ulu'i lahuë' Elías zí'alö ca ulu'i lahuë' Cristo?

<sup>11</sup> Bubi'ë didza' Jesúś, rë' légaquïë':

—Le nácatë ulu'i lo cazé' zí'alö Elías, en ucá'anë' tsahui' yúgu'të. <sup>12</sup> Neda' rea' libí'ili': "Chibulu'i lahuë' Elías na', pero biti' bulu'únbe'ë lë', ate' yúgu'të ca rnrasö quégaquïë' gulunë' queë'." Lësca' caní ilunë' quia' neda', Bönni' Guljë' Bönachi, ulu'saca' zi'ë neda'.

<sup>13</sup> Ní'irö gula'yéajni'inë' bönni' usëda queë', bë'lenë' Jesúś légaquïë' didza' ca guca queë' Juan, bönni' na' buquilë' bönnachi nisa.

*Ruúnë'-bi' Jesúś tubi' bi'i bönni' ré'ebi' xjote'  
(Mr. 9:14-29; Lc. 9:37-43)*

<sup>14</sup> Cate' bila'dxinë' ga na' nacuá' bönnachi zián, gubígui'ë tu bönni' ga zoë' Jesúś, ate' buzúa zxibë' lahuë' Lë', <sup>15</sup> en rë' Lë':

—Xan, buéchi' ladxi'-bi' bi'i bönni'do' quia', tu' ré'ebi' xjote', en rigu'i rizáca'da'abi', ate' zián luzuí ridzö'öbi' lu guí' o lu nisa. <sup>16</sup> Chidiguá'a-bi' lógaquïë' bönni' usëda quiu' pero biti' guca ulu'únë'-bi'.

<sup>17</sup> Bubi'ë didza' Jesúś, rnnë':

—Libi’ili’, bönachi cabí réajlë’ëli’, en biti’ nácali’ tsahui’. ¿Gáca’xte caz ral-la’ sóalena’ libi’ili’ para tséajlë’ëli’ neda? ¿Gáca’xte caz ral-la’ guá’ ilena’ queéli? Guli’diguá’-bi’ quia’ ni.

<sup>18</sup> Ní’irö Jesúz buzenë’ le bach bö’ xihui’ na’ yu’u läbi’, ate’ la’ burúajtë läbi’, ate’ la’ ná’asö böácatëbi’ bi’i bönni’do’ na’.

<sup>19</sup> Ní’irö, yugu’ bönni’ usëda queé’ Jesúz gula’biguë’ë quez ga zoë’, ate’ gula’nábinë’ Lë’, ta’nné’:

—¿Bizz que na’ biti’ guca ubéajtu’ netu’ bö’ xihui’ na’?

<sup>20</sup> Jesúz rë’ légaquië’:

—Biti’ guzxéqui’li’ tu’ cabí réajlë’ëli’ Dios idú ládxil’i’. Le nácatë rea’ libi’ili’, sal-la’ cuídi’sö naca yöl-la’ réajlë’ queéli’ Dios, nácatë ca tu xisedo’ mostaza, huáca guiéli’ guíado’ ni: “Gucuita ni, en yöjsóa ní’ilö”, ate’ la’ icuítatë guíado’ na’. Biti’ bi zoa le cabí gaca gunli’ channö réajlë’ëli’ Dios idú ládxil’i’. <sup>21</sup>Tu bö’ xihui’ caní gácasö ubéajli’ channö ulídzali’-në’ Dios, en gunli’ gubasa.

### *Riguixjö’ë Jesúz leyúböö ca si’ ilútië’ Lë’*

(Mr. 9:30-32; Lc. 9:43-45)

<sup>22</sup> Tsanni ni’ ta’dé’ luyú Galilea, Jesúz gudxë’ yugu’ bönni’ usëda queé’, rnnë’:

—Zoa nu udödi neda’, Bönni’ Guljë’ Bönachi, lu ná’agaca bönachi. <sup>23</sup> Ilútië’ neda’, pero cate’ gaca tsonna dza Dios usubanë’ neda’.

Ní’irö bulu’hu’innë’ bönni’ usëda queé’.

### *Jesúz riguizxaj lazë’ que yudo’*

<sup>24</sup> Cate’ bulu’dxinë’ Jesúz, en yugu’ bönni’ usëda queé’ lu yödzö Capernaum, bila’dxinë’ yugu’ bönni’ tu’quizzxjë’ bönachi lázagaca que yudo’ ga zoë’ Pedro, ate’ të’ lë’:

—¿Naru’ cabí quizzxaj lazë’ que yudo’ bönni’ rusédinë’ libi’ili’?

<sup>25</sup> Bubi’ë didza’ Pedro, rnnë’:

—Ön, huaguizzxjë’.

Cate’ buázië’ Pedro lu yu’u, Jesúz la’ bulidztë’ lë’, en rë’ lë’:

—¿Nacxi rusaca’ quiu’, Simón? Bönni’ ta’nná bë’ë luyú ni, ¿nupxi tu’quizzxjë’ le riguizxaj laz, en lazzaj que yu? ¿Naru’ tu’quizzxjë’ bönachi uládz quégaquië’ o bönachi izá’a?

<sup>26</sup> Bubi’ë didza’ Pedro, rë’ Lë’:

—Bönachi izá’a tu’quizzxjë’.

Ní’irö Jesúz rë’ lë’:

—Que lë ni na’, biti’ run bayudxi quizzxaj laza’ que yudo’ tu’ naca’ Zxf’inië’ Dios ca na’ biti’ bi ta’guízxaj nupa nátagaca bönachi uládz queé’ bönni’ na’ ruquízxjë’. <sup>27</sup> Na’a, para cuntu nu gun leru’, guyéaj ra’ nísado’, yöjzalaj lu nisa le rizóninu’-ba’ böla, ate’ böla cueju’-ba’ z’alö, guzx’i-ba’. Cate’ isalju’ ruá’aba’, ni’ idzólinu’ tu dumí lásido’. Guzx’i le, ate’ gudizxaj laza’, en lazu’.

## 18

### *¿Núxxilö gaca lo?*

(Mr. 9:33-37; Lc. 9:46-48)

<sup>1</sup> La’ dza ní’isö bila’dxinë’ bönni’ usëda queé’ Jesúz ga zoë’, ate’ gula’nábinë’ Lë’, ta’nné’:

—¿Núxxilë’ bönni’ ni gáquië’ lo ga rinná bë’ë Dios yehua’ yubá?

<sup>2</sup> Bulidzë’-bi’ Jesúz tubi’ bi’i bönni’do’, ate’ buzóë’-bi’ gatsaj láhui’lö ga na’ nacu’ë.

<sup>3</sup> Ní’irö rë’ légaquië’:

—Le nácatë rea’ libi’ili’, channö cabí huöácali’ ca zeaj nácabi’ b’ido’, biti’ ca’ tsú’uli’ ga ni’ rinná bë’ë Dios yehua’ yubá. <sup>4</sup> Que lë ni na’, nútítës nu gaca nöökaj ladxi’, en huöáca ca nácabi’ b’ido’ ni, nu ni gaca lo ga ni’ rinná bë’ë Dios yehua’ yubá. <sup>5</sup> Nútítës nu gun bal tubi’ b’ido’ caní tu’ néquibi’ quia’, neda’ caz gun bal.

*Le tun ga nu gun dul-la'*  
(Mr. 9:42-48; Lc. 17:1-2)

<sup>6</sup> Gunné' ca' Jesús:

—Nu gun ga gunbi' dul-la' tubi' bñido' caní réajlë'ëbi' quia', gácarö dxi'a queë' bönni' na' la'tu' ugalë'ë guiój riyétuni yaga yenë', ate' tsöjsuladzu' cuinë' lu nísado'. <sup>7</sup> Bica' bayechi' bönnachi yödzölió ni tun ga gun dul-la' luzé'eguequi. Nacuá'tica'sö le tun ga nu gun dul-la', pero bica' bayechi' nu run ga nu gun dul-la'.

<sup>8</sup> 'Que lë ni na', channö gun no'o o ni'u ga gunu' dul-la', guchugu le, en gurú'una le. Gácarö dxi'a quiu' tsöjtsáziu' ga su' ibanu' biti' rizó'o o narugu ni'a no'o, en calëga nacuá' chopá no'o, en chopá ni'u ate' tsöjtsáziu' lu gu' gabilia le catu caz ulu. <sup>9</sup> Channö gun guiój lo' ga gunu' dul-la', guléaj le, en gurú'una le. Gácarö dxi'a quiu' tsöjtsáziu' ga su' ibanu', zoa tuz guiój lo', en calëga nacuá' chopá guiój lo', ate' tsöjtsáziu' lu gu' gabilia.

*Jesús rucúdzu'ë didza' que tu bö'cu' zxila' nanítiba'*  
(Lc. 15:3-7)

<sup>10</sup> Gunné' ca' Jesús:

—Guli'gún chi'i cuinli' para cabí uzóali'-bi' tsölá'alö tubi' bñido' caní. Neda' rea' lib'ili', gubáz lá'ayi tapa chi'ë léjacabi' nacuá'tica'së' lahuë' Xuza' zoë' yehua' yubá. <sup>11</sup> Bida' ni neda', Bönni' Guljë' Bönachi, para usölá' nu ni naniti.

<sup>12</sup> '¿Nacxi rusáca'li' queéli'? Tu bönni', nacuá'aba' tu gayuá' bö'cu' zxila' queë', channö nítiba' tuba', ¿naru' cabí ucá'ané'-ba' tápalalaj yu' chénnaba' na', ate' tsejë' gapa naca lu gu' a, para tsöjtiljë'-ba' bö'cu' zxila'do' na' nanítiba'? <sup>13</sup> Channö udzölinë'-ba', le nácaté rea' lib'ili', udzéjarönë' ni'a queéba' bö'cu' zxila'do' na' ca gunë' quégacaba' ia'tápalalaj yu' chénnaba' ni' biti' gula'nítiba'. <sup>14</sup> Lësca' caní, Xúziru' Dios, zoë' yehua' yubá, biti' ré'ené' nítibi' tubi' bñido' caní.

*Ca ral-la' uniti loru' böchi' luzá'aru'*  
(Lc. 17:3)

<sup>15</sup> Gunné' ca' Jesús:

—Channö böchi' luzó'o guá' dö' quiu', guyéajtsöca', en yöjcá'analenë' tsahui' la' lib'isili'. Channö uzé náguië' li', chibuguélu'u böchi' luzó'o. <sup>16</sup> Channö cabí uzé náguië' xtídu'u, guché'ë ia'túë' o ia'chopë' bönni' para urúaj li xtídu'u lógaquië' chopá tsonné' bönni', nupa gaca ilún ba nalí que xtíza'li'. <sup>17</sup> Channö cabí uzé náguië' xtíza'gaquië', gudxi ca' bönnachi tu'dubi tu'sedi queë' Dios, en channö cabí uzé náguië' xtíza'gaca bönnachi na', ní'irö bönni' na' gáquië' quiu' ca tu bönni' biti' réajlë'ë Dios, en ca tu bönni' ruquízxjë' uláz que yödzö zi'tu'.

<sup>18</sup> 'Le nácaté rea' lib'ili', yúgu'të le inná bë'ëli' lu yödzölió ni, naca le chigunná bë'ë Dios yehua' yubá, ate' yúgu'të le gü'ili' lataj lu yödzölió ni, naca le chibé'ë lataj Dios yehua' yubá.

<sup>19</sup> 'Lësca' caní rea' lib'ili', channö chópasili' gun tuz xtíza'li' lu yödzölió ni ca naca tu le inábili'-në' Dios, gunë' Xuz caza' Dios, zoë' yehua' yubá, lë na' rinábili'-në'. <sup>20</sup> Ga nacuá' chopá tsonna nupa ni nudúbigaca quia' neda', zoa caza' neda' gatsaj láhui'lö ga na' nacu'ë.

<sup>21</sup> Ní'irö gubígui'ë Pedro ga zoë' Jesús, en gunábinë' Lë', rnmë':

—Xan, ¿bál-laxitë luzuí ral-la' uniti lahua' böchi' luzá'a, nu na' ruá' dö' quia'? ¿Naru' gadxi luzuí?

<sup>22</sup> Jesús rë' lë':

—Neda' rea' li', calégasö gadxi luzuí, pero idú tsónnalalaj yu' chi cuía le naca gadxi luzuí.

*Jesús rucúdzu'ë didza' que tu bönni' huen dxin biti' buniti lahuë' luzé'ë*

<sup>23</sup> Gunné' ca' Jesús:

—Ia'stú, ca gun Nu na' rinná bë' yehua' yubá naca ca benë' tu bönni' rinná bë'ë. Gú'unne' ucá'analenë' tsahui' yugu' bönni' huen dxin queë'. <sup>24</sup> Cate' gusí lahuë' rucá'analenë' légaquië' tsahui', dujuá'gaquië' ga zoë' tu bönni' ral-lë'ë queë' zián gayuá' dumí. <sup>25</sup> Tu' cabí guca quizxjë', gunná bë'ë xanë' idó'ogaquië' lë', en nigula queë', en yugu' bi'i queë', en yúgu'të le dë queë', ate' ní'irö gazzaj le ral-lë'ë queë' xanë' na'. <sup>26</sup> Ní'irö bönni' huen dxin na' buzúa zxibë' lahuë' xanë', en gunábinë' lë', rnnë': "Xan, ben zxön ládxu'u neda'. Huaguizzaj caza' li' idutë." <sup>27</sup> Ní'irö xanë' na' buéchi' ládxë'ë bönni' huen dxin queë' na', en buniti lahuë' lë' lë na' ral-lë'ë queë', ate' busanë' lë'. <sup>28</sup> Cate' burúajé' bönni' huen dxin na', la' yöjtságatë' tu bönni' rúnlenë' lë' tsözxón dxin, ate' bönni' na' ral-lë'ë queë' láti'do'os dumí. Ní'irö guzxönë' lë', en guzxínnajë' yenë', ate' rë' lë': "Gudízxjatë lë na' ral-lu'u quia'." <sup>29</sup> Ní'irö luzé'ë na' buzúa zxibë' lahuë', en gunaba yeché'ë lahuë', rnnë': "Ben zxön ládxu'u neda'. Huaguizzaj caza' li' idutë." <sup>30</sup> Biti' gú'unne' bönni' huen dxin na', ate' yöjlu'ë lë' lidxi guíé dza quízxjarë' lë na' ral-lë'ë queë'. <sup>31</sup> Cate' bila'lé'enë' lë ni ia'zíca'rë' huen dxin, bulu'hui'inide'enë' ni'a queë', ate' yöjtixjöi'iguequinë' xángaquië' yúgu'të lë na' guca. <sup>32</sup> Ní'irö xángaquië' bulidzë' bönni' huen dxin na', ate' rë' lë': "Li', huen dxin catsahui'. Yúgu'të dumí na' gúl-lu'u quia' buniti lahua' li'. Busúlua' lë na' gúl-lu'u quia' tu' gunaba yechu'u lahua'. <sup>33</sup> ¿Naru' cabí ral-la' huéchi' ládxu'u ca' luzó'o ca na' bena' neda', buéchi' ládx'a a li'?" <sup>34</sup> Ní'irö guléde'enë' xanë', en budödë' lë' lu ná'agaca nupa ulu'saca' zi' lë' dza quízxjarë' idútë le ral-lë'ë queë'.

<sup>35</sup> Ní'irö rnnë' Jesús:

—Lësca' caní gunë' Xuza' zoë' yehua' yubá queéli' channö cabí uniti loli' idú ládx'i'li' yugu' böchi' luzá'ali'.

## 19

*Nupa tu'lá'a yöl-la' nutsaga na'  
(Mr. 10:1-12; Lc. 16:18)*

<sup>1</sup> Cate' budxi bë'ë Jesús yugu' didza' ni, buzé'ë luyú Galilea, ate' bidxinë' luyú Judea le dë ia'tsölá'a yegu Jordán saca' ga rilén gubidza. <sup>2</sup> Bönachi zián söjácalen Jesús, ate' bunë' léguequi ni'.

<sup>3</sup> Ní'irö bila'dxinë' bal-lë' bönni' yudo' fariseo ga zoë' Jesús para ila'zi' bë'ë Lë', ate' gula'nábinë' Lë', ta'nné':

—¿Naru' dë lataj bönni' nutsaga né'ë usanë' nigula queë' tu' nözi bíti'tës bi raca?

<sup>4</sup> Bubi'ë didza' Jesús, rë' légaquië':

—¿Naru' cabí nulábanili' le nazúaj lu guichi lá'ayi ca benë' Dios bönachi cate' si' benë' yödzölió? Bönni', en nigula benë' légaquië'. <sup>5</sup> Caní gunné' Dios: "Que lë ni na', ralla' usanë' tu bönni' xuz xiné'ë, ate' tsaz tsöjsóalenë'-nu nigula queë', ate' iropë' na' ulu'huóáquië' tuz bönachi." <sup>6</sup> Caní naca, bíti'rö nácagaquië' chopë' pero tuz bönachi chinuhuóáquië'. Que lë ni na', biti' ral-la' ulu'lë'ë bönni' nupa na' benë' Dios tuz.

<sup>7</sup> Ní'irö bönni' yudo' na' gula'nábinë' Jesús, ta'nné':

—¿Bizz que na' gunná bë'enë' Moisés légaquië' le ru'i lataj nu bönni' unödzjë' tu guichi queénu nigula queë' le rnna nulá'a yöl-la' nutsaga na', ate' usanë'-nu nigula queë' na'?

<sup>8</sup> Jesús rë' légaquië':

—Caní benë' Moisés tu' nazidi icja ládx'i'do'oli'. Bennë' libí'ili' lataj usanli'-nu nigula queéli', pero cate' gusí lo guta' gurö' ö yödzölió, biti' guca caní. <sup>9</sup> Neda' rea' libí'ili', channö tu bönni' usanë'-nu nigula queë', en biti' gudálennu bönni' yúbölö, ate' utsaga ná'alenë'-nu nigula yúbölö, gunë' dul-la' le riguitsaj xibá que yöl-la' nutsaga na'. Lësca' caní, channö nu bönni' utsaga ná'alenë'-nu nigula na', nusanë'-nu bönni' queénu, gunë' dul-la' le riguitsaj xibá que yöl-la' nutsaga na'.

<sup>10</sup> Ní'irö yugu' bönni' usëda queë' Jesús gulé' Lë', ta'nné':

—Channö caní naca queë' tu bönni' zóalenë'-nu nigula queë', gácarö dxi'a queë' la'tu' cabí utsaga caz né'ë, ugá'anë' tuzë'.

<sup>11</sup> Bubi'ë didza' Jesús, rë' légaquië':

—Biti' gaca ila'zí' lu ná'agaca yúgu'té bönnachi didza' ni, pero núpasö na' Dios ruzéa-jni'inë' léguequi. <sup>12</sup> Nacu'ë bönni' biti' tu'tsaga ná'alengaquië' nigula tu' cabí nácagaquië' idú bönni' biguiú', tu' gulalje' ca', ate' ia'zíca'rë' bönni' biti' tu'tsaga ná'alengaquië' nigula tu' bulu'zaga' bönnachi xinózgaquië', ate' ia'zíca'rë' bönni' biti' tu'tsaga ná'alengaquië' nigula para gaca ilunë' xichinë' Dios, Nu rinná bë' yehua' yubá. Nu sequi' si' lu né'e didza' ni ral-la' si' lu né'e le.

*Jesús rulidza tsáhuë'ë-bi' yugu' bï'ido'*

(Mr. 10:13-16; Lc. 18:15-17)

<sup>13</sup> Ní'irö yugu' xuz xiná'agacabi' bï'ido' dujuá'agaquië'-bi' ga zoë' Jesús para ixóa né'e légacabi', en ulidzë' Dios ni'a quégacabi', ate' bönni' usëda queë' bulu'zágui'ë xinózgaquië'. <sup>14</sup> Ní'irö Jesús rë' légaquië', rnnë':

—Guli'gü'i-bi' yugu' bï'ido' lataj ila'dxinbi' ga zoa', en biti' uzága'li' xinózgacabi', tu' ila'zí' lataj nupa nácagaca ca yugu' bï'ido' caní ga ni' rinná bë'ë Dios yehua' yubá.

<sup>15</sup> Jesús guxóa né'e légacabi', ate' ní'irö buzé'ë ni'.

*Tu bönni' unná bë' cuidi' dë yöl-la' tsahui' queë'*

(Mr. 10:17-31; Lc. 18:18-30)

<sup>16</sup> Tu bönni' ni zoë' iz cuidi' queë' buduyúë' Jesús, en rë' Lë':

—Bönni' Usedi idú tsahui'. ¿Bizxi le naca tsahui' ral-la' guna' para gata' yöl-la' na'bán idú quia'?

<sup>17</sup> Bubi'ë didza' Jesús, rë' lë':

—¿Naru' nőztsenu' lë na' rnno' quia', rnno' naca' idú tsahui'? Cuntu nu bönni' náquië' idú tsahui'. Tuzë' Dios náquië' idú tsahui'. Channö ré'ënu' gata' yöl-la' na'bán idú quiu', ben ca rinná bë' xibá queë' Dios.

<sup>18</sup> Ní'irö bönni' na' rë' Jesús, rnnë':

—¿Bízzilö xibá na'?

Jesús rë' lë':

—Xibá na' gunná bë'ë Moisés:

Biti' gútiu' bönnachi.

Biti' gunu' dul-la' le riguitsaj xibá que yöl-la' nutsaga na'.

Biti' cuanu'.

Biti' innio' que böchi' luzó'o le cabí nácate.

<sup>19</sup> Ben bal xuz xinó'o.

Bidxí'i böchi' luzó'o ca nadxí'i cuinu'.

<sup>20</sup> Bönni' na' ni zoë' iz cuidi' queë' gudxë' Jesús, rnnë':

—Yúgu'té lë ni runa' ga gudela' naca' bï'ido'. ¿Naru' zoa ia'tú le ral-la' guna'?

<sup>21</sup> Jesús rë' lë':

—Channö ré'ënu' gacu' tsahui', guyéaj, yøjëti' le dë quiu', ate' dumí na' si'u, bunödzaj quégaca bönnachi yechi'. Caní gata' yöl-la' tsahui' quiu' ni' yehua' yubá. Ní'irö gudá, gudá' neda'.

<sup>22</sup> Cate' bönni' na' ni zoë' iz cuidi' queë' biyönnë' didza' ni, söhuójë' ruhu'innë' tu' dëda' yöl-la' tsahui' queë'.

<sup>23</sup> Ní'irö Jesús gudxë' yugu' bönni' usëda queë', rnnë':

—Le nácatë rea' libí'ilí', bönniga naca tsázië' nu bönni' dë yöl-la' tsahui' queë' ga rinná bë'ë Dios yehua' yubá. <sup>24</sup> Ia'stú rea' libí'ilí', nácarö bönniga tsázië' tu bönni' dë yöl-la' tsahui' queë' ga ni' rinná bë'ë Dios ca tódiba' böa' lu nagui yötsi'.

<sup>25</sup> Cate' bila'yönnë' yugu' bönni' usëda queë' didza' ni, bulu'báninë, ta'nné':

—¿Nuzxi caz gaca ulá, channö?

<sup>26</sup> Jesús buyúé' légaquië', en rë' légaquië':

—Biti' gaca ilún bönachi lë ni, pero Dios huáca gunë' yúgu'të.

<sup>27</sup> Ní'irö bubi'ë didza' Pedro, en rë' Jesús:

—Buyútsöca', netu' chibucá'anatu' yúgu'të, en zá'lentu' Li'. ¿Bízxirö gata' queétu'?

<sup>28</sup> Jesús rë' légaquië':

—Le nácatë rea' lib'ili', dza ni' cate' ucubi yödzölió, ate' cö'a inná bë'a neda', Bönni' Guljë' Bönachi, ga ni' gácatéra' lo, lësca' lib'ili' zá'lenli' neda' na'a, cö'öli' chinna lataj ga inná bë'ëli', en uchi'a usöröli' quégaca idxinna cö'të yödzö quégaca zxí'ini xi'sóë' Israel. <sup>29</sup> Nu bönni' rucá'anë' lidxë', o yugu' böchë'ë, o yugu' zanë', o xuzë', o xiné'ë, o nigula queë', o yugu' zxí'inë', o yugu' xiyüë', para gunë' xichina', bönni' ni si'ë ia'tú gáyua'térö ca' queë', en gata' ca' yöl-la' na'bán idú queë'. <sup>30</sup> Zián nupa nácagaca lo na'a, ulu'gá'ana cá'asö, ate' nupa nagá'anagaca cá'asö na'a, hualácagaca lo.

## 20

### *Rucúdzu'ë didza' Jesús ca tunë' bönni' huen dxin*

<sup>1</sup> Gunné' ca' Jesús:

—Ca gun Bönni' na' rinná bë'ë yehua' yubá naca ca benë' tu bönni' xan yu'u. Birúajë' zílado', yöjdilje' yugu' bönni' ilunë' dxin ga naca lu xiyúë' ga na' nadúzgaca lubá uva.

<sup>2</sup> Cate' chibugá'analenë' tsahui' yugu' bönni' huen dxin na', quizxjë' légaquië' tu dumí lazxaj que tu dza, gusól-lë'ë légaquië' ilunë' dxin ga naca lu xiyúë'. <sup>3</sup> Cate' burúajë' idú xsila, bilé'enë' ia'zíca'rë' bönni' nacuá'asë' ca' ga naca lu yé'ëyi. <sup>4</sup> Rë' légaquië': "Guli'tséaj ca' lib'ili' ga naca lu xiyúa', ate' quizxja' lib'ili' le naca tsahui'." La'yójácatë'ca' légaquië'.

<sup>5</sup> Burúajë' bönni' xan yu'u na' leyúbölö idú huagubidza, enca' idú xihuõ' udzö', en la' tuz ca benë', gusól-lë'ë yugu' bönni' yöjxáquië' lu xiyúë'. <sup>6</sup> Burúajë' ca' cate' ni' zoa ia'láti'do'os gubidza, en yöjxáquië' ia'zíca'rë' bönni' nacuá'asë' ca' ni', ate' rë' légaquië':

"¿Bízx que zóatsali' ni cá'asö idú dza, biti' bi dxin runli'?" <sup>7</sup> Yugu' bönni' na'të' lë', ta'nné': "Cuntu nu benna xichintu'." Ní'irö rë' légaquië': "Guli'tséaj ca' lib'ili' ga naca lu xiyúa', ate' quizxja' lib'ili' le naca tsahui'." <sup>8</sup> Cate' chizóa gal-la, bönni' xan yu na' rë' bönni' yu'u lu në'ë yugu' huen dxin na', rnnë': "Bulidza yugu' bönni' huen dxin na', ate' gu'u lázxjagaquië'. Quizxju' zí'alö yugu' bönni' na' bila'dxinë' yöjetsetë. Udzi na' quizxju' yugu' bönni' na' bila'dxinë' zí'atëlö." <sup>9</sup> Ní'irö bila'dxinë' bönni' yöjéngäquië' dxin cate' ni' zoa ia'láti'do'os gubidza, en gula'zi'ë tu tuhuéajë' dumí lazxaj que tu dza. <sup>10</sup> Cate' bila'dxinë' bönni' yöjéngäquië' dxin zí'atëlö, guléquinë' huazí'gaquië' ia'lati', pero lësca' gula'zi'ë tu tuhuéajë' dumí lazxaj que tu dza. <sup>11</sup> Cate' gula'zi'ë le, gula'nnédë'ë queë' bönni' xan yu'u na', <sup>12</sup> ta'nné': "Yugu' bönni' ni bila'dxinë' ga yöjetsetë, tu chí'isö gulunë' dxin, en tuz ca gudízxjatso' légaquië' ca netu', ate' netu' ni bentu' dxin idú dza, en gúguida'atu' gubidza."

<sup>13</sup> Bubi'ë didza' xan yu na', en rë' tuë': "Bócha'a, biti' bi runa' quiu' le cabí naca tsahui'. ¿Naru' cabí bugá'ana tsáhui'ru' si'u tu dumí lazxaj que tu dza? <sup>14</sup> Guzxi' lazxju', en böaj lidxu'. Neda' ré'ënda' quizxja' bönni' ni yöjenë' dxin ga yöjetsetë la' leze ca na' riguizxja' li'. <sup>15</sup> ¿Naru' cabí dë lu na'a guna' ca ré'ënda' len le nequi quia'? ¿Naru' ruzxe'etsenu'në' luzó'o tu' rúnnada'a queë'?" <sup>16</sup> Caní naca, bal-lë' bönni', tu'cá'ana bönachi légaquië' cá'asö, ilácagaquië' lo, ate' ia'zíca'rë' bönni', nácagaquië' lo na'a, ulu'gá'anë' cá'asö. Zián nupa nulidza', pero nabábasö nupa narögaca.

### *Riguíxjö'ë Jesús leyúbölö ca si' ilútië' Lë'*

(Mr. 10:32-34; Lc. 18:31-34)

<sup>17</sup> Cate' ni' yu'ë Jesús nöza, sa'yéajë' Jerusalén, guché'ë quez idxínnutë' bönni' usëda queë', en rë' légaquië':

<sup>18</sup> —Buli'yútsöca', ribenru' zéajru' Jerusalén, ate' ni' soa nu udödi neda', Bönni' Guljë' Bönachi, lu ná'agaquië' bixúz unná bë', en lu ná'agaquië' bönni' yudo' usëdi, ate' ila'chúguië' quia' gátia'. <sup>19</sup> Ulu'dödë' neda' lu ná'agaquië' bönni' zi'tu' para ulu'titjë'

neda'. Ila'guinë' neda', en ulu'dé'ë neda' lë'e yaga cruz, pero cate' gaca tsonna dza, Dios usubanë' neda' lu yöl-la' guti.

*Le gunábanu xiná'agaquië' Jacobo, en Juan*  
(Mr. 10:35-45)

<sup>20</sup> Ni'irö bidxinnu xiná'agaquië' Jacobo, en Juan, yugu' zxí'inë' Zebedeo, ga zoë' Jesús, dzágagaquië'-nu chopë' ni, ate' buzúa zxíbinu lahuë' Jesús, en gunábinu Lë' tu le uzá' ládxë'ë queénu. <sup>21</sup> Jesús gunábinë'-nu, rnnë':

—¿Bizxi ré'ënu?

Rënu Lë':

—Gunná bë' cō'öbi' tubi' zxí'ina' ni cuita lë'u ibëla, en ia'tubi' cō'öbi' cuita lë'u yögöla ga ni' inná bë'u.

<sup>22</sup> Bubi'ë didza' Jesús, rë' légaquië':

—Biti' nözili' le rinábali'. ¿Naru' huáca guá' ilenli' le qui'i saca' neda', en idílali' nisa ca idila' neda' nisa, gátia'?

Të' Lë':

—Huácatu'.

<sup>23</sup> Ni'irö Jesús rë' légaquië':

—Le nácatë le ral-la' qui'i saca'a neda', gaca ca' queéli', en le ral-la' idila' neda' nisa, gátia', idílali' ca' nisa libíili', pero que cō'öli' cuita lë'a ibëla o cuita lë'a yögöla, biti' dë lu na'a nu gu'a que, pero gata' quégaca nupa ni' chinupé'ë Xuza' quéguequi.

<sup>24</sup> Cate' ia'chíe' bönni' usëda queé' Jesús bila'yönnë' lë ni, gula'lenë'. <sup>25</sup> Ni'irö Jesús bulidzë' légaquië', rnnë':

—Nözquézili' ca tunë' yugu' bönni' ta'nná bë'enë' bönachi izá'a, ridöditë bë' ta'nná bë'enë' légaquië', ate' nupa ni' nácagacarö lo ta'nná be'e la' luzé'eguequisö. <sup>26</sup> Biti' gaca caní queéli'. Núti'tëslöli' libíili' nu ré'ëni gaca zxön ga zóali', nu ni ral-la' gun dxin que ia'zíca'röli'. <sup>27</sup> Lësca' caní, núti'tëslöli' libíili' nu gué'ëni gaca lo, ral-la' gaca ca tu bönni' nadó'o que ia'zíca'röli'. <sup>28</sup> Lësca' neda', Bönni' Guljé' Bönachi, bida' ni, caléga para nu gun xichina', pero para guna' xichíngaca bönachi, en udöda' yöl-la' na'bán quia', le quízxjada' ni'a quégaca bönachi zián para ulu'lágaca.

*Ruúnë' Jesús chopë' bönni' nachul-la lógaquië'*  
(Mr. 10:46-52; Lc. 18:35-43)

<sup>29</sup> Cate' ni' tu'rúajë' yödzö Jericó, bönachi zián söjácalen Jesús. <sup>30</sup> Nacu'ë chopë' bönni' nachul-la lógaquië' ni', rö'gaquië' ra' nöza. Cate' bila'yönnë' ridödë' Jesús ni', gulu'ë zidzaj didza', ta'nné':

—Xan, zxí'ini xi'sóë' David, buéchi' ladxi' netu'.

<sup>31</sup> Bönachi zián nacuá' ni' gulé lógaquië' ila'cu'ë dxisö, pero zídzajrö gulu'ë didza', ta'nné':

—Xan, zxí'ini xi'sóë' David, buéchi' ladxi' netu'.

<sup>32</sup> Ni'irö guzé' ribözé' Jesús, en bulidzë' légaquië', ate' gunábinë' légaquië', rnnë':

—¿Bizxi ré'ënili' guna' queéli'?

<sup>33</sup> Të' Jesús:

—Xan, ré'ënitu' gunu' ga huöálaj guiój lotu'.

<sup>34</sup> Ni'irö Jesús buéchi' ládxë'ë lógaquië', ate' gudanë' guiój lógaquië'. La' böáljatëgaca guiój lógaquië', ate' yójácalenë' Jesús.

<sup>1</sup> Cate' bila'dxíngalë' yödzö Jerusalén, en ni' nacu'ë ga dë yödzö Betfagé ga na' zoa Gu' a Yaga Olivo, ni'irö gusöl-lë'ë Jesús chopë' bönni' usëda queë', <sup>2</sup> ate' rë' légaquië':

—Guli'tséajtsöca' yödzödo' ni' ca dódilö ga ni zóaru', ate' la' tsöjxáca'téli'-ba' tuba' burro guná' nágaba', ate' dzaga lëba' tuba' burro biguiú'do'. Guli'tsöjsedxi-ba', en iché'ëli'-ba' quia' ni. <sup>3</sup> Channö nu bi guíe libí'ili', guli'guíe nu na': "Xanru' riquinnë'-ba'." Ni'irö isö'l-lë'ë légacaba' quia'.

<sup>4</sup> Caní guca para gaca lë na' buzúajé' lu guichi bönni' bë'ë didza' uláz queë' Dios, gunnë':

<sup>5</sup> Guli'guíe nupa nacuá' yödzö Sión,  
Buli'yútsöca', zë'ë Bönni' inná bë'enë libí'ili'.  
Lu yöl-la' nöxaj ladxi' queë' dxíe'-ba' tuba' burro.  
Dxíe' cídzu'ba' búrrodo' nácaba' zxí'iniba' böa' ruá'aba' yua'.

<sup>6</sup> Ni'irö bönni' usëda queë' yójáquië' ni', ate' gulunë' ca na' gunná bë'enë' Jesús légaquië'. <sup>7</sup> Gula'ché'ë-ba' burro guná' na', en burro biguiú'do' na', ate' bulu'dxíe' cídzu'gacaba' yugu' lari' guitsa' quégäquië', ate' gudxíe' Jesús lahui' lari' na'. <sup>8</sup> Nacuá' ca' bönachi zián ni', ate' gula'chilaj yugu' lari' ta'xoa cídzu'guequi la' nöza. Ia'zíca'rë' bulu'chibë' zin le bulu'zxóë' ga naca la' nöza. <sup>9</sup> Gulu'i' zidzaj didza' bönachi na' nanörugaca, en nupa na' söjácalen Jesús, ta'nná:

—Yöl-la' ba Lë', zxí'ini xi'sóë' David! ¡Bica' ba nu ni za' ni'a que Lë' Xanru'! ¡Yöl-la' ba Dios!

<sup>10</sup> Cate' guyázië' Jesús yödzö Jerusalén, bulu'dzatsa yúgu'të bönachi lu yödzö na', ate' zián nupa gulé luzé'eguequi, ta'nná:

—¿Nuzxi caz bönni' ni?

<sup>11</sup> Ia'bal-la bönachi ni' ta'nná:

—Nu ni Jesús, bönni' ru'ë didza' uláz queë' Dios, ate' naca ladzë' Nazaret luyú Galilea.

### Jesús rulatje' lö'a yudo'

(Mr. 11:15-19; Lc. 19:45-48; Jn. 2:13-22)

<sup>12</sup> Cate' guyázië' Jesús lö'a yudo' queë' Dios, bulágui'ë ni'ilö yúgu'të nupa tuti' to'o ga naca lö'a yudo' na'. Burixë' ca' yugu' blaga quégäquië' bönni' tu'tsé'ë dumí yödzö zi'tu', en yugu' le ta'bö'i nupa tuti' gu'dödo'. <sup>13</sup> Rë' légaquië':

—Nazúaj lu guichi lá'ayi le rnna: "Lidxa' si'i le, yu'u ga nu ulidza Dios", pero libí'ili' chinunli' lataj ni ca naca yu'u lídxigaca gubán.

<sup>14</sup> Cate' ni' zoë' Jesús chila yudo', bal-lë' bönni' nachul-la lógaquië', en bönni' biti' raca ila'zé'ë bila'dxinë' ga na' zoë', ate' Lë' bunë' légaquië'. <sup>15</sup> Gula'lenë' yugu' bixúz unná bë', en bönni' yudo' tu'sédinë' cate' bila'lé'enë' yugu' yöl-la' huáca ni runë' Jesús, en bila'yönnë' tu'ibi' bï'ido' zidzaj didza' ga naca chila yudo', ta'nnabi':

—¡Bica' ba Lë', zxí'ini xi'sóë' David!

<sup>16</sup> Ni'irö të' Jesús:

—¿Naru' cabí riyönnu' ca ta'nnabi' bï'i ni?

Bubi'ë didza' Jesús, rnnë':

—Ön, riyönda'. ¿Naru' catu caz nulábanili' le nazúaj lu guichi lá'ayi caní caz ral-la' gaca? Caní rnna: "Li' benu' ga yugu' bï'i cuidi', en yugu' bï'ido' ni' tádzi'bi' gulúl-labi' yöl-la' ba le naca idú."

<sup>17</sup> Ni'irö Jesús bucá'anë' légaquië', ate' burúajé' Jerusalén. Guyijë' yödzö Betania ga ni' bugá'anë' idú yëla.

### Jesús rulidza zi'ë yaga higo

(Mr. 11:12-14, 20-26)

<sup>18</sup> Cate' za' reni', ate' ni' söhuójë' Jesús Jerusalén, ridunë'. <sup>19</sup> Bilé'enë' tu yaga higo rö' gal-la' cuite nöza, ate' gubígui'ë ga na' rö', pero biti' bi bidzölinë' lu yaga na'. Xilágui'sö dxía. Ni'irö Jesús gudxë' le:

—Bíti'rö cuúa le ribía quiu'.

La' gubídxítë yaga higo na'. <sup>20</sup> Cate' bila'lé'enë' bönni' usëda queë' lë ni, bulu'báninë', ate' gula'nábinë' Jesús, ta'nnë':

—¿Nacxi caz guca, gubídxítë yaga ni?

<sup>21</sup> Bubi'ë didza' Jesús, rë' légaquië:

—Le nácatë rea' libíili', channö tséajlë'ëli' Dios, en biti' gaca chopá ládxili', calégasö huáca gunli' ca na' bena' que yaga ni, pero channö guiéli' guí'a ni: Gucuíta, en yöjsóa lu nísado', gaca ca na' innali'. <sup>22</sup> Lësca' caní, yúgu'té le inábali' cate' ulídzali'-në' Dios, channö huayéjlë'ëli' gunné' Dios queéli', huazíili' lë na' inábali'.

*Yöl-la' unná bë' dë lu në'ë Jesús*

(Mr. 11:27-33; Lc. 20:1-8)

<sup>23</sup> Ní'irö guyázië' Jesús chila yudo', ate' tsanni ni' rusédinë' böñachi nacuá' ni', bila'dxinë' yugu' bixúz unná bë' len bönni' gula tu'zéajni'inë' ga zoë', ate' gula'nábinë' Jesús, ta'nnë':

—¿Bizxi yöl-la' unná bë' dë lu no'o, runtso' yugu' lë ni? ¿Nuzxi budödi lu no'o yöl-la' unná bë' ni?

<sup>24</sup> Bubi'ë didza' Jesús, rë' légaquië:

—Lësca' neda' inábatsöqui da' libíili' tu didza'. Channö quíxjöi'ili' neda' ca naca, neda' ca' guí'a libíili' bizxi yöl-la' unná bë' dë lu na'a runa' caní. <sup>25</sup> ¿Nuzxi caz gusöl-la' Juan para buquile' böñachi nisa? ¿Naru' Dios gusöl-lë'ë lë', o gula'sól-lë'ë yugu' bönni' lë'?

Ní'irö gula'sí lógaquië' bönni' yudo' na' ta'nnë' la' légacasë':

—Channö innaru': Dios gusöl-lë'ë lë', la' guiéte' rë'u: “¿Bizxi que biti' guyéajlë'ëli' lë'?”

<sup>26</sup> Na'a, channö innaru': Gula'sól-lë'ë yugu' bönni' lë', rádxiru' le ilún böñachi lu yödzö tu' ta'yéajlë'ë yúgu'té' Juan na' bë'ë didza' uláz queë' Dios.

<sup>27</sup> Que lë ni na' bulu'bí'ë didza', té' Jesús:

—Biti' nöztu'.

Jesús rë' légaquië':

—Neda' ca', biti' guí'a libíili' bizxi yöl-la' unná bë' dë lu na'a runa' lë ni.

*Rucúdzu'ë didza' Jesús ca gulunbi' chópabi' zxí'inë' tu bönni'*

<sup>28</sup> Ní'irö Jesús gudxe' yugu' bönni' yudo' na':

—¿Nacxi rusáca'li' queéli'? Guzóë' tu bönni' nacuá'abi' chópabi' bi'i bönni' queë', ate' yöjödxë'-bi' tubi' bi'i queë' na', gunné': “Zxí'ina', guyéaj na'a tsöjenu' dxin ga naca luyú quia' ga rö'gaca lubá uva.” <sup>29</sup> Bubíibi' didza' bi'i na', gúdxibi'-në': “Biti' ré'ënda' tseja'.” Gudödi ni' bubíi ládxibí', ate' yöjenbi' dxin. <sup>30</sup> Ní'irö bönni' na' yöjödxë'-bi' ia'tubi' bi'i queë' na', en la' tuz ca gunné', ate' bubíibi' didza' bi'i ni, gúdxibi'-në': “Huaca, Dad. Uyéaja'.” Biti' guyéajbi' bi'i ni. <sup>31</sup> ¿Núzxilöbi' bi'i chopá ni benbi' le guyaza ládxë'ë xúzibi'?

Bulu'bí'ë didza', té' Jesús:

—Bí'i zí'alö na'.

Ní'irö Jesús rë' légaquië':

—Le nácatë rea' libíili', ila'nórué' bönni' uquízxaj tuá' dö', en yugu' nigula udá dzaga ca libíili', ate' ila'yázië' ga ni' rinná bë'ë Dios. <sup>32</sup> Caní gaca, tu' bidé' Juan, bönni' buquile' böñachi nisa, ga zóali', en busédinë' libíili' le naca tsahui' ca ral-la' gunli', ate' libíili' biti' guyéajlë'ëli' lë', pero yugu' bönni' uquízxaj, en yugu' nigula udá dzaga gula'yéajlë'ë lë'. Sal-la' bilé'eli' lë ni, biti' bubíi ládxibí' para tséajlë'ëli' lë'.

*Rucúdzu'ë didza' Jesús ca bénagaquië' bönni' huen dxin biti' nácagaquië' tsahui'*

(Mr. 12:1-12; Lc. 20:9-19)

<sup>33</sup> Gunné' ca' Jesús:

—Buli'zé' nágali' ia'tú le ucúdzu'a didza'. Guzóë' tu bönni' xan yu'u, ate' bönni' ni budé'ë yugu' lubá uva luyú queë'. Guléquië' lë'aj que, en guchö'önë' tu lerui guiój ga isié'

xisi uva na'. Bené' ca' tu yu'u xitsá' ga gaca nu uyú idútë luyú queë'. Ní'irö budödë' luyú na' lu ná'agaquië' bönni' huen dxin, para ila'zi'ë quégaquië' gatsaj huéaj, ate' sa'yéaje' yödzö zi'tu'.

<sup>34</sup> Cate' chibidxín dza ulu'chibë' yugu' lubá uva na', gusól-lë'ë bönni' xan luyú na' bal-lë' ni'a në'ë ga na' nacu'ë bönni' huen dxin ni' para ulu'zi'ë lu ná'agaquië' uláz queë'. <sup>35</sup> Ní'irö gula'zönë' bönni' huen dxin na' yugu' ni'a në'ë na'. Gulunë' huë' tuë', en ia'tué' bétigaquië' lë', en ia'tué' bulu'ladxë' lë' guiój. <sup>36</sup> Leyúbölö bönni' xan luyú na' gusól-lë'ë ca' ia'zíca'rë' ni'a në'ë, ate' guláquië' ziánterë' ca nupa na' gusól-lë'ë zí'alö, ate' la' tuz ca gulunë' bönni' huen dxin ni' quégaquië'.

<sup>37</sup> 'Ga yöjsete, gusól-lë'ë ca' zxí'inë' ga na' nacu'ë. Guzá' ládxë'ë, rnnë': Hualunë' bal bi'i quia'. <sup>38</sup> Cate' yugu' bönni' huen dxin na' bila'lë'enë'-bi' zxí'inë', la' gula'nnatë' la' légacasë': "Bi'i ni guequi queébi' luyú ni. Guli'dá, gútiru'-bi', ate' le ral-la' guequi queébi' guequi queéru'." <sup>39</sup> Ní'irö gula'zönë'-bi', ate' bulu'béajë'-bi' ní'ilö luyú ga na' rö'gaca lubá uva, ate' bétigaquië'-bi' ni'.

<sup>40</sup> Ní'irö Jesús gunábinë' légaquië', gunné':

—Cate' udxinë' bönni' xan luyú na', ¿nacxi gunë' quégaquië' bönni' huen dxin ni'?

<sup>41</sup> Bulu'bi'ë didza' bönni' yudo' na', të' Jesús:

—Usunítië' bönni' tuá' dö' na', ate' luyú queë' na' udödë' lu ná'agaquië' ia'zíca'rë' bönni' huen dxin, bönni' ilu'ë lë' uláz queë' cate' idxín dza ulu'chibë' le.

<sup>42</sup> Ní'irö Jesús gudxë' légaquië':

—¿Naru' catu caz nulábanili' lë na' nazúaj lu guichi lá'ayi ca naca lë ni? Caní rnna:  
Guíój na' gula'rú'unë' bönni' tu'cu'ë zö'ö,  
la' guíój ná'asö chinaca guíój len zö'ö.  
Lë cazë' Xanru' benë' ga naca caní,  
ate' naca tu le run ga rubániru'.

<sup>43</sup> 'Que lë ni na' rea' libí'ili', xilátjali' ga na' rinná bë'ë Dios idúa queéli', en gata' quégaca böñachi ilún ca ral-la' gun nu nadeli' lataj ni'. <sup>44</sup> Nu tsöjchegu' lu guíój ni, la' cuinsi quitsaj, ate' channö guíój ni tseajbaga' bönni' na', uzxuzzaj lë'.

<sup>45</sup> Cate' yugu' bixúz unná bë', en yugu' bönni' yudo' fariseo bila'yönnë' lë na' bucúdzu'ë didza' Jesús, téquibe'enë' bë'ë Jesús didza' ca naca quégaquië'. <sup>46</sup> Gula'zóa gula'bö'ë ila'zönë' Jesús, pero guládxinë' bi ilún böñachi zián nacuá' ni' tu' ta'yéajlé' náquië' Jesús bönni' ru'ë didza' uláz queë' Dios.

## 22

*Rucúdzu'ë didza' Jesús ca naca que laní que yöl-la' rutsaga na'*

<sup>1</sup> Jesús bë'lenë' légaquië' didza' leyúbölö, ate' bucúdzu'ë didza', rnnë':

<sup>2</sup> —Ca gaca quégaca nupa ila'yaza ga rinná bë'ë Dios yehua' yubá naca ca guca quégaca nupa bulidzë' tu bönni' rinná bë'ë cate' benë' laní que dza utsaga ná'abi' bi'i bönni' queë'. <sup>3</sup> Gusól-lë'ë ni'a në'ë tsöjxi'gaquië' yugu' bönni' chinulidzë' para guídagaquië' laní queébi', pero biti' gulé'ënë' guídagaquië'. <sup>4</sup> Ní'irö gusól-lë'ë ia'zíca'rë' ni'a në'ë, en gudxë' légaquië': "Guli'tsöjödxitsöca' nupa na' chinulidza', na' guíeli' légaquië': Bulí'yútsöca', chinupá'a la' huagu. Chibétia'-ba' yugu' xpëdxa', en yugu' böa' bëdxí renni' quia'. Yúgu'të chinupá'a. Guli'dá, sóaru' laní queébi' bi'i bönni' quia' utsaga ná'abi'." <sup>5</sup> Yugu' bönni' na' yöjlídzagaquië' biti' gulunë' légaquië' bal, ate' yöjáquië' que queégaquië'. Tuë' yöjenë' dxin, en ia'tué' guyijé' tsöjö'u tsöjéti'ë. <sup>6</sup> Ia'zíca'rë' gula'zönë' yugu' ni'a në'ë na', ate' gulu'ë dö' quégaquië', en bétgaquië' légaquië'. <sup>7</sup> Cate' bönni' na' rinná bë'ë biyönnë' lë ni, gulénë', en gusól-lë'ë yugu' bönni' queë' röjáquië' gudil-la, ate' bétigaquië' yugu' bönni' hueti böñachi na', en bulu'quélë'ë guí' ládzagaquië'. <sup>8</sup> Ní'irö bönni' na' rinná bë'ë

gudxë' yugu' ni'a në'ë, gunné': "Le nácatë chinupá'a que laní na', pero yugu' bönni' bulidza' biti' guláquië' lesaca' guídagaquië' laní quia'. <sup>9</sup> Guli'tséajtsöca' gapa naca la' nöza, en buli'lidza yúgu'të nupa tsöjxáca'li' ni' para guídagaca laní queébi' bi'i bönni' quia' utsaga ná'abi'." <sup>10</sup> Ní'irö bila'rúaje' ni'a në'ë na', söjáquië' gapa naca la' nöza, ate' bulu'tubë' yúgu'të nupa yójxáca'gaquië', yugu' bönni' dxi'a, en yugu' bönni' tuá' dö', ate' ga na' raca laní bilírø bönnachi.

<sup>11</sup> 'Cate' guyázië' bönni' na' rinná bë'ë para uyúë' nupa ni' nudúbigaca, bilé'enë' tu bönni' biti' nácuë' lari' tsahui' le bunödzjë' quégäquië' bönni' nacu'ë laní na'. <sup>12</sup> Ní'irö gudxë' bönni' na': "Bönni'do', ¿zóatso' ni, en biti' nacu' lari' tsahui' bunödzja' quégaca nupa nacuá' laní?" Bönni' na' busayaj ru'ë. <sup>13</sup> Ní'irö bönni' na' rinná bë'ë gudxë' nupa na' tun xichinë', gunné': "Guli'guga' ni'a në'ë bönni' ni. Guli'tsöjchú'un-në' ní'ilö ga na' rö'ö chul-la. Ni' cödxë', en útil-la láyë'ë, lu yöl-la' ruhu'ini queé'."

<sup>14</sup> Ní'irö Jesús gudxë' légaquië':

—Zian nupa nulidza', pero nabábasö nupa ila'rögaca.

*Jesús ru'ë didza' ca naca le riguízxaj lázaru'*

(Mr. 12:13-17; Lc. 20:20-26)

<sup>15</sup> Ní'irö yugu' bönni' yudo' fariseo na' bulu'zé'ë ni', ate' gulún xtídzagaquië' ilunë' ga bi innë' Jesús para gaca ulu'zéguië' Lë' didza'. <sup>16</sup> Para ilunë' caní, gula'söll-lë'ë bal-lë' bönni' dá'gaquië' légaquië', len bönni' dá'gaquië' Herodes, ga zoë' Jesús, nupa na' gulé Jesús:

—Bönni' Usedi, nöztu' Li' ru'u didza' cátëze naca, en naca idútë li ca rusédinu' ca naca queé' Dios, en biti' rui'i ládxu'u le ta'nná quiu' bönnachi, tu' cabí ruchi'a rusöróu' bönnachi ca naca le ta'nnasö bönnachi na'. <sup>17</sup> Gudíxjöi'i netu'. ¿Nacxi runi li? ¿Naru' run bayudxi, o biti' run bayudxi quizxaj laztu' queé' César, bönni' yödzö zi'tu' na' rinná bë'enë' rë'u?

<sup>18</sup> Réquibe'enë' Jesús té'ënnë' ulu'béajë' Lë' didza', ate' gudxë' légaquië':

—Libi'ili', bönni' rulu'isö tsahui' cuinli', ¿bizx que ruí'ili' didza' le ruzóa neda' ra' guí'a?

<sup>19</sup> Buli'lui'i neda' dumí le riguízxaj lázali'.

Ní'irö bulu'lui'inë' Lë' tu dumí que yödzö Roma. <sup>20</sup> Jesús gunábinë' légaquië', rnnë':

—¿Nuzxi lahui da' ni, en nuzxi le nazúaj lë'e dumí ni?

<sup>21</sup> Të' Lë':

—Queé' César na'.

Ní'irö Jesús gudxë' légaquië':

—Guli'guízxjë' César le nequi queé' César, ate' Dios le nequi queé' Dios.

<sup>22</sup> Cate' bila'yönnë' lë ni, bulu'báninë' ca naca didza' tsahui' bubi'ë Jesús, ate' bulu'cá'anë' Lë', söhuőajtëgaquië'.

*Ta'nabi yúdxinë' Jesús ca ulu'bán nupa chinátigaca*

(Mr. 12:18-27; Lc. 20:27-40)

<sup>23</sup> La' dza ná'asö yugu' bönni' yudo' saduceo, bönni' na' ta'nnë' biti' ulu'bán nupa chinátigaca, bila'dxinë' ga zoë' Jesús, ate' gula'nábinë' Lë', <sup>24</sup> ta'nnë':

—Bönni' Usedi, Moisés gunné': "Channö gátië' tu bönni' zóanu nigula queé', en cuntu nu bi'i zóabi' queé', ní'irö bi'i bóchë'ë bönni' na' ral-la' utsaga ná'alenbi'-nu nigula uzëbi queé', para cabí initi dí'a dza queé' bönni' bóchi'bi' na'." <sup>25</sup> Gula'cuá'abi' gadxi bi'i bönni' ga zóatu', naca bóchi'gacabi'. Bi'i zí'alö na' butsaga ná'alenbi'-nu nigula, ate' gútitébi'. Tu' cuntu nu bi'i queébi' zóabi', bi'i buropi na' butsaga ná'alenbi'-nu nigula uzëbi queébi' bi'i bóchi'bi' na'. <sup>26</sup> Lësca' caní guca queébi' bi'i buropi na', enca' queébi' bi'i bunni, en la' tuz ca guca quégacabi' igádxítëbi', gulátibi' yúgu'tëbi'. <sup>27</sup> Ga búdxítë gútinu ca' nigula na'. <sup>28</sup> Cate' idxín dza ulu'bán nupa chinátigaca, ¿núzxilögacabi' bi'i gadxi ni' guéquinu nigula na' queébi', tu' bulu'tsaga ná'alenbi'-nu yúgu'tëbi' nigula na'?

<sup>29</sup> Ní'irö bubi'ë didza' Jesús, ate' rë' légaquië':

—Nachíxili' libí'ili' tu' cabí réajni'ili' le nazúaj lu guichi lá'ayi, en tu' cabí núnbe'ëli' yöl-la' huáca queë' Dios. <sup>30</sup> Cate' idxín dza ulu'bán nupa chinátigaca, bíti'rö gaca yöl-la' rizóalen nigula, en biti' ulu'tsaga ná'agaquië', pero gácagaquië' ca nácagaquië' gubáz lá'ayi queë' Dios nacu'ë yehua' yubá. <sup>31</sup> Ca na' ral-la' ulu'bán nupa chinátigaca, ¿naru' cabí nulábanili' lë na' gudxi cazé' Dios libí'ili'? <sup>32</sup> Caní gunné': "Neda' naca' Dios queë' Abraham, en Dios queë' Isaac, en Dios queë' Jacob." Dios na' biti' náquië' Dios quégaca nupa nátigaca tsaz, pero náquië' Dios quégagaquië' bönni' ni nabángagaquië' sal-la' gulátië".

<sup>33</sup> Cate' bila'yöni böñachi nacuá' ni' didza' ni, bulu'bani ca naca lë na' rusédinë' Jesús léguequi.

*Xibá queë' Dios le naca lo*

(Mr. 12:28-34)

<sup>34</sup> Cate' guléquibe'enë' bönni' yudo' fariseo ca benë' Jesús, busayjë' ruá'agaquië' bönni' yudo' saduceo, ní'irö bulu'dubë' yúgu'té'. <sup>35</sup> Tuë' bönni' nútsë'ë ládjagaquië', en nazëdë' xibá queë' Moisés, gú'unne' si' bë'ë Jesús. <sup>36</sup> Que lë ni na' gunábinë' Jesús, rnnë':

—Bönni' Usedi, ¿bízzilö xibá queë' Dios naca lo?

<sup>37</sup> Jesús rë' lë':

—Idxi'nu' Xanu' Dios idú ládxu'u, en idú icja ládxido'o, enca' len idú yöl-la' réajni'i quiu'. <sup>38</sup> Xibá ni naca lo, en nazáca'térö. <sup>39</sup> Xibá na' naca buropi, la' ca nácatë, en caní rnna: "Idxi'nu' böchi' luzó'o ca nadxi'i cuinu'." <sup>40</sup> Chopa xibá ni nácgaca ga röjlöz yúgu'té le rinná bë' xibá queë' Dios, en yúgu'té le bulu'sédinë' bönni' gulu'ë didza' uláz queë' Dios.

*¿Nuzxi zxí'ini náquië' Cristo?*

(Mr. 12:35-37; Lc. 20:41-44)

<sup>41</sup> Tsanni ni' nacu'ë tsözxón bönni' yudo' fariseo na', Jesús gunábinë' légaquië', <sup>42</sup> rnnë':

—¿Nacxi rusáca'li' queë'li' queë' Bönni' na' lë' Cristo? ¿Nuzxi zxí'ini náquië'?

Bulu'bí'ë didza', ta'nné':

—Zxi'ini xi'sóë' David náquië'.

<sup>43</sup> Ní'irö Jesús rë' légaquië':

—¿Bizz que na' lë' cazé' David bulidzë' Lë', gunné': "Xana"?" Caní gunné' cate' ni' bë'ë didza' uláz queë' Dios Bö' Lá'ayi, gunné':

<sup>44</sup> Xanru' Dios gudxë' Xana':

"Gurö'ö cuita lë'a ibëla,  
cate' gunra' ga ulu'zechu zxibigaca Lo' nupa tequi Li' zi'."

<sup>45</sup> Channö David na' gunné' queë' náquië' Xanë', ¿nacxi caz naca, rnnali' náquië' zxí'ini xi'sóë' David na'?

<sup>46</sup> Cuntu nu guca ubí'i didza', ate' ga gusí lo dza na', cínturö nu burugui bi inábini Lë'.

## 23

*Jesús ruzégui'ë yugu' bönni' yudo' didza'*

(Mr. 12:38-40; Lc. 11:37-54; 20:45-47)

<sup>1</sup> Ní'irö Jesús bë'lenë' böñachi nacuá' ni' len yugu' bönni' usëdi queë' didza'. <sup>2</sup> Rë' légaquië':

—Yugu' bönni' yudo' fariseo, en yugu' bönni' yudo' usedi nuhuöázagaquië' xilatjë' Moisés, en tu'sédinë' böñachi. <sup>3</sup> Que lë ni na', guli'gún yúgu'té le ilé' libí'ili', pero biti' gunli' libí'ili' ca na' tunë' légaquië', tu' tu le ta'nné', en ia'tú le tunë'. <sup>4</sup> Le ta'nná bë'enë' böñachi naca ca tu yua' zi'i le cabí sequi' nu guá', ate' tu'gu'ë le ya'zxícjagaca böñachi, pero légaquië' biti' té'ennë' ulu'tenë' le, caléga len tuze xibón ná'agaquië'. <sup>5</sup> Yúgu'té le tunë', tunë' para ila'lé'e böñachi légaquië', tu' tunë' zxön le túgui'ë yen ná'agaquië', en ra' xigágaquië' ga na' nuzúajgaquië' tu le nazúaj lu guichi lá'ayi, en tu'tunne' luzxi lari' nácugaquië'. <sup>6</sup> Té'ennë' ila'bö'ë ga naca lataj lo ga na' tu'dubë' tahuë', enca' ga na' naca

lataj lo lu yu'u ga tu'dubé' tu'sédé' queë' Dios. <sup>7</sup> Lësca' caní, té'ënné' ulu'gapa bönachi légaquië' didza' ba zxön gapa naca lógaca bönachi, en té'ënné' ilé bönachi légaquië': "Padiux, bönni' usedi."

<sup>8</sup> 'Pero lib'ili', biti' ral-la' gunli' ga nu guíë lib'ili': Bönni' Usedi, tu' zoa tuz Nu naca Bönni' Usedi queéli', neda', Cristo, ate' yúgu'téli' nácali' bóchi'li' tuli' ia'tuli'. <sup>9</sup> Cuntu nu guiéli' luyú ni, biti' innali': Xuz, tu' zoa tuz Nu naca Xúzili', zoë' yehua' yubá. <sup>10</sup> Biti' gunli' ga nu guíë lib'ili': Xan, tu' zoa tuz Nu naca Xanli', neda', Cristo. <sup>11</sup> Nu nutsa' ládjali' nu run xichinli' ia'zíca'röli', nu ni na' gácarö lo ga zóali'. <sup>12</sup> Channö nu uzóa cuini lataj lo, cá'asö ugá'ana nu na', pero nu naca nöxaj ladxi', gaca lo.

<sup>13</sup> 'Bica' bayechi' lib'ili', bönni' yudo' usedi, enca' lib'ili', bönni' yudo' fariseo, bönni' rulu'i isö tsahui' cuinli'. Ruzágala'li' nöza söjácalen bönachi para ila'dxín ga ni' rinná bë'ë Dios yehua' yubá. La' lib'isili' biti' sequi' tsú'uli', en biti' ruíili' lataj ila'yú'u nupa té'ëni ila'yú'u.

<sup>14</sup> 'Bica' bayechi' lib'ili', bönni' yudo' usedi, enca' lib'ili', bönni' yudo' fariseo, bönni' rulu'i isö tsahui' cuinli'. Rugúali' yugu' lídxigacanu nigula uzébido', en para ulu'i isö tsahui' cuinli', xidzé rulídzali'-në' Dios. Que lë ni na', zítérö irugu queéli' qui'i sáca'li'.

<sup>15</sup> 'Bica' bayechi' lib'ili', bönni' yudo' usedi, enca' lib'ili', bönni' yudo' fariseo, bönni' rulu'i isö tsahui' cuinli'. Ridódili' idú lu nísado', en idú yödöli' ni para gunli' ga tseaj ládxé'ë tu bönni' Dios tsözxón len lib'ili', en cate' chiguzxéqui'li'-në', runli' ga nabága'rë' xíguia' ca lib'ili', ate' tsöjtsu'ë lu guí' gabila.

<sup>16</sup> 'Bica' bayechi' lib'ili'. Nachul-la loli', ate' ré'ënili' ulu'i'li' nöza bönachi. Caní naca queéli' tu' rnnali': "Channö bi rizí' lu né'ë tu bönni' ni'a que yudo', biti' run bayudxi, pero channö runé' le ni'a que oro dzö'ö yudo', bayudxi gun." <sup>17</sup> Lib'ili', bönni' lo chul-la, en tu' careajni'i. ¿Bízxilö nácarö lo? ¿Naru' oro na', o yudo' le run lá'ayi oro na'? <sup>18</sup> Lësca' caní rnnali': "Channö nu bönni' gunë' le ni'a que bucugu lá'ayi, biti' gun bayudxi, pero channö gunë' le ni'a que gun zxoa lahui, bayudxi gun." <sup>19</sup> Lib'ili', nazídili', en nachul-la loli'. ¿Bízxilö nácarö lo? ¿Naru' gun zxoa láhuisö, o bucugu lá'ayi na' run lá'ayi gun na'? <sup>20</sup> Que lë ni na', channö nu bönni' runé' le ni'a que bucugu lá'ayi, runé' le ni'a que le, enca' ni'a que yúgu'té le zxóagaca láhuisö. <sup>21</sup> Lësca' caní, channö nu bönni' runé' le ni'a que yudo', runé' le ni'a que le, enca' ni'a queë' Dios, nun cazé' xilatjé' ni'. <sup>22</sup> Lësca' caní, channö nu bönni' runé' le ni'a que yehua' yubá, runé' le ni'a que lataj ga rö'ë rinná bë'ë Dios, enca' ni'a que Lë cazé' Dios rö'ë ni'.

<sup>23</sup> 'Bica' bayechi' lib'ili', bönni' yudo' usedi, enca' lib'ili', bönni' yudo' fariseo, bönni' rulu'i isö tsahui' cuinli'. Caní naca queéli' tu' riguízxjali' que yudo' tu cö' huéaj tu' chi cö' le rizí'li' que xöhuéaj, en que guixi' anís, en que comino la' huagu, pero rucá'anali' le nácarö lo le rinná bë' xibá queë' Dios, tu' cabí runli' le naca tsahui', en biti' ruhuéchi' ládxí'li' luzá'ali', en biti' réajlé'ëli'-në' Dios. Yugu' lë ni run bayudxi gunli', en lës biti' uca'anali' ia'zíca'rö lë na' runli', le riguízxjali' que yudo'. <sup>24</sup> Lib'ili', nachul-la loli', en ré'ënili' ulu'i'li' nöza bönachi. Ca na' runli' naca ca rudódili' bödzádzado' le ré'jali', rubéajgacali'-ba' bō'iyudo', pero ré'jali'-ba' böa' ta'bíe'-ba' bönni'.

<sup>25</sup> 'Bica' bayechi' lib'ili', bönni' yudo' usedi, enca' lib'ili', bönni' yudo' fariseo, bönni' rulu'i isö tsahui' cuinli'. Nácali' ca zxíga'do' ré'jali', en yó'öna ráhuili'. Riguíbili' le nuá' cuita lë'e, pero lu icja ládxí'do'oli' nalí yugu' le ribanli', en yugu' le ruá' dö' runli'.

<sup>26</sup> Lib'ili', bönni' yudo' fariseo lo chul-la. Zí'alö guli'quibi le nuá' lu zxíga'do', en lu yó'öna, lë na' sa'yéaj gácali' tsahui' lu icja ládxí'do'oli', para gácali' ca' tsahui' cuita lë'ëli'.

<sup>27</sup> 'Bica' bayechi' lib'ili', bönni' yudo' usedi, enca' lib'ili', bönni' yudo' fariseo, bönni' rulu'i isö tsahui' cuinli'. Caní naca queéli' tu' nácali' ca yugu' yeru ba quégaca nupa chinátigaca, le nácagaca chiguichido'os cuita lë'e, en le nácaté lachi nalá'gaca, pero nalígaca dxita quégaca nupa chinátigaca, enca' yúgu'té le siguti. <sup>28</sup> Lësca' caní nácali'

libí'ili'. Le nácaté láhuisö rulu'i cuinli' tsahui' lógaca bönachi, pero lu icja láxsi'do'oli' nalili' yugu' le rulu'isö tsahui' cuini, en le ruá' dö' runli'.

<sup>29</sup> 'Bica' bayechi' libí'ili', bönni' yudo' usedi, enca' libí'ili', bönni' yudo' fariseo, bönni' rulu'isö tsahui' cuinli'. Ruchísali' biquitaj que ba gapa nagáchi'gaquië' bönni' gulu'ë didza' uláz queë' Dios, en ruí'ili' biquitaj gapa nagáchi'gaca bönachi tsahui'. <sup>30</sup> Lësca' caní rninali': "La'tu' zóatu' dza ni'te cate' gula'cu'ë xuz xtó'otu', biti' guntu' légaquië' tsözxón cate' gulútië' yugu' bönni' gulu'ë didza' uláz queë' Dios." <sup>31</sup> Tu' rninali' caní, la' libí'isili' runli' ba nalí nácali' zxí'ini xi'sóagaca nupa ni' bétigaca yugu' bönni' gulu'ë didza' uláz queë' Dios. <sup>32</sup> Caní naca, rusubaga' cuinli' xíguia' na' gula'báguië' xuz xtó'oli'.

<sup>33</sup> 'Libí'ili' na', nácali' ca yugu' bëla sínia', en di'a dza quégacaba' bëla sínia'. ¿Nacxi caz uláli' lu le usaca' zi' libí'ili' lu guí' gabilä? <sup>34</sup> Que lë ni na', neda' isól-la'a queéli' yugu' bönni' ilu'ë didza' uláz queë' Dios, enca' yugu' bönni' ta'yéajni'inë', en yugu' bönni' usedi. Yugu' bönni' ni, bal-lé' gútili'-në', en ia'zíca'rë' udá'ali' lë'e yaga cruz, en ia'zíca'rë' quinli' gapa naca lu yu'u ga rudúbili' rusédali' queë' Dios, ate' ulágali' légaquië' tu ia'tú yödzö. <sup>35</sup> Caní gaca, ibága'li' libí'ili' xíguia' que idútë rön quégacaba' bönni' tsahui' le gulalaj luyú, ga gudela' nu bëti Abel, bönni' tsahui', ga ridxitnë nupa bétigaca Zacarías, zxí'ine' Berequías, bönni' na' bétili'-në' gatsaj láhui'lö ga dë yudo', en ga dë bucugu lá'ayi ga na' tu'zégu'ë' böa' bédximo' lahuë' Dios. <sup>36</sup> Le nácaté rea' libí'ili', yúgu'të lë ni ila'baga' bönachi nacuá' dza ni zóaru' na'a.

*Jesús ribödxé' ni'a que yödzö Jerusalén  
(Lc. 13:34-35)*

<sup>37</sup> Lësca' caní gunné' Jesús:

—Jerusalén, Jerusalén, libí'ili' na' rútigacali'-në' bönni' tu'ë didza' uláz queë' Dios, en ruláxsi'gacali' guiój nupa nasól-lé'ë Dios. Zián luzuí gú'unida' utuba' libí'ili' quia', ca runba' yøjede, rutúbiba' bórado' queéba' zxan xíliba', pero biti' gú'unili'. <sup>38</sup> Buli'yútsöca', cá'asö ugá'ana yu'u lídxili'. <sup>39</sup> Caní gaca, tu' rea' libí'ili', na'a isí lo biti' ulé'eli' neda' cate' innáröli': "Lá'ayi náquië' Bönni' na' zë'ë uláz queë' Xanru'."

## 24

*Riguíxjö'ë Jesús ca si' ulu'quínnajë' yudo'  
(Mr. 13:1-2; Lc. 21:5-6)*

<sup>1</sup> Birúajé' Jesús chila yudo', en tsanni ni' rizé'ë ni', gula'bígui'ë bönni' usëda queë' ga na' zoë', ate' bulu'lufinë' Lë' ca nácabaca zö'ö nagú'ugaca lë'a yudo'. <sup>2</sup> Bubi'ë didza' Jesús, ate' rë' légaquië':

—¿Rilé'etseli' yúgu'të lë ni? Le nácaté rea' libí'ili', biti' ca' ugá'ana guiój nabaga' luzé'e ni, le cabí iguínna.

*Le ilaca bë' chizóa idxín dza údxi que yödzölió  
(Mr. 13:3-23; Lc. 21:7-24; 17:22-24)*

<sup>3</sup> Cate' ni' rö'ë Jesús ga naca lu Gui'a Yaga Olivo, bila'dxinë' bönni' usëda queë' ga na' zoë' queézë', en të' Lë':

—Gudíxjö'i netu', ¿bátaxi ilaca lë ni, en bizxi gaca bë' dza huödu', en dza údxi que yödzölió ni?

<sup>4</sup> Ní'irö bubi'ë didza' Jesús, ate' rë' légaquië':

—Buli'yú para cabí nu si' ye'e libí'ili', <sup>5</sup> tu' zá'gaquië' zián bönni' légaquië' ca lea' neda'. Illa'nné' nácabaca' Cristo, en ila'zí' ye'enë' bönachi zián. <sup>6</sup> Huayónili' raca gudil-la, en le ruí'i didza' que gudil-la, pero biti' cõ'öli' böniga, tu' ral-la' ilaca yúgu'të lë ni, pero cabí ridxini dza údxi cate' ilácarö lë ni. <sup>7</sup> Til-la tu yödzö len ia'tú yödzö, ate' tu ga nu rinná bë' len ia'tú ga nu rinná bë'. Ilatsaj yödzöhuë' zxön, en gaca gubín, ate' zián lataj tödi budó' zxu'. <sup>8</sup> Yúgu'të lë ni nácabaca le isí lógaca yugu' le ila'guí'i ila'zaca' bönachi.

<sup>9</sup> 'Ní'irö ulu'dödi bönachi libí'ili' lu na' nu usaca' zi' libí'ili'. Yúgu'té bönachi ulu'dí'i libí'ili' tu' dá'ali' neda', en ilútié' bál-lali' libí'ili'. <sup>10</sup> Cate' gaca caní, gaca chopá ládxí'gaca zián bönachi, en ulu'cá'ana neda', ate' udödi tu ia'tú luzé'e, en tu ia'tú udí'i luzé'e. <sup>11</sup> Ní'irö ulu'lui'i lógaquië' zián bönni' ta'zi' yé'ë. Ulu'lui'i cuíngaqüië' ca yugu' bönni' tu'ë didza' uláz queë' Dios, en ila'zi' yé'enë' bönachi zián. <sup>12</sup> Ilua'ada' dö' bönachi, ate' que lë ni na' bíti'rö ila'dxí'i böchi' luzé'eguequi. <sup>13</sup> Nu guequi tsaz queë' Dios ga idxinté dza údxi, nu ni ulá. <sup>14</sup> Idú yödzölió gaca libán que didza' dxí'a ca rinná bë'ë Dios para gaca ba nalí que lögaca yúgu'té bönachi izá'a, ate' ní'irö idxín dza údxi.

<sup>15-16</sup> 'Nu ulaba lë ni ral-la' uzéajni'i ladxi'. Gunné' Daniel, bönni' bë'ë didza' uláz queë' Dios, gunné': "Tsaza le rudi'inë' Dios lataj lá'ayi queë' Dios, lë na' rusuniti." Cate' ilé'eli' gaca caní, ní'irö nuli' zóali' luyú Judea ral-la' tsöjzxúnnaajli' saca' guí'ado'. <sup>17</sup> Nu dxía ícjo'olö biti' gal-la' huötaj tsöjzxí' bi dë que lu yu'u, pero ral-la' izxúnnaajtë. <sup>18</sup> Nu zoa la' guixi', biti' gal-la' huóaj tsöjzxí' lari' que. <sup>19</sup> Bica' bayechi' yugu' nigula si' ulu'zóanu bí'ido' quégacanu, enca' nigula ni' tu'gádxí'nu-bí' bí'ido' quégacanu cate' idxín dza ni'. <sup>20</sup> Buli'lidzë' Dios inábili'-në' cabí idxín dza ni' izxúnnaajli' cate' raca beo' ziaga o cate' naca dza lá'ayi, <sup>21</sup> tu' ila'guí'i ila'záca'térö bönachi dza ni' ca gula'guí'i gula'zaca' bönachi dza ni'te cate' si' guta' guró'ö yödzölió, ga ridxitnë na'a dza, en caléga dza zá'gaca biti' ila'guí'i ila'zaca' caní. <sup>22</sup> Cate' idxín dza ni', channö Dios biti' cuéqui lahuë' quégäquië', cuntu nu ulá, pero cuéqui lahuë' quégäquië' dza ni', en gácalenë' nupa guró' cazë' Lë'.

<sup>23</sup> 'Ní'irö biti' tséajlë'ëli' channö nu idxín queëli', en guíé libí'ili': "Buli'yútsöca', ni zoë' Cristo", o inná: "Ni' zoë'." <sup>24</sup> Ulu'lui'i lógaquië' zián bönni' ta'zi' yé'ë, en ila'nné' nácagaquië' Cristo, o ila'nné' tu'ë didza' uláz queë' Dios. Ilunë' le ilaca bë', en le ilún ga ulu'bani bönachi, ate' ila'zi' yé'enë' nupa guró' cazë' Dios channö huala'zéqui'në'. <sup>25</sup> Buli'yútsöca', chigudxi caza' libí'ili' yúgu'té lë ni zí'atélö ca si' ilaca. <sup>26</sup> Que lë ni na', biti' irúajli' channö ila'dxín queëli' nupa ilé libí'ili': "Buli'yútsöca', ni' zoë' Cristo lu lataj cá'asö." Lësca' caní, biti' tséajlë'ëli' channö ila'nná: "Buli'yútsöca', lu yu'u zoë'." <sup>27</sup> Ca na' raca cate' répi yösa ga rilén gubidza, en ruzení' ga ribía gubidza, lësca' caní gaca cate' huöda' neda', Bönni' Guljé' Bönachi. <sup>28</sup> Ilácatë caní, ca na' ta'nná bönachi: "Gáti'tës ga dë tu le natí, ni' ulu'dubi cázaba' bíchulab."

### *Ca gaca cate' huöde' Bönni' Guljé' Bönachi* (Mr. 13:24-37; Lc. 21:25-33; 17:26-30, 34-36)

<sup>29</sup> Gunné' ca' Jesús:

—Tödi yugu' dza ni' cate' ila'guí'i ila'zaca' bönachi caní, ichul-la gubidza, ate' beo' biti' gunna bení' que. Ila'guínnajba' bölaj lúzxiba, ate' ila'zxízi le nalá'gaca naca tsutsu lúzxiba. <sup>30</sup> Ní'irö ilá' lahuí lúzxiba le gaca bë' huöda' neda', Bönni' Guljé' Bönachi, ate' ila'bödxí yechi' yúgu'té bönachi yödzölió ni, cate' ila'lé'e neda', Bönni' Guljé' Bönachi, suzá'a lu böaj lúzxiba, dë lu na'a yöl-la' unná bë', en yöl-la' huáca zxön. <sup>31</sup> Ní'irö isól-la'gaca'-në' gubáz lá'ayi quia'. Ulu'cödxé' zidzaj lúzuba' böa' guixi', ate' ulu'tubë' nupa naböa' quia', nacuá' idapa la'até yödzölió, en yúgu'té lataj zxan lúzxiba.

<sup>32</sup> 'Buli'zéajni'i ládxí'li' le rusedi libí'ili' le raca que yaga higo. Cate' ta'lén ni'a në'e yúludo', en chirubía xilagui' yúludo', inózili' chizúa idxín cusubá. <sup>33</sup> Lësca' caní, cate' ilé'eli' taca yúgu'té lë ni, inózili' chizúa idxín dza údxi na', en chiridzaga lahuí.

<sup>34</sup> Le nácatë rea' libí'ili', yúgu'té lë ni ilaca zí'atélö ca ilátigaca bönachi nacuá' dza ni'.

<sup>35</sup> Huadödi quégaca lúzxiba, en luyú ni, pero yugu' xtídzaj lúzxiba.

<sup>36</sup> 'Cate' idxín dza ni' cuntu nu nözi. Biti' nözguequinë' gubáz lá'ayi queë' Dios nacuë' yehua' yubá, en biti' nözda' neda', Zxí'inë' Dios, pero tuzë' Dios Xuz nözinë'.

<sup>37</sup> 'Ca na' guca dza cate' ni' zoë' Noé, lësca' caní gaca cate' huöda' neda', Bönni' Guljé' Bönachi. <sup>38</sup> Yugu' dza ni' zí'atélö ca si' idxín nisa guíoj le busuniti yödzölió, gulé'aj gulahuë', bulu'tsaga ná'agäquië', en bulu'dödë' zxí'inigaquië' lu yöl-la' rutsaga

na' ga bidxintë dza guyázië' Noé lë'e barco zxön ni' benë', <sup>39</sup> en biti' guléquibe'enë' cate' bidxintë nisa guiój le busuniti yödzölió, ate' gula'nitië' yúgu'të'. Lësca' caní gaca cate' si' huöda' neda', Bönni' Guljë' Bönachi, cuntu nu guéquibe'e. <sup>40</sup> Dza huöda' ila'cu'ë chopë' bönni' la' guixi'. Tuë' uchë'a-në' quia', ate' ia'tué' ucá'ana'-në'. <sup>41</sup> Ila'cuá'anu chópanu nigula nacuá'anu huëtu. Tunu uchië'a-nu quia', ate' ia'tunu ucá'ana'-nu.

<sup>42</sup> 'Buli'subán ládxil'i tu' cabí nőzili' bizxi dza huöda' neda', Xanli'. <sup>43</sup> Na'a, guli'tséajni'i lë ni. La'tu' nőzinë' xan yu'u bizxi dza guídë' gubán, huané'ë yëla, en biti' gu'ë lataj nu quidaj zö'ö para cuan le dzö'ö lidxë'. <sup>44</sup> Que lë ni na', buli'subán ládxil'i ca' libf'ili', tu' huöda' neda', Bönni' Guljë' Bönachi, tu dza biti' nuzóa icjali'.

*Bönni' huen dxin tsahui', en bönni' huen dxin biti' náquië' tsahui'*

(Lc. 12:41-48)

<sup>45</sup> Gunné' ca' Jesús:

—¿Nuzxi caz bönni' huen dxin náquië' tsahui', en réajni'inë', bönni' huen dxin na', xanë' cu'ë lu né'ë bönachi nacuá' lidxë' para gu'ë le ilágugaca cate' idxín dza? <sup>46</sup> Bica' ba bönni' huen dxin na' náquië' tsahui', bönni' na', cate' udxinë' xanë', uduxáquië' lë' caní runë' le nudödë' xanë' lu né'ë. <sup>47</sup> Le nácatë rea' libf'ili', yúgu'të le dë queë' xanë', udödë' lu né'ë bönni' huen dxin na' runë' caní. <sup>48</sup> Channö huöáquië' bönni' huen dxin queë' huiá' dö', en sa' ládxë'ë, innë': "Huadzenë' xana', en biti' huödatië", <sup>49</sup> en channö isí lahuë' gundë' zi' bönni' túnlenë' lë' tsözxón dxin, en isí lahuë' ca' guí'aj gágulenë' nupa ta'zudxi, <sup>50</sup> ní'irö huödë' xanë' bönni' huen dxin na' tu dza cate' biti' zoë' ribözë', o tu yëla biti' réquinë'. <sup>51</sup> Ní'irö xanë' na' usaca' zí'dë'ë bönni' huen dxin na', en gunë' ga gaca queë' ca na' ral-la' gaca quégaca nupa tu'luf'isö tsahui' cuínguequi. Ní'irö cödxi yeché'ë, en gagu zxea láyë'ë.

## 25

*Rucúdzu'ë didza' Jesús ca naca quégacabi' chibi' bi'i nigula ra'bando'*

<sup>1</sup> Gunné' ca' Jesús:

—Ca gaca quégaca nupa ila'yaza ga rinná bë'ë Dios yehua' yubá naca ca guca quégacabi' chibi' bi'i nigula ra'bando'. Gula'zí'ibi' le nuá'gaca guí' quégacabi', ate' bila'rúajbi' tsöjtságagacabi' bönni' utsaga né'ë. <sup>2</sup> Gáyu'bi' nácagacabi' bi'i biti' ta'yéajni'ibi' ate' ia'gáyu'bi' nasína'gacabi'. <sup>3</sup> Yugu' bi'i nigula biti' ta'yéajni'ibi' na' gula'zí'ibi' le nuá'gaca guí' quégacabi' pero biti' guluá'abi' ia'lati' za régui. <sup>4</sup> Yugu'bi'i sina' na' guluá'abi' za régui lu bôga'do' quégacabi' len le nuá'gaca guí' quégacabi'. <sup>5</sup> Tu' gudzenë' bönni' utsaga né'ë, gudödi yëla lögacabi', en gulásitëbi'. <sup>6</sup> Cate' bidxín idú guluahuëla, biyón chi'i nu rinnë zidzaj, rnna: "¡Chizé'ë bönni' utsaga né'ë! ¡Guli'rúaj tsöjtságali'-né'!" <sup>7</sup> Ní'irö gula'yásabi' yúgu'tëbi' bi'i nigula na', ate' bulu'pá'abi' le nuá'gaca guí' quégacabi'. <sup>8</sup> Gulu'ibi' didza' bi'i biti' ta'yéajni'ibi' na', en gulébi' yugu' bi'i sina' na': "Guli'gunna queëtu' láti'do' za régui queëli' tu' tu'úlu le nuá'gaca guí' queëtu' ni." <sup>9</sup> Bulu'bí'ibi' didza' bi'i sina' na', gula'nnabi': "Biti' gaca, tu' cabí bi ugá'ana queëtu', en queëli'. Guli'tséajtsöca' ga ridó'o za régui, tsöjö'uli' queëli'." <sup>10</sup> Tsanni ni' söjácabí' söjxi'gacabi' le, bidxinë' bönni' utsaga né'ë. Yugu' bi'i na' nacuá'abi' sina', en ta'bözabi' lë' gula'yú'ulentëbi' lë' ga na' raca laní que utsaga na', ate' la' guyáyajtë yu'u. <sup>11</sup> Gudödi ni' ia'zíca'röbi' bi'i nigula ra'bando' na' bila'dxinbi' ni', ate' bulu'lídzabi'-në', en gula'nnabi': "Xan, Xan, gusalaj queëtu'." <sup>12</sup> Lë' bubí'ë didza', rnne': "Le nácatë rea' libf'ili', biti' nözda' gazxi libf'ili'."

<sup>13</sup> Ní'irö Jesús gudxë' légaquië':

—Buli'subán ládxil'i', tu' cabí nőzili' bizxi dza o bizxi yëla huöda' neda', Bönni' Guljë' Bönachi.

*Rucúdzu'ë didza' Jesús ca naca que dumí zaca'*

<sup>14</sup> Gunné' ca' Jesús:

—Ca gun Nu na' rinná bë' yehua' yubá naca ca benë' tu bönni', chizóa tsejë' zi'tu'. Bulidzë' yugu' bönni' huen dxin queë' en gulu'ë yugu' le dë queë' lu ná'agaquië'.

<sup>15</sup> 'Tuë' bönni' huen dxin na', gulu'ë gayu' dumí nazaca' lu në'ë, ate' ia'túë' gulu'ë chopá dumí nazaca' lu në'ë. Ia'túë' gulu'ë tu dumí nazaca' lu në'ë. Tu tuë' gulu'ë lu në'ë tsca huéaj le ila'zéqui'në'. Ní'irö la' guzá'atë' ga naca zi'tu'. <sup>16</sup> Guyijë' bönni' huen dxin na' guzxi'ë gayu' dumí nazaca' na', en yöjtíjalenë' le ia'gayu' dumí nazaca'. <sup>17</sup> Lësca' caní, bönni' na' guzxi'ë chopá dumí na', yöjtíjalenë' le ia'chopa ca'. <sup>18</sup> Bönni' na' guzxi'ë tu dumí guyijë', en yöjchö'önë' lu yu, ate' bucáchë'ë dumí queë' xanë' lu yu ni'.

<sup>19</sup> 'Cate' chigudzé, budxinë' xángaquië' bönni' huen dxin na', ate' bucá'analenë' légaquië' tsahui'. <sup>20</sup> Ga gusí lo bidxintë' bönni' na' guzxi'ë gayu' dumí nazaca' na', en sunu'ë ia'gayu' dumí ca', ate' rë' xanë': "Xan, gayu' dumí gulú'u lu na'a. Ni dë ia'gayu' dumí ca' yöjtíjalena' le." <sup>21</sup> Xanë' na' rë' lë': "Naca dxi'a. Nacu' huen dxin tsahui'. Tsáhui'do' benu' cate' ni dë lu no'o láti'do'os. Na'a yénni'térö cu'a lu no'o. Guyaza ga zoa', udzéjalenu' neda'." <sup>22</sup> Gudödi ni' bidxinë' ca' bönni' huen dxin na' guzxi'ë chopá dumí nazaca', ate' rnnë': "Xan, chopá dumí gulú'u lu na'a. Ni dë ia'chopa dumí ca' yöjtíjalena' le." <sup>23</sup> Ní'irö xanë' na' rë' lë': "Naca dxi'a. Nacu' huen dxin tsahui'. Tsáhui'do' benu' cate' ni dë lu no'o láti'do'os. Na'a, yénni'térö cu'a lu no'o. Guyaza ga zoa', udzéjalenu' neda'." <sup>24</sup> Ní'irö cate' bidxinë' bönni' huen dxin na' guzxi'ë tu dumí nazaca' na', rnnë': "Xan, nözda' nacu' bönni' bizxaj, tu' rulapu' ga biti' guzu', en rutubu' ga biti' guchilju'. <sup>25</sup> Que lë ni na' gúdxida' li', ate' guyija', yöjcácha'a dumí quiu' lu yu. Ni dë na'a le nequi quiu'." <sup>26</sup> Ní'irö bubi'ë didza' xanë', en rë' lë': "Nacu' huen dxin biti' naca tsahui', en xöhuëdi. Nöz quézinu' rulapa' ga biti' guza', en rutuba' ga biti' guchilja'. <sup>27</sup> Que lë ni na', gácarö dxi'a quiu' la'tu' bunödzju' dumí quia' lu ná'agaquië' bönni' ulu'gunë' le dxin, ila'guíjalenë' le ia'lati', para cate' huöda' neda', uzi'a le nequi quia' len icja ca'." <sup>28</sup> Ní'irö xanë' na' gudxë' nupa nacuá' ni': "Guli'cúa dumí na' dë lu në'ë bönni' ni, en guli'cú'u le lu në'ë bönni' na' dë queë' chi dumí." <sup>29</sup> Núti'tés nu rugún tsahui' dxin le dë queë', zoa nu unödzaj queë' ia'lati', ate' gáta'da' queë', pero nu na'biti' rugún tsahui' dxin le dë lu në'e, la's dui le dë queë' idúa. <sup>30</sup> Na'a, bönni' huen dxin biti' naca tsahui' ni, guli'tsöjchú'una-né' ní'ilö ga naca chul-la. Ni' cödxi yéché'ë, en gagu zxea láyë'ë.

### Cristo uchi'a usöröe' quégaca bönachi

<sup>31</sup> Gunné' ca' Jesús:

—Cate' ni' huöda' neda', Bönni' Guljë' Bönachi, idinná bë'a, ate' dzágagaquië' neda' yúgu'të gubáz lá'ayi quia', ní'irö cö'a lataj tsahui' quia', ga na' uchi'a usöröa' quégaca bönachi. <sup>32</sup> Ulu'dubi dërö lahua' neda' bönachi yödzölió ni, ate' ucu'a léguequi tsölá'a huéaj ca runë' bönni' uyú bö'cu' zxila', rucu'ë-ba' tsölá'a huéajba' yugu' chivo, en yugu' bö'cu' zxila'. <sup>33</sup> Yugu' bö'cu' zxila' na' ucu'ë-ba' cuita lë'ë ibëla, ate' yugu' chivo na' ucu'ë-ba' cuita lë'ë yöggöla. <sup>34</sup> Ní'irö, neda', bönni' unná bë', guía' nupa nacuá' cuita lë'a ibëla, innia': "Guli'dá ga zoa', libí'ili' bubéaje' Xuza' libí'ili' quez queë'. Nequi queéli' lataj ga na' rinná bë'ë, lë na' bupé'ë queéli' dza ni'te cate' ni' benë' yödzölió. <sup>35</sup> Caní nequi queéli' tu' guduna', ate' bénnali' le gudahua'. Gubidxa' nisa, ate' bénnali' le gu'a. Guca' ca tu bönni' ridá zi'tu', ate' gulú'uli' neda' lídxili'. <sup>36</sup> Biyadzaj le gácua', ate' bugáculi' neda' le ráculi'. Gü'ida', ate' buduyúli' neda'. Guyu'a lidxi güié, ate' buduyúli' neda'." <sup>37</sup> Ní'irö ulu'bí'ë didza' bönni' tsahui' na', ilé' neda': "Xan, ¿bátaxi bilé'etu' Li' gudunu', ate' bugágutu' Li'? ¿Bátaxi gubidxu', ate' bénnatu' le gu'u? <sup>38</sup> ¿Bátaxi bilé'etu' Li' gudó' zi'tu', ate' gulú'utu' Li' lídxitu'? ¿Bátaxi biyadzaj le gacu', ate' bugácutu' Li' le rácutu'? <sup>39</sup> ¿Bátaxi bilé'etu' Li' gü'ini', o guyú'u lidxi güié, ate' buduyútu' Li'?" <sup>40</sup> Ubi'a didza' neda', bönni' unná bë', ate' guía' légaquië': "Le nácatë rea' libí'ili', tu' benli' caní queë' nu bönni' bőcha'ado' ni, sal-la' náquië' bönni' cá'asö, quia' neda' caz benli' ca'."

<sup>41</sup> Ní'irö guía' nupa nacuá' cuita lë'a yöggöla, innia': "Guli'cuítä ga zoa', libí'ili' na' nabága'li' xíguia', tsöjtsázali' lu guí' na' biti' ulu, lë na' bupé'ë Dios ni'a que tu' xihui',

en quéguequi gubáz dá'gaca le. <sup>42</sup> Caní gaca queéli' tu' guduna', ate' biti' bennali' le gahua'. Gubidxa' nisa, ate' biti' bennali' le guíja'. <sup>43</sup> Guca' ca bönni' ridé' zi'tu', ate' biti' gulú'uli' neda' lídxili'. Biyadzaj le gácua', ate' biti' bugáculi' neda' le ráculi'. Güíida', enca' guyu'a lidxi guíë, ate' biti' buduyúli' neda'." <sup>44</sup> Ní'irö ila'nná ca' nupa na', ilé neda': "Xan, ¿bátaxi bilé'etu' Li' gudunu', o gubidxu', o gucu' ca bönni' ridé' zi'tu', o biyadzaj le gacu', o güíinu', o guyú'u lidxi guíë, ate' biti' gúcalentu' Li?" <sup>45</sup> Ní'irö ubi'a didza' neda', bönni' unná bë', guía' légaquië: "Le nácatë rea' libíili', tu' cabí bi benli' que tu nu nutsa' ladaj nupa nacuá' ni, sal-la' naca cá'asö nu na', biti' bi benli' quia' neda'." <sup>46</sup> Ní'irö bönachi tuá' dö' na'la' tsöjtsázagacatë ga ni' ila'guí i ila'záca'tica'sö, pero bönachi tsahui' ni' gata' yöl-la' na'bán idú quéguequi.

## 26

### *Tun xtídza'gaquië' bönni' yudo' ila'zonë' Jesús*

(Mr. 14:1-2; Lc. 22:1-2; Jn. 11:45-53)

<sup>1</sup> Cate' budxi bë'ë Jesús yugu' didza' ni, gudxé' yugu' bönni' usëda queë', <sup>2</sup> rñnnë':

—Nöz quézili' ia'chopa dza idxín Laní Pascua, ate' dza na' neda', Bönni' Guljë' Bönachi, ulu'dödë' neda' lu ná'agaca nupa ulu'dá' neda' lë'e yaga cruz.

<sup>3</sup> Ní'irö bila'dxiné' yugu' bixúz unná bë' len yugu' bönni' yudo' usedi, en bönni' gula tu'zéajni'iné' bönachi judío, ate' bulu'dubé' ga naca lò'a lidxi bixúz lo, lë' Caifás.

<sup>4</sup> Ni' gulún xtídza'gaquië' ila'zonë' Jesús, lu yöl-la' rizi' yë' quégaquië', para ilútië' Lë'.

<sup>5</sup> Ta'nné:

—Biti' gunru' lë ni dza laní, para cabí ila'dzatsa bönachi.

### *Tu nigula rigú'unu le rilá' zxixi icjë' Jesús*

(Mr. 14:3-9; Jn. 12:1-8)

<sup>6</sup> Cate' ni' zoë' Jesús lu yödzö Betania lu yu'u lidxe' Simón, bönni' na' güíiné' huë' nudzu' ruzödi, <sup>7</sup> bidxinnu cídzu'lë' Jesús tu nigula, nuá'anu tu bóga'do' néquini guiój nazaca', en yudzu tu le rilá' zxixi le nazáca'da', ate' gulú'unu le icjë' Jesús cate' ni' rö'ë rahuë'. <sup>8</sup> Cate' bila'lé'ené' bönni' usëda queë' Jesús lë ni, gula'lenë', ta'nné':

—¿Bizz que réqui ditaj lë ni? <sup>9</sup> Guca nu guti' lë ni, en si' dumí zián para gácalenru' yugu' bönachi yechi'.

<sup>10</sup> Cate' biyönnë' Jesús lë ni, rë' légaquië':

—¿Bizz que rñnnëli' queénu nigula ni? Tsahui' naca le bennu quia'. <sup>11</sup> Yugu' bönachi yechi' ila'cuá'lentica'sö libíili', pero neda' biti' ugá'analentica'sa' libíili'. <sup>12</sup> Le bennu nigula ni, gulú'unu neda' le rilá' zxixi ni, naca le rupá'anu neda' para dza igácha'a yeru ba. <sup>13</sup> Le nácatë rea' libíili', gáti'tés luyú yödzölió ga gaca libán que didza' dxi'a ni, lësca' ila'guixjö' bönachi le bennu nigula ni quia' para nu tsöjnë lënu.

### *Rizi' lu në'ë Judas udödë' Jesús lu ná'agaquië' bönni' unná bë'*

(Mr. 14:10-11; Lc. 22:3-6)

<sup>14</sup> Ní'irö guyijë' Judas Iscariote ga na' nacu'ë bixúz unná bë'. Náquië' bönni' dzáguië' chínnuë' na' dä'gaquië' Jesús, <sup>15</sup> ate' gudxé' légaquië':

—¿Bizxi gúnnali' quia' channö neda' udöda'-në' Jesús lu ná'ali'?

Bulu'gá'analenë' lë' tsahui' ilu'ë lë' chi uruá' dumí plata. <sup>16</sup> Ní'irö gusí lahuë' Judas na' risí ribö'ë udödë' Jesús lu ná'agaquië'.

### *Le ráguru' le rusá' ládxí'ru' ca gútië' Xanru'*

(Mr. 14:12-25; Lc. 22:7-23; Jn. 13:21-30; 1Co. 11:23-26)

<sup>17</sup> Cate' naca dza risí lo laní quégaquië' bönni' judío cate' tahuë' yöta xtila le cabí nazí'i cúa zi que, gula'bígui'ë bönni' usëda queë' Jesús ga zoë', en té' Lë':

—¿Gazxi ré'ënu' tsöjpá'atu' queéru' para gáguru'-ba' bô'cu' zxíla'do' dzö' Laní Pascua?

<sup>18</sup> Jesús rë' légaquië':

—Guli'tséajtsöca' yödzö ni' ga na' zoë' tu bönni', en guli'guië: "Bönni' rusédinë' netu' rnnë': Chizá' gala' dza quia'. Lu yu'u lidxu' gágulengaca'-në' bönni' usëda quia' bö'cu' zxila' do' dzö' Laní Pascua."

<sup>19</sup> Ní'irö gulunë' bönni' usëda queë' ca na' gunná bé'enë' Jesús légaquië', ate' bulu'pé'ë le ilahuë' dzö' Laní Pascua.

<sup>20</sup> Cate' chigudzö' dza na', Jesús guró'lenë' idxínnutë' bönni' usëda queë' tahuë'.

<sup>21</sup> Tsanni ni' tahuë', Jesús rë' légaquië':

—Le nácatë rea' libi'ili', tu nu nutsa' ladjali' ni udödi neda'.

<sup>22</sup> Ní'irö bulu'hu'ini ladxí'gaquië', en gula'nábinë' Jesús tu tuë', ta'nnë':

—Xan, ¿naru' neda'?

<sup>23</sup> Bubi'ë didza' Jesús, rnnë':

—Bönni' ni runë' në'ë tsözxöñ len na'a lu yó'öna, bönni' ni udödë' neda'. <sup>24</sup> Le nácatë neda', Bönni' Guljë' Bönachi, uyija' ga gátia' ca na' nazúaj lu guichi lá'ayi ca ral-la' gaca quia', pero bica' bayechi' nu na' udödi neda' gátia'. Gácarö dxi'a queë' bönni' na' la' cabí guljë'.

<sup>25</sup> Ní'irö bubi'ë didza' Judas, bönni' na' udödë' Jesús, rnnë':

—Bönni' Usedi, ¿naru' neda'?

Jesús rë' lé':

—Ön, li' na'.

<sup>26</sup> Tsanni ni' tahuë', gudélë'ë Jesús yöta xtila, en gudxë' Dios: "Xclenu'." Ní'irö buzzuzxjë' le, en bunödzjë' quégaquië' bönni' usëda queë', rnnë':

—Guli'sf', guli'gagu. Lë ni le naca caza'. Ca bena' que yöta xtila ni rulu'i ca gaca que le naca caza'.

<sup>27</sup> Gudélë'ë ca' tu zxíga'do', en gudxë' Dios: "Xclenu'." Ní'irö bunödzjë' ca' quégaquië', rnnë':

—Guli'gui'aj yúgu'tëli'. <sup>28</sup> Lë ni rulu'i ca naca xichöna' le run tsutsu didza' cubi rucá'ana tsahui'. Xichöna' na' ilalaj ni'a quégaca bönachi zián para gaca uniti lahuë' Dios yugu' dul-la' nabága'gaquië'. <sup>29</sup> Rea' ca' libi'ili', bíti'rö guí'ja' xisi le ribía lubá uva ni cate' idxinrö dza ni' guí'jalena' libi'ili' tu le cubi ga ni' rinná bé'ë Xuza'.

*Jesús rnnë' innë'* Pedro biti' núnbe'ë Lë'

(Mr. 14:26-31; Lc. 22:31-34; Jn. 13:36-38)

<sup>30</sup> Cate' budxi gulul-lë' yöl-la' ba queë' Dios, yójáquië' lu Guí'a Yaga Olivo. <sup>31</sup> Ní'irö Jesús rë' légaquië':

—Yúgu'tëli' gaca chopá ladxí'li', en ucá'anali' neda' na'a dzö' ni, tu' nazúaj lu guichi lá'ayi ca gaca quia', le rnna: "Guna' ga gátië' Bönni' Uyú Bö'cu' Zxila', ate' ilásilasiba' bö'cu' zxila' na'." <sup>32</sup> Cate' ubana' lu yöl-la' guti, ní'irö tséaja' tsöjnörwa' loli' saca' luyú Galilea.

<sup>33</sup> Ní'irö bubi'ë didza' Pedro, en rë' Jesús:

—Sala' ilaca chopá ladxí'gaquië', en ulu'ca'anë' yúgu'të' Li', neda' biti' gaca chopá ladx'a, biti' ucá'ana' Li'.

<sup>34</sup> Jesús gudxë' lë':

—Le nácatë rea' li', na'a dzö' ni, cate' si' códixilöba' böra, li' innó' tsonna luzuí biti' núnbe'u neda'.

<sup>35</sup> Ní'irö Pedro gudxë' Jesús:

—Sal-la' gátilentea' Li', biti' ca' innia' biti' núnbe'a Li'.

Lësca' caní gula'nnë' yúgu'të bönni' usëda queë'.

*Jesús rulidzë' Dios la' yëla Getsemaní*

(Mr. 14:32-42; Lc. 22:39-46)

<sup>36</sup> Ní'irö Jesús bidxínlenë' légaquië' la' yëla Getsemaní, ate' gudxë' yugu' bönni' usëda queë' na', rnnë':

—Guli'cö'tsöca' ni tsanni tséaja' ia'lati' ní'ilö, tsöjlidza'-në' Dios.

<sup>37</sup> Jesú斯 guché'ë Pedro len iropë' zxí'inë' Zebedeo, ate' gusí lahuë' ruhuï'innë', en risëbi ládxë'ë. <sup>38</sup> Ní'irö Jesú斯 gudxë' légaquië':

—Ruhuï'ini ládx'a'a, en huáti caza' lu yöl-la' risëbi ladxi'. Guli'gá'ana ni, en guli'ná' yëla tsözxón len neda'.

<sup>39</sup> Gudödë' Jesú斯 ia'láti'do' ní'ilö, ate' ni' biyéchuë'. Busudxín lahuë' lu yu, en bulidzë' Dios, gunné':

—Xuza', channö huáca, ben ga biti' gun bayudxi qui'i saca'a lë ni, calëga ca ré'ënda' neda', pero ca ré'ënu' Li' gunu'.

<sup>40</sup> Cate' budxinë' Jesú斯 ga na' nacu'ë bönni' usëda queë', yöjxáquië' légaquië' tasië', ate' rë' Pedro:

—¿Naru' cabí gúcatsö iná'alenu' neda' tsözxón yëla tu chí'ido'? <sup>41</sup> Guli'ná' yëla, en buli'lidzë' Dios inábili'-në' gácalenë' libí'ilí', para cabí güí'ilí' Satanás tu' xihui' lataj si' bë' libí'ilí' le xihui'. Bö' naca cázali' nasína'tica'sö, pero lu yöl-la' böñachisö queéli' nacuídi'ilí'.

<sup>42</sup> Ní'irö guyijë' Jesú斯 le buropi luzuí, en bulidzë' Dios, rnnë':

—Xuz, channö cabí gaca gunu' ga biti' qui'i saca'a lë ni, ben ca raza ládxu'u Li'.

<sup>43</sup> Cate' bőajë', leyúbölö buduxaquië' légaquië' tasië' tu' nadódirö yëla guiój lógaquië'.

<sup>44</sup> Ní'irö bucá'anë' Jesú斯 légaquië', ate' guyijë' leyúbölö, en bulidzë' Dios le bunni luzuí, ate' tuz ca gunné' zí'alö rnnë'. <sup>45</sup> Leyúbölö bőajë' ga na' nacu'ë bönni' usëda queë', en rë' légaquië':

—¿Rásitsali' na'a, en ruzi'tsö ládx'i'li'? Buli'yútsöca', chibudzaga lo. Neda', Bönni' Guljë' Bönachi, chinadöda' lu ná'agaquië' bönni' dul-la'. <sup>46</sup> ¡Guli'chasa, uyéajru'! Buli'yútsöca', bönni' na' rudödë' neda' chibidxinë' ni.

### Ta'che'ë' Jesú斯 nadzunë'

(Mr. 14:43-50; Lc. 22:47-53; Jn. 18:2-11)

<sup>47</sup> Tsanni ni' ru'ë Jesú斯 didza' ni, Judas, bönni' nabábalenë' idxínnutë' na', la' bidxitë' ni', ate' dzágagaquië' bönni' zián lë', nuá'agaquië' güí'e tuchi', en yugu' yágado'. Yugu' bixúz unná bë', en bönni' gula tu'zéajni'inë' bönachi judío nasól-la'gaquië' légaquië'.

<sup>48</sup> Judas, bönni' na' rudödë' Jesú斯, chibulu'inë' légaquië' tu le gunë' le gaca bë' nu naca Jesú斯, gunné':

—Bönni' na' utsaga lahua'-në', Lë' na' Jesú斯. Guli'sönë'.

<sup>49</sup> Ní'irö gubígu'ë Judas ga na' zoë' Jesú斯, rnnë':

—Padiux, Bönni' Usedi.

Ní'irö la'busudxín lotë' Lë'. <sup>50</sup> Jesú斯 rë' lë':

—Böcha'a, ¿bizxi huen zo'o ni?

Ní'irö gula'biguë'ë bönni' na', ate' gula'zöne' Jesú斯. <sup>51</sup> Tuë' bönni' dzáguië' Jesú斯 gulecjë' güí'e tuchi' queë', en benë' huë', guchúguië' güídi náguië' bönni' huen dxin queë' bixúz lo. <sup>52</sup> Jesú斯 gudxë' lë':

—Bugú' güí'e tuchi' quiu' lidxi. Yúgu'të nupa tu'dí'ini güí'e tuchi', lu güí'e tuchi' ilátigaca. <sup>53</sup> ¿Naru' cabí nőzinu' huáca ulidza' Xuza', ate' Lë' la' isól-la'të' ziántérö ca chinnu cö' gubáz lá'ayi le naca zián gáyu'ë tu cö' huéaj? <sup>54</sup> Channö guna' caní, ¿nacxi gaca udxín le nazúaj lu guichi lá'ayi, le rnna caní ral-la' gaca quia'?

<sup>55</sup> Ní'irö Jesú斯 gudxë' yugu' bönni' ni:

—¿Birúaitsali' nuá'ali' güí'e tuchi', en yágado' para sönli' neda' ca runli' rizönli'-në' gubán? Yugu' dza gurò'a loli' ga naca lu chila yudo', en busédigacada' bönachi, pero biti' guzxönlí' neda'. <sup>56</sup> Raca caní yúgu'të lë ni para udxín le nazúaj lu guichi lá'ayi, ca na' gula'nnë' bönni' gulu'ë didza' uláz queë' Dios.

Ní'irö yúgu'të bönni' usëda queë' Jesú斯 bulu'cá'anë' Lë', en bulu'zxúnnajë' ni'.

### Ridxinë' Jesú斯 lógaquië' bönni' yudo'

(Mr. 14:53-65; Lc. 22:54-55, 63-71; Jn. 18:12-14, 19-24)

<sup>57</sup> Ní'irö yugu' bönni' na' zöngaquië' Jesús gula'chë'ë Lë', ate' bila'dxinë' lahuë' Caifás, bixúz lo, ga ni' nudúbigaquië' ca' yugu' bönni' yudo' usedi len bönni' gula tu'zéajni'inë'.

<sup>58</sup> Pedro söjnáhuë' Jesús zi'tu' zi'tu'sö, en bidxinë' ga naca lõ'a lidxi bixúz lo na', para ilé'enë' nacxi utságuië' Jesús.

<sup>59</sup> Yugu' bixúz unná bë' len bönni' gula tu'zéajni'inë', en bönni' yudo' tu'chi'a tu'söröë', bulu'guiljë' nu uzegui Jesús didza' sal-la' si' yë'ë bönni' na', para gaca ila'chúguië' queë' gátië'. <sup>60</sup> Cuntu nu bila'dzólinë' sal-la' bila'dxinë' bönni' zián, en gula'nné' queë' le cabí nácatë. Ga búdxitë bila'dxinë' chopë' bönni', ate' lu yöl-la' rizí' yë' quégaquië' gula'nné' queë', <sup>61</sup> ta'nné':

—Bönni' ni gunnë': “Huaca uquínnaja' yudo' queë' Dios, ate' uchisa' le ia'tsonna dzasö.”

<sup>62</sup> Ní'irö guzuínë' bixúz lo na', en rë' Jesús:

—¿Naru' cabí rubí'itsö' didza'? ¿Bizxi caz lë ni ta'nné' bönni' ni quiu'?

<sup>63</sup> Jesús biti' bi gunnë'. Ní'irö bixúz lo gudxë' Lë':

—Ni'a queë' Xanru' Dios ban rinná bë'eda' Li' quíxjö'u le nácatë. Gudíxjö'i netu' channö nacu' Li' Cristo, Zxi'inë' Dios.

<sup>64</sup> Jesús rë' lë':

—Ca na' rnno' naca'. Le nácatë rea' libí'ili', ilé'eli' neda', Bönni' Guljë' Bönachi, rö'a cuita lë'ë ibëla Dios, ga ni' dë lu na'a yöl-la' unná bë', ate' guída' lu böaj lúzziba, en idxina' ga zóali'.

<sup>65</sup> Ní'irö lu yöl-la' rilé queë' guchözë' bixúz lo lari' nácuë', rnnë':

—¡Gunnë' zi'ë bönni' ni queë' Dios! ¿Núzxirö naquíniru' nu inné queë' bönni' ni? Chibiyón quézili' didza' zi' bë'ë queë' Dios. <sup>66</sup> ¿Nacxi rusáca'li' queéli'?

Bulu'bi'ë didza', gula'nné':

—Nabáguë'ë xíguia' gátië'.

<sup>67</sup> Ní'irö bulu'chejë' zxöna' lahuë' Jesús, en gulu'ë dö' queë'. Gula'gápë'ë ru'ë Jesús ia'zíca'rë', <sup>68</sup> en të' Lë':

—¿Nácatso' Li' Cristo? Gunnéya'atsöca' na'a, ¿nuzxi na' gudapa' Li'?

*Pedro rnnë': “Biti' núnbe'a-në' Jesús”*

(Mr. 14:66-72; Lc. 22:56-62; Jn. 18:15-18, 25-27)

<sup>69</sup> Tsanni ni' gulaca lë na', rö'ë Pedro lõ'alö, ate' bidxinnu tunu nigula huen dxin ga na' zoë', ate' rnñanu:

—Lésca' li' gudálenu' Jesús, bönni' Galilea na'.

<sup>70</sup> Gudá'baguë'ë Pedro lógaca bönachi nacuá' ni', rnnë':

—Biti' nözda' nuzxi que na' ru'u didza'.

<sup>71</sup> Cate' birúajë' Pedro ga nu riyaza lõ'a, bilé'enu-në' ia'tunu nigula, ate' gúdxinu nupa nacuá' ni':

—Bönni' ni gudálenë' ca' Jesús, bönni' Nazaret na'.

<sup>72</sup> Leyúbölö gudá'baguë'ë Pedro, en buzötje' Dios, rnnë':

—Biti' ca' núnbe'a-në' bönni' ni.

<sup>73</sup> Iá'láti'do'os gudzé, gula'bíga' nupa nacuá' ni' ga na' zoë' Pedro, en të' lë':

—Le nácatë li' nunu' ca' tsözxöñ légaquië' tu' naca bë'u yöl-la' ru'isö quiu' didza'.

<sup>74</sup> Ní'irö gusí lahuë' Pedro rudxía dö' cuinë', en ruzötje' Dios, rnnë':

—Biti' ca' núnbe'a-në' bönni' ni.

La' ná'asö gurödxítëba' böra. <sup>75</sup> Ní'irö yöjnenë' Pedro didza' gudxë' Jesús lë', gunnë': Cate' si' códixilöba' böra, tsonna luzuí chigunnó' biti' núnbe'u neda', ate' burúajë' Pedro ni', en gurödxi yéchi'dë'ë.

<sup>1</sup> Cate' za' rení' dza na', gulún xtídza'gaquië' yúgu'té bixúz unná bë' len bönni' gula tu'zéajni'iné' bönni' judío para ilútië' Jesús. <sup>2</sup> Gula'ché'ë Jesús nágue'ë, ate' bulu'dödë' Lë' lu næ'ë Poncio Pilato, bönni' rinná bë'ë uláz que yödzö Roma.

### *Ratië' Judas*

<sup>3</sup> Cate' chinóziné' Judas, bönni' na' budödë' Jesús lu ná'agaquië' bönni' yudo', narugu queë' Jesús gátië', buí'inné', ate' yöju'ë chi uruá' dumí plata na' lu ná'agaquië' bixúz unná bë', en yugu' bönni' gula na'. <sup>4</sup> Rë' légaquië':

—Bena' dul-la' tu' budöda'-në' bönni' tsahui' gátië'.

Ní'irö të' lë':

—Biti' gun lë ni ga cő'ötu' böninga. Le ben cazu' li' na'.

<sup>5</sup> Ní'irö gurú'uné' Judas yugu' dumí plata na' ga naca chila yudo', ate' buzé'ë ni', en yöjsí' yené'.

<sup>6</sup> Bulu'zi'ë bixúz unná bë' yugu' dumí plata na', ta'nné':

—Biti' sa'yéaj cú'uru' dumí ni ga rigú'uru' dumí que yudo', tu' naca lazxjë' tu bönni' ratië' bönachi.

<sup>7</sup> Ní'irö gulún xtídza'gaquië', ate' gulá'uiné' dumí na' tu la' yëla queë' tu bönni' huen rö'ö para gaca ga ila'gáchë'ë bönni' zi'tu'. <sup>8</sup> Que lë ni na', ga ridxitné na'a dza nazí'i le lataj na', La' Yéla Rön. <sup>9</sup> Caní guca ca na' gunné' Jeremías, bönni' bë'ë didza' uláz queë' Dios, gunné': "Gula'guélë'ë chi uruá' dumí plata na', tsca le gula'zéqui'në' bönni' Israel Lë', <sup>10</sup> ate' dumí na' gulá'uiné' la' yëla queë' tu bönni' huen rö'ö. Lë ni bulu'iné' Xana' neda'."

### *Ridxiné' Jesús lahuë' Pilato*

(Mr. 15:2-5; Lc. 23:3-5; Jn. 18:33-38)

<sup>11</sup> Cate' bulu'sudxiné' Jesús lahuë' Pilato, bönni' na' rinná bë'ë uláz que yödz Roma, bönni' ni gunábiné' Jesús, rë' Lë':

—¿Nacu' Li' Bönni' inná bë'ené' bönachi judío?

Jesús rë' lë':

—Ca nácasö rnno'.

<sup>12</sup> Cate' yugu' bixúz unná bë' len bönni' gula tu'zéajni'iné' bulu'zégui'ë Jesús didza', biti' bi didza' bubi'ë Jesús. <sup>13</sup> Ní'irö Pilato rë' Jesús:

—¿Naru' cabí riyóntsenu' cate' xö le ta'nné' quiu'?

<sup>14</sup> Jesús biti' bi didza' bubi'ë. Caní guca, bubániné' bönni' unná bë' na'.

### *Rirugu queë' Jesús gátië'*

(Mr. 15:6-20; Lc. 23:13-25; Jn. 18:38-19:16)

<sup>15</sup> Cate' naca dza Laní Pascua na', dë caz tu le runé' Pilato, bönni' unná bë' na', ca ta'naba bönachi rusané' tuë' bönni' yu'ë lidxi guíë, nútítës nu té'ëni usané'. <sup>16</sup> Dza na' tu bönni' nabaguë'ë xíguia', lë' Barrabás, yu'ë lidxi guíë ni'. <sup>17</sup> Cate' bulu'dubi bönachi zián ni', Pilato gunábiné' légaquië', rnné': —¿Nuzxi ré'ënili' usana' queéli'? ¿Naru' Barrabás o Jesús, Bönni' na' lë' Cristo?

<sup>18</sup> Caní gunné' Pilato tu' réquibe'ené' bulu'dödë' bönni' yudo' Jesús lu næ'ë tu' tu'zxé'ené' Lë'.

<sup>19</sup> Tsanni ni' rö'ë Pilato ga na' ruchi'a rusöröë', nigula queë' gusö'l-la'nu nu tsöjödxi lë', rrna:

—Biti' bi gunu' queë' bönni' tsahui' ni, tu' gúdxide'eda' guduyëla lu yëla bëchigal tu' nòzинé' Lë'.

<sup>20</sup> Yugu' bixúz unná bë' len bönni' gula tu'zéajni'iné' gula'gú'u yö'l-lë'ë bönachi zián na' para ila'nabi Pilato usané' Barrabás na', ate' gútië' Jesús. <sup>21</sup> Leyúbölö bë'ë didza' bönni' unná bë' na', rë' légaquië':

—¿Núzxilë' chopë' ni ré'ënili' usana'-në' queéli'?

Gula'nné':

—Barrabás.

<sup>22</sup> Ni'irö Pilato gunábinë' légaquië', rnnë':  
—¿Nacxi guna' queë' Jesús, bönni' na' lë' Cristo?

Yúgu'të' ta'nné':

—¡Budé'ë lë'e yaga cruz!

<sup>23</sup> Ni'irö bönni' unná bë' na' rë' légaquië':  
—¿Bizxi dö' benë?

Zídzajrö gulu'ë didza', ta'nné':

—¡Budé'ë lë'e yaga cruz!

<sup>24</sup> Cate' réquibe'enë' Pilato biti' birúaj xtídzë'ë, pero gula'dzásarö bönnachi, ni'irö gudélé'ë nisa, en gudibi né'ë lógaquië', rnnë':

—Biti' bi xíguia' nabága'a neda' tu' nözi yöl-la' guti queë' bönni' tsahui' ni. Le gun cázali' libi'ili' lë ni.

<sup>25</sup> Bulu'bí'i didza' yúgu'të bönnachi ni', ta'nná:

—¡Yöl-la' guti queë' bönni' ni ibága'tu' netu', en ila'baga' ca' zxí'initu'!

<sup>26</sup> Ca' guca, Pilato busanë' Barrabás na' lu ná'agaquië'. Ni'irö gunná bë'enë' bönni' röjáquië' gudil-la ila'guínë' Jesús, ate' gudödi ni' budödë' Lë' lu ná'agaquië' para ulu'dé'ë Lë' lë'e yaga cruz.

<sup>27</sup> Yugu' bönni' röjáquië' gudil-la nacu'ë lu né'ë bönni' unná bë' na' gula'chë'ë Jesús lu yu'u yúlahui' nazí'i le pretorio, ate' ni' bulu'tubë' yúgu'të bönni' röjáquië' gudil-la nacu'ë ni' ga na' zoë' Jesús. <sup>28</sup> Ni'irö gula'lecjë' lari' nácuë' Jesús, en bulu'gácuë' Lë' tu lari' xiná chul-la, ca rácugaca nupa ta'nná bë'. <sup>29</sup> Bulu'dxíë' icjë' tu le néquini ni'a né'e yaga yötsi' le naca ca le dxia icjë' bönni' rinná bë'ë, en bulu'zóë' tu guído' lu né'ë ibëla le rulu'i ca tu yaga que bönni' yúlahui'. Ni'irö bulu'zóá zxibë' lahuë', en bulu'titjë' Lë', ta'nné':

—¡Bica' ba Li', rinná bë'enu' bönnachi judío!

<sup>30</sup> Ni'irö bulu'chejë' Lë' zxöna', ate' bulu'guélë'ë gui na', en gula'guínë' icjë'. <sup>31</sup> Gudödi bulu'titjë' Jesús, gula'lecjë' lari' na' nácuë', ate' bulu'gácuë' Lë' lari' que cazë'. Ni'irö gula'chë'ë Lë' para tsöjdá'agaquië' Lë' lë'e yaga cruz.

### Tu'dé'ë Jesús lë'e yaga cruz

(Mr. 15:21-32; Lc. 23:26-43; Jn. 19:17-27)

<sup>32</sup> Cate' ni' bila'rúajë' bönni' na', yöjxáca'gaquië' Simón, tu bönni' Cirene, ate' gulunë' ga bi'ë yaga cruz queë' Jesús.

<sup>33</sup> Cate' bila'dxinë' lataj nazí'i le Gólgota, le rnna lu didza' xidza', Lataj Que Böga' Ícjaru', <sup>34</sup> bulu'gui'jë' Jesús nupi zi nutsí'i zxígala'aba' böa' guixi'. Cate' buxi'i ru'ë Jesús, biti' gó'unnë' guí'jë'.

<sup>35</sup> Cate' chinudá'agaquië' Lë' lë'e yaga cruz, gula'guísië' lari' nácuë', en bulu'quitjë' lahui le gaca bë' núzxilë' guequi queë'. Caní guca, budxín lë na' gunné' bönni' bë'ë didza' uláz queë' Dios, gunné': "Gula'guísië' lari' nácu'a', en bulu'quitjë' lahui le gaca bë'." <sup>36</sup> Ni'irö gula'bö'ë ni', tu'yúë' Jesús. <sup>37</sup> Lësca' bulu'zóë' lë'e yaga cruz ícjale' Jesús tu didza' le riguijö' le nabáguë'ë le rnna caní: "Bönni' ni Jesús, Bönni' rinná bë'enë' bönnachi judío."

<sup>38</sup> Ga ni' dë'ë Jesús, bulu'dé'ë ca' lë'egaca yaga cruz chopë' bönni' gubán. Tuë' bulu'dé'ë cuita lë'ë ibëla, en ia'túë' na' cuita lë'ë yögöla. <sup>39</sup> Gula'dödë' ni' yugu' bönni' bulu'lidza zi'ë Jesús, en bulu'tá ícjagaquië', tu'titjë' Lë', <sup>40</sup> ta'nné':

—¡Ön, Li' na' uquínnaju' yudo', ate' tsonna dzasö ca' uchísatso' le! ¡Busölá cuinu' na'a channö nacu' Li' Zxí'inë' Dios! ¡Böttjatsöca' lë'e yaga cruz na'!

<sup>41</sup> Lësca' caní bulu'titjë' Lë' yugu' bixúz unná bë' len yugu' bönni' yudo' usedi, en yugu' bönni' yudo' fariseo, len bönni' gula tu'zéajni'inë', ta'nné':

<sup>42</sup> —Yugu' nu yúbölö busölé' bönni' ni, pero biti' gaca usölá cuiné'. Channö náquië' Bönni' inná bé'ené' bönachi Israel, huöttjatsöquië' na'a lë'e yaga cruz, ate' tséajlé'ëru' Lë'.

<sup>43</sup> Lë' buzxöni ládxé'ë Dios. Dios usölá cazé' Lë' na'a channö raza ládxé'ë Lë', tu' gunnë': "Zxí'iné' Dios naca'."

<sup>44</sup> Lësca' caní yugu' bönni' gubán na' dá'gaquië' lë'egaca yaga cruz ga ni' dë'ë Jesús bulu'lidza zi'ë Lë'.

### Ratië' Jesús

(Mr. 15:33-41; Lc. 23:44-49; Jn. 19:28-30)

<sup>45</sup> Cate' bidxín huagubidza, guchul-la idútë yödzölió ga bidxitné idú ridödi xihuö. <sup>46</sup> Idú ridödi xihuö na', bë'ë zidzaj didza' Jesús, rnnë':

—Elí, Elí, ¿lama sabactani?

Didza' ni rnnna lu didza' xidza': "Dios quia', Dios quia', ¿bizz que nubéaj ládxu'u neda'?"

<sup>47</sup> Cate' nupa nacuá' ni' bila'yöni didza' ni, ta'nná:

—Bönni' ni rulidzé' Elías, bönni' ni' bë'ë didza' uláz queë' Dios.

<sup>48</sup> La' guxítitë' tuë' bönni' nútsé'ë ládjagaquië', en gudélë'ë tu le bululu rizxupi nisa, ate' buxúpiné' le nupi zi, en buzóe' le tu lu gui, ate' butságuië' le ru'ë Jesús para xupé'.

<sup>49</sup> Ni'irö ia'zíca'rë' bönni' ni' ta'nné':

—¡Gulözagarö! ¡Uyútsöca'ru' channö huidé' Elías usölé' Lë'!

<sup>50</sup> Leyúbölö gurödxi'ë zidzaj Jesús, ate' burúajtë bö' naca cazé', gútité'. <sup>51</sup> La' ná'asö biröza'të lari' nal-la' lu yudo', birúaj choplö, le gudela' icjlö ga bidxitné xini'i. Ni'irö gudödi budó' zxu', en gula'lá'a guiój. <sup>52</sup> Gula'yalaj yero ba quégaca nupa chinátigaca, nupa ni' gula'yéajlé' Dios, ate' bulu'bán bönachi na'. <sup>53</sup> Gudödi bubanë' Jesús, bulu'rúajé' bönni' na' yero ba quégagaquië', en gula'yázië' yödzö lá'ayi Jerusalén, ga ni' bila'lé'e bönachi zián légaquië'.

<sup>54</sup> Ni'irö gúdxiné' bönni' na' rinná bë'ené' bönni' rójáquië' gudil-la, enca' yugu' bönni' rójáquië' gudil-la nacuá'lené' lë' tu'yúe' Jesús, ate' gunnë':

—Le nácatë bönni' ni gúquië' Zxí'iné' Dios.

<sup>55</sup> Zí'tu'sö gula'cuá'anu nigula zián tu'yunu Jesús, nigula na' gula'dálenヌ Jesus cate' ni' buzé'ë luyú Galilea, ate' gulunnu xichiné', gula'gú'unu le gulahuë'. <sup>56</sup> Lësca' María Magdalena, en María, xiná'agaquië' Jacobo, en José, nútsa'gacanu ládjagacanu, ate' zóanu ca' ni' xiná'agaquië' yugu' zxí'iné' Zebedeo.

### Ta'gu'ë Jesús yero ba le nadaj lë'e guí'a guiój

(Mr. 15:42-47; Lc. 23:50-56; Jn. 19:38-42)

<sup>57</sup> Cate' chiridzó' dza na', bidxiné' José, bönni' Arimatea, tu bönni' rilé'ené' yöl-la' tsahui' queë', en dë'ë ca' Jesús. <sup>58</sup> Bönni' ni yögyúü' Pilato, en gunabé' lataj u'ë Jesús. Ni'irö Pilato gunná bë'ë ulu'nödzjé' queë' Jesús. <sup>59</sup> Guzxi'ë José Lë', en buchóliné' Lë' tu lari' nazaca'. <sup>60</sup> Ni'irö gulu'ë Lë' lu yero ba cubi queë' le naguidjé' lë'e guí'a guiój. Budé'ë tu guiój blaga zxön ga nu riyaza yero ba na', ate' söhuójë'. <sup>61</sup> Gula'cuá'anu María Magdalena, en ia'tunu María ni', rö'gacanu ra' yero ba na'.

### Yugu' bönni' rójáquië' gudil-la tapa chi'ë ba queë' Jesús

<sup>62</sup> Cate' za' reni' ia'tú dza, gudödi bulu'pé'ë que dza lá'ayi quégagaquië' bönni' judío, bulu'dubé' yugu' bixúz unná bë', en yugu' bönni' yudo' fariseo ga zoë' Pilato. <sup>63</sup> Të' Pilato:

—Bönni', rójnetu' bi gunnë' bönni' rizi' yë'ë na', cate' ni' zoë' nabanë', gunnë': "Cate' gaca tsonna dza ubana' lu yöl-la' guti." <sup>64</sup> Que lë ni na' gunná be'e nupa ilún chi'i ba ni' ga idxintë dza bunni, para cabí ídigaquië' bönni' usëda queë' chi'i dzó'ölö, en ulu'béajé' Lë'. Ni'irö ilé' bönachi: "Bubanë' Jesús lu yöl-la' guti." Channö caní gaca, didza' cabí nácatë ni ilu'ë gúnterö huiá' dö' ca ben didza' cabí nácatë na' gulu'ë zí'alö.

<sup>65</sup> Pilato gudxé' légaquië':

—Ni nacu’ë bönni’ röjáquië’ gudil-la. Guli’chë’ë queéli’. Guli’tséaj, guli’gún chi’i yeru ba na’ tsca séqui’li’ gunli’.

<sup>6</sup> N’irö yøjáquië’ ni’, en bulu’sayjë’ dxí’ a yeru ba na’, en bulu’dë’ë lë’ e guiój na’ tu le gaca bë’ channö isalaj, ate’ bulu’cá’anë’ ni’ bönni’ röjáquië’ gudil-la ilún chi’ë le.

## 28

### *Rubanë’ Jesúis lu yöl-la’ guti*

(Mr. 16:1-8; Lc. 24:1-12; Jn. 20:1-10)

<sup>1</sup> Cate’ chigudödi dza lá’ayi quégäquië’ bönni’ judío, en chizá’ rení’ dza domingo, yöyúgacanu María Magdalena en ia’tunu María na’ yeru ba queë’ Jesúis. <sup>2</sup> Tsálido’os gudödi budó’ zxu’. Caní guca, tu’ bötje’ tuë’ gubáz lá’ayi queë’ Xanru’ narúajë’ yehua’ yubá. Bidxinë’ ra’ yeru ba na’, ate’ gudúie’ guiój blaga zxön na’, en gurö’ë lu guiój na’. <sup>3</sup> Nalá’ lahui gubáz lá’ayi na’ ca yösa bení’, ate’ zxila’do’os naca lari’ nácuë’. <sup>4</sup> Cate’ yugu’ bönni’ na’ röjáquië’ gudil-la tapa chi’ë yeru ba na’ bila’lé’enë’ lë’, guládxinë’, en gula’zxízië’. Gula’dzö’ë lu yu, en guláquië’ ca bönni’ nati caz. <sup>5</sup> N’irö gubáz lá’ayi na’ gudxe’ yugu’ nigula na’, rnnë’:

—Biti’ gádxili’. Nözda’ rugufljali’-në’ Jesúis, bönni’ na’ bulu’dë’ë lë’ e yaga cruz. <sup>6</sup> Biti’ zoë’ ni tu’ chiburbanë’ ca na’ chigunná cazë’ Lë’. Guli’dá, uyuli’ ga ni’ gutë’ Xanru’. <sup>7</sup> Guli’tséaj na’a, guli’tsöjödxi yugu’ bönni’ usëda queë’ chiburbanë’ Jesúis lu yöl-la’ guti, ate’ na’a Lë cazë’ inóruë’ loli’ saca’ luyú Galilea. Ni’ ulé’eli’-në’. Chigudxa’ libi’ili’ le gulu’ë Dios lu na’a.

<sup>8</sup> N’irö la’ bulu’zá’tënu ra’ yeru ba na’, tádxinu, en tu’dzéjanu, ate’ carelö söjácanu söjtixjöi’iguequinu yugu’ bönni’ usëda queë’. <sup>9</sup> Tsanni ni’ söjácanu, Jesúis yöjtságuië’ légacanu, ate’ rë’ légacanu:

—Padiux.

N’irö gula’bígaa’nu ga zoë’ Jesúis, en bulu’nida’nu ni’ë. Gula’yéaj ládxí’gacanu Lë’.

<sup>10</sup> N’irö Jesúis rë’ légacanu:

—Biti’ gádxili’. Guli’tséaj, guli’tsöjtixjöi’i yugu’ bôcha’ a tsöjáquië’ saca’ luyú Galilea, ate’ ni’ ulu’lé’enë’ neda’.

### *Le gula’guíxjö’ë yugu’ bönni’ röjáquië’ gudil-la*

<sup>11</sup> Tsanni ni’ söjácanu nigula na’, yugu’ bönni’ na’ röjáquië’ gudil-la gulún chi’ë yeru ba na’ bulu’dxinë’ lu yödzö ni’, ate’ gula’guíxjö’ë’ yugu’ bixúz unná bë’ yúgu’të lë na’ gulaca. <sup>12</sup> Cate’ chibulu’tubë’ yugu’ bönni’ gula tu’zéajni’ inë’, gulún xtídza’gaquië’. N’irö bulu’nödzejë’ dumí zián quégäquië’ bönni’ na’ röjáquië’ gudil-la. <sup>13</sup> Të’ légaquië’:

—Caní innali’: “Bila’dxinë’ bönni’ usëda queë’ chi’i dzö’ölö, en bulu’béajë’ Lë’ tsanni ni’ rásitu’.” <sup>14</sup> Channö huayönnë’ bönni’ rinná bë’ë lë ni, netu’ uzéajni’itu’ lë’, en guntu’ ga biti’ bi gunë’ queéli’.

<sup>15</sup> N’irö yugu’ bönni’ röjáquië’ gudil-la na’ gula’zi’ë dumí na’ ate’ yöjéngäquië’ ca na’ chinazédagaquië’. Caní guca, tu’zé’ bönni’ judío didza’ ni ga ridxitnë’ na’ dza.

### *Jesús risól-lë’ë yugu’ bönni’ gubáz queë’*

(Mr. 16:14-18; Lc. 24:36-49; Jn. 20:19-23)

<sup>16</sup> N’irö idxinéajtë’ bönni’ usëda queë’ Jesúis yöjáquië’ luyú Galilea, ate’ bila’dxinë’ lu guí’ado’ na’ chibulu’i’ inë’ Jesúis légaquië’. <sup>17</sup> Cate’ bulu’lé’enë’ Jesúis, gula’yéaj ládxí’-gaquië’ Lë’, pero bal-lë’ gulaca chopá ládxí’gaquië’. <sup>18</sup> N’irö gubígui’ë’ Jesúis ga na’ nacu’ë, en rë’ légaquië’:

—Dios chinudödë’ lu na’ a yúgu’të yöl-la’ unná bë’ yehua’ yubá, en luyú ni. <sup>19</sup> Que lë ni na’, guli’tséaj, guli’tsöjsëdi yúgu’të böñachi idútë yödzölió. Buli’quña légaquië’ nisa, ugunli’ dxin Lë’ Dios Xuz, en Lë’ Dios Zxf’ini, en Lë’ Dios Bö’ Lá’ayi. <sup>20</sup> Guli’sëdi légaquië’ ilunë’ yúgu’të lë na’ gunná bë’eda’ libi’ili’. Buli’yútsöca’, neda’ caz zóalena’ libi’ili’ yúgu’të dza ga idxinrö dza údxí que yödzölió. Ca’ gaca.

## DIDZA' DXI'A BUZÚAJÉ' MARCOS

*Libán benë' Juan, bönni' buquilë' bönnachi nisa  
(Mt. 3:1-12; Lc. 3:1-9, 15-17; Jn. 1:19-28)*

<sup>1</sup> Caní gusí lo didza' dxi'a ca guca queë' Jesucristo, Zxí'inë' Dios.

<sup>2</sup> Budxín lë na' buzúajé' lu guichi Isaías, bönni' bë'ë didza' uláz queë' Dios, le gunné' Dios:

Buyútsöca', risöl-la'a bönni' gubáz quia', inóruë' Lo'.

Lë' upé'ë nøza ga tödu'.

<sup>3</sup> Yön chí'ë tu bönni' ulidzë' zidzaj lu lataj cá'asö, inné':  
“Buli'pá'a nøza para idxín Xanru' yichaj lázxdo'oli'.  
Buli'béaj li yugu' nøza lasi ga tödë'.”

<sup>4</sup> Caní budxín, tu' ruquile' Juan bönnachi nisa lu lataj cá'asö, en runé' libán para ilá'dila bönnachi nisa, bönni' na' bulu'bí'i ládxí'gaquië' para uniti lahuë' Dios dul-la' nabága'gaquië'. <sup>5</sup> Bila'rúaj bönnachi zián yúgu'té yödzö luyú Judea, enca' yödzö Jerusalén, en yöjáquië' ga na' zoë' Juan, ate' Juan na' buquile' légaquië' nisa lu yegu Jordán, bönni' na' gula'xóalépë' dul-la' nabága'gaquië'.

<sup>6</sup> Nácuë' Juan lari' néquini lítsa'ba' böa', en núguë'ë lë'ë tu guídi. Rahuë'-ba' bőchi'zu, en re'jé' le zxixi que buzdo'. <sup>7</sup> Runé' Juan libán, rnné':

—Si' zé'ë bönni' tödi na'a, náparë' yöl-la' unná bë' ca neda'. Biti' naca' neda' lesaca' yéchua', para ilecja' xiráchue' nudé'ë. <sup>8</sup> Neda' ruquila' libíili' nisa, pero Lë' guné' le rulufisö yöl-la' ridila nisa ni, uchízië' libíili' Dios Bö' Lá'ayi.

*Ridilé' Jesús nisa  
(Mt. 3:13-17; Lc. 3:21-22)*

<sup>9</sup> Tu dza ni' birúajé' Jesús yödzö Nazaret luyú Galilea, ate' Juan na' buquile' Lë' nisa lu yegu Jordán. <sup>10</sup> Cate' burúajé' Jesús lu nisa, la' ná'asö bilé'enë' guyalaj lúzxiba, en ruhuötjé' Dios Bö' Lá'ayi, rulu'i cuiné' ca tuba' gu'dödo', en bidisóalenë' Lë'. <sup>11</sup> Biyón chi'i nu ru'i didza' yehua' yubá, rnnna:

—Li' nacu' Zxí'ina'. Nadxí'ida' Li', en raza ládex'a Li'.

*Re'ëni tu' xihui' gun ga ibáguë'ë Jesús dul-la'  
(Mt. 4:1-11; Lc. 4:1-13)*

<sup>12</sup> Ni'irö Dios Bö' Lá'ayi guché'ë Jesús bayudxi lu lataj cá'asö. <sup>13</sup> Guzóë' Jesús lataj cá'asö na' idú choá' dza, ate' gú'uni Satanás tu' xihui' gun ga ibáguë'ë Jesús dul-la'. Guzóë' Jesús ga ni' ta'daba' böa' guixi' dzó'öba' guí'ado'. Yugu' gubáz lá'ayi queë' Dios gulácalenë' Jesús, en gula'gu'ë le gudahuë'.

*Rusédine' Jesús bönnachi luyú Galilea  
(Mt. 4:12-17; Lc. 4:14-15)*

<sup>14</sup> Gudödi gula'gu'ë Juan na' lidxi guíë, sa'yéajé' Jesús luyú Galilea. Runé' libán ni' que didza' dxi'a ca rinná bë'ë Dios. <sup>15</sup> Caní rnné':

—Chibidxín dza. Chizóa idinná bë'ë Dios. Buli'bí'i ládxí'li', en guli'tséajlë' didza' dxi'a ni.

*Rulidzë' Jesús tapé' bönni' uzxón böla  
(Mt. 4:18-22; Lc. 5:1-11)*

<sup>16</sup> Tsanni ni' ridé' Jesús ra' nísado' luyú Galilea, bilé'enë' Simón len Andrés, bönni' bőchë'ë Simón na'. Nácagaquië' uzxón böla, en ta'chiljé' yoxaj böla quégaquië' lu nisa na'. <sup>17</sup> Jesús gudxé' légaquië', rnné':

—Guli'dutá' neda', ate' guna' ga iché'ëli' bönachi quia' neda', gunli' ca runli' rizönli'-ba'böla.

<sup>18</sup> La' bulu'cá'anaté' yökaj quégäquië', en söjácalené' Jesús.

<sup>19</sup> Gudödë' Jesús ia'láti'do' ní'ilö, ate' bilé'ené' Jacobo, en Juan, yugu' zxí'iné' Zebedeo, nacu'ë lë'e bárcodo' quégäquië', tu'únë' yökaj böla quégäquië'. <sup>20</sup> Jesús la' bulidzté' légaquië', ate' bulu'cá'ané' xúzgaquië' Zebedeo, dzáguië' yugu' huen dxin queë' lë'e bárcodo' na', ate' söjácalené' Jesús.

*Tu bönni' yu'u lë' bö' xihui'*

(Lc. 4:31-37)

<sup>21</sup> Bila'dxiné' Jesús, en yugu' bönni' dá'gaquië' Lë' lu yödzö Capernaum. Cate' ni' naca dza lá'ayi quégäquië' bönni' judío, guyázië' Jesús yu'u ga tu'dubé' bönni' judío, en tu'sédë' queë' Dios, ate' gusílahue' rusédiné' nupa nudúbigaca ni'. <sup>22</sup> Bulu'bániné' ca na' rusédiné' Jesús, tu' rusédiné' ca runé' tu bönni' dë lu në'ë, en caléga ca tuné' bönni' yudo' usëdi. <sup>23</sup> Zóaté' ca' tu bönni' yu'u lë' bö' xihui' lu yu'u ga na' tu'dubé' tu'sédë' queë' Dios, ate' gurödxi'ë bönni' na', rnné':

<sup>24</sup> —¿Bizxi rál-la'tu' quiu', Jesús, bönni' Nazaret? ¿Za'tsu' usunítiu' netu'? Núnbë'a Li', nacu' Bönni' Lá'ayi queë' Dios.

<sup>25</sup> Jesús buzené' le bach, rnné':

—Busayaj ru'u, en burúaj lu bönni' ni.

<sup>26</sup> Ní'irö bö' xihui' na' buxízida' bönni' na' yu'u lë', ate' gurödxi'a zidzaj, en la' burúajtë.

<sup>27</sup> Bulu'bániné' yúgu'të bönni' nacu'ë ni', ate' gula'nabi luzé'egaquië', ta'nné':

—¿Bizxi caz lë ni? ¿Naru' nácatsö xibá cubi? ¡Len yöl-la' unná bë'rinná bë'ené' yugu' bö' xihui', ate' tun ca rnné'!

<sup>28</sup> La' guzétë didza' que yöl-la' huáca queë' Jesús, ate' bila'yöni bönachi idútë luyú Galilea na'.

*Ruúnë' Jesús xiná'anu nigula queë' Pedro*

(Mt. 8:14-15; Lc. 4:38-39)

<sup>29</sup> Ní'irö burúajë' Jesús lu yu'u ga na' tu'dubé' tu'sédë' queë' Dios, en la' guyéajlentë' Jacobo, en Juan, ate' bila'dxiné' lídxigaquië' Simón, en Andrés. <sup>30</sup> Ni' dënu xiná'anu nigula queë' Pedro, yú'unu tu xilá. La' gula'guíxjöi'itené' Jesús ca raca queénu. <sup>31</sup> Ní'irö gubígui'ë Jesús, ate' gudélë'ë ná'anu, en guchisë'-nu. La' burúajtë tu xilá na' yú'unu, ate' bupá'anu le gulahuë'.

*Ruúnë' Jesús zián nupa te'e*

(Mt. 8:16-17; Lc. 4:40-41)

<sup>32</sup> Cate' chiridzö', ca gudxía gubidza, la' dujuá'gacatë' yúgu'të nupa te'e, en yugu' bönni' yu'u légaquië' bö' xihui' ga zoë' Jesús. <sup>33</sup> Yúgu'të bönachi lu yödzö bila'guírø ga nu riyaza yu'u ga na' zoë' Jesús. <sup>34</sup> Jesús bunë' zián nupa te'e, naca zián yödzöhuë' té'ené'. Bubéajë' ca' zián bö' xihui' yú'ugaca bönachi na'. Biti' bë'ë lataj ila'nné bö' xihui' na' tu' núnbe'gaca Lë' Nu náquië'.

*Runë' libán Jesús luyú Galilea*

(Lc. 4:42-44)

<sup>35</sup> Zí'acado' guyasë' Jesús, ni' naca chul-la. Burúajë' yödzö na', en sa'yéajë' tu lataj cásö, ate' ni' bulidzë' Dios. <sup>36</sup> Simón, en nupa nacuá'len lë' söjdíljagaquië' Jesús. <sup>37</sup> Cate' yójxáca'gaquië' Lë', té' Lë':

—Yúgu'të bönachi tu'guílaj Li'.

<sup>38</sup> Ní'irö Jesús gudxë' légaquië', rnné':

—Uyéajru' yugu' dzaga yödzö, para guna' ca' libán ni'. Que lë ni na' birúaja'.

<sup>39</sup> Caní guca, gudödë' Jesús idú luyú Galilea, runë' libán lu yu'u gapa tu'dubé' bönni' judío, tu'sédiné' queë' Dios, ate' rubéajë' bö' xihui' yú'ugaca bönachi.

*Tu bönni' ré'ené' huë' nudzu' ruzödi  
(Mt. 8:1-4; Lc. 5:12-16)*

<sup>40</sup> Tu bönni' ré'ené' huë' nudzu' ruzödi bidxiné' ga zoë' Jesús. Buzóá zxibë', en gúta'yuë' lahuë', rnnë':

—Channö ré'ënú', huáca unu' neda'.

<sup>41</sup> Jesús buéchi' ládxë'ë lë'. Bulí né'ë, gudanë' lë', en gudxë' lë':

—Ré'ënda'. Chinuhuöácu'.

<sup>42</sup> Ca gunné' ca', la' bunitítë huë' ré'ené', en böáquië' dxí'ado'. <sup>43</sup> Ní'irö Jesús buzenë' bach bönni' na', en la' busól-la'të' lë'. <sup>44</sup> Caní gudxë' lë':

—Cuntu nu guío' ca bena' quiu', pero guyéaj, yöjlui'i cuinu' lahuë' bixúz, en yöjnödzaj para le böácanu' li' que yudo' ca na' gunná bë'ë Moisés, lë na' ulu'i bönnachi chinuhuöácu'.

<sup>45</sup> Burúajë' bönni' ni, en gusí lahuë' riguíxjöi'iné' bönnachi zián ca guca queé'. Tu' buzé' didza' ni, bíti'rö guca tsázië' Jesús yálajdo' tu lu yödzö, pero guzóasë' ní'ilö gapa naca lu lataj cá'asö. Bönnachi yúgu'të yödzö bila'dxín ga na' zoë' Jesús.

## 2

*Bönni' ré'ené' huë' nacú'unië' bin  
(Mt. 9:1-8; Lc. 5:17-26)*

<sup>1</sup> Cate' chigudödi chopá tsonna dza, buázië' Jesús yödzö Capernaum, ate' guzé' didza' zoë' yu'u. <sup>2</sup> La' bulu'dúbite bönnachi zián ga na' zoë' Jesús, ga bidxité bíti'rö guzxéqui' ila'cuá' ni', ni ra' yu'u, ate' Jesús benë' libán que xtídzë'ë lógaquië'. <sup>3</sup> Ní'irö bila'dxine' ga na' zoë' Jesús tapé' bönni', nuá'agaquië' tu bönni' huë' nacú'unië' bin. <sup>4</sup> Biti' guca ila'dxine' lahuë' Jesús tu' nacuá' bönnachi zián ni'. Que lë ni na' gula'saljé' ícjo'olö ca dödilö ga zoë' Jesús. Cate' budxi bulu'dxíe' yero na', ni' bulu'zötjé' le denë' bönni' huë' na'.

<sup>5</sup> Cate' gúquibe'enë' Jesús ca na' ta'yéajlë'ë Lë', gudxë' bönni' huë' na':

—Zxi'ina', chibunít lahuá' li' ca naca dul-la' nabágú'u.

<sup>6</sup> Rö'ögaquië' bal-lë' bönni' yudo' usedi ni'. Ta'zá' ládxí'gaquië', ta'nné': <sup>7</sup> ¿Bizz que ru'ë caní didza' bönni' ni? Rucá'anë' cá'asö Dios. Cuntu nu bönni' gaca uniti lahuë' dul-la'. Tuzé' Dios gaca gunë' lë ni. <sup>8</sup> La' gúquibe'etenë' Jesús le ta'zá' ládxí'gaquië', ate' gudxë' légaquië':

—¿Bizz que rizá' ládxí'li' caní? <sup>9</sup> Biti' naca böninga nu guiésö bönni' huë' ni chibunít lo dul-la' nabágue'ë, pero naca böninga nu gun ga huöásë', en u'ë le denë', en uzé'e ni'ë. <sup>10</sup> Guna' le gaca bë' neda', Bönni' Guljé' Bönnachi, dë lu na'a luyú ni uniti lahuá' dul-la' nabágá'gaca bönnachi.

Ní'irö Jesús gudxë' bönni' huë' na':

<sup>11</sup> —Li' rea': Guyasa. Buá' le denu', en böaj lidxu'.

<sup>12</sup> La' guyásatë' bönni' huë' na', bu'ë le gúti'në', en burúajë' lóga yúgu'të nupa nacuá' ni'. Bulu'báninë' yúgu'të', en gula'gu'ë Dios yöl-la' ba, ta'nné':

—Catu caz rilé'etu' le caní.

*Jesús rulidzé' Leví  
(Mt. 9:9-13; Lc. 5:27-32)*

<sup>13</sup> Burúajë' Jesús yödzö Capernaum, na' gudödë' leyúbölö ra' nísado'. Bulu'dubi bönnachi zián ga zoë' Jesús, ate' Lë' busédinë' légaquië'. <sup>14</sup> Cate' ridödë' Jesús ni', bilé'enë' Leví, zxí'inë' Alfeo, rö'ë ga ruquízxjë' uláz que yödzö zi'tu'. Jesús gudxë' lë':

—Gudá' neda'.

La' guyásatë' Leví na', sa'yéajlenë' Jesús.

<sup>15</sup> Gudödi guca lë ni, rö'ë Jesús rahuë' lu yu'u lidxë' Leví na', ate' zián bönni' uquízxaj, en ia'bal-lë' bönni' cá'asö rö'ölengaquië' tsözxón Jesús, en yugu'bönni' usëda queé'. Caní guca, tu' röjaca bönnachi zián len Jesús. <sup>16</sup> Cate' yugu' bönni' yudo' usedi, en yugu' bönni' yudo' fariseo, bila'lé'enë' Lë' rö'ë rágulenë' tsözxón yugu' bönni' uquízxaj, en ia'bal-lë' bönni' cá'asö, gulé' yugu' bönni' usëda queé' Jesús, ta'nné':

—¿Bizxi caz runtsë? ¡Rë'aj rágulentsë' yugu' bönni' uquízxaj, en ia'bal-lë' bönni' dul-la'!

<sup>17</sup> Biyönnë' Jesús didza' ni tu'ë, en gudxë' légaquië':

—Nupa nacuá' dxi'a biti' naquíniguequi nu un bönachi, pero nupa te'e naquíniguequi nu un bönachi. Za'a neda', calëga dulízagaca'bönachi tsahui', pero rulízagaca'bönachi dul-la' para ulu'bí'ládxi'gaca.

*Ru'ë Jesús didza' que yöl-la' run gubasa*

(Mt. 9:14-17; Lc. 5:33-39)

<sup>18</sup> Tu dza ni' tunë' gubasa bönni' dá'gaquië' Juan, en bönni' dá'gaquië' yugu' bönni' yudo' fariseo, ate' bila'dxín nupa gula'nabi Jesús, ta'nná:

—¿Bizx que tunë' gubasa bönni' dá'gaquië' Juan, en bönni' dá'gaquië' yugu' bönni' yudo' fariseo, pero bönni' dá'gaquië' Li' biti' tunë' gubasa?

<sup>19</sup> Bubi'ë didza' Jesús, rë' légaquië':

—¿Naru' réquitseli' ilún gubasa nupa nacuá' laní queë' bönni' rutsaga né'ë tsanni ni' bönni' na' rutsaga né'ë zóalenë' légaquië'? Tsanni ni' bönni' na' rutsaga né'ë zóalenë' légaquië', biti' gaca ilunë' gubasa. <sup>20</sup> Idxín dza cate' udúë' bönni' na' rutsaga né'ë, en bíti'rö sóalenë' légaquië', ate' dza n'irö ilunë' gubasa.

<sup>21</sup> 'Cuntu nu bönni' udé'ë tu lari' cúbido' lu lari' chinatëbi, tu' utsupi' lari' cubi na', en huachöza' lari' tëbi na', ate' huaróza'rö lari' tëbi na'. <sup>22</sup> Lësca' caní cuntu nu bönni' queë'ë xisi uva cubi lu buzudi bidxi néquini guídi, tu' gal-la xisi uva cubi na', en ulá'a buzudi bidxi na' néquini guídi, ate' ilalaj xisi uva na', en gaca ditaj buzudi néquini guídi. Xisi uva cubi lu buzudi néquini guídi cubi ral-la' cá'aru'.

*Bönni' dá'gaquië' Jesús ta'lecjë' do dza lá'ayi*

(Mt. 12:1-8; Lc. 6:1-5)

<sup>23</sup> Tu dza lá'ayi quégaquië' bönni' judío, gudödë' Jesús gapa dë yöla zxoa' xtila, ate' bönni' usëda queë' gula'sí lógaquië' ta'lecjë' do ga dxía zxoa' xtila. <sup>24</sup> N'irö bönni' yudo' fariseo gulé' Jesús, ta'nné':

—Buyútsöca'. ¿Bizx que tunë' bönni' dá'gaquië' Li' le cabí ral-la' gunru' dza lá'ayi?

<sup>25</sup> Jesús gudxë' légaquië':

—¿Naru' cabí nulábanili' ca benë' David cate' gudunë'? Biyadzaj le ilahuë' lë', en nupa nacuá'len lë' <sup>26</sup> ate' guyázië' lu yu'u queë' Dios cate' ni' náquië' bixúz lo Abiatar, en gudahuë' yöta xtila tu'cu'ë lahuë' Dios, lë na' biti' dë lataj nu gagu, pero tuz bixúz dë lataj ilahuë' le. Bé'ë ca' le ilahuë' bönni' nacuá'lenë' lë'.

<sup>27</sup> N'irö Jesús gudxë' légaquië':

—Dios benë' dza lá'ayi le ulu'zí' xibé bönachi, calëga benë' bönachi para ilún chi'i dza lá'ayi. <sup>28</sup> Que lë ni na', neda', Bönni' Guljé' Bönachi, naca' Xani dza lá'ayi.

### 3

*Ruúnë' Jesús tu bönni' narequi' né'ë*

(Mt. 12:9-14; Lc. 6:6-11)

<sup>1</sup> Leyúbölö guyu'ë Jesús tu lu yu'u ga tu'dubë' tu'sëdë' bönni' judío queë' Dios, ate' zoë' ca' ni' tu bönni' narequi' né'ë. <sup>2</sup> Bönni' yudo' nacu'ë ni' tu'yúë' Jesús channö únë' bönni' na' dza lá'ayi, tu' té'ennë' ulu'zégu'ë Lë' didza'. <sup>3</sup> N'irö Jesús gudxë' bönni' na' narequi' né'ë, rnnë':

—Guyasa, en guzuí lógaca bönachi ni.

<sup>4</sup> Jesús gunábinë' bönachi ni', rnnë':

—¿Naru' dë lataj gunru' le naca dxi'a cate' naca dza lá'ayi o gunru' le ruá' dö'? ¿Naru' dë lataj gunru' ga ila'deli' bönachi yöl-la' na'bán o usunítiru' le?

Gula'cuá' dxisö bönachi ni'. <sup>5</sup> N'irö len yöl-la' rilé queë', buyúë' Jesús bönachi na' nacuá' gásibi'ilë'. Ruhu'innë' tu' nácagaquië' zidi ladxi'. Gudxë' bönni' na' narequi' né'ë, rnnë':

—Bulí no'o.

Ní'irö bulí në'ë bönni' na', ate' böácatë dxí'ado' në'ë. <sup>6</sup> Ní'irö bulu'rúajë' bönni' yudo' fariseo, ate' la' guluntë' tsözxón didza' len bönni' dá'gaquië' Herodes bi ilunë' queë' Jesús, para ilútië' Lë'.

*Tu'dubi bönnachi zián ra' nísado'*

<sup>7</sup> Buzé'ë Jesús ni' tsözxón len bönni' dá'gaquië' Lë', en bidxinë' ra' nísado', ate' söjácalen Lë' bönnachi zián narúajgaca luyú Galilea, en luyú Judea. <sup>8</sup> Bönnachi zián narúajgaca Jerusalén, en luyú Idumea, en ia'tsölá'a yegu Jordán, en yugu' yödzö nacuá' idú gásibi'ilö ga nacuá' yödzö Tiro, en yödzö Sidón bila'dxín ca' ga zoë' Jesús. Caní gulunë', tu' bila'yönnë' ca nácagaca yugu' le zxön runë' Jesús. <sup>9</sup> Que lë ni na' Jesús gunná bé'enë' bönni' dá'gaquië' Lë' ulu'cóztica'sé' tu bárcodo' ga gaca cuenë', para cabí ulu'quí bönnachi zián na' Lë'. <sup>10</sup> Caní guca tu' chibunë' zián nupa te'e, ate' bila'guírö bönnachi zián na' ga zoë' para ila'gán Lë'. <sup>11</sup> Cate' bö' xihui' yú'ugaca bönnachi bila'lé'e Jesús, bulu'dxiga' bönnachi na' yú'ugaca xinië' Jesús, ate' gula'bödxi'a, ta'nná:

—Nacu' Li' Zxí'inë' Dios.

<sup>12</sup> Jesús buzenë' le bach bö' xihui' na', cabí ila'guixjö' nu náquië' Lë'.

*Riböe' Jesús chinnu bönni' ilácagaquië' gubáz queë'*

(Mt. 10:1-4; Lc. 6:12-16)

<sup>13</sup> Ní'irö gurenë' Jesús tu lu guí'ado', ga ni' bulidzë' nupa ré'ënë'. Gula'biguë'ë bönni' ni gásibi'ilë'. <sup>14</sup> Jesús bucu'ë chínnuë' bönni' ni, para ila'cuá'lenë' Lë', en para isól-lë'ë légaquië' tsöjéngäquië' libán. <sup>15</sup> Budödë' lu ná'agaquië' yöl-la' huáca ulu'únë' nupa te'e, en ulu'béaje' bö' xihui' yú'ugaca bönnachi. <sup>16</sup> Caní nácagaca lágaquië':

Simón, (buzóë' Jesús ia'tú lë', Pedro),

<sup>17</sup> Jacobo,

Juan, (bönni' bőchë'ë Jacobo, ate' nácagaquië' zxí'inë' Zebedeo. Chopë' ni, Jesús buzóë' ia'tú lágaquië', Boanerges, le rnna lu didza' xidza': Bönni' sínia' ca guziú'),

<sup>18</sup> Andrés, Felipe, Bartolomé, Mateo, Tomás,

Jacobo, (zxí'inë' Alfeo),

Tadeo,

Simón, (bönni' rui'i ládxë'ë yödzö queë'),

<sup>19</sup> Judas Iscariote, (bönni' udödë' Jesús lu ná'agaquië' bönni' ilútië' Lë').

*Yugu' bönni' yudo' ta'nné': "Tu' xihui' dzaga Jesús"*

(Mt. 12:22-32; Lc. 11:14-23; 12:10)

Gudödi ni' Jesús len bönni' dá'gaquië' Lë' bulu'dxinë' tu lu yu'u. <sup>20</sup> Leyúbölö bila'guírö bönnachi zián ga zoë' Jesús, ate' bíti'rö guta' lataj bi ilahuë' Jesús, en bönni' na' dá'gaquië' Lë'. <sup>21</sup> Cate' di'a dza queë' Jesús bila'yönnë' ca raca queë', bila'dxinë' ni' para ulu'chë'ë Lë', ta'nné': Richixi icjë'.

<sup>22</sup> Lësca' caní bönni' yudo' usedi, narúajgäquië' Jerusalén gula'nné' queë', ta'nné':

—Dzaga Belzebú, xángaca bö' xihui' Lë', ate' len yöl-la' unná bë' que rubéajë' yugu' bö' xihui'.

<sup>23</sup> Ní'irö Jesús bulidzë' yugu' bönni' yudo' usedi na', en bucúdzu'ë didza', rnnë':

—¿Naru' ubéaj la' cuinsi Satanás tu' xihui'? <sup>24</sup> Channö ila'rúaj choplö bönnachi tu yödzö, en ila'díl-lalen luzé'eguequi, biti' gaca idía' yödzö na'. <sup>25</sup> Lësca' caní channö ila'rúaj choplö bönnachi nacuá' tu yu'u, en ila'díl-lalen luzé'eguequi, biti' gaca ila'día' bönnachi nacuá' yu'u na'. <sup>26</sup> Que lë ni na', channö Satanás tu' xihui' tá'baga' luzé'e, narúajgaca choplö bö' xihui'. Biti' gaca idía' yöl-la' unná bë' que, pero chizóa údxí que.

<sup>27</sup> Cuntu nu gaca tsu'u lidxe' tu bönni' nál-la, en cuéaj yöl-la' tsahui' queë' channö cabí gaga' zí'alö bönni' nál-la na', ate' ní'irö sequi' cuéaj le dzö'ö lidxe'.

<sup>28</sup> 'Le nácaté rea' libí'ili': Dios gaca uniti lahuë' bönachi ca naca yúgu'té dul-la' nabága'gaca, en ca naca yúgu'té didza' schanní' ta'nná, <sup>29</sup> pero nútítés nu inné schanní' queë' Dios Bö' Lá'ayi, catu caz uniti lahuë' Dios nu na'. Tsaz nabaga' xíguia' nu na'.

<sup>30</sup> Caní gunné' Jesús tu' ta'nné' queë' bönni' yudo' usedi na', ta'nné':

—Tu' xihui' dzaga Lë'.

*Nu naca xiné'ë Jesús, en bönni' bőchë'ë  
(Mt. 12:46-50; Lc. 8:19-21)*

<sup>31</sup> Ní'irö bila'dxiné' yugu' bönni' bőchë'ë Jesús, enca' xiné'ë ga zoë'. Gula'cu'ë lő'alö, en gula'sól-lë'ë nu tsöjlidza Jesús. <sup>32</sup> Bönachi zián na' rö'gaca cuité' Jesús gulé Lë', ta'nná:  
—Yugu' bönni' bőchu'u, enca' xinó'o nacu'ë lő'alö, tu'lidzë' Li'.

<sup>33</sup> Bubi'ë didza' Jesús, gudxë' légaquië':

—¿Nuzxi caz na' xiná'a, en nupxi caz yugu' bönni' bőcha'a?

<sup>34</sup> Ní'irö buyúë' nupa na' rö'gaca gásibi'ilë', rnnë':

—Buli'yútsöca'. Nupa ni nácagaca ca xiná'a, en yugu' bönni' bőcha'a. <sup>35</sup> Nu run ca ré'ënë' Dios, nu ni naca ca bi'i bőcha'a, en bi'i zana' enca' xiná'a.

## 4

*Rucúdzu'ë didza' Jesús ca naca queë' bönni' guz  
(Mt. 13:1-9; Lc. 8:4-8)*

<sup>1</sup> Leyúbölö gusí lahuë' Jesús rusédiné' bönachi ga naca ra' nísado'. Bulu'dubi bönachi zián ga zoë', ate' gurenë' Jesús tu lë'e bárcodo' zxoa lu nisa na', en gurö'ë ni', ate' yúgu'té bönachi na' gula'cuá' luyú ra' nisa na'. <sup>2</sup> Zián le busédiné' Jesús légaquië', bucúdzu'ë didza'. Tsanni ni' rusédiné' légaquië', rnnë':

<sup>3</sup> —Guli'zé nágali' didza' ni. Birúajë' tu bönni' guz, söjésië' xisedo'. <sup>4</sup> Tsanni ni' rúsië', gulasi bal-la xisedo' na' ra' nöza, ate' bila'dxinba' biguínnido', gulé'ajba'le. <sup>5</sup> Gulasi ia'bal-la xisedo' na' ga rö'ö guiój ga biti' rö'ö yenni' yu. Bayón gula'lén xisedo' na' tu' cabí rö'ö yenni' yu. <sup>6</sup> Ní'irö cate' gulén gubidza, buquexu' le, ate' gubidxi, tu' cabí nun luí ga rë'. <sup>7</sup> Gulasi ia'bal-la xisedo' na' ga tu'lén lubá yötsi'. Cate' gula'lén xisedo' na', bulu'lén ca' lubá yötsi' na', en gula'röli le, ate' lë na' bësië' biti' bi bunödzaj. <sup>8</sup> Gulasi ia'bal-la xisedo' na' ga naca luyú bëbu, ate' gula'zxón, en xitsá' ra' gula'bö'. Bulu'nödzaj lë na' bësië'. Tu dxigu' xisedo' na' bësië' bunödzaj ia'chí uruá' xisedo' ca'. Ia'tú bunödzaj ia'tsónnalalaj ca', ate' ia'tú na' bunödzaj ia'tú gayuá' ca'.

<sup>9</sup> Ní'irö Jesús gudxë' légaquië', rnnë':

—Nu zoa nagui, en riyöni ral-la' uzé nagui.

*Riguíxjö'ë Jesús bizx que rucúdzu'ë didza'  
(Mt. 13:10-17; Lc. 8:9-10)*

<sup>10</sup> Cate' chibugá'ané' tuzé' Jesús, bila'dxín nupa dá'gaca Lë' ga zoë', núngaca tsözxón idxínnuté' bönni' usëda queë', ate' gula'nábiné' Lë' bi sa'yéaj lë na' bucúdzu'ë didza'.

<sup>11</sup> Jesús gudxë' légaquië', rnnë':

—Libi'ili' nadéli'li' tséajni'ili' le nagachi' ca rinná bë'ë Dios, pero nupa na' biti' nácagaca tuz len rë'u, ruí'lena' légaquië' didza' yugu' le rucúdzu'a didza'. <sup>12</sup> Caní runa' para gaca lë na' nazúaj lu guichi lá'ayi, rnna:

Ulu'yúé', en biti' ila'lé'enë'.

Ulu'zé nágagaquië', en biti' ila'yéajni'inë'.

Biti' ulu'bí'i ládxí'gaquië' para gaca uniti lahua' légaquië' ca naca dul-la' nabága'gaquië'.

*Riguíxjö'ë Jesús le bucúdzu'ë didza'  
(Mt. 13:18-23; Lc. 8:11-15)*

<sup>13</sup> Jesús gudxë' ca' yugu' bönni' dá'gaquië' Lë', rnnë':

—¿Naru' cabí réajni'itseli' lë na' bucúdzu'a didza'? ¿Nacxi caz gaca tséajni'ilí ia'zíca'rö le ucúdzu'a didza'? <sup>14</sup> Bönni' guz na' náquië' nu ruzé xtídzë'ë Dios.

<sup>15</sup> 'Nácagaca bal-la bönachi ca xisedo' na' gulasi ra' nöza. Ta'yönnë' xtídzë'ë Dios, en ca ta'yónisinë' ca', la' za'të Satanás tu' xihui', en rigúa didza' na' bidxín lu icja ládxi'do'gaquië'.

<sup>16</sup> 'Nácagaca ia'bal-la bönachi ca xisedo' na' gulasi ga rö'ö guiój. Ta'yönnë' didza' na', ate' len yöl-la' rudzeja quégaquië' ta'zi'ë le. <sup>17</sup> Biti' riyaza icja ládxi'do'gaquië', ate' tu ch'isö ta'dé'ë le. Cate' bi raca quégaquië', o zoa nu ribía ladxi' légaquië' tu' ta'dé'ë didza' na', la' tu'huóatë ládxi'gaquië'.

<sup>18</sup> 'Nácagaca ia'bal-la bönachi ca xisedo' na' gulasi ga na' tu'lén lubá yötsi'. Ta'yönnë' didza' na', <sup>19</sup> pero tu'i ládxi'gaquië' le nácagaca que yödzölió ni. Nazí' yé'eguequinë' tu' nadxi'iguequinë' yugu' yöl-la' tsahui', en ta'zé ládxi'gaquië' yugu' le dë. Ta'yaza icja ládxi'do'gaquië' yúgu'të lë ni, en tu'suniti didza' na', para cabí gun dxin lu icja ládxi'do'gaquië'.

<sup>20</sup> 'Nácagaca ia'bal-la bönachi ca xisedo' na' gulasi ga naca luyú bëbu. Ta'yönnë' didza' na', en ta'zí' lu ná'agaquië' le, ate' run dxin lu icja ládxi'do'gaquië'. Nácagaca bal-la bönachi caní ca xisedo' na' bulu'nödzaj ia'chí uruá' huéaj. Nácagaca ia'bal-lé' ca xisedo' na' bulu'nödzaj ia'tsónnalalaj ca', ate' nácagaca ia'bal-la bönachi ca xisedo' na' bulu'nödzaj ia'tú gayuá' ca'.

### Rucúdzu'ë didza' Jesús que tu le rigú'u bení'

(Lc. 8:16-18)

<sup>21</sup> Jesúz gudxé' ca' bönni' dá'gaquië' Lë', rnnë':

—¿Naru' rigála'ru' guí', ate' rudúsi'ru' le tu guí'ina, o rigú'uru' le zxani le ráti'ru'? Biti' ca' runru' caní. Ruzóaru' guí' ga naca xitsá' ga cu'u bení'. <sup>22</sup> Yúgu'të le nagachi' ilá' lahui, ate' yúgu'të le raca balándo'os ila'rúaj ga liná'. <sup>23</sup> Nu zoa nagui, en riyöni ral-la' uzé nagui.

<sup>24</sup> Gudxé' ca' légaquië':

—Guli'gü' ládxi'li' le riyónili'. Ca naca le ruríxili', la' leze urixë' Dios queéli', ate' gunnë' queéli' ia'lati'. <sup>25</sup> Nu nazí'i le za' que, gu'ë que ia'lati', pero nu biti' nazí'i le, la's dui le dë que, udúa.

### Rucúdzu'ë didza' Jesús ca rizxón zxoa' xtila

<sup>26</sup> Gunné' ca' Jesúz:

—Ca raca ni le rinná bë'ë Dios naca ca raca cate' ruchejë' tu bönni' zxoa' xtila lu yu.

<sup>27</sup> Chi'i dzö'ölö rásië', en riyasë' cate' za' rení'. Ta'lén zxoa' xtila na', en ta'zxón, pero biti' nòzinë' lë' nacxi raca ta'zxón. <sup>28</sup> La' cuinsi luyú na' ruxón le nadúzgaca luyú na', zí'alö xiyazi, ní'irö za' do que, en tödi na' cuía xui'i nál-la lu do que. <sup>29</sup> Cate' chinal-la xui'i na', la' tséajtë' tsöjchibë' do na' tu' chibidxín dza uzi'ë xui'i.

### Rucúdzu'ë didza' Jesús ca raca que xisé mostaza

(Mt. 13:31-32; Lc. 13:18-19)

<sup>30</sup> Gunné' ca' Jesúz:

—¿Bizxi caz innaru' ca raca ni le rinná bë'ë Dios? ¿Bizxi ucúdzu'ru' didza' ca raca?

<sup>31</sup> Raca ca raca que tu xisedo' mostaza. Cate' riyaza luyú naca tu xisedo' nácatérö cuidi' ca yúgu'të xisedo' dzö'ölö luyú, <sup>32</sup> pero cate' chinadúz, rilén, en rizxóntérö ca yúgu'të guixi' cuan rö'gaca luyú. Tscá run yana' ni'a në'e, gaca ila'dxinba' biguínnido', en ulu'dxíaba' xicá'agacaba' lu zxul-la que.

### Ca ruguné' dxin Jesús le rucúdzu'ë didza'

(Mt. 13:34-35)

<sup>33</sup> Caní guca, busédinë' Jesús légaquië', en ziánrō ca' le bucúdzu'ë didza' tsca guca ila'yéajni'inë'. <sup>34</sup> Yúgu'të didza' bë'lenë' böñachi bucúdzu'ë didza', ate' yúgu'të didza' ni buchila lá'anë', buzéajni'inë' légacasë' bönni' usëda queë'.

*Jesús ribequi dxie' bö' budunu'*

(Mt. 8:23-27; Lc. 8:22-25)

<sup>35</sup> La' dza ná'asö, cate' ridzó', Jesús gudxë' yugu' bönni' dá'gaquië' Lë', rnnë':

—Tóditsöca'ru' ia'tsölá'a nísado' ni.

<sup>36</sup> Ní'irö bulu'lá'alenë' böñachi zián nacuá' ni', ate' bulu'sé'ë bárcodo' ga na' chizóasë' Jesús. Gula'cuá' ca' ni' ia'zica'rö bárcodo' söjácalen légaquië'. <sup>37</sup> Gusí lo recja bö' budunu' lu nisa na', ate' gudá'a nisa lë'e bárcodo' na'. Ca' guca, zeaj ridzä' nisa lë'e bárcodo' na'.

<sup>38</sup> Dë' rásië' Jesús lu xicúgüüe' ga naca xitsá'alö lë'e bárcodo' na', ate' bulu'subanë' Lë'. Të' Lë':

—¡Bönni' Usedi! ¿Naru' cabí ruí'i ládxí'tso' netu'? ¡Huáti caztu' lu nisa ni!

<sup>39</sup> Ní'irö guyasë' Jesús, en gunná bë'enë' bö' na' recja, gunné':

—Guró'ö dxi.

Gudxë' ca' nisa na', gunné':

—Dxisö guzóa.

Guró'ö dxi bö' na' guyecja, en guzóa dxi lu nísado' na'. <sup>40</sup> Ní'irö Jesús gudxë' yugu' bönni' dá'gaquië' Lë', rnnë':

—¿Bizx que radxi ridzóbili' caní? ¿Naru' cabí réajlë'ëli' Dios?

<sup>41</sup> Ni' tádxinë' gulé luzé'ë tuë' ia'túë':

—¿Nuzxi caz bönni' ni? ¡Tun bö' recja, en nísado' ca rnna xtídzë'ë!

## 5

*Bönni' Gadara yu'u bö' xihui' le'*

(Mt. 8:28-34; Lc. 8:26-39)

<sup>1</sup> Ní'irö bila'dxinë' Jesús, en yugu' bönni' dá'gaquië' Lë' ia'tsölá'a nísado' ga naca lu xiyúgaca böñachi Gadara. <sup>2</sup> Cate' burúajé' Jesús lë'e bárcodo' na', tu bönni' rirúajé' zxan bulóaj ga nacuá' yero ba la' dutságaté' Lë'. Bönni' ni yu'u bö' xihui' le', <sup>3</sup> ate' nun xilatjé' ga na' nacuá' yero ba. Cuntu nu guca guga' bönni' na', caléga len du guíë. <sup>4</sup> Zián luzuí bulu'zóë' bregui' guíë yen né'ë, en ni'ë, en gulúgui'ë lë' du guíë. Yugu' du guíë na' bulé'ë, ate' bregui' guíë na' guditsjë'. Biti' rizéqui'në' nu bönni' inná bë'enë' lë'. <sup>5</sup> Ridática'së' ribödxi'ë rëla, en të dza ga na' nacuá' yero ba, en gapa naca lu guí'ado', run huë' cuinë' yugu' lu guiój dzö'ö ni'. <sup>6</sup> Cate' bilé'enë' zë'ë zi'tu' Jesús, guxítíë guyijë' ga na' zë'ë, ate' buzúa zxibë' lahuë' Lë'. <sup>7</sup> Bë'ë zidzaj didza', rë' Jesús:

—¿Bizxi ral-la'a quiu' Jesús, Zxi'inë' Dios nayépisëtérë? Ni'a queë' Xanru' Dios ráta'yua' lo', biti' usaca' zí'u neda'.

<sup>8</sup> Caní gunné' bönni' na' tu' chigudxë' Jesús bö' xihui' na':

—Li', bö' xihui', burúaj lu bönni' ni.

<sup>9</sup> Jesús gunábinë' le, rnnë':

—¿Bi leu'?

Bubí'i didza' le, gudxi Lë':

—Lea': Le Zián, tu' rö'ö ziantu'.

<sup>10</sup> Gula'nabi yechi' yugu' bö' xihui' na' Jesús para cabí isö'l-lë'ë léguequi zi'tu' luyú ni'.

<sup>11</sup> Nacuá'aba' cuchi zián lu guí'ado' ní'isö, ta'daba' táguba' ni'. <sup>12</sup> Gula'nabi yechi' bö' xihui' na' Jesús, ta'nná:

—Gusöl-la' netu' ga ni' dzö'öba' cuchi zián. Bë' netu' lataj tsöjtsú'ugacatu'-ba'.

<sup>13</sup> La' bë'të' Jesús léguequi lataj, ate' bila'rúaj bö' xihui' na', en yöjtsú'ugaca cuchi zián na', ate' gula'xítiba' cuchi zián na', yöjbixigacaba' ga naca ra' guí'a, yöjcházagacaba' nísado'. Lu nísado' na' gula'yépiba' nisa, gulátiba', en nácagacaba' ca galaj gayuá'aba'.

<sup>14</sup> Ní'irö bulu'zxunnaj nupa ni' gulún chi'i cuchi zián na'. Yöjtixjöi'iguequinë' bönachi lu yödzö ni', enca' bönachi nacuá' la' guxi' ni'. Bila'rúaj bönachi lu yödzö, söjyúgaquie' bizxi na' guca ni'. <sup>15</sup> Cate' bila'dxiné' ga ni' zoë' Jesús, bila'lé'ené' bönni' na' zí'alö yú'ugaca bö' xihui' lë'. Bönni' ni rö'ë ni', nácuë' lari', en zoë' dxí'ado', ate' guladxi bönachi na'. <sup>16</sup> Nupa na' bila'lé'e le benë' Jesús gula'guíxjöi'i bönachi na' bila'rúaj lu yödzö ca na' guca queë' bönni' na' zí'alö yú'ugaca bö' xihui' lë', enca' ca guca quégacaba' cuchi na'. <sup>17</sup> Ní'irö gula'sí lógaca bönachi zián na' ta'ta'yu lahuë' Jesús urúajë' lu xiyúguequi.

<sup>18</sup> Cate' bubenë' Jesús lë'e bárcodo', bönni' na' zí'alö yú'ugaca bö' xihui' zián lë', gúta'yuë' lahuë' Jesús gu'ë lë' lataj tséajlenë' Lë'. <sup>19</sup> Jesús biti' bë'ë lë' lataj, pero gudxë' lë':

—Böaj lidxu'. Yöjtixjöi'i di'a dza quiu' yugu' le zxön bena' quiu' neda', naca' Xanu', en ca bena' buéchi' ládxa' a li'.

<sup>20</sup> Söhüöjë' bönni' na', en ruzé' didza' yugu' yödzö Decápolis ca nácagaca le zxön benë' Jesús queë', ate' bulu'bani yúgu'të bönachi nacuá' yugu' yödzö ni'.

*Bi'i nigula queë' Jairo, en nigula na' gudannu lari' nácuë' Jesús*

(Mt. 9:18-26; Lc. 8:40-56)

<sup>21</sup> Cate' budxiné' Jesús ia'tsölá'a nísado' na', ní'irö bulu'dubi bönachi zián ga na' zoë' ra' nísado'. <sup>22</sup> Bönni' lë' Jairo, bönni' rinná bë'ë lu yu'u ga tu'dubë' bönni' judío, en nazëdë' queë' Dios, bidë' ga zoë' Jesús. Cate' bilé'ené' Jesús, buzóazxibë' lahuë', <sup>23</sup> en gúta'yuë' lahuë', rñnë':

—Chiraqui gátibi' bi'i nigúlado' quia'. Gudá ixóa no'o lëbi' para huöácabi', en biti' gátibi'.

<sup>24</sup> Sa'yéajlenë' Jesús lë', ate' bönachi zián söjácalen Jesús, tu'quirö Lë'. <sup>25</sup> Tu nigula, chinaca chinnu iz ré'enu, zóanu ca' ni'. Biti' ruhu'i rön queënu que huë' quégaca cázanu nigula. <sup>26</sup> Yenni' chigudf'i guzxáca'nu lu ná'agaquie' zián bönni' tu'únë' bönachi. Nítisö chibutönu dëra le dë queënu, tu' cabí bi gúcalen lënu, pero riyalí' queënu. <sup>27</sup> Cate' biyóningu tu'i didza' bönachi ca naca queë' Jesús, gudödinu ládjalo bönachi zián na', en bidxinnu zaca' cíduz'lë' Jesús, en gudannu lari' nácuë'. <sup>28</sup> Caní bennu tu' rñnanu: "Channö cansa' le nácuë', huöáca'." <sup>29</sup> La' bu'itë rön queënu, ate' réquibe'enu chiböácanu que le guca queënu.

<sup>30</sup> La' gúquibe'etenë' Jesús ben dxin yöl-la' huáca queë', ate' buécjë', ruyúë' bönachi zián na'. Rnnë':

—¿Nuzxi na' gudán neda'?

<sup>31</sup> Ní'irö bönni' dá'gaquie' Lë' të' Lë', ta'nné':

—Rilé'e quézinu' bönachi zián ni tu'quirö Li', en rñnatso': "¿Nuzxi na' gudán neda'?"

<sup>32</sup> Ruyúë' Jesús gásibi'ilé' para ilé'ené' nuzxi na' gudán Lë'. <sup>33</sup> Ní'irö nigula na' gubíga'nu lahuë'. Rádxinu, en rizxízinu tu' chinózinu bi na' guca queënu, ate' buzóazxibë' lahuë' Jesús, en gúdxinu Lë' idútë le nácatë. <sup>34</sup> Jesús rë'ë-nu:

—Nigúlado'. Chiböácu' tu' réajlë'u neda'. Böaj lidxu' idú ládxu'u. Tsaz nuhuöácu' que le guca quiu'.

<sup>35</sup> Tsanni ni' ru'ë caní didza' Jesús, bönni' narúajgaquie' lidxë' bönni' na' rinná bë'ë lu yu'u ga tu'dubë' tu'sédë' queë' Dios bila'dxnë' ni', en të' bönni' na':

—Chigútibi' bi'i nigúlado' quiu'. Bíti'rö upízxjanu' Bönni' Usedi.

<sup>36</sup> Biti' bë' ládxë'ë Jesús lë na' ta'nné', ate' gudxë' bönni' unná bë' na', rñnnë':

—Biti' gádxinu'. Guyéajlë'ësë' Dios.

<sup>37</sup> Biti' bë'ë lataj Jesús tsójácalen Lë' ia'zíca'rö bönachi, pero légacase' Pedro, en Jacobo, en Juan, bóchë'ë Jacobo na'. <sup>38</sup> Cate' bidxiné' lidxë' bönni' na' rinná bë'ë ga tu'dubë' tu'sédë' queë' Dios, bilé'ené' raca dzatsa, enca' nupa ni' ta'bödxi, en nupa ta'bödxi yechi'.

<sup>39</sup> Guyázie' Jesús, en gudxë' légaquie':

—¿Bizz que rutsátsali', en ribödxili' caní? Biti' nátibi' bi'i nigúlado' ni. Rásisibi' na'.

<sup>40</sup> Ni'irö bulu'titjë' Jesús, pero Lë' bubéajë' yúgu'të bönachi na' ní'ilö, ate' guché'ë xuz xiná'abi' bi'i nigúlado' na', enca' nupa nacuá'len Lë', ate' guyázië' ga na' dëbi'. <sup>41</sup> Gudélë'ë ná'abi' bi'i nigúlado' na', en gudxë'-bi':

—Talita, cumi.

Didza' hebreo ni rnna lu didza' xidza': Bi'i nigúlado', guyasa. <sup>42</sup> La' guyásatëbi' bi'i nigúlado' na', en buzé'ebi'. Chiyú'ubi' chinnu iz. Bulu'bani nupa nacuá' ni'. <sup>43</sup> Ni'irö Jesús gunná bé'enë' légaquië' cuntu nu ulu'siyönnë' lë na' guca. Gudxë' légaquië':

—Guli'gü' le gágubi' bi'i nigúlado' ni.

## 6

### *Ridxinë' Jesús Nazaret, le naca ladzë'*

(Mt. 13:53-58; Lc. 4:16-30)

<sup>1</sup> Buzë'ë Jesús ni', budxinë' ladzë', ate' yugu' bönni' dá'gaquië' Lë' söjácalenë' Lë'. <sup>2</sup> Cate' bidxín dza lá'ayi quégaquië' bönni' judío, gusí lahuë' Jesús rusédinë' bönachi ga na' tu'dubë' tu'sëdë' queë' Dios. Gula'cuá' bönachi zián ni' ta'yoni Lë'. Bulu'bani, ta'nná:

—¿Gazxi caz bizéde' bönni' ni yugu' lë ni? ¿Bizxi caz yöl-la' réajni'i ni nadéli'në'? ¿Nacxi caz runë' le nácagaca bë' na' zá'gaca yehua' yubá? <sup>3</sup> Náquië' bönni' ni gubëdxi yaga na', en zxí'ininu María. Náquië' bóch'i'gaquië' Jacobo, en José, en Judas, en Simón. Nigula zanë' nacuá'lennu ca' rë'u.

Que lë ni na' bulu'cá'anë' Lë' cá'asö. <sup>4</sup> Ni'irö Jesús gudxë' légaquië', rnnë':

—Gáti'tës tunë' bal nu bönni' ru'ë didza' uláz queë' Dios, pero bönachi uládz queë', en bönachi di'a dza queë', en bönachi nacuá' lidxë' biti' tun lë' bal.

<sup>5</sup> Que lë ni na' biti' guca gunë' Jesús nitú yöl-la' huáca zxön ni'. Bunsë' nabábasö bönachi te'e cate' guxóa né'ë léguequi. <sup>6</sup> Bubáninë' Jesús tu' cabí ta'yéajlë' Lë'. Gudödi na' gudödë' yugu' yódzödo' nacuá' gásibi'ilö, rusédinë' bönachi ni'.

### *Risöl-lë'ë Jesús bönni' dá'gaquië' Lë' tsöjéngäquië' libán*

(Mt. 10:5-15; Lc. 9:1-6)

<sup>7</sup> Ni'irö bulidzë' Jesús idxínnutë' bönni' dá'gaquië' Lë', en gusí lahuë' risöl-lë'ë légaquië' chopa huéajgaquië'. Budödë' lu ná'agaquië' yöl-la' unná bë' ulu'béajë' yugu' bö' xihui' yú'ugaca bönachi. <sup>8</sup> Gunná bé'enë' légaquië' biti' bi ilu'ë la' nöza, calëga yóxaj, calëga yöta, en calëga dumí biti' ila'gu'ë lu buzudi quégaquië', pero ilu'ë assë' xiyágado'. <sup>9</sup> Ralla' ulu'dé'ë xiráchugaquië', pero calëga chopa lari' ulu'xóá yéngäquië'. <sup>10</sup> Gudxë' ca' légaquië':

—Gáti'tës ga tsú'uli' tu yu'u, guli'soa yu'u na' cate' uzá'aröli' yódzö na'. <sup>11</sup> Channö tsú'uli' tu yódzö ga biti' ilún bönachi lu yódzö na' libí'il' bal, en biti' ulu'zé nágagaquië' xtídza'li', buli'rúaj ni', en buli'quínnaj bëchtö da'lé'e lábali'. Lë ni gaca bë' nabága'gaquië' xíguia'. Le nácatë rea' libí'il', cate' idxín dza ichúguië' Dios quégaca bönachi, ila'gu'i ila'záca'rö bönachi lu yódzö na' ca ila'gu'i ila'zaca' bönachi Sodoma, en Gomorra, yugu' yódzö na' busunítié' Dios.

<sup>12</sup> Ni'irö bila'rúajë' bönni' dá'gaquië' Lë', yójéngäquië' libán ca ral-la' ulu'bí'i ládxí'gaca bönachi. <sup>13</sup> Bulu'béajë' zián bö' xihui' yú'ugaca bönachi. Gula'gu'ë le za zián nupa te'e, ate' bulu'huöáquië'.

### *Ca bétigaquië' Juan, bönni' buquilë' bönachi nisa*

(Mt. 14:1-12; Lc. 9:7-9)

<sup>14</sup> Biyönnë' Herodes, bönni' unná bë', ca naca le runë' Jesús, tu' rizé didza' gáti'tës que yöl-la' huáca queë'. Bal-la bönachi ta'nná:

—Chibubanë' Juan, bönni' ni' buquilë' bönachi nisa, lu yöl-la' guti. Que lë ni na' napë' yöl-la' huáca runë' yugu' lë ni.

<sup>15</sup> Ia'bal-la bönachi ta'nná:

—Naquië' Elías, bönni' bë'ë didza' uláz queë' Dios dza ni'te.

Ia'bal-la bönachi ta'nná:  
—Naquië' bönni' ru'ë didza' uláz queë' Dios ca guláquië' bönni' gulu'ë didza' uláz queë' dza ni'te.

<sup>16</sup> Cate' biyönnë' Herodes yugu' lë ni, gunné':

—Naquië' Juan, bönni' na' burixa' yenë'. Chibubanë' lu yöl-la' guti.

<sup>17</sup> Caní gunné' Herodes tu' gusöl-lë'ë lë cazë' bönni' yöjxöngäquië' Juan na', ate' gulúgiü'ë lë' du guíë lu yu'u lidxi guíë. Caní benë' Herodes tu' rilenu Herodías Juan na'. Nácanu nigula na' gúcanu nigula queë' Felipe, bóchë'ë Herodes na'. Herodes gudúë'-nu Herodías na', en butsaga ná'alenë'-nu. <sup>18</sup> Juan na' gudxë' Herodes:

—Biti' ral-la' sóalenu'-nu nigula queë' bóchu'u.

<sup>19</sup> Que lë ni na' gusí gurö'önu Herodías. Gú'uninu bi gunnu queë' Juan, tu' gú'uninu gútinu lë', pero biti' bi guzxéqui' nu <sup>20</sup> tu' rádxinë' Herodes Juan. Nőzinë' náquië' Juan na' tsahui', en lá'ayi. Que lë ni na' gudapa chi'ë lë', en buzé náguië' lë' idú ládxë'ë sal-la' lë na' rnnë' Juan ben ga gurö'ë böninga Herodes na'. <sup>21</sup> Ni'irö bidxín tu dza guzxéqui' nu Herodías na', le naca dza runë' Herodes laní que dza guyé' enë' iz. Bupé'ë le ilë' aj ilahuë' bönni' dë lu ná'agaquië' uláz queë', en bönni' ta'nná bé'enë' bönni' rójáquië' gudil-la, enca' bönni' nácagaquië' lo luyú Galilea. <sup>22</sup> Guyázabi' bi'i nigula queënu Herodías ga na' të'aj tahuë', en buyá'abi' lógaquië'. Guyaza ládxë'ë Herodes ca runbi', en gula'yaza ládxí'gaca ca' nupa të'aj tágulen lë'. Ni'irö Herodes gudxë'-bi' bi'i nigula na', gunné':

—Gunaba bi ré'ënu' gunna' quiu', ate' guna' ca'.

<sup>23</sup> Benë' tsutsu xtídzë'ë, gudxë'-bi':

—Ni'a queë' Xanru' Dios gunna' quiu' bíti'tës bi inabu' ga idxintë gatsaj ga rinná bë'a.

<sup>24</sup> Burúajbi' lëbi', ate' gunábabi' xiná'abi':

—¿Bizxi inábatса?

Lënu gúdixinu-bi':

—Icjë' Juan, bönni' buquilë' bönachi nisa, inabu'.

<sup>25</sup> La' buázatëbi' ga na' zoë' Herodes, en rëbi'-në':

—Ré'ënda' ixú' quia' na'a lu zxiga' zxön icjë' Juan, bönni' na' buquilë' bönachi nisa.

<sup>26</sup> Ni'irö bui'innë' Herodes, pero tu' buzötje' Dios, en tu' bila'yöni ca' nupa tágulen lë', biti' gú'unnë' initi xtídzë'ë na' guzxi' lu në'ë queëbi'. <sup>27</sup> Herodes la' gusöl-la'të' tu bönni' rejë' gudil-la zoë' rapa chi'ë, ate' gunná bé'enë' lë' tsöjxi'ë icjë' Juan. <sup>28</sup> Bönni' na' rejë' gudil-la guyijë' lidxi guíë, yörrixë' yen Juan na', ate' bu'ë icjë', nuxóë' le tu lu zxiga' zxön. Budödë' le lu ná'abi' bi'i nigula na', ate' lëbi' bunödzjabí' le queënu xiná'abi'.

<sup>29</sup> Cate' bönni' dá'gaquië' Juan na' bila'yönnë' didza' chiguca lë na', bila'dxinë' ni', en bulu'ú'ë lë', ate' yöjcáchi'gaquië' lë' yeru ba.

### Rugahué' Jesús ziánrö ca chi-un gayuá' bönachi

(Mt. 14:13-21; Lc. 9:10-17; Jn. 6:1-14)

<sup>30</sup> Gudödi ni' bulu'dubë' bönni' gubáz queë' Jesús ga zoë', en gula'guíxjöi'inë' Lë' yúgu'të le gulunë', en yugu' le bulu'sédinë' bönachi. <sup>31</sup> Nacuá' bönachi zián ni', nupa zá'gaca, en nupa söjaca, ga bidxitë bíti'rö dë lataj ilahuë' Jesús, en yugu' bönni' dá'gaquië' Lë'. Que lë ni na' Jesús gudxë' légaquië', rnnë':

—Guli'dá. Uyéaj cázaru' ga naca lataj cá'asö, en uzí' ládxí'ru' tu chi'i.

<sup>32</sup> La' légacasë' yöjáquië' tu lë'e bárcodo', ate' bila'dxinë' tu lataj cá'asö. <sup>33</sup> Bila'lë'e bönachi zián légaquië' söjáquië' ni', en núnbe'gaca Jesús. Que lë ni na' bönni' yúgu'të yödzö ni' carelö yöjáquië' ni'. Gula'zë'e ní'agaquië', ate' bila'dxinë' ni' zí'atëlö ca Jesús, en yugu' bönni' dá'gaquië' Lë'. <sup>34</sup> Cate' burúajje' Jesús lë'e bárcodo' na', bilé'enë' bönachi zián na', ate' buéchi' ládxë'ë légaquië' tu' nácagaquië' ca bö'cu' zxíla'do' biti' zoa nu gapa chi'i légacaba'. Gusí lahuë' rusédinë' légaquië' le zián. <sup>35</sup> Cate' chiridzö' dza na', yugu' bönni' dá'gaquië' Jesús bila'dxinë' ga zoë', en të' Lë':

—Chiridzó’, ate’ lataj cá’asö naca ni. <sup>36</sup> Busöl-la’ bönachi zián ni para tsöjaca yugu’ yú’udo’, en yugu’ yődzödo’ nacuá’ gásibi’ilö, tsöjö’ugaca yöta, tu’ cabí bi dë ni le ilagu.

<sup>37</sup> Bubi’ë didza’ Jesús, gudxé’ légaquië’:

—Guli’güi’ libi’i cázali’ le ilahuë’.

Gulé’ Lë’:

—¿Naru’ tsöjö’utsatu’ yöta xtila len lázxjatu’ que idú xunu’ beo’, ate’ güi’itu’ le ilahuë’?

<sup>38</sup> Jesús gudxé’ légaquië’:

—¿Bal-laxi yöta xtila dë queéli? Guli’tsöjyútsöca’.

Cate’ chinóziguequinë’, të’ Lë’:

—Gáyu’sö yöta xtila dë, en chópasöba’ böla dëba’.

<sup>39</sup> Ní’irö gunná bë’ë Jesús ilunë’ ga ila’bő’ bönachi zián na’, ila’cuá’ tu cö’ huéajguequi ga naca lachi’ lu daca’. <sup>40</sup> Gula’cu’ë tu cö’ huéajgaquië’, tu gayuá’ huéajgaquië’, en chi-un huéajgaquië’. <sup>41</sup> Ní’irö gudélë’ë Jesús igáyu’të yöta xtila na’, en irópaba’ böla na’. Buyúë’ zaca’ lúzziba, en gudxé’ Dios: “Xclenu.” Ní’irö buzxuzxjë’ yöta xtila na’, en bë’ë quégäquië’ bönni’ usëda queë’ para ila’guisië’ quégaca bönachi zián na’. Gudisië’ ca’ irópatëba’ böla na’ quégaca yúgu’të bönachi na’. <sup>42</sup> Gulahuë’ yúgu’të, en bulu’huóljanë’.

<sup>43</sup> Ní’irö bulu’tubë’ le bizxaj que yöta xtila na’, en quégacaba’ böla, ate’ chinnu ga’böra bulu’lië’. <sup>44</sup> Guláquië’ ca chi-un gáyu’ë bönni’ na’ gulahuë’.

### Rizë’ e ni’ë Jesús lu nísado’

(Mt. 14:22-27; Jn. 6:16-21)

<sup>45</sup> La’ bentë’ Jesús ga gula’benë’ yugu’ bönni’ dá’gaquië’ Lë’ lë’e bárcodo’, para ila’nóruë’ lahuë’, ila’dödë’ lu nísado’ na’, para ila’dxinë’ lu yödzö Betsaida, tsanni ni’ Lë’ rusöl-lë’ bönachi zián na’ lídxiguequi. <sup>46</sup> Cate’ chibudxi busöl-lë’ légaquië’, guyije’ tu lu guí’ado’, ate’ ni’ rui’ilenë’ Dios didza’. <sup>47</sup> Cate’ chizá’ ral-la, zeaj bárcodo’ na’ gatsaj láhui’lö nísado’, ate’ zoë’ Jesús tuzë’ luyú bidxi na’. <sup>48</sup> Bilé’enë’ Jesús légaquië’, böninga tu’sé’ë bárcodo’ na’ tu’ recja bö’ za’ ga na’ ta’dödë’. Gudödi guluhuëla bidxinë’ Jesús ga na’ nacu’ë, rizë’ e ni’ë lu nísado’ na’, ate’ gü’unnë’ tódise’ ga na’ nacu’ë. <sup>49</sup> Cate’ bila’lé’enë’ Lë’ rizë’ e ni’ë lu nísado’, guléquinë’ bixín na’, ate’ gula’bödxi’ë <sup>50</sup> tu’ bila’lé’enë’ yúgu’të’ Lë’, en guladxi gula’dzöbinë’. Ní’irö la’ bulidztë’ Jesús légaquië’, rnnë’:

—Buli’tipa ládzi’li’. Neda’ caz. Biti’ gádxili’.

<sup>51</sup> Gurenë’ Jesús lë’e bárcodo’ ga na’ nacu’ë, ate’ gurö’ö dxi bö’ na’ recja, ate’ légaquië’ gula’niti gula’tíqui’sinë’ bulu’báninë’. <sup>52</sup> Biti’ ta’yéajni’ininë’ le rulu’i lë na’ benë’ Jesús que yöta xtila na’. Ni’ naca zidi icja ládzi’do’gaquië’.

### Ruuínë’ Jesús nupa te’ e lu yödzö Genesaret

(Mt. 14:34-36)

<sup>53</sup> Gula’dödë’ Jesús, en yugu’ bönni’ dá’gaquië’ Lë’ ia’tsölä’ a nísado’, ate’ bila’dxinë’ ga naca lu xiyúgaca bönachi Genesaret. Bulu’dxiguë’ë bárcodo’ luyú bidxi ni’. <sup>54</sup> Cate’ bulu’rúajë’ lë’e bárcodo’ na’, la’ bulu’únbe’ë bönachi ni’ Jesús. <sup>55</sup> Gula’xiti’ bönachi na’, yöjacä yúgu’të yődzödo’ idú gásibi’ilö, en gula’sí lógaquië’ dujuá’agaquië’ yúgu’të nupa te’ e ga zoë’ Jesús, zxóagaca yugu’ le déguequini, ate’ bila’dxinë’ gáti’tës ta’yönnë’ zoë’ Jesús. <sup>56</sup> Gáti’tës ga ridödë’ Jesús, yugu’ lu yődzödo’, en yugu’ yödzö zxön, en yugu’ yú’udo’, tu’cu’ë nupa te’ e quégäquië’ gapa naca la’ nöza, en gapa naca lu yé’ëyi, en ta’ta’yuë’ lahuë’ Jesús gu’ë légaquië’ lataj ila’gansë’ luzxi lari’ nácuë’. Yúgu’të nupa na’ bila’gán lari’ nácuë’ bulu’huöácatë dxí’ado’.

<sup>1</sup> Ní'irö bal-lë' bönni' yudo' fariseo len bal-lë' bönni' yudo' usedi narúajgaquië' Jerusalén, bulu'dubë' ga zoë' Jesús. <sup>2</sup> Bönni' yudo' ni bila'lé'enë' bönni' usëda queë' Jesús tahuë' yöta, biti' nuchi'agaquië' ná'agaquië', lë na' rnna: Biti' nayárigaca ca nalébiguequinë' tunë' bönni' yudo' na'. Que lë ni na' gula'nné' quégaquië'. <sup>3</sup> Yugu' bönni' yudo' fariseo na', en ia'zica'rö bönnachi judío tunë' ca gulébiguequinë' gulunë' xuz xtó'ogaquië', ate' channö cabí ta'guíbi ná'agaquië' zián luzuí ca na' nalébiguequinë' tunë', biti' ca' tahuë'. <sup>4</sup> Cate' tu'dxinë' röjö'ugaquië' lu yé'ëyi, channö cabí ta'guibë' lë na' ca nalébiguequinë' tunë', biti' ca' tahuë'. Ziánrö ca' tunë', yugu' le nalébiguequinë' tunë'. Caní ta'guibë' zxiga' yó'öna, en yugu' zxiga' guíë, en yugu' le táti'në'. <sup>5</sup> Que lë ni na' yugu' bönni' yudo' fariseo, en yugu' bönni' yudo' usedi gula'nábinë' Jesús, ta'nné':

—¿Naru' cabí tunë' yugu' bönni' usëda quiu' ca gulébiguequinë' gulunë' xuz xtó'oru', pero tahuë' yöta biti' nuchi'agaquië' ná'agaquië'?

<sup>6</sup> Bubi'ë didza' Jesús, rë' légaquië':

—Libi'ili', bönni' rulu'isö tsahui' cuinli'. Nácatë le gudíxjö'ë Isaías, bönni' ni' bë'ë didza' uláz queë' Dios, ca naca queéli'. Buzúaje' lu guichi, gunné':

Yugu' bönni' ni, len rú'agacasë' tunë' neda' bal,  
calëga idú ládxi'gaquië'.

<sup>7</sup> Nítisö naca yöl-la' ba ta'gu'ë neda'  
tu' tu'sédinë' le ta'nná bë' bönnachi,  
calëga xibá quia'.

<sup>8</sup> Caní naca, tu' rucá'anali' le gunná bë'ë Dios, ate' runli' yugu' le nazí' láhuili' lu ná'agaca bönnachi.

<sup>9</sup> Gudxë' ca' légaquië':

—Idú ládxi'li' rucá'anali' cá'asö le gunná bë'ë Dios para gunli' ca naca le nulaga loli' runli'. <sup>10</sup> Moisés gunné' caní: "Ben bal xuz xinó'o." Gunné' ca': "Nu ulidza zi' xuzi o xiné'e, guli'gútite nu na'." <sup>11-12</sup> Libi'ili' rninali' caní: "Channö nu bönni' guíë' xuzé' o xiné'ë: Biti' gaca bi gunna' queéli', tu' naca Corbán." (Didza' ni rnna lu didza' xidza': Tu' nuzoa' quez queë' Dios yúgu'të.) Ní'irö rninali': "Biti' run bayudxi bi gunë' bönni' na' quégaquië' xuz xiné'ë." <sup>13</sup> Caní naca, rucá'anali' cá'asö xtídzë'ë Dios para gunli' le nulaga loli' runli', yugu' le rudódili' lu ná'agaca zxí'ini xi'sóali'. Ziánrö ca' le caní runli'.

<sup>14</sup> Ní'irö Jesús bulidzë' bönni' zián na' nacu'ë ni', en rë' légaquië':

—Guli'zé nágali' didza' gu'a, yúgu'tëli', en guli'tséajni'i. <sup>15</sup> Biti' bi dë le riyaza nu bönni' le gaca gun ga biti' náquië' tsahui' lahuë' Dios, pero le rirúaj lë', lë ni gaca gun ga biti' náquië' tsahui' lahuë' Dios. <sup>16</sup> Channö zoa nágali', en riyónili', buli'zé nágali'.

<sup>17</sup> Cate' Jesús bulá'alenë' bönnachi zián na', guyu'ë tu yu'u, ate' yugu' bönni' usëda queë' gula'nábinë' Lë' ca naca lë na' bucúdu'ë didza'. <sup>18</sup> Jesús gudxë' légaquië':

—¿Riyádzjatsö ca' queéli' yöl-la' réajni'i? ¿Naru' cabí réajni'ilí', yúgu'të le riyaza nu bönni', biti' gaca gun ga biti' náquië' tsahui' lahuë' Dios? <sup>19</sup> Naca caní tu' cabí riyaza icja ládxi'da'ahuë', pero lë'ësë' riyaza, ate' rurúaj lë'ë.

Tu' gunné' caní Jesús, bulu'inë' rë'u naca dxi'a yúgu'të le rë'aj ráguru'. <sup>20</sup> Gunné' ca' Jesús:

—Le rirúaj lu bönni' run ga biti' náquië' tsahui' lahuë' Dios. <sup>21</sup> Caní naca, tu' ta'rúaj icja ládxi'do'gaquië' bönni' yugu' le ta'zá' ládxi'gaquië' le naca xihui', yugu' le tun ga tunë' dul-la' ta'guitsjë' xibá que yöl-la' nutsaga na', en yugu' le ruá' dö'. Tun ga tútië' bönnachi, <sup>22</sup> en ta'banë', en ta'zé ládxi'gaquië' le dë que luzá'agaquië', en tu'ë dö', en ta'zí' yë'ë, en tu'zxé'ë, en ta'nná zi'ë que luzá'agaquië', en tun ba zxön cuíngaqüië', en tunë' le canóz. <sup>23</sup> Yúgu'të le xihui' caní ta'rúaj icja ládxi'da'ahuë' nu bönni', en tun ga biti' náquië' tsahui' lahuë' Dios.

*Tu nigula izá'a réajlé'ënu Jesús  
(Mt. 15:21-28)*

<sup>24</sup> Buzé'ë Jesús ni', ate' bidxinë' gala' ga nacuá' yödzö Tiro, en yödzö Sidón. Guyázië' tu yu'u ni', en gú'unne' cuntu nu inözi, pero biti' ca' guca ucachi' cuinë'. <sup>25</sup> Tu nigula zóabi' bi'i nigúlado' queénu, yu'u bö' xihui' läbi', biyóninu didza' rizé ca naca queé' Jesús, ate' la' bídäténu ga zoë' Jesús, en buzóá zxíbinu xini'ë. <sup>26</sup> Nigula ni biti' nácanu judío, pero nabábanu bönachi Sirofenicia. Gúta'yunu lahuë' Jesús ubéajé' bö' xihui' na' yu'u-bi' bi'i nigúlado' queénu. <sup>27</sup> Ní'irö Jesús gudxë'-nu, rnnë':

—Bé' lataj ulu'huölaj zí'alö nupa nácagaca ca zxífini xan yu'u, tu' cabí naca dxi'a ugúaru' yöta quégacabi' bi'i na', en chú'unaru' le lögacaba' bö'cu'do'.

<sup>28</sup> Bubí'nu didza' nigula na', gúdixinu Jesús:

—Ön, Xan, pero yugu' bö'cu'do' nacuá'aba' zxani ga tágubi', táguba' le bizxaj tu'huóxaj ga na' tágubi'.

<sup>29</sup> Ní'irö Jesús gudxë'-nu, rnnë':

—Tu' gunnó' caní, huáca huóaju'. Chiburúaj bö' xihui' na' guyú'u-bi' bi'i nigúlado' quiu'.

<sup>30</sup> Cate' budxinnu lídxinu, bilé'enu-bi' bi'i nigúlado' queénu na', dëbi' lu da'a, en chinurúaj bö' xihui' na' guyú'u läbi'.

*Jesús ruúnë' tu bönni' nacóödzuë', en biti' gaca inné'*

<sup>31</sup> Burúajé' Jesús lataj na' nababa yödzö Tiro, ate' gudödë' gapa dë yödzö Sidón, en yugu' yödzö Decápolis, ate' bidxinë' ra' nísado' lu xiyú Galilea. <sup>32</sup> Bönachi ni' dujuá'gaca tuë' bönni' nacóödzuë', en biti' raca inné' ga zoë' Jesús, ate' ta'ta'yu lahuë' Jesús ixóa næ'ë lë'. <sup>33</sup> Jesús bubéajé' lë' tsölä'alö lädjagaca bönachi na', ate' buné'ë xibón næ'ë yelu náguië' bönni' na'. Gurú'unë' zxöna'do', en gudanë' lúdxë'ë. <sup>34</sup> Ní'irö buyúë' lúzxibálö, en gunnë ládxë'ë, rnnë':

—Efata.

Didza' hebreo ni rnna lu didza' xidza': Guyalaj.

<sup>35</sup> La' böáljatë náguië', en la' buguítjatë lúdxë'ë, en gunnëtë' dxí'ado'. <sup>36</sup> Jesús gunná bë'enë' légaquië' cuntu nu ilé' ca', pero tsca gunná bë'enë' légaquië', bulu'zétérë' ca' didza' que lë na' benë'. <sup>37</sup> Bulu'báninë, ta'nné':

—Tsáhui'do' runë' yúgu'të. Runë' ga tu'yöni nupa gulaca ciòdu, en ga tu'i didza' nupa biti' guca ila'nné'.

## 8

*Rugahuë' Jesús ziánrö ca choá' gayuá' bönachi*

*(Mt. 15:32-39)*

<sup>1</sup> Yugu' dza na' bulu'dubi bönachi zián ga zoë' Jesús. Tu' cabí dë le ilágugaca, Jesús bulidzë' bönni' usëda queé', ate' bë'lenë' légaquië' didza'. <sup>2</sup> Gudxë' légaquië':

—Ruhuechi' ládexa'a bönachi zián ni tu' chinaca tsonna dza nacuá'len neda' ni, en biti' dë le ilágugaca. <sup>3</sup> Channö usö'l-la'a léguequi lídxigaca ta'dunsö ca', huala'cuídi' la' nöza, tu' zá'gaca zi'tu' bál-lagaca.

<sup>4</sup> Bulu'bí'ë didza' bönni' usëda queé', të' Lë':

—¿Bizxi ugágutsaru' bönachi guizxi yu ni, ga ni naca lataj cá'asö?

<sup>5</sup> Gunábinë' Jesús légaquië', rnnë':

—¿Bál-laxi yöta xtila dë queéli'?

Të' Lë':

—Gádxisö.

<sup>6</sup> Ní'irö Jesús gunná bë'enë' bönachi zián na' ila'bó' lu yu. Gudélë'ë gadxi yöta xtila na', ate' gudxë' Dios: "Xclenu'." Ní'irö buzzuzzjë' léguequi, en bë'ë quégäquië' bönni' usëda queé' para ila'guisië' lögaca bönachi zián na'. <sup>7</sup> Guta' ca' quégäquië' tu chópaba' böla

cuidi'. Jesús gudxë' Dios: "Xclenu'", ate' gunná bé'ené' légaquië' ila'guisië' ca' légacaba' lógaca böñachi. <sup>8</sup> Gulagu yúgu'të böñachi na', en bulu'huölaj. Ní'irö bulu'tubë' le bizxaj nagá'anagaca, ate' gula'lí idú gadxi ga'böra. <sup>9</sup> Bönachi na' gulagu gulaca idú ca choá' gayuá'gaca. Jesús busöl-lë' léguequi lídxigaca, <sup>10</sup> ate' gurenë' lë'e bárcodo' tsözxón len yugu' bönni' usëda queë', ate' bila'dxinë' lu xiyúgaca böñachi Dalmanuta.

*Ta'nábinë' Jesús gunë' tu le gaca bë' nuzxi náquië'*  
(Mt. 16:1-4; Lc. 12:54-56)

<sup>11</sup> Ní'irö bila'dxinë' bönni' yudo' fariseo ga zoë' Jesús, en gula'sí lógaquië' ta'dfl-lalenë' Lë' didza'. Gulé'ennë' ila'zí' bë'ë Jesús. Que lë ni na' gula'nábinë' Lë' gunë' tu le naca bë' za' yehua' yubá. <sup>12</sup> Gunnëda' ládxë'ë Jesús, rnnë':

—¿Bizz que ta'nábitsö böñachi ni neda' guna' tu le naca bë' za' yehua' yubá? Le nácatë rea' libí'ili', biti' ca' ilé'eli' tu le naca bë' za' yehua' yubá.

<sup>13</sup> Ní'irö bulá'alenë' légaquië'. Bubenë' lë'e bárcodo', en sa'yéajé' ia'tsölá'a nísado'.

*Le tu'sédinë' bönni' yudo' naca ca cúa zi que yöta xtila*  
(Mt. 16:5-12)

<sup>14</sup> Gulal-la ládx'i'gaquië' bönni' usëda queë' Jesús ilu'ë bi ilahuë', ate' tuz yöta xtila dë lë'e bárcodo' na'. <sup>15</sup> Ní'irö Jesús buzéajni'inë' légaquië', rnnë':

—Buli'yútsöca' queéli'. Guli'gún chi'i cuinli' para cabí sí'ili' le naca ca cúa zi que yöta xtila quégaquië' bönni' yudo' fariseo, en queë' Herodes.

<sup>16</sup> Gula'sí lógaquië' tu'ë didza' bönni' usëda queë' la' légacasë', ta'nnë':

—Gunnë' caní tu' cabí dë yöta xtila gáguru'.

<sup>17</sup> Réquibe'enë' Jesús le ta'nnë', ate' rë' légaquië':

—¿Bizz que ru'ili' caní didza' tu' cabí dë yöta xtila gáguru'? ¿Naru' cabí réajni'itseli', en biti' réquibe'itseli'? ¿Ni nácatsö zidi icja ládx'i'do'oli'? <sup>18</sup> ¿Zóatsö guiój loli', en biti' rilé'eli', en zóatsö guídi nágali', en biti' riyónili'? ¿Naru' cabí röjnëtseli'? <sup>19</sup> Cate' ni' buzxuzxa' gayu' yöta xtila, ate' gulahuë' chi-un gáyu'ë bönni', ¿bál-laxi ga'böra bulili' le bizxaj butúbili'?

Gula'nnë':

—Chinnu.

<sup>20</sup> Gunnë' ca' Jesús:

—Cate' ni' buzxuzxa' gadxi yöta xtila, ate' gulagu choá' gayuá' böñachi, ¿bál-laxi ga'böra bulili' le bizxaj butúbili'?

Gula'nnë':

—Gadxi.

<sup>21</sup> Ní'irö Jesús gudxë' légaquië':

—¿Naru' cabí réajni'itseli' na'a, bë'a didza' que le tu'sédinë' bönni' na'?

*Jesús ruúnë' bönni' Betsaida nachul-la lahuë'*

<sup>22</sup> Cate' Jesús, en bönni' dá'gaquië' Lë' bila'dxinë' yödzö Betsaida, bila'dxín ga zoë' Jesús nupa dujuá'gaquië' queë' tu bönni' nachul-la lahuë'. Ta'tá'yuë' lahuë' cané' bönni' na'.

<sup>23</sup> Jesús gudélë'ë né'ë bönni' na' nachul-la lahuë', ate' guché'ë lë' ní'ilö ra' yödzö. Ni' budxíe' zxöna' guiój lahuë', en guxóa né'ë lë'. Ní'irö gunábinë' lë', rnnë':

—¿Ba rilé'enu' lati'?

<sup>24</sup> Buyúë' bönni' na' nachul-la lahuë', rnnë':

—Rilé'egacada' böñachi, nalá'gaca ca yugu' yaga, pero ta'dá böñachi na'.

<sup>25</sup> Leyúbölö guxóa né'ë Jesús guiój lahuë', ate' buyúdë'ë bönni' na' nachul-la lahuë', ate' böácatë dxí'ado' guiój lahuë'. Na'a rilé'enë' dxí'ado' yúgu'të. <sup>26</sup> Ní'irö Jesús gusöl-lë'ë lë' lidxë', rnnë':

—Biti' tsöjdödu' lahui' yödzö, en cuntu nu guío' le bena' nu zoa lu yödzö ni.

*Rnnë' Pedro: "Jesús náquië' Cristo"*  
*(Mt. 16:13-20; Lc. 9:18-21)*

<sup>27</sup> Gudödi na', bulu'zé'ë Jesús, en yugu' bönni' usëda queë' ni', ate' gula'dödë' yugu' yódzödo' nabábagaca Cesarea, ga na' rinná bë'ë Filipo. Tsanni ni' yú'ugaquië' nöza, Jesús rinabi yudxë' yugu' bönni' usëda queë', rnnë':

—¿Nuzxi ta'nná bönachi naca'?

<sup>28</sup> Bulu'bí'ë didza', ta'nné':

—Ta'nná bal-la bönachi nacu' Juan, bönni' buquilë' bönachi nisa. Ta'nná ia'bal-la nacu' Elías, bönni' bë'ë didza' uláz queë' Dios dza ni'te. Ta'nná ia'bal-la nacu' bönni' yúbölö bë'ë didza' uláz queë' Dios dza ni'te.

<sup>29</sup> Ní'irö Jesús gunábinë' légaquië', rnnë':

—Nazxi lib'ili', ¿nuzxi rnnañi' naca'?

Bubi'ë didza' Pedro, rnnë':

—Li' nacu' Cristo.

<sup>30</sup> Ní'irö Jesús gunná bé'enë' légaquië' cuntu nu ulu'siyönnë' Nu náquië'.

*Riguixjö'ë Jesús ca si' ilútië' Lë'*

*(Mt. 16:21-28; Lc. 9:22-27)*

<sup>31</sup> Ní'irö gusí lahuë' Jesús rusédinë' bönni' dá'gaquië' Lë', rnnë':

—Run bayudxi qui'i saca'a neda', Bönni' Guljë' Bönachi. Bönni' gula tu'zéajni'inë', en yugu' bixúz unná bë', en bönni' yudo' tu'sédinë' ulu'zóë' neda' tsölá'alö. Ilútië' neda', pero cate' gaca tsonna dza ubana'.

<sup>32</sup> Yálajsö bë'lenë' légaquië' didza' ni. Ní'irö Pedro guché'ë Jesús tsölá'alö, en gusí lahuë' ridil-lë' lë' didza'. <sup>33</sup> Buécjë' Jesús, en buyúë' ia'zíca'rë' bönni' usëda queë', ate' buzenë' bach Pedro, rnnë':

—Gucuita ga zoa'. Nacu' ca Satanás, tu' xihui'. Le rizá' ládxu'u biti' za' lu në'ë Dios, pero ca ta'zá' ládx'i'gaca bönachi naca.

<sup>34</sup> Ní'irö Jesús bulidzë' yugu' bönni' usëda queë', enca' bönachi nacuá' ni', en gudxë' légaquië':

—Channö ré'ënë' nu bönni' té'ë neda', ral-la' uzóë' tsölá'alö le ré'ëni quézinë', en gáquië' ca tu bönni' sa'yéajë' söjté'ë lë'e yaga cruz, ate' ní'irö huáca té'ë neda'. <sup>35</sup> Nu bönni' ru'ida' ládxë'ë yöl-la' na'bán queë', unítië' le, pero nu bönni' unítië' yöl-la' na'bán queë' tu' dë'ë neda', o tu' dë'ë didza' dxí'a quia', udéli'në' bönni' ni yöl-la' na'bán queë'.

<sup>36</sup> ¿Naru' uzi'tsë' xibé tu bönni' channö utubé' yúgu'të le dë yödzölió ni, pero uniti cuinë'?

<sup>37</sup> Biti' bi gaca unödzjé' tu bönni' le huöá'ui cuinë'. <sup>38</sup> Channö zoë' nu bönni' rutu' inë' quia' neda', en que xtídz'a' lógaca bönachi ni nucá'anagaca Dios, en tun dul-la', lësca' caní neda', Bönni' Guljë' Bönachi, utu'ida' queë' bönni' na' cate' guídalena' yöl-la' huáca zxön queë' Xuza', ate' dzágagaquië' gubáz lá'ayi neda'.

## 9

<sup>1</sup> Jesús gudxë' ca' légaquië', rnnë':

—Le nácatë rea' lib'ili', nacuá' ni nupa biti' ilátigaca cate' ila'lé'erö idinná bë'ë Dios luyú ni, en ilá' lahui yöl-la' huáca zxön queë'.

*Ridzá'a ca riná' lahuë' Jesús*  
*(Mt. 17:1-13; Lc. 9:28-36)*

<sup>2</sup> Cate' chiguddödi xopa dza, Jesús guché'ë Pedro, en Jacobo, en Juan, ate' légacasë' yójáquië' tu lu guí'a sibi. Ni' bidzá'a ca riná' lahuë' Jesús lógaquië' yonnë' na'. <sup>3</sup> Guyépi yösa ben' lari' nácuë' Jesús, ate' guca chiguichido'os. Zxíla'do'os guca, le cuntu nu ra' lari' yödzölió ni gaca gun chiguichido'os ca guca lari' na'. <sup>4</sup> Bulu'lui'i lógaquië' Elías, en Moisés, tu'ilenë' Jesús didza'. <sup>5</sup> Ní'irö Pedro gudxë' Jesús:

—Bönni' Usedi, bica' ba rë'u zóaru' ni. Gúntsöca'tu' tsonna yu'u lága'do', tu quiu', ia'tú queë' Moisés, en ia'tú queë' Elías.

<sup>6</sup> Caní gunn ' Pedro tu' cab  n zin ' bi na' rnn ', tu' t dixin ' b nni' us da que ' Jes s  na'. <sup>7</sup> N ir o gur ' b aj le gul ' u zxul-la l gaqui ', ate' biy n chi'i nu ru ' i didza' lu b aj na', rnna'.

—B nni' ni Zx ' ina'. Nadx ' ida' L '. Buli' z ' n gali' L '.

<sup>8</sup> La' bulu'yut ' pero c ntur  nu ta'l ' en '. Tuz ' Jes s z alen ' l gaqui '.

<sup>9</sup> Tsanni ni' y ' ugaqui ' n za, tu'd nni ' lu gu ' a sibi na', Jes s gunn ' b ' en ' l gaqui ' cuntu nu ulu'siy nn ' ca', l ' na' bila'l ' en ', cate' ubanr ' lu y l-la' guti L ', B nni' Gulj ' B nachi. <sup>10</sup> Que l  ni na' gula'g ' us '  cagaqui ' didza' ni b ' e, ate' la' l gac ' ta'nabi y dixin ' luz ' agaqui ' bizxi sa'y aj didza' na' b ' e, gunn ' ubani ' lu y l-la' guti.

<sup>11</sup> Gula'n bin ' Jes s, ta'nn ':

— Bizz que ta'nn ' b nni' yudo' usedi run bayudxi gu d ' El as z ' al ' ca gu d ' Cristo?

<sup>12</sup> Bubi' ' didza' Jes s, rnna':

—Le n cat ' gu d ' El as z ' al ', en ucu' ' y gu't ' ca ral-la' gaca. Na'a,  bizxi sa'y aj le naz aj lu guichi rnna run bayudxi qui'i s qu ' ' B nni' Gulj ' B nachi, ate' c ' as ' ulu'c ' ana b nachi L '? <sup>13</sup> Rea' lib 'ili': Chibid ' El as, ate' gulun ' que ' tsca gul 'enn ', tsca naz aj lu guichi l 'ayi ca ral-la' gaca que '.

*Jes s ru n '-bi' bi'i b nni' yu'u l bi' b ' xihui'*

*(Mt. 17:14-21; Lc. 9:37-43)*

<sup>14</sup> Cate' ni' bulu'dxin ' Jes s, en b nni' dz gagaqui ' L ' ga na' nacu' ' ia'z ca'r ' b nni' us da que ' Jes s, bila'l ' en ' nacu ' b nachi zi n ni', ate' b nni' yudo' tu's din ' ta'd l-lalen ' yugu' b nni' us da que ' na' didza'. <sup>15</sup> Cate' b nachi zi n na' bila'l ' e Jes s, bulu'bani, en carel ' z 'gaca ga na' z 'e, dij dxigaca L : "Padiux."

<sup>16</sup> N ir o Jes s gun bin ' yugu' b nni' us da que ' na', rnna':

— Bizxi didza' na' ridfl-lalenli' l gaqui '?

<sup>17</sup> Bubi' ' didza' tu b nni' n ts ' ' ladaj b nachi zi n na', rnna':

—B nni' Usedi, nach 'a-b ' bi'i b nni' do' quia' ni quiu', yu'u l bi' b ' xihui' le run ga biti' raca inn bi'. <sup>18</sup> Cate' b ' xihui' na' ru'u l bi', rurixi rutula l bi' lu yu, ate' rib ' bidxina' zidi' ru 'abi', en rutil-la l ya'bi'. Que l  ni na' zeaj ridx tabi'. Gun bigacada'-n ' b nni' us da quiu' ulu'b aje' b ' xihui' na', pero biti' gula'z qui'n '.

<sup>19</sup> Bubi' ' didza' Jes s, rnna':

—Lib 'ili', b nni' cab  ta'y ajl ' '.  G ca'xt e caz ral-la' s alena' lib 'ili'?  G ca'xt e caz ral-la' gu ' ilena' que li'? Guli'digu 'bi' quia' ni.

<sup>20</sup> Duju 'agaqui 'bi' ga na' zo ' Jes s. Cate' b ' xihui' na' bil ' e L ', la' bux zit ' l bi'. Gudz ' bi' lu yu, ate' burixi butula l bi', ate' bidx 'a bidxina' zidi' ru 'abi'. <sup>21</sup> N ir o Jes s gun bin ' x zib ' bi'i na', rnna':

— G ca'xi chiguca raca can  que bi'?

Rnn ' x zib ' na':

—Ni' n cat 'bi'ido' r 'ebi' can . <sup>22</sup> Zi n l zu ' rir 'una l bi' lu gu ', en lu nisa para guti l bi'. Que l  ni na', chann  racu' lati', bu chi' ladxi' netu', g calenu' netu'.

<sup>23</sup> Jes s gudx ' l ':

—Chann  hu ca ts ajl ' u, y gu't ' hu ca chann  ts ajl ' u Dios.

<sup>24</sup> La' b 't ' zidzaj didza' x zib ' bi'i na', rnna':

— R ajl 'a!  G calen ned ' para ts ajl ' ra' L '!

<sup>25</sup> Cate' bil 'en ' Jes s z 'gaca b nachi zi n, tu'qu ' buzen ' bach b ' xihui' na', r ' le:

—Li', b ' xihui' runu' ga biti' raca inn , en biti' raca y ni b nachi, rinn ' b 'eda' li' uruju' lu bi'i ni, en b ti'r ' tsu'u l bi'.

<sup>26</sup> Gur dxi'a b ' xihui' na', en burixi but lada' bi'i na'. N ir o bur ajt , en buc 'ana bi'i na' ca bi'i nat 'c abi'. Ca' naca, gul 'i didza' b nachi zi n ni', ta'nn :

—Chin t bi'.

<sup>27</sup> Ni'irö Jesǖs gudélë'ë ná'abi', en buchisë'-bi', ate' guzuíbi' bi'i na'.  
<sup>28</sup> Ni'irö guyázië' Jesǖs tu yu'u, ate' la' légacasë' gula'nábinë' bönni' usëda queë' Lë', ta'nnë':  
—¿Bizx que biti' guca ubéajtu' netu' bö' xihui' na'?  
<sup>29</sup> Jesǖs gudxë' légaquië':  
—Biti' gaca ubéajli' cá'asö bö' xihui' caní, pero tuz channö ulídzali' -në' Dios, en gunli' gubasa.

*Jesǖs riguíxjö'ë leyúbölö ca si' ilútië' Lë'*  
(Mt. 17:22-23; Lc. 9:43-45)

<sup>30</sup> Cate' bulu'zé'ë Jesǖs, en yugu' bönni' dá'gaquië' Lë' ni', gula'dödë' luyú Galilea. Biti' ré'ënë' Jesǖs nu inözi ga na' zoë' <sup>31</sup> tu' rusédinë' yugu' bönni' usëda queë'. Rë' légaquië':  
—Ulu'dödë' neda', Bönni' Guljë' Bönachi, lu ná'agaquië' bönni' ilútië' neda', pero tödi gátia', cate' gaca tsonna dza ubana'.

<sup>32</sup> Biti' gula'yéajni'inë' didza' ni rë' légaquië', ate' tu' tádxinë', biti' bi gula'nábinë' Lë'.

*Nu naca lo*  
(Mt. 18:1-5; Lc. 9:46-48)

<sup>33</sup> Ni'irö Jesǖs, en bönni' dá'gaquië' Lë' bila'dxinë' yödzö Capernaum, ate' tsanni ni' nacu'ë lu yu'u, Jesǖs gunábinë' légaquië', rnnë':  
—¿Bizxi didza' na' gudíl-lalen luzá'ali' cate' ni' yú'uli' nöza?

<sup>34</sup> Légaquië' bulu'sayaj rú'ugaquië', tu' gula'díl-lalen luzá'agaquië' didza' la' nöza ni' núzxilögaquië' gáquië' bönni' lo. <sup>35</sup> Ni'irö gurö'ë Jesǖs, en bulidzë' idxínnutë' bönni' usëda queë'. Rë' légaquië':

—Nu ré'ëni gaca lo ral-la' gaca ca tu bönni' cuídi'sö, enca' ca ni'a ná'ali' yúgu'tëli'.  
<sup>36</sup> Ni'irö Jesǖs gudélë'ë-bi' tubi' bï'ido', en buzóë'-bi' gatsaj láhui'lö ga na' nacu'ë. Ni' runidë'-bi', rë' légaquië':  
<sup>37</sup> —Nu bönni' si' lu në'ë tu bï'ido' caní tu' néquibi' quia', si' lu në'ë ca' neda', ate' nu bönni' si' lu në'ë neda', caléga néda'sö si' lu në'ë, pero si' lu në'ë ca' Xuza', Bönni' na' nasól-lé'ë neda'.

*Nu biti' ridá'baga' rë'u, rácalen rë'u*  
(Mt. 10:42; Lc. 9:49-50)

<sup>38</sup> Ni'irö Juan gudxë' Jesǖs:  
—Bönni' Usedi, bilé'etu'-në' tu bönni' rubéajë' yugu' bö' xihui', rugunë' dxin lo'. Gunná be'etu' lë' bítí'rö gunë' ca', tu' cabí dë'ë rë'u.

<sup>39</sup> Ni'irö Jesǖs gudxë' lë':  
—Biti' inná bé'eli'-në', tu' channö zoë' nu bönni' runë' tu yöl-la' huáca le za' yehua' yubá, en rugunë' dxin La' neda', biti' ca' gaca bönni' na' inné zí'ë quia'. <sup>40</sup> Caní naca, nu biti' ridá'baga' rë'u, rácalen nu na' rë'u. <sup>41</sup> Núti'tës nu gunna queéli' tu zxíga'do' nisa guí'jali' tu' dá'ali' neda', Cristo, si'i caz nu na' le ral-la' gata' que.

*Zoa bönadxi queéru' gunru' ga nu gun dul-la'*  
(Mt. 18:6-9; Lc. 17:1-2)

<sup>42</sup> Gunné' ca' Jesǖs:  
—Núti'tës nu gun ga gunbi' dul-la' tubi' bï'ido' caní réajlé'ëbi' neda', gácarö dxi'a ugala' nu na' guichi riyyetu yaga yeni, en tsöjchú'una cuini lu nísado'. <sup>43</sup> Channö tu no'o gun ga gunu' dul-la', guchugu le. Dxí'arö gaca quiu' tsöjtsáziu' ga su' ibanu' zoa tuz no'o, caléga zoa chopá no'o, ate' tsöjtsáziu' lu guí' gabila, ga ni' biti' ulu guí' que. <sup>44</sup> Lataj ni' biti' ilátiba' buzuga' yú'ugacaba' nupa tsöjcuá' ni', ate' guí' na' biti' ca' ulu. <sup>45</sup> Lësca' caní, channö tu ni'u gun ga gunu' dul-la', guchugu le. Gácarö dxi'a quiu', tsöjtsáziu' ga su' ibanu' zoa tuz ni'u, caléga zoa chopá ni'u, ate' tsöjtsáziu' lu guí' gabila, ga ni' biti' ulu guí' que. <sup>46</sup> Lataj ni' biti' ilátiba' buzuga' yú'ugacaba' nupa tsöjcuá' ni', ate' guí' na' biti' ca' ulu. <sup>47</sup> Lësca' caní, channö tu guiój lo' gun ga gunu' dul-la', guléaj le. Gácarö dxi'a quiu'

tsöjtsáziu' ga rinná bë'ë Dios zoa tuz guiój lo', caléga zoa chopá guiój lo', ate' tsöjtsáziu' lu guí' gabilä. <sup>48</sup> Lataj ni' biti' ilátiba' buzuga' yú'ugacaba' nupa tsöjcuá' ni', ate' guí' na' biti' ca' ulu.

<sup>49</sup> 'Ruxí'iru' bëla' zödi', en rugála'ru' le ra' guí', para cabí gaca ditaj. Lë ni rusedi rë'u ca ulu'huöáca dxi'a yúgu'të böñachi. Lësca' caní, ré'ënë' Dios izxí'i zödi' yúgu'të böa' bëdxido' tu'zégui'gaquië'-ba' lu bucugu lá'ayi queë'. <sup>50</sup> Dxi'a naca zödi', pero channö initi yöl-la' siná'a que, ¿nacxi úniru' le siná'a? Guli'gaca la' libí'isili' ca zödi' dxi'a, sóali' dxí'ado' tuli' len ia'tuli'.

## 10

*Rusédinë' Jesús que nu rulá' yöl-la' nutsaga na'*

(Mt. 19:1-12; Lc. 16:18)

<sup>1</sup> Buzé'ë Jesús yödzö Capernaum, ate' guyijé' luyú Judea, en gudödë' ia'tsölá'a yegu Jordán saca' ga rilén gubidza. Bulu'dubi leyúbölö böñachi zián ga zoë', ate' leyúbölö busédinë' légaquië' ca run cazë'. <sup>2</sup> Ní'irö bila'dxinë' bönni' yudo' fariseo ga zoë' Jesús, ate' té'ennë' ilunë' ga bi innë' Jesús para gaca ulu'zéguië' Lë' didza'. Gula'nábinë' Lë', ta'nnë':

—¿Dë lataj bönni' nutsaga në'ë usanë'-nu nigula queë'?

<sup>3</sup> Bubi'ë didza' Jesús, rnnë':

—¿Bizxi gunná bë'enë' Moisés libí'ili'?

<sup>4</sup> Gula'nnë':

—Moisés bë'ë lataj nu bönni' uzúajë' lu guichi le rnna rulá'alenë'-nu nigula queë' na', ate' ní'irö usanë'-nu.

<sup>5</sup> Bubi'ë didza' Jesús, rnnë':

—Gunná bë'enë' Moisés libí'ili' caní tu' naca zidi icja ladxí'do'oli', <sup>6</sup> pero cate' gusí lo rata' yödzölió, Dios bené' légaquië' bönni', en nigula. <sup>7</sup> Gunné': "Que lë ni na' ucá'anë' bönni' xuz xiné'ë, en tsöjsóalenë'-nu nigula queë'", <sup>8</sup> ate' chopé' ni ulu'huöáquië' ca tuz böñachi." Que lë ni na' bíti'rö nácagaquië' chopé' pero tuz chinácagaquië'. <sup>9</sup> Que lë ni na' ca', nu naca böñachi biti' ral-la' ulá'a nupa na' chinutságuië' Dios.

<sup>10</sup> Cate' gula'yázië' yu'u, gula'nabi yúdxinë' bönni' usëda queë' Jesús ca naca didza' na' bë'ë. <sup>11</sup> Jesús gudxe' légaquië':

—Núti'tës bönni' ulá'alenë'-nu nigula queë', en utsaga ná'alenë'-nu nigula yübölö, runë' dul-la' le riguitsaj xibá que yöl-la' nutsaga na' tu' rusubágue'ë'-nu dul-la' nigula na' guzóalenë'-nu zí'alö. <sup>12</sup> Lësca' caní channö tu nigula nutsaga ná'lennu bönni' usannu-në', en sí' inu-në' bönni' yübölö, runnu ca' dul-la' le riguitsaj xibá que yöl-la' nutsaga na'.

*Jesús rulidza tsáhuë'ë-bi' yugu' bï'ido'*

(Mt. 19:13-15; Lc. 18:15-17)

<sup>13</sup> Ní'irö bila'dxín böñachi ga zoë' Jesús dujuá'gaquië' bï'ido' quéguequi. Té'ëni ixoa në'ë légacabi', ate' gula'sí lógaquië' bönni' usëda queë' Jesús ta'dil-la dídz'a'gaquië' nupa na' dujuá'agaca légacabi'. <sup>14</sup> Cate' bilé'enë' Jesús lë ni, gulénë' légaquië', en gunné':

—Guli'güí'-gácabi' bï'ido' lataj ila'dxinbi' quia'. Biti' uzága'gacali'-bi', tu' gata' quégaca nupa nácagaca ca bï'ido' ni, lataj ga rinná bë'ë Dios. <sup>15</sup> Le nácatë rea' libí'ili': Nu cabí si' lu në'e le rinná bë'ë Dios ca runbi' tu bï'ido', biti' ca' tsaza ga ni' rinná bë'ë.

<sup>16</sup> Ní'irö Jesús bunidë'-bi' yugu' bï'ido' na'. Guxóa në'ë légacabi', en bulidza tsáhuë'ë-bi'.

*Bönni' cuidi' napë' yöl-la' tsahui'*

(Mt. 19:16-30; Lc. 18:18-30)

<sup>17</sup> Cate' bu'ë Jesús nöza, carelö bidë' tu bönni', en buzúa zxibë' lahuë' Jesús, en gunábinë' Lë', rnnë':

—Bönni' Usedi idú dxi'a, ¿nacxi guna' para idéli'da' yöl-la' na'bán idú?

<sup>18</sup> Jesús gudxe' lë':

—¿Bizz que ru'u neda' didza', rnno': "Idú dxi'a"? Cuntu nu bönni' náquië' idú dxi'a. Tuzë' Dios náquië' idú dxi'a. <sup>19</sup> Chinöz quézinu' yugu' le gunná bë'ë Dios, gunnë': Biti' gunu' dul-la' le riguitsaj xibá que yöl-la' nutsaga na'.

Biti' gútìu' bönachi.

Biti' cuanu'.

Biti' inniò' que luzó'o le cabí nácatë.

Biti' ucáchil'anu'.

Ben bal xuz xinó'o.

<sup>20</sup> Bubi'ë didza' bönni' na', rë' Jesús:

—Bönni' Usedi, yúgu'të lë ni run caza' cate' ni' nácatea' bï'ido'.

<sup>21</sup> Len yöl-la' dxi'i ladxi' queë', Jesús buyúë' lë', rnnë':

—Tu le riyadzaj quiu'. Guyéaj, yöjeti' yúgu'të le dë quiu', en bunödzaj quégaca bönachi yechi' lë na' si'u, ate' gata' quiu' yöl-la' tsahui' yehua' yubá. Ní'irö huödu' quia', gacu' ca tu bönni' sa'yéajé' söjte'ë lë'e yaga cruz, ate' to'o neda'.

<sup>22</sup> Cate' biyönnë' didza' ni, bui'innë', ate' söhuójë' risëbi ládxë'ë tu' dëda' yöl-la' tsahui' queë'.

<sup>23</sup> Ní'irö buyúë' Jesús gásibi'ilë', en gudxë' yugu' bönni' usëda queë':

—Böniga naca ila'yaza nupa ta'lé'e yöl-la' tsahui' ga rinná bë'ë Dios.

<sup>24</sup> Bulu'báninë' bönni' usëda queë' ca naca xtídzë'ë, ate' leyúbölö Jesús gudxë' légaquië':

—Libi'ili', zxí'ina'do', böniga naca ila'yázië' bönni' tu'zxöni ládxì'gaquië' yöl-la' tsahui' quégäquië' ga rinná bë'ë Dios. <sup>25</sup> Nácarö böniga tsázië' nu bönni' rilé'enë' yöl-la' tsahui' ga rinná bë'ë Dios, ca tódiba' böa' ta'bía-ba' bönachi lu nagui yötsi'.

<sup>26</sup> Cate' bila'yönnë' didza' ni, bulu'bánitérönë' ca'. Ta'nnë' la' légaçasë':

—¿Nuzxi caz gaca ulá, channö?

<sup>27</sup> Buyúë' Jesús légaquië', rnnë':

—Biti' gaca gun bönachi lë ni, pero huáquië' Dios, tu' rizéqui'në' Dios yúgu'të.

<sup>28</sup> Ní'irö Pedro gudxë' Lë':

—Xan, netu' nucá'anatu' yúgu'të, en dá'atu' Li'.

<sup>29</sup> Bubi'ë didza' Jesús, rnnë':

—Le nácatë rea' libi'ili', nu bönni' ucá'anë' lidxë', o bôchë'ë, o zanë', o xuzë', o xinë'ë, o nigula queë', o yugu' zxí'inë', o xiyúë', tu' runë' xichina' o tu' runë' libán que didza' dxi'a quia', <sup>30</sup> bönni' ni huazi' queë' ia'tú gayuá'terö ca' dza ni zóaru' na'a, yugu' lidxë', en yugu' bôchë'ë, en yugu' zanë', en yugu' xinë'ë, en yugu' zxí'inë', en yugu' xiyúë', enca' yugu' le ila'bía ládxì'gaca bönachi lë', ate' lu yödzölió si' za', gata' yöl-la' na'bán idú queë'.

<sup>31</sup> Zián nupa nácagaca lo na'a, ilaca cuídi'sö ni', ate' nupa nácagaca cuídi'sö na'a, ilaca lo ni'.

*Leyúbölö riguixjö'ë Jesús ca si' ilútië' Lë'*

(Mt. 20:17-19; Lc. 18:31-34)

<sup>32</sup> Cate' ni' yú'ugaquië' nöza, ta'benë' söjáquië' Jerusalén, nanóruë' Jesús lógaquië' bönni' usëda queë'. Nanítiguequinë', en lu yöl-la' rádxisö söjácalenë' Lë'. Leyúbölö Jesús guché'ë quez idxínnutë' na'. Gusí lahuë' ruí'ilenë' légaquië' didza' ca naca le ral-la' gaca queë'. <sup>33</sup> Rnnë':

—Rilé'e quészili' ribenru' zéajru' Jerusalén ga ni' zoa nu udödi neda', Bönni' Guljë' Bönachi, lu ná'agaquië' bixúz unná bë', en lu ná'agaquië' bönni' yudo' usedi, ate' chúguië' quia' gátia', en ulu'dödë' neda' lu ná'agaquië' bönni' zi'tu'. <sup>34</sup> Bönni' na' ulu'titjë' neda', en ilúndë'ë neda' zi'. Ulu'chejë' neda' zxöna'. Ní'irö ilútie' neda', pero cate' gaca tsonna dza ubana' lu yöl-la' guti.

*Jacobo en Juan ta'nábinë' Jesús bi gunë' quégäquië'*

(Mt. 20:20-28)

<sup>35</sup> Ní'irö gula'biguë'ë Jacobo, en Juan, zxí'inë' Zebedeo, lahuë' Jesús, en të' Lë':

—Bönni' Usedi, ré'ënitu' gunu' queétu' le inábatu'.

<sup>36</sup> Jesús gudxë' légaquië':

—¿Bizxi ré'ënili' guna' queéli'?

<sup>37</sup> Gulé' Lë':

—Cate' idxín dza cö'u ga inná bë'u, ben ga cō'ötü' tutu' cuitu' ibëla, en ia'tutu' cuitu' yóögöla.

<sup>38</sup> Ní'irö Jesús gudxë' légaquië':

—Biti' nözili' bi rinábali'. ¿Naru' huáca sí'ili' le ral-la' si'a neda', le naca le qui'i saca'a? ¿Naru' huáca idílali' nisa ca idila' neda' nisa, gátia'?

<sup>39</sup> Bulu'bí'ë didza', ta'nné':

—Huácatu'.

Jesús gudxë' légaquië':

—Le nácatë, le qui'i saca'a neda', sí'ili' ca' libi'ili', en ca idila' neda' nisa, idílali' ca' nisa,

<sup>40</sup> pero biti' dë lu na'a cóa' nu cuía cuita' ibëla, en nu cuía cuita' yóögöla. Dios unödzjé' quégaquië' bönni' chinupé'ë quégaquië' yugu' lataj na'.

<sup>41</sup> Cate' bila'yönné' ia'chië' bönni' usëda queë' Jesús didza' ni, gula'lenë' Jacobo, en Juan na'. <sup>42</sup> Ní'irö Jesús bulidzë' légaquië', rnnë':

—Nöz quézili' ca tun nupa ta'nná be'e yugu' yödzö, tu'zenë' bach bönachi, ate' nupa nácagaca lo ládjagaquië' ta'nná be'e luzë'eguequi. <sup>43</sup> Biti' gaca caní queéli', pero nu gué'ëni gaca zxön ga zóali', ral-la' gun xichinli' ia'zica'röli', <sup>44</sup> ate' núti'tëslöli' nu gué'ëni gaca lo ral-la' gaca ca bönni' huen dxin tsaz queéli' yúgu'tëli'. <sup>45</sup> Caní ral-la' gunli' tu' bida' ni neda', Bönni' Guljë' Bönachi, calëga para nu gun xichina', pero para guna' xichíngaca bönachi, en udöda' yöl-la' na'bán quia' le huöá'uida' bönachi zián.

*Jesús ruúnë' Bartimeo, bönni' lo chul-la*  
(Mt. 20:29-34; Lc. 18:35-43)

<sup>46</sup> Ní'irö bila'dxiné' Jesús, en yugu' bönni' dá'gaquië' Lë' yödzö Jericó. Cate' ni' rurujé' Jesús yödzö ni, dzágagaquië' Lë' yugu' bönni' usëda queë', enca' bönachi zián. Ra' nöza ni' rö'ë tu bönni' nachul-la lahuë', lë' Bartimeo, zxí'iné' Timeo. Rinabë' nu bi gúnnasö queë'. <sup>47</sup> Cate' biyönné' Bartimeo ridödë' Jesús, bönni' Nazaret, ni', gusí lahuë' ru'ë zidzaj didza', rnnë':

—¡Jesús, zxí'ini xi'sóë' David! ¡Buéchi' ladxi' neda'!

<sup>48</sup> Nupa ta'dödi ni' gula'dil-la lë' didza'. Të lë':

—Busayaj ru'u.

Ní'irö zídzajrö bulidzë', rnnë':

—¡Zxí'ini xi'sóë' David! ¡Buéchi' ladxi' neda'!

<sup>49</sup> Ní'irö guzöë' dxisö Jesús, ribözë', ate' rë' légaquië':

—Buli'lidzë'.

Bulu'lidzë' bönni' na' nachul-la lahuë'. Të lë':

—¡Butipa ládxu'u! ¡Guyaschi! ¡Rulidzë' li'!

<sup>50</sup> Ní'irö gurú'unë' tsölä'alö lari' naxoa yenë'. La' guyásatë', en bidë' ga na' zoë' Jesús.

<sup>51</sup> Jesús gunábinë' lë', rnnë':

—¿Bizxi ré'ënu' guna' quiu'?

Bubi'ë didza' bönni' na' nachul-la lahuë', rnnë':

—Bönni' Usedi, ré'ënda' gunu' ga huöálaj guiój lahua'.

<sup>52</sup> Jesús gudxë' lë':

—Böaj lidxu'. Chinuhuöácu' tu' réajlë'u neda'.

La' böáljatë guiój lahuë', ate' sa'yéajlenë' Jesús.

*Riyazië' Jesús yödzö Jerusalén*  
*(Mt. 21:1-11; Lc. 19:28-40; Jn. 12:12-19)*

<sup>1</sup> Bila'dxiné' Jesús, en yugu' bönni' dá'gaquië' Lë' gala' ga dë Jerusalén, ga na' nacuá' yödzö Betfagé, en yödzö Betania, en ga na' dë ca' Guí'a Yaga Olivo. Ní'irö Jesús gusól-lë'ë chopë' bönni' usëda queë', <sup>2</sup> en rë' légaquië':

—Guli'tséaj lu yödzödo' dë loru' ni', en cate' tsú'uli' ni', tsöjxáca'li'-ba' tuba' bürrodo' nágaba' ni', en cuntu nu ribíani lëba'. Guli'sedxi-ba', en guli'ché'-ba' quia' ni. <sup>3</sup> Channö nu bi guíe libí'ili' tu' runli' lë ni, guli'guíe nu na': "Xanru' riquinnë'-ba', ate' la' usól-la'të'-ba' quiu'."

<sup>4</sup> Ní'irö yójáquië', en yójxáca'gaquië'-ba' bürrodo' na', nágaba' ra' nöza ga nu riyaza lö'a, ate' gula'sedxe'-ba'. <sup>5</sup> Nupa nacuá' ni' të légaquië':

—¿Bizxi ni runli'? ¿Bizx que risédxili'-ba' bürrodo' na'?

<sup>6</sup> Bulu'bi'ë didza' bönni' usëda queë' Jesús, gulé' légaquië' ca na' chigudxi cazë' Jesús légaquië', ate' gulu'ë légaquië' lataj. <sup>7</sup> Ní'irö gula'ché'-ba' bürrodo' na' ga na' zoë' Jesús. Gula'xóë' lari' quégäquië' cùdzu'ba', ate' Jesús gudxië'-ba'. <sup>8</sup> Zián bönni' nacuë ni' gula'chiljë' lari' quégäquië' gapa naca la' nöza. Ia'bal-la bönachi ni' gula'guitsaj zin le bulu'zxoa la' nöza.

<sup>9</sup> Gula'sí lo nupa nanörugaca lahuë' Jesús, en nupa na' zá'gaca cùdzu'lë' tu'i zidzaj didza', ta'nné':

—¡Yöl-la' ba! ¡Xanru' Dios gun lá'ayë' Bönni' zë'ë ni, nasól-lë'ë Dios Lë'! <sup>10</sup> ¡Dios gun lá'ayë' Bönni' ni si' inná bë'ë, ca na' gunná bë'ë xuz xtó'oru' David! ¡Yöl-la' ba Dios!

<sup>11</sup> Caní guca, bidxiné' Jesús Jerusalén, ate' guyázië' lö'a yudo'. Cate' budxi buyúë' yúgu'të le nacuá' idú gásibi'ilö ni', burúajë' zaca' yödzö Betania tu' chiridzö', ate' dzágagaquië' Lë' yugu' bönni' usëda queë'.

*Jesús rulidza zi'ë tu yaga higo*

*(Mt. 21:18-19)*

<sup>12</sup> Cate' za' ren' ia'tú dza, ate' tu'rúajë' Jesús, en yugu' bönni' dá'gaquië' Lë' yödzö Betania, riduné' Jesús. <sup>13</sup> Zi'tu' bilé'enë' tu yaga higo dxía xilagui'. Gubígui'ë ga na' zoa yaga na' channö utsöjxaquië' lati' le ribía. Cate' bidxiné' ni' biti' bi yójxáquië' le ribía. Xilagui'sö dxía tu' cabí ridxini dza cuía. <sup>14</sup> Ní'irö Jesús bulidzë' yaga na', rnné':

—Bíti'rö nu gagu le ribía quiu'.

Yugu' bönni' usëda queë' bila'yönnë' didza' ni.

*Jesús rulatje' lö'a yudo'*

*(Mt. 21:12-17; Lc. 19:45-48; Jn. 2:13-22)*

<sup>15</sup> Cate' bila'dxiné' Jesús, en yugu' bönni' dá'gaquië' Lë', yödzö Jerusalén, guyázië' Jesús lö'a yudo', en gusí lahuë' rubéajë' ní'ilö nupa tuti', en nupa to'o lu lö'a yudo'. Burixë' yugu' blaga quégaca nupa tu'tsá' dumí izá'a, enca' yugu' ga ta'bó' nupa tuti' yugu' gu'dödo'. <sup>16</sup> Biti' ca' bë'ë lataj nu bi guá', uzóa nöza ga naca lö'a yudo'. <sup>17</sup> Busédiné' nupa nacuá' ni', rnné':

—Nazúaj lu guichi lá'ayi, rnna: "Lidxa' si'i le, yu'u ga bönachi idútë yödzölió ulu'lidza Dios." Libí'ili' chinunli' le ca naca lídxigaca gubán.

<sup>18</sup> Cate' yugu' bixúz unná bë', en yugu' bönni' yudo' usedi bila'yönnë' didza' ni, gula'sí lógaquië' tu'guiljë' nacxi ilútië' Jesús, pero tu' tádxiné' le ilún bönachi, biti' bi guluné' queë', tu' tu'bani yúgu'të bönachi ca naca le rusédiné' Jesús. <sup>19</sup> Cate' chiridzö' burúajë' Jesús lu yödzö na'.

*Ribidxi yaga higo bulidza zi'ë Jesús*

*(Mt. 21:20-22)*

<sup>20</sup> Cate' za' rení' ia'tú dza, gula'dödë' Jesús, en yugu' bönni' dá'gaquië' Lë' ga zoa yaga higo na' bulidza zi'ë Jesús, en bila'lé'enë' le, chinabidxi idú luí. <sup>21</sup> Ní'irö yöjnenë' Pedro bi guca, ate' gudxë' Jesús:

—Bönni' Usedi, buyútsöca'. Chinabidxi yaga higo ni bulidza zi'u néaje.

<sup>22</sup> Bubi'ë didza' Jesús, rë' légaquië':

—Guli'tseajlë' Dios. <sup>23</sup> Le nácatë rea' lib'iili', channö nu bönni' guíe' guí'ado' ni: "Gucuíta ni, yöjsóa lu nísado", en biti' gaca chopá ládxë'ë bönni' na', pero idú ládxë'ë tseajlë'ë gunë' Dios ca na' rnnë', ca' gaca. <sup>24</sup> Que lë ni na' rea' lib'iili': Yúgu'të le inábali' cate' ulídzali'-në' Dios, guli'tséajlë' chibennë' Dios queéli' lë na' rinábali', ate' gunnë' queéli'. <sup>25</sup> Cate' ni' rulídzali'-në' Dios, channö zoa nu rileli' nu bi ben queéli', buli'niti lo nu na', para uniti lahuë' ca' lib'iili' Xúzili' na' zoë' yehua' yubá ca naca dul-la' nabága'li'. <sup>26</sup> Channö cabí uniti loli' böñachi, biti' uniti lahuë' Xúzili' zoë' yehua' yubá lib'iili' dul-la' nabága'li'.

*Yöl-la' unná bë' dë lu në'ë Jesús*

(Mt. 21:23-27; Lc. 20:1-8)

<sup>27</sup> Ní'irö Jesús, en yugu' bönni' dá'gaquië' Lë' yöjhüójgaquië' Jerusalén. Cate' ni' ridë' Jesús ga naca chila yudo', bila'dxinë' yugu' bixúz unná bë', en yugu' bönni' yudo' usedi, en bönni' gula tu'zéajni'inë', ga zoë'. <sup>28</sup> Gula'nábine' Jesús, ta'nnë':

—¿Bizxi yöl-la' unná bë' dë lu no'o runu' yugu' lë ni? ¿Nuzxi caz budödi lu no'o yöl-la' unná bë' gunu' caní?

<sup>29</sup> Bubi'ë didza' Jesús, rë' légaquië':

—Neda' ca' inábida' lib'iili' tu didza'. Channö ubíili' quia' didza', ní'irö guía' lib'iili' bi yöl-la' unná bë' rúnida' yugu' lë ni. <sup>30</sup> ¿Nuzxi budödi lu në'ë Juan uquile' böñachi nisa? ¿Naru' Dios o böñachi? Guli'nnátsöca'.

<sup>31</sup> Gula'sí lógaquië' tun xtídza'gaquië' la' légacasë', ta'nnë':

—Channö innaru' Dios gusól-lë'ë lë', guíe' rë'u: "¿Bizx que biti' guyéajlë'ëli' lë?"

<sup>32</sup> ¿Naru' guíëtsaru'-në': Gula'sól-lë'ë bönni' lë?

Caní ta'zá' ládxì'gaquië' tu' tádxinë' le ilún böñachi zián nacuá' ni' tu' téquiguequi yúgu'të böñachi na' bë'ë didza' Juan na' uláz queë' Dios. <sup>33</sup> Que lë ni na' gulé' Jesús:

—Biti' nöztu'.

Ní'irö Jesús gudxë' légaquië':

—Neda' ca' biti' quíxjöi'ida' lib'iili' bi yöl-la' unná bë' dë lu na'a rúnida' yugu' lë ni.

## 12

*Rucúdzu'ë didza' Jesús ca gaca quégaca huen dxin biti' nácagaca tsahui'*

(Mt. 21:33-46; Lc. 20:9-19)

<sup>1</sup> Ní'irö gusí lahuë' Jesús ru'ilenë' yugu' bönni' dá'gaquië' Lë' didza' yugu' le rucúdzu'ë didza', rnnë':

—Guzoë' tu bönni', budé'ë lubá uva zián ga naca lu xiyúë'. Guléquië' lë'a que, en guchö'önë' tu röga' guiój ga isíë' xisi uva na'. Budxíë' tu yu'u gupa ga naca xitsá' ga nu uyú xiyúë' na'.

'Ní'irö budödë' xiyúë' na' lu ná'agaquië' huen dxin, ila'zi'ë gatsaj huéaj le unödzaj, ate' guyijë' yödzö zi'tu'. <sup>2</sup> Cate' bidxín dza ulu'chibë' le ribía, gusól-lë'ë-bi' bi'i huen dxin tsöjxi'ibi' lu ná'agaquië' huen dxin na' le ral-la' si'ë xanbi' que le gula'bía lubá uva na'.

<sup>3</sup> Ní'irö yugu' huen dxin na' gula'guélë'ë-bi' bi'i na', en gulundë'-bi' zi', ate' bulu'sól-lë'ë-bi' cá'asöbi'. <sup>4</sup> Ní'irö bönni' xan luyú na' gusól-lë'ë-bi' ia'tubi' bi'i huen dxin queë', ate' bi'i ni bulu'ladxë'-bi' guiój. Bulu'lé'ë ícjabi'. Gulu'ë dö' queëbi'. <sup>5</sup> Ní'irö bönni' xan luyú na' gusól-lë'ë-bi' ca' ia'tubi' bi'i huen dxin queë', ate' bi'i ni gulútië'-bi'. Gusól-lë'ë-bi' ca' ziánröbi', ate' bál-labi' gulúngacadë'-bi' zi', en ia'bál-labi' gulútigaquië'-bi'.

<sup>6</sup> 'Cúnturö nu nagá'ana queé' xan luyú na'. Nagá'anasibi' zxí'inë', ate' nadxf'ide'enë'-bi'. Ga yöisetë, gusól-lë'ë-bi' zxí'inë', rnnë': "Ilunë' bal zxí'ina." <sup>7</sup> Ní'irö yugu' bönni' huen dxin na' gula'nné' la' légacase', ta'nné': "Bi'i ni ral-la' guequi queébi' luyú ni. Guli'dá, gútiru'-bi', ate' guequi queéru' luyú ni." <sup>8</sup> Que lë ni na' gula'zönë'-bi', en gulútië'-bi'. Gula'rú'unë'-bi' ní'ilö ga dá'gaca lubá uva na'.

<sup>9</sup> Ní'irö Jesús gunábiné' bönni' nacu'ë ni', rnnë':

—¿Nacxi gunë' bönni' xan luyú na', channö? Huidë', en gútigaquië' bönni' huen dxin na', ate' udödë' luyú na' lu ná'gaquië' bönni' yübölö.

<sup>10</sup> '¿Naru' cabí nulábanili' lë na' nazúaj lu guichi lá'ayi? Caní rnna:

Guíoj na' gula'rú'unë' bönni' tu'cu'ë zö'ö, na'a naca guijoj len, squin zö'ö.

<sup>11</sup> Xanru' Dios benë' ga naca caní ate' rubániru' ca naca lë ni rilé'eru'.

<sup>12</sup> Ní'irö ta'zóa ta'bö'ë ila'zönë' Jesús tu' téquibe'enë' bucúdzü'ë didza' ca naca quégaquië', pero tádxinë' le ilún bönachi zián nacuá' ni', en que lë ni na' bulu'cá'anë' Lë', söhuójgaquië'.

### *Ca naca le ta'guízxaj lázagaca bönachi*

(Mt. 22:15-22; Lc. 20:20-26)

<sup>13</sup> Gudödi lë ni yugu' bönni' yudo' unná bë' na' gula'sö'l-lë'ë bal-lë' bönni' yudo' fariseo len bönni' dä'gaquië' Herodes ga zoë' Jesús para ilunë' ga bi innë' para gaca ulu'zeguië' Lë' didza'. <sup>14</sup> Bila'dxinë' bönni' ni ga na' zoë' Jesús, en të' Lë':

—Bönni' Usedi, nőzitu' ru'u didza' idútë li. Biti' ru'i ládxu'u bi ta'nnasö bönachi, tu' cabí ruyusu' le tu'lui'isö cuínguequi bönachi, pero rusédinu' ca nácatë le ré'ënë' Dios ilún bönachi. ¿Ru'i netu' lataj xibá queé' Moisés quizxaj laztu' le tu'quizxjé' uláz queé' César? ¿Naru' uguízxajtu' o biti' quízxajtu'?

<sup>15</sup> Réquibe'enë' Jesús tu'ë didza' lu yöl-la' riguñaj ladxi' quégaquië', ate' rë' légaquië':

—¿Bizx que rubéajli' neda' didza'? Guli'diguá'tsöca' tu dumí ridá para ilé'eda' le.

<sup>16</sup> Diguá'agaquië' le, ate' Jesús gunábiné' légaquië', rnnë':

—¿Nuzxi lahui da' lë'e ni, en nuzxi lë ni?

Bulu'bí'ë didza', ta'nnë':

—Queé' César na'.

<sup>17</sup> Ní'irö Jesús gudxé' légaquië', rnnë':

—Buli'nödzaj queé' César le nequi queé' César, ate' queé' Dios le nequi queé' Dios.

Bulu'báninë' ca naca didza' bubi'ë Jesús.

### *Ca naca que yöl-la' rubán lu yöl-la' guti*

(Mt. 22:23-33; Lc. 20:27-40)

<sup>18</sup> Ní'irö bila'dxinë' bal-lë' bönni' yudo' saduceo ga zoë' Jesús. Bönni' ni ta'nnë' biti' ulu'bán nupa chinátigaca. Que lë ni na' gulé' Jesús, ta'nnë':

<sup>19</sup> —Bönni' Usedi, Moisés nuzúajë' queéru' lu guichi channö gátië' tu bönni' biti' zoa bi'i queé', ate' ugá'anamu nigula queé', bi'i bőchë'ë bönni' na' ral-la' utsaga ná'aleni'-nu, en uzóabi' bï'ido' gácabi' bi'i queébi' bőchi'bi'. <sup>20</sup> Gula'cuá'abi' gádxibi' bi'i nácagacabi' bőchi'gacabi'. Bi'i huáca na' butsaga ná'aleni'-nu nigula, ate' gútibi', cuntu nu zoa bï'ido' queébi'. <sup>21</sup> Bi'i buropi na' butsaga ná'aleni'-nu nigula uzébi na', ate' gútibi' ca', cuntu nu zoa bï'ido' queébi'. Lësca' caní guca queébi' bi'i bunni. <sup>22</sup> Caní guca, bulu'tsaga ná'aleni'-nu yúgu'tëbi', cuntu nu zoa bï'ido' quégacabi'. Ga yöisetë, gútinu ca' nigula na'. <sup>23</sup> Na'a, cate' ulu'bán nupa chinátigaca, ¿núzxilöbi' guéquinu nigula na' queébi', tu' bulu'tsaga ná'aleni'-nu igádxitëbi'?

<sup>24</sup> Bubi'ë didza' Jesús, rë' légaquië':

—Richíxili' tu' cabí núnbë'ëli' le nazúaj lu guichi lá'ayi, en biti' nőzili' ca naca yöl-la' huáca queé' Dios. <sup>25</sup> Cate' ulu'bán nupa chinátigaca, biti' ca' ulu'tsaga ná'agaquië', ate' yugu' bönni' biti' ila'cuá'lenë' nigula, pero ilácagaquië' ca nácagaquië' gubáz lá'ayi queé'

Dios, nacu'ë yehua' yubá. <sup>26</sup> Na'a, ca naca quégaca nupa chinátigaca channö ulu'bán, ¿naru' cabí nulábanili' le buzúajé' lu guichi Moisés? Ru'i didza' ca na' bulidzë' Dios lë' lu yaga yótsi'do' régui. Gudxë' lë': "Neda' naca' Dios queé' Abraham, en Dios queé' Isaac, en Dios queé' Jacob." Tu' gunné' caní quégacié', naca bë' nabángacié' sal-la' gulátié' zí'alö. <sup>27</sup> Dios náquié' Dios quégaca nupa nabángaca, caléga quégaca nupa nátigaca tsaz. Richíxitéröli'.

*Le naca lo le gunná bë'ë Dios*

(Mt. 22:34-40)

<sup>28</sup> Bidë' ca' tu bönni' yudo' usedi ga zoë' Jesús. Biyönnë' ca na' guluf'ilenë' Jesús didza', en nőziné' dxí'ado' bubi'ë Jesús didza'. Que lë ni na' gunábiné' Jesús, rnné':

—¿Bízxilö le gunná bë'ë Dios nácatérö lo ca yúgu'të le gunná bë'ë?

<sup>29</sup> Bubi'ë didza' Jesús, rë' lë':

—Le gunná bë'ë le nácatérö lo ca yúgu'të naca lë na' rnna: "Guli'yöni bönachi Israel. Xanru' Dios, tuzë' Lë' náquié' Xanru'. <sup>30</sup> Ral-la' idxí'nu' Xanu' Dios idú ládxu'u, en lu idú icja ládxí'do'o, en lu idú yöl-la' réajni'i quiu', en lu idú yöl-la' huáca quiu'." Lë ni naca le gunná bë'ë le nácatérö lo. <sup>31</sup> Le gunná bë'ë le naca buropi, lébisö ca naca. Caní rnna: "Ral-la' idxí'nu' luzó'o ca nadxi'i cuinu'." Biti' ca' zoa ia'tú le gunná bë'ë le nácarö lo ca chopa ni gunná bë'ë.

<sup>32</sup> Ní'irö bönni' yudo' usedi na' gudxë' Jesús, rnné':

—Dxí'ado' gunnó', Bönni' Usedi. Le nácatë rnno'. Tuzë' náquié' Dios, en cínturö nu zoa naca Dios. <sup>33</sup> Para idxí'iru'-në' Dios idú ládxí'ru', en lu idú yöl-la' réajni'i queéru', en lu idú icja ládxí'do'oru', en lu idú yöl-la' huáca queéru', en para idxí'iru' luzá'aru' ca nadxi'i cuinru', nácarö lesaca' ca yúgu'të böa' bédxido' rútigacaru'-ba' lu bucugu lá'ayi queé' Dios, enca' ca yúgu'të böa' bédxido' ruzégui' gacaru'-ba' lu bucugu na'.

<sup>34</sup> Cate' biyönnë' Jesús dxí'ado' rubi'ë didza' bönni' ni, ní'irö gudxë' lë', rnné':

—Ia'láti'sö riyadzaj quiu' gúnbe'u le rinná bë'ë Dios.

Cínturö nu burugui bi inábini Jesús.

*¿Nuzxi zxí'ini náquié' Cristo?*

(Mt. 22:41-46; Lc. 20:41-44)

<sup>35</sup> Cate' ni' rusédiné' Jesús bönachi ga naca chila yudo', rnné':

—¿Bizx que ta'nné' bönni' yudo' usedi náquié' Cristo zxí'ini xi'sóe' David? <sup>36</sup> Lë cazë' David na' bë'ë didza', zóalené' Dios Bö' Lá'ayi lë', gunné':

Xanru' Dios gudxë' Xana':

"Guró'ö cuita lë'a ibëla  
cate' gunra' ga ulu'zóa zxíbigaca lo'  
nupa biti' ta'lé'e Li' dxí'a."

<sup>37</sup> ¿Naru' nácatsë' Cristo zxí'ini xi'sóe' David channö lë cazë' David na' rnné' queé' náquié' Xanë'?

Bönachi zián nacu'ë ni' tu'zé nágagaca Lë' gula'yaza ládxí'gaca didza' ni.

*Jesús ruzégui'ë didza' bönni' yudo' tu'sédiné'*

(Mt. 23:1-36; Lc. 11:37-54; 20:45-47)

<sup>38</sup> Ni' rusédiné' Jesús yugu' bönni' dá'gaquié' Lë', rë' légaquié':

—Guli'gún chi'i cuinli' quégacié' bönni' yudo' tu'sédiné'. Ta'yaza ládxí'gaquié' ta'dé' nilö na'lö, nácugaquié' lari' tunna. Ta'yaza ládxí'gaquié' ca' tu'lidza tsahui' bönachi légaquié' gapa naca lu yé'ëyi. <sup>39</sup> Ta'bö'ë yugu' lataj lo lu yu'u ga tu'dubë' tu'sëdë' queé' Dios, enca' gapa tu'dubë' të'aj tahuë'. <sup>40</sup> Rugúagaquié' lídxigacanu nigula uzëbi, en para ulu'lui'isö tsahui' cuíngacié', xidzé tu'lidzë' Dios. Bönni' ni, gúnda'rë' Dios légaquié' xíguia'.

*Le bunódzjanu tu nigula uzébido' queë' Dios  
(Lc. 21:1-4)*

<sup>41</sup> Tsanni ni' rö'ë Jesús chila yudo' ga zoa guí'ina ga ta'gú'u bönachi dumí que yudó', ruyú'ë ca tun bönachi ta'gú'u dumí lu guí'ina. Dumí zián ta'gu'ë bönni' dë yöl-la' tsahui' quégaquië'. <sup>42</sup> Ní'irö bidxinnu tu nigula yechi' uzébido' ni', ate' gulú'unu chopá dumí lásido', le nazáca'gaca láti'do'os. <sup>43</sup> Ní'irö bulidzë' Jesús yugu' bönni' usëda queë', en rë' légaquië':

—Le nácatë rea' libí'ili', nigula yechi' uzébido' ni gulú'urönu ca yúgu'të nupa bi ta'gú'u lu guí'ina que yudo'. <sup>44</sup> Yúgu'të bönni' ni ta'gu'ë que le nagá'anaso quégaquië', pero nigula ni, lu yöl-la' yéchi'do' queënu gulú'unu idútë la's dui tsca le dësö queënu, le ral-la' gáhuinu.

## 13

*Riguíxjö'ë Jesús ca si' ulu'quínnajë' yudo'  
(Mt. 24:1-2; Lc. 21:5-6)*

<sup>1</sup> Cate' burúajë' Jesús chila yudo', tuë' bönni' usëda queë' gudxë' Lë', rnnë':

—Bönni' Usedi, buyútsöca' náctiga yugu' yu'u zxön ni, en náctiga yugu' guiój lë'e zö'ö quéguequi.

<sup>2</sup> Bubi'ë didza' Jesús, rë' lë':

—Rilé'enu' yugu' yu'u zxön ni, pero biti' ca' ugá'ana guiój lahui luzé'e ni, tu' ulu'quínnaj bönachi léguequi.

*Le ilaca bë' cate' si' údxi que yödzöliö  
(Mt. 24:3-28; Lc. 21:7-24; 17:22-24)*

<sup>3</sup> Ní'irö yójáquië' Jesús, en yugu' bönni' dá'gaquië' Lë' lu Gui'a Yaga Olivo, guí'a na' dë ca dödilö ra' yudo'. Cate' chirö'ë Jesús ni', la' légacasë' Pedro, en Jacobo, en Juan, en Andrés, gulé' Lë', ta'nné':

<sup>4</sup> —Gudíxjö'i netu' bátaxi ilaca lë ni. ¿Bizxi gaca bë' chizóa ilaca yúgu'të lë ni?

<sup>5</sup> Bubi'ë didza' Jesús, rusédinë' légaquië', rnnë':

—Guli'gún chi'i cuinli' para cabí nu si' ye'e libí'ili'. <sup>6</sup> Ila'lá' lahuë' zián bönni' si' lágaquië' ca lea' neda', ila'nné' nácagaquië' Cristo. Caní ila'zí' yé'enë' bönachi zián.

<sup>7</sup> Ní'irö cate' yónili' raca gudil-la nilö ná'alö, biti' gádxili'. Yúgu'të lë ni ral-la' ilaca, pero biti' ridxini dza údxi. <sup>8</sup> Tu yödzö tñl-lalen ia'tú yödzö, en tu ga nu rinná bë' tsöjtñl-lalen ia'tú ga nu rinná bë'. Zián lataj tödi budó' zxu', en tsu'u gubín. Ila'tsatsa bönachi. Yugu' lë ni ilaca le isí lo ila'gu'i ila'zaca' bönachi dza ni'.

<sup>9</sup> Ní'irö guli'gún chi'i cuinli', tu' ulu'dödë' libí'ili' lu ná'agaquië' bönni' yúlahui'. Ila'guinë' libí'ili' gapa tu'dubë' tu'sëdë' queë' Dios bönni' judío. Idxinli' lógaquië' bönni' ta'nná bë'enë' libí'ili', en lógaquië' bönni' ta'nná bë'enë' yödzö zi'tu'. Ilunë' caní queéli' tu' dä'ali' neda', pero gunli' ba nalí quia' neda' ni'. <sup>10</sup> Zí'alö ca idxín dza údxi, run bayudxi gaca libán que didza' dxi'a quia' lólgaca bönachi idútë yödzöliö. <sup>11</sup> Cate' ni' ila'chë'ë libí'ili', en ulu'dödë' libí'ili' lu ná'agaquië' bönni' yúlahui', biti' gü'i ládxí'li' bizxi innali'. La' dza ní'isö Dios gunné' queéli' didza' gü'i'ili', ate' lë ni innali'. Cate' ni' gü'i'ili' didza', caléga libí'isili' na' innali', pero Dios Bö' Lá'ayi inné'. <sup>12</sup> Ulu'dödi bönachi la' bóchi'gacasö lu ná'agaquië' bönni' ilútië' légaquië'. Yugu' bönni' nacuá'abi' bi'i quégaquië' ulu'dödë' la' zxí'inigaca cazë' ca', ate' zxí'inigacië' na' ulu'dödib' la' xuz xiná'agaca cázabi' lu ná'agaquië' bönni' ilútië' légaquië'. <sup>13</sup> Yúgu'të bönachi ulu'zóa libí'ili' tsölá'alö tu' dä'ali' neda', pero núloli' guá' ilenli' lë na' ga idxinxö dza údxi, uláli'.

<sup>14</sup> Nupa tu'laba didza' ni ral-la' ila'yéajni'i. Buzúajë' lu guichi Daniel, bönni' ni' bë'ë didza' uláz queë' Dios, le rnna caní: "Tsaz tu le xihui' le rucá'ana cané ga naca la'ayi." Dza ní'irö ral-la' ila'zxunnaj nupa nacuá' luyú Judea, en tsöjaca gapa naca lu guí'ado'.

<sup>15</sup> Nu zoa ícjo'olö dza ni' ral-la' izxúnnajtë, en biti' huötaj zxan yu'u para tsöjzxí' bi dë

que lu yu'u. <sup>16</sup> Nu zoa la' guixi' ral-la' izxúnnajtë, en biti' huőaj tsöjzxí' lari' rixóa yeni. <sup>17</sup> Bica' bayechi' yugu' nigula dza ni' nuá' agacanu-bi' b'iido', enca' nigula tu'gádxí'nu-bi' b'iido'. <sup>18</sup> Bulí'lidzé' Dios inábili'-në' cabí gun bayudxi izxúnnajlí' cate' raca beo' ziaga ca'. <sup>19</sup> Yugu' dza ni' ila'gu'i ila'zaca'rö böñachi ca le guca zí'atélö cate' si' guta' yödzölió le benë' Dios ga ridxitnë na'a dza, ate' dza zá'gaca biti' gaca caní. <sup>20</sup> La'tu' cabí nunë' Dios ga ulu'huöáca nabábasö yugu' dza ni', cuntu nu ulá, pero tu' nadxf'inë' nupa chigurö cazë', chinunë' queë' gunë' ga ulu'huöáca nabábasö yugu' dza ni'.

<sup>21</sup> 'Na'a, channö nu guié libí'ili': "Buli'yútsöca', ni zoë' Cristo", o inná: "Buli'yútsöca', ni' zoë'", biti' ca' tséajlé'eli' nu na'. <sup>22</sup> Ila'lá' lahuë' zián bönní' ila'zí' ye'enë' böñachi. Ila'nné' nácagaquië' Cristo, en ila'nné' nácagaquië' bönní' tu'ë didza' uláz queë' Dios. Ulu'lui'inë' le ilaca bë', en ilunë' yugu' yöl-la' huáca zxön. Huala'zí' ye'enë' ca' nupa gurö cazë' Dios channö ila'zéqui'në'. <sup>23</sup> Ní'irö libí'ili', guli'soa ban ladxi'. Yúgu'të chigudxa' libí'ili' zí'atélö ca gaca.

*Ca huödë' Bönní' Guljë' Bönachi  
(Mt. 24:29-35, 42-44; Lc. 21:25-36)*

<sup>24</sup> Gunné' ca' Jesús:

—Yugu' dza ni', tödi gaca dza na' ila'gu'i ila'zaca' caní böñachi, ichul-la gubidza, en biti' cu'u bení' beo'. <sup>25</sup> Ila'guínnaj bólaj lúzxiba, en ila'zxizi le nál-lagaca nalá'gaca lúzxiba na'. <sup>26</sup> Ní'irö ila'lé'eni neda', Bönní' Guljë' Bönachi, za'a lu böaj lúzxiba, napa' yöl-la' huáca zxön, en yöl-la' bení' quia'. <sup>27</sup> Isól-la'gaca'-në' gubáz lá'ayi quia', ate' ulu'tubë' böñachi gurö caza' quia' nacuá' idapa la'a yödzölió, ga naguélä'të luyú bidxi, ga ridxitnë ga naguela' lúzxiba.

<sup>28</sup> 'Guli'tséajni'i le rusedi yaga higo ni'. Cate' ta'lén ni'a në'e hué'ënido', en rubía xilagui' yulu, nőzili' chizóa idxín beo' cusubá. <sup>29</sup> Lësca' caní, cate' ilé'eli' taca lë ni, inőzili' chizóa idxín dza údxi na', en chiridzaga lo. <sup>30</sup> Le nácatë rea' libí'ili', yúgu'të lë ni ilaca zí'atélö ca ilátigaca nupa nacuá' dza na'. <sup>31</sup> Huadödi que lúzxiba, en que luyú ni, pero xtízda'a catu caz tödi que.

<sup>32</sup> 'Cate' idxín dza ni' o rëla ni', cuntu nu nözi. Biti' nőzguequinë' gubáz lá'ayi nacuë' yehua' yubá, en biti' nözda' neda', Zxf'inë' Dios. Tuzë' Dios Xuz nőzinë'. <sup>33</sup> Que lë ni na', buli'subán ládxí'li'. Guli'soa sina', en buli'lidzé' Dios tu' cabí nőzili' bizxi dza gaca lë ni. <sup>34</sup> Gaca ca raca cate' sa'yéajë' zí'tu' tu bönní'. Cate' chizóa uzé'ë lidxe', udödë' lu ná'agaquië' huen dxin queë' yugu' le dë queë'. Que queëgaquië' gu'ë xichíngaqüië', en inná bë'ë soa ban ladxi' nu zoa huen chi'i ga nu riyaza. <sup>35</sup> Guli'soa libí'ili' ban ladxi' tu' cabí nőzili' bátaxi huödë' xan yu'u, cate' chiridzö', o gatsaj lahui' yëla, o cate' ribödxiba' böra, o zílado'. <sup>36</sup> Guli'gún caní, para cabí idixáquië' libí'ili' rásili' channö huödë' tsálido'os. <sup>37</sup> Lë ni rea' libí'ili', rea' ca' yúgu'të böñachi: Guli'soa ban ladxi'.

## 14

*Tun xtízda'gaquië' bönní' yudo' ila'zönë' Jesús  
(Mt. 26:1-5; Lc. 22:1-2; Jn. 11:45-53)*

<sup>1</sup> Ia'chopa dza ca' gaca Laní Pascua cate' tu'subanë' bönní' judío ca benë' Dios, bubéajë' xuz xtó'ogaquië' luyú Egipto. Naca laní cate' tahuë' yöta xtila biti' nazí' cúa zi que. Ta'zóa ta'bö'ë yugu' bixúz unná bë', en bönní' yudo' tu'sédinë' ila'zönë' Jesús bagáchisö para ilútië' Lë'. <sup>2</sup> Ta'nné':

—Biti' gaca sönru'-në' dza laní tu' ila'tsatsa böñachi.

*Nigula rigú'unu le rilá' zxixi icjë' Jesús  
(Mt. 26:6-13; Jn. 12:1-8)*

<sup>3</sup> Zoë' Jesús yödzö Betania, lu yu'u lidxe' Simón, bönní' gü'finë' huë' nudzu' ruzödi. Tsanni ni' rö'ë rahuë' Jesús, guyázantu tu nigula, nuá'anu tu bôga'do' néquini guiój zaca',

yudzu le rilá' zxixi que yöj susén lasi idú, le nazaca' yenni'. Gulá'anu bôga'do' na', en gulú'unu le rilá' zxixi na' icjë' Jesús. <sup>4</sup> Gula'lélanë' bal-lé' bönni' nacu'ë ni'. Ta'nné' la' légacasë':

—¿Bizz que guca ditaj le zxixi na'? <sup>5</sup> La'tu' nu guti' lë na', huazí' que ia'lati' ca lázxjaru' que tu iz para nu quisi le quégaca bönachi yechi'.

Gula'nnédë'ë queénu.

<sup>6</sup> Ní'irö Jesús bë'ë didza', rnnë':

—Guli'gü'i-nu lataj. ¿Bizz que rinné zí'ilí' queénu? Naca dxi'a le bennu quia'.

<sup>7</sup> Nacuá'lentica'sö bönachi yechi' libí'ilí', en bátati'tés gué'ënili', huáca gunli' dxi'a quégaquië', pero neda' biti' sóatica'sa' ga zóali'. <sup>8</sup> Tsca le guzxéqui'nu bennu nigula ni. Cate' gulú'unu le rilá' zxixi ni neda', bupá'anu neda' zí'atëlö ca igácha'a yero ba. <sup>9</sup> Le nácatë rea' libí'ilí', gáti'tés ga gaca libán que didza' dxi'a quia' idú yödzölió, soa nu quixjö' ca' lë ni bennu nigula ni quia'. Caní gaca para nu tsöjnë lënu.

### Rizi' lu né'ë Judas udödë' Jesús

(Mt. 26:14-16; Lc. 22:3-6)

<sup>10</sup> Ní'irö birúajë' Judas Iscariote, bönni' nabábalenë' chínnuë' na' dá'gaquië' Jesús. Guyijë' ga nacu'ë bixúz unná bë' para udödë' Jesús lu ná'agaquië'. <sup>11</sup> Cate' bila'yönnë' xtídë'ë Judas na', bulu'dzéjanë', ate' gula'zí' lu ná'agaquië' ilu'ë lë' dumí. Ní'irö gusí lahuë' Judas rizóa ribö'ë udödë' Jesús lu ná'agaquië'.

### Le rë'aj ráguru' rusubanru' ca gútië' Xanru'

(Mt. 26:17-29; Lc. 22:7-23; Jn. 13:21-30; 1Co. 11:23-26)

<sup>12</sup> Naca dza risí lo laní cate' tahuë' yöta xtila biti' nazí'i cúa zi que, dza na' tutië'-ba' bö'cu' zxíla'do' tahuë'-ba' dzö' Laní Pascua na', cate' tu'subanë' ca benë' Dios busölé' bönachi judío luyú Egipto. Ní'irö bönni' usëda queë' Jesús gula'nábinë' Lë', ta'nné':

—¿Gazxi ré'ënu' tséajtu' tsöjpá'atu' le gáguru' xtsö' que Laní Pascua?

<sup>13</sup> Ní'irö Jesús gusöl-lë'ë chopë' bönni' usëda queë', en rë' légaquië':

—Guli'tséaj lu yödzö. Ni' huadzágali' tu bönni' nu'ë tu rö'ö nisa. Guli'tséajlenë'.

<sup>14</sup> Ga na' tsázië', guli'guíë' xan yu'u na': "Rnné' Bönni' Usedi: ¿Gazxi zoa yu'u ga na' gágulengaca'-në' bönni' usëda quia' xtsö' que Laní Pascua?" <sup>15</sup> Ní'irö ulu'ìnë' libí'ilí' tu yu'u zxön ga naca buropi cuía ga chinabá'a. Buli'pá'a le gáguru' ni'.

<sup>16</sup> Bila'rúajë' bönni' usëda queë' na', en bila'dxinë' lu yödzö, ate' yöjxáca'gaquië' yúgu'të ca na' chigudxë' légaquië' Jesús. Bulu'pé'ë le ilahuë' ni' que Laní Pascua.

<sup>17</sup> Cate' chizá' ral-la, bidxinë' Jesús ni', dzágagaquië' idxínnutë' bönni' usëda queë' Lë'.

<sup>18</sup> Tsanni ni' rö'ögaquië' tahuë', bë'ë didza' Jesús, rnnë':

—Le nácatë rea' libí'ilí', zoa nu dzaga libí'ilí', nu rágulen neda' tsözxón, nu udödi neda' lu ná'agaca bönachi.

<sup>19</sup> Ní'irö bulu'hu'innë', en gula'sí lógaquië' tu tuë' të' Lë':

—¿Naru' neda'?

Ia'túë' ca' gunné':

—¿Naru' neda'?

<sup>20</sup> Bubi'ë didza' Jesús, rë' légaquië':

—Naca tu nu nutsa' ladaj chínnuli' ni, bönni' na' nuné'ë në'ë tsözxón len na'a lu yö'öna.

<sup>21</sup> Tseja' ga gátia' neda', Bönni' Gulje' Bönachi, ca na' nazúaj lu guichi lá'ayi ca gaca quia', pero bica' bayechi' bönni' na' udödë' neda' lu ná'agaquië' bönni' ilútië' neda'. Gácarö dxi'a queë' bönni' na' la'tu' cabí gulje'.

<sup>22</sup> Tsanni ni' tahuë', gudélë'ë Jesús yöta xtila. Gudxë' Dios: "Xclenu'." Buzxuzxjë' le, en bë'ë quégagaquië', rnnë':

—Guli'gagu. Lë ni naca bëla' rön quia'.

<sup>23</sup> Gudélë'ë ca' tu zxíga'do', en gudxë' Dios: "Xclenu'." Ní'irö bë'ë quégaquië', ate' yúgu'të' gulé'aje' le. <sup>24</sup> Jesús rë' légaquië':

—Lë ni xichöna' le run tsutsu didza' cubi rucá'ana tsahui', le núnlenë' Dios böñachi. Rön ni ilalaj ni'a quégaca böñachi zián. <sup>25</sup> Le nácatë rea' lib'iili', bíti'rö guí'ja' xisi uva ga idxinxrö dza guí'ja' le cubi ga ni' rinná bë'ë Dios.

*Jesús rnnë' innë'* Pedro biti' núnbe'ë Lë'  
(Mt. 26:30-35; Lc. 22:31-34; Jn. 13:36-38)

<sup>26</sup> Gudödi gulúl-lë' yöl-la' ba, bila'rúajë' söjáquië' Guí'a Yaga Olivo. <sup>27</sup> Ní'irö Jesús gudxë' légaquië', rnnë':

—Yúgu'tëli' gaca chopá ládxí'li', ucá'anali' neda' na'a dzö', tu' nazúaj lu guichi lá'ayi, rnna: "Gutia'-në' uyú bö'cu' zxila', ate' ilásilasiba' bö'cu' zxila' na'." <sup>28</sup> Tödi ubana' lu yöl-la' guti, tseja' luyú Galilea zí'alo ca lib'iili'.

<sup>29</sup> Ní'irö Pedro gudxë' Jesús, rnnë':

—Sal-la' yúgu'të' ilaca chopá ládxí'gaquië', en ulu'cá'anë' Li', biti' ca' gaca chopá ládx'a' neda'.

<sup>30</sup> Jesús gudxë' lë', rnnë':

—Le nácatë rea' li', la' dzö' nisö, si' códixilöba' böra le buropi luzuí, tsonna luzuí innó' biti' núnbe'u neda'.

<sup>31</sup> Ní'irö Pedro buzötje' Dios, rnnë':

—Sal-la' gátilentea' Li' tsözxón, biti' ca' innía' biti' núnbe'a Li'.

Lësca' caní gula'nné' yúgu'të'.

*Jesús rulidzë' Dios la' yëla Getsemaní*  
(Mt. 26:36-46; Lc. 22:39-46)

<sup>32</sup> Ní'irö Jesús, en bönni' dá'gaquië' Lë' bila'dxinë' la' yëla Getsemaní, ate' Jesús gudxë' légaquië', rnnë':

—Guli'cő' ni, tsanni tseja' neda', tsöjlidza'-në' Dios.

<sup>33</sup> Jesús guché'ë Pedro, en Jacobo, en Juan, ate' gusí lahuë' ridzóbinë', en risëbi ládxë'ë.

<sup>34</sup> Gudxë' légaquië', rnnë':

—Huati caza' lu yöl-la' risëbi ladxi'. Guli'cöz ni, en guli'ná' yëla.

<sup>35</sup> Ní'irö guzé'ë Jesús ia'láti'do', en busudxín lahuë' lu yu, bulidzë' Dios. Gunábinë' Lë', channö huáca, ucuítë' queë' le ral-la' qui'i sáquë'ë dza na'. <sup>36</sup> Ni' rulidzë' Dios, rnnë':

—Xúza'do', yúgu'të huáca gunu' Li'. Gucuítä lë na' ral-la' qui'i saca'a, pero calëga ca ré'ënda' neda', pero ca ré'ënu' Li', gunu'.

<sup>37</sup> Ní'irö bőajë' Jesús ga na' nacu'ë bönni' usëda queë', ate' yøjxáquië' légaquië' tasië'. Gudxë' Pedro:

—Simón, ¿rásits'o'? ¿Naru' cabí rubéajtso' yëla lo' tu chí'ido'? <sup>38</sup> Guli'ná' yëla, en buli'lidzë' Dios, inábili'-në' para cabí gata' lataj tu' xihui' idilú'u yöl-la' lib'iili'. Le nácatë bö' naca cázali' zoa caz sina', pero lu yöl-la' böñachisö queéli' ricuídi'li'.

<sup>39</sup> Ní'irö sa'yéajë' Jesús leyúbölö, rulidzë' Dios, en la' tuz ca gunné'. <sup>40</sup> Cate' bőajë' leyúbölö ga na' nacu'ë, yøjxáquië' légaquië' tasië' tu' nadöditë yëla lógaquië'. Biti' nőzguequinë' bizzi didza' ulu'bi'ë, le ilé' Lë'. <sup>41</sup> Cate' bőajë' le bunni luzuí ga na' nacu'ë, rë' légaquië':

—¿Rásitsali'? ¿Ruzi'tsa ládxí'li'? ¡Tsca'ti' gaz! ¡Chibidxín dza! ¡Buli'yútsöca', Neda', Bönni' Gulje' Bönachi, chinadöda' lu ná'agaca böñachi dul-la'! <sup>42</sup> ¡Guli'chasa, uyéajru'! ¡Buli'yútsöca', chizé'ë bönni' na' udödë' neda' lu ná'agaca böñachi!

*Ta'zönë' Jesús*  
(Mt. 26:47-56; Lc. 22:47-53; Jn. 18:2-11)

<sup>43</sup> Ni' ru'ë Jesús didza' ni, bidxinë' Judas, bönni' nabábalenë' chínnuë' na' dá'gaquië' Jesús, ate' zá'lengaquië' bönni' zián lë', nuá'agaquië' guíë tuchi', en yaga. Yugu' bixúz

unná bë', en yugu' bönni' yudo' usedi, en bönni' gula tu'zéajni'inë' nasól-la'gaquië' légaquië'. <sup>44</sup> Judas, bönni' na' rudödë' Jesús lu ná'agaquië' chinulu'iinë' légaquië' tu le gunë' le gaca bë' nu naca Jesús, gunnë':

—Bönni' na' utsaga lahu'a'-në', Lë' na' Jesús. ¡Guli'sönë', en guli'chë'ë! ¡Guli'yútsöquië'!

<sup>45</sup> Cate' bidxinë' Judas ni', la' gubíga'të' ga na' zoë' Jesús, en gudxë' Lë':

—Bönni' Usedi, Bönni' Usedi.

Ní'irö busudxín lahuë' Jesús. <sup>46</sup> Ní'irö gula'zönë' Jesús, en gula'chë'ë Lë' nadzunë'.

<sup>47</sup> Ní'irö tuë' bönni' ni' dë'ë Jesús guléajé' guíë tuchi', en benë'-bi' huë' bi'i huen dxin queë' bixúz lo. Guchúguië' guídi nágabi'. <sup>48</sup> Jesús gudxë' bönachi na', rnnë':

—¿Narúajtsali' nuá'ali' guíë tuchi', en yaga para sönli' neda', runli' ca runli' cate' rizönli'-në' gubán? <sup>49</sup> Yugu' dza guzóalena' lib'ili' rusédigacada' bönachi ga naca chila yudo', ate' biti' guzxönlì' neda', pero raca caní para gaca le nazúaj lu guichi lá'ayi.

<sup>50</sup> Ní'irö yúgu'të bönni' usëda queë' Jesús bulu'cá'anë' Le', ta'zxúnnaejë'.

### *Rizxúnnaejbi' tubi' bi'i ra'bán*

<sup>51</sup> Zóabi' ca' ni' tubi' bi'i ra'bán söjnobi' Jesús, nuxóasö cuinbi' tu lari' blaga'. Yugu' bönni' na' nachë'gaquië' Jesús gula'zönë'-bi' <sup>52</sup> pero busanbi' lari' na', en xiguídisöbi' buzxúnnaejbi'.

### *Ridxinë' Jesús lógaquië' bönni' yúlahui' lo*

(Mt. 26:57-68; Lc. 22:54-55, 63-71; Jn. 18:12-14, 19-24)

<sup>53</sup> Gula'chë'ë Jesús lahuë' bixúz lo, ate' bulu'dubë' ni' yúgu'të bixúz unná bë', en bönni' gula tu'zéajni'inë', en yugu' bönni' yudo' usedi. <sup>54</sup> Pedro yöjnahue' Jesús zi'tu' zí'tu'sö, en guyázië' lö'a lidxi bixúz lo na', en guró'ölenë' tsözxón yugu' ni'a në'ë bixúz lo na', rutsë'e cuinë' ra' guí'.

<sup>55</sup> Yugu' bixúz unná bë' len yúgu'të bönni' yúlahui' lo bulu'guiljë' tu le ulu'subáguië' Jesús para gaca ila'chúguië' queë' gátië' pero biti' bi bulu'dzólinë'. <sup>56</sup> Bönni' zián gula'nné' queë' Jesús le cabí nácatë, pero biti' yöjlözagaca le gula'nné' queë'. <sup>57</sup> Ní'irö gula'zuínë' yugu' bönni' gula'nné' queë' Jesús le cabí nácatë, ta'nné':

<sup>58</sup> —Netu' biyónitu' didza' bë'ë bönni' ni, gunnë': “Uquínnaja' yudo' ni, lë ni nequi lu ni'a lu na' bönachi, ate' tsonna dzasö uchissa' ia'tu le cabí nequi lu ni'a lu na' bönachi.”

<sup>59</sup> Lësca' lë ni, biti' yöjlözagaca xtídza'gaquië'.

<sup>60</sup> Ní'irö guyasë' bixúz lo na' gatsaj láhui'lö bönachi nacuá' ni', en gunábinë' Jesús, rnnë':

—¿Naru' cabí rubi'itso' didza'? ¿Bizxi na' ta'nné' quiu' bönni' ni?

<sup>61</sup> Jesús, dxisö zoë'. Biti' bi didza' rubi'ë. Gunábinë' Lë' leyúbölö bixúz lo na', rnnë':

—¿Naru' nacu' Li' Cristo, Zxi'inë' Dios Lá'ayi?

<sup>62</sup> Bubi'ë didza' Jesús, rnnë':

—Naca'. Ilé'eli' neda', Bönni' Guljë' Bönachi, soa' cö'a cuitë' ibëla Dios napa cazë' yöl-la' huáca cate' ni' huöda' lu böaj lúzxiba.

<sup>63</sup> Ní'irö bixúz lo na', lu yöl-la' rilé queë' guchözë' lari' nácuë', rnnë':

—¿Núzxirö naquíniru' nu quixjö'? <sup>64</sup> ¡Riyón quézili' rucá'anë' Dios cá'asö len didza' ru'ë! ¿Nacxi rusáca'li' queéli'?

Yúgu'të' gula'chúguië' queë' gátië'.

<sup>65</sup> Ní'irö gula'sí lógaquië' bal-lë' tu'chejë' Jesús zxöna'. Bulu'sayjë' lahuë', en gulundë' Lë' zi', ta'nné':

—Gunnë' yá'atsöca' nuzxi na' bë' Li'.

Yugu' bönni' ni'a në'ë bixúz lo gula'gápë'ë ru'ë Jesús.

### *Rnnë' Pedro biti' núnbe'ë Jesús*

(Mt. 26:69-75; Lc. 22:56-62; Jn. 18:15-18, 25-29)

<sup>66</sup> Cate' ni' zoë' Pedro lö'a zxan yu'u, bidxinbi' tubi' bi'i nigula huen dxin queë' bixúz lo na' ga na' zoë'. <sup>67</sup> Cate' bilé'ebi' Pedro, rö'ë rutsë'e cuinë' ra' gui', buyubi' lë', rnnabi': —Do'o ca' li' Jesús, bönni' Nazaret na'.

<sup>68</sup> Gudá'baguië' Pedro, rnnë':

—Biti' núnbe'a-në', en biti' nözda' bizxi na' rnno'.

Burúajë' Pedro yöjsöë' ga nu riyaza lö'a. Ní'irö guródxiba' böra. <sup>69</sup> Buyubi' lë' leyúbölö bi'i nigula huen dxin na', en gusí lobí' rëbi' nupa nacuá' ni': —Bönni' ni dzáguië' légaquië'.

<sup>70</sup> Leyúbölö gudá'baguië' Pedro. Ia'lati' gudzé nupa nacuá' ni' të Pedro, ta'nná:

—Le nácatë dzagu' légaquië', tu' nacu' bönni' Galilea. Yöl-la' ru'isö quiu' didza' naca bë'u, tu' tuz ca rui'ili' didza'.

<sup>71</sup> Gusí lahuë' Pedro rudxía dö' cuinë', en ruzötjë' Dios, rnnë':

—Biti' ca' núnbe'a-në' bönni' na' rui'ili' didza' ca naca queë'.

<sup>72</sup> La' guródxitëba' böra le buropi luzuí. Ní'irö yöjnenë' Pedro didza' na' bë'ë Jesús, gudxe' lë': "Zi'alö códxiba' böra le buropi luzuí, tsonna luzuí innó' biti' núnbe'u neda'." Cate' yöjnenë' didza' ni, gusí lahuë' ribódxidë'.

## 15

*Ridxinë' Jesús lahuë' Pilato, bönni' rinná bë'ë*

(Mt. 27:1-2, 11-14; Lc. 23:1-5; Jn. 18:28-38)

<sup>1</sup> Ni' naca zílado', yugu' bixúz unná bë' len bönni' gula tu'zéajni'inë', en yugu' bönni' yudo' usedi, en yúgu'te bönni' yúlahui' lo gulún xtídza'gaquië'. Ní'irö gula'chë'ë Jesús náguë'ë, en bulu'dödë' Lë' lu né'ë Pilato, bönni' rinná bë'ë uláz que yödz Roma. <sup>2</sup> Pilato gunábinë' Jesús, rnnë':

—¿Naru' nacu' Li' Bönni' inná bë'enë' bönachi judío?

Bubi'ë didza' Jesús, rnnë':

—Ca nácatë rnno'.

<sup>3</sup> Yugu' bixúz unná bë' bulu'zéguië' Jesús didza' le zián. <sup>4</sup> Ní'irö Pilato gunábinë' Lë' leyúbölö, rnnë':

—¿Naru' cabí rubi'itso' didza'? Buzétsöca' nagu' cate' xö zián le ta'nné' quiu'.

<sup>5</sup> Biti' bi didza' bubí'ë Jesús. Ca' guca, bubáninë' Pilato.

*Ta'chúguië' queë' Jesús gátië'*

(Mt. 27:15-31; Lc. 23:13-25; Jn. 18:38-19:16)

<sup>6</sup> Dë tu le runé' Pilato cate' raca laní na', rusanë' lu ná'agaca bönachi tu bönni' nadzunë' lidxi guíë, núti'tës nu ta'naba. <sup>7</sup> Nadzunë' tu bönni' lë' Barrabás lidxi guíë, ate' dzágagaquië' lë' ia'bal-lë' luzé'ë, yugu' bönni' gulútie' bönnachi cate' gula'dá'báguïe' yúlahui'. <sup>8</sup> Cate' bila'dxín bönachi zián ni', gula'sí lógaquië' ta'nabé' lahuë' Pilato gunë' quégaquië' ca run cazë'. <sup>9</sup> Bubi'ë didza' Pilato, rnnë':

—¿Ré'ënili' usana'-në' queëli' Bönni' Inná Bé'enë' Bönachi Judío?

<sup>10</sup> Caní gunné' Pilato tu' réquibe'enë' bulu'dödë' yugu' bixúz unná bë' Jesús lu né'ë tu' tu'zxé'enë' Lë'. <sup>11</sup> Yugu' bixúz unná bë' na' gula'gu'ë xilá ládxí'gaca bönachi zián na', para ila'nabé' lahuë' Pilato usanë' lu ná'agaquië' Barrabás. <sup>12</sup> Ní'irö Pilato gunábinë' légaquië' leyúbölö, rnnë':

—¿Bizxi ré'ënili' guna' queë' bönni' na' rui'ili' lë', Bönni' Inná Bé'enë' Bönachi Judío?

<sup>13</sup> Gulu'ë zidzaj didza', ta'nné':

—¡Budé'ë lë'e yaga cruz!

<sup>14</sup> Gunábinë' Pilato légaquië', rnnë':

—¿Bizxi caz dö' nu'ë?

Leyúbölö tu'ë zidzaj didza', ta'nné':

—¡Budé'ë lë'e yaga cruz!

<sup>15</sup> Tu' gú'unne' Pilato guné' ga ila'yaza láxsi'gaca bönachi zián na', busané' Barrabás lu ná'agaquié'. Ní'irö gunná bé'ené' nu quin Jesús, ate' budödë' Lë' lu ná'agaquié' bönni' ulu'dé'ë Lë' lë'e yaga cruz.

<sup>16</sup> Ní'irö yugu' bönni' rójáquié' gudil-la gula'chë'ë Jesús lõ'a yúlahui', ate' bulu'tubë' luzá'agaquié' ni'. <sup>17</sup> Bulu'gácuë' Jesús tu lari' xiná gul-la, en guluné' tu bregui' ni'a në'e yötsi', le bulu'dxié' icjé'. <sup>18</sup> Ní'irö gula'sí lógaquié' tu'lidzé' Jesús, ta'nné':

—¡Yöl-la' ba li', rinná bé'enu' bönachi judío!

<sup>19</sup> Gula'guíné' gui icjé', en bulu'chejé' Lë' zxöna'. Bulu'zóa zxíbigaquié' lahuë', en lu yöl-la' rutitaj guluné' Lë' bal. <sup>20</sup> Cate' budxi bulu'titjé' Lë', bulu'gúë' lari' xiná chul-la na' nácuë' ate' bulu'gácuë' Lë' lari' que cazé'. Ní'irö gula'chë'ë Lë' ní'ilö yúlahui' na' para tsöjda'gaquié' Lë' lë'e yaga cruz.

*Tu'dé'ë Jesús lë'e yaga cruz*

(Mt. 27:32-44; Lc. 23:26-43; Jn. 19:17-27)

<sup>21</sup> Guluné' ga bi'ë tu bönni' Cirene yaga cruz queë' Jesús, ridödisë' ni' suzé'ë la' guixi'. Lë' Simón, xúzgacabi' Alejandro, en Rufo.

<sup>22</sup> Gula'chë'ë Jesús lataj na' nazí'i le Gólgota, tu didza' hebreo le rnna lu didza' xidza', Lataj Que Böga' Ícjaru'. <sup>23</sup> Gulu'ë le gu'jé' Jesús xisi uva nutsi' nöri silá' que yaga mirra, pero Lë' biti' gu'ë le. <sup>24</sup> Ní'irö bulu'dé'ë Jesús lë'e yaga cruz, ate' gula'guísië' lari' nácuë', le gula'zí' que queégaquié' bönni' na' rójáquié' gudil-la. Bulu'béajé' le gaca bë' para ilá'nóziné' bízxilö idela' que queégaquié'.

<sup>25</sup> Naca idú xsila cate' bulu'dé'ë Lë' lë'e yaga cruz. <sup>26</sup> Didza' na' bulu'zóë' lë'e yaga cruz ícjälë' Jesús ca naca le tu'quíë' Lë' rnna caní: "Bönni' Rinná Bé'ené' Bönachi Judío."

<sup>27</sup> Bulu'dá'llené' Jesús tsözxón lë'egaca yaga cruz chopë' gubán, tuë' cuita lë'ë ibëla, en ia'tué' cuita lë'ë yögöla. <sup>28</sup> Caní guca lë na' nazúaj lu guichi lá'ayi, rnna: Gubábalené' bönni' tuá' dö'.

<sup>29</sup> Yugu' bönni' ta'dödë' ni' tu'lidza zi'ë Jesús, en tu'tá ícjagaquié', ta'nné':

—¡Ön! ¿Naru' uquínnajtso' yudo' queë' Dios, ate' tsonna dzasö uchísatsu' le? <sup>30</sup> ¡Busölá cuinu' na'a, en bötaj lë'e yaga cruz na'!

<sup>31</sup> Lëscá' caní yugu' bixúz unná bë', en yugu' bönni' yudo' usedi tu'titjé' Lë'. Të' luzá'agaquié' tuë' ia'tué':

—Bönachi yúbölö busölé', pero biti' gaca usölá cuiné'.

<sup>32</sup> Ta'nné' ca':

—¡Ön! ¿Nácatsu' Cristo, Bönni' Inná Bé'ené' Bönachi Israel? ¡Böttjatsöca' na'a lë'e yaga cruz para ilé'etu', ate' tséajlë'etu' Li'!

Yugu' bönni' na' dá'gaquié' tsözxón len Lë' lë'egaca yaga cruz bulu'lidza zi'ë ca' Lë'.

*Le guca cate' gútië' Jesús*

(Mt. 27:45-56; Lc. 23:44-49; Jn. 19:28-30)

<sup>33</sup> Cate' bidxín idú huagubidza, guchul-la idútë yödzölió. Guca caní ga bidxitné idú ridödi xihuö. <sup>34</sup> Idú ridödi xihuö na' bë'ë Jesús zidzaj didza', rnné':

—Eloí, Eloí, ¿lama sabactani?

Didza' hebreo ni rnna lu didza' xidza': Dios quia', Dios quia', ¿bizz que nubéaj ládxu'u nedá'?

<sup>35</sup> Yugu' bönni' nacu'ë ni' bila'yönné' didza' ni, ate' ta'nné':

—Buli'zétsöca' nágali'. Elías rulidzé'.

<sup>36</sup> Ní'irö guxíti'ë tu bönni' nútsë'ë ládjagaquié', en buxúpiné' nupi zi tu le bululu rë'aj nisa. Budé'ë le lahui gui, en bë'ë le xupé' Jesús, rnné':

—Cóztsöca'ru', uyuru' channö huidé' Elías uzötjé' Lë'.

<sup>37</sup> Gurōdxi'ë zidzaj Jesús, en la' gútítë'. <sup>38</sup> Biröza' lari' yödx nala' lu yudo'. Birúaj choplö, gudela' icjlö, en birúajtë zxánilö. <sup>39</sup> Bönni' na' rinná bé'enë' bönni' röjáquië' gudil-la zuínë' lahuë' Jesús, en bilé'enë' ca na' guca gurōdxi'ë Jesús, en la' gútítë', ate' gunnë':

—Le nácatë bönni' ni gúquië' Zx'inë' Dios.

<sup>40</sup> Nacuá'anu ca' ni' nigula, zí'tu'sö tu'yunu. Nútsa'gacanu ládjagacanu María Magdalena, en Salomé, en María, xiná'agacabi' Jacobo cuidi', en José. <sup>41</sup> Nigula ni yójácalennu Jesús cate' ni' gudé' luyú Galilea, en gulácalennu Lë', gula'gú'unu le gulahuë'. Nacuá'anu ca' ni' ia'bál-lanu nigula zián gula'zá'lennu Lë' lu yödzö Jerusalén.

### *Ta'gu'ë Jesús yero ba*

(Mt. 27:57-61; Lc. 23:50-56; Jn. 19:38-42)

<sup>42</sup> Chizá' ral-la, en naca dza tu'pé'ë, dza si' idxín dza lá'ayi quégacië' bönni' judío. <sup>43</sup> Que lë ni na' bidé' José, bönni' yödzö Arimatea, bönni' lo ládjagaquie' bönni' yúlahui' lo. Ribözé' ca' dza idinná bë'ë Dios. Idú ládxë'ë guyázië' ga na' zoë' Pilato, en gunábinë' lë' gu'ë lë' lataj u'ë Jesús. <sup>44</sup> Bubáninë' Pilato tu' gunné' chigútië' Jesús, ate' bulidzë' bönni' na' rinná bë'enë' bönni' röjáquië' gudil-la para inábinë' lë' channö chinátië' Jesús. <sup>45</sup> Cate' biyönnë' ca na' gunné' bönni' na' rinná bë'enë' bönni' röjáquië' gudil-la, bë'ë José lataj u'ë Jesús. <sup>46</sup> Ní'irö José na' gú'uë' tu lari' xtila dxí'ado', ate' buzötjë' Jesús lë'e yaga cruz, en buchólinë' Lë' lari' na'. Ní'irö gulu'ë' Lë' yero ba nadaj lë'e guí'a guiój. Budé'ë tu guiój blaga zxön ga nu riyaza ba na'. <sup>47</sup> María Magdalena, en María, xiné'ë José tu'yunu ga na' ta'gu'ë Jesús.

## 16

### *Rubanë' Jesús lu yöl-la' guti*

(Mt. 28:1-10; Lc. 24:1-12; Jn. 20:1-10)

<sup>1</sup> Cate' chinadödi dza lá'ayi quégaca böñachi judío le naca dza gadxi, María Magdalena, en Salomé, en María, xiné'ë Jacobo, ta'zí'nu yugu' le rilá' zxixi para tsöjlú'ugacanu Jesús.

<sup>2</sup> Ni' naca zílado' dza risí lo, yójácanu ra' yero ba queë'. Bila'dxinnu ni' cate' si' gulén gubidza. <sup>3</sup> Gula'nábinu luzá'agacanu:

—¿Nuzxi cúaatsö queëru' guiój na' da' ga nu riyaza ba queë'?

<sup>4</sup> Cate' bila'dxinnu ni', bulu'yunu, en bila'lé'enu chinadúa guiój na', ate' guiój zxön naca. <sup>5</sup> Gula'yú'nu yero ba lë'e guí'a guiój na', ate' ni' bila'lé'enu-bi' tubi' bi'i bönni' ra'bán, nácabi' gubáz lá'ayi queë' Dios. Rö'öbi' tsölä'a ibëla lu yero ba na', nácubi' lari' tunna chiguichido'os. Guládxide'enu. <sup>6</sup> Ní'irö bi'i na' gúdxibi' légacanu, rnnabi':

—Bíti'rö gádxili'. Ruguylajli' Jesús, Bönni' Nazaret, Bönni' na' gudé'ë lë'e yaga cruz. Chibubanë'. Biti' zoë' ni. Buli'yú ga ni gula'gu'ë Lë'. <sup>7</sup> Guli'tséaj na'a, guli'tsöjtixjö'i'i ca' yugu' bönni' usëda queë', enca' Pedro. Guiéli' légaquie': "Tsejë' Jesús luyú Galilea zí'alö ca libí'ili'. Ni' ulé'eli'-në' ca na' chigudxi cazë' libí'ili'."

<sup>8</sup> Ní'irö bulu'rúajnu ni', bulu'zxúnnañnu ra' yero ba na' tu' ta'zxízinu lu yöl-la' radxi ridzöbi quégacanu. Cuntu nu gulénu ca' tu' tádxinu.

### *Rulu'i lahuë' Jesús lonu María Magdalena*

(Jn. 20:11-18)

<sup>9</sup> Cate' bubanë' Jesús zílado' dza na', bulu'i lahuë' zí'alö lonu María Magdalena, nigula na' bubéajë' gadxi bö' xihui' gula'yú'u lënu. <sup>10</sup> Guyéajnu yöjtixjö'i'inu nupa na' gula'dalen Jesús. Nupa ni ta'sébi ládxí'gaca, en ta'bödxi yechi'. <sup>11</sup> Cate' bila'yöni didza' rui'inu, zoë' nabanë' Jesús, ate' bilé'e quézinu Lë', biti' gula'yéajlé' lënu.

### *Chopë' bönni' usëda queë' Jesús tu'lé'enë' Lë'*

(Lc. 24:13-35)

<sup>12</sup> Gudödi na', nadzá'alö buluí'i lahuë' Jesús lógaquië' chopë' bönni' usëda queë' yú'ugaquië' nöza, söjáquië' ga naca ladaj guixi'. <sup>13</sup> Ní'irö bulu'dxinë', dutíxjöi'iguequinë' ia'zíca'rë', ate' ni xtídza'gaquië' biti' gula'yéajlë'ë.

*Le rigu'ë Jesús lu ná'agaquië' bönni' gubáz queë'*

*(Mt. 28:16-20; Lc. 24:36-49; Jn. 20:19-23)*

<sup>14</sup> Ga yöisetë, buluí'i lahuë' Jesús lógaquië' idxinéajtë' tsanni ni' ta'bö'ë tahuë', ate' gudil-lë' légaquië' didza' tu' cabí ta'yéajlë'ë Lë', en tu' naca zidi icja ládzi'do'gaquië', tu' cabí gula'yéajlë'ë xtídza'gaca nupa na' bila'lé'e Lë' nubanë'. <sup>15</sup> Ní'irö gudxë' légaquië', rnne'ë:

—Guli'tséaj idútë yödzölió tsöjenli' libán que didza' dxi'a lógaca yúgu'të böñachi. <sup>16</sup> Nu tséajlë' neda', en idila nisa, ulá nu na', pero nu biti' tséajlë', irugu que gati nu na'. <sup>17</sup> Le ilaca bë' ni ilunë' bönni' ila'yéajlë'ë neda'. Ulu'gunë' dxin La' neda', en ulu'béajë' yugu' bö' xihui' yú'ugaca böñachi, en ilu'ë didza' izá'a. <sup>18</sup> Channö ila'zönë'-ba' bëla sínia' lu ná'agaquië', o channö ile'jë' le nachë' yöl-la' guti, biti' bi gun quégaquië'. Ila'xóa næ'ë nupa te'e, ate' ulu'huöácatë.

*Ruhuëpë' Jesús yehua' yubá*

*(Lc. 24:50-53; Hc. 1:6-11)*

<sup>19</sup> Cate' Xanru' budxi bë'lenë' légaquië' didza' ni, buchisë' Dios Lë' yehua' yubá ga ni' gurö'ë cuitë' ibëla Lë'. <sup>20</sup> Bila'rúajë' légaquië', yöjéngäquië' libán yúgu'të yödzö. Gúcalenë' Xanru' légaquië', en benë' ga gulunë' le nácagaca bë' naca idútë li didza' tu'ë. Ca' naca.

## DIDZA' DXI'A BUZÚAJÉ' LUCAS

*Didza' rigu'ë Lucas lu në'ë Teófilo*

<sup>1</sup> Zián nupa chigulún bayudxi ulu'zúaj lu guichi idútë le nácatë, le guca ga zóaru', <sup>2</sup> ca na' bila'lé'e nupa ni' dza ni'te, ate' bulu'lui'i rë'u, en bulu'zé didza' que. <sup>3</sup> Teófilo, bönni' tsáhui'do', runi neda' naca dxi'a uzúaja' quiu' lu guichi, ga ze lo dzö' yúgu'të lë ni, tu' chibuguílaj bubéquia' ga ze lo dzö' ca naca yúgu'të lë na' guca dza ni'te. <sup>4</sup> Ruzúaja' quiu' lu guichi ni para inózinu' naca idútë li lë na' chinazédu'.

*Rulu'iné' gubáz lá'ayi queë' Dios ca si' gálajbi' Juan, bönni' uquilë' bönachi nisa*

<sup>5</sup> Dza ni'te cate' gunná bë'ë Herodes luyú Judea, ni' zoë' tu bixúz lë' Zacarías. Nabábalené' cō' bixúz, nazí'i le Cō' Queë' Abías. Elisabet, nigula queë' Zacarías na' nácanu ca' zxí'ini xi'soë' Aarón, bönni' gúquie' bixúz lo dza ni'te. <sup>6</sup> Nácagaquië' Zacarías, en Elisabet tsahui' lahuë' Dios, ate' idú láxii'gaquië' tuné' ca rnna xtídzë'ë Dios, en le rinná bë' xibá queë'. Caní guca, cuntu nu guca bi inné quégaquië'. <sup>7</sup> Cuntu nu zoa bi'i quégaquië', tu' nácanu Elisabet nigula huödx, ate' chinagúlaguacië' irópatë'.

<sup>8</sup> Guca beo' gul-la' uláz que cō' na' nabábalené' Zacarías iluné' dxin lahuë' Dios, lu yöl-la' bixúz quégaquië'. <sup>9</sup> Ca naca le nulaga lógaquië' tuné' bixúz, gul-la' uláz queë' Zacarías guyázië' lu lataj lá'ayi que yudo' para uzégui'ë yalaj lahuë' Xanru' Dios. <sup>10</sup> Tsanni ni' ruzégui'ë Zacarías na' yalaj, gula'cuá' yúgu'të bönachi ní'lö, tu'lidza Dios. <sup>11</sup> La' ná'asö bulu'i lahuë' gubáz lá'ayi queë' Xanru' ga zoë' Zacarías na'. Zuínë' gubáz na' tsólá'a ibëla bucugu lá'ayi ga na' régui yalaj. <sup>12</sup> Cate' bilé'enë' Zacarías gubáz lá'ayi na', gurö'ë böniga, en gudxi bidzöbinë'. <sup>13</sup> Ní'irö gubáz lá'ayi na' gudxë' lë', gunnë':

—Zacarías, biti' gádixinu', tu' chibiyönnë' Dios le rinabu' lahuë', ate' Elisabet, nigula quiu', uzóanu-bi' tubi' bi'i bönni'do', ate' gu'u labi' Juan. <sup>14</sup> Gata' quiu' le uzi'u xibé, en udzéjanu', ate' zián nupa ulu'dzeja láxii'gaca cate' gálajbi' bñ'ido' na', <sup>15</sup> tu' gácatébi' zxön lahuë' Dios. Biti' guí'ajbi' xisi uva, en caléga tu le rusudxi bönachi, ate' sóalenë'-bi' Dios Bö' Lá'ayi cate' isí lo si' gálajbi'. <sup>16</sup> Gunë' Juan ni ga ulu'huöáca zián bönachi Israel queë' Xanru'. <sup>17</sup> Inóruë' lë' ca Xanru', ate' ila'cuá'alen lë' Bö' na', en yöl-la' huáca na' gula'cuá'alen Elías, bönni' bë'ë didza' uláz queë' Dios dza ni'te. Caní gunë' para únë' tuz nupa nátagaca xuz len zxí'inigaquië', en uzéajni'inë' nupa ta'dá'baga' para ilácagaca tsahui', en ucözë' bönachi para ila'zí' lu në'eguequi Xanru'.

<sup>18</sup> Zacarías gunábinë' gubáz lá'ayi na', rnnë':

—¿Bizxi gaca bë' para inözda' ilaca lë ni? Chinagúla' neda', en chinagúlanu ca' nigula quia'.

<sup>19</sup> Bubi'ë didza' gubáz lá'ayi na', rnnë':

—Neda' lea' Gabriel. Runa' dxin lahuë' Dios. Lë cazë' gusö'l-lë'ë neda' para gü'ilenä' li' didza', en usiyönda' li' didza' dxi'a ni. <sup>20</sup> Na'a, tu' cabí guyéajlé'u xtídz'a'a, icödzu', en bíti'rö gaca innó' cate' gácarö lë ni. Yúgu'të lë ni udxín cate' idxín dza que.

<sup>21</sup> Tsanni ni' raça lë ni, nacuá' bönachi ní'lö, ta'böza Zacarías, ate' tu'bani tu' ridzenë' xidzé ga na' zoë' lu lataj lá'ayi. <sup>22</sup> Cate' burúajé' Zacarías, biti' guca gü'ilenë' légaquië' didza', ate' guléquibe'enë' bilé'enë' tu le bulu'i inë' Dios lë' lu lataj lá'ayi. Bulá'a bulu'i isë' Zacarías, buzájn'i inë' légaquië', tu' cabí raca inné'.

<sup>23</sup> Cate' bizá'a yugu' dza na' ral-la' gunë' dxin Zacarías lahuë' Dios, ní'irö bőajë' lidxë'.

<sup>24</sup> Gudödi yugu' dza na' Elisabet, nigula queë' Zacarías na', biá'anu-bi' lë'ënu bñ'ido', ate' idú gayu' beo' bugá'anasinu ga zoa lídxigaquië'. Guzá' láxii'nu, rnnnanu: <sup>25</sup> "Caní runë' Xanru' quia'. Ruzá' ládxë'ë quia' bñ'ido', en runë' ga bíti'rö utu'ida' lögaca bönachi."

*Riguíxjö'ë gubáz lá'ayi ca si' gálajbi' Jesús*

<sup>26</sup> Cate' chiguca xopa beo', bulu'i lahuë' gubáz lá'ayi na', tu' gusól-lë'ë Dios lë cazë' Gabriel, tsejë' Nazaret, tu yödzö luyú Galilea. <sup>27</sup> Dios gusól-lë'ë lë' ni' tsöjyúë'-bi' tubi' bi'i nigula ra'bando' lëbi' María. Chinazi' lu ná'abi' María utsaga ná'alenbi'-në' bönni' lë' José. Nababë' José di'a dza queë' David, bönni' gunná bë'enë' bönachi Israel dza ni'te.

<sup>28</sup> Cate' guyázi' Gabriel na' ga zóabi' María, gudxé'-bi':

—Padiux. Dios ruzá' ládxé'ë quiu'. Xanru' Dios zóalenë' li'. Lë cazë' benë' ga nácaru' li' bica' ba ca yúgu'të nigula.

<sup>29</sup> Cate' bilé'ebi' María gubáz lá'ayi na', guró'öbi' böniga tu' nözi didza' na' bë'ë, en rubani ládxí'bi' nacxi sa'yéaj didza' na' bulidzé'-bi' gubáz lá'ayi na'. <sup>30</sup> Ní'irö gubáz lá'ayi na' gudxé'-bi', rnnë':

—María, biti' gádixinu', tu' chibidéli'nu' le ruzá' ládxé'ë Dios quiu'. <sup>31</sup> Na'a, tsú'ubi' tubi' bñ'ido' lë'u, ate' uzú'-bi' tubi' bi'i bönni'do', ate' gu'u labi' Jesús. <sup>32</sup> Jesús ni tsépisétérë', en si' Lë' Zxi'inë' Dios, Nu nayépisétérö. Xanru' Dios gunë' ga inná bë'ë ca na' gunná bë'ë David, xuz gula gudödi queë'. <sup>33</sup> Jesús na' inná bë'etica'sinë' bönachi Israel, ate' le inná bë'ë Lë' catu caz tödi que.

<sup>34</sup> Ní'irö María gunábibi' gubáz lá'ayi na', rnnabi':

—¿Nacxi caz gaca lë ni, tu' cabí zóalena' bönni'?

<sup>35</sup> Bubi'ë didza' gubáz lá'ayi na', rë'ë-bi':

—Guidë' Dios Bö' Lá'ayi ga zu', ate' yöl-la' huáca queë' Dios, Nu nayépisétérö, sóalen li', le gaca ca tu zxul-la rigú'u böaj ga zu'. Que lë ni na' bi'i bönni'do' na' ral-la' gálajbi', tsú'ubi' lu në'ë Dios, ate' si' labi' Zxi'inë' Dios. <sup>36</sup> Cá'anqueze Elisabet, nigula di'a dza quiu', chinua'anu-bi' lë'ënu tubi' bi'i bönni'do' sal-la' chinagúlanu. Gula'nné' queënu: "Nácanu nigula huödx", pero chizéaj xopa beo' nuá'anu-bi' lë'ënu bñ'ido' na'. <sup>37</sup> Biti' bi zoa le cabí séqui'në' Dios.

<sup>38</sup> Ní'irö María gunabi':

—Ni zoa'. Tsaz naca' huen dxin queë' Xanru'. Gaca quia' ca na' chigunnó'.

Ní'irö la' buza'të' gubáz lá'ayi na' ga zóabi' María.

### *María söjyubi'-nu Elisabet*

<sup>39</sup> La' dza ní'isö guyú'ubi' nöza María, ate' carelö sa'yéajbi' ga naca guí'ado', en bidxinbi' tu yödzö luyú Judea. <sup>40</sup> Ni' guyázabi' lidxé' Zacarías, en gúdxibi'-nu Elisabet:

—Padiux.

<sup>41</sup> Cate' biyöñinu Elisabet didza' na' bë'ëbi' María, la' butátë cuinbi' bi'i hué'ërido' na' yú'ubi' lë'ënu, ate' bidisóalenë'-nu Dios Bö' Lá'ayi. <sup>42</sup> Ní'irö bë'ënu Elizabet zidzaj didza', rnnanu:

—¡Chinunë' Dios ga nácaru' li' bica' ba ca yúgu'të nigula, en chinunë' ca' ga nácabi' bica' ba bñ'ido' na' yú'ubi' lë'u! <sup>43</sup> ¿Núzxítë neda', zá'anu xiné'ë Xana' quia'? <sup>44</sup> Cate' biyönda' didza' bë'u, bulidzu' neda', lu yöl-la' rudzeja queëbi' la' butátë cuinbi' bi'i hué'ërido' ni yú'ubi' lë'a. <sup>45</sup> ¡Bica' ba li' tu' guyéajlë'u xtídzé'ë gubáz lá'ayi, ate' udxín caz lë na' gudxé' li' uláz queë' Xanru'!

<sup>46</sup> Ní'irö gunabi' María:

¡Idútë le naca' rigú'u Xanru' yöl-la' ba,

<sup>47</sup> en rudzeja ládxí'lena'-në' Dios, Nu rusölá neda'!

<sup>48</sup> ¡Dios caz buzá' ládxé'ë quia' neda'!

Yu'a lu në'ë, en tsaz naca' huen dxin queë'.

Na'a isí lo, ca naca quia' ila'nná:

Bica' ba nigula na'.

<sup>49</sup> ¡Zxóntérö naca le benë' Dios unná bë' quia'!

¡Lá'ayi naca Lë'!

<sup>50</sup> Lë' ruhuéchi' ládxí'tica'së' bönachi tadxi Lë' na'a dza, en dza zá'gaca.

- <sup>51</sup> Yugu' yöl-la' huáca zxön chibenë' Lë'.  
 Buzötje' nupa gulún zxön yöl-la' réajni'i quéguequi.  
<sup>52</sup> Bugüé' yöl-la' unná bë' quégaca nupa gulaca lo,  
 en benë' ga gulaca lo nupa gulaca nöxañ ladxi'.  
<sup>53</sup> Benë' ga bulu'huólaj bulu'dzé'e nupa gula'dún,  
 en bucá'anë' cá'asö nupa bila'lé'e yöl-la' tsahui'.  
<sup>54</sup> Gúcalenë' bönachi Israel, nupa na' tun xichinë',  
 tu' yöjnenë' légaquië', en buéchi' ládxë'ë légaquië'.  
<sup>55</sup> Benë' ca guzxí' lu né'ë gunë' quégaca dí'a dza queë'.  
<sup>56</sup> María bugá'analenbi'-nu Elisabet idú ca tsonna beo', ate' gudödi ni' bőajbi' lídxibi'.

*Le guca cate' gúlajbe' Juan, bónni' uquile' bönachi nisa*

- <sup>57</sup> Cate' bidxín dza ral-la' sóabi' bí'ido' queënu Elisabet, buzóanu-bí' tubi' bí'i bónni'do'.  
<sup>58</sup> Bila'yöni dzaga yu'u queënu, en yugu' di'a dza queënu ca na' guca, buéchi' ládxë'ë-nu  
 Dios, ate' bulu'dzéjalen lénu. <sup>59</sup> Cate' chiguca xunu' dza zóabi' bí'ido' na', bila'dxinë' dí'a  
 dza queënu para ila'chúguië' lu xipéla'bí' bí'i bónni'do' na' lë na' gaca bë' néquibi' queë'  
 Dios, ate' té'ennë' ilu'ë labi' Zacarías ca na' lë' xúzibi'. <sup>60</sup> Ní'irö bubí'nu didza' Elisabet,  
 xiná abi', rnnanu:

—Caléga. Juan si' labi'.

<sup>61</sup> Gula'nábinë'-nu, ta'nné':

—¿Bizz que? Cuntu nu di'a dza quiu' lë' Juan.

- <sup>62</sup> Ní'irö bulu'lá' bulu'lui'isinë', gula'nábinë' xúzibi' nacxi ré'ënë' gu'ë labi'. <sup>63</sup> Zacarías  
 na' gunabë' tu blágado', ate' buzájajé' lahui caní: Juan lëbi'. Bulu'báninë' yúgu'të'. <sup>64</sup> La'  
 ní'isö böáljatë ru'ë Zacarías na', en buguítjatë ládxë'ë, ate' bë'ë didza' le gulu'ë Dios yöll  
 la' ba. <sup>65</sup> Ní'irö guládxinë', en bulu'báninë' yúgu'të dzaga yu'u quégaca dí'a dza queë'  
 yödzödo' nacuá' lu gu'ado' luyú Judea, guzé didza' ca guca lë ni. <sup>66</sup> Gula'zá' ládxí'gaca  
 yúgu'të nupa bila'yöni ca na' guca, ta'nná: "¿Nacxi caz gácabi' bí'i bónni'do' ni? Le nácatë  
 Xanru' zóalenë'-bí'."

*Didza' bë'ë Zacarías uláz queë' Dios*

- <sup>67</sup> Ní'irö Dios Bö' Lá'ayi bidisóalenë' Zacarías, xúzibi' Juan, ate' bë'ë didza' uláz queë'  
 Dios, rnñë':

<sup>68</sup> ¡Yöl-la' ba Dios, Xángaca bönachi Israel  
 tu' buduyúë' rë'u, bönachi queë', en böá'uë' rë'u!

<sup>69</sup> ¡Gusól-lé'ë queéru' Bönni' usólé' rë'u,  
 len yöl-la' huáca zxön queë'!  
 Bönni' ni guljé' lágajgaca dí'a dza queë' David,  
 huen dxin queë' Dios.

<sup>70</sup> ¡Dza ni'te guzxí' lu né'ë gunë' ga gaca caní!  
 Raca ca na' gunné' lu ruá'agaquië' bönni' gulu'ë didza' uláz queë'.

<sup>71</sup> Guzxí' lu né'ë usólé' rë'u  
 lu ná'agaca nupa tequi rë'u zi',  
 enca' lu ná'agaca nupa biti' ta'lé'e rë'u dxí'a.

<sup>72</sup> Guzxí' lu né'ë huéchi' ládxë'ë xuz gudödi queéru',  
 en tsöjnenë' le guzxí' lu né'ë le naca lá'ayi.

<sup>73</sup> Lë ni benë' tsutsu xtídzë'ë, en guzxí' lu né'ë,  
 le gunë' queë' Abraham, xuz gudödi queéru',  
 le naca tu le ral-la' gunë' queéru' rë'u.

<sup>74</sup> Guzxí' lu né'ë usólé' rë'u  
 lu ná'agaca nupa biti' ta'lé'e rë'u dxí'a  
 para cabirö gádxiru' gunru' xichinë' Lë',

<sup>75</sup> en para gácaru' ba'a ladxi', en idú dxi'a lahué' Lé' yúgu'té dza sóaru' ibanru'.  
<sup>76</sup> Li', zxí' ina'do', si' lo' bönni' ru'ë didza' uláz queé' Dios unná bë' tu' tsöjnörü' ca Xanru' caz, en upó'o nöza ga tödë'.  
<sup>77</sup> Gunu' ga ila'nözi bönachi queé' ca gaca ulu'lágaca, en ca na' uniti lahué' Dios dul-la' nabága'gaca.  
<sup>78</sup> Caní gaca, tu' ruhuéchi'da' ládxé'ë Dios rë'u, en runé' ga tsení' queéru' Bönni' na' náquië' bení' idú.  
<sup>79</sup> Lé' uzení'ë quégaca nupa nacuá' gapa naca chul-la, en gapa nacuá' nupa chizóa ilátigaca para ugú'ë rë'u nöza ga cö'ö dxi ládxí'do'oru'.  
<sup>80</sup> Guzxönbí' bi'i bönni'do' na', en bidipa ládxí'bi'. Guzóasibi' gapa naca lu lataj cá'asö cate' bidxinrö dza bulu'i lobi' lógaca bönachi Israel.

## 2

*Le guca cate' gúlajbi' Jesús*

(Mt. 1:18-25)

<sup>1</sup> Lu dza na' gunná bë'ë Augusto César, bönni' Roma, ila'yaza lu guichi yúgu'té bönachi nacuá' yödzölió. <sup>2</sup> Cate' gusí lo ta'yaza lu guichi caní, rinná bë'ë bönni' lë' Cirenio luyú Siria. <sup>3</sup> Yúgu'té bönachi yójaca yödzö que queéguequi ga na' zeaj nababa para ila'yaza lu guichi. <sup>4</sup> Guzé'ë José yödzö Nazaret luyú Galilea, sa'yéajé' luyú Judea, en bidxinë' yödzö Belén, ga ni' gulje' David, tu' gulje' José lágajgaca di'a dza queé' David na'. <sup>5</sup> Guyijé' José ni' para tsázië' lu guichi, ate' dzágabi'-në' María, bi'i nigula nazí' lu ná'abi' utsaga ná'alenbi' lë', en chizóa sóabi' bï'ido' queébi'. <sup>6</sup> Cate' ni' nacu'ë lu yödzö Belén, bidxín dza sóabi' bï'ido' queébi'. <sup>7</sup> Buzóanu-bi' tubi' bi'i bönni'do', bi'i huáca queénu. Buchólinu-bi' yugu' lári'do', ate' gudíxjanu-bi' tu lu yú'udo' ga tun chi'i le táguba'böa' quégaca bönachi yú'ugaca nöza. Caní guca, tu' cabí bidzöli lataj ila'cu'ë lu yu'u ga ni' ta'dxín bönachi yú'ugaca nöza.

*Tu'lui' lahué' gubáz lá'ayi queé' Dios ga nacu'ë bönni' tu'yúë'-ba' bö'cu' zxila'*

<sup>8</sup> Gala' ra' yödzö Belén nacu'ë bönni' tu'yúgaquië'-ba' bö'cu' zxila' la' guixi', tapa chí'igaquië'-ba' chí'i dzó'ölö. <sup>9</sup> La' bulu'itë lahué' gubáz lá'ayi queé' Xanru' ga na' nacu'ë. Yöl-la' bení' queé' Xanru' buzení' ga na' nacu'ë, ate' guládxinë'. <sup>10</sup> Ni'irö gubáz lá'ayi na' gudxé' légaquië', rnnë':

—Biti' gádxili'. Na'a rusiyóna' libfili' didza' le gun ga udzéjade'eli', le ulu'zí' ca' xibé yúgu'té bönachi. <sup>11</sup> Na'a chigúlajbi' lu ladzé' David Nu usölá libi'ili'. Nu ni naca Cristo, Xanru'. <sup>12</sup> Lé ni gaca bë'ëbi'. Udzólili'-bi' BÍ'ido' na', narólibi' yugu' lári'do', en dëbi' tu lu yú'udo' ga tun chí'i le táguba'böa' quégaca bönachi yú'ugaca nöza.

<sup>13</sup> Ga na' zoë' gubáz lá'ayi na', tsálido'os bulu'lui' lógaquië' ziánrö ca' gubáz lá'ayi queé' Dios, narúajgaquië' yehua' yubá, en ta'gu'ë Dios yöl-la' ba, ta'nnë':

<sup>14</sup> ¡Yöl-la' ba Dios zoë' xitsá', ate' luyú gaca le cuéqui dxi ládxí'do'gaquië' bönni' raza ládxé'ë Dios légaquië'!

<sup>15</sup> Cate' bulu'zé'ë gubáz lá'ayi na' ga ni' nacu'ë, söjhuöjgaquië' yehua' yubá, ni'irö gulé luzé'ë tuë' ia'túie' bönni' uyú bö'cu' zxila' na', ta'nnë':

—Uyéajtsöca'ru' Belén para ilé'eru' lë ni chiguca ca na' chibusiyönné' Xanru' rë'u.

<sup>16</sup> La' yójacatië', ate' yójaxáca'gaquië' María len José, enca' bï'ido' na', dëbi' tu lu yú'udo' ga tun chí'i le táguba'böa' quégaca bönachi yú'ugaca nöza. <sup>17</sup> Cate' bila'lé'enë' lëbi', gula'guíxjö'ë lë na' si' busiyönné' gubáz lá'ayi na' légaquië' ca naca queébi' bï'ido' na'.

<sup>18</sup> Bulu'bani yúgu'té nupa bila'yöni didza' gulu'ë bönni' tu'yúë' bö'cu' zxila' na'. <sup>19</sup> María gulú'usö icja náganu didza' ni, ate' guzá' ládxí'nu ca naca que. <sup>20</sup> Söjhuöjgaquië' bönni'

na' tu'yúe'-ba' bö'cu' zxila', tunë' zxön Dios, en ta'gu'ë Lë' yöl-la' ba ni'a que yúgu'të lë na' bila'yönnë', en bila'lé'enë', le guca ca na' busiyönnë' gubáz lá'ayi na' légaquië'.

### *Ta'gu'ë-bi' b'ido' Jesús lu né'e Dios*

<sup>21</sup> Cate' chiguca xunu' dza zóabi' b'ido' na', gula'chúguië' lu xipéla'bi' lë na' naca bë' néquibi' queë' Dios, ate' gulu'ë labi' Jesús ca na' chibé' cazë' labi' gubáz lá'ayi na' zí'alö cate' si' tsú'ubi' lë'ënu xiná'abi'.

<sup>22</sup> Cate' chibizá'a dza que le tu'pá'a cuíngacanu nigula ca rinná bë' xibá queë' Moisés, gula'ché'ë-bi' b'ido' Jesús yödzö Jerusalén para ila'gu'ë-bi' lu né'e Xanru' Dios. <sup>23</sup> Caní gulunë', tu' nazúaj lu guichi lu xibá queë' Xanru' le rnna: "Yúgu'tëbi' bi'i bónni'do' nácagacabi' bi'i zí'alö queënu xiná'agacabi', ulu'béajé'-bi' quez queë' Xanru' Dios." <sup>24</sup> Que lë ni na' yójáquië' ni' para ilútië'-ba', en ila'gú'ë-ba' lahuë' Dios chópaba' gúgudo' o chópaba' budödu' ca na' rinná bë' xibá queë' Xanru' Dios.

<sup>25</sup> Dza n'isö zoë' tu bónni' lë' Simeón lu yödzö Jerusalén. Bónni' ni náquië' tsahui', en reaj ládxë'ë Dios. Ribözé' Bónni' na' isól-lë'ë Dios, Bónni' na' gácalenë' bönachi Israel. Dios Bö' Lá'ayi zóalenë' Simeón na', <sup>26</sup> en chibului'inë' lë' biti' gátië' cate' ilé'erönë' Cristo, Bónni' na' isól-lë'ë Xanru' Dios. <sup>27</sup> Bidxinë' Simeón na' chila yudo' tu' guché'ë Dios Bö' Lá'ayi lë' ni'. Cate' xuz xiná'abi' gula'ché'ë-bi' b'ido' Jesús chila yudo' para ilunë' queëbi' ca rinná bë' xibá na', <sup>28</sup> ní'irö bunidë'-bi' Simeón na', en guyéaj ládxë'ë Dios, rnne':

<sup>29</sup> Xana', na'a huáca gunnu' neda' lataj gátia', soa dxí ládxa'a tu' chiguca le gudxu' neda', huen dxin quiu'.

<sup>30</sup> Chibilé'eda' Nu na' buzóa cazu', Nu usólá bönachi,

<sup>31</sup> Nu na' ulú'u lahui lógaca yúgu'të bönachi.

<sup>32</sup> Lébi' nácabi' bení' le uzení' bönachi izá'a, en nácabi' ca' bení' quégaca bönachi Israel quiu'.

<sup>33</sup> Bulu'báninë' José, en María, xiná'abi' b'ido' Jesús, ca naca lë na' gunné' Simeón ca naca queëbi' Jesús. <sup>34</sup> Simeón na' gunábinë' Dios gunë' ga gaca dxí'a quégaquië', ate' gudxë'-nu María, xiná'abi' Jesús, rnne':

—Buyútsöca'. Bi'i ni nuzóë'-bi' Dios para gunbi' ga ila'chixi bönachi zián, ate' ulu'huöasa bönachi zián ladaj bönachi Israel. Gácabí' tu le naca bë', ate' ila'nné bönachi queëbi'. <sup>35</sup> Gaca caní para ila'lá' lahui le ta'zá' ládxi'gaca bönachi zián. Yugu' lë ni ilaca quiu' ca tu guíë tuchi' le tsaza ládxi'do'o.

<sup>36</sup> Ana, nigula rui'nu didza' uláz queë' Dios, zóanu ca' ni'. Nácanu zx'ínë' Fanuel, bónni' nababë' di'a dza queë' Aser. Chinagúlada'anu Ana na', tu' guzóalennu bónni' queënu idú gadxi iz gudödi gúcanu ra'bando', <sup>37</sup> ate' bugá'ananu tuzi cate' bidxitë dza chiyú'unu idú ca tápalalaj yu' tapa iz. Biti' ca' rubí'i ruzá'anu ga naca chila yudo'. Rëla, en te dza reaj ládxi'nu-në' Dios, runnu gubasa, en rulídzanu-në' Dios. <sup>38</sup> La' ná'asö bidxitënu ni', rënu-në' Dios: "Xclenu'." Gudíxjöi'inu yúgu'të bönachi ca naca queëbi' b'ido' Jesús, bönachi na' nacuá' Jerusalén, nupa ta'böza dza idxín Nu na' isól-lë'ë Dios para gácalen bönachi.

### *Söjhuójgaquië' José, en María yödzö Nazaret*

<sup>39</sup> Gudödi gulunë' José, en María yúgu'të le rinná bë' xibá queë' Xanru' Dios, yöjhuójgaquië' ládzagaquië' Nazaret luyú Galilea. <sup>40</sup> Guzxönbí' b'ido' Jesús, en bidipa ládxi'bi'. Guta' queëbi' yöl-la' réajni'i, ate' zxön naca le ruzá' ládxë'ë queëbi' Dios.

### *Rudxinbi' b'ido' Jesús chila yudo'*

<sup>41</sup> Yugu' iz röjáquië' xuz xiná'abi' Jesús Jerusalén cate' raca Laní Pascua, laní tu'subanë' bónni' judío ca benë' Dios, bubéajé' xuz xtó'ogaquië' luyú Egipto. <sup>42</sup> Cate' chiyú'ubi' chinnu iz bi'i Jesús, yöjáquië' Jerusalén ca tun cazë' cate' raca laní na'. <sup>43</sup> Cate' gudödi laní, söjhuójgaquië', ate' bugá'anabi' b'ido' Jesús Jerusalén, pero biti' téquibe'enë' José, en

María, xiná'abi' Jesús. <sup>44</sup> Tu' téquinë' nútsa'bi' ladaj bönachi zián yú'ulengaca légaquië' nöza, tu dza nayá' gula'zé'ë. Ní'irö cate' bulu'guilje'-bi' gapa nacuá' di'a dza quégaquië', en gapa nacuá' nupa núnbë'gaquië' <sup>45</sup> biti' bulu'dzólinë'-bi'. Que lë ni na' yöjhuőjgaquië' Jerusalén, söjdíljagaquië'-bi'.

<sup>46</sup> Cate' chiguca dza bunni, bulu'dzólinë'-bi' ga naca chila yudo', rö'öbi' gatsaj láhui'lë' bönni' yudo' tu'sédinë'. Ruzé' nágabi' didza' tu'ë, en rinaba yúdxibi' légaquië'. <sup>47</sup> Bulu'bani yúgu'të nupa bila'yöni didza' bé'ëbi' ca naca yöl-la' réajni'i queébi', en ca nácagaca didza'bubí'ibí'. <sup>48</sup> Cate' bila'lé'enë'-bi' xuz xiná'abi', bulu'báninë', ate' gúdixinu-bi' xiná'abi', rnnanu:

—Zxi'ina', ¿bizz que benu' caní queétu'? Buyútsöca', len yöl-la' ruúbi ruguï'i neda', en xuzu' buguñjatu' li'.

<sup>49</sup> Ní'irö gúdxibi' Jesús légaquië', rnnavi':

—¿Bizz que buguñjali' neda'? ¿Naru' cabí nözili' run bayudxi guna' xichinë' Xuza'?

<sup>50</sup> Biti' gula'yéajni'inë' xuz xiná'abi' didza' na' gúdxibi' légaquië'.

<sup>51</sup> Jesús bőajlenbi' légaquië', budxinbi' Nazaret, ate' benbi' ca rnna xtídza'gaquië' xuz xiná'abi'. María, xiná'abi' Jesús, gulú'usönu icja ládzi'do'onu yúgu'të lë ni. <sup>52</sup> Ráta'rö yöl-la' réajni'i queébi' bi'i Jesús, en rizxonbi'. Burúajbi' dxi'a lahuë' Dios, en lógaca bönachi.

### 3

*Libán runë' Juan, bönni' ruquile' bönachi nisa*

(Mt. 3:1-12; Mr. 1:1-8; Jn. 1:19-28)

<sup>1</sup> Cate' chiguca chinu iz rinná bë'enë' Tiberio César idútë yödzölió, rinná bë'ë Poncio Pilato luyú Judea, ate' Herodes rinná bë'ë ca' luyú Galilea. Felipe, bóchë'ë Herodes na', rinná bë'ë luyú Iturea, en luyú Traconite, ate' Lisanias rinná bë'ë luyú Abilinia. <sup>2</sup> Yugu' dza na' nácagaquië' bixúz lo Anás, en Caifás, ate' la' ná'asö Dios bë'lenë' Juan, zxí'inë' Zacarías, didza' cate' ni' zoë' Juan lu lataj cá'asö. <sup>3</sup> Ridé' Juan ni yúgu'të lataj nacuá' ra' yegu Jordán, runë' libán ca ral-la' ila'dila nisa nupa tu'bí'i ládzi'gaca para uniti lahuë' Dios dul-la' nabága'gaca. <sup>4</sup> Guca caní ca na' nazúaj lu guichi lá'ayi yugu' didza' bë'ë Isaías, bönni' bë'ë didza' uláz queë' Dios, rnna:

Riyón chi'ë bönni' rulidzë' lu lataj cá'asö, rnna:

“Buli'pá'a nöza lu icja ládxido'oli' para idxín Xanru' queéli'.

Buli'béaj li yugu' nöza lasi ga tödë'.

<sup>5</sup> Ral-la' ulígaca yúgu'të gapa naca röga', en ulu'huöáca lachi' yúgu'të guí'a sibi, en guí'ado'.

Ral-la' ulu'rúaj li nöza nayecja nabí'igaca,

ate' ulu'huöáca dxi'a nöza guiój.

<sup>6</sup> Ila'lé'eni yúgu'të bönachi Bönni' na' isö'l-lë'ë Dios,  
Nu usölá bönachi.”

<sup>7</sup> Cate' bila'rúaj bönachi zián para ila'dila nisa lu në'ë Juan, lë' gudxe' légaquië':

—Libi'ili', di'a dza quégacaba' bëla sínia'. ¿Zoa nu bului'i libi'ili' ral-la' izxúnnajli' yöl-la' rusiúdxí si' gaca quégaca bönachi? <sup>8</sup> Na'a, guli'gún le ilaca bë' chibubi'i ládzi'li', en biti' sa' ládzi'li', biti' innali': “Nácatu' tsahui' tu' nácatu' di'a dza queë' Abraham”, tu' rea' libi'ili', huáca quélë'ë Dios yugu' guiój ni, en gunë' ga ulu'huöáca di'a dza queë' Abraham.

<sup>9</sup> Nácali' ca yugu' yaga. Chizóa riböza guíe huága para ichugu yugu' yaga. Yúgu'të yaga biti' ta'bía le naca dxi'a, ila'chúguië' yaga na', en ila'gu'ë léguequi lu guí'.

<sup>10</sup> Ní'irö bönachi nacuá' ni' gula'nabi lë', ta'nná:

—¿Nacxi gúntsatu'?

<sup>11</sup> Bubi'ë didza' Juan, rë' légaquië':

—Nu dë chopá cö' zxe ral-la' unödzaj que nu biti' dë que, ate' nu dë le gagu, lësca' caní ral-la' quisí quégaca nupa biti' dë le ilágugaca.

<sup>12</sup> Bal-lë' bönni' tu'quizxjë' lázagaca bönachi uláz que yödzö zi'tu' bila'dxinë' ca' ni' para ila'dilë' nisa, ate' gula'nábinë' lë', ta'nnë':

—Bönni' usëdi, ¿nacxi gúntsatu' netu'?

<sup>13</sup> Juan gudxë' légaquië':

—Biti' uquízxjaröli' tsca le chigunnë' bönni' yú'uli' lu në'ë.

<sup>14</sup> Bal-lë' bönni' rójáquië' gudil-la gula'nábinë' ca' lë', ta'nnë':

—¿Nazxi netu', nacxi guntu'?

Juan gudxë' légaquië':

—Bítirö gun gádxili' bönachi para cuali' le dë quéguequi. Bítirö innëli' quégaca bönachi le cabí nácatë para gunli' ga ila'guizzaj lib'iili', pero guli'tsaza ládxi'li' tsca rázxjali'.

<sup>15</sup> Ta'zá' ládxi'gaca bönachi na' ta'böza Bönni' na' ral-la' isöll-lë'ë Dios, channö náquië' Juan na' Bönni' lë' Cristo. <sup>16</sup> Bubi'ë didza' Juan, gudxë' yúgu'të', rnne':

—Le nácatë neda' ruquila' lib'iili' nisa, pero zë'ë Bönni' gunë' le rului'isö yöl-la' ridila nisa ni, ichízië' lib'iili' Dios Bö' Lá'ayi, en le naca guí' queë'. Bönni' ni náparë' yöl-la' unná bë' ca neda', ate' neda' biti' naca' lesaca' ilecja' le nudé'ë ni'e. <sup>17</sup> Zönë' lu në'ë böcö' queë', ate' ulubë' ga rilubi zxoa' xtila queë', lë ni rului'i le gaca quégaca bönachi. Utubë' zxoa' xtila, en cu'ë le xilataj, pero bëbu que uzégui'ë lu guí' le catu caz ulu.

<sup>18</sup> Ca nácagaca didza' ni, en ia'zíca'rö zián didza' le guchízië' icja nágagaca bönachi, benë' libán Juan lógaquië' que didza' dxi'a. <sup>19</sup> Juan na' buzégui'ë didza' Herodes, bönni' rinná bë'ë, tu' zóalenë'-nu Herodías, nigula queë' Felipe, bönni' bóchë'ë, enca' tu' runë' zián le ruá' dö'. <sup>20</sup> Ní'irö benë' Herodes tu le nácarö huiá' dö', gulu'ë Juan na' lidxi guíë.

### Ridile' Jesús nisa

(Mt. 3:13-17; Mr. 1:9-11)

<sup>21</sup> Dza na' cate' cabí nadzunë' Juan lidxi guíë, cate' ni' ruquilë' bönachi nisa, bidilë' ca' Jesús nisa. Cate' ni' rulidzë' Dios, guyalaj lúzxiba, <sup>22</sup> ate' bötje' Dios Bö' Lá'ayi, bidxinë' ga na' zoë' Jesús. Bulu'i lahuë', riné'ë ca riná' tuba' gu'dödo', ate' biyón chi'i Nu ru'i didza' yehua' yubá, rnna:

—Li' nacu' Zxi'ina'. Nadx'ida' Li', en raza ládxa'a Li'.

### Yugu' xuz xinë'e gudödi queë' Jesús

(Mt. 1:1-17)

<sup>23</sup> Cate' gusí lahuë' runë' xichinë' Jesús, yu'ë ca chi uruá' iz. Téquiguequi bönachi náquië' zxi'inë' José. Jesús náquië' zxi'ini xi'soë' Elí, nu na' náquië' xúzinu María, nigula queë' José na'.

<sup>24</sup> Elí na' gúquië' zxi'inë' Matat,

nu ni guca zxi'inë' Leví,

nu ni guca zxi'inë' Melqui,

nu ni guca zxi'inë' Jana,

nu ni guca zxi'inë' ia'tué' José.

<sup>25</sup> José ni gúquië' zxi'inë' Matatías,

nu ni guca zxi'inë' Amós,

nu ni guca zxi'inë' Nahum,

nu ni guca zxi'inë' Esli,

nu ni guca zxi'inë' Nagai.

<sup>26</sup> Nagai na' gúquië' zxi'inë' Mat,

nu ni guca zxi'inë' ia'tué' Matatías,

nu ni guca zxi'inë' Semei,

nu ni guca zxi'inë' ia'tué' José,

nu ni guca zxi'inë' Judá.

<sup>27</sup> Judá na' gúquië' zxi'inë' Joana,

nu ni guca zxi'inë' Resa,

nu ni guca zxí'inë' Zorobabel,  
 nu ni guca zxí'inë' Salatiel,  
 nu ni guca zxí'inë' Neri.

<sup>28</sup> Neri na' gúquië' zxí'inë' ia'túë' Melqui,  
 nu ni guca zxí'inë' Adi,  
 nu ni guca zxí'inë' Cosam,  
 nu ni guca zxí'inë' Elmodam,  
 nu ni guca zxí'inë' Er.

<sup>29</sup> Er na' gúquië' zxí'inë' Josué,  
 nu ni guca zxí'inë' Eliezer,  
 nu ni guca zxí'inë' Jorim,  
 nu ni guca zxí'inë' ia'túë' Matat.

<sup>30</sup> Matat na' gúquië' zxí'inë' Leví,  
 nu ni guca zxí'inë' Simeón,  
 nu ni guca zxí'inë' Judá,  
 nu ni guca zxí'inë' ia'túë' José,  
 nu ni guca zxí'inë' Jonán,  
 nu ni guca zxí'inë' Eliaquim.

<sup>31</sup> Eliaquim na' gúquië' zxí'inë' Melea,  
 nu ni guca zxí'inë' Mainán,  
 nu ni guca zxí'inë' Matata,  
 nu ni guca zxí'inë' Natán.

<sup>32</sup> Natán na' gúquië' zxí'inë' David,  
 nu ni guca zxí'inë' Isaí,  
 nu ni guca zxí'inë' Obed,  
 nu ni guca zxí'inë' Booz,  
 nu ni guca zxí'inë' Salmón,  
 nu ni guca zxí'inë' Naasón.

<sup>33</sup> Naasón na' gúquië' zxí'inë' Aminadab,  
 nu ni guca zxí'inë' Aram,  
 nu ni guca zxí'inë' Esrom,  
 nu ni guca zxí'inë' Fares,  
 nu ni guca zxí'inë' ia'túë' Judá.

<sup>34</sup> Judá na' gúquië' zxí'inë' Jacob,  
 nu ni guca zxí'inë' Isaac,  
 nu ni guca zxí'inë' Abraham,  
 nu ni guca zxí'inë' Taré,  
 nu ni guca zxí'inë' Nacor.

<sup>35</sup> Nacor na' gúquië' zxí'inë' Serug,  
 nu ni guca zxí'inë' Ragau,  
 nu ni guca zxí'inë' Peleg,  
 nu ni guca zxí'inë' Heber,  
 nu ni guca zxí'inë' Sala.

<sup>36</sup> Sala na' gúquië' zxí'inë' Cainán,  
 nu ni guca zxí'inë' Arfaxad,  
 nu ni guca zxí'inë' Sem,  
 nu ni guca zxí'inë' Noé,  
 nu ni guca zxí'inë' Lamec.

<sup>37</sup> Lamec na' gúquië' zxí'inë' Matusalén,  
 nu ni guca zxí'inë' Enoc,  
 nu ni guca zxí'inë' Jared,  
 nu ni guca zxí'inë' Mahalalel,

nu ni guca zxí'iné' ia'túé' Cainán.  
<sup>38</sup> Cainán na' gúquié' zxí'iné' Enós,  
 nu ni guca zxí'iné' Set,  
 nu ni guca zxí'iné' Adán,  
 nu ni guca ca zxí'ini cazé' Dios.

## 4

*Satanás tu' xihui' rē' éni usubaga' Jesús dul-la'*  
*(Mt. 4:1-11; Mr. 1:12-13)*

<sup>1</sup> Buzé'ë Jesús ra' yegu Jordán, zóalené' Dios Bö' Lá'ayi Lë', ate' Dios Bö' Lá'ayi na' guché'ë Jesús lu lataj cá'asö. <sup>2</sup> Guzóë' Jesús ni' idú ca choá' dza, ate' gú'uni tu' xihui' usubaga' Jesús dul-la'. Biti' bi gudahuë' Jesús yugu' dza na', ate' gudödi ni' riduné'. <sup>3</sup> Ní'irö tu' xihui' na' gudxi Jesús, rnna:

—Channö naca cazu' Li' Zxí'iné' Dios, gunnátsöca' ulu'huöáca guiój ni yöta xtila.

<sup>4</sup> Bubi'ë didza' Jesús, rē' le:

—Nazúaj lu guichi, rnna: "Calégasö yöta xtila nabánigaca böñachi, pero nabánigaca ca' yúgu'té xtídzé'ë Dios."

<sup>5</sup> Ní'irö guché' tu' xihui' na' Jesús ga naca tu lu gu'a sibi ate' tu chí'ido'osö bului'i Lë' yúgu'té xilátjagaca nupa ta'nná bë' yödzölió. <sup>6</sup> Tu' xihui' na' rē' Jesús, rnna:

—Gunna' quiu' yúgu'té xilátjagaca nupa ta'nná bë' ni, en yöl-la' tsahui' quéguequi, tu' nadödi lu na'a yúgu'té lé ni, ate' nu rē'énisida' ruá'a que. <sup>7</sup> Channö Li' uzóa zxibu' lahua', en gunu' neda' zxön, yúgu'té lé ni guequi quiu'.

<sup>8</sup> Bubi'ë didza' Jesús, rē' le:

—Gucuita ga zoa', Satanás, tu' nazúaj lu guichi lá'ayi le rē' netu', rnna: "Xanu' Dios tseaj ládxu'u-në', en tuzé' Lë' gunu' xichiné'."

<sup>9</sup> Ní'irö tu' xihui' na' guché' Jesús Jerusalén, ate' budxía Lë' lu zö'ö ícjo'olö yudo', en rē' Lë':

—Channö nacu' Zxí'iné' Dios, busuládzu'tsöca' cuinu' ni <sup>10</sup> tu' nazúaj lu guichi lá'ayi, rnna:  
 Dios isól-lë'ë gubáz lá'ayi queë', ilácalené' Li'.

<sup>11</sup> Lu ná'agaquie' ulu'chisë' Li' para cabí tsöjchégü'u guiój,  
 en biti' gunu' zi' ni'u.

<sup>12</sup> Bubi'ë didza' Jesús, rē' le:

—Nazúaj lu guichi lá'ayi le rē' netu': "Biti' si' bë'u Xanu' Dios."

<sup>13</sup> Cate' biti' budzöli tu' xihui' na' ia'tú le si' bë' Jesús, buzá' ga zoë' tu chí'ido'.

*Risí lahuë' Jesús runé' xichiné' luyú Galilea*

*(Mt. 4:12-17; Mr. 1:14-15)*

<sup>14</sup> Böajé' Jesús luyú Galilea, dë lu në'ë yöl-la' huáca queë' Dios Bö' Lá'ayi. Guzé' didza' ca naca queë', ate' bila'yöni böñachi nacuá' yúgu'té yödzö idú gásibi'ilö. <sup>15</sup> Busédiné' Jesús böñachi gapa naca lu yu'u ga tu'dubë' tu'sëdë' bönni' judío queë' Dios, ate' yúgu'té böñachi gulún Lë' zxön.

*Le bené' Jesús yödzö Nazaret, ga naca ladzé'*

*(Mt. 13:53-58; Mr. 6:1-6)*

<sup>16</sup> Ní'irö budxiné' Jesús yödzö Nazaret ga ni' guzxöné'. Cate' bidxín dza lá'ayi quégaquie' bönni' judío, ca run cazé' Jesús, guyázié' lu yu'u ga tu'dubë' tu'sëdë' bönni' judío queë' Dios, ate' guzuíné' para ulabë' tu le nazúaj lu guichi lá'ayi. <sup>17</sup> Bulu'dödë' lu në'ë Jesús guichi ga na' nazúaj didza' bë'ë Isaías, bönni' bë'ë didza' uláz queë' Dios. Cate' gusaljé' guichi na', budzöliné' ga nazúaj lu guichi le rnna:

<sup>18</sup> Zóalené' Bö' Lá'ayi queë' Xanru' neda'  
 tu' nubéajé' neda' quez queë'

para usiyönda' bönachi yechi' didza' dxi'a.

Gusól-lë'ë neda' para una' nupa raca zi' ládxi'do'guequi,  
en usiyönda' nupa nadzúngaca, ca gaca ulu'lágaca,  
en úna' bönachi nachul-la lóguequi,  
en usölá' bönachi zoa nu run léguequi zi',

<sup>19</sup> en guna' libán que dza ruzá' ládxé'ë Xanru' Dios quégaca bönachi.

<sup>20</sup> Ní'irö butubé' Jesús guichi na', en bugu'ë le lu né'ë bönni' rapa chi'ë yugu' guichi  
lá'ayi, ate' gurö'ë. Ní'irö yúgu'té nupa nudúbigaca lu yu'u na' gula'ná' Jesús. <sup>21</sup> Gusí lahuë'  
Jesús rë' légaquié':

—Na'a dza ni zóali' lib'ili', rwdxín caz le nazúaj lu guichi ni.

<sup>22</sup> Yúgu'té' gula'nné' dxi'a queë', en bulu'bániné' ca naca didza' dxi'a ru'ë, ate' ta'nné':

—¿Naru' caléga bönni' ni zxí'iné' José?

<sup>23</sup> Jesús rë' légaquié', rnñé':

—Nadxi huëli' neda' lë ni ta'nná bönachi, le rnna: "Li', bönni' ruún bönachi, bun  
cuinu'." Lësca' caní huëli' neda': "Yugu' le biyónitu' benu' Capernaum, ben ca' ga ni  
naca ladzu'."

<sup>24</sup> Gunné' ca' Jesús:

—Le nácaté rea' lib'ili', channö zoë' nu bönni' ru'ë didza' uláz queë' Dios, biti' tun  
bönachi uládz queë' lë' bal. <sup>25</sup> Le nácaté rea' lib'ili', gula'cuá'anu zián nigula uzébi luyú  
Israel yugu' dza ni' zoë' Elías, bönni' bë'ë didza' uláz queë' Dios, cate' ni' biti' gulaj guiój  
idú ca tsonna iz yu' xopa beo', ate' guca gubín luyú na', <sup>26</sup> pero Dios biti' gusól-lë'ë Elías  
na' ga nacuá'anu nigula uzébi nabábagacanu Israel, pero gusól-lë'ë lë' ga na' zóanu tu  
nigula uzébi lu yödzö Sarepta, le nababa yödzö Sidón. <sup>27</sup> Lësca' caní, gula'cuá' zián nupa  
te'e huë' nudzu' ruzödi luyú Israel dza ni' zoë' Eliseo, bönni' bë'ë didza' uláz queë' Dios,  
pero biti' böáquié' nu bönni' nútsë'ë ladaj bönachi Israel na', pero böáquié' tuzé' Naamán,  
bönni' nababé' luyú Siria.

<sup>28</sup> Cate' bila'yönné' didza' ni, gula'lené' yúgu'té bönni' nacu'ë lu yu'u ga na' tu'dubë'  
tu'sëdë' queë' Dios. <sup>29</sup> Ní'irö gula'yasë', en bulu'béajé' Jesús ní'ilö ra' yödzö. Gula'chë'ë  
Lë' ga naca lë'e guí'a guiój ga na' dé ládzagaquié' para ulu'suládzue' Lë' ga naca lë'e guí'a  
guiój na'. <sup>30</sup> Ní'irö gudödë' Jesús gatsaj láhui'lö ga na' nacu'ë, söhuóajtë'.

*Tu bönni' yu'u lë' bö' xihui'*

(Mr. 1:21-28)

<sup>31</sup> Ní'irö guyijé' Jesús yödzö Capernaum luyú Galilea, ate' busédiné' bönachi yugu' dza  
lá'ayi quégäquié' bönni' judío. <sup>32</sup> Bulu'bániné' ca naca le rusédiné' Jesús légaquié', tu'  
bë'ë didza' ca tu bönni' dë lu né'ë yöl-la' unná bë'.

<sup>33</sup> Zóaté' ca' tu bönni' yu'u lë' bö' xihui' lu yu'u ga na' tu'dubë' tu'sëdë' queë' Dios, ate'  
bë'ë zidzaj didza', <sup>34</sup> rnñé':

—¡Busán netu'! ¿Bizxi rálá'tu' quiu', Jesús, bönni' Nazaret? ¿Naru' zo'o para usunítiu'  
netu'? Núnbe'a Li' Nu nacu'. Bönni' Lá'ayi queë' Dios nacu'.

<sup>35</sup> Jesús buzené' le bach bö' xihui' na', en rë' le:

—Busayaj ru'u, en burúaj lu bönni' ni.

Ní'irö bö' xihui' na' gurú'una bönni' na' lu yu lögaca bönachi nacuá' ni'. Burúajtë lu  
bönni' na', en bíti'rö bi ben queë'. <sup>36</sup> Bulu'bániné' yúgu'té', en gulu'ë didza' tuë' len ia'túë',  
ta'nné':

—¿Bizxi didza' ni ru'ë? Len yöl-la' unná bë', en yöl-la' huáca zxön rinná bë'enë' yugu'  
bö' xihui', ate' tu'rúajtë bö' xihui' na'.

<sup>37</sup> Guzé' didza' ca naca queë' Jesús, ate' bila'yöni bönachi yúgu'té yödzö idú gásibi'ilö.

*Ruúné' Jesús xiná'anu nigula queë' Pedro*

(Mt. 8:14-15; Mr. 1:29-31)

<sup>38</sup> Ní'irö guyasë' Jesús, en burúajë' lu yu'u ga na' tu'dubë' tu'sëdë' queë' Dios, ate' guyázië' lidxë' Simón. Xiná'anu nigula queë' Simón na' zóanu ni', en yú'unu xilá, ate' guláta' yuë' lahuë' Jesús únë'-nu. <sup>39</sup> Gubígui'ë Jesús ga na' dënu, ate' bulidzë' huë' xilá na' yú'unu. La' birúajtë xilá na' yú'unu, ate' la' guyástënu, en bë'ënu le gulahuë'.

*Ruúnë' Jesús zián nupa te'e*

(Mt. 8:16-17; Mr. 1:32-34)

<sup>40</sup> Cate' chiribía gubidza, yúgu'të nupa nacuá'len léguequi nupa na' te'e que queéguequi yödzhué' bila'dxín ni', ate' dujuá'gaca léguequi ga na' zoë' Jesús. Lë' guxóa né'ë nupa na' te'e, en bunë' léguequi. <sup>41</sup> Bulu'rúaj ca' zián bö' xihui' yú'ugaca böñachi te'e na'. Ta'bódxí'a bö' xihui' na', ta'nná:

—Li' nacu' zxí'inë' Dios.

Ní'irö Jesús buzenë' le bach yugu' bö' xihui' na', en biti' bë'ë lataj ila'nná, tu' nöñiguequi náquië' Cristo.

*Runë' Jesús libán luyú Galilea*

(Mr. 1:35-39)

<sup>42</sup> Cate' za' rení' ia'tú dza, burúajë' Jesús Capernaum na', ate' guyijë' tu lataj cá'asö. Bila'dxín böñachi zián ni', tu'guílaj Jesús. Cate' bila'dxinë' ga na' zoë', gulé'ëniguequinë' ulu'tsenë' Lë', para cabí uzé'ë ga na' nacu'ë. <sup>43</sup> Ní'irö Jesús gudxë' légaquië', rnnë':

—Run bayudxi tseja' gapa nacuá' ia'zíca'rö yödzö, tsöjena' ca' libán ni' que didza' dxí'a ca rinná bë'ë Dios. Que lë ni na' gusól-lë'ë neda' ni.

<sup>44</sup> Caní guca, benë' libán yugu' yödzö luyú Galilea gapa naca lu yu'u ga tu'dubë' bönni' judío, en tu'sëdë' queë' Dios.

5

*Ta'dzunba' böla zián*

(Mt. 4:18-22; Mr. 1:16-20)

<sup>1</sup> Cate' ni' zoë' Jesús ra' nísado' nazí'i le Genesaret, lu xiyú Galilea, bulu'quída' böñachi zián Lë' para ila'yöni xtídzë'ë Dios. <sup>2</sup> Ní'irö bilé'enë' Jesús chopa bárcodo', zxóagaca lu nísado' ga na' naca ra' yu bidxi, ate' narúajgaquië' bönni' uxzón böla lë'egaca bárcodo' na', en ta'guibë' yözxaj böla quégaquië'. <sup>3</sup> Gurenë' Jesús tu lë'e bárcodo' na', le nequi queë' Simón Pedro, ate' gunábinë' lë' udxígouië' le ia'láti'do' zi'tu' ga naca ra' yu bidxi na'. Ní'irö gurö'ë Jesús lë'e bárcodo' na', en rö'ösë' ca' ni' rusédinë' böñachi zián nacuá' lu yu bidxi na'. <sup>4</sup> Cate' budxi bë'ë didza' Jesús, ní'irö gudxë' Simón, rnnë':

—Busá' bárcodo' ni lu nísado' ga na' rö'ö zila, ate' ni' guli'zalaj yözxaj böla queéli' para sönli'-ba' böla.

<sup>5</sup> Bubi'ë didza' Simón, rë' Jesús:

—Bönni' Usëdi, idú yëla chibentu' dxin, en biti' bi böla nazõnitu'-ba', pero didza' quiu' izáljagara' yözxaj.

<sup>6</sup> Cate' chigula'zaljë' le, gula'zönë' ziántéröba' böla, ate' réquitiqui' iröza' yözxaj böla na'. <sup>7</sup> Ní'irö bulu'lá'a bulu'lui'isinë', bulu'lidzë' luzá'agaquië' nacu'ë ia'tú lë'e bárcodo' na' para zá'gaquië' ilácalenë' légaquië'. Cate' bila'dxinë' ni' bulu'dzé'ë-ba' böla irópatë bárcodo' na', ate' chirequi ulu'huótaj bárcodo' na' lu nisa. <sup>8</sup> Cate' bilé'enë' Simón Pedro lë ni, ní'irö buzúa zxibë' lahuë' Jesús, rnnë':

—Gucuita ga zoa', Xan, tu' naca' bönni' dul-la'.

<sup>9</sup> Caní gunné' tu' radxi ridzöbinë' Pedro ni'a quégacaba' böla zián na' gula'zöngäquië'-ba', en lësca' caní guca quégaca nupa nacuá'len lë'. <sup>10</sup> Guladxi gula'dzöbinë' ca' Jacobo, en Juan, yugu' zxí'inë' Zebedeo, nupa ni nácagaca luzé'ë Simón Pedro na'. Ní'irö Jesús rë' Simón na', rnnë':

—Biti' gádxinu'. Na'a isí lo' ichë'u quia' böñachi ca runu' rizönu'-ba' böla.

<sup>11</sup> Cate' chibulu'sudxinë' yugu' bárcodo' na' ga naca ra' yu bidxi, ní'irö bulu'cá'anë' yúgu'të ni', ate' söjácalenë' Jesús.

*Ruúnë' Jesús tu bönni' ré'enë' huë' nudzu' ruzödi  
(Mt. 8:1-4; Mr. 1:40-45)*

<sup>12</sup> Cate' zoë' Jesús tu lu yödzö ni', bidxinë' tu bönni' ré'ede'enë' huë' nudzu' ruzödi ga na' zoë'. Cate' bíle'enë' Jesús, busudxín lahuë' lu yu, en gúta'yuë' lahuë', rnnë':

—Xan, channö rë'ënu', huáca unu' neda'.

<sup>13</sup> Ní'irö bulí né'ë Jesús, en gudanë' lë'. Rë' lë':

—Ré'ënda'. Gacu' dxi'a.

La' gubídxíté huë' nudzu' queë' bönni' na'. <sup>14</sup> Ní'irö Jesús gunná bë'enë' lë' cuntu nu guíë' ca'. Gudxé' lë':

—Guyéaj, yöjlui'i cuinu' lahuë' bixúz, ate' yöjnödzaj que yudo' le rulu'i nuhuöácu' dxi'a ca gunná bë'ë Moisés, lë na' ulu'i légaquië' chiböácu'.

<sup>15</sup> Guzétérö didza' que yöl-la' huáca queë' Jesús, ate' bulu'dubi bönachi zián ga na' zoë' para ila'yöni xtídzë'ë, en para únë' léguequi, ugüë' yödzöhuë' té'eguequi. <sup>16</sup> Ní'irö buzé'ë Jesús ni', en guyije' tu lataj cá'asö, ate' ni' bulidzë' Dios.

*Ruúnë' Jesús tu bönni' huë' nacú'unië' bin  
(Mt. 9:1-8; Mr. 2:1-12)*

<sup>17</sup> Ia'tú dza, cate' ni' rusédinë' Jesús bönachi, rö'ögäquië' yugu' bönni' yudo' fariseo len bönni' yudo' tu'sédinë' xibá queë' Moisés ni', narúajgaquië' yúgu'të yödzö luyú Galilea, en luyú Judea, en lu yödzö Jerusalén. Naca bë' dë lu né'ë Jesús yöl-la' huáca queë' Xanru' Dios tu' ruúnë' bönachi te'e nacuá' ni'. <sup>18</sup> Ní'irö bönni' nuá'agaquië' le denë' tu bönni' huë' nacú'unië' bin bila'dxinë' ga ni', ate' bulu'guiljë' nacxi ilunë' para ila'gu'ë lë' lu yu'u para ila'guixjë' lë' lahuë' Jesús. <sup>19</sup> Cate' biti' gula'dzölinë' nacxi ilunë', tu' nacuá' bönachi zián ni', gula'benë' ícjo'olö yu'u na', en gula'saljë' ícjo'o na'. Ní'irö bulu'zötje' le denë' bönni' huë' na', ate' gula'guíxjë' lë' gatsaj láhui'lö bönachi ni' lahuë' Jesús. <sup>20</sup> Cate' gúquibe'enë' Jesús ca na' ta'yéajlé'ë Lë', gudxé' bönni' huë' na':

—Bönni', yugu' dul-la' nabágú'u chibuníti lahua'.

<sup>21</sup> Ní'irö gula'sí lógaquië' ta'zá' ládxi'gaquië' bönni' yudo' tu'sédinë' na', en yugu' bönni' yudo' fariseo, ta'nné': “¿Nuzxi caz bönni' ni rnnë' le rucá'ana Dios cá'asö? ¿Nuzxi caz gaca uniti lo dul-la'? Tuzé' Dios runiti lahuë' dul-la'.”

<sup>22</sup> Réquibe'enë' Jesús le ta'zá' ládxi'gaquië', ate' rë' légaquië':

—¿Bizx que rizá' ládxi'li' caní? <sup>23</sup> Biti' naca böniga nu guiésö bönni' ni: “Yugu' dul-la' nabágú'u chibuníti lahua'”, pero naca böniga nu gun ga chasë', en së'e ni'ë. <sup>24</sup> Guna' ga inózili' dë lu na'a neda', Bönni' Guljë' Bönachi, yöl-la' unná bë' uniti lahua' dul-la' luyú ni.

Ní'irö gudxé' bönni' na' nacú'unië' bin, rmnë':

—Li' rea', guyasa. Buá' le denu', en böaj lidxu'.

<sup>25</sup> La' guyásatë' bönni' huë' na' lógaquië', ate' bu'ë lë na' gúti'në', en söhuöjë' lidxë', rigu'ë Dios yöl-la' ba. <sup>26</sup> Gula'nítitiqui'sinë' yúgu'të', ate' gula'gu'ë Dios yöl-la' ba, en tádxisinë' ca', ta'nné':

—Na'a bíle'eru' le run ga rubániru'.

*Jesús rulidzë' Leví  
(Mt. 9:9-13; Mr. 2:13-17)*

<sup>27</sup> Gudödi gulaca yugu' lë ni burúajë' Jesús ni', ate' bíle'enë' tu bönni' uquízxaj lázagaca bönachi, lë' Leví, rö'ë ga na' ruquízxjë', ate' Jesús rë' lë':

—Gudá' neda'.

<sup>28</sup> La' guyásatë' Leví, ate' bucá'anë' yúgu'të, en sa'yéajlenë' Jesús.

<sup>29</sup> Gudödi ni' benë' Leví na' tu gü'i huagu queë' Jesús ga naca lu yu'u lidxë', ate' gula'cu'ë zián bönni' uquízxaj ni' len ia'bal-lë' bönni' ta'bó'lenë' légaquië' tahuë'. <sup>30</sup> Ní'irö

bönni' yudo' tu'sédinë' len yugu' bönni' yudo' fariseo gula'nné' quégaquië' bönni' usëda queë' Jesús, ta'nné':

—¿Bizz que rë'aj rágulenli' yugu' bönni' uquízxaj, en ia'zíca'rë' bönni' dul-la'?

<sup>31</sup> Bubi'ë didza' Jesús, rë' légaquië:

—Yugu' bönni' nacu'ë dxi'a biti' naquíniguequinë' nu un bönachi, pero bönni' té'enë' naquíniguequinë' nu un bönachi. <sup>32</sup> Za'a, calëga ulídzagaca'-në' bönni' tsahui', pero za'a ulídzagaca'-në' bönni' dul-la' para ulu'bí'i ládzi'gaquië'.

### *Ta'nábinë' Jesús ca naca que yöl-la' run gubasa*

(Mt. 9:14-17; Mr. 2:18-22)

<sup>33</sup> Ní'irö bönni' yudo' na' gula'nábinë' Jesús, ta'nné':

—¿Bizz que tunë' gubasa zián luzuí bönni' dá'gaquië' Juan, en tu'lidzë' Dios, ate' tunë' ca' caní bönni' dá'gaquië' yugu' bönni' yudo' fariseo, pero bönni' dá'gaquië' Li' té'aj tahuë?

<sup>34</sup> Jesús rë' légaquië:

—¿Naru' huáctsö gunli' ga ilunë' gubasa bönni' nacu'ë laní que yöl-la' rutsaga na' tsanni ni' bönni' rutsaga né'ë zóalenë' légaquië'? <sup>35</sup> Huadxín dza cate' udúë' bönni' rutsaga né'ë ga nacu'ë. Dza ní'irö ilunë' gubasa.

<sup>36</sup> Ní'irö bucúdzu'ë didza' Jesús ca naca lë ni, ate' rë' légaquië':

—Cuntu nu bönni' ichúguië' tu lari' cubi chinadía, en cuejë' tsötaca' le udé'ë lë'e lari' tèbi. Channö gunë' caní, calégasö gaca ditaj lari' cubi na', pero lári'do' na' birúaj lë'e lari' cubi na' biti' tsöjlöza lari' tèbi na'. <sup>37</sup> Lësca' caní, cuntu nu bönni' riguë'ë xisi uva cubi lu buzudi guídi gula. Channö nu gun caní, xisi uva cubi na' uchöza' buzudi guídi gula, ate' ilalaj xisi uva na', ate' gaca ditaj buzudi guídi gula na'. <sup>38</sup> Que lë ni na' ral-la' cá'aru' xisi uva cubi lu buzudi guídi cubi, ate' irópatë ilaca chí'i. <sup>39</sup> Channö zoa nu rë'aj xisi uva gula, biti' guë'ënité guí'aj xisi uva cubi, tu' rnna: "Nácarö sizxí' xisi uva gula na'."

## 6

### *Bönni' usëda queë' Jesús ta'lecjë' do zxoa' xtila dza lá'ayi*

(Mt. 12:1-8; Mr. 2:23-28)

<sup>1</sup> Cate' naca tu dza lá'ayi quégaquië' bönni' judío, ridödë' Jesús gapa dë yöla zxoa' xtila, ate' bönni' usëda queë' ta'lecjë' do ga dxia zxoa' xtila. Ta'zxúbi'ni ná'agaquië' le, en tahuë'. <sup>2</sup> Ní'irö gula'nábinë' bönni' yudo' fariseo légaquië', ta'nné':

—¿Bizz que runli' le cabí ral-la' gunru' dza lá'ayi?

<sup>3</sup> Bubi'ë didza' Jesús, rë' légaquië':

—¿Naru' cabí nulábanili' ca benë' David cate' gudunë', ate' gula'dún ca' nupa nacuá'len lë'? <sup>4</sup> Guyázië' lu yu'u queë' Dios, en guzxi'ë yöta xtila tu'cu'ë lahuë' Dios, lë na' biti' ral-la' gáguru', pero tuz bixúz dë lataj ilahuë', ate' gudahuë' David le, en bë'ë ca' quéguequi nupa nacuá'len lë'.

<sup>5</sup> Ní'irö Jesús gudxë' légaquië', rnnë':

—Neda', Bönni' Guljë' Bönachi, naca' xani dza lá'ayi.

### *Tu bönni' narequi' né'ë*

(Mt. 12:9-14; Mr. 3:1-6)

<sup>6</sup> Cate' naca ia'tú dza lá'ayi quégaquië' bönni' judío, guyázië' Jesús lu yu'u ga tu'dubë' tu'séde' queë' Dios, en busédinë' nupa nacuá' ni'. Zoë' ca' tu bönni' ni' narequi' né'ë ibëla. <sup>7</sup> Yugu' bönni' yudo' tu'sédinë', en yugu' bönni' yudo' fariseo tu'yúë' Jesús para ila'lé'enë' channö únë' bönni' na' cate' naca dza lá'ayi quégaquië' para ulu'dzólinë' nacxi ulu'zéguë' Lë' didza'. <sup>8</sup> Réquibe'enë' Jesús le ta'zá' ládzi'gaquië', ate' gudxë' bönni' na' narequi' né'ë, rnnë':

—Guyasa. Guzuí gatsaj láhui'lö ni.

La' guyásatë' bönni' na', guzuínë'. <sup>9</sup> Ní'irö Jesús gudxë' yugu' bönni' yudo' na', rnnë':

—Unábitsöqui'da' libí'ili' tu didza'. ¿Naru' dë lataj cate' naca dza lá'ayi gunru' le naca dxi'a o gunru' le ruá' dö? ¿Naru' dë lataj uguéla'ru' yöl-la' na'bán quégaca bönachi, o ugúaru' le?

<sup>10</sup> Ní'irö buyúë' Jesús yúgu'të bönni' na' nacu'ë gásibi'ilë', ate' gudxë' bönni' huë' na':

—Bulí no'o.

Bulí né'ë bönni' na', ate' la' böácatë né'ë na'. <sup>11</sup> Ní'irö gula'lenë' bönni' yudo' na', ate' gulún xtídza'gaquië' la' légacasë' nacxi bi ilunë' queë' Jesús.

*Ribőë' Jesús chínnue' bönni' ilácagaquië' gubáz queë'*

(Mt. 10:1-4; Mr. 3:13-19)

<sup>12</sup> Dza ni' guyijé' Jesús ga naca tu lu guí'ado'. Bulidzë' Dios ni', ate' idú yëla bë'lenë' Dios didza'. <sup>13</sup> Cate' za' reni', bulidzë' yugu' bönni' dá'gaquië' Lë', ate' guróë' chínnue' para iláquië' gubáz queë'. <sup>14</sup> Bulidzë':

Simón, (lë' ca' Pedro),

Andrés, (bóchë'ë Pedro),

Jacobo, en Juan, en Felipe, en Bartolomé,

<sup>15</sup> Mateo, en Tomás,

Jacobo, (zxí'inë' Alfeo),

Simón, (bönni' ru'i ládxë'ë yödzö queë'),

<sup>16</sup> Judas, (bóchë'ë Jacobo),

en Judas Iscariote, (bönni' udödë' Jesús lu ná'agaquië' bönni' ilútië' Lë').

*Ruúné' Jesús bönachi zián*

(Mt. 4:23-25)

<sup>17</sup> Jesús böttjalenë' yugu' bönni' gubáz queë' na' lu guí'ado' na', ate' bila'dxinë' tu ga naca lachi', ga ni' nacu'ë ziánrö ca' bönni' usëda queë', ate' nacuá'len légaquië' bönachi zián narúajgaca yúgu'të yödzö luyú Judea, en yödzö Jerusalén, en yugu' yödzödo' dëgaca ra' nísado' ga na' nacuá' yödzö Tiro, en yödzö Sidón. Bila'dxín bönachi ni ga ni' para ulu'zé nágagaca xtídze'ë Jesús, en ulu'huöáca lu yödzöhuë' té'eguequi. <sup>18</sup> Bulu'huöáquië' ca' bönni' ni' ta'guí'i ta'záquië' lu ná'agaca bö' xihui'. <sup>19</sup> Yúgu'të bönachi zián na' tu'i ládx'i'gaca ila'gán Jesús tu' ruúnë' léguequi len yöl-la' huáca queë'.

*Nupa nácagaca bica' ba, en nupa nácagaca bica' bayechi'*

(Mt. 5:1-12)

<sup>20</sup> Ní'irö buyúë' Jesús yugu' bönni' usëda queë' nacu'ë ni', en gudxë' légaquië':

—Bica' ba libí'ili', réquibe'eli' riyadzjali' le naca queë' Dios, tu' gata' queéli' lataj ga rinná bë'ë Dios.

<sup>21</sup> 'Bica' ba libí'ili' ridunli' le gunnë' Dios queéli', tu' huőljali'.

'Bica' ba libí'ili' ribödxili' tu' bi nadéli'li' le naca tsahui', tu' huadxín dza uzxídxili'.

<sup>22</sup> 'Bica' ba libí'ili', tu' za' dza cate' biti' ila'lé'e bönachi libí'ili' dxi'a, en ulu'béaj libí'ili' ga nacuá', en ila'nné zi' queéli', en ulu'cá'ana cá'asö le nazí'i lali' ca tu le naca xihui' tu' dá'ali' neda', Bönni' Guljë' Bönachi. <sup>23</sup> Bulí'si' xibé dza na', en bulí'dzeja, tu' naca zxön le guequi queéli' yehua' yubá. Lësca' caní gulunë' xuz xtó'ogaca bönachi ni quégacië' bönni' gulu'ë didza' uláz queë' Dios.

<sup>24</sup> 'Bica' bayechi' libí'ili', dë yöl-la' tsahui' queéli', tu' chidé le ruzí'ili' xibé.

<sup>25</sup> 'Bica' bayechi' libí'ili' nuhuőljaj nudzé'eli' na'a, tu' huadunli'.

'Bica' bayechi' libí'ili' ruzxídxili na'a, tu' hu'iniili', en cödxi yéchi'li'.

<sup>26</sup> 'Bica' bayechi' libí'ili' ta'nné yúgu'të bönachi dxi'a queéli'. Lësca' caní gulunë' xuz xtó'oli', gula'nné dxi'a quégacië' bönni' gula'zí' yë'ë, gula'nné nácagacië' bönni' tu'ë didza' uláz queë' Dios.

*Ral-la' idxí'iru' nupa biti' ta'lé'e rë'u dxi'a*

(Mt. 5:38-48; 7:12)

<sup>27</sup> Gunné' ca' Jesús:

—Libi'ili' zóali' ni, en riyónili' xtídza'a, rea' libí'ili': Guli'dxí'i nupa biti' ta'lé'e libí'ili' dxi'a. Guli'gún le naca dxi'a quégaca nupa tu'dí'i libí'ili'. <sup>28</sup> Guli'nabi Dios gaca dxi'a quégaca nupa tua' dö' queéli', en buli'lidzé' Dios inábili'-në' gácalenë' nupa ta'nné' zi' queéli'. <sup>29</sup> Channö nu capa' tsölá'a xagu', buzé ia'tsölá'a ca' xagu'. Channö nu cúa lari' naxóa cúdzu'u, bë' lataj cúa ca' zxo'. <sup>30</sup> Núti'tës nu bi inaba le dë quiu', bunödzaj que, ate' nu cúa le nequi quiu', biti' unabu' le. <sup>31</sup> Ca ré'ënili' ilún böñachi queéli', lësca' caní guli'gún quéguequi.

<sup>32</sup> 'Channö nadxí'isili' nupa nadxí'igaca libí'ili', ¿bizxi yöl-la' ba idéli'li'? Lësca' caní tuné' bönni' dul-la', ta'dxí'iné' nupa nadxí'iguequi légaquië'. <sup>33</sup> Channö runli' le naca dxi'a quégacasö nupa tun dxi'a queéli', ¿bizxi yöl-la' ba idéli'li'? Lësca' caní tuné' bönni' dul-la'. <sup>34</sup> Channö runödzjali' quégaca nupa runli' löza ulu'bí'i queéli', ¿bizxi yöl-la' ba idéli'li'? Lësca' caní tuné' bönni' dul-la', tu'nödzjé' quégaca nupa tun dul-la', tu' tuné' löza ulu'bí'i quégacu' le na' bulu'nödzjé'. <sup>35</sup> Neda' rea' libí'ili': Guli'dxí'i nupa biti' ta'lé'e libí'ili' dxi'a, en guli'gún le naca dxi'a. Buli'nödzaj quégaca böñachi sal-la' biti' runli' löza nu ubí'i queéli'. Channö caní gunli', zxön naca le gata' queéli', ate' gácali' zxí'ini cazé' Dios, Nu nácatérö lo, tu' runé' Lë' le naca dxi'a quégaca böñachi biti' ta'yaza ládxí'gaca, en quégaca böñachi tuá' dö'. <sup>36</sup> Buli'huéchi' ládxí'li' böñachi ca na' runé' Xúzili' Dios, ruhuéchi' ládxé' yúgu'të böñachi.

*Biti' ral-la' ichugu bë'ëru' que luzá'aru'*  
(Mt. 7:1-5)

<sup>37</sup> Gunné' ca' Jesús:

—Biti' ichugu bë'ëli' que luzá'ali', ate' cuntu nu ichugu bë' queéli'. Biti' cuéaj bë'ëli' que luzá'ali', ate' cuntu nu cuéaj bë' queéli'. Buli'niti lo luzá'ali', ate' Dios uniti lahuë' ca' libí'ili'. <sup>38</sup> Buli'nödzaj que luzá'ali', ate' Dios gunnë' queéli'. Ulu'nödzjé' queéli' le ulu'rixé' len tu guí'ina ribixi le naca idú, le naguirö, en naguí gate ga ré', en zóatica' gubá. Ca naca le ruríxili', la' cá'asö urixé' Dios ca' queéli'.

<sup>39</sup> Bucúdzu'ë didza' Jesús, ré' légaquië':

—¿Naru' huácatsö nu bönni' lo chul-la iché'ë ia'túë bönni' lo chul-la? Biti' ca' gaca, tu' ila'bixë' iropë' tu lu yeru. <sup>40</sup> Biti' ca' gácarë' lo tu bönni' usëda ca nu rusëdi lë', pero cate' údxí izëdë' bönni' na', gáquië' ca naca nu na' rusëdi lë'.

<sup>41</sup> '¿Bizx que ruyú' bëbudo' yu'u guiój lahuë' böchi' luzó'o, en biti' rilé'enu' le zxön yu'u guiój lo cazu'? <sup>42</sup> ¿Naru' huácatsö guío'-në' böchi' luzó'o: "Böcha'a, benna lataj cueja' bëbudo' yu'u guiój lo", en biti' rilé'enu' le zxön yu'u guiój lo cazu'? Li', bönni' rulu'isö tsahui' cuinu', guléaj zí'alö le zxön yu'u guiój lo cazu', ate' ní'irö ilé'enu' dxi'a para cueju' bëbudo' yu'u guiój lahuë' böchi' luzó'o.

*Le runru' naca bë' le nácaru'*  
(Mt. 7:17-20; 12:34-35)

<sup>43</sup> Gunné' ca' Jesús:

—Tu yaga dxi'a biti' cuía le naca cá'asö. Lësca' caní, tu yaga guí'a biti' gaca cuía le naca dxi'a. <sup>44</sup> Caní naca, le ribía tu yaga naca bë' ca naca yaga na'. Biti' ruchiburu' le ribía yaga higo lu yaga yötsi', en caléga lu bisequi' yötsi' biti' ruchiburu' le ribía lubá uva. <sup>45</sup> Tu bönni' dxi'a ru'ë didza' dxi'a tu' yu'u le naca dxi'a icja ládxí'da'ahuë', ate' didza' xihui' ru'ë bönni' xihui' tu' yu'u icja ládxí'da'ahuë' le xihui'. Rinné ruá'aru' ca naca le yu'u icja ládxí'do'oru'.

*Chopa ca gaca cuéquiru' xilibi yu'u*  
(Mt. 7:24-27)

<sup>46</sup> Gunné' ca' Jesús:

—¿Bizz que rulídzali' neda', rnnali': "Xantu', Xantu'", pero biti' runli' ca rinná bē'eda' lib'iili'? <sup>47</sup> Ulu'ida' lib'iili' ca naca nu na' za' quia', en riyöni xtídza'a, en run ca rnna xtídza'a. <sup>48</sup> Nu ni naca ca tu bönni', cate' benë' lidxë', guchö'önë' ga rë', en guléquië' xilibi yu'u ga naca lu guiój. Cate' bötaj yegu gubó'o, guchö'öna cuita yu'u na', pero biti' guca uquínnaj le, tu' nulibi ga naca lu guiój. <sup>49</sup> Na'a, nu riyöni xtídza'a, en biti' run ca rnna, nu ni naca ca tu bönni' benë' lidxë' ga naca lu yu cá'asö. Biti' benë' xilibi. Cate' guchö'öna yegu gubó'o cuita yu'u na', la' biguínnajtë, ate' gubixi dërö zö'ö que.

## 7

*Jesús ruúnë'-bi' bi'i huen dxin queë' tu bönni' unná bë'*  
(Mt. 8:5-13)

<sup>1</sup> Cate' Jesús budxi bē'lenë' légaquië' didza' ni, guyázië' yödzö Capernaum. <sup>2</sup> Lu yödzö ni' zoë' tu bönni' Roma rinná bē'enë' bönni' röjáquië' gudil-la. Zóabi' bi'i huen dxin queë' nadxi'ide'enë'-bi', ate' bi'i ni ré'ebi', en chirequi gátibi'. <sup>3</sup> Cate' biyönnë' bönni' ni didza' tu'ë böñachi ca naca queë' Jesús, la' gusól-la té' bal-lë' bönni' gula tu'zéajni'inë' bönni' judío ga na' zoë' Jesús, tsöjóta'yugaquië' lahuë' Lë' guídë' uduhuénë'-bi' bi'i huen dxin queë' na' ré'ebi'. <sup>4</sup> Bönni' gula tu'zéajni'inë' na' bila'dxinë' ga zoë' Jesús, ate' guláta'yuë' lahuë' idú ládxí'gaquië', ta' nné':

—Náquië' lesaca' bönni' na' gunu' queë' lë ni, <sup>5</sup> tu' runë' bal böñachi uládz queëru', en benë' tu yu'u queëru' ga rudúbiru' rusédaru' queë' Dios.

<sup>6</sup> Ni'irö Jesús guyéajlenë' légaquië'. Cate' chizóa ila'dxinë' lidxë' bönni' na', lë' gusól-lë'ë bal-lë' böchi' luzé'ë ga zé'ë Jesús, ate' té' Lë':

—Xan, rnnë' bönni' na': "Biti' ugu'iniu', tu' cabí naca' lesaca' tsáziu' lidxa', <sup>7</sup> en biti' naca' lesaca' guída' ga zu'. Que lë ni na' biti' burúguida' guída' ga zu'. Bé'ësö didza', ate' huöácatébi' bi'i huen dxin quia'. <sup>8</sup> Neda' ca', zoa nu rinná be'e neda', ate' nacu'ë ca' bönni' röjáquië' gudil-la rinná bē'eda' légaquië'. Rea'-në' tuë': Guyéaj ni', ate' rejé'. Rea'-në' ia'túë': Gudá ni, ate' ridé'. Rea'-në' ca' huen dxin quia': Ben dxin ni, ate' runë' dxin na'."

<sup>9</sup> Cate' biyönnë' Jesús didza' ni, bubáninë' queë' bönni' na', ate' buécjë', en gudxë' böñachi na' zá'gaca cúdzu'lë', rnnë':

—Le nácatë rea' lib'iili', cuntu nu bönni' Israel biti' röjxáqui'da'-në' réajlë'ë quia' ca réajlë'ë quia' bönni' ni.

<sup>10</sup> Cate' bulu'dxinë' bönni' na' gusól-lë'ë bönni' rinná bē'enë' bönni' röjáquië' gudil-la, gula'yázië' ga naca lu yu'u lidxë', en bila'lé'enë' chiböácabi' bi'i huen dxin na'.

*Jesús rusubanë'-bi' bi'i bönni' queénu tu nigula uzëbi*

<sup>11</sup> Gudödi guca lë ni, sa'yéajë' Jesús yödzö Naín, ate' dzágagaquië' bönni' usëda queë' Lë', len böñachi zián. <sup>12</sup> Cate' bidxinë' gala' ra' yödzö na', bilé'enë' yugu' bönni' nuá'agaquië'-bi' tubi' bi'i bönni' nati. Söjcáchi'gaquië'-bi'. Bi'i nati na' nácabi' la's duí bi'i queénu tu nigula uzébido'. Zián böñachi uladza queénu nigula uzëbi na' söjácalen-nu. <sup>13</sup> Cate' Xanru' bilé'enë'-nu, buéchi' ládxë'ë-nu, ate' gudxë'-nu:

—Bíti'rö cödxu'.

<sup>14</sup> Ni'irö gubígui'ë Jesús, en gudanë' da'a yaga ga na' dëbi' bi'i nati na'. Gula'bözë' bönni' na' nuá'agaquië'-bi', ate' Jesús gunné':

—Bí'ido', li' rea', guyasa.

<sup>15</sup> Ni'irö bubambi'. Gurö'öbi' bi'i na' zí'alö nátibi', ate' gusí lobi' ruíibi' didza'. Jesús budöde'-bi' lu ná'anu xiná'abi'. <sup>16</sup> Cate' bönni' ni' bila'lé'enë' lë ni, guládxinë' yúgu'té', ate' gula'gu'ë Dios yöl-la' ba, ta'nné':

—Bidixín queéru' tu bönni' lo, ru'ë didza' uláz queë' Dios. Dios caz rácalenë' böñachi queë'.

<sup>17</sup> Guzé didza' ca naca yöl-la' huáca queë' Jesús, ate' bila'yöni böñachi yúgu'të yödzö luyú Judea, en yúgu'të yödzö idú gásibi'ilö.

*Le rinabë' Juan, bönni' buquilë' böñachi nisa  
(Mt. 11:2-19)*

<sup>18</sup> Bönni' dá'gaquië' Juan gula'guíxjöi'inë' lë' yúgu'të lë ni runë' Jesús. Ni' yu'ë Juan lidxi guíë, bulidzë' chopë' bönni' na' dá'gaquië' lë, <sup>19</sup> ate' gusö'l-lë'ë légaquië' ga na' zoë' Jesús para ila'nábinë' Lë', ila'nné': "¿Nacu' Li' Cristo, bönni' ral-la' guídë', o naru' ral-la' ciòtu'-në' bönni' yúbölö?" <sup>20</sup> Cate' bila'dxinë' bönni' na' nasö'l-lë'ë Juan ga na' zoë' Jesús, të' Lë':

—Juan, bönni' buquilë' böñachi nisa, nasö'l-lë'ë netu' para inábitu' Li', innatu': "¿Nacu' Li' Cristo, bönni' na' ral-la' guídë', o naru' ral-la' ciòtu'-në' bönni' yúbölö?"

<sup>21</sup> La' ná'asö ruúnë' Jesús zián nupa te'e, yugu' bönni' huë', en bönni' yú'ugaca légaquië' bö' xihui', ate' zián bönni' lo chul-la busaljë' guiój lógaquië'. <sup>22</sup> Bubi'ë didza' Jesús, re' chopë' bönni' na' nasö'l-lë'ë Juan, rnnë':

—Guli'tséaj, guli'tsöjtixjöi'i-në' Juan ca naca le bilé'eli', en le biyónili'. Tu'lé'enë' bönni' guchul-la lógaquië'. Tu'zé'ë bönni' gulatsjë'. Nuhuöácagaquië' bönni' gü'iguequinë' huë' nudzu' ruzödi. Tu'yönnë' bönni' gula'códzuë'. Nubángaqüië' bönni' gulátië'. Ta'yönnë' bönni' yechi' didza' dxi'a. <sup>23</sup> Bica' ba nu biti' gaca chopá ladxi', ate' za'len neda' sal-la' biti' runa' ca réqui nu na' ral-la' guna'.

<sup>24</sup> Cate' bönni' na' gusö'l-lë'ë Juan bulu'zé'ë ni', gusí lahuë' Jesús rulu'íinë' böñachi ni' ca naca queë' Juan na', rnne':

—¿Bizxi birúajli' yöjyuli' lu lataj cá'asö? ¿Naru' birúajli' yöjyuli' tu gui rutá bö' recja le? <sup>25</sup> ¿Bizxi caz birúajli' yöjyuli'? ¿Naru' birúajli' yöjyuli'-në' tu bönni' nácuë' lari' nazáca'de' e? Nöz quézili' nupa nácugaca lari' nazáca'de' e, en tu'zí xibé yöl-la' tsahui', nacuá' lídxigaquië' bönni' ta'nná bë'ë. <sup>26</sup> ¿Bizxi caz birúajli' yöjyuli'? ¿Naru' birúajli' yöjyuli'-në' tu bönni' ru'ë didza' uláz queë' Dios? Ön, rea' libíili', ate' nayépisétérë' ca nu ru'í i didza' uláz queë' Dios. <sup>27</sup> Náquië' Juan bönni' na' nazúaj lu guichi lá'ayi ca naca queë', rnna:

Buyútsöca', risö'l-la'a-në' gubáz quia', inóruë' ca Li'.

Bönni' ni uchi'ë nöza ga tödu'.

<sup>28</sup> 'Neda' rea' libíili': Gapa nacuá' böñachi, channö zoë' nu bönni' ru'ë didza' uláz queë' Dios, biti' nácarë' lo ca Juan, bönni' na' buquilë' böñachi nisa, pero nu nácatérö cuídi'sö ga rinná bë'ë Dios nayépisétérö ca Juan na'.

<sup>29</sup> Cate' böñachi ni', en bönni' tu'quizxjë' lázagaca böñachi bila'yönnë' didza' ni bë'ë Juan, guléquibe'enë' le naca tsahui' lahuë' Dios, en bila'dilë' nisa lu në'ë Juan, <sup>30</sup> pero yugu' bönni' yudo' fariseo, en bönni' yudo' tu'sédinë' xibá queë' Moisés biti' bila'dilë' nisa lu në'ë Juan, ate' caní guca, bulu'cá'anë' cá'asö le gú'unnë' Dios gunë' quégaquië'.

<sup>31</sup> Gunné' ca' Xanru':

—¿Nacxi uséqui'tseda' böñachi nacuá' dza ni zóaru' na'a? ¿Nacxi caz nácagaquië'?

<sup>32</sup> Nácagaquië' ca bí'ido' ta'guítjabi'. Ta'bó'öbi' lu yé'ëyi, en ta'bó'dxi'abi'. Ta'nnabi' tubi' ia'tubi': "Rucódxitu' queéli' gui, pero biti' ruyá'ali'. Rul-la yéchi'tu', pero biti' ribódxili'."

<sup>33</sup> Caní nácali' tu' bidë' Juan, bönni' buquilë' böñachi nisa, en biti' gudahuë' yöta xtila, en biti' gu'ë xisi uva, ate' rnali' queë': "Tu' xihui' dzaga lë'." <sup>34</sup> Cate' bida' neda', Bönni' Guljë' Bönachi, en rë'aj rahuá', rnali' quia': "Bönni' ni náquië' bönni' huágulë'ë, en bönni' re'jë'. Náquië' luzá'agaquië' bönni' tu'quizxjë', en ia'zíca'rë' bönni' dul-la'." <sup>35</sup> Rea' libíili': Naca bë' nupa nápagaca yöl-la' réajni'i queë' Dios ni'a que le túngaca.

*Le benë' Jesús lidxe' tu bönni' yudo' fariseo*

<sup>36</sup> Tu bönni' yudo' fariseo bulidzë' Jesús gágulenë' lë' tsözxön, ate' guyázië' Jesús lidxe' bönni' na', en gurö'ë rahuë'. <sup>37</sup> Zóanu lu yödzö na' tu nigula udá dzaga, en cate' nözinu

rö'ë rahuë' Jesús lidxë' bönni' yudo' fariseo na', ní'irö bidxinnu ni' nuá'anu tu bôga'do' néquini guiój nazaca' le yudzu tu le rilá' zxixi. <sup>38</sup> Cate' bidxinnu zaca' cûdzu'lë' Jesús, guró'önü xini'ë ribôdxinu. Ní'irö gusí lonu rigú'unu nisa ribôdxinu ni'ë Jesús, en ruzxinu ni'ë len guitsa' ícjanu. Butsaga lonu ni'ë, en gulú'unu ni'ë lë na' rilá' zxixi. <sup>39</sup> Cate' bönni' yudo' fariseo na' nulidzé' Jesús bilé'ené' lë ni, guzá' ládxë'ë, rnnë': "La'tu' náquië' bönni' ni bönni' ru'ë didza' uláz queë' Dios, huéquibe'ené' nuzxi na', en nacxi nácanu nigula ni rigannu Lë', tu' nácanu nigula udá dzaga." <sup>40</sup> Ní'irö Jesús gudxë' bönni' fariseo na', rnnë':

—Simón, dë tu le ral-la' guía' li'.

Bubi'ë didza' bönni' na', rnnë':

—Gunná, Bönni' Usedi.

<sup>41</sup> Jesús rë' lë':

—Zoë' tu bönni' dë dumí queë', ate' nacu'ë chopë' bönni' tál-lë'ë dumí queë'. Tuë' bönni' na' ral-lë'ë queë' lazxjé' que chopa iz, ate' ia'túë' na' ral-lë'ë queë' lazxjé' que chopa beo'. <sup>42</sup> Tu' cabí dë quégäquië' dumí ulu'guízxjé' lë na' tál-lë'ë queë', que lë ni na' buniti lahuë' iropë' lë na' tál-lë'ë queë'. Gunnátsöca' na'a. ¿Núzxilë' bönni' chopë' ni idxí'irönë' bönni' na' buniti lahuë' légaquië'?

<sup>43</sup> Bubi'ë didza' Simón na', rnnë':

—Réquida' neda', bönni' na' rálal're' queë' dumí, lë na' buniti lahuë'.

Jesús gudxë' lë':

—Le nácasö rnnö'.

<sup>44</sup> Ní'irö buécjé' Jesús, ate' ni' ruyúë'-nu nigula na', rë' Simón:

—¿Naru' rilé'enu' nigula ni? Guyázia' lidxu', ate' biti' bennu' quia' nisa quíbida' ni'a, pero nigula ni gulú'unu ni'a nisa ribôdxinu, en buzxinu ni'a len guitsa' ícjanu. <sup>45</sup> Biti' butsaga lo' neda', pero cate' bidxíntea' lidxu', biti' ruzúa dxinu nigula ni, rutsaga lonu ni'a. <sup>46</sup> Biti' gulú'u icja' le za, pero nigula ni gulú'unu ni'a lë na' rilá' zxixi. <sup>47</sup> Que lë ni na' rea' li', dul-la' zián gubága'nu nigula ni, chiguyú'u yöl-la' runiti lo quéguequi, ate' nadxí'ide'enu neda'. Nu na' Dios runiti lahuë' le láti'do'os, láti'do'os nadxí'i Dios nu na'.

<sup>48</sup> Ní'irö Jesús gudxë'-nu nigula na', rnnë':

—Dul-la' gubágú'u chiguyú'u yöl-la' runiti lo que.

<sup>49</sup> Yugu' bönni' na' ta'bó'lené' Jesús tahuë' gula'sí lógaquië' të' luzá'agaquië', ta'nné':

—¿Nuzxi caz bönni' ni, runiti lotsé' ca' dul-la'?

<sup>50</sup> Ní'irö Jesús gudxë'-nu nigula na', rnnë':

—Tu' réajlë'u neda', chibuló' li'. Böaj lidxu', zoa dxi ládxu'u.

## 8

### *Yugu' nigula tácalennu Jesús, ta'gú'unu le tahuë'*

<sup>1</sup> Gudödi gulaca lë ni, gudé' Jesús gapa nacuá' zián yödzö zxön, en yugu' yödzödo', ate' bené' libán ni', en bë'ë didza' que didza' dxi'a ca rinná bë'ë Dios, ate' idxínnuté' bönni' usëda queë' dzágagaquië' Lë'. <sup>2</sup> Bál-lanu nigula buné' Jesús légacanu dzágagacanu ca' Lë'. Bubéajé' bö' xihui' yú'ugaca légacanu, en bugúë' yugu' yödzöhué' güí'iguequinu. Nútsa'nu ládjagacanu María, lënu ca' Magdalena, nigula na' bubéajé' gadxi bö' xihui' yú'ugaca lënu. <sup>3</sup> Juana, nigula queë' Chuza, bönni' yu'u lu në'ë le dë lidxë' Herodes, nútsa'nu ca' ládjagacanu, ate' cá'anqueze Susana nútsa'nu ca' légacanu. Ta'gú'unu nigula ni, en ziánrönü ca', le tahuë' Jesús, en yugu' bönni' usëda queë'. Tu'nödzjanu le dë quégacanu.

*Rucúdzu'ë didza' Jesús ca naca queë' bönni' guz*

*(Mt. 13:1-9; Mr. 4:1-9)*

<sup>4</sup> Bila'rúaj bönachi zián yugu' yödzö ni', en bilá'gaca ga na' zoë' Jesús. Cate' bulu'dubë' ga na' zoë', Lë' bucúdzu'ë didza', rë' légaquië':

<sup>5</sup> —Birúajé' bönni' guz, söjésië' xisedo'. Cate' ni' söjésië', bulu'huöxaj bal-la xisedo' na' ga naca la' nøza, ate' bulu'libi bönachi léguequi. Bila'dxinba' ca' biguínnido', en gulé'ajba'

xisedo' na' dzö'ö la' nöza. <sup>6</sup> Bulu'huöxaj ia'bal-la xisedo' na' lu yu ga rö'ö guiój. Cate' gula'lén xisedo' na', la' gula'bídxítë tu' cabí nalupa' yu na'. <sup>7</sup> Bulu'huöxaj ia'bal-la xisedo' na' ga bulu'lén lubá yötsi'. Tsözxón gula'zxón lubá yötsi' na', en xisedo' na', ate' lubá yötsi' na' bila'röli xisedo' na' gula'lén, en gulún ditaj léguequi. <sup>8</sup> Bulu'huöxaj ia'bal-la xisedo' na' ga naca luyú bëbu. Cate' chigula'zxón, bulu'nödzaj. Tu dxigu' na' bunödzaj ia'tú gayuá'térö xisedo' ca'.

Cate' budxi gunnë' caní Jesús, bë'ë zidzaj didza', rnnë':

—¡Nu zoa nagui, en riyöni ral-la' uzé nagui!

*Bizx que rucúdzu'ë Jesús didza'*

(Mt. 13:10-17; Mr. 4:10-12)

<sup>9</sup> Ní'irö yugu' bönni' usëda queë' Jesús gula'nábinë' Lë', ta'nnë':

—¿Bizxi sa'yéaj lë na' bucúdzu'u didza'?

<sup>10</sup> Jesús gudxë' légaquië':

—Dios ruzéajni'inë' libí'ili' le nagachi' ca rinná bë'ë Lë', pero ia'zíca'rö böñachi ni, ru'ílena' léguequi didza' le rucúdzu'a didza' para cate' ulu'yúë', biti' ila'lé'enë', en cate' ila'yönnë', biti' ila'yéajni'inë'.

*Riguíxjö'ë Jesús le rulu'i le bucúdzu'ë didza'*

(Mt. 13:18-23; Mr. 4:13-20)

<sup>11</sup> Gunnë' ca' Jesús:

—Caní naca le ruluf'i lë na' bucúdzu'a didza'. Xisedo' na' naca xtídzë'ë Dios. <sup>12</sup> Xisedo' na' bulu'huöxaj la' nöza tu'luf'i ca raca quégaca bönni' ta'yönnë' didza' na', pero la' za'të tu' xihui', en rigúa didza' na' bidixín lu icja ládx'i'do'gaquië', para cabí ila'yéajlë'ë, en cabí ulu'lé'. <sup>13</sup> Xisedo' na' bulu'huöxaj lu yu ga rö'ö guiój tu'luf'i ca raca quégagaquië' bönni' ta'yönnë' didza' na', en tu'dzéjanë' ta'zi'ë le, pero nácagaquië' ca xisedo' na' biti' ben lui. Tu chí'isö ta'yéajlë'ë, tu' ridxín le rizi' bë' légaquië', ate' la' tu'huóatë ládx'i'gaquië'. <sup>14</sup> Xisedo' na' bulu'huöxaj ga bulu'lén lubá yötsi' tu'luf'i ca raca quégagaquië' bönni' ta'yönnë' didza' na', en cate' chibila'yönnë', yugu' le tu'luf'i ládx'i'gaquië' yödzölió ni, en yugu' yöl-la'tsahui' que, en yugu' le ta'yaza ládx'i'gaquië' le taca ni, tun nigui légaquië', ate' biti' run dxin didza' na' lu icja ládx'i'do'gaquië'. <sup>15</sup> Xisedo' na' bulu'huöxaj ga naca luyú bëbu tu'luf'i ca raca quégagaquië' bönni', idú ládx'i'gaquië' ta'yönnë' didza' na', en ta'gu'ë tsutsu le lu icja ládx'i'do'gaquië', ate' lu yöl-la' riböza zxön ladxi' tunë' ca rnna didza' na'.

*Rucúdzu'ë didza' Jesús que le rigú'u beni' lídxiru'*

(Mt. 4:21-25)

<sup>16</sup> Gunnë' ca' Jesús:

—Cuntu nu bönni' ruquélë'ë guí', ate' la' rudúsi'të' le guí'ina, en biti' rigu'ë le zxani le ráti'në', pero ruzóë' le xilataj ga naca liná' lu yu'u, ate' nupa ila'yaza ni' ulu'zi' xibé guí' na'. <sup>17</sup> Ilá' lahui yúgu'të le nagachi', ate' gaca bë', ate' irúaj ga liná' yúgu'të le raca balándo'os.

<sup>18</sup> 'Que lë ni na', buli'zé' nágali', tu' huadéli'në' ia'lati' bönni' ruzóë' tsutsu icja ládx'i'da'ahuë' didza' riyönnë', en huazi'rë' xtídzë'ë Dios, pero bönni' biti' ruzóë' tsutsu icja ládx'i'da'ahuë' didza' riyönnë', huadúa didza' na' biyönnë'.

*Xiné'ë Jesús, en yugu' bönni' bôchë'ë*

(Mt. 12:46-50; Mr. 3:31-35)

<sup>19</sup> Ní'irö bila'dxinë' xiné'ë Jesús, en yugu' bönni' bôchë'ë ga na' zoë', pero biti' guca ila'bíguë'ë gala' ga zoë' tu' nacua' böñachi zián ni'. <sup>20</sup> Zoa ni' nu bulidza Jesús, rnna:

—Nacu'ë xinó'o, en yugu' bönni' bôchu'u lö'a. Té'ennë' ilu'ilenë' Li' didza'.

<sup>21</sup> Bubi'ë didza' Jesús, rë' légaquië':

—Nupa ni ta'yöni xtídzë'ë Dios, en tun ca rnna, bönni' ni nácagaquië' ca xiná' caza', en yugu' bönni' böchi' caza'.

*Jesús ribequi dxie' bö' budunu'*

(Mt. 8:23-27; Mr. 4:35-41)

<sup>22</sup> Tu dza gurené' Jesús tu lë'e bárcodo', dzágagaquië' bönni' usëda queë' Lë', ate' Jesús rë' légaquië':

—Udóoditsöca'ru' ia'tsölá'a nísado' ni.

Ní'irö söjácatë'. <sup>23</sup> Tsanni ni' ta'dödë' lu nísado' na', rásië' Jesús. Ní'irö gusí lo recja bö' budunu' lu nísado' na', ate' chirequi huötaj bárcodo' na' zxan nisa, en zoa bönadxi quégaquië'. <sup>24</sup> Ní'irö gula'biguë'ë ga dë' Jesús, en bulu'subanë' Lë', ta'nné':

—¡Bönni' Usedi! ¡Bönni' Usedi! ¡Chirequi huöttjaru' lu nisa!

Cate' bubanë' Jesús, bulidzë' bö' na' recja, en nisa na' riyasa ridxíada', ate' guzóa dxi bö' na' recja, en gurö'ö dxi lu nísado' na'. <sup>25</sup> Ní'irö Jesús gudxë' yugu' bönni' usëda queë', rnnë':

—¿Naru' cabí réajlë'ëli' Dio?

Guládxinë' légaquië', en tu'báninë'. Gulé luzá'agaquië' tuë' ia'túë':

—¿Nuzxi caz bönni' ni? Rinná bé'enë' bö' recja, en nísado', ate' tun ca rnna xtídzë'ë.

*Tu bönni' yödzö Gadara yu'u lë' bö' xihui'*

(Mt. 8:28-34; Mr. 5:1-20)

<sup>26</sup> Ní'irö bila'dxinë' lu xiyúgaquië' bönni' Gadara, le dë ia'tsölá'a nísado' ca dódilö ga dë luyú Galilea. <sup>27</sup> Cate' birúajë' Jesús lë'e bárcodo' na' ga naca lu yu na', dutságuië' tu bönni' yödzö na' Lë'. Chigudzé yu'u bö' xihui' lë', ate' bíti'rö rácuë' lari', en bíti'rö rizóë' lu yu'u, pero nun xilatjë' lu zxan bulóaj ga nádjagaca yero ba. <sup>28</sup> Cate' bönni' na' yu'u bö' xihui' lë' bilë'enë' Jesús, gurödxi'ë zidzaj, ate' buzúa zxibë' lahuë' Jesús, en bë'ë zidzaj didza', rnnë':

—¿Bizxi ral-la'a quiu', Jesús, Zxf'inë' Dios nayépisëtërë'? Ráta'yua' lo' cabí usaca' zi'u neda'.

<sup>29</sup> Caní gunné' tu' chigunná bé'enë' Jesús bö' xihui' na' urúaj lu bönni' na'. Zián luzuí zí'atëlö burixi butúluda' bö' xihui' na' bönni' na', ate' yugu' bönni' yödzö ni' gulúgui'ë lë' du guíë, en bulu'xéjanë' bregui' guíë ni'a në'ë, pero blë'ë yugu' du guíë na', ate' bö' xihui' na' yu'u lë' guché' lë' lu lataj cá'asö. <sup>30</sup> Ní'irö Jesús gunábinë' bö' xihui' na', rnnë':

—¿Bi leu'?

Bö' xihui' na' gudxi Lë':

—Le Zián lea'.

Caní gunná tu' yú'ugaca bö' xihui' zián bönni' na'. <sup>31</sup> Ní'irö yugu' bö' xihui' na' guláta'yugaca lahuë' Jesús cabí isól-lë'ë léguequi lataj chul-la quégaca nupa nátigaca.

<sup>32</sup> Nacuá'aba' ca' tu cō'öba' cuchi zián ta'daba' táguba' lu guí'ado' ni', ate' bö' xihui' na' gula'naba yechi' Jesús gu'ë léguequi lataj tsöjtsú'ugaca cuchi zián na'. Jesús bë'ë léguequi lataj. <sup>33</sup> Bulu'rúaj yugu' bö' xihui' lu bönni' na', en yöjtsú'ugaca cuchi zián na', ate' yöjácaba' cuchi zián na' ga naca tu lë'e guíoj. Yöjbíxigacaba' lu nísado', ate' ni' gula'yépiba' nisa, gulátiba'.

<sup>34</sup> Cate' bila'lé'enë' bönni' tu'yúgaquië'-ba' cuchi zián na' ca na' guca quégacaba', guladxi gula'dzöbinë'. Bulu'zxúnnajë' ni', ate' yöjhüöjgaquië' yöjtíxjöi'iguequinë' nupa nacuá' yödzö na', en nupa nacuá' la' guixi' ni'. <sup>35</sup> Ní'irö bila'rúajë' bönni' yödzö na', yöjyúgaquië' lë na' guca. Cate' bila'dxinë' ga na' zoë' Jesús, bila'lé'enë' bönni' na' gula'yú'u bö' xihui' lë', rö'ë xini'ë Jesús. Nácuë' lari', en dxí'ado' chizóë', ate' guládxinë'.

<sup>36</sup> Nupa na' bila'lé'e lë na' guca gula'guíxjöi'i légaquië' ca guca, böáquië' bönni' na' gula'yú'u bö' xihui' lë'. <sup>37</sup> Ní'irö yúgu'të böñachi zián na' quégaca yödzö nabábagaca Gadara na' guláta'yu lahuë' Jesús urúajë' lu xiyúguequi, tu' tádxinë'. Bubenë' Jesús lë'e

bárcodo' na', en söhuójë'. <sup>38</sup> Bönni' na' bulu'rúaj bö' xihui' na' lë' gúta'yuë' lahuë' Jesús gu'ë lë' lataj tséajlenë' Lë' tsözxón. Gunná bé'enë' Jesús lë' ugá'anë' ni', rnnë':

<sup>39</sup> —Böaj lidxu'. Yöjtíxjöi'i böñachi uládz quiu' yugu' le zxön benë' Dios quiu'.

Bóajë' bönni' na' lidxë', ate' buzé' didza' idú lu yödzö ni' ca naca le zxön benë' Jesús queë'.

*Jesús ruúnë'-bi' bi'i nigula queë' Jairo enca' nigula na' gudannu lari' nácuë'  
(Mt. 9:18-26; Mr. 5:21-43)*

<sup>40</sup> Cate' budxinë' Jesús ia'tsölá'a nísado' na', bulu'dzeja böñachi zián nacuá' ni' ni'a queë' Lë', tu' ta'böza Lë'. <sup>41</sup> Ní'irö bidxinë' Jairo ga zoë' Jesús. Náquië' bönni' lo que yu'u ga tu'dubë' bönni' judío, en tu'sëdë' queë' Dios. Biyéchuë' xini'ë' Jesús, en gúta'yuë' lahuë' tseje' lidxë'. <sup>42</sup> Caní benë' tu' zóabi' tubi' bi'i nigula queë', chirequi gátibi'. Nácabi' bi'i la's dui queë', en yú'ubi' ca chinnu iz. Tsanni ni' sa'yéajë' Jesús, sönögaca tu'quirö böñachi zián Lë'.

<sup>43</sup> Nútsa'nu tu nigula ladaj böñachi zián na', chiguca chinnu iz rigu'i rizáca'nu. Biti' ruhu'i rön queénu que huë' quégaca cázanu nigula, ate' chibutönu dëra le dë queénu, riguízxjanu nupa tu'ún böñachi, pero biti' guca nu bönni' únë'-nu. <sup>44</sup> Gubíga'nu zaca' cúdzu'lë' Jesús, en gudannu rui'i lari' nácuë', ate' la' bu'itë huë' rön queénu.

<sup>45</sup> Ní'irö Jesús gunábinë' nupa nacuá' ni', rnnë':

—¿Nuzxi na' gudán neda?

Gula'dá'bagui'ë yúgu'të'. Ní'irö Pedro, en nupa nacuá'len lë' gulé' Lë', ta'nnë':

—Bönni' Usedi, nacuá' böñachi zián ni, tu'quirö Li', en tu'dxiga' Li', ate' ¿rnnatso':  
“¿Nuzxi na' gudán neda?”

<sup>46</sup> Ní'irö Jesús gunnë':

—Zoa nu gudán neda', tu' gúquibe'eda' birúaj yöl-la' huáca neda' le ruún böñachi.

<sup>47</sup> Cate' réquibe'enu nigula na' nőzinë' Jesús le bennu, ní'irö guzzízinu. Biyéchunu xini'ë' Jesús, en gudíxjöi'inu Lë' lógaca böñachi zián na' bizx que na' gudannu lari' nácuë', en ca na' guca, la' böácatenü. <sup>48</sup> Ní'irö Jesús gudxë'-nu:

—Nigúlado', tu' réajlé'u neda' chiböácu'. Böaj lidxu', zoa dxi ládxu'u.

<sup>49</sup> Cate' ni' ru'ë Jesús didza' ni, bidxinë' tu bönni' ni', zë'ë lidxë' bönni' lo na' que yu'u ga tu'dubë' tu'sëdë' queë' Dios, ate' gudxë' bönni' lo na':

—Chigútibi' bi'i nigúlado' quiu'. Bíti'rö upízxjanu'-në' Bönni' Usedi.

<sup>50</sup> Cate' biyönnë' Jesús lë ni, bubí'ë didza', rë' bönni' lo na':

—Biti' gádxinu'. Guyéajlé'ësö Dios. Huöácabi' bi'i nigúlado' quiu'.

<sup>51</sup> Cate' guyázië' Jesús yu'u na', biti' bë'ë lataj nu tsázalen Lë', pero légacasë' Pedro, en Jacobo, en Juan, enca' xuz xiná'abi' nigúlado' na'. <sup>52</sup> Ta'bödxi nupa nacuá' ni'. Ta'bödxi yeché'ë ni'a queébi' bi'i nigúlado' na', ate' Jesús rë' légaquië', rnnë':

—Bíti'rö códxili'. Biti' nátibi' nigúlado' ni. Rásisibi'.

<sup>53</sup> Bulu'titjë' Lë' tu' nőzguequinë' chinátiibi'. <sup>54</sup> Ní'irö gudélë'ë Jesús ná'abi', en bë'ë zidzaj didza', rnnë':

—Bi'i nigúlado', guyaschi.

<sup>55</sup> Ní'irö bu'u bö' naca cázabi', bubanbi', ate' la' guyásatëbi'. Jesús gunná bé'enë' légaquië' ilu'ë le gágubi'. <sup>56</sup> Bulu'báninë' xuz xiná'abi', pero Jesús gunná bé'enë' légaquië' cuntu nu ilé' ca na' guca.

*Risól-lë'ë Jesús bönni' usëda queë' tsöjéngaqüië' libán*

*(Mt. 10:5-15; Mr. 6:7-13)*

<sup>1</sup> Ní'irö butubë' Jesús idxínnutë' bönni' usëda queë', ate' budödë' lu ná'agaquië' yöl-la' huáca, en yöl-la' unná bë' para ulu'béajë' bö' xihui' yú'ugaca böñachi, en ulu'únë' nupa

te'e. <sup>2</sup> Gusól-lë'ë légaquië' tsöjéngaqüië' libán ca rinná bë'ë Dios, en tsöjhuéngaqüië' nupa te'e. <sup>3</sup> Jesús gudxë' légaquië':

—Biti' bi guá'ali' para la' nöza, calëga xiyágado', en calëga yöxa, en calëga yöta, en calëga dumí, en biti' ixoa yenli' chopla lari'. <sup>4</sup> Bítitës yu'u ga tsú'uli', guli'sóa ni' cate' uzá'aröli' yödzö na'. <sup>5</sup> Gáti'tës ga biti' ilún bönachi libí'ili' bal, buli'rúaj yödzö na', en guli'cu'bí bëchtö da' lë'e lábali', le ulu'i légaquië' nagá'ana xíguia' nabága'gaquië'.

<sup>6</sup> Ní'irö bila'rúajë' bönni' usëda queë' na'. Gula'dödë' yúgu'të yödzödo', tunë' libán que didza' dxi'a, en tu'únë' nupa te'e yúgu'të lu yödzö na'.

*Ca gútië' Juan, bönni' buquile' bönachi nisa*

(Mt. 14:1-12; Mr. 6:14-29)

<sup>7</sup> Biyönnë' Herodes, bönni' rinná bë'ë, ca naca yúgu'të le runë' Jesús, ate' gurö'ë böninga, tu' ta'nná bönachi:

—Juan na' chibubanë' lu yöl-la' guti.

<sup>8</sup> Ia'bal-lë' ta'nné':

—Chibulé'ë Elías, bönni' na' bë'ë didza' uláz queë' Dios.

Ia'bal-lë' ta'nné':

—Chibubanë' tu bönni' bítsë'ë yugu' bönni' gulu'ë didza' uláz queë' Dios dza ni'te.

<sup>9</sup> Herodes na' gunné':

—Juan na' burixa' yenë'. ¿Nuzxi caz bönni' ni, riyönda' queë' runë' yugu' lë ni?

Rizóa ribö'ë Herodes ilé'enë' Jesús.

*Rugahué' Jesús chi-un gayuá' bönachi*

(Mt. 14:13-21; Mr. 6:30-44; Jn. 6:1-14)

<sup>10</sup> Cate' bulu'dxinë' bönni' gubáz nasól-lë'ë Jesús ga zoë' Lë', bulu'siyönnë' Lë' yúgu'të le gulunë'. Ní'irö guché'ë Jesús légaquië' quez. Yójáquië' tu lataj cä'asö lu xiyú yödzö Betsaida. <sup>11</sup> Cate' chinóziguequi bönachi lë ni, yöjnóguequi Lë', ate' Jesús benë' léguequi bal, en bë'lenë' léguequi didza' ca rinná bë'ë Dios, ate' bunë' nupa te'e.

<sup>12</sup> Cate' chizá' ral-la dza na', idxínnutë' bönni' gubáz queë' Jesús gula'bíguë'ë ga zoë', en të' Lë':

—Busól-la' bönachi ni tsöjaca gapa dë yödzödo', en gapa dë yú'udo' idú gásibi'ilö para tsöjtílagaquië' gapa ulu'gá'anë', en bi ilahuë', tu' naca lataj cä'asö ga ni zóaru'.

<sup>13</sup> Ní'irö Jesús rë' légaquië':

—Guli'gu'ë libí'ili' le ilahuë'.

Të' Lë':

—Gáyu'sö yöta xtílado' dë, en chópasöba' böla dëba' queëtu', o ¿naru' huayéajtsatu' tsöjó'outu' le ilágugaca bönachi zián ni?

<sup>14</sup> Nacu'ë ca chi-un gáyu'ë bönni' ga na'. Ní'irö Jesús gudxë' yugu' bönni' usëda queë', rnnë':

—Guli'gún ga ila'bö'ë tu cö' huéajgaquië', ilaca ca chi-un huéajgaquië'.

<sup>15</sup> Caní gulunë', ate' gula'bö'ë yúgu'të'. <sup>16</sup> Ní'irö gudélë'ë Jesús gayu' yöta xtila na', en chópaba' böla na', ate' guchisa lahuë' ruyú'ë lúzziba, en rë' Dios: "Xclenu'." Ní'irö buzxuzxjë' léguequi, en bë'ë quégaquië' bönni' usëda queë' para ulu'cu'ë lógaca bönachi na'. <sup>17</sup> Gulahuë' yúgu'të', en bulu'huö'ljanë'. Gudödi na' bulu'tubë' yugu' bizxaj bugá'ana, ate' bulu'líë' idú chinnu ga'böra.

*Rnnë' Pedro Jesús náquië' Cristo*

(Mt. 16:13-19; Mr. 8:27-29)

<sup>18</sup> Tu dza tsanni ni' zoë' quez Jesús, rulidzë' Dios, bila'dxinë' bönni' usëda queë' ga zoë', ate' gunábinë' légaquië', rnnë':

—¿Nuzxi ta'nná bönachi naca' nedá'?

<sup>19</sup> Bulu'bi'ë didza', ta'nné':

—Ta'nná bal-la bönachi nacu' Juan, bönni' buquilë' bönachi nisa. Ta'nná ia'bal-lë' nacu' Elías, ate' ta'nná ia'bal-lë' nacu' tu bönni' bítsë'ë yugu' bönni' gulu'ë didza' uláz queë' Dios dza ni'te, en nubanë' lu yöl-la' guti.

<sup>20</sup> Ní'irö Jesús gunábinë' légaquië', rnnë':

—Názxi lib'ili', ¿nuzxi rnnali' naca'?

Bubi'ë didza' Pedro, rnmë':

—Nacu' Cristo nasól-lë'ë Dios.

*Riguíxjö'ë Jesús ca si' ilútië' Lé'*

(Mt. 16:20-28; Mr. 8:30-9:1)

<sup>21</sup> Ní'irö Jesús gúxdidë'ë légaquië', en gunná bé'enë' légaquië' cuntu nu ilé' Nu náquië' Lé'. <sup>22</sup> Ní'irö rë' légaquië':

—Run bayudxi qui'i saca'a neda', Bönni' Guljë' Bönachi, zián le gaca quia'. Ulu'cá'anë' neda' cá'asö yugu' bönni' gula tu'zéajni'inë', en yugu' bixúz unná bë', en yugu' bönni' yudo' usedi. Ilútië' neda', pero dza tsonna dza Dios usubanë' neda' lu yöl-la' guti.

<sup>23</sup> Gudxë' ca' yúgu'të':

—Channö rë'ënë' nu bönni' té'ë neda', ral-la' uzóë' tsölá'alö le dë queë', en gáquië' ca tu bönni' sa'yéajé' söjtë'ë lë'e yaga cruz, ate' ní'irö gaca té'ë neda'. <sup>24</sup> Núti'tës bönni' ruf'i ládxë'ë gun chi'ë yöl-la' na'bán queë', unítië' le, pero channö unítië' yöl-la' na'bán queë' tu' dë'ë neda', bönni' ni gata' yöl-la' na'bán idú queë'. <sup>25</sup> Biti' bi uzi'ë xibé tu bönni' channö utubé' queë' yúgu'të le dë yödzölió ni, pero unítië' tsaz yöl-la' na'bán queë'. <sup>26</sup> Nu bönni' rutu'ínë' neda', en rutu'ínë' ca' xtídfa'a, lësca' neda', Bönni' Guljë' Bönachi, utu'ida' bönni' na' cate' huöda' idinná bë'a, dzágagaca neda' yöl-la' zxön queë' Xuza', en yöl-la' zxön quégaquië' gubáz lá'ayi queë' Dios. <sup>27</sup> Le nácatë rea' lib'ili', nacuá' bal-lë' bönni' ni biti' ilátië' cate' ila'lé'erönë' dza idinná bë'ë Dios.

*Ridzá' ca riná' lahuë' Jesús*

(Mt. 17:1-8; Mr. 9:2-8)

<sup>28</sup> Cate' bizá'a xunu' gubidza gudödi bë'ë Jesús yugu' didza' ni, ní'irö guché'ë Pedro, en Juan, en Jacobo, ate' gurené' tu lu guí'ado', ga na'bulidzë' Dios. <sup>29</sup> Tsanni ni' ruf'ilenë' Dios didza', bidzá' ca riná' lahuë', ate' böáca chiguíchido'os lari' nácuë', en guyëpi yösa bení'.

<sup>30</sup> Ní'irö bulu'lui'i lógaquië' chopë' bönni' ga zoë' Lé' tu'ilenë' Lé' didza'. Nácagaquië' Moisés, en Elías. <sup>31</sup> Chopë' ni gula'yépë' yösa bení', ate' tu'ilenë' Jesús didza' ca si' uzé'ë yödzölió ni, gátië' lu yödzö Jerusalén. <sup>32</sup> Sal-la' chirácada' ilásië' Pedro, en nupa nacuá'len lë', bayudxi gula'ná'asë', ate' bila'lé'enë' yöl-la' bení' queë' Jesús, en chopë' na' nacuá'lenë' Lé'. <sup>33</sup> Cate' bulu'zé'ë chopë' na' ga na' zoë' Jesús, ní'irö Pedro gudxë' Lé':

—Bönni' Usedi, dxi'a naca zóaru' ni. Gúntsöca'tu' tsonna yu'u lága'do', tu quiu', ia'tú queë' Moisés, en ia'tú queë' Elías.

Biti' réquibe'enë' Pedro bi na' rnnë'. <sup>34</sup> Tsanni ni' ru'ë didza' ni, la' gurö'ötë böaj le bugacu légaquië', ate' guládxinë' tu' nacu'ë lu böaj na'. <sup>35</sup> Ní'irö biyöñ chi'i Nu ruf'i didza' lu böaj na', rnna:

—Bönni' ni náquië' Zxi'ina'. Nadxi'ida' Lé'. Buli'zé' nágali' didza' gu'ë.

<sup>36</sup> Cate' budxi bë' didza' chi'i na', tuzë' Jesús nagá'analenë' légaquië'. Ta'cuá' dxíë' bönni' usëda queë', ate' dza na' cuntu nu gulé' ca naca le bila'lé'enë'.

*Ruúnë' Jesús bi'i bönni' yu'u bö' xihui' lëbi'*

(Mt. 17:14-21; Mr. 9:14-29)

<sup>37</sup> Cate' za' ren'f' ia'tú dza bulu'huötjë' Jesús, en bönni' na' dzágagaquië' Lé' lu guí'ado' na', ate' bila'rúaj bönachi zián dutsgagaca Jesús. <sup>38</sup> Ní'irö bë'ë zidzaj didza' tu bönni' nútsë'ë ladaj bönachi zián na'. Bulidzë' Jesús, rnnë':

—Bönni' Usedi, ráta'yua' lo' duyú'-bi' bi'i bönni' quia' tu' nácabí' bi'i la's dui quia'.

<sup>39</sup> Yu'u bö' xihui' lëbi' le run ga ribödxi'abi', en ruxízida' lëbi'. Run ga ribía bidxina' zxöna'

ruá'abi', en rurixi rutúluda' lëbi', ate' catu caz rusán lëbi'. <sup>40</sup> Gúta'yua' lógaquié' bönni' usëda quiu' ulu'béajé' le, pero biti' gula'zéqui'né'.

<sup>41</sup> Bubi'ë didza' Jesús, rnné':

—Libi'ili', biti' réajle'ëli', en nachixi ícjali'. ¿Gáca'xte ral-la' sóalena' libi'ili', en guá' ilena' queéli'? Diju'a-bi' bi'i bönni' quiu' ni.

<sup>42</sup> Cate' ni' zá' abi' ribíga'bi' ga na' zoë' Jesús, burixi butúluda' bö' xihui' na' lëbi'. Jesús gudil-lé' bö' xihui' na', en buné'-bi' bi'i bönni' na'. Ní'irö bugu'ë-bi' lu né'ë xúzibi'.

<sup>43</sup> Bulu'bani yúgu'té bönnachi ni' ca naca yöl-la' huáca zxön queé' Dios.

### *Jesús ru'ë didza' leyúbölö ca si' ila'zönë' Lë'*

(Mt. 17:22-23; Mr. 9:30-32)

Tsanni ni' tu'bani yúgu'té bönnachi ca naca le zxön runé' Jesús, Lë' gudxé' yugu' bönni' usëda queé', <sup>44</sup> rnné':

—Guli'cú'u icja nágali' didza' ni, tu' si' ulu'dödë' neda', Bönni' Guljé' Bönachi, lu ná'agaca bönnachi.

<sup>45</sup> Biti' gula'yéajni'iné' bönni' usëda queé' didza' ni, tu' cabí ruí'iné' Dios légaquié' lataj ila'yéajni'iné', pero biti' bulu'rúguiné' ila'nábiné' Jesús ca naca didza' ni.

### *Nu naca lo*

(Mt. 18:1-5; Mr. 9:33-37)

<sup>46</sup> Ní'irö gula'sí lógaquié' bönni' usëda queé' Jesús tu'ë didza'. Ta'nábini luzá'agaquié' tuë' ia'túe' núxxilé' gáquié' lo. <sup>47</sup> Réquibe'ené' Jesús le ta'zá' ládxí'gaquié', ate' gudélë'ë-bi' tubi' bï'ido', en buzóë'-bi' cuité'. <sup>48</sup> Ní'irö rë' légaquié':

—Núti'tés bönni' guné' bal tu bï'ido' caní tu' néquibi' quia' neda', neda' caz guné' bal, ate' nu bönni' guné' neda' bal, guné' ca' bal Xuza' nasól-lé'ë neda'. Que lë ni na' bönni' nútsé'ë ládjali' nácaré' nöxaj ladxi', bönni' ni náquié' lo.

### *Nu biti' ridá'baga' rë'u, rácalen rë'u*

(Mr. 9:38-40)

<sup>49</sup> Ní'irö Juan bulidzé' Jesús, rnné':

—Bönni' Usedi, bilé'etu'-në' tu bönni' ruguné' dxin Lo' rubéajé' bö' xihui', ate' gunná bé'etu'-në' tu' cabí dë'ë rë'u.

<sup>50</sup> Jesús rë' lë':

—Biti' inná bé'eli'-në', tu' rácalen rë'u nu biti' ridá'baga' rë'u.

### *Jesús ridil-lé' Jacobo, en Juan*

<sup>51</sup> Cate' chizá' gal-la' dza ral-la' gátié' Jesús, en huëpë' yehua' yubá, benë' bayudxi tsejé' Jerusalén. <sup>52</sup> Gusól-lé'ë yugu' bönni' gubáz queé' ila'nóruë' ca Lë', ate' yójáquié' tu yódzödo' quégaca bönnachi Samaria para tsöjpá'agaquié' ga ugá'ané' Jesús tu yëla.

<sup>53</sup> Yugu' bönni' yódzö na' biti' guluné' Jesús bal tu' chinaca queé' sa'yéajé' Jerusalén.

<sup>54</sup> Cate' Jacobo, en Juan, bönni' usëda queé' Jesús, bila'lé'ené' lë ni, të' Lë':

—Xan, ¿narú' inábatsöca'tu' huötaj guí' le za' yehua' yubá, en usuniti légaquié', guntu' ca na' benë' Elías?

<sup>55</sup> Buécjé' Jesús, en gudil-lé' légaquié', rnné':

—Biti' nőzili' bizxi bö' dzágui libi'ili'. <sup>56</sup> Bida' ni neda', Bönni' Guljé' Bönachi, calëga para usunitia' yöl-la' na'bán quégaca bönnachi, pero bida' dusölä' bönnachi.

Ní'irö yójáquié' yódzö yúbölö.

### *Nupa té'ëni tsöjácalen Jesús*

(Mt. 8:19-22)

<sup>57</sup> Tsanni ni' yú'ugaquié' nöza Jesús, en yugu' bönni' dá'gaquié' Lë', bidxiné' tu bönni' yódzö Jerusalén, en rë' Jesús:

—Xan, ré'ënda' sá'lena' Li' gáti'tés ga tseju'.

<sup>58</sup> Jesús rë' lë':

—Yúgu' böza', nacuá' zxan bulóaj quégacaba', ate' biguínnido', dxíagaca xcá'agacaba', pero neda', Bönni' Guljë' Bönachi, biti' dë quia' ga gáta'a uzí ládx'a.

**59** Ní'irö Jesús gudxë' tu bönni' yúbölö, rnnë':

—Gudá' neda'.

Bönni' ni gudxë' Lë':

—Xan, benna neda' lataj huöja' lidxa' ga idxinrö dza chibucácha'a-në' xuza'.

<sup>60</sup> Jesús gudxë' le':

—Bé' lataj bönni' chizóa ilátië' ulu'cáchë'ë nupa chinati quégaquie', pero li', guyéaj, yöjén libán ca inná bë'ë Dios.

<sup>61</sup> Ní'irö bidxinë' ia'túë' ca', en rë' Jesús:

—Xan, ré'ënda' sá'lena' Li', pero benna neda' lataj tseja' tsöjzégacada'-në' didza' di'a dza quia'.

62 Jesús gudxë' lë':

—Núti'tés bönni' ru'i ládxé'ë le raca yödzölió náquië' ca tu bönni' rugá'ané'-ba' bëdxi, en ruyúé' zaca' cídzulé'. Nu run caní biti' naca lesaca' tsaza ga rinná bë'ë Dios.

10

Risöl-lë'ë Jesús tsónnalalaj yu' chië' bönni' tsöjénqaquië' libán

<sup>1</sup> Gudödi gulaca yugu' lë ni, guroë' Xanru' ia'tsónnalalaj yu' chié' bönni' usëda queé', ate' gusól-lë'ë légaquië' chopa huéajgaquië' para ila'nóruë' ca Lë', en tsójáquië' yúgu'të yödzö, en yödzödo' gapa chizóa tödë' Lë'. <sup>2</sup> Gudxe' légaquië':

—Le nácatë, dëda' dxin quia', le naca ca tu la' yëla zxön ga nu tsöjlapa', pero nabábasö huen dxin quia' nacuá'. Que lë ni na', guli'gáta'yu lahuë' Dios, náquië' Xan la' yëla na', isól-lë'ë yugu' huen dxin ga naca la' yëla queé'. <sup>3</sup> Guli'tséaj na'a. Buli'yútsöca', neda' risöl-la'a libí'ilí', nácalí' ca yugu' bö'cu' zxila' söjácaba' ládjagacaba' bö'cu' guí'a sínia'. <sup>4</sup> Biti' guá'ali' yöxa j dumí, en caléga buzudi yöta, en biti' guá'ali' ia'tú cö' xiráchuli', en biti' tselí' para güí'ilenli' böñachi didza' gapa naca la' nøza. <sup>5</sup> Gáti'tës yu'u ga tsú'uli', innalí': "Le ribequi dxi ladxi' gaca quégaca böñachi nacuá' yu'u ni." <sup>6</sup> Channö zoa ni' nu bönni' si'ë yöl-la' ribequi dxi ladxi', ugá'analen lë' le ribequi dxi ladxi' na' inábali', pero channö cabí zoa ni' nu bönni' caní, ugá'analen libí'ilí' le ribequi dxi ladxi' na' inábali'.

<sup>7</sup> Guli'gá'ana yu'u ga na' tsú'uli', en guli'gui'aj guli'gagu bi ilunné' queéli', tu' udzöli quézine' bönni' huen dxin le gahué'. Biti' tódili' yu'u yu'u. <sup>8</sup> Gáti'tés yödzö ga tsú'uli', ate' ilún libí'ili' bal, guli'gagu le ulu'cu'ë loli'. <sup>9</sup> Buli'ún nupa te'e nacuá' yödzö na', en guli'guié léguequi: "Chibidxín le rinná bë'ë Dios ga zóali'." <sup>10</sup> Gáti'tés yödzö ga tsú'uli', channö cabí ilún libí'ili' bal, guli'rúaj, tsöjsóali' la' nöza que yödzö na', en innali': <sup>11</sup> "Béchtö que ládzali' le da' lë'e lábatu' ruquínnajtu', le rulu'i nabága'li' xíguia', pero ral-la' inözili' lë ni, chibidxín le rinná bë'ë Dios ga zóali'." <sup>12</sup> Neda' rea' libí'ili', cate' idxín dza ichúguié' Dios quégaca bönachi, ila'gui'i ila'zaca'rö bönachi yödzö ni' ca ila'gui'i ila'zaca' bönachi yödzö Sodoma, nupa ni' busunítië' Dios.

*Le gaca quégaca nupa biti' ulu'bí'i ládxi'gaca*

(Mt. 11:20-24)

<sup>13</sup> Gunné' ca' Jesús:

—Bica' bayechi' libí'ili', bönachi yödzö Corazín. Bica' bayechi' libí'ili', bönachi yödzö Betsaida. La'tu' gulaca lu yödzö Tiro, en lu yödzö Sidón yugu' yöl-la' huáca rubani ca yugu' le bena' ga zóali', dza ni'te ulu'bí'i ládxí'gaquië' bönni' ni', ate' ilácuë' lari' cá'assö, en ila'gu'ë dö ícjagaquië', le ulu'igaca chibulu'bí'i ládxí'gaquië'. <sup>14</sup> Que lë ni na', cate' idxín dza ichúguië' Dios quégaca bönachi, qui'i sáca'röli' ca ila'gu'i ila'záquie' bönni' yödz Tiro, en yödz Sidón. <sup>15</sup> Libí'ili', bönachi Capernaum. Réquili' tsázali' yehua' yubá. Huójtali' tsójtsázali' lataj chul-la quégaca nupa nátigaca.

<sup>16</sup> Ní'irö Jesús gudxë' yugu' bönni' usëda queë', rnnë':

—Nu ruzé nagui libíili', ruzé nagui ca' neda', ate' nu rucá'ana libíili' cá'asö, rucá'ana ca' neda' cá'asö, en nu rucá'ana neda' cá'asö, rucá'ana ca' cá'asö Xuza', nasö'l-lé'ë neda'.

*Bönni' yójéngaqüie' libán tu'dxiné' ga zoë' Jesús*

<sup>17</sup> Cate' tsónnalalaj yu' chië' bönni' na' gusö'l-lé'ë Jesús bulu'dxiné' ga zoë' Lë', bönni' na' yójéngaqüie' libán, ta'nné':

—Xan, tun bö' xihui' ca rnñatu' cate' ruguntu' dxin Lo'.

<sup>18</sup> Jesús gudxé' légaquié':

—Neda' bilé'eda' Satanás tu' xihui', gubixi zxan lúzxiba ca run yösa, le riyaza luyú.

<sup>19</sup> Buli'yútsöca', neda' nudöda' lu ná'ali' yöl-la' unná bë' para gaca söngacali'-ba' bëla sínia', en xöjnö', en biti' bi gaca queéli', ate' ucúl-lali' yöl-la' unná bë' que tu' xihui', nu biti' rilé'e rë'u dxi'a. <sup>20</sup> Na'a, buli'dzeja, calégasö tu' tun bö' xihui' ca rnñali', pero tu' nuzúajaca lali' lu guichi ni' yehua' yubá.

*Rudzéjané' Jesús*

(Mt. 11:25-27; 13:16-17)

<sup>21</sup> La' ní'isö rudzéjané' Jesús, dzáguié' Dios Bö' Lá'ayi Lë', rnñé':

—Rigu'a Li' yöl-la' ba, Xuza', nacu' Xani yehua' yubá, en Xani luyú ni, tu' bucáchu'u yugu' lë ni lógaquié' bönni' táquié' yenni', en bönni' ta'yéajni'iné', pero bulu'iguequinu'bí' bí'ido' ca naca. ¡Ca' gaca, Xuza', tu' caní guyaza ládxu'u!

<sup>22</sup> Ní'irö gunnë':

—Yúgu'të budödë' Xuza' lu na'a. Cuntu nu bönni' nőziné' Nu náquié' Zxf'iné' Dios, pero tuzë' Dios Xuz nőziné', ate' cuntu nu nözi Nu náquié' Dios Xuz, pero tuzë' Zxf'iné' nőziné', ate' inózigaca ca' nupa na' Zxf'iné' ré'ënë' ulu'fné' léguequi Xuzë'.

<sup>23</sup> Ní'irö Jesús buyúë' yugu' bönni' usëda queë', en rë' légaquié':

—Bica' bágaca nupa ta'lé'e le rilé'eli' libíili', <sup>24</sup> tu' rea' libíili': Zián bönni' gulu'ë didza' uláz queë' Dios, enca' bönni' gula'nná bë'ë, gulé'ënné' ila'lé'enë' le rilé'eli', pero biti' bila'lé'enë' le. Gulé'ënné' ila'yönnë' le riyónili', pero biti' bila'yönnë' le.

*Tu bönni' Samaria, bönni' tsahui'*

<sup>25</sup> Ní'irö guyasë' tu bönni' yudo' usedi, en para si' bë'ë Jesús, gunábiné' Lë', rnñé':

—Bönni' Usedi, ¿bizxi ral-la' guna' para idéli'da' yöl-la' na'bán idú?

<sup>26</sup> Jesús rë' lë':

—¿Bizxi caz nazúaj lu guichi lu xibá queë' Moisés? ¿Nacxi rusaca' quiu' lë na' rulabu'?

<sup>27</sup> Bubi'ë didza' bönni' na', rnñé':

—Caní rnna: “Idxí'nu' Xanu' Dios idú ládxu'u, en len idú icja ládxido'o, en len idú yöl-la' run quiu', en len idú yöl-la' réajni'i quiu', ate' idxí'nu' bönni' luzó'o ca nadxí'i cuinu'.”

<sup>28</sup> Jesús rë' lë':

—Dxi'ado' bubí'u didza'. Ben caní, ate' gata' quiu' yöl-la' na'bán na'.

<sup>29</sup> Tu' gú'unne' bönni' na' ubéaj dxi'a cuiné', rë' Jesús:

—¿Nuzxi na' bönni' luzá'a?

<sup>30</sup> Bubi'ë didza' Jesús, rë' lë':

—Buzé'ë tu bönni' Jerusalén, rudínnié', sa'yéajë' yödzö Jericó. La' nöza ni' gula'zönë' gubán lë'. Gula'gúë' lari' nácuë', en guluné' lë' huë'. Ní'irö bulu'zé'ë ni', en nucá'ana-gaquié' lë', chirati cazé'. <sup>31</sup> Ní'irö gudödë' tu bixúz la' nöza ni'. Cate' bilé'enë' bönni' huë' na', tsölä'alö gudödë'. <sup>32</sup> Gudödë' ca' ni' tu bönni' nababé' zxi'ini xi'sóé' Leví, yugu' bönni' na' tunë' dxin que yudo'. Cate' bilé'enë' lë', tsölä'alö ca' gudödë'. <sup>33</sup> Lësca' yu'ë tu bönni' Samaria nöza na', ate' bidxiné' gala' ga dë' bönni' huë' na'. Cate' bilé'enë' lë', buéchi' ládxé'ë lë'. <sup>34</sup> Gubígui'ë ga na' dë', ate' gulu'ë le za, en xisi uva nál-la lu huë' queë', ate' buchólinë' le lari'. Ní'irö budxië' lë' cídu'ba' böa' queë', en bu'ë lë' yu'u ga ta'dxiné' bönni' yú'ugaquié' nöza, ate' ni' gudapa chi'ë lë'. <sup>35</sup> Cate' za' rení' ia'tú dza, en chizóa

uzé'ë bönni' Samaria na', guléajé' lázxjaro' que chopa dza, le bucá'ané' lu në'ë bönni' xan yu'u na', en rë' lë': "Gudapa chi'ë bönni' ni, en channö utóu' ia'lati' dumí, ubi'a neda' quiu' cate' huöda'." <sup>36</sup> Na'a, ¿nacxi runi li? ¿Núzxilé' bönni' yonna ni gúquié' bönni' luzé'ë bönni' na' gulu'ë dö' bönni' gubán queë'?

<sup>37</sup> Bubi'ë didza' bönni' yudo' usedi na', rë' Jesús:

—Bönni' na' buéchi' ládxé'ë lë'.

Ní'irö Jesús gudxé' lë'.

—Guyéaj na'a, yójén ca' li'.

### *Le bené' Jesús lídxigacanu Marta, en María*

<sup>38</sup> Ní'irö bu'ë nöza Jesús, ate' bidxiné' tu yódzödo' ga ni' tu nigula lënu Marta guché'ënu Lë' lídxinu. <sup>39</sup> Marta ni zóanu nigula zxílanu lënu María, ate' María na' gurö'ötënu ga naca xini'ë Jesús, en ruzé' náganu xtídzé'ë. <sup>40</sup> Marta na' bubi bugu'ínu, zián dxin runnu, ate' gubiga'nu ga na' zoë' Jesús, en rénu Lë':

—Xan, ¿narú' cabí rui'i ládxí'tso' neda' tu' nucá'anabi' bi'i zxila' ni neda', ate' tuza' runa' dxin? Gudxi-bi' gácalenbi' neda'.

<sup>41</sup> Bubi'ë didza' Jesús, rë'ë-nu:

—Marta, Marta, ruúbi rugu'ide'enu', en zián le rui'i ládxu'u runu'. <sup>42</sup> Tuz le run bayudxi nu gun, ate' María ni guröbi' lë na' nácatérö dxí'a, ate' lë na' guröbi' biti' udúa queébi'.

## 11

### *Ca ral-la' ulídzaru'-në' Dios* (Mt. 6:9-15; 7:7-11)

<sup>1</sup> Tu dza ni' Jesús rulidzé' Dios. Cate' budxi bë'lené' Dios didza', tuë' bönni' usëda queë' rë' Lë', rñnné':

—Xan, busedi netu' ulídzatu'-në' Dios gü'ilentu'-në' didza', ca bené' Juan, busédiné' bönni' dá'gaquië' lë'.

<sup>2</sup> Ní'irö Jesús rë' légaquië':

—Cate' ulídzali'-në' Dios gü'ilentli'-në' didza', guli'ná:  
Xuztu', zu' yehua' yubá, gá'ana zxön Lo'.

Gudá inná bë'u.

Gaca ca raza ládxu'u Li' luyú ni, ca na' raca yehua' yubá.

<sup>3</sup> Benna le gágutu' na'a dza.

<sup>4</sup> Buniti lo netu' dul-la' nabága'tu'  
ca netu' ca' runitti lotu' nupa tua' dö' queétu'.  
Biti' gu'u lataj si' bë' tu' xihui' netu',  
pero busölá netu' lu na' nu ruá' dö'.

<sup>5</sup> Jesús rë' ca' légaquië':

—Channö zoë' nu bönni' ládjali', en zoë' böchi' luzé'ë, en channö huidé' ga na' zoë' guluhuëla, ate' ulidzé' lë', inné': "Bócha'a, benna quia' tsonna yöta xtila <sup>6</sup> tu' si' bidxiné' quia' böchi' luzá'a, zé'ë zi'tu', pero biti' bi dë le gu'a-në' gahué'." <sup>7</sup> ¿Naru' ubi'ë didza' caní bönni' na' zoë' yu'u, guíe' lë': "Biti' utsó'o neda' tu' chinayayaj yu'u, en chidélengacabi' bi'i quia' neda', ate' biti' gaca chasa' bi gunna' quiu'?" <sup>8</sup> Neda' rea' lib'ili': Sal-la' biti' chasé' bi unödzjé' queë' tu' náquië' böchi' luzé'ë, pero chasé', en unödzjé' queë' idutë le riquinné' para cabirö upízzjané' lë'. <sup>9</sup> Que lë ni na' rea' lib'ili': Guli'naba, ate' Dios gunné' queéli'. Guli'quilaj, ate' idzoli queéli'. Buli'lidza ra' yu'u, ate' tsalaj queéli'. <sup>10</sup> Nu rinaba, rizi' que, ate' nu riguilaj, ridzoli que, ate' nu rulidza ra' yu'u, ralaj que.

<sup>11</sup> 'Channö zoë' nu bönni' ládjali', en náquië' xuz, ate' channö zxí'iné' inábibi' lë' yöta xtila, ¿narú' unödzjatsé' queébi' guiój? Channö inábibi' lë' tuba' böla, ¿narú' unödzjatsé' queébi' bëla? <sup>12</sup> Channö inábibi' lë' dxita que böra, ¿narú' unödzjatsé' queébi' xöjnö'?

<sup>13</sup> Caní naca, nácali' libí'ili' huiá' dö', pero nőzili' unődzjali' quégacabi' zxi'inili' le naca dxí'a. Nácatérö löza Xúzili' zoë' yehua' yubá gunnë' queéli' Dios Bö' Lá'ayi, nóloli' inábili' Lé'.

*Ta'nné' runë' dxin Jesús len yöl-la' huáca que tu' xihui'*

(Mt. 12:22-30; Mr. 3:19-27)

<sup>14</sup> Tu dza bubéajé' Jesús bö' xihui' yu'u tu bönni', le run ga biti' raca inné'. Cate' burúaj bö' xihui' na', bë'ë didza' bönni' na' biti' guca inné', ate' bulu'bani bönnachi nacuá' ni'.

<sup>15</sup> Bal-la bönnachi nacuá' ni' ta'nná:

—Len yöl-la' huáca que tu' xihui' Beelzebú, xángaca bö' xihui', rubéajé' yugu' bö' xihui' na'.

<sup>16</sup> Ia'bal-la bönnachi na' gulé'ëni ila'zí' bë' Jesús, ate' gula'nabi Lë' gunë' tu le gaca bë' le za' yehua' yubá. <sup>17</sup> Réquibe'ené' Jesús le ta'zá' ládx'i'gaquié', ate' rë' légaquié':

—Gáti'tës ga ta'nná be'e bönnachi luzé'eguequi, channö ila'rúaj choplö la' laguequisö bönnachi na', ila'niti. Channö ila'rúaj choplö bönnachi nacuá' tu yu'u, údxi quéguequi.

<sup>18</sup> Lësca' caní raca que Satanás, tu' xihui', nazí'i le ca' Beelzebú. Channö ila'rúaj choplö nupa dá'gaca le, ¿nacxi gaca idía' yöl-la' unná bë' que? ¿Rnnátsali' na'a: Len yöl-la' huáca que Beelzebú rubéaja' yugu' bö' xihui'? <sup>19</sup> Channö neda', len yöl-la' huáca que Beelzebú rubéaja' yugu' bö' xihui', ¿nuzxi runna quégaca nupa dá'gaca libí'ili' yöl-la' huáca tu'béaj yugu' bö' xihui'? Que lë ni na', le tun nupa ni naca bë' nachíxili'. <sup>20</sup> Channö neda', len yöl-la' huáca queé' Dios rubéajgaca' bö' xihui', le nácatë chibidxín le rinná bë'ë Dios ga zóali'.

<sup>21</sup> 'Cate' tu bönni' nál-la dë lu në'ë le rudi'inë', en rapa chi'ë lidxe', naca chi'i dërö le dë queé'. <sup>22</sup> Na'a, channö zë'ë ia'tué' bönni' nál-latérë' ca lë', en ucul-lë' lë', ní'irö cuë' yúgu'të le rudi'inë', lë na' ruzxöni ládxë'ë, ate' quisié' le dë queé' bönni' na'.

<sup>23</sup> 'Nu biti' rácalen neda', ridá'baga' neda'. Nu biti' rutúbilen neda', rusilasi nu na'.

*Ca naca que bö' xihui' rudxín xilataj*

(Mt. 12:43-45)

<sup>24</sup> Gunné' ca' Jesús:

—Cate' rirúaj bö' xihui' lu bönni', ridá gapa nabídx, riguilaj ga uzí' ladxi'. Channö cabí idzöli que, inná: "Huöja' xilatja' ga ni' birúaja'." <sup>25</sup> Cate' rudxín ni', röjxaca' bönni' na', náquié' ca tu yu'u chinulúa, en chinabá'a para nu tsöjsóa ni'. <sup>26</sup> Ní'irö reaj, en röjxí' ia'gadxi bö' xihui', nácagacatérö xihui' ca le, ate' ta'yú'u bönni' na'. Na'a, le raca queé' bönni' na' nayáli'térö ca le guca queé' zí'alö.

*Le naca bica' ba le naca idú*

<sup>27</sup> Tsanni ni' ru'ë Jesús didza' ni, tu nigula nútsa'nu ladaj bönnachi zián na' bë'ënu zidzaj didza', rnnanu:

—Bica' ba nigula na' biá'anu Li' lë'ënu, en bica' ba ca' luchú'unu ga na' gúdxu'u.

<sup>28</sup> Bubi'ë didza' Jesús, gunnë':

—Nácagacatérö bica' ba nupa ta'yöni xtídzë'ë Dios, en tun ca rnna.

*Ta'nábiné' Jesús gunë' le gaca bë' nuzxi náquié'*

(Mt. 12:38-42; Mr. 8:12)

<sup>29</sup> Tsanni ni' ta'biga' bönnachi zián ga zoë' Jesús, gusí lahuë' ru'ë didza', rnnë':

—Ta'nába bönnachi tuá' dö' ni guna' le gaca bë' ga za' yöl-la' huáca quia', pero biti' bi le gaca bë' ila'lë'enë'. Tuz le gaca bë' ca na' guca queé' Jonás ila'lë'enë'. <sup>30</sup> Ca na' guca queé' Jonás, gúquié' tu le naca bë' lögaca bönnachi yödzö Nínive, lësca' caní gaca quia' neda', Bönni' Guljë' Bönachi, gaca' tu le gaca bë' lögaca bönnachi dza ni zóaru' na'a. <sup>31</sup> Cate' idxín dza ichúguié' Dios quégaca bönnachi ila'gu'i ila'zaca', en uchi'a usöröe' bönnachi dza ni zóaru' na'a, Dios uchisë'-nu nigula gunná bë'ënu bönnachi dza ni'te luyú ni' dë tsölá'a ga ridödi gubidza beo' ziaga, ate' le bennu ulu'i nabága'gaca bönnachi ni xíguia', tu' bídanu lënu, birúajnu ga naca zi'tu' para uduzé' náganu didza' réajni'i bë'ë Salomón,

bönni' gunná bē'enë'bönachi Israel, pero na'a, zoa' neda' ni, en nayépisétéra' ca Salomón na'. <sup>32</sup> Lësca' caní, Dios uchisë' bönni' gula'cu'ë yödzö Nínive cate' idxín dza ichugu bē'ë quégaca bönnachi, en uchi'a usöröö' bönnachi dza ni zóaru' na'a, ate' le gulunë' ulu'i nabága'gaca bönnachi ni xíguia', tu' bulu'bí'ládxi'gaquië' bönni' Nínive cate' bila'yönnë' libán benë' Jonás, ate' na'a zoa' neda' ni, en nayépisétéra' ca Jonás na'.

*Le rigú'u bení' lu icja ládxi'do'oru'*

(Mt. 5:15; 6:22-23)

<sup>33</sup> Gunné' ca' Jesús:

—Cate' nu ruquela' guí', biti' rigú'u le ga nagachi', en biti' rudusi' le guí'ina, pero ruzóa le xitsá' ga liná', para uzení' quégaca nupa ta'yú'u yu'u na'. <sup>34</sup> Guiój loru' naca ca tu le rigú'u bení' lu icja ládxi'do'oru'. Channö guiój lo' naca dxi'a, idúteo' yudzu le naca bení', pero channö naca xihui' guiój lo', idúteo' yudzu le naca chul-la. <sup>35</sup> Ben chi'i cuinu' na'a, para cabí huöáca chul-la lë na' rigú'u bení' lu icja ládxi'do'o. <sup>36</sup> Caní naca, channö idúteo' nalísinu' le naca bení', en biti' bi zóalen li' le chul-la, yúgu'të ilé'enu' dxi'a ca raca cate' ruzeni' quiu' guí'.

*Jesús ruzégui'ë yugu' bönni' yudo' didza'*

(Mt. 23:1-36; Mr. 12:38-40; Lc. 20:45-47)

<sup>37</sup> Cate' budxi bē'ë didza' ni Jesús, tu bönni' yudo' fariseo bulidzë' Lë' para tsöjtágulenë' lë'. Cate' guyázië' Jesús lidxë' bönni' yudo' na', gurö'ë rahuë'. <sup>38</sup> Cate' bönni' yudo' fariseo na' bilé'enë' Lë', bubáninë' tu' cabí gudibi né'ë Jesús cate' si' gahuë'. <sup>39</sup> Xanru' rë' lë':

—Libí'ili', bönni' yudo' fariseo, riguibi cuinli' ca riguibili' láhuilögaca le ré'aji ráhuili', pero lu icja ládxi'do'oli' ruhuídili', en rizá' ládxi'ili' le ruá' dö'. <sup>40</sup> Libí'ili', bönni' biti' réajni'ili'. ¿Naru' cabí nőzili', Nu ben le zoa láhuisö ben ca' le yu'u lë'elö? <sup>41</sup> Na'a, guli'gún gun le dë queéli', ate' ní'irö huöáca dxi'a yúgu'të le dë queéli'.

<sup>42</sup> Bica' bayechi' libí'ili', bönni' yudo' fariseo. Riguízxjali' que yudo' tu cö' huéaj tu' chi cö' le rizi'ili' que xöhuéaj, en que guixi' ruda, en quégaca guixi' cuando', pero rudödisili' le naca tsahui', en yöl-la' nadxf'i queéli' Dios. Yugu' lë ni run bayudxi gunli', en biti' ucá'anali' ia'zica' lë na' runli'.

<sup>43</sup> Bica' bayechi' libí'ili', bönni' yudo' fariseo. Ré'ënili' cö'öli' gapa naca lo lu yu'u ga rudúbili' rusédali' queë' Dios, en ré'ënili' ulu'lidza bönnachi libí'ili' ba zxön gapa naca láhuilöguequi bönnachi.

<sup>44</sup> Bica' bayechi' libí'ili', bönni' yudo' usedi, enca' libí'ili', bönni' yudo' fariseo, bönni' ruluf'isö tsahui' cuinli', tu' nácali' ca nácagaca yero ba quégaca nupa nátigaca le cabí nalá'gaca, ate' ta'dá bönnachi láhuigaca yero ba na', en biti' téquibe'e.

<sup>45</sup> Ní'irö bubi'ë didza' tu bönni' yudo' usedi raquië' xibá queë' Moisés. Rë' Jesús:

—Bönni' Usedi, cate' rnno' caní, netu' ca' runu' zi'.

<sup>46</sup> Jesús rë' lë':

—Bica' bayechi' ca' libí'ili', bönni' yudo' usedi rácaldi' xibá queë' Moisés, tu' rusubága'-gacali' bönnachi tu yua' zi'i le cabí gaca nu guá', pero libí'ili' caléga láti'do'os biti' ruláhui'li' le len ná'alí'.

<sup>47</sup> Bica' bayechi' libí'ili', tu' richísali' biquitaj quégaca ba ga nagáchi'gaquië' bönni' gulu'ë didza' uláz queë' Dios, ate' gulútië' xuz xtó'oli' légaquië'. <sup>48</sup> Caní naca, runli' ba nalí runli' tuz le gulunë' xuz xtó'oli' tu' gulútië' xuz xtó'oli' na' légaquië', ate' libí'ili' richísali' biquitaj quégaca ba ga nagáchi'gaquië'.

<sup>49</sup> Que lë ni na', lu yöl-la' réajni'i queë', Dios gunné' caní: "Isól-la'a queéli' bönni' ilu'ë didza' uláz quia', en yugu' bönni' gubáz quia', ate' yugu' bönni' ni, bal-lë' gútili', en ia'bal-lë' cuia na'li' légaquië'." <sup>50</sup> Caní guné' Dios tu' uchi'a usöröö' quégaca bönnachi dza ni zóaru' na'a, ni'a que rön quégaca yúgu'të bönni' gulu'ë didza' uláz queë', bönni' ni' bétigaca bönnachi légaquië' cate' gusí lo rata' yödzölió, <sup>51</sup> ga gusí lo nu bëti Abel, ga bidxitë gulútië' Zacarías, bönni' na' gulútië' gatsaj láhui'lö ga dë bucugu lá'ayi ga na'

tu'zégui'gaquië'-ba' böa' bédxido' lahuë' Dios, en ga dë lataj lá'ayi. Que lë ni na', rea' lib'i'ili', Dios uchúguë' quégaca bönachi dza ni zóaru' na'a, ni'a que rön quégaca yúgu'të bönni' na' gulútië' xuz xtó'oli' légaquië'.

<sup>52</sup> 'Bica' bayechi' lib'i'ili', bönni' yudo' usedi, rácali' xibá queë' Moisés. La' lib'i'isili' dë lu ná'ali' zxí'ini guíë que lataj ga ta'dzoli bönachi yöl-la' réajni'i. Lib'i'ili' biti' riyázali', ate' ruzág'a'l' xinózigaca nupa té'ëni ila'yaza.

<sup>53</sup> Cate' Jesús budxi bélénë' légaquië' didza' ni, bönni' yudo' tu'sédinë', en yugu' bönni' yudo' fariseo gula'léde'enë' Lë', ate' gula'sílógaquië' ta'naba yúdxide'enë' Lë' ca naca zián le taca, <sup>54</sup> en tu'béajë' Lë' didza' para gaca ulu'zéguië' Lë' didza' ni'a que didza' ubi'ë.

## 12

### *Rusédinë' Jesús ca naca yöl-la' rulu'isö tsahui' cuini*

<sup>1</sup> La' dza na' bulu'dubi zián gayuá' bönachi ga zoë' Jesús ga bidxitnë ta'ròlisö lutzé'eguequi bönachi na'. Ní'irö gusí lahuë' Jesús rë' yugu' bönni' usëda queë' cazë', rnnë':

—Guli'gún chi'i cuinli' que le naca ca cúa zi que yöta xtila quégagaquië' bönni' yudo' fariseo, le naca yöl-la' rulu'isö tsahui' cuini quégagaquië'. <sup>2</sup> Biti' bi dë le naca balándo'os le cabí ilá' lahuí, en biti' bi dë le nagachi' le cabí gaca bë'. <sup>3</sup> Que lë ni na', yúgu'të le chigunnáli' ga naca chul-la, ila'yöni bönachi ga naca lu bení', ate' didza' bél'eli' bagáchi'sö ga guzóa lu yu'u nayabaj, gaca libán que ga naca lógaca bönachi.

### *Nu ral-la' gádxiru'*

(Mt. 10:28-31)

<sup>4</sup> Gunné' ca' Jesús:

—Bócha'ado', rea' lib'i'ili': Biti' gádxili' bönni' tútigaquië' bönachi, ate' tödi na' bíti'rö bi gaca ilunë' quéguequi. <sup>5</sup> Ulu'ida' lib'i'ili' nu ral-la' gádxili'. Guli'gadxi Nu na' gaca ugúa yöl-la' na'bán queéli', en tödi na' dë lu né'ë yöl-la' unná bë' chú'unë' lib'i'ili' lu guí' gabilia. Ön, rea' lib'i'ili', guli'gadxi Nu na'.

<sup>6</sup> 'Túti'gaquië'-ba' gáyu'ba' biguínido' len chopa dumí lárido'. Biti' ral-la ládxë'ë-ba' Dios tu biguínido' na'. <sup>7</sup> Lësca' caní, yúgu'të guitsa' ícjali' nabábagaca lahuë' Dios. Que lë ni na', biti' gádxili'. Nazáca'téröli' lib'i'ili' ca zianba' biguínido'.

### *Nupa ta'nnasö néquiguequi queë' Jesús*

(Mt. 10:32-33; 12:32; 10:19-20)

<sup>8</sup> Gunné' ca' Jesús:

—Rea' lib'i'ili': Yúgu'të bönni' ta'nné' néquiguequinë' quia' neda' lógaca bönachi, lësca' neda', Bönni' Guljë' Bönachi, innia' néquiguequinë' quia' lógaquië' gubáz lá'ayi queë' Dios, <sup>9</sup> ate' bönni' ta'dá'bagüë'ë néquiguequinë' quia' lögaca bönachi, lësca' neda' tá'baga'a néquiguequinë' quia' lógaquië' gubáz lá'ayi queë' Dios.

<sup>10</sup> 'Yúgu'të nupa bi ila'nné quia' neda', Bönni' Guljë' Bönachi, gaca uniti lahuë' Dios lëguequi, pero nu inné' zi' queë' Dios Bö' Lá'ayi, biti' uniti lahuë' Dios nu na'.

<sup>11</sup> 'Cate' ila'chë'ë lib'i'ili' gapa naca lu yu'u ga tu'dubë' bönni' judío, en tu'sëdë' queë' Dios, en lógaquië' bönni' ulu'chi'a ulu'söröë' lib'i'ili', en lógaquië' bönni' dë lu ná'agaquië', biti' ubi ugu'i'ili' nacxi gunli' o bizxi didza' ub'i'ili', o bizxi innali'. <sup>12</sup> La' dza ná'asö usédinë' Dios Bö' Lá'ayi lib'i'ili' le ral-la' innali'.

### *Huáca gun yöl-la' tsahui' queéru' ga gal-la ládxì'ru'-në' Dios*

<sup>13</sup> Tu bönni' nútse'ë ladaj bönachi zián na' rë' Jesús, rnnë':

—Bönni' Usedi, gudxë' bócha'a gunné' uláz quia' le guta' queë' xuztu'.

<sup>14</sup> Jesúr rë' lë':

—Bönni'. ¿Naru' zoa nu buzóa neda' ca nu uchi'a usörö lib'i'ili', o nu gun gatsaj le dë queéli'?

<sup>15</sup> Ní'irö Jesúś gudxë' bönachi nacuá' ni', rnnë':

—Buli'yútsöca'. Guli'gún chi'i cuinli' para cabí uhuídi'li'. Le uzi'ë xibé nu bönni' biti' nácasö le zián le dë queé'.

<sup>16</sup> Ní'irö Jesúś bé'lenë' légaquië' didza', bucúdzu'ë didza', rnnë':

—Zoë' tu bönni' rile'enë' yöl-la' tsahui' queé', ate' runödzjada' gulapa lu xiyúë'.

<sup>17</sup> Ní'irö guzá' ládxë'ë bönni' na', rnnë': "¿Nacxi guntsa"? Biti' dë ga gapa chi'a le rulá' quia?". <sup>18</sup> Ní'irö rnnë': "Caní guna'. Uquínna jgaca' yu'u ga rapa chi'a le rulá' quia', ate' guna' yugu' yu'u zxónterö ca', ate' gapa chi'a le rulá' quia' ni', len yugu' le dë quia'.

<sup>19</sup> Ní'irö gaca guíë cuina': Chidéda' quia' zián le chinutuba', le gáhuida' zián iz. Uz' ládx'a'a. Guí'aj gahua', en udzéjada'." <sup>20</sup> Ní'irö Dios rë' lë': "Li', bönni' biti' bi nözinë'. Na'a dzö' gátiu'. Na'a, ¿nuzxi caz guequi que, lë na' chinutubu?" <sup>21</sup> Caní raca queé' bönni' rutubë' la' queézë' yöl-la' tsahui', en biti' runë' le naca ca yöl-la' tsahui' lahuë' Dios.

### *Dios run chi'ë yugu' bönachi queé'*

(Mt. 6:25-34)

<sup>22</sup> Gudödi ni' Jesúś gudxë' yugu' bönni' usëda queé', rnnë':

—Que lë ni na' rea' libí'ili': Biti' ubi uguí'ili' ni'a que le guí'aj gáguli', lë na' nabánili', o ni'a que lari' gáculi'. <sup>23</sup> Nácarö lesaca' yöl-la' na'bán queéli' ca le ráguli', ate' nácarö lesaca' idú le nácali' ca lari' ráculi'. <sup>24</sup> Buli'yutëz ca raca quégacaba' boíquiaj. Biti' tázaba', en biti' ta'lápaba', en biti' nacuá' quégacaba' ga ilún chi'iba' le rulá' quégacaba', pero Dios rugahuë' légacaba'. ¿Naru' cabí nazáca'téröli' libí'ili' ca yugu' biguinnido? <sup>25</sup> ¿Nuzxi caz bönni' ládjali' gaca gunë' ga soë' ibanë' ia'tú chi'ido'os tu' ruúbi ruguí'i ládx'i'da'ahuë'? <sup>26</sup> Que lë ni na', channö cabí gaca gunli' lë ni naca cuídi'sö, ¿bizx que ruúbi ruguí'ili' ni'a que le naca zxónterö?

<sup>27</sup> 'Buli'yutëz ca ta'zxón yöpdo'. Biti' tun du lari', en biti' taba lari', pero rea' libí'ili', biti' gúcarö lachi le gúcuë' Salomón ca nácagaca yöpdo' ni, sal-la' gúta'da' yöl-la' tsahui' queé'.

<sup>28</sup> Channö Dios runë' lachi yöd guíxi' do' rö' gaca na'a la' guixi', ate' cuxö' huidzaj ila'guë' léguequi lu guí', ¿naru' cabí gunë' le nácarö dxi'a queéli', libí'ili' na' biti' réajlë'eli' Dios idú ládx'i'li'? <sup>29</sup> Que lë ni na', biti' gü'i ládx'i'li' le ral-la' gáguli', en le ral-la' guí'jali', en biti' ubi uguí'i ládx'i'do'oli'. <sup>30</sup> Yúgu'të lë ni ta'guilaj bönachi yödzölió ni, pero chinöz quézinë' Xúzili' Dios le riquínili'. <sup>31</sup> Guli'gü'i ládx'i'li' tsú'uli' ga rinná bë'ë Dios, ate' yúgu'të lë ni cu'ë xinöza queéli'.

### *Yöl-la' tsahui' rigú'uru' yehua' yubá*

(Mt. 6:19-21)

<sup>32</sup> Gunné' ca' Jesús:

—Biti' gádxili', libí'ili' na' nácali' bö'cu' zxíla'do' quia'. Nabábasili' zóali', pero raza ládxë'ë Xúzili' Dios gunnë' queéli' lataj tsú'uli' ga ni' rinná bë'ë Lë'. <sup>33</sup> Guli'guti' le dë queéli', en buli'nödzaj quégaca bönachi yechi'. Caní gaca, gunli' queéli' yöxa dumí le cabí gaca ditaj, en cú'uli' yöl-la' tsahui' na' yehua' yubá le biti' ubidxi udú, ga ni' biti' idxinë' bönni' gubán, en biti' usunítiba' böa'do' le. <sup>34</sup> Ga ni' dë yöl-la' tsahui' queéli', ni' gü'i ládx'i'li' idixinli'.

### *Ral-la' sóaru' ban ladxi'*

<sup>35</sup> Gunné' ca' Jesús:

—Guli'soa sina', en guli'quela' guí' le uzení' queéli'. <sup>36</sup> Guli'gaca ca bönni' huen dxin ta'bözë' dza huödë' xángaquië', bönni' sa'yéajë' laní que yöl-la' rutsaga na', para cate' udxinë', en ulidzë', la' ila'sáljatë' queé' tsu'ë. <sup>37</sup> Bica' bágaca huen dxin na' ila'cu'ë ban ladxi' cate' huödë' xángaquië'. Le nácatë rea' libí'ili', upá'a cuinë' xángaquië' na', ate' gunë' ga ila'bö'ë ga ilahuë', ate' cu'ë le ilahuë'. <sup>38</sup> Sal-la' huödë' cate' chiral-la o idú guluhuela, channö idixáquië' légaquië' nacu'ë ban ladxi', bica' bágaca huen dxin na'.

<sup>39</sup> Lë ni ral-la' inózili'. La'tu' nòzinë' xan yu'u bizxi dza huadxinë' bönni' gubán, usubán ládxë'ë, en biti' gu'ë lataj bönni' na' udxíe' yero lidxë', para cabí cuanë' le dzö'ö lidxë'.

<sup>40</sup> Que lë ni na', guli'soa ban ladxi' ca' libíili', tu' huöda' neda', Bönni' Guljë' Bönachi, tu dza biti' ribőzali' neda'.

*Bönni' huen dxin tsahui', en bönni' huen dxin biti' náquië' tsahui'*

(Mt. 24:45-51)

<sup>41</sup> Ni'irö Pedro gunábinë' Jesús, rnnë':

—Xan, ¿naru' reo' nétu'sö lë ni rucúdzu'u didza', o reo' ca' caní yúgu'të bönachi?

<sup>42</sup> Rë' Xanru' lë':

—¿Nuzxi na' bönni' huen dxin tsahui', en réajni'inë', dë lu në'ë uláz queë' xanë'? Bönni' ni, xanë' udödë' lu në'ë lidxë' para cate' gála'rö ilahuë' bönni' nacu'ë lidxë', gu'ë que queégaquië' le ilahuë'. <sup>43</sup> Bica' ba bönni' huen dxin na' cate' huödë' xanë', idixáquië' lë' runë' caní dxin na' nudödë' lu në'ë. <sup>44</sup> Le nácatë rea' libíili', udödë' xanë' lu në'ë bönni' huen dxin tsahui' na' idutë le dë queë'. <sup>45</sup> Channö guéquinë' bönni' huen dxin na' huadzenë' huödë' xanë', ate' isí lahuë' gu'ë dö' quégaquië' ia'zíca'rë' huen dxin, bönni' en nigula, en isí lahuë' gu'aj gahuë', en súdxinë', <sup>46</sup> ni'irö huödë' xanë' bönni' huen dxin na' cate' biti' ribözë' lë', en cate' biti' réquibe'enë', ate' usaca' zi'ë bönni' huen dxin biti' náquië' tsahui' na', en ichúguië' queë' qui'i sáquië' ca narugu quégaquië' bönni' biti' ta' yéajlë'ë.

<sup>47</sup> 'Bönni' huen dxin na' nòzinë' le ré'ënë' xanë', en biti' zoë' sina', en biti' runë' ca rnnë' xanë', bönni' ni, quíniterë' xanë' lë'. <sup>48</sup> Channö cabí nòzinë' tu bönni' huen dxin le ré'ënë' xanë', en gunë' le gun ga ibágue'ë le quinë' xanë' lë', bönni' ni quinë' lë' láti'do'os. Tu bönni' yu'u lu në'ë yenni', yenni' unabë' xanë' lu në'ë, ate' bönni' na' xanë' nuzxöni ládxë'ë lë' le zxön, le zxöntëro ca' unabë' xanë' lu në'ë bönni' huen dxin na'.

*Le náquië' Jesús gun ga ila'rúaj choplö bönachi*

(Mt. 10:34-36)

<sup>49</sup> Gunné' ca' Jesús:

—Bida' neda' dujéna' ga tsegui gu'ë yödzölió ni, en caba ládex'a chinaguéla' gu'ë na'.

<sup>50</sup> Na'a, dë tu le ral-la' qui'i saca'a le naca ca tu le idflida' nisa, ate' rö'a böninga ga idxintë gaca caní quia'. <sup>51</sup> ¿Naru' réquili' bida' dulequi dxía' le raca yödzölió ni? Rea' libíili': ¡Caléga! Bida' duléquia' le gun ga ila'rúaj choplö bönachi. <sup>52</sup> Na'a isí lo ulu'lá'alen luzé'eguequi gayu' bönachi nacuá' tu yu'u. Tsonné' ila'dá'baguë'ë chopë' nazí'igaquië' xtídza'a, ate' chopë' na' ila'dá'baguë'ë tsonné' na'. <sup>53</sup> Nu bönni' zóabi' bi'i bönni' queë' tá'baguë'ë zxí'inë' na', ate' bi'i bönni' na' tá'baga'bi' xúzibi'. Nigula zóabi' bi'i nigula queénu tá'baga'nu zxí'ininu na', ate' bi'i nigula na' tá'baga'bi' xiná'abi'. Nigula zóanu nigula zxoa' lídxinu tá'baga'nu zxoa' lídxinu na', ate' nigula zxoa' lídxinu na' tá'baga'nu xto' zxí'ininu.

*Le nácagaca bë' le taca na'a dza*

(Mt. 16:1-4; Mr. 8:11-13)

<sup>54</sup> Jesús gudxe' ca' bönachi zián nacuá' ni', rnnë':

—Cate' rilé'eli' za' böaj saca' ga ribía gubidza, la' rnnáteli': "Hualaj guiój", ate' caní raca. <sup>55</sup> Cate' recja bö' za' saca' ga ridödi gubidza beo' ziaga, rnnali': "Udzá'a na'a", ate' caní raca. <sup>56</sup> Libíili', bönni' rulu'isö tsahui' cuinli'. Nózili' le rulu'i le raca lúzziba, en le raca luyú ni, pero biti' réquibe'eli' le rulu'i le nácagaca bë' taca dza ni zóaru' na'a.

*Ral-la' ugá'analenu' tsahui' nu rilé rë'u*

(Mt. 5:25-26)

<sup>57</sup> Gunné' ca' Jesús:

—¿Bizz que biti' ruchi'a rusöröli' la' libíisili' ca naca le naca tsahui'? <sup>58</sup> Channö zoa nu bi unabi yudxi li', ate' zéajli' idxinli' yúlahui', bë' ladxi' ugá'analenu' tsahui' nu na' tsanni ni' yú'uli' nöza, para cabí uzegui li' lahuë' bönni' uchi'a usöröö' libíili', ate' bönni' uchi'a

usöröö' na' udödë' li' lu né'ë bönni' rusayjë' lidxi guíë, ate' bönni' na' rusayjë' lidxi guíë cu'ë li' lidxi guíë na'. <sup>59</sup> Rea' li', biti' uruju' ni' cate' údxirö quizxju' yúgu'të dumí lásido' ral-lu'u que nu na'.

## 13

*Run bayudxi ubí'i ládxi'ru'*

<sup>1</sup> La' dza ní'isö bila'dxinë' bönni' ta'guíxjöi'inë' Jesús ca benë' Pilato, bétie' ballë' bönni' Galilea, en guzxi'ë rön quégaquië', le bugútsi'në' xichóngacaba' böa' bëdxi chigulútië' légacaba' para ila'gu'ë xichóngacaba' na' lahuë' Dios. <sup>2</sup> Bubi'ë didza' Jesús, rë' légaquië':

—¿Naru' réquili' gulácarë' bönni' dul-la' bönni' Galilea na' ca ia'zíca'rë' bönni' Galilea, tu' gula'guí'i gula'zaquië' caní? <sup>3</sup> Rea' libí'ili: ¡Caléga! Channö cabí ubí'i ládxi'li', nítili' ca' yúgu'teli'. <sup>4</sup> Lësca' caní guca quégaquië' chizxunë' bönni' ni', yöjbaga' yu'u sibi na' nazí'i le Siloé légaquië', ate' gulátië'. ¿Naru' réquili' gula'bága'térë' légaquië' xíguia' ca ia'zíca'rö bönachi nacuá' Jerusalén? <sup>5</sup> Rea' libí'ili: ¡Caléga! Channö cabí ubí'i ládxi'li', nítili' ca' yúgu'teli'.

*Rucúdzu'ë didza' Jesús que yaga higo biti' bi ribía*

<sup>6</sup> Ní'irö bucúdzu'ë didza' Jesús, rë' légaquië':

—Zoë' tu bönni', zoa tu yaga higo nazë' ga naca lu xiyúë'. Röjtiljë' le ribía yaga na', pero biti' bi ridzólinë'. <sup>7</sup> Ní'irö gudxë' bönni' runë' dxin lu xiyúë' na', rnnë': "Chiguca tsonna iz rida' rududilja' le cuía yaga higo ni, en biti' bi ridzólida'. Guchugu le, ¿Bizx que run nigui luyú ni?" <sup>8</sup> Ní'irö bubi'ë didza' bönni' huen dxin na', rë' lë': "Xan, bucá'anagarö le ia'tú ízatëz, ate' uzatsa' yu zxani, en cu'a bëbu zxani. <sup>9</sup> Channö cuía yaga ni, gaca dxi'a, pero channö cabí bi cuía, ní'irö ichugu' le."

*Ruúnë' Jesús tu nigula ré'enu cate' naca dza lá'ayi*

<sup>10</sup> Tu dza rusédinë' Jesús bönachi nacuá' lu yu'u ga tu'dubë' bönni' judío, en tu'sëdë' queë' Dios cate' naca dza lá'ayi quégaquië'. <sup>11</sup> Zóanu tu nigula ni' chiguca chizxunu' iz ré'enu, tu' yu'u lënu bö' xihui' run ga te'e bönachi, ate' nayéchutica'sinu ridanu, en biti' ca' raca ulí cuinnu. <sup>12</sup> Cate' bilé'enë'-nu Jesús, bulidzë'-nu, rnnë':

—Nigúlado', chibóbacu' que yödzöhüé' quiu'.

<sup>13</sup> Ní'irö Jesús guxóa nè'ë lënu, ate' la' bulitë cuinnu, en gulú'unu-në' Dios yöl-la' ba.

<sup>14</sup> Ní'irö gulénë' bönni' lo que yu'u ga na' tu'dubë' tu'sëdë' queë' Dios. Rilenë' tu' bunë' Jesús nigula na' cate' naca dza lá'ayi. Bönni' lo na' gudxë' nupa nacuá' ni', rnnë':

—Xopa dza nacuá' cate' runru' dxin. Dë lataj yugu' dza ni guídali' para nu un libí'ili', en caléga dza lá'ayi.

<sup>15</sup> Ní'irö bubi'ë didza' Xanru', rnnë':

—Libí'ili', bönni' rulu'isö tsahui' cuinli', ¿naru' cabí rusédxigacali'-ba' böa' bëdxi que

queéli' ga na' dá'gacaba' cate' naca dza lá'ayi, ate' tsöju'a'agacali'-ba' para ilé'ajba' nisa?

<sup>16</sup> Nácanu nigula ni zxí'ini xi'sóë' Abraham, ate' idú chizxunu' iz chiyú'unu lu yalaj que Satanás tu' xihui'. ¿Naru' cabí ral-la' nu usedxi lënu sal-la' naca dza lá'ayi?

<sup>17</sup> Cate' bë'ë didza' ni Jesús, bulu'tu'iñë' yúgu'të bönni' nacu'ë ni' ta'lenë' Lë', pero bulu'dzeja ia'zíca'rö bönachi, yúgu'të nupa nacuá' ni', tu' ta'lé'enë' yugu' le zxön runë' Jesús.

*Rucúdzu'ë didza' Jesús que xisedo' mostaza*

(Mt. 13:31-32; Mr. 4:30-32)

<sup>18</sup> Ní'irö rnnë' Jesús:

—¿Nacxi caz raca rizxón le rinná bë'ë Dios, o bizxi uséqui'tseru' le? <sup>19</sup> Raca ca raca que xisedo' mostaza, le guzxi'ë tu bönni', ate' guzë' le ga naca lu xiyúë'. Guzxón yaga mostaza na', en guca ca tu yaga zxön, ate' bila'dxinba' biguínnido', gulunba' xcá'agacaba' lu ni'a nè'ë yaga mostaza na'.

*Rucúdzu'ë didza' Jesús que cúa zi que yöta xtila  
(Mt. 13:33)*

<sup>20</sup> Lëscá' caní rnné' Jesús:

—¿Bizxi caz uséqui'tseda' le rinná bë'ë Dios? <sup>21</sup> Naca ca cúa zi que yöta xtila, le guzxi'inu tu nigula, en bugútsi'nu tsonna cö' cúa yöta xtila, ate' guyazxaj idútë cúa na'.

*Tu ga tódiru' le naca guído'  
(Mt. 7:13-14, 21-23)*

<sup>22</sup> Tsanni ni' yu'ë nöza Jesús, sa'yéajé' Jerusalén, ridödë' yugu' yödzö zxön, en yugu' yödzödo', ate' rusédinë' böñachi nacuá' gapa na'. <sup>23</sup> Tu bönni' zoë' ni' gunábinë' Jesús, rnné':

—Xan, ¿naru' nabábasö nupa ulu'lágaca?

Jesús rë' nupa nacuá' ni', rnné':

<sup>24</sup> —Guli'gü'i ládxí'li' tsú'uli' saca' ga nu ridödi le naca guído', tu' rea' libí'ili': Zián nupa ilé'ëni ila'yaza ni', pero biti' ila'zéqui'në'. <sup>25</sup> Tödi chasé' Xan yu'u, en usayjé' yu'u, isí loli' libí'ili' na' zóali' ni'ilö ulídzali'-në' ra' yu'u na', ate' guiéli'-në': "Xan, Xan, gusalaj queétu'." Ni'irö ubi'ë didza' Lë', en guié' libí'ili': "Biti' nözda' nuzxi libí'ili'." <sup>26</sup> Ni'irö isí loli' innali': "Gü'i gudágulento' Li', ate' busédinu' gapa naca lu yé'ëyi queétu'." <sup>27</sup> Ni'irö guié' libí'ili': "Rea' libí'ili', biti' nözda' gazxi böñachi libí'ili'. Guli'cuítá ga zoa', yúgu'téli' ruá'ali' dö'." <sup>28</sup> Ni'irö cödxí yéchi'li', en gagu zxea láya'li' cate' ilé'egacali'-në' Abraham, en Isaac, en Jacob, en yúgu'të bönni' gulu'ë didza' uláz queé' Dios, nacu'ë ga ni' rinná bë'ë Dios, pero libí'ili' sóali' ni'ilö. <sup>29</sup> Ila'dxín böñachi ila'rúaj saca' ga rilén gubidza, en saca' ga ribía gubidza, en saca' ga za' bö' ziaga, en saca' ga ridödi gubidza beo' ziaga, ate' ila'bö'ë ilahuë' ga ni' rinná bë'ë Dios. <sup>30</sup> Ni'irö ilaca lo bal-la böñachi nácagaca cá'asö na'a, ate' ulu'gá'ana cá'asö bal-la nupa nácagaca lo na'a.

*Ribödxi yeché'ë Jesús ni'a quégaca böñachi Jerusalén  
(Mt. 23:37-39)*

<sup>31</sup> La' dza ni'isö bila'dxinë' bal-la bönni' yudo' fariseo ga zoë' Jesús en té' Lë':

—¡Burúaj! ¡Buzxunnaj ni! ¡Ré'ënë' Herodes gútië' Li'!

<sup>32</sup> Jesús rë' légaquië':

—Guli'tséaj, guli'tsöjödxé' bönni' na' náquië' ca tuba' böza', innali': "Buyútsöca', rubéajgaca' bö' xihui', en ruúna' böñachi na'a, en cucö', en cate' gaca lidzaj, údxí guna' dxin quia'." <sup>33</sup> Run bayudxi tséajlensa' ca' nöza na'a, en cucö', en huidzaj, ate' idxina' Jerusalén, tu' tútigaquië' bönni' tu'ë didza' uláz queé' Dios ni'.

<sup>34</sup> 'Libí'ili', zóali' Jerusalén. Rútigacali'-në' bönni' tu'ë didza' uláz queé' Dios, en ruládxí'gacali'-në' guiój bönni' gubáz risöl-lë'ë Dios ga zóali'. Cate' xö zián luzuú gú'unida' utuba' libí'ili' quia' ca runba' yøjede, rutúbiba' bórado' queéba' zxan xíliba', pero biti' gú'unili'. <sup>35</sup> Buli'yútsöca', cá'asö ugá'ana lídxili', ate' rea' libí'ili', bíti'rö ilé'eli' neda' cate' idxinxrö dza innali': "Bica' ba Nu na' za' uláz queé' Xanru'."

## 14

*Ruúnë' Jesús tu bönni' ré'enë' huë' gui*

<sup>1</sup> Cate' naca dza lá'ayi quégacië' bönni' judío, guyu'ë Jesús lidxë' tu bönni' unná bë', bönni' yudo' fariseo. Rö'ë Jesús rahuë', ate' nacu'ë bönni' yudo' fariseo ni' ta'né'ë Lë'.

<sup>2</sup> Zoë' ca' tu bönni' ré'enë' huë' gui ga na' zoë' Jesús. <sup>3</sup> Ni'irö Jesús gunábinë' bönni' yudo' usedi táquië' xibá queé' Moisés, en yugu' bönni' yudo' fariseo, rnné':

—¿Naru' dë lataj unru' nu re'e cate' naca dza lá'ayi?

<sup>4</sup> Légaquië' bulu'sayaj ruá'agaquië'. Ni'irö Jesús gudélë'ë bönni' huë' na', en bunë' lë', ate' la' busöl-la'të' lë'. <sup>5</sup> Ni'irö Jesús rë' yugu' bönni' yudo' na', rnné':

—Channö nu bönni' ládjali' nacuá'aba' queë' böa' bëdxi, ate' ibíxiba' tuba' lu yeru, ¿naru' cabí tsöjléajtë'-ba', sal-la' naca dza lá'ayi?

<sup>6</sup> Biti' bi didza' guca ulu'bi'ë ca naca lë ni.

### *Nu cö' lataj lo*

<sup>7</sup> Cate' bilé'enë' Jesús ca tunë' bönni' yudo' fariseo na', ta'bö'ë lataj lo ga na' ta'bö'ë tahuë', ní'irö bucúdzü'ë didza', ate' rë' légaquië':

<sup>8</sup> —Cate' nu bönni' ulidzë' li' guídu' ga raca laní que yöl-la' rutsaga na', biti' cö'u lataj lo. Nadxi ca' nulidzë' ca' tu bönni' nácatérë' lo ca li'. <sup>9</sup> Ní'irö bönni' na' bulidzë' li' huidé' ga zu', en guié' li': "Bë' lataj bönni' ni cö'ë ga zu'", ate' ní'irö lu yöl-la' rutui' quiu' tsöjchö' u zxánitëlö. <sup>10</sup> Que lë ni na', cate' nu bönni' ulidzë' li', guyéaj yöjchö' zxánitëlö, para cate' idxinë' bönni' na' bulidzë' li', huë' li': "Bócha'a, gudödi ia'lati' nilö." Ní'irö gácaru' li' lo lógaca nupa ta'bö'len li' tsözxön. <sup>11</sup> Nu run ba zxön cuini, ilunë' ga huöta' huöxaj, pero nu zoa nöxañ ladxi', ilunë' ga gácarö lo nu na'.

<sup>12</sup> Jesúr rë' ca' bönni' na' bulidzë' Lë', rnnë':

—Cati' gunu' tu gü'i huagu o tu lanido', biti' ulídzagacu'-në' yugu' böchi' luzö'o, en yugu' bönni' böchu'u, en yugu' di'a dza quiu', en dzaga yu'u quiu' ta'lé'enë' yöl-la' tsahui' quégäquië', tu' ulu'lidzë' ca' li', ate' caní gaca, ubí'i quiu'. <sup>13</sup> Cate' gunu' tu gü'i huagu, bulidza yugu' böñachi yechi', en nupa nabixi ni'a ná'agaca, en nupa biti' raca sá'gaca, en yugu' bönni' lo chul-la. <sup>14</sup> Ní'irö gacu' bica' ba, tu' cabí gaca bi ulu'bi'ë bönni' caní quiu', pero ubí'i quiu' cate' idxín dza ulu'bán nupa gulún le naca tsahui', en gulátigaca.

### *Rucúdzü'ë didza' Jesús que tu laní zxön*

<sup>15</sup> Cate' tu bönni' rö'ë rágulenë' Jesús biyönnë' didza' ni, rë' Lë':

—Bica' ba nu gagu ga ni' rinná bë'ë Dios.

<sup>16</sup> Jesúr rë' lë':

—Zoë' tu bönni' benë' laní zxön, ate' zián nupa bulidzë'. <sup>17</sup> Cate' chinabá'a la' huagu, gusól-lë'ë bönni' huen dxin queë' tsöjödxë' nupa na' chinulidzë', gunné': "¡Guli'dá! ¡Yúgu'té chinabá'a!" <sup>18</sup> Gula'sí lógaquië' yúgu'té' ta'nabë' lataj cabí tsöjáquië'. Bönni' zí'alö na' rnnë': "Si' guzxi'a tu luyú, en ronda' bayudxi tsöjyúa' le. Ráta'yua' lo' gunnu' neda' lataj." <sup>19</sup> Ia'tué' rnnë': "Si' guzxi'a gayu' nözaba' bëdxi, ate' tsöjzxí' bë'a légacaba' ugúngaca' ba' dxin. Ráta'yua' lo' gunnu' neda' lataj." <sup>20</sup> Ia'tué' rnnë': "Si' butsaga na'a, en que lë ni na' biti' gaca guída'." <sup>21</sup> Cate' bóajë' bönni' huen dxin na', yöjtíxjöi'inë' xanë' yúgu'té lë ni. Ní'irö gulénë' bönni' xan yu'u na', ate' gudxë' bönni' huen dxin na', rnnë': "Guyéajtë na'a gapa naca lu yé'ëyi, en gapa naca la' nöza que yödzö ni, ate' ichë'u yugu' böñachi yechi' ni, en nupa nabixi ni'a ná'agaca, en nupa biti' raca sá'gaca, en yugu' bönni' lo chul-la." <sup>22</sup> Cate' chinunë' bönni' huen dxin na' caní, rnnë': "Xan, chibena' ca na' gunná bë'enu' neda', ate' ni dë lataj." <sup>23</sup> Ní'irö xanë' gudxë' bönni' huen dxin na', rnnë': "Guyéaj gapa naca la' nöza, en gapa naca nöza lasi, ate' ben bayudxi guídigaca nupa nacuá' ni' para ilí lidxa', <sup>24</sup> tu' rea' libí'ili': Biti' gahuë' que laní quia' nitúë' bönni' ni' bulidza' zí'alö."

### *Le sáca'ru' cate' zéajlenru'-në' Cristo*

<sup>25</sup> Yugu' dza ni' röjácalen Jesús böñachi zián, ate' buécjë' Jesús, en rë' légaquië':

<sup>26</sup> —Channö guídalenë' neda' tu bönni', en biti' idxi'irönë' neda' ca nadxi' inë' xuz xiné'ë, en nigula queë', en yugu' zxí' inë', en yugu' bi'i böchë'ë, en yugu' bi'i zanë', en yöl-la' na'bán queë', biti' gaca gáquië' bönni' usëda quia'. <sup>27</sup> Nu bönni' biti' gáquië' ca tu bönni' sa'yéajë' söjtë'ë lë'e yaga cruz, ate' té'ë neda', biti' gaca gáquië' bönni' usëda quia'. <sup>28</sup> Channö zoë' nu bönni' ladaj libí'ili' gué'ënnë' gunë' tu yu'u zián cuía, ¿naru' cabí cö'ë zí'alö ulabë' gáca'xi dumí ral-la' utöë' para inózinë' channö dë queë' tsca le riquinnë' para údxi gunë' yu'u na'? <sup>29</sup> Channö cabí gunë' caní, en isí lahuë' cuéquië' xilibi yu'u na', ate' biti' gaca údxi gunë' yu'u na', ní'irö ila'sí lógaca yúgu'té nupa ila'lé'e le ulu'titaj lë',

<sup>30</sup> ila'nná: "Bönní' ni gusí lahuë' runë' yu'u, pero biti' guca údxi gunë' le." <sup>31</sup> Lësca' caní, channö zoë' nu bönní' rinná bë'ë, en ral-la' tsejë' gudil-la tsöjtíl-lalenë' ia'túé' bönní' rinná bë'ë, ¿narú' cabí cö'ë zí'alö, en cuéqui icjë' channö séqui'në' tsöjtíl-lalenë' bönní' ni' naché'ë galaj milë' bönní', ate' lé' chi milsë' bönní' naché'ë? <sup>32</sup> Channö cabí séqui'në', cate' ni' zoë' zi'tu' ia'túé' bönní' na' rinná bë'ë, isól-lë'ë bönní' gubáz queë', ate' inábinë' lë' nacxi ral-la' gunë' para ulu'dzáguië' dxi'a. <sup>33</sup> Caní naca, channö zoë' nu bönní' ladaj libíili' biti' ucá'anë' yúgu'të le dë queë', biti' gaca gáquië' bönní' usëda quia'.

*Zödi' le naniti yöl-la' siná'a que*  
(Mt. 5:13; Mr. 9:50)

<sup>34</sup> Gunné' ca' Jesús:

—Dxi'a naca zödi', pero channö initi yöl-la' siná'a que, ¿nacxi gaca úniru' le siná'a?

<sup>35</sup> Bítirö nazaca' zödi' na', caléga para luyú, en caléga para ga rirú'uniru' bëbu, pero chú'unaru' le ní'ilö. Nu zoa nagui, en riyöni, ral-la' uzé nagui nu na'.

## 15

*Rucúdzu'ë didza' Jesús ca naca queéba' bö'cu' zxila' gunítiba'*  
(Mt. 18:10-14)

<sup>1</sup> Bulu'dubë' yúgu'të bönní' tu'quízxjë' lázagaca böñachi, en yugu' bönní' cá'asö ga zoë' Jesús para ulu'zé náguië' Lë'. <sup>2</sup> Que lë ni na' yugu' bönní' yudo' fariseo, en yugu' bönní' yudo' usedi gula'nné' queë' Jesús, ta'nné':

—Bönní' ni runë' bal yugu' bönní' dul-la', en rágulenë' légaquië'.

<sup>3</sup> Ní'irö bucúdzu'ë didza' Jesús, ré' légaquië':

<sup>4</sup> —Channö zoë' tu bönní' ladaj libíili', nacuá'aba' queë' tu gayuá'aba' bö'cu' zxila', en channö nítiba' tuba', ¿narú' cabí ucá'anë' ia'zíca'röba' tápalalaj yu' chénnaba' na' ga naca lu lataj cá'asö, ate' tsejë' tsöjdiljë'-ba' bö'cu' zxila' na' nanítiba', cate' udzólinë'-ba'?

<sup>5</sup> Cate' udzólinë'-ba', lu yöl-la' rudzeja queë' ixóë'-ba' ya' zxicjë', <sup>6</sup> en cate' udxinë' lidxë' utubë' yugu' böchi' luzé'ë, en yugu' dzaga yu'u queë', ate' guíë' légaquië': "Buli'dzéjalen neda', tu' chibudzólida'-ba' bö'cu' zxila' quia' gunítiba'." <sup>7</sup> Rea' libíili': Lësca' caní gácatérö yöl-la' rudzeja yehua' yubá ni'a queë' tuë' bönní' dul-la' ubí'i ládxë'ë ca gaca quégaquië' tápalalaj yu' chénnë' bönní' tsahui', bönní' téquinë' biti' naquíniguequinë' ulu'bí'i ládxë'ë.

*Rucúdzu'ë didza' Jesús que tu dumí guniti*

<sup>8</sup> Rnné' ca' Jesús:

—Channö zóanu tu nigula, dë queënu chi dumí plata, en channö initi tu dumí plata na', ¿narú' cabí uquélá'nu guí', ate' ulúanu yu'u, uguilaj yúdxinu le cate' udzólinu le?

<sup>9</sup> Cate' udzólinu le, utúbinu yugu' nigula luzá'anu, en yugu' nigula dzaga yu'u queënu, ate' guíënu légaçanu: "Buli'dzéjalen neda', tu' chibudzólida' dumí plata na' guniti." <sup>10</sup> Rea' libíili': Lësca' caní, ulu'dzéjade'erönë' gubáz lá'ayi queë' Dios ni'a queë' tuë' bönní' dul-la' ubí'i ládxë'ë.

*Rucúdzu'ë didza' Jesús queébi' tu bi'i gunítibi'*

<sup>11</sup> Rnné' ca' Jesús:

—Zoë' tu bönní' nacuá'abi' chópabi' bi'i bönní' queë'. <sup>12</sup> Bi'i cuidi' na' rëbi'-në' xúzibi': "Dad, benna quia' le dë quiu' le ral-la' guequi quia'." Ní'irö xúzibi' na' gudisië' quégacabi' le dë queë'. <sup>13</sup> Nabábasö dza gudzé, bi'i cuidi' na' butúbibi' yúgu'të, ate' guyéajbi' tu yödzö zi'tu', ate' ni' butöbi' dërø le dë queëbi'. Le ruá' dö' benbi'. <sup>14</sup> Cate' chibutöbi' dërø le dë queëbi', guca gubín lu yödzö ga na' zóabi', ate' biyadzaj queëbi'. <sup>15</sup> Ní'irö guyéajbi' yöjsóabi' huen dxin queë' tu bönní' lu yödzö ni', ate' bönní' na' gusól-lë'ë-bi' ga dë xiyúë' tsöjgágubi'-ba' yugu' cuchi queë'. <sup>16</sup> Guca láxbi' gágubi' guixi' cá'asö na' táguba' cuchi,

pero cuntu nu bi bë' le gágubi'. <sup>17</sup> Ní'irö bubí'i ládxí'bi', rnnabi': "Cate' xö bönni' huen dxin nacu'ë lidxe' xuza', en dëda' le tahuë', pero neda' ni huáti caza' yöl-la' ridún. <sup>18</sup> Uzá'a ni, huöja' ga zoë' xuza', en tsöjödxa' -në': Dad, bena' dul-la' lahuë' Dios, zoë' yehua' yubá, en lo' li'. <sup>19</sup> Bítirö naca' neda' lesaca' gaca' zxí'inu'. Ben neda' ca bönni' huen dxin quiu'."

<sup>20</sup> Ní'irö guyú'ubí' nöza, söhuóajbi' ga zoë' xúzibi'.

'Cate' ni' zóabi' zi'tu' suzá'abi', bilé enié'-bi' xúzibi', en buéchi' ládxë'ë-bi'. Carelö yöjzxí'galë'-bi' xúzibi', en yöjnidë' yenbi', gudahuë'-bi' zxixi. <sup>21</sup> Ní'irö zxí'inë' na' rëbi'-në': "Dad, bena' dul-la' lahuë' Dios, zoë' yehua' yubá, en lo' li'. Bítirö naca' neda' lesaca' gaca' zxí'inu'." <sup>22</sup> Ní'irö xúzibi' rë' yugu' bönni' huen dxin queë', rnnë': "Guli'tsöjléajtë lari' nazáca'térö, en guli'gacu-bi'. Guli'cú'u le nazaca' xibón ná'abi', en buli'dá' huarache ní'abi'. <sup>23</sup> Guli'tsöjzxí'i-ba' bëdxi renni', ate' guli'guti-ba'. Gáguru'-ba', en gunru' laní, <sup>24</sup> tu' guca bi'i bönni' quia' ni ca tu bi'i chinátibi', ate' bubanbi'. Gunítibi', ate' chibulá'abi' na'a." Ní'irö gula'sí lógaquië' tu'dzéjanë'.

<sup>25</sup> 'Tsanni ni' raca lë ni, zóabi' bi'i bönni' zí'alö queë' bönni' na' la' guixi'. Cate' suzá'abi' rudxinbi' gala' ra' yu'u, riyónibi' raca huila, en raca huö' a lu yu'u na'. <sup>26</sup> Ní'irö bulídzabi'-në' tuë' bönni' huen dxin zoë' ni', en gunábibi' lë' bizxi na' raca. <sup>27</sup> Bönni' huen dxin na' rë'ë-bi': "Bi'i bóchu'u na' budxinbi', ate' gunná bë'ë xuzu' gulútië'-ba' bëdxi renni', tu' budxinbi' lu në'ë dxi'a tsáhui'do'." <sup>28</sup> Ní'irö gulébi' bi'i zí'alö na', en biti' gú'unibi' tsú'ubi' yu'u. Ní'irö birúajë' xúzibi', en gúta'yuë' lobí' tsú'ubi'. <sup>29</sup> Bubi'ibi' didza' bi'i zí'alö na', rëbi'-në' xúzibi': "Nöz quézinu' cate' xö iz bena' dxin lo', en catu caz gudá'baga'a li', pero catu caz bennu' quia' tuba' bö'cu' zxíla'do' para gü'ílena' xibé yugu' luzá'a. <sup>30</sup> Na'a, cate' budxinbi' bi'i quiu' ni busunítibi' yugu' le guta' quiu', gudálenbi'-nu yugu' nigula udá dzaga, benu' ga gulútië'-ba' bëdxi renni' ni'a queëbi'." <sup>31</sup> Ní'irö xúzibi' rë'ë-bi', rnnë': "Zxí'ina', li' zóalen cazu' neda' ate' yúgu'të le dë quia', quiu' nequi. <sup>32</sup> Ben bayudxi gunru' laní, en udzéjaru', tu' gúcabi' bi'i bóchu'u ni ca tu bi'i chinati cázabi', ate' nubanbi'. Gunítibi' ate' chibulá'abi'."

## 16

### Rucúdzu'ë didza' Jesús queë' bönni' huen dxin biti' náquië' tsahui'

<sup>1</sup> Jesús rë' ca' yugu' bönni' dá'gaquië' Lë', rnnë':

—Zoë' tu bönni' dë yöl-la' tsahui' queë', en zoë' ca' queë' tuë' bönni' huen dxin dë lu në'ë uláz queë'. Bila'dxinë' yugu' bönni' tu'zéguië' bönni' huen dxin na' lahuë' xanë', ta'nné' queë' rutösë' le dë queë' xanë' na'. <sup>2</sup> Ní'irö xan yu'u na' bulidzë' bönni' huen dxin na', en rë' lë: "¿Bizxi didza' ni riyönda' quiu'? Bulu'i neda' le naca bë' dxin nunu', tu' cabirö gata' lu no'o uláz quia'." <sup>3</sup> Ní'irö guzá' ládxë'ë bönni' huen dxin na', rnnë': ¿Nacxi guntsa'? Rubéajë' xana' neda' lataj lo ga runa' dxin. Biti' séqui'da' guna' dxin gú'una, en utu'ida' inaba' nu bi gúnnasö quia'. <sup>4</sup> Na'a nözda' naca guna' para cate' ubéajë' neda' lataj lo ni, ila'cuá' nupa ulu'zí' neda' lídxiguequi. <sup>5</sup> Ní'irö bönni' huen dxin na' bulidzë' yugu' bönni' bi tál-lë'ë queë' xanë', ate' rë' bönni' zí'alö: "¿Gáca'xi ral-lu'u queë' xana'?" <sup>6</sup> Lë' rnnë': "Tu gayuá' rö'ö chugu le za ral-la'a." Bönni' huen dxin lo na' rë' lë', rnnë': "Ni dë guichi ga nazúaj le ral-lu'u. Guró'ötë ni, en buzúaj ia'tú lu guichi le inná chi-un rö'ö chugu ral-lu'u." <sup>7</sup> Gudödi ni' gunábinë' ia'túe', rnnë': "Nazxi li', ¿gáca'xi ral-lu'u?" Lë' rnnë': "Tu gayuá' da'a zxoa' xtila." Ní'irö bönni' huen dxin lo na' rë' lë', rnnë': "Ni dë guichi ga nazúaj le ral-lu'u. Buzúaj ia'tú lu guichi le inná tápalalaj da'a ral-lu'u." <sup>8</sup> Réquibe'enë' xanë' na' sínatë' benë' bönni' huen dxin biti' náquië' tsahui' na'. Caní naca, nácagacarë' sina'bönni' yödzölió ni lu le tunë' la' légacasë', ca nácagaca böñachi ta'dalen Dios lu bení queë'.

<sup>9</sup> 'Neda' rea' libí'ili': Guli'cázalen böñachi dxi'a, ugunli' dxin yöl-la' tsahui' dë queëli' yödzölió ni, para cate' idxín dza ucá'anali' yugu' lë ni, ilunë' libí'ili' bal lataj ni' zóatica'sö.

<sup>10</sup> 'Nu rugún dxi'a dxin tu le cuídi'sö dë lu në'e, lësca' ugún dxi'a dxin tu le zxön gata' lu në'e. Nu biti' rugún dxi'a dxin tu le cuídi'sö dë lu në'e, biti' ugún dxi'a dxin tu le zxön

gata' lu nē'e. <sup>11</sup> Que lē ni na', channō cabí rugunli' dxi'a dxin yöl-la' tsahui' dē queéli' yödzölió ni, ḡnuzxi caz udödi lu nā'ali' yöl-la' tsahui' le naca idú? <sup>12</sup> Channō cabí rugunli' dxi'a dxin le dē lu nā'ali' le nequi que nu yübölö, ḡnuzxi caz udödi lu nā'ali' le ral-la' quequi que quézil?'

<sup>13</sup> 'Biti' gaca nitúë' bönni' huen dxin gunë' xichíngaca chopá xanë', tu' udí'inë' tuë', en idxf'inë' ia'tué', o gunë' bal tuë', en uzóë' tsölä'alö ia'tué' na'. Biti' gaca gunli' xichinë' Dios, en gunli' ca' dxin para uzi'ili' xibé yöl-la' tsahui' que yödzölió.

<sup>14</sup> Bila'yönné' bönni' yudo' fariseo didza' ni, ate' tu' nadxf'iguequinë' yöl-la' tsahui' quégaquië', que lē ni na' bulu'titjé' Jesús. <sup>15</sup> Ní'irö Jesú斯 rë' légaquië':

—Libí'ili' rubéaj dxi'a cuinli' lógaca bönachi, pero nőzinë' Dios le yu'u icja ládxido'oli', tu' naca lē na' tun zxön bönachi tu le ruzoë' Dios tsölä'alö.

### Xibá queë' Moisés, en le rinná bë'ë Dios

<sup>16</sup> Gunné' ca' Jesús:

—Ga bidxité dza zoë' Juan, ben dxin le rinná bë' xibá queë' Moisés, en le bulu'zúajé' lu guichi yugu' bönni' gulu'ë didza' uláz queë' Dios. Ní'irö cate' bidxinë' Juan na', gusí lo raca libán ca gaca nu tsaza ga rinná bë'ë Dios, ate' tun bayudxi yúgu'të bönachi ila'yaza ni'.

<sup>17</sup> 'Sal-la' raca caní, gácarö ila'dödi que lúzziba, en que luyú ni ca initi tu dídza'sö nazúaj lu guichi lu xibá queë' Dios.

### Le rulá'a yöl-la' nutsaga na'

(Mt. 19:1-12; Mr. 10:1-12)

<sup>18</sup> Gunné' ca' Jesús:

—Channö tu bönni' ulá'alenë' nigula queë', ate' utsaga ná'alenë'-nu nigula yübölö, gunë' dul-la' le riguitsaj xibá que yöl-la' nutsaga na', ate' nu utsaga ná'alen nigula na' nusanë'-nu bönni' queénu, gun ca' dul-la' le riguitsaj xibá que yöl-la' nutsaga na'.

### Bönni' dë yöl-la' tsahui' queë', en Lázaro

<sup>19</sup> Ní'irö bucúdzu'ë didza' Jesús, rnnë':

—Zoë' tu bönni' rilé'enë' yöl-la' tsahui' queë'. Rácuë' lari' xiná, en lari' nazáca'da', ate' yugu' dza rúntica'së' laní, ate' té'aj tahuë' le banéquini. <sup>20</sup> Zoë' ca' ni' tu bönni' yéchi'do' lë' Lázaro, bönni' rinabé' nu bi unödzaj queë', ate' hué'tézé' rö'ë ra' yu'u queë' bönni' na' rilé'enë' yöl-la' tsahui'. <sup>21</sup> Raca ládxé'ë bönni' yéchi'do' na' gahuë' le bizxaj tu'huöxaj zxani ga rahuë' bönni' na' rilé'enë' yöl-la' tsahui'. Ta'dxinba' ca' bö'cu', en ta'lé'éba' lu huë' queë' bönni' yéchi'do' na'. <sup>22</sup> Bidxín dza gútië' bönni' yéchi'do' na', ate' gubáz l'ayi queë' Dios gula'ché'ë lë' tsöjsóalenë' Abraham ga naca lataj lachi queë' Dios. Gútië' ca' bönni' na' bilé'enë' yöl-la' tsahui', ate' bulu'cáchë'ë lë' yero ba. <sup>23</sup> Cate' ni' rigu'i rizáquë'ë bönni' na' bilé'enë' yöl-la' tsahui', zoë' lataj quégaca nupa nátigaca, guchisa lahuë', en bilé'enë' Abraham zoë' zi'tu', en dzáguië' Lázaro na' lë'. <sup>24</sup> Ní'irö bë'ë zidzaj didza', rnnë': "Xuza', Abraham, buéchi' ladxi' neda'. Gusól-la' Lázaro quia' para usubisë' xibón nē'e, en udusuuhöälé' lúdxa'a, tu' rigu'i rizáca'a lu guí' ni." <sup>25</sup> Abraham rë' lë', rnnë': "Zxf'ina', busá' ládxu'u ca guca quiu', buzi'u xibé yöl-la' tsahui' tsanni ni' zu' nabantu', pero Lázaro ni, guca queë' yöl-la' yechi', ate' na'a, ruzi' zxönë' Lázaro ni, pero li' rigu'i rizácu'u.

<sup>26</sup> Ia'stú, tu ra' guí'a sibi rö', le zoa gatsaj láhui'lö ga ni' zóali' libi'ili', en ga ni zóatu' netu'. Que lē ni na' nupa nacuá' ni, en ilé'eni ila'dödi ga zóali' libi'ili', biti' ca' gaca ilunë' ca', en biti' gaca ilida ni nupa nacuá' ni'." <sup>27</sup> Ní'irö bönni' na' bilé'enë' yöl-la' tsahui' rë' lë', rnnë': "Xuza' Abraham, ráta'yua' lo' isól-lu'u-në' Lázaro tsejë' lidxé' xuza', <sup>28</sup> tu' nacuë' gáyu'ë bönni' bócha'a ni'. Gusól-lë'ë tsöjenë' liná' lo que le raca ni, para cabí guídigaquië' ca' lataj ga ni rigu'i rizáca'a." <sup>29</sup> Ní'irö Abraham rë' lë', rnnë': "Dë quégaquië' le buzúajé' lu guichi Moisés, en le bulu'zúajé' lu guichi bönni' gulu'ë didza' uláz queë' Dios. Yugu' didza' quégaquië' na' ral-la' ulu'zé' náguië'." <sup>30</sup> Bubi'ë didza' bönni' na' bilé'enë' yöl-la'

tsahui', rnnë': "Xuza' Abraham, biti' gaca caní, pero channö ubanë' tu bönni' lu yöl-la' guti, en tsejë' ga na' nacuë', ulu'bí'i ládxí'gaquië'." <sup>31</sup> Abraham rë' lë', rnnë': "Channö cabí tu'zé náguië' didza' bë'ë Moisés, en le gula'nnë' bönni' gulu'ë didza' uláz queë' Dios, biti' ila'yéajlë'ë sal-la' nu ubán lu yöl-la' guti."

## 17

### *Run bönadxi queéru' gunru' ga nu gun dul-la'*

(Mt. 18:6-7, 21-22; Mr. 9:42)

<sup>1</sup> Jesús rë' yugu' bönni' dá'gaquië' Lë', rnnë':

—Nacuá'tica'sö le tun ga ilún böñachi dul-la', pero bica' bayechi' bönni' na' runë' ga nu gun dul-la'. <sup>2</sup> Dxi'arö gaca queë' bönni' na' runë' caní, nu ugal-la' tu guiój riyetu yaga yenë', en tsöjchú'una lë' lu nísado', cátelö gunë' ga gun dul-la' nu bi'i néquibi' quia'. <sup>3</sup> Guli'gún chi'i cuinli'. Channö böchi' luzó'o gu'ë dö' quiu', buzájní'i-në', en channö ubí'i ládxë'ë, buniti lo lë'. <sup>4</sup> Sal-la' gadxi luzuí tu dza gu'ë dö' quiu', en gadxi luzuí ca' guídë' ga zu', en guíë' li': "Rubí'i ládx'a'a", ral-la' uniti lo' lë'.

### *Yöl-la' huáca que le réajlë'ëru' Cristo*

<sup>5</sup> Ní'irö yugu' bönni' gubáz queë' Xanru' të' Lë', ta'nnë':

—Ben ga tséajlë'érötü'-në' Dios.

<sup>6</sup> Xanru' rë' légaquië', rnnë':

—La'tu' naca cuídi'sö yöl-la' réajlë' queéli' Dios, nácasö ca tu xisedo' mostaza, huáca guíeli' yaga zxön ni: "Gucuítá ni, en yöjsóa lu nísado", ate' gun yaga na' ca rnnali'.

### *Le ral-la' gun nu naca huen dxin*

<sup>7</sup> Gunné' ca' Jesús:

—Channö zoë' tuë' bönni' ladaj lib'ili', en zoë' queë' tuë' bönni' nadó'o rugá'anë'-ba' bëdxi o rulapë', cate' údxí gunë' xichinë' xanë', ¿naru' huëtsë' xanë' lë', innë': "Gudá, guró'ö gagu"? <sup>8</sup> ¡Caléga! Caní guíë' lë': "Bupá'a le gahua'. Guzóa sina' cu'u le guí'aj gahua', ate' tódirö na' huáca guí'aj gagu' li'." <sup>9</sup> ¿Naru' huëtsë' bönni' nadó'o queë' na': "Xclenu'", tu' benë' ca gunná bë'enë' lë'? Runi neda', biti' gunë' caní. <sup>10</sup> Lësca' caní gaca queéli'. Cate' chinunli' yúgu'të le gunná bë'enë' Dios libi'ili', ral-la' innali': "Nácatu' huen dxin cabí nácatu' lesaca', tu' bénsoitu' le run bayudxi guntu'."

### *Chië' bönni' té'enë' huë' nudzu' ruzödi*

<sup>11</sup> Tsanni ni' yu'ë Jesús nöza, sa'yéajé' Jerusalén, ridödë' gapa dë yödzödo' nabábagaca luyú Samaria, en luyú Galilea. <sup>12</sup> Cate' guyázië' tu yödzödo', bila'rúa'je' dutságagaquië' Lë' chië' bönni' té'enë' huë' nudzu' ruzödi, ate' gula'cu'ë zí'tu'sö, <sup>13</sup> en tu'ë zidzaj didza', ta'nnë':

—¡Jesús, Bönni' Usedi! ¡Buéchi' ladxi' netu'!

<sup>14</sup> Cate' bilé'enë' Jesús légaquië', rë' légaquië':

—Guli'tséaj, guli'tsöjlui'i cuinli' lógaca bixúz.

Tsanni ni' söjáquië', bulu'huöáquië' dxi'a. <sup>15</sup> Ní'irö tuë' bönni' nútsë'ë ládjagaquië', cate' réquibe'enë' chinuhuöáquië' dxi'a, böajé' ga na' zoë' Jesús, ru'ítica'së' zidzaj didza', rigu'ë Dios yöl-la' ba. <sup>16</sup> Biyéchuë', en busudxín lahuë' lu yu lahuë' Jesús, en rë' Lë': "¡Xclenu'!"

Bönni' ni nababë' Samaria. <sup>17</sup> Ní'irö Jesús rë' lë':

—¿Naru' cabí bulu'huöáquië' dxi'a chië' bönni'? ¿Gazxi nacuá'tsë' ia'zíca'rë' bönni' na'? <sup>18</sup> ¿Naru' cabí zoa nu huöda cu'u Dios yöl-la' ba, pero tuzë' bönni' zi'tu' ni?

<sup>19</sup> Ní'irö Jesús gudxë' bönni' na', rnnë':

—¡Guyasa, en böaj lidxu'! ¡Chiböácu' dxi'a tu' réajlë'u neda'!

### *Ca idxín le rinná bë'ë Dios*

(Mt. 24:23-28, 36-41)

<sup>20</sup> Cate' yugu' bönni' yudo' fariseo ta'nábinë' Jesús bátaxi ral-la' idxín le rinná bë'ë Dios, Lë' bubí'ë didza', rë' légaquië':

—Ca idxín le rinná bë'ë Dios, biti' naca le ilé'eli'. <sup>21</sup> Cuntu nu gaca inná: “¡Ni bidxín!”, o inná: “¡Ni' bidxín!” ¡Buli'yútsöca'! ¡Rinná bë'ë Dios lu icja ládxi'do'gaca böñachi!

<sup>22</sup> Ní'irö Jesúus gudxe' yugu' bönni' usëda queë', rnnë':

—Huadxín dza cate' gué'ënili' ilé'eli' dza huöda' neda', Bönni' Guljë' Bönachi, pero biti' ilé'eli' le. <sup>23</sup> Ila'cuá' nupa ilé libí'ili': “¡Ni zoë!” , o ila'nná: “¡Ni' zoë!” Biti' tséajli' ni', en biti' tséajlenli' légaquië'. <sup>24</sup> Ca raca cate' répi yösa, ruzen' idá'alö lúzxiba, lësca' caní gaca cate' idxín dza huöda' neda', Bönni' Guljë' Bönachi. <sup>25</sup> Zí' alö ca gaca lë ni, run bayudxi qui'i sáca'da', ate' böñachi dza ni zóaru' na'a ulu'cá'ana neda' cá'asö. <sup>26</sup> Ca na' guca dza ni' zoë' Noé, lësca' caní gaca cate' idxín dza huöda' neda', Bönni' Guljë' Bönachi. <sup>27</sup> Dza ni'te na' gulé'aj gulahuë'. Bulu'tsaga ná'agáquië', en bulu'dödë' zxí'inigaquië' lu yöl-la' rutsaga na' ga bidxintë dza guyázië' Noé lë'e barco zxön na' nazí'i le arca, ate' bidxintë nisa guiój usuniti yödzölió le busuniti yúgu'të'. <sup>28</sup> Lësca' caní guca dza ni' zoë' Lot. Gulé'aj gulahuë'. Gulá'uë', en gulúti'ë. Gulazé' xiyúgaquië', en gulunë' yugu' yu'u quégäquië'. <sup>29</sup> Cate' bidxín dza na' burúajë' Lot lu yödzö Sodoma, böxaj guí' ca tu nisa guiój, enca' le ruzéguida' nazí'i le azufre, ate' bulu'suniti yúgu'të'. <sup>30</sup> Lësca' caní gaca cate' idxín dza ului'i lahua' neda', Bönni' Guljë' Bönachi.

<sup>31</sup> 'Cate' idxín dza na', channö zoë' tu bönni' ícjo'olö, en dzö'ö le dë queë' lu yu'u na', biti' ral-la' huötjë' tsöjzxi'ë le dë queë', ate' nu zoa la' guixi', lësca' caní, biti' ral-la' huöje' lidxë'. <sup>32</sup> Guli'sá' ládxi'li' ca guca queénu nigula queë' Lot. <sup>33</sup> Nu bönni' ré'ënë' gun chi'ë yöl-la' na'bán queë', unítië' le, pero bönni' udödë' yöl-la' na'bán queë' ni'a quia', udélë'ë le.

<sup>34</sup> 'Rea' libí'ili': Cate' idxín rëla na', ila'cu'ë chopë' bönni' tsözxón ga tasië', ate' tuë' uduzxi'a-në', en ia'túe' ucá'ana' lë'. <sup>35</sup> Ila'cuá'anu huëtu tsözxón chópanu nigula, ate' tunu uduzxi'a-nu, en ia'tunu ucá'ana'-nu. <sup>36</sup> Ila'cu'ë chopë' bönni' la' guixi', ate' tuë' uduzxi'a-në', en ia'túe' ucá'ana' lë'.

<sup>37</sup> Cate' bila'yönnë' lë ni bönni' usëda queë' Jesús, gula'nábinë' Lë', ta'nnë':

—Xan, ¿gazxi gaca lë ni?

Jesúus rë' légaquië':

—Ga dë tu le nati, ni' ulu'dubi quéziba' bíchulab.

## 18

### *Tu nigula uzébi, en bönni' ruchi'a rusöröe'*

<sup>1</sup> Ní'irö bucúdzu'ë didza' Jesús, rë' légaquië' ca run bayudxi ulídzatica'siru'-në' Dios, en biti' gaca chopá ládxi'ru'. <sup>2</sup> Rnnë':

—Zoë' tu bönni' ruchi'a rusöröe' tu yödzö, bönni' biti' rádxinë' Dios, en biti' runë' nu bönni' bal. <sup>3</sup> La' yödzö ná'asö zóanu tu nigula uzébi, ate' bidxinnu nigula ni ga zoë' bönni' ruchi'a rusöröe' na', rnnanu: “Buchi'a busörö le run quia' nu ruá' dö' quia'.” <sup>4</sup> Xidzé biti' gú'unne' bi gunë' queénu, pero gudödi ni' guzá' ládxe'ë, rnnë': “Biti' rádxida' -në' Dios, en biti' runa' nu bönni' bal, <sup>5</sup> pero tu' rupízxjanu nigula uzébi ni neda', que lë ni na' uchi'a usörööa'-nu, para cabí guídatica'sinu ni, en para cabí tödi bë' upízxjanu neda'.”

<sup>6</sup> Ní'irö Xanru' rë' légaquië', rnnë':

—Guli'zé nágali' ca na' gunné' bönni' ruchi'a rusöröe' na', bönni' biti' náquië' tsahui'.

<sup>7</sup> ¿Naru' cabí uchi'a usöröe' Dios böñachi gurö' cazë' queë', nupa na' tu'lidza Lë' rëla te dza? ¿Naru' huadzétsenë' gácalenë' légaquië'? <sup>8</sup> Rea' libí'ili': La' uchi'a usörötenë' légaquië'. Cate' huöda' neda', Bönni' Guljë' Bönachi, ¿naru' idzólida' nupa ta'yéajlë' neda' luyú ni?

*Tu bönni' yudo' fariseo, en tu bönni' uquízxaj*

<sup>9</sup> Bucúdzu'ë didza' Jesús ca naca quégaquië' bönni' tu'béaj tsahui' cuíngaquië', en tu'cá'anë' cá'asö ia'zíca'rö bönachi. <sup>10</sup> Gunné':

—Bila'dxinë' chopë' bönni' ga naca chila yudo' para ulu'lídze' Dios. Tuë' bönni' na' náquië' bönni' yudo' fariseo, ate' ia'túe' na' náquië' bönni' ruquízxjë' lázagaca bönachi. <sup>11</sup> Guzuínë' bönni' yudo' fariseo na', en caní bulidzë' Dios, rnnë': "Dios, rea' Li': Xclenu', tu' cabí naca' ca nácagaquië' ia'zíca'rë' bönni', nácagaquië' gubán, en biti' nácagaquië' tsahui'. Ta'guitsjë' xibá que yöl-la' nutsaga na'. Lësca' biti' naca' ca bönni' uquízxaj ni. <sup>12</sup> Neda' runa' gubasa chopá luzuí tu' xunu' dza huéaj, en runödzja' que yudo' tu cö' huéaj tu' chi cö' que yúgu'té le rata' quia'." <sup>13</sup> Guzóazë' zi'tu' bönni' uquízxaj na', en biti' böázxjanë' ichisa lahuë' uyúe' lúzxiba, pero gudapë' luchu'ë, rnnë': "Dios, buéchi' ladxi' neda', bönni' dul-la'." <sup>14</sup> Neda' rea' libíili': Böajë' lidzë' bönni' uquízxaj na', nuhuöáquië' tsahui' lahuë' Dios, caléga ia'túe' bönni' ni'. Núti'tés bönni' run ba zxön cuinë', gunë' Dios ga huöta' igulë', pero nu bönni' rizóë' nözxaj ladxi', gunë' Dios ga gácarë' lo.

*Jesús rulidza tsáhuë'ë-bi' yugu' bï'ido'*

(Mt. 19:13-15; Mr. 10:13-16)

<sup>15</sup> Ní'irö bila'dxinë' yugu' bönni', en nigula ga zoë' Jesús, naché'gaquië'-bi' yugu' bï'ido' quégaquië' para ixóa né'ë Jesús légacabi'. Cate' bila'lé'enë' yugu' bönni' usëda queë' Jesús lë ni, gula'dil-lë' légaquië'. <sup>16</sup> Ní'irö Jesús bulidzë' yugu' bönni' dá'gaquië' Lë', rnnë':

—Guli'gü'i-bi' lataj ila'dxinbi' bï'ido' ni ga zoa'. Biti' uzágala'li' xinózagacabi', tu' gata' quégaca nupa nácagaca ca bi'i caní lataj ga rinná bë'ë Dios. <sup>17</sup> Le nácatë rea' libíili': Nu cabí si' lu né'e le rinná bë'ë Dios, ca runbi' tubi' bï'ido', biti' ca' tsaza ga ni' rinná bë'ë Lë'.

*Tu bönni' rile'ënë' yöl-la' tsahui'*

(Mt. 19:16-30; Mr. 10:17-31)

<sup>18</sup> Tu bönni' unná bë' gunábinë' Jesús, rnnë':

—Bönni' Usedi idú dxi'a. ¿Bizxi ral-la' guna' para idéli'da' yöl-la' na'bán idú?

<sup>19</sup> Jesús rë' lë':

—¿Bizx que rë'u neda': "Idú dxi'a"? Cuntu nu bönni' náquië' idú dxi'a. Tuzé' Dios náquië' idú dxi'a. <sup>20</sup> Nöz quézinu' yugu' le gunná bë'ë Dios:

Biti' gunu' dul-la' le riguitsaj xibá que yöl-la' nutsaga na'.

Biti' gútigacu' bönachi.

Biti' cuanu'.

Biti' innío' que luzó'o le cabí nácatë.

Ben bal xuz xinó'o.

<sup>21</sup> Bönni' na' rë' Jesús, rnnë':

—Yúgu'té lë ni runa' ga gudela' naca' bï'ido'.

<sup>22</sup> Cate' biyönnë' Jesús didza' ni, rë' lë':

—Ia'tú le riyadzaj quiu' gunu'. Bëti' yúgu'té le dë quiu', ate' lë na' si'u bunödzaj quégaca bönachi yechi', ate' gata' quiu' yöl-la' tsahui' yehua' yubá. Ní'irö gudá, gudá' neda'.

<sup>23</sup> Cate' bönni' na' biyönnë' didza' ni, ruhu'innë', tu' dëda' yöl-la' tsahui' queë'. <sup>24</sup> Cate' bilé'enë' Jesús ca na' ruhu'innë' bönni' na', rnnë':

—¡Bica' böniga gaca, ila'yaza nupa ta'lé'e yöl-la' tsahui' ga rinná bë'ë Dios! <sup>25</sup> Gácarö tódiba' böa' nagui yötsi', ca tsázië' tu bönni' rile'ënë' yöl-la' tsahui' ga rinná bë'ë Dios.

<sup>26</sup> Ní'irö nupa bila'yöni didza' ni gula'nná:

—¿Nuzxi caz gaca ulá, channö?

<sup>27</sup> Jesús gudxë' légaquië':

—Le biti' gaca ilunë' bönni', huáca gunë' Dios.

<sup>28</sup> Ní'irö Pedro rë' Jesús:

—Buyútsöca', netu' nucá'anatu' yúgu'té le dë queëtu', en dá'atu' Li'.

<sup>29</sup> Ní'irö Jesús rë' légaquië':

—Le nácatë rea' libí'ili', nu bönni' ucá'anë' lidxë', o xuz xiné'ë, o yugu' böchi' zanë', o nigula queë', o yugu' zxí'ine', tu' ru'i ládxë'ë inná bë'ë Dios, <sup>30</sup> bönni' ni huazí'irë' dza ni zóaru' na'a, ate' dza si' za' idéli'në' yöl-la' na'bán idú.

*Jesús riguíxjö'ë leyúbölö ca si' ilútië' Lë'*

(Mt. 20:17-19; Mr. 10:32-34)

<sup>31</sup> Jesús guché'ë quez queë' idxínnute' bönni' usëda queë', en rë' légaquië':

—Buli'yútsöca', ribenru' zéajru' Jerusalén, ga ni' ilaca yúgu'të le nazúajgaca lu guichi ca gula'nné' bönni' gulu'ë didza' uláz queë' Dios ca ral-la' gaca quia' neda', Bönni' Guljë' Bönachi. <sup>32</sup> Yugu' bönni' Jerusalén ulu'dödë' neda' lu ná'agaquië' bönni' zi'tu', ate' ulu'titje' neda', en ulu'lidza zi'ë neda', en ulu'chejë' neda' zxöna'. <sup>33</sup> Ila'guinë' neda', ate' tódirö ni' ilútië' neda', pero cate' gaca tsomma dza ubana'.

<sup>34</sup> Biti' gula'yéajni'inë' bönni' usëda queë' didza' ni, en biti' guléquibe'enë' ca sa'yéaj le ru'ilenë' légaquië' didza' que, tu' naca le cabí sequi' ila'yéajni'inë'.

*Jesús ruúnë' tu bönni' yödzö Jericó nachul-la lahuë'*

(Mt. 20:29-34; Mr. 10:46-52)

<sup>35</sup> Cate' chizóa idxinë' Jesús yödzö Jericó, zoë' tu bönni' ni' nachul-la lahuë'. Rö'ë ra' nöza rinabë' nu bi gúnnasö queë'. <sup>36</sup> Bönni' ni' biyönnë' ta'dödi bönachi zián ni', ate' gunabë' bizxi na'raca. <sup>37</sup> Bönachi ni' të lë':

—Jesús, bönni' Nazaret, ridödë' ni.

<sup>38</sup> Ni'irö bönni' na' nachul-la lahuë' bë'ë zidzaj didza', rnnë':

—Jesús, zxí'ini xi'sóe' David, buéchi' ladxi' neda'!

<sup>39</sup> Yugu' bönni' nanórumaquië' lahuë' Jesús gula'dil-lë' bönni' na' nachul-la lahuë' para usayaj ru'ë, pero lë' zídzajrë bë'ë didza', rnnë':

—Jzxí'ini xi'sóe' David, buéchi' ladxi' neda'!

<sup>40</sup> Ni'irö guzé' dxiz Jesús ribözë', ate' gunná bë'enë' nu tsöjjidza lë' para idxinë' lahuë'. Cate' bönni' na' nachul-la lahuë' bidxinë' lahuë' Jesús, gunábinë' Jesús lë', rnnë':

<sup>41</sup> —¿Bizxi rë'ënu' guna' quiu'?

Bönni' na' nachul-la lahuë' rnnë':

—Ré'ënida' huoálaj guiój lahua'.

<sup>42</sup> Jesús rë' lë':

—Chiböálaj guiój lo'. Chiböácu' tu' réajlë'u neda'.

<sup>43</sup> La' ní'isö bulé'etenë', ate' sa'yéajlenë' Jesús, rigu'ë Dios yöl-la' ba. Lësca' yúgu'të bönachi nacuá' ni', en bila'lé'e lë na' guca gula'gú'u Dios yöl-la' ba.

## 19

*Jesús, en Zaqueo*

<sup>1</sup> Ni'irö guyázië' Jesús yödzö Jericó, en ridödë' lu yödzö na'. <sup>2</sup> Zoë' tu bönni' lë' Zaqueo ni', bönni' lo ládjagaquië' bönni' uquízxaj, ate' dë yöl-la' tsahui' queë'. <sup>3</sup> Rui'i ládxë'ë bönni' ni ilé'enë' Jesús, pero biti' guca queë' tu' nacuá' bönachi zián ni', en náquië' bönni' ga ré'ëdo'. <sup>4</sup> Ni'irö carelö yöjnóruë' lógaca bönachi zián na', ate' yöjchenë' tu lu yaga para gaca ilé'enë' Jesús, tu' ral-la' tödë' ni'. <sup>5</sup> Cate' bidxinë' Jesús ni', guchisa lahuë' ruyúë' ga na' dxíë' Zaqueo na', en rë' lë':

—Zaqueo, bőjtatë lu yaga na', tu' run bayudxi tsöjjgá'ana' lidxu' na'a.

<sup>6</sup> Ni'irö la' bőjtatë' Zaqueo lu yaga, ate' lu yöl-la' rudzeja queë' guché'ë Jesús lidxë'.

<sup>7</sup> Cate' bila'lé'e bönachi nacuá' ni' lë ni, gula'sí lógaquië' yúgu'të' ta'nné' queë', ta'nné':

—Guyázië' Jesús ugá'analenë' bönni' dul-la'.

<sup>8</sup> Ni'irö guzuínë' Zaqueo, en rë' Xanru':

—Xan, buyútsöca'. Gatsaj le dë quia' gu'a quégaca bönachi yechi', en channö bi gudödi bë' buquizxa' bönachi, ubi'a quégaca bönachi na' tapa cõ'tëlö ca'.

<sup>9</sup> Jesús rë' lë':

—Na'a dza ni bidxín yöl-la' rusölá quégaca nupa nacuá' yu'u ni, tu' nababë' bönni' ni di'a dza queë' Abraham. <sup>10</sup> Bida' neda', Bönni' Guljë' Bönachi, ududilja', en udusölá' nupa nanítigaca.

*Rucúdzu'ë didza' Jesús que chi cö' dumí*

<sup>11</sup> Tsanni ni' ta'yönné' didza' ni ru'ë Jesús, rë' légaquië' le rucúdzu'ë didza', tu' chizóa ila'dxiné' yödzö Jerusalén, ate' téquiné' chizóatë ilá' lahui le rinná bë'ë Dios. <sup>12</sup> Caní rnné' Jesús:

—Zoë' tu bönni' lo, sa'yéajé' tu yödzö zi'tu' para si' lu në'ë yöl-la' unná bë', ate' ní'irö huödë'. <sup>13</sup> Cate' chizóa tsejé' ni' bulidzë' chië' bönni' huen dxin queë', en bë'ë que queëgaquië' tu cö' huéaj dumí, ate' rë' légaquië': "Guli'guílajlen dumí ni tsanni huöda'." <sup>14</sup> Yugu' bönni' uládz queë' biti' ta'lé'enë' lë' dxi'a, ate' gula'sól-lë'ë yugu' gubáz quégagaquië' ga ni' tsejé', ila'nné': "Biti' ré'énitu' inná bë'enë' bönni' ni netu'." <sup>15</sup> Ní'irö guzxi' lu në'ë yöl-la' unná bë', ate' budxiné' ladzë'. Cate' bidxiné' ni' gunná bë'enë' nu tsöjlidza yugu' bönni' huen dxin na' budödë' lu ná'agaquië' dumí na', para inóziné' gáca'xi bulu'guílajlené' le tu tué'. <sup>16</sup> Cate' bönni' zí'alö na' bidxiné' lahuë', rnné': "Xan, tu cö' dumí quiu' na' chibén icja ia'chí cö' ca'." <sup>17</sup> Xané' na' rë' lë': "Tsahui' benu'. Nacu' huen dxin tsahui'. Tu' dxi'ado' bugunu' dxin láti'do'os na' guta' lu no'o, na'a, guna' ga inná bë'enu' chi yödzö." <sup>18</sup> Ní'irö bidxiné' ia'túé' bönni' huen dxin na' lahuë' lë', rnné': "Xan, tu cö' dumí quiu' na' chibén icja ia'gayu' cö' ca'." <sup>19</sup> Xané' na' rë' ca' lë': "Inná bë'enu' gayu' yödzö." <sup>20</sup> Ní'irö bidxiné' ia'túé' lahuë' lë', rnné': "Xan, ni dë tu cö' dumí quiu' na'. Ben chi'a le, butúlida' le lari'. <sup>21</sup> Caní bena' tu' rádxida' li', tu' nacu' bönni' bizxaj. Runu' ca na' ta'nná bönnachi: Ruzi'u le cabíbuzú', en rulapu' ga biti' guzu'." <sup>22</sup> Ní'irö xané' na' rë' lë': "Nacu' huen dxin biti' naca tsahui'. Ni'a que didza' bë'u uchi'a usöró'a li'. ¿Réquibe'enu' naca' bönni' bizxaj: Ruzi'a le cabíbuzó', en rulapa' ga biti' guzu'?" <sup>23</sup> Na'a, ¿bizx que biti' yöjlú'u dumí quia' na' ga gun icja, para cate' huöda', uzi'a le idú len icja na'?" <sup>24</sup> Ní'irö rë' nupa nacuá' ni': "Guli'cúa lu në'ë dumí na', ate' guli'gü'i queë' bönni' na' dë queë' chi cö' dumí." <sup>25</sup> Légaquië' té' lë': "Xan, chidé queë' chi cö' dumí." <sup>26</sup> Ní'irö bubí'ë didza' xángaquië', rnné': "Rea' libí'ili': Nu rugún dxi'a dxin le do' dë lu në'e, ulu'zxöni ládxí'gaca lë' ia'late', pero nu biti' rugún dxi'a dxin le do' dë lu në'e, ulu'béaj lu në'e lë na' guta' lu në'e. <sup>27</sup> Ca naca quégagaquië' bönni' ni' biti' ta'lé'enë' neda' dxi'a, en biti' gulé'ënné' inná bë'eda' légaquië', guli'tsöjzxí' légaquië' para ídigaquië' ni, ate' guli'guti légaquië'."

*Len yöl-la' ba zxön razie' Jesús yödzö Jerusalén*

(Mt. 21:1-11; Mr. 11:1-11; Jn. 12:12-19)

<sup>28</sup> Cate' budxi gunné' caní Jesús, buguélë'ë xinözë', sa'yéajé' zaca' yödzö Jerusalén.

<sup>29</sup> Cate' bila'dxiné' gala' ga nacuá' yödzö Betfagé, en yödzö Betania, ga naca ra' gui'ado' nazí'i le Gu'a Yaga Olivo, gusól-lë'ë Jesús chopé' bönni' usëda queë', <sup>30</sup> ate' rë' légaquië':

—Guli'tséaj yödzödo' ni' ca dödilö ga zóaru', en cate' idxinli' ni', tsöjxáca'lí'-ba' tuba' búrrodo' nágaba' ni', búrrodo' na' cuntu nu ribíani lëba'. Guli'sedxi-ba', en guli'duché'-ba' quia' ni. <sup>31</sup> Channö zoa nu rinábini libí'ili', inná: "¿Bizx que risédxili'-ba'?", ubí'ili' didza' caní innali': "Xanru' riquinné'-ba'."

<sup>32</sup> Sójáquië' bönni' usëda queë' na' nasól-lë'ë, ate' yöjxáca'gaquië'-ba' ca na' chigudxé' Jesús légaquië'. <sup>33</sup> Cate' gula'sedxe'-ba' búrrodo' na', yugu' bönni' xanba' té' légaquië':

—¿Bizz que risédxili'-ba' búrrodo' na'?

<sup>34</sup> Bulu'bí'ë didza', ta'nné':

—Xanru' riquinné'-ba'.

<sup>35</sup> Gula'ché'ë-ba' ga na' zoë' Jesús. Cate' chigula'xóë' yugu' lari' tsölá'a quégagaquië' cúdzu'ba' búrrodo' na', bulu'dxíë' Jesús cúdzu'ba' lahui lari' na'. <sup>36</sup> Gapa ral-la' tödë' Jesús, gula'chiljë' lari' quégagaquië' la' nöza. <sup>37</sup> Cate' chibila'dxiné' gala' ga zoa lidinni que Gu'a Yaga Olivo, lu yöl-la' rudzeja quégagaquië' gula'sí lógaquië' yúgu'té bönni' dá'gaquië' Jesús,

tu'ë zidzaj didza', ta'gu'ë Dios yöl-la' ba, ni'a quégaca yugu' yöl-la' huáca zxön bila'lé'enë' benë' Jesús. <sup>38</sup> Ta'nné':

—¡Yöl-la' ba bönni' unná bë' ni zé'ë uláz queé' Xanru' Dios! ¡Yehua' yubá za' le ribequi dxi ládxí'ru'! ¡Yöl-la' ba Dios!

<sup>39</sup> Ní'irö yugu' bönni' yudo' fariseo nútsa'gaquië' ladaj bönachi zián ni' të' Jesús, ta'nné':

—¡Bönni' Usedi, gudil-la yugu' bönni' usëda quiu'!

<sup>40</sup> Bubi'ë didza' Jesús, rë' légaquië':

—Rea' libí'ili': Channö ila'cuá' dxíë' bönni' ni, yugu' guiój hualu'i caz zidzaj didza'.

<sup>41</sup> Cate' bidxinë' Jesús gala' ra' yödzö na', en rilé'enë' le, ní'irö ribödxë' que, <sup>42</sup> rnnë':

—Raca ládex'a huanózili' na'a dza le gaca gun ga cuéqui dxi ládxí'li' lahuë' Dios, pero na'a chinagachi' queéli', para cabí ilé'eli' le. <sup>43</sup> Huala'dxín queéli' dza cate' nupa biti' ta'lé'e libí'ili' dxí'a ila'bequi zö'ö idú gásibi'ilö ga zóali', en ila'gú'u libí'ili' lë'alö, ate' yúgu'të lataj idú gásibi'ilö ilúnlenë' libí'ili' gudil-la. <sup>44</sup> Ulu'quínnajé' zö'ö run chi'i yödzö queéli', en ilútië' nupa nacuá' lu yödzö ni. Biti' ugá'ana guiój lahui luzé'e. Yúgu'të lë ni gaca queéli' tu' cabí gúquibe'eli' dza bidë' Dios buduyúë' libí'ili'.

### Rulatjé' Jesús lõ'a yudo'

(Mt. 21:12-17; Mr. 11:15-19; Jn. 2:13-22)

<sup>45</sup> Ní'irö guyázië' Jesús lõ'a yudo', en gusí lahuë' rubéajë' ní'ilö yúgu'të nupa tuti', en nupa to'o ga naca lõ'a yudo'. <sup>46</sup> Rë' légaquië':

—Nazúaj lu guichi lá'ayi, rnna: “Lidxa' naca yu'u ga ulu'lidza bönachi Dios”, pero libí'ili' chinunli' le ca tu lídxigaca bönni' gubán.

<sup>47</sup> Yugu' dza rusédinë' Jesús bönachi ga naca chila yudo', ate' gula'zóa gula'bö'ë bixúz unná bë', len bönni' yudo' tu'sédinë', en yugu' bönni' lo que lu yödzö ilútië' Lë'. <sup>48</sup> Biti' bulu'dzölinë' nacxi ilútië' Lë', tu' idú ládxí'gaca tu'zé nágagaca yúgu'të bönachi xtídzë'ë.

## 20

### Yöl-la' unná bë' dë lu në'ë Jesús

(Mt. 21:23-27; Mr. 11:27-33)

<sup>1</sup> Tu dza, cate' ni' rusédinë' Jesús bönachi ga naca chila yudo', en riguíxjö'ë didza' dxí'a, bila'dxinë' yugu' bixúz unná bë', en bönni' yudo' tu'sédinë', len bönni' gula tu'zéajni'inë', ga na' zoë', <sup>2</sup> ate' të' Jesús:

—Gudixjö'i netu'. ¿Bixxi yöl-la' unná bë' dë lu no'o runu' caní? ¿Nuzxi caz budödi lu no'o yöl-la' unná bë' ni?

<sup>3</sup> Bubi'ë didza' Jesús, rë' légaquië':

—Inábida' ca' libí'ili' tu didza', ate' ubí'ili' innali'. <sup>4</sup> ¿Nuzxi gusõl-la' Juan ruquilë' bönachi nisa? ¿Naru' Dios, o bönachi?

<sup>5</sup> Gulún xtídzä'gaquië' la' légacasë' bönni' yudo' na', ta'nné':

—Channö innaru': Gusõl-lë'ë Dios lë', guíë' rë'u: “¿Bixxi que biti' guyéajlé'ëli'-në'?”

<sup>6</sup> Channö guiéru'-në': Gula'sõl-lë'ë yugu' bönni' lë', bönachi lu yödzö ni ulu'ladxi' rë'u guiój, tu' nöziguequi bë'ë didza' Juan na' uláz queé' Dios.

<sup>7</sup> Ní'irö bulu'bí'ë didza', ta'nné':

—Biti' nöztu' nuzxi na' gusõl-la' Juan.

<sup>8</sup> Ní'irö Jesús rë' légaquië':

—Neda' ca' biti' guía' libí'ili' bi yöl-la' unná bë' rúnida' caní.

### Yugu' bönni' huen dxin biti' nácagaquië' tsahui'

(Mt. 21:33-44; Mr. 12:1-11)

<sup>9</sup> Ní'irö la' gusí lotë' Jesús ru'ilenë' bönachi nacuá' ni' didza'. Rucúdzu'ë didza', rnnë':

—Zoë' tu bönni' budé'ë yugu' lubá uva lu xiyúë', ate' budödë' luyú na' lu ná'agaquië' bönni' huen dxin para ilún gatsjë' len lë' le ulu'zi'ë, ate' guyijë' zi'tu' ga ni' bugá'anë' xidzé. <sup>10</sup> Cate' bidxín dza ulu'chibé' uva luyú na', gusól-lé'ë tuë' bönni' gubáz queë' ga na' nacu'ë huen dxin na' para si'ë uláz queë' que le ulu'zi'ë, pero huen dxin na' gulúndë'ë lë' zi', en bulu'sól-lé'ë lë' cá'asö. <sup>11</sup> Leyúbölö gusól-lé'ë ia'tué' gubáz queë', ate' légaquië' gulúndë'ë lë' ca' zi', en gulu'ë dö' queë', ate' bulu'sól-lé'ë lë' cá'asö. <sup>12</sup> Leyúbölö gusól-lé'ë quégaquië' bönni' bunni gubáz queë', ate' bulu'dxié' ca' lë' huë', en bulu'béajë' lë' ní'ilö luyú na'.

<sup>13</sup> 'Ní'irö guzá' ládxë'ë xani luyú na', gunnë': "¿Nacxi guntsa'? Isöll-la'a zxí'ini caza' nadxi'ida'-bi' quégaquië'. Cate' ila'lé'enë'-bi', nadxi ca' ilunë'-bi' bal." <sup>14</sup> Ní'irö, cate' yugu' bönni' huen dxin na' bila'lé'enë'-bi', gulún xtídza'gaquië' la' légacasë', ta'nné': "Bi'i ni guequi queébi' luyú ni. Guli'dá, gútiru'-bi', para guequi queéru' le ral-la' guequi queébi'." <sup>15</sup> Bulu'béajë'-bi' ní'ilö luyú na', en gulútië'-bi'.

'Na'a, ¿nacxi caz gunë' xani luyú na' quégaquië'? <sup>16</sup> Guídë', en gútië' yugu' huen dxin na', ate' udödë' luyú queë' lu ná'agaca bönnachi yúbölö.

Cate' bönnachi nacuá' ni' bila'yöni lë ni, gula'nné':

—¡Inná Dios biti' gaca caní!

<sup>17</sup> Ní'irö buyúë' Jesús légaquië', rnné':

—¿Bizxi sa'yéaj lë na' nazúaj lu guichi lá'ayi, rnna:

Guiój na' gula'rú'unë' bönni' huen zö'ö,

guiój ni chinaca guiójlen squin zö'ö?

<sup>18</sup> Núti'tës nu ibixi lahui guiój ni, quitsaj nu na', ate' nu bönni' tsöjbága' guiój ni lë', uzxuzxaj lë'.

### *Ca naca dumí ta'guizxaj lázagaca bönnachi*

(Mt. 21:45-46; 22:15-22; Mr. 12:12-17)

<sup>19</sup> La' dza ní'isö, yugu' bixúz unná bë' len bönni' yudo' tu'sédinë' gula'zóá gula'bö'ë ila'zönë' Jesús, tu' téquibe'enë' gunnë' quégaquië' lë na' bucúdzu'ë didza', pero guládxinë' bi ilún bönnachi zián nacuá' ni'. <sup>20</sup> Ní'irö bulu'yúyenië' Jesús, en gula'sól-lé'ë yugu' bönni' para ulu'béajë' Lë' didza', bönni' ulu'lui'i cuíngaqüie' ca bönni' tsahui', para ilunë' ga bi inné' Jesús, para gaca ulu'dödë' Lë' lu në'ë bönni' rinná bë'enë' uláz queë' César.

<sup>21</sup> Para ilunë' caní, gula'nábinë' Jesús, ta'nné':

—Bönni' Usedi, nöztu' rnno' le nácatë, en rusédinu' le nácatë, en biti' ruchi'a rusöróu' ca naca le tu'lui'isö lahui bönnachi, pero idútë li naca ca rusédinu' xibá queë' Dios.

<sup>22</sup> Gudíxjöi'i netu'. ¿Naru' run bayudxi quizxaj laztu' queë' César, bönni' Roma rinná bë'ë, o cabí?

<sup>23</sup> Réquibe'enë' Jesús le té'ënnë' ilunë' queë', ate' rë' légaquië':

—¿Bizz que rizi' bë'ëli' neda'? <sup>24</sup> Buli'lui'itsöqui' neda' tu dumí ridá. ¿Nuzxi lahui da' lë' ni, en nuzxi le nazúaj ni?

Bulu'bí'ë didza', ta'nné':

—Queë' César na'.

<sup>25</sup> Ní'irö Jesús rë' légaquië':

—Buli'nödzaj queë' César le nequi queë' César, ate' queë' Dios le nequi queë' Dios.

<sup>26</sup> Biti' guca ilunë' ga bi inné' Jesús para gaca ulu'zéguië' Lë' didza' lógaca bönnachi zián na', pero bulu'báninë' ca naca didza' bubí'ë, ate' bulu'sayaj ruá'agaquië'.

### *Ca gaca quégaca nupa ulu'bán lu yöl-la' guti*

(Mt. 22:23-33; Mr. 12:18-27)

<sup>27</sup> Ní'irö yugu' bönni' yudo' saduceo, nupa na' ta'nná biti' ulu'bán nupa chinátigaca, bila'dxinë' ni', ate' gula'nábinë' Jesús, ta'nné':

<sup>28</sup>—Bönni' Usedi, Moisés buzúajé' queéru' lu guichi, le rnna: “Channö gátië’ nu bönni’, ate’ ugá’ananu nigula queé’, en channö cuntu nu zoa bi’i queé’, ní’irö bi’i bőchi’bi’ ral-la’ sí’ibi’-nu nigula queé’ na’, para uzóabi’ bi’i queébi’ bőchi’bi’ na’ gútibi’.” <sup>29</sup> Gula’cuá’abi’ gadxi bi’i bönni’ nácagacabi’ bőchi’bi’, ate’ bi’i zí’alö na’ butsaga ná’alenbi’ bi’i nigula, en gútibi’, biti’ zóabi’ bi’i queébi’. <sup>30</sup> Ní’irö bi’i buropi na’ butsaga ná’alenbi’-nu nigula na’, ate’ gútibi’ ca’ bi’i ni, biti’ zóabi’ bi’i queébi’. <sup>31</sup> Butsaga ná’alenbi’-nu bi’i bunni na’, ate’ la’ tuz ca’ gulunbi’ igádxitëbi’, ate’ gulátibi’, biti’ zóabi’ bi’i quégacabi’. <sup>32</sup> Ga búdxitë, gútinu ca’ nigula na’. <sup>33</sup> Na’ a, cate’ ulu’bán nupa chinátigaca, ¿núzxilöbi’ guéquinu nigula na’ queébi’, tu’ bulu’tsaga ná’alenbi’-nu igádxitëbi’?

<sup>34</sup> Ni’irö bubí’ë didza’ Jesús, rë’ légaquië’:

—Tu’tsága ná’agaca bönachi dza ni zóaru’ na’ a, en tu’nödziejë’-bi’ zxí’inigaquië’ para ulu’tsaga ná’agacabi’. <sup>35</sup> Na’ a, nupa nácagaca lesaca’ ulu’bán lu yöl-la’ guti, en tsöjcuá’ yödzölió si’ gata’, biti’ ilún yöl-la’ rizóalen nigula, en biti’ ulu’tsaga ná’agaca. <sup>36</sup> Caní gaca, tu’ cabirö ilati nupa na’ ulu’bán lu yöl-la’ guti, pero ilácagaca ca nácagaquië’ gubáz lá’ayi queé’ Dios, en ilácagaca zxí’ini cazë’ Dios. <sup>37</sup> Ca na’ ral-la’ ulu’bán nupa chinátigaca, rulu’í’ inë’ rë’ u Moisés caz ga na’ nazúaj lu guichi ca naca que yaga yötsi’ régui, ga ni’ ru’ë didza’ Xanru’, rnnë’ náquië’ Dios queé’ Abraham, en Dios queé’ Isaac, en Dios queé’ Jacob. <sup>38</sup> Dios náquië’ Dios, caléga quégaca nupa nátigaca tsaz, pero quégaca nupa nabángaca, tu’ nabángaca lahuë’ Lë’ yúgu’të bönachi, sal-la’ gulati luyú ni.

<sup>39</sup> Ni’irö bulu’bi’ë didza’ bal-lë’ bönni’ yudo’ usedi, ta’nné’:

—Bönni’ Usedi, dxí’ado’ gunnó’.

<sup>40</sup> Bíti’rö bulu’rúguinë’ ila’nábinë’ Lë’ didza’.

*¿Nuzxi zxí’ini náquië’ Cristo?*

(Mt. 22:41-46; Mr. 12:35-37)

<sup>41</sup> Ni’irö Jesús rë’ légaquië’:

—¿Nacxi caz na’ ta’nné’: “Cristo náquië’ zxí’inë’ David”? <sup>42</sup> David caz bë’ë didza’ le nazúaj lu guichi lá’ayi ga nazúajgaca salmo, le rnna:

Xanru’ Dios gudxë’ Xana’:

“Gurö’i cuita lë’ a ibëla

<sup>43</sup> cate’ gunra’ ga ulu’zechu zxí’bigaca lo’ nupa ta’dá’baga’ Li’.”

<sup>44</sup> David caz na’ gunnë’ queé’ náquië’ Xanë’. ¿Nacxi caz naca, rnnali’ lib’ili’ náquië’ zxí’inë’?

*Jesús ruzégui’ë diza’ bönni’ yudo’ tu’sédinë’*

(Mt. 23:1-36; Mr. 12:38-40; Lc. 11:37-54)

<sup>45</sup> Tsanni ni’ yúgu’të bönachi nacuá’ ni’ tu’zé’ nágagaca Jesús, rë’ yugu’ bönni’ usëda queé’:

<sup>46</sup>—Guli’gún chi’i cuinli’ quégagaquië’ bönni’ yudo’ tu’sédinë’, tu’ ta’yaza ládxı’gaquië’ ta’dé’ nácugaquië’ lari’ tunna, en té’enné’ ulu’lidza bönachi légaquië’ zxön gapa naca lu yé’ëyi, en ta’yaza ládxı’gaquië’ ca’ ta’bö’ë lataj lo gapa tu’dubë’ tu’sëdë’ queé’ Dios, en gapa ta’bö’ë tahuë’. <sup>47</sup> Ta’gúë’ lídxigacanu nigula uzébido’, ate’ para ulu’lui’i tsahui’ cuíngagaquië’, xidzé tu’lidzé’ Dios. Yugu’ bönni’ ni, yénni’térö gunë’ Dios ga ila’gu’i ila’záquië’.

*Gun le gulú’unu tu nigula yechi’ lahuë’ Dios*

(Mr. 12:41-44)

<sup>1</sup> Ga na’ zoë’ Jesús chila yudo’, guchisa lahuë’, en rilé’enë’ yugu’ bönni’ dë yöl-la’ tsahui’ quégagaquië’, ta’gu’ë dumí lu gu’ina que dumí gun que yudo’. <sup>2</sup> Bilé’enë’ ca’ tu nigula yechi’ uzébido’, rigú’unu chopá dumí lásido’, le nazáca’gaca láti’do’os. <sup>3</sup> Rnnë’ Jesús:

—Le nácatë rea' libí'ili', tu le zxóntérö gulú'unu nigula yechi' uzébido' ni ca ia'zíca'rö böñachi na' ta'gu'ë dumí. <sup>4</sup> Yúgu'të', tsca le nadödi bë' dë quégaquië', gula'gu'ë dumí que yudo', pero nigula ni, lu yöl-la' yechi' queénu gulú'unu idútë le dë queénu, le ral-la' gáhuinu.

*Riguíxjö'ë Jesús ca ulu'sunítië' yudo'*  
(Mt. 24:1-2; Mr. 13:1-2)

<sup>5</sup> Nacuá' ni' nupa tu'i didza' ca naca que yudo' na', ca na' nazí'i biquitaj que, yugu' guiój nazácalë'egaca, en yugu' gundo' nácagaca lachi, ate' Jesús rë' légaquië', rnnë':

<sup>6</sup> —Yúgu'të lë ni rilé'eli', huadxín dza cate' bíti'rö ugá'ana guiój lahui luzé'e ni, tu' ulu'suniti böñachi yudo' ni.

*Le ilaca bë' cate' si' idxín dza údxi*  
(Mt. 24:3-28; Mr. 13:2-23)

<sup>7</sup> Ní'irö gula'nábinë' Jesús, ta'nné':

—Bönni' Usedi, ¿bátaxi gaca lë ni? ¿Bizxi gaca bë' chizóa gaca caní?

<sup>8</sup> Bubi'ë didza' Jesús, rnnë':

—Guli'gún chi'i cuinli', para cabí nu si' ye'e libí'ili', tu' ila'lá'gaquië' bönni' zián, en ila'zí'i lágaquië' ca lea' neda', ila'nné' nácagaquië' Cristo, en ila'nné': "Chizá' gala' dza údxi." Neda' rea' libí'ili': Biti' tséajlenli' légaquië'. <sup>9</sup> Cate' yónili' raca gudil-la, en ta'dá'baga' böñachi yúlahui', biti' gadxi idzóbili', tu' run bayudxi ilaca le caní, pero biti' zuítensi dza údxi.

<sup>10</sup> Ní'irö rë' ca' légaquië':

—Til-la tu yödzö len ia'tú yödzö, ate' böñachi tu ga nu rinná bë' ila'díl-lalen böñachi ia'tú ga nu rinná bë'. <sup>11</sup> Tódigaca budó' zxu', ate' zián lataj gaca gubín, en ilatsaj yödzöhué' zxön. Ila'lá' lahui lúzxiba le ilún gadxi böñachi, en le ilaca bë'.

<sup>12</sup> 'Zí'atélö cate' si' ilaca lë ni, ila'zón böñachi libí'ili', en ila'bía ládxi'gaca libí'ili'. Ila'ché'ë libí'ili' gapa tu'dubë' tu'sédë' queé' Dios para ilútië' libí'ili', en ila'gu'ë libí'ili' lidxi guíë. Ila'ché'ë libí'ili' lógaquië' bönni' ta'nná bë'ë, en lógaquië' bönni' lo, tu' dá'ali' neda'. <sup>13</sup> Gaca caní queéli' para séqui'li' gunli' ba nalí quia' neda'. <sup>14</sup> Tsutsu guli'gún ládxi'li', para cabí cuéqui ícjali' zí'alö nacxi innalí uláz queéli', <sup>15</sup> tu' gunna' queéli' didza' ubí'ili', en yöl-la' réajni'i, para cabí gaca ulu'cul-lë' libí'ili', en para cabí gaca bi ila'nné' que xtídza'li' bönni' ni' biti' ila'lé'enë' libí'ili' dxi'a. <sup>16</sup> Ní'irö xuz quézili' ulu'dödë' libí'ili', en cá'anqueze yugu' bönni' böchi' quézili', en yugu' di'a dza que quézili', en yugu' böchi' luzé'e quézili', ate' ilútië' bál-lali'. <sup>17</sup> Yúgu'të böñachi ulu'zóa libí'ili' tsölá'alö tu' dá'ali' neda', <sup>18</sup> pero biti' initi nitú guitsa' ícjali'. <sup>19</sup> Channö ugá'analí' tsutsu, idéli'li' yöl-la' na'bán idú.

<sup>20</sup> 'Cate' ilé'eli' bönni' röjáquië' gudil-la nagú'ugaquië' lë'a Jerusalén, inózili' chibidxín dza initi yödzö ni. <sup>21</sup> Ní'irö nupa nacuá' luyú Judea ral-la' ila'zxunnaj ni, en tsöjaca gapa naca guí'ado', ate' nupa nacuá' lu yödzö ni ral-la' ila'rúaj ni, ate' nupa nacuá' la' guixi', biti' ral-la' ulu'dxín lu yödzö ni. <sup>22</sup> Yugu' dza ni' Dios gunë' xíguia' nupa nacuá' yödzö ni para gaca yúgu'të le nazúaj lu guichi lá'ayi ca ral-la' gaca quégaquië'. <sup>23</sup> Cate' idxín dza ni', bica' bayechi' yugu' nigula nuá'gacanu-bí' bí'ido' si' ilaljbi', en nigula tu'gádxi'nu-bí' bí'ido', tu' ila'gu'i ila'záca'da' böñachi nacuá' ni', ate' Dios gúndë'ë böñachi ni' xíguia'. <sup>24</sup> Ilátië' ziánë' lu gudil-la na', ate' ila'ché'ë ia'bal-lë' nadzúngaqüië' ga ila'dxinë' idútë yödzölió, ate' yödzö Jerusalén ni, ulu'léaj ulu'libë' le bönni' zi'tu', cate' izá'arö dza quégaquië'.

*Le ilaca bë' si' huödë' Bönni' Gulje' Bönachi*  
(Mt. 24:29-35, 42-44; Mr. 13:24-37)

<sup>25</sup> Gunné' ca' Jesús:

—Ni’irö ila’cuá’ le ilaca bë’ lu gubidza, en lu beo’, en yugu’ lu bölaj lúzxiba, ate’ luyú ni ulu’chixi böñachi, en iládxiguequi, tu’ yön chi’i guziú’ yu que nísado’, en que le riyasa ridxía nisa na’. <sup>26</sup> Ulu’dú ládxí’gaca lu yöl-la’ radxi quéguequi tu’ ila’zá’ ládxí’gaca quégaca le ral-la’ ilaca lu yödzölió, en ila’zxizi le nalá’gaca lúzxiba. <sup>27</sup> Ni’irö ila’lé’ené’ neda’, Bönni’ Guljë’ Bönachi, guída’ lu böaj lúzxiba, dë lu na’a yöl-la’ unná bë’, ate’ ilá’ lahui yöl-la’ zxön quia’. <sup>28</sup> Cate’ isí lo ilaca lë ni, buli’tipa ládxí’li’, en guli’chisa loli’, tu’ chizóa udxina’ neda’, para huöá’ua’ libí’ili’.

<sup>29</sup> Jesús gudxé’ ca’ légaquië’ tu le bucúdzu’ë didza’, rnnë’:

—Buli’yútsöca’ ca raca que yaga higo, en que bíti’tés yaga yúbölö. <sup>30</sup> Cate’ rilé’eli’ ta’lén ni’ a né’e hué’énido’, nöz quézili’ chizá’ gala’ cusu ba. <sup>31</sup> Lësca’ caní, cate’ ilé’eli’ chitaca yugu’ lë ni, inózili’ chizá’ gala’ dza idinná bë’ë Dios luyú ni.

<sup>32</sup> ‘Le nácatë rea’ libí’ili’, biti’ ilátigaca böñachi ila’cuá’ dza ni’ cate’ ilaca yúgu’të lë ni.

<sup>33</sup> Ila’dödi que lúzxiba, en que luyú ni, pero xtídza’ a, biti’ tödi cá’asö, tu’ idxín caz ca rnna.

<sup>34</sup> ‘Guli’gún chi’i cuinli’ para cabí güí’ili’ lataj tsaza icja ládxí’do’oli’ le gun ditaj libí’ili’, lë na’ naca yöl-la’ rágulë’e, en yöl-la’ rizudxi, en yöl-la’ ruúbi rugui’i, para cate’ idxín dza ni’, cabí sóali’ niti ladxi’, <sup>35</sup> en para cabí gaca queéli’ ca tu le rizón böñachi, ca naca le gaca quégaca yúgu’të böñachi nacuá’ idútë yödzölió. <sup>36</sup> Que lë ni na’, guli’soa ban ladxi’, en buli’lídzatíca’së’ Dios, para gaca uláli’ lu lë na’ ral-la’ ilaca, en para cabí utu’ili’ cate’ idxinli’ lahua’ neda’, Bönni’ Guljë’ Bönachi.

<sup>37</sup> Lahui’ dza rizoë’ Jesús chila yudo’, rusédinë’ böñachi, ate’ chi’i dzö’ölö rirúajë’ ni’, en rejë’ lu guí’ado’ nazí’i le Guí’ a Yaga Olivo. <sup>38</sup> Yugu’ zila bila’dxín yúgu’të böñachi ga zoë’ Jesús chila yudo’ para ulu’zé’ nágagaca xtídzë’ë.

## 22

*Tun xtídza’gaquië’ ilútië’ Jesús*

(Mt. 26:1-5, 14-16; Mr. 14:1-2, 10-11; Jn. 11:45-53)

<sup>1</sup> Cate’ chizóa idxín laní cate’ tahuë’ yöta xtila cabí nazí’i cúa zi que, nazí’i le Pascua laní na’, <sup>2</sup> bulu’dubë’ yugu’ bixúz unná bë’ len bönni’ yudo’ tu’ sédinë’. Ta’zóa ta’bö’ë ilútië’ Jesús, pero biti’ gula’zéqui’ne’ tu’ tádxinë’ bi ilún böñachi.

<sup>3</sup> Ni’irö Satanás tu’ xihui’ yöjtsaga Judas. Judas lë’ ca’ Iscariote, en nababë’ idxínnutë’ gubáz nasól-lë’ë Cristo. <sup>4</sup> Guyijë’ Judas na’, yöjé’lenë’ didza’ yugu’ bixúz unná bë’, en bönni’ dë lu ná’agaquië’ que yudo’, nacxi gunë’ para udödë’ Jesús lu ná’agaquië’.

<sup>5</sup> Bulu’dzéjanë’ bönni’ yudo’ na’, en gula’zí’ lu ná’agaquië’ ulu’nödzje’ queë’ dumí. <sup>6</sup> Raza ládxë’ë Judas lë ni, ate’ rizóa ribö’ë udödë’ Jesús lu ná’agaquië’ bagáchi’sö.

*Le ráguru’ le rusá’ ládxí’ru’ ca gútië’ Xanru’*

(Mt. 26:17-29; Mr. 14:12-25; Jn. 13:21-30; 1Co. 11:23-26)

<sup>7</sup> Bidxín dza na’ tahuë’ yöta xtila cabí nazí’i cúa zi que, cate’ ral-la’ ilútië’-ba’ bö’cu’ zxila’ le tahuë’ dzö’ Laní Pascua. <sup>8</sup> Jesús gusól-lë’ë Pedro, en Juan, rnnë’:

—Guli’tséaj, guli’tsöjpá’ a queéru’ le gáguru’ dzö’ Laní Pascua.

<sup>9</sup> Të’ Lë’:

—¿Gazxi ré’enu’ tsöjpá’atu’ queéru’?

<sup>10</sup> Jesús ré’ légaquië’, rnnë’:

—Buli’yútsöca’, cate’ tsú’uli’ lu yödzö ni, irúajë’ tu bönni’ dutságuië’ libí’ili’, söjnu’ë tu rõ’ö nisa. Guli’tséajlenë’ ga idxínteli’ yu’u ga tsázië’. <sup>11</sup> Guli’guíë’ xan yu’u na’: “Bönni’ Usedi ré’ li’: ¿Gazxi zoa yu’u laní ga gágulena’ yugu’bönni’ uséda quia’ dzö’ Laní Pascua?”

<sup>12</sup> Ni’irö ulu’inë’ libí’ili’ tu yu’u zxön xitsá’ ga ni’ chinabá’a. Buli’pá’ a ni’ le gáguru’.

<sup>13</sup> Ni’irö yójáquië’, en yójáca’gaquië’ ca na’ chigudxé’ Jesús légaquië’, ate’ bulu’pë’ë ni’ le ilahuë’ dzö’ Laní Pascua.

<sup>14</sup> Cate’ bidxín dzö’ na’, gurö’ë Jesús ga ilahuë’, ate’ bönni’ gubáz queë’ na’ gula’bó’lenë’ Lë’ tsözxón. <sup>15</sup> Ni’irö Jesús ré’ légaquië’:

—Gúcada' ládex'a gágulena' libí'ili' tsözxón xtsö' ni zí'atélo cate' si' qui'i saca'a, en gátia'. <sup>16</sup> Rea' libí'ili': Bíti'rö gahua' lë ni cate' idxinrö dza gaca le rulu'isö xtsö' ni ga ni' rinná bë'ë Dios.

<sup>17</sup> Gudélë'ë Jesús tu zxíga'do', en gudxë' Dios: "Xclenu'." Ní'irö rë' légaquië':

—Guli'sí' lë ni, en guli'gu'aj lati' huéaj, <sup>18</sup> tu' rea' libí'ili': Bíti'rö gu'ja' xisi uva cate' idxinrö le rinná bë'ë Dios.

<sup>19</sup> Ní'irö gudélë'ë yóta xtila, en gudxë' Dios: "Xclenu'." Gudödi ni' buzxuzxjé' le, en bë'ë queégaquië', rnnë':

—Lë ni naca idútë le naca' le rudoña' uláz queéli'. Guli'gún caní para usá' ládx'i'li' neda'.

<sup>20</sup> Cate' budxi gulahuë', lësca' caní bë'ë didza' que zxíga'do' na', rnnë':

—Zxíga'do' ni rulu'i ca naca didza' cubi rucá'ana tsahui', ate' rön quia' run tsutsu le, rön na' ilalaj ni'a queéli'.

<sup>21</sup> Na'a, bönni' na' udödë' neda' lu ná'agaca bönachi rö'ë rágulenë' neda' tsözxón. <sup>22</sup> Le nácatéhuayija' ga ilútië' neda', Bönni' Guljé' Bönachi, en gaca quia' ca na' nazúaj lu guichi lá'ayi ca ral-la' gaca quia', pero bica' bayechi' bönni' na' udödë' neda'.

<sup>23</sup> Ní'irö gula'sí lógaquië' ta'nábinë' Lë' tu tuë', ta'nnë':

—¿Núzzilötu' nu gun caní?

### *Tu'i xtílda'gaquië' núzzilögaquië' gáquië' lo*

<sup>24</sup> Ní'irö gulu'ë didza' la' lágacasë' núzzilögaquië' idéli'në' lataj lo. <sup>25</sup> Jesús gudxë' légaquië':

—Yugu' bönni' unná bë' tu'gunë' dxin yöl-la' unná bë' quégäquië', ta'nná bë'enë' bönachi, ate' nupa ni dë lu ná'agaca yöl-la' unná bë', légaquië' bönni' tácalen. <sup>26</sup> Libí'ili' biti' ral-la' gunli' caní, pero nu naca lo ládjali' ral-la' gaca ca nu naca cuídi'térö, ate' nu rinná bë' ral-la' gaca ca nu run dxin quéguequi luzé'e. <sup>27</sup> ¿Núzzilö na' nácarö lo, nu na' rö'ö ragu, o nu rupá' la' huagu? ¿Naru' caléga nu na' rö'ö ragu nácarö lo? Neda' zóalena' libí'ili' ca nu rupá' la' huagu.

<sup>28</sup> Libí'ili' ni guzóalenli' neda' cate' ni' bi guca quia', yugu' le gula'zí' bë' neda'. <sup>29</sup> Que lë ni na' udöda' lu ná'ali' tu ga inná bë'eli', ca na' benë' Xuza', budödë' lu na'a ga inná bë'a neda'. <sup>30</sup> Caní guna' para gaca cō'öli', en gu'aj gágulenli' neda' ga ni' inná bë'a, ate' cō'öli' xilataj cázali' ga uchi'a usöröli' idxinno cō' zxí'ini xi'sóë' Israel.

### *Rnnë' Jesús innë' Pedro biti' núnbë'ë Lë'*

(Mt. 26:31-35; Mr. 14:27-31; Jn. 13:36-38)

<sup>31</sup> Gunné' ca' caní Xanru':

—Simón, Simón. Buyútsöca'. Chigunaba Satanás tu' xihui' libí'ili', para urixi udödi libí'ili' ca nu rurixi rudödi zxoa' xtila, <sup>32</sup> pero chibulidza'-në' Dios, en gunábida' Lë' gácalenë' li', para cabí údxi udú yöl-la' réajlë' quiu' neda'. Na'a, cate' huöácu' quia', butipa ládx'i'gaquië' böchi' luzó'o.

<sup>33</sup> Pedro rë' Lë':

—Xan, chizóa' sá'lena' Li', calégasö tseja' lidxi guíë, pero lësca' gátilena' Li'.

<sup>34</sup> Jesús rë' lë':

—Pedro, rea' li': Zí'alö códxiba' böra na'a, chigudá'bagu'u tsonna luzuí, innó' cabí núnbë'u neda'.

### *Le benë' Jesús cate' chizúa ilútië' Lë'*

<sup>35</sup> Jesús gunábinë' légaquië', rnnë':

—Cati' gusól-la' libí'ili' cabí nuá'ali' yoxaj yóta, en caléga buzudi dumí, en caléga chopa cō' xiráchuli', ¿naru' bi biyadzaj queéli'?

Légaquië' ta'nnë':

—Biti' bi.

<sup>36</sup> Ní'irö rë' légaquië':

—Na'a, nu dë yöxa j yöta que ral-la' guá' le, ate' lësca' caní ral-la' gun nu dë que buzudi dumí, ate' nu biti' dë que guíe tuchi' ral-la' guti' lari' rixóa yeni, en si' tu guíe tuchi'.  
**37** Rea' lib'i ili': Run bayudxi gaca quia' lë na' nazúaj lu guichi lá'ayi, rnna: "Guluné' queé' ca tuné' quégaca nupa tua' dö", ate' ilaca yúgu'të le nazúajgaca lu guichi ca ral-la' gaca quia'.

**38** Ni'irö légaquié' ta'nné':

—Xan, ni dë chopá guíe tuchi'.

Lë' rë' légaquié':

—Chinaca.

*Jesús rulidzé' Dios la' yëla Getsemaní*

(Mt. 26:36-46; Mr. 14:32-42)

**39** Ni'irö birúajé' Jesús, en ca run cazé' sa'yéajé' lu Guí a Yaga Olivo, ate' yugu' bönni' usëda queé' söjácalené' Lë'. **40** Cate' bila'dxiné' ni', Jesús rë' légaquié', rnne':

—Buli'lídze' Dios, inábili'-në' cabí gata' lataj si' bë' tu' xihui' lib'i ili'.

**41** Ni'irö Jesús guzé'ë ga na' nacu'ë, en gudödë' ia'lati' tsca ga ridxín tu guiój rirú'uniru', ate' ni' buzúa zxibë', en rulidzé' Dios. **42** Rnné':

—Xúz, channö ré'ënu', bucuása ga zoa' lë na' ral-la' qui'i saca'a, pero calëga ca ré'ënda' neda', pero ca ré'ënu' Li' gunu'.

**43** Ni'irö bulu'i lahué' gubáz lá'ayi queé' Dios, zé'ë yehua' yubá, ate' butipë' ládxé'ë Jesús. **44** Lu yöl-la' risëbi ladxi' queé', idú ládxé'ë Jesús bulidzé' Dios, ate' nisa yösa queé' guca ca rön raba' luyú.

**45** Cate' budxi bulidzé' Dios, guyasé', en bőajé' ga na' nacu'ë bönni' usëda queé', ate' duxáquié' légaquié' tásié' tu' tu'hü'inigaquié'. **46** Ni'irö Jesús rë' légaquié':

—¿Rásitsali'? ¡Guli'chasa, en buli'lídze' Dios! Inábili'-në' cabí gata' lataj si' bë' tu' xihui' lib'i ili'.

*Ta'zöné' Jesús*

(Mt. 26:47-56; Mr. 14:43-50; Jn. 18:2-11)

**47** Tsanni ni' ru'ë didza' Jesús, la' bila'dxintë' bönni' zián ni', ate' Judas, bönni' na' nababé' idxínnuë' bönni' usëda queé' Jesús dzáguié' légaquié', ate' nanóruë' lógaquié' bönni' zián na'. Gubígui'ë ga zoë' Jesús para utsaga lahué' Lë'. **48** Ni'irö Jesús rë' lë':

—Judas, ¿naru' rudööditso' caní neda', Bönni' Gulje' Bönachi, rutsaga lo' neda'?

**49** Cate' yugu' bönni' na' nacuá'lenë' Jesús bila'lé'enë' ca na' raca queé' Lë', të' Lë':

—Xan, ¿naru' gü'itu' légaquié' guíe tuchi'?

**50** Tuë' bönni' usëda queé' Jesús bené' huë' guídi náguié' bönni' huen dxin queé' bixúz lo. Burixé' guídi náguié' ibëla. **51** Jesús rnné':

—Chinaca na'a. Tsca' gaz.

Gudané' Jesús guídi náguié' bönni' huen dxin na', en bunë' le. **52** Ni'irö rë' yugu' bixúz unná bë', en bönni' dë lu ná'agaquié' que yudo', en bönni' gula tu'zéajni'inë', bönni' na' biti' ta'lé'enë' Lë' dxi'a, rnné':

—¿Narúajtsali' nuá'ali' guíe tuchi', en yaga para sönli' neda' ca runli' rizönli'-në' gubán? **53** Yugu' dza guzóalen caza' lib'i ili' chila yudo', ate' biti' bi benli' quia', pero na'a chibidxín dza queéli', le naca dza dë lu né'e nu na' zoa lataj chul-la.

*Rnné' Pedro: "Biti' núnbë'a-në' Jesús"*

(Mt. 26:37-58, 69-75; Mr. 14:53-54, 66-72; Jn. 18:12-18, 25-37)

**54** Ni'irö gula'zöné' Jesús, en gula'ché'ë Lë' ga na' bulu'sudxiné' Lë' lidxé' bixúz lo. Pedro yöjnahué' Jesús zi'tu' zí'tu'sö. **55** Cate' ni'a në'ë bixúz lo chigula'béquié' guí' lö'a lidxé' bixúz lo na', gula'bö'ë idú gásibi'ilö ra' guí' na', ate' Pedro guró'lenë' légaquié' tsözxón. **56** Cate' tubi' bi'i nigula huen dxin bilé'ebi'-në' Pedro, ni' rö'ösë' ra' guí', buyubi' lë', en rnnabi':

—Bönni' ni dë'ë ca' Jesús.

<sup>57</sup> Gudá'baguië' Pedro, rnnë':

—Nigúla, biti' ca' núnbe'a-në' bönni' na'.

<sup>58</sup> Ia'lati' gudzé ia'tué' bönni' bilé'enë' Pedro, ate' rnnë':

—Li' do'o ca' légaquië'.

Pedro gunné':

—Bönni', caléga neda'.

<sup>59</sup> Ia'láti'sö gudzé, gunné' ia'tué' bönni':

—Le nácatë bönni' ni dë'ë Jesús, tu' náquië' bönni' Galilea.

<sup>60</sup> Ní'irö Pedro gunné':

—Bönni', biti' nözda' bizxi na' ru'u didza' que.

Tsanni ni' ru'ë didza' ni, la' gurödxítëba' böra. <sup>61</sup> Ní'irö buécjé' Xanru', en ruyúë' Pedro, ate' yöjenenë' Pedro xtídzé'ë Xanru', ca na' gudxé' lë: "Zí'alö códxiba' böra na'a, li' chigudá'bagu'u tsonna luzuí, innó' biti' núnbe'u neda'." <sup>62</sup> Burúajé' Pedro ní'ilö, ate' rön caz gurödxé'.

*Tu'titjé' Jesús*

(Mt. 26:67-68; Mr. 14:65)

<sup>63</sup> Yugu' bönni' na' nazöngaquië' Jesús bulu'titjé' Lë', ate' gula'guínë' Lë'. <sup>64</sup> Ní'irö bulu'sayjé' lahuë' Jesús, ate' gula'gápë'ë lahuë', en gula'nábinë' Lë', ta'nné':

—¡Gunnéya'atsöca'! ¿Nuzxi na' gudapa' Li?

<sup>65</sup> Ziánrö ca' gula'nné' queë' le gulu'ë dö' queë'.

*Ridxinë' Jesús lógaquië' bönni' yudo' tu'chi'a tu'söröë'*

(Mt. 26:59-66; Mr. 14:55-64; Jn. 18:19-24)

<sup>66</sup> Cate' chizá' rení' dza na', bulu'dubë' bönni' gula tu'zéajni'inë' bönachi judío len yugu' bixúz unná bë', en bönni' yudo' tu'sédinë', ate' gula'chë'ë Jesús lógaquië' bönni' yudo' tu'chi'a tu'söröë', ate' gula'nábinë' Lë', <sup>67</sup> ta'nné':

—Gudíxjöi'i netu'. ¿Naru' nactso' Li' Cristo?

Jesús rë' légaquië':

—Channö guía' lib'ili' naca' Cristo, biti' tséajlë'ëli' neda', <sup>68</sup> en channö inábida' lib'ili' tu didza', biti' ub'ili' didza', en biti' usanli' neda'. <sup>69</sup> Na'a isí lo, neda', Bönni' Guljë' Bönachi, cö'a cuita lë'ë ibëla Dios, nápatérë' yöl-la' unná bë'.

<sup>70</sup> Gula'nábinë' Lë' yúgu'të', ta'nné':

—¿Naru' nactso' Li' Zxí'inë' Dios?

Lë' gudxé' légaquië':

—Le nácasö rnñali'.

<sup>71</sup> Ní'irö ta'nné':

—¿Núzxirö naquíniru' nu gun ba nalí queë'? La' rë'usö chibiyóniru' didza' ru'ë.

## 23

*Ridxinë' Jesús lahuë' Pilato, bönni' rinná bë'ë uláz queë' César*

(Mt. 27:1-2, 11-14; Mr. 15:1-5; Jn. 18:28-38)

<sup>1</sup> Ní'irö gulazuínë' yúgu'të bönni' zián ni', ate' gula'chë'ë Jesús lahuë' Pilato, <sup>2</sup> ga ni' gula'sí lógaquië' tu'zéguië' Lë' didza', ta'nné':

—Bönni' ni, budzólitu' ca runë'. Runë' ga ta'dá'baga' bönachi uládz queétu' yúlahui', en ruzágüë'ë xinózigaca nupa ta'guízxaj laz ruquízxjé' César, en rnnë' lë cazë' náquië' Cristo, bönni' ral-la' inná bë'ë.

<sup>3</sup> Ní'irö Pilato gunábinë' Jesús, rnnë':

—¿Naru' nacu' Li' nu inná be'e bönachi judío?

Bubi'ë didza' Jesús, rnnë':

—Le nácasö rnño'.

<sup>4</sup> Ní'irö Pilato gudxë' yugu' bixúz unná bë', en böñachi nacuá' ni', rnnë':

—Biti' bi budzólida' le naca xíguia' nunë' bönni' ni.

<sup>5</sup> Ní'irö gulunré' tsutsu xtídza'gaquië', ta'nné':

—Runë' ga tu'tsatsa böñachi, en rusédinë' caní böñachi idú luyú Judea. Gusí lahuë' benë' caní luyú Galilea ga ridxitnë runë' ca' ni.

### *Ridxinë' Jesús lahuë' Herodes, bönni' rinná bë'ë luyú Galilea*

<sup>6</sup> Cate' biyönnë' Pilato didza' ni, tu'ë didza' que luyú Galilea, ní'irö gunábinë' légaquië' channö náquië' Jesús bönni' Galilea. <sup>7</sup> Cate' gunózinë' nababë' Jesús ga ni' rinná bë'ë Herodes, gusól-lé'ë Lë' lahuë' Herodes na', tu' zoë' ca' Herodes Jerusalén yugu' dza na'.

<sup>8</sup> Cate' Herodes na' bilé'enë' Jesús, budzéjanë', tu' chiguca xidzé ré'ënë' ilé'enë' Lë' tu' chibiyönnë' le zián ca naca queë' Jesús, en runë' löza ilé'enë' tu yöl-la' huáca gunë'.

<sup>9</sup> Ní'irö Herodes gunábinë' Jesús le zián, pero Jesús biti' bi didza' bubi'ë. <sup>10</sup> Nacu'ë ca' ni' yugu' bixúz unná bë', len bönni' yudo' tu'sédinë', ate' bulu'zéguidë'ë Jesús didza'. <sup>11</sup> Ní'irö Herodes, en bönni' queë' rójáquië' gudil-la bulu'cá'anë' Jesús cá'asö, en para ulu'titje' Lë', bulu'gácuë' Lë' tu lari' nazaca' ca rácuë' tu bönni' unná bë', ate' leyúbölö bulu'sudxinë' Lë' lahuë' Pilato. <sup>12</sup> Dza na' bulu'dzáguië' dxi'a Pilato, en Herodes, tu' zí'alö gula'lé luzé'ë tuë' ia'túë'.

### *Ta'chúguië' queë' Jesús gátië'*

(Mt. 27:15-26; Mr. 15:6-15; Jn. 18:39-19:16)

<sup>13</sup> Ní'irö butubë' Pilato yugu' bixúz unná bë', en bönni' dë lu ná'agaquië', en böñachi lu yödzö, <sup>14</sup> ate' ré' légaquië':

—Dujuá'ali'-në' bönni' ni lahua' neda', rnnali' queë' runë' ga tu'tsatsa böñachi, pero cate' gunabi yúdxida'-në', ate' zóatëli' ca' ni, biti' bi budzólida' le naca xíguia' nabáguë'ë, yugu' lë na' ruzéguili'-në' didza'. <sup>15</sup> Cate' gusól-la'a libíili' lahuë' Herodes, biti' bi budzölinë' le benë' bönni' ni le naca xíguia' nabáguë'ë para nu ichugu queë' gátië'. <sup>16</sup> Na'a usaca' zi'a-në', ate' tödi na' usana'-në'.

<sup>17</sup> Run bayudxi tu le gunë' Pilato, usanë' lu ná'agaca böñachi tuë' bönni' nadzunë' cate' raca laní na', ca na' run cazë'. <sup>18</sup> Ní'irö gulu'ë zidzaj didza' yúgu'të bönni' nacu'ë ni', ta'nné':

—Bëtië' bönni' ni, en busanë' queétu' Barrabás.

<sup>19</sup> Nadzunë' Barrabás na' lidxi guíë tu' gudíl-lalenë' yúlahui' lu yödzö na', en tu' bëtië' böñachi. <sup>20</sup> Bulidzë' Pilato légaquië' leyúbölö, tu' ré'ënë' usanë' Jesús. <sup>21</sup> Leyúbölö gulu'ë zidzaj didza', ta'nné':

—¡Budé'ë lë'e yaga cruz! ¡Budé'ë lë'e yaga cruz!

<sup>22</sup> Ní'irö Pilato gudxë' légaquië' le bunni luzuí, rnnë':

—¿Bizxi caz le ruá' dö' benë' bönni' ni? Biti' bi budzólida' nunë' le run ga nabáguë'ë xíguia' gátië'. Usaca' zi'a-në', ate' ní'irö usana'-në'.

<sup>23</sup> Zídzajrö gulu'ë didza', ta'nabë' té'ë Jesús lë'e yaga cruz. Tu' gula'bódxi'ë yenni' yugu' bönni' na', en yugu' bixúz unná bë', gula'déli'në' gaca ca na' té'ënnë'. <sup>24</sup> Ní'irö Pilato guchúguië' queë' Jesús, para gaca queë' ca na' ta'nabë'. <sup>25</sup> Busanë' quégaquië' bönni' na' nadzunë' lidxi guíë tu' gudíl-lalenë' yúlahui', en bëtië' böñachi, bönni' na' chigula' nabë', ate' budödë' Jesús para gaca queë' ca na' té'ënnë'.

### *Dë'ë Jesús lë'e yaga cruz*

(Mt. 27:32-44; Mr. 15:21-32; Jn. 19:17-27)

<sup>26</sup> Cate' ni' ta'ché'ë Jesús tsöjdá'gaquië' Lë' lë'e yaga cruz, gula'zönë' Simón, bönni' yödzö Cirene, suzé'ë la' guixi', ate' gula'xóë' yen zxicjë' yaga cruz na' para gu'ë le, en tsejë' cíduzulë' Jesús.

<sup>27</sup> Bönachi zián, enca' yugu' nigula söjnógaca Jesús, ta'bödxinu nigula na', en ta'bödxi yéchi'nu queë' Lé'. <sup>28</sup> Ní'irö buécjé' Jesús, en ruyúë' légacanu, ate' rë' légacanu:

—Libí'ili' nigula Jerusalén. Biti' códixil' quia' neda', pero guli'cödxi que quézili', en quégacabi' zxí'inili' <sup>29</sup> tu' huadxín dza ila'nná: "Bica' bágaca yugu' nigula huödx, en nigula biti' guluá'anu-bi' bñido', en biti' bulu'gádxí'nu-bi' bñido'." <sup>30</sup> Ní'irö ila'sí lógaca ila'nná bönachi, ilé' yugu' guí'a sibi: "Guli'dubága' netu", en ilé' ca' yugu' guí'ado': "Guli'cachi' netu." <sup>31</sup> Channö caní tunë' quia' neda', naca' ca tu yaga ya'a, ¿narú' cabí ilúnterë' ca' queéli', nácali' ca yaga bidxi?

<sup>32</sup> Gula'ché'ë ca' chopë' bönni' tuá' dö', para ilútië' légaquië' tsözxón len Jesús. <sup>33</sup> Cate' bila'dxiné' lataj nazí'i le Calavera, le rnna len didza' xidza' Lataj Que Böga' Ícjaru', bulu'dé'ë Jesús lë'e yaga cruz. Bulu'dé'ë ca' lë'egaca yaga cruz chopë' bönni' tuá' dö'. Tuë' bulu'dé'ë cuita lë'e ibëla Jesús, en ia'tué' bulu'dé'ë cuita lë'e yóögola. <sup>34</sup> Ní'irö Jesús rnné':

—Xuz, buniti lo légaquië', tu' cabí nñozguequinë' bi tunë'.

Bönni' rójáquië' gudil-la nacu'ë ni' bulu'lé'ë que queëgaquië' le nácuë' Jesús, en bulu'quitjé' le gaca bë'lahui. <sup>35</sup> Bönachi nacuá' ni' tu'yú, en yugu' bönni' dë lu ná'agaquië' bulu'titjé' Jesús, ta'nné':

—Yugu' nu yúbölö busölé' bönni' ni. Na'a ral-la' usölä cuinë' channö náquië' Cristo, bönni' gurö' cazë' Dios.

<sup>36</sup> Yugu' bönni' na' rójáquië' gudil-la bulu'titjé' ca' Jesús. Gula'biguë'ë ga na' zoë', en bulu'gui'jé' Lé' nupi zi, <sup>37</sup> ta'nné':

—Channö nacu' Li' bönni' inná bë'enë' bönachi judío, busölä cuinu'.

<sup>38</sup> Da' ca' lë'e yaga cruz icjlé' Jesús tu le nazúaj lu guichi lu didza' griego, en lu didza' latín, en lu didza' hebreo, le rnna caní: "Bönni' Rinná Bé'enë' Bönachi Judío." <sup>39</sup> Tuë' bönni' huiá' dö' na' dë'ë lë'e yaga cruz bulidza zi'ë Jesús, rnné':

—Channö nacu' Li' Cristo, busölä cuinu', enca' netu'.

<sup>40</sup> Bubi'ë didza' ia'tué' bönni' huiá' dö' na', en gudil-lë' luzé'ë na', rnné':

—¿Naru' cabí rádxinu'-në' Dios? Lësca' li' narugu quiu' gátiu'. <sup>41</sup> Le nácatë rë'u, le rál-la'sö gaca queéru' rigu'í'i rizáca'ru', ca na' sa'yéaj dö' biá'aru', pero Bönni' ni, biti' bi dö' nu'ë.

<sup>42</sup> Ní'irö bönni' ni rë' Jesús:

—Yöjné neda' cate' idixinu' ga ni' inná bë'u.

<sup>43</sup> Jesús rë' lë':

—Le nácatë rea' li', na'a dza ni sóalenu' neda' lataj lachi quia'.

### Ratië' Jesús

(Mt. 27:45-56; Mr. 15:33-41; Jn. 19:28-30)

<sup>44</sup> Cate' bidxín idú huagubidza, guchul-la idútë yödzölió ga bidxinrö idú ridödi xihuö.

<sup>45</sup> Guchul-la gubidza, ate' lari' nal-la' lu yudo' biröza' chopa dí'ilö. <sup>46</sup> Ní'irö bë'ë zidzaj didza' Jesús, rnné':

—Xuz, rigu'a lu no'o bö' naca caza'.

Cate' budxi gunnë' caní, birúajtë bö' naca cazë', gútië'.

<sup>47</sup> Cate' bönni' rinná bë'enë' bönni' rójáquië' gudil-la bilé'enë' ca na' guca, gulu'ë Dios yöl-la' ba, rnné':

—Le nácatë bönni' ni gúquië' bönni' tsahui'.

<sup>48</sup> Cate' yúgu'të bönni' nacu'ë ni' tu'yúë' bila'lé'enë' lë na' guca, yöjuö'jgaquië' yödzö, ta'gapa' luchú'ugaquië' tu' tu'báninë'. <sup>49</sup> Zí'tu'sö bulu'gá'ana yúgu'të nupa ni' núnbe'gaca Jesús, en yugu' nigula na' yójácalennu Lé' cate' ni' gudé' luyú Galilea, ate' tu'yúë' lë ni raca.

*Rigáché'ë Jesús yero ba*

(Mt. 27:57-61; Mr. 15:42-47; Jn. 19:38-42)

<sup>50</sup> Zoë' ca' ni' tu bönni' yödzö Arimatea que luyú Judea, lë' José. Bönni' ni náquië' dxi'a, en tsahui', en nabábalenë' yugu' bönni' yudo' tu'chi'a tu'söröö'. <sup>51</sup> Biti' benë' tuz nupa na' gula'chugu queë' Jesús gátië', tu' ribözë' ca' José ni le rinná bë'ë Dios. <sup>52</sup> Ní'irö guyijë' José na' lahuë' Pilato, en gunabë' lataj u'ë Jesús. <sup>53</sup> Cate' chinuzötje' Lë', buchölinë' Lë' lari', ate' gulu'ë Jesús yero ba, le nadaj lë' e guí'a guioj, ate' lu ba na', cuntu nu nagüi' iguequinë'. <sup>54</sup> Dza na' naca dza tu'pé'ë que dza lá'ayi quégaquië' bönni' judío, tu' si' idxín dza na'.

<sup>55</sup> Yójacanu ca' ni' nigula na' gula'zá'lennu Jesús, cate' ni' gudë' luyú Galilea, ate' bila'lé'enu yero ba na', en ca na guca, gula'gu'ë Lë' ni'. <sup>56</sup> Cate' yöjhüöjgacanu yu'u, bulu'pá'anu nöri rilá' zxixi, en yugu' le za rilá' zxixi. Ní'irö bulu'zí' ládzi'gacanu dza lá'ayi na' quégaquië' bönni' judío ca na' rinná bë' xibá queë' Dios.

## 24

*Rubanë' Jesús lu yöl-la' guti*

(Mt. 28:1-10; Mr. 16:1-8; Jn. 20:1-10)

<sup>1</sup> Cate' bidxín dza risí lo ia'gadxi dza na', cate' ni' naca zílado', bila'dxinnu nigula na' ra' yero ba queë' Jesús. Nuá'gacanu yugu' le rilá' zxixi, lë na' chinupá'agacanu, ate' dzágagacanu légaracanu ia'bál-lanu nigula. <sup>2</sup> Cate' bila'dxinnu ni', bila'lé'enu chinadúa guioj na' gudá' ga nu riyaza yero ba queë'. <sup>3</sup> Cate' gula'yázanu yero ba na', biti' bulu'dzölinu zoa Xanru' Jesús ni'. <sup>4</sup> Cate' ni' ta'bó'önü böninga ni'a que lë ni, chopë' bönni' nácugaquië' lari' rëpi yösa bení' la' bila'dxintë' ni', en gula'zuínë' ga na' nacuá'anu. <sup>5</sup> Ní'irö guládxinu, en bulu'zötaj ícjagacanu, tu'yunu lu yu, ate' chopë' gubáz lá'ayi na' té' légaracanu, ta'nné':

—¿Bizz que ruguílajli' nu zoa nabán xilataj nu nati? <sup>6</sup> Biti' zoë' ni, tu' chibubanë'. Guli'tsöjnë lë na' chigudxi cazë' libí'ili' cate' ni' zoë' luyú Galilea. <sup>7</sup> Gunné': "Run bayudxi nu udödi neda', Bönni' Guljë' Bönachi, lu ná'agaquië' bönni' dul-la', ate' ulu'dé'ë neda' lë'e yaga cruz, ate' ubana' cate' gaca tsonna dza."

<sup>8</sup> Ní'irö yöjnégacanu didza' na' bë'ë Jesús, <sup>9</sup> ate' bulu'zá'anu ra' yero ba na', yöjtíxjöi'iguequinu idxinéajtë' bönni' gubáz queë' Cristo, en ia'zíca'rë' ca', ca naca lë na' guca. <sup>10</sup> Nigula na' yöjtíxjöi'iguequinu bönni' gubáz na' yugu' lë ni, nácagacanu María Magdalena, en Juana, en María, xiné'ë Jacobo, en ia'bál-lanu nigula na' dzágagacanu légaracanu. <sup>11</sup> Guléquinë' bönni' gubáz na' tu'iniu didza' chixi, en biti' gula'yéajlé'ë légaracanu.

<sup>12</sup> Ní'irö guyasë' Pedro, en carelö sa'yéajë' ra' yero ba na'. Cate' buyúë' lu ba na', bilé'enë' yugu' lári'sö nacuá' ni', ate' ní'irö bőajë' lidxë', rubáninë' ca naca lë na' guca.

*Le guca la' nöza ridxintë Emaús*

(Mr. 16:12-13)

<sup>13</sup> La' dza ná'asö söjáquië' chopë', yú'ugaquië' nöza le ridxintë Emaús, le rö'ö ca chopa hora rizá'aru' Jerusalén. <sup>14</sup> Yú'ugacasë' ca' nöza, tu'ë didza' ca naca yúgu'të lë na' guca.

<sup>15</sup> Tsanni ni' yú'ugaquië' nöza, tu'ë didza' la' légaracasë', gubígi'ë gala' Lë cazë' Jesús, ate' gudálenë' légaquië' tsözxón. <sup>16</sup> Biti' bulu'únbe'ë Lë' tu' naca ca tu le nabaga' guioj lógaquië'. <sup>17</sup> Ní'irö Jesús gunábinë' légaquië', rnnë':

—¿Bizzxi didza' na' ruf'ili' la' libí'isili' yú'uli' nöza? ¿Bizz que na' ruhu'inili?

<sup>18</sup> Bubi'ë didza' bönni' na' lë' Cleofas, rë' Lë':

—¿Nácatso' bönni' zi'tu' lu yödzö Jerusalén, en tuzu' li' biti' nözinu' lë na' guca néaje nasi ni'?

<sup>19</sup> Ní'irö Jesús rë' légaquië':

—¿Bizzxi na' guca?

Të' Lë':

—Lë na' guca queë' Jesús, bönni' Nazaret. Gúquië' bönni' bë'ë didza' uláz queë' Dios, ate' len yöl-la' huáca zxön bené' dxin, en bë'ë didza' lahuë' Dios, en lógaca yúgu'të bönnachi. <sup>20</sup> Yugu' bixúz unná bë', len bönni' ta' nná bë'enë' netu' bulu'dödë' Lë', en gulunë' ga nu guchugu queë' gátië', ate' bulu'dé'ë Lë' le'e yaga cruz. <sup>21</sup> Netu' bentu' löza gúquië' Lë' bönni' na' ral-la' huöá'uë' bönnachi Israel, pero na'a chiguca tsonna dza cate' gulaca lë ni. <sup>22</sup> Ia'stú, bál-lanu nigula nútsa'gacanu netu' gulunnu ga guró'ötu' böninga. Yójacanu ra' yero ba queë' cate' si' gulén gubidza na'a dza, <sup>23</sup> en cate' biti' bulu'dzölinu Lë', buduhuójgacanu, en gulénu netu' bila'lé'enu yugu' gubáz lá'ayi queë' Dios, nupa ni' gulé' lágacanu zoë' nabaneë' Jesús. <sup>24</sup> Ní'irö bal-lë' bönni' luzá'atu' yójáquië' ra' yero ba na', en bila'lé'enë' naca ca na' gula'nnanu nigula na', pero biti' bila'lé'enë' Jesús.

<sup>25</sup> Ní'irö Jesús gudxë' lágacië':

—Libi'ili', bönni' biti' réajni'ininë'. Nazidi icja ládxí'do'oli' para cabí tséajlë'ëli' yúgu'të le gula'nné' bönni' gulu'ë didza' uláz queë' Dios. <sup>26</sup> ¿Naru' cabí ben bayudxi qui'i sáquë'ë Cristo yugu' lë ni, en tsázië' ga ni' tsépisétérë?

<sup>27</sup> Ní'irö gusí lahuë' Jesús riguixjöi'inë' lágacië' yúgu'të le ruí'i didza' ca naca queë' le nazúajgaca lu guichi lá'ayi, ca na' gusí lo bë'ë didza' Moisés ga bidxitnë yugu' le gula'nné' yúgu'të bönni' gulu'ë didza' uláz queë' Dios.

<sup>28</sup> Cate' bila'dxinë' yódzödo' ga na' sójáquië', bené' Jesús ca tu bönni' zéajtérë' zi'tu'.

<sup>29</sup> Gulunë' bayudxi ugá'analenë' lágacië', ta'nné':

—Bugá'analen netu', tu' chiridzö' na'a, en chizóa gal-la.

Ní'irö guyázië' Jesús yu'u, en bugá'analenë' lágacië'. <sup>30</sup> Cate' ni' Jesús rö'ë rágulenë' lágacië', gudélë'ë yóta xtila, en gudxë' Dios: "Xclenu'." Ní'irö buzxuzxjë' le, en bë'ë quégaquië'. <sup>31</sup> La' ní'isö bidúa lë na' gubaga' guiój lógaquië', ate' bulu'únbë'ë Jesús, ate' Lë' buniti cuinë' lógaquië'. <sup>32</sup> Ní'irö gulé' luzé'ë tuë' ia'tué':

—¿Naru' cabí böála'tica' ládxí'do'oru' tsanni ni' ruí'ilenë' rë'u didza' la' nöza, en cate' ni' ruchila lá'anië' le nazúaj lu guichi lá'ayi?

<sup>33</sup> La' ní'isö gula'zuínë' yójhuójgaquië' Jerusalén, ate' yójxáca'gaquië' nudúbigaquië' idxinéajtë' bönni' gubáz queë' Jesús, en nupa nacuá'len lágacië'. <sup>34</sup> Ní'irö yugu' bönni' na' nacu'ë ni' gulé' chopë' na':

—Chibubán cazë' Xanru', en bulu'i lahuë', ate' bilé'enë' Simón Lë'.

<sup>35</sup> Ní'irö chopë' na' gula'guíxjö'ë ca na' guca quégaquië' la' nöza, en ca na' bulu'únbë'ë Jesús cate' ni' buzxuzxjë' yóta xtila na'.

*Bönni' usëda queë' Jesús tu'lé'enë' Lë'*

(Mt. 28:16-20; Mr. 16:14-18; Jn. 20:19-23)

<sup>36</sup> Tsanni ni' tu'ë didza' ca nácagaca lë ni, la' yöjsóatë' Jesús gatsaj láhui'lö ga na' nacu'ë, ate' rë' lágacië':

—Guli'soa dxi ládxí'li'.

<sup>37</sup> Ní'irö guladxi gula'dzöbinë' tu' téquinë' bixín ta'lé'enë'. <sup>38</sup> Jesús rë' lágacië':

—¿Bizx que rö'öli' böninga? ¿Bizx que rizá' ládxí'li' yugu' lë ni? <sup>39</sup> Buli'yútsöca' na'a, en ni'a. Neda' caz ni. Guli'cán neda', en buli'yú neda', tu' cabí da' bixín bëla', en biti' yu'u dxita ca ni rilé'eli' naca quia' neda'.

<sup>40</sup> Ni' ruí'isë' ca' didza' ni, bulu'inë' lágacië' në'ë, en ni'ë. <sup>41</sup> Tu' tu'dzéjaguequinë' biti' gula'yéajlë'ë, en gula'bö'ë baniga. Que lë ni na' Jesús gudxë' lágacië':

—¿Dë queéli' ni le gahua'?

<sup>42</sup> Ní'irö bulu'nödzjë' queë' láti'do'oba' böla chinégui'ba', en tu quízxi'ba' buz.

<sup>43</sup> Guzxi'ë Jesús le, en gudahuë' lógaquië'. <sup>44</sup> Ní'irö rë' lágacië':

—Yúgu' lë na' gulaca quia' gulaca ca na' gudxi caza' libi'ili' cate' ni' zóalena' libi'ili', gunnía': Run bayudxi gaca yúgu'të le nazúaj lu guichi lu xibá queë' Moisés, en le gula'nné'

bönni' gulu'ë didza' uláz queë' Dios, en le nazúaj lu guichi nazí'i le Yugu' Salmo, ca ral-la' gaca quia' neda'.

<sup>45</sup> Ní'irö buzéajni'inë' légaquië' lä na' nazúajgaca lu guichi lá'ayi. <sup>46</sup> Rë' légaquië':

—Caní nazúaj lu guichi ca run bayudxi gaca queë' Cristo, qui'i sáquë'ë, en ubanë' lu yöl-la' guti cate' gaca tsonna dza, <sup>47</sup> ate' idútë yödzölió ral-la' gaca libán ca naca quia' neda' para ulu'bí'i ládxi'gaca bönachi para uniti lahuë' Dios dul-la' nabágaga'gaquië'. Lu yödzö Jerusalén isí lo gaca libán na' <sup>48</sup> ate' libí'i cázali' na' bilé'eli' yugu' lë ni ral-la' gunli' ba nalí que. <sup>49</sup> Buli'yútsöca', isól-la'a queéli' le guzxí' lu næ'ë Xuza' gunnë' queéli', pero buli'gáanasö Jerusalén cate' idxinrö queéli' yöl-la' huáca na' za' yehua' yubá.

*Ruhuepë' Jesús yehua' yubá*

(Mr. 16:19-20)

<sup>50</sup> Ní'irö Jesús guché'ë yugu' bönni' dá'gaquië' Lë', söjáquië' yödzö Betania, ate' ni' guchisa næ'ë, en bulidza tsáhuë'ë légaquië'. <sup>51</sup> Tsanni ni' rulidza tsáhui'së' ca' légaquië', buzá'atë' ga na' nacu'ë, buépë' yehua' yubá. <sup>52</sup> Gudödi gula'yéaj ládxi'gaquië' Lë', lu yöl-la' rudzeja quégaquië' yöjhuójgaquië' Jerusalén. <sup>53</sup> Gula'cuá'tica'së' chila yudo', ta'gu'ë Dios yöl-la' ba, en tun zxönë' Lë'. ¡Ca' naca!

## DIDZA' DXI'A BUZÚAJË' JUAN

*Bönni' na' nazí'i lë' Didza' gúlaje' böñachi*

<sup>1</sup> Cate' gusí lo, zi'atélö cate' si' gata' yödzölió, ni' zoa cazé' Bönni' lë' Didza', ate' Bönni' na' náquië' Didza' zóalené' Dios, ate' Didza' na' naca caz Dios. <sup>2</sup> Bönni' na' náquië' Didza' zóalené' Dios cate' ni' gusí lo si' rata' yödzölió. <sup>3</sup> Lu né'ë Bönni' ni, Dios benë' yúgu'të le dë, en biti' bi dë le nunë' Dios le cabí benë' lu né'ë Bönni' na'. <sup>4</sup> Dë caz queë' yöl-la' na'bán, ate' yöl-la' na'bán na' naca ca tu bení' le ruzení' lu icja ládxí'do'gaca böñachi. <sup>5</sup> Ruzeni' bení' na' ga naca chul-la que dul-la', pero biti' ca' sequi' le chul-la na' usulu bení' na'.

<sup>6</sup> Dios gusól-lë'ë ni tu bönni' lë' Juan. <sup>7</sup> Bidé' bönni' ni para gáquië' nu gun ba nalí. Bidé' para gunë' ba nalí queë' Bönni' na' náquië' bení', para tséjlé'gaca yúgu'të böñachi Dios ni'a que lë na' runé' ba nalí. <sup>8</sup> Biti' náquië' Juan bení' na', pero bidé' para gunë' ba nalí queë' Bönni' na' náquië' bení'. <sup>9</sup> Bönni' na' náquië' bení' le naca idú ni' razië' yödzölió ni, ate' ruzení'ë lu icja ládxí'do'gaca yúgu'të böñachi.

<sup>10</sup> Bönni' na' náquië' bení' bidxiné' yödzölió ni, ate' lu né'ë Lë' Dios benë' yödzölió ni, pero böñachi yödzölió biti' bulu'únbe'ë Lë'. <sup>11</sup> Bidxiné' ga nequi queë', pero biti' ca' gula'zí' lu ná'agaquie' Lë' bönni' nabábalené'. <sup>12</sup> Yúgu'të bönni' gula'zí' lu ná'agaquie' Lë', bönni' ni' gula'yéajlë'ë Jesús, Lë' benë' ga dë lu ná'agaquie' ilácagaquie' zxí'inë' Dios. <sup>13</sup> Bönni' ni nácagaquie' zxí'inë' Dios, caléga tu' nácagaquie' zxí'inë' nu bönni', en caléga tu' nálajgaquie' ni'a que le rizé ládxë'ë nu bönni', o ni'a que tu le ré'ënë' nu bönni', pero nácagaquie' caní tu' naca le ré'ënë' quézinë' Dios.

<sup>14</sup> Bönni' na' náquië' Didza' guljé' böñachi, en tu chí'isö guzóalené' rë'u, idú dzágagaca Lë' le ruzá' ládxë'ë Dios queéru', en le naca idútë li. Bilé'etu' yöl-la' zxön queë', ate' yöl-la' zxön queë' na' naca le rui'i queébi' bi'i la's dui que, Nu na' naca Xúzibi'. <sup>15</sup> Juan na' benë' ba nalí queë' Bönni' na', en bë'ë zidzaj didza', rnnë':

—Bönni' ni náquië' Nu na' gudíxjö' a que, gunnía': Bönni' si' zá'télë' ca neda' nayépisétërë' ca neda', tu' zoa cazé' Lë' zí'alö ca neda'.

<sup>16</sup> Le naca idú queë' buz'iru' xibé yúgu'tëru', lë na' buzá' ládxë'ë queéru' Dios, en ziánrö ca' le ruzá' ládxë'ë queéru'. <sup>17</sup> Bidxín queéru' xibá queë' Dios lu né'ë Moisés, pero le ruzá' ládxë'ë queéru' Dios, en le naca idútë li bila'dxín queéru' lu né'ë Jesucristo. <sup>18</sup> Catu caz nu bilé'e Dios, pero Lë', la's dui Zxí'inë' Dios, Bönni' na' nadxí'ide'enë' Dios Xuz, Bönni' ni na' benë' ga núnbe'ëru'-në' Dios.

*Le benë' ba nalí Juan, bönni' buquilë' böñachi nisa, ca náquië' Jesús*

(Mt. 3:1-12; Mr. 1:7-8; Lc. 3:1-17)

<sup>19</sup> Lë ni naca le benë' ba nalí Juan, cate' ni' bönni' judío unná bë' nacu'ë Jerusalén gula'sól-lë'ë yugu' bixúz, en bönni' nabábaguquie' Leví, nupa ni nácagaca ni'a ná'agaquie' bixúz, para ila'nábinë' Juan na', ila'nnë':

—¿Nuzxi bönni' li?

<sup>20</sup> Yálajdo' bë'ë didza' Juan, en biti' gudá'baguië', pero gudíxjö'ë catëz naca, rnnë':

—Biti' naca' Cristo, Bönni' na' guzxi' lu né'ë Dios isól-lë'ë queéru'.

<sup>21</sup> Ní'irö gula'nábinë' lë' leyúbölö, té' lë':

—¿Nuzxi caz li? ¿Naru' nacu' li' Elías, bönni' bë'ë didza' uláz queë' Dios dza ni'të?

Gunné' Juan:

—Biti' naca'.

Ní'irö té' lë':

—¿Naru' nacu' li' bönni' na' ral-la' guídë' gu'ë didza' uláz queë' Dios?

Bubi'ë didza' Juan, rnnë':

—Caléga neda'.

<sup>22</sup> Ní'irö tē' lë':

—¿Nuzxi caz nacu'? Gudíxjö'i netu' para gaca usiyöntu' nupa gula'söl-la' netu'. ¿Bizzxi rnno' li' nuzxi nacu'?

<sup>23</sup> Bubi'ë didza' Juan, rë' légaquië':

—Neda' naca' bönni' na', nazúaj lu guichi lá'ayi ca naca queë', rnna: Riyón chi'i nu rulidza lu lataj cá'asö, rnna: Buli'béaj li näza para idxín Xanru' queéli'. Caní gunnë' Isaías, bönni' na' bë'ë didza' uláz queë' Dios.

<sup>24</sup> Yugu' bönni' ni nácagaquië' bönni' yudo' fariseo nasöl-la'gaquië' bönni' judío unná bë'. <sup>25</sup> Gula'nábinë' Juan, tē' lë':

—¿Bizz que ruquilu' bönachi nisa channö cabí nacu' li' Cristo, en biti' nacu' Elías, en caléga bönni' na' ral-la' guídë' gu'ë didza' uláz queë' Dios?

<sup>26</sup> Bubi'ë didza' Juan na', rë' légaquië':

—Neda' ruquila' bönachi nisa lu nisa, pero gatsaj láhui'lö ga zóali' zoë' tu bönni' biti' núnbe'ëli'-në'. <sup>27</sup> Bönni' ni náquië' Bönni' na' si' zá'télë' ca neda', en nayépisëtërë' ca neda', ate' biti' naca' neda' lesaca' ulecja' xiráchue' nudé'ë.

<sup>28</sup> Yugu'të lë ni guca lu xiyú yödzö Betábara, ga naca ia'tsöl'a yegu Jordán, zaca' ga rilén gubidza, ga ni' buquilë' Juan bönachi nisa.

### *Jesús náquië' ca bö'cu' zxila'do' tutië'-ba' lahuë' Dios tu' nøzi dul-la'*

<sup>29</sup> Dza buropi ni' Juan bilé'enë' Jesús, zë'ë ga zoë', ate' rnnë':

—Buli'yútsöca'. Bönni' ni náquië' bö'cu' zxila'do' queë' Dios, gátië' para ugúë' dul-la' nabágagaca bönachi yödzölió. <sup>30</sup> Lë' náquië' bönni' na' gunnia' queë': "Si' zá'télë' ca neda' tu bönni', nayépisëtërë' ca neda', tu' zoa cazë' zí'alö ca neda'." <sup>31</sup> Neda' biti' bénbe'a-në' zí'alö, pero bida', ruquila' bönachi nisa para ilúnbë'e bönachi Israel Lë'.

<sup>32</sup> Benë' ba nalí Juan ca naca queë' Jesús, rnnë':

—Bilé'eda'-në' Dios Bö' Lá'ayi, bötje' birúajé' yehua' yubá, guné'ë ca riná'aba' gu'dödo', ate' bidxinë' ga zoë' Jesús, en bugá'analenë' Lë'. <sup>33</sup> Biti' bénbe'eda' Lë' zí'alö. Gudxi neda' Nu na' gusöl-la' neda' para uquila' bönachi nisa, gunnë': "Cate' ilé'enu'-në' huötje' Dios Bö' Lá'ayi, tsöjsóalenë' Bönni' na', en ugá'analenë' Lë', Bönni' ni gunë' le rulu'isö yöl-la' ridila nisa ni, uchízië' bönachi Dios Bö' Lá'ayi." <sup>34</sup> Na'a, chibilé'eda' lë na', en runa' ba nalí queë' Bönni' ni, náquië' Zxf'inë' Dios.

### *Yugu' bönni' usëda zí'alö queë' Jesús*

<sup>35</sup> Ia'tú dza ca', leyúbölö zoë' Juan ni', ate' nacuá'lenë' lë' chopë' bönni' dá'gaquië' lë'.

<sup>36</sup> Cate' Juan na' bilé'enë' Jesús, ridödë' ni', ní'irö gudxë' bönni' na' dá'gaquië' lë', rnnë':

—Buli'yutsöca'. Ni' zoë' bönni' na' náquië' bö'cu' zxila'do' queë' Dios, gatië' uláz quegaca bönachi dul-la'.

<sup>37</sup> Chopë' bönni' na' dá'gaquië' Juan bila'yönnë' didza' ni bë'ë lë', ate' yöjnógaquië' Jesús. <sup>38</sup> Ní'irö buécjë' Jesús, en buyúë' chopë' ni söjnógaquië' Lë', ate' rë' légaquië':

—¿Bizzxi riguíjali'?

Të' Lë':

—Bönni' Usedi, ¿gazxi zu'?

<sup>39</sup> Bubi'ë didza' Jesús, rë' légaquië':

—Guli'dá, uyuli'.

Ní'irö yöjácalenë' Lë', en bila'lé'enë' ga na' zoë', ate' bulu'gá'analenë' Lë' dza na', tu' chizá' ral-la'.

<sup>40</sup> Andrés, bóchë'ë Simón Pedro, náquië' tuë' bönni' chopë' ni' bila'yönnë' didza' bë'ë Juan, en yöjnógaquië' Jesús. <sup>41</sup> Andrés na', zí'alö yöjdiljë' bönni' bóchë'ë, lë' Simón, ate' rë' lë':

—Chibidzölitu'-në' Mesías.

Mesías naca tu didza' hebreo le rnna lu didza' griego: Cristo, ate' lu didza' xidza': Bönni' nasöl-lë'ë Dios.

<sup>42</sup> Ní'irö Andrés na' la' guché'të' Simón ga na' zoë' Jesús. Cate' Jesús bilé'enë' lë', rë' lë': —Li' nacu' Simón, zxí'inë' Jonás. Na'a, si' lo' Cefas.

Cefas naca ca' tu didza' hebreo le rnna: Pedro, lu didza' xtila, ate' lu didza' xidza': Guiój.

*Jesús rulidzé' Felipe, en Natanael*

<sup>43</sup> Cate' za' rení' ia'tú dza, gú'unne' Jesús tsejë' luyú Galilea, ate' yöjxáquië' Felipe, en rë' lë':

—Gudá' neda'.

<sup>44</sup> Náquië' Felipe bönni' yödzö Betsaida, le naca ládzagaquië' Andrés, en Pedro.

<sup>45</sup> Felipe budzólinië' Natanael, en rë' lë':

—Chibidzólitu'-në' bönni' na' buzúajë' Moisés ca naca queë' lu guichi lu xibá queë' Dios, ate' bulu'zúajë' ca' ca naca queë' bönni' gulu'ë didza' uláz queë' Dios. Bönni' ni Jesús, zxí'inë' José, bönni' yödzö Nazaret.

<sup>46</sup> Natanael rë' lë':

—¿Naru' huala'tsö Nazaret tu le naca dxí'a?

Felipe rë' lë':

—Gudá uyú'.

<sup>47</sup> Cate' bilé'enë' Jesús zë'ë Natanael na' ga zoë', rnnë':

—Buli'yú ni tu bönni' náquië' idú bönni' Israel, en biti' rnnasë' ca' bönni' ni.

<sup>48</sup> Ní'irö Natanael gunábinë' Jesús, rë' Lë':

—¿Naru' núnbé'tso' neda'?

Bubi'ë didza' Jesús, rë' lë':

—Cate' si' ulídzatérë' Felipe li', cate' ni' zu' zxan yaga higo, bilé'eda' li'.

<sup>49</sup> Ní'irö bubi'ë didza' Natanael, rë' Lë':

—Bönni' Usedi, Li' nacu' Zxí'inë' Dios. Li' nacu' Nu inná be'e bönachi Israel.

<sup>50</sup> Bubi'ë didza' Jesús, rë' lë':

—¿Réajlé'tso' tu' gudxa' li': Bilé'eda' li' zxan yaga higo? Yugu' le zxóntérö ca lë ni hualé'enu'.

<sup>51</sup> Lësca' caní rë' Jesús légaquië', rnnë':

—Le nácatë rea' libí'ili', ilé'eli' nayalaj lúzxiba, en ta'benë', en tu'huötje' gubáz lá'ayi queë' Dios ga zoa' neda', Bönni' Guljé' Bönachi.

## 2

*Laní que yöl-la' rutsaga na' le guca lu yödzö Caná*

<sup>1</sup> Cate' chiguca tsonna dza, guca laní que yöl-la' rutsaga na' lu yödzö Caná luyú Galilea, ate' zóanu xiné'ë Jesús ni'. <sup>2</sup> Lësca' zoa nu bulidza Jesús, en yugu' bönni' usëda queë' dijáquië' laní na'. <sup>3</sup> Cate' biyadzaj xisi uva ilé'ajë', ní'irö xiné'ë Jesús gúdxinu Lë', rnnanu:

—Biti'rö dë xisi uva ilé'ajë'.

<sup>4</sup> Bubi'ë didza' Jesús, rë'ë-nu:

—Nigúlado'. ¿Bizx que rulidzu' neda'? Biti' ca' ridxini dza ulu'a lahui yöl-la' huáca quia'.

<sup>5</sup> Ní'irö xiné'ë Jesús gúdxinu bönni' huen dxin ta'gu'ë le tahuë', rnnanu:

—Guli'gún yúgu'të le guié' libí'ili'.

<sup>6</sup> Nacuá' ni' xopa yusu' guiój tu'gunë' dxin bönni' judío cate' tu'pá'a cuíng aquië' ca nalébiguequinë' tunë', en rúdzugaca chopatsonna rö'ö nisa tu tu yusu' na'. <sup>7</sup> Jesús gudxë' yugu' bönni' huen dxin na', rnnë':

—Buli'lí yugu' yusu' ni nisa.

Bulu'líë' yugu' yusu' na' nisa. <sup>8</sup> Ní'irö Jesús rë' légaquië':

—Guli'gachi' na'a, en guli'tsöjuá' lahuë' bönni' zoë' ra' yusu'.

Yöjuá'gaquië' na'. <sup>9</sup> Buyúë' bönni' na' zoë' ra' yusu' channö nazxí'i nisa na' nuhuöáca xisi uva, pero biti' réquibe'enë' gazxi za'. Nőziguequinë' bönni' huen dxin na' guláchë'ë nisa na'. Ní'irö bönni' na' zoë' ra' yusu' bulidzé' bönni' rutsaga në'ë, <sup>10</sup> en rë' lë':

—Zí’alö tu’nödzjé’ yúgu’të bönni’ xisi uva nácarö sizxí’i, en cate’ chigulé’ajé’ yenni’, ní’irö tu’nödzjé’ le cabí nazxí’i. Li’, ga bidxité na’a ben chi’u xisi uva nácarö sizxí’i.

<sup>11</sup> Yöl-la’ huáca naca bë’ ni benë’ Jesús lu yödzö Caná luyú Galilea naca le risí lo yugu’ yöl-la’ huáca gunë’. Caní guca, bulu’e lahui yöl-la’ zxön queë’, ate’ gula’yéajlë’ë Lë’ bönni’ usëda queë’.

<sup>12</sup> Gudödi na’ guyijé’ Jesús yödzö Capernaum, ate’ dzágagaquië’ xiné’ë, en yugu’ bönni’ böchë’ë, en yugu’ bönni’ usëda queë’ Lë’, ate’ zián dza gula’cu’ë Capernaum na’.

*Rulatjé’ Jesús lö’ a yudo’, rubéajé’ nupa tun le cabí ral-la’ ilún ni’*

(Mt. 21:12-13; Mr. 11:15-18; Lc. 19:45-46)

<sup>13</sup> Cate’ chizóa idxín Laní Pascua cate’ tu’subanë’ bönni’ judío ca benë’ Dios, ca na’ bubéajé’ xuz xtó’ogaquië’ luyú Egipto, guyijé’ Jesús yödzö Jerusalén. <sup>14</sup> Lu yödzö na’ yójxáquië’ Jesús nacu’ë bönni’ lö’ a yudo’ ga na’ túti’ë-ba’ yugu’ bëdxi, en yugu’ bö’cu’ zxila’, en yugu’ gu’dödo’, böa’ bëdxi na’ tútigaquië’-ba’ lahuë’ Dios. Rö’ögaquië’ ca’ ni’ bönni’ tu’tsé’ë dumí za’ idútë yödzölió. <sup>15</sup> Cate’ bilé’enë’ Jesús lë ni, buzalë’ yugu’ du lasi le quindë’ bönachi na’, ate’ bulágui’ë yúgu’të’ ní’ilö lö’ a yudo’, en bulágui’ë-ba’ ca’ ní’ilö yugu’ bö’cu’ zxila’, en yugu’ bëdxi. Bësië’ dumí quégaquië’ bönni’ na’ tu’tsé’ë dumí lu yu, en burixë’ yugu’ blaga quégaquië’. <sup>16</sup> Ní’irö Jesús gudxë’ bönni’ na’ túti’ë-ba’ yugu’ gu’dödo’, rnne’:

—Guli’cúa yugu’ lë ni. Biti’ únili’ lidxe’ Xuza’ tu yé’ëyi.

<sup>17</sup> Ní’irö yöjnéguequinë’ bönni’ usëda queë’ Jesús le nazúaj lu guichi lá’ayi, rnna: Tu’ ruí’ida’ ládxá a lidxu’, régui rilá ládxí’ da’ahua’.

<sup>18</sup> Ní’irö bulu’bi’ë didza’ bönni’ judío unná bë’ nacu’ë ni’, të’ Jesús:

—¿Bizxi yöl-la’ huáca ulu’’inu’ netu’ le gaca bë’ dë lu no’o runu’ yugu’ lë ni?

<sup>19</sup> Bubi’ë didza’ Jesús, rë’ légaquië’:

—Guli’quínnaj yudo’ ni, ate’ tsonna dzasö uchisa’ le.

<sup>20</sup> Ní’irö të’ Lë’ bönni’ judío, ta’nné’:

—Idú xopa-un iz guyá’ yudo’ ni, ate’ Li’, ¿tsonna dzasö uchísatso’ le?

<sup>21</sup> Yudo’ na’ bë’ë didza’ que Jesús naca la’ cuin cazé’. <sup>22</sup> Que lë ni na’, cate’ bubanë’ Jesús lu yöl-la’ guti, yöjnéguequinë’ bönni’ usëda queë’ Jesús ca na’ gunnë’, ate’ gula’yéajlë’ë le nazúaj lu guichi lá’ayi, enca’ yugu’ didza’ bë’ë Jesús.

*Jesús núnbe’ë yúgu’të bönachi*

<sup>23</sup> Cate’ ni’ zoë’ Jesús Jerusalén, cate’ raca Laní Pascua na’, gula’yéajlë’ bönachi zián Lë’, tu’ bila’lé’enë’ yugu’ yöl-la’ huáca runé’. <sup>24</sup> Biti’ buzxoni ládxé’ë Jesús légaquië’, tu’ nunbe’’ cazé’ yúgu’të bönachi. <sup>25</sup> Biti’ naquínnë’ Jesús nu quíxjö’i Lë’ ca nácagaca bönachi, tu’ nöz quézinë’ Lë’ le yu’u icja ládxí’do’gaca bönachi.

3

*Jesús, en Nicodemo*

<sup>1</sup> Nicodemo, tu bönni’ yudo’ fariseo, nabábalenië’ yugu’ bönni’ judío unná bë’. <sup>2</sup> Bidë’ bönni’ ni ga zoë’ Jesús chi’i dzö’ölö, en rë’ Lë’:

—Bönni’ Usedi. Réquibe’etu’ nasól-lë’ë Dios Li’ para usédinu’ netu’. Biti’ séqui’në’ tu bönni’ gunë’ yugu’ yöl-la’ huáca nácagaca bë’ ca nácagaca le caní runu’ Li’ channö cabí zóalenë’ Dios lë’.

<sup>3</sup> Bubi’ë didza’ Jesús, rë’ lë’:

—Le nácatë rea’ li’, nu cabí galaj leyúbölö, biti’ ca’ ilé’e lataj ga ni’ rinná bë’ë Dios.

<sup>4</sup> Nicodemo gunábinë’ Lë’, rnne’:

—¿Nacxi caz séqui’në’ tu bönni’ galjé’ leyúbölö cate’ chináquië’ bönni’ gula? ¿Naru’ huácatsö tsu’ë leyúbölö lé’ënu xiné’ë, ate’ galjé’ ia’tú?

<sup>5</sup> Bubi’ë didza’ Jesús, rë’ lë’:

—Le nácaté rea' li'. Nu bönni' cabí galjé' ni'a que nisa, en ni'a queé' Dios Bö' Lá'ayi, biti' gaca tsázié' ga rinná bë'ë Dios. <sup>6</sup> Nu na' nalaj lu ni'a lu na' bönachi, bönáchisö naca, pero nu nalaj ni'a queé' Dios Bö' Lá'ayi, Bö' Lá'ayi nabani nu na'. <sup>7</sup> Biti' ubáninu' tu' rea' li', run bayudxi galju' leyúbölö. <sup>8</sup> Gáti'tés recja bö', ate' riyönnu' rnné bö' na', pero biti' nözinu' gazxi za', o gazxi zeaj. Lësca' caní raca quégaca nupa náljagaca ni'a queé' Dios Bö' Lá'ayi.

<sup>9</sup> Ní'irö Nicodemo gunábiné' Jesús, rnné':

—¿Nacxi caz gaca lë ni?

<sup>10</sup> Bubi'ë didza' Jesús, rë' lë':

—¿Ruséditsenu' li' bönachi Israel, en biti' nözinu' yugu' lë ni? <sup>11</sup> Le nácaté rea' li', le nöztu' ru'itu' didza' que, en le bilé'etu' runtu' ba nalí que, pero biti' rizi' lu ná'ali' lë na' runtu' ba nalí. <sup>12</sup> Channö cabí réajlë'ëli' neda' cate' ru'ílena' libíili' didza' ca naca le raca yödzölió ni, ¿nacxi caz gaca tséajlë'ëli' channö guía' libíili' le raca yehua' yubá?

<sup>13</sup> 'Catu caz gurené' nu bönni' yehua' yubá, pero tuza' neda', Bönni' Guljé' Bönachi, bötja' birúaja' yehua' yubá, ate' zoa caza' ni' yehua' yubá. <sup>14</sup> Ca na' bené' Moisés lu lataj cá'asö, buchisë'-ba' bëla néquiniba' guíé, budé'ë-ba' lë'e yaga, lësca' caní run bayudxi gaca quia' neda', Bönni' Guljé' Bönachi, ulu'chisë' neda' xitsá'. <sup>15</sup> Caní gaca quia', para cabí ila'niti yúgu'të nupa ila'yéajlë' neda', pero gata' quéguequi yöl-la' na'bán idú.

### Dios nadxi'ide'ené' bönachi yödzölió

<sup>16</sup> Tu' bidxi'ide'ené' Dios bönachi yödzölió, buzá' ládxë'ë quéguequi Zxi'iné' la' buduíné', para cabí ila'niti yúgu'të nupa ila'yéajlë' Lë', pero gata' yöl-la' na'bán idú quéguequi. <sup>17</sup> Dios gusól-lë'ë Zxi'iné' yödzölió ni, caléga para ichúguië' quégaca bönachi yödzölió ni gátigaca, pero para ulu'lágaca bönachi yödzölió ni ni'a queé' Lë'.

<sup>18</sup> Nu bönni' réajlë'ë Zxi'iné' Dios, biti' ca' narugu queé' inítië', pero bönni' na' biti' réajlë'ë Lë', chinarugu queé' gátië', tu' cabí réajlë'ë Zxi'iné' Dios la' buduíné'. <sup>19</sup> Que lë ni na' chinarugu quégaca bönachi gátigaca, tu' bidxiné' Bönni' na' náquië' bení' yödzölió ni, pero gulunrö zxön bönachi ni le naca chul-la que dul-la' ca guluné' zxön Bönni' na' náquië' bení', tu' nácagaca xihui' le tuné'. <sup>20</sup> Yúgu'të bönni' tu'ë dö'biti' raza láxí'gaquïë' bení', en biti' rídigaquië' lu bení', para cabí ilá' lahui le tuné'. <sup>21</sup> Nu run le naca idútë li ridxín lu bení' para gaca bë' núngaca ni'a queé' Dios le run nu na'.

### Juan, bönni' ruquilë' bönachi nisa, ru'ë didza' ca naca queé' Jesús

<sup>22</sup> Gudödi na', Jesús guyéajlené' bönni' dá'gaquië' Lë', ate' bila'dxiné' luyú Judea, en guzóalené' légaquië' ni', ga na' tu'quilë' bönachi nisa. <sup>23</sup> Lësca' ruquilë' Juan bönachi nisa ga nazí'i le Enón, gala' ga dë yödzö Salim, tu' dë nisa zila lataj na', ate' ta'dxín bönachi ni', en ta'dila nisa. <sup>24</sup> Raca caní zí'atëlö cate' biti' idzuné' Juan na' lidxi guíé.

<sup>25</sup> Ní'irö gula'sí lógaquië' bal-lë' bönni' dá'gaquië' Juan ta'díl-lalené' yugu' bönni' judío didza' ca naca que yöl-la' ruchi' a cuini que yudo'. <sup>26</sup> Bila'dxiné' ga zoë' Juan, en të' lë':

—Bönni' usedi. Buyútsöca'. Bönni' na' guzóalené' li' ia'tsölä'a yegu Jordán, bönni' na' benu' ba nalí queé', ruquilë' bönachi nisa, ate' ta'dxín yúgu'të bönachi ga zoë'.

<sup>27</sup> Ní'irö bubi'ë didza' Juan, rë' légaquië':

—Biti' bi dë lu në'ë nu bönni', channö cabí nudödë' Dios le lu në'ë. <sup>28</sup> Biyón quézili' lë na' bera' ba nalí, gunnía': "Biti' naca' neda' Cristo", pero Dios nasól-lë'ë neda' para guía' bönachi si' zë'ë Lë'. <sup>29</sup> Bönni' na' rizi'ë-bi' bi'i nigula rutsaga ná'abi' náquië' bönni' rutsaga në'ë, pero böchi' luzé'ë bönni' rutsaga në'ë, en dzáguië' lë', ruzé' náguië' didza' ru'ë, en rudzéjané' tu' riyönné' didza' ru'ë bönni' rutsaga në'ë. Lësca' caní, rudzéjade'eda' neda' tu' raca lë ni caní. <sup>30</sup> Run bayudxi gácarë' zxön Cristo, pero neda', run bayudxi gácarä' cuídi'sö.

### Nu za' zaca' yehua' yubálö

<sup>31</sup> Gunné' ca' Juan:

—Bönni' na' zé'ë zaca' xitsá'alö nayépisétërë' ca yúgu'të bönnachi. Nu bönni' náquië' bönnachi yödzölió ni, que yödzölió ni náquië', en ru'ë didza' que le raca yödzölió ni, pero Bönni' na' zé'ë zaca' yehua' yubálö nácatérë' lo ca yúgu'të bönnachi. <sup>32</sup> Bönni' na' runé' ba nalí que le bilé'ené', en le biyönné', pero cuntu nu rizí' lu né'e le runé' ba nalí. <sup>33</sup> Núti'tés bönni' rizí' lu né'e lë na' runé' ba nalí, bönni' ni rulu'ë lahui réajlé'ë naca idútë li didza' ru'ë Dios. <sup>34</sup> Bönni' na' nasól-lë'ë Dios, didza' queë' Dios ru'ë, tu' nuzóadërë' Dios Bö' Lá'ayi queë' lu Bönni' na'. <sup>35</sup> Dios Xuz nadxí'iné' Zxf'iné', ate' yúgu'të le dë chinudödë' lu né'e Zxf'iné' na'. <sup>36</sup> Nu bönni' réajlé'ë Dios Zxf'ini, dë yöl-la' na'bán idú queë', pero bönni' na' biti' réajlé'ë Dios Zxf'ini, biti' idéli'né' yöl-la' na'bán na', pero nabáguë'ë xíguia' lahuë' Dios.

## 4

*Jesús rui'ilenë'-nu didza' tu nigula Samaria*

<sup>1</sup> Bila'yönné' bönni' yudo' fariseo ca na' dá'gaca Jesús ziánrö bönnachi ca dá'gaca Juan, ate' ruquilé' ca' nisa ziánrö bönnachi ca ruquilé' nisa Juan. <sup>2</sup> Caléga Jesús caz ruquilé' bönnachi nisa, pero bönni' usëda queë' tu'quilé' bönnachi nisa. <sup>3</sup> Cate' gúquibe'enë' Jesús lë ni, buzé'ë luyú Judea, ate' sa'yéajë' leyúbölö luyú Galilea.

<sup>4</sup> Ga ni' sa'yéajë', run bayudxi tödë' luyú Samaria. <sup>5</sup> Caní guca, bidxiné' Jesús tu yödzödo' luyú Samaria, nazf'i le Sicar, gala' ga dë yu na' bunödzjë' Jacob queébi' José, zxí'iné' Jacob na', dza ni'te. <sup>6</sup> Lataj na' zoa tu yero nisa nachó'önë' Jacobo na' ga rë'. Cate' bidxiné' Jesús ni', gurö'ë ra' yero nisa na' tu' yöjxéqui'në' yu'ë nöza. Guca idú huagubidza.

<sup>7</sup> Ní'irö bidxinnu tu nigula Samaria ni' para sif'nu nisa. Jesús rë'ë-nu:

—Benna le guí'ja'.

<sup>8</sup> Tuzé' zoë' Jesús tu' chisójáquië' bönni' usëda queë' lu yödzö söjxí'gaquië' le ilahuë'.

<sup>9</sup> Ní'irö nigula Samaria na' rënu Jesús, rnnanu:

—¿Rinábitsenu' neda' le guí'ju', en nacu' bönni' judío? Neda' ni naca' nigula Samaria. Caní gunnánu tu' cabí ta'dzaga dxi'a bönnachi Samaria len bönnachi judío.

<sup>10</sup> Bubi'ë didza' Jesús, rë'ë-nu:

—La'tu' núnbë'u le runödzjë' Dios, en Nuzxi na' rë li': “Benna le guí'ja”, li' inabu', ate' Lë' gunnë' quiu' nisa runna yöl-la' na'bán.

<sup>11</sup> Ní'irö nigula na' rënu Lë', rnnanu:

—Bönni', biti' nu'u le cuéaju' nisa, ate' yero nisa ni, dxí'térö rö'. ¿Gazxi dë nisa na' runna yöl-la' na'bán? <sup>12</sup> ¿Naru' nácatérötso' Li' zxön ca xúziru' gudödi Jacob, bönni' ni' bennë' queétu' yero nisa ni, ga ni guzxi'ë nisa gu'ë, en gulé'ajbi' ca' zxí'iné', en gulé'ajba' ca' böa' bëdxi queë'?

<sup>13</sup> Bubi'ë didza' Jesús, rë'ë-nu:

—Núti'tés nu guí'aj nisa ni, leyúbölö ubidxi nisa, <sup>14</sup> pero nu guí'aj nisa na' unödzja' neda', bítirö ubidxi icja ládzi'da'ahuë', tu' unödzja' queë' nisa na' gaca lu icja ládzi'da'ahuë' ca tu ga ralaj nisa, le güí'i yöl-la' na'bán idú queë'.

<sup>15</sup> Ní'irö nigula na' rënu Lë', rnnanu:

—Bönni', benna quia' nisa na', para cabirö ubidxa', en cabirö uduzxi'a nisa ni.

<sup>16</sup> Jesús rë'ë-nu:

—Guyéaj, yöjlidzë' bönni' quiu', ate' huödu' ni.

<sup>17</sup> Bubí'nu didza' nigula na', rënu Lë':

—Cuntu nu zoa bönni' quia'.

Ní'irö Jesús rë'ë-nu:

—Ca nácatë rnno': “Cuntu nu zoa bönni' quia'”, <sup>18</sup> tu' chiguzóalenu' gayu' bönni', ate' bönni' na' zóalenu' në' na'a, biti' náquië' bönni' quiu'. Didza' ni ru'u, ca nácatë rnno'.

<sup>19</sup> Ní'irö nigula na' rënu Lë', rnnanu:

—Bönni', runi neda' nacu' bönni' ru'ë didza' uláz queë' Dios. <sup>20</sup> Xuz xtó'oru' guléquinë' Dios le bach lu güí'a ni, pero rnali' lib'ilí' Jerusalén naca ga ral-la' ilequi bönnachi Dios le bach.

<sup>21</sup> Jesús rë'ë-nu:

—Nigula, guyéajlé' neda'. Za' dza cate' tseaj ládxí'li'-në' Dios Xuz sal-la' biti' idisóali' guí'ado' ni, en biti' tsöjsóali' Jerusalén. <sup>22</sup> Libí'ili' reaj ládxí'li' Nu biti' núnbe'ëli', pero netu' núnbe'ëtu' Nu na' reaj ládxí'tu', tu' bené' queë' Dios ilá' lahuï yöl-la' rusólá ni'a quégäquië' bönni' judío. <sup>23</sup> Na'a, za' dza, en chiridxín dza na', cate' nupa le nácatë ta'yéaj ládxí'gaca Dios, ila'yéaj ládxí'gaca Lë', zóalenë' Dios Bö' Lá'ayi léguequi, en le naca idútë li, tu' rë'ënë' Dios Xuz ilácagaquië' queë' bönni' ila'yéaj ládxí'gaquië' Lë' caní. <sup>24</sup> Dios náquië' Bö', ate' nupa ta'yéaj ládxí'gaca Lë', run bayudxi ila'yéaj ládxí'gaca Lë', zóalenë' Dios Bö' Lá'ayi léguequi, en le naca idútë li.

<sup>25</sup> Ní'irö nigula na' rënu Lë', rnnanu:

—Nözda' ral-la' guídë' Mesías, Bönni' na' lë' Cristo. Cate' guídirë' Lë' quíxjöi'inë' rë'u yúgu'të.

<sup>26</sup> Jesús rë'ë-nu:

—Lë' cazë' ruí'ilenë' li' didza'.

<sup>27</sup> La' ná'asö bulu'dxinë' bönni' usëda queë' Jesús, ate' bulu'báninë' tu' ruí'ilenë'-nu nigula didza', pero biti' burúguinë' nitúë' inábinë' Lë', cabí innë': “¿Bizxi rinábinu'lënu?” o: “¿Bizxi didza' ruí'ilenu'-nu?” <sup>28</sup> Ní'irö nigula na' bucá'anamu xichö'önu ni', ate' bőajnu la' yödzö, söjódxinu nupa nacuá' ni', rnnanu:

<sup>29</sup> —¡Guli'dá, ilé'eli'-në' tu bönni' gudxë' neda' yúgu'të le chinuna! ¿Naru' cabí nácatsë' Lë' Cristo?

<sup>30</sup> Ní'irö bila'rúaj böñachi yödzö na', en bila'dxín ga zoë' Jesús.

<sup>31</sup> Tsanni ni' söhuóajnu nigula na', bönni' usëda queë' Jesús gulunë' bayudxi, të' Lë': —Bönni' Usedi, gudagu.

<sup>32</sup> Jesús rë' légaquië':

—Dë tu le rahua', le cabí réquibe'eli'.

<sup>33</sup> Ní'irö gula'nabi luzá'agaquië' bönni' usëda queë' tuë' ia'túë', ta'nnë':

—¿Zoa nu chidiguá'tsö le gudahuë'?

<sup>34</sup> Ní'irö Jesús rë' légaquië':

—Le nabánida' naca guna' ca rë'ënë' Xuza' nasö'l-lë'ë neda', en údxí guna' xichinë'.

<sup>35</sup> Caní rnnali' libí'ili': “Ia'tapa beo' huadxín dza uláparu.” Neda' rea' libí'ili': Guli'chisa lolí' uyuli' böñachi náca gaca ca gapa nadúzgaca, le chinabídxigaca para tsöjláparu'.

<sup>36</sup> Bönni' na' rulapë' rizi'ë lazxjë', ate' lë na' rulapë' bönni' na', naca para gata' yöl-la' na'bán idú quégaca böñachi, para gaca ulu'dzeja tsözxöön nu raza, en nu rulapa. <sup>37</sup> Naca idútë li lë na' rnna caní: Tu nu raza, ate' ia'tú nu rulapa. <sup>38</sup> Neda' gusö'l-la' libí'ili' tsöjlápali' ga biti' gúzali'. Gulún böñachi yúbölö dxin guláz, ate' libí'ili' ruzí'ili' xibé dxin na' núnquaquië'.

<sup>39</sup> Zián böñachi Samaria nacuá' yödzö Sicar na' gula'yéajlé'ë Jesús ni'a que xtídz'a nu nigula na' bennu ba nalí queë', gunnánu: “Gudxë' neda' yúgu'të le chinuna.” <sup>40</sup> Cate' bila'dxinë' bönni' Samaria ga ni' zoë' Jesús, guláta'yuë' lahuë' ugá'analenë' légaquië'. Jesús bugá'anë' ni' ia'chopa dza. <sup>41</sup> Caní guca, ziánterë' ca' bönni' ni' gula'yéajlé'ë Jesús ni'a que didza' bë'ë. <sup>42</sup> Ní'irö bönni' ni' gulé'-nu nigula na', ta'nnë':

—Na'a réajlé'ëtu' Lë', calégasö ni'a que didza' bë'u li', pero lësca' tu' biyónitu' netu' Lë', en nöztu' le nácatë bönni' ni náquië' Cristo, Nu rusólá böñachi yödzölió.

### Ruúnë' Jesús zxí'inë' tuë' bönni' dë lu në'ë

<sup>43</sup> Ia'chopa dza ca', buzé'ë Jesús luyú Samaria, en sa'yéajë' luyú Galilea. <sup>44</sup> Caní benë', tu' gudíxjö'ë Lë' cazë' Jesús, gunnë': “Böñachi uládz queë' nu bönni' ru'ë didza' uláz queë' Dios biti' tun lë' bal.” <sup>45</sup> Cate' bidxinë' Jesús luyú Galilea, gulunë' bönni' Galilea na' Lë' bal tu' yójáquië' ca' Jerusalén cate' guca Laní Pascua, en bila'lé'enë' le benë' Jesús ni'.

<sup>46</sup> Ní'irö bőajé' Jesús yödzö Caná luyú Galilea, ga ni' benë' ga böáca nisa xisi uva. Lu yödzö Capernaum na' zoë' tu bönni' dë lu në'ë uláz queë' bönni' rinná bë'ë, ate' ré'ebi'

bí'i bönni' queé' bönni' na' dë lu në'ë. <sup>47</sup> Cate' biyönnë' bönni' ni chibuzé'ë Jesús luyú Judea, en budxiné' luyú Galilea na', ní'irö guyijé' ga na' zoë' Jesús, en góta'yuë' lahuë' guídé' lidxé', para uduhuénë'-bi' bí'i bönni' queé' na', tu' chirequi gátili'. <sup>48</sup> Ní'irö Jesús rë' lë':

—Bitti' ca' tséajlë'eli' channö cabí ilé'eli' le nácagaca bë', en yugu' yöl-la' huáca guna'.

<sup>49</sup> Ní'irö bönni' na' dë lu në'ë uláz queé' bönni' rinná bë'ë gudxé' Jesús, rnne':

—Bönni', gudía'të para cabí gátili' bí'i quia'.

<sup>50</sup> Ní'irö Jesús rë' lë':

—Böaj lidxu'. Nabambi' bí'i quiu'.

Bönni' ni guyéajlë'ë didza' bë'ë Jesús, ate' söhuójé'. <sup>51</sup> Tsanni ni' yu'ë nöza söhuójé', duzxi'gala'gaquie' lë' bönni' huen dxin queé' ate' gula'guíxjöi'iné' lë', ta'nné':

—Nabambi' bí'i quiu'.

<sup>52</sup> Gunábiné' légaquie' bátaxi gusí lo ruhuöáca ládxibi'. Të' lë':

—Ba'ayi, idú huagubidza, burúaj xilá yú'ubi'.

<sup>53</sup> Ní'irö góquibe'ené' xúzibi' bí'i na', böácabi' cate' ni' bë'lené' Jesús lë' didza', en gudxé' lë': "Nabambi' bí'i quiu'." Que lë ni na' guyéajlë'ë Jesús, ate' gula'yéajlë' ca' Lë' böñachi nacuá' lidxé'.

<sup>54</sup> Yöl-la' huáca ni naca le buropi bené' Jesús cate' ni' zoë' luyú Galilea, gudödi buzé'ë luyú Judea.

## 5

### *Ruúnë' Jesús tu bönni' nacú'unië' bin ga naz'i le Betedsa*

<sup>1</sup> Gudödi guca lë ni, guca laní quégaquie' bönni' judío, ate' guyijé' Jesús Jerusalén. <sup>2</sup> Lu yödzö na', gala' ga tu'ú'uba' bö'cu' zxila', dë tu le zxön yudzu nisa, naz'i le Betedsa lu didza' hebreo, en nacuá' gayu' chila don que. <sup>3</sup> Yugu' lu chila na' dégaquie' zián bönni' té'ené', bönni' nachul-la lógaquie', en bönni' biti' gaca sa'gaquie', en bönni' nacú'unigaquie' bin. Ta'bözé' bata utá cuini nisa na'. <sup>4</sup> Caní raca, tu' ruhuötje' tu gubáz lá'ayi queé' Dios tu chi'i huéaj, en röjtsu'ë lu nisa na', en ruté' nisa na'. Huöácatë' nu bönni' tsöjtsú'utië' lu nisa na' cate' rutá cuini ca naca bíti'tës yödzöhué' raca queé'. <sup>5</sup> Zoë' tu bönni' ni', chiguca chizxunu' uruá' iz ré'ené'. <sup>6</sup> Cate' bilé'ené' Jesús dë' bönni' huë' na' ni', réquibe'ené' chiguca zián iz ré'ené', ate' gunábiné' lë', rnne':

—¿Ba ré'enu' huöácu'?

<sup>7</sup> Bubi'ë didza' bönni' huë' na', rë' Jesús:

—Bönni', cuntu nu zoa cu'u neda' lu nisa na' cate' rutá cuini. Tsanni sa'yéaja' neda', röjtsu'ë bönni' yübölö zí'alö ca neda'.

<sup>8</sup> Jesús rë' lë':

—Guyaschi. Buá' le denu', en guzé'e.

<sup>9</sup> La' böácate' bönni' na', ate' bu'ë le góti'në', en guzé'ë. Dza na' raca caní naca dza lá'ayi quégaquie' bönni' judío. <sup>10</sup> Ní'irö bönni' judío unná bë' gulé' bönni' na' nuhuöáquie', ta'nné':

—Dza lá'ayi naca na'a. Biti' ral-la' u'u le ráti'nu'.

<sup>11</sup> Bubi'ë didza' bönni' na', rë' légaquie':

—Bönni' na' bunë' neda' gudxi cazé' neda', gunnë': "Buá' le denu', en guzé'e." Bönni' na' bunë' neda'.

<sup>12</sup> Ní'irö gula'nábiné' lë', ta'nné':

—¿Nuzxi na' gudxi caní li': "Buá' le denu', en guzé'e"?

<sup>13</sup> Biti' nőziné' bönni' na' nuhuöáquie' nuzxi na', tu' chibuzé'ë Jesús lataj ni' tu' nacuá' böñachi zián ni'. <sup>14</sup> Gudödi guca lë ni, Jesús yöjxáquie' bönni' na' ga naca chila yudo', ate' rë' lë':

—Buyútsöca'. Chiböácu'. Bíti'rö gunu' dul-la', para cabí gaca quiu' tu le nácarö zi' ca lë na' guca quiu'.

<sup>15</sup> Guyijé' bönni' na', yöjtixjöi'iné' yugu' bönni' judío unná bë' Jesús na' buné' lë'. <sup>16</sup> Que lë ni na' bönni' judío unná bë' gula'bía ládxí'gaquië' Jesús, en gulé'enné' ilútië' Lë', tu' runé' yugu' lë ni cate' naca dza lá'ayi quégaquië'. <sup>17</sup> Bubi'ë didza' Jesús, rë' légaquië':

—Xuza' ná'atë runé' dxin, ate' neda' ca' runa' dxin.

<sup>18</sup> Que lë ni na' gulé'ëniröné' bönni' judío unná bë' ilútië' Jesús, calégasö tu' guditsjë' xibá que dza lá'ayi quégaquië', pero lësca' tu' gunnë' Dios caz náquië' Xuzë', ate' caní naca nun cuiné' ca náquië' Dios.

### *Yöl-la' unná bë' dë lu né'ë Zxi'iné' Dios*

<sup>19</sup> Ni'irö bubi'ë didza' Jesús, rë' légaquië':

—Le nácatë rea' libí'ili'. Biti' bi gaca guna' neda', Zxi'iné' Dios, rácasö quia', pero tuz lë na' rilé'eda' runé' Dios Xuz. Yúgu'të le runé' Dios Xuz, lësca' caní runa' neda', Zxi'iné'. <sup>20</sup> Dios Xuz nadxí'iné' neda', Zxi'iné', en rulu'iné' neda' yúgu'të le runé', ate' yugu' le zxóntëro ca lë ni ulu'iné' neda', le ilún ga ubánili' libí'ili'. <sup>21</sup> Ca na' runé' Dios Xuz, rusubané' nupa nátigaca, en rugú'ë légaquië' yöl-la' na'bán, lësca' caní runa' neda', Zxi'iné', runödzja' quégaca bönachi yöl-la' na'bán ca ré'ëni quézida'. <sup>22</sup> Cuntu nu ruchi'a rusöröe' Dios Xuz, pero chinudödë' lu na'a neda', Zxi'iné', yúgu'të yöl-la' unná bë' para uchi'a usöröa' bönachi. <sup>23</sup> Caní naca para ilún bal yúgu'të bönachi neda', Zxi'iné', ca na' tun bal Dios Xuz. Nu biti' run bal neda', Zxi'iné', biti' run bal Dios Xuz, nasól-lë'ë neda', Zxi'iné' na'.

<sup>24</sup> 'Le nácatë rea' libí'ili'. Bönni' na' riyyönné' didza' ruá'a, en réajlë'ë Dios Xuz na' nasól-lë'ë neda' dë yöl-la' na'bán idú queë', ate' biti' irugu queë'. Náquië' ca nu chinubán lu yöl-la' guti tu' chidé yöl-la' na'bán idú queë'. <sup>25</sup> Le nácatë rea' libí'ili', za' dza, en chiridxín dza na', cate' ila'yöni nupa chinátigaca chi'a neda', Zxi'iné' Dios, ate' nupa ila'yöni xtídz'a', en ilún ca rnna, huöáta' yöl-la' na'bán quéguequi. <sup>26</sup> Ca na' dë lu né'ë Dios Xuz unödzjë' yöl-la' na'bán quégaca bönachi, lësca' caní bené' ga dë lu na'a neda', Zxi'iné', unödzjë' yöl-la' na'bán quégaca bönachi. <sup>27</sup> Lësca' caní budödë' lu na'a yöl-la' unná bë' uchi'a usöröa' bönachi, tu' naca' Bönni' Gulje' Bönachi. <sup>28</sup> Biti' ubánili' ca naca lë ni, tu' huadxín dza cate' yúgu'të nupa chinátigaca ila'yöni chi'a, <sup>29</sup> en ulu'rúaj yero ba. Ulu'bán nupa na' gulún le naca tsahui', en huöáta' yöl-la' na'bán quéguequi, pero nupa na' gulún le biti' naca tsahui', ulu'bán, ate' irugu quéguequi ilátigaca tsaz.

### *Le naca bë' le náquië' Jesús*

<sup>30</sup> Gunné' ca' Jesús:

—Biti' bi gaca guna' la' néda'sö. Ca naca le riyyönda' rë' Xuza' neda', caní ruchi'a rusöröa', ate' ca na' ruchi'a rusöröa' naca tsahui', tu' cabí runa' ca ré'ënisida' neda', pero ca ré'ëni quéziné' Xuza' nasól-lë'ë neda', runa'. <sup>31</sup> Channö neda' runa' ba nalí que la' cuin caza', biti' naca lesaca' lë na' runa' ba nalí. <sup>32</sup> Zoa Nu yübölö Nu run ba nalí quia' neda', Lë' Xuza', ate' nözda' naca lesaca' le runé' ba nalí quia'. <sup>33</sup> Libí'ili' gusól-la'li' bönni' yöjnábiguequiné' Juan, ate' lë na' bené' ba nalí quia' naca idútë li. <sup>34</sup> Neda' biti' naquinda' nu bönni' guné' ba nalí quia', pero ruá'a didza' caní para uláli'. <sup>35</sup> Didza' bë'ë Juan na' gulaca ca tu guí' yöri, le guyegui, en buzení', ate' libí'ili', tu chí'isö guyaza ládxí'li' uzi'ili' xibé bení' queë'. <sup>36</sup> Na'a, zoa le run ba nalí quia' neda' le nácarö idú li ladxe' ca lë na' bené' ba nalí quia' Juan. Yugu' le budödë' Dios Xuz lu na'a guna', la' leze na' runa', ate' yugu' lë na' runa', tun ba nalí quia', en nácagaca bë' gusól-lë'ë Dios Xuz neda'. <sup>37</sup> Lësca' Dios Xuz nasól-lë'ë neda' runé' ba nalí quia'. Catu caz biyónili' chí'ë, en catu caz bilé'eli' lahuë', <sup>38</sup> en cabí nazí' lu ná'ali' xtídzë'ë, tu' cabí réajlë'ëli' neda', Nu na' gusól-lë'ë. <sup>39</sup> Rusédali' le nazúaj lu guichi lá'ayi, tu' réquili' huáta' yöl-la' na'bán idú queëli' ni'a que lë na' nazúaj lu guichi lá'ayi, ate' lë na' nazúaj lu guichi run ba nalí quia' neda'. <sup>40</sup> Biti' ré'ënil'i' guídali' quia' neda' para gata' yöl-la' na'bán queëli'.

<sup>41</sup> 'Biti' riguilja' yöl-la' ba le ila'gú'u bönachi neda'. <sup>42</sup> Neda' núnbë'a libí'ili', en nözda' biti' nadxfí'ili'-në' Dios. <sup>43</sup> Bidxina' ni uláz queë' Dios Xuz, ate' libí'ili' biti' rizi' lu ná'ali' neda', pero channö huadxín nu yúbölö nu guídi rácasö que, si' lu ná'ali' nu na'. <sup>44</sup> ¿Nacxi caz gaca tséajlé'ëli' Dios channö rizi'ili' yöl-la' run zxön que luzá'ali' tuli' ia'tuli', en biti' riguéljali' yöl-la' run zxön na' za' lu në'ë la's dui Dios? <sup>45</sup> Biti' uzóa ícjali' uzégua' libí'ili' didza' lahuë' Xuza'. Nu na' uzegui libí'ili' didza' naca lë cazë' Moisés, bönni' na' ruzxöni ládxí'li'-në', sal-la' gútië' dza ni'te. <sup>46</sup> La'tu' réajlé'ëli'-në' Moisés, tséajlé'ëli' ca' neda', tu' buzúajë' Moisés lu guichi ca naca quia' neda'. <sup>47</sup> Na'a, ¿nacxi caz gaca tséajlé'ëli' didza' ruá'a neda' channö cabí réajlé'ëli' yugu' le buzúajë' Moisés lu guichi?

## 6

*Rugahuë' Jesús ziánrö ca chi-un gayuá' bönachi*

(Mt. 14:13-21; Mr. 6:30-44; Lc. 9:10-17)

<sup>1</sup> Gudödi guca lë ni, guyijë' Jesús ia'tsölá'a Nísado' Que Galilea, nazí'i le ca' Nísado' Queë' Tiberias. <sup>2</sup> Bönachi zián yöjnögaca Jesús tu' bila'lé'e yugu' yöl-la' huáca benë', cate' bunë' bönni' té'enë'. <sup>3</sup> Ní'irö gurenë' Jesús, guyijë' ga naca tu lu guí'ado', ga ni' gurö'ölenë' yugu' bönni' usëda queë'. <sup>4</sup> Chizóa idxín Laní Pascua cate' tu'subanë' bönni' judío ca benë' Dios, bubéajë' xuz xto'ogaquie' luyú Egípto. <sup>5</sup> Cate' guchisa lahuë' Jesús, en bilé'enë' bönachi zián zá'gaca ga zoë', ní'irö rë' Felipe:

—¿Gazxi tsöjö'uru' yöta xtila le ilágugaca bönachi zián ni?

<sup>6</sup> Caní gunné' Jesús para si' bë'ë Felipe na', tu' chinózinë' Lë' naca gunë'. <sup>7</sup> Bubi'ë didza' Felipe, rnnë':

—La'tu' si'iru' yöta xtila len lázxjaro' que idú xunu' beo', biti' guequi láti'do' huéaj le ilágugaca bönachi zián ni.

<sup>8</sup> Ní'irö tu bönni' usëda queë' Jesús, lë' Andrés, bóchë'ë Simón Pedro, rë' Lë', rnnë':

<sup>9</sup> —Ni zóabi' tubi' bi'i bönni', nuá'abi' gayu' yöta xtila néquiguequini zxoa' cebada, en chópaba' böla cuídi'do'. ¿Naru' huéqui'tse ugagu le do' ni cate' xo bönachi?

<sup>10</sup> Ní'irö Jesús rë' légaquie':

—Guli'gún ga ila'bö' bönachi zián ni lu yu.

Lataj na', rö'öda' daca', ate' gula'bö'ë idú ca chi-un gáyu'ë bönni' ni'. <sup>11</sup> Ní'irö gudélë'ë Jesús yugu' yöta xtila na'. Cate' chigudxë' Dios: "Xclenu'", gudísië' le quégaquie' bönni' usëda queë', ate' légaquie' gula'guisië' le quégaca yúgu'të nupa na' rö'gaca lu daca' ni'. Lësca' caní gulunë' quégacaba' böla cuídi'do' na', ate' gulahuë' tsca gulë'ënnë' ilahuë'.

<sup>12</sup> Cate' chibulu'huóljanë', Jesús gudxë' yugu' bönni' usëda queë', gunné':

—Buli'túbi le bizxaj nagá'anagaca, para cabí ilaca ditaj.

<sup>13</sup> Bulu'tubë' ca', ate' bulu'líë' chinnu ga'börado' yugu' le bizxaj quégaca gayu' yöta xtila néquiguequini zxoa' cebada na', le bulu'gá'ana quégaquie' bönni' na' gulahuë'.

<sup>14</sup> Cate' bila'lé'enë' bönni' ni' yöl-la' huáca na' benë' Jesús, ta'nnë':

—Le nácatë bönni' ni náquië' bönni' na' ru'ë didza' uláz queë' Dios, bönni' na' ral-la' guídë' yödzölió ni.

<sup>15</sup> Tu' réquibe'enë' Jesús té'ënnë' ila'ché'ë Lë' bayudxi para ilunë' ga inná bé'enë' légaquie', que lë ni na' buzé'ë ni', sa'yéajë' tuzë' tu lu guí'a.

*Rizë'e ni'ë Jesús lu nísado'*

(Mt. 14:22-27; Mr. 6:45-52)

<sup>16</sup> Cate' chizá' ral-la, yójáquië' bönni' usëda queë' Jesús, ate' bila'dxinë' ra' nísado'.

<sup>17</sup> Gula'benë' tu lë'e bárcodo' ni', en söjáquië' ta'dödë' lu nísado' na', para ulu'dxinë' Capernaum. Chinaca chul-la ate' Jesús biti' ridxíninë' ga na' nacu'ë. <sup>18</sup> Gusí lo recja bö' budunu' lu nísado' na', ate' riyasa ridxía nisa na'. <sup>19</sup> Cate' chibulu'sé'ë bárcodo' na', le

guzá' le naca tsca rizá'aru' tu hórasö, ní'irö bila'lé'enë' Jesús rizë'e ni'ë lu nísado' na', en zë'ë ribíguë'ë ga na' zeaj barco na', ate' guladxi gula'dzöbinë'. <sup>20</sup> Ní'irö Jesús rë' légaquië': —Neda' caz ni. Biti' gádxili'.

<sup>21</sup> Ní'irö len yöl-la' rudzeja quégaquië' bulu'guélë'ë Lë' lë'e bárcodo' na', ate' la' bidxitë bárcodo' na' lu bidxi ga ni' söjáquië'.

### *Bönachi zián tu'guilaj Jesús*

<sup>22</sup> Dza buropi ni', guléquibe'e bönachi zián na' nagá'anagaca ia'tsól'a nísado' bidxín tuz bárcodo' ni', ate' Jesús biti' gurénlenë' yugu' bönni' usëda queë' lë'e bárcodo' na', pero légacase' na' yójáquië'. <sup>23</sup> Ní'irö bila'rúaj ia'bal-la bárcodo' lu yödzö Tiberias, ate' bila'dxín tu lataj le dë gálä'sö ga ni' gulahuë' yöta xtila cate' ni' Xanru' Jesús gudxë' Dios: "Xclenu'" que. <sup>24</sup> Tu' bila'lé'enë' bíti'rö zoë' Jesús ni', en biti' nacu'ë bönni' usëda queë' ni', que lë ni na' gula'benë' lë'egaca bárcodo' na', ate' yójáquië' Capernaum, tu'guilje' Jesús.

### *Náquië' Jesús yöta xtila nabánigaca tsaz bönachi*

<sup>25</sup> Cate' bila'dxín bönachi zián na' ia'tsól'a nísado' na', yöjxáca'gaquië' Jesús, en té' Lë':

—Bönni' Usedi, ¿bátaxi bidxinu' ni?

<sup>26</sup> Bubi'ë didza' Jesús, rë' légaquië':

—Le nácatë rea' libí'ili': Ruguílajli' neda', calëga tu' bilé'eli' yugu' yöl-la' huáca bena', pero tu' gudáguli' yöta xtila ni', en bóljali'. <sup>27</sup> Guli'gún dxin, calëga para sí'ili' la' huagu ridödi que, pero para sí'ili' la' huagu na' ugá'anatica'sö, en runna yöl-la' na'bán idú. Lë ni naca la' huagu neda', Bönni' Guljë' Bönachi, gunna' queéli', tu' bulu'ë lahui Xuza' Dios naca' Zxi'inë'.

<sup>28</sup> Ní'irö gula'nábinë' Lë', ta'nné':

—¿Bizxi run bayudxi guntu' para guntu' le raza ládxë'ë Dios?

<sup>29</sup> Bubi'ë didza' Jesús, rë' légaquië':

—Lë ni le raza ládxë'ë Dios, tséajlë'eli' neda', naca' nu gusól-lë'ë Lë'.

<sup>30</sup> Ní'irö gula'nábinë' Lë', ta'nné':

—¿Bizxi le naca bë' runu', le ilé'etu' para tséajlë'etu' Li'? ¿Bizxi yöl-la' huáca runu'?

<sup>31</sup> Gulahuë' xuz gudödi queëru' yöta xtila nazí'i le maná lu lataj cá'asö, ca nazúaj lu guichi lá'ayi, rnna: "Yöta xtila que yehua' yubá Moisés bë'ë quégaquië', gulahuë'."

<sup>32</sup> Bubi'ë didza' Jesús, rë' légaquië':

—Le nácatë rea' libí'ili': Calëga Moisés na' bennë' queéli' yöta xtila que yehua' yubá, pero Xuza' Dios runnë' queéli' yöta xtila le naca idú que yehua' yubá. <sup>33</sup> Yöta xtila na' runnë' Dios quégaca bönachi naca' neda', lë na' birúaj yehua' yubá, en runödzaj yöl-la' na'bán quégaca bönachi yödzölió ni.

<sup>34</sup> Ní'irö té' Lë':

—Xan, bénnatica'sö queëtu' yöta xtila na'.

<sup>35</sup> Jesús rë' légaquië':

—Neda' caz naca' yöta xtila nabánigaca tsaz bönachi. Nu za'len neda', huölaj udzé'e tsaz nu na' le naca queë' Dios, ate' nu tséajlë' neda', chiné'aj tsaz le naca queë' Dios.

<sup>36</sup> Naca ca na' chigudxi caza' libí'ili': "Sal-la' rilé'eli' neda', biti' ca' réajlë'eli' neda'."

<sup>37</sup> Yúgu'të nupa na' runnë' Xuza' quia', ídigaca quia', ate' nupa na' zaca quia', biti' usá'gaca'-në'. <sup>38</sup> Caní naca, tu' böötja' birúaja' yehua' yubá, calëga para guna' ca ré'ënda' neda' caz, pero para guna' ca ré'ënenë' Dios Xuz, nasól-lë'ë neda'. <sup>39</sup> Lë ni le ré'ënenë' Xuza' nasól-lë'ë neda', ré'ënenë' cabí unítia' nitú nupa na' bennë' quia', pero usubana' léguequi dza údxi. <sup>40</sup> Lë ni le ré'ënenë' Dios Xuz nasól-lë'ë neda', ré'ënenë' gata' yöl-la' na'bán quéguequi, yúgu'të nupa na' ila'lé'e neda', Zxi'inë', en ila'yéajlë' neda', ate' neda' usubana' léguequi dza údxi na'.

<sup>41</sup> Ní'irö gula'nné' queë' Jesús bönni' judío unná bë' tu' gunnë': "Neda' caz naca' yöta xtila na' bötaj, birúaj yehua' yubá." <sup>42</sup> Que lë ni na' ta'nné':

—¿Naru' cabí bönni' ni Jesús, zxí' iné' José? Nunbë' cázaru' xuz xiné'ë. ¿Nacxi caz naca na', rnné' bönni' ni: "Bötja' birúaja' yehua' yubá"?

<sup>43</sup> Ní'irö bubi'ë didza' Jesús, rë' légaquië':

—Biti' innéli' quia' la' libí'isili'. <sup>44</sup> Biti' séqui'né' nitúë' bönni' guídë' quia' channö cabí idigu'ë quia' Xuza' nasól-lë'ë neda' nu na', ate' neda' usubana' nu na' dza údxi. <sup>45</sup> Nazúaj lu guichi lá'ayi ca gula'nné' bönni' gulu'ë didza' uláz queë' Dios, le rnna caní: Dios usédiné' yúgu'të bönachi. Que lë ni na', yúgu'të bönni' ta'yönné' chi'ë Xuza', en nazédaquie' lu né'ë Lë' zá'gaquië' quia'.

<sup>46</sup> 'Cuntu nu bönni' bilé'ené' Dios Xuz, pero tuzë' Bönni' na' birúajë' ga zoë' Dios. Bönni' ni rilé'e quéziné' Dios Xuz. <sup>47</sup> Le nácatë rea' libí'ili': Núti'tës bönni' réajlé'ë neda' dë yölla' na'bán idú queë'. <sup>48</sup> Neda' caz naca' yöta xtila nabánigaca tsaz bönachi. <sup>49</sup> Gulahuë' xuz xtó'oli' yöta xtila na' nazi'i le maná lu lataj cá'asö, en cate' bizá'a dza quégaquië' gulátië'.

<sup>50</sup> Neda' naca' yöta xtila ruhuötaj rirúaj yehua' yubá, ate' núti'tës bönni' gahuë' le, biti' ca' gátië' bönni' na'. <sup>51</sup> Neda' caz naca' yöta xtila na' nabánigaca bönachi, le bötaj birúaj yehua' yubá, ate' channö núti'tës bönni' gahuë' yöta xtila na', gaca bántica'së' bönni' na'. Yöta xtila na' runödzja' neda' naca xipéla'a, le runödzja' para gata' yöll-la' na'bán quégaca bönachi yödzölió.

<sup>52</sup> Ní'irö bönni' judío unná bë' gula'chixi luzá'agaquië', ta'nné':

—¿Naru' huácatsö bönni' ni gunnë' queëru' xipéle'ë le gáguru'?

<sup>53</sup> Que lë ni na' Jesús rë' légaquië':

—Le nácatë rea' libí'ili': Channö cabí gáguli' xipéla'a neda', Bönni' Guljë' Bönachi, en channö cabí guí'jali' xichöna', biti' ca' zóalen libí'ili' yöll-la' na'bán na'. <sup>54</sup> Núti'tës nu gagu xipéla'a, en guí'aj xichöna', dë que yöll-la' na'bán idú, ate' neda' usubana' nu na' dza údxi. <sup>55</sup> Caní gaca, tu' naca xipéla'a la' huagu idú, ate' xichöna' naca tu le naca idú para nu guí'aj le. <sup>56</sup> Núti'tës bönni' gahuë' xipéla'a, en guí'jë' xichöna', sóalentica'së' bönni' na' neda', ate' neda' sóalentica'sa' le'. <sup>57</sup> Ca na' zoë' nabánë' Dios Xuz nasól-lë'ë neda', ate' neda' nabánida' Lë', lësca' caní ibániné' neda' núti'tës bönni' gahuë' neda'. <sup>58</sup> Lë ni yöta xtila bötaj birúaj yehua' yubá, en biti' naca ca yöta xtila na' nazi'i le maná, lë na' gulahuë' xuz xtó'oli', en cate' bizá'a dza quégaquië' gulátië'. Núti'tës bönni' gahuë' yöta xtila ni sóatica'së' ibané'.

<sup>59</sup> Yugu' didza' ni bë'ë Jesús ga naca tu lu yu'u ga tu'dubë' bönni' judío, en tu'sëdë' queë' Dios, ate' guca lë ni tsanni ni' rusédiné' bönachi Capernaum.

### Didza' rúnnagaca queëru' yöll-la' na'bán idú

<sup>60</sup> Cate' bila'yönné' didza' ni, zián bönni' usëda queë' Jesús gula'nné' que, ta'nné':

—Banígatë didza' ni. ¿Nuzxi caz gaca si' lu né'e le?

<sup>61</sup> Réquibe'ené' Jesús ta'nné' bönni' usëda queë' que xtídzë'ë, ate' gunábinë' légaquië', rnné':

—¿Naru' run didza' ni libí'ili' zi'? <sup>62</sup> ¿Nacxi caz gaca channö hualé'eli' neda', Bönni' Guljë' Bönachi, huëpa' huöja' ga ni' zoa' zí'alö? <sup>63</sup> Le naca queë' Dios Bö' Lá'ayi naca le runna yöll-la' na'bán queëli'. Le naca bëla'sö cuntu nu uzi' xibé. Didza' na' bë'lena' libí'ili' nácagaca queë' Dios Bö' Lá'ayi, en rúnnagaca yöll-la' na'bán quégaca bönachi. <sup>64</sup> Na'a, bál-lali' biti' réajlé'ëli'.

Gunnë' caní Jesús tu' nòziné' dza ni'te nupa na' biti' ta'yéajlé', enca' nu na' udödi Lë' lu ná'agaquië' bönni' ilútië' Lë'. <sup>65</sup> Que lë ni na' gunnë':

—Que lë ni na' chigudxi caza' libí'ili': Biti' séqui'né' nitúë' bönni' të'ë neda' channö Dios Xuz cabí gu'ë lë' lataj.

<sup>66</sup> Dza na' gulaca chopá ládxí'gaquié' zián bönni' usëda queë', en bíti'rö gula'dálenë' Lë'. <sup>67</sup> Ní'irö Jesús gunábinë' idxínnutë' bönni' usëda queë' na', rë' légaquié':

—¿Naru' ubíga'tsali' ca' libí'ilí?

<sup>68</sup> Bubi'ë didza' Pedro, rë' Lë':

—Xan, ¿nuzxi que tséajtu'? Li' napu' didza' rúnnagaca queëtu' yöl-la' na'bán idú.

<sup>69</sup> Netu' réajlé'etu' Li', en núnbe'etu' Li', nacu' Cristo na' nasö'l-lë'ë Dios, en nacu' ca' Zxí'inë' Dios ban.

<sup>70</sup> Bubi'ë didza' Jesús, rë' légaquié':

—Guró caza' libí'ilí chínnuli' ni, pero tuë' bönni' lágajli' libí'ilí dzaga tu' xihui' lë'.

<sup>71</sup> Didza' ni bë'ë Jesús ca naca queë' Judas Iscariote, zxí'inë' tu bönni' lë' Simón, tu' náquié' Judas bönni' na' udödë' Jesús lu ná'agaquié' bönni' ilútié' Lë', en nabábalenë' ia'chinéajé' bönni' usëda queë' Jesús.

## 7

### *Bönni' böchi' cazë' Jesús biti' ta'yéajlë'ë Lë'*

<sup>1</sup> Gudödi guca lë ni ridé' Jesús luyú Galilea. Biti' gú'unne' tsejë' luyú Judea tu' té'ennë' bönni' judío unná bë' nacu'ë ni' ilútié' Lë'. <sup>2</sup> Dza ni' chizóa idxín laní quégacié' bönni' judío cate' tu'subanë' ca gula'cu'ë xuz xtó'ogaquié' zxan libín lága'do'. <sup>3</sup> Que lë ni na' yugu' bönni' bôchë'ë Jesús gulé' Lë', ta'nné':

—Birúaj ni, en guyéaj luyú Judea para ila'lé'enë' ca' bönni' usëda quiu' nacu'ë ni' yugu' yöl-la' huáca runu'. <sup>4</sup> Channö rë'ënë' nu bönni' ilúnbë' e bönachi lë', biti' runë' bagáchi'sö le runë'. Tu' runu' yugu' yöl-la' huáca caní, bulu'i cuinu' lógaca yúgu'të bönachi.

<sup>5</sup> Caní gula'nné', tu' cabí ta'yéajlë'ë bönni' bôchë'ë Jesús Lë'. <sup>6</sup> Ní'irö Jesús rë' légaquié':

—Biti' ridxini dza quia' para ulu'i lahuá' lógaca bönachi, pero dza queëli' tséajli' ni' chizóa caz. <sup>7</sup> Bönachi yödzölió ni biti' tu'zóa libí'ilí tsölä'alö, pero tu'zóa neda' tsölä'alö tu' runa' ba nalí quégacié', rnnía' naca xihui' le tunë'. <sup>8</sup> Guli'tséaj libí'ilí laní na'. Biti' tseja' laní na' na'a tu' biti' ridxini dza quia'.

<sup>9</sup> Cate' chigudxé' légaquié' lë ni, bugá'anë' luyú Galilea.

### *Sa'yéajë' Jesús laní quégaca bönachi judío*

<sup>10</sup> Gudödi söjáquié' bönni' bôchë'ë Jesús laní na', ní'irö sa'yéajë' ca' Lë', caléga yálajdo', pero bagáchi'sö sa'yéajë'. <sup>11</sup> Ga na' raca laní na', bulu'guiljë' bönni' judío unná bë' Jesús, ta'nné':

—¿Gazxi zoë' bönni' na'?

<sup>12</sup> Bönachi zián ni' gulü'ida' didza' ca naca queë' Jesús. Bal-lë' ta'nné':

—Náquié' dxi'a.

Ia'bal-lë' ta'nné':

—Biti' náquié' dxi'a tu' rizi' yé'enë' bönachi.

<sup>13</sup> Biti' bë'ë nitúë' bönni' didza' yálajdo' ca naca queë' Jesús, tu' tadxibönachi zián na' le ilunë' yugu' bönni' judío unná bë'.

<sup>14</sup> Cate' chibidxín gatsaj laní na', blë'ë Jesús ra' yudo', en busédinë' bönachi nacuá' ni'.

<sup>15</sup> Bulu'báninë' bönni' judío, ta'nné':

—¿Nacxi caz naca, rácadë'ë bönni' ni, en biti' ca' nazëdë' que yudo'?

<sup>16</sup> Bubi'ë didza' Jesús, rë' légaquié':

—Le rusédida' neda', caléga quia' naca, pero queë' Dios Xuz na' nasö'l-lë'ë neda'.

<sup>17</sup> Channö rë'ënë' nu bönni' gunë' ca rë'ënë' Dios, huéquibe'enë' bönni' na' channö nequi queë' Dios le rusédida' bönachi o channö rácásö quia' ruá'a didza'. <sup>18</sup> Nu bönni' ru'ë didza' rácásö queë', runë' caní para ilún bal bönachi lë', pero Bönni' na' rë'ënë' ilún bönachi bal Nu nasö'l-la' lë', Bönni' ni ru'ë didza' idútë li, en biti' ca' rizi' yë'ë.

<sup>19</sup> 'Moisés bennë' queéli' xibá queé' Dios, pero biti' runli' ca rinná bë' xibá na'. ¿Bizzx que rizóa ribő'öli' gútili' neda'?

<sup>20</sup> Bulu'bí'i didza' bönachi zián na', té Lë':

—Tu' xihui' dzaga li'. ¿Nuzxi caz rizóa ribő'ö guti li'?

<sup>21</sup> Bubi'ë didza' Jesús, ré' légaqui'ë:

—Tu yöl-la' huáca bena', ate' rubánili' yúgu'téli'. <sup>22</sup> Le nácatë Moisés bennë' queéli' lë na' narugu lu xipéla'lí' le naca bë', pero caléga Moisés caz bennë' queéli' lë na', pero guzxi'ë le lu ná'agaqui'ë xuz xtá'ahuë'. Na'a, sal-la' naca dza lá'ayi, richúguli' lu xipéla'gacabi' bi'i bönni'do' lë na' naca bë' néquiguequibi' queé' Dios. <sup>23</sup> Channö ta'zí'ibí' lu xipéla'gacabi' lë na' naca bë' cate' naca dza lá'ayi, para cabí quítsjali' xibá queé' Moisés, ¿naru' rilétseli' neda' tu' buna'-në' tu bönni', ate' böáqui'ë dxí' ado' cate' naca dza lá'ayi? <sup>24</sup> Biti' ral-la' uchi'a usörö' lízili' ca', pero buli'chi'a buli'sörö' ca naca le naca idútë li.

### *Riguíxjö'ë Jesús ga naruaje'*

<sup>25</sup> Ni'irö gulu'ë didza' bal-lë' bönni' nacu'ë Jerusalén, ta'nné'ë:

—¿Naru' caléga bönni' ni Nu na' tu'guiljë' bönni' judío unná bë' para ilútië' Lë'?

<sup>26</sup> Buli'yútsöca', yálajdo' ru'ë didza', en biti' bi té' Lë'. ¿Naru' téquibe'ené' bönni' ta'nná bë'ené' ré'u, le nácatë bönni' ni náqui'ë Cristo, Nu na' ral-la' inná be'e ré'u? <sup>27</sup> Bönni' ni, nöz quéziru' gazxi bönni' Lë'. Cate' guídë' Cristo, cuntu nu inözi gazxi bönni' Lë'.

<sup>28</sup> Ni' zoë' Jesús rusédinë' bönachi chila yudo', en cate' biyönnë' didza' ni, ni'irö bë'ë zidzaj didza', rnne'ë:

—¿Naru' núnbe'etseli' neda', en nözitseli' gazxi bönni' neda'? Bida' ni, caléga rácasö quia', pero Dios caz nasö'l-lë'ë neda', ate' Lë', biti' núnbe'ëli'-në' libí'ili'. <sup>29</sup> Neda' núnbe'eda'-në', tu' za'a queé' Lë', ate' Lë cazë' nasö'l-lë'ë neda'.

<sup>30</sup> Ni'irö gulunë' bayudxi ila'zönë' Lë', pero cuntu nu guzxón Lë', tu' cabí ridxini dza queé' tsu'ë lu ná'agaqui'ë. <sup>31</sup> Gula'yéajlé' zián bönachi ni' Lë', ta'nná:

—Cate' guídë' Cristo, ¿naru' gunë' ziánrö yöl-la' huáca ca le runë' bönni' ni?

### *Bönni' yudo' ta'sö'l-lë'ë nupa ila'zón Jesús*

<sup>32</sup> Bila'yönnë' bönni' yudo' fariseo yugu' didza' ni tu'i bönachi ca naca queé' Jesús, ate' yugu' bixúz unná bë', en yugu' bönni' yudo' fariseo na' gula'sö'l-lë'ë ni'a ná'agaqui'ë para tsöjxöngäqui'ë Lë'. <sup>33</sup> Ni'irö Jesús gunné'ë:

—Ia'tú chí'isö sóalena' libí'ili', ate' ni'irö huöja' ga zoë' Xuza' nasö'l-lë'ë neda'.

<sup>34</sup> Uguíjlali' neda', pero biti' udzö'lili' neda'. Ga ni' tsöjsóa' neda' biti' gaca guídali' libí'ili'.

<sup>35</sup> Ni'irö té' luzá'agaqui'ë bönni' judío, ta'nné'ë:

—¿Gazxi tséajtsë' bönni' ni, ga ni' biti' udzö'liru'-në'? ¿Naru' huayéajtsë' ga nacu'ë bönni' judío násilasigaqui'ë idútë yödzölió, en usédinë' yugu' bönni' zi'tu' ni'? <sup>36</sup> ¿Bizzxi ré'ëni inná didza' na' bë'ë: “Uguíjlali' neda', pero biti' udzö'lili' neda'”, enca': “Ga ni' tsöjsóa' neda' biti' gaca guídali' libí'ili”?

### *Nisa yegu le runna yöl-la' na'bán queéru'*

<sup>37</sup> Cate' ni' naca dza údxi que laní na', dza na' naca lo, guzuínë' Jesús, en bë'ë zidzaj didza', rnne'ë:

—Channö zoë' nu bönni' ribidxi icja ládxi'da'ahuë', ral-la' guídë' bönni' na' ga zoa', en guí'jé'. <sup>38</sup> Nu bönni' réajlé'ë neda', gaca queé' ca na' nazúaj lu guichi lá'ayi, rnna: Lu icja ládxi'da'ahuë' bönni' na' ilén le naca ca nisa yegu, lë na' ulu'zí' xibé bönachi, gata' yöl-la' na'bán quéguequi.

<sup>39</sup> Didza' ni bë'ë Jesús ca naca queé' Dios Bö' Lá'ayi, Nu ral-la' idisóalen bönni' na' ila'yéajlé'ë Jesús. Caní gunné'ë Jesús tu' cabí ridxíninë' Dios Bö' Lá'ayi, tu' cabí ruhuépinë' Jesús ga tsépisétëre'.

*Ta'rúaj choplö bönachi*

<sup>40</sup> Cate' bila'yöni didza' ni, gula'nná bal-la bönachi zián na', ta'nná:  
—Le nácatë Bönni' ni náquië' Bönni' na' ru'ë didza' uláz queë' Dios, Bönni' na' guzxi'  
lu në'ë Dios isól-lë'ë queérnu'.

<sup>41</sup> Ta'nné' ia'bal-lë':  
—Bönni' ni náquië' Cristo.  
Ta'nná bal-la bönachi:  
—¿Naru' irúajtsë' Cristo luyú Galilea? <sup>42</sup> Nazúaj lu guichi lá'ayi le rnna: "Cristo galjë'  
ladaj di'a dza queë' David, en gáquië' ca' bönni' Belén le guca ladzë' David na'."  
<sup>43</sup> Caní guca, bila'rúaj bönachi na' choplö tu' nőzinë' Jesús. <sup>44</sup> Té'enné' bal-lë' ila'zönë'  
Jesús, pero cuntu nu bi ben queë'.

*Biti' ta'yéajlë'ë Jesús bönni' unná bë'*

<sup>45</sup> Ní'irö bulu'dxinë' ni'a ná'agaquië' yugu' bixúz unná bë', en yugu' bönni' yudo'  
fariseo ga na' nacu'ë bönni' yudo' na', ate' légaquië' gulé' ni'a ná'agaquië' na', ta'nné':  
—¿Bizx que biti' diché'ëli'-në'?

<sup>46</sup> Bulu'bi'ë didza' ni'a ná'agaquië', ta'nné':  
—Cuntu nu bönni' ru'ë didza' ca ru'ë didza' Bönni' ni.  
<sup>47</sup> Ní'irö bulu'bi'ë didza' bönni' yudo' fariseo na', ta'nné':  
—¿Naru' bë'tsali' lataj guzxi' yé'enë' ca' libí'ili'? <sup>48</sup> ¿Naru' guyéajlë'tsë' Lë' nu bönni'  
unná bë' o nu bönni' yudo' fariseo? <sup>49</sup> Libí'ili' dxíali' dö' tu' cabí rácali' xibá queë' Dios.  
<sup>50</sup> Zoë' ca' Nicodemo ni', bönni' na' bidxinë' ga zoë' Jesús chi'i dzö'ölö, tu' náquië' ca'  
bönni' yudo' fariseo, ate' rë' légaquië':

<sup>51</sup> —¿Naru' richúguru' queë' tu bönni' gátië' lu xibá queérnu' channö cabí yóniru' lë'  
zí'alo para inóziru' bi benë'?

<sup>52</sup> Ní'irö bulu'bi'ë didza' ia'zíca'rë' na', të' lë':  
—¿Nácatso' ca' li' bönni' Galilea? Bulaba le nazúaj lu guichi lá'ayi, ate' uyú' catu caz  
birúaj nitúë' bönni' ru'ë didza' uláz queë' Dios luyú Galilea.

<sup>53</sup> Ní'irö yójhuójgaquië' lidxi que queégaquië'.

## 8

<sup>1</sup> Guyijë' Jesús ga naca lu Guí'a Yaga Olivo.

*Nigula naguítjanu xibá que yöl-la' nutsaga na'*

<sup>2</sup> Cate' za' rení' budxinë' Jesús ra' yudo', ate' bila'dxín yúgu'të bönachi ga zoë'. Gurö'ë  
Jesús, rusédinë' légaquië'. <sup>3</sup> Ní'irö yugu' bönni' yudo' usedi, en yugu' bönni' yudo' fariseo  
duché'ëgaquië'-nu tu nigula ga zoë' Jesús, tu' gula'dzölinë'-nu ni' riguítjanu xibá que  
yöl-la' nutsaga na'. Bulu'sudxinë'-nu lógaca bönachi na' tu'zé' nágagaca Jesús, <sup>4</sup> ate' të'  
Lë':

—Bönni' Usedi, nigula ni guzxöntu'-nu ni' runnu dul-la' riguítjanu xibá que yöl-la'  
nutsaga na'. <sup>5</sup> Lu xibá queë' Moisés, gunná bë'enë' netu' uládxí'tu'-nu guiój nu nigula  
runnu caní, para gátinu. ¿Názxiga Li', nacxi rnno'?

<sup>6</sup> Caní gula'nné' para ila'zí' bë'ë Jesús para ila'zéqui'në' ulu'zéguië' Lë' didza'. Ní'irö  
biyéchuë' Jesús, ruyúë' lu yu, en buguélë'ë ruzúajë' leyúbölö lu yu na'. <sup>7</sup> Cate' gula'nábide'enë'  
Lë', ní'irö buzuínë' Jesús, en rë' légaquië':

—Núli' cabí nunli' dul-la' isí lolí' uládxí'li'-nu guiój.

<sup>8</sup> Leyúbölö biyéchuë' Jesús, ruyúë' lu yu, en buguélë'ë ruzúajë' leyúbölö lu yu na'.  
<sup>9</sup> Cate' bila'yönnë' didza' ni, bulu'xösa ládxí'do'gaquië' légaquië', ate' bila'rúajë' tu tuë'.  
Gula'sí lógaquië' bönni' gúlarö ga bidxitë bönni' cuidi'. Nagá'anë' Jesús ni', dzáganu  
nigula na' Lë' gatsaj láhui'lö nupa na' tu'zé' nágagaca Lë'. <sup>10</sup> Ní'irö buzuínë' Jesús leyúbölö,  
en cuntu nu bilé'enë' nu ruzegui lënu didza', pero túzinu nigula na', ate' rë'ë-nu:

—Nigúla, ¿gazxi nacuá' nupa na' bulu'zegui li' didza'? ¿Naru' cabí zoa nu bönni' richúguié' quiu'?

<sup>11</sup> Lénu rnunanu:

—Cuntu nu caz, Xan.

Ní'irö Jesúz rë' é-nu:

—Lëzc' neda', biti' richuga' quiu'. Böaj lidxu', en bíti'rö gunu' dul-la'.

*Náquié' Jesúz bení' quégaca bönachi yödzölió*

<sup>12</sup> Leyúbölö Jesúz bë'lené' bönachi didza', rnné':

—Neda' naca' bení' quégaca bönachi yödzölió. Nu bönni' zá'lené' neda', biti' të' ga naca chul-la que dul-la', pero tu bení' sóalen bönni' na' le ulu'i lë' naca gata' yöl-la' na'bán idú queé'.

<sup>13</sup> Ní'irö të' Lë' bönni' yudo' fariseo, ta'nné':

—Li' runu' ba nalí que la' cuinsu'. Biti' naca lesaca' le runu' ba nalí. Nítisö naca.

<sup>14</sup> Bubi'ë didza' Jesúz, rë' légaquié':

—Sal-la' runa' ba nalí que la' cuinsa', idútë li naca le runa' ba nalí, tu' nözda' ga birúaja', en ga tseja', pero lib'ili' biti' nözili' gazxi za'a, en calëga gazxi tseja'. <sup>15</sup> Lib'ili' ruchi'a rusöröli' ca nácagaca le taca yödzölió ni, pero neda', rácasö quia' cuntu nu bönni' ruchi'a rusöröa' queé'. <sup>16</sup> La'tu' uchi'a usöröa', ca nácaté uchi'a usöröa', tu' calëga néda'sö uchi'a usöröa', pero Xuza' nasól-lë'ë neda' gunë' neda' tsözxón. <sup>17</sup> Lësca' caní lu xibá queé' Moisés nazúaj lu guichi le rnna: Le tuné' ba nalí chopë' bönni', idútë li naca. <sup>18</sup> Neda' runa' ba nalí que la' cuinsa', ate' Xuza' nasól-lë'ë neda', runé' ca' ba nalí quia'.

<sup>19</sup> Ní'irö bönni' yudo' fariseo na' gula'nábiné' Lë', ta'nné':

—¿Gazxi zóatsé' Xuzu'?

Bubi'ë didza' Jesúz, rë' légaquié':

—Biti' núnbë'ëli' neda', en biti' núnbë'ëli'-në' Xuza'. La'tu' núnbë'ëli' neda', lësca' Xuza' gúnbë'ëli'-në'.

<sup>20</sup> Yugu' didza' ni bë'ë Jesúz cate' ni' zoë' rusédiné' bönachi lu chila yudo', ga na' nacuá' guí'ina gapa ta'gu'ë gun que yudo', pero cuntu nu guzxón Lë', tu' cabí ridxini dza queé' tsu'ë lu ná'agaquié'.

*Rnné' Jesúz: "Ga tseja' neda', biti' gaca guídali"*

<sup>21</sup> Leyúbölö Jesúz rë' légaquié', rnné':

—Uzá'a yödzölió ni, ate' uguíjali' nu usólá lib'ili', pero ugá'ana dul-la' nabága'li', en gátili'. Ga tseja' neda', biti' gaca guídali'.

<sup>22</sup> Ní'irö gulu'ë didza' bönni' judío unná bë', ta'nné':

—¿Naru' guti cuiné'? Rnné': "Ga tseja' neda', lib'ili' biti' gaca guídali'."

<sup>23</sup> Jesúz rë' légaquié':

—Lib'ili' nácali' que luyú dë cadxi'ilö ni, pero neda' za'a yehua' yubá xitsá'. Lib'ili' nácali' bönachi yödzölió ni, pero neda' biti' naca' bönni' yödzölió ni. <sup>24</sup> Que lë ni na' gudxa' lib'ili': Ugá'ana dul-la' nabága'li', en gátili'. Channö cabí tséajlé'ëli' naca caza' Nu usólá, ugá'ana dul-la' nabága'li', en gátili'.

<sup>25</sup> Ní'irö gula'nábiné' Lë', ta'nné':

—¿Nuzxi caz nacu'?

Jesúz rë' légaquié':

—Naca' la' leze ca na' chigudxa' lib'ili' dza ni'te. <sup>26</sup> Zián le ral-la' guía' lib'ili', en uchi'a usöröa' le naca queé'ëli'. Didza' idútë li ru'ë Xuza' nasól-lë'ë neda', ate' didza' riyönda' ru'ë Lë', ru'ilenä' bönachi yödzölió ni.

<sup>27</sup> Biti' gula'yéajni'iné' ru'ilené' légaquié' didza' ca naca queé' Dios Xuz. <sup>28</sup> Que lë ni na' Jesúz rë' légaquié':

—Cate' idxín dza uchísali' neda', Bönni' Guljé' Bönachi, gútili' neda', ní'irö guéquibe'ëli' naca caza' Nu rusólá, en biti' bi runa' rácasö quia', pero ca na' rulu'íné'

Xuza' neda', ca' ruá'a didza'. <sup>29</sup> Xuza' nasól-lé'ë neda' zóalenë' neda'. Biti' nucá'anë' Xuza' neda' tuza', tu' rúntica'sa' le raza ládxë'ë Lë'.

<sup>30</sup> Cate' bë'ë Jesús didza' ni, bönni' zián gula'yéajlé'ë Lë'.

*Nupa nácagaca zxí'iné' Dios, en nupa nadzúngaca lu na' dul-la'*

<sup>31</sup> Ní'irö Jesús gudxë' yugu' bönni' judío na' ta'yéajlé'ë Lë', rnnë':

—Channö gúntica'sili' ca rnna xtídza'a, gácali' idú bönni' usëda quia'. <sup>32</sup> Gúnbë'ëli' le naca idútë li, ate' le naca idútë li na' usólá libi'ilí'.

<sup>33</sup> Bulu'bí'ë didza', té' Lë':

—Abraham naquië' xuz gudödi queëtu', en cuntu nu ben netu' bönni' nadó'ogaca. ¿Rnnatso': "Usólá libi'ilí"?

<sup>34</sup> Jesús rë' légaquie':

—Le nácatë rea' libi'ilí': Yúgu'të nupa tun dul-la', nadzúngaca lu na' dul-la'. <sup>35</sup> Nu naca bönni' nadó'o biti' ugá'anatica'sö lidxë' xan yu'u, pero nu naca zxí'iné' xan yu'u na' rugá'anatica'sö lidxi nu na' naca xan yu'u. <sup>36</sup> Caní naca, channö Nu na' naca Zxi'iné' Dios usólá libi'ilí', le nácatë uláli'. <sup>37</sup> Nözda' naquië' Abraham xuz gudödi queëli', pero rizóa ribó'öli' gútili' neda', tu' cabí nazí' lu ná'ali' xtídza'a. <sup>38</sup> Neda' ruá'a didza' ca naca le bilé'eda' ga na' zoë' Xuza', pero libi'ilí' runli' le biyónili' ga zoa xuz quézili'.

<sup>39</sup> Bulu'bí'ë didza', té' Lë':

—Abraham náquië' xuztu'.

Ní'irö Jesús rë' légaquie':

—La'tu' nácali' idú zxí'ini xi'sóë' Abraham, gunli' ca na' benë' Abraham. <sup>40</sup> Na'a, rizóa ribó'öli' gútili' neda', sal-la' ruí'lena' libi'ilí' didza' idútë li, didza' na' biyönda' bë'ë Dios. Biti' benë' Abraham caní. <sup>41</sup> Libi'ilí' runli' ca run xuz quézili'.

Ní'irö té' Lë':

—Netu' biti' ca' nácatu' bi'i lando'. Tuzë' Dios náquië' Xuztu'.

<sup>42</sup> Ní'irö Jesús rë' légaquie':

—La'tu' náquië' Dios idú Xúzili', huadxí'ilí' neda', tu' birúaja' neda' ga zoë' Dios, en bida' luyú ni, ate' caléga rácasö quia' bida', pero Dios caz gusól-lé'ë neda'. <sup>43</sup> ¿Bizz que biti' gaca tséajni'ilí' didza' ruá'a? Naca tu' cabí ré'ënili' uzé nágali' xtídza'a. <sup>44</sup> Xuz quézili' naca tu' xihui'. Néquili' que tu' xihui', en ré'ënili' gunli' le rizé ladxi' xúzili' na'. Dza ni'te naca tu' xihui' nu guti bönochí, en cabí nazí' lu né'e le naca idútë li, tu' cabí ruí'i didza' idútë li. Cate' rizi' yé' tu' xihui', ca naca caz ruí'i didza', tu' naca nu rizi' yé', en naca ca xúzgaca caz nupa ta'zi' yé'. <sup>45</sup> Tu' ruá'a neda' didza' idútë li biti' réajlé'ëli' neda'. <sup>46</sup> ¿Núzzilöli' gaca usubága'li' neda' dul-la'? Channö ruá'a didza' idútë li, ¿bizz que biti' réajlé'ëli' neda'?

<sup>47</sup> Nu naca queë' Dios, ruzé' nagui xtídzë'ë Dios, pero libi'ilí', tu' cabí nácali' queë' Dios, biti' ruzé' nágali' xtídzë'ë.

*Cristo zoa cazé' zí'atélö ca Abraham*

<sup>48</sup> Ní'irö bulu'bí'ë didza' yugu' bönni' judío, té' Jesús:

—Catéz gunnatu' cate' gunnatu' nacu' bönni' Samaria, ate' dzaga tu' xihui' Li'.

<sup>49</sup> Bubi'ë didza' Jesús, rë' légaquie':

—Biti' dzaga tu' xihui' neda'. Neda' runa' Xuza' bal, ate' libi'ilí' ruzóali' neda' tsölá' alö.

<sup>50</sup> Biti' runa' zxön cuina'. Zoa Nu run zxön neda', ate' Lë' ruchi'a rusöröë' rë'u. <sup>51</sup> Le nácatë rea' libi'ilí': Nu bönni' si' lu né'e xtídza'a, biti' ca' gátië' bönni' na'.

<sup>52</sup> Ní'irö yugu' bönni' judío na' té' Lë', ta'nné'ë:

—Na'a réquibe'etu' dzaga tu' xihui' Li'. Abraham gútië', ate' gulátië' ca' bönni' gulu'ë didza' uláz queë' Dios, pero Li' rnno': "Nu bönni' si' lu né'e xtídza'a, biti' ca' gátië' bönni' na'." <sup>53</sup> ¿Naru' nácatérötso' Li' zxön ca xúziru' Abraham? Gútië' lë', ate' gulátië' ca' bönni' gulu'ë didza' uláz queë' Dios. ¿Nuzxi caz run cuinu'?

<sup>54</sup> Bubi'ë didza' Jesús, rë' légaquie':

—Channö neda' guna' zxön cuina', yöl-la' zxön na' biti' bi gaca. Xuza' runë' neda' zxön, ate' libi'ilí' rnnali' náquië' Dios queëli'. <sup>55</sup> Libi'ilí' biti' núnbe'ëli'-në' Dios Xuz, pero

neda' núnbe'a-né'. La'tu' innia': Biti' núnbe'a-né', gaca' nu rizi' yé' ca na' nácali' libí'ili', rizi' yé'eli'. Na'a, le nácaté núnbe'a-né', en nazi' lu na'a xtídzé'ë. <sup>56</sup> Xúzili' Abraham budzéjané' tu' ral-la' ilé'ené' dza soa' yödzölió ni, en sal-la' gútié' dza ni'te, bille'ené' le, en budzéjade'ené'.

<sup>57</sup> Ni'irö yugu' bönni' judío na' tē' Jesús, ta'nné':

—Biti' yui'inu' chi-un iz. ¿Naru' bilé'etsenu' Abraham?

<sup>58</sup> Jesús rē' légaquié':

—Le nácaté rea' libí'ili': Zí'atélö ca soë' Abraham, neda' zoa caza'.

<sup>59</sup> Ni'irö gula'guélë'ë guiój para ulu'ladxé' Jesús, pero Lé' bunítitë cuiné', en burúajé' lõ'a yudo' na'. Gudödë' gatsaj láhui'lö ga na' nacu'ë, ate' söhuójë'.

## 9

### *Ruúnë' Jesús tu bönni' guljé' nachúl-latë lahuë'*

<sup>1</sup> Cate' gudödë' Jesús tu lataj, bilé'ené' tu bönni' ni' guljé' nachúl-latë lahuë'.

<sup>2</sup> Gula'nábiné' Jesús bönni' usëda queë', ta'nné':

—Bönni' Usedi, ¿nuzxi ben dul-la'? ¿Naru' bönni' ni o xuz xiné'ë tu' guljé' nachúl-latë lahuë'?

<sup>3</sup> Bubi'ë didza' Jesús, rē' légaquié':

—Biti' naca tu' bené' dul-la' bönni' ni, en calëga tu' guluné' dul-la' xuz xiné'ë, pero naca para ilá' lahui yöl-la' huáca queë' Dios ni'a queë' bönni' ni. <sup>4</sup> Run bayudxi gunru' xichiné' Xuza' nasól-lé'ë neda', tsanni ni naca ca lahui' dza. Huadxín dza gaca chul-la que yöl-la' guti, cate' cuntu nu gaca gun dxin. <sup>5</sup> Tsanni ni zoa' yödzölió ni, naca' bení' quégaca bönachi yödzölió.

<sup>6</sup> Cate' Jesús budxi bë'ë didza' ni, gurú'uné' zxöna' lu yu, en bené' gúna'do' len zxöna' na', ate' bugu'ë guna' na' guiój lahuë' bönni' na' nachul-la lahuë'. <sup>7</sup> Ni'irö rē' lë':

—Guyéaj yöjtibi lo' lu beaj nisa nazi'i le Siloé.

Siloé naca tu didza' hebreo le rnna: Nasól-la'.

Ni'irö bönni' na' nachul-la lahuë' guyijé' ni', yöjtibi lahuë'. Cate' buzé'ë ni' chirilé'ené'.

<sup>8</sup> Ni'irö bulu'bani bönachi dzaga yu'u queë', en nupa ni' bila'lé'e lë' zí'atélö cate' ni' nachul-la lahuë', ta'nná:

—¿Naru' calëga bönni' ni bönni' na' ribö'ë rinabë' nu bi unödzaj queë'?

<sup>9</sup> Bal-lé' ta'nné':

—Lé' na'.

Ia'bal-lé' ta'nné':

—Calëga lë', pero ca rna' lahuë' bönni' na', rna' lahuë' ca' bönni' ni.

Lé' rnne':

—Neda' na'.

<sup>10</sup> Ni'irö gula'nábiné' lë', ta'nné':

—¿Nacxi caz guca, guyalaj guiój lo'?

<sup>11</sup> Bubi'ë didza', rē' légaquié':

—Bönni' na' lë' Jesús bené' gúna'do', ate' gudëbë' gúna'do' na' guiój lahua', en gudxé' neda': "Guyéaj ra' beaj nisa nazi'i le Siloé, yöjtibi lo'." Guyija' ni', yöjtibi lahua', ate' guyálajtë guiój lahua'.

<sup>12</sup> Ni'irö gula'nábiné' lë', ta'nné':

—¿Gazxi zoë' bönni' na'?

Lé' rē' légaquié':

—Biti' nözda'.

### *Yugu' bönni' yudo' ta'náb yúdxiné' bönni' na' guyalaj guiój lahuë'*

<sup>13</sup> Ni'irö gula'chë'ë bönni' na' zí'alö nachul-la lahuë', en bulu'sudxiné' lë' lógaquié' bönni' yudo' fariseo. <sup>14</sup> Tu' naca dza lá'ayi quégaquié' cate' bené' Jesús gúna'do' na', en

gusaljé' guiój lahuë' bönni' na' zí'alö nachul-la lahuë', <sup>15</sup> que lë ni na' yugu' bönni' yudo' fariseo na' gula'nábinë' lë' leyúbölö nacxi guca guyalaj guiój lahuë'. Lë' gudxé' légaquië': —Budxíe' gúna'do' guiój lahua', ate' yöjtiba' le, en rile'eda'.

<sup>16</sup> Ni'irö gulu'ë didza' bal-lë' bönni' yudo' fariseo na', ta'nné':

—Biti' nasöl-lë' Dios bönni' na', tu' cabí rapa chi'ë dza lá'ayi.

Ia'bal-lë' ta'nné':

—¿Naru' huácatsö tu bönni' dul-la' gunë' yugu' yöl-la' huáca runé' bönni' na'?

Caní guca, bila'rúajë' choplö. <sup>17</sup> Leyúbölö gula'nábinë' bönni' na' zí'alö nachul-la lahuë', ta'nné':

—¿Bizxi rnno' li' queë' bönni' na', gusaljé' guiój lo'?

Lë' rnne':

—Náquië' bönni' ru'ë didza' uláz queë' Dios.

<sup>18</sup> Biti' gula'yéajlë'ë bönni' judío unná bë' na' guljé' nachúl-latë lahuë' bönni' na', en guyalaj guiój lahuë', cate' bulu'lídzarë' xuz xiné'ë bönni' na' guyalaj guiój lahuë', <sup>19</sup> ate' gula'nábinë' légaquië', ta'nné':

—¿Naru' náquië' bönni' ni zxí'inili', rnnali' guljé' nachúl-latë lahuë'? ¿Nacxi caz naca rile'enë' na'a?

<sup>20</sup> Bulu'bí'ë didza' xuz xiné'ë na', të' légaquië':

—Nózitu' bönni' ni náquië' zxí'initu', en guljé' nachúl-latë lahuë', <sup>21</sup> pero nacxi guca, rile'enë' na'a, biti' nøztu', en nuzxi na' gusalaj guiój lahuë', biti' nøztu'. Guli'nabi-në' lë', tu' chináquië' bönni' chinaca. Lë cazë' quíxjö'ë.

<sup>22</sup> Caní gula'nné' xuz xiné'ë bönni' na' zí'alö nachul-la lahuë', tu' tádxiné' yugu' bönni' judío unná bë', tu' chigulún xtídza'gaquië' bönni' judío na' channö nu bönni' si' lu né'ë Jesús náquië' Cristo, tsaz ulu'béajë' bönni' na' lu yu'u ga tu'dubë' bönni' judío, en tu'sëdë' queë' Dios. <sup>23</sup> Que lë ni na' gula'nné' xuz xiné'ë: "Guli'nabi-në' lë', tu' chináquië' bönni' chinaca."

<sup>24</sup> Ni'irö yugu' bönni' judío unná bë' bulu'lidzë' leyúbölö bönni' na' zí'alö nachul-la lahuë', ate' të' lë':

—Ni'a queë' Xanru' Dios gudixjö' le nácatë. Netu' réquibe'etu' bönni' na' náquië' bönni' dul-la'.

<sup>25</sup> Ni'irö bubi'ë didza', rnne':

—Channö náquië' bönni' dul-la' biti' nøzda'. Tu le nøzda'. Zí'alö nachul-la lahua', ate' na'a rile'eda'.

<sup>26</sup> Gula'nábinë' lë' leyúbölö, ta'nné':

—¿Bizxi benë' quiu'? ¿Nacxi benë' gusaljé' guiój lo'?

<sup>27</sup> Bubi'ë didza', rë' légaquië':

—Chigúdzi caza' libí'ili', pero biti' gú'unili' si' lu ná'ali' xtídza'a. ¿Bizz que na' ré'ënili' yónili' leyúbölö? ¿Naru' ré'ënili' tá'ali' ca' Lë'?

<sup>28</sup> Ni'irö bulu'lidza zi'ë lë', ta'nné':

—Li' do'o Lë', pero netu' dá'atu' Moisés. <sup>29</sup> Netu' nøztu' Dios bë'lenë' Moisés didza', pero ca naca queë' bönni' ni, biti' nøztu' nuzxi caz gusöl-la' Lë'.

<sup>30</sup> Ni'irö bubi'ë didza' bönni' na', rë' légaquië':

—Lë ni run ga rubánida'. Libí'ili' biti' nøzili' nuzxi gusöl-la' bönni' ni, ate' Lë' gusaljé' guiój lahua'. <sup>31</sup> Nóziru' biti' riyönnë' Dios yugu' bönni' dul-la', pero channö reaj ládxë'ë tu bönni' Dios, en runë' ca ré'ënili' Lë', Dios riyönnë' bönni' ni. <sup>32</sup> Dza ni'te biti' riyón nu gunná channö nu bönni' gusaljé' guiój lahuë' tu bönni' guljé' nachúl-latë lahuë'. <sup>33</sup> La'tu' cabí náquië' bönni' ni queë' Dios, biti' bi gaca gunë'.

<sup>34</sup> Ni'irö bulu'bí'ë didza', të' lë':

—Ca gulju' naca bë' nabág'u dul-la'. ¿Naru' li' ruséditsenu' netu'?

Ni'irö bulu'béajë' lë' ní'ilö.

*Nupa nácagaca chul-la niti*

<sup>35</sup> Biyönnë' Jesús ca guluné' bönni' judío unná bë', bulu'béaje' bönni' na' zí'alö nachul-la lahuë'. Cate' budzáguë' lë', gudxë' lë':

—¿Ba réajlé'u Zxi'inë' Dios?

<sup>36</sup> Bubi'ë didza' lë', rë' Jesús:

—¿Nuzxi na', Xan, para tséajlë'a Lë'?

<sup>37</sup> Jesús rë' lë':

—Chibilé'enu' Lë', ate' neda' ni ru'ilena' li' didza', naca' Zxi'inë' Dios.

<sup>38</sup> Ni'irö bönni' na', guyalaj guiój lahuë', guyéaj ládxë'ë Jesús, en rë' Lë':

—Xan, réajlé'a Li'.

<sup>39</sup> Jesús rnnë':

—Para uchi'a usöröa' bönnachi bida' yödzölió ni, para ulu'lé'e nupa nachul-la nanítigaca, en ilaca ca nu nachul-la lahui nupa téquiguequi ta'lé'e.

<sup>40</sup> Cate' yugu' bönni' yudo' fariseo na' nacuá'lenë' Jesús bila'yönnë' didza' ni, ni'irö të' Lë':

—¿Naru' nachul-la nanítitsatu'?

<sup>41</sup> Bubi'ë didza' Jesús, rë' légaquië':

—La'náru' nachúl-lasö guiój loli', biti' ibága'li' dul-la'. Na'a rnnali': "Rilé'etu'." Que lë ni na' nabága'li' dul-la'.

## 10

*Rucúdzu'ë didza' Jesús que lë'a quégacaba' bö'cu' zxila'*

<sup>1</sup> Gunnë' ca' Jesús:

—Le nácatë rea' libíili': Nu bönni' biti' razië' saca' ga nu riyaza lë'a quégacaba' bö'cu' zxila', pero tsázië' saca' ga yúbölö, bönni' ni náquië' gubán, en ribán cazë'. <sup>2</sup> Nu bönni' razië' saca' ga nu riyaza náquië' bönni' run chi'i cazë' bö'cu' zxila' na'. <sup>3</sup> Para tsázië' bönni' ni, risalaj nu zoa run chi'i ga nu riyaza, ate' ta'yóniba' bö'cu' zxila' na' chi'ë, en tu'únbe'ëba'-në'. Lë' rulidzë'-ba' que queéba' ca légaquie, en rubéajë' yugu' bö'cu' zxila' na'. <sup>4</sup> Cate' chinubéajë'-ba' yúgu'tëba' bö'cu' zxila' néquigacaba' queë', röjnörue' lögacaba', ate' bö'cu' zxila' na' röjnögacaba' lë', tu' tu'únbe'ëba' chi'ë. <sup>5</sup> Bönni' yúbölö biti' tsöjnögacaba' lë', pero ulu'zxúnnaiba' queë', tu' cabí núnbë'gacaba' ch'igaquië' bönni' yúbölö.

<sup>6</sup> Le rucudzu' didza' ni gudxë' Jesús légaquië', pero biti' gula'yéajni'inë' lë na' rë' légaquië'.

*Náquië' Jesús ca bönni' rapa chi'ë-ba' bö'cu' zxila'*

<sup>7</sup> Ni'irö Jesús rë' légaquië' leyúbölö, rnnë':

—Le nácatë rea' libíili': Neda' naca' ca tu ga ta'yázaba' bö'cu' zxila'. <sup>8</sup> Chigula'lé'ë zián bönni' gula'nné' nácagaquië' Cristo, pero yúgu'të bönni' na' bila'dxinë' zí'alö ca neda', nácagaquië' gubán, en ta'bán cazë', ate' biti' bulu'zé nágaba' bö'cu' zxila' na' légaquië'.

<sup>9</sup> Neda' naca' ca tu ga nu riyaza. Núti'tës bönni' tsázalenë' neda', ulé' bönni' na', en gáquië' ca tuba' bö'cu' zxila' rázaba', en rurúajba', en ridzöliba' le ráguba'.

<sup>10</sup> Za'zë' bönni' gubán para cuanë'-ba', en gútië'-ba', en usunítië'-ba'. Neda' bida' para gata' yöl-la' na'bán idú quégaca bönnachi nácagaca ca bö'cu' zxila' quia'. Le nácatë gata' quégagaquië' yöl-la' na'bán idú na'. <sup>11</sup> Neda' run chi'igaca' bönnachi quia' ca runë' bönni' na', lu yöl-la' dxí'i ladxi' queë' rapa chi'ë yugu' bö'cu' zxila'. Bönni' na' rapa chi'ë-ba' bö'cu' zxila' caní zoa cazë' udödë' yöl-la' na'bán queë' ni'a quégacaba' bö'cu' zxila' queë'.

<sup>12</sup> Tu bönni' nazxjë' rapa chi'ë-ba' bö'cu' zxila', cate' rilé'enë' zá'aba' bö'cu' guí'a sínia', rucá'anë'-ba' bö'cu' zxila' na', en ruzxúnnaibë', ate' bö'cu' guí'a sínia' na' ráguya'aba' yugu' bö'cu' zxila' na', en rusilásiba' légaquie. Caní runë' bönni' na' rapa chi'ë-ba' bö'cu' zxila' tu' cabí náquië' idú nu run chi'i-ba' bö'cu' zxila', ate' biti' néquigacaba' que cazë' bö'cu'

zxila' na'. <sup>13</sup> Ruzxúnnajé' bönni' nazxjé' na' tu' rapa chi'ë-ba' bö'cu' zxila' na' para sí'isë' dumí, en biti' ruí'i ládxé'ë-ba' bö'cu' zxila' na'.

<sup>14-15</sup> Neda' naca' bönni', lu yöl-la' dxi'i ladxi' quia' run chíigaca'-ba' bö'cu' zxila'. Ca na' núnbé'ë Xuza' neda', ate' neda' núnbé'a-né' Xuza', lësca' caní núnbe'egacada'bönachi quia' nácagaca ca bö'cu' zxila' quia', en rudöda' yöl-la' na'bán quia' ni'a quégacaba' bö'cu' zxila' na', ate' bö'cu' zxila' na' néquiguequia' quia' núnbé'gacaba' neda'. <sup>16</sup> Lësca' nacuá'aba' ia'zíca'röba' bö'cu' zxila' quia' biti' nabábagacaba' ni. Lësca' légacaba' ral-la' tsöjxí'gaca'-ba'. Légacaba' ulu'zé nágaba' chi'a, en ilácaba' tuz len ia'zíca'röba' bö'cu' zxila' quia', ate' neda' caz gun chíigaca'-ba'.

<sup>17</sup> Que lë ni na' nadxí'iné' Xuza' neda', tu' rudöda' yöl-la' na'bán quia', gu'a lataj nu guti neda', ate' uzi'a le leyúbölö, ubana' lu yöl-la' guti. <sup>18</sup> Cuntu nu bönni' séqui'né' gútië' neda', pero neda' rudödi caza' yöl-la' na'bán quia', gátia'. Dë lu na'a udöda' le, en dë lu na'a uzi'a le leyúbölö. Caní naca le gunná bé'ené' Xuza' neda'.

<sup>19</sup> Cate' yugu' bönni' judío bila'yönné' didza' ni, leyúbölö bila'rúajé' choplö ca téquiné' queë'. <sup>20</sup> Ziánë' ta'nné':

—Yu'u bö' xihui' Lë', en nachixi icjé'. ¿Bizx que ruzé' nágali' Lë'?

<sup>21</sup> Ia'bal-lë' ta'nné':

—Biti' ca' ru'ë caní didza' bönni' yu'u bö' xihui' lë'. ¿Naru' huácatsö bö' xihui' usalaj guiój lógaquië' bönni' nachul-la lógaquië'?

### *Yugu' bönni' judío unná bë' tu'zóë' Jesús tsölä'alö*

<sup>22</sup> Raca beo' ziaga, en naca dza na' tuné' laní yödzö Jerusalén, tu'subané' ca gula'gu'ë yudo' quégäquië' lu né'ë Dios. <sup>23</sup> Ridé' Jesús ra' yudo' ga naca chila que, nazí'i le Chila Queë' Salomón. <sup>24</sup> Yugu' bönni' judío unná bë' gula'gu'ë Jesús lë'alö, en të' Lë':

—¿Bátaxi caz usanu' runu' ga ró'ötu' böninga? Channö nacu' li' Cristo, ca nácatë gudíxjöi'i netu'.

<sup>25</sup> Jesús rë' légaquië':

—Chigudxi caza' libi'ili', pero biti' réajlë'ëli' neda'. Yugu' dxin runa' tu' dë lu na'a uláz queë' Xuza' nácagaca bë' Nu naca'. <sup>26</sup> Libi'ili' biti' réajlë'ëli' neda', tu' cabí nabábalenli' nupa nácagaca bö'cu' zxila' quia', ca na' chigudxi caza' libi'ili'. <sup>27</sup> Ta'yóniba' bö'cu' zxila' quia' chi'a, en tu'únbe'eba' neda', ate' neda' núnbe'egacada'-ba', ate' ridijácalenba' neda'. <sup>28</sup> Neda' runödzja' yöl-la' na'bán idú quégacaba', ate' biti' ca' ila'nítiba', ate' cuntu nu sequi' ubéaj légacaba' lu na'a neda'. <sup>29</sup> Xuza' Dios benné' quia' légacaba', ate' Lë' nápatërë' yöl-la' huáca ca yúgu'të böñachi, ate' cuntu nu sequi' ubéaj légacaba' lu né'ë Xuza'. <sup>30</sup> Neda', en Dios Xuz, tuz nácatu'.

<sup>31</sup> Leyúbölö yugu' bönni' judío unná bë' na' bulu'guélë'ë guiój ulu'ladxë' Jesús. <sup>32</sup> Jesús rë' légaquië':

—Zian le naca dxi'a bena' loli' tu' dë lu na'a uláz queë' Xuza'. ¿Ni'a que bízzilö dxin dxi'a ni uládxí'li' neda' guiój?

<sup>33</sup> Bulu'bi'ë didza' bönni' judío unná bë' na', të' Lë':

—Ni'a que dxin dxi'a biti' uládxí'tu' li' guiój, pero tu' cabí rnnío' dxi'a queë' Dios, tu' nacu' li' böñachisö, en run cuinu' Dios.

<sup>34</sup> Bubi'ë didza' Jesús, rë' légaquië':

—¿Naru' cabí nazúaj lu guichi lu xibá queéli' ca gunné' Dios, rnna: “Neda' rnnía': Nácali' yugu' dios”? <sup>35</sup> Nöz quésziru' le nazúaj lu guichi lá'ayi nazúaj tsaz. Lu guichi lá'ayi na' ruí'i lágaquië' dios, bönni' ni' Dios bë'lenë' légaquië' didza'. <sup>36</sup> Dios bubéajé' neda' quez queë', en gusól-lë'ë neda' yödzölió ni. ¿Naru' rnnátsali' quia': “Li' biti' rnnío' dxi'a queë' Dios”, tu' gunnía': Zxí'iné' Dios naca'? <sup>37</sup> Channö cabí runa' dxin budödë' Xuza' Dios lu na'a, biti' ral-la' tséajlë'ëli' neda'. <sup>38</sup> Channö runa' dxin budödë' Dios lu na'a, sal-la' biti' réajlë'ëli' neda' caz, guli'tséajlë' le nácagaca bë' dxin na' runa', para guéquibe'eli' náquië' Dios Xuz tuz len neda', ate' neda' ca' naca' tuz len Xuza'.

<sup>39</sup> Leyúbölö gula'zóa gula'bö'ë ila'zönë' Jesús, pero Lë' bulé' lu ná'agaquië'.

<sup>40</sup> Ni'irö guyijë' Jesús leyúbölö ia'tsölá'a yegu Jordán, ga ni' buquilë' Juan böñachi nisa zi'atëlö, ate' bugá'anë' Jesús ni'. <sup>41</sup> Bila'dxín böñachi zián ga zoë' Jesús, ta'nná:

—Le nácatë biti' benë' Juan nitú yöl-la' huáca zxön, pero yúgu'të le gunné' Juan na' caral-la' gaca queë' bönni' ni, idútë li zeaj naca.

<sup>42</sup> Que lë ni na' gula'yéajlë'ë bönni' zián Jesús ga na' zoë'.

## 11

### *Le guca cate' gütië' Lázaro*

<sup>1</sup> Dza ni' ré'enë' Lázaro, bönni' Betania, le naca ládzagacanu María, en Marta. Nácanu Marta na' zxílanu María na'. <sup>2</sup> Nácanu María na' nigula zanë' Lázaro, bönni' na' ré'enë', en nácanu ca' nigula na' gulú'unu le rilá' zxixi ni'ë Xanru', en buzzinu ni'ë len guitsa' ícjanu. <sup>3</sup> Gula'sól-la'nu nigula zanë' Lázaro na' nu yójödx Jesús, gunná:

—Xan, buyútsöca', ré'enë' Lázaro, bönni' na' nadxi'inu'-në'.

<sup>4</sup> Cate' biyönnë' Jesús didza' ni, gudxë' nupa nacuá' ni', rnnë':

—Yödzöhuë' ni biti' naca le guti lë' tsaz, pero naca para ilá' lahui yöl-la' zxön queë' Dios, ate' ni'a que yödzöhuë' ni ilá' lahui ca' yöl-la' zxön quia' neda', Zxi'inë' Dios.

<sup>5</sup> Jesús nadxi'inë' Marta, en nigula zxílanu Marta na', en Lázaro na'. <sup>6</sup> Sal-la' nadxi'inë' Jesús légaquië', cate' biyönnë' ré'enë' Lázaro, bugá'anë' ga na' zoë' ia'chopa dza ca'.

<sup>7</sup> Cate' bizá'a chopa dza na', Jesús gudxë' yugu' bönni' usëda queë', rnnë':

—Uyéajru' leyúbölö luyú Judea.

<sup>8</sup> Ni'irö yugu' bönni' usëda queë' të' Lë', ta'nnë':

—Bönni' Usedi, si' gula'zóa gula'bö'ë bönni' judío unná bë' ni' ulu'ladxe' Li' guiój. ¿Naru' uyéajtso' leyúbölö ni?

<sup>9</sup> Bubi'ë didza' Jesús, ré' légaquië':

—Nacuá' caz chinnu hora lahui' dza. Nu bönni' ridé' lahui' dza, biti' tsöjchégu'ë, tu' rilé'enë', tu' zóalen lë' bení' zoa yödzölió ni. <sup>10</sup> Channö ridé' bönni' na' chi'i dzö'ölö, röjchégu'ë, tu' cabí zóalen bení' lë'.

<sup>11</sup> Cate' budxi bë'ë Jesús didza' ni, ni'irö gudxë' légaquië':

—Rásië' Lázaro, böchi' luzá'aru', ate' tseja' neda', en usubana'-në'.

<sup>12</sup> Ni'irö yugu' bönni' usëda queë' të' Lë', ta'nnë':

—Xan, channö rásië', huöáquië'.

<sup>13</sup> Gunné' caní Jesús tu' chigútië' Lázaro, pero légaquië' téquinë' gunné': Rásisë' Lázaro.

<sup>14</sup> Ni'irö Jesús gudxë' légaquië' yálajdo', gunnë':

—Chigútië' Lázaro. <sup>15</sup> Rudzéjada' tu' cabí zoa' ni', tu' gaca na'a tu le uzí'ili' xibé, le gun ga tséajlë'ëli' neda'. Uyéajru' na'a ga na' dë' Lázaro.

<sup>16</sup> Ni'irö Tomás, bönni' na' tu'ë lë', Bönni' Bilidi' gudxë' ia'zíca'rë' bönni' usëda queë' Jesús, rnnë':

—Uyéajru' ca' rë'u, en gátilenu'-në'.

### *Náquië' Jesús Nu rusubán nupa chinátigaca, enca' Nu nabániru'*

<sup>17-19</sup> Dë yödzö Betania gála'sö ga dë Jerusalén na', le naca ca rizá'aru' tu hóratëz. Que lë ni na' chibila'dxinë' zián bönni' judío ga na' nacuá'anu Marta, en María, en tu'huë tsáhuë'ë légaçanu tu' gütië' bönni' zángacanu. Cate' Jesús bidxinë' ni', biyönnë' chiguca tapa dza yu'ë Lázaro na' yero ba. <sup>20</sup> Cate' biyönninu Marta didza' zë'ë Jesús, ni'irö birúajnu yu'u, yöjtságano Lë', pero María bugá'anano yu'u na'. <sup>21</sup> Marta na' rënu Jesús:

—Xan, la'tu' zu' ni, biti' gátië' bönni' zana'. <sup>22</sup> Lësca' na'a, nözda' yúgu'të le inábinu' Dios, Lë' gunné' qui'.

<sup>23</sup> Jesús rë'ë-nu:

—Ubanë' bönni' zanu'.

<sup>24</sup> Marta rënu Lë':

—Nözda' ubanë' cate' idxín dza údxi cate' ulu'bán nupa chinátigaca.

<sup>25</sup> Ní'irö Jesús rë'ë-nu:

—Naca caza' neda' Nu rusubán nupa chinátigaca, enca' Nu nabánigaca böñachi. Nu tséajlé' neda', sal-la' gati nu na', ubán caz, <sup>26</sup> ate' yúgu'të bönni' nabángaquië', en ta'yéajlé'ë neda', biti' ca' ilátië' tsaz. ¿Réajlé'u lë ni?

<sup>27</sup> Marta rënu Lë':

—Ön, Xan. Réajlé'a nacu' Li' Cristo, Zxi'inë' Dios, Bönni' na' guzxi' lu në'ë Dios isől-lë'ë yödzölio ni.

### *Ribödxé' Jesús tu' rui'i ládxé'ë nigula zané' Lázaro*

<sup>28</sup> Cate' budxi bë'ënu Marta na' didza' ni, bőajnu yu'u, yöjlídzanu María, zxílanu, ate' bagáchi'sö rënu lënu:

—Bönni' Usedi zoë' ni, rulidzé' li'.

<sup>29</sup> Cate' biyóñinu María didza' ni, la' guyástenu, zéajnu ga na' zoë' Jesús. <sup>30</sup> Biti' rázinë' Jesús la' yödzödo' na', pero zóasë' ga na' yöjtságanu Marta Lë'. <sup>31</sup> Cate' yugu' bönni' judío na' nacuá'lenë' María na', en tu'huë tsáhuë'ë-nu bila'lé'enë'-nu guyásanu, en birúajnu carelö ga naca lu yu'u, ní'irö yöjnógaquië'-nu, ta'nné':

—Uyéajnu ra' yero ba tsöjchödxinu ni'.

<sup>32</sup> Ní'irö bidxinnu María ga na' zoë' Jesús. Cate' bilé'enu Lë', biyéchunu xini'ë, en rënu Lë':

—Xan, la'tu' zu' ni, biti' gátië' bönni' zana'.

<sup>33</sup> Cate' bilé'enë' Jesús ribödxinu, en ta'bödxé' ca' bönni' judío na' dzágagaquië'-nu, ní'irö bu'innë', en gunnéda' ládxé'ë. <sup>34</sup> Rnnë':

—¿Gazxi bucáchili'-në'?

Të' Lë':

—Gudá uyú'.

<sup>35</sup> Gurödxé' Jesús. <sup>36</sup> Ní'irö gula'nné' bönni' judío na', ta'nné':

—Buli'yútsöca' ca nadxi'ide'enë' lë'.

<sup>37</sup> Bal-lë' ta'nné':

—Bönni' ni benë' ga rilé'enë' bönni' na' zí'alö nachul-la lahuë'. ¿Naru' cabí gúcatsö gunë' ga biti' gátië' Lázaro?

### *Rubanë' Lázaro lu yöl-la' guti*

<sup>38</sup> Leyúbölö gunnéda' ládxé'ë Jesús, ate' bidxinë' ra' yero ba na'. Ba na' naca tu yero nadaj lë'e guí'a guíój, ate' da' tu guíójta'a le nusayaj ga nu riyaza le. <sup>39</sup> Jesús gudxé' nupa nacuá' ni', rnnë':

—Guli'cúa guíój ni.

Ní'irö Marta, nigula zanë' bönni' nati na', rënu Lë':

—Xan, chirilé'ë siguti tu' chiguca tapa dza nátië'.

<sup>40</sup> Jesús rë'ë-nu:

—¿Naru' cabí chigudxi caza' li' channö réajlé'u, hualé'enu' yöl-la' zxön queë' Dios?

<sup>41</sup> Ní'irö gula'gúë' guíójta'a na' nusayaj ga nu riyaza yero ba ga na' yu'ë bönni' nati na'. Buyúë' Jesús zaca' lúzxibalö, rnnë':

—Xuza', rea' Li', xclenu' tu' riyönnu' neda'. <sup>42</sup> Neda' nözda' riyóntiqu'sinu' neda', pero ruá'a didza' ni para ulu'zí' xibé böñachi zián ni, en ila'yéajlé' Li' na' nasől-lu'u neda'.

<sup>43</sup> Cate' budxi bë'ë Jesús didza' ni, zidzaj bulidzé', rnnë':

—Lázaro, burúaj nilö.

<sup>44</sup> Burúajé' bönni' na' gúquië' bönni' nati lu yero ba, naróligacarö ni'a në'ë yugu' lári'do', en nagachi' ca' lahuë' ia'tú lári'do'. Ní'irö Jesús rë' légaquië':

—Buli'lí lari' na' naröli ni'a në'ë, en guli'gu'ë lataj së'ë.

*Tun xtídzë'ë yugu' bönni' judío unná bë' ilútië' Jesús  
(Mt. 26:1-5; Mr. 14:1-2; Lc. 22:1-2)*

<sup>45</sup> Ní'irö zián bönni' judío na' gula'yéajlé'ë Jesús, bönni' na' yöjácalenë' tsözxón María, en bila'lé'enë' le' na' benë' Lë'. <sup>46</sup> Bal-lë' yöjáquië' ga nacu'ë bönni' yudo' fariseo, en bulu'siyönnë' légaquië' ca na'benë' Jesús. <sup>47</sup> Ní'irö bönni' yudo' fariseo na'bulu'dúbilenë' tsözxón bönni' yudo' tu'chi'a tu'söröö', en yugu' bixúz unná bë', ta'nnë':

—¿Nacxi caz gunru'? Runë' bönni' ni zián yöl-la' huáca zxön. <sup>48</sup> Channö gü'isiru'-në' lataj gunë' ca ni run cazë', ila'yéajlé' yúgu'të böñachi Lë', ate' idijáquië' bönni' Roma ni, duquínna jagaquië' yudo' láayi queéru', en yödzö queéru'.

<sup>49</sup> Ní'irö bë'ë didza' Caifás, bixúz lo iz na', en dzágäuië' légaquië', re' légaquië':

—Libí'ili' biti' bi nőzili', <sup>50</sup> en biti' réquibe'eli' run bayudxi gátië' tuë' bönni' ni'a quégaca böñachi, para cabí initi idú yödzö.

<sup>51</sup> Calëga rácassö queë' bë'ë didza' ni, pero tu' náquië' bixúz lo iz na', que le' ni na' bë'ë didza' uláz queë' Dios ca ral-la' gátië' Jesús ni'a quégaca böñachi yödzö na'. <sup>52</sup> Gátië' Jesús, calégasö ni'a que yödzö na', pero gátië' ca' para utubë' yugu' zxí'inë' Dios násilasigaquië', para ilácagaquië' tuz. <sup>53</sup> Caní guca, la' dza ná'asö gulún xtídz'a'gaquië' ilútië' Jesús.

<sup>54</sup> Que le' ni na' bíti'rö gudé' Jesús yálajdo' gapa nacuá' böñachi judío, pero buzé'ë ni', sa'yéaje' tu lataj gala' ga naca lataj cá'asö, ate' bidxinë' yödzö Efraín, ga ni' bugá'anë', ate' dzágagaquië' bönni' usëda queë' Lë'.

<sup>55</sup> Dza na' chizá' gala' Laní Pascua quégagaquië' bönni' judío cate' tu'subanë' ca benë' Dios, bubéajë' böñachi queë' luyú Egipto. Bila'rúaj böñachi zián yugu' yödzö ni', ate' gula'benë', sójáquië' Jerusalén cate' si' idxín laní na' para tsöjpá'a cuíngagaquië' ca naca que yudo'. <sup>56</sup> Yugu' bönni' na' nacu'ë Jerusalén tu'guiljë' Jesús, en cate' ni' nacu'ë chila yudo', gula'nabi luzá'agaquië' tuë' ia'túë', ta'nnë':

—¿Bizxi rusáca'li'? ¿Huídatsë' laní, o biti' guídë?

<sup>57</sup> Chigula'nná bë'ë yugu' bixúz unná bë', en yugu' bönni' yudo' fariseo channö nu nözi ga zoë' Jesús, ral-la' ududíxjöi'i légaquië' para gaca tsöjxöngagaquië' Lë'.

## 12

*María rigú'unu le rilá' zxixi ni'ë Jesús  
(Mt. 26:6-13; Mr. 14:3-9)*

<sup>1</sup> Cate' ni' nagá'anagaca ia'xopa dza cate' idxín Laní Pascua cate' tu'subanë' bönni' judío ca benë' Dios, bubéajë' böñachi queë' luyú Egipto, ní'irö bidxinë' Jesús lu yödzö Betania, ga na' zoë' Lázaro, bönni' na' gútië', en bubanë' lu yöl-la' guti. <sup>2</sup> Gula'gu'ë tu gü'i huagu ni' le gahuë' Jesús. Gulú'unu María le ilahuë', ate' nútsë'ë Lázaro ladaj bönni' ró'ölengaquië' Jesús ga na' tahuë'. <sup>3</sup> Ní'irö gudéla'nu María ca tu güié le rilá' zxixi que yöj susén lasi idú, le nazáca'da', en gulú'unu le ni'ë Jesús. Buzxinu ni'ë len guitsa' ícjanu. Idútë lu yu'u na' guzé bö' zxixi. <sup>4</sup> Ní'irö bë'ë didza' tu bönni' usëda queë' Jesús, le' Judas Iscariote, zxí'inë' tu bönni' le' Simón, en náquië' bönni' na' udödë' Jesús lu ná'agaquië' yugu' bönni' yudo', rnnë':

<sup>5</sup> —¿Bizxi que biti' gudó'o le rilá' zxixi na', le nazaca' lázxjaru' que tu iz, ate' huáca nu quisi dumí na' quégaca böñachi yechi'?

<sup>6</sup> Gunné' caní, calëga tu' rui'i ládxë'ë böñachi yechi', pero tu' náquië' gubán, en le' cazë' nu'ë buzudi dumí quégagaquië', en rubéajlanë' dumí na' tu'chejë' lu buzudi na'. <sup>7</sup> Ní'irö Jesús re' le':

—Bë'ë-nu lataj, tu' naca le' ni bennu tu le nabá'a para dza igácha'a. <sup>8</sup> Yugu' böñachi yechi' ila'cuá'lentica'sö libí'ili', pero neda' biti' ugá'anatica'sa' ga zóali'.

*Tun xtídz'a'gaquië' bönni' judío unná bë' ilútië' Lázaro*

<sup>9</sup> Cate' bila'yönnë' bönni' judío zoë' Jesús yödz Betania, bila'dxinë' ziánë' ni', calégasö tu' zoë' Jesús ni', pero lësca' tu' té'ennë' ila'lé'enë' Lázaro, bönni' na' busubanë' Jesús lu

yöl-la' guti. <sup>10</sup> Ní'irö gulún xtídza'gaquië' yugu' bixúz unná bë', ilútië' ca' Lázaro, <sup>11</sup> tu' ta'yéajlé'ë zián bönni' judío Jesús ni'a queë' Lázaro na', en chinulá'alengaquië' yugu' bixúz unná bë' na'.

*Len yöl-la' ba zxön razië' Jesús Jerusalén*

(Mt. 21:1-11; Mr. 11:1-11; Lc. 19:28-40)

<sup>12</sup> Bönachi zián bila'dxín Jerusalén dza Laní Pascua, ate' dza buropi na' ta'yöni zë'ë Jesús ni'. <sup>13</sup> Ní'irö gula'guítsjé' zin, en bila'rúajé' söjxí'gala'gaquië' Jesús, ate' gulu'ë zidzaj didza', ta'nné':

—¡Yöl-la' ba Dios! ¡Yöl-la' ba Bönni' ni zë'ë uláz queë' Xanru', para inná bë'enë' bönachi Israel!

<sup>14</sup> Budzölinë' Jesús tuba' búrrodo', ate' gudxíë'-ba' ca na' nazúaj lu guichi lá'ayi, rnna:

<sup>15</sup> ¡Biti' gádxili', libí'ili', zóali' yödzo Sión!

¡Buli'yútsöca', zë'ë Bönni' inná bë'enë' libí'ili'!

¡Dxië'-ba' tuba' búrrodo'!

<sup>16</sup> Cate' ni' si' guca lë ni, biti' gula'yéajni'inë' bönni' usëda queë' Jesús, pero gudödi ni', cate' bubanë' Jesús lu yöl-la' guti, en buëpë' yehua' yubá queë', ní'irö yöjnéguequinë' lë ni nazúaj lu guichi lá'ayi ca ral-la' gaca queë', ate' guca queë' caní.

<sup>17</sup> Lësca' yugu' bönni' na' gula'cuá'lenë' Jesús cate' ni' bulidzé' Lázaro, bönni' na' yu'ë yeru ba, en busubanë' lë'lu yöl-la' guti, guluné' ba nalí queë'. <sup>18</sup> Que lë ni na' ca'bila'rúajé' bönni' yöjxí'gala'gaquië' Jesús, tu'bila'yönnë' ca naca yöl-la' huáca ni benë' Lë'. <sup>19</sup> Ní'irö gula'nné' la' légacasë' bönni' yudo' fariseo, ta'nné':

—Chinaca bë' biti' bi séqui'rú' gunru'. Buli'yú ca dá'gaca yúgu'të bönachi Lë'.

*Yugu' bönni' zi'tu' tu'guiljé' Jesús*

<sup>20</sup> Bal-lë' bönni' zi'tu' dzágagaquië' nupa na' bila'dxín Jerusalén dza Laní Pascua na' para ila'yéaj ládxí'gaquië' Dios. <sup>21</sup> Yugu' bönni' zi'tu' na' bila'dxinë' ga zoë' Felipe, bönni' Betsaida que luyú Galilea, ate' guláta'yuë' lahuë', ta'nné':

—Bönni', rë'ënitu' ilé'etu'-në' Jesús.

<sup>22</sup> Guyijé' Felipe na', en yöjödxé' ca' Andrés. Ní'irö Andrés, en Felipe na' gulé' ca' Jesús.

<sup>23</sup> Bubi'ë didza' Jesús, rë' légaquië':

—Chizóa idxín dza gátia' neda', Bönni' Guljé' Bönachi, huöja' xilatja' yehua' yubá. <sup>24</sup> Le nácatë rea' libí'ili': Ugá'ana cá'asö tu xisedo' channö cabí igachi' luyú, en údxi que. Channö údxi que xisedo' na', ate' ilén, yénni'térö unödzaj. <sup>25</sup> Nu bönni' ru'i ládxí'dë'ë yöl-la' na'bán queë', unítië' le, tu' gátië' tsaz bönni' na'. Nu bönni' biti' ru'i ládxé'ë yöl-la' na'bán dë queë' yödzölió ni gun chi'ë le ga idxinrö dza gata' yöl-la' na'bán idú queë'.

<sup>26</sup> Channö rë'ënë' nu bönni' guné' xichina', ral-la' të'ë neda' bönni' na', ate' ga ni' tsöjsóa' neda', ní' tsöjsóë' ca' bönni' na' runë' xichina'. Channö runë' xichina' nu bönni', Xuza' Dios guné' bal bönni' na'.

*Riguíxjö'ë Jesús ca si' ilútië' Lë'*

<sup>27</sup> Gunné' ca' Jesús:

—Na'a rö'a böninga neda'. ¿Nacxi innatsa'? ¿Naru' innía': Xuza', busölá neda' lu le gaca quia' na'a? Que lë ni na' bida', para guá' ilena' le ral-la' gaca quia' na'a. <sup>28</sup> Xuza', ben ga ilá' lahui yöl-la' zxön quiu'.

Ní'irö biyón chi'ë Nu ru'i didza' yehua' yubá, rnna:

—Chibéna' ga nalá' lahui yöl-la' zxön quia', ate' leyúbölö guna' ga ilá' lahui yöl-la' zxön quia' na'.

<sup>29</sup> Bila'yöni bönachi zián nacuá' ni' chi'ë ni, ate' ta'nná:

—Guziú' na' gunné'.

Ia'bal-la bönachi na' ta'nná:

—Tu gubáz lá'ayi queë' Dios bë'lenë' Lë' didza'.

<sup>30</sup> Ní'irö bubi'ë didza' Jesús, rë' légaquië':

—Biyóñ chi'i ni, caléga para uzi'a xibé neda', pero para uzí'ili' xibé libí'ili'. <sup>31</sup> Chibidxín dza uchi'a usöröö' Dios bönachi yödzölió ni. Na'a chú'uné' Dios tu' xihui' ní'ilö, nu na' rinná be'e bönachi yödzölió ni. <sup>32</sup> Na'a, channö ilútië' bönni' neda', en ulu'chisé' neda' xitsá', guna' ga ulu'dubi yúgu'té bönachi ga zoa'.

<sup>33</sup> Didza' ni bë'ë Jesús naca bë' ca gátië'. <sup>34</sup> Bönachi zián na' tē Jesús, ta'nná:

—Netu' biyónitu' nupa bulu'laba le rnna xibá queé' Dios, lë na' rnna: Sóatica'sé' Cristo. ¿Nacxi caz naca, rnno' Li': "Run bayudxi Bönni' Guljé' Bönachi, ulu'chisé' Lë' xitsá"? ¿Nuzxi na' Bönni' Guljé' Bönachi?

<sup>35</sup> Ní'irö Jesús rë' légaquië':

—Ia'tú chí'ido'osö sóalena' neda' libí'ili', en naca' bení' queéli'. Guli'tá tsanni ni zóalena' libí'ili', en zóalen bení' libí'ili', para cabí ichul-la inítili'. Nu bönni' ridé' ga chul-la niti biti' nöziné' gazxi sa'yéajé'. <sup>36</sup> Tsanni ni zóalena' libí'ili', naca' bení' queéli'. Guli'tséajlë' neda' naca' bení' queéli' para ilé'eli' bení' na' naca idú.

Cate' Jesús budxi bë'ë didza' ni, yöjhuöjë' yöjcachi' lahuë' lógaquië'.

### *Le run nigui bönachi judío, para cabí ila'yéajlë' Jesús*

<sup>37</sup> Sal-la' bené' Jesús zián yöl-la' huáca lógaquië', biti' gula'yéajlë'ë Lë'. <sup>38</sup> Caní guca lë na' buzúajé' Isaías lu guichi, bönni' na' bë'ë didza' uláz queé' Dios, gunné':

Xan, ¿nuzxi caz guyéajlë' didza' bë'ëtu'?

¿Nuzxi caz bulu'iné' Xanru' yöl-la' huáca queé'?

<sup>39</sup> Caní guca, biti' guca ila'yéajlë'ë Jesús. Guca ca na' gunné' ca' Isaías:

<sup>40</sup> Dios bené' ga gula'chul-la gula'nítie',

ate' guca zidi ládxí'do'gaquië'

para cabí ila'lé'ené' len guiój lógaquië',

en cabí ila'yéajni'iné' lu icja ládxí'do'gaquië'.

Biti' ulu'huöáquië' quia' para úngaca'-në'.

<sup>41</sup> Bë'ë Isaías didza' ni tu' bilé'ené' yöl-la' zxön queé' Cristo, en bë'ë didza' ca naca queé' Lë'. <sup>42</sup> Sal-la' raca caní, gula'yéajlë' bönachi zián Jesús, ga bidxitné gula'yéajlë'ë bal-lé' bönni' unná bë' Lë', pero tu' tádxiné' yugu' bönni' yudo' fariseo, biti' guluné' ba nalí queé' yálajdo', para cabí ulu'béajé' légaquië' tsaz ga na' tu'dubé' tu'sédé' queé' Dios.

<sup>43</sup> Caní guluné' tu'tunré' zxön le tun bönachi légaquië' bal ca le runé' Dios légaquië' bal.

### *Ilún didza' bë'ë Jesús ga irugu quégaca bönachi ilátigaca*

<sup>44</sup> Bë'ë zidzaj didza' Jesús, rmné':

—Nu bönni' réajlë'ë neda', caléga néda'sö réajlë'ë, pero réajlë'ë ca' Xuza' nasól-lë'ë neda'. <sup>45</sup> Lësca' caní, nu bönni' rilé'ené' neda', rilé'ené' ca' Xuza' nasól-lë'ë neda'. <sup>46</sup> Neda' naca' bení', en bida' yödzölió ni, para cabí ulu'gá'ané' ga chul-la yúgu'té bönni' ila'yéajlë'ë neda'. <sup>47</sup> Channö riyönné' nu bönni' xtídza'a, en biti' runé' le bal, caléga neda' ichuga' queé' bönni' na' gátië', tu' bida' ni, caléga para ichuga' quégaca bönachi yödzölió ni, pero para usólá' bönachi yödzölió ni. <sup>48</sup> Nu bönni' ruzóë' neda' tsólá'alö, en biti' rizi' lu në'ë xtídza'a, chizóa le ichugu queé' bönni' na'. Didza' na' chibé'lena' libí'ili' naca tu le ichugu queé' bönni' na' dza údxi. <sup>49</sup> Caní naca, ruá'a didza', caléga rácasö quia', pero Xuza' nasól-lë'ë neda' gudxé' neda' le ral-la' innía', enca' ca ral-la' gu'a didza'. <sup>50</sup> Nözda' gunná bë'ë Dios caní para gata' yöl-la' na'bán idú quégaca bönachi. Caní naca, didza' na' ruá'a, ruá'a didza' ca na' Xuza' chigudxi cazé' neda'.

### *Jesús riguibé' ní'agaquië' bönni' usëda queé'*

<sup>1</sup> Ni' naca dza si' idxín Laní Pascua cate' tu'subané' bönni' judío ca bené' Dios, bubéajé' bönachi queé' luyú Egipto. Nöziné' Jesús chibidxín dza queé' gátië', cate' ral-la' uzé'ë

yödzölió ni, en huöjë' ga zoë' Xuzë'. Ca na' nadxí'inë' bönnachi queë' nacuá' yödzölió ni, na'a nadxí'inë' légaquië' ga idxintë gátië' uláz quégaquië'.

<sup>2</sup> Satanás tu' xihui' chinagú'u yöl-la' Judas Iscariote, zxí'inë' tu bönni' lë' Simón, para udödë' Jesús lu ná'agaca nupa iluti Lë'. <sup>3</sup> Nózinë' Jesús ca naca, birúaiejë' ga zoë' Dios, en huöjë' ca' ga na' zoë' Dios, ate' Dios Xuzë' chinudödë' lu në'ë Lë' idútë yöl-la' unná bë' queë'. <sup>4</sup> Que lë ni na', cate' ni' tahuë', guzuínë' Jesús, en gudúë' lari' rixoa yenë'. Gudélë'ë tu lari' ruzxini ná'aru' le budé'ë lë'ë. <sup>5</sup> Ní'irö gudé'ë nisa tu lu zxiga' guíë, ate' gusí lahuë' riguibë' ní'agaquië' bönni' usëda queë', en ruzxinë' ní'agaquië' len lari' na' da' lë'ë.

<sup>6</sup> Cate' bidxinë' ga rö'ë Simón Pedro, Pedro na' rë' Lë':

—Xan, ¿naru' Li' quíbitso' ni'a?

<sup>7</sup> Bubi'ë didza' Jesús, rë' lë':

—Lë ni runa', biti' réajni' ininu' na'a, pero huadzé tséajni' inu'.

<sup>8</sup> Ní'irö Pedro rë' Lë':

—Biti' ca' quíbi cazu' Li' ni'a.

Jesús rë' lë':

—Channö neda' biti' quiba' li', biti' ca' séqui'nu' gunu' neda' tsözxön.

<sup>9</sup> Ní'irö Simón Pedro rë' Lë':

—Xan, calégassö ni'a quibu', pero quibu' ca' na'a, en icja'.

<sup>10</sup> Jesús rë' lë':

—Nu nayari, ní'asö run bayudxi tsari, tu' naca cazë' dxi'a idutë', ate' libíili' nácali' dxi'a, pero caléga yúgu'téli'.

<sup>11</sup> Gunné' caní Jesús: "Caléga yúgu'téli' nácali' dxi'a", tu' nözinë' nülögaquië' na' udödi Lë'.

<sup>12</sup> Gudödi gudibë' Jesús ní'agaquië', buguélë'ë lari' na' buxoa yenë'. Bubö'ë ga tahuë', ate' rë' légaquië':

—¿Réajni'ili' lë na' si' bena' queéli'? <sup>13</sup> Libíili' ruíili' La': Bönni' Usedi enca': Xan. Dxi'a naca ca rnali', tu' caní naca'. <sup>14</sup> Na'a, channö neda' naca' Xanli', en Bönni' Usedi queéli', ate' gudiba' ní'ali', lësca' caní ral-la' gunli' libíili', quíbili' ni'a luzá'ali' tulí' ia'tuli'. <sup>15</sup> Tu le bulu'ida' libíili' para gunli' libíili' ca na' bena' neda'. <sup>16</sup> Le nácatë rea' libíili': Biti' nayépisétérë' tu bönni' huen dxin ca xanë', ate' bönni' gubáz biti' nayépisétérë' ca nu nasöl-la' lë'. <sup>17</sup> Channö réajni'ili' yúgu'té lë ni, bica'ba libíili' channö gunli' caní. <sup>18</sup> Didza' ni ruá'a biti' rea' yúgu'téli'. Nöz quézida' nupa guró caza' neda', pero run bayudxi gaca lë na' nazúaj lu guichi lá'ayi, le rnna: "Nu rágulen neda' tsözxön, nu ni tá'baga' neda'." <sup>19</sup> Na'a riguixjöi'ida' libíili' zí'alö ca gaca, para cate' gaca caní, tséajlë'ëli' zoa caza' neda'. <sup>20</sup> Le nácatë rea' libíili': Nu bönni' gunë' bal gubáz isól-la'a neda', neda' ca' gunë' bal, ate' nu bönni' gunë' neda' bal, gunë' ca' bal Xuza', nasöl-lë'ë neda'.

*Riguixjö'ë Jesús ca gunë' Judas, udödë' Lë'*

(Mt. 26:20-25; Mr. 14:17-21; Lc. 22:21-23)

<sup>21</sup> Cate' Jesús budxi bë'ë didza' ni, buí'innë', ate' yálajdo' gunné':

—Le nácatë rea' libíili': Tu bönni' nútsë'ë ládjali' udödë' neda'.

<sup>22</sup> Ní'irö bulu'yú lo luzá'agaquië' tuë' ia'túë' bönni' usëda queë', en gula'cu'ë böninga, ate' ta'naba ládxí'gaquië' nuzxi que na' gunné' Jesús caní. <sup>23</sup> Tuë' bönni' usëda queë' Jesús, bönni' na' Jesús nadxí'inë' lë', zoë' cuita lë'ë. <sup>24</sup> Simón Pedro bulá'a bulu'isë' bönni' ni para inábinë' Jesús nuzxi que na' gunné' caní. <sup>25</sup> Ní'irö bönni' na' zoë' cuita lë'ë Jesús rë' Lë':

—Xan, ¿nuzxi na' ru'u didza' que?

<sup>26</sup> Bubi'ë didza' Jesús, rë' lë':

—Náquië' bönni' na' gu'a-në' yóta xtila nabisa.

Ní'irö busubísië' yöta xtila na', en bë'ë queë' Judas Iscariote, zxí'inë' tu bönni' lë' Simón. <sup>27</sup> Gudödi gudahuë' Judas yöta xtila na', guyaza Satanás tu' xihui' icja ládx'i'da'ahuë'. Ní'irö Jesús rë' lë':

—Lë na' gunu', yöjentë na'a.

<sup>28</sup> Biti' ta'yéajni'inë' ia'zíca'rë' bönni' usëda queë' rö'ögaquië' tahuë' bizx que na' Jesús gudxë' lë' caní. <sup>29</sup> Tu' nu'ë Judas buzudi dumí quégäquië', téquinë' bal-lë' Jesús gudxë' lë': Yöxi' le gáguru' laní, o gunné': Bë' lati' quégaca böñachi yechi'. <sup>30</sup> Cate' budxi gudahuë' Judas yöta xtila na', en ni' naca chi'i dzö'ölö, la' birúajtë'.

### Tu xibá cubi

<sup>31</sup> Cate' chibirúajë' Judas na', ní'irö gunné' Jesús:

—Na'a chizóa ilá' lahui yöl-la' zxön quia' neda', Bönni' Guljë' Bönachi, en ilá' lahui ca' yöl-la' zxön queë' Dios. <sup>32</sup> Channö ilá' lahui yöl-la' zxön queë' Dios ni'a quia' neda', Zxí'inë', lësca' Lë cazë' Dios gunë' ga ilá' lahui yöl-la' zxön quia' neda', Zxí'inë', en la' guntë' caní. <sup>33</sup> Libíili', zxí'ina'do', ia'tú chí'isö zóalena' libíili'. Uguíljalí' neda', ate' ca na' chigúdxigaca'-në' bönni' judío, lësca' rea' libíili' na'a: Ga na' tseja' neda', biti' gaca guídali' rácasö queéli'. <sup>34</sup> Rea' libíili' tu xibá cubi le rnna caní: Guli'dxí'i luzá'ali' tuli' ia'tuli'. Ca na' neda' nadxí'ida' libíili', lësca' caní ral-la' idxí'ili' luzá'ali' tuli' ia'tuli'. <sup>35</sup> Channö huadxi'i luzá'ali' tuli' ia'tuli', iléquibe'e yúgu'të böñachi dá'ali' neda'.

Rnnë' Jesús innë' Pedro biti' núnbë'ë Lë'

(Mt. 26:31-35; Mr. 14:27-31; Lc. 22:31-34)

<sup>36</sup> Ní'irö Simón Pedro gunábinë' Jesús, rnnë':

—Xan, ¿gazxi caz tseju'?

Bubi'ë didza' Jesús, rnnë':

—Ga na' tseja' neda', biti' gaca sá'lenu' neda' na'a, pero huadzé guídu' ga tseja' neda'.

<sup>37</sup> Pedro rë' Lë':

—Xan, ¿bizx que biti' gaca sá'lenu' Li' na'a? Chizóa' udöda' yöl-la' na'bán quia', gátia' tu' nadxí'ida' Li'.

<sup>38</sup> Bubi'ë didza' Jesús, rë' lë':

—¿Naru' udödu' yöl-la' na'bán quiu' tu' nadxí'iniu' neda'? Le nácatë rea' li', zi'alö ca códxiba' böra, li' tá'bág'u'u tsonna luzuí, innó' biti' núnbë'u neda'.

## 14

Náquië' Jesús nöza tséajlenru' para idxinru' ga zoë' Dios Xuz

<sup>1</sup> Rnnë' Jesús:

—Biti' cö'li' baniga lu icja ládx'i'do'oli'. Guli'tséajlé' Dios, en guli'tséajlé' ca' neda'. <sup>2</sup> Lu yu'u lidxë' Xuza' lataj zián nacuá'. La'tu' cabí naca caní, neda' chigudxi caza' libíili'. Tseja' na'a, tsöjpá'a lataj queéli' ga tsöjsóali'. <sup>3</sup> Channö huayéaja', en tsöjpá'a lataj queéli' ga tsöjsóali', huöda' leyúbölö, ate' uchë'a libíili' lataj quia', para ga na' tsöjsóali' neda', tsöjsóali' ca' libíili'. <sup>4</sup> Nöz quézili' ga ni' tseja', en núnbë'ëli' ca' nöza.

<sup>5</sup> Tomás rë' Lë':

—Xan, biti' nöztu' gazxi na' tseju'. ¿Nacxi caz gaca gúnbë'ëtu' nöza?

<sup>6</sup> Bubi'ë didza' Jesús, rë' lë':

—Neda' naca caza' nöza, en naca' ca' le naca idútë li, en naca' ca' Nu nabánigaca böñachi. Ni'a quia' néda'sö gaca nu idxín ga zoë' Dios Xuz. <sup>7</sup> La'tu' núnbë'ëli' neda', Xuza' ca' núnbë'ëli'-në'. Na'a, núnbë'ëli'-në', en chibile'ëli'-në'.

<sup>8</sup> Ní'irö Felipe rë' Lë':

—Xan, bulu'i netu' Xuzu', ate' nácatë queétu'.

<sup>9</sup> Bubi'ë didza' Jesús, rë' lë':

—Felipe, xidzé chiguca zóalena' libíili'. ¿Naru' cabí núnbë'ëtso' neda'? Nu bönni' rile'enë' neda', rile'enë' ca' Xuza'. ¿Rnnatso': "Bulu'i netu' Xuzu"?" <sup>10</sup> ¿Naru' cabí réajlé'u zóalen caza'-në' Xuza', ate' Xuza' zóalen cazë' neda'? Yugu' didza' ni ru'ilenä' libíili',

caléga rácasdö quia' ruá'a didza' ni, pero Xuza' zóalen cazë' neda', Lë cazë' runë' dxin ni. <sup>11</sup> Guli'tséajlë' neda', zóalen caza'-në' Xuza', ate' Xuza' zóalen cazë' neda'. Channö cabí gaca gunli' caní, guli'tséajlë' neda' ni'a quégaca dxin ni runa'. <sup>12</sup> Le nácatë rea' libi'ili': Yugu' dxin ni runa' neda', lësca' gunë' bönni' na' réajlë'ë neda', ate' le zxõntëro ca' gunë' bönni' na' tu' huöja' ga zoë' Dios Xuz. <sup>13</sup> Yúgu'të le inábili' Dios Xuz, en ugunli' dxin La' neda', neda' guna' lë na' inábali', para ulu'a lahui neda', Zxf'inë', yöl-la' zxön queë' Dios Xuz. <sup>14</sup> Bíti'tés bi inábali', en ugunli' dxin La' neda', neda' guna' le.

*Jesús isól-lë'ë Dios Bö' Lá'ayi, para idisóalenë' bönachi queë'*

<sup>15</sup> Rnnë' ca' Jesús:

—Channö nadxi'ili' neda', guli'gún le rea' libi'ili', <sup>16</sup> ate' neda' gáta'yua' lahuë' Dios Xuz, ate' Lë' isól-lë'ë queéli' Nu yúbölö Nu gácalen libi'ili', Nu utipa ládzi'ili', en sóalentica'sö libi'ili'. Nu ni naca Dios Bö' Lá'ayi, Nu ruí'i didza' idútë li. <sup>17</sup> Biti' gaca ulu'zi' bönachi yödzölió ni xibé' Lë', tu' cabí gaca ila'lé'e Lë', en biti' gaca ilúnbe'e Lë'. Zóalen cazë' libi'ili', ate' soë' lu icja ládzi'do'oli'. <sup>18</sup> Biti' ucá'ana' libi'ili' ca yugu' bi'i uzébido'. Huöda' udusóalena' libi'ili'. <sup>19</sup> Ia'tú chí'ido'osö bíti'rö ila'lé'e bönachi yödzölió ni neda', pero libi'ili' ulé'eli' neda'. Tu' zoa caza' nabana' neda', libi'ili' ca', tsaz sóali' ibanli'. <sup>20</sup> Dza ní'irö cate' Dios Bö' Lá'ayi na' idisóalenë' libi'ili', inóz quézili' zóalen caza'-në' Xuza' Dios, ate' libi'ili' zóalenli' neda', ate' neda' ca' zóalen caza' libi'ili'. <sup>21</sup> Nu bönni' rizi' lu në'ë xtídza'a, en runë' ca rnna, naca bë' nadxi'inë' neda'. Xuza' Dios idxi'inë' bönni' na' nadxi'inë' neda', ate' neda' idxi'ida'-në' bönni' na', en ulu'i lahua' lahuë'.

<sup>22</sup> Judas rë' lë', pero caléga Judas Iscariote, rnnë':

—Xan, ¿nacxi caz gaca ulu'i lo' lotu' netu', en biti' ulu'i lo' lógaca bönachi yödzölió?

<sup>23</sup> Bubi'ë didza' Jesús, rë' lë':

—Nu bönni' nadxi'inë' neda' gunë' ca rnna xtídza'a, ate' Xuza' Dios idxi'inë' bönni' na', ate' guídatu' idisóalentu'-në' bönni' na' lu icja ládzi'da'ahuë'. <sup>24</sup> Bönni' na' biti' nadxi'inë' neda' biti' runë' ca rnna xtídza'a. Didza' na' biyónili' bë'a neda', calégasö quia' na', pero naca queë' Dios Xuz nasól-lë'ë neda'.

<sup>25</sup> 'Rë caza' libi'ili' yugu' lë ni tsanni ni zóalena' libi'ili', <sup>26</sup> pero Dios Bö' Lá'ayi gácalenë' libi'ili', en utipë' ládzi'ili'. Xuza' Dios isól-lë'ë Lë' queéli' tu' ugunli' dxin La' neda'. Usédinë' libi'ili' yúgu'të, en usé'ë ládzi'ili' ca naca yúgu'të didza' na' chigudxa' libi'ili'.

<sup>27</sup> 'Rucá'ana' queéli' le cuéqui dxi ládzi'ili'. Runna' queéli' yöl-la' rö'ö dxi ladxi' quia'. Yöl-la' rö'ö dxi ladxi' na' runna' queéli' biti' naca ca le tunna queéli' bönachi yödzölió ni. Biti' ichixi icja ládzi'do'oli', en biti' gadxi idzöbili'. <sup>28</sup> Chibiyónili' ca na' chigudxa' libi'ili': Huöja', ate' huöda' udusóalena' libi'ili'. La'tu' nadxi'ili' neda', udzéjali' cate' ni' gudxa' libi'ili' huöja' ga zoë' Dios Xuz, tu' nayépisétérë' Dios Xuz ca neda'. <sup>29</sup> Na'a, chigudxa' libi'ili' z'alö ca si' gaca, para cate' gaca caní, tséajlë'eli' neda'.

<sup>30-31</sup> 'Bíti'rö güü'lena' libi'ili' didza' zián, tu' za' tu' xihui', nu rinná be'e bönachi yödzölió ni. Sal-la' biti' bi dë lu në'e bi gun quia' neda', ral-la' gaca caní para iléquibe'e bönachi yödzölió ni nadxi'ida'-në' Dios Xuz, en runa' ca na' chigudxë' neda' guna'. Guli'chasa, uzá'aru' ni.

## 15

*Ca naca que lubá uva, en ni'a në'e lubá na'*

<sup>1</sup> Lësca' caní Jesús gudxë' légaquië':

—Naca' neda' ca tu lubá uva le naca idú dxi'a, ate' Xuza' náquië' ca bönni' guz gü'una rapa chí'ë lubá na'. <sup>2</sup> Ugüü' yúgu'të ni'a në'e lubá na' naca' neda', le cabí bi ta'bía, ate' uchi'ë yúgu'të ni'a në'e na' ta'bía, para ila'bía ia'lati'. <sup>3</sup> Libi'ili' chinácali' dxi'a ni'a que didza' na' chibé'lena' libi'ili'. <sup>4</sup> Guli'dá'tica'sö neda', ca na' neda' dá'tica'sa' ca' libi'ili'. Ca naca que ni'a në'e lubá na', biti' gaca bi cuía rácasdö que, channö cabí dá'tica'sö lubá na', lësca' caní naca queéli', biti' bi gaca gunli' channö cabí tá'tica'sili' neda'.

<sup>5</sup> 'Naca' neda' ca lubá na', ate' libí'ili' nácali' ca ni'a né'e. Nu bönni' dá'tica'së' neda', ca na' neda' dá'tica'sa' lë', bönni' ni náquië' ca ni'a né'e lubá na' ribía yenni', tu' channö nulá'alenli' neda', biti' bi gaca gunli'. <sup>6</sup> Nu bönni' biti' dá'tica'së' neda', gaca queë' ca raca quégaca ni'a né'e lubá na' biti' nácagaca dxi'a, ta'rú'uné' ni'a né'e na', ate' ila'bidxi. Cate' chinabídxigaca ni'a né'e na', ulu'tubë' léguequi, en ila'gu'ë léguequi lu guí', ate' tséguigaca.

<sup>7</sup> 'Channö tá'tica'sili' neda', en gunli' ca rnna xtídz'a'a, huáca inábali' bi gué'ënili', ate' neda' guna' lë na' inábali'. <sup>8</sup> Gunli' bal Xuza' Dios cate' gunli' xichinë', ate' gácali' ca ni'a né'e lubá na' ta'bía, en caní gaca bë' nácali' idú bönni' ta'dé'ë neda'. <sup>9</sup> Ca na' nadxi'iné' Dios Xuz neda', lësca' caní nadxi'ida' libí'ili'. Guli'gúntica'sö ca ral-la' gunë' bönni' nadxi'ida'-në'. <sup>10</sup> Channö gunli' ca rea' libí'ili', gunli' ca ral-la' gunë' bönni' nadxi'ida'-në', ca na' neda' ca' runa' ca chigudxë' Xuza' Dios neda' guna', en rúntica'sa' le raza ládxë'ë Lë', Bönni' na' nadxi'iné' neda'.

<sup>11</sup> 'Yugu' didza' ni rea' libí'ili' para udzéjalenli' tsözxón neda', en gaca idú ca na' udzéjali'. <sup>12</sup> Lë ni naca le rea' libí'ili' gunli': Guli'dxi'i luzá'ali' tuli' ia'tuli', ca na' neda' ca' nadxi'ida' libí'ili'. <sup>13</sup> Biti' gaca idxí'irönë' nu bönni' luzé'ë ca nu bönni' udödë' yöl-la' na'bán queë', gátië' para gácalenë' yugu' böchi' luzé'ë tu' nadxi'iné' légaquië'. <sup>14</sup> Libí'ili' nácali' böchi' luzá'a channö gunli' ca na' chigudxa' libí'ili' gunli'. <sup>15</sup> Bíti'rö innia' queéli' nácali' huen dxin quia', tu' cabí nözinë' bönni' huen dxin naca gunë' xanë'. Neda' chigunnia' queéli' nácali' böchi' luzá'a, tu' chibena' ga nözili' yúgu'të le chigudxë' Xuza' neda' guna'. <sup>16</sup> Caléga libí'ili' guröli' neda', pero neda' gurö caza' libí'ili', en buzóa' libí'ili' para tséajli' bi tsöjenli', ca na' tun ni'a né'e lubá na' ta'bía yenni', ate' ugá'anatica'sö lë na' gunli'. Caní gaca, Xuza' Dios gunné' queéli' yúgu'të le inábili' Lë', en ugunli' dxin La' neda'. <sup>17</sup> Lë ni naca le rea' libí'ili' gunli': Guli'dxi'i luzá'ali' tuli' ia'tuli'.

### Bönachi yödzölió tu'zóa tsölá'alö Jesúś, en nupa dá'gaca Lë'

<sup>18</sup> Gunné' ca' Jesúś:

—Channö bönachi yödzölió ni tu'zóa libí'ili' tsölá'alö, nözili' chibulu'zóë' neda' tsölá'alö zí'alö ca tu'zóë' libí'ili' tsölá'alö na'a. <sup>19</sup> La'tu' nácali' tuz len bönachi yödzölió ni, huala'dxi'i bönachi yödzölió ni libí'ili' ca na' ta'dxi'i luzé'ë guequi, pero tu'zóa bönachi yödzölió ni libí'ili' tsölá'alö tu' cabí nácali' tuz len léguequi, tu' gurö caza' neda' libí'ili', en guléaja' libí'ili' ladaj bönachi yödzölió ni. <sup>20</sup> Guli'tsöjné didza' na' chigudxa' libí'ili', gunnia': Biti' nayépisëtërë' nu bönni' huen dxin ca xanë'. Channö gula'bía ládxí'gaca bönachi neda', ila'bía ládxí'gaca ca' libí'ili'. Channö nacuá' nupa tun ca rnna xtídz'a'a, ilún ca' ca rnna xtídz'a'li' libí'ili'. <sup>21</sup> Yúgu'të lë ni ilún bönachi queéli' tu' dá'ali' neda', tu' cabí núnbe'gaca Dios Xuz nasö'l-lë'ë neda'.

<sup>22</sup> 'La'tu' cabí bida', en la'tu' cabí bë'lena' légaquië' didza', biti' ila'bágue'ë dul-la', pero na'a tu' bida' ni, biti' bi gaca ila'nné' que dul-la' nabága'gaquië' le ubéaj légaquië' dxi'a. <sup>23</sup> Nu bönni' ruzoë' neda' tsölá'alö, ruzoë' ca' Xuza' Dios tsölá'alö. <sup>24</sup> La'tu' cabí bena' yugu' yöl-la' huáca ga nacuë', yugu' le cuntu nu ben ca gulaca, biti' ila'bágue'ë dul-la'. Na'a, bila'lé'enë' yugu' lë na' bena', ate' tu'zóë' neda' tsölá'alö, en tu'zóë' ca' Xuza' tsölá'alö. <sup>25</sup> Caní raca, para gaca ca rnna xtídzë'ë Dios, le nazi' lu ná'agaquië', le rnna: Tu'zóë' neda' tsölá'alö, en biti' zoa bizx que.

<sup>26</sup> 'Cate' idxinë' Dios Bö' Lá'ayi, Bönni' ru'ë didza' idútë li, en gácalenë' libí'ili', utipë' ládxí'li'. Isö'l-la'a Bönni' na' queéli' uláz queë' Dios Xuz, ate' gunë' ba nalí quia' neda'.

<sup>27</sup> Libí'ili' ca' gunli' ba nalí quia', tu' zóalen cázali' neda' tsözxón dza ni'te.

—Yugu' didza' ni chigudxa' libi'ili', para cabí gaca chopá ládxi'li'. <sup>2</sup> Yugu' bönni' judío ulu'béajé' libi'ili' tsaz ga tu'dubé' tu'séde' queé' Dios, ate' idxín dza cate' nu bönni' gútié' libi'ili' guéquiné' dxin queé' Dios runé'. <sup>3</sup> Caní iluné', tu' cabí núnbe'gaquié' Dios Xuz, en cabí núnbe'gaquié' neda'. <sup>4</sup> Rea' libi'ili' yugu' didza' ni, para cate' idxín dza na', tsöjnélí' didza' ni chigudxi caza' libi'ili'.

### *Le guné' Dios Bö' Lá'ayi*

Gunné' ca' Jesús:

—Yugu' didza' ni biti' gudxa' libi'ili' dza ni'te, tu' ni' zóalen caza' libi'ili'. <sup>5</sup> Na'a huöja', tsöjsóalena'-në' Dios Xuz, nasöl-lë'ë neda'. Biti' inábili' neda' nituli' libi'ili', biti' innali': ¿Gazxi tseju'? <sup>6</sup> Na'a, tu' rea' libi'ili' yugu' didza' ni, risébi ládxi'li'. <sup>7</sup> Neda' rea' libi'ili' le naca idútë li. Gácarö dxi'a queéli' huöja', tu' channö cabí huöja', biti' idisóalene' Dios Bö' Lá'ayi libi'ili', Bönni' na' gácalené' libi'ili', en utipé' ládxi'li', pero channö huöja', isöllala'a-në', na' idisóalene' libi'ili'. <sup>8</sup> Cate' guídë' Lë', guné' ga iléquibe'e bönachi yödzölió ni nabága'gaca dul-la', en biti' núnbe'gaca le naca tsahui', ate' ichúguié' Dios quéguequi ilatigaca. <sup>9</sup> Nabága'gaquié' dul-la' tu' cabí ta'yéajlé'ë neda'. <sup>10</sup> Biti' núnbe'gaquié' le naca tsahui' tu' ilútié' neda', ate' huöja' ga zoë' Dios Xuz, Bönni' na' náquié' tsahui', ate' bíti'rö ila'lé'ené' neda'. <sup>11</sup> Ichúguié' Dios quégaequié' ilátié' tu' chiguchúguié' que tu' xihui' nu rinná be'e bönachi yödzölió ni.

<sup>12</sup> Ia'zica' zián didza' ré'ënda' gü'ilenä' libi'ili', pero biti' gaca tséajni'ili' na'a. <sup>13</sup> Cate' guídë' Dios Bö' Lá'ayi, Bönni' na' ru'ë didza' idútë li, Lë' usediné' libi'ili' yúgu'të le naca idútë li na', tu' cabí gu'ë didza' rácasö queé', pero gu'ë yúgu'të didza' na' yönnë' ru'ë Xuza', en guné' ga inözili' yúgu'të le ral-la' gaca. <sup>14</sup> Lë' guné' neda' bal, tu' si'ë le nequi quia', en guné' ga inözili' le. <sup>15</sup> Yúgu'të le nequi queé' Dios Xuz nequi quia'. Que lë ni na' gunnía' si'ë le nequi quia', en guné' ga inözili' le.

### *Yöl-la' risébi ladxi' queéli' huöáca yöl-la' rudzeja*

<sup>16</sup> Gunné' ca' Jesús:

—Yetú chí'ido'osö, en bíti'rö ilé'eli' neda', ate' ia'tú chí'ido'osö ca' ulé'eli' neda', tu' huöja' ga zoë' Dios Xuz.

<sup>17</sup> Ni'irö bönni' usëda queé' gulé luzá'agaquié' tuë' ia'túë', ta'nné':

—¿Bizxi rnna didza' ni rë' rë'u? Rnné': "Ia'tú chí'ido'osö, en bíti'rö ilé'eli' neda', ate' ia'tú chí'ido'osö ca' ulé'eli' neda', en naca tu' huöja' ga zoë' Dios Xuz."

<sup>18</sup> Ni'irö gula'nné':

—¿Bizxi caz ré'ëni inná didza' ni, gunné': "Ia'tú chí'ido'osö"? Biti' réajni'itu' didza' ni ru'ë.

<sup>19</sup> Réquibe'ené' Jesús té'ënné' ila'nábiné' Lë', ate' rë' légaquié':

—¿Naru' rinábitsö luzá'ali' ca naca que didza' na' bë'a, gunnía': Ia'tú chí'ido'osö, en bíti'rö ilé'eli' neda', ate' ia'tú chí'ido'osö ca' ulé'eli' neda'? <sup>20</sup> Le nácatë rea' libi'ili': Códxili', en isébi ládxi'li', pero bönachi yödzölió ni ulu'dzeja cate' iluti neda'. Ni'irö sal-la' isébi ládxi'li', yöl-la' risébi ladxi' queéli' huöáca yöl-la' rudzeja cate' ulé'eli' neda'. <sup>21</sup> Tu nigula cate' chizóa gáljabí' bí'ido' queénu, rigu'i rizáca'nu, tu' chibidxín dza queénu, pero cate' chizóabi' tubi' bi'i bönni'do' queénu, bíti'rö röjnenu lë na' butságanu, tu' rudzéjanu tu' chigúlajbi' tubi' bi'i bönni'do' yödzölió ni. <sup>22</sup> Lësca' caní raca queéli', risébi ládxi'li' na'a, pero huöda' uduyúa' libi'ili', ate' ní'irö udzeja ládxi'li', ate' biti' séqui'në' nu bönni' ugúë' yöl-la' rudzeja queéli' na'.

<sup>23</sup> Dza ní'irö biti' bi inábili' neda'. Le nácatë rea' libi'ili': Yúgu'të le inábili' Dios Xuz, en ugunli' dxin La' neda', Lë' gunné' queéli'. <sup>24</sup> Ga ridxitné na'a dza biti' rugunli' dxin La' neda' cate' bi rinábili'-në' Dios Xuz. Guli'naba caní, ate' idéli'li' lë na' inábali', para gaca idú yöl-la' rudzeja queéli'.

*Ridéli'né' Jesucristo lu le raca yödzölió ni*

<sup>25</sup> Gunné' ca' Jesús:

—Yugu' lë na' chibélena' libíili' didza' bucúdzu'a didza'. Huadxín dza cate' bíti'rö güí'ilena' libíili' didza' le rucúdzu'a didza', pero yálaçdo' güí'ilena' libíili' didza' ca naca queé' Dios Xuz. <sup>26-27</sup> Dza na' inábili'-në' Dios, en ugunli' dxin La' neda', ate' rea' libíili', biti' gun bayudxi gáta'yua' lahuë' Dios Xuz uláz queéli', tu' nadxí'iné' Lë cazé' Dios Xuz libíili'. Nadxí'iné' libíili' tu' nadxí'ilí' neda', en réajlé'ëli' birúaja' ga zoë' Dios. <sup>28</sup> Birúaja' ga zoë' Dios Xuz, en bidxina' yödzölió ni. Ia'tú ca', ucá'ana' yödzölió ni, ate' huöja' ga zoë' Dios Xuz.

<sup>29</sup> Ní'irö yugu' bönni' usëda queé' gulé' Lë', ta'nné':

—Na'a ru'u didza' yálaçdo', en bíti'rö rucúdzu'u didza'. <sup>30</sup> Na'a réquibe'etu' nöz quézinu' Li' yúgu'të, en biti' run bayudxi nu bi inabi yudxi Li', tu' riguíxjöi'nu' netu' le si' inábatu'. Que lë ni na' réajlé'ëtu' birúaju' ga zoë' Dios.

<sup>31</sup> Bubi'ë didza' Jesús, rë' légaquie':

—¿Naru' réajlé'tsali' neda' na'a? <sup>32</sup> Buli'yú, huadxín dza, en chiridxín dza na', cate' gásilasili' que queéli', en ucá'anali' neda' tuza', pero biti' soa' tuza', tu' zóalen cazé' Dios Xuz neda'. <sup>33</sup> Yugu' didza' ni chigudxa' libíili' para cuéqui dxi ládzi'li', tu' nácali' quia' neda'. Lu yödzölió ni gaca queéli' le usaca' zi' libíili', pero buli'tipa ládzi'li'. Neda' chibideli'da' lu le raca yödzölió ni.

## 17

*Jesús rinábiné' Dios gácalené' nupa dá'gaca Lë'*

<sup>1</sup> Cate' budxi bë'ë Jesús yugu' didza' ni, guchisa lahuë', ruyúë' yehua' yubálö, ate' rnné':

—Dios Xuz, chibidxi dza. Ben ga ilá' lahui yöl-la' zxön quia' neda', Zxi' inu', para gaca guna' ga ilá' lahui yöl-la' zxön quiu' Li'. <sup>2</sup> Ben caní tu' chinudödu' lu na'a yöl-la' unná bë' para inná bë'eda' yúgu'të bönachi, en gu'a yöl-la' na'bán idú quégaca yúgu'të nupa na' chibennu' quia'. <sup>3</sup> Lë ni naca yöl-la' na'bán idú na', tu' núnbë'gaquie' Li', nacu' la's dui Dios idú, en tu' núnbë'gaquie' ca' neda', Jesucristo, ate' Li' nasól-lu'u neda'.

<sup>4</sup> Neda' chibena' ga nalá' lahui yöl-la' zxön quiu' yödzölió ni, en chibudxi bena' dxin na' budödu' lu na'a. <sup>5</sup> Na'a, Xuz, ben ga ilá' lahui yöl-la' zxön napa' tsözxön len Li', para gaca quia' yöl-la' zxön guta' quia' tsözxön len Li' dza ni'te quez cate' si' gata' yödzölió.

<sup>6</sup> Chibulu'a lahui le nacu' Li' lógaquie' bönni' ni bennu' quia', nupa na' gurö cazu' Li' ladaj bönachi yödzölió. Guléquiné' bönni' ni quiu', ate' bennagacu'-në' quia', ate' tuné' ca rnna xtídzu'u. <sup>7</sup> Na'a nőzguequiné' yúgu'të lë na' bennu' quia' zá'gaca lu no'o Li', <sup>8</sup> tu' chibudöda' lu ná'agaquie' didza' na' budödu' Li' lu na'a neda', ate' légaquie' nazi' lu ná'agaquie' le, en téquibe'ené' birúaja' ga zu' Li', ate' ta'yéajlé'ë Li' nasól-lu'u neda'.

<sup>9</sup> Neda' ráta'yua' Lo' gácalenu' légaquie'. Ráta'yua' Lo', calëga gácalenu' yúgu'të bönachi yödzölió, pero gácalengacu'-në' bönni' ni chibennagacu'-në' quia', tu' néquiguequiné' quiu'. <sup>10</sup> Yúgu'të nupa néquiguequi quia' néquiguequi ca' quiu', ate' nupa na' néquiguequi quiu' néquiguequi ca' quia', ate' ca nácagaca nupa na' rulu'i lahui yöl-la' zxön quia'.

<sup>11</sup> Na'a, bíti'rö ugá'ana' yödzölió ni, pero yugu' bönni' ni ulu'gá'anë' yödzölió, ate' neda' udusóalena' Li'. Xuz Lá'ayi, len yöl-la' huáca quiu' ben chi'i nupa ni chibennu' quia', para iláçagaca tuz, ca na' nácaru' rë'u tuz. <sup>12</sup> Cate' ni' guzóalena' légaquie' yödzölió ni, ben chi'igaca'-në', buguna' dxin yöl-la' huáca na' bennu' quia'. Nupa na' bennu' quia', ben chi'igaca'-në', ate' nitüé' biti' bunítia'-në', pero tuzë' bönni' na' náquië' ca zxí'ini tu' xihui', en narugu queé' gátië' tsaz. Caní raca ca nazúaj lu guichi lá'ayi.

<sup>13</sup> Na'a udusóalena' Li', ate' tsanni ni zoa' yödzölió ni, ruá'a yugu' didza' ni para gaca idú yöl-la' rudzeja quégaquei' ca na' raca quia' neda' yöl-la' rudzeja. <sup>14</sup> Neda' chibudöda' lu ná'agaquie' xtídzu'u, ate' bönachi yödzölió ni tu'zóa légaquie' tsölä'alö tu' cabí nácagaquie' tuz len léguequi, ca na' naca quia' neda', biti' naca' tuz len bönachi

yödzölió ni. <sup>15</sup> Ráta'yua' Lo', caléga cúagacu'-në' vödzölió ni, pero gun chí'igacu'-në', para cabí ila'dzunë' lu na' tu' xihui'. <sup>16</sup> Biti' nácagaquië' tuz len bönnachi vödzölió ni ca na' naca quia' neda', biti' naca' tuz len bönnachi vödzölió. <sup>17</sup> Guléaj quez quiu' légaquië', ugunu' dxin le naca idútë li. Le naca idútë li na' naca xtídz'u. <sup>18</sup> Ca na' benu' Li', gusól-lu'u neda' ladaj bönnachi vödzölió. <sup>19</sup> Tu' nadxi'igacada'-në' rudödi cuina' quiu', para ulu'rúajë' ca' légaquië' quez quiu' tu' nazí' lu ná'agaquië' le naca idútë li.

<sup>20</sup> 'Ráta'yua' Lo', caléga quégacasë' bönni' ni, pero lësca' quégasquië' bönni' ni' ila'yéajlë' neda' ni'a que didza' ilu'ë bönni' ni. <sup>21</sup> Ráta'yua' Lo' gunu' ga ilácagaquië' tuz yúgu'të', en ilácagaquië' ca' tuz len rë'u, ca na' nacu' Li', Xuza', nacu' tuz len neda', ate' neda' ca', naca' tuz len Li'. Caní ral-la' ilácagaquië' para ila'yéajlë' ia'zíca'rö bönnachi vödzölió ni, Li' caz gusól-lu'u neda'. <sup>22</sup> Yöl-la' zxön na' bennu' quia', neda' bë'a ca' quégasquië', para ilácagaquië' tuz, ca na' nácaru' tuz rë'u. <sup>23</sup> Li' nacu' tuz len neda', ate' neda' naca' tuz len légaquië', para gaca idú ca nácagaquië' tuz, en caní iléquibe'e ia'zíca'rö bönnachi vödzölió ni, Li' caz gusól-lu'u neda', ate' nadxi'igacanu'-në' ca na' nadxi'inu' neda'.

<sup>24</sup> Xúza'do', rë'ënda' ila'cuá'lenë' neda' bönni' ni bénnergacu'-në' quia' ga na' tsöjsóa', para ila'lé'enë' yöl-la' zxön na' bennu' quia' dza ni'te cate' si' gunu' vödzölió tu' nadxi'inu' neda'. <sup>25</sup> Xuza' tsahui', bönnachi vödzölió ni biti' núnbe'gaca Li', pero neda' nunbe' caza' Li', ate' yugu' bönni' ni chinóziguequinë' Li' caz gusól-lu'u neda'. <sup>26</sup> Bena' ga nóziguequinë' le nacu' Li', en gunra' ca' ga ila'nózinë' lë ni para ca na' nadxi'inu' Li' neda', lësca' caní ila'dxi'i luzá'agaquië', ate' gaca caza' tuz len légaquië'.

## 18

### Ta'zönë' Jesús

(Mt. 26:47-56; Mr. 14:43-50; Lc. 22:47-53)

<sup>1</sup> Cate' budxi bë'ë Jesús yugu' didza' ni, birúajë' ni', ate' sa'yéajlenë' yugu' bönni' usëda queë'. Gudöde' ia'tsölá'a yegu Cedrón, en bidxinë' ga ni' nacuá' yaga olivo ca', ate' lataj ni guyázalenë' yugu' bönni' usëda queë'. <sup>2</sup> Lësca' Judas, bönni' na' udödë' Jesús, núnbe'ë la' yëla na', tu' butubë' Jesús yugu' bönni' usëda queë' ni' zián luzuí. <sup>3</sup> N'irö guchë'ë Judas tu cö' bönni' rójáquië' gudil-la, en yugu' bönni' ni'a ná'agaquië' bixúz unná bë', en ni'a ná'agaquië' yugu' bönni' yudo' fariseo, ate' yójáquië' ga ni' zoë' Jesús, nuá'agaquië' yugu' gu'ë yöri, en yugu' le tu'dí'inë'. <sup>4</sup> N'irö, tu' nózinë' Jesús yúgu'të le ral-la' gaca queë', birúajë' ga ni' zoë', en rë' légaquië':

—¿Nuzxi riguíljali?

<sup>5</sup> Bulu'bí'ë didza', të' Lë':

—Jesús, bönni' Nazaret, riguíljatu'-në'.

Jesús rë' légaquië':

—Neda' caz.

Judas, bönni' na' rudödë' Jesús lu ná'agaquië', zóalenë' légaquië'. <sup>6</sup> Cate' Jesús gudxë' légaquië': "Neda' caz", n'irö bulu'bíguë'ë cusi zxanlö, en gula'dzö'ë lu yu. <sup>7</sup> Jesús gunábinë' légaquië' leyúbölö, rnnë':

—¿Nuzxi riguíljali?

Të' Lë':

—Jesús, bönni' Nazaret, riguíljatu'-në'.

<sup>8</sup> N'irö bubi'ë didza' Jesús, rnnë':

—Chigúdxa' lib'ili: Neda' caz. Channö riguíljali' neda', guli'gü'ë-gáquië' lataj tsöjhuój-gaquië' bönni' ni.

<sup>9</sup> Caní gunné' Jesús para idxín didza' na' bë'ë, gunné': "Nupa ni bennu' quia', nitúë' biti' bunítia'-në'." <sup>10</sup> N'irö, tu' nu'ë Simón Pedro tu guíë tuchi', gulecjë' le, en bentë'

hué' Malco, tu bönni' huen dxin queé' bixúz lo, guchúguié' guídi náguié' ibëla bönni' na'.  
**11** Ni'irö Jesús rë' Pedro na':

—Bugú' u guíë tuchi' quiu' lidxi. ¿Naru' cabí ral-la' quí'i saca' a lë na' chinunë' Xuza' ca gaca quia'?

*Ridxinë' Jesús lahuë' bixúz lo*

(Mt. 26:57-58; Mr. 14:53-54; Lc. 22:54)

**12** Yugu' bönni' na' rójáquié' gudil-la, en bönni' na' nacu'ë lu né'ë, enca' yugu' bönni' ni'a ná'agaquié' bönni' judío unná bë' gula'zönë' Jesús, en gulúgui'ë Lë'. **13** Ni'irö gula'chë'ë Lë' zí'alö lahuë' Anás, tu' náquié' xto' zxí'inë' Caifás, bönni' náquié' bixúz lo iz na'. **14** Náquié' Caifás bönni' na' buzéajni'inë' yugu' bönni' judío unná bë', bulu'ìnë' légaquié' dxí'arö gaca gátië' tuzë' bönni', en calëga initi idútë yödzö quégaquié'.

*Rnnë' Pedro: "Biti' núnbe'a-në' Jesús"*

(Mt. 26:69-70; Mr. 14:66-68; Lc. 22:55-57)

**15** Simón Pedro, en ia'túë' bönni' usëda queë' Jesús yójáquié' cùdzu'lë' Lë', söjnógaquié' Lë'. Bönni' usëda ni guyázalenë' Jesús lò'a que lidxi bixúz lo, tu' núnbe'ë bixúz lo na' lë'.

**16** Bugá'anë' Pedro ni'ilö ga nu riyaza lò'a na'. Que lë ni na' burúajé' bönni' usëda na' núnbe'ë bixúz lo lë', ate' bë'lenë'-nu didza' nigula na' run chí'inu ga nu riyaza lò'a na', ate' benë' ga guyázië' Pedro lò'a. **17** Ni'irö nigula na' run chí'inu ga nu riyaza lò'a rënu Pedro, rnnanu:

—¿Naru' cabí do'o ca' li' bönni' ni?

Bubi'ë didza' Pedro, rnnë':

—Calëga neda'.

**18** Tu' run ziaga, yugu' bönni' huen dxin, en yugu' bönni' ni'a ná'agaca böñachi yudo' nabéquigaquié' guí', ate' zuíguequinë' ra' guí' na', en tu'tsé'e cuíngaqueié'. Lësca' Pedro zuílenë' légaquié', rutsë'e cuinë'.

*Bixúz lo rinabi yúdxinë' Jesús*

(Mt. 26:59-66; Mr. 14:55-64; Lc. 22:66-71)

**19** Ni'irö gunabi yúdxinë' bixúz lo Jesús para inózinë' nupxi dá'gaca Lë', en nacxi naca le rusedinë' Jesús böñachi. **20** Bubi'ë didza' Jesús, rë' lë':

—Lahui' lo bë'lena' yúgu'të böñachi didza'. Buseditiqui'sida' légaquié' gapa naca lu yu'u ga tu'dubé' tu'sédë' queë' Dios, enca' chila yudo', ga ni' tu'dubé' yúgu'të bönni' judío, en biti' bi didza' bë'a bagáchi'sö. **21** ¿Bizx que rinabi yúdxinu' neda'? Gunabi yudxi nupa ni' bila'yöni didza' bë'lena' léguequi. Nózguequi quézinë' bönni' na' didza' na' bë'lena' légaquié'.

**22** Cate' budxi bë'ë Jesús didza' ni, tu bönni' ni'a ná'agaca böñachi yudo' gudápë'ë ru'ë Jesús, rnnë':

—¿Naru' caní rubi'itsø' didza' lahuë' bixúz lo?

**23** Bubi'ë didza' Jesús, rë' lë':

—Channö biti' gunnía' dxí'a, gudixjö' bízxilö didza' bë'a biti' naca dxí'a, en channö guca dxí'a didza' bë'a, ¿bizx que na' gudápu'u neda'?

**24** Ni'irö Anás na' gusöl-lë'ë Jesús náguë'ë, ate' bulu'sudxinë' Lë' lahuë' Caifás, bönni' náquié' idú bixúz lo.

*Leyübölö rnnë' Pedro: "Biti' núnbe'a-në' Jesús"*

(Mt. 26:71-75; Mr. 14:69-72; Lc. 22:58-62)

**25** Cate' ni' zuínë' Pedro ra' guí' rutsë'e cuinë', yugu' bönni' nacu'ë ni' gulé' lë', ta'nné':

—¿Naru' cabí do'o ca' li' Jesús na'?

Gudá'baguié' Pedro, rnnë':

—Calëga neda'.

**26** Zoë' ni' tu bönni' huen dxin queë' bixúz lo, náquié' di'a dza queë' bönni' na' Pedro guchúguié' guídi náguié', ate' bönni' huen dxin na' rë' Pedro:

—¿Naru' cabí bilé'e quézida' li' la' yëla ni', dzagu'-në' Jesús?

<sup>27</sup> Leyúbölö gudá'baguië' Pedro, ate' la' guródxiteba' böra.

*Ridxinë' Jesús lahuë' Pilato*

(Mt. 27:1-2, 11-14; Mr. 15:1-5; Lc. 23:1-5)

<sup>28</sup> Ní'irö gula'chë'ë Jesús, en bulu'zé'ë lidxë' Caifás na', ate' bila'dxinë' yúlahui' queë' bönni' yu'u lu në'ë uláz que yödz Roma, le nazi'i le Pretorio. Chizá' rení' dza na', ate' biti' gula'yázië' yugu' bönni' judío yúlahui' na', tu' téquinë' ila'bágue'ë xíguia' channö ila'yázië' ni', le gun ga biti' gaca ilahuë' xtsö' Laní Pascua, laní na' tu'subanë' ca benë' Dios, bubéaje' böñachi Israel luyú Egipto. <sup>29</sup> Ní'irö birúajé' Pilato, bönni' na' yu'u lu në'ë, en bidxinë' ga na' nacu'ë, ate' rë' légaquië':

—¿Bizxi ruzégu'i li'-në' bönni' ni didza'?

<sup>30</sup> Bulu'bi'ë didza', të' lë':

—La'tu' cabí nu'ë bönni' ni dö', biti' udöditu'-në' lo'.

<sup>31</sup> Ní'irö Pilato rë' légaquië', rnnë':

—Libí'i cázali' guli'chë'ë, en buli'chi'a buli'sörö Lë' ca rinná bë' xibá queëli'.

Yugu' bönni' judío të' lë', ta'nné':

—Biti' dë lu na'tu' nu gútitu'.

<sup>32</sup> Caní guca para idxín xtídzë'ë Jesús, le bë'ë naca ral-la' gátië'. <sup>33</sup> Ní'irö buázië' Pilato yúlahui' na', ate' bulidzë' Jesús, en rë' Lë':

—¿Nacu' Li' Bönni' Rinná Bé'enë' Bönachi Judío?

<sup>34</sup> Bubi'ë didza' Jesús, rë' lë':

—¿Naru' rácassö quiu' rnno' caní, o gulé böñachi li' caní ca naca quia'?

<sup>35</sup> Pilato rë' Lë':

—¿Naru' réquitsenu' naca' judío? Yugu' bönni' uládz quiu', en yugu' bixúz unná bë' bulu'dödë' Li' lu na'a. ¿Bizxi caz benu'?

<sup>36</sup> Ní'irö bubi'ë didza' Jesús, rë' lë':

—Rinná bë'a neda', pero caléga ca ta'nná bë' böñachi yödzölió ni. La'tu' rinná bë'a ca ta'nná bë' böñachi yödzölió, ila'dil-lë' bönni' dá'gaquië' neda', para cabí ilu'ë lataj nu udödi neda' lu ná'agaquië' bönni' judío. Ca rinná bë'a neda' biti' naca ca ta'nná bë' böñachi yödzölió ni.

<sup>37</sup> Ní'irö Pilato rë' Lë':

—¿Nácatso' bönni' rinná bë'ë?

Bubi'ë didza' Jesús, rë' lë':

—Naca' ca na' rnno'. Que lë ni na' bida' ga gulja' yödzölió ni, para guna' ba nalí que le naca idútë li. Yúgu'të nupa ni tun le naca idútë li tu'zé nágagaca didza' ruá'a.

<sup>38</sup> Pilato rë' Lë':

—¿Bizxi na' le naca idútë li?

*Ta'chúguië' queë' Jesús gátië'*

(Mt. 27:15-31; Mr. 15:6-20; Lc. 23:13-25)

Cate' budxi gunné' Pilato caní, burúajé' leyúbölö ga na' nacu'ë bönni' judío unná bë' na', en rë' légaquië':

—Biti' bi dö' ridzólida' nu'ë bönni' ni. <sup>39</sup> Libí'ili' dë tu le nulaga loli' runli' cate' raca Laní Pascua ni, rinábili' neda' usana'-në' queëli' tuë' bönni' nadzunë'. ¿Ré'ënili' usana'-në' queëli' Bönni' Rinná Bé'enë' Bönachi Judío?

<sup>40</sup> Ní'irö yúgu'të gulu'ë zidzaj didza' leyúbölö, ta'nnë':

—¡Caléga bönni' ni, pero Barrabás usanu'-në' queëtu'!

Barrabás na' náquië' gubán.

## 19

- <sup>1</sup> Ní'irö Pilato guché'ë Jesús, en benë' ga gula'guínë' yugu' bönni' röjáquië' gudil-la Lë'.  
<sup>2</sup> Bönni' röjáquië' gudil-la na' gulunë' tu bregui' ni'a në'e yötsi', ate' bulu'dxië' le icjë' Jesús, en bulu'gácuë' Lë' tu lari' tunna xiná chul-la ca naca le tácuë' bönni' ta'nná bë'ë.  
<sup>3</sup> Ní'irö gula'bigüe'ë lahuë' Jesús, en té' Lë':  
—¡Bica' bo' Li', Bönni' Rinná Bé'enë' Bönachi Judío!  
Ní'irö gula'gápë'ë lahuë'.  
<sup>4</sup> Ní'irö burúajë' Pilato, en rë' yugu' bönni' judío unná bë', rnnë':  
—Buli'yú, rubéaja'-në' loli' ni para inózili' biti' bi rudzólida' le naca dö' nu'ë bönni' ni.  
<sup>5</sup> Ní'irö birúajë' Jesús, dxía icjë' bregui' ni'a në'e yötsi' na', en nácuë' lari' tunna xiná chul-la na'. Pilato rë' légaquië':  
—Ni zoë' bönni' ni.  
<sup>6</sup> Cate' yugu' bixúz unná bë', en yugu' bönni' ni'a ná'agaquië' bila'lé'enë' Jesús, zidzaj gulu'ë didza', ta'nné':  
—¡Budé'ë lë'e yaga cruz! ¡Budé'ë lë'e yaga cruz!  
Pilato rë' légaquië':  
—Libí'i cázali' guli'chë'ë, en guli'tsöjdé'ë lë'e yaga cruz. Neda' biti' bi dö' budzólida' nu'ë bönni' ni.  
<sup>7</sup> Ní'irö bönni' judío na' té' lë':  
—Dë queétu' tu xibá, ate' rinná bë' xibá queétu' na' ral-la' gátië' bönni' ni tu' gunné' náquie' Zxi'inë' Dios.  
<sup>8</sup> Cate' biyönnë' Pilato didza' ni, gúdxirönë'. <sup>9</sup> Leyúbölö buázië' yúlahui' na', en rë' Jesús:  
—¿Gázxite bönni' Li'?  
Biti' bi didza' bubi'ë Jesús.  
<sup>10</sup> Ní'irö Pilato rë' Lë':  
—¿Naru' cabí ubí'itso' didza', quíxjöi'inu' neda'? ¿Naru' cabí nözinu' dë lu na'a udá'a Li' lë'e yaga cruz, en dë lu na'a usana' Li'?  
<sup>11</sup> Bubi'ë didza' Jesús, rë' lë':  
—Biti' bi dë lu no'o gunu' quia' la'tu' cabí nudödë' Dios yöl-la' unná bë' na' lu no'o. Que lë ni na', bönni' na' budödë' neda' lu no'o nabága'rë' xíguia' ca li'.  
<sup>12</sup> La' ní'isö rizóa ribö'ë Pilato usanë' Jesús, pero gulu'ë zidzaj didza' bönni' judío unná bë', ta'nné':  
—Channö usanu'-në' bönni' ni, biti' ridzagü'-në' dxí'a César, bönni' rinná bë'enë' idútë yödzölió. Nu bönni' run cuinë' bönni' rinná bë'ë, ridá'báguë'ë César na'.  
<sup>13</sup> Cate' biyönnë' Pilato didza' ni, gunná bë'enë' nupa diguá'gaca Jesús, ate' gurö'ë xilatjë' ga ruchi'a rusöröë', lataj na' nazí'i le Lö'a Ga Zxóagaca Guiójta'a, en ca naca didza' hebreo nazí'i le Gabata. <sup>14</sup> La' dza ná'asö naca dza si' idxín Laní Pascua, en naca idú hua gubidza. Ní'irö Pilato gudxë' yugu' bönni' judío unná bë' na', rnnë':  
—Ni zoë' bönni' rinná bë'enë' libí'ili'.  
<sup>15</sup> Gulu'ë zidzaj didza', ta'nné':  
—¡Bétië! ¡Bétië! ¡Budé'ë lë'e yaga cruz!  
Pilato rë' légaquië':  
—¿Rinábitseli' neda' udá'a-në' lë'e yaga cruz bönni' rinná bë'enë' libí'ili'?  
Bulu'bi'ë didza' bixúz unná bë', ta'nné':  
—Cúnturö nu zoa rinná bë'enë' netu'. Tuzë' César rinná bë'enë' netu'.  
<sup>16</sup> Que lë ni na' Pilato budödë' Jesús lu ná'agaquië', para tsöjdá'agaquië' Lë' lë'e yaga cruz. Ní'irö gula'guélë'ë Jesús, en gula'chë'ë Lë' ní'ilö.

*Tu'dé'ë* Jesús lë'e yaga cruz  
(Mt. 27:32-44; Mr. 15:21-32; Lc. 23:26-43)

<sup>17</sup> Birúajé' Jesús ni', nu'ë yaga cruz queé', sa'yéajé' lataj na' nazí'i le Lataj Que Böga' Ícjaru', en ca naca didza' hebreo nazi'i le Gólgota. <sup>18</sup> Bulu'dé'ë Jesús lë'e yaga cruz ni', ate' bulu'dá'lenë' Lë' tsözxón lë'egaca yaga cruz ia'chopé' bönni'. Tsölá'a huéaj ta'dé'ë, ate' Jesús dë'ë gatsaj láhui'lö chopé' bönni' na'. <sup>19</sup> Gusól-lë'ë Pilato tu bönni' nu'ë le buzúajé' lu guichi le buzóë' lë'e yaga cruz icjlé' Jesús, le rnna caní: "Jesús, Bönni' Nazaret, Bönni' Rinná Bé'enë' Bönni' Judío." <sup>20</sup> Bulu'labë' zián bönni' judío didza' ni, tu' zoa ga na' bulu'dé'ë Jesús lë'e yaga cruz gála'sö ra' yödzö, ate' didza' na' nuzúajé' len didza' hebreo, en len didza' griego, en len didza' latín. <sup>21</sup> Yugu' bixúz unná bë' quégäquië' bönni' judío té' Pilato, ta'nné':

—Biti' uzúaju', "Bönni' Rinná Bé'enë' Bönni' Judío." Buzúaj caní: "Bönni' ni gunné": Inná bë'eda' bönni' judío."

<sup>22</sup> Bubi'ë didza' Pilato, rë' légaquië':

—Le chinuzúaja', tsaz chinuzúaja'.

<sup>23</sup> Cate' yugu' bönni' na' röjáquië' gudil-la budxi bulu'dé'ë Jesús lë'e yaga cruz, gu-la'guélë'ë lari' gúcüë'. Gula'béajé' tápalö, tu cö' huéaj guta' que queégaquië'. Gula'guélë'ë ca' lari' guxóá yenë' Jesús, ate' lari' na' biti' nadía, pero naduba tuz ca naduba. <sup>24</sup> Ni'irö yugu' bönni' na' röjáquië' gudil-la gulé luzá'agaquië' tuë' ia'túë', ta'nné':

—Biti' ichúguru' le, pero dxí'arö gaca uyuru' le gaca bë' para inóziru' nuzxi guequi que.

Caní guca, budxín ca nazúaj lu guichi lá'ayi, le rnna:

Gula'guísie' que queégaquië' lari' nacuá',  
en que lari' quia' bulu'yúë' le naca bë'.

Caní guluné' bönni' na' röjáquië' gudil-la.

<sup>25</sup> Xiné'ë Jesús, en nigula zxílanu xiné'ë, en María, nigula queé' Cleofas, en María Magdalena gula'cuá'anu gala' ga na' dë'ë Jesús lë'e yaga cruz. <sup>26</sup> Cate' Jesús bilé'enë'-nu xiné'ë, en bilé'enë' ca' zoë' ni' bönni' usëda queé' na' nadxi'inë', gudxé'-nu xiné'ë:

—Na'a, na' zoë' zxí' inu'.

<sup>27</sup> Ni'irö gudxé' bönni' usëda queé' na':

—Na' zóanu xinó'o.

Bönni' usëda na' benë' ga yöjsóanu lidxé' la' dza ní'isö.

#### *Le guca cate' gutië' Jesús*

(Mt. 27:45-56; Mr. 15:33-41; Lc. 23:44-49)

<sup>28</sup> Gudödi ni, tu' nőziné' Jesús yúgu'të chibóá budzaga lahui, en para udxín le nazúaj lu guichi lá'ayi, gunné':

—Ribidxa' nisa.

<sup>29</sup> Dë ni' tu zxiga' yudzu nupi zi. Ni'irö yugu' bönni' na' röjáquië' gudil-la bulu'gui'jë' nupi zi na' tu le bululu rizzupi nisa, ate' bulu'zóë' le tu lahui gui, en bulu'dé'ë le ru'ë Jesús para xupé'. <sup>30</sup> Budxi gu'ë Jesús nupi zi na', gunné':

—Chinácatë.

Ni'irö buzötaj icjë'. Burúajté bö' naca cazë', gútië'.

#### *Tu bönni' reajë' gudil-la runé'ë yaga tuchi' cuita lë'ë Jesús*

<sup>31</sup> Ni'irö, tu' naca dza si' idxín Laní Pascua na', en tu' cabí ral-la' ulu'gá'ana nupa nátigaca lë'egaca yaga cruz cate' naca dza lá'ayi quégäquië', le naca tu dza lá'ayi zxöntë, que lë ni na' yugu' bönni' judío guláta'yuë' lahuë' Pilato guíë' bönni' röjáquië' gudil-la tsöjtitsjagaquië' xiguichjagaquië' bönni' dá'gaquië' lë'egaca yaga cruz, en ulu'zötjë' légaquië' lë'egaca yaga cruz na'. <sup>32</sup> Que lë ni na' gula'biguë'ë bönni' röjáquië' gudil-la, ate' gula'guítsjë' xiguichjë' bönni' zí'alö, en lësca' caní guluné' queé' ia'túë' bönni' na' dá'lenë' Jesús lë'e yaga cruz. <sup>33</sup> Cate' bila'dxinë' ga na' dë'ë Jesús, en bila'lé'enë' chinátië', biti' gula'guítsjë' xiguichjë'.

<sup>34</sup> Ní'irö tuë' bönni' na' reajë' gudil-la buné'ë yaga tuchi' cuita lë'ë Jesús, ate' la' birúajtë rön, en nisa. <sup>35</sup> Neda', Juan, bilé'eda' lë ni, en runa' ba nalí que, ate' le runa' ba nalí naca idútë li. Nöz quézida' ruá'a didza' idútë li, para tséajlë'ëli' ca' libí'ili' ca naca queë' Jesús. <sup>36</sup> Gulaca yugu' lë ni para budxín le nazúaj lu guichi lá'ayi, le rnna: "Biti' gatsaj nitú dxita yu'ë." <sup>37</sup> Ia'tú le nazúaj ca' lu guichi rnna caní: "Ulu'yúë' bönni' na' bulu'né'ë lë' yaga tuchi'."

### Tu'caché'ë Jesús

(Mt. 27:57-61; Mr. 15:42-47; Lc. 23:50-56)

<sup>38</sup> Gudödi guca yúgu'të lë ni, guyijë' José, bönni' yödzö Arimatea, bönni' dë'ë Jesús, pero bagáchi'sö tu' rádxiné' yugu' bönni' judío unná bë', ate' gunábinë' Pilato gu'ë lë' lataj u'ë Jesús. Pilato bë'ë lë' lataj. Ní'irö bidxiné' José ga na' dë'ë Jesús lë'e yaga cruz, ate' bu'ë Lë'. <sup>39</sup> Lësca' bidxiné' Nicodemo ni', bönni' na' guyijë' zí'alö yöjjýüë' Jesús chi'i dzö'ölö, nu'ë tu le nutsí'i nöri silá' que mirra, en tu le rilá' zxixi, le naca ca tu gayuá' guíë. <sup>40</sup> Ní'irö José, en Nicodemo na' gula'guélë'ë Jesús, en bulu'chóliné' Lë' yugu' lári'do', ate' gula'gu'ë láhuilö lë na' nutsí'i nöri silá' que mirra, en le rilá' zxixi. Guluné' ca nalébiguequinë' tuné' bönni' judío cate' tu'caché'ë tu bönni' nati. <sup>41</sup> Gala' ga na' bulu'dë'ë Jesús lë'e yaga cruz dë tu luyú ga zeaj da' yaga olivo, ate' gatsaj láhui'lö lataj na' zoa tu yeru ba cubi le nadaj lë'e guí'a guiój, yeru ba na' cuntu nu ta'güi'iné'. <sup>42</sup> Lu yeru ba na' gula'gu'ë Jesús tu' dë gála'sö yeru ba na', en tu' naca dza tu'pé'ë bönni' judío que Laní Pascua.

## 20

### Rubanë' Jesús lu yöl-la' guti

(Mt. 28:1-10; Mr. 16:1-8; Lc. 24:1-12)

<sup>1</sup> Cate' chinaca zílado' dza domingo, en ni' naca chul-la, guyéajnu María Magdalena ra' yeru ba na', ate' bilé'enu chinadúa guiójta'a na' busayaj ga nu riyaza yeru ba na'. <sup>2</sup> Ní'irö bőajnu carelö ga zoë' Simón Pedro, dzáguië' lë' ia'túë' bönni' usëda, bönni' na' Jesús nadxi' iné' lë', ate' rënu légaquië':

—Bulu'béajë' Xanru' yeru ba ni', en biti' nözta' gazxi gula'gu'ë Lë'.

<sup>3</sup> Ní'irö bila'rúajë' Pedro, en ia'túë' bönni' usëda na', söjáquië' ra' yeru ba na'. <sup>4</sup> Tsözxón ta'xítë' iropë', pero ia'túë' bönni' usëda na' guxítirië' carelö ca Pedro, ate' zí'alö lë' bidxiné' ra' yeru ba na'. <sup>5</sup> Biyéchuë', en buyúë' lu yeru ba na', ate' bilé'enë' yugu' lári'do' na' bila'röli-në' Jesús, nacuá' ni', pero biti' guyázië' yeru ba na'. <sup>6</sup> Ní'irö bidxiné' Simón Pedro cúdzu'lë' ia'túë' bönni' usëda na', ate' guyázië' lë' yeru ba na', en bilé'enë' lári'do' na' nacuá' ni'. <sup>7</sup> Lësca' bilé'enë' lári'do' na' gula'xóë' icjë' Jesús, biti' dëlen ia'zíca'rò lári'do' na', pero tsölä'alö nudubi quez. <sup>8</sup> Ní'irö guyázië' ca' ia'túë' bönni' usëda na' bidxiné' zí'alö ra' yeru ba na', en bilé'enë' ca na' naca, ate' guyéajlë'ë didza' bë'ë Jesús. <sup>9</sup> Caní guca, tu' cabí ta'yéajni'ininé' le nazúaj lu guichi lá'ayi ca run bayudxi gaca queë' Jesús, ate' ubanë' lu yöl-la' guti. <sup>10</sup> Ní'irö iropë' bönni' usëda na' yöjhuőjgaquië' lídxigaquië'.

### Rulu'i lahuë' Jesús lonu María Magdalena

(Mr. 16:9-11)

<sup>11</sup> Bugá'anamu María ní'ilö ra' yeru ba na', ribödxinu. Tsanni ni' ribödxinu, biyéchunu, buyunu lu yeru ba na'. <sup>12</sup> Bilé'enu chopë' gubáz lá'ayi queë' Dios ni', nácugaquië' lari' chiguichi. Rö'ögäquië' ni', tuë' ícjalö ba na', en ia'túë' xiní'alö ba na' ga ni' gula'gu'ë Jesús. <sup>13</sup> Yugu' gubáz lá'ayi na' té' lënu, ta'nné':

—Nigúlado', ¿bizx que ribödxu'?

Rënu légaquië':

—Tu' bulu'ú'ë Xana', en biti' nözda' gazxi gula'gu'ë Lë'.

<sup>14</sup> Cate' budxi gunnánu caní, buécjanu, en bilé'enu-në' Jesús, zoë' ni', pero biti' réquibe'enu Jesús na'. <sup>15</sup> Ni'irö Jesús gudxë'-nu:

—Nigúlado', ¿bizz que ribödxu'? ¿Nuzxi ruguilju'?

Tu' réquinu náquië' Lë' bönni' rapa chí'ë latja na', rënu Lë':

—Bönni', channö li' bu'u-në', gudíxjöi'i neda' gazxi gulú'u-në', ate' neda' u'a-në'.

<sup>16</sup> Ni'irö Jesús gudxë'-nu:

—María.

Ni'irö buécjanu, en lu didza' hebreo rënu Lë':

—Raboni.

Didza' ni rnna: Bönni' Usedi quia'.

<sup>17</sup> Jesús rë'ë-nu:

—Biti' canu' neda', tu' cabí ruhuépinida' ga zoë' Xuza'. Na'a, guyéaj ga nacu'ë böchi' lutzá'a, ate' yöjödxi-gáquië': "Caní rnnë' Jesús: Huëpa' ga zoë' Xuza', náquië' ca' Xúzili'. Náquië' Dios quia', en Dios queéli'."

<sup>18</sup> Ni'irö guyéajnu María Magdalena na', yöjtíxjöi'inu yugu' bönni' usëda queë' Jesús chibilé'enu-në' Xanru', en ca naca didza' na' gudxë'-nu.

*Rulu'i lahuë' Jesús lógaquië' bönni' usëda queë'*

*(Mt. 28:16-20; Mr. 16:14-18; Lc. 24:36-49)*

<sup>19</sup> Cate' chigul-la la' dza ná'asö, le naca dza risí lo gadxi dza, nudúbigaquië' bönni' usëda queë' Jesús, ate' nayayaj yu'u ga na' nacu'ë tu' tádxinë' bönni' judío unná bë'. Ni'irö bulu'i lahuë' Jesús gatsaj láhui'lö ga na' nacu'ë, en rë' légaquië':

—Guli'zóa dxi ládxi'li'.

<sup>20</sup> Cate' budxi gudxë' légaquië' didza' ni, bulu'inë' légaquië' né'ë, en cuita lë'ë. Ni'irö tu'dzéjanë' yugu' bönni' usëda na' tu' tu'lé'enë' Xanru'. <sup>21</sup> Ni'irö Jesús rë' légaquië' leyübölö, rnnë':

—Guli'zóa dxi ládxi'li'. Ca benë' Xuza', gusól-lë'ë neda', lësca' caní risól-la'a libíili' tsöjenli' xichina'.

<sup>22</sup> Cate' budxi gunnë' caní, bulubë' lógaquië', en rë' légaquië':

—Guli'sí' Dios Bö' Lá'ayi. <sup>23</sup> Núti'tës nu uniti loli', nu na' ben dul-la', chiyú'u yöl-la' runiti lo que, ate' núti'tës nu biti' uniti loli' le, ugá'ana dul-la' que nu na' nun dul-la'.

*Biti' réajlé'ë Tomás*

<sup>24</sup> Tomás biti' zóalenë' légaquië' cate' Jesús buduyüë' légaquië'. Náquië' Tomás tuë' bönni' chínnuë' ni', en tu'ë ca' lë' Bönni' Bilidi'. <sup>25</sup> Gudödi ni' ia'zíca'rë' bönni' usëda na' gulé' Tomás, ta'nné':

—Chibilé'etu'-në' Xanru'.

Tomás rë' légaquië':

—Channö cabí ilé'eda' né'ë ga gunnë' bididaj, en unë'a xibón na'a ga na' guné'gaca bididaj na', en unë'a na'a cuita lë'ë ga na' gunnë' yaga tuchi', biti' ca' tséajlé'a.

<sup>26</sup> Cate' chigudödi ia'xunu' dza, nudúbigaquië' bönni' usëda na' leyübölö lu yu'u, ate' Tomás na' zóalenë' légaquië'. Sal-la' nayayaj yu'u ga na' nacu'ë, bulu'i lahuë' Jesús gatsaj láhui'lö ga na' nacu'ë, en rë' légaquië':

—Guli'zóa dxi ládxi'li'.

<sup>27</sup> Ni'irö Jesús rë' Tomás na':

—Buné' xibón no'o ni, en buyú na'a ni. Buné' no'o cuita lë'a ni, en bíti'rö gaca chopá ládxu'u, pero guyéajlé' neda'.

<sup>28</sup> Ni'irö bubi'ë didza' Tomás, rë' Lë':

—Xána'do', en Dios quia'.

<sup>29</sup> Jesús rë' lë':

—Tomás, tu' bulé'enu' neda', réajlé'u. Bica' ba nupa ni' ila'yéajlé' neda' sal-la' biti' ila'lé'eni neda'.

*Le rë'ëni gun didza' nazúaj lu guichi ni*

<sup>30</sup> Benë' Jesús ziánrō ca' yöl-la' huáca lógaquië' bönni' usëda queë', le cabí nazúajgaca lu guichi ni. <sup>31</sup> Yugu' lë ni nuzúaja' lu guichi para tséajlé'ëli' náquië' Jesús Bönni' na' ru'ë Dios lë' Cristo, Zxf'inë' Dios, en cate' tséajlé'ëli', gata' queëli' yöl-la' na'bán idú tu' réajlé'ëli'-në'.

## 21

*Rulu'i lahuë' Jesús lógaquië' gadxé' bönni' usëda queë'*

<sup>1</sup> Gudödi guca lë ni, leyúbölö bulu'i lahuë' Jesús lógaquië' bönni' usëda queë' ga naca ra' nísado' que Tiberias, ate' caní guca ca na' bulu'i lahuë' lógaquië'. <sup>2</sup> Nudúbigaquië' Simón Pedro, en Tomás, bönni' na' tu'ë ca' lë' Bönni' Bilidi', en Natanael, bönni' yödzö Caná que luyú Galilea, en chopë' bönni' zxí'inë' Zebedeo, en ia'chopë' ca' bönni' usëda queë' Jesús. <sup>3</sup> Simón Pedro rë' légaquië':

—Tseaja' tsöjxöna'-ba' böla.

Të' lë' ia'zíca'rë', ta'nné':

—Guntu' li' tsözxón.

Ní'irö yójáquië', en gula'benë' tu lë'e bárcodo', ate' rëla ni' nituba' böla biti' gula'zönë'-ba'. <sup>4</sup> Cate' chizá' rení', yösöö' Jesús luyú ra' nisa na', pero biti' téquibe'enë' bönni' usëda queë' Jesús Lë' na'. <sup>5</sup> Ní'irö Jesús rë' légaquië':

—Zxf'ina'do', ¿narü' cabí deba' lati' böla queëli'?

Bulu'bí'ë didza', të' Lë':

—Nituba'.

<sup>6</sup> Ní'irö Jesús rë' légaquië':

—Guli'chílaj yöxfaj böla queëli' tsölä'a ibëla barco, ate' söngacali'-ba'.

Ní'irö gula'chiljë' le, ate' bíti'rö guca ulu'béajë' le, tu' naguíraba' böla lë'e yöxfaj böla na'. <sup>7</sup> Ní'irö bönni' usëda na' nadxf'inë' Jesús lë' rë' Pedro, rnnë':

—¡Xanru' na'!

Cate' biyönnë' Simón Pedro, "Xanru' na'", böácuë' lari' gúcuë', tu' nagüë' le zí'alö, ate' guyázië' lu nisa. <sup>8</sup> Bila'dxinë' ia'zíca'rë' bönni' usëda na', tu'sé'ë barco na', suná'ayöjgaquië' yöxfaj ga na' dzö'öba' böla, tu' cabí naca zí'tu' ga dë luyú bidxi. Nácatë ca tu gayuá' löga' ní'aru'. <sup>9</sup> Cate' bila'dxinë' luyú bidxi na', bila'lé'enë' rö'ö tu gu' bo' yalaj ni', en zxóaba' tuba' böla láhuilö, en dë ca' yöta ni'. <sup>10</sup> Jesús rë' légaquië':

—Guli'diguá'a-ba' ni böla na' si' guzxóngacali'-ba'.

<sup>11</sup> Gurenë' Pedro lë'e barco na', ate' gú'uyöjë' yöxfaj na' zaca' luyú bidxi, nalírö-ba' böla zxön, idú tu gayuá' yu' chí'nu-unba'. Sal-la' nácagacaba' böla zián, biti' biröza' yöxfaj na'.

<sup>12</sup> Ní'irö Jesús rë' légaquië':

—Guli'dá gáguli'.

Biti' burúguinë' nitúë' bönni' usëda queë' na' inábinë' Lë', inné': "¿Nuzxi Li?" Nőzguequi quézinë' náquië' Xanru'. <sup>13</sup> Ní'irö gubígui'ë Jesús, en gudélé'ë yöta na', enca' böla na', ate' bë'ë quégaquië'.

<sup>14</sup> Lë ni naca le bunni luzuí bulu'i lahuë' Jesús lógaquië' bönni' usëda queë' gudödi bubanë' lu yöl-la' guti.

*Jesús ru'ilenë' Simón Pedro didza'*

<sup>15</sup> Cate' budxi gulahuë', Jesús rë' Simón Pedro:

—Simón, zxí'inë' Jonás, ¿narü' nadxf'irönu' neda' ca nadxf'iguequinë' bönni' ni neda'?  
Bubi'ë didza' Pedro, rë' Lë':

—Ön, Xan. Li' nöz quézinu' raza ládxa'a Li'.

Jesús rë' lë':

—Bugagu yugu' bö'cu' zxíla'do' quia'.

<sup>16</sup> Jesús rë' lë' le buropi luzuí, rnnë':

—Simón, zxí'inë' Jonás, ¿narü' nadxf'inyu' neda'?

Bubi'ë didza' Pedro, rë' Lë':

—Ön, Xan. Li' nöz quézinu' raza ládxa'a Li'.  
 Jesús rë' lë':  
 —Bugagu yugu' bö'cu' zxila' quia'.  
<sup>17</sup> Jesús rë' lë' le bunni luzuí:  
 —Simón, zxí'iné' Jonás, ¿raza ládxu'u neda'?  
 Buí'inné' Pedro tu' le chibunni luzuí rinabi yúdxiné' lë', gunné': "¿Raza ládxu'u neda'?"  
 Bubi'ë didza' Pedro, rë' Lë':  
 —Xan, yúgu'të nöz quézinu' Li'. Nö'zinu' raza ládxa'a Li'.  
 Jesús rë' lë':  
 —Bugagu yugu' bö'cu' zxila' quia'. <sup>18</sup> Le nácatë rea' li', cate' ni' nacu' ra'bando', rácasö  
 qui' bugacu cuinu', en ca gunnásö quiu' gudó'. Cate' igulu', ulí no'o, ate' nu yúböö  
 ugacu li' lari', en iché' li' ga ni' biti' gué'ënnu' tseaju'.  
<sup>19</sup> Yugu' didza' ni bë'ë Jesús naca bë' naca gátië' Pedro, tsöjté'ë lë'e yaga cruz, para gaca  
 yöl-la' ba queë' Dios. Cate' budxi gunné' caní Jesús, gunné' ca' ia'tú:  
 —Gudá' neda'.  
*Ru'ë didza' Jesús ca gaca queë' bönni' usëda na' nadxi'iné'*  
<sup>20</sup> Buécjë' Pedro, en bilé'ené' söjnáhuë' légaquië' bönni' usëda na' Jesús nadxi'iné' lë'.  
 Náquië' bönni' usëda na' gurö'ë cuita lë'ë Jesús cate' ni' gulahuë', en gudxë' Jesús: "Xan,  
 ¿nuzxi na' udödi Li'?" <sup>21</sup> Cate' Pedro bilé'ené' lë', rë' Jesús:  
 —Xan, ¿bizxi gunë' bönni' ni?  
<sup>22</sup> Jesús rë' lë':  
 —Channö ré'ënda' ugá'anë' bönni' ni ga idxinrö dza huöda', biti' ral-la' cö'u böninga.  
 Gudá'a neda' li'.  
<sup>23</sup> Guzé didza' ni ga nacu'ë böchi'ru' ta'yéajlë'ë Cristo. Téquiné' biti' gátië' bönni' usëda  
 na'. Jesús biti' gudxë' lë' biti' gátië', pero caní gunné': "Channö ré'ënda' ugá'anë' bönni'  
 ni ga idxinrö dza huöda', biti' ral-la' cö'u böninga."  
<sup>24</sup> Bönni' usëda ni naca' neda', Juan. Runa' ba nalí quéguequi lë ni, en nuzúaja' yugu'  
 lë ni lu guichi, ate' nözili' naca idútë li le runa' ba nalí.  
<sup>25</sup> Ziánrö ca' le benë' Jesús. Channö nu uzúaj léguequi lu guichi tu tu, rusaca' quia' biti'  
 guequi yödzölió ni ila'cuá' guichi na' ral-la' nu uzúaj. Ca' caz.

## LE GULUNË' BÖNNI' GUBÁZ NASÖL-LË'Ë CRISTO Los Hechos

*Le guzxi' lu në'ë Dios, isöl-lë'ë Dios Bö' Lá'ayi*

<sup>1</sup> Cate' buzúaja' lu guichi zí'alö, quiu' li', Teófilo, neda', Lucas, buzúaja' yúgu'té le gusí lahuë' runë' Jesús, en rusédinë' <sup>2</sup> ga bidxintë dza buëpë' yehua' yubá. Cate' si' huëpë' Jesús yehua' yubá, dzáguië' Dios Bö' Lá'ayi Lë', gunná bë'ë ca ral-la' ilunë' gubáz queë', yugu' bönni' na' gurö' cazë'. <sup>3</sup> Gudödi gudi'i guzxáquë'ë Jesús, gútië'. Ní'irö bubanë', en bulu'i lahuë' lógaquië' gubáz queë' na'. Bulu'inë' légaquië' zián le gulaca bë' zoë' nabanë', le cabí gaca nu tá'baga'. Zián luzuí bulu'i lahuë' lógaquië' idú ca choá' dza, en bë'lenë' légaquië' didza' ca rinná bë'ë Dios.

<sup>4</sup> Cate' ni' nacu'ë tsözxón, gunná bë'enë' légaquië' cabí ulu'zé'ë Jerusalén. Jesús gudxë' légaquië', rnnë':

—Guli'cöz ni' le guzxi' lu në'ë Xuza' isöl-lë'ë queëli' ca na' chibusiyón quézida' libí'ili'.

<sup>5</sup> Gunnë' ca':

—Le nácaté Juan buquilë' bönachi nisa lu nisa. Na'a biti' tse xidzé gaca queëli' le rulu'i yöl-la' ridila nisa ni, idisóalenë' Dios Bö' Lá'ayi libí'ili'.

*Ruhuëpë' Jesús yehua' yubá*

<sup>6</sup> Ní'irö yugu' bönni' ta'yéajlë'ë Jesús, nudúbigaquië' ni', gula'nábinë' Lë', ta'nnë':

—Xan, ¿naru' gunu' ga ila'nná bë' bönachi Israel leyúbölö dza ni zóaru' na'a?

<sup>7</sup> Jesús gudxë' légaquië':

—Biti' nequi queëli' inózili' bizxi dza o bizxi dzö' gunë' Dios Xuz le nuzóë' lu na' cazë'.

<sup>8</sup> Sí'ili' yöl-la' huáca cate' guídë' Dios Bö' Lá'ayi idisóalenë' libí'ili'. Ní'irö gunli' ba nalí quia' neda' lu yödzö Jerusalén, en idú luyú Judea, en luyú Samaria, en ga idxíntëli' idútë yödzölió.

<sup>9</sup> Cate' budxi bë'lenë' légaquië' didza' ni, tsanni ni' tu'yusë' ca' Lë', la' buépitë' xitsá' ga rö'ö tu böaj le bucache' Lë', ate' bíti'rö bila'lé'enë' Lë'. <sup>10</sup> Tsanni ni' tu'yúë' lúzxibalö cate' ni' buëpë' Jesús, bulu'lui' lógaquië' chopë' gubáz lá'ayi ga na' nacu'ë, nácugaquië' lari' chiguichido'os. <sup>11</sup> Chopë' ni gulé' légaquië', ta'nnë':

—Bönni' Galilea, ¿bizz que ruyuli' lúzxibalö? Lë cazë' Jesús ni si' guzé'ë ga zóali', buëpë' yehua' yubá, lësca' caní huödë' leyúbölö ca na' chibilé'eli'-në' söhuójë' yehua' yubá.

*Ta'böë' Matías para tsázië' xilatjë' Judas*

<sup>12</sup> Ní'irö gula'zé'ë ga na' rö'ö guí'ado' na' nazí'i le Guí'a Yaga Olivo, ate' yöjhuójgaquië' Jerusalén. Guí'ado' ni dë gála'sö ga dë Jerusalén, tsca nazí'gaquië' lataj ta'zé'ë dza lá'ayi quégaquië'. <sup>13</sup> Cate' bulu'dxinë' yödzö ni', gula'benë' ga naca buropi cuía lu yu'u, ga ni' ta'cu'ë Pedro, en Jacobo, en Juan, en Andrés, en Felipe en Tomás, en Bartolomé, en Mateo, en Jacobo, zxí'inë' Alfeo, en Simón, bönni' na' ruí'i ládxë'ë ladzë', en Judas, böchë'ë Jacobo. <sup>14</sup> Yúgu'té bönni' ni tu'lidzë' Dios tsözxón, ate' yugu' böchë'ë Jesús, en María, xiné'ë Jesús, en ia'zíca'rönu nigula ca' núnngaquië' légaquië' tsözxón.

<sup>15</sup> La' dza ná'assö guzuínë' Pedro gatsaj láhui'lö ga nacu'ë böchi' luzá'aru' na' ta'yéajlë'ë Cristo. Gulaca idú ca xópalalaj bönachi nupa nudúbigaca ni'. <sup>16</sup> Pedro gudxë' légaquië', rnnë':

—Böchi' luzá'ado'. Ben bayudxi guca le nazúaj lu guichi lá'ayi, ca na' gunnë' Dios Bö' Lá'ayi dza ni'të, le buzúajë' David lu guichi, ca guca queë' Judas, bönni' na' guché'ë nupa ni' gula'zón Jesús. <sup>17</sup> Judas na' gubábalenë' rë'u, en bénlenë' rë'u tsözxón dxin ni.

<sup>18</sup> Gula'zí'inë' tu la' yëla lazzaj que dö' na' bi'ë bönni' ni. Judas ni gubixë', en biröza' lë'ë,

ate' bila'rúaj yúgu'té le dzö'ö lë'ë. <sup>19</sup> Cate' bila'yöni bönnachi nacuá' Jerusalén lë ni, gulu'ë le la' yëla na' Acéldama, tu didza' hebreo le rnna lu didza' xidza': La' Yëla Rön. <sup>20</sup> Caní guca queë' Judas, ca na' nazúaj lu guichi lá'ayi naz'i le Salmos, le rnna:  
Ugá'ana cá'asö lidxë',  
en biti' idzöli nu soa yu'u na'.

Rnna ca':  
Nu yúbölö tsaza xilatjé'.

<sup>21-22</sup> 'Run bayudxi na'a cöru'-në' tu bönni' gunë' rë'u tsözxón para gunë' ba nalí queë' Jesús, ca guca, bubanë' lu yöl-la' guti. Ral-la' gáquië' bönni' nabábalenë' bönni' ni' gula'cuá'lénë' rë'u dza ni'te cate' ni' Xanru' Jesús gudálenë' rë'u. Gula'sí lógaquië' nacuá'lénë' rë'u cate' ni' buquilé' Juan bönnachi nisa, ga bidxitë dza buëpë' Jesús yehua' yubá, cate' buzé'ë ga zóaru'.

<sup>23</sup> Ní'irö bulu'lü'ë chopë', José, en Matías. José na' lë' ca' Barsabás, en zoa ia'tú lë' Justo.  
<sup>24</sup> Ní'irö bulu'lidzé' Dios, ta'nné':

—Xantu' Dios, numbë' cazu' icja ládxido'gaca yúgu'té bönnachi. Bului'i netu' nulë' chopë' ni chiguró' cazu' Li' <sup>25</sup> para tsázië' lu dxin ni para gáquië' gubáz quiu'. Tsázië' xilatjé' Judas, bönni' ni' bunítië' xilatjé' tu' benë' dul-la', ate' guyijé' xilataj cazé' lataj chul-la'.

<sup>26</sup> Ní'irö bulu'zúajé' yugu' lu guichi lógaquië', tu queë' José, en ia'tú queë' Matías. Bulu'gútsi'në' luzé'eguequi, en bulu'béajé' tu, ate' birúaj le nazúaj lë' Matías. Caní guca, Matías na' gubábalenë' ia'chinéajé' gubáz queë' Cristo.

## 2

### Dios Bö' Lá'ayi ridisóalenë' lógaquië'

<sup>1</sup> Cate' chibidxín dza Pentecostés, nudúbigaquië' tsözxón yúgu'té bönni' ta'yéajlë'ë Cristo. <sup>2</sup> Tsálido'os biyón bö le birúaj lúzxiba, le biyón ca riyón cate' recja bö' budunu', ate' biyón idútë lu yu'u ga na' rö'ögaquië'. <sup>3</sup> Bulu'lü'i lahui yugu' bululu guido' lu bö'ös lógaquië', ate' gula'guísi que queëgaquië'. Bidisóalengaca tu tué'. <sup>4</sup> Caní guca, Dios Bö' Lá'ayi bidisóalenë' yúgu'té', ate' gula'sí lógaquië' tu'ë didza' yúbölö, tsca naca le bë'ë Dios Bö' Lá'ayi que queë' gu'ë didza' yúbölö na'.

<sup>5</sup> Nacu'ë zián bönni' judío yödzö Jerusalén dza na', nácagaquië' bönni' ta'yéaj ládx-i'gaquië' Dios, en zá'gaquië' narúajgaquië' yúgu'té yödzö idútë yödzölió ni. <sup>6</sup> Cate' bila'yönnë' bö na', bulu'dubë' bönni' zián, ate' gula'bö'ë böninga, tu' bila'yönnë', ca naca xtídza'gaquië' que queëgaquië', tu'ë didza' bönni' na' ta'yéajlë'ë Cristo. <sup>7</sup> Gula'ná' badxë' yúgu'té', en bulu'báninë, ta'nné':

—Buli'yútsöca'. ¿Naru' caléga bönni' Galilea yúgu'té bönni' ni tu'ë didza'? <sup>8</sup> ¿Nacxi caz naca riyóniru' tu'ë xtídza'ru' ca naca didza' ru'iru' tu turu'? <sup>9</sup> Rë'u ni nácaru' bönni' zián yödzö, bönni' narúajgaquië'

luyú Partia, en luyú Media, en luyú Elam,  
en luyú Mesopotamia, en luyú Judea, en luyú Capadocia,  
en luyú Ponto, en luyú Asia,

<sup>10</sup> en luyú Frigia, en luyú Panfilia, en luyú Egipto,  
en luyú Africa, ga nácarö zi'tu' ga dë luyú Cirene.

'Lësca' nacu'ë bönni' yödzö Roma ni. Bal-lë' nácagaquië' bönni' judío, en ia'bal-lë' naz'i lu ná'agaquië' le ta'yéajlë'ë bönni' judío Dios. <sup>11</sup> Lësca' nacu'ë ni yugu' bönni' narúajgaquië' Creta, en luyú Arabia. Riyóniru' tu'ë didza' ru'iru' que queéru', ate' ta'guíxjö'ë yugu' le zxön benë' Dios, le tun ga rubániru'.

<sup>12</sup> Caní guca, bulu'báninë yúgu'té', en gula'bö'ë böninga. Gulé luzá'agaquië' tuë' ia'túë', ta'nné':

—¿Bizxi caz lë ni?

<sup>13</sup> Bulu'titjé' bal-lé', ta'nné':  
—¡Ta'zúdxiné'!

*Libán bené' Pedro lógaca böñachi zián*

<sup>14</sup> Ní'irö Pedro guzuílené' ia'chinéajé' gubáz na' nasől-lé'ë Cristo, ate' gusí lahuë' ru'ë zidzaj didza', re' légaquie':

—¡Libí'ili', bönni' Judea, en yúgu'téli' nacuá'ali' yödzö Jerusalén! ¡Lé ni ral-la' inózili'! ¡Buli'zé nágali' le guía' libí'ili'! <sup>15</sup> Netu' ni biti' rizúdxitu' ca na' réquili' libí'ili', tu' ni zóaru' si' gala' xsila, ate' cuntu nu rizudxi hora caní. <sup>16</sup> Lé ni naca le gunné' Joel, bönni' bë'ë didza' uláz queë' Dios, gunné':

<sup>17</sup> Caní rnné' Dios: Lé ni le gaca dza tsöjsétégaca.

Isől-la'a Bö' Lá'ayi quia', tsöjsóalené' yúgu'té böñachi.  
Zx'ini', bönni', en nigula, ilu'ibi' didza' uláz quia' neda'.  
Yugu' bi'i ra'bán ila'lé'ebi' le ulu'a lahui,  
ate' yugu' bönni' gula ila'nené' yéla.

<sup>18</sup> Cate' idxín dza ni' quísia' Bö' Lá'ayi quia',  
tsöjsóalené' huen dxin quia', bönni', en nigula,  
ate' ilu'ë didza' uláz quia' neda'.

<sup>19</sup> Ulu'a lahui lúzziba xitsá' le ilún ga ulu'bani böñachi,  
ate' yödzölió ulu'a lahui le ilaca bë',  
rön, en guí', en dzön ca böaj.

<sup>20</sup> Ichul-la gubidza, ate' gaca beo' xiná ca naca rön.  
Caní gaca cate' idxín dza ni' chibulu'ë Dios.

Gaca dza ni' le catu caz rilé'eru'.

<sup>21</sup> Ulu'lágaca yúgu'té nupa ni' ulu'lidza Lé' Xanru',  
lu yöl-la' réajlë' quéguequi Lé'.

<sup>22</sup> 'Buli'zé nágali' lé ni guía' libí'ili', böñachi Israel. Dios caz bené' bal Jesús, bönni' Nazaret ga zóali'. Dios bë'ë Lé' lataj bené' le tun ga rubániru', yugu' yöl-la' huáca, en le taca bë'. Yúgu'té lé na' bené' Dios lu në'ë Jesús, ca na' chinóz quézili'. <sup>23</sup> Lësca' caní, Dios bë'ë lataj nu budödi Jesús lu ná'ali'. Caní guca, ca na' chigunná ládxé'ë Dios guné', en ca naca le chibucözé' dza ni'te. Libí'i cázali' guzxönli'-në' Jesús, en bëtili'-në' lu ná'agaquie' yugu' bönni' tuá' dö', bönni' gulútié' Lé' cate' ni' bulu'dá'gaquie' Lé' lé'e yaga cruz. <sup>24</sup> Ní'irö Dios caz busubané' Jesús na'. Bubéaje' Lé' lu yöl-la' guti, tu' cabí guca ugá'ané' tsaz lu yöl-la' guti na'. <sup>25</sup> Ca naca lé ni, bë'ë didza' David uláz queë' Dios ca naca queë' Jesús, gunné':

Bilé'etiqu'sida'-në' Xanru', zoë' lahua'.  
Lé' zoë' cuita lé'a ibëla, rizöné' neda',  
para cabí gaca nu bi gun quia'.

<sup>26</sup> Que lé ni na' budzeja ládxá'a,  
ate' lu yöl-la' rudzeja quia' bil-la'.  
Que lé ni na' guna' löza Lé'  
cate' idxín dza gátia'.

<sup>27</sup> Xantu' Dios, nözda' biti' ucá'anu' neda'  
lataj chul-la ga nacuá' nupa nátigaca.  
Biti' gu'u lataj initi idútë le naca'.

Naca' bönni' nadxi'i quézinu' Li'.

<sup>28</sup> Buzéajni'inu' neda' ca ral-la' guna'  
para idéli'da' yöl-la' na'bán idú.  
Gunu' ga udzéjada' tu' zóalen cazu' neda'.

<sup>29</sup> 'Na'a, libí'ili', bócha'a. Naca bë' gútié' xuz xtó'oru' David, en bigáchë'ë yeru ba, ate' ba queë' na' dë ga zóaru' ga ridxitë na'a dza. <sup>30</sup> David na' bë'ë didza' uláz queë' Dios, en

gunőzinë' benë' tsutsu Dios didza' le guzxi' lu në'ë queë', gunë' ga galjë' Cristo ladaj di'a dza queë' si' zá'gaca, ate' Cristo na' inná bë'ë xilatjë' David na'. <sup>31</sup> Tu' bilé'enë' David lë ni zí'älö, bë'ë didza' ca guca, bubenë' Cristo, en ca guca, biti' bugá'anë' lataj chul-la ga nacuá' nupa nátigaca, en biti' guniti le naca cazë'. <sup>32</sup> Dios busubanë' Jesús lu yöl-la' guti, ate' ca guca lë ni yúgu'tetu' runtu' ba nalí que. <sup>33</sup> Caní guca, len yöl-la' huáca queë', Dios buchisë' Lë' xitsá' ga ni' nácatérë' zxön. Na'a, Cristo chigusól-lë'ë Dios Bö' Lá'ayi ni, ate' raca ca na' guzxi' lu në'ë Dios gunë' lu në'ë Cristo, ate' Dios Bö' Lá'ayi na' runë' yugu' lë ni rilé'eli', en riyónili'. <sup>34</sup> Biti' buépë' David na' yehua' yubá, pero lë cazë' David na' gunné': Xanru' Dios gudxë' Xana':

Gurö'i cuita lë'a ibëla ga naca lo

<sup>35</sup> cate' gunra' ga ulu'zechu zxibigaca nupa ta'dá'baga' Li' lo' Li'.

<sup>36</sup> Na'a, bönachi Israel, ral-la' inózili' le nácatë. Dios benë' ga náquië' Lë' cazë' Jesús ni Xanru', en Bönni' Rusólá, bönni' na' budá'alí'-në' lë'e yaga cruz.

<sup>37</sup> Cate' yugu' bönni' ni' bila'yönnë' lë ni, gula'bö'ë böninga, ate' gulé' Pedro, en ia'zíca'rë' bönni' gubáz queë' Cristo, ta'nné':

—Bóchi'ru', ¿nacxi gúntsatu'?

<sup>38</sup> Ni'irö Pedro gudxë' légaquië':

—Buli'bí'i ládxí'lí', en guli'dila nisa tu tuli' lu Lë' Jesucristo para uniti lahuë' Dios dul-la' nabága'li', ate' Dios Bö' Lá'ayi idisóalenë' libí'lí', Nu na' isól-lë'ë Dios. <sup>39</sup> Queéli' nequi le guzxi' lu në'ë Dios, en quégaca zxí'inili', enca' quégaca yúgu'të bönachi izá'a, yúgu'të bönni' ni' ulidzë' Xanru' Dios légaquië'.

<sup>40</sup> Yugu' didza' ni, en ia'bal-la zián didza' benë' ba nalí Pedro, le guchízië' icja nágagaquië', gunné':

—Guli'gún ga uláli', irúajli' ládjagaca bönachi tuá' dö' nacuá' dza ni zóaru' na'a.

<sup>41</sup> Caní guca, gula'dila nisa nupa ni' gula'zí' lu në'eguequi didza' na' bë'ë Pedro. Dza na' ca chi uruá' gayuá' bönachi gulún légaquië' tuz. <sup>42</sup> Gulunë' yúgu'të idútë le bulu'sédinë' gubáz nasól-lë'ë Cristo légaquië'. Guláquië' tuz tuë' len ia'túë', en gulahuë' tsözxön le rusá' ládxí'ru' ca gútië' Jesús, ate' gulunë' tsözxön, bulu'lidzë' Dios.

### *Ca tun bönachi queë' Cristo*

<sup>43</sup> Gulunë' gubáz queë' Cristo zián le run ga rubániru', en zián le taca bë', pero guladxi gula'dzöbi ia'zíca'rò bönachi. <sup>44</sup> Yúgu'të nupa na' ta'yéajlé' Cristo gulaca tuz, ate' bulu'ún tuz yúgu'të le dé quéguequi. <sup>45</sup> Cate' bila'lé'enë' ta'yadzaj nupa nútsa'gaca ládjagacië', ni'irö yugu' bönni' bi dé quégaequië' gulúti'ë le, ate' gula'guisië' dumí na' que queégaca nupa ni' bi ta'yadzaj. <sup>46</sup> Bulu'dubë' tsözxön chila yudo' yugu' dza, ate' gulahuë' le rusá' ládxí'ru' ca gútië' Xanru'. Caní gulunë' gapa naca lu yu'u lídxigaquië'. Gulahuë' tsözxön, ate' bulu'dzéjanë', en gulaca idú ládxí'gaquië'. <sup>47</sup> Gula'gu'ë Dios yöl-la' ba, ate' yúgu'të bönachi gulún légaquië' bal. Buzanë' Xanru' nupa tu'dubi queë', nupa na' tu'lá tu tu dza.

### *Ruhuöáquië' tu bönni' biti' raca së'ë*

<sup>1</sup> Tu dza ni' gula'benë' Pedro, en Juan, söjáquië' tsözxön lu chila yudo', cate' tu'dubi bönachi tu'lidza Dios ni', le naca idú ridödi xihuó. <sup>2</sup> Ga ni' ta'dödë' zoë' tu bönni' biti' raca së'ë dza ni'te ni' náquië' bi'ido'. Yugu' dza röjuá'gaquië' lë' ni', en ta'béquië' lë' ra' yudo' ga nazí'i le Ra' Yu'u Lachi, para inábinë' nu bi unödzjasö queë' ladaj nupa ni' ta'yaza lö'a yudo'. <sup>3</sup> Bönni' ni, cate' bilé'enë' Pedro, en Juan, söjáquië' ta'yázië' lö'a yudo', gúta'yuë' lógaquië' bi ulu'nödzjasë' queë'. <sup>4</sup> Ni'irö bulu'yúë' Pedro, en Juan lë', ate' Pedro gudxë' lë':

—Buyú netu'.

<sup>5</sup> Ní'irö bönni' na' buzëda' náguië' légaquië' tu' runë' löza bi ulu'nödzjasë' queë'.  
<sup>6</sup> Pedro gudxë' lë:

—Biti' dë dumí plata, dumí oro quia', pero le dësö quia' gunna' quiu'. Ni'a que yöl-la' huáca que Lë' Jesucristo, bönni' Nazaret, guyasa, en guzë'e.

<sup>7</sup> Ní'irö gudélë'ë Pedro në'ë ibëla bönni' huë' na', en buchisë' lë', ate' la' böácatë ni'ë, en buguitaj bëchaj ni'ë bönni' na'. <sup>8</sup> Ní'irö guzuínë' bönni' na', ate' guxítì'ë, en guzë'ë. Guyázalenë' tsözxón Pedro, en Juan, lö'a yudo', rizë'e ni'ë, en rixítì'ë, en rigu'ë Dios yöl-la' ba. <sup>9</sup> Yúgu'të bönachi nacuá' ni' ta'lé'e lë' rizë'e ni'ë, en rigu'ë Dios yöl-la' ba. <sup>10</sup> Caní guca, guládxinë', en bulu'báninë ca naca lë na' guca, tu' bulu'únbeë' lë', náquië' bönni' na' ribö'ë ra' yudo' ga nazí'i le Ra' Yu'u Lachi, rinabë' nu bi unödzjasö queë'.

#### *Didza' bë'ë Pedro chila yudo'*

<sup>11</sup> Tsanni ni' bönni' na' biti' guca së'ë, ate' böáquië', zònë' ná'agaquië' Pedro, en Juan, bulu'dubi yúgu'të bönachi ga na' nacu'ë chila yudo' nazí'i le: Chila Queë' Salomón, ate' gula'ná' badxë'. <sup>12</sup> Cate' bilé'enë' Pedro lë ni, gudxë' bönachi na':

—Libi'ili', bönni' Israel, ¿bizx que rubánili' ca naca lë ni? ¿Bizz que ruyuli' netu', en réquitseli' nétu'sö buntu'-në' bönni' ni, en bentu' ga rizë'e ni'ë len yöl-la' huáca queéztu', o ni'a que le reaj ládzi'tu'-në' Dios? <sup>13</sup> Naca lë ni le benë' Dios. Náquië' Dios quégaquië' xuz gudödi queéru' Abraham, en Isaac, en Jacob. Lë cazë' bënterë' bal Jesús, Zxf'inë'. Jesús ni, libi'i cázali' bëtili'-në' lu ná'agaquië' bönni' ta'nná bë'enë' libi'ili'. Cate' gú'unne' Pilato usanë' Jesús, gudá'baga'li'-në'. <sup>14</sup> Buzóali' tsölä'alö Bönni' Tsahui', en Lá'ayi, ate' gunábili'-në' Pilato usanë' queéli' tu bönni' rútië' bönachi. <sup>15</sup> Caní guca, bëtili'-në' Bönni' runna cazë' yöl-la' na'bán idú queéru'. Ní'irö Dios busubanë' Lë' lu yöl-la' guti, ate' ca naca lë ni runtu' ba nalí que. <sup>16</sup> Tu' guyéajlë'ë bönni' ni Jesús, böáca ni'ë. Rilé'eli'-në', en núnbë'eli'-në'. Tu' réajlë'ë Jesús, Lë' bunë' dxí ado' bönni' ni, ate' rilé'eli' yúgu'tëli' le nácatë na'.

<sup>17</sup> 'Na'a, bôcha'a, nözda' benli' caní, bëtili'-në' Jesús tu' cabí guyéajni'ili', en biti' gula'yéajni'inë' bönni' ta'nná bë'enë' libi'ili'. <sup>18</sup> Caní busudxinë' Dios didza' na' bë'ë zí'alö, le gula'nné' bönni' gulu'ë didza' uláz queë' ca ral-la' qui'i sáquë'ë Cristo. <sup>19</sup> Que lë ni na', buli'bí'i ládzi'li', en buli'huóáca queë' Dios, para ugúë' dul-la' nabága'li', en gunë' ga huóáca ládzi'li'. <sup>20</sup> Ní'irö isöll-lë'ë leyúbölö Jesús, Bönni' na' buzóë' dza ni'te para gáquië' Cristo, Bönni' Rö queë', Bönni' na' inná bë'enë' libi'ili'. <sup>21</sup> Na'a, run bayudxi ugá'anë' yehua' yubá ni' cate' idinxnrö dza uduhuénë' tsahui' yúgu'të le raca, en gaca ca na' chigunná cazë' Dios, lë na' gula'nné' bönni' gulu'ë didza' uláz queë', bönni' ni' gula'cu'ë dza ni'te. <sup>22</sup> Lësca' caní Moisés gudxë' xuz xtó'oru', gunné': "Xanru' Dios isöll-lë'ë queéli' tu bönni' galjë' ládjagaca di'a dza queéli'. Gáquië' bönni' gu'ë didza' uláz queë' Dios. Isöll-lë'ë Lë' queéli' ca na' gusöll-lë'ë neda'. Run bayudxi uzé nágali'-në' ca naca yúgu'të le guíë' libi'ili'. <sup>23</sup> Yúgu'të nupa biti' ulu'zé nágagaca bönni' ni' gu'ë didza' uláz queë' Dios ila'niti, en ulu'lá'alen bönachi queë' Dios."

<sup>24</sup> 'Ca naca dza ni zóaru' na'a, gula'guíxjö'ë yúgu'të bönni' gulu'ë didza' uláz queë' Dios ga gudéla'të zoë' Samuel, en gudödi ni'. <sup>25</sup> Libi'ili' nácali' zxí'ini xi'sóagaquië' bönni' gulu'ë didza' uláz queë' Dios, ate' nequi queéli' didza' rucá'ana tsahui', le bénlenë' Dios xuz xtó'oru', cate' ni' gudxë' Abraham: "Ni'a que le gunë' zxí'ini xi'sú' ilaca bica' ba yúgu'të bönachi yödzölió." <sup>26</sup> Cate' Dios busubanë' Zxf'inë' lu yöl-la' guti, gusöll-lë'ë Lë' zí'alö queéli' para gunë' ga gácali' bica' ba, en ucá'anali' le cabí naca dxí'a runli'.

#### *Ta'dxinë' Pedro, en Juan lógaquië' bönni' yudo' tu'chi'a tu'söröë'*

<sup>1</sup> Tsanni ni' bönachi na' tuí'ilenë' Pedro, en Juan, didza', yugu' bixúz judío, en yugu' bönni' yudo' saduceo, en bönni' ta'nná bë'enë' ni'a ná'agaquië' bönni' yudo', bila'dxinë'

tsálido'os ga na' nacu'ë. <sup>2</sup>Gula'lenë' bönni' ni tu' tu'sédinë' Pedro, en Juan, bönachi, en tē' laguequi ulu'bán nupa chinátigaca tu' bubanë' Jesús. <sup>3</sup>Ní'irö gula'zönë' Pedro, en Juan, ate' gula'gu'ë légaquië' lidxi guíë ga idxinxrö dza yúbölö tu' chiridzö' dza na'. <sup>4</sup>Zián nupa ni' bila'yöni didza' gulu'ë Pedro, en Juan, gula'yéajlë' Cristo. Na'a, yugu' bönni' biguiú'sö ta'yéajlë'ë Cristo nácagaquië' idú chi-un gáyu'ë.

<sup>5</sup>Dza buropi ni', yugu' bönni' unná bë', en bönni' gula tu'zéajni'inë' bönachi judío, en yugu' bönni' yudo' usédi, bulu'dubë' lu yödzö Jerusalén. <sup>6</sup>Lësca' Anás, bixúz lo, en Caifás, en Juan, en Alejandro, enca' yúgu'të bönni' di'a dza quégaquië' bixúz lo bulu'dubë' ni'.

<sup>7</sup>Ní'irö duché'gaquië' Pedro, en Juan, ate' bulu'sudxinë' légaquië' gatsaj láhui'lö ga na' nacu'ë, en gula'nábinë' légaquië', ta'nné':

—¿Bizxi yöl-la' unná bë' dë lu ná'ali' runli' lë ni? ¿Nuzxi budödi lu ná'ali' yöl-la' unná bë' ni?

<sup>8</sup>Ní'irö Pedro gudxë' légaquië', zóalenë' Dios Bö' Lá'ayi lë', rnmë':

—Libi'ili', núloli' rinná bë'eli' netu', bönachi Israel, en libi'ili', bönni' gula. <sup>9</sup>Na'a, jrinábitseli' netu' ca naca dxin dxi'a bentu' queë' bönni' huë' ni, en nacxi guca, böáquië' bönni' ni? <sup>10</sup>Riguíxjö'iitu' libi'ili' para ila'nözi yúgu'të bönachi Israel. Zoë' bönni' ni loli', nuhuöáquië' tu' ben dxin yöl-la' huáca queë' Jesucristo, bönni' Nazaret, Bönni' ni' budá'ali'-në' lë'e yaga cruz, pero Dios busubanë' Lë' lu yöl-la' guti. <sup>11</sup>Dios bë'ë didza' ca naca queë' Jesús ni, cate' ni' gunné': "Libi'ili', bönni' rucuá'ali' zö'ö, gurú'unali' guiój na', pero guró' caza' neda' guiój na' para gaca guiójlen zö'ö." <sup>12</sup>Cúnturö nu zoa nu gaca usólá bönachi, tu' cabí zoa yödzölió ni ia'túë' bönni' nuzóë' Dios, nu gaca usólá rë'u.

<sup>13</sup>Cate' bila'lé'enë' nácagaquië' rugu ladxi' Pedro, en Juan, en guléquibe'enë' biti' nazédagaquië' que yudo', en nácagaquië' bönni' cá'asö, bulu'báninë', ate' yöjnéguequinë' Pedro, en Juan na', gula'cuá'lenë' Jesús. <sup>14</sup>Lësca' bila'lé'enë' bönni' na' böáquië', zuínë' lógaquië', ate' biti' guca bi ila'nné' quégaquië'. <sup>15</sup>Ní'irö gula'nná bë'enë' nupa ulu'béaj légaquië' ló'alo yu'u ga na' nudúbigaquië', ate' gulún xtídze'ë la' légacasë'. <sup>16</sup>Gula'nné':

—¿Nacxi gúntsaru' quégaquië' bönni' ni? Le nácatë gulunë' tu le run ga tu'bani bönachi, ate' nózigaca yúgu'të bönachi nacuá' Jerusalén lë ni. Biti' gaca tá'baga'ru' le.

<sup>17</sup>Na'a, para cabí sérö didza', en ila'yöni ziánrö ca' bönachi, uzeru' bach légaquië' para cabí ilui'ilenre' bönachi didza' ca naca queë' Jesús na'.

<sup>18</sup>Ní'irö bulu'lidzë' Pedro, en Juan, ate' bulu'zenë' bach légaquië' para cabí ilui'ilenre' bönachi didza', en para cabí ulu'sédinë' légaquië' ca naca queë' Jesús. <sup>19</sup>Ní'irö bulu'bi'ë didza' Pedro, en Juan. Gulé' légaquië':

—Buli'chi'a buli'sörö libi'ili' channö naca tsahui' lahuë' Dios uzérö nágatu' xtídza'lli' libi'ili' ca xtídze'ë Dios. <sup>20</sup>¡Biti' gaca soa dxitu'! ¡Run bayudxi güí'itu' didza' que le bilé'etu', en le biyónitu'!

<sup>21</sup>Ní'irö yugu'bönni' yudo' tu'chi'a tu'sörö' bulu'zenë' bach légaquië', pero bulu'sanë' légaquië' tu' cabí gula'dzölinë' nacxi ilunë' légaquië' xíguia'. Caní gulunë' tu' guládxinë' le ilún bönachi lu yödzö ni', tu' ta'gú'u Dios yöl-la' ba ni'a que lë na' guca. <sup>22</sup>Bönni' na' böáquië', en guca queë' lë na' run ga rubániru', chiyú'urë' ca choá' iz.

### Ta'nábinë' Dios gunë' ga ilácagaquië' rugu ladxi'

<sup>23</sup>Cate' bönni' yudo' bulu'sanë' Pedro, en Juan, böajgaquië' ga na' nacu'ë luzá'agaquië', ate' bulu'siyönnë' légaquië' yúgu'të lë na' gula'nné' yugu' bixúz unná bë', en bönni' gula tu'zéajni'inë' bönachi judío. <sup>24</sup>Cate' bila'yönnë' lë ni, bulu'lidzë' Dios tsözxöñ, gula'nné':

—Xantu' Dios, jzxöntérö nacu' Li'! ¡Li' nacu' Dios! ¡Benu' lúzxiba! ¡Benu' luyú! ¡Benu' nísado'! ¡Benu' yúgu'të le nacuá' tu tu lataj na'! <sup>25</sup>Uláz quiu' Li' bë'ë didza' David, bönni' huen dxin quiu', ni' zóalenë' Dios Bö' Lá'ayi lë', gunné':

¿Bizx que tun dzatsa bönachi,  
en ta'zá' ládxi'gaca le ruá' dö'?

<sup>26</sup> Yugu' bönni' ta'nná bë'ë yödzölio ni gulún dzatsë', ate' guláquië' tuz bönni' unná bë'. Gula'dá'báguë'ë Xanru' Dios, enca' Cristo, bönni' guró' cazë' Lë'.

<sup>27</sup> 'Le nácatë guláquië' tuz Herodes, en Poncio Pilato, en yugu' bönni' Israel lu yödzö ni. Gula'dá'báguë'ë Jesús, Zxi'inu' lá'ayi, Bönni' na' buzú' queétu'. <sup>28</sup> Gulunë' yúgu'të le bucözü' zí'atélö, en guzxí' lu no'o, ate' guca ca na' benu' tsutsu xtídzu'u ca ral-la' gaca. <sup>29</sup> Na'a, Xantu', buyú le tu'zenë' bach netu', en ben ga gácatu' rugu ladxi', para gü'i'itu' xtídzu'u, netu' bönni' huen dxin quiu'. <sup>30</sup> Ben ga gaca úngacatu' nupa te'e, tu' sóalen yöl-la' huáca quiu' netu', en ben ga gaca gúngacatu' le ilún ga ubánitu', en le ilaca bë'. Gaca caní tu' zóalenë' Jesús, Zxi'inu' lá'ayi, netu'. ¡Ca' gaca!

<sup>31</sup> Cate' budxi bulu'lídze' Dios, guzxizi lataj ga na' nacu'ë, ate' Dios Bö' Lá'ayi guzóalenë' yúgu'të, ate' len yöl-la' rugu ladxi' quégaquië' gulu'ë xtídzë'ë Dios.

### *Tu'únë' tuz le dë quégaquië'*

<sup>32</sup> Bönachi zián na' ta'yéajlë' Cristo, tuz ca ta'zá' ládxi'guequi, en tuz ca gulúngaca. Biti' gunnë' nu bönni' nútsë'ë ládjagaquië' nequi queézë' le dë queë', pero bulu'únë' tuz le dë quégaquië'. <sup>33</sup> Len yöl-la' huáca zxön gula'guíxjö'ë gubáz na' nasól-lë'ë Xanru' Jesús ca bubanë' Lë', ate' le buzá' ládxë'ë Dios quégaquië' gúcalen yúgu'të'. <sup>34</sup> Cuntu nu bi biyadzaj nu nutsa' ládjagaquië'. Caní guca tu' yúgu'të bönni' zoa bi dë quégaquië', xiyúgaquië', o lídxigaquië', gulúti'ë le, ate' dumí que na' yöjuá'gaquië', <sup>35</sup> en bulu'dödë' le lu ná'agaquië' gubáz na' nasól-lë'ë Cristo, ate' légaquië' gula'guísië' le que queégaca nupa bi biyadzaj quéguequi. <sup>36</sup> Zoë' José ni', bönni' bulu'zóë' gubáz na' nasól-lë'ë Cristo ia'tú lë' Bernabé, le rnna lu didza' xidza', Bönni' Ruhuë Tsáhuë'ë. Nabábalenë' zxí'ini xi'sóë' Leví, en guljë' luyú Chipre. <sup>37</sup> Béti'ë bönni' ni tu cö' xiyúë', ate' yöju'ë dumí que na', en budödë' le lu ná'agaquië' gubáz na' nasól-lë'ë Cristo.

## 5

### *Dul-la' gulunë' Ananías, en Safira*

<sup>1</sup> Tu bönni' yúbölö lë' Ananías, béti'ë tu cö' xiyúë'. Safira, nigula queë', bennu tsözxöñ lë'. <sup>2</sup> Ananías na' bucachi' lanë' late' dumí que yu na', ate' nőzinu ca' nigula queë'. Le bugá'anasö yöju'ë, en gulu'ë le lu ná'agaquië' gubáz nasól-lë'ë Cristo. Rnnë':

—Tsca nisö guzxí'a.

<sup>3</sup> Pedro gudxë' lë':

—Ananías, ¿narú' guyázatsö Satanás tu' xihui' lu icja ládxi'do'o, en ben ga rizi' yé'enu' Dios Bö' Lá'ayi, ate' bucachi' lanu' late' dumí que xiyú' na'? <sup>4</sup> Tsanni ni' nagá'ana yu na' lu no'o, ¿narú' cabí nequi quez quiu'? Gudödi béti'u le, ¿narú' cabí dë caz lu no'o dumí que na'? ¿Bizx que guró'ö icju' gunu' caní? Dios caz guzxí' yé'enu', calégasö bönnachi.

<sup>5-6</sup> Cate' biyönnë' Ananías didza' ni, gudzö'ë, en gútite'. Ní'irö gula'bíga'tëbi' bi'i ra'bán, ate' bulu'chólibi' lë' lari', en guluá'abi' lë', en yöjcáchì'gacabi' lë'. Guladxi gula'dzöbi yúgu'të nupa ni' bila'yöni ca guca lë ni.

<sup>7</sup> Ca tsonna hora gudödi ni', bidxinnu nigula queë' Ananías na' ni', en biti' nőzinu lë na' guca queë' bönni' queénu. <sup>8</sup> Ní'irö Pedro gudxë'-nu:

—Gudíxjö'i neda'. ¿Naru' guzxí'ili' tsca nisö xiyuli' na'?

Gunnánu:

—Ön, tsca nisö guzxí'itu'.

<sup>9</sup> Ní'irö Pedro gudxë'-nu:

—¿Bizx que ben tuz xtídzala' guzxí' bë' xihui'li' Dios Bö' Lá'ayi? Buyútsöca'. Chizóa ulu'dxinbi' yugu' bi'i bulu'cáchì'bi'-në' bönni' quiu', ate' ulu'béajbi' ca' li'.

<sup>10</sup> Ní'irö la' gudzó'tënu xini'ë Pedro, en gútitënu. Cate' gula'yázabi' bi'i ra'bán na', gula'lé'ebi'-nu chinátinu. Ní'irö bulu'béajbi'-nu, en yöjcáchi'gacabi'-nu cuita lë'ë bönni' queënu. <sup>11</sup> Que lë ni na' guladxi gula'dzöbi yúgu'të bönnachi queë' Dios, ate' guladxi ca' yúgu'të nupa bila'yöni ca guca lë ni.

*Tunë' bönni' gubáz nasól-lë'ë Cristo le taca bë'*

<sup>12</sup> Gulunë' bönni' gubáz na' nasól-lë'ë Cristo zián le taca bë', en zián yöl-la' huáca zxön lógaca bönnachi lu yödzö. Yúgu'të' bulu'dubë' tsözxón ga naca chila yudo' nazí'i le Chila Queë' Salomón. <sup>13</sup> Ladaj nupa ni' biti' ta'yéajlë' Cristo, cuntu nu burugui tsöjtá légaquië', ate' bönnachi lu yödzö ni' gulún légaquië' bal. <sup>14</sup> Ní'irö ia'bal-la bönnachi zián ca' gula'yéajlë' Cristo, bönni', en nigula. <sup>15</sup> Cate' bila'lé'e bönnachi yugu' le tunë' bönni' ni' ta'yéajlë'ë Cristo, yöjuá'agaca nupa te'e gapa naca la' nöza, ate' gula'xóë' léguequi lu da'a yaga, en ia'bal-la lu dá'asö, para cate' tódë' ni' Pedro, tsa zxúl-lasö queë' cu'u zxul-la bal-la bönnachi huë' na', para ulu'huöáca. <sup>16</sup> Lësca'bila'rúaj bönnachi yugu' dzaga yödzö, en bila'dxín Jerusalén, nuá'agaca nupa te'e, en nupa ta'gu'i ta'zaca' tu' yú'ugaca bö' xihui' léguequi, ate' bulu'huöáca yúgu'tëguequi.

*Bönni' yudo' ta'bía ládx'i'gaquië' bönni' gubáz nasól-lë'ë Cristo*

<sup>17</sup> Que lë ni na' bixúz lo, en bönni' yudo' saduceo na' dá'gaquië' bixúz lo, bulu'zxé'enë' Pedro. <sup>18</sup> Ní'irö bixúz lo na', en bönni' na' dá'gaquië' lë' gula'zönë' gubáz na' nasól-lë'ë Cristo, ate' gula'gu'ë légaquië' lidxi guíë. <sup>19</sup> Ní'irö bidxinë' gubáz lá'ayi queë' Xanru' chi'i dzö'ölö, ate' gusaljë' lidxi guíë na', en bubéajé' légaquië'. <sup>20</sup> Gubáz lá'ayi na' gudxë' légaquië', rnnë':

—Guli'tséaj, guli'tsöjsóa chila yudo', en guli'tsöjë'len bönnachi ni' didza', quíxjöi'ilí' légaquië' ca naca yöl-la' na'bán idú ni, en ca gaca ila'déli'në' le.

<sup>21</sup> Cate' bila'yönnë' didza' ni ru'ë gubáz lá'ayi na', gula'yázië' chila yudo' cate' za' reni' zílado', en bulu'sédinë' bönnachi.

La' ní'isö bulu'dubë' bixúz lo, en nupa nacuá'len lë' tsözxón, len bönni' yudo' tu'chi'a tu'söröë', en bönni' gula tu'zéajni'inë' bönnachi Israel, ate' gula'sól-lë'ë nupa tsöjaca lidxi guíë para tsöjxí'gaquië' yugu' gubáz na' nasól-lë'ë Cristo, tu' téquinë' ni' nacu'ë lidxi guíë na'. <sup>22</sup> Cate' ni'a ná'agaquië' bönni' yudo' na' bila'dxinë' ni', biti' yöjxáca'gaquië' légaquië' lu yu'u lidxi guíë na', ate' ní'irö bulu'huöajë' tsöjtíxjö'gaquië' ca'. <sup>23</sup> Gulé' bönni' yudo' tu'chi'a tu'söröë' na', ta'nnë':

—Le nácatë yöjxáca'tu' nayáyajtë lidxi guíë, ate' nacuá' nupa tun chi'i ra' lidxi guíë na', pero cate' gusálajtu', cuntu nu yöjxáca'tu' lu yu'u na'.

<sup>24</sup> Cate' bixúz lo, en yugu' bixúz unná bë', en bönni' nacuá' lu næ'ë ni'a ná'agaca bönnachi yudo', bila'yönnë' didza' ni, gula'bó'dë'ë böninga tu' cabí nöziguequinë' bizxi guntë lë na' raca. <sup>25</sup> Ní'irö bidxinë' tu bönni' ni', en gudíxjöi'inë' légaquië', rnnë':

—Buli'yútsöca'. Yugu' bönni' na' gulú'ugacali'-në' lidxi guíë nacu'ë chila yudo' tu'sédinë' bönnachi.

<sup>26</sup> Ní'irö guyijë' bönni' na' rinná bé'enë' ni'a ná'agaca bönnachi yudo', dzágagaquië' lë' ni'a ná'agaquië' na', ate' gula'chë'ë yugu' gubáz na' nasól-lë'ë Cristo, pero biti' bi gulunë' quégaquië', tu' guládxinë' ulu'ladxi' bönnachi nacuá' ni' légaquië' guíój. <sup>27</sup> Cate' chinaché'gaquië' yugu' gubáz na', bulu'sudxinë' légaquië' lógaquië' bönni' yudo' tu'chi'a tu'söröë' na', ate' bixúz lo gunábinë' légaquië', rnnë':

<sup>28</sup> —¿Naru' cabí gúdxida'atu' libí'ili' biti' usédili' bönnachi ca naca queë' bönni' na'? Na'a, chigudísili' xibá ni idútë yödzö Jerusalén, en ré'ënili' usubága'li' netu' xíguia' tu' nözi yöl-la' guti queë' bönni' na'.

<sup>29</sup> Ní'irö bulu'bi'ë didza' Pedro, en ia'zíca'rë' gubáz na' nasól-lë'ë Cristo, ta'nnë':

—Run bayudxi uzérö nágatu' xtídzé'ë Dios ca xtíza'gaca bönachi. <sup>30</sup> Libí'ili' bétilli'-në' Jesús cate' ni' budá'ali'-në' lë'e yaga cruz, pero Dios quég aquié' xuz xtó'oru' busubané' Lë'. <sup>31</sup> Jesús ni, Dios buzúa cazé' Lë' ga nayépisétérë' cuita lë'e ibëla, para gáquié' Bönni' Lo, en Bönni' Rusólá, en guné' ga ulu'bí'i ládzi'gaca bönachi Israel, para gaca uniti lahué' dul-la' nabága'gaquié'. <sup>32</sup> Ca naca lë ni, runtu' netu' ba nalí que, ate' lësca' runé' Dios Bö' Lá'ayi ba nalí que, Bö' na' risó'l-lë'ë Dios quégaca nupa tun ca rnna xtídzé'ë.

<sup>33</sup> Cate' bila'yönné' bönni' yudo' tu'chi'a tu'söröö' na' lë ni, gula'lené', en gulé'enné' ilútié' légaquié'. <sup>34</sup> Ní'irö guzuíné' tu bönni' yudo' ruchi'a rusöröö' lógaquié', lë' Gamaliel, tu bönni' yudo' fariseo. Rácadé'ë bönni' ni xibá queé' Moisés, ate' yúgu'të bönachi tun lë' bal. Gudxé' nupa na' ulu'béaj yugu' gubáz na' nasó'l-lë'ë Cristo ló'alö tu ch'ido'. <sup>35</sup> Ní'irö gudxé' bönni' yudo' tu'chi'a tu'söröö' na', gunné':

—Libí'ili', bönni' Israel, buli'yutéz queéli' ca naca le ré'énili' gunli' quég aquié' bönni' ni. <sup>36</sup> Ral-la' tsöjnélí' ca guca zí'atélo cate' si' idxín dza ni zóaru' na'a. Birúaje' Teudas, ate' ben cuiné' ca tu bönni' nayépisétérë'. Guláquié' bönni' yöjtá'gaquié' lë' idú tapa gáyu'ë bönni'. Yugu' bönni' rójáquié' gudil-la gulútié' lë', ate' gulásilasi yúgu'të nupa ni' yöjtá'gaca lë', ate' gunítiso ca' yúgu'të le bené' bönni' na'. <sup>37</sup> Gudödi guca lë ni, birúaje' ca' Judas, tu bönni' Galilea. Bené' caní cate' ni' gula'yú'u lu guichi bönachi ta'guízxaj lázagaquié', ate' yöjtá'gaca bönachi zián lë'. Lësca' gulútié' bönni' ni, ate' gulásilasi yúgu'të nupa ni' yöjtá'gaca lë'. <sup>38</sup> Que lë ni na' rea' libí'ili': Guli'sán-gaquié' bönni' ni, en biti' bi gunli' quég aquié'. Channö naca quégacasö bönachi lë ni ta'nné' o lë ni tuné', initi caz, <sup>39</sup> pero channö naca queé' Dios, biti' gaca usunítili' le. ¡Buli'yú cuinli' cabí til-lalenli'-në' Dios!

<sup>40</sup> Ní'irö guluné' tuz didza' len lë'. Bulu'lídze' yugu' gubáz na' nasó'l-lë'ë Cristo, ate' gula'guíné' légaquié', en bulu'zené' légaquié' bach para cabirö ilu'ilené' bönachi didza' ca naca queé' Jesús. Ní'irö bulu'sané' légaquié'. <sup>41</sup> Bila'rúaje' gubáz na' nasó'l-lë'ë Cristo lógaquié' bönni' yudo' tu'chi'a tu'söröö' na'. Tu'dzéjané' tu' bë'ë Dios légaquié' lataj gula'guí'i gula'záquë'ë tu' dá'gaquié' Jesús. <sup>42</sup> Yugu' dza bulu'séeditiqui'siné' bönachi, en guluné' libán queé' Jesucristo lu chila yudo', en gapa naca lu yu'u lídxigaca bönachi.

## 6

*Ta'bóë' gadxi bönni' para ilácalené' bönachi queé' Cristo*

<sup>1</sup> Dza ni', tu' gula'yán bönachi ta'yéajlë' Cristo, yugu' bönni' judío tu'ë didza' griego gula'nné' quég aquié' bönni' judío tu'ë didza' hebreo tu' nözi le raca cate' ta'guísié' le ilágunu nigula uzébi, tu' cuntu nu rui'i le ilágunu nigula uzébi quég aquié' bönni' ni' tu'ë didza' griego. <sup>2</sup> Ní'irö idxínnuté' bönni' gubáz na' nasó'l-lë'ë Cristo bulu'tubë' yúgu'të bönachi ni' ta'yéajlë' Cristo, ate' të' légaquié':

—Biti' naca dxí'a soa dxitu', en cabí guntu' libán que xtídzé'ë Dios, para guntu' dxin cú'utu' le ilágugaca bönachi. <sup>3</sup> Que lë ni na', böchi' luzá'atu', guli'cô' gadxe' bönni' lädjali', para ugú'uru' lu ná'agaquié' dxin ni. Yugu' bönni' na' run bayudxi ilácagaquié' bönni' tun yúgu'të bönachi légaquié' bal, en nácagaquié' bönni' ta'yéajni'i, en naca bë' Dios Bö' Lá'ayi zóalené' légaquié'. <sup>4</sup> Netu' ni ulídzatica'stu'-në' Dios, en uséditu' bönachi xtídzé'ë Dios.

<sup>5</sup> Yúgu'të' gula'yaza ládzi'gaquié' didza' ni, ate' gula'bóë' Esteban, tu bönni' réajlë'ë Cristo idú ládxé'ë, en zóalené' Dios Bö' Lá'ayi lë'. Lësca' gula'bóë' Felipe, en Prócoro, en Nicanor, en Timón, en Parmenas, en Nicolás, bönni' yödzö Antioquia, bönni' zí'alö butsé'ë ca runé' para tseaj ládxé'ë Dios ca tuné' yugu' bönni' judío. <sup>6</sup> Ní'irö bulu'sudxiné' bönni' na' gula'bóë' lógaquié' gubáz na' nasó'l-lë'ë Cristo. Yugu' bönni' gubáz na' gula'xóa ná'agaquié' légaquié', ni' tu'lídze' Dios.

<sup>7</sup> Guzérö xtídzë'ë Xanru', ate' gula'yanda' bönachi ta'yéajlë' Cristo nacuá' Jerusalén. Lësca' zián bixúz judío gula'zí' lu ná'agaquie' le réajlë'ëru' Cristo.

### Ta'zönë' Esteban

<sup>8</sup> Esteban na' benë' le tun ga rubániru', en yugu' le taca bë' lógaca bönachi lu yödzö, zóalen yöl-la' huáca queë' Dios lë' le buza' ládxë'ë queë'. <sup>9</sup> Ní'irö gula'yasë' bal-lë' bönni' nabábagaqüie' yu'u ga tu'dubë' bönni' judío, en tu'sedë' queë' Dios, nazí'i le Yu'u Quégaquie' Bönni' Nadzángaqüie'. Bönni' narúajgaquie' yödzö Cirene, en yödzö Alejandría, en luyú Cilicia, en luyú Asia, gulunë' légaquie' tsözxón. Bönni' ni gula'díllalalenë' Esteban didza'. <sup>10</sup> Biti' guca tá'baga'gaquie' didza' ru'ë Esteban na', tu' bë'ë didza' len yöl-la' réajni'i, tu' zóalenë' Dios Bö' Lá'ayi lë'. <sup>11</sup> Ní'irö gula'guízxjë' bönni' ila'zi' yë'ë, ila'nné': "Netu' biyónitu' didza' ru'ë Esteban ni, rnnë zi'ë queë' Moisés, en queë' Dios." <sup>12</sup> Caní guca, bönni' ni gula'gu'ë xilá ládx'i'gaca bönachi, tsözxón len bönni' gula tu'zéajni'inë', en yugu' bönni' yudo' usëdi. Yúgu'të bönni' ni gula'bía di'ë Esteban na'. Gula'zönë' lë', en gula'ché'ë lë' lógaquie' bönni' yudo' tu'chi'a tu'söröe'. <sup>13</sup> Lësca' bulu'cu'ë lógaquie' nupa gula'guíxjö' le cabí nácatë, bönni' na' gula'nné':

—Biti' zoë' dxisö bönni' ni rnnë zi'ë que yudo' lá'ayi ni, en que xibá queë' Dios. <sup>14</sup> Biyónitu' didza' bë'ë bönni' ni ca gunë' Jesús, bönni' Nazaret, rnnë' usunítië' yudo' ni, en utsé'ë yugu' le nalébiru' runru', yugu' lë na' gunná bë'enë' Moisés rë'u.

<sup>15</sup> Ní'irö bönni' yudo' tu'chi'a tu'söröe', en yúgu'të nupa rö'gaca ni' bulu'yúë' Esteban, ate' bila'lé'enë' lahuë', rna' ca rna' lahuë' tu gubáz lá'ayi queë' Dios.

### 7

#### Didza' bë'ë Esteban, le gunné' uláz queë'

<sup>1</sup> Ní'irö bixúz lo gunábinë' Esteban na', rnnë':

—¿Naru' nácatë caní?

<sup>2</sup> Bubi'ë didza' Esteban, rnnë':

—Libi'ili', bönni' gula, en libi'ili', bócha'a. Buli'zé' nágali' le guía' libi'ili'. Dios, Bönni' nayépisétérë', bulu'i lahuë' ga zoë' Abraham, xúziru' gudödi, cate' ni' zoë' luyú Mesopotamia, cate' si' tsöjsöë' yödzö Harán. <sup>3</sup> Dios gudxë' lë': "Birúaj ladzu', en bulá'len di'a dza quiu', ate' guyéaj luyú ni' ului'ida' li'." <sup>4</sup> Ní'irö birúajë' Abraham luyú Mesopotamia le naca xiyágaca bönachi Caldea, ate' yöjsöë' yödzö Harán. Lu yödzö ni' gútië' xuzé' Abraham na', ate' lë' buzé'ë ni', ate' Dios guché'ë lë' luyú ga ni zóaru' na'a.

<sup>5</sup> Dios biti' bë'ë lë' lataj guequi queë' luyú ni. Caléga láti'sö bunödzjë' queë' ga soë' luyú ni, pero guzxí' lu né'ë Dios unödzjë' queë' luyú ni, ate' tödi gátië' Abraham guequi luyú ni quégaca zxí'ini xi'sóë', sal-la' biti' nacu'iniibi' bi'i queë'. <sup>6</sup> Lësca' caní Dios gudxë' Abraham: "Tsöjáquië' zxí'ini xi'sú' lu xiyágaca bönachi izá'a, ate' ni' ilácagaquie' ca bönachi zi'tu'. Iluné' bönni' luyú ni' ga ilácagaquie' zxí'ini xi'sú' bönni' nadó'ogaquie'. Ulu'saca' zi'ë légaquie' idú ca tapa gayuá' iz." <sup>7</sup> Lësca' Dios gudxë' lë': "Neda' uzötja' bönachi luyú ni', ga ni' ilácagaquie' zxí'ini xi'sú' bönni' nadó'ogaquie', ate' tödi ni' ulu'rúajë' ni', ate' iluné' xichina' luyú ni." <sup>8</sup> Dios bénlenë' Abraham tu didza' rucá'ana tsahui', en gunná bë'enë' lë' ichúguië' lu xipéla'gaquie' bönni' biguiú' nacu'ë lidxë' tu le gaca bë' nazi' lu ná'agaquie' didza' na' rucá'ana tsahui'. Gudödi ni' gúquië' Abraham xúzibi' bi'i Isaac, en cate' chigúquibi' xunu' gubidza, guchúguië' lu xipéla'bi' lë na' naca bë'. Isaac na', lësca' caní benë' queébi' bi'i Jacob, zxí'inë', en caní benë' ca' Jacob quégaca idxínnutëbi' bi'i bönni' queë', nupa ni' gulaca xuz xtó'ogaca idxinnu cö' bönachi Israel.

<sup>9</sup> 'Yugu' xuz xtó'oru' na', lu yöl-la' ruzxé'e quégagaquie', gulúti'ë-bi' bi'i José, bóchi'-gaquie', lu ná'agaquie' bönni' ni' gulúti'gaquie'-bi' luyú Egipto. Dios guzóalenë'-bi' bi'i José na' <sup>10</sup> en busólë'-bi' lu le gulaca queébi'. Dios bë'ë-bi' yöl-la' réajni'i, le ben ga guyaza ládxë'ë-bi' Faraón, bönni' rinná bë'enë' bönachi Egipto, ate' Faraón na' budödë' lu ná'abi'

bí'i José yöl-la' unná bë' para gunná bë'ebi' böñachi luyú Egipto, en yúgu'të böñachi nacuá' lidxë' Faraón na'.

<sup>11</sup> Ní'irö gúcada' gubín idú luyú Egipto, en luyú Canaán ni, ate' gula'gu'i gula'zaca' yúgu'të böñachi dza ni'. Biti' bidzöli le ilahuë' xuz xtó'oru'. <sup>12</sup> Cate' biyönnë' Jacob dë zxoa' xtila luyú Egipto, gusól-lé'ë yugu' zxi'inë', bönni' ni' nácagaquië' xuz xtó'oru', luyú ni'. Caní guca le zí'alö luzuí yöjáquië' ni'. <sup>13</sup> Cate' le buropi luzuí yöjáquië' luyú Egipto, benë' José ga bulu'únbë'ë böchë'ë lë'. Caní guca, gunózinë' Faraón nupa nácagaca di'a dza queë' José. <sup>14</sup> Ní'irö gusól-lé'ë José didza', en benë' ga bidxinë' Jacob, xuzë', luyú Egipto, ate' dzágagaca di'a dza queë' lë'. Gulaca idú tsónnalalaj yu' chinu böñachi. <sup>15</sup> Caní guca, bidxinë' Jacob luyú Egipto, ga ni' gútië' lë', ate' gulátië' ca' xuz xtó'oru' luyú ni' cate' bizá'a dza que quéegaquië'. <sup>16</sup> Cate' gulátië' tu tu xuz xtó'oru', zxi'ini xi'sóagaquië' yöjuá'agaquië' lélégaquië' luyú Siquem, ate' ni' bulu'cáchë'ë lélégaquië' yeru ba lu zxan bulóaj na' gú'uë' Abraham lu ná'agaca zxi'inë' Hemor, bönni' Siquem na'.

<sup>17</sup> Gudödi zián iz, cate' bidxín dza ral-la' gaca le guzxí' lu në'ë Dios, lë na' benë' tsutsu xtídzë'ë gunë' queë' Abraham, gula'yán böñachi yugu' cö' Israel, ate' gulaca böñachi zián cate' ni' gula'cuá' luyú Egipto. <sup>18</sup> Ní'irö guyázië' bönni' yúbölö gunná bë'ë luyú Egipto na', en catu caz biyönnë' ca naca le benë' José, gúcalenë' böñachi Egipto. <sup>19</sup> Bönni' unná bë' na' bi'ë dö' quégaca böñachi uládz queéru'. Busaca' zi'ë yugu' xuz xtó'oru' na', en benë' ga bulu'sanë'-bi' bi'i bönni' hué'ënido' que quéegaquië', para ilátibi'. <sup>20</sup> La' dza ní'isö gúljabí' ca' bï'ido' Moisés, ate' Dios guyaza ládxë'ë-bi'. Xuz xiná'abi' bulu'sculë'-bi' lídxigaquië' idú ca tsonna beo'. <sup>21</sup> Cate' bidxín dza ulu'sanë'-bi' xuz xiná'abi' para gátibi' bï'ido' Moisés na', bidxinnu nigula zxi'inë' Faraón ga ni' bulu'cá'anë'-bi', ate' yöjzxí' inubi', en buscúlunu-bi' ca bi'i que cázanu. <sup>22</sup> Caní guca, bizédabi' bi'i Moisés yúgu'të le táquië' bönni' Egipto, en gúcatéröbi' zxön ca naca didza' bë'ëbi', en ca nácagaca le benbi'.

<sup>23</sup> Cate' Moisés na' chiyú'ubi' choá' iz, gunná ládxí'bi' tsöjyubi' böñachi uládz queébi', böñachi Israel. <sup>24</sup> Cate' bidxinbi' ga na' nacu'ë, bilé'ebi'-në' tu bönni' Egipto, rusaca' zi'ë tu bönni' uládz queébi'. Ní'irö gúcalenbi'-në' bönni' uládz queébi' na', en bétibi'-në' bönni' Egipto na'. Caní guca, buzí' labí' bi'i Moisés bönni' na' uláz queë' bönni' uládz queébi'. <sup>25</sup> Gúquibi' Moisés huala'yéajni'inë' bönni' bóchi'bi' gunë' Dios ga usölábi' lë cázabi' lélégaquië', pero lélégaquië' biti' gula'yéajni'inë'. <sup>26</sup> Ia'tú dza ca' yöjxáca'bi' ia'chopë' bönni' Israel, ta'dil-lé', ate' gú'unibi' cuéqui dxibi' lélégaquië', en gúdxibi' lélégaquië': "Libí'ili', bóchi'li' naca. ¿Bizx que ruá'ali' luzá'ali' dö?" <sup>27</sup> Ní'irö bönni' na' ru'ë dö' que luzé'ë budxíguë'ë-bi' bi'i Moisés, gunné': "¿Núzzxitë buzúa li' para inná bë'enu' netu', en uchi'a usöröu' le runtu?" <sup>28</sup> ¿Naru' ré'ënitsenu' gútiu' ca' neda' ca benu' néaje, bétiu'-në' bönni' Egipto na'?" <sup>29</sup> Cate' Moisés biyónibi' didza' ni, buzxúnnajbi' ni', en yöjsóabi' luyú Madián ga ni' guzóabi' ca tu bönni' zi'tu'. Luyú Madián na' butsaga ná'alenbi'-nu nigula lu yödzö ni', ate' gúljagacabi' chópabi' bi'i bönni' queë'.

<sup>30</sup> Cate' chigudödi choá' iz zoë' ni', bulu'i lahuë' tu gubáz lá'ayi queë' Dios ga zoë' lu guí' que yaga yótsi'do' régui, ga ni' naca lu lataj cá'asö, le rö'ö ra' guí'a nazí'i le Sinaí. <sup>31</sup> Cate' Moisés bilé'enë' guí' na', bubáninë', ate' gubígui'ë gala' para ilé'enë' dxi'a, ate' biyönnë' chi'ë Xanru'. <sup>32</sup> Caní gudxë' Xanru' lë': "Neda' naca' Dios quéagaquië' xuz xto'o. Naca' Dios queë' Abraham, en Dios queë' Isaac, en Dios queë' Jacob." Ní'irö lu yöl-la' radxi queë', guzxízidë'ë Moisés, en bítí'rö burúguinë' uyúë'. <sup>33</sup> Xanru' gudxë' lë': "Guléaj xirachu' nudó'o, tu' naca lá'ayi ga ni zu' tu' zoa caza' neda', Dios, ni. <sup>34</sup> Le nácatë chibilé'eda' le ta'guí'i ta'zaca' böñachi quia' nacuá' luyú Egipto, en chibiyönda' ta'bödxi yeche'. Bötja', zoa' ni para usölá' lélégaquië'. Gudá na'a, isöl-la'a li' luyú Egipto."

<sup>35</sup> Sal-la' bönni' uládz queë' Moisés, bulu'cá'anë' lë' cá'asö, gula'nné': "¿Núzzxitë buzúa li' para inná bë'enu' netu', en uchi'a usöröu' le runtu?" Dios gusól-lé'ë lë' para gáquië' bönni' unná bë', en bönni' rusölá, ca na' gubáz lá'ayi na' queë' Dios gudxë' Moisés, cate'

bulu'i lahuë' lu yaga yōtsi'do' régui ga na' zoë'. <sup>36</sup> Moisés ni bubéajë' bönni' uládz queéru' luyú Egipto. Guca caní gudödi benë' le gulún ga bulu'bani bönnachi ni', en le taca bë' benë' luyú ni'. Lësca' caní benë' lu nísado' nazí'i le Nísado' Xiná. Caní benë' lógaquië' idú ca choá' iz lu lataj cá'asö. <sup>37</sup> Lë cazé' Moisés na' gudxë' bönnachi Israel ni', gunné': "Xanru' Dios isól-lë'ë queéli' tu bönni' galjë' ladaj di'a dza queéli', ate' gáquië' bönni' gu'ë didza' uláz queé' Dios. Isól-lë'ë lë' queéli' ca na' gusól-lë'ë neda'. Lë cazé' run bayudxi uzé nágali'-në'." <sup>38</sup> Lësca' lë cazé' Moisés na' guzóalenë' bönnachi nudúbigaca queë' Dios lu lataj cá'asö, ate' gudzáguië' gubáz lá'ayi queë' Dios lë', Nu na' bé'len lë' didza' lu guí'a Sinaí na'. Moisés na' guzóalenë' xuz xtó'oru', ate' Dios budödë' lu né'ë xibá lá'ayi queë', le ruí'i didza' ca gaca ila'deli' bönnachi yöl-la' na'bán, ate' budödë' Moisés xibá ni lu ná'agaca zxí'ini xi'sóagaquië' ga ridxitnë queéru' rë'u.

<sup>39</sup> 'Biti' gulé'ennë' xuz xtó'oru' ilunë' ca rnna xtídzë'ë Moisés, pero bulu'zóë' lë' tsölá'alö, en gulé'ennë' tsöjhuójgaquië' luyú Egipto. <sup>40</sup> Cate' ni' zoë' Moisés na' lu guí'a Sinaí na', légaquië' gulé' Aarón, bóchë'ë Moisés na', gula'nné': "Ré'ënitu' gunu' yugu' dios queétu', tu budó' guíë, para tsöjnörugaca lotu'. Biti' nöztu' bi guca queë' Moisés, bönni' na' nubéajë' netu' luyú Egipto." <sup>41</sup> Ní'irö gulunë' tu budó' oro le naca ca tu bédxido', ate' gulútië'-ba' bö'cu' zxíla'do', en gulú'ugaquië'-ba' lo budó' oro na', ate' gulunë' laní lo budó' na' núnagaquië'. <sup>42</sup> Que lë ni na' Dios bucá'anë' légaquië', en guléaj ládxë'ë légaquië'. Ní'irö gula'yéaj ládxì'gaquië' yugu' le ta'yépi lúzxiba. Ca naca lë ni nazúaj lu guichi le gula'nné' bönni' gulu'ë didza' uláz queë' Dios, le rnna:

Libí'ilí', bönnachi Israel,  
¿narú' gulú'ugacatsali'-ba' quia' neda' böa' bëdxi ni'

bétigacali'-ba', en buzégu'gacali'-ba',  
lë na' benli' lu lataj cá'asö idú ca choá' iz?

<sup>43</sup> Biti' gulú'ugacali'-ba' quia' neda',  
pero biá'ali' le nequi que Moloc, budó' guiój queéli'.

Biá'ali' ca' tu le naca ca bölaj lúzxiba nazí'i le Refán,  
lë na' buzóali' ca dios queéli'.

Yugu' budó' guiój budó' yaga ni,  
la' libf'isili' benli' para guyéaj ládxíllí' léguequi.  
Que lë ni na', ubéaja' libf'illí' lu xiyuli',  
en ichë'a libf'illí' zí'tu'rö ga dë luyú Babilonia.

<sup>44</sup> 'Cate' ni' gula'cu'ë xuz xtó'oru' lu lataj cá'asö, guta' quégaquië' yu'u lari' na' ga gulún chi'ë xibá queë' Dios, lë na' naca bë' Dios caz zóalenë' légaquië'. Gulunë' tu yu'u lari' na' ca na' Dios gunná bë'enë' Moisés, cate' ni' gudxë' lë' gunë' le ca naca lë na' bilé'enë', le bulu'inë' Dios lë' lu guí'a ni'. <sup>45</sup> Lësca' bulu'dödë' yu'u lari' na' lu ná'agaquië' zxí'inigaquië' ga bidxitnë dza ni' gulu'ë xuz xtó'oru' le luyú ni, cate' ni' dzáguië' Josué légaquië', ate' gula'gúë' xiyúgaca bönnachi izá'a, nupa ni' bulágui'ë Dios lógaquië' xuz xtó'oru'. Caní gulunë' zián iz ga bidxitnë dza zoë' David. <sup>46</sup> Dios guyaza ládxë'ë David na', ate' lë' gunábinë' Dios gu'ë lë' lataj gunë' tu yu'u ga soë' Dios queë' Jacob. <sup>47</sup> Biti' bë'ë Dios lë' lataj, ate' Salomón, zxí'inë' David na' benë' yu'u queë' Dios. <sup>48</sup> Caní benë' sal-la' biti' zoë' Dios, Nu nácatérö lo, tu lu yudo' núnaga bönnachi. Ca naca lë ni gunné' tu bönni' bë'ë didza' uláz queë' Dios, gunné':

<sup>49</sup> Yehua' yubá naca ga rö'a rinná bë'a,  
ate' yödzölio naca xilbi ni'a.

Rnnë' Xanru': "¿Naru' gúntsali' tu yu'u ga soa'?"

¿Naru' zóatsö tu lataj ga ral-la' uzí' ládx'a'a?"

<sup>50</sup> ¿Naru' cabí len na'a caza' bena' yúgu'të lë ni?"

<sup>51</sup> Ní'irö Esteban na' gudxë' yugu' bönni' yudo' tu'chi'a tu'söröë' na', gunné':

—Libí'ili', bönni' zidi, biti' bi raza icja nágali'. Nazidi icja ládxí'do'oli' ca raca quégaca bönnachi biti' númbé'gaquié' Dios. Ridá'baga'tica'sili'-në' Dios Bö' Lá'ayi. Ca na' guluné' xuz xtó'oli', runli' ca' libí'ili'. <sup>52</sup> Gula'bía ládxí'gaquié' xuz xtó'oli' na' yúgu'té bönni' ni' gulu'ë didza' uláz queé' Dios. Lësca' gulútië'bönni' ni' gula'guíxjö'ë zí'alö ca ral-la' guídë' Cristo, Bönni' Tsahui', ate' na'a, cate' ni' bidxiné' Bönni' Tsahui' na', libí'i cázali' bétili'-në' lu ná'agaquié' bönni' gulútië' Lë'. <sup>53</sup> Libí'i cázali' dë lu ná'ali' xibá queé' Dios, lë na' gubáz lá'ayi queé' Dios bulu'dödë' lu ná'agaquié' xuz xtó'oli', pero biti' runli' ca rnna.

### Tútié' Esteban

<sup>54</sup> Cate' bönni' yudo' tu'chi'a tu'söröö' na' bila'yönnë' didza' ni, gula'léde'enë' Esteban, ate' lu yöl-la' rilé quég aquié' lë' gulagu zxéatica' láyë'ë. <sup>55</sup> Ní'irö buyúé' Esteban na' lúzxibalö, ate' zóalenë' Dios Bö' Lá'ayi lë', bilé'enë' lataj bení' ga zoë' Dios, enca' Jesús, zuínë' cuita lë'ë ibëla Dios ga nayépisétérë'. <sup>56</sup> Ní'irö gunné':

—Buli'yútsöca'. Rile'eda' nayalaj lúzxiba, ate' zuínë' Bönni' Guljë' Bönachi cuita lë'ë ibëla Dios.

<sup>57</sup> Ní'irö bönni' yudo' tu'chi'a tu'söröö' na' bulu'sayaj nágagaquié'. Gula'bödxí'ë zidzaj, en tsözxón gula'bía di'ë Esteban na'. <sup>58</sup> Bulu'béajë' lë' ní'ilö ra' yödzö na', ga ni' bulu'ladxë' lë' guiój. Yugu' bönni' ni' tunë' ba nalí le tu'zéguíé' Esteban didza' bulu'cu'ë lari' ta'xoa yéng aquié' xini'ë tu bönni' lë' Saulo cate' ni' bulu'ladxë' Esteban guiój. <sup>59</sup> Cate' ni' tu'ladxë' Esteban guiój, lë' bulidzë' Dios, gunné':

—Xána' Jesús. Buzí' bö' naca caza'.

<sup>60</sup> Ní'irö biyéchuë', buzóa zxibé', en bë'ë zidzaj didza', gunné':

—¡Xan! ¡Biti' usubágu'u légaquié' dul-la' ni!

Cate' budxi bë'ë didza' ni, gútite'.

## 8

### Saulo ribía ládxë'ë bönnachi queé' Cristo

<sup>1-3</sup> Saulo bené' tsözxón yugu' bönni' ni' gulútië' Esteban.

La' ní'isö yugu' bönni' ta'yéaj ládxí'gaquié' Dios guluá'agaquié' Esteban, ate' yöjcáchi'-gaquié' lë'. Gula'bödxidë'ë ni'a queé'.

Dza na' yugu' bönni' judío cabí ta'yéajlë'ë Cristo gula'bía ládxí'da'gaquié' bönnachi queé' Cristo nacuá' Jerusalén. Lësca' Saulo gudxía ládxë'ë bönnachi queé' Cristo. Guyázié' gapa naca lu yu'u quég aquié', ate' guzxönë' yugu' bönni', en nigula, ate' gulu'ë légaquié' lidxi guíë.

Ní'irö gulásilasi ia'láti'sö cabí bidáchigaca yúgu'té bönnachi queé' Cristo idú luyú Judea, en luyú Samaria, ate' légacasë' gubáz na' nasö'l-lë'ë Cristo bulu'gá'anë' Jerusalén.

### Raca libán que didza' dxi'a luyú Samaria

<sup>4</sup> Yugu' bönni' na' gulásilasi' yöjáquié' yúgu'té lataj, ate' guluné' libán que didza' dxi'a.

<sup>5</sup> Ní'irö Felipe, tu bönni' dzáguié' nupa na' gulásilasi, guyijé' luyú Samaria, ate' bené' libán ni' ca naca queé' Cristo. <sup>6</sup> Bulu'dubé' yugu' bönni' ni', ate' idú ládxí'gaquié' bulu'zé nágagaquié' didza' ru'ë Felipe na', tu' bila'yönnë' xtídzë'ë, en bila'lé'enë' yugu' le taca bë' runë'. <sup>7</sup> Caní guca, tu' bené' ga bulu'rúaj zián bö' xihui' yú'ugaca bönnachi, ta'bödxí'a zidzaj, ate' bulu'huöáca zián nupa te'e huë' nacú'uni bin, en nupa biti' guca sá'gaca. <sup>8</sup> Caní guca, bulu'dzeja bönnachi yödzö ni'.

<sup>9</sup> Zoë' Simón, tu bönni' zí'alö gúquié' bönni' udzá' unë ya'a lu yödzö na', bönni' guzxí' yé'enë' bönnachi Samaria na', gunné' lë' cazé' náquié' bönni' nayépisétérë'. <sup>10</sup> Yúgu'té bönnachi bulu'zëda' nágagaca bönni' ni, ga riguela' yugu' bönni' cá'asö ga ridxitnë yugu' bönni' lo, gula'nné': "Bönni' ni dë lu në'ë yöl-la' huáca zxön queé' Dios." <sup>11</sup> Caní guca, guluné' lë' bal, tu' xidzé nazí' yé'enë' légaquié' len yöl-la' gudzá' unë ya'a queé'.

<sup>12</sup> Cate' gula'yéajlë'ë libán runé' Felipe que didza' dxi'a ca rinná bë'ë Dios, en ca naca queë' Jesucristo, ní'irö gula'dilë' nisa, bönni', en nigula. <sup>13</sup> Ní'irö guyéajlë'ë ca' Simón na', en bidilë' nisa, ate' gudálentica'sé' tsözxón Felipe na'. Cate' bilé'ené' yugu' yöl-la' huáca zxön, en yugu' le taca bë' runé' Felipe, bubániné' Simón na'.

<sup>14</sup> Cate' yugu' gubáz na' nasól-lë'ë Cristo nacu'ë Jerusalén bila'yönnë' ca guca lë ni, chinazi' lu ná'agaca bönachi luyú Samaria xtídzë'ë Dios, ní'irö gula'sól-lë'ë Pedro, en Juan ni'. <sup>15</sup> Cate' Pedro, en Juan na' bila'dxiné' ni', bulu'lidzë' Dios uláz quégaca bönachi ni' ta'yéajlë' Cristo para idisóalené' Dios Bö' Lá'ayi léguequi. <sup>16</sup> Ga bidxitnë dza na', biti' ridxíniné' Dios Bö' Lá'ayi quégaquië'. Nadílagacasé' nisa para ilácagaquië' tuz len Xanru' Jesús. <sup>17</sup> Ní'irö Pedro, en Juan na', gula'xoa ná'agaquië' bönachi Samaria na'. Bulu'lidzë' Dios, ate' bidisóalené' Dios Bö' Lá'ayi légaquië'.

<sup>18</sup> Cate' bilé'ené' Simón, bönni' udzá' na', le guca cate' gubáz na' nasól-lë'ë Cristo gula'xoa ná'agaquië' bönachi ni', bidisóalené' Dios Bö' Lá'ayi légaquië', gú'unné' quizxjé' légaquië' dumí, <sup>19</sup> ate' rë' légaquië':

—Benna ca' yöl-la' huáca ni quia', para cate' ixóa na'a núti'tés bönachi, idisóalené' Dios Bö' Lá'ayi nu na'.

<sup>20</sup> Ní'irö Pedro gudxë' lë', rnnë':

—Initi dumí quiu' tsözxón len li', tu' réquinu' len dumí idéli'nu' yöl-la' huáca queë' Dios. <sup>21</sup> Biti' nacu' bachi gútsu'u lë ni, tu' dxía le naca ruá' dö' icja ládxí'do'o lahuë' Dios. <sup>22</sup> Bubi'i ládxí' ca naca huiá' dö' ni runu', en gúta'yu lahuë' Dios, nadxi ca' uniti lahuë' li' ca naca lë ni rizá' ládxu'u. <sup>23</sup> Réquibe'eda' nabágu'u xíguia', en nadzunu' lu yalaj que tu' xihui'.

<sup>24</sup> Ní'irö bubi'ë didza' Simón na', rë' légaquië':

—Buli'lídze'ë Dios, gáta'yuli' lahuë' Xanru' ni'a quia' neda' para cabí gaca quia' nitú lë na' chigunnáli'.

<sup>25</sup> Cate' Pedro, en Juan na' budxi guluné' ba nalí queë' Cristo lu yödzö ni', en bulu'siyön-né' légaquië' xtídzë'ë Dios, guluné' ca' libán que didza' dxi'a yugu' lu ládzagaquië' bönni' Samaria, ate' gudödi ni' yöjhuójgaquië' Jerusalén.

### *Felipe, en tu bönni' Etiopía*

<sup>26</sup> Ní'irö tu gubáz lá'ayi queë' Xanru' bë'lené' Felipe didza', en gudxë' lë':

—Guyasa, en guyéaj saca' ga ridödi gubidza beo' ziaga. Idxinu' ga ni' nalá' nöza zeaj Jerusalén zéajtë yödzö Gaza, nöza na' ridödi lu lataj cá'asö.

<sup>27</sup> Ní'irö guyu'ë nöza Felipe na', sa'yéaj'. La' nöza ni' yöjtságuië' tu bönni' Etiopía, náquië' bönni' huödx. Luyú Etiopía náquië' bönni' huen dxin lo queënu Candace, nigula na' rinná bë'enu bönachi Etiopía na', en yu'u lu né'ë yúgu'të yöl-la' tsahui' queënu dzö'ö lídxinu. Guyijë' Jerusalén bönni' ni para guyéaj ládxé'ë Dios. <sup>28</sup> Na'a, söhuójë' ladzë', rö'ë lu carreta queë', en rulabë' le nazúaj lu guichi ca gunné' Isaías, bönni' bë'ë didza' uláz queë' Dios. <sup>29</sup> Ní'irö Dios Bö' Lá'ayi gudxë' Felipe na':

—Gubiga' ga zeaj carreta na', en guyéajlen le.

<sup>30</sup> Cate' chigubíguë'ë Felipe ni', biyönnë' ru'ë didza' bönni' huödx na', rulabë' le nazúaj lu guichi ca gunné' Isaías, ate' gudxë' lë':

—¿Naru' réajni'inu' lë na' rulabu'?

<sup>31</sup> Bubi'ë didza' bönni' Etiopía na', gunné':

—¿Nacxi gaca tséajni'ida' channö cuntu nu zoa uzéajni'i neda'?

Ní'irö gúta'yuë' lahuë' Felipe cuenë', en cõ'lené' lë' tsözxón lu carreta na'.

<sup>32</sup> Lë na' nazúaj lu guichi rulabë', rnna caní:

Ca bö'cu' zxíla'do',

gula'chë'ë Lë' para ilútië' Lë',

en ca bö'cu' zxíla'do',

biti' rnnëba' cate' nu richugu lítsa'ba',

ca' benë' Lë', biti' gusalaj ru'ë bi innë'.

<sup>33</sup> Bulu'cá'anë' Lë' cá'asö,

en biti' gulu'ë lataj nu uchi'a usörö' Lë'.

¿Nuzxi caz gaca inözi xíguia' nabága'gaca bönachi uládz queë'?

La' légacasé' gulútië' Lë'.

<sup>34</sup> Bönni' huödx na' gunábine' Felipe, rë' lë':

—Rátaya'ua' lo' quíxjöi' inu' neda'. ¿Nuzxi que gunné' caní bönni' na' bë'ë didza' uláz queë' Dios? ¿Naru' queë' cazë', o que nu yúbölö?

<sup>35</sup> Ní'irö la' didza' nisö buguélë'ë Felipe, en busiyönnë' lë' didza' dxi'a ca naca queë' Jesús. <sup>36</sup> Cate' ni' yú'ugaquië' nöza söjáquië', bila'dxinë' ga dë nisa, ate' bönni' huödx na' rë' Felipe, rnnë':

—Buyútsöca'. Ni dë nisa. ¿Naru' huácatsö idila' nisa?

<sup>37</sup> Felipe gudxë' lë':

—Channö réajlë'u idú ládxu'u, huáca idilu' nisa.

Lë' bubí'ë didza', rnnë':

—Réajlë'a Jesucristo, náquië' Zxí'inë' Dios.

<sup>38</sup> Ní'irö benë' ga guzóa dxisö carreta queë' na', ate' bulu'huötje' irópatë', yöjtsáza-gaquië' lu nisa. Ní'irö Felipe buquilë' bönni' huödx na' nisa. <sup>39</sup> Cate' bulu'rúajë' lu nisa, Dios Bö' Lá'ayi buché'ë Felipe, ate' bönni' huödx na' bíti'rö bilé'enë' lë'. Ní'irö buguélë'ë xinözë', söhuójë' rudzéjanë'. <sup>40</sup> Cate' chiréquibe'enë' Felipe, zoë' lu yödzö Azoto. Gudödë' yúgtë yödzö ni', ate' benë' libán que didza' dxi'a, ga bidxitë' yödzö Cesarea.

## 9

### Saulo ruhuöáquië' queë' Cristo

<sup>1</sup> Ni' ruzenë' bach Saulo nupa ta'yéajlë' Xanru', gú'unnë' gútië' légaquië'. Para gunë' caní bidxinë' lahuë' bixúz lo, <sup>2</sup> en gunábinë' lë' tu guichi unná bë', le tsöju'ë lógaquië' bönni' unná bë' quégaca yu'u gapa tu'dubë' bönni' judío, en tu'sëdë' queë' Dios lu yödzö Damasco, ate' channö utsöjxáquië' yugu' bönni', en nigula ta'yéajlë'ë Jesús ni', gaca iché'ë légaquië' nadzungaquië' lu yödzö Jerusalén. <sup>3</sup> Tsanni ni' yú'ugaquië' nöza Saulo, en nupa nacuá'len lë', söjáquië', en cate' chizóa ila'dxinë' Damasco, tsálido'os buzeni'da' tu bení' za' lúzziba, le buzení' ga ni' söjáquië'. <sup>4</sup> Ní'irö gudzö'ë Saulo lu yu, en biyönnë' chi'i Nu rë lë':

—Saulo, Saulo, ¿bizx que ribía ládxu'u neda'?

<sup>5</sup> Saulo gunábinë' Lë', gunné':

—¿Nuzxi li', Xan?

Lë' gunné':

—Neda' Jesús, Nu ribía ládxu'u. Run zi' cuinu', ridá'bagu'u neda'. Raca quiu' ca na' raca queéba' bëdxi, run zi' cuinba' richégu'ba' yaga tuchi' túndë'ë-ba' zi'.

<sup>6</sup> Ní'irö Saulo guzxízidë'ë, gúdxinë', en gunné':

—Xan, ¿bizxi ré'ënu' guna'?

Xanru' gudxë' lë':

—Guyasa, en guyáz lu yödzö, ate' ni' isól-la'a quiu' nu guié li' le ral-la' gunu'.

<sup>7</sup> Guládxinë' yugu' bönni' na' söjácalenë' Saulo, tu'bila'yönnë' chi'i na', sal-la' cuntu nu bila'lé'enë'. <sup>8</sup> Ní'irö böasë' Saulo luyú, en cate' guxá' guiój lahuë', biti' ca' rilé'enë'. Que lë ni na' gula'guélë'ë né'ë, en gula'ché'ë lë' Damasco. <sup>9</sup> Guzóë' ni' tsonna dza nachul-la lahuë', en biti' bi gü'i' gudahuë'.

<sup>10</sup> Zoë' ca' Ananías, bönni' réajlë'ë Cristo, yödzö Damasco, ate' Xanru' bulu'i lahuë' ga zoë' ca tu lu yëla bëchigal, en gudxë' lë':

—Ananías.

Lë' bubí'ë didza', gunné':

—Ni zoa', Xan.

<sup>11</sup> Xanru' gudxë' lë':

—Guyasa, en guyéaj ga naca la' nöza na' nazí'i le Nöza Li, ate' lu yu'u lidxë' Judas gunaba didza' queë' Saulo, bönni' Tarso. Lu yu'u na' rulidzë' Dios. <sup>12</sup> Chibilé'enë' tu bönni' ca tu lu yëla bëchigal zë'ë tsázië' ga zoë', lë' Ananías, en ixóa né'ë lë' para huöálaj guiój lahuë'.

<sup>13</sup> Ni'irö bubí'ë didza' Ananías, rë' Lë':

—Xan, zián nupa chibulu'siyónnë' neda' ca runé' bönni' ni, zián le naca dö' nu'ë le benë' quégaca bönachi ta'yéajlë' Li', nacuá' Jerusalén. <sup>14</sup> Zë'ë ca' ni, dë lu né'ë uláz quégaquië' bixúz unná bë' sönë' yúgu'të nupa tu'lidza Dios len Lo' Li'.

<sup>15</sup> Ni'irö Xanru' rë' Ananías na', rnné':

—Guyéaj, tu' guró caza' neda' bönni' ni para guné' libán ca naca quia' lógaca bönachi izá'a, en lógaquië' bönni' ta'nná bé'enë' légaquië', enca' lógaca bönachi Israel. <sup>16</sup> Ulu'ida' lë' le zián le qui'i sáquë'ë uláz quia' neda', guné' xichina'.

<sup>17</sup> Ni'irö guyijë' Ananías ni', ate' guyázië' yu'u, en guxóa né'ë Saulo, ate' rë' lë':

—Böcha'a Saulo, Xanru' Jesús, Nu na' bulu'i lahui la' nöza ga ni' zo'o, gusól-lë'ë neda' para huöálaj guiój lo', en idisóalenë' Dios Bö' Lá'ayi li'.

<sup>18</sup> La' n'isö gula'guínnaj le naca ca xilácuba' böla lu guiój lahuë', ate' la' böáljatë guiój lahuë'. Ni'irö guyasë' Saulo, en bidilë' nisa. <sup>19</sup> Gudödi ni' gudahuë', en böáca ládxë'ë. Ca chopa tsonna dza guzóalenë' yugu' bönni' ta'yéajlë'ë Cristo nacu'ë Damasco.

### *Runé' libán Saulo lu yödzö Damasco*

<sup>20</sup> La' gusí lotë' Saulo runé' libán queë' Cristo gapa naca lu yu'u ga tu'dubë' bönni' judío, en tu'sédë' queë' Dios, rnné':

—Jesús náquië' Zxf'ini cazë' Dios.

<sup>21</sup> Bulu'báninë' yúgu'të bönni' ni' ta'yönnë' lë', ta'nné':

—¿Naru' caléga bönni' ni bönni' na' busunítië' nupa nacuá' Jerusalén, en tu'lidza Dios lu Lë' Jesús? Para guné' caní bidë' ca' ni para iché'ë légaquië' nadzúngaquië' lógaquië' bixúz unná bë'.

<sup>22</sup> Bidíparö ládxë'ë Saulo, en benë' ga gula'bö'ë böninga bönni' judío nacu'ë Damasco, tu' bulu'inë' légaquië' Jesús naca cazë' Cristo, bönni' na' tunë' löza idinná bé'enë' légaquië'.

### *Rule' Saulo lu ná'agaquië' bönni' judío*

<sup>23</sup> Cate' chigudödi zián dza, gulún xtídza'gaquië' bönni' judío nacu'ë ni' ilútië' Saulo.

<sup>24</sup> Rëla, en të dza gula'bö' nísië' yugu' bönni' judío ga nu ridödi lu zö'ö run chi'i yödzö na' para ilútië' lë', pero gúquibe'enë' Saulo le té'ënné' iluné' queë'. <sup>25</sup> Ni'irö yugu' bönni' ta'yéajlë'ë Cristo gula'guélë'ë Saulo chi'i dzö'ölö, ate' gula'gu'ë lë' tu lu ga'böra zxön naga' du, en bulu'zötje' lë' n'ílö lu zö'ö run chi'i yödzö na'.

### *Rudxinë' Saulo Jerusalén*

<sup>26</sup> Cate' budxinë' Saulo Jerusalén, gú'unnë' tsöjenë' tsözxón bönni' ni' ta'yéajlë'ë Cristo, pero yúgu'të' guládxinë' lë', tu' cabí téquinë' réajlë'ë Saulo na' Cristo. <sup>27</sup> Ni'irö bönni' na' lë' Bernabé gudélë'ë Saulo, en guché'ë lë' ga na' nacu'ë bönni' gubáz nasól-lë'ë Cristo. Busiyönnë' légaquië' ca na' guca queë' Saulo, bilé'enë' Xanru' la' nöza, ate' Xanru' caz bë'lenë' lë' didza', en ca na' benë' Saulo lu yödzö Damasco, len yöl-la' rugu ladxi' benë' libán ca naca queë' Jesús. <sup>28</sup> Ni'irö Saulo guzóalenë' légaquië' lu yödzö Jerusalén, ate' gudálenë' légaquië' tsözxón. <sup>29</sup> Lu yöl-la' rugu ladxi' benë' libán Saulo ca naca queë' Xanru', en gudíl-lalenë' didza' bönni' judío tu'ë didza' griego, ate' légaquië' gula'zóa gula'bö'ë ilútië' lë'. <sup>30</sup> Cate' guléquibe'enë' böchí'ru' ta'yéajlë'ë Cristo lë ni, gula'ché'ë Saulo lu yödzö Cesarea, ate' gula'sól-lë'ë lë' yödzö Tarso, le naca ladzë' Saulo.

<sup>31</sup> Ni'irö guca tsahui' quégaca yúgu'të cö' bönachi queë' Cristo, nacuá' idú luyú Judea, en luyú Galilea, en luyú Samaria, ate' bila'dipa ládxí'gaquië'. Gula'cu'ë lu yöl-la' radxi quégaquië' Xanru', ate' gula'yanë' tu' gúcalenë' Dios Bö' Lá'ayi légaquië'.

*Pedro ruúnë' tu bönni' lë' Eneas*

<sup>32</sup> Ia'tú le guca, cate' Pedro yöjyúé' yugu' böchi'ru', bidxinë' ga nacu'ë bönni' ta'yéajlë'ë Jesús lu yödzö Lida. <sup>33</sup> Yójxáquië' tu bönni' ni' lë' Eneas, chiguca xunu' iz dë' ré enë', nacu'unie' bin. <sup>34</sup> Pedro gudxë' lë':

—Eneas, Jesucristo ruúnë' li'. Guyasa, en butubi xto'o.

La' guyásatë' Eneas na'. <sup>35</sup> Yúgu'të nupa nacuá' yödzö Lida, en yödzö Sarón bila'lë'e lë', ate' bulu'huöáca queë' Xanru', tu' chita'yéajlë' Lë'.

*Rátinu Dorcas, en rubannu*

<sup>36</sup> Ia'stú le guca, lu yödzö Jope zóanu tu nigula réajlë'ënu Cristo, lënu Tabita, en ca naca didza' griego lënu Dorcas. Bennu nigula ni zián le nácagaca dxi'a le tácalen bönachi yechi'. <sup>37</sup> Le guca dza ni', gü'linu Dorcas na', en gútinu. Gudödi gula'guíbinu lënu, gula'guíxjé'-nu tu lu yu'u ga naca buropi cuía. <sup>38</sup> Tu' dë yödzö Lida gálal'sö ga na' dë yödzö Jope, ga na' zoë' Pedro, bila'yönnë' bönni' Jope na' ta'yéajlë'ë Cristo zoë' Pedro ni', ate' que lë ni na' gula'sól-lë'ë chopë' bönni' ga na' zoë', ate' guláta'yué' lahuë', të' lë':

—Biti' tsenu' guídu' queétu'.

<sup>39</sup> Ní'irö la' guyásatë' Pedro, sa'yéajlenë' légaquië'. Cate' bidxinë' ni', la' gula'chë'të' lë' ga naca lu yu'u ga dënu nigula nati na'. Ní'irö yugu' nigula uzëbi bulu'dúbinu gásibi'ilë', ta'bódxinu, en tu'lui'nu lë' lari' quégäquië' bönni', en nigula, yugu' le bennu Dorcas cate' ni' zóalennu légacanu. <sup>40</sup> Ní'irö Pedro bubéajë' ní'ilö yúgu'të nupa nacuá' ni', ate' buzóa zxibë', rulidzë' Dios. Ní'irö buécjë' ga dënu Dorcas na', gunné':

—Tabita, guyasa.

La' buxa'të guiój lonu Dorcas. Cate' bilé'enu-në' Pedro, la' guyástenu, gurö'önü.

<sup>41</sup> Gudélë'ë Pedro ná'anu, en buchisë'-nu. Ní'irö bulidzë' bönni' na' ta'yéajlë'ë Jesús, len yugu' nigula uzëbi na', ate' busudxinë' Dorcas na' lógaquië', nabannu. <sup>42</sup> Ca guca lë ni guzé didza' idú lu yödzö Jope, ate' gula'yéajlë' bönachi zián Xanru' Jesús. <sup>43</sup> Bugá'anë' Pedro yödzö Jope na' zián dza lu yu'u lidxë' Simón, bönni' runë' tsahui' guídi zxa bëdxi.

## 10

*Le benë' Pedro lidxë' Cornelio*

<sup>1</sup> Zoë' yödzö Cesarea tu bönni' lë' Cornelio, bönni' rinná bë'enë' tu gáyu'ë bönni' röjáquië' gudil-la, nazi'i lágaquië' Bönni' Italia Röjáquië' Gudil-la. <sup>2</sup> Cornelio na' reaj ládxë'ë Dios, en rádxinë' Lë', ate' yúgu'të bönachi nacuá' lidxë' núngaca lë' tsözxón. Runödzjë' Cornelio dumí zián le rácalen bönachi yechi', en rulídzatrica'së' Dios. <sup>3</sup> Tu dza idú ridödi xihuó bilé'enu' Cornelio ca tu lu yëla bëchigal, razië' tu gubáz lá'ayi queë' Dios ga na' zoë', en rë' lë':

—Cornelio.

<sup>4</sup> Gúdxinië' Cornelio. Buyúé' gubáz lá'ayi na', en gudxë' lë':

—¿Bizxi rnno', Xan?

Gubáz lá'ayi na' gudxë' lë', rnnë':

—Dios riyönnë' le rulidzu'-në', en nőzinë' ca runu', rácalenu' bönachi yechi'. <sup>5</sup> Na'a, gusól-la' yugu' bönni' tsójáquië' yödzö Jope tsöjlídzagaquië' bönni' na' lë' Simón, zoa ia'tú lë' Pedro. <sup>6</sup> Bönni' ni zoë' lidxë' tu bönni' runë' tsahui' guídi zxa bëdxi. Bönni' ni, lësca' lë' Simón, ate' zoa lidxë' ra' nísado'. Pedro na' guíe' li' le ral-la' gunu'.

<sup>7</sup> Cate' chibuzé'ë gubáz lá'ayi na' bë'lenë' lë' didza', bulidzë' Cornelio chòpabi' bi'i huen dxin queë', en tuë' bönni' rejë' gudil-la reaj ládxë'ë Dios, en dzágüië' bönachi nacuá' lidxë' Cornelio. <sup>8</sup> Cate' budxi busiyönnë' légaquië' yúgu'të le guca, gusól-lë'ë légaquië' yödzö Jope.

<sup>9</sup> Dza buropi, tsanni ni' yú'ugaquië' nøza, en ta'dxinë' gala' ga dë Jope na', la' ní'isö gurenë' Pedro ícjo'olö yu'u para ulidzë' Dios, ni' naca idú huagubidza. <sup>10</sup> La' ná'asö ridunë' Pedro, en gú'unnë' gahuë', ate' tsanni ni' tu'pé'ë queë', bilé'enë' le naca ca tu lu yëla

béchigal. <sup>11</sup> Bilé'enë' nayalaj lúzxiba, en ruhuötaj tu le naca ca tu lari' guitsa' zxön ga zoë', le naga' idapa la'a. <sup>12</sup> Lahui lari' na' dxíagacaba' yugu' böa' guixi' izá'a nacuá' tapa ni'a ná'agacaba', en yugu' böa' tá'ayöj l'é'egacaba' lu yu, en yugu' böa' zoa xíligacaba'. <sup>13</sup> Ní'irö biyönnë' chi'i nu rë lë':

—Pedro, guyasa. Béti-gacaba', en gudagu.

<sup>14</sup> Bubi'ë didza' Pedro, rnnë':

—¡Caléga, Xan! Catu caz gudahua' le cabí ral-la' gágutu', o le cabí naca dxi'a.

<sup>15</sup> Le buropi luzuí biyönnë' chi'i nu na' gudxi lë':

—Le nunë' Dios dxi'a, biti' innó' que: "Biti' naca dxi'a."

<sup>16</sup> Tsonna luzuí guca caní, ate' ní'irö la' buépitë lari' zxön na' lúzxiba. <sup>17</sup> Tsanni ni' rö'ë böniga Pedro, rizá' ládxë'ë bizxi sa'yéaj lë na' bilé'enë' ca tu lu yëla béchigal, bila'dxinë' bönni' na' nasól-lë'ë Cornelio légaquië' ra' yu'u, ta'nabë' gazxi zoa lidxë' Simón na'. <sup>18</sup> Cate' bila'dxinë' ni', bulu'lidzë' nupa nacuá' yu'u na', en gula'nábinë' légaquië' channö zoë' tu bönni' lë' Simón ni', zoa ia'tú lë' Pedro. <sup>19</sup> Tsanni ni' rizá' ládxë'ë Pedro ca naca lë na' bilé'enë', Dios Bö' Lá'ayi gudxë' lë', rnnë':

—Buyútsöca'. Chibila'dxinë' tsonne' bönni' ni, tu'guiljë' li'. <sup>20</sup> Guyaschi na'a, en bötaj zzan yu'u. Biti' gaca chopá ládxu'u tséajlenu' légaquië', tu' nasól-la'a neda' yugu' bönni' ni.

<sup>21</sup> Ní'irö bötje' Pedro zzan yu'u ga na' nacu'ë bönni' na' nasól-lë'ë Cornelio, en gudxë' légaquië':

—Neda' bönni' ruguílajli'. ¿Bizxi huen zá'ali' ni?

<sup>22</sup> Bulu'bi'ë didza', té' lë':

—Cornelio, tu bönni' rinná bé'enë' bönni' rójáquië' gudil-la, nasól-lë'ë netu'. Náquië' bönni' tsahui', en rádxinë' Dios. Yúgu'të bönni' judío tunë' bal bönni' ni, en nadxi'igue-quinë' lë'. Ia'tú le guca, tu gubáz lá'ayi queë' Dios bélénë' lë' didza', en gudxë' lë' isól-lë'ë nu udulídza li' guídu' lidxë' para yönnë' didza' gu'u.

<sup>23</sup> Ní'irö Pedro gulu'ë légaquië' lu yu'u, en bë'ë ga ila'cu'ë. Cate' za' rení' ia'tú dza, guyasé' Pedro, en guyéajlenë' légaquië'. Bal-lë' böchi'ru' nacu'ë Jope na' gulunë' lë' tsözxón.

<sup>24</sup> Dza bunni ni', bila'dxinë' Cesarea. Chizóë' Cornelio ribözë' légaquië', ate' chinutubë' yugu' di'a dza queë', en yugu' böchi' luzë'ë nadxi'irönë' lidxë'. <sup>25</sup> Cate' guyázië' Pedro lö'a, birúajë' Cornelio yu'u, yöjtságuië' lë'. Biyéchuë' xini'ë Pedro, en guyéaj ládxë'ë lë' ca runru' queë' Dios caz. <sup>26</sup> Pedro buchisë' lë', en gudxë' lë':

—Guyasa. Lësca' bönachi yödzölió naca' ca nacu' li'.

<sup>27</sup> Ni' tu'isë' ca' didza', guyázatë' Pedro yu'u, en yöjxáquië' nudúbigaca bönachi zián ni'. <sup>28</sup> Ní'irö Pedro gudxë' légaquië', rnnë':

—Libi'ili' nöz quézili' ca rinná bë' xibá queë' Moisés, rnna biti' ral-la' gunë' tu bönni' judío tsözxón o tsázalenë' nu bönni' izá'a. Na'a, Dios bulu'inë' neda' biti' ral-la' innía' queë' nitúë' bönni' náquië' cá'asö o biti' náquië' dxi'a. <sup>29</sup> Que lë ni na' cate' bulídzali' neda', la' bídatea', en biti' guca chopá ládx'a. Rinaba' na'a, ¿bizx que na' bulídzali' neda'?

<sup>30</sup> Ní'irö bubi'ë didza' Cornelio, gunné':

—Chiguca tapa dza ca zóaru' na'a, idú ridödi xihuó, cate' ni' runa' gubasa, en rulidza'-në' Dios lu yu'u lidxa' ni, bilé'eda'-bi' tubi' bönni' ra'bán nácubi' lari' répi yösa bení', duluf'i lobi' neda'. <sup>31</sup> Caní gúdxibi' neda': "Cornelio. Dios riyönnë' le rulidzu'-në', en nözinë' ca runu', rácalenu' yugu' bönachi yechi'. <sup>32</sup> Na'a, isól-lu'u nu bönni' lu yödzö Jope para tsöjlídzë' tu bönni' lë' Simón, zoa ia'tú lë' Pedro. Bönni' ni zoë' lidxë' tu bönni' runë' tsahui' guídi zxa bëdxi, en lë' ca' Simón. Zoa lidxë' bönni' ni ra' nísado'. Cate' idxinë' Pedro na' ga zu', usiyönnë' li' didza' dxi'a." <sup>33</sup> Caní guca, la' gusól-la'tea' nu tsöjlidza' li', ate' tsahui'do'benü' bidu' ga zóatu' ni. Que lë ni na' zóatu' ni yúgu'tetu', nudúbitu' lahuë' Dios para uzé nágatu' le inná bë'enë' Dios li' innó'.

*Didza' bë'ë Pedro lidxé' Cornelio*

<sup>34</sup> Ní'irö gusí lahuë' Pedro ru'ë didza', rnnë':

—Le nácatë réajni'ida' na'a, biti' ruyusë' Dios yöl-la' rinnësö quégaca bönachi, pero tuz ca rilé'ené' rë'u. <sup>35</sup> Dios raza ládxé'ë bönachi idútë yödzölió, nupa na' tadxi Lë', en tun le naca dxi'a. <sup>36</sup> Gusól-lë'ë Dios xtídzë'ë ga nacuá' bönachi Israel, en gusól-lë'ë nu ben libán que didza' dxi'a, le run ga raca dxi'a quégaca bönachi, lë na' bidxín queéru' lu né'ë Jesucristo. Lë cazé' náquié' Xanru' yúgu'tëru'. <sup>37</sup> Libf'ili' nöz quézili' lë na' guca luyú Judea, le gusí lo guca luyú Galilea gudödi benë' libán Juan para ila'dila bönachi nisa. <sup>38</sup> Nözili' ca benë' Dios le guca queë' Jesús, bönni' Nazaret. Gusól-lë'ë Dios Bö' Lá'ayi, en yöl-la' huáca queë' para sóalengaca Lë'. Nözili' ca na' gudé' Jesús, runë' le naca tsahui', en ruúnë' yúgu'të nupa gula'gui'i gula'zaca' lu na' tu' xihui'. Caní benë', tu' guzóalenë' Dios Lë'. <sup>39</sup> Na'a, netu' runtu' ba nalí que yúgu'të lë na' benë' Jesús luyú Judea, en lu yödzö Jerusalén, en ca na' guca, gulútië' Jesús, cate' bulu'dé'ë Lë' lë'e yaga cruz. <sup>40</sup> Ní'irö Dios busubanë' Lë' cate' guca tsonna dza nátië', en benë' ga bulu'i lahuë' ga zóatu' netu'. <sup>41</sup> Biti' bulu'i lahuë' lógaca yúgu'të bönachi, pero lotu' netu' bulu'i lahuë'. Dios guróë' netu' dza ni'te para guntu' ba nalí queë' Jesús, ate' gü'i gudágulento' Lë' tsözxón gudödi bubanë' lu yöl-la' guti. <sup>42</sup> Gunná bë'enë' Dios netu' guntu' libán lógaca bönachi, ate' runtu' ba nalí queë' Cristo, náquié' Nu buzúa cazé' Dios para uchi'a usöróë' nupa nabángaca, en nupa chinátigaca. <sup>43</sup> Lësca' yúgu'të bönni' gulu'ë didza' uláz queë' Dios gulunë' ba nalí queë' Jesús, gula'nnë': "Yúgu'të nupa ila'yéajlë' Lë', Dios uniti lahuë' dul-la' nabága'gaquié' ni'a que le benë' Lë'."

*Dios Bö' Lá'ayi ridisóalenë' bönachi iz'a*

<sup>44</sup> Ni' ruí'isë' caní didza' Pedro, la' bidxitë' Dios Bö' Lá'ayi, bidisóalenë' légaquië', yúgu'të nupa ni' ta'yöni libán runë' lë'. <sup>45</sup> Gula'ná' badxé' bönni' judío ta'yéajlë'ë Cristo, nupa na' bila'dxín ni' tsözxón len Pedro, tu' bidë' Dios Bö' Lá'ayi, Nu na' nasól-lë'ë Dios Xuz. Bidisóalenë' bönachi ni' biti' nácagaca judío. <sup>46</sup> Caní gulunë' tu' bila'yönnë' tu'ë bönni' zi'tu' na' didza' yúbölö, en tunë' Dios zxön. <sup>47</sup> Ní'irö bë'ë didza' Pedro, gunnë':

—¿Naru' huácatsö nu inná be'e bönachi ni para cabí ila'dila nisa? Naca bë' Dios Bö' Lá'ayi bidisóalenë' légaquië', ca na' bidisóalenë' netu'.

<sup>48</sup> Gunná bë'ë Pedro ila'dilë' nisa tu' nazí' lu ná'agaquië' Lë' Xanru' Jesús. Ní'irö yugu' bönni' ni' guláta'yuë' lahuë' Pedro ugá'analenë' légaquië' ca chopa tsonna dza.

## 11

*Didza' bë'ë Pedro lógaca bönachi queë' Cristo nacuá' Jerusalén*

<sup>1</sup> Bila'yönnë' gubáz nasól-lë'ë Cristo, en bôchi'ru' nacu'ë luyú Judea ca na' bönni' biti' nácagaquië' judío gula'zí' lu ná'agaquië' xtídzë'ë Dios. <sup>2</sup> Cate' budxinë' Pedro Jerusalén, bôchi'ru' judío gula'dil-lalenë' lë' didza'. <sup>3</sup> Gulé' Pedro:

—¿Bizz que yöjtsú'ulenu' bönni' biti' nácagaquië' judío, en gudágulenu' légaquië' tsözxón?

<sup>4</sup> Ní'irö gusí lahuë' Pedro rusiyönnë' légaquië' idútë lë na' guca, rnnë':

<sup>5</sup> —Guzóa' lu yödzö Jope, en cate' ni' rulidza'-në' Dios, bilé'eda' ca tu lu yëla bëchigal tu le bulu'inë' Dios neda'. Bilé'eda' bötaj birúaj lúzxiba tu le naca ca tu lari' guitsa' zxön, naga' idapa la'a, ate' bidxín ga na' zoa'. <sup>6</sup> Cate' ni' ruyúa' le para ilé'eda' le dxia láhuilö, bilé'egacada'-ba' böa' guixi' nacuá' tapa ní'agacaba', yugu' böa' guixi' sínia', en böa' tá'ayöj lë'egacaba' lu yu, en böa' zoa xíligacaba'. <sup>7</sup> Biyönda' chi'i nu gudxi neda': "Pedro, guyasa. Bëti-ba', en gudagu." <sup>8</sup> Ní'irö gudxa'-në': "Biti' ca', Xan. Catu caz gudhua' tu le cabí ral-la' gágutu', o tu le cabí naca dxi'a." <sup>9</sup> Ní'irö le buropi luzuí bulidza chi'i lúzxiba na' neda', en gudxi neda': "Le nunë' Dios dxi'a, biti' innó' biti' naca dxi'a."

<sup>10</sup> Tsonna luzuí guca caní, ate' ní'irö idútë lë na' bilé'eda' la' buépitë lúzxiba. <sup>11</sup> La'

ní'isö bila'dxintë' tsonnë' bönni' ra' yu'u ga na' zoa', narúajgaquië' yödzö Cesarea, nasól-lë' légaquië' tu bönni' lë' Cornelio. Sududfljagaquië' neda'. <sup>12</sup> Dios Bö' Lá'ayi gudxë' neda': "Guyéajlen légaquië', en cabí gaca chopa ládxu'u." Lësca' izxópatë' böchi'ru' ni gula'zá'lenë' neda' tsözxón. Guyéajtu' Cesarea, ate' guyaztu' lidxë' tu bönni' zoë' ni'. <sup>13</sup> Bönni' ni' gudíxjöi'inë' netu' ca na' bilé'enë', bidxinë' tu gubáz lá'ayi queë' Dios lu yu'u lidxë'. Guzuínë' lahuë', en gudxë' lë: "Na'a isól-la'gacu'-në' bönni' tsójáquië' yödzö Jope, tsöjlídzagaquië' Simón, zoa ia'tú lë' Pedro. <sup>14</sup> Bönni' na' usiyonné' li' naca gaca uló' li', en ulu'lágaca ca' yúgu'té bönachi nacuá' lidxu'." <sup>15</sup> Cate' ni' gusí lahua' ruf'ilena' légaquië' didza', bidisóalenë' Dios Bö' Lá'ayi légaquië' ca na' bidisóalenë' rë'u zí'atëlö. <sup>16</sup> Ni'irö yöjneda' didza' na' bë'ë Xanru', gunné': "Le nácatë Juan buquilë bönachi nisa lu nisa, pero libíili', gaca queéli' le rulu'isö yöl-la' ridila nisa na', idisóalenë' Dios Bö' Lá'ayi libíili'." <sup>17</sup> Que lë ni na', channö Dios gusól-lë'ë Dios Bö' Lá'ayi quégaquië', la' tuz ca benë' queérü' rë'u réajlë'ëru' Xanru' Jesucristo, ¿núzzxitë neda' inná bé'eda'-në' Dios?

<sup>18</sup> Ni'irö, cate' bila'yönnë' lë ni, gula'cuá' dxíë', en gula'gu'ë Dios yöl-la' ba, ta'nnë':  
—Caní naca, Dios ru'ë lataj bönni' biti' nácagaquië' judío, tu'bí'i ládxı'gaquië' para ila'deli'në' yöl-la' na'bán idú.

### *Yugu' bönni' nacu'ë Antioquía ta'yéajlë'ë Cristo*

<sup>19</sup> Cate' ni' yugu' bönni' judío biti' ta'yéajlë'ë gulútië' Esteban, en gula'bía ládxı'gaquië' ia'zíca'rö bönachi ta'yéajlë' Cristo, bulu'zxunnaj bönachi ni, en gulásilasi zián yödzö luyú Fenicia, en luyú Chipre, en lu yödzö Antioquía. Gulunë' libán ni' que xtídzë'ë Dios, pero lógacasö bönachi judío. <sup>20</sup> Yugu' bönni' Chipre, en yugu' bönni' Cirene, gula'cuá'lenë' légaquië', ate' yugu' bönni' ni, cate' bila'dxinë' lu yödzö Antioquía, gulu'ilenë' ca' didza' yugu' bönni' izá'a. Gulunë' libán lógaquië' que didza' dxi'a ca naca queë' Xanru' Jesús. <sup>21</sup> Yöl-la' huáca queë' Xanru' guzóalen légaquië', ate' bönachi zián gula'yéajlë' Xanru', en bulu'huöáca queë'.

<sup>22</sup> Cate' bidxín didza' ca guca lë ni, ate' bila'yönnë' bönni' queë' Cristo nacu'ë Jerusalén, gula'sól-lë'ë Bernabé tséajë' Antioquía na'. <sup>23</sup> Cate' Bernabé na' bidxinë' Antioquía, bilé'enë' le ruzá' ládxë'ë Dios quégaquië', en budzéjanë'. Guchízië' icja nágagaquië' para ila'día'tica'sé' queë' Xanru' idú ládxı'gaquië'. <sup>24</sup> Náquië' Bernabé na' tsahui', en idú zóalenë' Dios Bö' Lá'ayi lë', en idú ládxë'ë réajlë'ë Cristo. Ni'a que libán benë' Bernabé na', bönachi zián lu yödzö na' gula'yéajlë' Xanru'.

<sup>25</sup> Gudödi ni', guyijë' Bernabé na' yödzö Tarso, yöjdiljë' Saulo. Cate' budzólinë' lë', buché'ë lë' Antioquía. <sup>26</sup> Idú ca tu iz gula'cu'ë ni', tunë' tsözxón bönachi queë' Cristo, en tu'sédinë' bönachi zián. Lu yödzö Antioquía na', gusí lo gula'zí' lógaquië' cristiano le rnna len didza' xidza': Bönachi Queë' Cristo, nupa ni' ta'yéajlë' Lë'.

<sup>27</sup> Dza ni' bila'rúajë' Jerusalén, en yøjáquië' Antioquía bal-lë' bönni' tu'ë didza' uláz queë' Dios. <sup>28</sup> Guzuínë' Agabo, bönni' dzáguië' yugu' bönni' na', en uláz queë' Dios Bö' Lá'ayi buzéajni'inë' légaquië', gunné':

—Si' gaca gubín idútë yödzölió.

Guca gubín na' cate' ni' rinná bë'ë Claudio, lu yödzö Roma. <sup>29</sup> Ni'irö gula'zí' lu ná'agaquië' bönni' ta'yéajlë'ë Cristo nacu'ë Antioquía, ila'sól-lë'ë tsca le dësö que queé-gaquië', le gácalen böchi'ru' nacu'ë luyú Judea. <sup>30</sup> Caní gulunë', ate' lë na' bulu'nödzjë', gula'gu'ë lu ná'agaquië' Bernabé, en Saulo para ilu'ë le lógaquië' bönni' gula tapa chi'ë bönachi queë' Cristo nacu'ë Judea.

### *Tútië' Jacobo, en ta'gu'ë Pedro lidxi guíë*

<sup>1</sup> Dza na' Herodes, bönni' unná bë', benë' ga gula'zönë' bal-lë' bönni' queë' Cristo para ulu'saca' zi'ë légaquië'. <sup>2</sup> Gunná bë'enë' bönni' gulútië' Jacobo, böchë'ë Juan. Gulu'ë lë'

guié tuchi'. <sup>3</sup> Cate' gúquibe'ené Herodes gula'yaza láx'i'gaquié bönni' judío lë ni, bené' ga gula'zöné' ca' Pedro. Gulaca lë ni dza ni' raca laní cate' tahué' yóta xtila biti' nazí'i cúa zi que. <sup>4</sup> Gudödi gula'zöné' Pedro, gula'gu'ë lë' lidxi guíé, en bulu'dödë' lë' lu ná'agaquié' tapa cö' bönni' rójáquié' gudil-la, nacu'ë tapé' tu huéaj cö' na', para uyúgaquié' lë'. Yu'u ládxé'ë Herodes ubéajé' Pedro lógaca bönachi tödi Laní Pascua, laní na' tu'subané' ca bené' Dios, bubéajé' bönachi judío luyú Egipto. <sup>5</sup> Caní guca, nun ch'igacré' Pedro lu yu'u lidxi guíé na', pero bönachi queé' Cristo bulu'lídzatica'sö Dios, ta'nábini Dios gácalené' Pedro.

### Dios rubéajé' Pedro lidxi guíé

<sup>6</sup> Cate' si' idxín dza yu'u ládxé'ë Herodes ubéajé' Pedro lidxi guíé na', la' dzö' n'isö dë' rásié' Pedro, ate' nacu'ë chopé' bönni' rójáquié' gudil-la cuita lë'ë Pedro na', en núga'gaquié' lë' chopu du guíé. Gula'cu'ë ia'bal-lë' bönni' rójáquié' gudil-la tapa chi'ë ga nu riyaza lidxi guíé na'. <sup>7</sup> Tsárido'os bului'i lahué' tu gubáz lá'ayi queé' Xanru' ni', ate' buzení'da' bení' lidxi guíé. Gudané' gubáz lá'ayi na' cuita lë'ë Pedro, ate' busubané' lë', en gudxé' lë':

—Guyaachi.

Ní'irö bulu'huédxí du guíé na' naga' ni'a në'ë Pedro. <sup>8</sup> Gubáz lá'ayi na' gudxé' lë', gunné':

—Béga' lë'u, en gudá' xirachu'.

La' benté' Pedro caní. Ní'irö gubáz lá'ayi na' gudxé' lë', rnné':

—Guxóa lari' cídzu'u, en gudá len neda'.

<sup>9</sup> Burúajé' Pedro, sa'yéajlené' gubáz lá'ayi na', pero biti' réquibe'ené' nácaté le runé' gubáz lá'ayi na'. Gúquiné' yélasö rinené'. <sup>10</sup> Cate' chigula'dödë' ga nacu'ë bönni' zí'alö, en bönni' buropi cö', bönni' na' rójáquié' gudil-la tapa chi'ë, bila'dxiné' ga zoa le néquini guíé le nusayaj ga nu riyaza lidxi guíé na', ga nu rurúaj la' nöza que yödzö. Ga nu riyaza na', rácassö que guyalaj. Cate' bila'rúajé' ni', gula'zé'ë ga ridzaga ia'turö nöza, ate' ni' gubáz lá'ayi na' la' bulá'alenté' Pedro. <sup>11</sup> Ní'irö réquibe'ené' Pedro, ate' lu icja ládxí'da'azé' gunné':

—Na'a chinözda' le nácaté gusól-lë'ë Xanru' gubáz lá'ayi queé', en busölé' neda' lu në'ë Herodes, en lu yúgu'të le gulé'ënné' bönni' judío iluné' quia'.

<sup>12</sup> Tsanni ni' yu'ë nöza Pedro, rizá' ládxé'ë ca naca lë na' guca, ate' bidxiné' lídxinu María, xiná'abi' Juan, bi'i na' zoa ia'tú labi' Marcos. Lu yu'u na' nudúbigaca bönachi zián ta'yéajlé' Cristo, en tu'lidza Dios. <sup>13</sup> Cate' bulidzé' Pedro ra' yu'u lö'a, birúajbi' bi'i nigula lëbi' Rode para inözibi' nuzxi na'. <sup>14</sup> Cate' búnbé'ëbi' bi'i nigula ni chi'ë Pedro, lu yöl-la' rudzeja queébi' biti' gusaljbi' yu'u, pero carelö bőajbi' lu yu'u, yöjtíxjö'ibí' nupa nacuá' ni', rnnabi':

—Zoë' Pedro ra' yu'u.

<sup>15</sup> Ní'irö gulé' lëbi':

—Nachixi icju'.

Lébi' tsútsurö ben xtídza'bi' naca caní. Ní'irö gula'nné':

—Caléga lë'. Bixín queé' na'.

<sup>16</sup> Tsanni na' biti' zoa dxíe' Pedro rulidzé' nupa nacuá' lu yu'u. Cate' gula'saljé' yu'u, gula'nítisiné' cate' bila'lé'ené' lë'. <sup>17</sup> Ní'irö guchisa në'ë Pedro para ila'cu'ë dxisö, ate' busiyönné' légaquié' ca bené' Xanru', bubéajé' lë' lidxi guíé. Ní'irö gudxé' légaquié':

—Guli'siyónné' ca' Jacobo, en yugu' bőchi'ru' ca na' guca.

Ní'irö burúajé' Pedro, sa'yéajé' ga yúbölö.

<sup>18</sup> Cate' za' rení' dza na', bönni' rójáquié' gudil-la gula'bö'ë böniga nacxi guca, bíti'rö yu'ë Pedro lidxi guíé. <sup>19</sup> Ní'irö gusól-lë'ë Herodes nupa tsöjxi'gaca Pedro. Cate' biti' bulu'dzöliné' lë', Herodes gunabi yúdxiné' yugu' bönni' na' rójáquié' gudil-la, bönni'

gulún chi'ë Pedro. Gudödi ni' gunná bë'enë' nupa bëtigaca yugu' bönni' na' röjáquië' gudil-la. Ní'irö buzé'ë Herodes luyú Judea, sa'yéajé' Cesarea, ate' bugá'anë' ni'.

### *Ca gútië' Herodes*

<sup>20</sup> Dza ní'isö rilenë' Herodes bönnachi yödzö Tiro, en yödzö Sidón. Zi'alö bönnachi lu xiyúë' Herodes na' gula'sól-la' le biyadzaj quégaca bönnachi lu xiyúgaca yödzö Tiro, en Sidón na', pero tu' rilenë' Herodes légaquië', bíti'rö bi ta'sól-lë'ë quégagaquië'. Ní'irö gulunë' tuz bönni' Tiro, en Sidón na', ate' gulunë' ga soë' Blasto uné quégagaquië' lahuë' Herodes na'. Náquië' Blasto na' huen dxin nadéli'në' lataj lo lahuë' Herodes. Gulé'ënnë' bönni' Tiro, en Sidón na' ila'dxinë' lahuë' Herodes, para ila'nábinë' lë' ugá'ana tsahui' didza' bizxaj quégagaquië'. <sup>21</sup> Ní'irö budxië' bë' Herodes dza yönne' légaquië', ate' dza na' gurö'ë xilatjë' ga ruchi'a rusörö'ë bi raca, nácuë' lari' nazaca', en benë' libán lógaquië'.

<sup>22</sup> Ní'irö bulu'lidzé' zidzaj bönni' na', ta'nné':

—¡Caléga bönni'sö ni! ¡Dios caz ni ru'ë didza'!

<sup>23</sup> La' ná'asö la' bë'të' gubáz lá'ayi queë' Xanru' lë' tu' buzi'ë lë' cazë' yöl-la' ba ral-la' gaca queë' Dios. Ní'irö gurö'ë Herodes na' buzuga', ate' gútië' tu' táguba' lë'.

<sup>24</sup> Ní'irö guca libán que xtídzé'ë Xanru', ate' gula'yán nupa nazi' lu ná'agaca le.

### *Le zi' alö luzuí röjéngaquië' Bernabé, en Saulo libán*

<sup>25</sup> Cate' Bernabé, en Saulo chibulu'dödë' dumí na' lu ná'agaquië' bönni' gula tapa chi'ë bönnachi queë' Cristo nacu'ë Jerusalén, bulu'zé'ë ni', yöjhuójgaquië' yödzö Antioquía. Gula'chë'ë-bi' ca' bi'i Juan, zoa ia'tú labi' Marcos.

## 13

<sup>1</sup> Dza ná'asö gula'cu'ë bönni' tu'ë didza' uláz queë' Dios, en bönni' tu'sédinë' bönnachi lu yödzö Antioquía, tunë' tu zxön bönnachi queë' Cristo lu yödzö na'. Caní légaquië': Bernabé,  
Simón, (lë' ca' Bönni' Gasja),  
Lucio, (bönni' Cirene),  
Saulo,

Manaén, (bönni' na' guzxónlenë' tsözxón Herodes, bönni' rinná bë'ë luyú Galilea).

<sup>2</sup> Tsanni ni' nudúbigaquië' bönni' ni queë' Xanru', en tunë' gubasa, Dios Bö' Lá'ayi gudxë' légaquië', rnnë':

—Guli'béaj-gáquië' quez quia' Bernabé, en Saulo para tsöjéngaquië' dxin na' bulidza' légaquië' ilunë'.

<sup>3</sup> Budxi gulunë' gubasa, en gulu'ilenë' Dios didza', ní'irö gula'xóa ná'agaquië' chopë' ni, en gula'sól-lë'ë légaquië'.

### *Yugu' gubáz nasól-lë'ë Cristo tunë' libán luyú Chipre*

<sup>4</sup> Ní'irö yöjáquië' Bernabé, en Saulo yödzö Seleucia, tu' gusól-lë'ë Dios Bö' Lá'ayi légaquië' ni', ate' ni' gula'benë' tu lë'e barco le guché' légaquië' ga naca tu luyú bidxi lu nísado', nazi'i le Chipre. <sup>5</sup> Cate' bila'dxinë' lu yödzö Salamina luyú na', gulu'ë xtídzé'ë Dios gapa naca lu yu'u ga tu'dubé' bönni' judío luyú na', en tu'sédé' queë' Dios. Naché'gaquië'-bi' bi'i Juan para gunbi' légaquië' tu zxön. <sup>6</sup> Budxi gula'dödë' idú gapa dë yödzödo' luyú bidxi na' lu nisa zxön, ní'irö bila'dxinë' yödzö Pafos. Yöjxáca'gaquië' Barjesús, tu bönni' judío ni'. Náquië' bönni' udzá' rinné yë'ë, en rnnë' ru'ë didza' uláz queë' Dios. <sup>7</sup> Bönni' ni dzáguië' Sergio Paulo, bönni' réajni'i rinná bë'ë. Bönni' unná bë' na' bulidzé' Bernabé, en Saulo, tu' ré'ënë' yönne' xtídzé'ë Dios. <sup>8</sup> Ní'irö bönni' udzá' na' gudá'baguië' Bernabé, en Saulo, tu' gú'unnë' gunë' ga biti' tséajlé'ë Dios bönni' rinná bë'ë. Bönni' udzá' na' lë' ca' Elimas tsca naca xtídzá'gaca bönnachi izá'a ga na'. <sup>9</sup> Ní'irö Saulo,

lë' ca' Pablo, buzóá tsutsu lahuë', zóalenë' Dios Bö' Lá'ayi lë'. Ruyúë' Elimas na' <sup>10</sup> en rë' lë':

—Li', bönni' rizi' yë', en bönni' huiá' dö', nacu' ca zxí'ini caz tu' xihui', en bönni' biti' rilé'enë' dxi'a yúgu'të le naca tsahui'. ¿Naru' cabí soa dxitso' ca runu', ridá'bagu'u didza' tsahui' queë' Xanru', en ruzágú'u xinöza nu ré'ëni tséajlë' Lë'? <sup>11</sup> Na'a, Xanru' usaca' zi'ë li', ate' ichul-la lo', en biti' ilé'enu' gubidza nababa dza.

La' guchúl-laté lahuë' Elimas na', ate' gudé' nilö ná'alö, riguiljë' nuzxi sön në'ë para iché' lë'. <sup>12</sup> Cate' bilé'enë' bönni' unná bë' na' lë na' guca, bubáninë' ca naca xtídzë'ë Xanru', ate' guyéajlë'ë Cristo.

### *Le gulunë' Pablo, en Bernabé lu yödzö Antioquía luyú Pisidia*

<sup>13</sup> Ni'irö buzé'ë Pablo lu yödzö Pafos na' len yugu' bönni' dzágagaquië' lë', nacu'ë tu lë'e barco, ate' bila'dxinë' yödzö Perge luyú Panfilia. Lu yödzö na' bi'i Juan bulá'alenbi' légaquië', en bőajbi' Jerusalén. <sup>14</sup> Gudödi ni' bulu'zé'ë Perge na', en yójáquië' yödzö Antioquía luyú Pisidia. Lu yödzö na', cate' ni' naca dza lá'ayi quégaquië' bönni' judío, gula'yázië' lu yu'u ga tu'dubë' tu'sëdë' queë' Dios, ate' lu yu'u na' gula'bö'ë. <sup>15</sup> Ni'irö tu bönni' zoë' ni' bulabë' guichi ga nazúaj xibá queë' Dios, enca' le nazúaj lu guichi ca gula'nné' bönni' gulu'ë didza' uláz queë' Dios. Gudödi ni' yugu' bönni' unná bë' que yu'u na' gula'sól-lë'ë nu yojódx Saulo, en Bernabé, gunné':

—Libi'ili', bőchi'tu'. Channö nuá'ali' bi innali' le uzéajni'i netu', guli'nné'.

<sup>16</sup> Ni'irö guzuínë' Pablo, en guchisa në'ë para ila'cu'ë dxisö, gunné':

—Buli'zé' nágali' le guía' libi'ili', bönni' Israel, en libi'ili', núloli' rádxili'-në' Dios. <sup>17</sup> Xanru' Dios, Nu ta'yéaj ládzi'gaca bönachi Israel, guró' cazë' xuz xtó'oru', en benë' ga gula'yándë'ë cate' ni' nácagaquië' bönni' zi'tu' luyú Egipto. Len yöl-la' huáca zxön queë' bubéajé' légaquië' luyú ni'. <sup>18</sup> Idú choá' iz Dios biá' gulénë' quégaquië' cate' ni' gula'dé' idú luyú bidxi lu lataj cá'asö. <sup>19</sup> Cate' budxi busunítië' gadxi cö' yödzö gula'cuá' luyú Canaán, bunödzjë' xiyúgaca bönachi ni' quégaquië' xuz xtó'oru'. <sup>20</sup> Gudödi ni', le guca idú ca tapa gayuá' yu' chi-un iz, Dios bucu'ë yugu' bönni' bulu'chi'a bulu'söröë' légaquië' ga bidxitnë' zoë' Samuel, bönni' bë'ë didza' uláz queë' Dios. <sup>21</sup> Ni'irö gula'nábinë' Dios uzóë' tu bönni' unná bë' quégaquië'. Dios guroë' Saúl, zxí'inë' Cis, bönni' nababë' di'a dza queë' Benjamín. Idú ca choá' iz gunná bë'enë' Saúl na' légaquië'. <sup>22</sup> Gudödi ni' Dios gudüë' Saúl na', ate' buzóë' David quégaquië' para inná bë'ë. Dios benë' ba nalí queë' David ni, gunné': "Nözda' runë' David, zxí'inë' Isaí, le raza ládex'a, en gunë' yúgu'të le ré'ënda' neda'." <sup>23</sup> Ladaj zxí'ini xi'sóë' David na' benë' Dios ga guljë' Jesús para gáquië' bönni' usölé' bönachi Israel, ca na' guzxí' lu në'ë Dios zí'atélo gunë'. <sup>24</sup> Zí'alö cate' si' ilá' lahuë' Jesús, benë' Juan libán lógaca yúgu'të bönachi Israel para ulu'bí'i ládzi'gaca, en ila'dila nisa. <sup>25</sup> Cate' ni' chizóá údzi gunë' libán Juan na', gunné': "¿Nuzxi réquili' naca' neda'? Biti' naca' Cristo, bönni' na' ral-la' guídë'. ¡Na'a, buli'yútsöca'! Chizóë' idxinë' bönni' na' ga zoa' ni, ate' neda' biti' naca' lesaca' ilecja' xiráchuë' nudé'ë."

<sup>26</sup> 'Libi'ili', bőcha'a, yugu' zxí'ini xi'sóë' Abraham, en núloli' zóali' ni, en rádxili'-në' Dios. Dios caz gusól-lë'ë queëli' didza' ni para uláli'. <sup>27</sup> Nupa nacuá' Jerusalén, en bönni' ta'nná bë'enë' légaquië' biti' bulu'únbe'ë Jesús, en biti' gula'yéajni'inë' le nazúaj lu guichi le gula'nné' yugu' bönni' gulu'ë didza' uláz queë' Dios, sal-la' tu'laba cazë' yugu' didza' ni yugu' dza lá'ayi. Lu yöl-la' cabí réajni'i quégaquië' gulunë' ga budxín ca rnna didza' ni cate' ni' gula'chúguië' queë' Jesús gátië'. <sup>28</sup> Sal-la' biti' budzöli le nabáguë'ë Jesús gátië', gula'nábinë' Pilato inná bë'enë' bönni' ilútië' Lë'. <sup>29</sup> Cate' budxi gulunë' queë' yúgu'të le nazúaj lu guichi ca ral-la' gaca queë', bulu'zötje' Lë' lë'e yaga cruz, en bulu'cáchë'ë Lë' yero ba. <sup>30</sup> ¡Ni'irö Dios busubanë' Lë' lu yöl-la' guti! <sup>31</sup> Zián dza bulu'i lahuë' Jesús lógaca

nupa yöjácalen Lé' tsözxón cate' ni' buzé'ë luyú Galilea, en bidxinë' Jerusalén. Na'a, yugu' bönni' na' tuné' ba nalí queë' lögaca bönachi.

<sup>32</sup> 'Caní naca, lësca' netu' ni rusiyöntu' libí'ili' didza' dxi'a ca naca lë na' guzxi' lu në'ë Dios gunë' quégäquië' xuz xtó'oru'. <sup>33</sup> Lé na' guzxi' lu në'ë Dios quégäquië', Lé cazë' benë' ga budxín queëru', nácaru' zxí'ini xi'sóagaquië'. Caní benë' cate' busubanë' Jesús. Guca ca na' nazúaj lu guichi ga zoa salmo buropi, le rnna caní: "Li' nacu' Zxi'ina'. Neda' buzóa caza' Li'." <sup>34</sup> Ca naca na', Dios busubanë' Lé' lu yöl-la' guti para cabí initi le naca cazë', Lé cazë' Dios gunné' caní: "Gunna' quiu' le nácagaca bica' ba guzxi' lu na'a lahuë' David."

<sup>35</sup> Que lë ni na' nazúaj ca' lu guichi, ga zoa ia'tú salmo, le rnna caní: "Biti' gu'u lataj ugá'anë' bönni' lá'ayi quiu' ga initi le naca cazë'." <sup>36</sup> Le guca queë' David naca bë'. Gudödi benë' dxin lögaca bönachi uládz queë', ca na' gunná bë'enë' Dios lë', ní'irö gútië', ate' gula'gu'ë lë' yero ba ga nacu'ë xuz xtá'ahuë', ate' guniti le naca cazë'. <sup>37</sup> Na'a, ca naca queë' Jesús na', Dios busubanë' Lé', ate' biti' guniti le naca cazë' lu yero ba. <sup>38</sup> Libí'ili', böcha'a, ral-la' inözili' lë ni rusiyöntu' libí'ili'. Dios runiti lahuë' libí'ili' ca naca dul-la' nabága'li' ni'a que le benë' Jesús ni. <sup>39</sup> Na'a, Dios ruúnë' tsahui' yúgu'të nupa ta'yéajlë' Jesús, rugúë' yugu' dul-la' na' le cabí guca ugúa xibá queë' Dios, le bë'ë Moisés. <sup>40</sup> Guli'gún chi'i cuinli' na'a para cabí gaca queéli' le nazúaj lu guichi le gula'nné' bönni' gulu'ë didza' uláz queë' Dios, le rnna caní:

<sup>41</sup> Buli'yútsöca', libí'ili', bönni' cabí tuné' neda' bal.

Ubánili', pero lu yöl-la' cabí réajlë' queéli' gátili'.

Neda' guna' tu dxin dza ni zóali',

en sal-la' nu ulu'i libí'ili' le rulu'i dxin na', biti' ca' tséajlë'ëli'.

<sup>42</sup> Cate' bulu'rúajé' Pablo, en yugu' bönni' na' dzágagaquië' lë' lu yu'u ga na' tu'dubë' bönni' judío, en tu'sëdë' queë' Dios, ní'irö bönachi ni' guláta'yu lógaquië' ulu'sédinë' légaquië' ca naca lë ni cate' idxín ia'tú dza lá'ayi quégäquië'. <sup>43</sup> Cate' ni' bulu'rúajé' lu yu'u na' bönni' nudúbigaquië' ni', zián bönni' judío, en bönni' nuhuöácagaquië' judío, yugu' bönni' ta'yéaj ládxí'gaquië' Dios, gulunë' tsözxón Pablo, en Bernabé. Chopé' ni gulu'ilenë' légaquië' didza', en bulu'sé'ë ládxí'gaquië' para ilácatica'sé' tsutsu, ilunë' löza le ruzá' ládxë'ë Dios quégäquië'.

<sup>44</sup> Ia'xunu' gubidza ca' cate' bidxín ia'tú dza lá'ayi quégäquië', bulu'dubë' látu'biqu' yúgutë bönachi lu yödzö na' para ila'yönnë' xtídzë'ë Dios. <sup>45</sup> Ní'irö bulu'zxé'enë' bönni' judío biti' ta'yéajlë'ë, cate' bila'lé'enë' bönachi zián na', ate' gula'nné' que didza' ru'ë Pablo, en gula'dá'báguë'ë le. <sup>46</sup> Ní'irö lu yöl-la' rugu ladxi' quégäquië' Pablo, en Bernabé, gülé' yugu' bönni' judío na', ta'nné':

—Ben bayudxi usiyöntu' libí'ili' zí'alö xtídzë'ë Dios, pero tu' rucá'anali' cá'asö didza' ni, en rusáca'li' queéli' biti' nácali' lesaca' sí'ili' yöl-la' na'bán idú ni, que lë ni na', na'a uyéajtu' ga nacuá' bönachi izá'a. <sup>47</sup> Lësca' caní gunná bë'enë' Xanru' Dios netu' guntu' libán queë' Cristo lögaca bönachi izá'a, en naca ca rnna didza' na' bë'ë Dios ca naca queë' Cristo, gunné':

Nuzóa' Li' para gacu' bení' quégaca bönachi izá'a,

en gacu' Nu usólá bönachi idútë yödzölió.

<sup>48</sup> Cate' bila'yöni bönachi izá'a nacuá' ni' didza' ni, bulu'dzéjanë', en gula'gu'ë Xanru' yöl-la' ba ni'a que xtídzë'ë, yúgu'të nupa ni' chinunë' Dios quéguequi gata' quéguequi yöl-la' na'bán idú. <sup>49</sup> Caní guca, guzé xtídzë'ë Xanru', ate' bila'yöni bönachi yúgu'të yödzö nacuá' luyú ni'. <sup>50</sup> Ní'irö bönni' judío biti' ta'yéajlë'ë na' gula'gú'u yö'l-lë'ë yugu' bönni' lo que yödzö ni' para cabí ila'lé'enë' dxi'a Pablo, en Bernabé. Lësca' caní gula'gú'u yö'l-lë'ë nigula lo ta'yéaj ládxí'nu Dios. Caní guca, gulunë' ga gula'bía ládxí'gaquië' Pablo, en Bernabé, ate' bulu'láguë' chopé' ni ní'ilö lu xiyúgaquië'. <sup>51</sup> Ní'irö Pablo, en Bernabé bulu'quínnajé' yu bëchtö da' la' lábagaquië' le rulu'i nagá'ana xíguia' nabága'gaca

bönachi lu yödzö na', ate' yójáquië' lu yödzö Iconio. <sup>52</sup> Bulu'dzéjanë' bönni' yödzö Antioquia na', bönni' ta'yéajlë'ë Xanru', ate' guzóalenë' Dios Bö' Lá'ayi légaquië'.

## 14

### *Le gulunë' Pablo, en Bernabé lu yödzö Iconio*

<sup>1</sup> Cate' bila'dxinë' Pablo, en Bernabé yödzö Iconio, gula'yu'ë tsözxöñ lu yu'u ga tu'dubë' bönni' judío, en tu'sédë' queë' Dios, ate' gulu'ë didza' ni'. Caní guca, zián bönnachi judío, enca' zián bönnachi izá'a gula'yéajlë' Cristo. <sup>2</sup> Ní'irö bönni' judío biti' ta'yéajlë'ë gula'gú'u yól-lë'ë bal-lë' bönni' izá'a, para cabí ila'lé'enë' dxi'a bóchi'ru' ta'yéajlë'ë Cristo. <sup>3</sup> Tu' gula'yéajlë' bönnachi zián na' Cristo, gula'cu'ë Pablo, en Bernabé ni' zián dza, ate' lu yölla' rugu ladxi' gulu'ë xtídzë'ë Dios, tu' tu'zxöni ládx'i'gaquië' Xanru'. Lë cazë' Xanru' bulu'e naca idútë li didza' tu'ë ca naca le ruzá' ládxë'ë Dios quégaca bönnachi, tu' bë'ë légaquië' lataj gulunë' yugu' le taca bë', en le tun ga tu'bani bönnachi. <sup>4</sup> Ní'irö bönnachi lu yödzö na' bila'rúaj choplö. Bal-lë' gula'dé'ë bönni' judío biti' ta'yéajlë'ë, ate' ia'bal-lë' gula'dé'ë Bernabé, en Pablo, gubáz na' nasól-lë'ë Cristo. <sup>5</sup> Ní'irö bönni' judío biti' ta'yéajlë'ë na', en yugu' bönni' izá'a ni' gulunë' tuz bönni' ta'nná bë'enë' légaquië', ate' bulu'dubë' para ilu'ë dö' quégäquië' gubáz na' nasól-lë'ë Cristo, en ulu'ladxë' légaquië' guiój. <sup>6</sup> Cate' téquibe'enë' Pablo, en Bernabé lë ni, bulu'zxúnnajë' ni', yójáquië' yödzö Listra, en Derbe luyú Licaonia, ate' gula'dödë' yúgu'të yödzödo' idú gásibi'ilö ni', <sup>7</sup> gapa ni' gulunë' libán que didza' dxi'a ca naca queë' Cristo.

### *Tu'ladxë' Pablo guiój lu yödzö Listra*

<sup>8</sup> Zoë' tu bönni' lu yödzö Listra biti' raca së'ë. Ró'ösë' ni' tu' cabí rizé'ë cate' ni' guljé', en catu caz guzë'e ni'ë. <sup>9</sup> Bönni' ni ruzé' náguië' didza' ru'ë Pablo. Pablo buyúë' lë', en gúquibe'enë' réajlë'ë Cristo para huöáquië'. <sup>10</sup> Ní'irö Pablo bë'ë zidzaj didza', en rë' lë': —Guzuí.

La' guxítitë' bönni' na', en guzë'e ni'ë. <sup>11</sup> Cate' yugu' bönni' Listra bila'lé'enë' lë na' benë' Pablo, gula'sí lógaquië' tu'ë zidzaj didza' lu didza' tu'ë bönni' Licaonia na', ta'nné': —¡Yugu' dios bönni' ni! ¡Nuhuótjagaquië' ga zóaru', en tu'lui' cuíngäquië' ca nácagaquië' bönni'!

<sup>12</sup> Gula'nné' Bernabé na' náquië' Júpiter, ca lë' dios lo quégäquië', ate' gula'nné' náquië' Pablo Mercurio, ia'tú dios quégäquië'. Caní gula'nné' tu' ru'ë didza' Pablo ca na' ta'nné' runë' Mercurio na'. <sup>13</sup> Zoa yudo' que Júpiter ga ni' nacu'ë, cuita nöza ga ni' ta'yaza bönnachi lu yödzö na'. La' bidxitë' bixúz que Júpiter na', naché'ë-ba' yugu' bëdxi, en nu'ë ca' yugu' bregui' yöj, ate' dzágagaca bönnachi zián lë'. Gulé'ënné' ilútië'-ba' bëdxi na' lógaquië' Pablo, en Bernabé para ila'yéaj ládx'i'gaquië' légaquië' ca tunë' quégaca dios quégäquië'. <sup>14</sup> Cate' Bernabé, en Pablo, gubáz na' nasól-lë'ë Cristo, guléquibe'enë' lë ni, gula'chözë' lari' nácagaquië'. Tu'hu'ininë' tu' tunë' bönni' ni le cabí ral-la' ilunë', ate' gula'xítì'ë, en yójcu'ë gatsaj láhui'lö bönnachi zián na', en gulu'ë zidzaj didza', të' légaquië':

<sup>15</sup> —¡Libí'ili' bönnachi! ¿Bizx que runli' caní? Lësca' bönni' ca libí'ili' nácatu', en riguixjöi'itu' libí'ili' lë ni caz ral-la' ucá'anali', le cabí nácatë, para guéquili' queë' Dios ban. Dios ni benë' lúzziba, en yödzölió, en nísado', en yúgu'të le nacuá' tu tu lataj na'. <sup>16</sup> Yugu' iz chigula'dödi, gulún yúgu'të bönnachi ca rrnasö que queëguequi, ate' Dios biti' buzáguë'ë xinózguequi, <sup>17</sup> pero benë' ga gulaca le tun ba nalí queë', yugu' le nácagaca dxi'a benë' quégäquië'. Risö'l-lë'ë queëru' nisa guiój, en runë' ga ta'yán le rázaru'. Ruzolaj rudzé'enë' rë'u, en runë' ga rudzeja ládx'i'ru'.

<sup>18</sup> Sal-la' Bernabé, en Pablo gulé' légaquië' caní, cánnisö bila'deli'në' bulu'záguë'ë xinózguequi bönnachi zián na', para cabí ilútië'-ba' bëdxi na' lógaquië'.

<sup>19</sup> Ní'irö bal-lë' bönni' judío biti' ta'yéajlë'ë, narúajgaquië' Antioquía, en Iconio, bila'dxinë' ni', ate' gula'gú'u yól-lë'ë bönachi zián na'. Ní'irö yúgu'té' bulu'ladxë' Pablo guiój, en gulá'ayøjë' le' ní'ilö ra' yödzö na', tu' téquinë' chinátië'. <sup>20</sup> Ní'irö bulu'dubë' yugu' bönni' ta'yéajlë'ë Cristo idú gásibi'ilö ga dë' Pablo. Guyasë' lë', en buázië' lu yödzö na'. Cate' za' rení' ia'tú dza, burúajlenë' Bernabé, yójáquië' yödzö Derbe.

<sup>21</sup> Lu yödzö ni' gulunë' libán que didza' dxi'a ca naca queë' Jesucristo, ate' bönachi zián ni' gula'yéajlë' Cristo. Gudödi ni' yöjhuójgaquië' Listra, en Iconio, en Antioquía. <sup>22</sup> Cate' gula'dödë' Bernabé, en Pablo yugu' yödzö na', bulu'tipë' ládx'i'gaquië' bönni' ni' ta'yéajlë'ë Cristo, en bulu'sé'ë ládx'i'gaquië' ulu'gá'anë' tsutsu ca na' ta'yéajlë'ë Lë'. Gulé' légaquië':

—Rë'u tsaza cázaru' ga rinná bë'ë Dios, run bayudxi qui'i sáca'ru' zián le gaca queëru'.

<sup>23</sup> Bulu'cu'ë yugu' bönni' gula ilún chi'ë bönachi queë' Cristo tu cö' huéaj bönachi ni' queë' Cristo. Cate' chigulu'ilenë' Dios didza', en gulunë' gubasa, ní'irö gula'gu'ë légaquië' lu né'ë Xanru', Nu na' ta'yéajlë'ë.

### Pablo, en Bernabé tu'dxinë' Antioquía luyú Siria

<sup>24</sup> Ní'irö Pablo, en Bernabé gula'dödë' luyú Pisidia, ate' bila'dxinë' luyú Panfilia.

<sup>25</sup> Budxi gulunë' libán que xtídzë'ë Cristo lu yödzö Perge, yójáquië' yödzö Atalia.

<sup>26</sup> Bulu'zé'ë ni', ate' gula'benë' tu lë'e barco, en bulu'dxinë' yödzö Antioquía, ga na' nacu'ë bönni' queë' Cristo, bönni' na' gula'sól-lë'ë légaquië' tsöjéngäquië' libán, cate' ni' gula'gu'ë légaquië' lu né'ë Dios, Nu na' ruzá' ladxi' quégäquië' ilunë' xichinë', dxin na' chibudxi gulunë'. <sup>27</sup> Cate' ni' bulu'dxinë' Antioquía, bulu'dubi bönachi queë' Cristo nacu'ë ni'. Ní'irö Pablo, en Bernabé bulu'siyönnë' légaquië' ca nácagaca le zxön benë' Dios lu ná'agaquië', enca' ca benë' Dios, bë'ë yugu' bönachi izá'a lataj ta'yéajlë' ca' Lë'.

<sup>28</sup> Pablo, en Bernabé bulu'gá'analenë' bönachi ni' ta'yéajlë' Cristo zián dza.

## 15

### Tu'dubë' huen dxin queë' Cristo lu yödzö Jerusalén

<sup>1</sup> Ní'irö bal-lë' bönni' narúajgaquië' luyú Judea bila'dxinë' yödzö Antioquía, ate' bulu'sédinë' böchi'ru', bönni' izá'a ni', ta'nnë':

—Channö cabí irugu lu xipéla'li' ca nalébitu' runtu' ca na' gunná bë'ë Moisés, biti' gaca ulál'.

<sup>2</sup> Ní'irö Pablo, en Bernabé gula'díl-lalenë' légaquië' didza', ate' gúcada' dzatsa. Gudödi ni', gula'böö' Pablo, en Bernabé len ia'bal-lë' bönni' böchi'ru' ni', para tsöjáquië' Jerusalén, en ila'dxinë' lógaquië' gubáz ni' queë' Cristo, enca' lógaquië' bönni' gula tapa chi'ë bönachi queë' Cristo ni', para ilu'ilenë' légaquië' didza' ca naca lë ni raca, tu'sédinë' bönni' na' bönachi le nachixi.

<sup>3</sup> Ní'irö yugu' bönni' queë' Cristo nacu'ë Antioquía bulu'gu'ë légaquië' nöza, ate' gula'dödë' lu xiyú yödzö Fenicia, en luyú Samaria, ate' bulu'siyönnë' böchi' luzá'aru' yugu' lataj ni' ca guca, bulu'huöáquië' bönni' izá'a queë' Cristo. Lë ni ben ga bulu'dzéjanë' yúgu'té böchi' luzá'aru' ni'.

<sup>4</sup> Cate' bila'dxinë' Pablo, en Bernabé lu yödzö Jerusalén, yugu' bönni' queë' Cristo nacu'ë ni', enca' yugu' gubáz nasól-lë'ë Lë', en yugu' bönni' gula tapa chi'ë gulunë' légaquië' bal. Pablo, en Bernabé bulu'siyönnë' légaquië' yúgu'té le benë' Dios lu ná'agaquië'. <sup>5</sup> Ní'irö gula'zuínë' bal-lë' bönni' yudo' fariseo, bönni' ta'yéajlë'ë Cristo, en ta'nnë':

—Run bayudxi irugu lu xipéla'gaquië' bönni' izá'a na' ta'yéajlë'ë Cristo, en inná bë'eru' légaquië' ilunë' ca rnna bë' xibá queë' Moisés.

<sup>6</sup> Ní'irö bulu'dubë' gubáz nasól-lë'ë Cristo len bönni' gula tapa chi'ë bönachi queë', para ulu'chi'a ulu'söröë' lë ni raca. <sup>7</sup> Gudödi gulu'ë zián didza', guzuínë' Pedro, en gudxë' légaquië':

—Libi’ili’, bócha’ a. Nöz quézili’ ca guca dza ni’té, Dios guró cazé’ neda’ para guna’ libán lógaca bönachi izá’ a para ila’yöni didza’ dxi’ a, en ila’yéajlé’ Cristo. <sup>8</sup> Dios, Nu nunbë’ caz le yu’u icja ládxi’do’gaca bönachi, buzóë’ le naca bë’ runë’ légaquië’ bal, gusól-lë’ë Dios Bö’ Lá’ayi quégaquië’, ca na’ gusól-lë’ë Lë’ queéru’. <sup>9</sup> Biti’ butsé’ë ca benë’ quégaquië’, en queéru’, en lësca’ bunë’ dxi’ a icja ládxi’do’gaquië’ tu’ ta’yéajlé’ë Cristo. <sup>10</sup> Na’ a, ¿bizx que run leli’-në’ Dios, rusubágala’li’ yua’ xiyéngaca böchi’ luzá’aru? Yua’ ni, le naca le ta’nná bë’ xibá queë’ Moisés, biti’ guca guá’aru’ rë’ u, en biti’ guca ilu’ë xuz xtó’oru’ le. <sup>11</sup> Rë’ u ni, réajlé’ëru’ nuláru’ ni’ a que le buzá’ ládxé’ë Xanru’ Jesús queéru’, en ca na’ nuláru’ rë’ u, ulu’lë’ ca’ légaquië’.

<sup>12</sup> Cate’ budxi bë’ë Pedro didza’ ni, yúgu’të’ gula’cu’ë dxisö, ate’ bulu’zé nágagaquië’ didza’ gulu’ë Bernabé, en Pablo. Bulu’siyönnë’ légaquië’ yugu’ le taca bë’, en le tun ga tu’bani bönachi, yugu’ le benë’ Dios lu ná’agaquië’ ga nacuá’ bönachi izá’ a. <sup>13</sup> Cate’ Bernabé, en Pablo budxi gulu’ë didza’ ni, bubi’ë didza’ Jacobo, gunné’:

—Libi’ili’, bócha’ a. Buli’zé nágali’ le guía’ libi’ili’. <sup>14</sup> Simón Pedro chigudíxjöi’i quézinë’ rë’ u ca benë’ Dios, bulu’ e lahui yöl-la’ huáca queë’ le zí’alö luzuí lógaca yugu’ bönachi izá’ a para bubéajé’ quez queë’ bönachi nútsa’gaca ládjagaquië’. <sup>15</sup> Ca naca lë ni röjlózgaca xtídza’gaquië’ bönni’ gulu’ë didza’ uláz queë’ Dios, ca na’ nazúaj lu guichi lá’ayi, rnna:

<sup>16</sup> Dza tödi lë ni huöda’, en uchisa’ Nu inná bë’,  
bönni’ na’ tsázië’ xilatjé’ David.

Guna’ ca run nu ruchisa tu yu’u naguinnaj.

Uchisa’ ca’ bönachi ila’cuá’ lidxe’, nupa nagá’ anagaca.

Guna’ ca run nu ruchisa tu zö’ö yexu’.

Caní uchisa’ le gunná bë’ë David

<sup>17</sup> para ulu’guilaj ia’zíca’rö bönachi Xanru’.

Ulu’guilaj bönachi izá’ a Lë’,

ate’ si’ láguequi: Bönachi Queë’ Dios.

<sup>18</sup> Caní rnnë’ Xanru’,

Nu na’ dza ni’té ben ga naca bë’ yúgu’të lë ni.

<sup>19</sup> Que lë ni na’ runi neda’ biti’ ral-la’ gun níguiru’ bönachi izá’ a, nupa tu’huöáca queë’ Dios. <sup>20</sup> Ral-la’ uzúajru’ lu guichi quégaquië’ ulu’cá’anë’ yugu’ le biti’ ral-la’ ilahuë’, le nadödi lógaca budó’ guiój budó’ yaga, en cabí ilunë’ le ruá’ dö’, en cabí ilahuë’ xipéla’gacaba’ böa’ guixi’ biti’ narúaj-gácaba’ rön, en cabí ilahuë’ xichönba’ bíti’tës böa’ guixi’. <sup>21</sup> Dza ni’té nacuá’ yúgu’të yödzö nupa tun libán lu yu’u gapa tu’dubë’ bönni’ judío, en tu’sëdë’ queë’ Dios. Tunë’ libán ni’ que le buzúajé’ lu guichi Moisés. Tu’laba cazé’ le yugu’ dza lá’ayi.

<sup>22</sup> Ní’irö gula’yaza ládxi’gaquië’ gubáz nasól-lë’ë Cristo, en bönni’ gula tapa chi’ë, en yúgu’të bönachi queë’ Cristo, ila’böë’ bal-lë’ bönni’ ládjagaquië’, en ila’sól-lë’ë légaquië’ Antioquía. Tsójácalenë’ Pablo, en Bernabé. Chopé’ na’ gula’böë’, légaquië’ Judas, zoa ia’tú lë’ Barsabás, enca’ Silas. Nácagaquië’ bönni’ lo ládjagaquië’ böchi’ru’ ni’.

<sup>23</sup> Bulu’zúajé’ lu guichi le bulu’dödë’ lu ná’agaquië’ ilu’ë, le rnna caní:

“Netu’, gubáz nasól-lë’ë Cristo, en bönni’ gula tun chi’ë, en yugu’ böchi’ru’, rugápatu’ libi’ili’ Dios, böchi’tu’, nácali’ bönachi izá’ a zóali’ Antioquía, en yugu’ yödzö luyú Siria, en Cilicia. <sup>24</sup> Biyónitu’ ca tun bal-la bönachi bila’rúaj ga zóatu’, nupa na’biti’ nasól-la’tu’. Dutsá’agaquië’ libi’ili’ len le ta’nnë’, en tu’bequi böniga icja ládxi’do’oli’, tu’ ta’nná bë’ë irugu lu xipéla’li’, en gunli’ ca rinná bë’ xibá queë’ Moisés. <sup>25</sup> Que lë ni na’ guyaza ládxi’tu’ cate’ chibén tuz xtídza’tu’, gurötu’ chopé’ bönni’, nupa isól-la’tu’ para uduyúgaquië’ libi’ili’. Guídlengaquië’ Bernabé, en Pablo, nupa na’ nadxí’iru’. <sup>26</sup> Chiyójáquië’ Bernabé, en Pablo gapa guzóa bönadxi ilátië’ tu’ nadxí’iguequinë’ Xanru’ Jesucristo. <sup>27</sup> Caní naca, risól-la’tu’ Judas, en Silas ga zóali’. Chopé’ ni ulu’siyönnë’ libi’ili’ lë ni ruzúajtu’ lu guichi

ni. <sup>28</sup> Dios Bö' Lá'ayi bulu'finé' netu' le raza ládxé'ë, en lësca' caní raza ládxí'tu' netu', biti' usubága'rötü' libí'ili' yua', le naca le rinná bë' xibá queé' Moisés, pero yugu' lë nisö run bayudxi gunli':

<sup>29</sup> Biti' gáguli' le nadödi lógaca budó' guiój budó' yaga.

Biti' gáguli' rön.

Biti' gáguli' xipéla'gacaba' böa' guixi' biti' narúaj-gácaba' rön.

Biti' gunli' le ruá' dö'.

Channö gun chi'i cuinli' para gunli' ca rnna yugu' lë ni, gunli' dxi'a."

<sup>30</sup> Caní guca, yugu' bönni' na' nasöll-la'gaquié' bila'dxiné' Antioquía. Bulu'tubé' bönachi queé' Cristo nacuá' ni', ate' gula'gu'ë guichi na' lu ná'agaquié'. <sup>31</sup> Cate' chibudxi bulu'labé' le, bulu'dzéjané' ca naca le nazúaj lu guichi na', le ruhué tsahui' légaquié'. <sup>32</sup> Tu' nácagaquié' Judas, en Silas bönni' tu'ë didza' uláz queé' Dios bulu'hué tsáhué'ë légaquié', en bulu'tipé' ládxí'gaquié' böchi'ru' ni', bulu'guné' dxin didza' zián le gulu'ilené' légaquié'. <sup>33</sup> Gudödi bulu'dzéné' Judas, en Silas ni' nababa dza, ní'irö böchi'ru' ni' bulu'zené' légaquié' dxi'a didza' para tsöjhuóajgaquié' Jerusalén ga nacu'ë bönni' gula'söll-lë'ë légaquié'. <sup>34</sup> Guyaza ládxé'ë Silas bugá'ané' Antioquía. <sup>35</sup> Bulu'gá'ané' ca' Pablo, en Bernabé Antioquía na', ate' bulu'sédiné' bönachi, en guluné' libán que xtídzé'ë Xanru'. Lësca' caní gulún ziánrö ca' bönachi.

### *Risí lahué' Pablo röjené' libán le buropi luzuí*

<sup>36</sup> Gudödi nababa dza Pablo gudxé' Bernabé:

—Uyéajru' leyúbölö tsöjyúgacaru'-në' böchi'ru' nacu'ë yúgu'të yödzö gapa chiyöjenru' libán que xtídzé'ë Xanru', para ilé'eru' nacxi raca quégaquié'.

<sup>37</sup> Gú'unné' Bernabé ila'ché'ë-bi' bi'i Juan Marcos, tséajlenbi' légaquié', <sup>38</sup> pero biti' guyaza ládxé'ë Pablo ila'ché'ë-bi' tséajlenbi' légaquié' tu' bulá'alenbi' légaquié' luyú Panfilia, en bíti'rö yójénlenbi' légaquié' dxin queé' Xanru'. <sup>39</sup> Biti' guca tuz xtídzá'gaquié' Bernabé, en Pablo ga bidxitnë bulu'lá'alené' tuë' ia'tué'. Bernabé guché'ë-bi' bi'i Marcos, ate' gula'bené' tu lë'e barco, yójáquié' luyú Chipre. <sup>40</sup> Pablo guröë' Silas para tséajlené' lë'. Ní'irö yugu' böchi'ru' gula'gu'ë légaquié' lu në'ë Xanru', en gula'nábiné' Lë' uzá' ládxé'ë quégaquié', ate' bulu'zé'ë Pablo, en Silas ni'. <sup>41</sup> Gula'dödë' yugu' yödzö luyú Siria, en Cilicia, ate' bulu'tipé' ládxí'gaca bönachi queé' Cristo nacuá' ni'.

## 16

### *Bi'i Timoteo runbi' tsözxón Pablo, en Silas*

<sup>1</sup> Gudödi ni' bila'dxiné' Pablo, en Silas yödzö Derbe, en yödzö Listra. Zóabi' tu bi'i bönni' ni', réajlë'ëbi' Cristo, lëbi' Timoteo. Nácabi' zxí'ininu tu nigula judío réajlë'ënu Cristo, pero xúzibi' biti' náquié' judío. <sup>2</sup> Yugu' böchi'ru' nacu'ë Listra, en Iconio tuné' ba nalí queébi', ta'nné' runbi' le naca dxi'a. <sup>3</sup> Gú'unné' Pablo tséajlenbi' bi'i ni lë', ate' gudélé'ë-bi', en guchúguié' lu xipéla'bi' ca tun bönachi judío. Caní bené' para cabí ila'nné' queébi' bönni' judío nacu'ë yugu' yödzö ni', tu' nőziguequiné' yúgu'të' xúzibi' biti' náquié' judío. <sup>4</sup> Cate' Pablo, en nupa dzágagaca lë' gula'dödë' gapa nacuá' yödzö ni', tu tu yödzö na' bulu'dödë' lu ná'agaquié' yugu' böchi'ru' nacu'ë gapa ni' yugu' xibá na' guluné' gubáz nasöll-lë'ë Cristo, en bönni' gula tapa chi'ë bönachi queé', nacu'ë Jerusalén. Bulu'dödë' yugu' xibá ni lu ná'agaquié' para iluné' ca rinná bë' xibá na'. <sup>5</sup> Caní guca, bönachi yúgu'të cö' bönachi queé' Cristo bila'dipa ládxí'gaca ca naca le réajlë'ëru' Cristo, ate' gula'yán tu tu dza.

### *Tu bönni' Macedonia rulidzé' Pablo lu yëla bëchigal*

<sup>6</sup> Pablo, en bönni' dzágagagaquié' lë' gula'dödë' luyú Frigia, en luyú Galacia, tu' buzáguë'ë Dios Bö' Lá'ayi xinózgaquié', para cabí iluné' libán que xtídzé'ë Xanru' luyú Asia. <sup>7</sup> Cate'

bila'dxinë' luyú Misia, gulé'ënnë' tsöjáquië' luyú Bitinia, pero Dios Bö'Lá'ayi, Nu risöl-lë'ë Jesús queéru', biti' bë'ë légaquië' lataj. <sup>8</sup> Ní'irö gula'dödë' gala' ga dë Misia, ate' yöjáquië' lu yödzö Troas. Neda' Lucas, ruzúaja' lu guichi lë ni, guzó'a Troas na', ate' yöjsóalena'-në' Pablo. <sup>9</sup> Lu yödzö ni' Dios bulu'iñë' Pablo tu le bilé'enë' lu yëla bëchigal. Tu bönni' Macedonia bulu'i lahuë' lë', zuínë', en ráta'yuë' lahuë' Pablo, rnnë': "Gudödi ladztu', lu xiyú Macedonia, en gúcalen netu'." <sup>10</sup> Cate' bilé'enë' Pablo lë ni, lë na' bulu'i lahuë' lë', la' bë' ládxitëtu' tséajtu' luyú Macedonia, tu' gúquibe'etu' Dios chibulidzë' netu' tsöjentu' libán que didza' dxi'a lögaca bönnachi luyú ni'.

*Le gulunë' Pablo, en Silas lu yödzö Filipos*

<sup>11</sup> Ní'irö gurentu' lë'e barco, en buzá'atu' Troas. Gudöditu' lirá ga bidxintu' yödzö Samotracia, ate' gudödi ia'tú dza bidxintu' yödzö Neápolis. <sup>12</sup> Buzá'atu' ni', ate' bidxintu' Filipos, yödzö na' nácarö lo ca yúgu'të yödzö nabábagaca tsölä'a ni' luyú Macedonia. Lu yödzö ni' yugu' bönni' Roma nucuá'agaquië' bönnachi uládz quégäquië'. Lu yödzö nisö guzóatu' nababa dza. <sup>13</sup> Cate' bidxín tu dza lá'ayi, birúajtu' lu yödzö, en guyéajtu' ra' yegu ga na' tu'dubi caz bönnachi yödzö na', en tu'lidza Dios. Gurö' ötu' ni', en busiyöntu' yugu' nigula nudúbigacanu ni' ca naca xtídzë'ë Xanru'. <sup>14</sup> Nútsa'nu ládjagacanu Lidia, tu nigula Tiatira. Nácanu nigula rúti'nu lari' xiná chul-la le nazáca'da'. Reaj ládxí'nu Dios, ate' buzé náganu didza' ru'ë Pablo, ate' Xanru' gúcalenë'-nu para guzxí' lu na'anu didza' na' bë'ë. <sup>15</sup> Ní'irö bidílanu lënu nisa, ate' gula'dila ca' nisa bönnachi nacuá' lídxinu. Gudödi ni' gúta'yunu lotu', gunnánu:

—Channö réquibe'eli' réajlë'a Xanru', guli'tsaza lidxa', en guli'soa ni'.

Bennu bayudxi ugá'anatu' ni'.

<sup>16</sup> Ia'tú le guca tu dza tsanni ni' zéajtu' ga na' rulidztu'-në' Dios, birúajbi' dutságabi' tu bi'i nigula netu' yu'u lëbi' bö' le run ga rinné yá'abi'. Len yöl-la' rinné ya'a queébi' runbi' ga ta'zí'dë' dumí yugu' bönni' xanbi'. <sup>17</sup> Bi'i nigula ni sudunóbi'-në' Pablo, en netu', ruí'ibi' zidzaj didza', rnnabi':

—¡Yugu' bönni' ni tunë' xichinë' Dios nayépisétérë! ¡Tu'siyönnë' libí'ili' naca gaca ulálí'!

<sup>18</sup> Caní benbi' zián dza. Cate' bíti'rö guyaza ládxë'ë Pablo, buécjë', en bulidzë' bö' na' yu'u lëbi', rnnë':

—Lu Lë' Xanru' Jesucristo, rinná bé'eda' li'. ¡Burúaj icja ládxí'do'obi' bi'i nigula ni!  
La' ní'isö burúajtë bö' na'.

<sup>19</sup> Cate' bila'lé'enë' xanbi' chiburúaj bö' na' run ga rinné yá'abi', en bíti'rö naca löza ila'zi'ë dumí ni'a queébi', que lë ni na' gula'zönë' Pablo, en Silas, ate' gula'chë'ë légaquië' lógaquië' bönni' yúlahui', nudúbigaquië' ga naca lu yé'ëyi. <sup>20</sup> Bulu'cu'ë légaquië' lógaquië' bönni' yúlahui' na', ta'nné':

—Yugu' bönni' ni nácagaquië' judío, en tunë' ga tu'tsatsa bönnachi yödzö ni.

<sup>21</sup> Tu'sédinë' le cabí ral-la' si' lu ná'aru', en biti' ral-la' gunru', tu' nabábaru' Roma.

<sup>22</sup> Ní'irö bönnachi zián ni' gula'dá'baga' Pablo, en Silas, ate' yugu' bönni' yúlahui' gula'nná bë'enë' nupa gula'lecja lari' nácagaquië' Pablo, en Silas, ate' gula'guíne' légaquië' gubá'ayi. <sup>23</sup> Gudödi gula'guíndë'ë légaquië', gula'gu'ë légaquië' lidxi guíë. Gula'nná bë'enë' bönni' rusayjë' lidxi guíë na' gun chí'idë'ë légaquië'. <sup>24</sup> Bönni' ni, cate' chigula'nná bë'enë' lë' caní, gulu'ë légaquië' lu yu'u lë'e dxi' lidxi guíë na', en gulu'ë ní'agaquië' yeru yaga ta'zón ní'agaquië'.

<sup>25</sup> Idú guluhuëla Pablo, en Silas tu'lidzë' Dios, en tul-lë' yöl-la' ba queé' Dios, ate' ta'yönnë' yugu' bönni' nadzúngaquië' lidxi guíë na'. <sup>26</sup> Ní'irö tsálido'os gudödi budó' zxu' bach. Caní guca ga bidxintë guzxizi xilibi zö'ö lidxi guíë na', ate' la' gula'yáljatë yúgu'të gapa nu riyaza, ate' bulu'huéxhi ca' yugu' du guíë nága'gaca bönni' nadzúngaquië' ni'.

<sup>27</sup> Bubanë' bönni' na' rusayjë' lidxi guíë. Cate' bilé'enë' nayáljagaca gapa nu riyaza lidxi

guié na', gulecjé' guié tuchi' queé' para guti cuiné', tu' réquiné' chibulu'zxúnnajé' bönni' nadzúngaquié' lidxi guié na'. <sup>28</sup> Ní'irö Pablo zidzaj bulidzé' lë', gunné':

—¡Biti' bi góni cuinu', tu' zóatu' ni yúgu'tétu'!

<sup>29</sup> Ní'irö bönni' na' gunabé' gui', ate' gudá'até' lu yu'u lidxi guié na'. Guzxízidé' lu yöl-la' radxi, ate' biyéchué' xinf'agaquié' Pablo, en Silas. <sup>30</sup> Cate' chinubéajé' légaquié' lidxi guié na', gudxé' légaquié':

—Libi'ili', bönni', ¿bizxi ral-la' guna' para ulá'?

<sup>31</sup> Légaquié' të' lë':

—Guyéajlé'ë Xanru' Jesucristo, ate' uló' li', en lësca' caní ulu'lágaca bönachi nacuá' lidxu'.

<sup>32</sup> Gulu'ilené' lë' didza' ca naca xtídzé'ë Xanru', dzágagaca lë' yúgu'të bönachi nacuá' lidxé'. <sup>33</sup> La' ná'asö, ni' naca chi'i dző'ölö la' guché'të légaquié', ate' yöjtibé' légaquié' ga dxíagaquié' huë'. Gudödi ni', la' bidílaté' nisa, ate' gula'dila ca' nisa yúgu'të bönachi nacuá' lidxé'. <sup>34</sup> Ní'irö guché'ë légaquié' lidxé', en bë'ë le gulahuë'. Rudzéjané' lë', en tu'dzeja ca' yúgu'të bönachi nacuá' lidxé' tu' ta'yéajlé'ë Dios.

<sup>35</sup> Cate' za' rení' dza na', yugu' bönni' yúlahui' gula'sól-lë'ë ni'a ná'agaquié', ate' gulé' bönni' na' rusayjé' lidxi guié:

—Busán-gáquié' bönni' na'.

<sup>36</sup> Ní'irö bönni' na' rusayjé' lidxi guié gudíxjöi'iné' Pablo didza' ni, gunné':

—Gula'sól-lë'ë bönni' yúlahui' didza' usana' libi'ili'. Na'a, guli'rúaj, en buli'huóaj dx'ado' ga rizóali'.

<sup>37</sup> Ní'irö birúajé' Pablo, en gudxé' yugu' ni'a ná'agaquié' bönni' yúlahui' na', gunné':

—Chigula'guíné' netu' lógaca bönachi sal-la' biti' narúguini queétu' ca rinná bë' xibá, en gula'gu'ë netu' lidxi guié, ate' netu' ni nabábatu' Roma. ¿Naru' tu'santsé' netu' bagáchi'sö? ¡Biti' ca' gaca! ¡llídigaré' légaquié' udusángäquié' netu'!

<sup>38</sup> Yöjhüójgaquié' ni'a ná'agaquié' bönni' yúlahui' na', en bulu'siyönné' yugu' bönni' yúlahui' didza' ni, ate' légaquié' guládxiné' cate' bila'yönné' nabábagäquié' Pablo, en Silas Roma. <sup>39</sup> Cate' bila'dxiné' lidxi guié ni', guláta'yuë' lógaquié' Pablo, en Silas cabí ulu'subáguë'ë légaquié' xíguia'. Ní'irö gula'béajé' légaquié' lidxi guié na', en guláta'yuë' lógaquié' ulu'rúajé' yödzö na'. <sup>40</sup> Ní'irö bila'rúajé' Pablo, en Silas lidxi guié na', ate' gula'yázié' lídxinu Lidia. Cate' chibila'lé'ené' bóchi'ru' nacu'ë ni', bulu'chízié' didza' icja nágagaquié', en la' bulu'zá'até' ni'.

## 17

### *Yugu' bönachi Tesalónica tuné' dzatsa*

<sup>1</sup> Gula'dödë' Pablo, en Silas lu yödzö Anfípolis, en lu yödzö Apolonia, ate' bila'dxiné' lu yödzö Tesalónica, ga ni' zoa tu yu'u ga tu'dubé' bönni' judío, en tu'sedé' queé' Dios.

<sup>2</sup> Bugá'ané' Pablo ni' idú galaj dza, ate' ca run cazé', guyijé' ga zoa yu'u na' cate' naca dza lá'ayi quégaquié' bönni' judío, ate' bë'lené' légaquié' didza'. <sup>3</sup> Buchila lá'ané', en bulu' iné' légaquié' rusédi le nazúaj lu guichi lá'ayi run bayudxi qui'i sáquë'ë Cristo, Bönni' na' tuné' löza bönni' judío udusölé' légaquié', ate' tödi gátié' ubané' lu yöl-la' guti. Ní'irö Pablo gudxé' légaquié':

—¡Caní guca queé' bönni' na' lë' Jesús, runa' libán queé' ga ni zóali! ¡Bönni' ni náquié' Cristo!

<sup>4</sup> Ní'irö bal-lë' gula'yéajlé'ë Cristo, ate' guluné' tsözxón Pablo, en Silas. Lësca' caní zián bönni' izá'a, bönni' ta'yéaj ládxí'gaquié' Dios, gula'yéajlé'ë Cristo. Lësca' zián nigula lo gula'yéajlé'ënu Cristo. <sup>5</sup> Ní'irö yugu' bönni' judío biti' ta'yéajlé'ë, lu yöl-la' ruzzé'e quégaquié' Pablo, bulu'tubé' yugu' bönni' biti' nácagaquié' tsahui', bönni' ta'dasé' ca'. Cate' chibulu'tubé' bönnachi zián, guluné' ga gulún dzatsa idú lu yödzö na', ate' bayudxi gula'yázié' lidxé' Jasón para ulu'béajé' Pablo, en Silas lógaca bönachi na' tun dzatsa.

<sup>6</sup> Cate' biti' bulu'dzölinë' Pablo, en Silas, gula'béajë' Jasón, en ia'zíca'rë' bőchi'ru' nacu'ë ni', ate' gula'chë'ë légaquië' lógaquië' bönni' yúlahui'. Gulu'ë zidzaj didza', ta'nnë':

—Yugu' bönni' na' nutsá'gaquië' bönachi idútë yödzölió chibila'dxinë' ca' ni. <sup>7</sup> Jasón ni gulu'ë légaquië' lidxë'. Yúgu'të bönni' ni ta'dá'baguë'ë xibá queë' César, bönni' rinná bë'enë' rë'u, ta'nnë': “Zoë' ia'tué' bönni' rinná bë'ë, lë' Jesús.”

<sup>8</sup> Cate' bila'yönnë' yugu' bönni' lu yödzö, en yugu' bönni' yúlahui' na' lë ni, gula'bö'ë böniga. <sup>9</sup> Ni'irö, gudödi gula'zi'ë bönni' yúlahui' dumí le bulu'cá'anagarë' Jasón, en ia'zíca'rë' bönni' na', bulu'sanë' légaquië'.

### *Le gulunë' Pablo, en Silas lu yödzö Berea*

<sup>10</sup> Ni'irö yugu' bőchi'ru' ni' la' gula'sól-la'të' Pablo, en Silas, ni' naca chi'i dzö'ölö, ate' söjáquië' yödzö Berea. Cate' bila'dxinë' ni', gula'yázië' lu yu'u ga tu'dubë' bönni' judío nacu'ë ni', en tu'sëdë' queë' Dios. <sup>11</sup> Gulácarë' tsahui' bönni' ni ca bönni' nacu'ë Tesalónica, tu' gula'zi' lu ná'agaquië' xtídzë'ë Xanru' idú ládx'i'gaquië'. Yugu' dza bulu'labe' dxi'a le nazúaj lu guichi lá'ayi, para iléquibe'enë' channö nácatë lë na' rnnë' Pablo. <sup>12</sup> Caní guca, zián bönni' judío gula'yéajlé'ë Cristo. Lësca' caní, zián bönni' izá'a, yugu' nigula lo, en yugu' bönni' gula'yéajlé'ë Cristo. <sup>13</sup> Ni'irö cate' guléquibe'enë' bönni' judío nacu'ë Tesalónica, lësca' riguúxjö'ë Pablo xtídzë'ë Dios lu yödzö Berea, yójáquië' ni', en gulunë' ca' ni' ga gulún dzatsa bönachi zián. <sup>14</sup> Ni'irö yugu' bőchi'ru' ni' la' gula'sól-la'të' Pablo, para tseje' ga naca ra' nísado', pero bulu'gá'anasë' Silas, en bi'i Timoteo lu yödzö Berea. <sup>15</sup> Yugu' bönni' Berea na' gula'chë'ë Pablo lu yödzö Atenas. Ni'irö la' yójhuújgacatë' lu yödzö Berea, tu'ú'ë xtídzë'ë Pablo, para ilé' Silas, en bi'i Timoteo, tsöjácatë' ga ni' zoë' Pablo.

### *Le benë' Pablo lu yödzö Atenas*

<sup>16</sup> Tsanni ni' zoë' Pablo ribözë' Silas, en bi'i Timoteo, lu yödzö Atenas, ruhui'ini ládxë'ë tu' rilé'enë' ta'yéaj ládx'i'gaca yúgu'të bönachi yödzö na' yugu' budó' guiój budó' yaga.

<sup>17</sup> Que lë ni na' bë'lenë' bönni' judío, en bönni' ta'yéaj ládx'i'gaquië' Dios didza' ga naca lu yu'u ga tu'dubë' tu'sëdë' queë' Dios. Yugu' dza bë'lenë' nupa ta'dá lu yé'ëyi didza' ca naca xtídzë'ë Cristo. <sup>18</sup> Bal-lë' bönni' dá'gaquië' le tu'sédinë' bönni' epicúreo, en le tu'sédinë' bönni' estoico gulu'ilenë' Pablo didza'. Bal-lë' gula'nnë':

—¿Bizxi ré'ënitsenë' innë' bönni' huë' didza' ni?

Ia'bal-lë' gula'nnë':

—Réquitu' náquië' nu run libán quégaca dios zi'tu'.

Caní gula'nnë' tu' runë' libán Pablo lógaquië' que didza' dxi'a queë' Jesús, en que yöl-la' rubán. <sup>19</sup> Ni'irö gula'guélë'ë né'ë Pablo, en gula'chë'ë lë' lu gu'a ga tu'dubë' tu'ë didza', nazí'i le Areópago, ta'nnë':

—¿Naru' huácatsö yónitu' didza' cubi ni rusiyönnu' netu'? <sup>20</sup> Rusiyönnu' netu' le tun ga rubámitu'. Ré'ënitu' inózitu' bizxi rnna didza' ni ru'u.

<sup>21</sup> Bítirö ta'yaza ládx'i'gaquië' ilunë' bönni' Atenas na', en bönni' izá'a nacu'ë ni', pero ila'yónisinë', en ilu'isë' didza' tu le cubi.

<sup>22</sup> Ni'irö guzuínë' Pablo gatsaj láhui'lö lö'a Areópago na', gunné':

—Bönni' Atenas, yúgu'të le rilé'eda' naca bë' reaj ládx'i'da'ali' yugu' dios queéli'. <sup>23</sup> Cate' gudöda' lu yödzö, en buyúgaca' yugu' le reaj ládx'i'li', yójxáca'a ca' tu nichu ga ni' nazúaj le rnna caní: “Tu Dios, Cuntu Nu Nunbë' Lë’.” Dios na' reaj ládx'i'li'-në' sal-la' biti' núnbë'ëli'-në', Dios ni runa' libán queë' loli'.

<sup>24</sup> ¡Dios ni benë' yödzölió, en yúgu'të le nacuá' yödzölió ni! ¡Náquië' Xani yehua' yubá, en Xani luyú ni, en biti' ca' zoë' tu yudo' núngaca bönachi! <sup>25</sup> Bítirö bi riyadzaj queë' le gaca ulu'nödzaj bönachi, tu' runödzjé' Lë' cazé' quégaca yúgu'të bönachi yöl-la' na'bán, en yúgu'të le riquíniru'.

<sup>26</sup> 'Lë' benë' tuzë' bönni' ga zá'gaca yúgu'të bönnachi izá'a para ila'cuá' idú yödzölió, en bulu'e dza ila'cuá', en gapa ral-la' ila'cuá'. <sup>27</sup> Dios bucu'ë légaquié' para ulu'guiljé' Lë', channö nácati'tés ila'dzöliné' Lë' sal-la' ila'gán ila'zönsé'. Caní raca sal-la' biti' zoë' zi'tu' ga zóaru' tu turu'. <sup>28</sup> Lë cazé' runë' ga zóaru' nabanru', en bi gaca gunru', en le nácaru'. Naca ca na' gula'nné' bal-lë' bönni' nútsa'gaquié' libí'ili', nupa bulu'zúaj le do' rúl-lali', le ta'nná: "Di'a dza queé' Dios nácaru'." <sup>29</sup> Na'a, channö nácaru' dí'a dza queé' Dios, biti' ralla' innaru' náquié' Dios ca tu budó' guijo'budó' yaga, o tu le néquini oro, o plata, o guijoj, le núnngaca bönnachi ca naca tu le ta'guínnajsö ícjaguequi. <sup>30</sup> Dios budödë' cá'asö yugu' le guluné' lu yöl-la' biti' réajni'i quégäquié' yugu' iz chigula'dödi, pero na'a rinná bë'enë' yúgu'të bönnachi idútë yödzölió ulu'bi'i ladxigaca. <sup>31</sup> Dios chinulu'ë tu dza cate' uchi'a usöröö' yúgu'të bönnachi. Idú tsahui' naca ca uchi'a usöröö' légaquié' lu në'ë Jesús, bönni' na' buzóa cazé' Lë', ate' lögaca yúgu'të bönnachi benë' tsutsu gaca caní tu' busubanë' Lë' lu yöl-la' guti.

<sup>32</sup> Cate' bila'yönnë' didza' bë'ë Pablo ca guca, zoa nu bubán lu yöl-la' guti, bulu'titjë' bal-lë', ate' ia'bal-lë' gula'nné':

—Yöniguetu' ia'tú lë ni ru'u didza' que.

<sup>33</sup> Ní'irö burúajé' Pablo gatsaj láhui'lö ga na' nacu'ë, söhuójé'. <sup>34</sup> Bal-lë' gula'yéajlé'ë Cristo, en guluné' tsözxón Pablo. Nútsë'ë Dionisio, bönni' areópago, lädjagaquié', ate' nútsa'nu ca' lädjagaquié' nigula na' lënu Dámaris. Ia'bal-lë' na' gula'yéajlé'ë ca' Cristo.

## 18

### *Le benë' Pablo lu yödzö Corinto*

<sup>1</sup> Gudödi guca lë ni, buzé'ë Pablo yödzö Atenas na', ate' guyijé' yödzö Corinto. <sup>2</sup> Yöjxáquié' Aquilo, tu bönni' judío ni'. Guljé' bönni' ni luyú Ponto, en si' bidxíngazé' yödzö Corinto na'. Buzé'ë luyú Italia len nigula queé', lënu Priscila, tu' gunná bë'ë Claudio, bönni' unná bë', ulu'rúajé' yúgu'të bönni' judío yödzö Roma. Guyijé' Pablo ga nacu'ë Aquilo, en Priscila na' <sup>3</sup> tu' naca tuz dxin tuné' Aquilo, en Pablo. Bugá'analené' légaquié', ate' tsözxón guluné' dxin, tuné' yugu' yu'u guídido'. <sup>4</sup> Cate' nácagaca dza lá'ayi quégäquié' bönni' judío, razié' Pablo lu yu'u ga tu'dubë' tu'sëdë' queé' Dios, ga ni' bë'lenë' légaquié' didza'. Gú'unne' ulu'iné' yugu' bönni' judío, en yugu' bönni' izá'a nacu'ë ni', naca idútë li le riguixjö'ë ca naca queé' Jesucristo.

<sup>5</sup> Cate' bila'dxiné' Silas, en bi'i Timoteo ni', nuzá'agaquié' luyú Macedonia, nugui'ide'enë' Pablo, runë' libán que xtídzë'ë Dios, en runë' ba nalí lögäquié' bönni' judío, rnnë':

—Jesús náquié' Cristo, Nu na' tuné' löza yugu' bönni' judío udusölé' légaquié'.

<sup>6</sup> Cate' bönni' judío nacu'ë ni' gula'dá'bágue'ë xtídzë'ë, en gula'nné' zi'ë que, ní'irö Pablo gudxibë' lari' nácuë' para ulu'iné' légaquié' bíti'rö nabágue'ë lë' ni'a quégäquié', ate' gudxë' légaquié':

—La' cuínsili' nabága'li' xíguia' que yöl-la' guti queéli', calëga neda' nabága'a le. Na'a, uyija' ga nacuá' bönnachi izá'a.

<sup>7</sup> Ní'irö burúajé' Pablo ni', en guyijé' lidxë' Justo, bönni' reaj ladxë'ë Dios, ate' zoa lidxë' gal-la' ra' yu'u ga tu'dubë' bönni' judío, en tu'sëdë' queé' Dios. <sup>8</sup> Crispo, bönni' lo que yu'u ga na' tu'dubë' tu'sëdë' queé' Dios guyéajlé'ë Xanru' Jesús, ate' dzágagaca lë' yúgu'të bönnachi nacuá' lidxë'. Cate' bila'yönnë' xtídzë'ë Dios, zián bönni' Corinto gula'yéajlé'ë Cristo, ate' gula'dilë' nisa. <sup>9</sup> Ní'irö Lë cazé' Xanru' gudxë' Pablo lu yëla bëchigal, gunné':

—Beti' gádxinu', en biti' su' dxisö, quíxjö'u xtídz'a'a, <sup>10</sup> tu' zóalen caza' neda' li', ate' cuntu nu uzapa' në'e li' para guá' dö' quiu', tu' néquiguequi quia' bönnachi zián lu yödzö ni.

<sup>11</sup> Bugá'anë' Pablo ni' idú ca tu iz yu' gatsaj, ate' busédiné' légaquié' xtídzë'ë Dios.

<sup>12</sup> Cate' bidxín dza rinná bë'ë Galión luyú Acaya, guláquië' tuz bönni' judío bití ta'yéajlë', ate' gula'dá'báguë'ë Pablo, en gula'chë'ë lë' ga rö'ë ruchi'a rusörö'ë Galión na'.

<sup>13</sup> Gulé' Galión na':

—Bönni' ni rigú'u yöl-lë'ë bönachi para ilunë' bal Dios, ca ridá'baga' xibá queétu'.

<sup>14</sup> Cate' chizóa gu'ë didza' Pablo, Galión na' gudxë' yugu' bönni' judío, rnnë':

—Libí'ili', bönni' judío, la'tu' guca tu le riguitsaj xibá queë' César, o tu le ruá' dö', guá' ilena' uzé naga' xtídza'li' ca ral-la' guna', <sup>15</sup> pero channö naca didza' bizxaj que dídza'sö, o que lágaca bönachi, en ca naca xibá queézili', guli'cá'ana tsahui' lib'isili', tu' cabí ré'ënda' neda' gaca' nu uchi'a usörö yugu' le caní.

<sup>16</sup> Ní'irö Galión bulágui'ë légaquië' lu yu'u yúlahui'. <sup>17</sup> Ní'irö yúgu'të bönni' uládz na' gula'guélë'ë Sóstenes, bönni' lo que yu'u ga tu'dubë' bönni' judío, en tu'sëdë' queë' Dios, ate' gula'guínë' lë' lö' a yúlahui', pero bití' bë' ládxë'ë Galión lë na' raca.

<sup>18</sup> Pablo bugá'anë' lu yödzö na' zián dza, ate' gudödi busiyönnë' bôchi'ru' nacu'ë ni' didza', guyijë' yödzö Cencrea, ga ni' benë' yútusö icjë', tu' dë tu le nazí' lu në'ë lahuë' Dios gunë'. Ní'irö gurenë' tu lë'e barco, para tsejë' luyú Siria, dzágagaquië' lë' Priscila, en Aquilo. <sup>19</sup> Cate' bila'dxinë' yödzö Éfeso, Pablo bulá'alenë' légaquië' ni'. Guyázië' lu yu'u ga tu'dubë' bönni' judío, en tu'sëdë' queë' Dios, ate' bë'lenë' nupa nacu'ë ni' didza'. <sup>20</sup> Yugu' bönni' ni' guláta'yuë' lahuë' Pablo ugá'analenë' légaquië' ia'lati' xidzé, pero lë' bití' gú'unñë'. <sup>21</sup> Bé'lenë' légaquië' didza', gunnë':

—Run bayudxi soa' gapa' laní si' gaca Jerusalén, ate' leyúbölö huöda' ga ni zóali', channö gué'ënnë' Dios.

Ní'irö gurenë' Pablo tu lë'e barco, en buzé'ë Éfeso na'.

#### *Ridxinë' Pablo Antioquía, ate' risí lahuë' röjenë' libán le bunni luzuí*

<sup>22</sup> Gudödi bidxinë' Pablo yödzö Cesarea, gurenë' guyijë' Jerusalén, ga ni' yöjyúe' bönachi queë' Cristo, ate' ní'irö buzé'ë ni', en guyijë' Antioquía. <sup>23</sup> Gudödi zoë' ni' nababa dza, buzé'ë ni', sa'yéaje' tu tu yödzö luyú Galacia, en Frigia. Benë' tsutsu bôchi'ru' nacu'ë ni' ca naca le ta'yéajlë'ë Cristo.

#### *Runë' libán Apolos lu yödzö Éfeso*

<sup>24</sup> Tu dza ni' bidxinë' Apolos, tu bönni' judío lu yödzö Éfeso. Guljë' bönni' ni lu yödzö Alejandría, en nabé'ede'enë' ru'ë didza', en nazédadë'ë le nazúaj lu guichi lá'ayi.

<sup>25</sup> Chinazëdë' bönni' ni ca naca le réajlë'ëru' Xanru'. Idú ládxë'ë bë'ë didza', en ca nácatë busédinë' bönachi ca naca queë' Jesús, sal-la' núnbë'ë tuz le ruqufla bönachi nisa ca benë' Juan. <sup>26</sup> Gusí lahuë' Apolos ru'ë didza' idú ládxë'ë ga naca lu yu'u ga tu'dubë' bönni' judío, en tu'sëdë' queë' Dios. Cate' Priscila, en Aquilo bila'yönnë' didza' ru'ë Apolos na', gula'chë'ë lë' quez, en bulu'zéajni'irönë' lë' xibá queë' Dios. <sup>27</sup> Cate' gú'unñë' Apolos tödë' luyú Acaya, bulu'tipë' ládxë'ë, ate' bulu'zúajë' tu lu guichi le tsöju'gaquië' quégäquië' bönni' teaj ládxë'ë Cristo luyú Acaya na', para ilunë' Apolos na' bal. Cate' bidxinë' Apolos luyú na', yugu' bönni' ni' teaj ládxë'ë Cristo bulu'zí'dë'ë xibé didza' ru'ë Apolos na', tu' ruzá' ládxë'ë Dios quégäquië'. <sup>28</sup> Caní guca, tu' bucul-lë' Apolos na' yugu' bönni' judío ni' lögaca yúgu'të bönachi, tu' bugunë' dxin le nazúaj lu guichi lá'ayi, en bulu'e bönni' na' Jesús naca cazë' Cristo.

## 19

#### *Le benë' Pablo lu yödzö Éfeso*

<sup>1</sup> Tsanni ni' zoë' Apolos lu yödzö Corinto, gudödë' Pablo gapa nacu'ë yödzö ia'lati' ra'lö, ate' bidxinë' Éfeso. Yójxáquië' bal-lë' bönni' ta'yéajlë'ë Cristo ni'. <sup>2</sup> Pablo gunábinë' légaquië', rnnë':

—¿Naru' bidisóalenë' Dios Bö' Lá'ayi lib'ili' cate' ni' guyéajlë'ëli' Cristo?

Gulé' lë':

—Biti' nayónitu' channö zoë' Dios Bö' Lá'ayi.

<sup>3</sup> Ní'irö Pablo gunábinë' légaquië', rnnë':

—¿Nacxi guca le bidílali' nisa?

Ta'nné':

—Ca buquílë' Juan bönachi nisa.

<sup>4</sup> Pablo gunné':

—Buquílë' Juan bönachi nisa, nupa ni' bulu'bñ'i ládx'i'guequi, ate' Juan caz gudxë' léguequi ral-la' ila'yéajlë' Bönni' na' si' zá'télë' ca lë', ate' Bönni' ni naquië' Jesús, Lë' Cristo.

<sup>5</sup> Cate' yugu' bönni' na' bila'yönnë' didza' ni ru'ë Pablo, bila'dilë' nisa tu' chita'yéajlë'ë Xanru' Jesús. <sup>6</sup> Cate' guxóa né'ë Pablo légaquië', en ni' rulidzë' Dios, bidisóalenë' Dios Bö' Lá'ayi légaquië', ate' gulu'ë didza' yúbölö, en gulu'ë didza' uláz queë' Dios. <sup>7</sup> Guláquië' bönni' ni idú chínnuë'.

<sup>8</sup> Guzóë' Pablo idú ca tsonna beo' ni', ate' guyázië' lu yu'u ga tu'dubë' bönni' judío, en tu'sedë' queë' Dios, ate' lu yöl-la' rugu ladxi' benë' libán lógaquië'. Bé'lenë' légaquië' didza', en gú'unné' ulu'iné' légaquië' nácaté le riguixjö'ë ca rinná bë'ë Dios. <sup>9</sup> Ní'irö bizídi icja ládx'i'do'gaquië' bal-lë', en biti' gula'yéajlë'ë Cristo, ate' gula'nné zi'ë que xtídzë'ë Xanru' ga nacuá' bönachi zián na'. Ní'irö Pablo bulá'alenë' légaquië', ate' bubéajë' quez nupa ta'yéajlë' Cristo. Bé'lenë' bönachi ni ta'yéajlë' Cristo didza' yugu' dza ga na' tu'dubë' lu yu'u ga rusédinë' Tiranno bönachi. <sup>10</sup> Caní bénatica'së' Pablo idú ca chopá iz, ate' caní guca, bila'yöni yúgu'të bönachi didza' ca naca queë' Xanru' Jesús, bönachi nacu'ë yugu' yödzö luyú Asia, bönachi judío, en bönachi izá'a. <sup>11</sup> Dios benë' yugu' yöl-la' huáca zxön lu né'ë Pablo. <sup>12</sup> Caní guca, bal-lë' bönni' gula'zi'ë yugu' lári'do' bégue'ë icjë' Pablo, en yugu' lari' tsölá'a bugalë' lë'ë, ate' yöjuá'gaquië' léguequi gapa nacuá' nupa te'e, ate' bulu'huöáquië' ca naca yödzöhué' que queëgaquië', en bulu'rúaj bö' xihui' yú'ugaca bönachi na'.

<sup>13</sup> Ní'irö bal-lë' bönni' judío udá dzaga tu'béajë' bö' xihui' gulé'ennë' ulu'gunë' dxin Lë' Xanru' Jesús para ulu'béajë' yugu' bö' xihui' yú'ugaca bönachi, ta'nné':

—Ni'a que Lë' Jesús, Nu na' runë' libán que Pablo, rinná bë'etu' lib'ili' urúajli'.

<sup>14</sup> Caní gulunë' gadxi bönni' zxifiné' Esceva, tu bönni' judío náquië' bönni' lo ládjagaquië' bixúz unná bë'. <sup>15</sup> Bubí'i didza' bö' xihui' na', gunná:

—Núnbe'a-në' Jesús, en núnbe'eda' bönni' lë' Pablo, pero lib'ili', ¿núzxite lib'ili'?

<sup>16</sup> Ní'irö guxití'ë bönni' na' yu'u lë' bö' xihui', yöjenë' légaquië' zi', en bucül-lë' yúgu'të', tu' guzxéqui'rönë' ca légaquië'. Caní guca, xiguídigacasé', en hué'gacatézé' bulu'zxúnnajé' gadxë' bönni' na' lu yu'u ni'. <sup>17</sup> Guzé didza' ca guca lë ni, ate' bila'yöni yúgu'të nupa nacuá' lu yödzö Éfeso, bönachi judío, en bönachi izá'a, ate' yúgu'të' guládxinë' Dios. Que lë ni na' gulunë' zxön Lë' Xanru' Jesús.

<sup>18</sup> Lësca' bila'dxinë' zián bönni' ta'yéajlë'ë Cristo, en gula'xóalépë' dul-la' nabága'-gaquië', en gula'guíxjö'ë le chigulunë'. <sup>19</sup> Lësca' caní gulunë' zián bönni', zí'alö gulunë' yöl-la' udzá'. Dujuá'agaquië' yugu' guichi udzá' quégaquië', ate' bulu'zégu'ë léguequi lögaca yúgu'të bönachi. Bulu'lábë' tsca nazáca'gaca guichi na', le guca idú chi un mil dumí plata. <sup>20</sup> Caní guca, guzéda' xtídzë'ë Xanru', en bidéli'da' bönachi zián. Idú ládx'i'gaquië' gula'yéajlë'ë Cristo.

<sup>21</sup> Gudödi gulaca lë ni, benë' queë' Pablo tsejë' Jerusalén, pero zí'alö ral-la' tödë' yugu' yödzö luyú Macedonia, en luyú Acaya, ate' gunné':

—Tödi tseja' Jerusalén, run bayudxi tseja' ca' Roma.

<sup>22</sup> Ní'irö gusól-lë'ë-bi' chópabi' bi'i bönni' tácalenbi' lë', lögacabi' Timoteo, en Erasto, luyú Macedonia, pero bugá'anë' lë' nababa dza luyú Asia na'.

<sup>23</sup> Bulu'tsatsa bönachi Éfeso dza ni', ate' gula'dá'baguë'ë xtídzë'ë Xanru'. <sup>24</sup> Benë' Demetrio, bönni' gubëdxi guïë plata ga bulu'tsatsë'. Run cazë' yugu' lidxi budó' guiój budó' yaga néquiguequini plata que dios quégaquië', lënu Diana. Gula'zi'ë bönni' tunë' dxin ni dumí bach. <sup>25</sup> Butubë' Demetrio na' ia'zíca'rë' bönni' tunë' la' dxin nisö, ate' gudxë' légaquië':

—Böcha'a, nöz quézili' ca naca dxin runru', runna dumí queëru'. <sup>26</sup> Rilé'eli', en riyónili' ca runë' Pablo na'. Calégasö Éfeso ni, pero idú luyú Asia chibidéli'në' bönachi zián, ate' chibutsé'ë ca tunë', tu' rë' légaquië': "Yúgu le núngraca bönachi biti' nácagaca dios."

<sup>27</sup> Calégasö zoa bönadxi ugá'ana cá'asö dxin ni runru', pero lësca' zoa bönadxi ugá'ana cá'asö yudo' que dios zxön lënu Diana. Caní gaca, ugá'ana cá'asö yöl-la' zxön queënu, dios ni ta'yéaj ládx'i'gaca-nu bönachi idútë luyú Asia, enca' idútë yödzölió.

<sup>28</sup> Cate' yugu' bönni' na' bila' yönnë' didza' ni, gula'léde'enë', ate' gulu'ë' zidzaj didza', ta'nnë':

—Nácatérönu zxön Diana, dios queëru' rë'u, bönachi Éfeso.

<sup>29</sup> Caní guca, bulu'tsatsa bönachi idútë lu yödzö na', ate' guláquië' tuz, en carelö yójáquië' lõ'a yúlahui'. Gulá'ayöjë' Gayo, en Aristarco, bönni' Macedonia túngaquië' Pablo tsözxón, ga ni'. <sup>30</sup> Cate' gú'unne' Pablo tsázië' ga nacuá' bönachi zián na', biti' ca' gulu'ë' lë' lataj bönni' ta'yéajlë'ë Cristo. <sup>31</sup> Lësca' caní gulunë' bal-lë' bönni' yúlahui' que luyú Asia, bönni' ta'lé'enë' Pablo dxi'a. Gula'sól-lë'ë queë' nupa guláta'yu lahuë' biti' tsazië' lõ'a yúlahui' na'. <sup>32</sup> Ga ni' tu'tsatsë', en ta'bódxi'ë, tu le ta'nnë' bal-lë', en ia'tú le ta'nnë' ia'zíca'rë', tu' rö'ögacasë' baröli bönni' zián na' tu'tsatsë', en lá'tu'biqu' yúgu'tégäquië' biti' nözguequinë' bizx que na' nudúbigaquië' ni'. <sup>33</sup> Ní'irö yugu' bönni' judío gula'béajë' Alejandro ladaj bönachi zián na', ate' bulu'dxiguë'ë lë' lögaca bönachi zián na'. Bulu'e Alejandro na' len në'ë para ila'bó' dxisö, tu' gú'unne' gu'ë didza' le gácalen yugu' bönni' judío na' lögaca yúgu'téguequi. <sup>34</sup> Cate' guléquibe'enë' náquië' judío, yúgu'të' gulu'ë' tsözxón zidzaj didza' idú ca chopá hora, ta'nnë':

—Nácatérönu zxön Diana, dios queëru' rë'u bönachi Éfeso!

<sup>35</sup> Ní'irö bönni' uzúaj que yúlahui' benë' ga gula'bó' dxisö bönachi zián na', gunné':

—Bönni' Éfeso, nözigaca yúgu'të bönachi zoa yudo' queënu Diana, dios zxön, ni. Rë'u ni, bönachi Éfeso, run chí'iru' yudo' na', enca' budó' na' bôxaj ga zóaru', le birúaj lúzxiba.

<sup>36</sup> Cuntu nu gaca tá'baga' lë ni. Que lë ni na' run bayudxi sóalí' dxisö, en biti' bi gúntëzili'.

<sup>37</sup> Naché'gacali'-në' bönni' ni, en biti' ta'banë' le dzö'ö yudo', en biti' ta'nnë' xihuë'ë queënu dios queéli'. <sup>38</sup> Que lë ni na', channö zoa didza' bizxaj quégäquië' Demetrio, en yugu' bönni' gubëdxi guïë plata nacuá'lenë' lë', len nútítës bönni', dë lataj ga nu uzé nagui légaquië', en zoa nu uchi'a usörö légaquië'. Ni' huáca ulu'zegui luzá'agaquië' didza' tuë' ia'túë'. <sup>39</sup> Na'a, channö dë ia'tú le inábali', huáca ucá'anaru' tsahui' le cate' ulu'dubi bönni' yúlahui' ca na' rinná bë' yúlahui'. <sup>40</sup> Zoa bönadxi nu uzegui rë'u didza' ni'a que dzatsa ni guca na'a, inná ridá'baga'ru' yúlahui'. Biti' bi gaca innaru' bizx que guca dzatsa ni.

<sup>41</sup> Cate' budxi bë'ë didza' ni, busól-lë'ë bönachi zián na' nudúbigaca ni' tsöhuójgaca lídxiguequi.

## 20

### Sa'yéajë' Pablo luyú Macedonia, en luyú Grecia

<sup>1</sup> Cate' gurö'ö dxi dzatsa na' guca lu yödzö Éfeso, bulidzë' Pablo yugu' bönni' ta'yéajlë'ë Cristo, ate' guchízië' icja nágagaquië' didza'. Gudödi ni' bunidë' légaquië', en la' bulá'alente' légaquië'. Birúajë' ni', ate' sa'yéajë' luyú Macedonia. <sup>2</sup> Gudödë' yugu' yödzö luyú ni', ruzéajni'ide'enë' bôchi'ru' nacu'ë ni', ate' gudödi ni' bidxinë' luyú Acaya.

<sup>3</sup> Guzóë' Pablo ni' idú ca tsonna beo'. Cate' chizóa cuenë' tu lë'e barco para tsejë' luyú

Siria, gúquibe'enë' ta'bó' nísië' bönni' judío lë' para ila'zönë' lë'. Que lë ni na' buguélë'ë nöza söhuójë' luyú Macedonia, ate' bidxinë' yödzö Filipos.<sup>4</sup> Sópater, zxí'inë' Pirro, bönni' Berea, en Aristarco, en Segundo, yugu' bönni' Tesalónica, en Gayo, bönni' Derbe, enca' bi'i Timoteo, en Tíquico, en Trófimo, yugu' bönni' Asia, söjácalenë' tsözxón lë'.<sup>5</sup> Ní'irö yugu' bönni' ni yöjnörugaquië' lahuë' Pablo, yöjáquië' yödzö Troas, ga ni' gula'bözë' lë'.<sup>6</sup> Lu yödzö Filipos na', neda', Lucas, yöjtsaga'-në' Pablo. Cate' chigudödi laní cate' tahuë' bönni' judío yöta xtila biti' nazí'i cúa zi que, gurentu' tu lë'e barco, en buzá'atu' Filipos na'. Gudödi gayu' dza budzágatu' bönni' ni yöjnörugaquië' lahuë' Pablo, yöjáquië' Troas, ate' ni' bugá'anatu' gadxi dza.

#### *Le benë' Pablo lu yödzö Troas*

<sup>7</sup> Dza risí lo le gadxi dza bulu'dubë' bönni' ta'yéajlë'ë Cristo para ilahuë' yöta xtila le rusá' láxhi'ru' ca gútië' Jesucristo. Ni' rusédinë' Pablo légaquië', en tu' ral-la' uzé'ë ni' cate' za' rení' dza na', xidzé bë'ë didza', ga bidxitnë gudödi guluhuëla.<sup>8</sup> Ga ni' nudúbigaquië' naca lu yu'u xitsá', ate' nacuá' zián le ta'gú'u bení' ga na'.<sup>9</sup> Zóabi' bi'i Eutico ni', rö'öbi' ga ra'a lení' que yu'u na', ate' nadödirö yëla lobi' tu' ritunna libán runë' Pablo. Ga ni' rö'öbi' rásibi' bi'i na' naca ga bunni cuía lu yu'u, ate' rásisibi' ca' gubíxitëbi', bőxjabi' ga bidxitnë' zxan yu'u. Nátitébi' bulu'lisë'-bi'.<sup>10</sup> Bötje' Pablo zxan yu'u na', ate' yöjxóë' lëbi', en bunidë'-bi'. Ní'irö gudxë' nupa nacuá' ni':

—Biti' gadxi idzóbili'. Nabanbi'.

<sup>11</sup> Cate' chibubenë' Pablo xitsá', gudélë'ë yöta xtila, gudahuë'. Ní'irö Pablo bë'lenë' légaquië' didza' ga bidxitnë zila balö. Gudödi ni' burúajë' ni'.<sup>12</sup> Bi'i bönni' ra'bán na' gubíxibi', bulu'ché'-bi' nabanbi', en bulu'zí' zxöndë'ë.

#### *Ca guca bidxitu' Mileto*

<sup>13</sup> Gunörutu' lahuë' Pablo, en yöjchentu' tu lë'e barco, ate' gudöditu' ga bidxitu' yödzö Asón para tsöjtságatu'-në' Pablo ni', para gaca ca na' chibén xtídza'tu', tu' gú'unnë' Pablo tsejë' ni' sé'esi ni'ë.<sup>14</sup> Cate' chibudzágatu'-në' lu yödzö Asón na', gurénlenë' netu' lë'e barco, ate' guyéajtu' yödzö Mitilene.<sup>15</sup> Buzá' barco ni', ate' dza buropi bidxitu' tödi li ga zoa luyú bidxi nazí'i le Quío, ate' ia'tú dza ca' gudöditu' tödi li ga dë yödzö Samos, en bidxitu' yödzö Trogilio ga ni' guzóatu' tu chi'i. Ia'tú dza ca' bidxitu' yödzö Mileto.<sup>16</sup> Caní bentu' tu' chibenë' queë' Pablo tödisë' yödzö Éfeso, para cabí tsenë' luyú Asia, tu' run bayudxi soë' Jerusalén cate' naca dza Pentecostés channö séqui'në'.

#### *Didza' bë'ë Pablo lu yödzö Mileto*

<sup>17</sup> Cate' ni' zoë' Pablo lu yödzö Mileto, gusól-lë'ë nu yöjlidza bönni' gula tapa chi'ë bönnachi queë' Cristo nacu'ë Éfeso.<sup>18</sup> Cate' bila'dxinë' ga zoë' Pablo, lë' gudxë' légaquië':

—Libí'ili' chinóz quézili' ca bénatica'sa' ga zóali' ga gudela' bidxina' luyú Asia.<sup>19</sup> Yugu' dza bena' xichinë' Xanru' lu yöl-la' nöxa' ladxi', ga bidxitnë gurödxa' ni'a queéli', ate' zián le guca quia' le guzxí' bë' neda' ni'a que le ruá' dö' gulunë' quia' bönnachi judío biti' ta'yéajlë' Cristo.<sup>20</sup> Bénatica'sa' libán ga zóali' que yúgu'të le ruzí'ili' xibé, en busédida' libí'ili' yálajdo' ga nudúbili', en gapa naca lu yu'u lídxili'.<sup>21</sup> Bena' ba nalí lógaca bönnachi judío, en lógaca bönnachi izá'a para ulu'bí' láxhi'gaca, en ulu'huöáca queë' Dios, en ila'yéajlë' Xanru' Jesucristo.<sup>22</sup> Na'a, Dios Bö' Lá'ayi chinunë' quia' tseja' Jerusalén, en biti' nözda' bizxi gaca quia' ni'.<sup>23</sup> Yúgu'të yödzö ga ridá', riguíxjöi'inë' Dios Bö' Lá'ayi neda', rë' neda' ila'gu'ë neda' lidxi guíë bönni' judío biti' ta'yéajlë', en ulu'saca' zi'ë neda'.<sup>24</sup> Biti' bi runi neda' que lë na' gaca, sal-la' gátia' o cabí gátia', pero rui'i láxhi'sida' údxí guna' le chigudéla'a runa', para guna' dxin na' budödë' Xanru' Jesús lu na'a, le naca guna' libán que didza' dxí'a ca naca le ruzá' ládxë'ë Dios queéru'. Caní guna' len yöl-la' rudzeja.

<sup>25</sup> 'Na'a, yúgu'tëli' na' chibena' libán loli' ca rinná bë'ë Dios, nözda' bítirö ulé'eli' neda'.

<sup>26</sup> Que lë ni na', le nácatë rea' libí'ili' na'a dza. Biti' nabága'a neda' queéli' nituli' libí'ili'.

<sup>27</sup> Biti' bi bucáchi'da' lib'i'li', pero gudíxjöi'ida' lib'i'li' yúgu'té le rnné' Dios. <sup>28</sup> Que lë ni na', guli'gún chi'i cuinli', en guli'gún chi'i yúgu'té bönachi queë' Cristo, tu' nuzóe' Dios Bö' Lá'ayi lib'i'li' para gácalenli légaquië', en gun chi'i lib'i'li' bönachi queë' Xanru', Bönni' na' gútië' uláz quég aquië', bulalje' xichönë' le böá'uínë' légaquië'. <sup>29</sup> Chinözda', tödi uzá'a ga zóali', ila'yaza nupa ilé'eni ulu'suniti bönachi queë' Cristo ga zóali', ilunë' ca tunba' bö'cu' guf'a sínia', tu'sunítiba' yugu' bö'cu' zxila'. <sup>30</sup> Ilá'rúajë' bönni' nútsa'gaquië' ládjali', ate' ilu'ë didza' biti' nácatë para ulu'béaje' quégacase' nupa ta'yéajlé' Cristo nútsa'gaca ládjali'. <sup>31</sup> Que lë ni na', guli'soa ban ladxi', en guli'tsöjnë ca bena' neda' idú ca tsonna iz, rëla, en të dza buchízia' icja nágali' tu tuli' ga bidxitnë gurödxa' queëli'.

<sup>32</sup> 'Na'a, böchi' luzá'ado', rigu'a lib'i'li' lu né'ë Dios. Rinábida' Lé' uzá' ládxë'ë queëli', en gunë' ca rnna xtídzë'ë. Dios gunë' lib'i'li' tsutsu, en gunë' ga idéli'li' gunli' tsözxón yugu' bönni' rõ queë'. <sup>33</sup> Catu caz guzé' ládex'a le nequi quég aquië' böchi' luzá'a. Biti' guzé' ládex'a dumí, o lari' quég aquië'. <sup>34</sup> Nöz quészili' dxi'a, len na'a caza' bena' dxin para gaca gá'ua' le biyadzaj quia', en quégacase' nupa gula'cuá'len neda'. <sup>35</sup> Ca naca yúgu'té le bena', bulu'ida' lib'i'li' caní ral-la' gunru' dxin para gaca gácalenru' nupa bi ta'yadzaj. Ral-la' tsöjneru' didza' bë'ë Xanru' Jesús, gunné': "Uz'irö xibé nu bi runödza' ca nu bi rizi'."

<sup>36</sup> Cate' budxi bë'ë Pablo didza' ni, buzúa zxibë', ate' benë' tsözxón yúgu'té', bulu'lidzë' Dios. <sup>37</sup> Ní'irö gula'bödxë' yúgu'té'. Bulu'nidë' yenë' Pablo, en bulu'tsaga lahuë' lë'.

<sup>38</sup> Caní gulunë' tu' bulu'hui'innë' ni'a que didza' na' bë'ë Pablo, gunné': "Bíti'rö ulé'eli' neda'." Yójacalenë' tsözxón lë' ga na' gurenë' lu barco.

## 21

### Sa'yéaje' Pablo Jerusalén

<sup>1</sup> Gudödi bulá'alentu' légaquië', guyú'utë nöza barco na', ate' lirá guyéajtu' ga zoa luyú bidxi nazí'i le Cos. Dza buropi na', gudöditu' ia'tú lataj nazí'i le Rodas, ate' buzá'atu' ni', en bidxitu' yödzö Pátara. <sup>2</sup> Yójacáca'tu' tu barco yúbölö ni' le zeaj luyú Fenicia. Gurentu' lë'e barco na', ate' guyú'utë nöza. <sup>3</sup> Gudöditu' ga nalá' Chipre, le guta' tsölä'a yögöla, ate' guyéajtu' luyú Siria, ga ni' guyaza barco na'lu yödzö Tiro, tu' ral-la' tsöjcá'ana yua' ni' le dzö'ö lë'e barco na'. <sup>4</sup> Lu yödzö Tiro na' yójacáca'tu' tu bönni' réajlé'ë Cristo, ate' bugá'analentu' lë', en yugu' böchi'ru' ni' idú gadxi dza. Tu' chibulu'inë' Dios Bö' Lá'ayi légaquië' le ral-la' gaca queë' Pablo, gulé' lë' biti' tsejë' Jerusalén. <sup>5</sup> Cate' chibizá'a dza na', burúajtu' ni', ate' gula'zá'lenë' netu' tsözxón yúgu'té' len nigula que queëgaquië', en yugu' bi'i quég aquië', ga bidxitetu' ni'ilö ra' yödzö na'. Ra' nísado' ni' buzúa zxibitu', en bulidzu'-në' Dios. <sup>6</sup> Budxi bunida' luzá'atu' tutu' ia'tutu', bubentu' lë'e barco, ate' légaquië' yöju'jögaquië' lídxigaquië'.

<sup>7</sup> Buzá'atë barco na'lu yödzö Tiro, ate' ga yöjsé bidxitnë lu yödzö Tolemaida. Burúajtu' lë'e barco na' ni'. Bugápatu' Dios böchi'ru' nacu'ë ni', ate' bugá'analentu' légaquië' tu dza. <sup>8</sup> Cate' za' rení' ia'tú dza, burúajë' Pablo ni', ate' dzágatu'-në' netu' guyéajtu' yödzö Cesarea. Ni' guyú'utu' lu yu'u lidxe' Felipe, ate' bugá'analentu' lë'. Runë' Felipe na' libán que didza' dxi'a. Bítsë'ë gadxe'bönni' ni' bulu'cu'ë dza ni'te para ilácalenë' bönachi queë' Cristo. <sup>9</sup> Nacuá'abi' tapa bi'i nigula ra'bán queë' Felipe na', tu'ibi' didza' uláz queë' Dios. <sup>10</sup> Gudödi gudzetu' chopá tsonna dza ni', ní'irö bidxitnë' Agabo ni', bönni' ru'ë didza' uláz queë' Dios, narúajë' luyú Judea. <sup>11</sup> Bönni' ni buduyúë' netu', ate' gudélé'ë pan le néquini guídi queë' Pablo. Béguë'ë ni'a na' cuinë', en gunné':

—Caní rnnë' Dios Bö' Lá'ayi: "Caní ilunë' bönni' judío nacu'ë Jerusalén. Ilúguië' bönni' ni nequi queë' pan guídi ni, ate' ulu'dödë' lë' lu ná'agaca bönachi izá'a."

<sup>12</sup> Cate' biyónitu' didza' ni, gúta'yutu' lahuë' Pablo, netu', en nupa nacuá' ni', para cabí tsejë' Jerusalén. <sup>13</sup> Bubi'ë didza' Pablo, gunné':

—¿Bizxi ni runli', ribódxili', en rusuhu' inili' neda'? Neda' chizóa caza' sina', calégasö ilúguië' neda', pero gátia' ca' lu yödzö Jerusalén ni'a queé' Xanru' Jesús.

<sup>14</sup> Tu' cabí guzxéqui'tu'-në' didza', bíti'rö bi gúdxitu'-në', ate' gunnatu':

—Gaca ca raza ládxë'ë Xanru'.

<sup>15</sup> Cate' chigula'dödi dza na', bupa'atu' queétu', ate' guyéajtu' Jerusalén.

<sup>16</sup> Gula'zálenë' netu' bal-lë' bönni' ta'yéajlë'ë Cristo, nacu'ë Cesarea, ate' dzáguië' Mnasón, tu bönni' Chipre, légaquië'. Réajlë'ë Cristo dza ni'te, ate' ral-la' tsöjgá'anatu' lidxë' bönni' ni.

### Pablo röjyúë' Jacobo

<sup>17</sup> Cate' bidxitu' Jerusalén, len yöl-la' rudzeja quégaquië' böchi'ru' ni' ta'yéajlë'ë Cristo gulunë' netu' bal. <sup>18</sup> Dza buropi na' Pablo guyázalenë' netu' lu yu'u, yöjyutu'-në' Jacobo, ate' nudúbigaquië' ni' yúgu'të bönni' gula tapa chi'ë bönachi queé' Cristo nacu'ë Jerusalén. <sup>19</sup> Cate' Pablo chibugapë' légaquië' Dios, busiyönnë' légaquië' yúgu'të le benë' Dios lu né'ë lë' ga nacuá' bönachi izá'a. <sup>20</sup> Cate' bila'yönnë' lë ni, gula'gu'ë Dios yöl-la' ba. Ni'irö gulé' Pablo:

—Nöz quézinu', böchi'tu', cate' xo zián gáyu'ë bönni' judío ta'yéajlë'ë Cristo, ate' yúgu'të túndë'ë bal xibá queé' Moisés. <sup>21</sup> Chibila'yönnë' yugu' le tu'i didza' bönachi le ta'nné quiu', ta'nná rigú'u yöl-lu'u yúgu'të bönni' judío nútsa'gaquië' ladaj bönachi izá'a, para ulu'cá'anë' le gunná bë'ë Moisés, en rinná bë'enu' légaquië' biti' ila'chúguië' lu xpéla'gacabi' bi'i bönni'do' quégaquië', en biti' ilunë' bal yugu' le nalébiru' runru' rë'u, bönachi judío. <sup>22</sup> ¿Nacxi caz gunru' na'a? Ulu'rúaj bönachi zián cate' ila'yöni chibidxínu' ni. <sup>23</sup> Na'a, ben lë ni rëtu' li'. Nacuálenë' netu' ni tapë' bönni', chinazi' lu ná'agaquië' lahuë' Dios tu le ilunë'. <sup>24</sup> Guché'ë yugu' bönni' ni, en ben légaquië' tsözxón gun dxi'a cuinli' ca naca que yudo', en gudizzaj li' le ral-la' ila'guizxjé' para ilún yútusö ícjagaquië'. Ni'irö ila'nózinë' yúgu'të bönni' judío biti' nácatë lë na' ta'nné' quiu', pero lësca' li' runu' le naca dxi'a, en runu' ca rinná bë' xibá queé' Moisés. <sup>25</sup> Ca naca quégaca bönachi izá'a, nupa ni' chita'yéajlë' Cristo, chibén xtídza'tu', en buzúajtu' lu guichi ca ral-la' ilunë'. Biti' run bayudxi ilún chi'ë yugu' lë ni tunë' bönni' judío, pero tuz:

Biti' ilahuë' le ta'gú'u bönachi lógaca budó' guiój budó' yaga.

Biti' ilahuë' rön,

Biti' ilahuë' xipéla'gacaba' böa' guixi' biti' narúaj-gácaba' rön.

Biti' ilunë' le ruá' dö'.

### Ta'zönë' Pablo lö'a yudo'

<sup>26</sup> Ni'irö Pablo guché'ë queé' tapë' bönni' na', ate' dza buropi ni' ben dxi'a cuinë' tsözxón len légaquië' ca naca que yudo'. Ni'irö guyázi' lö'a yudo', para gaca bë' bizxi dza údxi ilunë' le tu'ún dxi'a cuíngaqüië', dza ni' ral-la' tsöjuá'agaquië' le ila'gu'ë lahuë' Dios que quégaquië'. <sup>27</sup> Cate' chizóa izá'a gadxi dza na', bal-lë' judío narúajgaquië' luyú Asia bila'lé'enë' Pablo, zoë' lö'a yudo'. Gulunë' ga gulún dzatsa bönachi zián, ate' gula'zönë' Pablo. <sup>28</sup> Gulu'ë zidzaj didza', ta'nné' :

—¡Guli'gácalen netu', bönni' Israel! Bönni' ni rusédinë' yúgu'të bönachi yúgu'të lataj ulu'cá'ana cá'asö yödzö queéru', en xibá queé' Moisés, en yudo' queéru' ni. Na'a, chigulu'ë yugu' bönni' izá'a lu yudo' ni. Caní runë', run dítjanë' lataj lá'ayi ni.

<sup>29</sup> Caní gula'nné' tu' bila'lé'enë' Pablo zí'alö lu yödzö dzáguië' Trófimo, bönni' Éfeso, en téquinë' gulu'ë bönni' ni lu yudo'.

<sup>30</sup> Caní guca, bulu'dubi yúgu'të bönachi yödzö, ate' bila'guírë' ni'. Ni'irö gula'zönë' Pablo, en gulá'ayöje' lë', bulu'béajë' lë' lö'a yudo', ate' la' bulu'sáyjatë' ga nu riyaza lö'a yudo' na'. <sup>31</sup> Cate' chitequi quézinë' ilútië' Pablo, bidxín didza' lahuë' bönni' lo rinná bë'enë' bönni' röjáquië' gudil-la. Biyönnë' tun dzatsa yúgu'të bönachi Jerusalén.

<sup>32</sup> Bönni' lo ni la' butúbitë' bönni' röjáquië' gudil-la, len bönni' ta'nná bë'enë' légaquië',

ate' carelö guyéajlenë' légaquië' ga na' tun dzatsa bönachi na'. Cate' bila'lé'e bönachi ni' bönni' lo na' rinná bë'enë' bönni' röjáquië' gudil-la, en bönni' na' röjáquië' gudil-la, bulu'sanë' ta'guinë' Pablo. <sup>33</sup> Ní'irö gubíguië' bönni' lo na', en guzxöne' Pablo, ate' gunná bë'enë' bönni' röjáquië' gudil-la ilúguië' lë' len chopá du guíë. Gudödi ni' gunábinë' bönachi zián ni', rnnë':

—¿Nuzxi caz bönni' ni, en bizxi benë'?

<sup>34</sup> Ta'bódxia' bönachi zián na', que queégaca ca ta'nná. Caní guca, biti' bi guca tséajni'inë' bönni' lo na', tu' tu'tsatsa bönachi na', ate' gunná bë'enë' bönni' röjáquië' gudil-la ila'chë'ë Pablo lu yu'u zxön ga nagá'anagaquië' bönni' na' röjáquië' gudil-la.

<sup>35</sup> Cate' bila'dxinë' ga naca ni'yëpi' que yu'u zxön na', bönni' na' röjáquië' gudil-la gulu'inë' Pablo, tu' dxíadi'igaca bönachi zián légaquië', <sup>36</sup> en zá'gaca cídu'lögaquië', ta'bódxia', ta'nná:

—Guli'gútië'.

### *Didza' bë'ë Pablo uláz queë' lögaca bönachi*

<sup>37</sup> Cate' ni' gula'sí lögaca bönachi ila'gu'ë Pablo lu yu'u zxön ni', lë' gudxë' bönni' lo na' rinná bë'enë' bönni' röjáquië' gudil-la, gunné':

—¿Naru' gunnu' neda' lataj guía' li' tu didza'?

Bönni' lo na' gudxë' Pablo:

—¿Rácatso' didza' griego? <sup>38</sup> ¿Naru' calëga li' bönni' Egipto na' dza lahui nisö butubë' yugu' bönni' gula'dá'baguë'ë yúlahui', ate' guchë'ë idú choá' gáyu'ë bönni' huëti bönachi lu lataj cá'asö?

<sup>39</sup> Ní'irö Pablo gudxë' lë', gunné':

—Le nácatë naca' neda' bönni' judío. Gulja' Tarso, tu yödzö lo luyú Cilicia. Ráta'yua' lo' gunnu' neda' lataj gu'a didza' lögaca bönachi ni.

<sup>40</sup> Bönni' lo na' bë'ë lë' lataj, ate' guzuínë' Pablo ga naca ni'yëpi', en guchisa né'ë para ila'cuá' dxisö bönachi zián ni'. Cate' chigula'cu'ë dxisö, Pablo bë'lenë' légaquië' didza' lu didza' hebreo.

## 22

<sup>1</sup> Caní gunné' Pablo:

—Libi'ili', bönni' gula, en libi'ili' böch'a'a. Buli'zé nágali' le guía' libi'ili' ca naca le runa'.

<sup>2</sup> Cate' bila'yönnë' ru'ë didza' hebreo, gula'cuá'arë' dxisö. Pablo gudxë' légaquië', rnnë':

<sup>3</sup> —Naca caza' neda' bönni' judío. Gulja' lu yödzö Tarso luyú Cilicia, pero guzxöna' lu yödzö ni, ate' busédinë' Gamaliel neda' idú ca naca xibá quégaquië' xuz xtó'oru'. Bé'tica'sö ládxa'a guyéaj ládxa'a Dios ca runli' libi'ili' na'a. <sup>4</sup> Zí'alö gudxía ládxi'gaca'-në' bönni' nazi' lu ná'agaquië' xtídzë'ë Cristo, en guchë'gaca'-në' ga ilatië'. Guzxöngaca'-në', en gulú'ugaca'-në' lidxi guíë, yugu' bönni', en nigula. <sup>5</sup> Lëscá' huáca ilunë' ba nalí yugu' bixúz unná bë', en yugu' bönni' gula tu'zéajni'inë' que le gulunë'. Gulunë' guichi unná bë' le yöju'a ga nacu'ë böch'i'ru' judío lu yödzö Damasco. Guyija' ni' para tsöjxöngaca' nupa ni' ta'yéajlë' Cristo, para idichë'gaca'-në' nága'gaquië' Jerusalén ni, para ilácagaquië' xíguia'.

### *Riguíxjö'ë Pablo ca böáquië' queë' Cristo*

<sup>6</sup> Ní'irö gunné' Pablo:

—Cate' ni' sa'yéaja' la' nöza, en si' idxina' Damasco, cate' guca idú huagubidza, tsálido'os guyëpi yösa bení' le za' lúzxiba, le buzení' ga na' sa'yéaja'. <sup>7</sup> La' yöjóta'tea' lu yu, en biyóna' chi'i Nu gudxi neda': "Saulo, Saulo, ¿bizz que ribía ládxi'u neda'?"

<sup>8</sup> Ní'irö gunábida' lë', gunnía': "¿Nuzxi li', Xan?" Lë' gudxë' neda': "Neda' ni Jesús, bönni' Nazaret. Neda' caz ribía ládxi'u." <sup>9</sup> Nupa ni' gula'cuá'len neda' bila'lé'e caz bení' na', en guladxi, pero biti' bila'yöni chi'i Nu na' bulidza neda'. <sup>10</sup> Ní'irö gudxa'-në': "¿Nacxi guna',

Xan?” Xanru’ gudxë’ neda’: “Guyasa, en guyéaj Damasco. Zoë’ ni’ tu bönni’ guíë’ li’ ca naca yúgu’të le ral-la’ gunu’.” <sup>11</sup> Tu’ cabirö rilé’eda’ tu’ bud’i yösa bení’ na’ guyépida’ lahua’, que lë ni na’ yugu’ bönni’ dzágagaquië’ neda’ gula’guélë’ë na’a, ate’ gula’chë’ë neda’ ga bidxíntea’ Damasco.

<sup>12</sup> ’Zoë’ Ananías ni’, tu bönni’ runë’ idútë ca rinná bë’ xibá queë’ Dios, ate’ yugu’ bönni’ judío nacu’ë Damasco tunë’ lë’ bal. <sup>13</sup> Bidxinë’ Ananías na’ ga zoa’, en gudxë’ neda’: “Saulo, bócha’a, huöálaj guiój lo.” La’ ni’isö böálaj guiój lahua’, ate’ bilé’eda’ lë’. <sup>14</sup> Lë’ gudxë’ neda’: “Dios quégaquië’ xuz xtó’oru’, dza ni’té gurö’ cazë’ li’ para inózinu’ le ré’ëni quézinë’ Lë’, en ilé’enu’-në’ Bönni’ Tsahui’, Lë cazë’ Zxi’inë’, en yönnu’ le guíë’ Lë cazë’ li’. <sup>15</sup> Caní gaca, tu’ ral-la’ gunu’ ba nalí queë’ Lë’ lógaca yúgu’të bönnachi, usiyönnu’ légaquië’ ca naca le chibilé’enu’, en le chibiyönninu’. <sup>16</sup> Na’a, ¿bizx que ridzenu”? ¡Guyasa, en bidila nisa! Bulidzë’ Xanru’ para únë’ li’ dxi’ a, en ugúë’ dul-la’ nabágu’u.”

### *Cristo gusól-lë’ë Pablo para gunë’ libán lógaca bönnachi izá’ a*

<sup>17</sup> Gunné’ ca’ Pablo:

—Gudódi ni’, cate’ budxina’ Jerusalén, en tsanni ni’ rulidza’-në’ Dios lu chila yudo’, bilé’eda’ tu le naca ca tu lu yëla bëchigal. <sup>18</sup> Bilé’eda’-në’ Xanru’, ate’ gudxë’ neda’: “¡Guyéaj carelö! ¡Burúajtë Jerusalén ni, tu’ cabí ilunë’ bal bönni’ ni le gunu’ ba nalí quia’!” <sup>19</sup> Neda’ gudxa’-në’: “Xan, nözgaca quézinë’ ca bena’ neda’. Guyázia’ gapa naca lu yu’u ga tu’dubé’ tu’sédé’ bönni’ judío queë’ Dios. Gudina’ nupa ni’ ta’yéajlé’ Li’, en gulú’ugaca’-në’ lidxi guíë. <sup>20</sup> Cate’ ni’ gulútië’ Esteban, bönni’ ni’ benë’ ba nalí quiu’, lësca’ zoa’ neda’ ni’, en bena’ tuz yugu’ bönni’ gulútië’ lë’ tu’ ben chi’ a lari’ nácugaquië’ bönni’ na’ bulu’ladxë’ lë’ guíëj.” <sup>21</sup> Ni’irö Xanru’ gudxë’ neda’: “Guyéaj, tu’ risól-la’ a li’ lógaca bönnachi izá’ a.”

### *Pablo rui’ilenë’ bönni’ lo didza’, bönni’ rinná bë’enë’ bönni’ röjáquië’ gudil-la*

<sup>22</sup> Nisö ze lo yugu’ bönni’ judío bulu’zé’ nágagaquië’ didza’ bë’ë Pablo, ate’ ni’irö gula’bödxi’ë. Gulu’ë zidzaj didza’, ta’nné’:

—¡Guli’gútië’ bönni’ ni! ¡Bíti’rö ral-la’ soë’ ibanë’!

<sup>23</sup> Ni’irö tu’ ta’bödxi’ë, en ta’chözé’ le nácugaquië’ lu yöl-la’ rilé quégaquië’, en tu’chejë’ bëchtö yu lu bö’ös, <sup>24</sup> bönni’ lo na’ rinná bë’enë’ bönni’ röjáquië’ gudil-la gunná bë’ë ulu’gu’ë Pablo lu yu’u zxön na’. Lësca’ gunná bë’enë’ légaquië’ ila’guinë’ Pablo para quíxjö’ë le nácatë, para ila’nözinë’ bizx que na’ ta’bödxi’ë bönni’ judío caní queë’ Pablo. <sup>25</sup> Cate’ gulúgui’ë lë’ du guídi para ila’guinë’ lë’, Pablo gudxë’ tu bönni’ nacu’ë lu në’ë bönni’ röjáquië’ gudil-la zoë’ ni’, rnnë’:

—¿Naru’ dë lataj quínili’ neda? Nababa’ Roma, ate’ cuntu nu buchi’ a busörö neda’ channö nabága’ a xíguia’.

<sup>26</sup> Cate’ bönni’ na’ biyönnë’ lë ni, guyijë’ yöjtíxjöi’inë’ bönni’ lo na’ rinná bë’enë’ bönni’ röjáquië’ gudil-la. Rë’ lë’:

—¿Bizxi caz ni runru? ¡Bönni’ ni nababë’ Roma!

<sup>27</sup> Ni’irö bidë’ bönni’ lo na’ ga zoë’ Pablo, en gudxë’ lë’:

—¡Gudixjö! ¿Naru’ nababu’ li’ Roma?

Pablo gudxë’ lë’:

—Ön, nababa’.

<sup>28</sup> Bubi’ë didza’ bönni’ lo na’, gunnë’:

—Neda’ ni, dumí zián gudizxja’ para ibaba’ Roma.

Ni’irö Pablo gudxë’ lë’:

—Neda’ gubaba’ Roma cate’ ni’ gulja’ tu’ nabábaguquië’ xuz xiná’ a Roma.

<sup>29</sup> Cate' bönni' na' chizóa ila'guinë' lë' bilä'yönnë' lë ni, la' bulu'bíga'të' ga zoë' Pablo. Lësca' gúdxinë' bönni' lo na' cate' gunózinë' nababë' Pablo Roma, tu' chigunná bë'ë ilúguië' lë'.

*Ridxinë' Pablo lógaquië' bönni' yudo' tu'chi'a tu'söröe'*

<sup>30</sup> Dza buropi ni', gú'unnnë' bönni' lo na' inózinë' gazxi ga rë' bizxi na' yugu' bönni' judío tu'zéguië' Pablo didza'. Gunná bë'ë bulu'sedxë' du guíë na' náguë'ë Pablo, ate' gunná bë'ë ulu'dubë' bixúz unná bë' judío, en yúgu'të bönni' yudo' tu'chi'a tu'söröe'. Ní'irö bubéajë' Pablo ga na' nagú'ugaquië' lë', ate' buzóë' lë' lógaquië'.

## 23

<sup>1</sup> Ní'irö buyúdë'ë Pablo lógaquië' bönni' yudo' tu'chi'a tu'söröe' na', en gunné':

—Libí'ili', bócha'a. Ga ridxitnë na'a riböza' dxí'ado'. Caní naca, biti' zoa le ruxösa ládxí'da'ahua' neda' lahuë' Dios.

<sup>2</sup> Ní'irö Ananías, bixúz lo, gunná bë'enë' nupa nacuá' cuita lë'ë Pablo ila'gápë'ë ru'ë.

<sup>3</sup> Pablo gudxë' lë':

—Lëzca' caní Dios ubi'ë quiu', li', rulu'iisö tsahui' cuinu'. ¿Naru' rö'ö cazu' ruchi'a rusöröu' neda' ca rinná bë' xibá, pero ridödi bë'tso' ca rinná bë' xibá na', na' rinná bë'enu' ila'gápë'ë neda'?

<sup>4</sup> Nupa nacuá' ni' të Pablo:

—¿Naru' rulidza zi'tso'-në' bixúz lo queë' Dios?

<sup>5</sup> Pablo gudxë' légaquië':

—Libí'ili', bócha'a. Nazúaj lu guichi, rnna: "Biti' ulidza zi'u nu rinná be'e böñachi uládz quiu'", pero neda' biti' gúquibe'eda' náquië' bixúz lo.

<sup>6</sup> Ní'irö gúquibe'enë' Pablo bal-lë' nácagaquië' bönni' yudo' saduceo, ate' ia'bal-lë' bönni' yudo' fariseo. Ní'irö bë'ë zidzaj didza' lógaquië' bönni' yudo' tu'chi'a tu'söröe' na', gunné':

—¡Libí'ili', bócha'a! ¡Naca' bönni' fariseo, en naca' zxí'inë' tu bönni' fariseo! ¡Na'a ruchi'a rusöröli' neda' tu' runa' löza ulu'bán nupa chinátigaca!

<sup>7</sup> Cate' bë'ë Pablo didza' ni, bila'rúajé' choplö yugu' bönni' yudo' fariseo, en yugu' bönni' yudo' saduceo, ate' gula'dil-la dídzë'ë la' légacasë'. <sup>8</sup> Caní gulunë' tu' ta'nné' bönni' saduceo na' biti' ulu'bán nupa chinátigaca, en biti' nacu'ë gubáz lá'ayi, en biti' nacuá' bö' nácagaca caz böñachi, pero ta'yéajlë'ë bönni' yudo' fariseo nácagaca yúgu'të lë ni. <sup>9</sup> Que lë ni na' gula'bódxí'ë. Ní'irö gula'yasë' bönni' nazédagaquië' xibá queë' Dios, yugu' bönni' yudo' fariseo, en gula'dil-la dídzë'ë, ta'nné':

—Rusáca'tu' queétu' biti' bi dö' nu'ë bönni' ni. Channö tu bö' naca caz böñachi bë'len lë' didza', o channö tu gubáz lá'ayi queë' Dios bë'lenë' lë' didza', biti' ral-la' tá'baga'ru'-në' Dios.

<sup>10</sup> Cate' chita'díl-lada' dídzë'ë bönni' judío na', gúdxinë' bönni' lo na' rinná bë'enë' bönni' rójáquië' gudil-la, tu' réquinë' ulu'zxuzxaj ulu'quínnaje' Pablo. Ní'irö gunná bë'enë' bönni' rójáquië' gudil-la tsöjléajgaquië' Pablo ladaj bönni' judío na', en ulu'chë'ë lë' lu yu'u zxön ga na' nagá'anagaquië' bönni' na' rójáquië' gudil-la.

<sup>11</sup> Cate' chinaca chi'i dzó'ölö la' dza ná'asö, bulu'i lahuë' Xanru' ga zoë' Pablo, en gudxë' lë':

—Butipa ládxu'u, Pablo. Ca na' chibenu' ba nalí quia' Jerusalén ni, lësca' run bayudxi gunu' ba nalí quia' lu yödzö Roma.

*Tun xtídza'gaquië' ilútië' Pablo*

<sup>12</sup> Cate' za' rení' ia'tú dza, gulún xtídza'gaquië' bal-lë' bönni' judío, en gulún tsutsu xtídza'gaquië', ta'nné' gunë' Dios légaquië' xíguia' channö cabí ilunë' lë na' gulún xtídza'gaquië', gula'nné' biti' ca' ilë'aj ilahuë' ga idxinxrö chigulútië' Pablo. <sup>13</sup> Nayánrö ca

choá'gaquië' bönni' na' gulún tsutsu xtídza'gaquië' caní. <sup>14</sup> Yójáquië' bönni' ni ga nacu'ë yugu' bixúz unná bë', en bönni' gula tu'zéajni'iné' böñachi judío, ate' gula'nné':

—Chiben tsutsu xtídza'tu', gunnatu' guné' Dios netu' xíguia' channö cabí guntu' caní. Biti' guí'aj gágutu' ga gútirötu'-në' Pablo. <sup>15</sup> Na'a, libí'ili', en bönni' yudo' tu'chi'a tu'söröö', guli'guí' bönni' lo rinná bë'ené' bönni' röjáquië' gudil-la idiché'ë Pablo cuxó para idxinë' ga nudúbili', innali' ré'énili' inábili'-në' Pablo tu didza' gate ga rë'. Netu' cö'ö nistu'-në' la' nöza, ate' gútitu'-në' zí'alö ca idxinë' ni.

<sup>16</sup> Biyónibi' bi'i bönni' queénu nigula zanë' Pablo ca na' ila'bó' nísië' Pablo, ate' guyéajbi', en guyú'ubi' yu'u zxön na', ate' yöjtíxjöi'ibi'-në' Pablo. <sup>17</sup> Pablo bulidzé' tuë' bönni' nacu'ë lu në'ë bönni' röjáquië' gudil-la en gudxé' lë':

—Guché'ë-bi' bi'i ni lahuë' bönni' lo, tu' nuá'abi' didza' guiébi'-në'.

<sup>18</sup> Ní'irö bönni' na' gudélë'ë-bi', en guché'ë-bi' ga na' zoë' bönni' lo na', ate' gudxé' lë': —Bulídzé' Pablo, bönni' na' yu'ë lidxi guíë, neda', en gúta'yuë' lahua' idigu'a-bi' bi'i ni lo', tu' ré'énibi' gü'ilenbi' li' didza'.

<sup>19</sup> Bönni' lo na' gudélë'ë-ná'abi', en guché'ë-bi' quez, ate' gunábinë'-bi', rnné':

—¿Bizxi na' ral-la' guío' neda'?

<sup>20</sup> Lébi' gúdxibi'-në':

—Chinúngäquië' didza' bönni' judío iláta'yuë' lo' iché'u-në' Pablo cuxó, para idxinë' lógaquië' bönni' yudo' tu'chi'a tu'söröö'. Ilé' li' té'enné' ila'nábinë' lë' tu didza' gate ga rë', <sup>21</sup> pero biti' tséajlë'u le ila'nné' tu' nadödi choá'gaquië' ila'bó' nísië' Pablo. Chigulún tsutsu xtídze'ë gula'nné' guné' Dios légaquië' xíguia' channö cabí ilútië' lë'. Biti' bi ilé'aj ilahuë' ga idxinrö ilútië' lë'. Chizóagaquië' ta'bözé' si' lu no'o gunu' le ila'nábinë' li'.

<sup>22</sup> Ní'irö bönni' lo na' rinná bë'ené' bönni' röjáquië' gudil-la gunná bë'ené'-bi' cuntu nu guiébi' lë na' chigúdxibi' lë', ate' ní'irö busöl-lë'ë-bi' bi'i ni.

#### *Ridxinë' Pablo lahuë' Félix, bönni' rinná bë'ë luyú na'*

<sup>23</sup> Ní'irö bönni' lo na' bulidzé' chopë' bönni' nacu'ë tu gáyu'ë bönni' röjáquië' gudil-la lu ná'agaquië' tu tuë', ate' gunná bë'ené' légaquië' ulu'cözë' chopa gáyu'ë bönni' röjáquië' gudil-la ta'zé'e ní'agaquië', en tsónnalalaj yu'chië' bönni' röjáquië' gudil-la dxíagaquië' böa', en chopa gáyu'ë bönni' röjáquië' gudil-la ilu'ë yaga tuchi' para tsójáquië' yödzö Cesarea idú ridödi xtsö'. <sup>24</sup> Lésca' gunná bë'ené' légaquië' ulu'cözë'-ba' tu böa' cuíë'-ba' Pablo, ate' ila'ché'ë lë' dxí'ado', cabí bi gaca queë', para idxinë' lahuë' Félix, bönni' lo rinná bë'ë uláz que Roma.

<sup>25</sup> Gusöl-lë'ë ca' tu guichi le rnna caní:

<sup>26</sup> “Neda', Claudio Lisias, ruzúaja' quiu' lu guichi, bönni' lo unná bë', Félix. Rugapa' Dios li'.

<sup>27</sup> 'Bönni' ni risöl-la'a-në' quiu', gula'zönë' bönni' judío lë', en gulé'ënné' ilútië' lë'. Cate' gúquibe'eda' nababë' Roma, guché'gaca'-në' bönni' röjáquië' gudil-la, en busölá'-në' lu ná'agaquië' judío na'. <sup>28</sup> Gú'unida' inözda' bizxi benë', lë na' tu'zéguië' lë' didza' bönni' judío, ate' guché'a-në' lógaquië' bönni' yudo' tu'chi'a tu'söröö' légaquië'. <sup>29</sup> Cate' buédxí didza', gunözda' tu'zéguië' lë' didza' ca naca le rinná bë' xibá quégäquië', en biti' bi nabáguë'ë bönni' ni para nu guti lë', o nu cu'u lë' lidxi guíë. <sup>30</sup> Ní'irö cate' bidxín nu gudíxjöi'i neda' ta'bó' nísië' yugu' bönni' judío lë', la' gusöl-la'tea' lë' ga zu', ate' gunná bë'egacada'-në' bönni' ni tu'zéguië' lë' didza' ila'dxinë' lo' li', para ila'guíxjöi'iné' li' bi didza' nápagaquië' lë'. ¡Dios gun tsáhuë'ë li'!"

<sup>31</sup> Ní'irö bönni' na' röjáquië' gudil-la gula'guélë'ë Pablo, en gulunë' ca na' chigunná bë'ené' légaquië', ate' gula'ché'ë lë' yödzö Antípatris, ni' naca chi'i dzö'ölö. <sup>32</sup> Cate' za' rení' ia'tú dza bönni' röjáquië' gudil-la ta'zé'e ní'agaquië' yöjhuójgaquië' Jerusalén, ate' bönni' röjáquië' gudil-la dxíagaquië' böa' bulu'ú'ë nöza, dzágagaquië' Pablo. <sup>33</sup> Cate' bönni' na' röjáquië' gudil-la naché'gaquië' Pablo bila'dxinë' Cesarea, bulu'nödzjë' guichi

na' lu nē'ë bönni' rinná bē'ë uláz que Roma, en bulu'sudxinë' Pablo lahuë'. <sup>34</sup> Gudödi bulabé' bönni' unná bē' guichi na', gunábinë' Pablo gazxi bönni' lë'. Cate' gúquibe'ené' nababé' luyú Cilicia, <sup>35</sup> gudxé' lë':

—Yónida' le innó' cate' ila'dxín ni nupa tu'zegui li' didza'.

Ní'irö gunná bē'ené' ilún chi'ë lë' lu yu'u yúlahui' ga ribö'ë Herodes, bönni' rinná bē'ë, para uchi'a usöröe' bönnachi.

## 24

### *Pablo ru'ë didza' uláz queë' lahuë' Félix*

<sup>1</sup> Cate' chibizá'a gayu' dza, bidxinë' Ananías, bixúz lo, ni', ate' dzágagaquië' lë' bal-lë' bönni' gula tu'zéajni'inë', en Tértulo, tu bönni' nazé'ede'ené' didza'. Bila'dxinë' lahuë' bönni' unná bē', ate' gula'nné' queë' Pablo. <sup>2</sup> Cate' chibulu'lidzé' Pablo, ate' bidxinë' ni', gusí lahuë' Tértulo ruzéguï'ë lë' didza', rnné':

—Bönni' lo unná bē', Félix. Ni'a quiu' li' ruzi'tu' xibé le run tsahui' netu', ate' lu yöl-la' réajni'i quiu' rinná bē'enu' dxi'a bönnachi uládz queëtu'. <sup>3</sup> Yúgu'të lë ni ruzi'tica'stu' xibé gáti'tés, ate' idú ládxu'tu' rëtu' li': "Xclenu'." <sup>4</sup> Na'a, para cabí upízxjarötu' li', ráta'yua' lo' gun zxön ládxu'u, yönnu' tu le do' guíetu' li'. <sup>5</sup> Gúquibe'etu' bönni' ni rigú'u yöl-lë'ë bönnachi, en runë' ga ta'dá'baguë'ë yúlahui' yugu' bönni' judío nacu'ë idútë yödzölió, en náquië' bönni' lo quégaquië' bönni' dá'gaquië' bönni' Nazaret na'. <sup>6</sup> Lësca' gú'unné' gun dítjanë' yudo' queëtu'. Que lë ni na' guzxöntu'-në', en gú'unitu' uchi'a usörötu' lë' ca naca xibá queëtu'. <sup>7</sup> Ní'irö Lisias, bönni' lo rinná bē'ené' bönni' röjáquië' gudil-la bidxinë' ga zóatu', en lu yöl-la' sínia' zxön bugüë' bönni' ni lu na'tu'. <sup>8</sup> Ní'irö gunná bē'ené' Lisias na' ídigaca nupa tu'zegui lë' didza' lo' li'. Na'a, li' caz, cate' rinabi yúdxinu'-në' Pablo ni, huáca inózinu' gate ga ré' yúgu'të lë ni ruzéguitu' lë' didza'.

<sup>9</sup> Lësca' caní gula'nné' yugu' bönni' judío ni', gula'nné' naca caz caní. <sup>10</sup> Ní'irö butásö né'ë bönni' rinná bē'ë uláz que Roma na' para gu'ë didza' Pablo, ate' lë' bubí'ë didza', gunnë':

—Idú ládex'a quíxjö'a ca naca le runa', tu' chinaca zián iz ruchi'a rusöröu' le raca quégaca bönnachi ladztu'. <sup>11</sup> Le bena' huáca inabu'. Biti' réquini chinnu dza bidxina' Jerusalén para tseaj ládex'a-né' Dios. <sup>12</sup> Biti' yöjxáca'gaquië' neda' nu ridíl-lalena' didza', en biti' bena' ga ulu'tsatsa bönnachi ga naca chila yudo', en cabí lu yu'u ga tu'dubé' tu'séde' queë' Dios, en cabí lu yödzö. <sup>13</sup> Biti' ca' gaca ulu'béaj lië' yugu' lë ni tu'zéguïë' neda' didza'. <sup>14</sup> Lë ni rixóalépa' lo'. Ca runa' xichinë' Dios quégaquië' xuz xtó' otu' nalëbi ca le tu'sédinë' légaquië', pero bönni' judío ni tu'ë le: Le ridá'baga' Dios, tu' réajlé'a yúgu'të le rinná bë' xibá queë' Dios, enca' yúgu'të le bulu'zúajë' bönni' gulu'ë didza' uláz queë' Dios. <sup>15</sup> Ca na' légaquië' tunë' löza Dios, lësca' neda' runa' löza Dios, usubanë' nupa chinátigaca, bönnachi tsahui', en bönnachi biti' nácagaca tsahui'. <sup>16</sup> Que lë ni na' ruí'i ládxu'tica'sa' cabí ibága'a le gun ga uxós ládxu'da'ahua' neda' lahuë' Dios o lógaca bönnachi.

<sup>17</sup> Gudödi zoa' ga yúbölö idú chopá tsonna iz, budxina' ga nacuá' bönnachi uládz quia' para unödzja' dumí le gácalen bönnachi yechi', en unödzja' le rigu'a lahuë' Dios. <sup>18</sup> Tsanni ni' runa' caní, bal-lë' bönni' judío narúajgaquië' luyú Asia bidixáca'gaquië' neda'. Ni' zoa' lö'a yudo', nubéaj dxi'a cuina' ca naca que yudo', en cabí nutuba' bönnachi zián, en cabí nuna' ga ulu'tsatsa bönnachi. <sup>19</sup> Yugu' bönni' judío ni' ral-la' ila'dxinë' lo' li', en ulu'zéguïë' neda' didza' channö nápagaquië' neda' didza'. <sup>20</sup> Ila'nnátsöquië' bönni' judío ni channö bulu'dzölinë' bi le cabí naca dxi'a bena' cate' ni' bidxina' lógaquië' bönni' yudo' tu'chi'a tu'söröe' légaquië'. <sup>21</sup> Tuz cate' ni' zoa' lógaquië', bë'a zidzaj didza', gunnía': "Ruchi'a rusöröli' neda' na'a tu' runa' löza ulu'bán nupa chinátigaca."

<sup>22</sup> Cate' biyönnë' Félix didza' ni, en dxi'ado' chinózinë' ca naca que lë na' rusédinë' Pablo, buzé láhui'sé' ca' didza' bizxaj ni, gunnë':

—Cati' idxinë' Lisias, bönni' lo rinná bë'enë' bönni' röjáquië' gudil-la, údxi yónida' ca naca didza' bizxaj queéli'.

<sup>23</sup> Ni'irö Félix gunná bë'enë' tu bönni' nacu'ë lu në'ë bönni' röjáquië' gudil-la zoë' ni', gun chi'ë Pablo, pero gu'ë lë' lataj të' lö'a, en biti' uzáguë'ë xinózgaquië' böchi' luzé'ë duyúgaquië' lë' bi dxin ilunë' queë'.

<sup>24</sup> Chopá tsonna dza gudzé, bidë' leyúbölö Félix na'. Drusila, nigula queë' dzáganu lë'. Nácanu nigula judío. Félix bulidzë' Pablo, ate' buzé náguië' xtídzë'ë ca naca le réajlé'ëru' Jesucristo. <sup>25</sup> Cate' bë'ë didza' Pablo ca ral-la' gácaru' tsahui', en inná be'e cuinru', ate' idxinru' ga uchi'a usöröö' Dios rë'u dza si' za', ni'irö gudxi bidzöbinë' Félix, en gudxë' Pablo:

—Guyéaj na'a. Cate' gapa' lataj ulidza' li'.

<sup>26</sup> Lëscá' gú'unne' Félix si'ë dumí le unödziejë' Pablo lë' para usanë' lë', ate' que lë ni na', zián luzuí bulidzë' Pablo, en bë'lenë' lë' didza'. <sup>27</sup> Cate' bizá'a chopá iz guyázië' Porcio Festo xilatjë' Félix, ate' tu' gú'unne' Félix gunë' le tsaza ládzi'gaquië' bönni' judío, bucá'anë' Pablo nadzunë' lidxi guíë'.

## 25

### *Ridxinë' Pablo lahuë' Festo, bönni' unná bë'*

<sup>1</sup> Bidxinë' Festo yödzö Cesarea para tsázië' xilatjë', gáquië' bönni' unná bë' ulaz que Roma. Cate' bizá'a tsonna dza buzé'ë yödzö na', sa'yéajë' Jerusalén. <sup>2</sup> Cate' bidxinë' Festo ni' yugu' bixúz unná bë', en yugu' bönni' lo quégaca bönachi judío bila'dxinë' lahuë' para ila'nné' queë' Pablo, ate' guláta'yuë' lahuë' Festo <sup>3</sup> bi uzá' ládxë'ë quégaquië', isöll-lë'ë nupa tsöjxí'gaca Pablo, para udxinë' Jerusalén. Gulé'ënnë' ila'bö' nisië' lë' la' nöza para ilutië' lë'. <sup>4</sup> Bubi'ë didza' Festo, gudxë' légaquië':

—Lu yödzö Cesarea nadzunë' Pablo, ate' ral-la' tseja' ni' cuxö huidzaj nisö. <sup>5</sup> Que lë ni na', núti'tëslöli' dë lu ná'ali', ral-la' sá'lenli' neda', en channö nabáguë'ë bönni' ni' xíguia', huáca uzéguili'-në' didza' ni'.

<sup>6</sup> Gudzenë' Festo Jerusalén idú ca xunu' gubidza, ate' ni'irö bőajë' Cesarea. Cate' guzá' rení' ia'tú dza gurö'ë ga ruchi'a rusöröö', en gunná bë'enë' nupa tsöjxí'gaca Pablo. <sup>7</sup> Cate' chibidxinë' Pablo ni', yugu' bönni' judío narúajgaquië' Jerusalén gula'gu'ë lë' lë'älö, en zián le gula'nné' queë'. Bulu'zéguïe' lë' le tu'subáguë'ë lë' xíguia', pero biti' guca ulu'béaj lië' yugu' lë' na' gula'nné' queë'. <sup>8</sup> Ni'irö bë'ë didza' Pablo uláz queë', gunné':

—Biti' bi le ruá' dö' bena' que xibá quégaquië' bönni' judío, en cabí que yudo' quégaquië', en cabí queë' César, bönni' Roma, rinná bë'enë' rë'u.

<sup>9</sup> Gú'unne' Festo gunë' le ila'yaza ládzi'gaquië' bönni' judío, ate' bubi'ë didza', gudxë' Pablo:

—¿Ré'ënu' so'o Jerusalén, ga na' soa nu uchi'a usöröö li' ca nácagaca lë ni ta'nné' quiu'?

<sup>10</sup> Bubi'ë didza' Pablo, gudxë' lë':

—Zoa caza' ga rö'ö nu ruchi'a rusöröö uláz queë' César, ga na' ral-la' uchi'a usöröö' neda'. Biti' bi huiá' dö' nuna' quégaquië' bönni' judío, ate' chinöz quézinu' lë ni. <sup>11</sup> La'tu' nuna' tu le ruá' dö', o bíti'tës le run ga ibága'a xíguia' gátia', biti' tá'baga'a gátia'. Na'a, channö cabí nuna' ca ta'nné' quia' bönni' ni, cuntu caz nu dë lu në'e udödi neda' lu ná'agaquië'. Rinaba' tseja' lahuë' César ga udxia' urö' quia'.

<sup>12</sup> Cate' Festo chibé'lenë' yugu' bönni' yúlahui' didza', bubi'ë didza', gudxë' Pablo:

—Chigunábu' tseju' lahuë' César. Lahuë' César uyiju'.

### *Ru'ë didza' Pablo lahuë' Agripa, bönni' unná bë'*

<sup>13</sup> Gudödi chopá tsonna dza, bidxinë' Agripa, bönni' rinná bë'ë lu yödzö Cesarea, dzáganu Berenice lë', duyúgaquië' Festo. <sup>14</sup> Cate' chigula'cu'ë ni' zián dza, Festo bului'inë' Agripa, bönni' rinná bë'ë, ca naca queë' Pablo. Gudxë' lë':

—Zoë' tu bönni' ni bucá'ané' Félix lë' lidxi güíë. <sup>15</sup> Cate' guzóa' Jerusalén, yugu' bixúz unná bë', en bönni' gula tu'zéajni'iné', bila'dxiné' lahua', ate' gula'nné' queë' bönni' ni. Gula'nábiné' neda' ichuga' queë' gátië'. <sup>16</sup> Neda' bubi'a didza', gudxa' légaquië' biti' nalébiguequiné' bönni' Roma ila'chúguië' queë' tu bönni' gátië' channö cabí ila'dxini lahuë' nupa tu'zegui lë' didza', para gaca ubi'ë didza' ca naca lë na' ta'nné' queë'. <sup>17</sup> Que lë ni na', cate' bila'dxiné' légaquië' ni, biti' ca' gudzeda', pero cate' guzá' guyeaní' ia'tú dza gurö'a ga ruchi'a rusörö'a', ate' gunná bë'eda' nupa yöjxí'gaca bönni' ni. <sup>18</sup> Cate' gula'cu'ë ni bönni' na' tu'zeguië' lë' didza', biti' bi gula'nné' queë' ca busaca' quia' ila'nné'. <sup>19</sup> Gula'nné' queë' bal-la didza' bizxaj ca naca le ta'yéajlë'ë Dios, en ca naca queë' tu bönni' lë' Jesúś, nu na' guti, pero Pablo runé' tsutsu xtídzé'ë rnné' ni zoë' nabané' leyúbölö. <sup>20</sup> Tu' buchíxida' ca nácagaca lë ni, gunábida'-në' Pablo channö ré'ënë' tsejé' Jerusalén, ga ni' soa nu uchi'a usörö lë' ca nácagaca lë ni. <sup>21</sup> Ní'irö cate' gunabë' Pablo tsejé' lahuë' Augusto César para uchi'a usöröë' lë' ni', gunná bë'eda' bönni' röjáquië' gudil-la ilún chí'igarë' lë' cate' gála'rö dza isól-la'a-në' lahuë' César.

<sup>22</sup> Ní'irö Agripa gudxë' Festo na':

—Lëzca' neda' ré'ënda' yónida' le inné' bönni' na'.

Festo gudxë' lë':

—Cuxó' yönnu' le inné'.

<sup>23</sup> Cate' za' rení' ia'tú dza, len ba zxön bila'dxiné' Agripa, en Berenice ni'. Gula'yázië' ga ral-la' ilu'ë didza', dzágagaquië' légaquië' bönni' unná bë', ate' gula'sö'l-lë'ë nupa tsöjxí'gaca Pablo. <sup>24</sup> Ní'irö Festo gudxë' Agripa, bönni' unná bë':

—Bönni' unná bë', Agripa, en yúgu'téli' zóali' ni tsözxón len netu'. Ni zoë' rilé'eli'-në' bönni' na', ta'nné' queë' yúgu'té bönni' judío nacu'ë Jerusalén, enca' nupa nacuá' ni, të' neda' ral-la' gátië'. <sup>25</sup> Runi neda' biti' bi bené' le nabáguë'ë xíguia' gátië', pero tu' gunabë' lë cazé' tsejé' ga uchi'a usöröë' Augusto César lë', que lë ni na' chinuna' quia' isól-la'a-në' lahuë' Augusto. <sup>26</sup> Tu' cabí nözda' bi ral-la' uzúaja' lu guichi le uzegui bönni' ni didza' para isól-la'a lu në'ë César, xana', que lë ni na' nachë'a-në' loli', en le nácarö lo, nachë'a-në' lo' li', Agripa, bönni' unná bë', para cate' údxi rinábini yudxu'-në', ní'irö inözda' bi ral-la' uzúaja' lu guichi ca naca queë' bönni' ni. <sup>27</sup> Réquida' biti' naca dxi'a isól-la'a-në' nu bönni' náguë'ë ni' channö cabí gaca ulu'a le nabáguë'ë.

## 26

### *Didza' bë'ë Pablo uláz queë' lahuë' Agripa, bönni' unná bë'*

<sup>1</sup> Ní'irö Agripa gudxë' Pablo:

—Dë lataj gu'u didza' uláz quiu'.

Buchila në'ë Pablo lahuë' Agripa, ate' gusí lahuë' ru'ë didza', rnné':

<sup>2</sup> —Bönni' unná bë', Agripa. Raza ládxa'a tu' dë lataj na'a gu'a didza' uláz quia' lo' li' ca naca yúgu'té le tu'zeguië' bönni' judío neda' didza'. <sup>3</sup> Raza ládxi'ra' tu' núnbe'u yúgu'té le nalébiguequiné' tunë' bönni' judío, enca' yugu' lë ni ridíl-latü' didza'.

### *Yugu' le benë' Pablo zí'atëlö*

<sup>4</sup> Gunné' ca' Pablo:

—Nózguequi quéziné' yúgu'té bönni' judío ca na' bena' ga gudéla'té cuídia' ga nacuá' bönachi uládz quia', enca' lu yödzö Jerusalén. <sup>5</sup> Nózguequi quéziné' ca', en huáca ila'guíxjö'ë ca na' bena' dza ni'te. Guca' bönni' fariseo. Yugu' bönni' fariseo tu'i ládxi'gacaré' ila'yéaj ládxi'gaquië' Dios ca tuné' ia'zíca'rë' bönni' judío. <sup>6</sup> Na'a, zoa' ni loli' para nu uchi'a usörö neda' tu' runa' löza Dios, usubanë' bönni' nati, en gunë' ca na' guzxí' lu në'ë lógaquië' xuz xtó'otu'. <sup>7</sup> Tunë' löza yugu' bönni' idxinnu cö' di'a dza queëtu' ila'déli'në' lë na' guzxí' lu në'ë Dios. Que lë ni na' ta'yéaj ládxi'gaquië' Dios, en

tuné' xichiné' rëla, en të dza. Tu' runa' löza lë ni, nuzéguigaquié' bönni' judío neda'. Caní naca, bönni' unná bë', Agripa. <sup>8</sup> Na'a, ¿naru' réquitseli' libí'ili' biti' naca le tséajlé'ëru', usubanë' Dios bönni' natí?

*Pablo gudxía ládxë'ë böñachi queë' Cristo*

<sup>9</sup> Gunné' ca' Pablo:

—Lëzca' neda', zi'atëlö gúquida' le zián ral-la' guna', tá'baga'a-në' Jesús, bönni' Nazaret. <sup>10</sup> Caní bena' lu yödzö Jerusalén. Gulu'a zián böñachi ta'yéajlé' Jesús lidxi guïë, tu' bulu'dödë' yugu' bixúz unná bë' lu na'a yöl-la' unná bë'. Cate' gulútië' böñachi ni', bénlena' légaquié' tuz didza'. <sup>11</sup> Zián luzuú busacá' zi'a yugu' bönni' ni' para ulu'sán ládx'i'gaquié' ca ta'yéajlé'ë Cristo. Caní bena' gapa naca lu yu'u ga tu'dubë' bönni' judío, en tu'sëdë' queë' Dios. Guléde'eda' légaquié', ate' gudxía ládx'a' légaquié' ga bidxintë guyija' gapa nacuá' yödzö zi'tu' para tsöjxóngaca'-në'.

*Riguíxjö'ë Pablo ca böáquié' queë' Cristo*

<sup>12</sup> Gunné' ca' Pablo:

—Para guna' caní guyija' yödzö Damasco, ate' bixúz unná bë' nasól-la'gaquié' neda' nudödigaquié' lu na'a yöl-la' unná bë'. <sup>13</sup> Caní guca, bönni' unná bë', Agripa. Cate' ni' sa'yija' la' näza, ni' naca idú huagubidza, bilé'eda' tu bení' lúzziba le buzení'rö ca gubidza. Buzení' ga na' zoa', en ga nacuá' nupa söjácalen neda'. <sup>14</sup> Ní'irö yúgu'tetu' gudzö'ötu' lu yu, ate' biyönda' chi'i nu bulidza neda'. Bë'ë didza' hebreo, gunné': "Saulo, Saulo, ¿bizx que ribía ládxu'u neda'? Run zi' cuinu', ridá'bagu'u neda'. Raca quiu' ca raca queéba' bëdxi, run zi' cuinba', richégu'ba' yaga tuchi' le túndë'ë-ba' zi'." <sup>15</sup> Ní'irö gudxa'-në': "¿Nuzxi li', Xan?" Xanru' gudxé' neda': "Neda' ni Jesús, Nu na' ribía ládxu'u. <sup>16</sup> Na'a, guyasa, en guzuí, tu' bulu'i lahua' li' na'a, para uzóa' li' gunu' xichina', en gunu' ba nalí que lë ni chibilé'enu', enca' quégaca le ulu'ida' li', ulu'i lahua' ga zu'. <sup>17</sup> Usólá' li' lu ná'agaquié' bönni' uládz quiu', en lu ná'agaquié' bönni' izá'a, lógaca nupa ni' risól-la'a li' na'a. <sup>18</sup> Risól-la'a li' ga na' nacu'ë para gunu' ga ulu'huöálaj guioj lógaquié', en ulu'huöáquié' queë' Dios, en ulu'cá'ané' le naca chul-la que dul-la', en ila'dxiné' lu bení'. Ulu'rúajé' lu na' Satanás tu' xihui', en ila'yázié' lu në'ë Dios. Channö ila'yéajlé'ë neda', Dios uniti lahué' légaquié', en ugúë' dul-la' nabága'gaquié', ate' ila'déli'në' ila'bábalenë' böñachi chinubéajé' Dios quez queë'."

*Benë' Pablo ca naca le bulu'iné' Xanru' lë'*

<sup>19</sup> Gunné' ca' Pablo:

—Qui lë ni na', bönni' unná bë', Agripa, biti' gudá'baga'a guna' le bulu'iné' Dios, zoë' yehua' yubá, neda'. <sup>20</sup> Buzéajni'ida' nupa nacuá' yödzö Damasco, en gudödi ni' nupa nacuá' Jerusalén, en nupa nacuá' luyú Judea, en böñachi yugu' yödzö zi'tu' para ulu'bí'i ládx'i'gaca, en ulu'huöáca queë' Dios, en ilún le ilaca bë' chibulu'bí'i ládx'i'gaca. <sup>21</sup> Tu' bena' caní, yugu' bönni' judío gula'zöné' neda' cate' ni' zoa' lõ'a yudo', en gulé'ënné' ilútië' neda'. <sup>22</sup> Ní'irö gúcalenë' Dios neda', ate' ga ridxintë na'a dza zoa' idú ládx'a', runa' ba nalí lógaquié' bönni' cá'asö, en lógaquié' bönni' lo. Biti' ruá'a didza' yübölö, pero ca gula'nnasé' zí'alö bönni' gulu'ë didza' uláz queë' Dios, enca' ca gunné' Moisés ca ral-la' gaca. <sup>23</sup> Gula'nné': "Qui'i sáquë'ë Cristo, en tödi gátië', gáquié' nu isí lo ubán tsaz lu yöl-la' guti, para ulu'ë lahui naca löza ila'dxín böñachi lataj bení', en gaca libán que lë ni lógaca böñachi uládz queétu', enca' lógaca böñachi izá'a."

*Pablo ruzéajni'iné' Agripa para tséajlé'ë Cristo*

<sup>24</sup> Cate' chibé'ë Pablo yugu' didza' ni, le bë'ë uláz queë', ní'irö bë'ë zidzaj didza' Festo, gunné':

—¡Nachixi icju', Pablo! ¡Tu' nazédad'o'o, chiguchixi icju'!

<sup>25</sup> Ní'irö Pablo gudxé' lë':

—Biti' nachixi icja', rea' li', Festo, ate' didza' ni ruá'a naca idútë li, en naca lesaca'.  
**26** Lë cazë' Agripa, bönni' ni rinná bë'ë, nőzinë' yugu' lë ni, en que lë ni na', idú ládxa'a ruá'a didza' lahuë' lë'. Nőzinë' yugu' lë ni, tu' cabí guca bagáchi'sö lë na' guca. **27** Bönni' unná bë', Agripa. ¿Naru' réajlë'u le gula'nné' bönni' gulu'ë didza' uláz queë' Dios? Nözda' réajlë'u lë ni.

**28** Ní'irö Agripa gudxë' Pablo:

—Ia'láti'sö la' réquinu' idéli'nu' neda' para gaca' queë' Cristo.

**29** Pablo gudxë' lë':

—Ni'a queë' Xanru' Dios ré'ënda', sal-la' ia'láti'sö o yenni', calégasö li', pero lësca' yúgu'të nupa ni ta'yöni neda', gácali' idú ca naca' neda', néquida' queë' Cristo, pero caléga gága'li' du guíë ca ni nága'a neda'.

**30** Cate' budxi bë'ë Pablo didza' ni, guzuínë' bönni' lo unná bë' na', ate' gulazuínë' ca' bönni' rinná bë'ë, en Berenice, en nupa rö'lengaca légaquië'. **31** Cate' bila'rúajé' quez, gulu'i xtídza'gaquië', ta'nné':

—Biti' bi nunë' bönni' ni le nabáguë'ë xíguia' gátië', en caléga tsázië' lidxi guíë.

**32** Agripa gudxë' Festo:

—Huáca usanu'-në' bönni' ni la'tu' cabí gunabë' tsejë' lahuë' César ga uchi'a usöröö' lë'.

## 27

### Ta'sól-lë'ë Pablo yödzö Roma

**1** Cate' chigulunë' quégäquië' ila'sól-lë'ë netu' lë'e barco para tséajtu' yödzö Roma, luyú Italia, gula'guélë'ë Pablo, en ia'bal-lë' nupa nadzungaca, ate' bulu'dödë' légaquië' lu në'ë Julio, tu bönni' rinná bë'enë' tu cö' bönni' röjáquië' gudil-la nazí'i le: Bönni' Queë' Augusto Röjáquië' Gudil-la. **2** Gurentu' tu lë'e barco que luyú Adramitio, le ralla'tödi yugu' yödzö gapa ta'dxín barco ga naca luyú Asia, ate' yú'usötu' ca' lë'e barco na', buzá'atu' yödzö Cesarea. Aristarco, tu bönni' yödzö Tesalónica, le nababa luyú Macedonia dzáguië' netu'. **3** Cate' za' rení' ia'tú dza, bidxintu' yödzö Sidón, ate' ni' Julio, bönni' na' rinná bë'enë' bönni' röjáquië' gudil-la, lu yöl-la' dxi'i ladxi' queë', bë'ë Pablo lataj tsejë' ga nacu'ë böchi' luzé'ë para ilácalenë' lë' bi riyadzaj queë'. **4** Gudödi ni', bubentu' lë'e barco, ate' buzá'atu' ni'. Gudöditu' tsölä'a ga dë luyú bidxi Chipre ga rö'ö dxi bö' na' recja, tu' za' saca' lotu' bö' recja lu nísado' na'. **5** Ní'irö gudöditu' lu nísado' ga nalá' luyú Cilicia, en luyú Panfilia, ate' bidxintu' Mira, tu yödzö nababa luyú Licia.

**6** Bönni' na' rinná bë'enë' bönni' röjáquië' gudil-la, en naché'ë netu', yöjxáquië' tu barco ni' narúaj yödzö Alejandría que luyú Egipto, barco na' zeaj luyú Italia ga rö' yödzö Roma. Gulu'ë netu' lë'e barco na'. **7** Guzá' barco na' tsahui' ládxi'do' zián dza, ate' len yöl-la' rizáca'sö bidxintu' ga nalá' tu luyú bidxi lu nísado' na' nazí'i le Gnido, ate' tu' ruzaga' netu' bö' na' recja, gudöditu' tsölä'a luyú bidxi nazí'i le Creta ga rö'ö dxi bö' na' recja, en bidxintu' ga nalá' yödzö Salmón luyú Creta na'. **8** Lu yöl-la' rizáca'sö gudöditu' tsölä'a ga dë luyú bidxi Creta na', en bidxintu' tu lataj ga ta'dxín barco, nazí'i le Buenos Puertos, le dë gala' ga na' dë yödzö Lasea.

**9** Tu' chigudzéda'atu', chigula' zoa bönadxi gaca ditaj bíti'tës barco rizá' lu nísado' na', tu' chigudödi yugu' dza tunë' gubasa cate' si' idxín beo' ziaga cate' récjada' bö'. Que lë ni na' Pablo buzáejni'inë' légaquië', **10** rnnë':

—Libi'ili', bönni', réquibe'eda' ga tseaj barco ni, huazóa bönadxi gaca ditaj barco ni, en yua' dzö'ö lë'e, en lësca' soa bönadxi queéru' gátiru'.

**11** Bönni' na', rinná bë'enë' bönni' röjáquië' gudil-la, guyéajlë'ërë' le gula'nné' bönni' na' dë lu në'ë barco, en bönni' xan caz, ca le gunné' Pablo. **12** Tu' cabí naca dxi'a lataj ni' ga ta'dxín barco, nazí'i le Buenos Puertos, para ulu'gá'anë' ni' yugu' beo' ziaga, que lë ni

na' la'tu'biqui' yúgu'të bönni' nacu'ë lë'e barco na' gulún tuz xtídza'gaquië' ulu'zé'ë ni', channö huáca ila'dxinë' ga ta'dxín barco lu yödzö Fenice, lësca' dë luyú bidxi na' nazí'i le Creta, le dë tsölá'a ga ribía gubidza, ate' gulé'ënnë' ulu'gá'anë' ni' yugu' beo' ziaga.

### *Recja bö' budunu' lu nísado'*

<sup>13</sup> Tu' recja tu bö'do' le za' saca' tsölá'a ga ridödi gubidza beo' ziaga, téquinë' chiraca ilunë' ca té'ënnë', ate' bulu'lisë' guié' zi'i naga' du guié' le ruzóa dxisö barco, ate' gudödi barco na' gala' ra' luyú bidxi na' nazí'i le Creta. <sup>14</sup> Ia'tú ch'isö ca', guyecja tu bö' budunu' za' lotu', nazí'i le Euroclidón. <sup>15</sup> Tu' ruzéaj bö' na' recja barco na' tsölá'alö, ate' tu' cabí guca tseaj barco ga za' bö', ní'irö bë'ëtu' lataj bö' na' buzéaj barco na' ga ré'ëni. <sup>16</sup> Cate' gudödi barco na' ga bidxintu' tsölá'a tu luyú bïdxido' nazí'i le Cauda, tsölá'a ni' ga biti' récjada' bö', lu yöl-la' rizáca'sö buchísatu' bárcodo' ná'ayój barco zxön na' yú'utu'. <sup>17</sup> Gudödi burentu' le lahui barco zxön na', ní'irö bégä'ratu'barco zxön na'. Zxante barco na' buchólitu' du, para cabí ilá'a lu le ridxía nisa na'. Tu' gúdxitu' tödi barco na', en inídxí' lu yuzxi lu nísado' na', buzótjatu' lari' que, le rutubi bö' rusá' barco na'. Canísö bë'ëtu' lataj bö' na' recja buzéaj barco. <sup>18</sup> Cate' za' rení' ia'tú dza, en ni' ruzéajda' bö' budunu' recja barco na', ní'irö gurú'unatu' lu nísado' lati' yua' dzö'ö lë'e barco na'. <sup>19</sup> Dza bunni, len na' cuintu' gurú'unatu' le tun dxin que barco na' lu nísado'. <sup>20</sup> Cate' chiguca zián dza biti' rilé'etu' gubidza, en nitú bólaj, en tu' récjada' bö' na' ruzéaj barco na' yú'utu', bíti'rö runtu' löza ulatu'.

<sup>21</sup> Tu' chiguca zián dza biti' nágatu', guzuínë' Pablo gatsaj láhui'lö légaquië', en gudxë' légaquië':

—Libi'ili', bönni', dxí'arö guca la'tu' uzé nágali' neda', en cabí uzá'aru' luyú Creta, en cabí udutságaru' lë ni rigu'i rizáca'ru', en yugu' lë ni raca ditaj que barco ni. <sup>22</sup> Na'a, rea' libi'ili': Tsutsu guli'gún ládxi'li', tu' cabí gátili' nituli' libi'ili' tscalí' zóali' ni, sal-la' gaca ditaj barco ni. <sup>23</sup> Caní gaca tu' budulu'i lahuë' neda' gudiyëla tu gubáz lá'ayi queë' Dios. Dios ni néquida' queë', en runa' xichinë'. <sup>24</sup> Gubáz lá'ayi na' gudxë' neda', gunné': "Pablo, biti' gádxinu'. Run bayudxi idxinu' lahuë' César. Tu' nadxi'inë' Dios li', usöle' yúgu'të bönnachi nacuá'len li' lë'e barco ni." <sup>25</sup> Que lë ni na', tsutsu guli'gún ládxi'li', tu' ruzxöni ládxa'a-në' Dios, gaca ca na' chigudxë' gubáz lá'ayi queë' neda'. <sup>26</sup> Caní gaca sal-la' run bayudxi gaca ditaj barco ni tu luyú bïdxido', ga ni' tsöjcá'ana rë'u.

<sup>27</sup> Cate' ni' chigudödi chidá' dza, ate' bö' na' recja ruzéaj barco na' lu nísado' nazí'i le Adriático, idú ladxi' yëla guléquinë' bönni' tunë' dxin lu barco na' chizóa idxín barco gala' tu luyú bidxi. <sup>28</sup> Gula'rú'unë' du lu nísado' na', ate' gula'nózинë' galaj ösa naca ga bidxintë ga rë' lu nisa. Cate' gudödi barco na' ia'láti'do', gula'rú'unë' du na' leyúbölö, en gula'nózинë' chinaca chinu ösa. <sup>29</sup> Tu' guládxinë' tsöjdín barco na' lu guiój, que lë ni na', tsölá'a láhuilö que barco gula'rú'unë' lu nísado' tapa guié' zi'i nágagaca du guié' le tu'zóa dxisö barco lu nisa. Lu yöl-la' ruúbi rugu'i isö ládxi'do'gaquië' gula'bözë' tsení'. <sup>30</sup> Ní'irö gulé'ënnë' bönni' tunë' dxin lu barco ulu'zxúnnajë' lë'e barco na'. Bulu'zötje' bárcodo' na' dë lahui barco zxön na' lu nísado'. Gulunë' ca té'ënnë' ilu'ë ia'lati' zi'tu' guié' zi'i na' naga' du guié' le ruzóa dxissö barco na', le zoa saca' tsölá'a láhuilö. <sup>31</sup> Ní'irö Pablo gudxë' bönni' na' rinná bë'enë' bönni' röjáquië' gudil-la, tsözxöni len bönni' na' röjáquië' gudil-la, gunné':

—Channö cabí ulu'gá'anë' bönni' ni lë'e barco ni, biti' gaca uláli'.

<sup>32</sup> Ní'irö bönni' na' röjáquië' gudil-la gula'chúguië' du naga' bárcodo' na', ate' gulu'ë lataj gubixi lu nísado'.

<sup>33</sup> Cate' chizá' rení', Pablo gúta'yuë' lógaquië' bi ilahuë' yúgu'të'. Gudxë' légaquië':

—Na'a chiguca chidá' dza rubéaj yëla loli', en runli' gubasa, biti' bi náguli'. <sup>34</sup> Que lë ni na', ráta'yua' loli' gáguli' para huöáca ládxi'li', tu' cabí gátili' nituli' libi'ili'.

<sup>35</sup> Cate' Pablo budxi bë'ë didza' ni, gudélë'ë yöta xtila, en gudxë' Dios: "Xclenu'." Caní benë' lógaquië' yúgu'të'. Ní'irö buzzuzxjë' yöta xtila na', en gusí lahuë' rahuë'. <sup>36</sup> Ní'irö

bila'dipa láxsi'gaquië' yúgu'të', en gulahuë'. <sup>37</sup> Tscatu' zóatu' lë'e barco na', gúcatu' idú chopa gayuá' yu' tsónnalalaj yu' chizxópatu'. <sup>38</sup> Gudödi gulahuë', en bulu'huö'janë', ní'irö gula'rú'unë' zxoa' xtila dë lë'e barco na' lu nisa, para ulu'lahuë' yua' dzö'ö lë'e barco na'.

### *Raca ditaj barco lu nísado'*

<sup>39</sup> Cate' chiguca lahui' dza, yugu' bönni' tunë' dxin lu barco na' biti' bulu'únbe'ë luyú na'. Bila'lé'enë' ga röjrö' nisa zxön na' gatsaj láhui'lö luyú bidxi na', en dë lataj ni' ga naca lachi' ra' nísado'. Gulé'ennë' ilunë' ga tsaza barco na' ga ni'. <sup>40</sup> Ní'irö bulu'sedxë' yugu' du guíë nágaga'gaca yugu' guíë zi'i tu'zóá dxisö barco na', en bulu'sanë' léguequi, ate' gula'bixi lu nísado'. Bulu'sedxë' ca' du naga' né'e yaga le ruzecaj rudxi'i barco. Ní'irö bulu'chissë' lari' que le rutubi bö', le zoa tsölá'a láhuilö barco na', ate' ní'irö gusí lo ridödi barco saca' ga röjrö' nísado' gatsaj láhui'lö luyú bidxi na'. <sup>41</sup> Cate' bidxín barco na' tu lataj ga ridzaga chopa nisa, ni' binidxi' tsölá'a láhuilö barco na' lu yuzxi lu nísado' na', ate' bugá'anaso barco na' ga ni'. Bíti'rö guca bi utá le, ate' tsölá'a cúczi'lö barco na', gusí lo riguitsaj nísado' na' le, len yöl-la' rizá' que. <sup>42</sup> Ní'irö bönni' röjáquië' gudil-la gulé'ennë' ilútie' bönni' nadzúngaqüië', para cabí ila'zxúnnajé', ila'zxoë' lu nisa na'. <sup>43</sup> Bönni' na' rinná bë'enë' bönni' na' röjáquië' gudil-la gú'unne' usöle' Pablo, ate' gunná bë'enë' bönni' na' röjáquië' gudil-la cabí ilunë' ca na' té'ennë'. Ní'irö gunná bë'enë' bönni' taca ila'zxoë' lu nisa, zí'alö légaquië' ila'yázië' lu nisa para ila'dxinë' luyú bidxi. <sup>44</sup> Gunná bë'enë' ca' yugu' bönni' nagá'anagaquië' ila'zxoë' lu yaga dzö'ö láhuilö barco, en ia'bal-lë' láhuigaca yágado' que barco na'. Caní guca, bulu'lé' yúgu'të'. Canísö bila'dxinë' luyú bidxi na'.

## 28

### *Le benë' Pablo luyú bidxi nazí'i le Malta*

<sup>1</sup> Cate' chibulatu' yúgu'tetu', gunöztu' luyú bidxi ga na' zóatu' nazí'i le Malta. <sup>2</sup> Bönni' xidza' nacu'ë luyú bidxi na' lu yöl-la' dxi'i ladxi' quégaquië' gulunë' netu' bal. Gula'béquië' guí', ate' bulu'lidzé' netu' yúgu'tetu' iditsé'e cuintu', tu' ralaj guiój, en ronda' ziaga. <sup>3</sup> Ní'irö Pablo gúchö'ë tu tsölén huága zxisi bídxido', en cate' gulu'ë le lu guí', birúajba' tuba' bëla sínia' lë'e huágado', rizxúnnajba' bôchila que guí' na', ate' yöjt'íniba' yen né'ë Pablo. <sup>4</sup> Cate' bönni' xidza' na' bila'lé'enë' bëla na', nála'ba' yen né'ë Pablo, gulé' tuë' ia'túë':

—Le nácatë bönni' ni náquië' nu ruti bönoch. Sal-la' bulé' lu nísado', dios queéru' lë' Tsahui' biti' ru'ë lë' lataj soë' ibané'.

<sup>5</sup> Gudxibi né'ë Pablo, en buslázdu'ë-ba' bëla sínia' na'. Yöjxóatëba' lu guí', ate' lë' biti' bi guca queë'. <sup>6</sup> Bönni' xidza' nacu'ë ni' tu'yúë' Pablo, bátacalö cö'ë gui, o tsó'ötë' gátië'. Ní'irö cate' chigudzé ta'bözé', en bila'lé'enë' biti' bi raca queë', ia'tú le guléquinë', ate' gula'nnë' naca cazé' tu dios.

<sup>7</sup> Lataj ní'isö dë xiyúë' Publio, bönni' lo que luyú bidxi na', ate' bönni' ni benë' netu' bal. Lu yöl-la' dxi'i ladxi' queë' gulu'ë netu' lidxë' idú tsonna dza. <sup>8</sup> Dza na' dë' ré'enë' xuzë' Publio na', yu'ë xilá, en ré'enë' huë' rön. Guyázië' Pablo söjyúë' lë', en gudödi bulidzé' Dios, ní'irö guxóa né'ë bönni' huë' na', en buné' lë'. <sup>9</sup> Tu' benë' Pablo lë ni, lësca' bila'dxín nupa te'e ga zoë', nacu'ë luyú bidxi ni', en bulu'huö'quie'. <sup>10</sup> Yugu' bönni' ni gulunë' netu' bal, en zián le gulunë' queétu'. Cate' chizóa uzá'atu' luyú ni', bulu'nödzjé' yugu' le naquínitu' queétu'.

### *Ridxinë' Pablo lu yödzö Roma*

<sup>11</sup> Cate' chiguca tsonna beo' zóatu' ni', ní'irö gurentu' tu lë'e barco que yödzö Alejandría, le bugá'ana luyú bidxi na' yugu' beo' ziaga. Barco ni dá'gaca tsölá'a láhuilö budó' yaga léguequi Cástor, en Pólux, dios bilidi' quégaca bönoch Alejandría na'.

<sup>12</sup> Buzá'a barco na' ga ni', ate' bidxín yödzö Siracusa, ga ni' bugá'anatu' tsonna dza.

<sup>13</sup> Buzá'atu' ni', ate' gudöditu' tsölá'alö luyú ni', en bidxitu' yödzö Regio. Cate' za' reni'

ia'tú dza, tu' recja bö' za' saca' ga ridödi gubidza beo' ziaga, buzá'atu' ni', ate' dza buropi na' bidxíntetu' yödzö Puteoli luyú Italia. <sup>14</sup> Lu yödzö na' yöjxáca'tu' yugu' bóchi'ru' ta'yéajlé'ë Cristo, ate' guláta'yuë' lotu' ugá'analentu' légaquië' idú xunu' dza. Cate' bizá'a dza na' buzá'atu' ni' para tséajtu' yödzö Roma, rizë'e ní'atü'. <sup>15</sup> Chibila'yönnë' bóchi'ru' nacu'ë Roma chizóa idxintu' ni', ate' bila'rúajé' idixf'gala'gaquië' netu'. Bila'dxinë' tu yödzödo' nazi'i le Yé'ëyi Que Apio. Ia'bal-lë' bila'dxinë' tu lataj nazi'i le Tsonna Yu'u Quégaquië' Bönni' Yu'ugaquië' Nöza. Cate' Pablo bilé'enë' légaquië', bidipa ládxé'ë, en gudxë' Dios: "Xclenu'."

<sup>16</sup> Cate' bidxintu' Roma, bönni' na' rinná bé'enë' bönni' röjáquië' gudil-la, guché'ë bönni' na' nadzúngaquië', ate' budödë' légaquië' lu né'ë tu bönni' lo rinná bé'enë' bönni' röjáquië' gudil-la, ate' bë'ë Pablo lataj soë' queézë', zóalenë' lë' tu bönni' rejë' gudil-la ruyúë' lë'.

### *Runë' Pablo libán lu yödzö Roma*

<sup>17</sup> Cate' chigudödi tsonna dza, bulidzë' Pablo yugu' bönni' lo quégaquië' bönni' judío nacu'ë Roma. Cate' chibulu'dubë' ga na' zoë' Pablo, lë' gudxë' légaquië':

—Libí'ili', bócha'a, sal-la' biti' bi bena' quégaca bönachi ládzaru', en calëga que le nalébiru' runru' ca na' gulunë' xuz xtó'oru', yugu' bönni' judío nacu'ë Jerusalén bulu'dödë' neda' lu ná'agaquië' bönni' Roma nacu'ë Jerusalén, ate' bulu'sayjë' neda' lidxi guíë. <sup>18</sup> Ní'irö cate' chigula'nabi yúdxinë' neda' bönni' Roma, gulé'ënnë' ulu'sanë' neda', tu' guléquibe'enë' biti' nabága'a xíguia' gátia'. <sup>19</sup> Yugu' bönni' judío ni' gula'dá'báguë'ë nupa na' gulé'ëni ulu'sán neda', ate' ben bayudxi gunaba' tseja' lahuë' César ga uchi'a usöröö' neda', en calëga para uzéguia' bönachi uládz queéru' didza'. <sup>20</sup> Que lë ni na' bulidza' libí'ili' para ilé'eda' libí'ili', en güí'ilena' libí'ili' didza', tu' nága'a du guíë ni tu' runa' löza le runru' löza rë'u, bönachi Israel, gácatë lë na' guzxí' lu né'ë Dios gata' queéru'.

<sup>21</sup> Ní'irö légaquië' gulé' Pablo:

—Biti' ridxini queétu' guichi le za' luyú Judea ca naca lë na' raca quiu', en cuntu nu ridxini nu naca bóchi'ru' judío, nu usiyöni netu' channö nu bi rnnë quiu' le ruá' dö'.

<sup>22</sup> Na'a, rë'ënitu' yöñitu' xtíuzu'u, lë na' riguinnaj icju', tu' chinózitu' ta'nné bönachi yúgu'të lataj quégaca nupa nazi' lu né'eguequi xibá cubi ni.

<sup>23</sup> Caní guca, bulu'dxié' bë' tu dza, ate' dza na' bila'dxinë' ziánë' ga na' zoë' Pablo. Gusí lahuë' Pablo zílado', ate' ni' gúl-li'ni buzéajni'inë' légaquië', en buchila lá'anë' le rinná bë'ë Dios. Gú'unnë' ulu'iñë' légaquië' naca idútë li libán runë' queë' Jesús. Para gunë' caní bugunë' dxin le rinná bë' xibá queë' Moisés, enca' le gula'nné' bönni' gulu'ë didza' uláz queë' Dios. <sup>24</sup> Bal-lë' gula'zi' lu ná'agaquië' didza' bë'ë Pablo, pero ia'bal-lë' biti' ca' gula'yéajlé'ë. <sup>25</sup> Tu' bila'rúajé' choplö, gula'sí lógaquië' tu'zé'ë ni', ate' Pablo gudxë' légaquië', rnnë'.

—Didza' nácatë bë'ë Dios Bö' Lá'ayi, lë na' gunnë' Isaías, bönni' bë'ë didza' uláz queë' Dios, ca na' buzéajni'inë' xuz xtó'oru', gunnë':

<sup>26</sup> Guyéaj lógaca bönachi ni', yöjödxi légaquië':

Yöni nágali', pero biti' tséajni'ili'.

Uyuli' iná'ali', pero biti' ilé'eli'.

<sup>27</sup> Yugu' bönni' ni chinazidi icja ládxí'do'gaquië', en biti' bi riyaza icja nágagaquië'.

Gulunë' ca tun nupa nachul-la guiój lóguequi  
para cabí ila'lé'e len guiój lóguequi,  
en cabí ila'yöni nágaguequi  
para cabí ulu'zéajni'i ládxí'guequi,  
en cabí ilé'ëni ulu'huöáca queë' Dios

para gaca una' léguequi.

<sup>28</sup> Na'a, ral-la' inőzili' lë ni. Dios risől-lë'ë netu' lógaca böñachi izá'a para ulu'lágaca, ate' légaquië' ila'yönnë'.

<sup>29</sup> Cate' Pablo budxi bë'ë didza' ni, bila'rúajë' bönni' judío, ta'díl-lada' dídzë'ë la' légacasë'.

<sup>30</sup> Idú chopá iz bugá'anë' Pablo ni', zoë'tu lu yu'u ga na' riguizxjë', ate' benë' bal yúgu'të nupa buduyúgaca Lé'. <sup>31</sup> Lu yöl-la' rugu ladxi' benë' libán ca rinná bë'ë Dios. Busédinë' böñachi ca naca queë' Xanru' Jesucristo, ate' cuntu nu buzaga' xinözë'. ¡Ca' naca!

## DIDZA' GUSÖL-LË'Ë PABLO YÖDZÖ ROMA

*Pablo rugapë' Dios bönachi queë' Cristo nacu'ë Roma*

<sup>1</sup> Neda', Pablo, naca' bönni' nadó'o queë' Jesucristo, en gubáz queë', tu' bulidzé' Dios neda', en guró cazé' neda' para guna' libán que didza' dxi'a queë'.

<sup>2</sup> Dza ni'te guzxi' lu né'ë Dios isól-lë'ë didza' dxi'a na' queéru'. Gunné' caní lu ruá'agaquië' bönni' gulu'ë didza' uláz queë', ate' légaquië' bulu'zúajé' le lu guichi lá'ayi queë' Dios. <sup>3</sup> Bulu'zúajé' lu guichi yúgu'té le ral-la' guné' Zxi'iné' Dios, Nu na' naca Xanru' Jesucristo. Lu yöl-la' bönachi queë' náquië' zxí'ini xi'sóë' David, <sup>4</sup> pero ca naca bö' naca cazé', le naca lá'ayi, naca bë' náquië' Zxi'iné' Dios, en nápadé'ë yöl-la' huáca. Naca bë' náquië' caní tu' bubenä' lu yöl-la' guti. <sup>5</sup> Ni'a que le benë' Jesucristo ruzí'iru' xibé le ruzá' ládxé'ë queéru' Dios, ate' benë' ga naca' gubáz queë' para uláz queë' Lë' guna' ga ila'yéajlé' bönachi idútë yödzölió Lë', en ilún ca rnna xtídzé'ë. <sup>6</sup> Bítsa'lli' libí'ili' ladjagaca bönachi yödzölió na', pero na'a nulidzé' Dios libí'ili' para guéquili' queë' Jesucristo.

<sup>7</sup> Rugapa' Dios libí'ili', yúgu'téli' zóali' Roma. Dios nadxi'iné' libí'ili', en bulidzé' libí'ili' para gácali' quez queë'. Rinábida'-në' Xúziru' Dios, enca' Xanru' Jesucristo, gunnë' queéli' le ruzá' ládxé'ë queéru', en le ribequi dxi ládxí'ru'.

*Ré'ënë' Pablo tsöjyúë' bönachi queë' Cristo nacu'ë Roma*

<sup>8</sup> Lë ni risí lahua' ruzúaja' lu guichi: Tu' néquiru' queë' Jesucristo rea'-në' Dios: "Xclenu'" ca naca queéli' yúgu'téli', ate' ta'guixjö' bönachi idútë yödzölió ca réajlé'ëli' Jesucristo. <sup>9</sup> Idú ládex'a runa' xichiné' Dios, runa' libán que didza' dxi'a ca naca queë' Zxi'iné'. Nóziné' Dios rulídzatica'sa'-në', en rinábida'-në' gaca tsahui' queéli'. <sup>10</sup> Rinábitica'sida' Dios, channö naca le ré'ënë' Lë', gunnë' neda' lataj uduyúa' libí'ili'. <sup>11</sup> Caní rinábida'-në' tu' raca ládex'a ilé'eda' libí'ili' para gaca guna' ga gata' queéli' tu le unödzjë' Dios Bö' Lá'ayi queéli', le gun ga gácali' tsutsu. <sup>12</sup> Lë na' ré'ënda' naca utipa ládxí'ru' turu' ia'turu', tu' réajlé'ëru' Jesucristo yúgu'téru'.

<sup>13</sup> Böchi' luzá'ado', ré'ënda' inózili' lë ni. Zián luzuí bë' ládex'a guída' ga zóali', pero ga ridxitné na'a biti' runni quia'. Ré'ënda' guída' ga zóali' para guna' ga uzí'ili' xibé libán na' runa', ca na'tu'zí' xibé ia'bal-la bönachi yödzölió ni. <sup>14</sup> Dë le ral-la' guna' quégaca yúgu'té bönachi, quégaca bönachi nazédagaca, en quégaca bönachi cabí nazédagaca, quégaca bönachi ta'yéajni'i, en quégaca bönachi cabí ta'yéajni'i. <sup>15</sup> Que lë ni na', tsca gaca guna', zoa' riböza' guna' ca' libán que didza' dxi'a ga ni' zóali' libí'ili', zóali' Roma.

*Yöl-la' huáca zxön que didza' dxi'a*

<sup>16</sup> Biti' ca' rutui'ida' runa' libán que didza' dxi'a, tu' napa yöl-la' huáca queë' Dios para gun ga ulu'lágaca yúgu'té nupa ta'yéajlé' le. Ga risí lo, ré'ënë' Dios ila'yönné' bönni' judío le, ate' tödi na' ila'yöni ca' bönachi izá'a. <sup>17</sup> Didza' dxi'a ni rulu'i rë'u guné' Dios ga huöácaru' tsahui', channö uyéajlé'ëru' Lë', en biti' gaca chopá ládxí'ru'. Ca naca lë ni nazúaj ca' lu guichi lá'ayi, rnna: "Nu naca tsahui' tu' réajlé' Dios, gata' yöl-la' na'bán que nu na'."

*Xígua' nabága'gaca bönachi*

<sup>18</sup> Dios, Nu zoa yehua' yubá, bulu'e lahui biti' rilé'ené' dxi'a yúgu'té le ruá' dö', en le cabí naca tsahui' tun bönachi. Guné' xígua' yugu' bönni' na', lu yöl-la' biti' naca tsahui' quégacië' ta'dá'baguë'ë le naca idútë li. <sup>19</sup> Caní gaca quégacië' tu' nalá' lahui lógaca yúgu'té bönachi le naca bë' zoa cazé' Dios, tu' bulu'i quégacina' Dios lë ni ga na' nacu'ë. <sup>20</sup> Dza ni'te cate' si' guta' yödzölió, ga ridxitné na'a dza, yugu' le nunë' Dios nácagaca bë' le cabí gaca ilé'ëru' queë' Dios, ca naca yöl-la' huáca idú queë', en le naca cazé' Dios. Que

lē ni na', biti' gaca ila'nné' biti' nabága'gaquië' xíguia'. <sup>21</sup> Cate' ni' gulúnbë'ë Dios, biti' gula'yéaj ládxí'gaquië' Lë' ca ral-la' tseaj ládxí'ru'-në' Dios, en biti' gulé' Lë': "Xclenu'." Que lë ni na', cá'asö böáca le gula'zá' ládxí'gaquië', ate' gula'chul-la gula'nítië' tu' nazidi icja ládxí'do'gaquië'. <sup>22</sup> Sal-la' guléquinë' ta'yéajni'inë' yenni', bulu'huöáquië' bönni' biti' bi nőzguequinë' <sup>23</sup> tu' bulu'cá'anë' yöl-la' beni' queë' Dios Nu zóatica'sö, ate' gula'yéaj ládxí'gaquië' budó' guiój budó' yaga, budó' na' nácagaca ca yugu' bönni' tati cazë', en ca yugu' böa'do' zoa xíligacaba', en ca yugu' böa' guixi' ta'daba' lu yu, en ca yugu' böa' bëla tá'ayøj lë'eba' lu yu ni.

<sup>24</sup> Que lë ni na' Dios guléaj ládxë'ë légaquië' para ilunë' yugu' le ta'zé ládxí'gaquië' le ruá' dö', ate' caní guca, bulu'cá'ana cuíngaqüië' lu yöl-la' stu' tuë' len ia'tué'. <sup>25</sup> Guca caní tu' bulu'cá'anë' xtídzë'ë Dios, le naca idútë li, ate' gula'zí' lu ná'agaquië' tu le cabí nácatë. Gulunë' bal, en gula'yéaj ládxí'gaquië' yugu' le benë' Dios, en calëga Lë cazë' Dios, Nu na' ral-la' gácatica'sö queë' yöl-la' ba. ¡Ca' gaca!

<sup>26</sup> Que lë ni na' Dios guléaj ládxë'ë légaquië' para ilunë' yugu' le ta'zé ládxí'gaquië' le ruá' dö'. Yugu' nigula bulu'cá'ananu yöl-la' rizóalen bönni', para ilunnu le ruá' dö'. <sup>27</sup> Lësca' caní gulunë' yugu' bönni' biguiú', bulu'cá'anë' yöl-la' rizóalen nigula, ate' gula'zé ládxí'gaquië' le ruá' dö' túnlenë' tuë' ia'tué', en gulunë' le tun ga nu rutuñ'i, tu' gula'cuá'lenë' la' luzá'a bönni'gacasë'. Que lë ni na' gula'gu'i gula'záquië' lu xipéla'gaquië' yugu' bönni' gulunë' caní tu' bubi'ë Dios quégäquië' ca sa'yéaj dul-la' na' gulunë' tu' nucá'anagaquië' Dios.

<sup>28</sup> Tu' cabí gulé'ënnë' ilunë' Dios bal, que lë ni na' guléaj ládxë'ë Dios légaquië' para ila'zá' ládxí'gaquië' le biti' naca dxí'a, en ilunë' le cabí nazaca'.

<sup>29</sup> Túntica'së' yúgu'të le cabí naca tsahui', en yugu' le naca stu'.

Tunë' le ruá' dö', en tu'huídi'në'.

Biti' ta'lé'enë' dxí'a luzá'agaquië', en tu'zxé'enë' luzá'agaquië'.

Tutië' luzá'agaquië', en ta'díl-lalenë' luzá'agaquië'.

Ta'zí' yé'enë' böñachi, en zi'të nácagaquië' xihui'.

Ta'nné' que luzá'agaquië'.

<sup>30</sup> Ta'nné' le cabí nácatë que luzá'agaquië'.

Biti' ta'lé'enë' Dios dxí'a, en nácagaquië' bönni' bizxaj.

Tun cuíngaqüië' lo, en tun ba zxön cuíngaqüië'.

Ta'guiljë' le ruá' dö' ilunë', en ta'dá'baguë'ë xuz xiná'agaquië'.

<sup>31</sup> Nácagaquië' bönni' biti' ta'yéajni'inë', en tun dítjagaquië' xtídz'a'gaquië'.

Biti' nácagaquië' dxí'i ladxi' ca ral-la' ilácagaquië'.

Biti' tu'niti lahuë' luzá'agaquië'.

Biti' tu'huechi' ládxí'gaquië' luzá'agaquië'.

<sup>32</sup> Nőzguequi quézinë' le nuzóë' tsaz Dios ca ral-la' gaca quégaca nupa tun yugu' le caní, ilátigaca tsaz. Sal-la' nőziguequinë' lë ni, calégasö caní tunë', pero ta'yaza ládxí'gaquië' nupa tun ca' caní.

## 2

### Naca tsahui' ichúguië' Dios quégaca böñachi gátigaca

<sup>1</sup> Que lë ni na', biti' gaca ubéaj tsahui' cuinu', núti'tës nu nacu', richugu bë'u luzó'o. Cate' richugu bë'u luzó'o, rusubaga' cuinu' xíguia', tu' richugu bë'u luzó'o, en lësca' runu' li'. <sup>2</sup> Nöz quéziru' ca ruchi'a rusöröë' Dios. Naca idútë li ca ruchi'a rusöröë' nupa tun le ruá' dö'. <sup>3</sup> Li' richugu bë'u nupa tun le ruá' dö', en tuz ca runu' li'. ¡Naru' réquitsenu' uló' li' cate' uchi'a usöröë' Dios? <sup>4</sup> ¡Naru' rucá'anatso' cá'asö yöl-la' dxí'i ladxi' idú queë' Dios, en yöl-la' riböza zxön ladxi' queë', en ca runë', ridzenë' para lenë' li'? ¡Naru' cabí nöz quézinu' ruzá' ládxë'ë Dios quiu' yöl-la' dxí'i ladxi' queë' para gunë' ga ubí'i ládxu'u? <sup>5</sup> Lu yöl-la' ládxí'do' zidi quiu' biti' rubí'i ládxu'u. Que lë ni na' rusubaga' cuinu' xíguia' gunë'

Dios li' cate' uchi'a usöröö' böñachi, ate' gaca bë' naca ca ral-la' gunë' Dios cate' ichúguië' quégaca böñachi ilátigaca. <sup>6</sup> La' dza ní'sö ubí'i cazë' Dios queeë' bönni' tsca naca le gulunë' tu tuë'. <sup>7</sup> Unödzjë' yöl-la' na'bán idú quégaca nupa túntica'sö le naca dxí'a, tu' tuí'i ládxí'gaquië' ulu'zi'ë xibé' Dios, en ulu'rúajë' dxí'a lahuë' Lë', en ila'cuá'tica'së'. <sup>8</sup> Lu yöl-la' rilé queeë', Dios gunë' xíguia' nupa ta'dá'baga', en biti' té'ëni ilún ca rnna le naca idútë li, pero tun ca rnna le cabí naca tsahui'. <sup>9</sup> Ila'guí'i ila'záquië', en huí'inida' ládxë'ë yúgu'të bönni' tunë' le ruá' dö'. Ga risí lo gaca caní quégaca böñachi judío, en gaca ca' caní quégaca böñachi izá'a. <sup>10</sup> Dios gunë' ga ilácagaquië' bica' ba, en gunë' légaquië' bal, en gu'ë le cuéqui dxí'ládxí'gaquië' yúgu'të bönni' tunë' le naca tsahui'. Ga risí lo gunë' caní quégaca böñachi judío, en gunë' ca' caní quégaca böñachi izá'a.

<sup>11</sup> Caní uchi'a usöröö' Dios böñachi, ate' Lë' biti' runë' bal le ta'nnasö böñachi, <sup>12</sup> Yúgu'të bönni' na' biti' bila'yönnë' le rinná bë' xibá queeë' Dios, en gulunë' dul-la', lësca' ilatië', sal-la' biti' téquibe'enë' gula'dá'baguë' le rinná bë' xibá na', ate' yúgu'të bönni' bila'yönnë' le rinná bë' xibá queeë' Dios, en gulunë' dul-la', Lë' uchi'a usöröö' légaquië' ca naca le rinná bë' xibá na'. <sup>13</sup> Caní gaca, tu' cabí nácagaquië' tsahui' lahuë' Dios yugu' bönni' ta'yónisë' xibá queeë', pero ulu'huoáca tsahui' lahuë' Lë' yugu' bönni' tunë' ca rnna xibá queeë'. <sup>14</sup> Bönni' na' biti' nácagaquië' judío, en biti' bila'yönnë' le rinná bë' xibá queeë' Dios, pero tun cazë' ca rinná bë' xibá queeë' na', bönni' ni, sal-la' biti' bila'yönnë' le rinná bë' xibá queeë' Dios, zóalen légaquië' tu xibá le nuzóë' Dios icja ládxí'do'gaquië'. <sup>15</sup> Nupa ni tu'lui' i lahu le run xibá na' nazúaj lu icja ládxí'do'gaquië'. Le yu'u icja ládxí'do'gaquië' naca bë' naca caní. Ca ta'zá'ládxí'gaquië', tu'zéguië' luzá'agaquië' didza', o tu'béaj tsahui' luzá'agaquië' tuë' ia'túë'. <sup>16</sup> Caní ubi'ë Dios quégagaquië' dza ni' uchi'a usöröö' lu na' Jesucristo yugu' le núnagaquië', en le gula'zá'ládxí'gaquië' yúgu'të'. Caní rusëdi didza' dxí'a runa' libán que.

### *Yugu' bönni' judío, en xibá queeë' Dios*

<sup>17</sup> Núloli' rnnali' nácali' judío, en ruzxöni ládxí'li' xibá queeë' Dios, en run ba zxön cuinli' tu' núnbe'eli'-në' Dios, <sup>18</sup> nöz quézili' le ré'ënë' Dios gunli', en le rusëdi libí'ili' xibá queeë', en réquibe'eli' le nácatérö dxí'a. <sup>19</sup> Réquili' gaca ulu'ili' nöza dxí'a nupa ta'dá ga yúbölö ca nu nachul-la lahu, en gaca uzéajni'ili' nupa nachul-la nanítigaca. <sup>20</sup> Réquili' gaca usédili' nupa biti' ta'yéajni'i, en nupa ta'yéajni'i láti'do'os, tu' dë lu ná'ali' xibá queeë' Dios le rusëdi böñachi ca naca yöl-la' réajni'i idú, en le naca idútë li. <sup>21</sup> Na'a, libí'ili' rusédili' ia'zíca'rö böñachi. ¿Naru' cabí ral-la' usëdi cuinli'? Libí'ili' rnnali': "Biti' cuanu'." ¿Naru' ribántsali' libí'ili'? <sup>22</sup> Rnnali' ca': "Biti' gunu' dul-la' le riguitsaj xibá que yöl-la' nutsaga na'." ¿Naru' rúntsali' libí'ili' dul-la' le riguitsaj xibá que yöl-la' nutsaga na'? Libí'ili' biti' rilé'eli' dxí'a yugu' budó' guiój budó' yaga. ¿Naru' ribántsali' le dzö'ö lu yudo' quéguequi? <sup>23</sup> Run ba zxön cuinli' tu' dë lu ná'ali' xibá queeë' Dios. ¿Naru' rucá'anatsali' Dios cá'assö, en riguítjsali' xibá le gunná bë'ë Lë'? <sup>24</sup> Nazúaj lu guichi lá'ayi ca runli', rnna: Ni'a que le runli' libí'ili' nupa biti' nácagaca judío ta'nné'zi' queeë' Dios.

<sup>25</sup> Le nácatë ruzi'u xibé lë na' narugu lu xipél'u le naca bë' nazí' lu ná'ali' xibá queeë' Dios channö runu' ca rinná bë' xibá na' queeë' Dios, pero channö riguitsju' xibá le gunná bë'ë Lë', nuhuoácu' ca tu bönni' biti' néquinë' queeë' Dios. <sup>26</sup> Que lë ni na', channö zoë' tu bönni' biti' narugu lu xipélë'ë lë na' naca bë' nu nazí'i xibá queeë' Dios, pero runë' idútë ca rinná bë' xibá queeë' Lë', bönni' ni náquië' lahuë' Dios ca tu bönni' narugu caz lu xipélë'ë lë na' naca bë' sal-la' biti' narugu lu xipéla' cazë'. <sup>27</sup> Bönni' na' biti' narugu lu xipélë'ë lë na' naca bë' nu nazí'i xibá queeë' Dios, pero runë' idú ca rinná bë' xibá na' queeë' Dios, ca runë' bönni' ni rului' i nabága'li' libí'ili' xíguia', sal-la' dë lu ná'ali' xibá na' queeë' Dios, en narugu lu xipéla'li' lë na' naca bë' nazí' lu ná'ali' xibá na' queeë' Dios, pero biti' runli' ca rinná bë' xibá queeë' na'. <sup>28</sup> Biti' náquië' idú bönni' judío tu bönni' nácasë' caní lu yöl-la' böñachisö queeë', ate' biti' naca idú lë na' naca bë' le narúgusö lu xipélë'ë nu bönni'. <sup>29</sup> Náquië' idú

bönni' judío bönni' na' náquië' caní lu icja ládxí'da'ahuë', en le naca idú le narugu lu xipélë'ë nu bönni' le naca bë' nu nazí'i xibá queë' Dios, naca tu le yu'u icja ládxí'do'gaca bönachi. Naca que bö' naca cázaru', en calëga que yöl-la' bönächisö queëru'. Nu bönni' náquië' caní, biti' tun bönachi lë' bal, pero Dios caz gunë' lë' bal.

## 3

<sup>1</sup> Channö caní naca, ¿bizxi ruzi'tsë' xibé tu bönni' tu' náquië' judío? ¿Bizxi ruzi'ë xibé tu bönni' judío tu' narugu lu xipélë'ë? <sup>2</sup> Yenni' ruzi'ë xibé, en zián ca ruzi'ë xibé. Le nácatérö lo, Dios gulu'ë lu ná'agaquië' yugu' bönni' judío didza' lá'ayi queë'. <sup>3</sup> Bal-lë' biti' ta'yéajlë'ë Dios. ¿Naru' réquitsenu' biti' gunë' Dios ca rnna xtídzë'ë tu' cabí ta'yéajlë'ë Lë'? <sup>4</sup> ¡Biti' ca' gaca! Ral-la' guéquibe'eru' rúntica'së' Dios ca rnna didza' bë'ë, sal-la' ta'zí' yë' yúgu'té bönachi. Ca naca queë' nazúaj lu guichi lá'ayi le rnna: Gaca bë' nacu' tsahui' ni'a que didza' ru'u, en uruju' tsahui' channö nu uchi'a usöröö Li'.

<sup>5</sup> Cate' runru' le ruá' dö', Dios rnnë' biti' naca tsahui' le runru', Lë ni naca bë' tsahui' náquië' Dios. Nacuá' nupa ta'nná: "Le cabí naca tsahui' le runru' naca bë' náquië' Dios tsahui', ate' que lë ni na' biti' ral-la' gunë' rë'u xíguia'." <sup>6</sup> ¡Biti' ca' naca caní! La'tu' ruzi'ë xibé Dios le ruá' dö' runru', ¿nacxi caz gaca uchi'a usöröö' bönachi yödzölió ni?

<sup>7</sup> Cate' nu rizi' yë', Dios rnnë' biti' rui'i didza' nu na' ca runë' Lë'. Lë ni naca bë' naca idútë li didza' ru'ë Dios. Ta'nné' bönni' le ta'zí' yë'ë légaquië' run ga gaca queë' Dios yöl-la'ba, ate' biti' ral-la' ichúguië' quégäquië', cabí inné' nácagaquië' bönni' dul-la'. <sup>8</sup> ¿Naru' huannátsaru': "Guá'aru' dö' para gaca le naca dxí'a"? Nupa na' ta'nné' zi' queëru' ta'nná rusédiru' caní, ate' tsahui' naca ichúguië' Dios quéguequi.

*Yúgu'tëru' nabágä'ru' dul-la'*

<sup>9</sup> ¿Bizxi caz innaru' na'a? Ca naca queëtu' netu', bönni' judío, ¿nácarötu' tsahui' ca ia'zíca'rö bönachi? ¡Biti' ca' nácatu'! Chibulu'a ni, nabágä'gaca dul-la' bönachi judío, ate' nabágä'gaca ca' dul-la' bönachi izá'a. ¡Yúgu'të' nabágä'gaquië' dul-la'! <sup>10</sup> Nazúaj lu guichi lá'ayi le rnna:

Cuntu nu zoa naca tsahui', cuntu nu caz.

<sup>11</sup> Cuntu nu réajni'i.

Cuntu nu riguilaj Dios.

<sup>12</sup> Yúgu'të' ta'dé' ga yübölö.

Yúgu'të' nanítigaquië'.

Cuntu nu run le naca dxí'a, cuntu nu caz.

<sup>13</sup> Lubá'agaquië' nácagaca ca yeru ba nayáljagaca.

Len yöl-la' rinnësö quégäquië' ta'zí' yë'enë' luzá'agaquië'.

Didza' rirúaj ruá'agaquië' naca ca le yudzu láya'ba' bëla sínia'.

<sup>14</sup> Len yugu' didza' tu'ë, tu'didza' yúdxinë' bönachi,

en ta'nné' zi'ë quégaca bönachi na'.

<sup>15</sup> Nacu'ë sina' tútigaquië' bönachi.

<sup>16</sup> Gáti'tés ga ta'dödë' tu'sunítië', en tu'saca' zi'ë luzá'agaquië'.

<sup>17</sup> Biti' ta'zéqui'né' ila'bözë' dxí'ado'.

<sup>18</sup> Biti' ca' tádxinë' Dios.

<sup>19</sup> Nóziru' yúgu'të didza' ni bë'ë Dios, rë' yugu' bönni' na' dë lu ná'agaquië' xibá queë'. Que lë ni na' cuntu nu gaca inná biti' nabaga' dul-la', ate' yúgu'të bönachi idútë yödzölió, uchi'a usöröö' Dios quéguequi. <sup>20</sup> Tu'i ládxí'gaquië' yugu' bönni' judío ilunë' yugu' le rinná bë' xibá queë' Dios para ulu'huöáquië' tsahui', pero cuntu nu huöáca tsahui' caní, tu' nuzóë' Dios xibá queë' para guéquibe'eru' nabágä'ru' dul-la'.

<sup>21</sup> Na'a, chibulu'i lahu'i ca gaca huöácaru' tsahui' lahuë' Dios. Biti' gaca huöácaru' tsahui' tu' runru' ca rinná bë' xibá queë' Dios, sal-la' lu xibá queë' na', en lu guichi lá'ayi ga nazúajgaca le gula'nné' bönni' gulu'ë didza' uláz queë' Dios, ru'i didza' ca gaca huöácaru' tsahui'. <sup>22</sup> Dios caz runë' ga huöácaru' tsahui' tu' réajlë'ëru' Jesucristo, ate' gunë' ga ulu'huöáca tsahui' yúgu'të nupa ila'yéajlé' Lë'. Tuz ca nácagaca yúgu'të bönnachi <sup>23</sup> tu' núnagaquie' yúgu'të dul-la', en biti' ca' nácagaquie' tsahui' ca na' náquië' Dios idú tsahui'. <sup>24</sup> Dios ruzá' ládxë'ë queéru', en nunsë' rë'u tsahui' tu' böá'uë' Jesucristo rë'u. <sup>25</sup> Dios budödë' Jesucristo uláz queéru'. Lë' bulaljë' xichönë', le rigúa dul-la', lë na' uzí'iru' xibé channö uyéajlé'ëru' Lë'. Caní benë' Dios para gaca bë' náquië' tsahui' Lë' sal-la' lu yöl-la' riböza zxön ladxi' queë' budödisë' cá'asö yugu' dul-la' benru' dza ni'te. <sup>26</sup> Caní benë' Dios, bulu'i cuinë' tsahui' dza ni zóaru' na'a, ate' rugá'anë' tsahui' sal-la' rugüë' dul-la' nabága'gaca bönnachi, runë' ga tu'huöáca tsahui' nupa ta'yéajlé' Cristo.

<sup>27</sup> ¿Naru' huácatsö gun ba zxön cuinru' ca naca queéru'? ¡Biti' ca' gácaru'! ¿Bizx que na'? Naca tu' nuláru', calëga tu' runru' ca rinná bë' xibá queë' Dios, pero tu' réajlë'ësiru' Jesucristo. <sup>28</sup> Na'a, rusáca'ru' queéru' nuhuöáquië' tsahui' tu bönni' tu' réajlë'ë' Jesucristo, en calëga tu' runë' ca rinná bë' xibá queë' Dios.

<sup>29</sup> Ca naca Dios, ¿náquië' Dios quégacasö bönnachi judío? ¿Naru' cabí náquië' ca' Dios quégaca bönnachi izá'a? Ön, náquië' ca' Dios quégaca bönnachi izá'a na' <sup>30</sup> tu' zoa Tuz Nu naca Dios. Dios ni gunë' ga ulu'huöáquië' tsahui' yugu' bönni' judío tu' ta'yéajlé'ë Jesucristo, yugu' bönni' na' narugu lu xipéla'gaquië' lë na' naca bë' nu nequi queë' Dios, en lësca' caní gunë' ga ulu'huöáquië' tsahui' yugu' bönni' zi'tu' tu' ta'yéajlé'ë Jesucristo, en biti' narugu lu xipéla'gaquië' lë na' naca bë'. <sup>31</sup> Na'a, channö nuláru' tu' réajlë'ësiru' Jesucristo, ¿ba nagá'ana cá'asö xibá queë' Dios? ¡Biti' ca' naca ca', pero nagá'anarö tsutsu xibá queë' na'!

## 4

*Le benë' Abraham rusedi rë'u*

<sup>1</sup> ¿Bizxi caz innaru' na'a? ¿Bizxi bidéli'në' Abraham, xuz xtó'otu' netu', nácatu' judío? <sup>2</sup> La'tu' böáquië' tsahui' Abraham tu' zoa le ben cazë' lë', gunna gun ba zxön cuinë', pero calëga lahuë' Dios. <sup>3</sup> Ca naca lë ni nazúaj lu guichi lá'ayi, le rnna: "Abraham guyéajlé'ë Dios, ate' que lë ni na' Dios benë' ga böáquië' tsahui' lahuë' Lë'." <sup>4</sup> Channö zoa nu bönni' runë' xichinru', le riguízxjaro'-në' biti' naca tu le ruzá' ládxí'ru' queë', pero naca tu le ral-la'ru' queë' bönni' na'. <sup>5</sup> Lësca' caní channö tu bönni' réajlë'ë' Dios, sal-la' biti' bi dxin benë' bönni' na', Dios, Nu run ga ulu'huöáca tsahui' bönnachi biti' nácagaca tsahui', rnnë' náquië' tsahui' lahuë' Lë' bönni' na', tu' réajlë'ë' Lë'. <sup>6</sup> Lësca' caní bë'ë didza' David ca náquië' bica' ba bönni', Dios rnnë' náquië' tsahui' sal-la' biti' bi dxin nunë' bönni' na'.

<sup>7</sup> Caní gunné' David:

¡Bica' ba bönni' na' Dios runiti lahuë' le biti' naca tsahui' nunë',  
en rugüë' yugu' dul-la' nabáguë'ë!

<sup>8</sup> ¡Bica' ba bönni' na', Dios biti' rusubágue'ë lë' xíguia' tu' nözi dul-la' benë' bönni' na'!

<sup>9</sup> ¿Naru' nácagacsë' bica' ba bönni' narugu lu xipéla'gaquië' lë na' naca bë', o nácagaca ca' caní nupa na' cabí narugu lë na' lu xipéla'gaquië'? Chigunná cázaru' böáquië' Abraham tsahui' lahuë' Dios tu' guyéajlé'ë' Lë'. <sup>10</sup> ¿Bátaxi böáquië' tsahui' caní Abraham? ¿Naru' guca cate' ni' chinarugu lu xipélë'ë lë na' naca bë', o guca zi'alö? Biti' guca cate' chinarugu lu xipélë'ë, pero zi'alö guca. <sup>11</sup> Abraham guyéajlé'ë' Dios cate' ni' biti' narúguni lu xipélë'ë lë na' naca bë'. Gudödi na' gurugu lu xipélë'ë lë na' naca bë', le rulu'isö chinuhuöáquië' tsahui' lahuë' Dios. Guca caní para gáquië' Abraham ca xúzgaquie' yugu' bönni' ila'yéajlé'ë' Dios sal-la' biti' narugu lu xipéla'gaquië' lë na' naca bë'. Tu' ta'yéajlé'ë' Dios, huáca inné' Dios nácagaquie' tsahui' lahuë' Lë'. <sup>12</sup> Náquië' Abraham xuz

xtó'ogaquië' yugu' bönni' judío ta'yéajlë'ë Dios. Calégasö náquië' xúzgaquië' bönni' na' narugu lu xipéla'gaquië' lë na' naca bë', pero lësca' náquië' xúzgaquië' bönni' na' tunë' ca benë' Abraham, ta'yéajlë'ë Dios ca na' benë' Abraham cate' ni' biti' narúguni lu xipélë'ë lë na'.

*Le guzxí' lu né'ë Dios gata' queéru' tu' réajlë'ëru' Lë'*

<sup>13</sup> Guzxí' lu né'ë Dios bi unödzjë' queë' Abraham, en quégaca zxí'ini xi'soë', gata' quégagaquië' la' yödzölió nisö. Gaca caní, caléga tu' tunë' ca rinná bë' xibá queë' Dios, pero tu' nuhuöácagaquië' tsahui' lahuë' Lë' tu' ta'yéajlë'ë Lë'. <sup>14</sup> La'tu' gata' yödzölió ni quégacasö nupa tun ca rinná bë' xibá queë' Dios, biti' gun bayudxi nu tséajlë' Lë', ate' nítisö gaca le guzxí' lu né'ë Dios. <sup>15</sup> Rulu'i xibá queë' Dios rë'u nabága'ru' xíguia', le run ga ichúguië' Dios queéru' gátiru'. Ga ni' biti' ridxini xibá queë' na', biti' gaca ila'dá'baga' bönachi le rinná bë' xibá na'.

<sup>16</sup> Que lë ni na' uzi'iru' xibé le guzxí' lu né'ë Dios tu' réajlë'ëru' Lë', para gaca bë' naca tu le ruzá' ládxë'ë queéru'. Caní naca, para gaca bë'da' gata' quéguequi yúgu'të zxí'ini xi'soë' Abraham lë na' guzxí' lu né'ë Dios, calégasö quégagaquië' bönni' na' dë lu ná'agaquië' xibá queë' Dios, pero lësca' quégaca nupa ta'yéajlë' Dios ca na' guyéajlë'ë Abraham Dios. Abraham na' náquië' ca xuz xtó'oru' yúgu'tëru' rë'u, réajlë'ëru'-në' Dios. <sup>17</sup> Caní náquië' ca na' nazúaj lu guichi lá'ayi, le rnna: "Nuzoa' li' ca xúzgaca bönachi idútë yödzölió."

Caní naca, lahuë' Dios, Nu na' guyéajlë'ë Abraham, náquië' xuz gudödi queéru' yúgu'tëru'. Dios ni rusubanë' nupa chinátigaca, en ru'ë didza' que nu biti' zuíni tsca chizóa caz nu na' biti' zuíni.

<sup>18</sup> Caní naca tu' gudxë' Dios Abraham na': "Ziántérö ila'cuá' zxí'ini xi'sú'." Abraham guyéajlë'ë Dios, en benë' löza lë na' guzxí' lu né'ë Dios, sal-la' biti' guca ilé'enë' lë na' runë' löza, ate' caní guca, bidéli'në' náquië' xúzgaca bönachi idútë yödzölió. <sup>19</sup> Biti' guca Abraham chopá ládxë'ë ca na' réajlë'ë Dios, sal-la' chiyu'ë ca tu gayuá' iz, en yöjenenë' ca naca que le naca cazë', chinati caz tu' chinagúladë'ë, enca' ca naca queénu Sara queë', nácanu nigula huödx. <sup>20</sup> Biti' guca chopá ládxë'ë, en biti' gúquië' tu' caréajlë' ca naca le guzxí' lu né'ë Dios gunë' queë', pero bidipa ládxë'ë tu' guyéajlë'ë Dios, ate' gulu'ë Dios yöl-la' ba. <sup>21</sup> Idú ládxë'ë benë' löza Dios, napë' yöl-la' huáca gunë' idútë lë na' guzxí' lu né'ë. <sup>22</sup> Que lë ni na', tu' guyéajlë'ë Abraham Dios, Dios buzóë' queë' náquië' tsahui'.

<sup>23</sup> Nazúaj lu guichi lá'ayi le rnna: "Dios buzóë' queë' náquië' tsahui'." Nazúaj lu guichi caní, calégasö para uzi'ë xibé Abraham, <sup>24</sup> pero para uzi'iru' xibé ca' rë'u. Rë'u ni, Dios gunë' ga huöácaru' tsahui' lahuë' Lë' channö uyéajlë'ëru' Lë', busubanë' Xanru' Jesús lu yöl-la' guti. <sup>25</sup> Jesús na', Dios budödë' Lë' para gútië' tu' nözi dul-la' nabága'ru', ate' busubanë' Lë' lu yöl-la' guti, para gaca gunë' ga huöácaru' tsahui' lahuë' Lë'.

## 5

*Le rata' queéru' tu' rnnë' Dios nuhuöácaru' tsahui'*

<sup>1</sup> Na'a, rnnë' Dios nuhuöácaru' tsahui' lahuë' Lë' ni'a que le benë' Xanru' Jesucristo, channö réajlë'ëru' Lë', ate' que lë ni na' nuhuöácaru' tuz len Lë'. <sup>2</sup> Tu' réajlë'ëru' Jesucristo, ruzí'iru' xibé le ruzá' ládxë'ë Dios queéru', le rutipa láxi'ru'. Rudzéjaru' tu' runru' löza uzi'iru' ca' xibé yöl-la' zxön queë' Dios. <sup>3</sup> Calégasö caní rudzéjaru', pero rudzéjaru' ca' cate' rigui'i rizáca'ru', tu' chinóziru' le rigui'i rizáca'ru' rusedi rë'u cózaru' zxön ladxi'. <sup>4</sup> Cate' ribózaru' zxön ladxi' rurúajru' tsahui' lahuë' Dios, en cate' chinurúajru' tsahui' runru' löza Lë' gácalen cazë' rë'u. <sup>5</sup> Cate' runru' löza Lë', biti' ca' raca chopá láxi'ru'. Caní naca, tu' nuhuölaj nudzé'e icja láxi'do'oru' yöl-la' nadxi'i queë' Dios rë'u. Runë' Dios Bö' Lá'ayi, Bönni' gusól-lë'ë Dios queéru' ga raca caní.

<sup>6</sup> Cate' ni' biti' ca' guca uláru' rácasö queéru', cate' gúla'rö dza queë', Cristo gútië' uláz queéru', ni' nácaru' bönachi dul-la'. <sup>7</sup> Cuntu nu gué'ëni gati uláz queë' tu bönni'

tsahui'. Nadxi ca' nu urugui gati uláz queë' tu bönni' náquië' idú dxi'a. <sup>8</sup> Dios rulu'i inë' rë'u ca nadxi'ide'enë' rë'u, tu' gútië' Cristo uláz queëru' cate' ni' nácaru' bönni' dul-la'. <sup>9</sup> Chinuhuöácaru' tsahui' lahuë' Dios tu' bulalje' Cristo xichönë', gútië' uláz queëru'. Que lë ni na' chinácada' löza usölé' Lë' rë'u lu dza ichúguië' Dios quégaca bönachi dul-la' gátigaca. <sup>10</sup> Cate' ni' biti' rilé'eru'-në' Dios dxi'a, gútië' Zxí'inë' Dios uláz queëru' para huöácaru' tuz len Lë'. Na'a, tu' zoë' nabanë', en chinuhuöácaru' tuz len Lë', chinácada' löza uláru'. <sup>11</sup> Rudzéjaru' lahuë' Dios ni'a que le benë' Xanru' Jesucristo, tu' nuhuöácaru' tuz len Dios ni'a que lë na' benë' Lë'.

*Le benë' Adán, en le benë' Cristo*

<sup>12</sup> Guyú'u dul-la' yödzölió ni tu' nözi le benë' tuzë' bönni', ate' tu' benë' dul-la', guyú'u ca' yöl-la' guti. Que lë ni na' ilátigaca yúgu'të bönachi tu' nabága'gaca yúgu'të bönachi dul-la'. <sup>13</sup> Zf'atélö ga bidxitë xibá queë' Dios, gulún bönachi yödzölió ni dul-la', pero biti' busubáguë'ë Dios bönachi na' xígua' ca nupa ta'dá'baga' xibá queë' tu' nözi dul-la' na', tu' biti' ridxini xibá queë' quégäquïë'. <sup>14</sup> Ga gudela' zoë' Adán ga bidxitë zoë' Moisés gulati yúgu'të bönachi tu' gula'baga' dul-la', sal-la' biti' gula'dá'baga' tu le gunná bë'ë Dios ca benë' Adán. Nácagaca yúgu'të bönachi tuz len Adán tu' nácagaca zxí'ini xi'sóë'. Lë ni rulu'i rë'u ca ilaca tuz len Cristo yúgu'të nupa ila'yéajlé' Lë'.

<sup>15</sup> Le rúnnasë' queëru' Dios biti' naca ca le guca queëru' tu' nözi dul-la' benë' Adán. Tu' nözi dul-la' benë' tuzë' bönni', ilátigaca yúgu'të bönachi. Dxí'atérö naca le ruzá' ládxë'ë queëru' Dios, en le rúnnasë' queëru'. Ruzá' ládxë'ë queëru' lë ni ni'a que le benë' yetuzë' Bönni', Jesucristo. <sup>16</sup> Le rúnnasë' Dios queëru' biti' naca ca le guca queëru' tu' nözi dul-la' na' benë' tuzë' bönni' na'. Le guchúguië' Dios queë' Adán gátië' tu' nözi dul-la' na' benë', guchúguië' ca' Dios quégaca yúgu'të bönachi gátigaca. Le rúnnasë' Dios queëru' naca para huöácaru' tsahui' lahuë' Lë' sal-la' nabága'ru' dul-la' zián. <sup>17</sup> Guyú'u yöl-la' guti tu' nözi dul-la' benë' tuzë' bönni'. Nácatérö löza ila'deli' yöl-la' na'bán nupa ulu'huöáca tsahui' lahuë' Dios tu' zoa le ruzá' ládxë'ë queëru' Dios ni'a que le benë' yetuzë' Bönni', Jesucristo.

<sup>18</sup> Dios guchúguië' quégaca yúgu'të bönachi ilátigaca tu' nözi dul-la' benë' tuzë' bönni' na'. Lësca' caní gaca ulu'huöáca tsahui' yúgu'të bönachi ni'a que le naca tsahui' benë' yetuzë' Bönni' na', gata' yöl-la' na'bán idú quégäquïë'. <sup>19</sup> Bulu'huöáca huen dul-la' bönachi zián tu' cabí benë' tuzë' bönni' ca rnna xtídzë'ë Dios. Lësca' caní ulu'huöáca tsahui' bönachi tu' benë' yetuzë' Bönni' na' ca rnna xtídzë'ë Dios.

<sup>20</sup> Guyú'u xibá queë' Dios yödzölió ni para gaca bë'da' nabága'gaca bönachi dul-la'. Tu' guca bë'rö nabága'gaca dul-la', guca bë'rö ca' zxöntérö naca le buzá' ládxë'ë Dios quégaca bönachi. <sup>21</sup> Guta' yöl-la' huáca unná bë' que dul-la' guti rë'u. Lësca' caní le ruzá' ládxë'ë Dios queëru' napa yöl-la' huáca gun ga huöácaru' tsahui' lahuë' Lë', ate' gata' yöl-la' na'bán idú queëru' ni'a que le benë' Xanru' Jesucristo.

6

*Naca tsca chinátiru' para cabirö gunru' dul-la' tu' nabániru'-në' Jesucristo*

<sup>1</sup> ¿Bizzxi caz innaru' na'a? ¿Naru' gúntsaru' dul-la' para gáta'rö queëru' le ruzá' ládxë'ë Dios queëru'? <sup>2</sup> ¡Biti' gun cázaru' ca! Naca queëru' ca tsaz chinati cázaru' para cabirö gunru' dul-la'. ¿Naru' gúntica'siru' dul-la'? <sup>3</sup> ¿Naru' cabí nözili' ca na' naca queëru'? Channö bidílaru' nisa para huöácaru' tuz len Cristo, lë na' bidílaru' nisa rulu'i rë'u chigudödiru' lu yöl-la' guti tsözxón len Lë'. <sup>4</sup> Ca na' guca, gútilenru'-në' Cristo tsözxón, lësca' caní bigáchi'lenru'-në' tsözxón niu' yeru ba cate' ni' bidílaru' nisa. Ca na' busubanë' Dios Cristo lu yöl-la' guti len yöl-la' huáca zxön queë', lës caní ca' rë'u nubánlenru'-në' Jesús tsözxón para gácaru' bönachi idútë cubi queë'.

<sup>5</sup> Channö nunru' Cristo tsözxőn, gútiru' ca na' gútië' Lë', lësca' caní gunru'-në' tsözxőn, ubanru' lu yöl-la' guti ca na' bubanë' Lë'. <sup>6</sup> Chinöz quéziru' lë ni, yöl-la' böñachi queéru' le guzóa zí'alö gudá'len Lë' tsözxőn lë'e yaga cruz, para initi yöl-la' böñachi queéru' na' bénlenru' le dul-la', para cabirö inná be'e le naca dul-la' rë'u. <sup>7</sup> Channö nácaru' tuz len Nu na' guti tu' nözi dul-la', nuhuöácaru' tsahui' lahuë' Dios tu' cabirö nabága'ru' dul-la' na', ate' bíti'rö yú'uru' lu na' dul-la'. <sup>8</sup> Na'a, channö nátilenru'-në' Cristo tsözxőn, réajlé'ëru' ubánlenru'-në' ca' tsözxőn, <sup>9</sup> tu' chinöziru' bubanë' Cristo lu yöl-la' guti, en bíti'rö gátië'. Que lë ni na' bíti'rö bi gaca gun yöl-la' guti na' queé' Lë'. <sup>10</sup> Ca na' guca, gútië' Lë', tu luzuísö gútië' tu' nözi dul-la' quégaca yúgu'të böñachi, pero ca na' naca, zoë' nabanë', nabánlenë' Dios. <sup>11</sup> Lësca' caní ral-la' usáca'li' queéli' naca queéli' ca chinati cázali' para cabirö gunli' dul-la', pero zóali' nabanli' para gunli' ca rnna xtídzë'ë Dios tu' nácali' tuz len Xanru' Jesucristo.

<sup>12</sup> Que lë ni na', biti' güi'ili' lataj le naca dul-la', para cabí gun ga gunli' dul-la' lu le naca cázali' le gati caz. Biti' gunli' ca naca le rizé ládx'i'li' le ruá' dö', lu le naca cázali'. <sup>13</sup> Biti' udödi cuinli' lu dul-la', biti' gunli' le ruá' dö', pero gulidödi cuinli' lu në'ë Dios tu' nubanli' lu yöl-la' guti, en gulidödi lu në'ë idútë le naca cázali' para ugúnlenë' le le naca dxi'a. <sup>14</sup> Biti' güi'ili' lataj le naca dul-la', para cabí gun ga gunli' dul-la', tu' nuzóë' Dios libi'ili', calëga para inná be'e libi'ili' xibá queé', pero para inná be'e libi'ili' le ruzá' ládxë'ë queéru'.

### *Le rucudzu' didza' ca naca que nu bönni' nadó'o*

<sup>15</sup> ¿Bizxi caz innaru' na'a? ¿Naru' gúntsaru' dul-la' tu' cabirö rinná be'e xibá queé' Dios rë'u, pero rinná be'e le ruzá' ládxë'ë Dios rë'u? ¡Biti' ca' gunru' caní! <sup>16</sup> Chinöz quézili' dxi'a channö udödi cuinli' lu në'ë nu bönni' para gácali' bönni' nadó'ogaca queé', en gunli' ca rnna xtídzë'ë, tsaz nácali' bönni' nadó'ogaca queé' bönni' na' runli' ca rnna xtídzë'ë. Lësca' caní gaca channö udödi cuinli' para gunli' dul-la' le gun ga gátili', o channö udödi cuinli' para gunli' ca rnna xtídzë'ë Dios, Nu gun ga huöácali' tsahui'. <sup>17</sup> Na'a, ¡Xclenë' Dios! Sal-la' zí'alö gúcali' bönni' nadó'ogaca lu na' dul-la', na'a idú ládx'i'li' runli' ca rinná bë' xibá na' budödi cuinli' lu në'e. <sup>18</sup> Tu' chinulali' lu na' dul-la', nuhuöácali' ca yugu' bönni' nadó'ogaca lu na' le naca dxi'a. <sup>19</sup> (Rui'lena' libi'ili' didza' ca tu'i didza' böñachi, tu' cabí réajni'ili' idútë lu yöl-la' böñachi queéli'.) Zí'alö budödi cuinli' len idútë le naca cázali' lu na' le ruá' dö', en lu na' le cabí naca tsahui', ate' gúcali' ca yugu' bönni' nadó'ogaca lu në'eguequi, en benli' xichini le ruá' dö' na'. Na'a, gulidödi idútë le naca cázali' lu na' le naca tsahui', para gácali' ca yugu' bönni' nadó'ogaca lu në'e, en gunli' xichini lë na' naca tsahui' para gácali' böñachi narúajgaca quez queé' Dios.

<sup>20</sup> Cate' ni' nácali' ca yugu' bönni' nadó'ogaca lu na' dul-la', biti' benli' xichini le naca tsahui'. <sup>21</sup> Na'a, ¿naru' buz'itsali' xibé lë na' benli' zí'alö? Na'a lë na' benli' run ga rutu'ili', en run ga nu gati tsaz. <sup>22</sup> Na'a chinulali' lu na' dul-la', en nácali' ca yugu' bönni' nadó'ogaca queé' Dios, en ruzí'ili' xibé le run ga nácali' böñachi narúajgaca quez queé' Dios, en le run ga dë queéli' yöl-la' na'bán idú. <sup>23</sup> Lazxaj nu run dul-la' naca yöl-la' guti, pero le rúnnasë' Dios queéru' naca yöl-la' na'bán idú, le rata' queéru' tu' nácaru' tuz len Xanru' Jesucristo.

### *Le rucudzu' didza' yöl-la' nutsaga na'*

<sup>1</sup> Bócha'ado', núlböli' núnbe'ëli' xibá queé' Dios. Nöz quézili' rinná be'e xibá na' nu bönni' tsanni ni zoë' nabanë'. <sup>2</sup> Naca queéli' ca naca que tu nigula nutsaga ná'lennu-në' bönni', yú'unu lu në'ë bönni' queénu tsanni ni zoë' nabanë' ca rinná bë' xibá que yöl-la' nutsaga na', pero channö chinátië', nurúajnu lu na' xibá na'. <sup>3</sup> Caní naca, tsanni ni zoë' nabanë' bönni' queénu, channö utsaga ná'lennu-në' ia'túë' bönni', gunnu dul-la' le

riguitsaj xibá que yöl-la' nutsaga na', pero channö chinátië' bönni' queénu na', nurúajnu lu na' xibá na', ate' na'a, channö utsaga ná'lennu-në' nu bönni' yúbölö, biti' gunnu dul-la' le riguitsaj xibá que yöl-la' nutsaga na'.

<sup>4</sup> Lësca' caní raca queéli', bócha'a. Tu' dzágali'-në' Cristo chinati cázali' libíili' para cabirö inná be'e libíili' le rinná bë' xibá na', para guéquili' que Nu yúbölö. Na'a chinéquili' queé' Cristo, Nu na' bubán lu yöl-la' guti. Caní naca, para gaca gunru' le raza ládxë'ë Dios. <sup>5</sup> Tsanni ni' guyú'uru' lu na' yöl-la' böñachisö queéru', le rinná bë' xibá na' ben ga gulaca bë' le guzé ládxí'ru' le ruá' dö', le gulún dxin lu idútë le naca cázaru' para ilún ga gátiru'. <sup>6</sup> Na'a nuláru' lu na' xibá na' tu' nati cázaru' tsca naca le rinná bë' xibá na' gunná be'e rë'u zí'alö. Caní naca para gaca gunru' xichinë' Dios lu yöl-la' na'bán cubi le runnë' queéru' Dios Bö' Lá'ayi, en caléga gunru' xichinë' lu lë na' chinaca gula, le naca xibá na'.

### *Le dzaga neda' le naca dul-la'*

<sup>7</sup> ¿Bizxi caz innaru' na'a? ¿Naru' runtsö xibá queé' Dios ga runa' dul-la'? ¡Biti' ca' run caní! La'tu' cabí buzéajni'i le rinná bë' xibá na' neda', biti' gunözda' naca dul-la' le runa'. La'tu' cabí zoa lu xibá na' le rnna: "Biti' së ládxu'u le dë que luzó'o", biti' gunözda' naca dul-la' yöl-la' rizé ladxi' le dë que luzá'a. <sup>8</sup> Cate' bidxín quia' xibá na', guca bë' le naca dul-la' na' run dxin lu idútë le naca', ate' ben ga gúquibe'eda' rizé ládx'a yúgu'të le ruá' dö'. Ga biti' ridxini xibá na', biti' naca bë' le naca dul-la'. <sup>9</sup> Dza ni'te, zí'atélö ga bidxín quia' xibá queé' Dios, ni' gúquida' zoa' nabana', pero cate' bidxín quia' xibá na', gúquibe'eda' nabága'a dul-la', en chinati caza'. <sup>10</sup> Dios gunná bë'ë xibá na' para gun ga gata' queéru' yöl-la' na'bán, pero ben ga gúquibe'eda' chinati caza'. <sup>11</sup> Guca bë' nazi' yé'eda' ca naca dul-la', tu' ben xibá na' ga gúquibe'eda' nabága'a dul-la', en ral-la' gátia'.

<sup>12</sup> Que lë ni na', lá'ayi naca xibá queé' Dios, ate' lá'ayi, en tsahui', en dxí'a naca le gunná bë'ë. <sup>13</sup> ¿Naru' bentsö lë na' naca dxí'a ga bidxín quia' yöl-la' guti? ¡Biti' ca' naca ca'! Le naca dul-la' bugún dxin lë na' naca dxí'a, en ben ga gúquibe'eda' chinati caza' para gaca bë' naca dul-la' le runa'. Caní guca, para gaca bë' ni'a que xibá na' nácatérö xihui' yúgu'të le naca dul-la'.

<sup>14</sup> Nöziru' Dios Bö' Lá'ayi bennë' queéru' xibá na', pero neda' naca' böñachisö, en yu'a lu na' dul-la' ca tu bönni' nadó'o que. <sup>15</sup> Na'a, biti' réajni'ida' le runa'. Ré'ënda' guna' ca rinná bë' xibá na', pero biti' runa' lë na' rë'ënda' guna'. Le naca dul-la' le cabí rile'eda' dxí'a, lë na' runa'. <sup>16</sup> Runa' dul-la' sal-la' biti' ré'ënda' guna' dul-la' na'. Xibá na' rusëdi neda' naca dul-la' le cabí naca dxí'a. Que lë ni na' naca bë'da' naca dxí'a le rinná bë' xibá na'. <sup>17</sup> Caní naca, caléga néda'sö runa' dul-la' na', pero dul-la' na' dzaga neda' run ga runa' dul-la' na'. <sup>18</sup> Nözda' biti' zóalen neda' le naca dxí'a, o huáca innía', lë na' naca dxí'a biti' zóalen le naca yöl-la' böñachisö quia'. Ré'ënda' guna' le naca dxí'a, pero la' néda'sö biti' gaca guna' lë na' naca dxí'a. <sup>19</sup> Biti' runa' le naca dxí'a le ré'ënda' guna', pero rúntica'sa' le biti' naca dxí'a le cabí ré'ënda' guna'. <sup>20</sup> Que lë ni na', channö runa' dul-la' na' biti' ré'ënda' guna', caléga neda' caz runa' le, pero dul-la' na' dzaga neda' run ga runa' dul-la' na'.

<sup>21</sup> Caní naca le raca queéru' yúgu'tëru'. Cate' rë'ëniru' gunru' le naca dxí'a, dzaga rë'u le run ga runru' le ruá' dö'. <sup>22</sup> Lu icja ládxí'da'ahua' raza ládx'a xibá queé' Dios <sup>23</sup> pero riquibe'eda' dzaga idútë le naca' le rinná bë'e neda', ate' lë ni ridá'baga' xibá queé' Dios yu'u icja ládxí'da'ahua'. Lë na' dzaga idútë le naca' run ga runa' dul-la'.

<sup>24</sup> ¡Bica' bayechi' neda'! ¿Nuzxi caz gaca usólá neda' lu yöl-la' böñachisö quia' le run ga runa' dul-la'? <sup>25</sup> ¡Xclenë' Dios, chinularu' na'a ni'a que le benë' Xanru' Jesucristo! Que lë ni na', tsca naca le yu'u icja ládxí'da'ahua' runa' ca rinná bë' xibá queé' Dios, sal-la' yöl-la' böñachisö quia' run ga rë'ënda' guna' dul-la'.

*Le runru' tu' zóalenë' Dios Bö' Lá'ayi rë'u*

<sup>1</sup> Que lë ni na', bítirö bi xíguia' nabága'gaquië' yugu' bönni' néquiguequinë' queë' Jesucristo, bönni' na' bítirö tunë' ca ré'ëni yöl-la' bönáchisö quégaquië', pero ca ré'ëni' Dios Bö' Lá'ayi tunë'. <sup>2</sup> Tu' naca' tuz len Jesucristo, Dios Bö' Lá'ayi, Nu na' nabániru', rácalenë' neda'. Que lë ni na', nulá' lu lë na' ben ga bena' dul-la', enca' lu yöl-la' guti. <sup>3</sup> Chinunë' Dios le cabí guca gun xibá na', tu' cabí bi guzxéqui' gun tu' nácaru' bönáchisö. Dios gusól-lë'ë Zxí'ini cazë', ate' guljé' bönachi ca nácaru' rë'u, nácaru' bönachi dul-la', pero biti' bi dul-la' bené' Lë'. Busubaga' cuinë' dul-la' nabága'ru' rë'u, ate' caní guca, guchúguië' que dul-la' runru' lu yöl-la' bönáchisö queëru'. <sup>4</sup> Caní bené' para gaca gunru' idútë le naca tsahui' le rinná bë' xibá queë', nülöru' na' bítirö runru' ca ré'ëni yöl-la' bönáchisö queëru', pero ca ré'ëni' Dios Bö' Lá'ayi runru'.

<sup>5</sup> Bönni' tunë' ca ré'ëni yöl-la' bönáchisö quégaquië', tu'i ládxi'gaquië' le naca que yöl-la' bönáchisö quégaquië', pero bönni' tunë' ca ré'ëni' Dios Bö' Lá'ayi, tu'i ládxi'gaquië' le naca queë' Dios Bö' Lá'ayi. <sup>6</sup> Channö ruí'i ládxi'siru' le naca que yöl-la' bönáchisö queëru', tsaz gátiru', pero channö ruí'i ládxi'ru' le naca queë' Dios Bö' Lá'ayi, chidé yöl-la' na'bán idú queëru', en ribózaru' dxi ladxi'. <sup>7</sup> Núti'tës nu ruí'i ládxi'sö le naca que yöl-la' bönáchisö que, biti' rilé'e Dios dxi'a, tu' cabí run nu na' ca rinná bë' xibá queë' Dios, en biti' ca' gaca gun caní. <sup>8</sup> Que lë ni na', bönni' na' tunë' ca ré'ëni yöl-la' bönáchisö quégaquië' biti' gaca ilunë' le raza ládxë'ë Dios.

<sup>9</sup> Na'a, bítirö runli' ca ré'ëni yöl-la' bönáchisö queëli', pero runli' ca ré'ëni' Dios Bö' Lá'ayi tu' zóalen cazë' Lë' libí'ili'. Tu bönni' biti' zóalenë' Dios Bö' Lá'ayi lë', Nu na' risól-lë'ë Cristo queëru', biti' néquinë' queë' Cristo. <sup>10</sup> Tu' zóalenë' Cristo libí'ili', chinati caz idútë le guca cázali' tu' nözi dul-la', ate' na'a nabánili'-në' Dios Bö' Lá'ayi tu' nunë' Dios libí'ili' tsahui'. <sup>11</sup> Bö' Lá'ayi queë' Dios, Nu na' busubán Jesús lu yöl-la' guti, zóalenë' libí'ili'. Lë cazë' Dios, Nu busubán Jesucristo lu yöl-la' guti, runë' ga nubanli' lu idútë le gúcali' le rati caz. Caní nunë' tu' zóalenë' Dios Bö' Lá'ayi libí'ili'.

<sup>12</sup> Que lë ni na', libí'ili' bócha'a, dë tu le ral-la'ru', pero caléga que yöl-la' bönáchisö queëru', para cabirö gunru' ca ré'ëni yöl-la' bönáchisö queëru' na'. <sup>13</sup> Channö runli' ca ré'ëni yöl-la' bönáchisö queëli', gátili' tsaz, pero channö len yöl-la' huáca queë' Dios Bö' Lá'ayi runli' ga ila'niti le runli' lu yöl-la' bönáchisö queëli', gata' yöl-la' na'bán idú queëli'.

<sup>14</sup> Yúgu'të nupa tun ca ré'ëni' Dios Bö' Lá'ayi nácagaca zxí'inë' Dios. <sup>15</sup> Dios Bö' Lá'ayi na' zóalenë' libí'ili' biti' nuzóe' libí'ili' leyúbölö ca bönni' nadó'ogaca para gadxi idzóbili', pero chinunë' ga nácali' zxí'inë' Dios caz, en runë' ca' ga rulídzaru'-në' Dios, rnñaru': "Abba", le rnna: Dad. <sup>16</sup> Lë cazë' Dios Bö' Lá'ayi ruzéajni'inë' bö' naca cázaru', en runë' ga nöziru' nácaru' zxí'inë' Dios. <sup>17</sup> Channö chinácaru' zxí'inë' Dios, gata' ca' queëru' tsözxón len Cristo le nequi queë' Xúziru' Dios. Caní gaca queëru' channö rigu'i rizáca'lenu'-në' tsözxón Cristo para uzi'iru' xibé tsözxón len Cristo yöl-la' zxón queë' Dios.

<sup>18</sup> Runi neda', yugu' lë ni rigu'i rizáca'ru' na'a naca tu le cuídi'do'os tsca naca yöl-la' zxón na' gata' queëru' dza si' za'. <sup>19</sup> Ta'böza yúgu'të le nunë' Dios, en ta'zé ládxi'gaca idxintë dza na' ulu'ë lahui Dios yugu' bönni' nácagacië' zxí'ini cazë'. <sup>20</sup> Yúgu'të lë na' nunë' Dios gula'dödi lu na' le run ga ila'niti, caléga tu' gulé'ëni caz gaca caní, pero tu' bené' Dios ga naca caní. Bené' ca' ga naca löza que idútë lë na' nunë', <sup>21</sup> ate' ulu'lágaca yúgu'të le nunë' Dios lu lë na' run ga ila'niti. Caní gaca, yúgu'të lë na' ulu'zí' ca' xibé yöl-la' rusól le nazáca'da' na' ulu'zí'ë xibé yugu' zxí'inë' Dios. <sup>22</sup> Nöziru' ta'gu'i ta'zaca' yúgu'të le nunë' Dios ga ridxitë na'a dza, ca na' rigu'i rizáca'nu tu nigula chizóa sóabi' bñido' queënu'. <sup>23</sup> Rigu'i rizáca'a, calégasö yödzölió ni, pero rigu'i rizáca'ru' ca' rë'u, sal-la' zóalenë' Dios Bö' Lá'ayi rë'u, Nu na' naca queëru' le rulu'i rë'u ca ral-la' gaca cázaru'.

Rigu'i rizáca'ru' tsanni ni ribózaru' dza ni' ulu'ë lahui Dios nácaru' idú zxí'inë', dza ni' únë' ca' idútë le naca cázaru'. <sup>24</sup> Tu' runru' löza lë ni, nuláru' rë'u, pero channö gaca ilé'eru' lë na' runru' löza, biti' naca tu le ribózaru'. Biti' ribózaru' le chirile'eru'. <sup>25</sup> Na'a, channö runru' löza tu le cabí gaca ilé'eru', lu yöl-la' riböza zxön ladxi' ribózaru' le.

<sup>26</sup> Lësca' caní rácalenë' Dios Bö' Lá'ayi rë'u cate' rudú ládxí'ru', tu' cabí nòziru' bi ral-la' inábiru'-në' Dios, pero Lë cazë' Dios Bö' Lá'ayi rudödë' xtídza'ru' lahuë' Dios, ate' lu yöl-la' rinaba yudxi queë' rinnëda' ládxë'ë, tscá cabí gaca nu inná. <sup>27</sup> Dios ruyüë' le yu'u icja ládxí' do'gaca bönachi, en nòzinë' le ré'ënë' innë' Dios Bö' Lá'ayi na', ate' Lë', ca ré'ëni quézinë' Dios, rudödë' xtídza' gaca nupa néquigüequi queë' Cristo lahuë' Dios.

#### *Nadéli'téröru' tu' zóalenë' Cristo rë'u*

<sup>28</sup> Nòziru' tu'zi'ë xibé bönni' yúgu'të le raca quégäquië', bönni' na' nadxí'iguequinë' Dios, ate' bulidzë' Dios légaquië' ca nuzoa cazë' gunë'. <sup>29</sup> Yugu' bönni' na' gurö' cazë' queë' Dios zí'atëlö, buzóë' ca' quégäquië' zí'atëlö ilácagaquië' ca naca cazë' Zxí'inë', para gáquië' Zxí'inë' lo ladaj zián böchë'ë. <sup>30</sup> Nupa na' buzóë' Dios quégäquië' zí'atëlö ca ral-la' ilácagaquië', bulidzë' ca' légaquië', ate' yugu' bönni' na' bulidzë', benë' légaquië' tsahui', ate' yugu' bönni' na' benë' légaquië' tsahui', benë' ga tu'zi'ë ca' xibé yöl-la' zxön queë'.

<sup>31</sup> ¿Bizxi caz innaru' na'a ca nácagaca lë ni? Channö rácalenë' Dios rë'u, biti' ral-la' gádxiru' sal-la' bi ilún bönachi queëru'. <sup>32</sup> Dios, idú ládxë'ë bennë' queëru' Zxí'ini cazë'. Budödë' lë' para gútië' uláz queëru'. Channö caní benë' Dios, ¿naru' cabí gúnnadë'ë queëru' tsözxón len Zxí'inë' yúgu'të le dë? <sup>33</sup> ¿Nuzxi caz gaca bi usubaga' nupa na' gurö' cazë' queë' Dios? ¡Cuntu nu gaca, tu' run cazë' Dios ga nahuöácaru' tsahui'! <sup>34</sup> ¿Nuzxi caz gaca ichugu queëru' gátiru'? ¡Cuntu nu gaca, tu' guti cazë' Cristo uláz queëru', en le nácarö lo, bubanë' lu yöl-la' guti, ate' na'a zoë' cuita lë'ë ibëla Dios ga nácatëre' zxön, ate' rñne' dxí'a uláz queëru' lahuë' Dios! <sup>35</sup> Sal-la' bi raca queëru', nöz quéziru' nadxí'inë' Cristo rë'u. Nòziru' nadxí'inë' rë'u:  
sal-la' rigu'i rizáca'ru', o sal-la' risëbi ládxí'ru',  
o sal-la' ta'bía ládxí'gaca bönachi rë'u,  
o sal-la' ridunru', o sal-la' riyadzaj le gácuru',  
o sal-la' zoa bönadxi queëru', o sal-la' ilútië' bönni' rë'u.

<sup>36</sup> Ca nácagaca lë ni nazúaj lu guichi lá'ayi, rnna:  
Tu' néquitu' quiu' Li', túntica'sö bönachi ga gátitu'.  
Nácatu' ca yugu' bö'cu' zxila',  
nadödigacaba' lu na' nu guti légacaba'.

<sup>37</sup> Na'a, tu' zóalen rë'u Nu na' nadxí'i rë'u, nácatëro löza idéli'ru' lu le raca queëru'.

<sup>38-39</sup> Que lë ni na' runi neda':

Biti' bi sequi' gun ga bíti'rö idxí'inë' Dios rë'u.  
Nadxí'inë' rë'u tu' néquiru' queë' Xanru' Jesucristo.  
Biti' sequi' gun caní yöl-la' guti o yöl-la' na'bán,  
o yugu' gubáz lá'ayi o nupa ta'nná bë',  
o yugu' yöl-la' huáca que tu' xihui',  
o bíti'tës bi zoa o bíti'tës bi si' za',  
o tu le dë xitsá'alö o tu le dë cadxí'ilö,  
o bíti'tës bi nunë' Dios.

#### *Dios gurö' cazë' queë' bönachi Israel*

<sup>1</sup> Ruá'a didza' idútë li tu' néquida' queë' Cristo, ate' röjlöz didza' ni le naca queë' Dios Bö' Lá'ayi le yu'u icja ládxí'da'ahua'. ¡Biti' rizi' yë'! <sup>2</sup> Ruhu' inide'eda', en risébitica'sö ládxia'a <sup>3</sup> tu' raca ládxia'a guna' ga ulu'lé' böchi' luzá'a, bönni' uládz quia'. La'tu' huácalen légaquië', gué'ëni quézida' ubéaj ládxë'ë Dios neda', en ulá'alena' Cristo. <sup>4</sup> Yugu' bönni'

uládz quia' na' nácagaquië' zxí'ini xi'sóë' Israel, ate' Dios bë'ë légaquië' lataj ilácagaquië' zxí'ini cazë'. Yöl-la' zxön queë' Dios guzóalen légaquië', ate' Dios budödë' lu ná'agaquië' didza' rucá'ana tsahui', enca' xibá' queë'. Bulidzë' légaquië' para tseaj ládxí'gaquië' Lë', ate' budödë' lu ná'agaquië' yugu' le guzxi' lu në'ë gunë' le ilún tsahui' böñachi. <sup>5</sup> Nácagaquië' zxí'ini xi'sóagaquië' xuz xtó'otu' Abraham, en Isaac, en Jacob, ate' ladaj di'a dza quégaquië', ca naca yöl-la' böñachi queë', gulje' Cristo, Nu naca caz Dios, en rinná bé'enë' yúgu'të. ¡Rácatica'sö queë' yöl-la' ba! ¡Ca' gaca!

<sup>6</sup> Sal-la' yúgu'të bönni' uládz quia' biti' nazí' lu ná'agaquië' Cristo, biti' ral-la' innaru': Nítisö böáca xtídzë'ë Dios. Caléga yúgu'të zxí'ini xi'sóë' Israel nácagaquië' idú böñachi Israel, nupa néquiguequi queë' Dios. <sup>7</sup> Sal-la' gúljagaquië' zián zxí'ini xi'sóë' Abraham, biti' guláquië' yúgu'të' idú zxí'ini xi'sóë' Abraham, pero guca ca na' nazúaj lu guichi lá'ayi, le rnna: "Yugu' zxí'ini xi'sóë' Isaac ilaca idú zxí'ini xi'sú'." <sup>8</sup> Caní naca, nupa nácagaca zxí'inë' tu bönni' néquinë' queë' Dios, caléga yúgu'të' nácagaquië' zxí'inë' Dios. Lëscá' caní, nácagaca idú zxí'ini xi'sóë' Abraham núpasö na' náljagaca ni'a que lë na' guzxi' lu në'ë Dios. <sup>9</sup> Lë na' guzxi' lu në'ë Dios unödzjë' queë' Abraham rnna caní: "Ia'tú iz na'a dza huöda', ate' Sara quiu' uzóanu-bi' tubi' bi'i bönni'do'."

<sup>10</sup> Calégasö lë ni guca caní, pero lëscá' cate' Rebeca ni' nuá'anu-bi' yugu' bi'i bönni'do' queë' Isaac, xuz xtó'otu', <sup>11-13</sup> cate' ni' si' iláljabi', en biti' bi núnigacabi' le naca dxí'a o le ruá' dö', Dios gudxë'-nu Rebeca na', gunné': "Bi'i bönni' zí'alö quiu' gunbi' xichinbi' bi'i buropi." Didza' ni röjlöz lë na' nazúaj lu guichi ca gunné' Dios, le rnna: "Bidxí'ida'-në' Jacob, en caléga Esaú." Caní guca, bugá'ana tsutsu le buzóë' tsaz Dios ca naca lë na' chiguró' cazë'. Que lë ni na' biti' raca caní ni'a que tu le gaca ilún böñachi, pero naca caní tu' ribö' cazë' Dios nu rulidzë'.

<sup>14</sup> ¿Bizzi caz innaru' na'a? ¿Naru' runtsë' Dios le cabí naca tsahui'? ¡Biti' ca' runë' caní! <sup>15</sup> Dios gudxë' Moisés, gunné': "Huéchi' ládx'a' nu ré'ënda' huéchi' ládx'a', en gü'i ládx'a' nu ré'ënda' gü'i ládx'a'." <sup>16</sup> Que lë ni na', biti' raca caní ni'a que le té'ëni caz böñachi, o tu' runë' bayudxi nu bönni', pero naca tu' ré'ëni quézinë' Dios, ruhuéchi' ládxë'ë böñachi. <sup>17</sup> Ca naca lë ni nazúaj lu guichi lá'ayi ca na' Dios gudxë' Faraón, gunné': "Que lë ni na' buzó'a' li' ga rinná bë'u para ulu'a lahui yöl-la' huáca quia' ga zu', en guna' ga ilunbë' böñachi idútë yödzölió le naca' neda'." <sup>18</sup> Caní naca, Dios ruhuéchi' ládxë'ë nu ré'ëni quézinë', en lëscá' caní runë' zidzaj icja ládxí'da'ahuë' nu bönni' ré'ënë' gunë' zidzaj icja ládxí'da'ahuë' bönni' na', ca na' benë' queë' Faraón na'.

<sup>19</sup> Na'a guiéli' neda': "Channö caní naca, ¿bizx que rusubáguë'ë Dios böñachi xíguia'? ¿Nuzxi caz gaca tá'baga' le ré'ëni quézinë' Dios gunë'?" <sup>20</sup> ¡Biti' ca' naca caní! ¿Nuzxi caz li' rnní'o' que Dios? ¿Naru' huácatsö tu yusu' néquini yu guíë bönni' huen rö'ö, inná: "¿Bizx que benu' neda' caní?" <sup>21</sup> ¿Naru' cabí dë lu në'ë bönni' huen rö'ö gunë' que guna' na' tu yusu' nu ugún le dxin ga liná', en que la' guna' ná'asö gunë' ia'tú yusu' nu ugún le dxin ga biti' naca liná'?

<sup>22</sup> Ré'ëni quézinë' Dios ulu'ë lahui ca gunë' xíguia' nu ruá' dö' en gunë' ga gaca bë' yöl-la' huáca queë', pero lu yöl-la' riböza zxön ladxi' queë' biá' gulénë' yugu' bönni' ni' ral-la' ichúguië' quégaquië', yugu' bönni' na' nabága'gaquië' xíguia', en run bayudxi usunítië' légaquië'. <sup>23</sup> Caní runë' Dios para gaca bë' nácatérö lesaca' yöl-la' ruzá' ladxi' queë', lë na' rulu'ë lahui lögaca nupa na' ruhuéchi' ládxë'ë, bönni' na' buzóë' quégaquië' zí'atëlö ulu'zi'ë xibé yöl-la' zxön queë'. <sup>24</sup> Yugu' bönni' caní bulidzë' Dios. Calégasö bulidzë' netu', böñachi judío, pero lëscá' bulidzë' böñachi izá'a. <sup>25</sup> Ca naca lë ni nazúaj lu guichi lá'ayi ca na' bë'ë didza' Oseas uláz queë' Dios, gunné':

Nupa biti' nácagaca böñachi quia',  
gu'a láguequi: Bönachi quia',  
ate' nupa na' biti' bidxi'ida',  
gu'a láguequi: Nupa nadxi'ida'.

<sup>26</sup> La' ná'asö ga gunnía' quéguequi:  
"Biti' nácali' bönachi quia",  
si' láguequi: "Yugu' zxí'ini' Dios ban."

<sup>27</sup> Na'a, ca naca quégaca zxí'ini xi'sóë' Israel, Isaías gunné':  
Sal-la' ila'yanë' zxí'ini xi'sóë' Israel,  
en iláquié' tsca naca yuzxi tu ra' yegu zxön,  
ulu'lé' nabábasë'.

<sup>28</sup> Xanru' Dios la' guntë' ga gaca idútë  
lë na' ichúguié' quégaca bönachi yödzölió ni.

<sup>29</sup> Lësca' caní Isaías bë'ë didza' zí'atëlö, gunné':  
Dios, Xanru' unná bë' idú,  
la'tu' cabí bucá'anë' queérnu' yugu' zxí'ini xi'sóaru',  
ugá'anaru' ca yödzö Sodoma, en yödzö Gomorra,  
yugu' yödzö na' busunítië' Dios.

### Bönachi Israel, en didza' dxi'a

<sup>30</sup> ¿Bizxi caz innaru' na'a? Yugu' bönni' biti' nabábagaquié' Israel chibila'déli'në'  
nuhuöácagaquié' tsahui' lahuë' Dios, en biti' gulunë' bayudxi ulu'huöáquié' tsahui' lahuë'  
Dios, pero nuhuöácagaquié' tsahui' tu' ta'yéajlé'ë Dios. <sup>31</sup> Na'a, sal-la' gulunë' bayudxi  
yugu' bönni' Israel ilunë' ca rinná bë' xibá queë' Dios, le ral-la' gun ga ilácagaquié' tsahui',  
biti' bila'déli'në' le ral-la' gata' quégagaquié' tu' tunë' ca rinná bë' xibá na'. <sup>32</sup> ¿Bizx que na'  
guca caní? Caní guca, tu' cabí gulunë' caní lu yöl-la' réajlé' quégagaquié' Dios, pero rácasö  
quégagaquié' gulé'ënnë' ilunë' ca rinná bë' xibá na', ate' que lë ni na' gula'chíxinë', o huáca  
innaru': Yójchegu'gaquié' lu lë na' nazf'i le: Guiój Ga Nu Rójchegu'. <sup>33</sup> Ca naca lë ni nazúaaj  
lu guichi lá'ayi, rnna:  
¡Buli'yú! Uzóa'-në' yödzö Sión bönni' na'  
gáquié' ca tu guiój ga nu tsójchegu',  
guiój na' gun ga nu ichixi inigui.  
Nu tséajlé' Lë', biti' ca' utu'i nu na'.

## 10

<sup>1</sup> Libí'ili', bócha'ado', le rizé ládxa'a, en le rinábida'-në' Dios gunë' quégaca bönachi  
Israel naca gunë' ga ulu'lé'. <sup>2</sup> Runa'ba nalí quégagaquié', idú ládxi'gaquié' tu'i ládxi'gaquié'  
Dios, pero caléga len yöl-la' réajni'i idú. <sup>3</sup> Biti' nözguequinë' ca runë' Dios, runsë' ga  
nácaru' tsahui', pero té'ënnë' ilún cuíngagaquié' tsahui' rácasö quégagaquié', en biti' ta'cu'ë  
nökaj ladxi' lahuë' Dios para gaca gunë' légaquié' tsahui'. <sup>4</sup> Budxi benë' Cristo le ré'ëni  
gun xibá queë' Moisés, benë' ga gaca ulu'huöáca tsahui' yúgu'të nupa ila'yéajlé' Lë'.

<sup>5</sup> Ca naca que nu huöáca tsahui' tu' run ca rinná bë' xibá queë' Dios, buzúajé' Moisés  
lu guichi le rnna caní: "Bönni' na' gunë' idútë ca rinná bë' xibá na', soë' ibanë' tu' gunë'  
caní." <sup>6</sup> Na'a, ca naca que nu huöáca tsahui' tu' réajlé'ë Dios, rnna caní: "Biti' innó' lu icja  
ládxi'do'o, biti' innó': ¿Nuzxi caz cuen ni' yehua' yubá?" Lë ni naca, para gun nu na' ga  
huötje' Cristo, <sup>7</sup> en biti' innó': ¿Nuzxi caz huötaj ga dë lataj que nupa chinátigaca?" Lë  
ni naca, para gun nu na' ga cuenë' Cristo, urúajé' lu yöl-la' guti. <sup>8</sup> Na'a, ¿bizxi caz rnna?  
Caní rnna: "Gala' ga zu' zoa caz xtídzë'ë Dios. Lu ru'u, en lu icja ládxi'do'o zoa xtídzë'ë  
na'." Lë ni naca didza' que le réajlé'ëru' Dios runtu' libán que, rnnatu': <sup>9</sup> "Channö didza'  
gu'u gaca bë' Jesús náquié' Xanu', en uyéaj lë'u idú ládxi'u Dios busubanë' Lë' lu yöl-la'  
guti, uló' li'." <sup>10</sup> Lu icja ládxi'do'oru' réajlé'ëru' Jesús para gácaru' tsahui', ate' len didza'  
rui'iru', rului'iru' lahui le náquié' Jesucristo para uláru'.

<sup>11</sup> Nazúaaj lu guichi lá'ayi le rnna: "Biti' ca' ulu'tui' i yúgu'të nupa ta'yéajlé' Lë'." <sup>12</sup> Dios,  
la' tuz ca rui'í ládxë'ë yugu' bönni' judío, enca' yugu' bönni' idútë yödzölió, tu' Lë  
caze' Xanru' náquié' Xángagaquié' yúgu'të', en nápadé'ë bi unödzjé' quégaca yúgu'të nupa

tu'lidza Lë'. <sup>13</sup> Ca naca lë ni nazúaj lu guichi lá'ayi, rnna: "Ulu'lá yúgu'të nupa ulu'lidza Lë' Xanru'." <sup>14</sup> ¿Nacxi gaca ulu'lidzë' Lë' channö cabí ta'yéajlë'ë Lë'? ¿Nacxi gaca ila'yéajlë'ë Lë' channö catu caz bila'yönnë' ca naca queë'? ¿Nacxi gaca ila'yönnë' channö cuntu nu zoa nu gun libán lógaquië'? <sup>15</sup> ¿Nacxi caz gaca ilunë' libán channö cuntu nu isölla' lógaquië'? Ca naca lë ni nazúaj lu guichi, rnna: "Bica' bágaca nupa na' ila'dxinë' ga nacuá' bönni' rójéngäquië' libán que le ribequi dxi ládxiru', en tunë' libán que didza' dxi'a."

<sup>16</sup> Na'a, calëga yúgu'të' gula'zí' lu ná'agaquië' didza' dxi'a. Ca naca lë ni, Isaías gunné': "Xan, ¿nuzxi caz guyéajlë' le bentu' libán que?" <sup>17</sup> Caní naca, ila'yéajlë' Lë' nupa ila'yöni, ate' lë na' ral-la' ila'yöni naca didza' ru'ë Cristo.

<sup>18</sup> Na'a rnnía': ¿Naru' cabí bila'yönnë'? Le nácatë bila'yönnë', ca na' nazúaj lu guichi lá'ayi, le rnna:

Idútë yödzölió bila'yöni chí'iguequi.

Yúgu'të lataj bila'dxín xtídzaguequi.

<sup>19</sup> Lësca' rnnía': ¿Naru' cabí guléquibe'enë' bönni' Israel lë ni? Le nácatë guléquibe'enë' le. Ga risí lo, bë'ë didza' Moisés uláz queë' Dios, gunné':

Gun caza' ga uzxé'eli',

tu' idxí'ida' bönnachi biti' nabábagaca libí'ilí'.

Ni'a quégaca bönnachi cabí ta'yéajni'i guna' ga leli'.

<sup>20</sup> Gudödi ni' gúcadë'ë rugu ladxi' Isaías na', en bë'ë didza' uláz queë' Dios, gunné': Bila'dzöli neda' nupa biti' gula'guílaj neda'.

Bulu'i lahuá' lógaquië' bönni' biti' bi gula'nábinë' neda'.

<sup>21</sup> Na'a, ca naca quégäquië' bönni' Israel, Isaías na' bë'ë didza' uláz queë' Dios, gunné': "Idú dza bulí na'a, bulidza' bönnachi biti' túngaca ca rnna xtídz'a'a, en ta'dá'baga' neda'."

## 11

### *Nupa nulágaca ladaj bönnachi Israel*

<sup>1</sup> Na'a rnnía': ¿Naru' nusán në'ë Dios bönnachi Israel? ¡Biti' ca' naca caní! Neda' caz naca' bönni' Israel. Naca' zxí'ini xi'sóë' Abraham, en nababa' di'a dza queë' Benjamín, zxí'ini cazë' Israel na'. <sup>2</sup> Dios biti' nusán në'ë bönnachi queë', nupa na' guró cazë' queë' dza ni'te. ¿Naru' cabí núnbe'ëli' lë na' nazúaj lu guichi lá'ayi ca na' benë' Elías? Bulidzë' Dios, en buzéguië' bönnachi Israel didza', gunné': <sup>3</sup> "Xan, chigulútië' bönni' gulu'ë didza' uláz quiu', en bulu'quinnajë' yugu' bucugu lá'ayi quiu' ga buzéguigacatu'-ba' böa' bédxido' lo' Li'. Tuza' neda' nagá'ana' quiu', ate' té'ënnë' ilútië' ca' neda'." <sup>4</sup> Na'a, ¿bizxi didza' bubí'ë Dios? Caní gunné': "Nun chí'igaca caza'-në' quia' tsónnalalaj yu' chi gáyu'ë bönni' biti' tu'zechu zxíbigaquië' lo budó' guijo' na' nazi'i le Baal." <sup>5</sup> Lësca' caní naca dza ni zóaru' na'a, nagá'anagaca bal-la bönnachi Israel, nupa na' guró cazë' queë' Dios tu' ruzá' ládxë'ë caní quégäquië'. <sup>6</sup> Channö naca le ruzá' ládxë'ë caní quégäquië', biti' naca ni'a que tu le gaca ilunë'. La'tu' guca ni'a que tu le gaca gunru', lë na' ruzá' ládxë'ë queéru' Dios bíti'rö gaca tu le ruzá' ládxë'ë queéru'.

<sup>7</sup> ¿Bizxi caz innaru' na'a? Lë na' gula'guílje' bönni' Israel, biti' bila'déli'në', pero chibila'déli' le nupa ni' guró cazë' queë' Dios, ate' ia'zíca'rë' na', Dios benë' zidi icja ládxí'do'gaquië'. <sup>8</sup> Ca naca lë ni nazúaj lu guichi lá'ayi, rnna: "Dios benë' ga nácagaquië' chul-la niti." Caní benë', en sal-la' gaca ila'lé'enë' le runë', en ila'yönnë' xtídzë'ë, biti' ca' ta'yéajni'inë'. Caní naca quégäquië' ga ridxitnë dza ni zóaru' na'a. <sup>9</sup> Ca naca lë ni bë'ë ca' David didza', gunné':

Yugu' laní quégäquië' ulu'huöáca le ila'zón légaquië',

en ca tu yalaj ga ila'rólínë'.

Ilaca ca' le ilún ga ila'chíxinë',

en ca tu le uzi' lëbi légaquié'.

<sup>10</sup> Ila'chul-la guiój lógaquié', para cabí ila'lé'ené'.  
Ila'yechu tsaz cùdzu'gaquié' tu' ilu'ë yua'.

### *Ca gaca ulu'lágaca bönachi biti' nácagaca judío*

<sup>11</sup> Na'a rnnía': ¿Naru' gula'chíxiné' yugu' bönni' judío ga bidxintë gula'nítié' tsaz? ¡Biti' ca' guca ca'! Gula'dá'baguë'ë xtídzë'ë Dios, ate' na'a Dios ru'ë lataj ulu'lágaca nupa biti' nácagaca judío para guné' ga ulu'zxé'ené' yugu' bönni' judío lóguequi. <sup>12</sup> Le guluné' bönni' judío, gula'chíxiné', ben ga bidxín quégaca bönachi yödzölió ni le naca ca tu yöl-la' tsahui'. Channö caní guca, guta' yöl-la' tsahui' quégaca nupa biti' nácagaca judío tu' gula'nítié' yugu' bönni' judío, zxóntérö gaca le gata' quéguequi cate' yugu' bönni' judío na' ulu'huoáquié' queé' Dios.

<sup>13</sup> Na'a rea' lib'iili' biti' nácali' judío, rnnía': Tu' naca' gubáz nasól-lé'ë Dios lógaica nupa biti' nácagaca judío, runa' zxön lë na' dë lu na'a <sup>14</sup> para nadxi ca' huáca guna' ga ulu'zxé'ené' bönni' uládz quia' lib'iili', en caní guna' ga ulu'lé' bal-lé'. <sup>15</sup> Channö bulu'huoáca bönachi nacuá' idú yödzölió queé' Dios tu' bulu'nítié' yugu' bönni' judío xilátjagaquié', zxóntérö gaca le gata' quéguequi cate' ulu'huoázié' xilátjagaca cazé' na'. Gaca ca raca cate' tu'bángaca nupa chinátigaca. <sup>16</sup> Channö rigú'uru' quez queé' Dios cúa nflado' rubéajru' zí'alö, lësca' cúa na' nagá'ana naca quez queé', en channö uzóaru' quez queé' Dios luí yaga, lësca' ilaca quez queé' ni'a né'e yaga na'.

<sup>17</sup> Nácagaquié' bal-lé' bönni' judío ca ni'a né'e tu yaga olivo narúgugaca, ate' lib'iili', ca ni'a né'e tu yaga olivo guí'a, yöjtá'ali' yaga olivo dxi'a na', en buázili' xilátjagaca nupa na' gurúgugaca, en ruzí'ili' xibé luí, en xichöni yaga olivo dxi'a na'. <sup>18</sup> Que lë ni na', biti' gun ba zxön cuinli', biti' uzóali' tsölá'alö nupa nácagaca ca ni'a né'e na' narúgugaca. Channö run ba zxön cuinli', ral-la' inózili' caléga lib'iili' rugáguli' luí yaga na', pero luí yaga na' rugagu lib'iili'.

<sup>19</sup> Nadxi ca' innó': "Gula'rugu ni'a né'e yaga na' para gaca tsázia' neda' xilátjagaca." <sup>20</sup> Nácaté didza' ru'u, pero gula'rúguié' tu' cabí gula'yéajlë'ë, ate' yöjtó'o li' yaga na' tu' réajlë'u Dios. Que lë ni na', biti' ral-la' gun ba zxön cuinu', pero ral-la' gádxinu' Dios. <sup>21</sup> Channö bené' Dios lóguequi xíguia', nupa na' nácagaca caz ni'a né'e yaga dxi'a na', ¿naru' cabí guné' xíguia' ca' li'? <sup>22</sup> Buyútsöca' na'a ca náquié' dxi'i ladxi' Dios, en ca rúndë'ë ca' xíguia'. Le nácaté rúndë'ë xíguia' nupa na' gula'chixi, pero náquié' dxi'i ladxi' len li'. Que lë ni na', ral-la' gúntica'su' ca sa'yéaj yöl-la' dxi'i ladxi' queé' na', para cabí ichúguié' ca' li' lu yaga queé' na'. <sup>23</sup> Lësca' caní gaca quégaequié' channö cabí ulu'gá'ané' lu yöl-la' cabí réajlë' quégaequié', tsöjtá'gaquié' leyúbölö lu yaga na', tu' napé' Dios yöl-la' huáca guné' ga tsöjtá'gaquié' le leyúbölö. <sup>24</sup> Nacu' li' ca tu ni'a né'e gurugu lu yaga olivo guí'a, en yöjtó'o yaga olivo dxi'a ga cuntu nu udá' tu ni'a né'e yaga guí'a. Yénni'térö huáca quégaequié', nácagaca cazé' ni'a né'e yaga dxi'a na', huáca tsöjtá'gaquié' leyúbölö lu yaga quéguequi cazé' na'.

### *Ca gaca ulu'lágaca bönachi Israel*

<sup>25</sup> Bócha'ado', r'é'ënda' inózili' lë ni bigachi', para cabí gun ba zxön cuinli' ca naca yöl-la' réajni'i queéli'. Bulu'huoáca bal-la bönachi Israel zidi ladxi', ate' caní iláquié' ga idxinrö dza chinayázgaca yúgu'té bönachi biti' nácagaca judío ga rinná bë'ë Dios, nupa na' ral-la' ulu'lágaca. <sup>26</sup> Tödi na' gata' lataj ulu'lé' ca' yúgu'té bönni' Israel, ca na' nazúaj lu guichi lá'ayi, rnna:

Iruáj yödzö Sión Nu rusólá,  
en ugúa le ruá' dö' nabága'gaca zxí'ini xi'sóë' Jacob.

<sup>27</sup> Lë ni naca didza' dzaga gúnlena' légaquié'  
cate' ugúa' dul-la' nabága'gaquié'.

<sup>28</sup> Caní naca, gula'dá'baguë'ë didza' dxi'a, ate' Dios guléaj ládxë'ë légaquié' para gaca uláli' lib'iili', pero nadxi'iné' ca' légaquié', tu' guró' cazé' queé' xuz xtó'ogaquié'. <sup>29</sup> Tsaz

runödzjé' Dios le runödzjé', en tsaz rulidzé' bönachi. <sup>30</sup> Ca na' naca queéli', zí'atélö biti' benli' ca rnna xtídzé'ë Dios, ate' na'a ruhuéchi' ládxé'ë Dios libí'ili' tu' cabí guluné' yugu' bönni' judío ca rnné'. <sup>31</sup> Lésca' caní naca quégaquié' na'a, biti' tuné' ca rnné' Dios, pero caní gácasö ga idxinrö dza huéchi' ládxé'ë Dios légaquié', ca ruhuéchi' ládxé'ë libí'ili' na'a. <sup>32</sup> Dios guléaj ládxé'ë yúgu'té bönachi para ila'dábaguë'ë xtídzé'ë, para gaca huéchi' ládxé'ë yúgu'té'.

<sup>33</sup> Zxóntérö naca yöl-la' tsahui' queë' Dios, lë na' naca yöl-la' huáca zxön, en yöl-la' réajni'i queë'. Cuntu nu gaca tséajni'i le nuzoë' Dios guné', en biti' gaca nu inözi yugu' le runé' Dios. <sup>34</sup> ¿Nuzxi caz guyéajni'i le guzá' ládxé'ë Xanru'? ¿Nuzxi caz buzéajni'i Lë'? <sup>35</sup> ¿Nuzxi caz bi bunödzaj queë' Dios para gun bayudxi bi ubi'ë Dios que? <sup>36</sup> Yúgu'té le dë narúajgaca lu në'ë Dios, en taca lu në'ë, en nácagaca para uzi'ë xibéguequi. ¡Gácatica'sö queë' Dios yöl-la' ba! ¡Ca' gaca!

## 12

### *Ral-la' udödi cuinru' quez queë' Dios*

<sup>1</sup> ¡Böchi' luzá'ado! ¡Ruhuéchi' ládxé'ë Dios rë'u! Que lë ni na' ráta'yua' loli' udödi cuinli' lu në'ë Dios, gácali' ca tu le naca ban rigú'uru' lahué' Dios, para gácali' quez queë', le gaca tu le tsaza ládxé'ë Dios. Lë ni ral-la' gunli', ca sa'yéaj le reaj láxi'rú'-në' Dios. <sup>2</sup> Bítirö gunli' la' lóbisö ca tun bönachi dza ni zóaru' na'a, pero guli'gaca bönachi cubi tu' nucubé' Dios icja láxi'do'oli'. Guli'gún caní para gaca inózili' le naca dxia're'ënë' Dios gunli', lë na' raza ládxé'ë, en le naca idú.

<sup>3</sup> Na'a, tu' zoa le buzá' ládxé'ë quia' Dios, rea' yúgu'teli': Biti' gun ba zxön cuinli', le cabí ral-la' gunli', pero ral-la' gácali' nönxaj ladxi' ca ribequi ícjali', tsca naca yöl-la' réajlë' queéli' Dios le benné' que queéli'. <sup>4</sup> Ca na' naca tuz idútë le naca cázaru', sal-la' zián le nagudi' dzágalenru', en caléga tuz dxin tun yúgu'té le zián na' nagudi' dzágalenru', <sup>5</sup> lësca' caní naca queéru'. Sal-la' zianru' zóaru', nácaru' ca tuz le naca cázaru' tu' nácaru' tuz len Cristo, ate' que lë ni na' yúgu'teru' nácaru' tuz turu' len ia'turu'.

<sup>6</sup> Tu turu' dë lu ná'aru' tu le benné' queéru' Dios, ate' nadzá'gaca tu tu tsca naca le buzá' ládxé'ë que queéru'.

Bönni' na' Dios bunödzjé' queë' gu'ë didza' uláz queë', tsca réajlë' Lë', ral-la' gu'ë didza' bönni' na'.

<sup>7</sup> Bönni' na' Dios bunödzjé' queë' gunë' xichiné', dxí'ado' ral-la' gunë' dxin na'.

Bönni' na' Dios bunödzjé' queë' usédiné' bönachi, dxí'ado' ral-la' usédiné' bönachi.

<sup>8</sup> Bönni' na' Dios bunödzjé' queë' uzéajni'iné' bönachi, dxí'ado' ral-la' uzéajni'iné' légaquié'.

Bönni' bi unödzjé' que nu yúbölö, idú ládxé'ë ral-la' unödzjé'.

Bönni' rinná bé'ené' bönachi, idú ládxé'ë ral-la' gunë' caní.

Bönni' rácalené' luzé'ë, len yöl-la' rudzeja ral-la' gunë' caní.

### *Yugu' le ral-la' gun nu nequi queë' Cristo*

<sup>9</sup> Ral-la' idxí'ili' luzá'ali' idú láxi'li'. Buli'ca' ana le ruá' dö'.

Guli'gü' láxi'li' gunli' le naca dxia'a.

<sup>10</sup> Guli'dxí'i-guéquiné' luzá'ali' ca nadxi'iguecli'në' böchi' cázali'.

Ca runli'-në' bal luzá'ali' ral-la' gunli' ga gácarë' lo ca nácali' la' cuínsili'.

<sup>11</sup> Buli'típatica'sö ládxi'li', en biti' gácali' xöhuëdi.  
 Guli'gún xichiné' Xanru' idú ládxi'li'.  
<sup>12</sup> Buli'dzeja tu' zoa le runli' löza.  
 Guli'cöz zxön ladxi' cate' bi rigui'i rizáca'li'.  
 Buli'lídzatica'së' Dios.  
<sup>13</sup> Buli'nödzaj quégaca böñachi queë' Cristo  
 tsca nayádzjaguequiné'.  
 Guli'gü' lataj ga ila'cuá' nupa ta'dxín queëli'.  
<sup>14</sup> Guli'nábiné' Dios guné' dxi'a  
 quégaca nupa ta'bía ládxi'gaca lib'ili'.  
 Guli'naba gaca dxi'a quégacuie',  
 en biti' udxíali' légaquie' dö'.  
<sup>15</sup> Buli'dzéjalen nupa tu'dzeja.  
 Guli'códxilen nupa ta'bödxi.  
<sup>16</sup> Guli'gaca tuz len luzá'ali'.  
 Biti' gun ba zxön cuinli',  
 pero guli'gún tsözxón yugu' bönni' nöxañadxi'.  
 Biti' guéquili' chinadéli'li' idútë yöl-la' réajni'i.  
<sup>17</sup> Cuntu nu ubí'ili' que,  
 biti' guá'ali' dö' que nu ruá' dö' queëli'.  
 Guli'gún dxi'a quégaca yúgu'të böñachi.  
<sup>18</sup> Channö huáca, tsca séqui'li', guli'cöz dxi'a  
 len yúgu'të böñachi.  
<sup>19</sup> Böchi' luzá'ado', biti' uzí' lóbili' böñachi la' lib'isili', pero guli'gü' lataj ubi'ë Dios  
 quégaca böñachi na', tu' nazúaj lu guichi lá'ayi le rnna:  
 Neda' caza' uzí' lëba'.  
 Neda' ubi'a quégaca böñachi.  
 Caní gunnë' Xanru' Dios. <sup>20</sup> Lësca' caní rnna:  
 Channö zoë' nu bönni' biti' ridzáguie' li' dxi'a,  
 en riduné, bë'ë le gahuë'.  
 Channö ribidxë' nisa, bë'ë le guí'jë'.  
 Cate' gunu' caní, gunu' ga utu'inë' bönni' na'.  
<sup>21</sup> Biti' gu'u lataj inná be'e le ruá' dö' li',  
 pero gunná be'e le ruá' dö' na',  
 uguru' dxin le naca dxi'a.

## 13

<sup>1</sup> Yúgu'teli' ral-la' gunli' ca ta'nné' bönni' yúlahui'. Dios caz budödë' lu ná'agaquie'  
 yöl-la' unná bë' nápagaquie', en nucu'ë xilátjagaquie' bönni' ni dë lu ná'agaquie' yöl-la'  
 unná bë'. <sup>2</sup> Que lë ni na', nu ridá'baga' yúlahui' ridá'baga' le nuzóazca' Dios, ate' nupa  
 ta'dá'baga' caní, nabága' gaca xiguia'. <sup>3</sup> Nacu'ë bönni' yúlahui', caléga para ulu'zenë'bach  
 nu run le naca dxi'a, pero para ulu'zenë'bach nu ruá' dö'. Channö ré'ënu' gunu' ga biti'  
 ulu'zenë' li'bach, ben le naca dxi'a, ate' uruju' dxi'a lógaquie'. <sup>4</sup> Náquië' bönni' yúlahui'  
 ni'a né'ë Dios para gácalenë' li', pero channö runu' le ruá' dö', ral-la' gádxinu', tu' cabí  
 nu'ë nítisö xiyaga yúlahui'. Náquië' ni'a né'ë Dios para uzí' lëbë', gunë' xiguia' nu ruá'  
 dö'. <sup>5</sup> Que lë ni na' run bayudxi gunli' ca rnne' bönni' na' dë lu né'ë, calégasö tu' budödë'  
 Dios lu né'ë gunë' lib'ili' xiguia', pero lësca' para soa dxi ládxi'do'oli' lahuë' Dios. <sup>6</sup> Que  
 lë ni na' ca' riguizxaj lázali' que yúlahui', tu' nácagaquie' bönni' yúlahui' ni'a né'ë Dios,  
 en tunë' le nudödi cazë' lu ná'agaquie'.

<sup>7</sup> Guli'guízxaj yúgu'të böñachi le rál-la'li' quégacuie'. Guli'guízxaj lázali' lu na' nu ral-  
 la' quízxaj lázali'. Guli'guízxaj dumí nu ral-la' quízxjali'. Guli'gadxi nu ral-la' gádxili', en

guli'gún bal nu ral-la' gunli' bal. <sup>8</sup> Cuntu nu bi ral-la' gál-la'li' que, pero tuz ral-la' idxí'i' luzá'ali', tu' chibén idú ca rinná bë' xibá queë' Dios nu nadxi'i' luzé'e. <sup>9</sup> Caní ta'nná bë' xibá na':

Biti' gunu' dul-la' le riguitsaj xibá que yöl-la' nutsaga na'.

Biti' gútiu' böñachi.

Biti' cuanu'.

Biti' innío' que luzó'o le cabí nácatë.

Biti' së ládxu'u le dë que luzó'o.

Yugu' xibá ni, en yúgu'të xibá ia'zíca'rö, údxi gun nu run ca rnna didza' rnna caní:

Bidxí'i' luzó'o ca nadxi'i' cuinu'.

<sup>10</sup> Nu na' nadxi'i' luzé'e biti' bi run que luzé'e le ruá' dö'. Caní naca, nu na' nadxi'i' luzé'e run idú ca rinná bë' xibá queë' Dios.

<sup>11</sup> Guli'gún caní tu' nőzili' ca raca dza ni zóaru' na'a, en nőzili' ca' chibidxín dza usubán ládxí'i'li' ca rubán nu chiguxi, tu' chizóarö gal-la' dza uláru' lu le ruá' dö' ca guca cate' ni' gusí loru' réajlë'ëru' Cristo. <sup>12</sup> Ga zóaru' na'a naca ca chi'i dzö'ölö, ate' chizóá tödi rëla na', pero ga na' zoë' Cristo naca ca lahuí' dza, ate' chizóá tsöjsóaru' ni'. Que lë ni na' ral-la' ucá'anaru' le tun böñachi ga naca chul-la que dul-la'. Ca na' rugacu cuinë' tu bönni' rejë' gudil-la le run chi'i lë' lu gudil-la, ral-la' taru' lu bení' queë' Dios, le gun chi'i rë'u lu na' tu' xihui'. <sup>13</sup> Para gunru' caní ral-la' gunru' dxi'a ca ral-la' gun nu ridá lahuí' dza.

Biti' ral-la' súdxiru', en cabí gágulë'ëru'.

Biti' ral-la' gunru' le ruá' dö', en calëga le gun ditaj rë'u.

Biti' ral-la' tíl-lalenru' luzá'aru', en cabí uzzé'eru' luzá'aru'.

<sup>14</sup> Na'a, ral-la' un cuinli' lu icja ládxí'i' do'oli' ca náquië' Xanru' Jesucristo, en biti' gü'i ládxí'i'li' gunli' le rizé' ládxí'i'li' lu yöl-la' böñachisö queëli'.

## 14

### *Biti' ral-la' si' quídza'ru' böchi' luzá'aru'*

<sup>1</sup> Guli'güí' lataj nu réajlë' Cristo gun libi'ili' tsözxón sal-la' biti' naca idú ca réajlë' nu na' Lë'. Biti' tíl-lalenli' nu na' ca nácagaca le runi nu na' huáca nu gun. <sup>2</sup> Ca naca lë ni, nacu'ë bönni' runi légaquie' huáca ilahuë' yúgu'të le tagu böñachi, pero ia'bal-lë' bönni', tu' cabí naca idú ca ta'yéajlë'ë Cristo, tágusë' le raza ruzóaru'. <sup>3</sup> Na'a, bönni' na' rahuë' yúgu'të biti' ral-la' uzóë' tsöla'alo nu bönni' biti' rahuë' yúgu'të, en lësca' caní, bönni' na' biti' rahuë' yúgu'të biti' ral-la' si' quídze'ë bönni' na' rahuë' yúgu'të, tu' nazí' lu në'ë Dios iropë' bönni' na' ta'yéajlë'ë Cristo. <sup>4</sup> ¿Nuzxi caz li', rizi' quídzu'u bönni' huen dxin que nu yübölö? Bönni' na' náquië' huen dxin queë' Dios, lahuë' Xan cazë' urúajé' tsahui' o biti' urúajé' tsahui'. Channö urúajé' tsahui' lahuë' Dios, naca tu' gun cazë' Xanru' Dios ga urúajé' tsahui'.

<sup>5</sup> Nadxi ca' zoë' nu bönni' runrë' bal tu dza ca runë' bal ia'zíca'rö dza, ate' bönni' yübölö, tuz ca runë' bal yúgu'të dza. Tu turu' ral-la' usédada'aru' channö naca dxi'a le runru'.

<sup>6</sup> Bönni' na' runë' bal tu dza, runë' le bal para tseaj ládxë'ë Xanru', ate' bönni' na' biti' runë' bal dza na', para tseaj ládxë'ë Xanru' biti' runë' bal dza na'. Lësca' caní, bönni' na' rahuë' yúgu'të, rahuë' caní para tseaj ládxë'ë Xanru', en rë'ë Dios: "Xclenu'", ate' bönni' na' biti' rahuë' yúgu'të, biti' rahuë' le para tseaj ládxë'ë Xanru', en rë'ë ca' Dios: "Xclenu'."

<sup>7</sup> Biti' zoë' nabanë' queëzë' nitúë' bönni' nabábalenë' rë'u, en biti' ratië' queëzë' nitúë' bönni'. <sup>8</sup> Channö zóaru' nabanru', para tseaj ládxí'ru'-në' Xanru' zóaru' nabanru', en channö gátiru', para gaca yöl-la' ba queë' Xanru' gátiru'. Caní naca, channö zóaru' nabanru' o channö gátiru', nequi quéziru' queë' Xanru'. <sup>9</sup> Que lë ni na' ca' gútië' Cristo, en bubanë', para gáquië' Xángaca nupa chinátigaca, en nupa nabángaca.

<sup>10</sup> Na'a li', ¿bizx que richugu bë'u böchi' luzó'o? ¿Bizz que ruzú' tsölä'alö böchi' luzó'o? Yúgu'tëru' idxinru' lahuë' Cristo ga uchi'a usöröö' rë'u. <sup>11</sup> Ca naca lë ni nazúaj lu guichi lá'ayi, rnna:  
Rnnë' Xanru': "Ni'a quia' neda' caz,  
ulu'zechu zxibigaca yúgu'të bönachi lahua' neda'.  
Ila'guixjö' yálajdo' naca' Dios."

<sup>12</sup> Caní naca, uchi'a usöröö' Dios yúgu'tëru'.

### *Biti' ral-la' gunru' ga ichixi iníguiné' böchi' luzá'aru'*

<sup>13</sup> Que lë ni na', bíti'rö ral-la' ichugu bë'eru' luzá'aru', pero ral-la' gun yúdxiru' cabí gunru' ga ichixi iníguine' böchi' luzá'aru', en para cabí gunru' ga gunë' dul-la'. <sup>14</sup> Nöz quézida' biti' bi dë le ráguru' le gaca gun ga bíti'rö nácaru' tsahui' lahuë' Dios, ate' röjlöz lë ni didza' bë'ë Xanru' Jesús. Channö réquinë' tu bönni' zoa bi gaca gun ga bíti'rö náquië' tsahui' lahuë' Dios, queë' bönni' ni, caní naca. <sup>15</sup> Channö rusuhuf'innu' böchi' luzó'o, tu' ragu' le runi lë' biti' ral-la' gáguru', biti' runu' ca ral-la' gun nu nadxi'i böchi' luzé'e. Biti' bi ral-la' gagu' le gun ga gaca chopa ládxë'ë bönni' na', gútië' Cristo uláz queë'. <sup>16</sup> Que lë ni na', biti' bi gunli' le gun ga ila'nné xihui' bönachi que le rusáca'li' queéli' naca tsahui'. <sup>17</sup> Cate' rinná bë'enë' Dios rë'u, biti' ru'i ládxí'ru' le guí'aj gáguru', pero ru'i ládxí'ru' gácaru' tsahui', en sóaru' dxi ladxi', en udzéjaru', yugu' le gaca gunru' tu' zóalenë' Dios Bö' Lá'ayi rë'u. <sup>18</sup> Núti'tës nu run xichinë' Cristo ca nácagaca lë ni, run le raza ládxë'ë Dios, ate' urúaj dxi'a lógaca bönachi.

<sup>19</sup> Que lë ni na' ral-la' gunru' le ilún ga gata' le ribequi dxi ládxí'ru' len yúgu'të bönachi, en le ilún tsutsu turu' ia'turu' ca réajlë'ëru' Cristo. <sup>20</sup> Biti' bi ral-la' gagu' le gun ga gaca chopa ladxi' nu na' nuzóë' Dios. Nácatë lë na' ta'nná bönachi: "Yúgu'të dë lataj gáguru'", pero gunru' le ruá' dö' channö gunru' ga ichixi iníguiné' luzá'aru' tu' nözi lë na' ráguru'.

<sup>21</sup> Gácarö dxi'a cabí gagu' bëla', en cabí guí'ju' xisi uva nal-la, en biti' bi gunu' le gun ga ichixi iníguiné' böchi' luzó'o, o le gun ga gaca chopa ládxë'ë, o le gun ga huóaj ládxë'ë ca réajlë'ë Cristo. <sup>22</sup> Channö réajlë'u dë lataj bi gunu', ral-la' gunu' le lahuë' Dios ga zu' tuzu'. Bica' ba bönni' na' biti' ruxösa ládxí'da'ahuë' lë' tu' nözi lë na' runi lë' dë lataj gunë', <sup>23</sup> pero bönni' na' raca chopa ládxë'ë tu' nözi le rahuë', nabáguë'ë xíguia', tu' runë' le cabí runi lë' dë lataj gunë'. Naca dul-la' yúgu'të le runru', le cabí runi rë'u dë lataj gunru'.

## 15

### *Ral-la' gunru' le raza ládxë'ë böchi' luzá'aru'*

<sup>1</sup> Que lë ni na', channö nácaru' tsutsu ca réajlë'ëru' Cristo, ral-la' guá' ilenru' nupa na' nagul-la ládxí'gaca ca ta'yéajlë' Cristo. Biti' ral-la' gunru' le raza ládxí'ru' la' cuínsiru'.

<sup>2</sup> Yúgu'tëru' ral-la' gunru' le raza ládxë'ë böchi' luzá'aru' para gaca dxi'a queë', en idipa ládxë'ë ca réajlë'ë Cristo. <sup>3</sup> Caní ral-la' gunru', tu' cabí benë' Cristo le guyaza ládxë'ë la' cuinsë', pero guca queë' ca na' nazúaj lu guichi lá'ayi, le rnna: "Budubága'gaca neda' yugu' didza' xihui' gului'i nupa gula'nné xihui' quiu' Li', Dios." <sup>4</sup> Yúgu'të le bulu'zúa'jë lu guichi lá'ayi dza ni'te, bulu'zúa'jë lu guichi para usëdi rë'u. Lë na' nazúaj lu guichi lá'ayi run ga ribózaru' zxön ladxi', en ruhuë' tsahui' rë'u. Que lë ni na' zoa le runru' löza.

<sup>5</sup> Rinábida'-në' Dios, Nu run ga ribózaru' zxön ladxi', en Nu ruhuë' tsahui' rë'u, gunë' ga gunli' tuz ca rusáca'li' queéli', para gácali' ca na' ré'ënë' Jesucristo. <sup>6</sup> Caní ral-la' gunli' para gácali' tuz, cù'uli'-në' tsözxón yöl-la' ba Dios, Xuzë' Xanru' Jesucristo. <sup>7</sup> Que lë ni na', para gaca yöl-la' ba queë' Dios, guli'sí' lu ná'ali' tuli' ia'tuli' ca na' Cristo guzxi' lu në'ë ca' rë'u. <sup>8</sup> Caní ral-la' gunli', tu' rea' lib'ili': Bidë' Jesucristo, en gúcalenë' bönachi judío, ate' caní bulu'e lahui naca idútë li didza' ru'ë Dios, ate' benë' ga bulu'dxín le guzxi' lu në'ë Dios unödziej' quégaquië' xuz xtó'otu'.

*Yugu' böñachi izá'a ila'yöni didza' dxí'a*

<sup>9</sup> Bidë' ca' Cristo para benë' ga ila'gú'u Dios yöl-la' ba nupa biti' nácagaca judío tu' ruhuéchi' ládxë'ë Dios légaquië'. Ca naca lë ni nazúaj lu guichi lá'ayi le rnna:  
Que lë ni na', ulu'a lahui le nacu' Li'  
lögaca böñachi idútë yödzölió,  
en gul-la' quiu' yöl-la' ba.

<sup>10</sup> Ga yübölö nazúaj lu guichi lá'ayi le rnna:  
Libí'ili', böñachi idútë yödzölió,  
buli'dzéjalen böñachi queë' Dios.

<sup>11</sup> Ga yübölö nazúaj ca' lu guichi lá'ayi le rnna:  
Guli'cu'ë Xanru' yöl-la' ba,  
yúgu'téli' biti' nácali' judío.  
Guli'tséaj ladxi' Lë',  
yúgu'téli' zóali' idútë yödzölió.

<sup>12</sup> Lësca' caní buzúajé' Isaías lu guichi le rnna:  
Ilá' lahui Nu nababa di'a dza queë' Isaí.  
Gaca lo Nu na' para inná be'e nupa biti' nácagaca judío.  
Nupa ni ilún löza Lë'.

<sup>13</sup> Rinábida'-në' Dios, Nu run ga runru' löza, gunë' ga udzéjade'eli', en ga soa dxí'ládxí'li' tu' réajlë'eli' Lë', en gunë' ga gaca idú ca runli' löza, tu' zóalen yöl-la' huáca queë' Dios Bö' Lá'ayi libí'ili'.

<sup>14</sup> Böchi' luzá'ado'. Chinőz quézida' rúntica'sili' le naca dxí'a, en dëda' yöl-la' réajni'i queéli' para gaca uzéajni'ili' luzá'ali'. <sup>15</sup> Na'a naca' rugu ladxi', ruzúaja' queéli' lu guichi ni, böcha'a, en rusá'a ládxí'li' tu' zoa le buzá' ládxë'ë Dios quia' neda'. <sup>16</sup> Que lë ni na' runa' xichiné' Jesucristo lögaca böñachi biti' nácagaca judío, en runa' libán que didza' dxí'a queë' Dios, para gaca ugu'a böñachi biti' nácagaca judío lu në'ë Dios, nupa na' guró cazé' Dios Bö' Lá'ayi queë' Lë'. Ilácagaquië' ca tu le rigú'uru' lu në'ë Dios, le raza ládxë'ë Lë'.

<sup>17</sup> Na'a, tu' rúnlena' tsözxón Jesucristo dxin, dë lu na'a tsaza ládxá'a ca naca le nuna' lu xichiné' Dios. <sup>18</sup> Lësca' rurúguida' innía' ca naca lë na' benë' Cristo lu na'a neda', benë' ga tun böñachi biti' nácagaca judío ca rnna xtídzë'ë Dios. Lë ni benë' Lë', bugunë' dxin didza' bë'a neda', en yugu' dxin bena' neda'. <sup>19</sup> Lu na'a neda' bugunë' dxin ca' le nácagaca bë' bulu'e lahui Lë', en yugu' yöl-la' huáca zxön benë', en yöl-la' huáca na' queë' Dios Bö' Lá'ayi le guzóalen neda'. Caní guca, gusí lahua' runa' libán lu yödzö Jerusalén, ate' idú gásibi'ilö ga ridxitë luyú Ilírico, chinuna' libán que didza' dxí'a ca naca queë' Cristo. <sup>20</sup> Bé' ládxá'a bena' libán que didza' dxí'a ga biti' bila'yöni böñachi ca naca queë' Cristo. La'tu' guna' libán ga chibila'yöni böñachi, guna' neda' ca runë' tu bönni' ruguélë'ë lahui dxin zxön chinunë bönni' yübölö. <sup>21</sup> Ca bena' neda' naca ca na' nazúaj lu guichi lá'ayi le rnna:  
Ila'lé'e nupa nacuá' ga cuntu nu ben libán queë' Lë',  
en ila'yéajni'i nupa catu caz bila'yöni ca naca queë'.

*Ré'ënë' Pablo tsejë' yödzö Roma*

<sup>22</sup> Que lë ni na', sal-la' zián luzuí gú'unida' guída' ga zóali', biti' guca guída'. <sup>23</sup> Na'a, chibudxi bena' dxin quia' yugu' lataj ni, en chiré'ënda' zián iz guída' ga zóali'. <sup>24</sup> Que lë ni na', cate' tseja' luyú España, töda' ga zóali' libí'ili', tu' runa' löza uduyúa' libí'ili', en udzéjalenda' libí'ili'. Tödi ni' huáca ugú'uli' neda' nöza. <sup>25</sup> Na'a ral-la' tseja' Jerusalén, tsöju'a tu le gácalen nupa ni' néquiguequi queë' Cristo. <sup>26</sup> Caní guna', le gula'yaza ládxí'gaquië' bönni' nacu'ë luyú Macedonia, en luyú Acaya, bulu'tubë' bi tu'nödzjë' quéguequi böñachi yechí' dzágagaca böñachi queë' Cristo, nacu'ë Jerusalén. <sup>27</sup> Gula'yaza ládxí'gaquië' bönni' biti' nácagaquië' judío gulunë' lë ni. Le nácatë naca tu le rál-la'gaquië' quégaca böñachi judío ni'. Channö bönni' biti' nácagaquië' judío tu'zi'ë xibé

le nácagaca queë' Dios ni'a que le núngaca bönachi judío, lësca' ral-la' ilácalenë' bönachi judío na', ulu'gunë' dxin le dë quégaquië'. <sup>28</sup> Que lë ni na', cate' údxi udöda' lu ná'agaca bönachi judío lë na' bulu'nödzjé' bönni' ni, ní'irö töda' ga zóali' libíili' cate' tseja' luyú España. <sup>29</sup> Cate' guída' ga zóali', runa' löza idxílnena' yúgu'të le ruzf'iru' xibé ni'a que didza' dxi'a queë' Cristo.

<sup>30</sup> Ni'a queë' Xanru' Jesucristo, en ni'a que yöl-la' nadxi'i ruchízië' Dios Bö' Lá'ayi icja ládxido'oru', ráta'yua' loli', bócha'ado', ulídzali'-në' Dios tsözxón len neda', inábili'-në' gácalenë' neda'. <sup>31</sup> Guli'nabi-në' Dios gunë' ga ulá' neda' lu ná'agaquië' bönni' biti' ta'yéajlé'ë nacu'ë luyú Judea, en gunë' ga ila'yaza ládxigaquië' ila'zi'ë lë na' tsöju'a lu ná'agaquië' bönni' nácagaquië' queë' Cristo, nacu'ë Jerusalén. <sup>32</sup> Guli'nabi-në' ca', channö naca ca ré'ënë' Dios, gunne' neda' lataj idxina' queëli' len yöl-la' rudzeja quia', para uzi' ládxilena' libíili'. <sup>33</sup> Na'a rinábida'-në' Dios, Nu run ga zoa dxi ládxiru', sóalenë' yúgu'teli'. ¡Ca' gaca!

## 16

### *Tu'gapa Dios luzé'eguequi bönachi queë' Cristo*

<sup>1</sup> Rigu'a-nu lu ná'ali' Febe, nigula zanru' d'a'nu Xanru'. Nácanu nigula huen dxin queë' Dios dzáganu bönachi queë' Cristo nacuá' yödzö Cencrea. <sup>2</sup> Uláz queë' Xanru' guli'si' lu ná'ali'-nu nigula na', ca ral-la' ilún bönachi queë' Cristo. Guli'gácalen lënu, unödzjali' queënu bíti'tës bi riquínnu. Lë cázanu gúcalennu bönachi zián, en gúcalennu ca' neda'.

<sup>3</sup> Guli'gapa Dios Priscila, en Aquilo, nupa na' gulunlen neda' tsözxón dxin queë' Jesucristo. <sup>4</sup> Chopé' ni gula'döde' ga guzóa bönadxi ilátië' para gulunë' ga cabí gátia' neda', ate' rea' légaquië': "Xclenli", en calégasö neda', pero lësca' yúgu'të böchi' luzá'aru' nabábaguacië' gapa nacuá' bönachi queë' Cristo biti' nácagaca judío, të'ë légaquië': "Xclenli." <sup>5</sup> Guli'gapa Dios bönachi queë' Cristo tu'dubé' lu yu'u lídxigaquië' Priscila, en Aquilo na'. Guli'gapa Dios Epeneto, bönni' na' nadxi'ida'. Bönni' ni guyéajlé'ë Cristo zí'atëlö ca yúgu'të bönachi luyú Acaya. <sup>6</sup> Guli'gapa Dios María, nigula na' bennu dxin zxön queë' Cristo ga ni' rudúbili' libíili'. <sup>7</sup> Guli'gapa Dios Andrónico, en Junias, yugu' bönni' uládz quia'. Yugu' bönni' ni gula'dzúnlenë' neda' tsözxón lidxi guíe, en nadéli'gaquië' lataj lo ladaj bönni' gubáz nasól-lë'ë Cristo. Lësca' gula'yéajlé'ë Cristo zí'älö ca neda'.

<sup>8</sup> Guli'gapa Dios Amplias, bönni' na' nadxi'ida', en néquinë' queë' Xanru'. <sup>9</sup> Guli'gapa Dios Urbano, bönni' na' bénlenë' netu' tsözxón dxin queë' Jesucristo. Guli'gapa Dios Estaquis, bönni' na' nadxi'ida'. <sup>10</sup> Guli'gapa Dios Apeles, bönni' na' naca bë' réajlé'ë Cristo. Guli'gapa Dios nupa nacuá' lidxé' Aristóbulo. <sup>11</sup> Guli'gapa Dios Herodión, bönni' uládz quia'. Guli'gapa Dios nupa nacuá' lidxé' Narciso, en ta'yéajlé'ë Xanru'. <sup>12</sup> Guli'gapa Dios Trifena, en Trifosa, nigula na' tunnu dxin queë' Xanru'. Guli'gapa Dios Pérsida, nigula na' bennu dxin zxön queë' Xanru', ate' nadxi'iru'-nu. <sup>13</sup> Guli'gapa Dios Rufo, bönni' rõ queë' Xanru'. Guli'gapa Dios xiné'ë Rufo na', nácanu ca' ca xiná' caza'. <sup>14</sup> Guli'gapa Dios Asíncrito, en Flegonte, en Hermas, en Patrobas, en Hermes, enca' yugu' böchi' luzá'aru' dä'gaquië' Xanru', nacuá'lenë' légaquië'. <sup>15</sup> Guli'gapa Dios Filólogo, en Julia, en Nereo, en nigula zanë' Nereo na', enca' Olimpas, en yúgu'të böchi' luzá'aru' ta'yéajlé'ë Cristo, nacuá'lenë' légaquië'.

<sup>16</sup> Guli'gapa Dios luzá'ali', unida'li' luzá'ali' lu yöl-la' nadxi'i queëli'. Tu'gapë' Dios libíili' yúgu'të böchi' luzá'aru' nabábaguacië' gapa nacuá' bönachi queë' Cristo luyú ni.

<sup>17</sup> Na'a, ráta'yua' loli', bócha'ado', guli'gún ga ilaca bë' nupa tun ga irúajli' choplö, en tun ga ichixi iníguili', tu' tu'sédinë' le cabí röjlöz le nazédali'. Guli'cuíta ga nacuá' bönachi caní <sup>18</sup> tu' cabí tun xichinë' Jesucristo. Tunë' dxin para bi gata' quégacasë', en ta'zi' yé'enë' yugu' bönni' nöxa'ladxi', tu'gunë' dxin didza' nöxa'ladxi', en didza' tséajlé'ëru' le cabí nácatë. <sup>19</sup> Rizé' didza' ca na' runli' ca rnna xtídzé'ë Xanru', ate' ta'yöni yúgu'të

bönachi. Que lë ni na' rudzéjada' ni'a que le runli' libíili'. Na'a, ré'ënda' gácali' sina' gunli' le naca dxí'a, en caléga gunli' le ruá' dö'. <sup>20</sup> Dios, Nu run ga zóaru' dxí ladxi', si' gunë' ga ucúl-lali' Satanás, tu' xihui'. Rinábida'-në' Xanru' Jesucristo uzá' ládxé'ë queéli' le gácalen libíili'.

<sup>21</sup> Bi'i Timoteo, bi'i na' rúnlenbi' neda' tsözxón dxin, rugápabi' Dios libíili'. Lucio, en Jasón, en Sosípater, yugu' bönni' uládz quia', tu'gapé' Dios libíili'.

<sup>22</sup> Neda', Tercio, ruzúaja' lu guichi didza' ni ru'ë Pablo, rugapa' Dios libíili', dzáguië' Xanru' neda'.

<sup>23</sup> Gayo, bönni' ni ru'ë neda' lataj zoa' lidxé', en ru'ë ca' lataj tu'dubi yúgu'té bönnachi queé' Cristo ni, rugapé' Dios libíili'. Erasto, bönni' yu'u lu né'ë dumí que yödzö ni, rugapé' Dios libíili'. Bóchi'ru'do' Cuarto rugapé' Dios libíili'.

<sup>24</sup> Rinábida'-në' Xanru' Jesucristo uzá' ládxé'ë queéli' yúgu'téli' le gácalen libíili'. ¡Ca' gaca!

### *Yöl-la' ba Dios*

<sup>25</sup> Na'a, rigú'utu'-në' yöl-la' ba Dios, Nu gaca gun tsutsu libíili' ca naca didza' dxí'a runa' libán que, en ca naca libán runa' ca naca queé' Jesucristo, en ca naca le chibulu'ë lahui Dios que le bigachi' queé', lë na' bucáchë'ë Lë' dza ni'te ga bidxitné na'a dza. <sup>26</sup> Na'a chibulu'ë lahui lë ni yugu' lu guichi bulu'zúajé' bönni' gulu'ë didza' uláz queé' Dios ca na' gunná cazé' Dios, Nu zóatica'sö. Na'a raca libán que lógaca yúgu'té bönnachi para gaca ila'yéajlé' Cristo, en ilún ca rnna xtídzé'ë.

<sup>27</sup> ¡Ni'a que le bené' Jesucristo, gácatica'sö yöl-la' ba queé' la's dui Dios, Nu rácatérö caz! ¡Ca' gaca!

## DIDZA' ZÍ'ALÖ GUSÖL-LË'Ë PABLO YÖDZÖ CORINTO

*Pablo rugapë' Dios böñachi queë' Cristo nacu'ë Corinto*

<sup>1</sup> Ca ré'ëni quézinë' Dios bulidzë' neda', Pablo, para gaca' gubáz queë' Jesucristo. Böchi'ru' Sóstenes runë' neda' tsözxón. <sup>2</sup> Rugapa' Dios lib'ili', böchi' luzá'ado', rudúbili' queë' Dios lu yödzö Corinto, en nácali' quez queë' Dios tu' nácali' tuz len Jesucristo. Dios caz bulidzë' lib'ili' para guéquili' quez queë' tsözxón len yúgu'të nupa nacuá' yúgu'të lataj, en tu'lidzë' Dios, tu'gunë' dxin La la'ayi queë' Xanru' Jesucristo, Xángaqüië', enca' Xanru'. <sup>3</sup> Ráta'yua' lahuë' Xúziru' Dios, en lahuë' Xanru' Jesucristo uzá' ládxë'ë queéli', en gunë' ga soa dxi icja ládxí'do'oli'.

*Yugu' le ruzi'iru' xibé tu' néquiru' queë' Cristo*

<sup>4</sup> Réтика'sa'-në' Dios: "Xclenu'" ca naca queéli', tu' zoa le buzá' ládxë'ë Dios queéli' tu' nácali' tuz len Jesucristo. <sup>5</sup> Tu' nácali' tuz len Cristo, Dios chinagú'udë'ë xinózili' yúgu'të le nequi queë'. Rácalenë' lib'ili' ca naca yúgu'të didza' ru'ili', en runë' ga réajni'ili' yúgu'të. <sup>6</sup> Caní naca, tu' guzxí' lu ná'ali' idú ládxí'li' le runtu' liná' lo ca naca queë' Cristo. <sup>7</sup> Que lë ni na', biti' bi riyadzaj queéli' que le runnë' Dios Bö' Lá'ayi queéru', tsanni ni ribózali' dza na' ilá' lahuë' Xanru' Jesucristo. <sup>8</sup> Lë cazë' utipë' ládxí'li' para gaca guá' ilenli' yúgu'të ga idxintë dza údxi, para cabí gaca nu bi inné' queéli' dza ni' huödë' Xanru' Jesucristo. <sup>9</sup> Dios runë' ca rnnë', en Lë cazë' bulidzë' lib'ili' para gácali' tuz len Zxf'inë', Xanru' Jesucristo.

*Narúajgaca choplö böñachi queë' Cristo nacu'ë Corinto*

<sup>10</sup> Ni'a queë' Xanru' Jesucristo ráta'yua' loli', böchi' luzá'ado', guli'gún tuz xtídzala'li' yúgu'tëli'. Biti' irúajli' choplö, pero guli'gaca tuz ca rizá' ládxí'li', en ca runi lib'ili'. <sup>11</sup> Caní rea' lib'ili', böchi' luzá'ado', tu' gula'guíxjöi'inë' neda' bönni' nacu'ë lídxinu Cloé ca runli', ta'nné' ridil-la dídzala'li'. <sup>12</sup> Lë ni rnnia': Nadzá'lö didza' ru'ili' tu tulí'. Bál-lali' rnnali' dá'ali' Pablo. Ia'bál-lali' rnnali' dá'ali' Apolos. Ia'bál-lali' rnnali' dá'ali' Cefas, ate' ia'bál-lali' rnnali' dá'ali' Cristo. <sup>13</sup> ¿Naru' birúajtsé' choplö Cristo? ¿Naru' gudá'atsa' neda', Pablo, lë'e yaga cruz uláz queéli'? ¿Naru' bidílatsali' nisa para gácali' tuz len neda'? <sup>14</sup> Rea'-në' Dios: "Xclenu'", tu' cabí buquila' nisa niturö lib'ili', pero chópasé' Crispo, en Gayo. <sup>15</sup> Que lë ni na' biti' gaca innali' bidílali' nisa para gácali' tuz len neda'. <sup>16</sup> Lësca' buquila' nisa Estéfanos, en nupa nacuá' lidxë'. Biti' röjneda' channö buquila' nisa nu yübölö. <sup>17</sup> Gusöl-lë'ë Cristo neda', calëga para uquila' böñachi nisa, pero para guna' libán que didza' dxi'a. Ru'a didza', calëga lu yöl-la' rácada' que caza', para cabí ucách'a yöl-la' huáca que le benë' Cristo lë'e yaga cruz.

*Cristo napa cazë' yöl-la' huáca, en yöl-la' réajni'i queë' Dios*

<sup>18</sup> Nupa náca gaca chul-la niti téquiguequi cá'asö naca libán runru' ca naca queë' Jesús, ca na' gútië' lë'e yaga cruz, pero rë'u na' nuláru', réquibe'eru' dzaga le yöl-la' huáca queë' Dios le rusólá rë'u. <sup>19</sup> Caní naca, tu' nazúaj lu guichi lá'ayi le rnna:

Guna' ga huöáca nítisö yöl-la' rácada'  
quégaca nupa taca yenni'.

Tsölá'alö ucá'ana' yöl-la' réajni'i  
quégaca nupa ta'yéajni'i yenni'.

<sup>20</sup> ¿Bizxi caz uzi'tsë' xibé bönni' réajni'inë' yenni'? ¿Bizxi caz uzi'tsë' xibé bönni' nazédadë'ë? ¿Bizxi caz uzi'tsë' xibé bönni' nabé'ede'enë' ru'ë didza'? Dios chibenë' ga böáca cá'asö yöl-la' réajni'i quégaca böñachi yödzölió ni. <sup>21</sup> Dios, lu yöl-la' réajni'i queë', biti' bë'ë lataj ilúnbe'e böñachi yödzölió ni Lë' ni'a que yöl-la' rácada' quégacië'. Dios

guyaza ládxé'ë busölé' nupa ta'yéajlë' Lë' ni'a que libán na' runru', sal-la' téquiguequi bönachi cá'asö naca.

<sup>22</sup> Té'enné' yugu' bönni' judío illalé'ené' yöl-la' huáca nácagaca bë', ate' bönni' zi'tu' ta'guiljë' yöl-la' réajni'i. <sup>23</sup> Rë'u ni runru' libán queë' Cristo, ca na' gútië' lë'e yaga cruz. Le nácatë, libán runru' ca gútië' Cristo, run ga ta'chixi ta'nigui bönachi judío, ate' ia'zica'rö bönachi téquiguequi cá'asö naca. <sup>24</sup> Bönni' na' bulidzé' Dios légaquië', sal-la' nácagaquië' bönni' judío o bönni' zi'tu', téquibe'ené' napa cazë' Cristo yöl-la' huáca queë' Dios, en yöl-la' réajni'i queë' Dios. <sup>25</sup> Téquiguequi bönachi yödzölió ni le bené' Dios naca bë' biti' bi nőziné', pero lë na' bené' náparö yöl-la' réajni'i ca yöl-la' réajni'i quégaca bönachi. Téquiguequi le bené' Dios naca bë' nacuídi'në', pero lë na' bené' náparö yöl-la' huáca ca yöl-la' huáca quégaca bönachi. <sup>26</sup> Na'a, böchi' luzá'ado', gulitsöjné ca gúcali' cate' bulidzé' Dios libfili'. Biti' gula'cu'ë lädjali' zián bönni' ta'yéajni'iné' lu yöl-la' bönächisö quégagaquië', en biti' gula'cu'ë lädjali' zián bönni' unná bë', en caléga zián bönni' nácagaquië' lo. <sup>27</sup> Téquiguequi bönachi yödzölió ni yugu' bönni' na' guröe' Dios biti' bi nőzguequiné'. Caní bené' Dios para guné' ga ulu'tu'i nupa ta'yéajni'i. Lësca' caní guröe' Dios nupa nacuídi'gaca yödzölió ni para guné' ga ulu'tu'i nupa nál-lagaca. <sup>28</sup> Lësca' caní, téquiguequi bönachi yödzölió ni nupa na' guröe' Dios nácagaca cá'asö, en biti' bi nácagaca, en nacuídi'gaca. Caní bené' Dios para guné' ga ulu'gá'ana cá'asö lë na' tun zxön bönachi yödzölió ni. <sup>29</sup> Que lë ni na', cuntu nu gaca gun ba zxön cuini lahuë' Dios. <sup>30</sup> Dios caz bené' ga nácaru' tuz len Jesucristo, en bené' ga náparu' yöl-la' réajni'i queë' Cristo. Tu' náquië' Cristo tuz len rë'u, nuhuöácaru' tsahui', en néquiru' quez queë' Dios, en nuláru'. <sup>31</sup> Naca ca na' nazúaj lu guichi lá'ayi, le rnna: "Channö zoa nu bi ré'ëni gun zxön, ral-la' gun zxön Xanru'."

## 2

### *Libán runru' queë' Cristo, ca gudé'ë lë'e yaga cruz*

<sup>1</sup> Caní guca, böchi' luzá'ado', cate' bidxina' queéli'. Bena' libán loli' que xtídzé'ë Dios, caléga len yöl-la' réajni'i quia', en biti' bë'a didza' lu yöl-la' rácada' quia'. <sup>2</sup> Cate' ni' guzóalena' libfili', bë' ládxa'a cabí gu'a didza' que le yúbólö, pero ca nácatë queë' Jesucristo bë'a didza', ca na' gudé'ë lë'e yaga cruz. <sup>3</sup> Guzóalena' libfili' lu yöl-la' ricuidi' quia', ate' lu yöl-la' radxi quia' guzxízida'a. <sup>4</sup> Bé'lena' libfili' didza', en bena' libán que xtídzé'ë Dios, caléga ca tu'i didza' bönachi lu yöl-la' rácada' quéguequisö, pero guzóalené' Dios Bö' Lá'ayi neda', ate' guzóalen yöl-la' huáca queë' Dios neda', le guca bë' naca idútë li didza' bë'a. <sup>5</sup> Caní bena' para gaca tséajlë'ëli' Dios, caléga tu' biyónili' yöl-la' rácada' quégaca bönachi, pero tu' bilé'ëli' yöl-la' huáca queë' cazë' Dios.

### *Dios Bö' Lá'ayi runé' ga núnbé'ëru'-në' Dios*

<sup>6</sup> Ru'itu' didza' lu yöl-la' rácada' lógaca nupa chinácarö idú ca ta'yéajlë' Dios. Yöl-la' rácada' ni biti' naca ca le nápagaca bönachi yödzölió ni, en biti' naca ca le nápagaquië' bönni' ta'nná bë'ë dza ni zóaru' na'a, nupa na' ta'niti caz. <sup>7</sup> Ru'itu' didza' que yöl-la' rácada' nagachi', lë na' runödzjë' Dios, tu' bigachi' yöl-la' rácada' na' buzóë' Dios dza ni'te para uzi'iru' xibé. <sup>8</sup> Yugu' bönni' ta'nná bë'ë dza ni zóaru' na'a biti' gulúnbë'ë yöl-la' rácada' na'. La'tu' gulúnbë'ë le, biti' ulu'dé'ë Xanru' nayépisétérë' lë'e yaga cruz. <sup>9</sup> Naca ca na' nazúaj lu guichi lá'ayi le rnna:

Chinupé'ë Dios le ulu'zí' xibé nupa nadxf'iguequi Lë',  
yugu' le cuntu nu ble'e, en biti' biyóni,  
en biti' gula'zá' lädxi'gaca bönachi ca naca que.

<sup>10</sup> Na'a, Dios nuzéajni'iné' rë'u yugu' lë ni lu në'ë Dios Bö' Lá'ayi, tu' ruyú cazë' Dios Bö' Lá'ayi yúgu'të, enca' le yu'u icja ládxi'da'ahuë' Dios caz.

<sup>11</sup> ¿Naru' gaca inóziné' nu bönni' le yu'u icja láxdi'da'ahuë' ia'túë' bönni'? Tuz bö' naca cazé' bönni' na' nözi lë na'. Lësca' caní, cuntu nu nözi le yu'u icja láxdi'da'ahuë' Dios. Tuzé' Dios Bö' Lá'ayi nöziné' lë ni. <sup>12</sup> Rë'u ni, biti' nazí' lu ná'aru' tu bö' ridasö yödzölió ni, pero nazí' lu ná'aru' Dios Bö' Lá'ayi, Nu na' ruchízië' Dios rë'u para gaca gúnbe'ëru' yugu' le buzá' ládxë'ë Dios queéru'. <sup>13</sup> Yugu' lë na' buzá' ládxë'ë Dios queéru' ru'iru' didza' que, caléga len didza' tu'sédiné' bönachi rë'u len yöl-la' rácada' quéguequi, pero len yugu' didza' rusédiné' Dios Bö' Lá'ayi rë'u. Caní naca, ruzéajni'iru' bönachi zóalené' Dios Bö' Lá'ayi légaquië' ca naca le rusédiné' Dios Bö' Lá'ayi rë'u.

<sup>14</sup> Tu bönni' biti' zóalené' Dios Bö' Lá'ayi lë' biti' rizí' lu né'ë le rusédiné' Dios Bö' Lá'ayi rë'u, tu' réquiné' cá'asö naca. Biti' gaca tséajni'iné' bönni' na' lë ni, tu' gaca guéquibe'ené' tuzé' bönni' zóalené' Dios Bö' Lá'ayi lë' le nazaca' lë ni. <sup>15</sup> Tu bönni' zóalené' Dios Bö' Lá'ayi lë' gaca guéquibe'ené' le nazaca' yúgu'të, pero cuntu nu gaca guéquibe'e le nazaca' cazé' bönni' na'. <sup>16</sup> Nazúaj lu guichi lá'ayi le rnna:

¿Nuzxi caz nözi le rizá' ládxë'ë Xanru'?

¿Nuzxi caz gaca uzéajni'i Lë'?

Le rizá' ládxë'ë Cristo yu'u icja láxdi'do'oru' rë'u.

### 3

#### *Nácaru' huen dxin tsözxón len Dios*

<sup>1</sup> Que lë ni na', böchi' luzá'ado', biti' guca güí'lena' libí'ili' didza' ca ru'ilen'a'-në' didza' tu bönni' nudödi cuiné' lu né'ë Dios Bö' Lá'ayi, pero bë'lena' libí'ili' didza' ca ru'ilen'a' nu naca bönáchisö didza', biti' zóalené' Dios Bö' Lá'ayi nu na'. Nácali' ca yugu' b'i hué'ëni. Biti' nácali' tsutsu ca réajle'ëli'-në' Cristo. <sup>2</sup> Busédida' libí'ili' le cabí naca böniga, lë na' guca ca nidxi' güí'ili'. Biti' busédida' libí'ili' le naca böniga ca bëla' gáguli'. Biti' guca tséajni'ili' le naca ca bëla' gáguli', en biti' rácali' na'a. <sup>3</sup> Caní naca, tu' nácali' ca nu naca bönáchisö ga ridxitnë na'a dza. Tsanni ni ruzxé'eli' luzá'ali', en ridil-la dídzla'li', en rirúajli' choplö, nácali' ca nu naca bönáchisö, en runli' tuz ca tun bönachi yödzölió ni. <sup>4</sup> Cate' zóalen libí'ili' nu rnna da' Pablo nu na', en ia'tú nu rnna da' Apolos, nácali' ca nu naca bönáchisö.

<sup>5</sup> ¿Nuzxi caz naca' neda', Pablo? ¿Nuzxi caz na' Apolos? Nácatu' huen dxin queé' Dios, ate' ni'a que le bentu' guyéajlé'ëli' Cristo. Tu tutu' runtu' dxin na' benné' Xanru' que queéetu'. <sup>6</sup> Dxin bentu' lu icja láxdi'do'oli' naca ca dxin run nu raza ruzóa. Neda' guza' xisedo', ate' Apolos gulu'ë nisa, pero Dios bené' ga gulén, en guzxón xisedo' na' nadúz icja láxdi'do'oli'. <sup>7</sup> Caní naca, láti'do'os nazáquië'bönni' guz, en láti'do'os ca'bönni' rigu'ë nisa, pero nazáca'dë'ë Dios Nu run ga rilén, en rizxón xisedo' na'. <sup>8</sup> Tuz ca nácagaquië' bönni' razë', en bönni' rigu'ë nisa. Dios ubi'ë que queégaquië' tsca naca dxin runé' tu tuë'. <sup>9</sup> Nácatu' huen dxin tsözxón len Dios, ate' libí'ili' nácali' ca la' yëla queé' Dios ga runtu' dxin.

Lësca' caní nácali' ca tu yu'u runé' Dios. <sup>10</sup> Ca naca le buzá' ládxë'ë Dios quia', naca' ca tu bönni' huen zö'ö lo. Neda' gulu'a xilibi zö'ö, ate' nu yübölö richisa zö'ö na'. Tu turu' ral-la' uyuru' ca richísaru' zö'ö lahui xilibi zö'ö na'. <sup>11</sup> Dios chigulu'ë tu xilibi zö'ö le naca Lë cazé' Jesucristo, ate' cuntu nu gaca cu'u ia'tú xilibi zö'ö caní. <sup>12</sup> Dxin runru' queé' Cristo naca ca richísaru' zö'ö lahui xilibi zö'ö na'. Lahui xilibi zö'ö na' gaca nu gun dxin le naca ca richisa zö'ö le naca ca le néquini oro, o plata, o guíoj nazáca'da'gaca, o gaca nu gun dxin le naca ca richisa zö'ö le néquini yaga, o guizxi, o guixi' cá'asö. <sup>13</sup> Gaca bë' ca naca dxin nungaca tu tu bönachi. Cate' idxín dza ichúguië' Dios quégaca bönachi, ilá' lahui dxin nunru', tu' tödi dxin na' lu guí', ate' guí' na' si' bë' dxin nungaca tu tu bönachi. <sup>14</sup> Channö dxin nuné' tu bönni' urúaj dxi'a lu guí' na', le naca ca tu zö'ö guchisë', Dios ubi'ë queé' ca sa'yéaj dxin nuné'. <sup>15</sup> Channö tsegui dxin nuné' tu bönni' le naca ca tu zö'ö guchisë', unítië' le ré'ënë' ubi'ë Dios queé', pero ulá cazé' lë', ate' gaca queé' ca raca que nu rulá tu lu guí'.

<sup>16</sup> ¿Naru' cabí nőzili' naca cázali' yudo' queë' Dios, ate' zoë' Dios Bö' Lá'ayi icja ládxi'do'oli'? <sup>17</sup> Channö nu usuniti yudo' queë' Dios, Dios usunítië' nu na', tu' naca lá'ayi yudo' queë' Dios, ate' libíili' naca cázali' yudo' na'.

<sup>18</sup> Biti' si' ye'e cuinli'. Channö réqui nu nutsa' ladjali' rácada' ca tácilada' bönachi yödzölió ni, ral-la' huöáca nu na' ca tu bönni' biti' bi nőzinë', para gata' que yöl-la' rácada' le naca idú. <sup>19</sup> Nu bönni' napzë' yöl-la' rácada' que yödzölió ni náquië' tu bönni' biti' bi nőzinë' lahuë' Dios. Nazúaj lu guichi lá'ayi le rnna: "Dios runë' ga ila'chixi ila'nigui nupa tácilada', rugunë' dxin yöl-la' rácada' quéguequi." <sup>20</sup> Lësca' caní rnna: "Xanru' nőzinë' nítisö naca le ta'bequi ícagaca bönachi tácilada'." <sup>21</sup> Que lë ni na', biti' ral-la' gunli' zxön le gaca gunë' tu bönni'. Nequi queéli' yúgu'të. <sup>22</sup> Néquiguequi queéli':  
 Pablo, en Apolos, en Cefas,  
 en yödzölió ni,  
 en yöl-la' na'bán, en yöl-la' guti,  
 en dza ni zóaru' na'a, en dza si' za'.  
 Yúgu'të nequi queéli',  
<sup>23</sup> ate' libíili' néquili' queë' Cristo,  
 ate' Cristo néquinë' queë' Dios.

## 4

*Dxin tunë' bönni' gubáz nasö'l-lë'ë Cristo*

<sup>1</sup> Que lë ni na', ral-la' guéquili' nácatu' netu' huen dxin queë' Cristo, en nazí' lu na'tu' le nagachi' queë' Dios. <sup>2</sup> Yugu' bönni', Dios nudödë' lu ná'agaquië' ulu'gunë' dxin le nequi queë', run bayudxi ilunë' idú dxi'a le tunë'. <sup>3</sup> Biti' bi ru'i' ladjala' channö uchi'a usöröli' neda', o channö ulu'chi'a ulu'sörö bönachi yödzölió ni neda'. Biti' ca' ruchi'a rusörö cuina'. <sup>4</sup> Biti' ruxós ladjxi'da'ahua' neda'. Lë ni biti' naca bë' biti' nabága'a xíguia'. Xanru' náquië' Nu ruchi'a rusöröe' neda'. <sup>5</sup> Que lë ni na', biti' ral-la' uchi'a usöröli' nu bönni' zí'alö ca idxín dza que, Guli'cöz dza ni' huödë' Xanru', ate' Lë' ubéajé' ga liná' le nagachi' ga chul-la, en ulu'ë lahui le yu'u icja ladjxi'do'gaca yúgu'të bönachi. Ní'irö Dios ubi'ë que queégaca bönachi le gun bal léguequi ca ral-la' gaca quéguequi.

<sup>6</sup> Na'a, böchi' luzá'ado', ca naca lë ni, bë'a didza' que le runtu' netu', Apolos, en neda'. Huáca usédali' ca runtu' netu' para gunli' le nazúajsö lu guichi lá'ayi, en biti' gunli' zxön tuë' bönni', en biti' uzóali' tsölá'alö ia'túë'. <sup>7</sup> ¿Nuzxi bentsö ga nacu' li' lo? ¿Bizxi caz bidéli'nu' li' le cabí bennë' Dios quiu'? Channö Lë' bénnasë' quiu' lë na' dë lu no'o, ¿bizzx que run ba zxön cuinu', réquinu' rácasö quiu' bidéli'nu' lë na'?

<sup>8</sup> ¿Naru' réquitseli' nadéli'téröli'? ¿Naru' réquitseli' rilé'eli' yöl-la' tsahui' queéli'? ¿Naru' réquitseli' rinná bë'eli', sal-la' biti' rinná bë'etu' netu'? Ni'a queë' Xanru' Dios ré'ënda' inná bë'eli' para gaca inná bë'lentu' libíili' tsözxón. <sup>9</sup> Runi neda' naca queëtu', bönni' gubáz queë' Dios, ca nuzóë' netu' zéajtu' xibánitë ca na' raca quégäquië' bönni' chinarugu quégäquië' ilátië' lahui' lógaca bönachi. Nácatu' ca tu le tu'yuda' bönachi yödzölió ni, enca' ca tu le tu'yúdë'ë gubáz lá'ayi queë' Dios. <sup>10</sup> Tu' ré'ënitu' guntu' xichinë' Cristo, ru'i'itu' bönachi lataj téquiguequi nácatu' bönni' biti' bi nőzquequinë', pero libíili' réquili' rácada'ali' tu' nácali' queë' Cristo.

Libíili' réquili' chinál-lali',  
 pero téquiguequi bönachi nacuíd'i tu' netu'.

Tu'zóa bönachi netu' tsölá'alö,  
 pero tun libíili' bal.

<sup>11</sup> Ga ridxitë na'a dza, riduntu', en ribídxitu' nisa.  
 Biti' dë lari' gácutu'.

Tun bönachi netu' zi', en biti' zoa lídxitu'.

<sup>12</sup> Rusaca' zi' cuintu', la' nétu'sö runtu' dxin.

Tu'lidza bönachi netu' zi',  
pero netu' rinábatu' le gácalen léguequi.  
Ta'bía ládxi'gaca bönachi netu',  
pero ruá' rilento' le.

<sup>13</sup> Ta'nné' queétu',  
pero lu yöl-la' nöxaj ladxi' ruí'ilento' légaquië' didza'.  
Ga ridxitë na'a dza nácatu' ca bëbu que yödzölió ni,  
en ca tu le ta'rú'una yúgu'të bönachi.

<sup>14</sup> Ruzúaja' queéli' caní lu guichi, caléga tu' ré'ënda' guna' ga utu'ili', pero ré'ënda' uzéajni'ida' lib'ili', runa' ca runé' tu bönni' ruzéajni'iné' yugu' zxí'ini cazé' tu' nadxi'ine' légacabi'. <sup>15</sup> Sal-la' gaca zián gáyu'ë bönni' ila'cuá'alen lib'ili', en ulu'sédiné' lib'ili' ca naca queé' Cristo, tuz nu zoa naca ca xúzili', nu na' ben ga néquili' queé' Cristo. Lu yöl-la' na'bán cubi le nápalí' tu' dzágali' Cristo, neda' caz naca' ca xúzili' tu' busiyonda' lib'ili' didza' dxi'a. <sup>16</sup> Que lë ni na', ráta'yua' loli' gü'i ládxi'li' gunli' ca runa' neda'.

<sup>17</sup> Que lë ni na' ca' risól-la'a-bi' bi'i Timoteo ga zóali'. Tu' rúnlenbi' neda' dxin queé' Xanru' nácabi' ca zxí'ini caza', en nácabi' idú ladxi', ate' nadxi'ida'-bi'. Gunbi' Timoteo ga tsöjnélí' yugu' xibá russédida' tu' néquida' queé' Cristo, yugu' le russédida' yúgu'të lataj lógaca yúgu'të cò' bönachi queé' Cristo. <sup>18</sup> Bál-lali' run ba zxön cuinli' tu' réquili' bíti'rö udxina' ga zóali'. <sup>19</sup> Na'a, la' udxíntea' ga zóali' channö Xanru' gunnë' neda' lataj. Ní'irö guéquibe'eda', calégasö didza' tu'ë bönni' tun ba zxön cuíngaqüie', pero guéquibe'eda' channö zóalen yöl-la' huáca queé' Dios légaquië'. <sup>20</sup> Channö nazí' lu ná'ali' rinná bé'ené' Dios lib'ili', biti' naca bé' naca caní tu' rnmásili' ca'. Naca bé' naca caní channö zóalen lib'ili' yöl-la' huáca queé' Dios. <sup>21</sup> ¿Bízzilö ré'ënili'? ¿Naru' ré'ënili' udxina' ga zóali' len gubá'ayi, para guna' lib'ili' zi', o len yöl-la' nadxi'i, en lu yöl-la' nöxaj ladxi'?

## 5

*Pablo ruchi'a rusöröë' tuë' bönni' runé' le ruá' dö'*

<sup>1</sup> Rizé' didza' zóalené' lib'ili' tuë' bönni' runé' le ruá' dö', tu' zóalené' nigula queé' xuzé'. Le ruá' dö' caní biti' ca' tun bönachi biti' núnbe'gaca Dios. <sup>2</sup> Lib'ili' run ba zxön cuinli', pero ral-la' hu'linili', en ubéajli' nu na' run dul-la' na' ga zóali'. <sup>3</sup> Sal-la' biti' zóalena' lib'ili' lu idútë le naca', le nácaté zóalena' lib'ili' lu bö' naca caza'. Ca chizóalen caza' lib'ili' chibuchi'a busöröa' nu na' run dul-la' na'. <sup>4</sup> Cate' udúbili' queé' Xanru' Jesucristo guna' lib'ili' tsözxón lu bö' naca caza'. Ní'irö, len yöl-la' huáca queé' Xanru' Jesús <sup>5</sup> buli'döde' bönni' na' lu na' Satanás tu' xihui' para initi idútë le naca cazé', pero ulá bö' naca cazé' dza ni' huödë' Xanru'.

<sup>6</sup> Biti' naca dxí'a gun ba zxön cuinli' ca naca le runli'. ¿Naru' cabí nözili' didza' na' rnna: "Cua zido'os que yöta xtila gun ga chazxaj idútë cúa nazí'i le"? <sup>7</sup> Na'a, guli'cúa ga zóali' dul-la' na' le naca ca tu cúa zi gulás, para gácali' dxi'a. Ní'irö gácali' ca tu cúa cubi le cabí nazí'i cúa zi que, ca na' le nácaté chinácali'. Naca queéru' ca chizóaru' Laní Pascua cate' tahuë' yöta xtila biti' nazí' cúa zi que, en chigulútië'-ba' uláz queéru' bö'cu' zxila' que Laní Pascua na', bö'cu' zxila' na' náquië' Lé cazé' Cristo. <sup>8</sup> Que lë ni na' ral-la' gunru' laní na', caléga zóalen rë'u cúa zi gulás na' le rulu'i le ruá' dö', en le cabí nazaca', pero ral-la' ugunru' dxin yöta xtila na' biti' nazí'i cúa zi que, yöta xtila na' rulu'i le naca idú dxi'a, en le naca idútë li.

<sup>9</sup> Cate' buzúaja' queéli' lu guichi zí'alö, gudxi caza' lib'ili' biti' gunli' tsözxón bönni' tuné' le ruá' dö'. <sup>10</sup> Gudxa' lib'ili' caní, caléga para ucuítali' tsaz ga nacuá' bönachi yödzölió ni, nupa tun le ruá' dö', en ga nacuá' bönachi ta'zé ládxi'gaca le dë que luzé'eguequi, en ga nacu'ë yugu' bönni' gubán, en bönachi ta'yéaj ládxi'gaca budó' guiój budó' yaga. Para gunli' caní gun bayudxi irúajli' yödzölió ni. <sup>11</sup> Le ré'ëni inná didza' na' buzúaja' queéli' zí'alö naca para cabí gunli' tu zxön tuë' bönni' rnmé' néquiné' queé'

Cristo, pero runié' dul-la' le lë'e, o rizé ládxé'ë le dë que luzé'ë, o reaj ládxé'ë tu budó' néquini, o rinné xihuë'ë, o rizúdxiné', o ribané'. Biti' ca' gágulenli' tsözxón tué' bönni' caní. <sup>12-13</sup> Biti' nequi quia' neda' uchi'a usöröa' nupa biti' nabábagaca rë'u. Dios uchi'a usöröe' léguequi. Libí'i cázali' ral-la' uchi'a usöröli' nupa nabábagaca libíili'. Que lë ni na', gulí'cúé' ga zóali' bönni' xihui' na'.

## 6

*Biti' ral-la' iché'ëru' böchi' luzá'aru' lógaca bönachi yúlahui'*

<sup>1</sup> Cate' ridil-la dídza'li' tuli' len ia'tuli', ¿nacxi caz rurúguili' tséajli' yúlahui' ga ulu'chi'a ulu'sörö nupa biti' ta'yéajlë' Cristo libíili'? Dxi'arö tséajli' lógaca bönachi queé' Cristo para ulu'chi'a ulu'sörö libíili'. <sup>2</sup> ¿Naru' cabí nözili' nupa néquiguequi queé' Cristo ral-la' ulu'chi'a ulu'sörö yúgu'të bönachi yödzölió? Channö libí'i cázali' uchi'a usöröli' bönachi yödzölió, ¿naru' cabí nápali' yöl-la' réajni'i uchi'a usöröli' didza' bizxaj caní? <sup>3</sup> ¿Naru' cabí nözili' ral-la' uchi'a usöröru' yugu' gubáz lá'ayi? Rúnterö bayudxi uchi'a usöröru' le taca yödzölió ga ni zóaru' na'a. <sup>4</sup> Na'a, channö raca tu le run bayudxi nu uchi'a usörö, lë na' raca yödzölió ni, ¿bizx que rucuá'ali' nupa ulu'chi'a ulu'sörö le, nupa na' biti' bi dë lu né'eguequi ládjagaca bönachi queé' Cristo? <sup>5</sup> Rnnía' caní para guna' ga utu'ili'. ¿Naru' cabí zóalen libíili' nu raca lati' nu gaca uchi'a usörö le raca quégaquië' böchi' luzá'ali'? <sup>6</sup> ¿Nacxi caz gaca tu bönni' réajlë'ë Cristo iché'ë böchi' luzé'ë yúlahui' ga ulu'chi'a ulu'sörö bönachi biti' ta'yéajlë' Cristo légaquië'?

<sup>7</sup> Le nácatë richixi riníguili' tu' ridil-la dídza'li'. ¿Bizx que biti' guá' ilenli' nu ruá' dö' queéli'? ¿Bizx que biti' guá' ilenli' nu rucáchi'lan le dë queéli'? <sup>8</sup> Libíili' ruá'ali' dö', en rucachi' lanli', ate' runli' caní quégaquië' böchi' luzá'ali' ta'yéajlë'ë Cristo.

<sup>9-10</sup> ¿Naru' cabí nözili' biti' ila'yaza bönachi biti' nácagaca tsahui' ga rinná bë'ë Dios? ¡Biti' si' ye'e cuinli'!

Biti' ca' tsaz ga rinná bë'ë Dios nu run le ruá' dö':

Cuntu nu reaj ladxi' budó' guiój budó' yaga,  
en cuntu nu riguitsaj xibá que yöl-la' nutsaga na',  
en cuntu nu bönni' run cuiné' ca nigula,  
en cuntu nu bönni' zóalenë' la' luzé'ë bönni'së',  
en cuntu nu bönni' gubán, en cuntu nu ruhuidi',  
en cuntu nu rizudxi, en cuntu nu rinné xihui',  
en cuntu nu rucáchi'lan.

Biti' ca' tsaz nu run caní ga rinná bë'ë Dios.

<sup>11</sup> Caní gúcali' bál-lali' libíili', pero na'a chinuhuöácali' dxí'a que dul-la' gubága'li', en chinéquili' quez queé' Dios, en chinuhuöácali' tsahui' ni'a que le bené' Xanru' Jesú. Bö' Lá'ayi queé' Dios runé' ga raca caní.

*Idútë le naca cázaru' nequi quez queé' Dios*

<sup>12</sup> Ta'nná bönachi: "Yúgu'të dë lataj gunru'." Sal-la' nácatë didza' ni, biti' ral-la' gunru' yúgu'të. Sal-la' dë lataj gunra' yúgu'të, biti' gu'a lataj bi inná be'e neda'. <sup>13</sup> Ta'nná ca' bönachi: "La' huagu naca le tsaz lë'ëru', ate' lë'ëru' naca ga tsudzu la' huagu." Nácatë didza' ni, pero idxín dza usunítië' Dios la' huagu, enca' lë'ëru'. Dios bené' idútë le naca cázaru', calëga para ugunru' le dxin gunru' le ruá' dö'. Naca para uzi'ë xibé Xanru', ate' Xanru' náquië' para uzi' xibé' idútë le naca cázaru'. <sup>14</sup> Dios busubané' Xanru' Cristo lu yöl-la' guti. Lësca' caní, len yöl-la' huáca queé' usubané' rë'u.

<sup>15</sup> ¿Naru' cabí nözili', idútë le nácali' naca tuz len le naca cazé' Cristo? ¿Nacxi caz gaca cúali' tu le da' Cristo, en gunli' ga ta' tu nigula udá dzaga? ¡Biti' ca' ral-la' gunli' caní! <sup>16</sup> ¿Naru' cabí nözili' channö tu bönni' zóalenë'-nu nigula udá dzaga, náquië' tuz

len lënu? Ca naca lë ni nazúaj lu guichi lá'ayi le rnna: "Ilácagaquië' ca tuz bönachi iropë' na." <sup>17</sup> Na'a, nu bönni' náquië' tuz len Xanru', náquië' tuz len Lë' lu bö' naca cazë'.

<sup>18</sup> Que lë ni na', biti' ca' gunli' le ruá' dö'. Bíti'tës dul-la' yúbölö runë' tu bönni', ní'lö lu le naca cazë' runë' dul-la' na'. Nu bönni' runë' dul-la' le lë'ë, runë' dul-la' le dzaga lë cazë'. <sup>19</sup> ¿Naru' cabí nòzili' idútë le naca cázali' naca yudo' queë' Dios Bö' Lá'ayi? Dios caz nuchizë' Dios Bö' Lá'ayi na' libí'ili', ate' Lë' zoë' icja ládzi'do'oli'. Que lë ni na' biti' nequi queézili' idútë le naca cázali'. Na'a, nequi queë' Dios. <sup>20</sup> Dios gú'uë' libí'ili' len tu le zxön le gudizxjé'. Guli'gún dxin idútë le nácali', enca' bö' naca cázali' para gaca queë' Dios yöl-la' ba, tú' néquiguequi queë' Dios idútë le naca cázali', enca' bö' naca cázali'.

## 7

*Rusédiné' Pablo ca naca que yöl-la' nutsaga na'*

<sup>1</sup> Na'a, ubi'a didza' yugu' le rinábili' neda', le buzúajli' quia' lu guichi. Gácarö dxi'a queë' nu bönni' channö cabí sóalenë'-nu nigula. <sup>2</sup> Tu' tunda' bönachi le ruá' dö' ga ni' zóali', yúgu'të bönni' nabábaguacië' libí'ili' ral-la' ila'cuá'lenë'-nu nigula que queégaquië', ate' yúgu'të nigula ral-la' ila'cuá'lennu-në' bönni' que queégacanu. <sup>3</sup> Bönni' na' zóanu nigula queë' ral-la' gunë' queénu nigula queë' ca naca yöl-la' run que yöl-la' nutsaga na', en la' lóbisö ral-la' gunnu nigula len bönni' queénu. <sup>4</sup> Biti' dë lu ná'asönu nigula le naca cázanu, pero bönni' queénu dë lu në'ë ca' le. Lësca' caní, biti' dë lu ná'asë' bönni' le naca cazë', pero nigula queë' dë lu ná'anu ca' le. <sup>5</sup> Biti' ral-la' ila'dá'baguë' luzá'agaquië' bönni', en nigula na', nutsaga ná'agaquië'. Huácasö ca' channö ilunë' tuz didza' biti' ila'dzáguië' tu chí'isö para gaca ulu'lidzë' Dios idú' ládzi'gaquië'. Tödi na', bönni' na' ral-la' sóalenë'-nu nigula queë' leyúbölö, para cabí sequi' Satanás tu' xihui' gun ga tsázagaquië' nöza dul-la' tu' cabí gaca ila'nná be'e cuíngaquië'.

<sup>6</sup> Lë ni rea' libí'ili' naca tu le runnë' Xanru' libí'ili' lataj. Biti' naca le gunná bë'ë. <sup>7</sup> Runi neda' gácarö dxi'a ulu'gá'anë' tuz yúgu'të bönni', ca na' zoa' tuza' neda'. Tu tuë' bönni' rizi'ë tsca le runödzjé' Dios queë' gunë'. Tuë' rizi'ë tu le runödzjé', ate' ia'túë' rizi'ë ia'tú le runödzjé'.

<sup>8</sup> Na'a, rea' nupa zóagaca tuz, enca' yugu' nigula uzëbi, gácarö dxi'a quéguequi ulu'gá'ana tuz ca na' zoa' tuz neda'. <sup>9</sup> Channö cabí gaca ila'nná be'e cuíngaquië', huáca ulu'tsaga ná'agaquië', tu' gácarö dxi'a ulu'tsaga ná'agaquië', en cabí ila'zé ládzi'gaquië' le ruá' dö'.

<sup>10</sup> Rinná bë'eda' nupa chinutsaga né'eguequi, en calëga néda'sö runa' xibá ni, pero Lë cazë' Xanru' runë' le, rnnë': "Biti' ulá'alennu tu nigula bönni' queénu." <sup>11</sup> Channö nu nigula ulá'alennu-në' bönni' queénu, ral-la' ugá'anamu túzinu, o huóácanu tuz len bönni' queénu na'. Lësca' caní tu bönni' biti' ral-la' ucá'anë'-nu nigula queë'.

<sup>12</sup> Na'a, néda'sö rea' ia'zíca'rö bönachi, en calëga rnnë' Xanru' caní, rnnía': Channö zoë' nu böchi' luzá'aru' réajlé'ë Cristo, ate' nigula queë' biti' réajlé'ënu Xanru', en channö ré'ënин ugá'analennu lë', biti' ral-la' ulá'alenë'-nu. <sup>13</sup> Lësca' caní rnnía': Channö zóanu nu nigula zanru' réajlé'ënu Cristo, ate' bönni' queénu biti' réajlé'ë Xanru', en channö ré'ënnë' ugá'analenë'-nu, biti' ral-la' ulá'alen lë'. <sup>14</sup> ¡Caní ral-la' ilunë'! Bönni' cabí réajlé'ë na', Dios rilé'enë' lë' ca tu bönni' néquinë' quez queë' tu' náquië' tuz len nigula queë' réajlé'ënu Cristo, ate' nigula caní, biti' réajlé'ënu, Dios rilé'enë'-nu ca tu nigula néquinu quez queë' tu' nácanu tuz len bönni' queénu náquië' böchi' luzá'aru' réajlé'ë Cristo. La'tu' cabí naca caní, ilácabi' zxí'inigaquië' ca yugu' bi'i lan lahuë' Dios. Na'a, nácagacabi' quez queë' Dios. <sup>15</sup> Nu bönni' o nigula nu cabí réajlé'ë Cristo, channö ré'ëni ulá'alen nu na' nutsaga ná'alen, huáca ca'. Biti' run bayudxi ugá'analen nu na' böchi' luzá'aru' o zanru' nu réajlé'ë Cristo, tu' bulidzë' Dios rë'u para cójzaru' tsáhui'do'. <sup>16</sup> ¡Caní

ral-la' gaca! Nadxi ca' li', nigula, huáca gunu' ga ulé' bönni' quiu', ate' nadxi ca' li', bönni', huáca gunu' ga ulanu nigula quiu'.

<sup>17</sup> Ral-la' gunru' tu turu' tsca le bennë' queéru' Xanru', enca' tsca guca queéru' cate' bulidzë' Dios rë'u para guéquiru' queë'. Rusédida' yúgu'të cö' böñachi queë' Cristo xibá ni. <sup>18</sup> Channö Dios bulidzë' nu bönni' narugu lu xipélë'ë le naca bë' néquinë' queë' Dios, ral-la' ugá'anë' caní, zoa lu xipélë'ë lë na' naca bë'. Lësca' caní, channö Dios bulidzë' nu bönni' biti' narugu lu xipélë'ë lë na' naca bë', biti' ral-la' ichúguië' lë na' lu xipélë'ë. <sup>19</sup> Biti' bi nazaca' lë na' narugu lu xipélë'ë tu bönni', en channö biti' narugu lu xipélë'ë bönni' lë na' naca bë', biti' bi nazaca'. Le nácadá' lesaca' naca gunru' ca rinná bë' xibá queë' Dios. <sup>20</sup> Ral-la' ugá'anë' tu tuë' bönni' ca na' gúquië' cate' ni' bulidzë' Dios lë'. <sup>21</sup> Channö bulidzë' li' cate' ni' nacu' bönni' nadó'o, biti' cö' u böñiga tu' nacu' caní, pero channö gata' quiu' lataj iruju' lu na' xanu', buzí' xibé lataj na' gata' quiu' iruju'. <sup>22</sup> Channö bulidzë' Xanru' nu bönni' cate' ni' nado'ë, lahuë' Xanru' náquië' ca nu bönni' narúajë' lu në'ë xanë' na', para gunë' xichinë' Xanru'. Lësca' caní, channö bulidzë' Xanru' nu bönni' cate' ni' narúajë' lu në'ë xanë' na', bönni' ni náquië' ca tu bönni' nadó'o queë' Cristo. <sup>23</sup> Zxóntérö le gudizzjë' Dios, gú'uë' libí'ili'. Que lë ni na' biti' ral-la' guti' cuinli' lu ná'agaca böñachi. <sup>24</sup> Que lë ni na' ca', böchi' luzá'ado', ral-la' sóali' lahuë' Dios tsca guca queéli' tu tuli' cate' ni' bulidzë' Dios libí'ili'.

<sup>25</sup> Ca naca quégaca nupa biti' nutsaga ná'agaca, biti' bi gunná bë'enë' Xanru' neda'. Caní runi neda', ate' huáca uzxöni ládxí'li' neda' tu' ruhuéchi' ládxë'ë Xanru' neda'. <sup>26</sup> Tu' taca zián le raca queéru' dza ni zóaru' na'a, runi neda' gácarö dxi'a channö ulu'gá'anë' yúgu'të bönni' ca nácagaquië' na'a. <sup>27</sup> Channö nutsaga ná'lenu'-nu nigula, biti' ulá'alenu'-nu. Lësca' caní, channö zu' tuzu', biti' quilju' tu nigula para utsaga ná'lenu'-nu. <sup>28</sup> Na'a, channö utsaga ná'lenu'-nu nigula, biti' gunu' dul-la', en channö tu bi'i nigula utsaga ná'alenbi'-në' bönni', biti' gunbi' dul-la', pero ila'gu'i ila'zaca' nupa nutsaga ná'agaca yödzölió ni, ate' ré'ënda' guna' ga uláli' lu yöl-la' rigui'i rizaca' na'.

<sup>29</sup> Na'a, rea' libí'ili' lë ni, böchi' luzá'ado'. ¡Chizóa idxín dza údxi! Que lë ni na', yugu' bönni' nutsaga ná'lengaquië'-nu nigula ral-la' ilu' ládxí'gaquië' Dios, ca runë' nu bönni' biti' nutsaga ná'alenë' nigula. <sup>30</sup> Lësca' caní, nupa ta'bödxi yechi' ral-la' ulu'dzeja lahuë' Dios ca run nu biti' ribödxi, ate' nupa tu'dzeja ral-la' ila'cuá' nöxaj lahuë' Dios ca run nu biti' rudzeja, ate' nupa to'o ral-la' ilaca ca nu biti' bi dë que. <sup>31</sup> Nupa tu'gún dxin le dë yödzölió ni ral-la' ilaca ca nu biti' ru'i ladxi' le dë yödzölió ni, tu' udödi quégaca le rilé'eru' yödzölió ni.

<sup>32</sup> Ré'ënda' biti' ubi ugu'iili'. Tu bönni' biti' zóanu nigula queë' ru'i ládxë'ë le nequi queë' Xanru', naca gunë' le raza ládxë'ë Xanru'. <sup>33</sup> Tu bönni' nutsaga ná'lénë'-nu tu nigula ru'i ládxë'ë le raca yödzölió, naca gunë' le raza ládxí'nu nigula queë'. <sup>34</sup> Lësca' caní raca queénu tu nigula nutsaga ná'lennu-në' bönni', en queénu nigula na' zóanu túzinu. Nigula na' zóanu túzinu ru'i ládxí'nu le nequi queë' Xanru', naca sóanu quez queë' Dios lu le naca cázanu, en lu bö' naca cázanu. Nigula na' nutsaga ná'lennu-në' tu bönni' ru'i ládxí'nu le raca yödzölió ni, naca gunnu le raza ládxë'ë bönni' queénu.

<sup>35</sup> Yugu' lë ni rea' libí'ili' para uzí'ili' xibé lë ni, en caléga para uzága'a xinőzili'. Ré'ënda' gunli' le ral-la' gunli', para gunli' xichinë' Xanru' idú ládxí'li'.

<sup>36</sup> Channö zoë' tu bönni' réquinë' biti' naca dxi'a ugá'anabi' túzibi' bi'i nigula ra'bando' queë', en chizóa iz queébi', en ré'ënidé'ebi' utsaga ná'alenbi'-në' bönni', huáca utsaga ná'alenbi'-në'. ¡Biti' gunbi' dul-la'! <sup>37</sup> Channö chinún tsutsu xtídzë'ë bönni' na', en biti' run bayudxi gunë' caní, en dë lu në'ë naca gunë', en chinún tsutsu xtídzë'ë ugá'anabi' túzibi', gunë' le naca dxi'a bönni' na'. <sup>38</sup> Caní naca, nu ru'i lataj bi'i que utsaga ná'alenbi'-në' bönni', run le naca dxi'a, pero nu run ga ugá'anabi' túzibi' run le nácarö dxi'a.

<sup>39</sup> Nigula na' nutsaga ná'lennu-në' bönni', rinná be'e xibá que yöl-la' nutsaga na' lënu tsanni ni zoë' nabane' bönni' queénu. Channö gátië' bönni' queénu, gata' lu ná'anu

utsaga ná'lennu-në' nu bönni' ré'ënину, channö réajlë'ë Xanru' bönni' na'. <sup>40</sup> Runi neda' gácarönu bica' ba channö ugá'anamu túzinu, en réquida' Bö' Lá'ayi queë' Dios runë' neda' tzazxön.

## 8

*Le ta'gú'u bönnachi lógaca budó' guiój budó' yaga*

<sup>1</sup> Na'a, gu'a didza' ca naca que le rë'aj ráguru', lë na' gula'gú'u bönnachi lógaca budó' guiój budó' yaga. Ta'nná bönnachi: "Yúgu'téru' náparu' yöl-la' réajni'i." ¡Nácatë didza' ni! Yöl-la' réajni'i caní run ga run ba zxön cuinru', pero yöl-la' nadxi'i queëru' luzá'aru' run ga rácalenru' luzá'aru'. <sup>2</sup> Channö zoë' nu bönni' réquinë' chiréajni'inë', biti' bi réajni'ininë' ca ral-la' tséajni'inë', <sup>3</sup> pero nu bönni' nadxi'inë' Dios, Dios caz zóalenë' bönni' na'.

<sup>4</sup> Na'a, ca naca que le rë'aj ráguru', lë na' gula'gú'u bönnachi lógaca budó' guiój budó' yaga, nőziru' biti' bi nazáca'gaca budó' guiój budó' yaga na' yödzölió ni, en cínturö nu zoa naca Dios. <sup>5</sup> Sal-la' nacuá' le téquiguequi bönnachi nácagaca dios, le nacuá' lúzxiba, en le nacuá' luyú, ate' zián le tu'lidza bönnachi, en tu'i lágaca: dios, enca': xan, <sup>6</sup> pero queëru' rë'u:

Tuzë' náquië' Dios, Lë' Xuz.

Lë' benë' yúgu'té le rilé'eru',  
ate' zóaru' nabanru' para tseaj ládxí'ru' Lë'.

Tuzë' náquië' Xanru', Lë' Jesucristo.

Lu në'ë Lë', Dios benë' yúgu'té le dë,  
ate' nabániru' Lë'.

<sup>7</sup> Caléga yúgu'té böchi' luzá'aru' ta'yéajni'inë' lë ni. Bal-lë', nupa ni' zí'alö gula'yéaj ládxí'gaca budó' guiój budó' yaga, ga ridxité na'a dza té'aj tahuë' le gula'gú'u bönnachi lógaca budó' guiój budó' yaga, ate' téquinë' napa yöl-la' huáca que budó' na'. Tu' cabí naca idú ládxí'gaquië', que lë ni na' téquinë' nabága'gaquië' xíguia' channö tahuë' lë na'.

<sup>8</sup> Biti' gun le guí'aj gáguru' ga gunë' Dios rë'u bal. Channö gáguru' le, biti' gácaröru' dxi'a, en channö cabí gáguru' le, biti' gácaröru' cá'asö. <sup>9</sup> Dë lu ná'ali' guí'aj gáguli' bíti'tës. Guli'gún chi'i cuinli' para cabí gunli' ga ila'chixi ila'nigui nupa biti' naca idú ca ta'yéajlë' Cristo. <sup>10</sup> Nadxi ca' li' réquinu' napu' yöl-la' réajni'i ca naca lë ni, en huáca gagu' bíti'tës. Channö cö'u xilataj budó' guiój budó' yaga, en guí'aj gagu' le gula'gú'u bönnachi lo budó' guiój budó' yaga na', ate' channö nu böchi' luzó'o biti' naca idú ládxë'ë ilé'enë' li', rö'u ragu' ni', nadxi ca' gunu' ga gahue' lë na' gula'gú'u bönnachi lo budó' guiój budó' yaga na'.

<sup>11</sup> Caní gaca, tu' réquinu' napu' yöl-la' réajni'i, gunu' ga ichixi iníguinë' böchi' luzó'o biti' naca idú ládxë'ë. ¿Naru' guntso' caní queë' böchi' luzó'o, ni'a que nu na' gútië' Cristo?

<sup>12</sup> Channö caní gunu', gunu' dul-la' tu' usubágú'u böchi' luzó'o xíguia', en gunu' ga ichixi iníguinë' tu' cabí naca idú ládxë'ë, en gunu' ca' dul-la' le ruzúa Cristo tsölä'alö. <sup>13</sup> Que lë ni na', channö le guí'aj gahua' gun ga ichixi iníguinë' böchi' luzá'a, bíti'rö gahua' bëla' na', para cabí guna' ga gunë' böchi' luzá'a dul-la'.

## 9

*Le dë lu në'ë nu bönni' gubáz nasól-lë'ë Cristo*

<sup>1</sup> ¿Naru' cabí naca' gubáz nasól-lë'ë Cristo? ¿Naru' cabí nadeli'da' yöl-la' rusölä? ¿Naru' cabí bilé'eda'-në' Xanru' Jesús? ¿Naru' cabí nácali' queë' Cristo ni'a que dxin bena' neda' uláz queë' Xanru'? <sup>2</sup> Nadxi ca' téquiguequi ia'zíca'rö bönnachi biti' naca' gubáz nasól-lë'ë Cristo. Libíili' run bayudxi guéquili' naca' gubáz queë' Cristo. Tu' nácali' queë' Xanru', le naca cázali' naca bë' naca' gubáz nasól-lë'ë Xanru'.

<sup>3-4</sup> Nacuá' nupa ta'zí' quidza' neda'. Caní rubi'a didza', rea' légaquië': Dë lu na'a inaba' le guí'aj gahua' tu' runa' dxin ni. <sup>5</sup> Lësca' caní dë lu na'a utsaga ná'alena'-bi' tubi' bi'i

nigula zanru' réajlë'ëbi' Cristo para gunbi' neda' tsözxón ga ridá', ca na' tunë' ia'zíca'rë' gubáz nasól-lë'ë Cristo, en yugu' bönni' bóchë'ë Xanru', enca' Pedro. <sup>6</sup> ¿Naru' réquili' tuza' neda', en Bernabé ral-la' guntu' dxin lahui' dza, para idzölitu' le gágutu'? <sup>7</sup> ¿Nuzxi caz bönni' rejé' gudil-la, ate' riguizxjé' la' cuinsé'? ¿Nuzxi caz bönni' rudé'ë tu la' yëla que lubá uva, en biti' rahuë' le ribía lubá na'? ¿Nuzxi caz bönni' rapa chi'ë-ba' bö'cu' zxila', en biti' re'jé' nidxi' quégacaba'? <sup>8</sup> Biti' guéquili' la' néda'sö ruá'a caní didza'. Lësca' caní rnna le nazúaj lu guichi lu xibá queë' Moisés. <sup>9</sup> Lu xibá queë' Moisés nazúaj lu guichi le rnna: Biti' cu'u du rúa'aba' bëdxi cate' rul'biba' zxoa' xtila. Bë'ë Dios didza' ni, calégasö tu' ru'i ládxë'ë-ba' bëdxi, <sup>10</sup> pero para uzi'iru' ca' xibé rë'u. Que lë ni na' nazúaj lu guichi didza' na', ate' bönni' na' rugá'anë'-ba' bëdxi, enca' bönni' na' runë' ga tu'l'biba' bëdxi zxoa' xtila, iropë' na' ral-la' ilunë' löza ila'zi'ë que le rulá' luyú na'. <sup>11</sup> Na'a, channö bentu' dxin ga zóali', le naca ca dxin guz gú'una, lë na' naca queë' Dios Bö' Lá'ayi, ¿naru' réquitseli' biti' ral-la' uzí'itu' xibé tu le do' dë queéli' ca na' ruzi'ë xibé bönni' guz gú'una le rulapë'? <sup>12</sup> Ia'zíca'rö bönachi tu'zéajni'inë' libf'ili' tu'zi'ë xibé le dë queéli'. ¿Naru' cabí rála'tëro uzí'itu' xibé netu' le dë queéli'?

Catu caz buzi'tu' xibé lë ni dë lu na'tu', pero biá' gulento' yúgu'të para gaca guntu' libán que didza' dxí'a ca naca queë' Cristo. <sup>13</sup> Nöz quézili' ca raca quégaca nupa tun dxin que yudo', tu'zí' xibé gun que yudo'. Lësca' caní nupa ta'gú'u rön quégacaba' bö'a' bëdxi lu bucugu lá'ayi queë' Dios, tahuë' bëla' quégacaba' bö'a' bëdxi na'. <sup>14</sup> Lësca' caní nuzóe' Xanru' ca ral-la' gaca quégacaba' bönni' tunë' libán que didza' dxí'a. Nupa tu'zí' xibé libán na' tunë' ral-la' ulu'gagu légaquië'. <sup>15</sup> Neda' catu caz buzi'a xibé lë ni dë lu na'a, ate' lë ni ruzúaja' lu guichi ni biti' naca le rinábini nu bi gunna quia'. Run ba zxön cuina' tu' cabí nazxja' cate' runa' libán que didza' dxí'a. Gué'ënítéra' gátia' ca gu'a lataj nu inné runa' libán na' tu' nazxja'.

<sup>16</sup> Biti' dë lu na'a gun ba zxön cuina' tu' runa' libán que didza' dxí'a, tu' run bayudxi guna' libán que. Bica' bayechi' neda' channö cabí guna' libán que didza' dxí'a. <sup>17</sup> La'tu' runa' libán tu' rë'ëni quézida', huáca inaba' lazxja', pero run bayudxi guna' libán, tu' naca tu le busubáguë'ë Dios neda' guna'. <sup>18</sup> ¿Bizzxi lazxja' uzi'tsa' xibé channö? Ruzi'a xibé le raza ládx'a' tu' cabí nazxja' cate' runa' libán que didza' dxí'a. Biti' ca' ruzi'a xibé lë na' dë lu na'a tu' runa' libán que didza' dxí'a.

<sup>19</sup> Na'a, sal-la' cuntu nu yu'a lu në'e, chibén cuina' ca tu bönni' nadó'o quégaca yúgu'të bönachi para gaca guna' ga ulu'lágaca ziánrö ca' bönachi. <sup>20</sup> Cate' runa' libán lógaca bönachi judío, run cuina' ca tu bönni' judío para gaca guna' ga ulu'lágaca bönachi judío na'. Bönachi judío na' tun ca rinná bë' xibá queë' Moisés. Que lë ni na' run cuina' ca tu bönni' runë' ca rinná bë' xibá na' sal-la' biti' yu'a lu na' xibá na'. Caní runa' para gaca guna' ga ulu'lágaca nupa tun ca rinná bë' xibá na'. <sup>21</sup> Cate' runa' libán lógaca bönachi izá'a, nupa biti' rinná be'e xibá queë' Moisés léguequi, run cuina' ca tu bönni' zi'tu' na', para gaca guna' ga ulu'lé'. Biti' rucá'ana' cá'asö xibá queë' Dios. Neda' runa' ca rinná bë' xibá queë' Cristo. <sup>22</sup> Run cuina' ca tu bönni' biti' naca idú ca réajlë'ë Cristo para gaca guna' ga ulu'lágaca nupa na' biti' naca idú ca ta'yéajlë' Lë'. Run cuina' ca nácagaca yúgu'të bönachi para gaca guna' ga ulu'lágaca bal-la bönachi na'. <sup>23</sup> Lu yúgu'të lë ni runa', runa' ga ta'yöni bönachi didza' dxí'a, para gaca uzi'a xibé tsözxón len libf'ili' didza' dxí'a na'.

<sup>24</sup> Chinóz quézili' ca tunë' bönni' nútsa'gaquië' lu huitaj. Ta'xíti'ë yúgu'të', pero tuzë' bönni' idéli'në' uzi'ë xibé lataj lo. Lësca' caní ral-la' gunli' xichinë' Dios, gácali' ca bönni' nútsa'gaquië' lu huitaj, para idéli'li' uzi'ili' xibé le ubi'ë Dios queéli'. <sup>25</sup> Yúgu'të bönni', cate' tu'pá'a cuíngacaba' para gaca ila'yázi' lu huitaj, ta'nná be'e cuíngacaba' lu yúgu'të le tunë'. Tunë' caní para ila'déli'në' tu bregui' zin le inítite, pero idéli'ru' rë'u tu le uzi'tica'siru' xibé. <sup>26</sup> Que lë ni na', naca' neda' ca tu bönni' idú ládxë'ë rixíti'ë. Naca' ca' ca tu bönni', idú ládxë'ë ridil-lë'. Biti' rucudxa' lu bö'ös. <sup>27</sup> Ca runë' bönni' na' rulidzé' bönachi para tsöjtsázagaca lu huitaj, runa' ca' neda', runa' libán para ulu'lágaca bönachi.

Bönni' na' nútsë' lu huitaj runé' ga gaca tsutsu idútë le naca cazë', en rinná bë'enë' le. Lësca' caní runa' neda', para cabí unítia' xilatja' lu dxin queë' Dios.

## 10

*Biti' ral-la' tseaj láxhi'ru' budó' guiój budó' yaga*

<sup>1</sup> Ré'ënda' uzéajni'ida' libí'ili', böchi' luzá'ado', ca guca quégäquië' xuz xtó'otu'. Dios bené' ga gulú'u zxul-la tu böaj yúgu'të'. Lësca' caní, gula'dodë' yúgu'të' gatsaj láhui'lö nísado'. <sup>2</sup> Lu böaj ni', en lu nísado' ni', guca quégäquië' ca raca que nu ridila nisa. Lë na' guca quégäquië' guca bë' guláquië' tuz len Moisés. <sup>3</sup> Lësca' caní, gulahuë' yúgu'të' yöta xtildo' na' bunödzjë' Dios Bö' Lá'ayi quégäquië'. <sup>4</sup> Gulé'ajë' yúgu'të' nisa na' bunödzjë' Dios Bö' Lá'ayi quégäquië', tu' gulé'ajë' nisa birúaj lë'e guiój na' bulu'e lahui Dios Bö' Lá'ayi, guiój na' gula'báninë' légaquië'. Ca guca guiój na' naca cazë' Cristo, nabániru' Lë'. <sup>5</sup> Sal-la' guca caní, biti' guyaza ládxë' Dio yúgu'të'. Que lë ni na' gulatië' lu lataj cásö.

<sup>6</sup> Yúgu'të lë ni naca tu le ruzéajni'i rë'u, para cabí së láxhi'ru' le ruá' dö', ca na' gula'zé láxhi'gaquië' légaquië'. <sup>7</sup> Biti' ral-la' tseaj láxhi'ru' budó' guiój budó' yaga, ca na' guluné' bal-lë' légaquië'. Nazúaj lu guichi lá'ayi le rnna: "Gula'bö'ë bönni' ni', en gulé'aj gulahuë', ate' gula'yasë', en guluné' laní que budó' na'." <sup>8</sup> Biti' ral-la' gunru' le ruá' dö', ca na' guluné' bal-lë' légaquië' le ruá' dö', ate' tu dzasö gulatië' idú ca tsonna-uruá' milë'. <sup>9</sup> Biti' ral-la' si' bë'ëru' Xanru', ca na' gula'zí' bë'ë Lë' bal-lë' légaquië', ate' gulatië' tu' guláguya'aba' bëla sínia' légaquië'. <sup>10</sup> Lësca' caní, biti' ral-la' innëru' queë' Dios ca na' gula'nné' queë' bal-lë' légaquië', ate' tuë' gubáz lá'ayi queë' Dios busunitië' légaquië'.

<sup>11</sup> Yúgu'të lë ni le gulaca quégäquië' xuz xtó'otu', tu'zéajni'i rë'u, en nazúaj lu guichi lá'ayi para gun gadxi rë'u, tu' chizóaru' dza chizóá údxi que yödzölió ni. <sup>12</sup> Que lë ni na', nu réqui chinal-la, ral-la' gun chi'i cuini, para cabí ichixi inigui. <sup>13</sup> Ca naca le ta'zí' bë' libí'ili' raca ca' quéguequi yúgu'të bönachi. Dios runé' ca rnne', en biti' gu'ë lataj bi si' bë' libí'ili' le cabí gaca guá' ilenli', pero cate' bi si' bë' libí'ili', ulu'ïnë' libí'ili' naca gaca irúajli' lu na' tu' xihui', para gaca guá' ilenli'.

<sup>14</sup> Que lë ni na', böchi' luzá'ado', biti' tseaj láxhi'li' budó' guiój budó' yaga. <sup>15</sup> Ruf'ilen'a libí'ili' didza' ca ru'ilen'a didza' nupa ta'yéajni'i. Buli'chi'a buli'sörö didza' ni gu'a. <sup>16</sup> Cate' inábiru'-në' Dios gun lá'ayë' le ré'ajru' cate' rusubanru' ca gútië' Cristo, lë na' ré'ajru' rulu'i nácaru' tuz len Cristo, en ruz'i'ru' xibé le benë' Cristo cate' bulaljë' xichönë' cate' gútië' lë'e yaga cruz. Lësca' caní, yöta xtila na' ruzxúzxjaru', en ráguru', rulu'i dzágbaru'-në' Cristo, en ruz'i'ru' xibé le benë' Cristo cate' budödë' idútë le naca cazë' uláz queéru'. <sup>17</sup> Sal-la' zianru' nácaru', yúgu'tëru' ráguru' tuz yöta xtila na', en que lë ni na' nácaru' ca tuz bönachi.

<sup>18</sup> Buli'yútsöca' ca tunë' bönni' Israel. Bönni' ni' tahuë' lahuë' Dios le ta'gu'ë lu bucugu lá'ayi queë', lë na' tahuë' rulu'i dzágagaquië' Dios. <sup>19</sup> ¿Bizxi rnna didza' ni ruá'a? Biti' rnna' napa budó' guiój budó' yaga yöl-la' huáca, en le ta'gú'u bönachi lögaca budó' guiój budó' yaga na' biti' napa yöl-la' huáca. <sup>20</sup> Caní rnna': Lë na' ta'gú'u bönachi biti' núnbë'gaquië' Dios lögaca budó' guiój budó' yaga, ta'gú'u lögaca bö' xihui', en caléga lahuë' Dios. Ré'ënda' biti' idzágali' yugu' bö' xihui'. <sup>21</sup> Biti' gaca guí'jali' le rulu'i nácaru' tuz len Xanru', enca' lë na' ulu'ï nácali' tuz len yugu' bö' xihui'. Biti' gaca gáguli' le rulu'i dzágbaru'-në' Xanru', enca' le ulu'ï dzágali' yugu' bö' xihui'. <sup>22</sup> ¿Naru' gúntsaru' ga uzxé'enë' Xanru'? ¿Naru' réquitseli' nápatéröli' yöl-la' huáca ca napé' Lë'?

*Le dë lu ná'aru' gunru', en ca ral-la' idxí'igacru'-në' böchi' luzá'aru'*

<sup>23</sup> Naca idútë li didza' na' rnna: "Yúgu'të dë lu ná'aru' gunru'." Na'a, neda' rnna': Caléga yúgu'të ral-la' gunru'. Yúgu'të dë lu ná'aru' gunru', pero caléga yúgu'të gun ga gácarö idú ca réajlë'ëru' Cristo. <sup>24</sup> Ral-la' gü'i láxhi'ru' gunru' le gun ga gaca dxia' quégäquië' böchi' luzá'aru', en calégasö le gun ga gaca dxia' que la' cuínsiru'.

<sup>25</sup> Bítí'tés bi tuti' bönachi lu yé'ëyi, huáca gáguli', en biti' bi ral-la' inábali' que, para cabí cuéqui böniga ládzi'do'oli'. <sup>26</sup> Nazúaj lu guichi le rnna: "Queë' Xanru' nequi yödzölió ni, enca' yúgu'té le dë yödzölió ni."

<sup>27</sup> Channö ulidzë' tu bönni' biti' réajlë'ë Dios libí'ili' para guídali' lidxë', ate' gué'ënili' tséajli', guli'gagu yúgu'té le cu'ë loli', en biti' bi inábali' que, para cabí cuéqui böniga ládzi'do'oli'. <sup>28</sup> Channö nútí'tés nu guië libí'ili': "Lë ni gula'gu'ë lo budó' guiój budó' yaga", biti' gáguli' lë na' para gaca dxi'a que nu na' gudíxjöi'i caní libí'ili', en para cabí cuéqui böniga ládzi'da'ahuë'. <sup>29</sup> Rnnia': Para cabí cuéqui böniga ládzi'da'ahuë' bönni' na' gudíxjöi'inë' caní libí'ili', en calëga para cabí cuéqui böniga ládzi'do'oli' libí'ili' cázali'.

Nadxi ca' nu inábini neda', inná: "¿Bizx que ral-la' uzóa' tsölá'alö le dë lu na'a guna' tu' ribequi böniga ládzi'da'ahuë' bönni' yúbölö?" <sup>30</sup> Huáca inná ca' nu na': "Channö guía-né' Dios: Xclenu', ni'a que lë na' rahua', ¿bizx que nu uzegui neda' didza' ni'a que lë na' rahua'?" <sup>31</sup> Channö bi gáguli' o bi guí'jali', o bíti'tés bi gunli', guli'gún yúgu'té para gaca queë' Dios yöl-la' ba. <sup>32</sup> Biti' bi gunli' le gun ga ila'chixi ila'nigui bönachi judío, en biti' gunli' le gun ga ila'chixi ila'nigui bönachi biti' nácagaca judío, en biti' gunli' le gun ga ila'chixi ila'nigui bönachi queë' Dios. <sup>33</sup> Guli'gún ca runa' neda'. Ruí'i ládxa'a guna' le ila'yaza ládzi'gaca yúgu'té bönachi, en biti' ruí'i ládxa'a guna' le uzi'a xibé la' néda'sö, pero le ulu'zí' xibé ia'zíca'rö bönachi para ulu'lágaca.

## 11

<sup>1</sup> Guli'gún ca runa' neda', ca na' neda' ca' runa' ca benë' Cristo.

### *Le tunnu nigula lógaca bönachi queë' Cristo*

<sup>2</sup> Runa' libí'ili' zxön, böchi' luzá'ado', tu' röjnética'sili' neda', en nazi' lu ná'ali' xibá budöda' lu ná'ali'. <sup>3</sup> Na'a, ré'ënda' tséajni'ili' rinná bé'enë' Cristo yúgu'té bönni', ate' bönni' rinná bé'enë'-nu nigula, ate' Dios rinná bé'enë' Zxi' inë', Bönni' na' náquië' Cristo. <sup>4</sup> Channö tu bönni' rulidzë' Dios, o ru'ë didza' uláz queë' Dios, en dxía icjë' xilu'ë, rucá'anë' Cristo cá'asö. <sup>5</sup> Na'a, channö tu nigula rulídzanu Dios, o ru'ënu didza' uláz queë' Dios, en biti' bi zxoa ícjanu, rucá'anau bönni' queënu cá'asö, en naca queënu ca naca queënu tu nigula narugu guitsa' ícjanu. <sup>6</sup> Channö tu nigula cabí bi zxoa ícjanu, ral-la' irugu ca' guitsa' ícjanu. Channö gun ga utu'ënu nigula na' channö nu chugu guitsa' ícjanu, ral-la' bi ixoa ícjanu. <sup>7</sup> Tu bönni' biti' bi ral-la' udxiá icjë' cate' ridxinë' lahuë' Dios, tu' náquië' ca naca cazë' Dios, ate' lë na' náquië' bönni' rulu'i lahui yöl-la' zxön queë' Dios, pero le nácanu nigula na' rulu'i lahui yöl-la' zxön queë' bönni' queënu. <sup>8</sup> Cate' benë' Dios bönachi, biti' bubéajë' bönni' na' lu nigula. Nigula na', lu bönni' na' bubéajë'-nu. <sup>9</sup> Lësca' caní, biti' benë' Dios bönni' para uz'ënu xibé' nigula, pero benë' nigula para uzi'ë xibánu bönni'. <sup>10</sup> Que lë ni na', nigula na' ral-la' ixoa ícjanu le rulu'i zoa nu rinná be'e lënu tu' tu'yúë' gubáz lá'ayi queë' Dios rë'u. <sup>11</sup> Na'a, lahuë' Xanru', tu bönni' riquinnë'-nu nigula queë', ate' nigula na' riquíninu-në' bönni' queënu. <sup>12</sup> Ca na' benë' Dios, bubéajë'-nu nigula lu bönni', lësca' caní na'a, yúgu'té bönni' náljlengaquië'-nu nigula, ate' yúgu'té rirúaj lu né'ë Dios.

<sup>13</sup> Buli'chi' a buli'sörö la' libí'isili'. ¿Naru' ral-la' ulídzanu-në' Dios tu nigula biti' bi zxoa ícjanu? <sup>14</sup> ¿Naru' cabí rusëdi libí'ili' yöl-la' nácatë quégaca bönachi, ral-la' utu'ënu bönni' na' ru'ë lataj itunna guitsa' icjë'? <sup>15</sup> Na'a, channö natúnna guitsa' ícjanu tu nigula, naca yöl-la' lachi queënu, tu' bë'ë Dios queënu guitsa' ícjanu para usubín ícjanu. <sup>16</sup> Channö zoa nu gué'ëni tá'baga' didza' ni, canísö nazi' lu na'tu' runtu', en lëbisö tun yugu' cö' bönachi queë' Dios.

### *Bönachi Corinto tu'cá'ana cá'asö le rë'aj ráguru' para usubanru' ca gútië' Xanru'*

<sup>17</sup> Biti' runa' libí'ili' bal ca naca le uzéajni'ida' libí'ili' na'a. Le runli'biti' run ga raca dxi'a queëli' cate' rudúbili' queë' Cristo, pero run ga raca queëli' le cabí naca dxi'a. <sup>18</sup> Risí lahua' ruzéajni'ida' libí'ili' lë ni ta'guíxjöi'i bönachi neda', ta'nná: "Cate' rudúbili' queë' Cristo,

narúajli' choplö", ate' réajlë'a nadxi ca' naca caní. <sup>19</sup> Run bayudxi ila'cuá'alen libíili' nupa tu'sedi le cabí nácaté para ilaca bë' nupa nácagaca idú böñachi queë' Cristo. <sup>20</sup> Que lë ni na', cate' rudúbili', lë na' ráguli' tsözxón biti' naca le rë'aj ráguru' para usubanru' ca gútië' Xanru'. <sup>21</sup> Caní naca, tu' runli' bayudxi tu tuli' ráguli' le nuá'alí' que queéli' cate' ráguli' tsözxón, ate' que lë ni na' ridunli' bál-lali', ate' ia'bál-lali' rë'aj ráguli' ga ridxintë rizúdxili'. <sup>22</sup> ¿Naru' cabí zoa lídxili' ga huáca guí'aj gáguli'? Ca na' runli', rucá'anali' böñachi queë' Dios cá'asö, en runli' ga tu'tu'i nupa biti' bi dë quéguequi. ¿Bizxi caz guía' libíili'? ¿Naru' guntsa' libíili' bal? Biti' ca' runa' libíili' bal ca naca lë ni runli'.

#### *Le rë'aj ráguru' para usubanru' ca gútië' Xanru'*

<sup>23</sup> Xanru' caz budödë' lu na'a lë na' busédida' libíili', ca na' benë' Xanru' Jesùs yëla ni' cate' nu budödi Lë' lu ná'agaquië' bönni' gulútië' Lë'. Gudélë'ë yöta xtila, <sup>24</sup> en cate' budxi gudxë' Dios: "Xclenu'", buzxuzxjé' le, en gunné': "Guli'gagu. Lë ni naca xipéla'a le nayuzxaj uláz queéli'. Guli'gún caní, para usubanli' ca gaca quia' neda'." <sup>25</sup> Lësca' caní, gudödi gulahuë', gudélë'ë tu zxíga'do', en gunné': "Le yudzu zxíga'do' ni naca xichöna', le run tsutsu didza' cubi rucá'ana tsahui'. Guli'gún caní yúgu'të luzuí guí'jali' le, para usubanli' ca gaca quia' neda'." <sup>26</sup> Caní gaca ga idxintë dza huödë' Xanru'. Yúgu'të luzuí gáguli' yöta xtila caní, en guí'jali' que le yudzu zxíga'do' caní, ulu'ili' lahui ca gútië' Xanru'.

#### *Ca ral-la' gunru' cate' guí'aj gáguru' para usubanru' ca gútië' Xanru'*

<sup>27</sup> Que lë ni na', nútitiës nu gagu yöta xtila ni o guí'aj que le yudzu zxíga'do' ni queë' Xanru', en biti' run le bal, nabaga' xíguia' nu na', en run dul-la', tu' rucá'ana xipéla'ë Xanru', enca' xichönë' cá'asö. <sup>28</sup> Que lë ni na', ral-la' uchi'a usöröru' la' cuínsiru' tu turu', ate' ní'irö huáca gáguru' yöta xtila ni, en guí'ajru' que le yudzu zxíga'do' ni. <sup>29</sup> Nútitiës nu rë'aj ragu lë ni, en biti' run le bal tu' cabí réquibe' e rulu'i le guca queë' Xanru', rusubaga' cuini dul-la' ni'a que lë na' rë'aj ragu. <sup>30</sup> Que lë ni na' te'e zián nupa dzágagaca libíili', en ta'cuídi', ate' ziánguequi chinátigaca. <sup>31</sup> La'tu' uchi'a usöröru' la' cuínsiru', biti' uchi'a usöröe' Xanru' rë'u. <sup>32</sup> Channö gun bayudxi uchi'a usöröe' Xanru' rë'u, usaca' zi'ë rë'u, para cabí irugu queéru' cate' ichúguië' quéguequi böñachi yödzölió ilátigaca.

<sup>33</sup> Que lë ni na', böchi' luzá'ado', cate' udúbili' para guí'aj gáguli' para usubanli' ca gútië' Xanru', guli'cöza luzá'ali'. <sup>34</sup> Channö zoa nu ridún, ral-la' gagu nu na' ga naca lu yu'u lidxi, para cabí gun bayudxi uchi'a usöröe' Dios libíili' cate' udúbili'. Nacuá' ia'bal-la le runli', pero ucá'ana' tsahui' yugu' lë na' cate' uduyúa' libíili'.

## 12

#### *Yugu' yöl-la' huáca runnë' queéru' Dios Bö' Lá'ayi*

<sup>1</sup> Na'a, böchi' luzá'ado', rë'ënda' tséajni'ili' ca zeaj naca yöl-la' huáca runnë' queéru' Dios Bö' Lá'ayi.

<sup>2</sup> Nöz quézili' ca guca cate' ni' biti' réajlë'ënili' Cristo, bë'ëli' lataj gula'chë' böñachi libíili' ga yúbölö. Guyéaj ládxí'li' budö' guiój budö' yaga, le cabí ta'nné. <sup>3</sup> Que lë ni na', ruzéajni'ida' libíili' caní, rnnia': Ladaj yúgu'të nupa tu'i didza' uláz queë' Bö' Lá'ayi queë' Dios, cuntu nu gaca inné xihui' queë' Jesùs, en nitúë' gaca inné: "Jesùs náquië' Xanru'", channö cabí zóalenë' Dios Bö' Lá'ayi nu na'.

<sup>4</sup> Na'a, nadzá'gaca tu tu le runnë' Dios Bö' Lá'ayi queéru', pero tuzë' náquië' Bö' Lá'ayi na'. <sup>5</sup> Lësca' caní, nadzá'gaca tu tu dxin rigu'ë Xanru' lu ná'aru', pero tuzë' náquië' Xanru' na'. <sup>6</sup> Nadzá'gaca ca' tu tu yöl-la' huáca náparu' le rúniru' xichinë' Dios, pero tuzë' náquië' Dios, Nu na' runna yöl-la' huáca na' queéru' para gunru' xichinë'. <sup>7</sup> Dios runnë' que queéru' tu le naca bë' náparu' yöl-la' huáca queë' Dios Bö' Lá'ayi, lë na' ruzí'ru' xibé yúgu'tëru'. <sup>8</sup> Dios Bö' Lá'ayi runödzjé' queë' tu bönni' yöl-la' huáca ru'ë didza' len yöl-la' rácada', ate' ia'tuë' bönni', Lë cazë' Bö' Lá'ayi runödzjé' queë' yöl-la' huáca ru'ë didza' lu

yöl-la' réajni'i. <sup>9</sup> Lësca' caní, Lë cazé' Dios Bö' Lá'ayi na' runödzjé' queé' ia'túe' bönni' yöl-la' réajlë' Cristo bi gunë', ate' ia'túe' bönni' runödzjé' queé' yöl-la' huáca ruúnë' nupa te'e. <sup>10</sup> Ia'túe' bönni' runödzjé' queé' yöl-la' huáca runé' yugu' yöl-la' huáca que yehua' yubá, ate' ia'túe' bönni' ru'ë le' lataj ru'ë didza' uláz queé' Dios, ate' ia'túe' bönni' runödzjé' queé' yöl-la' huáca réquibe'ené' channö bö' dzaga nu bönni' nequi queé' Dios, o nequi que tu' xihui'. Runödzjé' queé' ia'túe' bönni' yöl-la' huáca ru'ë didza' yúbölö le cabí nazëdë', ate' queé' ia'túe' bönni' yöl-la' huáca rudödë' didza' yúbölö na' biti' nazëdë'. <sup>11</sup> Yúgu'të lë ni runé' Lë cazé' Dios Bö' Lá'ayi, tu' runödzjé' que tu tu bönnachi tsca ré'ëni quéziné'.

### *Yúgu'tëru' nácaru' ca tuz bönnachi*

<sup>12</sup> Ca na' naca tuz idútë le naca cázaru', sal-la' zián le nagudi' dzágalenru', ate' le zián na' nagudi' dzágalenru' nácagaca tuz idútë le naca cázaru', lësca' caní naca queé' Cristo.

<sup>13</sup> Tu' zóalnené' Lë cazé' Dios Bö' Lá'ayi rë'u, lë ni naca queéru' ca tu le nadílaru' nisa, le naca bë' nácaru' ca tuz bönnachi, sal-la' nácaru' yugu' bönni' judío, en yugu' bönni' zi'tu', enca' yugu' bönni' nadó'ogaquié', en yugu' bönni' biti' nadó'ogaquié'. Yúgu'tëru', Dios bë'ë rë'u lataj s'íru' le runödzja cazé' Bö' Lá'ayi.

<sup>14</sup> Na'a, lu idútë le naca cázaru', zián le nagudi' dzágalenru', en calëga tuz. <sup>15</sup> La'tu' huáca gü'i didza' ní'aru', huanná: "Tu' cabí naca' né'ë bönni', biti' néquida' queé'", didza' ni biti' gun ga biti' nequi queé' bönni' na'. <sup>16</sup> La'tu' huáca gü'i didza' nágaru', huanná: "Tu' cabí naca' guiój lahuë', biti' néquida' queé' bönni' ni", didza' ni biti' gun ga biti' nequi queé' bönni' na'. <sup>17</sup> La'tu' naca guiój loru' idútë le naca cázaru', ¿nacxi gaca yóniru'? La'tu' naca nágaru' idútë, ¿nacxi gaca ilé'e zxína'ru'? <sup>18</sup> Na'a, Dios nucu'ë yúgu'të le nagudi' dzágalenru' ca gú'uni quéziné' Lë'. <sup>19</sup> La'tu' naca tuz le nagudi' dzágalenru', biti'rö soa idú ca naca cázaru'. <sup>20</sup> Na'a, ca nácaru', zián le nagudi' dzágalenru', pero tuz le nácaru'.

<sup>21</sup> Que lë ni na', guiój loru' biti' gaca guíe' ná'aru', inná: "Biti' riquinda' li'." Lësca' caní, ícjaru' biti' gaca guíe' ní'aru', inná: "Biti' riquinda' libí'ili'." <sup>22</sup> Na'a, yugu' le nagudi' dzágalenru', lë na' réquiru' nácagacarö cuídi'sö, lë ni naquíniröru'. <sup>23</sup> Lësca' caní, yugu' le nagudi' dzágalenru', le réquiru' nácagacarö cá'asö, lë ni rugácuröru' dxia', en yugu' le réquiru' biti' ral-la' ilá' lahui, rugácuröru' ca' dxia'. <sup>24</sup> Biti' run bayudxi gunru' caní que le nácarö lachi que le néquiniru'. Dios benë' idútë le naca cázaru', en benë' ga nácarö lesaca' lë na' réquiru' rë'u nácarö cá'asö. <sup>25</sup> Caní benë', ate' biti' narúajgaca choplö le nagudi' dzágalenru', tu' tun chi'i luzé'eguequi tu ia'tú. <sup>26</sup> Channö gaca zi' tu le néquiniru', ilaca zi' tsözxön len le yúgu'të le néquiniru' na', en channö tu le néquiniru' zoa bi ruz' xibé, yúgu'të le nagudi' dzágalenru' tu'zí xibé tsözxön le.

<sup>27</sup> Na'a, libí'i cázali' dzágali' idútë le naca cazé' Cristo, ate' tu tuli' nácali' ca yugu' le nagudi' dzágalené'. <sup>28</sup> Lësca' caní, ladaj bönnachi queé' Cristo, Dios nucu'ë nupa tun xichiné'.

Ga naca lo nucu'ë yugu' bönni' gubáz queé' Cristo.

Ga naca buropi nucu'ë yugu' bönni' tu'ë didza' uláz queé'.

Ga bunni nucu'ë yugu' bönni' tu'sédiné' luzá'aru'.

Ní'irö nucu'ë nupa tun yugu' yöl-la' huáca que yehua' yubá.

Ní'irö nucu'ë nupa tu'ún nupa te'e.

Ní'irö nucu'ë nupa tácalen böchi' luzá'aru'.

Ní'irö nucu'ë yugu' bönni' tu'lufiné' rë'u dxin gunru'.

Ní'irö nucu'ë yugu' bönni' tu'ë didza' yúbölö biti' nazëdagaquié'.

<sup>29</sup> Calëga yúgu'të' nácagaquié' gubáz queé' Cristo.

Calëga yúgu'të' tu'ë didza' uláz queé' Dios.

Calëga yúgu'të' tu'sédiné' luzá'aru'.

Calëga yúgu'të' tuné' yugu' yöl-la' huáca que yehua' yubá.

<sup>30</sup> Calëga yúgu'të' dë lu ná'agaquié' ulu'únë' nupa te'e.

Caléga yúgu'té' tu'ë didza' yúbölö biti' nazédagacié'.

Caléga yúgu'té' tu'dödë' didza' yúbölö biti' nazédagacié'.

<sup>31</sup> Guli'güi' ládxí'li' cu'ë Dios lu ná'ali' yugu' yöl-la' huáca na' nácagacarö lesaca'. Na'a, ului'ida' libi'ili' tu le nácarö lesaca' ca yúgu'té' lë ni.

## 13

### *Yöl-la' nadxi'i*

<sup>1</sup> Sal-la' gaca gu'a xtídz'a'gaca bönachi le cabí nazéda', enca' xtídz'a'gaquié' gubáz lá'ayi queë' Dios, pero channö cabí nadxi'ida' luzá'a, didza' gu'a biti' gácarö lesaca' ca bö le run gui rucódxiru' o guié rutíl-laru' luzé'e. <sup>2</sup> Sal-la' nazi' lu na'a gu'a didza' uláz queë' Dios en tséajni'ida' yúgu'té' le nagachi', en yúgu'té' didza' réajni'i, en sal-la' naca idú ca réajlé'a Dios ga ridxintë huáca cúa' yugu' guí'a, pero channö cabí nadxi'ida' luzá'a, biti' bi nazáca'a. <sup>3</sup> Sal-la' quísia' idútë le dë quia' para ugahua' yugu' bönachi yechi', en sal-la' udöda' idútë le naca' ga ulu'zegui bönachi le tu' réajlé'a Cristo, pero channö cabí nadxi'ida' luzá'a, biti' ca' uzi'a xibé lë na' runa'.

<sup>4</sup> Nu bönni' nadxi'iné' luzé'e, ribözé' zxön ladxi'.

Náquié' dxi'i ladxi', en biti' ruzxé'ené' luzé'e.

Nadxi'iné' luzé'e idú ládxé'e.

Biti' run ba zxön cuiné', en biti' run cuiné' lo.

<sup>5</sup> Biti' runé' le ruá' dö'.

Biti' rudúli'në' le dë queë'.

Biti' rilétené', en biti' röjenené' dö' gului'i bönachi queë'.

<sup>6</sup> Biti' ca' rudzéjané' cate' nu run le ruá' dö'.

Rudzéjané' cate' nu run le naca idútë li.

<sup>7</sup> Ruá' rilené' bíti'tës bi gun luzé'e queë'.

Réajlé'tica'së' luzé'e.

Rúntica'së' löza gun luzé'e le naca dxi'a.

Ribózatica'së' zxön ladxi'.

<sup>8</sup> Bíti'rö tödi que yöl-la' nadxi'i. Huadödi que le dë lu ná'agaca bönachi ilui'i didza' uláz queë' Dios. Huadxín dza cate' bíti'rö gata' lu ná'agaca bönachi ilui'i didza' yúbölö le cabí nazédagaca, ate' huadödi que yöl-la' réajni'i quéguequi bönachi. <sup>9</sup> Láti'do'os réajni'iru' na'a, en láti'do'os ca' ruí'iru' didza' uláz queë' Dios. <sup>10</sup> Cate' idxín le naca idú, ní'irö údxi que lë na' naca láti'do'os.

<sup>11</sup> Cate' ni' naca' bí'ido', bë'a didza' ca bí'ido', en gulequi icja' ca bí'ido', en guzá' ládxa'a ca bí'ido'. Cate' bigula' bucá'ana' le nequi que bí'ida'ahua'. <sup>12</sup> Na'a le rilé'eru' naca ca le rilé'eru' cate' ruyú cuinru' tu lu guié dxílico'. Biti' rilé'eru' idú ca naca. Dza ní'irö ilé'eru' idú ca naca yúgu'té. Na'a núnbë'a láti'do'os. Dza ní'irö gúnbbë'a yúgu'té ca na' Dios caz núnbë'e neda'. <sup>13</sup> Na'a, nacuá'tica'sö yöl-la' réajlé' queéru' Dios, en yöl-la' run löza queéru' Dios, en yöl-la' nadxi'i queéru' luzá'aru'. Nacuá' yonna ni, pero le naca lo naca yöl-la' nadxi'i.

## 14

### *Yugu' yöl-la' huáca runnë' queéru' Dios Bö' Lá'ayi*

<sup>1</sup> Guli'gún bayudxi idxí'ili' luzá'ali', en guli'güi' ládxí'li' sí'ili' ca' yugu' yöl-la' huáca runnë' queéru' Dios Bö' Lá'ayi, en le naca lo, yöl-la' huáca güí'ili' didza' uláz queë' Dios.

<sup>2</sup> Nu ruí'i didza' yúbölö le cabí nazéda, caléga bönachi ruí'ilen didza' nu na'. Dios caz ruí'ilen didza' nu na', tu' cuntu nu zoa réajni'i didza' ruí'i nu na'. Dios Bö' Lá'ayi ru'ë nu na' lataj ruí'i didza' ca nácagaca le nagachi' queë' Dios. <sup>3</sup> Nu na' ruí'i didza' uláz queë' Dios, ruí'ilen bönachi didza' para gácarö idú ca ta'yéajlé' Cristo. Rutipa ládxí'guequi, en ruhué tsahui' léguequi. <sup>4</sup> Nu na' ruí'i didza' yúbölö le cabí nazéda run tsutsu la' cuinsi, pero nu ruí'i didza' uláz queë' Dios run tsutsu yúgu'té bönachi queë' Cristo.

<sup>5</sup> Raca ládxa'a gü'iili' didza' yúbölö le cabí nazédali' yúgu'téli', pero le naca lo, ré'ënda' gü'iili' didza' uláz queë' Dios. Ruzí'iroru' xibé nu ru'i didza' uláz queë' Dios ca ruzí'iru' xibé nu ru'i didza' yúbölö le cabí nazëda, channö cabí zoa nu udödi didza' yúbölö na' le cabí nazëda, para ilaca tsutsu bönachi queë' Cristo. <sup>6</sup> Que lë ni na', böchi' luzá'ado', cate' guída' ga zóali', channö gü'ilena' lib'iili' didza' yúbölö le cabí nazëda', biti' bi uz'iili' xibé. Uz'iisili' xibé didza' na' gü'ilena' lib'iili' le nulu'ínë' Dios neda', o didza' uzéajni'i rë'u, o didza' gu'a uláz queë' Dios, o le naca xibá queë'.

<sup>7</sup> Lësca' caní raca que le ta'gú'u bö, yugu' le cabí nabángaca, ca naca gui rucôdxiru', o ca naca guitarra. Channö cabí tul-la ca ral-la' ilún, ¿nacxi caz gúnbe'ëru' bízxilö le tul-la na', lë na' rul-la gui na', o guitarra na'? <sup>8</sup> Channö cabí cödxi ca ral-la' gun lúzuba' böa' na' ulidza rë'u lu gudil-la, ¿nuzxi caz upá' cuini para tseaj lu gudil-la na'? <sup>9</sup> Lësca' caní raca queéeli'. Channö len lúdxi'li' gü'iili' didza' le cabí taca bönachi, biti' ca' ila'yéajni'i didza' gü'iili'. Caní gaca, nítisö gü'iili' didza'. <sup>10</sup> Le nácatë nacuá' zián didza' yúbölö tu'i zián cö' bönachi izá'a lu yödzölió ni, ate' nacuá' bönachi ta'yéajni'i tu tu didza' na'. <sup>11</sup> Na'a, channö cabí réajni'ida' didza' ru'ë tu bönni', gaca' ca tu bönni' zi'tu' lahué' bönni' na' ru'ë didza', ate' bönni' na' ru'ë didza' gáquië' ca' lahuá' neda' ca tu bönni' zi'tu'. <sup>12</sup> Lësca' caní naca queéeli'. Ru'iida' ládxi'li' s'iili' yugu' le runnë' queëru' Dios Bö' Lá'ayi. Que lë ni na', guli'gü'i' ládxi'li' s'iili' le ilún ga ilácarö tsutsu bönachi queë' Cristo.

<sup>13</sup> Que lë ni na' ca', nu ru'i didza' yúbölö le cabí nazëda ral-la' ulidza Dios, en inabi Lë' gunne' que yöl-la' huáca quixjö' le ré'ëni inná didza' na' ru'i nu na'. <sup>14</sup> Cate' rulidza'-në' Dios, channö ruá'a didza' yúbölö le cabí nazëda', lu bö' naca caza' rulidza'-në' Dios, pero tu' cabí réajni'ida' didza' ruá'a, lu yöl-la' réajni'i quia' biti' ruzi'a xibé didza' na' ruá'a. <sup>15</sup> ¿Nacxi caz ral-la' guna' channö? Ulidza'-në' Dios lu bö' naca caza', enca' lu yöl-la' réajni'i quia' ulidza'-në' Dios. Gul-la' yöl-la' ba lu bö' naca caza', enca' lu yöl-la' réajni'i quia' gul-la' yöl-la' ba. <sup>16</sup> Channö lu bö' naca cazu' rulidza lá'ayu'-në' Dios, ate' zoa ni' nu riyónisö, channö cabí réajni'i didza' ru'u, ¿nacxi caz gaca inná: "Ca' gaca", ni'a que didza' ru'u, rë'u-në' Dios: "Xclenu"?" <sup>17</sup> Nadxi ca' dxí'ado' ru'u didza', rë'u-në' Dios: "Xclenu." Channö cabí réajni'i didza' ru'u, biti' bi uz'i xibé nu na' riyöni. <sup>18</sup> Rea'-në' Dios: "Xclenu", tu' ru'iira' didza' yúbölö le cabí nazëda' ca yúgu'téli'. <sup>19</sup> Lögaca bönachi queë' Dios gué'ënitéröda' gu'a gáyu'sö didza' le gaca ila'yéajni'i bönachi ca zián gayuá' didza' yúbölö le cabí nazëda', ate' cuntu nu gaca tséajni'i. Gaca usédida' ia'zica'rö bönachi tuzi channö ila'yéajni'i didza' gu'a.

<sup>20</sup> Böchi' luzá'ado', biti' gácali' ca bñido' ca naca le rizá' ládxi'li'. Guli'gaca ca bñido' para cabí gunli' le ruá' dö', pero guli'gaca bönni' chinácagaca ca naca le rizá' ládxi'li'. <sup>21</sup> Nazúaj lu guichi lá'ayi le rnna: "Len didza' yúbölö, en lu ruá'agaca bönachi izá'a gü'ilena' bönachi ni didza'. Sal-la' guna' caní, biti' ulu'zé nágagaca xtídz'a'a." ¡Caní rnné' Xanru! <sup>22</sup> Caní naca, Dios ru'ë rë'u lataj ru'iuru' didza' yúbölö le cabí nazédaru' para gaca tu le naca bë' lögaca bönachi biti' ta'yéajlé', en caléga lögaca nupa ta'yéajlé' Cristo. Ru'ë rë'u lataj ru'iuru' didza' uláz queë' Lë' le ulu'zí' xibé nupa ta'yéajlé' Cristo, en caléga bönachi na' biti' ta'yéajlé'. <sup>23</sup> Que lë ni na', cate' udúbili' tsözxón, yúgu'téli' na' néquili' queë' Cristo, channö gü'iili' didza' yúbölö le cabí nazédali' yúgu'téli', ate' tsázagaca nupa nazédagaca láti'do'os, o nupa biti' ta'yéajlé' Cristo, ¿naru' cabí ila'nná: "Nachixi ícjali"?" <sup>24</sup> Na'a, channö yúgu'téli' gü'iili' didza' uláz queë' Dios, ate' tsaz nu cabí réajlé' Cristo o nu nazëda láti'do'os, guéquibe'e nu na' nabaga' xíguia', ate' Dios uchi'a usöröe' lë'. Caní guéquibe'e nu na', tu' tseajni'i didza' gü'iili' yúgu'téli'. <sup>25</sup> Guéquibe'e ca naca le rizá' ladxi' nu na', lë na' bigachi', ate' uzóaxxibi nu na', en tseaj ladxi' Dios, ate' inná: "Le nácatë Dios zóalenë' lib'iili'."

### *Ca ral-la' gunru' ga rudiúbiru' queë' Cristo*

<sup>26</sup> Que lë ni na', böchi' luzá'ado', cate' rudúbili' queë' Cristo, rul-lë' tu'ë bönni' dzáguië' lib'iili' tu salmo, ate' rusédinë' ia'túë' tu xibá, ate' ia'túë' riguíxjöi'inë' lib'iili' tu le

bulu'iñé' Dios lë', ate' ia'túé' ru'ë didza' yúbölö le cabí nazëdë', ate' ia'túé' rudo'dë' didza' yúbölö na' le cabí nazëdë'. Yúgu'të le gunli' ral-la' gaca le ulu'zi' xibé nupa tu'dubi queë' Cristo. <sup>27</sup> Cate' nacuá' ni' nupa tu'i didza' yúbölö le cabí nazëdagaca, biti' ral-la' gü'iili' didza' caní ziánrø ca chopa tsónnasili'. Huáca gu'ë didza' tuzë' bönni' na', ate' tödi na' huáca gu'ë didza' ia'túé', pero run bayudxi soa nu udödi didza' yúbölö na' le biti' nazédalí'. <sup>28</sup> Channö cuntu nu zoa nu gaca udödi didza' yúbölö na' le cabí nazédalí', nu na' rui'i didza' yúbölö le cabí nazëda ral-la' soa dxisö ga na' nudúbili', ate' huáca gü'iilen Dios didza' na' lu icja ládx'i'da'ahui. <sup>29</sup> Lësca' caní, yugu' bönni' tu'ë didza' uláz queë' Dios ral-la' ilu'ë didza' chopa tsónnasë', ate' ia'zíca'rë' bönni' na' tu'ë didza' uláz queë' Dios ral-la' ulu'chi'a ulu'söröö' didza' ru'ë bönni' na'. <sup>30</sup> Channö Dios ulu'iñé' tu bönni' rö'ë ni' le ré'eni inná xtídzë'ë, ral-la' soa dxisö nu na' rui'i didza'. <sup>31</sup> Yúgu'tëli' huáca gü'iili' didza' uláz queë' Dios tu tuli' para izédalí' yúgu'tëli', en idipa ládx'i'li' ca' yúgu'tëli'. <sup>32</sup> Yugu' bönni' tu'ë didza' uláz queë' Dios huáca ila'nná be'e cuíngaquië', en ila'cu'ë dxisö. <sup>33</sup> Caléga Dios nu run ga rutsásaru', tu' ré'éné' Lë' gácaru' ba'a ladxi', ca na' runë' ga nacuá' yúgu'të cö' bönachi queë' Cristo.

<sup>34</sup> Ral-la' ila'cuá'anu dxisö nigula queéli' ga na' rudúbili'. Biti' dë lu ná'agacanu ilu'iñu didza' ni'. Ral-la' ila'cuá'anu nöxaj ca na' rinná bë' xibá queë' Dios. <sup>35</sup> Channö té'ënini ila'yéajni'ñu ia'lati', ral-la' ila'nábinu bönni' que queégacanu cate' ni' nacu'ë lídxigaquië'. Biti' ral-la' ilu'iñu didza' yugu' nigula ga na' rudúbiru' queë' Dios.

<sup>36</sup> ¿Naru' réquitseli' bunödzjë' Dios xtídzë'ë lu ruá'ali' lib'isili'? ¿Naru' réquitseli' bidixín xtídzë'ë Dios queézili' lib'ili'? <sup>37</sup> Channö nu bönni' nútsë'ë ládjali' réquinë' ru'ë didza' uláz queë' Dios, o réquinë' zóalenë' Dios Bö' Lá'ayi lë', bönni' ni ral-la' si' lu në'ë naca xibá queë' Xanru' le ruzúaja' queéli' lu guichi ni. <sup>38</sup> Na'a, channö cabí rui'i ládxë'ë didza' ni, biti' gü'i ládx'i'li'-në' bönni' na'.

<sup>39</sup> Que lë ni na', böchi' luzá'ado', guli'güi' ládx'i'li' gü'iili' didza' uláz queë' Dios, en biti' inná bë'eli' nu rui'i didza' yúbölö le cabí nazëda. <sup>40</sup> Ral-la' gunru' yúgu'të ca sa'yéaj, en lu yöl-la' ba'a ladxi'.

## 15

### Bubanë' Cristo lu yöl-la' guti

<sup>1</sup> Na'a, böchi' luzá'ado', riguíxjöi'ida' lib'ili' ca naca didza' dxi'a na' bena' libán que ga zóali', lë na' guzxí' lu ná'ali', ate' run ga nácarö idú ca réajlë'ëli' Cristo. <sup>2</sup> Ni'a que didza' ni uláli', channö gunli' ca rnna didza' dxi'a na' bena' libán que ga zóali', channö le nácatë guyéajlë'ëli'-në' Cristo.

<sup>3</sup> Ga gusí lo budöda' lu ná'ali' le budödë' Dios lu na'a neda'. Caní rnna: "Gútië' Cristo uláz queéru' tu' nabága'ru' dul-la'." Ca naca lë ni nazúaj lu guichi lá'ayi le rnna ben bayudxi benë'. <sup>4</sup> Rnna ca': "Bigachë'ë yero ba, en cate' bizá'a tsonna dza, bubanë' lu yöl-la' guti", ca na' nazúaj ca' lu guichi lá'ayi le rnna ben bayudxi guca queë'. <sup>5</sup> Gudödi ni' bulu'i lahuë' Cristo, ate' bilé'enë' Pedro Lë', en gudödi ni' idxínnutë' gubáz queë' bila'lé'enë' Lë'. <sup>6</sup> Ni'irö bulu'i lahuë' lógaquië' ziánrø ca gayu' gáyu'ë böchi' luzá'aru' ta'yéajlë'ë Cristo, cate' ni' nudúbigaquië' tsözxón. La'tu'biqu' yúgu'të' böchi'ru' ni nacu'ë nabángaquië' na'a, sal-la' bal-lë' chinátigaquië'. <sup>7</sup> Ni'irö Jacobo bilé'enë' Lë', en gudödi ni' bulu'i lahuë' lógaquië' yúgu'të' bönni' gubáz queë'.

<sup>8</sup> Ga yötsetë bulu'i lahuë' ca' lahu'a' neda'. Ca guca lë ni, naca' ca tu bí'ido' gúljabi' cate' chigudödi dza ral-la' gáljabi'. <sup>9</sup> Caní naca, tu' nácarä' neda' cá'asö ca yúgu'të bönni' gubáz queë', en biti' naca' neda' lesaca' si' la' gubáz queë', tu' gudxía ládx'a'a bönachi queë' Dios. <sup>10</sup> Na'a, tu' buzá' ládxë'ë quia' Dios naca' le naca' na'a, en caléga nítisö buzá' ládxë'ë quia'. Béntëra' neda' xichinë' ca ia'zíca'rë' gubáz queë', sal-la' caléga rácasö quia' bena' dxin na'. Dios caz, lu yöl-la' ruzá' ladxi' queë', bugunë' neda' dxin. <sup>11</sup> Na'a, channö

bena' libán neda' o channö gulunë' libán ia'zíca'rë' bönni', lë ni le runtu' libán que, en le guyéajlë'ëli' libí'ili'.

### *Ubanru' lu yöl-la' guti*

<sup>12</sup> Runtu' libán queé' Cristo ca na' bubanë' lu yöl-la' guti. Channö caní naca, ¿nacxi caz naca, rnñali' bál-lali': "Biti' ulu'bán nupa chinátigaca"? <sup>13</sup> La'tu' cabí ulu'bán nupa chinátigaca, biti' bubanë' Cristo, <sup>14</sup> en la'tu' cabí bubanë' Cristo, nítisö naca le bentu' libán que, en nítisö naca yöl-la' réajlë' queéli' Lë'. <sup>15</sup> Ia'stú, la'tu' cabí bubanë' Cristo, rizi' yé'ëtu' cate' runtu' ba nalí queé' Dios, rnñatu' busubanë' Cristo, ate' la'tu' cabí usubanë' nupa chinátigaca, Dios biti' busubanë' Cristo. <sup>16</sup> La'tu' cabí ulu'bán nupa chinátigaca, biti' bubanë' Cristo, <sup>17</sup> en la'tu' cabí bubanë' Cristo, nítisö naca yöl-la' réajlë' queéli' Lë', ate' nagá'anagaca dul-la' nabága'lí'. <sup>18</sup> Lësca' caní, nupa na' chinátigaca, en gula'yéajlë' Cristo, tsaz gulati channö cabí bubanë' Lë'. <sup>19</sup> Channö tsánnisö ni zóaru' nabanru' huáca uzí'iru' xibé' Cristo, nácaroru' bayechi' ca yúgu'të bönachi.

<sup>20</sup> Na'a, le nácaté bubanë' Cristo lu yöl-la' guti, en náquië' nu gusí lo bubán tsaz ladaj yúgu'të nupa ulu'bán tsaz lu yöl-la' guti. <sup>21</sup> Ca na' guyú'u yöl-la' guti ni'a que le benë' tuë' bönni', lësca' caní, ni'a que le benë' ia'túe' bönni' guyú'u yöl-la' rubán quégaca nupa chinátigaca. <sup>22</sup> Ca na' tati yúgu'të bönachi tu' náljlengaca Adán, lësca' caní ulu'bán yúgu'të nupa na' náljlengaca Cristo. <sup>23</sup> Tu tuë' ubanë' ca ral-la' gaca. Zí'alö bubanë' Cristo, ate' tödi ni ulu'bán nupa néquiguequi queé' Cristo cate' huödë'. <sup>24</sup> Ni'irö idxín dza údxí cate' ugúë' Cristo idútë le dë lu në'e, en idútë yöl-la' unná bë', en idútë yöl-la' huáca que tu' xihui', ate' udödë' yöl-la' unná bë' queé' lu në'ë Dios Xuz. <sup>25</sup> Run bayudxi inná bë'ë Cristo ga idxinxrö dza chibenë' Dios ga ulu'zechu zxíbigaca lahuë' Lë' yúgu'të nupa ta'dá'baga' Lë'. <sup>26</sup> Le ridá'baga' Lë' le usunítië' ga údxí naca yöl-la' guti. <sup>27</sup> Dios chinudödë' yúgu'të lu në'ë Zxí'inë' para inná bë'enë' le. Nazúaj lu guichi lá'ayi, rnna: "Budödë' yúgu'të lu në'ë para inná bë'enë' le." Na'a, naca bë' biti' budödi cuinë' lu në'ë Zxí'inë', tu' naca cazé' Lë' Nu rudödi yúgu'të lu në'ë Zxí'inë'. <sup>28</sup> Cate' idxín dza ni' chinudödë' Dios lu në'ë Cristo yúgu'të para inná bë'enë' le, ni'irö Lë' cazé' Zxí'inë' udödi cuinë' lu në'ë Dios, Nu na' budödi lu në'ë Zxí'inë' yúgu'të, ate' ga údxí, Dios inná bë'enë' tsaz yúgu'të.

<sup>29</sup> Bál-lali' ridílali' nisa uláz quégaca nupa chinátigaca. Channö réquili' biti' ulu'bán nupa na' chinátigaca, ¿bizx que ridílali' nisa uláz quégaca nupa chinátigaca?

<sup>30</sup> Zoa bönadxi queétu' gátitu' yúgu'të dza. ¿Bizz que ruí'tu' lataj gaca caní channö cabí ubanru' lu yöl-la' guti? <sup>31</sup> Yúgu'të dza zoa bönadxi gátia'. Riguíxjöi'ida' libí'ili' lë ni, böchi' luzá'ado', tu' raza ládx'a' le bena'. Caní naca tu' bena' ga réajlë'ëli' Xanru' Jesucristo. <sup>32</sup> Channö tu' gú'unisida' gudí'lalena' böa' guixi' sínia' lu yödzö Éfeso, ¿bizxi caz uzi'a xibé? Channö cabí ulu'bán nupa chinátigaca, ral-la' gunru' ca ta'nná bönachi: "Guí'aj gáguru' tu' huátiyu' cuxó huidzaj."

<sup>33</sup> Biti' güí'ili' lataj nu si' ye'e libí'ili'. Channö si' lu ná'ali' láti'do'os le cabí nácaté, idúteli' huóácali' chul-la niti. <sup>34</sup> Buli'bí'i ládx'i'li', en biti' gunli' dul-la' tu' cabí núnbe'ëli'-në' Dios bál-lali' libí'ili'. Rnnía' caní para guna' ga utu'ili'.

### *Ca ilaca nupa ulu'bán lu yöl-la' guti*

<sup>35</sup> Nadxi ca' zoa nu inná: "¿Nacxi ulu'bán nupa chinátigaca? ¿Nacxi gaca idú ca nácataca cazé' cate' ulu'dxinë'?" <sup>36</sup> Li', bönni' biti' bi nözinë'. Lë na' rázu' luyú biti' ilén channö cabí initi. <sup>37</sup> Lë na' rázu' luyú naca tu xisédo'os, nadxi ca' que zxoa' xtila o que ia'tú guixi' cuando'. Lë na' rázu' biti' naca guixi' cuando' na' ral-la' ilén. <sup>38</sup> Dios runë' ga gaca guixi' cuando' ca nun cazé' que. Ca naca tu tu xisedo' na' runë' ga gaca guixi' cuando' que. <sup>39</sup> Lësca' caní, biti' naca lëbisö bëla' que queégacaba' yúgu'tëba' böa' guixi'. Zoa tu bëla' quégaca bönachi, en ia'tú ca naca bëla' quégacaba' böa' guixi'. Ia'tú ca naca bëla' quégacaba' biguínni, en ia'tú ca naca bëla' quégacaba' böla. <sup>40</sup> Lësca' caní nadzá' idú ca nácataca caz nupa nacuá' yehua' yubá ca naca idú ca nácataca caz nupa nacuá' luyú ni. Zoa tu yöl-la' lachi quégaca nupa nacuá' yehua' yubá, en ia'tú ca naca

yöl-la' lachi quégaca nupa nacuá' luyú ni. <sup>41</sup> Zoa tu yöl-la' lachi que gubidza, en ia'tú que beo', en ia'tú quéguequi bólaj lúzxiba. Yöl-la' lachi que tu bólaj lúzxiba nadzá' ca naca yöl-la' lachi que ia'tú bólaj lúzxiba. <sup>42</sup> Lésca' caní gaca cate' ulu'bán nupa chinátigaca. Cate' rigachi' lu yero ba naca tu bëla' initi. Cate' ubán, ní'irö gaca tu le soa tsaz. <sup>43</sup> Cate' rigachi' lu yero ba naca tu bëla' cá'asö, en le nacuidi'. Cate' ubán, ní'irö gaca tu le lachi, en le nál-la. <sup>44</sup> Cate' rigachi' lu yero ba naca tu bëla' que yödzölió ni. Cate' ubán, ní'irö gaca tu le soa tsaz yehua' yubá. Zoa tu bëla' que yödzölió ni, en ia'tú ca gaca le idzaga bö' naca cázaru'.

<sup>45</sup> Nazúaj lu guichi lá'ayi le rnna: "Bönni' na' gusí lahuë' zoë' luyú ni, lë' Adán, Dios benë' lë' bönni' ban", pero Bönni' na' guyázië' xilatjë' Adán, Lë' Cristo, Dios benë' ga náquië' Bö' nabániru'. <sup>46</sup> Biti' blé'ë zí'alö Bönni' na' náquië' Bö'. Bla' zí'alö nu na' naca bönáchisö, ate' ní'irö blé'ë Bönni' na' náquië' Bö'. <sup>47</sup> Bönni' ni' blé'ë zí'alö, gúquinë' yu. Bönni' na' blé'ë burópilö, Nu na' naca Xanru', birúajë' yehua' yubá. <sup>48</sup> Nupa nacuá' luyú ni nácagaca ca gúquië' bönni' na' gúquinë' yu, ate' nupa ral-la' tsöjcuá' yehua' yubá ilaca ca naca Nu na' birúaj yehua' yubá. <sup>49</sup> Ca na' na'a dë queéru' tu bëla' le naca ca guca bëla' queë' bönni' na' gúquinë' yu, lésca' ral-la' huöéquiru' ca néquinë' Nu na' birúaj yehua' yubá.

<sup>50</sup> Caní ré'ëni inná lë ni rea' libfili', böchi' luzá'ado', rnnía': Le néquini bëla', en rön biti' gaca tsaz ga ni' rinná bë'ë Dios, en lésca' caní, lë na' initi biti' gaca ideli' lë na' soa tsaz. <sup>51</sup> Buli'yútsöca', rea' libfili' tu le bigachi': Biti' gátiru' yúgu'teru', pero Dios utsé'ë ca nácaru' yúgu'teru'. <sup>52</sup> Tsálido'os gaca, tsca naca tu le rutásö guiój loru', cate' cödxi lúzuba' böa' le röjetë. Cödxi lúzuba' na', ate' ulu'bán nupa chinátigaca, en iléquini tu le soa tsaz, ate' Dios utsé'ë le néquiniru' yúgu'teru'. <sup>53</sup> Lë na' nácaru' le riniti ral-la' huöáca le soa tsaz, ate' le néquiniru', lë na' ral-la' gati, huöáca tu le catu caz gati. <sup>54</sup> Cate' lë na' riniti chinuhuöáca le soa tsaz, enca' lë na' ral-la' gati chinuhuöáca le catu caz gati, ní'irö idxín lë na' nazúaj lu guichi lá'ayi, le rnna:

Nadúa tsaz yöl-la' guti.

Chibidéli'në' Cristo.

<sup>55</sup> Bítirö inná be'e yöl-la' guti ré'u.

Bítirö gaca yöl-la' guti bi gun queéru'.

<sup>56</sup> Huáca bi gun yöl-la' guti queéru' tu' nabága'ru' dul-la', ate' nabága'ru' dul-la' tu' ridá'baga'ru' xibá queë' Dios. <sup>57</sup> ¡Xclenë' Dios! ¡Lë cazë' runë' ga nuláru' lu yöl-la' guti ni'a que le benë' Xanru' Jesucristo!

<sup>58</sup> Que lë ni na', böchi' luzá'ado', guli'sóa tsutsu. Guli'gaca idú ládxili', gúntica'sili' xichinë' Xanru' tu' nöz quézili' biti' runli' nítisö xichinë' Xanru'.

## 16

*Yugu' bönnachi Corinto tu' nödzaj quégäquië' böchi'gaca ta'yádzjanë'*

<sup>1</sup> Na'a, ca naca que dumí na' unödzjali', le gácalen böchi'ru' ta'yéajlë'ë Cristo nacuë' Jerusalén, guli'gún na'a ca na' gunná bë'eda' yugu' cö' bönnachi queë' Cristo, nacuá' luyú Galacia. <sup>2</sup> Yugu' dza domingo, tu tuli' ral-la' cù'uli' quez latí' dumí, tsca na' Dios runnë' queéli'. Guli'gún chi'i le, para cabí gun bayudxi bi utúbili' cate' idxina' ga zóali'. <sup>3</sup> Cate' ni' idxina' ga zóali', isól-la'a Jerusalén bönni' na' cöli' libfili'. Uzúaaja' tu lu guichi le gun ga ilaca bë'gaquië', ate' ilu'ë dumí na' unödzjali'. <sup>4</sup> Channö ral-la' tseja' ca' neda', tsöjácalenë' neda'.

*Le ré'ënë' gunë' Pablo*

<sup>5</sup> Guída' ga zóali' cate' údxí töda' yugu' yödzö luyú Macedonia, tu' run bayudxi töda' yugu' yödzö na'. <sup>6</sup> Réquida' ugá'analena' libfili' tu chí'i, o nadxi ca' ugá'ana' ni' yugu' beo' ziaga. Ní'irö huáca gácalenli' neda', ugú'uli' neda' nöza gáti'tës ga ral-la' tseja'. <sup>7</sup> Cate' guída' uduyúa' libfili' biti' ré'ënda' tódisa' ni'. Runa' löza sóalena' libfili' xidzé, channö

gunnë' Xanru' neda' lataj. <sup>8</sup> Ugá'ana' ni lu yödzö Éfeso ga idxinrö dza Pentecostés <sup>9</sup> tu' dë lataj ni guna' tu dxin zxön queé' Xanru', sal-la' zián nupa ta'dá'baga' neda'.

<sup>10</sup> Channö idxinbi' bi'i Timoteo ga na' zóali', guli'gü'i ládxí'lí'-bi', para cabí ubi ugu'ibi' tsanni ni' sóalenbi' libi'ili', tu' runbi' xichinë' Xanru' ca na' runa' neda' xichinë'. <sup>11</sup> Que lë ni na', cuntu nu ral-la' uzóa lëbi' tsölá'alö. Guli'gácalen-bi', ugú'uli'-bi' nöza idú tsáhui'do', para udxinbi' ga ni zoa' neda', tu' riböza'-bi' lëbi', enca' yugu' bóchi'ru' túnlenë'-bi' tsözxón dxin.

<sup>12</sup> Ca naca queé' bóchi'ru' Apolos, gúta'yua' lahuë' tsejë' tsöjyúë' libi'ili' tsözxón len yugu' bóchi'ru', pero biti' ré'ënë' tsejë' na'a. Guídë' cate' séqui'në'.

### *Didza' ru'ë Pablo ga ruúdx*

<sup>13</sup> Buli'subán ládxí'lí', en guli'gaca tsutsu ca réajlë'eli'-në' Cristo. Guli'gaca rugu ladxi', en buli'tipa ládxí'lí'. <sup>14</sup> Len yöl-la' nadxf'i guli'gún bítí'tës bi gunli'.

<sup>15</sup> Na'a, bōchi' luzá'ado', chinöz quégaca di'a dza queé'. Nácagaca nupa gula'sí lógaca ta'yéajlë' Cristo ladaj bönachi nacuá' luyú Acaya. Bulu'dödi cuíngaquië' para ilunë' xichíngaca bönachi queé' Dios. <sup>16</sup> Ráta'yua' loli', bōchi' luzá'ado', gunli' bal nupa nácagaca ca bōchi'ru' na', enca' ca nácagaca nupa tunlen légaquië' tsözxón dxin, en tácalen légaquië'. <sup>17</sup> Rudzéjada' tu' bila'dxinë' Estéfanas, en Fortunato, en Acaico ga zoa', tu' gúcalengaquië' neda' uláz queéli'. <sup>18</sup> Bulu'hué tsáhuë'ë neda' ca na' bulu'hué tsáhuë'ë ca' libi'ili'. Guli'gún bal bönachi caní.

<sup>19</sup> Yugu' cö' bönachi queé' Dios luyú Asia ni tu'gapa Dios libi'ili'. Aquilo, en Priscila, enca' nupa tu'dubi queé' Dios ga naca lu yu'u lídxigaquië' tu'gapë' Dios libi'ili'. <sup>20</sup> Yúgu'të bōchi'ru' ni tu'gapë' Dios libi'ili'. Guli'gapa Dios tuli' ia'tuli', en unída'li' luzá'ali'.

<sup>21</sup> Neda', Pablo, len na' cuin caza' ruzúaaja' lu guichi lë ni, rnnía': Rugapa' Dios libi'ili'.

<sup>22</sup> Nu biti' nadxf'i Xanru' Jesucristo, chinabía dö' nu na'.

Gudá Xanru'.

<sup>23</sup> Rinábida'-në' Xanru' Jesucristo uzá' ládxë'ë queéli'. <sup>24</sup> Nadxf'ida' yúgu'tëli' tu' nácaru' tuz len Xanru' Jesucristo. ¡Ca' gaca!

## DIDZA' BUROPI GUSÖL-LË'Ë PABLO YÖDZÖ CORINTO

*Pablo rugapë' Dios bönachi queë' Cristo nacu'ë Corinto*

<sup>1</sup> Neda', Pablo, naca' gubáz queë' Jesucristo tu' ré'ënë' caní Dios. Bi'i böchi'ru' Timoteo runbi' neda' tsözxón. Rugapa' Dios libí'ili', rudúbili' queë' Dios lu yödzö Corinto, enca' yúgu'téli' néquili' quez queë' Dios luyú Acaya ga na' nababa Corinto. <sup>2</sup> Rinábida'-në' Xúziru' Dios, en Xanru' Jesucristo uzá' ládxë'ë queéli', en gunë' ga soa dxi icja ládxi'do'oli'.

*Yugu' le gudí'i guzxáquë'ë Pablo*

<sup>3</sup> ¡Yöl-la' ba Dios, Xuzé' Xanru' Jesucristo, tu' náquië' Xúziru', en ruhuéchi' ládxë'ë rë'u, en náquië' ca' Dios, Nu ruhué tsáhui'tica'sö rë'u! <sup>4</sup> Dios ruhué tsáhui'ë rë'u cate' raca bíti'tés bi raca queéru', para gaca huë tsáhui'ru' ca' nupa bi raca quéguequi. Ruhué tsáhui'ru' légaquië' ca na' Dios ruhué tsáhui'ë rë'u.

<sup>5</sup> Tsca ta'yán le rigu'i rizáca'ru', ca na' gudí'i guzxáquë'ë Cristo, lësca' caní ta'yán le tu'hué tsahui' rë'u, tu' nácaru' tuz len Cristo. <sup>6</sup> Que lë ni na', channö bi rigu'i rizáca'tu', raca caní queétu' para gaca huë tsáhui'tu' libí'ili', en guntu' ga uláli'. Channö Dios ruhué tsáhui'ë netu', raca caní para gaca huë tsáhui'tu' libí'ili', ate' lu yöl-la' riböza zxön ladxi' queéli', gaca gua' ilenli' yugu' le qui'i sáca'li', ca na' raca ca' queétu'. <sup>7</sup> Ruzxöni ládxi'tu'-në' Dios gúntica'së' ga gaca dxi'a queéli', tu' chinózitu' ca na' rigu'i rizáca'li' tsözxón len netu', lësca' caní ruzí'ili' xibé tsözxón len netu' le ruhué tsáhui'ë Dios rë'u.

<sup>8</sup> Ré'ënitu' inózili', böchi' luzá'ado', ca naca le zián le gulaca queétu' luyú Asia. Gudöditë bë' lë na' guca queétu', ate' guca zítérö ca le guca guá' ilentu'. Ca' guca, bíti'rö bentu' löza sóatu' ibantu'. <sup>9</sup> Gúquitu' guca queétu' ca raca quégaequië' bönni' chinarugu quégaequië' ilátië'. Guca caní queétu' para cabí uzxöni ládxi'tu' la' cuínsitu', pero uzxöni ládxi'tu'-në' Dios, Nu rusubán nupa chinátigaca. <sup>10</sup> Dios busölé' netu' lu lë na' ben ga guzóa bönadxi gátitu', ate' rusölé' netu' yúgu'té dza. Runtu' löza usölé' Lë' netu' caní leyúbölö <sup>11</sup> channö gácalenli' netu', ulídzali'-në' Dios, en inábili'-në' gácalenë' netu'. Dios gunë' ca na' inábili'-në' tsözxón len bönachi zián, uzá' ládxë'ë queétu', ate' ila'nná: "Xclenë' Dios" ni'a queétu'.

*Riguíxjö'ë Pablo bizx que ridzenë' idxxinë' Corinto*

<sup>12</sup> Lë ni le run ga rudzéjatu'. Bö' naca caztu' rulu'i netu', len yöl-la' ba'a ladxi' queétu', en idú ládxi'tu' runtu' bi runtu' yödzölió ni, ate' caní bentu' ca' ga ni' zóali'. Caní bentu', tu' gúcalen netu' le buzá' ládxë'ë Dios queétu', en caléga len yöl-la' réajni'i queéztu' bentu' caní. <sup>13</sup> Ruzúajsötu' queéli' lu guichi le gaca ulábali', en le gaca tséajni'ili'. Raca ládxa'a tséajni'ili' idú <sup>14</sup> lë na' réajni'ili' lati'. Ni'irö cate' idxín dza huödë' Xanru' Jesucristo, gaca gunli' netu' zxön ca na' netu' guntu' libí'ili' zxön.

<sup>15-16</sup> Tu' bena' löza lë ni, guzá' ládxa'a guída' ga zóali' zí'alö cate' gudöda' luyú Macedonia, ate' guída' ga zóali' leyúbölö cate' uzá'a ni para uzf'ili' xibá' chopa luzuí. Tödi ni' huáca gácalenli' neda' ugú'uli' neda' nöza tseja' luyú Judea. Caní gú'unida' guna'.

<sup>17</sup> ¿Naru' réquitseli' guzxí' yé'a tu' butsá'a ca guna'? ¿Naru' réquitseli' lu yöl-la' bönáchisö quia' runa' le rizá'asö icja', en bë'ësa' ca' didza' cate' gunnía': "Caní guna"”? <sup>18</sup> Ni'a queë' Xanru' Dios, Nu run idútë ca rnna xtídzë'ë, biti' bë'ësa' ca' didza' cate' bë'lena' libí'ili' xtídzë'ë Dios. <sup>19</sup> Jesucristo, Zxí'inë' Dios, Nu na' bentu' libán que ga zóali', neda' len Silvano, en Timoteo, biti' rui'isë' ca' didza'. Lë' ru'ë didza' idútë li. <sup>20</sup> Cristo caz runë' ga naca idútë löza yúgu'té le guzxí' lu në'ë Dios, ate' ni'a queë' Lë' gaca innaru': "Ca' gaca", para gaca queë' Dios yöl-la' ba. <sup>21</sup> Dios caz runë' ga runtu' löza tsözxón len libí'ili'

néquiru' queë' Cristo, en budödë' lu na'tu' dxin queë' runtu'. <sup>22</sup> Bennë' queëru' le naca bë' néquiru' queë', tu' guchízië' icja ládzi'do'oru' Dios Bö' Lá'ayi, Nu naca queëru' le run ga naca löza yúgu'të le gunnë' Dios queëru'.

<sup>23</sup> Ni'a queë' Xanru' Dios, Nu nözi le rizá' ládex'a, ruá'a didza' idútë li. Nözinë' Lë' biti' bida' ga zóali' lu yödzö Corinto, para cabí gun bayudxi guna' ga huí'inili'. <sup>24</sup> Biti' ré'ënitu' inná bë'etu' libí'ili' ca réajlë'eli' Cristo, tu' chinácali' tsutsu ca réajlë'eli' Lë'. Ré'ënitu' guntu' le gun ga udzeja ládzi'li'.

## 2

<sup>1</sup> Que lë ni na' bë' ládex'a cabí guídatea' queëli' zí'alö, para cabí guna' ga huí'inili'. <sup>2</sup> Channö guna' neda' ga huí'inili', ¿nuzxi caz gun ga udzéjada' neda'? ¿Naru' guntsa' ga huí'ini nu ral-la' gun ga udzéjada' neda'? <sup>3</sup> Que lë ni na' buzúaja' queëli' lu guichi zí'alö. Biti' gú'unida' guída' ga zóali', para cabí gunli' libí'ili' ga huí'inida' neda', tu' ral-la' gácali' libí'ili' cázali' le gun ga udzéjada' neda'. Tu' ruzzöni ládex'a libí'ili', nözda' udzéjali' yúgu'tëli' channö udzéjada' neda'. <sup>4</sup> Cate' ni' buzúaja' queëli' lu guichi lë na', gusébide'e ládex'a, en buí'inide'e ládex'a ga bidxitë gurödxa'. Buzúaja' caní lu guichi, calëga para guna' ga huí'inili', pero para inözili' ca nadxi'ide'eda' libí'ili'.

*Ral-la' uniti loru' nu ruá' dö' cate' rubí'i ladxi'*

<sup>5</sup> Channö zoë' tu bönni' ni', bönni' na' busuhui'ininë' rë'u, calëga néda'sö busuhui' ininë', pero huáca innaru' busuhui'ininë' yúgu'tëli' libí'ili'. Rnnia': "Huaca innaru'", para cabí tödi bë' ichugu bë'a queë' bönni' na'. <sup>6</sup> Tscati' gaz xíguia' chibenli' látu'biqu' yúgu'tëli' queë' bönni' na'. <sup>7</sup> Na'a, ral-la' uniti loli' bönni' na', en utípali' ládxë'ë, para cabí tödi bë' huí'ininë', en para cabí gaca tsaz chopá ládxë'ë. <sup>8</sup> Que lë ni na' ráta'yua' loli' gunli' le gaca bë' nadxi'ili'-në' idú ládzi'li'. <sup>9</sup> Que lë ni na' ca' buzúaja' queëli' lu guichi lë na'. Gú'unida' si' bë'a libí'ili' para inözda' channö rúntica'sili' ca rnna xtídza'a. <sup>10</sup> Cate' nu runiti loli' libí'ili', neda' ca' runiti lahuá' nu na'. Cate' nu runiti lahuá', channö bi ben nu na' runiti lahuá', runa' caní uláz queë' Cristo para gaca bi uzi'ili' xibé. <sup>11</sup> Caní runa', para cabí sequi' Satanás tu' xihui' ucúl-la rë'u, tu' chinóziru' yugu' le ré'ëni gun queëru'.

*Gurö'ë böniña Pablo lu yödzö Troas*

<sup>12</sup> Cate' bidxina' lu yödzö Troas para guna' libán que didza' dxia' queë' Cristo, bénnadë'ë Xanru' neda' lataj guna' libán ni'. <sup>13</sup> Sal-la' guca caní, gurö'a böniña tu' cabí yöjxáca'a-bi' bi'i böchi'ru' Tito ni'. Que lë ni na' buzá'lena' böniachi ni', ate' guyija' luyú Macedonia.

*Idéli'ru' tu' zóalenë' Cristo rë'u*

<sup>14</sup> ¡Xclenë' Dios! Riché'tica'së' rë'u ca tu le naca bë' bidéli'në' Cristo yöl-la' rusölä queëru'. Dios rugunë' dxin rë'u para rulu'ë lahuí ca gaca ilúnbe'e böniachi Cristo. Le nácaru' naca ca tu le rilá' zxixi, le riguisi gáti'tës. <sup>15</sup> Nácaru' ca tu nöri rilá' zxixi, le ruzégui'ë Cristo lahuë' Dios, en le riguísie' lögaca nupa nulágaca, en nupa nanítigaca. <sup>16</sup> Lögaca nupa na' nanítigaca nácaru' ca tu le rilá' siguti le naca bë' ilátië'. Lögaca nupa na' nulágaca nácaru' ca tu le rilá' zxixi le naca bë' ibántica'siru'. ¿Nuzxi caz naca lesaca' gaca que caní? <sup>17</sup> Biti' runtu' ca tun zián böniachi, nupa tu'gún dxin xtídze'ë Dios ca tu le tuti', en to'o. Tu' nasól-lë'ë Dios netu', idú ládzi'tu' ruí'itu' didza' lahuë' Lë' tu' nácatu' tuz len Cristo.

## 3

*Ca naca didza' le ruún rë'u tuz len Dios*

<sup>1</sup> ¿Naru' réquitseli' run ba zxön cuintu' cate' ruí'itu' caní didza'? ¿Naru' runtsö bayudxi ului'itu' libí'ili' tu guichi le rulu'i le nácatu'? ¿Naru' ral-la' inábitu' libí'ili' gúnnali' queëtu' tu guichi caní, ca na' tun bal-la böniachi? <sup>2</sup> Libí'ili' cázali' nácali' ca tu guichi le rulu'i le nácatu', le nazúaj lu icja ládzi'do'otu', ate' yúgu'të böniachi gaca ulu'laba le, en

tséajni'iguequi le. <sup>3</sup> Le nácali' nalá' lahui ca tu guichi nuzúajé' Cristo, le gusól-lé'ë lu na'tu'. Biti' nazúaj tu lu guichi, pero Bö' Lá'ayi queé' Dios ban nuzúajé' le, caléga tu lu guiójta'a, pero lu icja ládxi'do'oli' nuzúajé'.

<sup>4</sup> Ruíitu' caní didza' tu' ruzxöni ládxi'tu'-në' Dios tu' zóalenë' Cristo rë'u. <sup>5</sup> Biti' réquitu' bi gaca guntu' rácasö queétu', pero Dios runnë' queétu' yöl-la' huáca bi guntu'. <sup>6</sup> Dios caz bennë' queétu' yöl-la' huáca guntu' xichinë' lu didza' cubi na', le ruún rë'u tuz len Dios. Didza' ni biti' naca tu xibá nazúaj lu guichi, pero naca tu le nusédinë' Dios Bö' Lá'ayi rë'u. Xibá na' nazúaj lu guichisö richugu queéru' gátiru', pero Dios Bö' Lá'ayi nabániru'.

<sup>7</sup> Yugu' xibá queé' nazúajgaca lu guichi, Dios buzúajé' yugu' lu guiójta'a, ate' bulu'e lahui yöl-la' bení' queé' cate' budödë' le lu né'ë Moisés. Sal-la' gudödi que, guyépitérö yösa bení' lahuë' Moisés. Caní guca, biti' guca ulu'yú böñachi Israel lahuë' Moisés. Channö yöl-la' bení' caní yöjtsaga xibá na', ate' xibá na' richugu quégaca böñachi ilátigaca, <sup>8</sup> zxöntérö naca yöl-la' bení' na' dzaga yugu' le runë' Dios Bö' Lá'ayi. <sup>9</sup> Yöjtsaga yöl-la' bení' lë na' ben ga narugu quégaca böñachi ilátigaca. Zxöntérö naca yöl-la' bení' que lë na' run ga rnnë' Dios nácagaca tsahui' böñachi. <sup>10</sup> Tu' nácatérö lesaca' yöl-la' bení' na' nalá' lahui na'a, cuídi'sö nagá'ana yöl-la' bení' na' bilá' lahui cate' Dios bunödzjé' xibá queé' quégaca böñachi. <sup>11</sup> Channö guzóa yöl-la' bení' que lë na' guzóa tu ch'ido'osö, zxöntérö naca yöl-la' bení' que lë ni sóatica'sö.

<sup>12</sup> Tu' zoa lë ni runru' löza, ruíitu' didza' lu yöl-la' rugu ladxi'. <sup>13</sup> Biti' runtu' ca benë' Moisés, bucache' lahuë' len tu lári'do', para cabí ulu'yú böñachi Israel yöl-la' bení' na' zeaj riniti. <sup>14</sup> Gula'chul-la gula'nítie' yugu' bönni' ni'. Ga ridxitë na'a dza cate' tu'labë' guichi que didza' gula na' le ruún böñachi tuz len Dios, naca tsca nagá'ana la' leze lári'do' na' lógaquie', lë na' gaca ugúé' tuzé' Cristo. <sup>15</sup> Ga ridxitë na'a dza, cate' tu'labë' guichi ga na' nazúaj didza' queé' Moisés, zxoa ca tu lári'do' guiój lógaquie' le run ga nachul-la nanítigaquie'. <sup>16</sup> Cate' nu ruhuöáca queé' Xanru', rigúa lë na' run ga nachul-la naniti nu na'. <sup>17</sup> Cate' ni rnnatu': "Xanru'", ruíitu' didza' queé' Dios Bö' Lá'ayi. Ga zoë' Bö' Lá'ayi queé' Xanru', ni' zoa caz yöl-la' nadzán. <sup>18</sup> Yúgu'téru' rë'u biti' bi nusayaj loru'. Nácaru' ca tu guié dxili ga nalá' yöl-la' bení' que lahuë' Xanru', ate' yöl-la' bení' na' queé' Xanru', Nu naca Bö' Lá'ayi, rutsá' rë'u, en run ga zeaj rácarörü' ca náquië' Cristo caz, en ráta'rö queéru' yöl-la' bení' queé'.

#### 4

<sup>1</sup> Dios buéchi' ládxë'ë netu', en budödë' lu na'tu' dxin ni runtu'. Que lë ni na' biti' raca chopa ládxi'tu'. <sup>2</sup> Chibucá'anatu' le tun böñachi bagáchi'sö, en le tun ga rutu'íru'. Cuntu nu rizi' yé'etu', en biti' rutsá'atu' xtídzë'ë Dios. Tu' ruíitu' didza' que le naca idútë li, ruí'ládxi'tu' guntu' le iléquibe'e yúgu'té böñachi naca dxí'a lahuë' Dios. <sup>3</sup> Channö zoa nu biti' réajni'ini didza' dxí'a runtu' ba nalí que, nácagacasö nupa nachul-la nanítigaca biti' ta'yéajni'i le. <sup>4</sup> Biti' ta'yéajlé' böñachi na'. Ben tu' xihui' ga naca caní, nu na' nun cuini ca dios, en rinná be'e böñachi dza ni zóaru' na'a. Ben ga nachul-la nanítigaca, para cabí ila'lé'e bení' que didza' dxí'a ca naca yöl-la' bení' queé' Cristo, Nu na' naca idú ca náquië' Dios caz. <sup>5</sup> Biti' runtu' libán que la' cuínsitu', pero runtu' libán queé' Jesucristo, en riguixjö'ötu' náquië' Xanru', ate' netu' ni nácatu' huen dxin queéli' tu' nadxi'itu'-në' Jesús. <sup>6</sup> Dios, Nu ben ga buzení' bení' ga ni' guca chul-la, náquië' Nu rigú'u bení' icja ládxi'do'oru', le ruzéajni'i rë'u para gúnbe'ëru' yöl-la' bení' queé' Dios, lë na' ruzeni' lahuë' Jesucristo.

*Tu' réajlé'ëru' Dios runru' ca rë'ënë' Lë'*

<sup>7</sup> Yöl-la' tsahui' ni yu'u icja ládxi'do'oru' rë'u. Nácaru' ca yugu' yusu' yu, para gaca bë' nequi queé' Dios yöl-la' huáca zxön na', en caléga que cázaru'.

<sup>8</sup> Tu'saca' zi' böñachi netu', pero biti' rudú ládxi'tu'.

Ró'ötu' böñiga, pero biti' raca chopa ládxi'tu'.

<sup>9</sup> Ta'bía ladxi' bönachi netu', pero biti' rubéaj ládxë'ë Dios netu'.  
Ta'zé'ede'e netu' yu, pero biti' tu'suniti netu'.

<sup>10</sup> Lu idú le naca caztu' rátitica'stu' tsözxón len Jesús,  
na' naca bë' lu le naca caztu' nabánitu' Lë'.

<sup>11</sup> Tsanni ni zóatu' nabantu', zóatica'sö bönadxi gátitu' tu' néquitu' queë' Jesús para  
gaca bë' nabánitu' Lë' lu le naca caztu' le riniti. <sup>12</sup> Caní naca, zoa bönadxi queëtu' gátitu',  
pero ni'a que lë ni rata' yöl-la' na'bán queëli'.

<sup>13</sup> Nazúaj lu guichi lá'ayi le rnna: "Guyéajlë'a Dios, ate' que lë ni na' bë'a didza'." Lësca'  
caní raca queëtu', réajlë'ëtu' Dios, en que lë ni na' ruí'itu' didza'. <sup>14</sup> Nöztu' ca gunë'  
Dios, Nu busubán Xanru' Jesús, usubanë' ca' netu' tsözxón len Jesús, en usudxinë' netu'  
tsözxón len libí'ili' lahuë' Lë'. <sup>15</sup> Raca caní yúgu'të lë ni para gaca bi uzi'ili' xibé. Channö<sup>1</sup>  
ila'deli' ziánrò ca' bönachi le ruzá' ládxë'ë Dios queëru', ila'nné': "Xclenë' Dios", ate' gaca  
yöl-la' ba queë' Dios.

<sup>16</sup> Que lë ni na', biti' raca chopá ládxì'tu'. Sal-la' riniti idú le naca caztu', yúgu'të  
dza rucubë' Dios le nácatu' lu icja ládxì'do'otu'. <sup>17</sup> Le cuídi'sö rigu'i rizáca'ru' ni tu  
chí'ido'osö run ga gata' queëru' le uzi'da'aru' xibé le sóatica'sö, en le nácatérö lesaca'  
ca gaca gúnbe'ëru'. <sup>18</sup> Biti' ruí'i ládxì'ru' le rilé'eri' luyú ni, pero le biti' gaca ilé'eri' ruí'i  
ládxì'ru'. Lë na' rilé'eri', tu chí'ido'osö zoa, pero le cabí gaca ilé'eri' sóatica'sö.

## 5

<sup>1</sup> Nöziru' cate' initi idútë le naca cázaru', le naca ca tu yu'u lári'do' yödzölió ni, Dios  
chinupé'ë tu le cubi queëru', le naca ca tu yu'u le zoa tsaz ni' yehua' yubá, lë na' nun cazé'  
Lë'. <sup>2</sup> Que lë ni na' rinné ládxì'ru' tu' ré'ëniru' tsú'uru' le cubi ni', lë na' naca ca tu lídxiru'  
ni' yehua' yubá. <sup>3</sup> Tsú'uru' le cubi ni' ca na' rácuru' tu lari', para cabí sóaru' ga biti' zoa  
idútë le naca cázaru'. <sup>4</sup> Tsanni ni zóaru' lu idútë le naca cázaru', le naca ca tu yu'u lári'do',  
rinné ládxì'ru' lu yöl-la' risëbi ladxi' queëru'. Biti' runru' caní tu' ré'ëniru' ucá'anaru'  
idútë le naca cázaru', pero ré'ëniru' tsú'uru' tsaz le cubi ni'. Caní gaca, ucá'anaru' idútë  
le naca cázaru' le riniti, ate' tsú'uru' lu yöl-la' na'bán idú. <sup>5</sup> Dios chinupé'ë yúgu'të lë ni  
queëru', ate' guchízië' rë'u Dios Bö' Lá'ayi, Nu naca queëru' le naca bë' naca löza sí'iru' lë  
na' nupé'ë queëru'.

<sup>6</sup> Que lë ni na' nadipa ládxì'ru'. Tsanni ni yú'uru' lu le naca cázaru', nöziru' zóaru'  
zi'tu' ga zoa lidxë' Xanru'. <sup>7</sup> Runru' ca runru' tu' réajlë'ëru'-në' Dios, en calëga tu' zoa bi  
rilé'eri'. <sup>8</sup> Tu' runru' löza lë ni, ré'ëniru' ucá'anaru' le naca cázaru' ni para tsöjsóalenru'-  
në' Xanru'. <sup>9</sup> Que lë ni na' ruí'i ládxì'ru' gunru' le raza ládxë'ë Xanru', channö ugá'anaru'  
lu idútë le naca cázaru' ni, o channö tsöjsóalenru'-në' Xanru' ni'. <sup>10</sup> Caní runru' tu' run  
bayudxi idxinru' yúgu'tëru' lahuë' Cristo ga ni' rö'ë ruchi'a rusörö'ë. Ní'irö ubi'ë que  
queëru' tsca naca le benru' tsanni ni yú'uru' lu le naca cázaru', channö benru' le naca  
dxi'a o le cabí naca dxi'a.

### *Le ruún rë'u tuz len Dios*

<sup>11</sup> Que lë ni na', tu' rádxitu'-në' Dios, ruí'i ládxì'tu' uzéajni'itu' bönachi. Nözinë' Dios ca  
naca le yu'u icja ládxì'do'otu', ate' ruzxöni ládxì'a nözili' dxi'a ca' libí'ili' lë na' yu'u icja  
ládxì'do'otu'. <sup>12</sup> Biti' rubéaj cuintu' dxi'a lolí'. Ré'ënitu' gata' lataj queëli' gunli' netu' bal,  
para gaca ubí'ili' didza', bi guiéli' yugu' bönni' tun ba zxön cuíngaqüië' ca na' tu'lui'isö  
lahui cuíngaqüië', en calëga ca nácagaqüië' lu icja ládxì'do'gaqüië'. <sup>13</sup> Channö nachixi  
ícjatu', naca para gaca yöl-la' ba queë' Dios, en channö cabí nachixi ícjatu', naca para  
gaca bi uzi'ili' xibé. <sup>14</sup> Run bayudxi bi guntu' tu' nadxf'inë' Cristo rë'u, tu' chinöziru'  
tuz Nu guti uláz quégaca yúgu'të bönachi, en que lë ni na' naca quégaca yúgu'të bönachi  
tsca nátilengaca Lë' tsözxón. <sup>15</sup> Lë' gútië' uláz quégaca yúgu'të bönachi para cabirö ilunë'  
bönni' nabángaqüië' le nequi quégacasë', pero le nequi que Nu na' guti uláz quégaqüië',

en bubán lu yöl-la' guti. <sup>16</sup> Que lë ni na', bíti'rö gúnbe'ëtu' bönachi tsca naca le nalá'gaca láhui'lö, en sal-la' canísö bénbe'ëtu'-në' Cristo, biti' núnbe'ëtu'-në' caní na'a. <sup>17</sup> Channö nuhuöáca núti'tés bönachi tuz len Cristo, chinaca bönachi cubi nu na'. Chigudödi que le gulaca zí'alö, ate' chinucúbigaca yúgu'té.

<sup>18</sup> Yúgu'té lë ni nunë' Dios, Nu bun rë'u tuz len Lë' lu né'ë Cristo, en budödë' lu na'tu' guntu' libán ca gaca ulu'huöáca yúgu'té bönachi tuz len Lë'. <sup>19</sup> Libán runtu' rnna caní: "Dios guzóalené' Cristo, en bené' ga gaca ulu'huöáca bönachi yödzölió ni tuz len Lë', en biti' röjnené' dul-la' gula'baga'." Budödë' lu na'tu' didza' dxi'a ni, ca gaca ulu'huöáca bönachi tuz len Dios. <sup>20</sup> Na'a, nácatu' gubáz queë' Cristo, en raca na'a ca Dios caz ráta'yuë' loli' lu rú'atu' netu'. Que lë ni na' ráta'yutu' loli' uláz queë' Cristo, guli'huöáca tuz len Dios. <sup>21</sup> Cristo biti' bi dul-la' bené', pero Dios budödë' Lë' ca tu bönni' dul-la' uláz queëru', para gata' queëru' lataj gácaru' tsahui' ca náquië' Dios caz tu' nácaru' tuz len Cristo.

## 6

<sup>1</sup> Tu' runtu' dxin tsözxón len Dios, ráta'yutu' loli', rnnatu': Biti' udódili' cá'asö le ruzá' ládxë'ë Dios queëli'. <sup>2</sup> Nazúaj lu guichi lá'ayi ca gunné' Dios le rnna: Tu dza buzá' ládxa'a quiú', biyönda' li', ate' dza bena' ga gaca uló', gúcalena' li'.

¡Buli'yútsöca'! ¡Na'a naca dza ruzá' ládxë'ë queëru'! ¡Na'a naca dza gaca uláru'!

<sup>3</sup> Biti' ré'ënitu' bi guntu' le gun ga nu ichixi inigui, para cabí soa nu ucá'ana cá'asö dxin ni runtu'. <sup>4</sup> Ni'a que bíti'tés bi runtu', ruí'i ládxi'tu' gaca bë' nácatu' huen dxin queë' Dios. Que lë ni na', len yöl-la' riböza zxön ladxi' ruá' rilento' yugu' le rigu'i rizáca'tu', en yugu' le riyadzaj queëtu', en yugu' le tun ga rö'ötu' böniga. <sup>5</sup> Caní bentu' sal-la' gula'zé'ede'e bönachi netu' yu, en gula'gu'ë netu' lidxi güié, en gula'bía di'i netu'. Gudödi bë' bentu' dxin, en biti' guta' lataj queëtu' gásitu' o bi gágatu'. <sup>6</sup> Bë' ládxi'tu' gaca bë' nácatu' huen dxin queë' Dios. Guca bë' lë ni:

Tu' nácatu' ba'a ladxi', en tu' nápatu' yöl-la' réajni'i, en tu' ribözu' zxön ladxi', en tu' nácatu' dxi'i ladxi', en tu' zóalené' Dios Bö' Lá'ayi netu', en tu' naca idú ca nadxi'itu' luzá'atu'.

<sup>7</sup> Ruí'itu' didza' idútë li, ate' zóalen netu' yöl-la' huáca queë' Dios. Le naca tsahui' naca ca tu le rudi'initu' lu gudil-la, enca' le run chí'i netu' lu gudil-la na'.

<sup>8</sup> Nacuá' nupa tun netu' bal, enca' nupa tu'zóa netu' tsölá'alö.

Nacuá' nupa tu'lidza ditaj netu', enca' nupa tu'lidza tsahui' netu'.

Sal-la' ta'nná bönachi rizi' yé'ëtu', ruí'itu' didza' idútë li.

<sup>9</sup> Sal-la' nacuá' bönachi biti' núnbe'gaquië' netu', nacuá' ca' nupa núnbe'gaca netu'.

Ridatu' ga zoa bönadxi gátitu', pero ni zóatu' nabantu'.

Tuné' netu' xígua', pero biti' tutië' netu'.

<sup>10</sup> Tu'suhu'ini netu', pero rudzéjatica'stu'.

Nácatu' bönni' yechi', pero runtu' ga rata' yöl-la' tsahui' idú quégaca bönachi zián.

Sal-la' biti' bi dë queëtu', nequi queëtu' yúgu'té le dë.

<sup>11</sup> Idú ládxi'tu' ruí'ilentu' libí'ili' didza', böchi' luzá'ado', zóali' Corinto. Buluí'itu' libí'ili' ca ruí'i ládxi'da'tu' libí'ili'. <sup>12</sup> Channö cabí nácaru' tuz biti' naca tu' cabí ruí'i ládxi'tu' libí'ili', pero libí'ili' cázali' biti' ruí'i ládxi'li' netu'. <sup>13</sup> Na'a, ruí'ilena' libí'ili' didza' ca runé' tu bönni' ruí'ilené'-bi' zxí'iné' didza', rnna': Buli'bí'i queëtu' ca rúnlentu' libí'ili'. Guli'güí' ladxi' netu'.

*Nácaru' ca tu yudo' ga yu'ë Dios ban*

<sup>14</sup> Biti' gácali' tuz len bönachi biti' ta'yéajlë'.

¿Nacxi gácatsö ilaca tuz le naca tsahui', en le cabí naca tsahui'?

¿Nacxi gácatsö ilaca tuz le naca chul-la, en le naca bení'?

<sup>15</sup> ¿Nacxi gácatsö ilácagaquië' tuz Cristo, en Satanás, tu' xihui'?

¿Nacxi gácatsö ilácagaquië' tuz tu bönni' réajlë'ë Cristo, en tu bönni' biti' réajlë'ë?

<sup>16</sup> ¿Nacxi gácatsö ilaca tuz yudo' queë' Dios, en budó' guiój budó' yaga?

Libí'i cázali' nácali' ca tu yudo' ga yu'ë Dios ban. Ca naca lë ni, Dios caz gunné':

Sóalena' légaquië', en tálена' légaquië'.

Gaca' Dios quégaquië', ate' légaquië' iláquië' bönachi quia'.

<sup>17</sup> Que lë ni na', gunné' ca' caní:

Guli'rúaj ládjagaquië', en buli'lá'alen légaquië'.

Rnnë' Xanru': "Biti' gútsa'li' le ruá' dö', ate' si' lu na'a libí'ili'.

<sup>18</sup> Neda' gaca' xuz cázali', ate' libí'ili' gácali' zxí'ina', bönni', en nigula."

Caní rnnë' Xanru', Nu napa caz idútë yöl-la' huáca.

## 7

<sup>1</sup> Böchi' luzá'ado', néquiguequi queéru' yugu' lë ni guzxí' lu në'ë Dios. Que lë ni na' ral-la' un cuinru' dxi'a, en ubéajru' yúgu'të le rucá'ana cá'asö idútë le naca cázaru', en bö' naca cázaru'. Lu yöl-la' radxi queéru' Dios ral-la' guéquiru' quez queë' Lë'.

### *Ca bulu'bí'i ládxi'gaca nupa ta'yéajlë' Cristo*

<sup>2</sup> Guli'sí' lu ná'ali' netu'.

Cuntu nu biá'atu' dö' que, nu dzaga libí'ili'.

Cuntu nu bentu' ga ichixi inigui.

Cuntu nu guzxí' yé'etu'.

<sup>3</sup> Ruá'a caní didza', caléga para usubága'a libí'ili' xíguia', pero naca ca na' chigunnía' zí'alö, rnnía': Zoa' sina' ibánlena' libí'ili' o gátilena' libí'ili' tu' ruí'i ládxa'a libí'ili'.

<sup>4</sup> Ruzxónida' ládxa'a libí'ili', en rúnda'a libí'ili' zxön. Sal-la' zián le rigu'i rizáca'tu', nadípada' ládxa'a, en rudzéjade'e ládxa'a.

<sup>5</sup> Cate' bidxitu' luyú Macedonia, ga ridxitu' na'a dza, biti' rata' queétu' lataj uzí' ládxi'tu', pero zián le taca queétu'. Ta'díl-lalen bönachi netu', ate' lu icja ládxi'do'otu' yú'ugaca le tun ga rádxitu'. <sup>6</sup> Ni'irö Dios, Nu rutipa ladxi' nu chizóa gaca chopla ladxi', butipé' ládxi'tu' cate' budxinbi' bi'i Tito ga guzóatu'. <sup>7</sup> Biti' gúcasö tu' budxinbi' queétu', pero tu' gudíxjöi'ibí' ca' netu' ca na' libí'ili' butípali' ládxi'ibí'. Gudíxjöi'ibí' netu' ca na' ré'ënide'eli' ulé'eli' neda', en ca na' ruhu'i'ini' ni'a que lë na' guca ni', enca' ca ruí'i ládxi'li' neda'. Yúgu'të lë ni ben ga rudzeja ládxa'a.

<sup>8</sup> Sal-la' le buzúaja' queéli' lu guichi zí'alö ben ga buí'ini'li', biti' ruhu'i'inda' na'a. Zí'alö buí'indida' cate' gúquibe'eda' ben ga buí'ini'li' libí'ili' tu chí'ido', <sup>9</sup> pero na'a rudzéjada', caléga tu' buí'ini'li', pero tu' ben yöl-la' ruhu'i'ini queéli' na' ga bubí'i ládxi'li'. Dios bugunë' dxin yöl-la' ruhu'i'ini queéli', para cabí ichixi iníguli' ni'a que le bentu' netu'. <sup>10</sup> Yöl-la' ruhu'i'ini na' rugunë' dxin Dios run ga nu ubí'i ladxi' para ulá nu na', ate' que lë ni na' biti' ral-la' huí'iniru' que. Yöl-la' ruhu'i'ini le naca que yödzölió ni run ga ilátigaca bönachi. <sup>11</sup> Buli'yútsöca' ca bugunë' Dios dxin yöl-la' ruhu'i'ini queéli' na'.

Ben ga ruí'i ládxi'li'-në' Dios.

Ben ga gú'unili' urúajli' dxi'a.

Ben ga guléli' nu na' ben dul-la'.

Ben ga rádxili'-në' Dios.

Ben ga bë' ládxi'li' gunli' ca rnna xtídzë'ë Dios.

Ben ga nadxi'ili'-në' Dios idú ládxi'li'.

Ben ga gú'unili' gunli' xíguia' nu na' ben dul-la'.

Benli' le naca bë' biti' bi dul-la' nabága'li' ni'a que lë na' guca.

<sup>12</sup> Que lë ni na', sal-la' buzúaja' caní lu guichi na', biti' guca ni'a que nu na' ben dul-la', en caléga ni'a que nu na' gudí'i guzxaca', pero para gaca bë' lahuë' Dios le nácatë

ruí'i ládxi'li' netu'. <sup>13</sup> ¡Lë ni butipa ládxi'tu'! Calégasö bidipa ládxi'tu', pero rudzéjade'e ládxi'tu' tu' rudzéjabi' bi'i Tito ni'a que le benli' libi'ili', tu' butípali' ládxi'bi'.

<sup>14</sup> Bena' libi'ili' zxön lobi' Tito, ate' biti' benli' ga utu'ida'. Bé'lentica'stu' libi'ili' didza' idútë li, ate' lësca' caní naca idútë li didza' bë'lentu'-bi' Tito cate' bentu' libi'ili' bal. <sup>15</sup> Zeaj rácarö idú ca nadx'ibi' bi'i Tito libi'ili' cate' röjnebi' ca na' benli' ca rnna xtídz'a'tu', en ca na' benli'-bi' bal lu yöl-la' radxi Dios queéli' en lu yöl-la' nöoxaj ladxi' queéli'. <sup>16</sup> Rudzéjade'eda' tu' gaca uzxöni ládxa'a libi'ili' idú ládxa'a.

## 8

*Ca ral-la' unödzaj nu réajlé' Cristo le dë que*

<sup>1</sup> Na'a, böchi' luzá'ado', ré'ënitu' quíxjöi'itu' libi'ili' ca naca le buzá' ládxé'ë Dios quégaca yugu' cö' bönachi queéi' Cristo luyú Macedonia. <sup>2</sup> Sal-la' yenni' gula'gu'i gula'záquië' lu yugu' le guzxi' bë' légaquië', bulu'dzéjade'enë', en idú ládxi'gaquië' bulu'nöödzjadé'ë sal-la' nácagaquië' bönachi yechi'. <sup>3</sup> Neda' runa' ba nalí quégaquië', idú ládxi'gaquië' bulu'nöödzjadé'ë tsca gula'zéqui'në', en bulu'nöödzjaré' tsca gula'zéqui'në'. <sup>4</sup> Gula'nábide'enë' netu', en guláta'yudé'ë lotu' gü'itu' légaquië' lataj tsözxón len netu' ilácalenë' böchi'ru' ta'yéajlé'ë Cristo. <sup>5</sup> Gulunré' ca guqui ícjatu' iluné'. Bulu'dödi cuíngäquië' zí'alö lu në'ë Xanru', enca' lu na'tu' netu', le naca le raza ládxé'ë Dios. <sup>6</sup> Que lë ni na' gunábitu'-bi' bi'i Tito údxi gunbi' xichinbi' ga ni' zóali', en utúbibi' dumí runöödzjali' lu yöl-la' dxi'i ladxi' queéli', ca na' gusí lobi' benbi' zí'alö. <sup>7</sup> Nácali' lo ca naca yúgu'të le runli',

ca réajlé'ëli' Cristo,  
en ca réajni'ili',  
en ca ruzéajni'ili' bönachi,  
en ca ru'i ládxi'li' luzá'ali',  
enca' ca nadx'ili' netu'.

Lësca' caní ral-la' gácali' lo ca gácalenli' luzá'ali', lu yöl-la' dxi'i ladxi' queéli' bi unöödzjali' quégaquië'.

<sup>8</sup> Biti' rinná bë'eda' libi'ili' gunli' caní. Ruá'a didza' ca tun ia'zíca'rö bönachi, tu'nöödzaj idú ládxi'gaca, para guna' ga gunli' le gaca bë' naca idú ca nadx'ili' luzá'ali'. <sup>9</sup> Nöz quézili' le buzá' ládxé'ë Xanru' Jesucristo queéru'.

Bilé'enë' yöl-la' tsahui'  
pero para gácalenë' libi'ili'  
böáquië' yechi'  
para gata' queéli' yöl-la' tsahui',  
tu' gúquië' Lë' yechi'.

<sup>10</sup> Caní runi neda': Dxi'arö gaca queéli' údxi gunli' lë na' gusí loli' runli' chiguca tu iz. Gúcali' lo, calégasö ca bunöödzjali', pero lësca' ca gú'unili' unöödzjali'. <sup>11</sup> Na'a, idú ládxi'li' buli'siyudxi gunli' lë na' gusí loli' runli', idú ládxi'li' bunöödzjali'. Buli'nöödzaj na'a tsca séqui'li'. <sup>12</sup> Channö ré'ënili' bi unöödzjali', Dios runë' bal le runöödzjali' tsca naca le dësö queéli'. Biti' rinabë' unöödzjaröli' tsca le dësö queéli'.

<sup>13</sup> Biti' ré'ënda' guna' ga unöödzjali' le gácalen ia'zíca'rö bönachi ga idxintë yadzaj queéli'. <sup>14</sup> Ré'ënda' gaca tuz ca dë queéli', en quégaquië'. Na'a dëda' queéli' le gaca unöödzjali' para bi gata' quégaca nupa ni' riyadzaj quéguequi. Ní'irö cate' bi yadzaj queéli', légaquië' huáca bi ulu'nöödzjë' queéli' para caní gaca tuz ca dë queéli', en quégaquië' yúgu'tëli'. <sup>15</sup> Lësca' caní nazúaj lu guichi lá'ayi le rnna: "Nu na' butúbida', biti' bugá'ana que, ate' nu na' butubi láti'do'os, biti' biyadzaj que."

*Ca runbi' bi'i Tito, enca' nupa dzágagaca lëbi'*

<sup>16</sup> ¡Xclené' Dios, tu' bené' Lë' ga ruí'i ládxi'bí' bi'i Tito libí'ili', ca na' ruí'i ládxa'a neda' libí'ili'! <sup>17</sup> Calégasö runbi' ca rnna xtídza'a bi rinábida'-bi', pero tu' ruí'i ladxi' cázabi' libí'ili', rácasö queébi' gú'unibi' tsöyubi' libí'ili'.

<sup>18</sup> Risól-la'tu'-në' tsözxón len läbi' bóchi'ru' na' tun lë' bal yúgu'té cö' bönachi queé' Cristo, tu' runé' dxi'a dxin que didza' dxi'a. <sup>19</sup> Ia'stú, gula'bó yugu' cö' bönachi queé' Cristo bönni' ni, para tséajlené' tsözxón netu' guá'atu' lë na' runödzjali', para gaca yöl-la' ba queé' Xanru', en gaca bë' ca' ruí'i ládxi'ru' luzá'aru' ta'yéajlë'ë Cristo. <sup>20</sup> Caní gaca, guné' netu' tsözxón para cuntu nu bi gaca inné queétu', ca rúnlenlu' dumí na' runödzjada'ali', le gácalen bönachi yechi'. <sup>21</sup> Ruí'i ládxi'tu' guntu' le naca dxi'a, calégasö lahuë' Xanru', pero lësca' lögaca bönachi.

<sup>22</sup> Risól-la'tu'-në' ca' ia'túe' bóchi'ru' tsözxón len légaquië', ate' zián luzuí guzxi' bë'ëtu' lë', ate' naca bë' ré'ené' gácalené' rë'u idú ládxë'ë. Ia'stú, tu' ruzxöni ládxë'ë libí'ili', ré'enitéröné' ca' gácalené' rë'u lu dxin ni. <sup>23</sup> Channö nu bi inaba ca nácabi' bi'i Tito, nácabi' luzá'a, rúnlenbi' neda' tsözxón dxin para gácalentu' libí'ili'. Channö nu bi inaba ca nácagaquië' ia'zíca'rë' bóchi'ru' na', nasól-la'gaca yugu' cö' bönachi queé' Cristo légaquië', ate' tuné' ga gaca yöl-la' ba queé' Cristo. <sup>24</sup> Guli'gún ga gaca bë' nadxi'ili' légaquië' para iléquibe'e yugu' cö' bönachi queé' Cristo runli' caní, en ila'nözi naca idútë li didza' dxi'a ruí'itu' ca naca queéli'.

## 9

*Ca naca dumí rutúbiru' le gácalen yugu' bóchi'ru'*

<sup>1</sup> Ca naca le runödzjali' quégaquië' bóchi'ru' ta'yéajlë'ë Cristo, biti' run bayudxi uzúaja' queéli' lu guichi ni. <sup>2</sup> Chinözda' ca ré'enili' gunli' lë ni, ate' ruá'a didza' lögaca bönachi ta'yéajlë'ë Cristo luyú Macedonia ni ca naca le dxi'a runli'. Riguíxjö'i ida' légaquië' ca naca queéli', zóali' luyú Acaya, chiguca tu iz chizóa gunli' lë ni, ate' tu' ruí'i ládxi'li' gunli' lë ni, bidipa ládxi'gaca lá'tu'biqui' yúgu'té bönachi ni ta'yéajlë'ë Cristo. <sup>3</sup> Na'a, risól-la'a yugu' bóchi'ru' ni queéli' para gaca bë' naca idútë li didza' ruí'itu' ca naca queéli', ate' naca ca na' chigunnía' queéli', chizúa gunli' lë na' gácalen yugu' luzá'aru'. <sup>4</sup> Channö ila'zá'alen bal-la bönachi Macedonia ta'yéajlë'ë Cristo neda' tsözxón, ate' gaca bë' biti' zuní gunli' lë na', ní'irö utu'itu' tu' buzxöni ládxi'tu' libí'ili', ate' libí'ili' cázali' ca' ral-la' utu'ili'. <sup>5</sup> Que lë ni na' gúquida' ral-la' isól-la'a yugu' bóchi'ru' ni para ila'dxiné' ga zóali' zí'alö ca neda', ate' ilácalené' libí'ili' para udxi utúbili' lë na' guzxi' lu ná'ali' unödzjali'. Caní gaca, údxi utúbili' dumí na' zí'alö ca idxina', ate' gaca bë' runödzjali' tu' ré'eni cázali', en caléga tu' rinná bë'etu' libí'ili' bi unödzjali'.

<sup>6</sup> Guli'tsöjnë lë na' rnna:

Nu raza ruzúa láti'do'os, láti'do'os ca' uzí'.  
Nu raza ruzúa sizzöni, sizzöni ca' uzí'.

<sup>7</sup> Tu tuli' ral-la' unödzjali' tsca na' chinuzóali' icja ládxi'do'oli', en caléga lu yöl-la' ruhu'ini queéli' o tu' run bayudxi, tu' nadxi'iné' Dios nu runödzaj idú ladxi'. <sup>8</sup> Dios gaca gúnnadé'ë queéli' ca riquínili' para gata' queéli' yúgu'té lë na' riquínili', ate' ugá'ana queéli' para gaca gácalenli' nu bi riyadzaj que. <sup>9</sup> Lësca' caní nazúaj lu guichi lá'ayi le rnna: Idú ládxë'ë bunödzjje' quégaca bönachi yechi'.

Naca bë'tica'sö yöl-la' dxi'i ladxi' queé'.

<sup>10</sup> Dios, Nu runna queéru' bi gaz uzóaru', enca' bi guí'aj gáguru', gunné' ca' queéli' bi unödzjali', le naca ca lë na' nu raza ruzúa, en guné' ca' ga ila'yán le ilápali' le nácagaca yugu' le dxi'a runli'. <sup>11</sup> Dios guné' ga gáta'da' queéli' yöl-la' tsahui' para gaca unödzjada'ali'. Caní gaca, yugu' le unödzjali', lë na' quísitu' uláz queéli', gun ga ila'nná

bönachi zián: "Xclenë' Dios." <sup>12</sup> Lë na' runödzjali' le gácalen yugu' bôchi'ru', calégasö gü'i quég aquië' le ta'yádzjanë', pero gun ga ila'nné': "Xclenë' Dios." <sup>13</sup> Cate' gunli' caní, ila'gu'ë Dios yöl-la' ba tu' gaca bë' runli' ca rnna didza' dxi'a queë' Cristo ca na' rninali' runli'. Ila'gu'ë Lë' yöl-la' ba ca', tu' nácali' dxi'i ladxi', runödzjali' quég aquië', enca' quégaca ia'zica'rö böñachi. <sup>14</sup> Ulu'lidzë' Dios, en ila'nábinë' Lë' gácalenë' lib'ili' tu' nadxi'iguequinë' lib'ili' ni'a que le buzá' ládxidë' Dios queëli'. <sup>15</sup> ¡Xclenë' Dios, bennë' tu le nácada' lesaca' queëli'!

## 10

### *Yöl-la' unná bë' dë lu né'ë Pablo*

<sup>1</sup> Ta'nná böñachi naca' nöxaj ladxi' cate' zóalena' lib'ili', pero cate' zoa' zi'tu' ga zóali' naca' rugu ladxi' ca ruzúaja' lu guichi. Tu' náquië' nöxaj ladxi', en dxi'i ladxi' Cristo, neda', Pablo, ráta'yua' loli' <sup>2</sup> cabí gunli' ga gun bayudxi gaca' rugu ladxi' len lib'ili' cate' idxina' ga zóali'. Chizóa gaca' rugu ladxi' len nupa ni' ta'nná runtu' dxin ni lu yöl-la' böñachisö queëtu'. <sup>3</sup> Le nácate' nácatu' böñachi, pero caléga rácasö queëtu' runtu' xichinë' Dios. <sup>4</sup> Yugu' le rudí'initu' lu gudil-la, biti' nácagaca ca le tu'dí'ini böñachi yödzölio ni lu gudil-la, pero yugu' le rudí'initu' lu gudil-la nápagaca yöl-la' huáca queë' Dios, le ruguntu' dxin para usunítitu' le nál-lagaca que tu' xihui'.

<sup>5</sup> Rusunititu' yugu' didza' biti' nácate' le tu'zxöni ládxigaca böñachi, en yúgu'të le tun ga tun ba zxöñ cuínguequi, en le tun ga cabí ilunbë' Dios. Runtu' ga gaca ila'nná bë'enë' yúgu'të le ta'zá' ládxigacië', lë na' tun ga ta'dá'baguë'ë Dios, ate' runtu' ca' ga tunë' ca rnne' Cristo. <sup>6</sup> Tödi gunli' le gaca bë' naca idú ca runli' ca rnna xtídzë'ë Cristo, sóatu' sina' guntu' xíguia' yúgu'të nupa ni' ta'dá'baga' xtídzë'ë.

<sup>7</sup> Ruyuli' le nalá' láhuisö. Channö réquinë' nu bönni' dzáguië' lib'ili' néquinë' queë' Cristo, ral-la' guéquibe'enë' ca' lë ni: Ca na' lë' néquinë' queë' Cristo, lësca' caní netu' néquitu' queë' Cristo. <sup>8</sup> Biti' ca' rutu'ida' sal-la' gudödi bë' ben ba zxöñ cuina' ca naca yöl-la' unná bë' budödë' Xanru' lu na'tu'. Lë na' dë lu na'tu' naca para guntu' ga gácarö idú ca réajle'ëli' Cristo, en caléga para usunítitu' lib'ili'. <sup>9</sup> Biti' ré'ënda' guéquili' ré'ënda' gun gáxdixa' lib'ili' ni'a que le ruzúaja' queëli' lu guichi ni. <sup>10</sup> Nacuá' ni' nupa ila'nná: "Yugu' le ruzúajë' Pablo queëru' lu guichi, rulidza zi'ë ré'u, en ralë' didza', pero cate' zóalenë' ré'u runë' nöxaj ladxi', en didza' gúlado' ru'ë." <sup>11</sup> Nu na' ruí'i caní didza' ral-la' guéquibe'e lë ni: Ca na' nácatu' cate' bi ruzúajtu' queëli' lu guichi tsanni ni zóatu' zi'tu' ga zóali', gácatu' ca' lu le guntu' cate' ni' sóalentu' lib'ili'.

<sup>12</sup> Le nácate' biti' nácatu' rugu ladxi' para innatü' nácatu' lëbi ca nácagaca nupa ni' tun ba zxöñ cuínguequi. Nácagaca nupa ni' yugu' bönni' biti' bi nözguequinë'. Lu le ta'za'sö ládxigacië' tu'zóe' ca ral-la' ilaca böñachi, en tu'chi'a tu'söröe' la' légacasë' tsca naca lë na' ta'za'sö ládxigacië'. <sup>13</sup> Netu' biti' gunrö ba zxöñ cuintu' ca ral-la' guntu', pero ca nácate' dxin budödë' Dios lu na'tu', ate' lu dxin ni, ral-la' guntu' le ga ni' zóali' lib'ili'.

<sup>14</sup> Channö budödë' Dios lu na'tu' dxin guntu' ga zóali', biti' ca' gudödi bë'ëtu' ca bentu' cate' bidxitu' ga zóali', en bentu' libán que didza' dxi'a ga na' zóali'. <sup>15</sup> Biti' run ba zxöñ cuintu' ca naca dxin núngaca ia'zica'rö böñachi, pero ca nácasö dxin na' budödë' Dios lu na'tu'. Runtu' löza gácarö idú ca réajle'ëli' Cristo para gaca guntu' dxin ga zóali' le nácarö lesaca', tsca naca le budödë' Dios lu na'tu' guntu'. <sup>16</sup> Ni'irö gaca guntu' libán que didza' dxi'a ga nacuá' yödzö dzö'ö zí'tu'rö ga zóali'. Caní gaca, biti' gun bayudxi gun ba zxöñ cuintu' ni'a que dxin núngaca ia'zica'rö böñachi, lë na' budödë' Dios lu né'eguequi.

<sup>17</sup> Nazúaj lu guichi lá'ayi le rnna:

Nu ré'ëni bi gun zxöñ,  
le ben cazë' Xanru' ral-la' gun zxöñ.

<sup>18</sup> Nurúajë' dxi'a tu bönni' cate' rnne' Xanru' nurúajë' dxi'a, en caléga cate' ru'ë caní didza' bönni' na' que la' cuinsë'.

## 11

*Ca nácagaquië' Pablo, en bönni' tun cuíngaquië' gubáz queë' Cristo*

<sup>1</sup> Ré'ënda' guá' ilenli' neda' tsanni ni gu'a didza' lu yöl-la' biti' bi nözi quia'. Buli'sá' ládxí'li' quia'. <sup>2</sup> Ru'i ládx'a'a libí'ili' ca na' Dios caz rui'i ládxé'ë libí'ili', tu' nácali' ca nácabi' tubi' bi'i nigula ra'bando', naca idú ládxí'bi', rusudxina'-bi' lahuë' Cristo para utsaga ná'aleni' Lë cazé'. <sup>3</sup> Rádxida' idxín queëli' nu si' ye'e libí'ili', en gun ga usanli' ca nadxi'ili'-në' Cristo idú ládxí'li', ca na' guca queënu Eva, nigula queë' Adán, cate' guzxí' ye'e Satanás tu' xihui' lénlu lu yöl-la' sina' que. <sup>4</sup> Caní rnnía' tu' idú ládxí'li' rui'i'li' nu za' queëli' lataj, en run libán que xibá queë' Jesús, le nadzá' ca naca xibá na' bentu' netu' libán que, ate' rizi' lu ná'ali' tu bö', en tu didza' dxi'a le nadzá'gaca ca nácagaca Bö' Lá'ayi na', en didza' dxi'a na' guzxí' lu ná'ali' lu na'tu' netu'. <sup>5</sup> Réquida' biti' nácará' cuídi'sö ca nácagaquië' bönni' ni' nácatérögaquië' lo, ate' réquili' nácagaquië' gubáz queë' Cristo. <sup>6</sup> Nadxi ca' naca' cuídi'sö ca ruá'a didza', pero biti' naca' cuídi'sö ca naca yöl-la' réajni'i napa'. Zián luzuí, en zián ca bulu'itu' libí'ili' ca naca yöl-la' réajni'i nápatu'.

<sup>7</sup> Nadxi ca' biti' naca dxi'a tu le bena', biti' bi buquizzja' libí'ili' cate' bena' libán ga zóali' que didza' dxi'a. Ben cuina' cá'asö, ate' bena' ga gúcali' libí'ili' zxön. <sup>8</sup> Buguna' dxin le nequi quéguequi ia'zica'rö cö' bönachi queë' Cristo, tu' guzxí'a dumí bulu'nödzjë' légaquië' quia' para guca bena' dxin ga zóali' libí'ili'. <sup>9</sup> Cate' guzóalena' libí'ili', en biyadzaj quia', biti' busaca' zi'a nituli' libí'ili', pero lë na' biyadzaj quia', gulunnë' quia' bóchi'ru' bila'rúajë' luyú Macedonia, en bila'dxiné' ga zoa'. Catu caz busaca' zi'a libí'ili', ate' la' lóbisö ca guna'. <sup>10</sup> Ni'a que le naca idútë li queë' Cristo le zóalen neda', biti' soa' dxissö, gun ba zxön cuina' ca naca lë ni idú luyú Acaya. <sup>11</sup> ¿Naru' réquitseli' rnnía' caní tu' cabí nadxi'ida' libí'ili'? Nözinë' Dios nadxi'ida' libí'ili'.

<sup>12</sup> Gúntica'sa' ca runa' na'a, para cabí gata' quégaquië' lataj ilún ba zxön cuíngaquië' bönni' ni' ta'nnasë' nácagaquië' gubáz queë' Cristo, en ta'nné' tuné' xichinë' Lë' ca runtu' netu'. <sup>13</sup> Biti' ca' nácagaquië' gubáz nasö'l-lë'ë Cristo. Ta'zí' ye'e ca naca dxin tuné', en tun cuíngacasë' gubáz queë' Cristo. <sup>14</sup> Biti' ral-la' ubániru' ca tuné' bönni' na'. Lësca' Satanás caz, tu' xihui', rulu'i cuini ca tu gubáz lá'ayi queë' Dios, ridé' lu beni'. <sup>15</sup> Que lë ni na' biti' ral-la' ubániru' channö yugu' huen dxin que tu' xihui' na' tu'lui'i cuíngaquië' ca nupa tun xichini Nu na' naca tsahui'. Udexi quégaquië' ca sa'yéaj le tuné'.

*Yugu' le gudí'i guzxáquë'ë Pablo*

<sup>16</sup> Leyübölö rea' libí'ili': Cuntu nu ral-la' guequi nachixi icja'. Channö réquili' nachixi icja', guli'güi' neda' lataj gu'a didza' ca tu bönni' nachixi icjë', para gun ba zxön cuina' tu chí'ido'. <sup>17</sup> Didza' ni ruá'a biti' naca le rinná bë'ë Xanru', pero ruá'a didza' ca tu bönni' nachixi icjë', run ba zxön cuina'. <sup>18</sup> Nacu'ë zián bönni' tun ba zxön cuíngaquië' ca nácagaca le tuné' lu yöl-la' bönachisö quégaquië'. Que lë ni na', neda' ca' gun ba zxön cuina'. <sup>19</sup> Tu' réquili' rácada'ali', idú ládxí'li' rui'i'li' lataj ilu'ë didza' yugu' bönni' nachixi icjagaquië'. <sup>20</sup> Ru'i'li' ca' lataj nu gun libí'ili' bönni' nadó'ogaca, o nu cúa le dë queëli', o nu inná be'e libí'ili', o nu ucá'ana libí'ili' cá'asö, o nu capa' rú'ali'. <sup>21</sup> Rutui'ida' rnnía' lë ni: Biti' bentu' caní queëli' tu' gudödi bë' gúcatu' nöxañ ladxi'.

Channö zoa nu naca rugu ladxi' para gun ba zxön cuini, neda' ca' gaca' rugu ladxi', en gu'a didza' ca tu bönni' nachixi icjë'.

<sup>22</sup> ¿Naru' nácagaquië' bönni' hebreo?

Lësca' naca' neda'.

¿Naru' nácagaquië' bönni' Israel?

Lësca' naca' neda'.

¿Naru' nácagaquië' zxí'ini xi'sóë' Abraham?

Lësca' naca' neda'.

<sup>23</sup> ¿Naru' nácagaquië' huen dxin queë' Cristo?

Lësca' nácatéra' neda'.

(Na'a ruá'a didza' ca tu bönni' nachixi icjé' cate' rnnía' caní.)  
Béntéra' dxin ca guluné' légaquië'.

Guyu'a lidxi guíe' ziánrö luzuí ca gula'yu'ë légaquië'.  
Gula'zé'eda' neda' yu bönachi ziánrö luzuí ca guca quégaquië'.

Guzóa bönadxi gátia' ziánrö luzuí ca guzúa quégaquië'.

<sup>24</sup> Gayu' luzuí yugu' bönni' judío gula'guínë' neda' guídi.

Tu tu luzuí na' gula'guínë' neda' chënnna uruá' luzuí.

<sup>25</sup> Tsonna luzuí gula'guínë' neda' gubá'ayi.

Tu luzuí bulu'ladxé' neda' guiój.

Tsonna luzuí guzóa' tu lé'e barco le guca ditaj, en bötaj lu nísado'.

Tu luzuí guzóa' idú tu yëla, en tu dza lu nisa que nísado'.

<sup>26</sup> Zián luzuí cate' ni' yu'a nöza,

gudöda' gapa guzóa bönadxi quia' yugu' lu yegu,

en gapa guzóa bönadxi quia' lu ná'agaquië' gubán,

en gapa guzóa bönadxi quia' lu ná'agaquië' bönni' uládz quia',

en gapa guzóa bönadxi quia' lu ná'agaquië' bönni' zi'tu',

en gapa guzóa bönadxi quia' lu yödzö,

en gapa guzóa bönadxi quia' lu lataj cá'asö,

en gapa guzóa bönadxi quia' lu nísado',

en gapa guzóa bönadxi quia' lu ná'agaquië' bönni' ta'zí' yë'ë, ta'nné' nácagaquië'  
böchi'ru' ta'yéajlé'ë Cristo.

<sup>27</sup> Bena' dxin zi'i, en gudú ládxa'a.

Zián luzuí biti' guta' quia' lataj gásia'.

Guduna', en gubidxa' nisa.

Zián luzuí biti' guta' quia' bi gahua', o ga utsë'e cuina', o lari' gácuá'.

<sup>28</sup> Ia'stú, yúgu'té dza ruúbi ruguí'ida' tu' ruí'ida' ládxa'a yúgu'té cö' bönachi queë' Cristo. <sup>29</sup> Cate' nu ricuidi', neda' ca' ricuídida'. Cate' nu run ga ichixi iníguinë' tu

böchi'ru', rileda' nu run caní. <sup>30</sup> Channö run bayudxi gun ba zxön cuina', gun ba zxön

cuina' ca naca le nácagaca bë' ricuídida'. <sup>31</sup> ¡Dios, Xuzé' Xanru' Jesucristo, gácatica'sö

queë' yöl-la' ba! ¡Lé' nózinë' ruá'a didza' idútë li! <sup>32</sup> Cate' ni' guzóa' lu yödzö Damasco,

bönni' ni' guta' lu në'ë uláz queë' bönni' rinná bë'ë, lé' Aretas, bucu'ë yugu' bönni'

gula'bö' nísië' para ila'zönë' neda', <sup>33</sup> pero yugu' böchi'ru' ni' bulu'dödë' neda' tu ga ra'a

beni' que yu'u, yu'a tu ga'böra zxön, en bulu'zötje' neda' n'ilö lu zö'ö run chi'i yödzö na'.

Caní guca, bulá' lu ná'agaquië' bönni' ni' gula'bö' nísië' neda'.

## 12

### *Yugu' le bulu'inë' Dios Pablo*

<sup>1</sup> Le nácaté biti' ral-la' gun ba zxön cuina'. Sal-la' caní naca, na'a gu'a didza' ca nácagaca le bulu'inë' Xanru' neda', en le buzáejni'inë' neda'. <sup>2</sup> Núnbë'a-në' tu bönni' réajlé'ë Cristo, chiguca chidá' iz zoa nu guché' lé' yehua' yubá. Biti' nözda' channö guyijé' ni' lu idútë le naca cazé', o lu bö' naca cazé'. Tuzé' Dios nózinë'. <sup>3</sup> Nözda' guyázië' lataj lachi queë' Dios, nazí'i le paraíso. Biti' nözda' channö guyijé' ni' lu idútë le naca cazé', o cabí. Tuzé' Dios nózinë'. <sup>4</sup> Tsanni ni' zoë' ga na', biyönnë' le tun ga nu rubani, yugu' le biti' dë lataj nu gü'i didza' que. <sup>5</sup> Bönni' ni huáca guna' lé' zxön, pero biti' gun ba zxön cuina'. Tuz gun ba zxön cuina' tu' ricuídida'. <sup>6</sup> La'tu' gué'énida' gun ba zxön cuina', biti' gaca' bönni' biti' bi nózinë', channö innía' le naca idútë li. Na'a, biti' gun ba zxön cuina' tu' cabí ré'ënda' nu gunrö neda' bal tsca le bilé'e bena' neda', o tsca naca didza' biyóni bë'a neda'.

<sup>7</sup> Ní'irö, para cabí tödi bë' gun ba zxön cuina' tu' bilé'eda' lé' na' tun ga nu rubani, Dios buzóë' tu huë' lu xipéla'a le riláda' ca rilá ga riné' tu yötsi'. Huë' na' guca ca tu le

bugún dxin tu' xihui', para busaca' zi' neda'. Caní guca quia' para cabí tödi bë' gun ba zxön cuina'. <sup>8</sup> Tsonna luzuí gúta'yua' lahuë' Xanru', en gunábida' Lë' ugúë' xihuë'a na'. <sup>9</sup> Xanru' gudxe' neda': "Nácatë quiu' le ruzá' ládxa'a quiu'. Uzi'teru' xibé le ruzá' ládxa'a quiu' cate' ricuídi'nu'.". Que lë ni na', rudzéjade'eda' tu' ricuídi'da'. Tu' raca caní quia', rácalentérö yöl-la' huáca queë' Cristo neda'. <sup>10</sup> Que lë ni na', tu' nadxi'ida'-në' Cristo, rudzéjada' cate' ricuídi'da', en cate' nu rulidza neda' zi', en cate' bi riyadzaj quia', en cate' nu ribía ladxi' neda', en cate' bi raca quia'. Cate' nacuídi'da', nápatérö caza' yöl-la' huáca queë' Lë'.

### *Pablo rui'i ládxé'ë böñachi queë' Cristo nacuá' Corinto*

<sup>11</sup> Naca' tu bönni' biti' bi nözinë' tu' bë' a didza' ca naca le dxi'a bena' neda'. Libi'i cázali' benli' bayudxi bena' caní. Libi'ili' ral-la' gunli' neda' bal, ate' sal-la' biti' bi naca' neda', biti' ca' nácará' cuidi' ca nácagaquië' bönni' ni' nácadagaquië' lo, ta' nnë' nácagaquië' gubáz queë' Cristo. <sup>12</sup> Yugu' le bena' lu yöl-la' riböza zxön ladxi' quia' ga ni' zóali' nácagaca bë' naca' gubáz queë' Cristo. Bilé'eli' yugu' le bena', le nácagaca bë', en le tun ga nu rubani, en yugu' yöl-la' huáca zxön que yehua' yubá. <sup>13</sup> Tuz le cabí bena' ga zóali' le bena' ga nacuá' ia' zíca'rö cö' böñachi queë' Cristo. Biti' busaca' zi'a libi'ili' bi gúnnali' le guí'aj gahua'. Buli'niti lo neda' tu' cabí bena' caní queéli'.

<sup>14</sup> Chizóa guída' ga zóali' le bunni luzuí. Biti' bi inaba' gúnnali' quia'. Ré'ënda' gunna cuin cázali' quia', en caléga bi dë queéli'. Yugu' bi'i hué'ënido', biti' run bayudxi ulu'gágubi' xuz xiná'agacabi'. Xuz xiná'agacabi' na' ral-la' ulu'gahuë' zxfinigaquië'.

<sup>15</sup> Idú ládex'a' utó'a' yúgu'té le dë quia', en udödi cuina' ni'a queéli' para gaca bi uzí'ili' xibé, sal-la' réquida' cate' nadxi'iröda' libi'ili', zeaj ruhuéchi' yöl-la' nadxi'i queéli' neda'.

<sup>16</sup> Nöz quézili' biti' busaca' zi'a libi'ili'. Na'a, bál-lali' innali' guca' sina', ate' len didza' biti' nácatë buzi'a xibali'. <sup>17</sup> ¿Naru' réquitseli' guzxfi' yé'eda' libi'ili' cate' gusól-la'a yugu' gubáz quia' ga zóali'? <sup>18</sup> Gúta'yua' lobi' bi'i Tito tséajbi' ga zóali', ate' gusól-la'a-në' böchi'ru' na' tsözxón len lëbi'. ¿Naru' réquitseli' buzi'ibi' xibali' bi'i Tito? ¿Naru' cabí bentu' la' lébisö ca runtu' bi'i Tito, en neda', enca' la' lébisö didza' bë'ëtu'?

<sup>19</sup> ¿Naru' réquitseli' rubéaj cuintu' dxi'a lolí libi'ili'? Lahuë' Dios rui'itu' didza' uláz queë' Cristo, böchi' luzá'ado', ate' yúgu'té le runtu' nácagaca para gácarö idú yöl-la' réajlë' queéli' Cristo. <sup>20</sup> Rádxida' biti' gácali' ca ré'ënda' gácali' cate' guída' ga zóali', ate' neda' biti' gaca' ca ré'ënilí libi'ili' gaca'. Rádxida' ridil-la dídzala', en ruzxé'eli' luzá'ali', en rileli' luzá'ali', en rulidza dítjali' luzá'ali', en rnnëli' que luzá'ali', en run ba zxön cuinli', en rutsátsali'. <sup>21</sup> Cate' guída' ga zóali', channö caní raca queéli', rádxida' gunë' Dios ga utu'ida' ca naca queéli', ate' gun bayudxi cödxa' ni'a quégaca zián nupa ni' gulún dul-la', en biti' bulu'bí'i ládex'i gaca ca nácagaca le cabí naca tsahui' gulúngaca, en yugu' le gula'zé ládex'i guequi le cabí naca dxi'a.

## 13

### *Pablo ruzéajni'inë' böñachi Corinto, en rugapë' Dios légaquië'*

<sup>1</sup> Le bunni luzuí ni guída' ga zóali'. Nazúaj lu guichi lá'ayi le rnna: "Run bayudxi ila'cuá' chopa tsonna nupa ilún ba nalí channö nu bi uzegui luzé'e didza'." <sup>2</sup> Chibuzéajni'ida' nupa gulún dul-la' cate' ni' guzóalena' libi'ili' le buropi luzuí, ate' na'a ruzéajni'ida' légaquië' leyúbölö, enca' yúgu'té nupa tun dul-la', sal-la' ni zoa' zi'tu', rnnña': Channö guída' ga zóali' leyúbölö biti' gaca' nönxaj ladxi' para til-la' légaquië'. <sup>3</sup> Rinábalí' tu le gaca bë' ruá'a didza' uláz queë' Cristo. Lë na' guna' gaca bë' ruá'a caní didza'. Biti' ca' ricuídi'në' Cristo cate' bi runë' queéli', pero lu yöl-la' huáca zxön queë' runë' bi runë' queéli'. <sup>4</sup> Le nácatë gudé'ë lë'e yaga cruz ca nu ricuidi', pero zoë' nabanë' tu' zóalen yöl-la' huáca queë' Dios Lë'. Netu' ca' ricuídi'tu' tsözxón len Lë', pero tu' nácatu' tuz len Lë' nabantu', ate' zóalen netu' yöl-la' huáca queë' Dios bi guntu' ga ni' zóali'.

<sup>5</sup> Buli'yú cuinli' channö réajlë'ëli' Cristo o cabí. Guli'sí' bë' la' cuínsili'. ¡Naru' cabí nòzili' zóalenë' Jesucristo libí'ili' channö le nácatë réajlë'ëli' Lë'? <sup>6</sup> Runtu' löza chinöz quézili' le nácatë netu' réajlë'ëtu' Cristo. <sup>7</sup> Rulídzatü'-në' Dios rinábitu'-në' gácalenë' libí'ili', para cabí guá'ali' dö', calëga para urúajtu' dxí'a netu', pero para gunli' libí'ili' le naca tsahui' sal-la' guéquili' richixi riníguitu' netu'. <sup>8</sup> Biti' ca' gaca tá'baga'tu' le naca idútë li, pero gácasö guntu' ca sa'yéaj le naca idútë li. <sup>9</sup> Que lë ni na' rudzéjatu' cate' ricuídi'tu', ate' libí'ili' ridipa ládxí'li'. Rulídzatica'stu'-në' Dios, rinábitu'-në' gunë' ga gaca idú ca réajlë'ëli' Cristo. <sup>10</sup> Que lë ni na' ruzúaja' queéli' lu guichi lë ni tsanni ni zoa' zi'tu' ga zóali'. Nf'irö cate' guída' ga zóali' biti' gun bayudxi usaca' zi'a libí'ili', pero uguna' dxin yöl-la' unná bë' nudödë' Xanru' lu na'a, le naca para utipa' ládxí'li', en calëga para usunitia' libí'ili'.

<sup>11</sup> Na'a, böchi' luzá'ado', dipa ládxí'li'.

Guli'gü' ládxí'li' gaca idú ca réajlë'ëli' Cristo.

Guli'gü' ládxí'li' ca' lë ni rea' libí'ili'.

Guli'gaca tuz len luzá'ali', en guli'cöza dxí'ado'.

Rinábida'-në' Dios sóalenë' libí'ili'.

Lë' nadxí'inë' rë'u, en runë' ga ribózaru' dxí'ado'.

<sup>12</sup> Guli'gapa Dios luzá'ali', tuli' ia'tuli', en unída'li' luzá'ali'. <sup>13</sup> Yúgu'të böchi' luzá'aru' ni tu'gapë' Dios libí'ili'.

<sup>14</sup> Rinábida'-në' Dios gunë' ga gata' queéli' yúgu'tëli' le ruzá' ládxë'ë Xanru' Jesucristo queéru', en idxí'inë' ca' libí'ili', en gunë' ga gácali' tuz len Dios Bö' Lá'ayi. ¡Ca' gaca!

## DIDZA' GUSÖL-LË'Ë PABLO LUYÚ GALACIA

### *Ruzúajé' Pablo quégaca bönachi luyú Galacia*

<sup>1</sup> Neda', Pablo, naca' gubáz queë' Cristo. Biti' gula'söl-la' bönachi neda'. Jesucristo caz gusól-lë'ë neda', en nunë' Xúziru' Dios tu zxön Lë'. Lë' busubanë' Jesús lu yöl-la' guti. <sup>2</sup> Ruzúaja' queëli' lu guichi ni, lib'ili', yugu' cö' bönachi tu'dubi queë' Cristo luyú Galacia. Núnquaquië' yugu' bóchi'ru' ni tu zxön neda'. <sup>3</sup> Rinábida' Xúziru' Dios, enca' Xanru' Jesucristo uzá' ládxë'ë queëli', en gunë' ga soa dxi icja ládxí'do'oli'. <sup>4</sup> Jesucristo caz budödi cuinë' lu yöl-la' guti tu' nözi dul-la' nabága'ru' para busölë' rë'u lu le naxihui' raca dza ni zóaru' na'a. Benë' caní tu' naca ca ré'ëni quézinë' Xúziru' Dios. <sup>5</sup> ¡Gácatica'sö queë' Dios yöl-la' ba! ¡Ca' caz!

### *Tuz naca le rinné dxi'a queë' Jesucristo*

<sup>6</sup> Rubánide'eda' ca runli', rucá'anatëli' Dios. Lë' bulidzë' lib'ili' para guéquili' queë' tu' nözi le ruzá' ládxë'ë Jesucristo queëru', ate' na'a ré'ënili' si' ladxi' ná'ali' tu le rinné dxi'a izá'a. <sup>7</sup> Le nácatë biti' ca' zoa ia'tú le rinné dxi'a pero ruá'a caní didza' tu' nacu'ë bönni' tu'tsé'ë lib'ili', en té'ënë' ulu'tsé'ë le rinné dxi'a queë' Cristo. <sup>8</sup> Channö zoa nu gun ba nalí que tu le rinné dxi'a le cabí naca tuz ca naca lë na' bentu' ba nalí que lolí' lib'ili', rinábida'-në' Dios udxíe' dö' nu na' run caní. Ral-la' udxíe' neda' dö' channö guna' caní, en channö gunë' caní tu gubáz queë' Dios zë'ë yehua' yubá, Dios caz udxíe' ca' lë' dö'. <sup>9</sup> Chigunná caza' caní zí'alö, ate' na'a rnnía' caní leyúbölö: Channö zoa nu gun ba nalí que tu le rinné dxi'a le cabí naca tuz ca naca lë na' chiguzxf' ladxi' ná'ali', rinábida'-në' Dios udxíe' dö' nu na'.

<sup>10</sup> ¿Réquitseli' ré'ënda' cú'uli' neda' yöl-la' zxön cate' ru'a caní didza'? ¡Biti' ca'! Ré'ënda' urúaja' tsahui' lahuë' Dios. ¿Réquili' ré'ënda' uzaca' baládxí'lengaca bönachi neda'? La'tu' ré'ënda' uzaca' baládxí'lengaca bönachi neda', biti' gaca' huen dxin queë' Cristo.

### *Naca böáquië' Pablo bönni' gubáz queë' Cristo*

<sup>11</sup> Ral-la' inózili' lë ni, böchi' zána'do'. Le rinné dxi'a na' runa' ba nalí que biti' gulén icja lo ládxí'da'ahuiguequi bönachi. <sup>12</sup> Cuntu nu bönni' budödë' lu na'a le rinné dxi'a na', en calëga nu bönni' busédinë' neda' le. Jesucristo caz buzéajni'inë' neda' ca naca le rinné dxi'a queë'. <sup>13</sup> Chibiyón quézili' ca na' ben caza' neda' zí'atëlö cate' ni' nazí' lu na'a ca tequi le bach Dios bönni' judío. Nözili' ca bena', yenni' gudxía nahua' bönachi queë' Dios ta'yija ladxi' Cristo, en gú'unda' usulu usunítia' léguequi. <sup>14</sup> Lu le tequi le bach Dios bönni' judío, guyépisëtéra' neda' ca lá'tu'biqui' yúgu'té luzá'a bönni' judío yú'ugaquië' iz ca yu'a neda', tu' guzxi'rö ladxi' na'a ca léguequi le bulu'dödë' xuz xtó'oru' loru' ca tun caze'. <sup>15</sup> Caní bena' neda', pero tu' náquië' dxi'i ladxi' Dios, gurö' cazë' neda' zí'atëlö ca gulja', ate' bulidzë' neda' para guna' xichinë'. <sup>16</sup> Ni'irö, cate' gú'uni quézinë' Dios, benë' ga núnbë'a-në' zx'finë', en gusól-lë'ë neda' tsöjena' libán que le rinné dxi'a ca naca queë' Lë' lögaca bönachi izá'a. Cate' benë' caní, biti' yödilja' nu naca bönachi nu usedi neda'. <sup>17</sup> Cabí guyija' yödzö Jerusalén para tsöyúa' nupa ni' nácagaca bönni' gubáz queë' Cristo zí'alö ca neda', pero guyija' luyú Arabia, ate' gudödi ni' böja' yödzö Damasco.

<sup>18</sup> Caní guca, chigudödi tsonna iz cate' ni' guyija' yödzö Jerusalén, yöyúa'-në' Pedro, ate' bugá'analena' lë' idú ca chidá' gubidza. <sup>19</sup> Tsanni ni' zoa' ni' biti' ca' bilé'eda' ia'turë' bönni' gubáz queë' Cristo, pero tuzé' Jacobo, bönni' bóchë'ë Xanru' bilé'eda'. <sup>20</sup> Didza' ni ruzúaja' queëli' lu guichi nácatë. Ni'a queë' Dios biti' ca' rizi' yë'a.

<sup>21</sup> Gudödi ni' guyija', gudöda' yugu' yödz luyú Siria, en luyú Cilicia. <sup>22</sup> Yugu' dza ni' biti' núnbe'gaquië' neda' böchi'ru' tu'dubë' queë' Cristo gapa naca luyú Judea. <sup>23</sup> Gula'nózisinë' lë na' gúla'guixjö' quia' ia'zíca'rö bönachi, gula'nná: "Bönni' na' gudxía nahuë' rë'u zí'alö, runë' libán na'a que le reja ládzi'ru', lë na' gú'unë' usulu usunítië'." <sup>24</sup> Caní guca, gula'gu'ë yöl-la' ba Dios tu' nözda' neda'.

## 2

*Bönni' gubáz queë' Cristo guzxí' lu ná'agaquië' Pablo*

<sup>1</sup> Cate' chigudödi chidá' iz, guyéajlena' Bernabé, en budxina' yödzö Jerusalén. Guchë'a-bi' Tito, dzágabi' neda'. <sup>2</sup> Guyija' ni', en bë'lena' didza' tsölá'alö bönni' ni' yu'u lu ná'agaquië' dxin queë' Cristo, ate' gudíxjö'i'ida' légaquië' ca naca libán runa' que le rinné dxí'a lógaca bönachi izá'a. Caní bena' tu' gú'unda' cabí ugá'ana nítisö dxin na' chibena', enca' dxin ni runa' na'a. <sup>3</sup> Sal-la' nácabi' Tito, bi'i luzá'a, bi'i griego, biti' gulunë' bönni' ni ga irugu lu xpéla'bi' lë na' naca bë' bönachi queë' Dios ca tun cazé' bönni' judío.

<sup>4</sup> Le nácatë gula'cuá' bal-la bönachi ni', nupa ni' ta'zí' yë', ta'ná nácagaca böchi'ru', ate' gulé'ëni ilún ga irugu lu xpéla'bi' Tito lë na' naca bë'. Yugu' bönni' ni núnagaquië' tu zxön rë'u pero tu'yusë' ca runru' para iléquibe'enë' ca nuláru' lu yöl-la' unná bë' que le rinná bë' xibá queë' Moisés tu' nácaru' tuz len Jesucristo. Gulé'ënë' ilunë' ga huöácaru' leyübölö huen dxin tsaz lu xibá na'. <sup>5</sup> Biti' ca' bë'tu' légaquië' lataj. Caní bentu' para gun chí'itu' le nácatë que le rinné dxí'a para gaca uzí'ili' xibé le rinné dxí'a na'.

<sup>6</sup> Yugu' bönni' ni' réquiru' yu'u lu ná'agaquië' dxin queë' Cristo biti' bi gula'nná be'e neda' le naca cubi, pero biti' ru'i ládx'a'ca nácagaquië'. Dios biti' ruchi'a rusöröë' rë'u ca tu'chi'a tu'sörö bönachi rë'u. <sup>7</sup> Biti' bi gula'nná be'e neda' tu' guléquibe'enë' Dios nudödë' lu na'a dxin queë', para tsöjena' libán que le rinné dxí'a lógaca bönachi izá'a, ca na' nudödë' lu né'ë Pedro dxin queë', para gunë' libán que le rinné dxí'a lógaca bönachi judío. <sup>8</sup> Len yöl-la' huáca queë', Dios benë' neda' bönni' gubáz queë' para usédida' bönachi izá'a, ca na' benë' Pedro bönni' gubáz queë' para usédinë' bönachi judío.

<sup>9</sup> Jacobo, en Pedro, en Juan, bönni' ni' réquiru' yu'u lu ná'agaquië' dxin queë' Cristo, guléquibe'enë' Dios nudödë' lu na'a dxin ni. Que lë ni na' guzxí' ladxi' ná'agaquië' neda', enca' Bernabé, ate' bentu' tuz didza' tsöjentu' xichinë' Dios lógaca bönachi izá'a neda', en Bernabé, ate' légaquië' ilunë' xichinë' Dios lógaca bönachi judío. <sup>10</sup> Gulá'ta'yusë' lotu' tsönetu' gácalentu' bönachi yechi', ate' lë ni naca tu le ru'itica'sö ládx'a' runa'.

*Ca guca cate' Pablo gudí-lalénë' Pedro lu yödzö Antiquía*

<sup>11</sup> Cate' bidxinë' Pedro lu yödzö Antioquia, gudí-lalena' lë' didza' tu' lë cazé' guchíxinë' ca benë'. <sup>12</sup> Caní guca tu' zí'atélö gudágulenë' tsözxón yugu' bönachi izá'a ni'. Benë' caní ga bila'dxinrë' bal-la bönni' dá'gaquië' Jacobo. Ní'irö gusí lahuë' rubíguië', en bíti'rö gudágulenë' tsözxón bönachi izá'a na' tu' gúdxinë' bi ilunë' bönni' na' nazí' lu ná'agaquië' ilunë' ga irugu lu xpéla'gaca bönachi izá'a ca rinná bë' xibá queë' Moisés. <sup>13</sup> Ní'irö ia'zíca'rë' bönni' judío ni' ta'yija ládxë'ë Cristo gulunë' tu zxön Pedro ca runë' lu yöl-la' radxi queë', ate' caní guca ga bidxitë gulunë' ga gúdxinë' ca' Bernabé, ate' lë' benë' tu zxön légaquië'. <sup>14</sup> Cate' bilé'eda' biti' tunë' ca naca le nácatë le rusedi rë'u le rinné dxí'a, gudxa'-në' Pedro lógaca yúgu'të nupa ni' nudúbigaca queë' Cristo, gunnía': "Li' nacu' bönni' judío, pero runu' li' ca túngaca bönachi izá'a, en caléga ca tunë' bönni' judío. ¿Bizz queë' rë'ënu' gunu' ga ilúngaca bönachi izá'a ca tunë' bönni' judío?"

*Nulágaca bönachi judío ca na' nulágaca ca' bönachi izá'a*

<sup>15</sup> Gudxa' ca' Pedro: "Rë'u ni nácaru' bönni' judío tu' nácagaquië' xuz xiná'aru' judío, en caléga bönachi izá'a, nupa cabí núnbe'gaca Dios. <sup>16</sup> Nöz quéziru' cuntu nu huöáca tsahui' lahuë' Dios tu' run nu na' tsca rinná bë' xibá queë' Moisés, pero huöáca tsahui' tuzi nu na' reja ladxi' Jesucristo. Lës caní ca' rë'u reja ládzi'ru' Jesucristo para huöácaru'

tsahui' lahuë' Dios, en calëga tu' runru' tsca rinná bë' xibá queë' Moisés. Cuntu caz nu huöáca tsahui' lahuë' Dios tu' run tsca rinná bë' xibá queë' Moisés.

<sup>17</sup> 'Na'a, réquiru' nuhuöácaru' tsahui' tu' reja ládxí'ru' Cristo, pero channö naca bë' nácaru' bönni' dul-la' ca nácagaca bönachi izá'a, ¿innátsaru' runé' Cristo ga runru' dul-la'? ¡Biti' caz! <sup>18</sup> Channö ruí'i ládx'a' uchisa' le chibuquinja', lë ni naca bë' riguitsja' xibá le gunná bë'ë Dios. <sup>19</sup> Tu' cabí guca uzó'a' didza' xibá na' gunná bë'ë Moisés, guca quia' tsca chinátia'. Tu' caní naca, nulá' na'a lu xibá na' para soa' ibana', en guna' ca ré'ënë' Dios. <sup>20</sup> Naca quia' ca chigútilena' tsözxón Cristo lë'e yaga cruz ga na' gútië' Lë'. Que lë ni na' calëga neda' ni zoa' nabana', pero Cristo zoë' nabanë' lu icja ládxí'da'ahua'. Tsca naca zoa' nabana' na'a, naca tu' reja ládx'a' Lë' zxí'inë' Dios, Bönni' na' bidxí'inë' neda', en budödi cuinë' lu yöl-la' guti uláz quia' neda'. <sup>21</sup> Biti' ré'ënda' uzó'a' tsölá'alö le ruzá' ládxé'ë queëru' Dios. Channö huáca huöáquie' tsahui' tu bönni' lahuë' Dios tu' runé' tsca rinná bë' xibá queë' Moisés, ní'irö nítisö gútië' Cristo."

### 3

#### *Le rinná bë' xibá queë' Moisés, en le reja ládxí'ru' Cristo*

<sup>1</sup> Libí'ili', tu' canóz, libí'ili', bönni' Galacia. ¿Nuzxi gulú'utsö libí'ili' nëbi para cabirö uzóali' didza' le nácatë? Gate ga ré' bulu'itu' libí'ili' le sa'yéaj ca gútië' Jesucristo lë'e yaga cruz. <sup>2</sup> Gudíxjöi'i neda' lë ni. ¿Bidisoalenë' libí'ili' Dios Bö' lá'ayi tu' benli' ca rinná bë' xibá queë' Moisés o tu' guyija ládxí'li' le rinné dxi'a biyónili'? <sup>3</sup> ¿Nacxi guca nácali' tu' canóz caní? Gusí lolí' nácali' bönachi queë' Dios tu' zóalenë' libí'ili' Dios Bö' lá'ayi. ¿Réquitseli' huáca udxi gunli' ga guéquili' queë' Dios rácasö queëli'? <sup>4</sup> ¿Guca nítisö guca queëli' yúgu'të lë na' guzxaca' gudí'ili'? ¡Biti' ca' guca caní! <sup>5</sup> Cate' Dios risól-lë'ë queëli' Dios Bö' lá'ayi, en ru'ë libí'ili' lataj gunli' yugu' yöl-la' huáca que yehua' yubá, ¿runé' caní tu' runli' ca rinná bë' xibá queë' Moisés o tu' reja ládxí'li' le rinné dxi'a na' biyónili'?

<sup>6</sup> Lu guichi lá'ayi rnna: Abraham guyija ládxé'ë Dios, ate' Dios gunnë' náquië' bönni' tsahui' tu' guyija ládxé'ë Lë'. <sup>7</sup> Que lë ni na na' ral-la' inózili', nupa na' ta'yija ladxi' Dios nácagaca idú zxí'ini xi'sóe' Abraham. <sup>8</sup> Lu guichi lá'ayi ruí'i didza' zí'atélö ca gunë' Dios, inné' nácagaquie' tsahui' bönni' izá'a ila'yija ládxé'ë Lë'. Que lë ni na' Dios gudíxjöi'inë' Abraham zí'atélö ca naca le rinné dxi'a, gunnë': "Lu né'ë Zxí'ini xi'sú' guna' ga gaca dxi'a quégaca bönachi idutë yödzölió." <sup>9</sup> Caní naca, Abraham guyija ládxé'ë Dios, ate' Dios benë' ga guca dxi'a queë'. Lës caní ca' na'a, Dios runé' ga raca dxi'a quégaca yúgu'të nupa ta'yija ladxi' Lë'.

<sup>10</sup> Nupa na' tu'zxöni ladxi' ulu'huöáca tsahui' tu' túngaca ca rinná bë' xibá queë' Moisés, nabága'gaca xíguia'. Caní naca tu' nazúaj lu guichi lá'ayi, le rnna: "Yúgu'të nupa na' cabí túngaca idutë ca rinná bë' xibá na' nabága'gaca xíguia'." <sup>11</sup> Na'a, naca bë' cuntu nu huöáca tsahui' lahuë' Dios tu' run nu na' le rinná bë' xibá na', tu' zoa lu guichi lá'ayi le rnna: "Nu na' nuhuöáca tsahui' lahuë' Dios soa ibán tu' reja ladxi' Lë'." <sup>12</sup> Ca na' nuhuöáca tsahui' lahuë' Dios nu na' reja ladxi' Cristo nadzä' ca naca que nu na' ruzxöni ladxi' nuhuöáca tsahui' tu' run ca rinná bë' xibá queë' Moisés. Zoa lu guichi lá'ayi le rnna: "Nu na' run idutë ca rinná bë' xibá na' soa ibán tu' run caní."

<sup>13</sup> Cristo busölë' rë'u lu le richugu queëru' le rinná bë' xibá na' tu' bë'ë latja nu guchugu queë' uláz queëru'. Caní naca tu' zoa lu guichi lá'ayi le rnna: "Narugu quégaca yúgu'të nupa na' dá'gaca lë'e yaga." <sup>14</sup> Caní guca queë' Cristo para gaca gunë' Dios ca na' guzxí' lu né'ë queë' Abraham, gunë' ga gaca dxi'a quégaca bönachi izá'a lu né'ë Jesucristo, en para gaca gunë' ga idisoalenë' Dios Bö' lá'ayi rë'u channö uyija ládxí'ru' Lë', ca na' guzxí' lu né'ë Dios gunë'.

#### *Le rinná bë' xibá queë' Moisés, en le guzxí' lu né'ë Dios gunë' queëru'*

<sup>15</sup> Na'a, böchi' zána'do', uzúaja' queéli' tu le rucudzu' didza', tu le raca queéru'. Cate' chopá bönni' chigulunë' tuz xtídza'gaquië', en chigulunë' tsutsu didza' na', cuntu nu gaca utsá' didza' na', en cabí gaca nu bi udá' lë'e didza' na'. <sup>16</sup> Dios guzxi' lu në'ë bi gunë' queé' Abraham, en que zxí'ini xi'sóe'. Ga zoa lu guichi lë ni, biti' rnna: "Quégaca zxí'ini xi'sú'", le ru'i didza' que zián bönachi, pero rnna: "Que zxí'ini xi'sú'." Lë ni ru'i didza' que tuz bönni', Lë' Cristo. <sup>17</sup> Lë ni na' le ré'ënda' innia': Dios bené' tuz didza' len Abraham, en guzxi' lu në'ë gunë' ca na' gunné'. Le nazúaj lu xibá queé' Dios, le bené' Dios tapa gayuá' yu' chi-uruá' iz gudödi ni' cate' gudxé' caní Abraham, biti' gaca ugúa lë na' guzxi' lu në'ë Dios gunë', en cabí gaca usulu le. <sup>18</sup> Na'a, channö ral-la' gunru' ca rinná bë' xibá na' para sí'iru' le guzxi' lu në'ë Dios gunsé', bíti'rö naca tu le guzxi' lu ná'asé' gunë'. Dios runse' caní tu' caní guzxi' lu në'ë bi gunë' queé' Abraham.

<sup>19</sup> Channö caní naca, ¿bizx queé gunná bë'ë Dios xibá na' nazúajgaca lu didza' queé'? Dios gunná bë'ë caní para gaca bë' xíguia' nabága'ru', pero gúcasö caní ga bidxitintë dza na' bilá' lahuë' zxí'ini xi'sóe' Abraham na', Bönni' na' guzxi' lu në'ë Dios gunë' queé' lë na'. Yugu' le gunná bë'ë Dios lu xibá queé', gusól-lë'ë yödzölió ni lu ná'agaquië' gubáz lá'ayi queé', ate' Moisés budödë' didza' ca nácagaca xibá na'. <sup>20</sup> Biti' naquín nu udödi didza' cate' naca tuz nu run tuz didza', ate' Dios, tuz náquië'.

#### Bizx queé gunná bë'ë Dios le zóagaca lu xibá queé'

<sup>21</sup> Le nazúajgaca lu xibá queé' Dios, ¿ta'dá'gaca lë na' guzxi' lu në'ë Dios gunë'? ¡Biti' ca'! La'tu' gunná bë'ë Dios tu xibá le gaca gun ga sóaru' ibanru' tsaz, ní'irö huáca huöácaru' tsahui' lahuë' Dios channö gunru' ca na' rinná bë' xibá na'. <sup>22</sup> Tsca naca lë na' nazúaj lu guichi lá'ayi, yúgu'tëru' nabága'ru' dul-la'. Caní naca para gaca sí'iru' lë na' guzxi' lu në'ë Dios gata' queéru' cate' tseja ládxí'ru' Jesucristo.

<sup>23</sup> Zí'atélö ga bidixín dza gaca tseja ládxí'ru' Cristo, le rnna xibá na' gunná be'e ré'u, ca na' zoa le rinná be'e tu bönni' yu'ë lidxi guíë. Caní guca ga bidxitintë dza bilá' lahuí gaca huöácaru' tsahui' channö uyija ládxí'ru' Lë'. <sup>24</sup> Caní naca, le nazúaj lu xibá queé' Dios gunná be'e ré'u, lë na' busedi ré'u ca tu bönni' usedi ga bidxitintë dza bilá' lahuë' Jesucristo, para gaca huöácaru' tsahui' lahuë' Dios channö uyija ládxí'ru' Lë'. <sup>25</sup> Na'a, tu' bidixín dza gaca huöácaru' tsahui' channö uyija ládxí'ru' Cristo, bíti'rö inná be'e ré'u lë na' busedi ré'u.

<sup>26</sup> Yúgu'tëli' nácali' bi'i queé cazé' Dios tu reja ládxí'li'-në' Jesucristo, en chinácali' tuz len Lë'. <sup>27</sup> Yúgu'të nupa nadílagaca nisa para huöácagaca tuz len Jesucristo, nihuöácagaca ca náquië' Lë cazé'. <sup>28</sup> Bíti'rö narúaj cholplö bönni' judío, en bönni' izá'a, en cabí narúaj cholplö bönni' náquië' tsaz huen dxin, en bönni' nazán, en cabí narúaj cholplö bönni', en nigula, tu' cate' böácali' tuz len Jesucristo, yúgu'tëli' böácali' ca' tuz len luzá'ali' tulí' ia'tulí'. <sup>29</sup> Na'a, channö néquili' queé' Cristo, nácali' ca' zxí'ini xi'sóe' Abraham, ate' nazí'ili' lë na' guzxi' lu në'ë Dios gunnë' queé' Abraham.

#### 4

<sup>1</sup> Lë ni le ré'ënda' innia': Tsanni ni ribözabi' tu bi'i bönni'do' sí'ibi' bi ral-la' gunnë' xúzibi' queébi', ni' nácabi' bñido', en biti' nayépisétéröbi' ca raca que tu nu naca tsaz huen dxin, sal-la' le nácaté nequi queébi' yúgu'të. <sup>2</sup> Tsanni ni' nácabi' bñido', nacuá' nupa tun chi'i lëbi', en tu'gún dxin le nequi queébi' ga idxintë dza chinuzóë' xúzibi' queébi'.

<sup>3</sup> Lës caní raca ca' queéru'. Tsanni ni' gúcaru' ca bñido', gunná be'e xibá na' ré'u ca raca quégaca bönachi yödzölió ni. <sup>4</sup> Cate' bizá'a dza, Dios gusól-lë'ë zxí'ini cazé' ni. Gúquië' zxí'ininu tu nigula ca nácaru' ré'u, en gunná be'e le zoa lu xibá quégaca bönni' judío Lë'.

<sup>5</sup> Caní guca queé' para guca busölé' nupa na' rinná be'e le zoa lu xibá léguequi, para gaca huöácaru' bi'i queé' Dios.

<sup>6</sup> Para gaca bë' chinácali' bi'i queé cazé', Dios guchizé' Dios Bö' lá'ayi ládxí'do'oli', ate' Lë cazé' rulidzé' Dios uláz queéli', rnne': "Xuza'." <sup>7</sup> Caní naca, chinácali' bi'i queé' Dios,

en bíti'rö nácali' ca yugu' bönni' tsaz nácagaquië' huen dxin. Na'a, tu' nácali' bi'i queë cazë' Dios, Lë cazë' nazi' ladxi' né'ë guequi queëli' le nequi queë' tu' nácali' tuz len Cristo.

### *Pablo ru'i ládxé'ë bönni' Galacia ta'yija ládxé'ë Cristo*

<sup>8</sup> Cate' ni' biti' núnbë'ëli'-në' Dios, gúcali' ca yugu' bönni', tsaz nácagaquië' huen dxin, en benli' dxin quégaca budó' néquini. Biti' ca' nácagaca budó' na' Dios. <sup>9</sup> Na'a, tu' núnbë'ëli'-në' Dios, o huáca innaru': Tu' núnbë'ë Dios libí'ili', ¿bizx queë ré'ënili' ubí'ili' yugu' lu xibá cané na' cabí nu uzí' xibé? ¿Ré'ënili' huöácali' huen dxin tsaz, en gunli' ca rinná bë' xibá na'? <sup>10</sup> Rápali' tu ia'tú dza, enca' tu ia'tú beo', enca' tu ia'tú cusu na, en tu ia'tú iz. <sup>11</sup> Ráxdida' bi gaca queëli'. ¿Naru' nuhuöáca nítisö dxin bena' para gúnbbë'ëli' le nácatë? <sup>12</sup> Ráta'yuá' loli', böchi' zána'do', gácali' ca naca' neda', nulá' na'a lu na' xibá benë' Moisés. Caní ral-la' gácali' tu' böáca' neda' ca gúcali' libí'ili'. Biti' bi le cabí naca dxi'a benli' quia' neda'.

<sup>13</sup> Chinöz quézili' bizx queë na' gusí lahua' runa' libán loli' que le rinné dxí'a. Bena' libán ni' tu' güü'ida'. <sup>14</sup> Biti' bucá'anali' neda' cané, en cabí buzóali' neda' tsölá'alö sal-la' bigútili' ca guca yödzöhué' quia' na'. Benli' neda' bal, tuz ca gunli' bal tu gubáz lá'ayi queë' Dios, o ca runli' bal Jesucristo caz. <sup>15</sup> Budzéjalë'ëli' dza ni'. ¿Bizxi guca queëli' tu' cabirö raca caní? Lë ni gaca innía' ca guca queëli': La'tu' huáca gunli', bubéajli' guioj lo quézili', le gúnnali' quia'. <sup>16</sup> Na'a, ¿réquili' nuhuöáca' tu nu riléde'e libí'ili' tu' gudxa' libí'ili' le nácatë?

<sup>17</sup> Bönni' ni' tu'tsé'ë libí'ili' tu'i ládxé'ë libí'ili', pero calëga para gaca dxí'a queëli'. Té'ënë' ilunë' ga ucá'anali' netu' para güü'i ládxí'li' légaquië'. <sup>18</sup> Na'a, naca dxí'a zoa nu ru'i ladxi' libí'ili', pero tuz channö naca para gaca dxí'a queëli'. Caní ru'i'itica'sö ládx'a a libí'ili', en calégasö cate' ni' zóalena' libí'ili'. <sup>19</sup> Libí'ili', zxí'ina'do'. Ca na' raca queënu nigula chizóa sóabi' bï'ido' queënu, rigu'i rizáca'nu, lës caní rigu'i rizáca'a neda' ni'a queëli' leyübölö ga idxinrö dza gácali' idú ca náquië' Cristo. <sup>20</sup> Nácaru la' zóalena' libí'ili' na'a para gaca güü'ilena' libí'ili' didza' nadzá'alö, tu' ruúbi rugu'ilë'ëda' ni'a queëli'.

### *Le rucudzu' didza' ca guca quégacanu Agar en Sara*

<sup>21</sup> Na'a, libí'ili', nuli' ré'ënili' uzóa cuinli' lu xibá queë' Moisés, guli'ná'tsöca' didza' ni gu'a. ¿Catu caz buzé nágali' le rnna xibá na'? <sup>22</sup> Rnna xibá na' caní: gula'cuá'abi' chòpabi' bi'i bönni'do' queë' Abraham. Tubi' gúcabi' zxí'ininu tu nigula tsaz nácanu huen dxin, ate' ia'tubi' gúcabi' zxí'ininu nigula nazannu. <sup>23</sup> Zxí'ininu nigula huen dxin na' gúlajbi' lu ni'a lu na' tu bönni' tsca tálajbi' yúgu'të bï'ido', pero zxí'ininu nigula nazannu na' gúlajbi' tu' guzxí' lu né'ë Dios gunë' ga gálajbi'. <sup>24</sup> Lë ni naca ca tu le rucudzu' didza'. Ca guca quégacanu chòpanu nigula ni sa'yéaj ca naca chopá didza' Dios bénlenë' böñachi. Tu didza' na' naca le buzóë' Dios lu guí'a Sinaí, le sa'yéaj lë na' guca queënu Agar. Nupa na' rinná be'e xibá na' léguequi, nácagaca ca zxí'ininu Agar, en nácagaca ca huen dxin tsaz lu xibá na'. <sup>25</sup> Le gúcanu Agar na' sa'yéaj ca' ca naca guí'a Sinaí na' le zoa luyú Arabia, en sa'yéaj ca' ca naca yödzö Jerusalén na'a dza, tu' naca yödzö na' ca tu bönni' tsaz náquië' huen dxin tsözxón len nupa nacuá' lu yödzö na'. <sup>26</sup> Jerusalén na' zoa yehua' yubá nazán, ate' rë'u ni nácaru' böñachi uládz que yödzö ni'. <sup>27</sup> Nazúaj lu guichi lá'ayi le rnna: Budzeja, nigula huödx, cabí nacuá' zxí'inu'.

Lu yöl-la' rudzeja quiu' gurödxí'a,  
sal-la' catu caz guca quiu' le rigu'i rizáca'nu nigula  
chizúa sóabi' bï'ido' queënu.

Budzeja tu' sal-la' nusán né'eguequi böñachi li',  
gunë' Dios ga ila'yánterö zxí'inu'  
ca bi'i queënu nigula zóalennu bönni' queënu.

<sup>28</sup> Libí'ili', böchi' zána'do', rë'u ni nácaru' ca gúcabi' Isaac, zxí'iné' Abraham. Nácaru' ca yugu' zxí'ini xi'sóe' Abraham, guzxí' lu né'e Dios gata' queé'. <sup>29</sup> Dza ni', bi'i na' gúlajbi' ca tálajbi' yúgu'té bí'ido', gudxía ná'abi' bi'i na' gúlajbi' tu' nözi yöl-la' huáca queé' Dios Bö' lá'ayi. Lës caní raca ca' queéru' na'a, ta'bía no bönachi yödzölió ni rë'u. <sup>30</sup> ¿Bizzí rnna le zoa lu guichi lá'ayi? Caní rnna: "Gurú'una-nu nigula na' tsaz nácanu huen dxin tsözxón len zxí'ininu, tu' biti' gaca zxí'ininu nigula na' sí'ibí' tsözxón zxí'ininu nigula nazannu le guzxí' lu né'e Dios guequi queébi' zxí'ininu nigula nazannu na'." <sup>31</sup> Caní naca, böchi' zána'do'. Biti' nácaru' ca nácabi' zxí'ininu nigula na', tsaz gúcanu huen dxin, pero nácaru' ca zxí'ininu nigula nazannu na'.

## 5

*Guli'gún chi'i cuinli', ugá'anali' lu yöl-la' nazán*

<sup>1</sup> Chinazanru' tu' busané' Cristo rë'u. Guli'sóa tsutsu channö, ugá'anali' lu yöl-la' nazán na'. Biti' uzóa cuinli' leyúbölö lu xibá queé' Moisés para cabí gácali' ca tu bönni', tsaz náquié huen dxin.

<sup>2</sup> Buli'zé nágali' neda'. Neda', Pablo, rea' libí'ili', channö ruí'ili' lataj nu ichugu lu xpéla'li' ca rinná bë' xibá na', biti' ca' uzí'ili' xibé le bené' Cristo. <sup>3</sup> Leyúbölö ré'ënda' guía' nútitiés bönni' ru'ë lataj nu ichugu lu xpéle'ë caní, run bayudxi gunë' idutë ca le rinná bë' xibá queé' Moisés. <sup>4</sup> Nuli' réquili' huöácali' tsahui' lahuë' Dios tu' runli' ca rinná bë' xibá na', chibulá'alenli'-në' Cristo. Chibusán ná'ali' le ruzá' ladxé'ë Dios queéru'. <sup>5</sup> Rë'u ni ruzxöni ladxí'ru' huöácaru' tsahui' lahuë' Dios ni'a que yöl-la' huáca queé' Dios Bö' lá'ayi tu' reja ladxí'ru' Cristo. <sup>6</sup> Channö nácaru' tuz len Jesucristo, biti' bi run channö narugu lu xpéla'ru' ca rinná bë' xibá na' o channö cabí narugu caní lu xpéla'ru'. Le run bayudxi naca tseja ladxí'ru' Cristo, le run ga idxí'iru' luzá'aru'.

<sup>7</sup> Dxí'ado' guca ca gusí loli' runli' dza ni'. ¿Nuzxi ben ga bucá'anali' le nácatë? <sup>8</sup> Biti' bené' Dios, Bönni' rulidzë' libí'ili', ga benli' caní. <sup>9</sup> Biti' gal-la ladxí'li' lë na' rnna: "Láti'sö cúa zi que yöta xtila ruhuöázx idutë cúa ga nayú'u cúa zi na'." <sup>10</sup> Tu' nácaru' tuz len Xanru', runa' löza ca naca queéli', sa' ladxí'li' tuz ca rizá' ladxá'a neda', ate' Dios gun zi'ë bönni' na' rutsé'ë libí'ili', nútitiés nu naca bönni' na'.

<sup>11</sup> Ca naca quia' neda', böchi' zána'do', nacuá' nupa ta'nná rusédida' bönachi ral-la' irugu lu xpéla'guequi ca rinná bë' xibá queé' Moisés. Channö runa' caní, ¿bizx queé ta'bía nahuë' bönni' judío neda'? La'tu' rusédida' caní, cuntu nu ilé neda' tu' runa' libán ca gútié' Cristo lë'e yaga cruz. <sup>12</sup> Ca naca que nupa ni' tu'tsá' libí'ili', té'ëni irugu lu xpéla'li' lë na', nácoru la' ila'chugu tsaz cuínguequi.

<sup>13</sup> Ca naca queéli', böchi' zána'do', Dios bulidzë' libí'ili' para gácali' bönachi nazángaca. Biti' ugunli' dxin yöl-la' nazán na' para gunli' ca rizësö ladxí'li', pero para gunli' dxin que luzá'ali', tuli' ia'tuli', tu' nadxí'ili' luzá'ali'. <sup>14</sup> Yúgu'té le rinná bë' xibá queé' Dios rusudxín nu na' run ca rinná bë' xibá na' rnna: "Ral-la' idxí'iniu' luzó'o ca nadxí'i cuinu'." <sup>15</sup> Channö rizi' quídza'li' luzá'ali' tuli' ia'tuli', runli' ca tunba' böa' guí'a sínia', táguya'aba', en táguba' luzá'aba'. Buli'yú tsate' usulu usunítili' luzá'ali' tuli' ia'tuli'.

*Le runru' lu yöl-la' bönáchisö queéru', en le runru' len yöl-la' huáca queé' Dios Bö' lá'ayi*

<sup>16</sup> Lë ni na' rea' libí'ili': Guli'güí' latja inná bë'ené' libí'ili' Dios Bö' lá'ayi, ate' ni'irö bíti'rö gunli' ca rizësö ladxí'ili' lu yöl-la' bönáchisö queéli'. <sup>17</sup> Yugu' le rizé ladxí'ru' gunru' lu yöl-la' bönáchisö queéru' biti' röjlöz le ré'ënë' Dios Bö' lá'ayi gunru', ate' lë na' ré'ënë' Dios Bö' lá'ayi biti' röjlöz le ré'ëniru' gunru' lu yöl-la' bönáchisö queéru'. Chopá ni, biti' röjlözgaca, en que lë ni na' biti' gaca gunli' ca ré'ëni quézili'. <sup>18</sup> Channö ruí'ili' lataj inná bë'ené' Dios Bö' lá'ayi libí'ili', bíti'rö inná be'e xibá queé' Moisés libí'ili'.

<sup>19</sup> Naca bë' le tun bönachi lu yöl-la' bönáchisö quéguequi.

Tun dul-la' le riguitsaj xibá que yöl-la' nutsaga na', enca' dul-la' le lë'ë.

Tun yugu' le naxihui', en yugu' le catsahui'.  
 20 Téquiguequi le bach budó' néquiniguequi.  
 Tun yöl-la' gudzá'.  
 Tu'dí'i luzé'eguequi, en ta'díl-lalen léguequi.  
 Tu'zxé'e luzé'eguequi, en ta'lé nupa na', en tu'huídi'.  
 Ta'rúaj chopló, en tu'béaj tsölá'alö nupa dá'gaca léguequi.  
 21 Ta'zé ladxi' le dë que luzé'eguequi, en ta'guilaj xíguia'.  
 Ta'zudxi, en tagu lë'e.  
 Tu'dödi bë' ca túnguequi.

Le zían le caní túnguequi. Neda' ruxösa' ládxi'li' na'a para cabí gunli' caní ca na' buxösa' ládxi'li' zí'alö, rnmía': Nupa túngaca caní biti' ca' ila'deli' ila'yú'u ga na' rinná bë'ë Dios.

22 Channö zóalen Dios Bö' lá'ayi rë'u runru' caní:  
 Nadxi'iru' luzá'aru'.  
 Rudzeja ládxi'ru'.  
 Zoa dxi ládxi'do'oru'.  
 Ribózaru' zxön ladxi'.  
 Ru'i ládxi'ru' luzá'aru'.  
 Nácaru' dxi'i ladxi'.  
 Rusudxinru' xtíza'ru'.  
 23 Nácaru' nöxañ ladxi'.  
 Rinná bë'e cuinru'.

Biti' ca' gunná bë'ë Moisés rë'u para cabí gunru' yugu' le caní. 24 Nupa néquiguequi queë' Cristo bíti'rö tun ca té'ëni quez, en cabí tun le ta'zësö ladxi' lu yöl-la' böñachisö quéguequi. 25 Dios Bö' lá'ayi runnë' yöl-la' na'bán queéru'. Lë' cazë' ral-la' inná bë'enë' rë'u ca naca yúgu'të le runru'.

26 Biti' ral-la' gun ba zxön cuinru', en cabí utsá'aru' luzá'aru', en cabí uzxé'eru' luzá'aru' turu' ia'turu'.

## 6

### *Ral-la' gácalenru' luzá'aru' turu' ia'turu'*

1 Na'a, böchi' zána'do', channö ilé'eli' runë' dul-la' tu bönni' böchi'li', nuli' zóalenë' Dios Bö' lá'ayi libí'ili', ral-la' gunli' ga ubí'i ládxé'ë bönni' na', pero run bayudxi gunli' caní lu yöl-la' nöxañ ladxi' queéli', en uyú cuinli' tsate' cu'u tu' xihui' libí'ili' nöza dul-la'.  
 2 Guli'gácalen luzá'ali' tuli' ia'tuli' tsca naca yuá' nabága'li'. Channö gunli' caní uzóali' didza' le gunná bë'enë' Cristo rë'u.

3 Channö zoa nu réqui chinadeli' yöl-la' nayépisë, en biti' bi nadeli' nu na', nu ni na' rizi' ye'e la' cuinsi. 4 Tuhuéaj tuhuéajë' bönni' ral-la' uchi'a usöröë' que le runë'. Ni'irö channö urúajë' dxi'a, huáca gun ba zxön cuinë' ni'a que le chinunë', en biti' gun bayudxi uyúë' ca núngaca ia'zíca'rö böñachi channö ba benrë' dxi'a o cabí. 5 Tuhuéaj tuhuéajë' bönni' ral-la' gu'ë le nusubáguë'ë Dios lë'.

6 Channö zoa nu rusedi libí'ili' ca naca le rinné dxi'a, ral-la' unódzjali' nu na' rusedi libí'ili' lati' que yúgu'të le do' dë queéli'.

7 Biti' si' ye'e cuinli' tu' cuntu nu gaca si' ye'e Dios. Ulápali' tsca naca le rázali'. 8 Channö le rázali' naca yugu' le runli' ca rizësö ládxi'li' lu yöl-la' böñachisö queéli', le ulápali' gaca yöl-la' guti. Channö le rázali' naca yugu' le runli' ca raza ládxé'ë Dios Bö' Lá'ayi, ulápali' le gunnë' Dios Bö' lá'ayi queéli', le naca yöl-la' na'bán idú. 9 Caní naca, biti' ral-la' huöa ládxi'ru' gunru' le naca dxi'a, tu' channö cabí huöa ládxi'ru', idxín dza uláparu'. 10 Que lë ni na', bátati'tës gata' queéru' lataj, ral-la' gunru' le naca dxi'a quégaca yúgu'të böñachi, en le naca lo, ral-la' gunru' caní quégaca böchi' zanru' ta'yija ladxi' Cristo.

*Le buzúajë' Pablo lu guichi ga ruúdx*

<sup>11</sup> Buli'yú cate' bach didza' ni ruzúaja' lu guichi len na' cuina'. <sup>12</sup> Nupa na' té'ëni ilún ga irugu lu xpéla'li' ca rinná bë' xibá queë' Moisés, túngaca caní para ulu'rúaj dxi'a lögaca bönachi, en cabí bi ilún quéguequi tu' túngaca libán ca gútië' Cristo lë'e yaga cruz. <sup>13</sup> Yugu' bönni' na' ta'zí' lu ná'agaquië' le narugu lu xpéla'gaquië' ca rinná bë' xibá queë' Moisés, biti' tu'zóë' didza' idutë ca rnna xibá na'. Té'ënë' ilunë' ga irugu lu xpéla'li' para gaca ilún ba zxön cuíngaquië' tu' ta'nná bë'enë' libí'ili' para irugu lu xpéla'li' caní. <sup>14</sup> Ca naca quia' neda', cú'usa' yöl-la' ba le benë' Xanru' Jesucristo cate' gútië' lë'e yaga cruz. Tu' näzi le benë' Cristo lë'e yaga cruz, yugu' le dë yödzölió ni naca quia' ca tu le chinati, biti' rui'i ládxa'a le, ate' neda' naca' quégaca bönachi yödzölió ni ca tu bönni' nati, biti' tu'i ladxi' neda'. <sup>15</sup> Channö nácaru' tuz len Jesucristo, biti' bi run channö narugu lu xpéla'ru' ca rinná bë' xibá na' o channö cabí narugu lu xpéla'ru' caní. Le run bayudxi naca gácaru' bönachi cubi niu' lë'e ládxi'do'oru'. <sup>16</sup> Yúgu'të bönni' na' tunë' ca rinná bë' xibá runa' ni, en yúgu'të bönni' na' néquiguequinë' queë' Dios, rinábida'-në' Dios gunë' ga soa dxi ládxi'do'gaquië', en huéchi' ládxë'ë légaquië'.

<sup>17</sup> Na'a zë lo, cuntu nu bönni' ral-la' utsé'ë neda', tu' nácagaca bë' butsúa zóagaca lu xpéla'a naca' huen dxin queë' Xanru' Jesús.

<sup>18</sup> Na'a, böchi' zána'do', rinábida'-në' Xanru' Jesucristo uzá' ládxë'ë queëli' yúgu'tëli'. Ca' caz.

## DIDZA' GUSÖL-LË'Ë PABLO YÖDZÖ ÉFESO

*Pablo rugapë' Dios bönachi queë' Cristo nacuá' Éfeso*

<sup>1</sup> Neda', Pablo, naca' gubáz nasööl-lë'ë Jesucristo tu' gú'uni quézinë' Dios gaca' caní. Rugapa' Dios libi'ili', zóali' Éfeso. Néquili' quez queë' Dios, en réajlë'eli' Jesucristo.

<sup>2</sup> Rinábida'-në' Xúziru' Dios, enca' Xanru' Jesucristo uzá' ladxë'ë queëli', en gunë' ga soa dxi icja ládxi'do'oli'.

*Le naca queë' Dios Bö' Lá'ayi rata' queëru'*

<sup>3</sup> ¡Ral-la' cù'uru'-në' yöl-la' ba Dios, Xuzë' Xanru' Jesucristo! Tu' nácaru' tuz len Cristo, Dios chibuzá' ladxë'ë queëru' yúgu'të le naca dxi'a que yehua' yubá, le runë' Dios Bö' Lá'ayi ga rata' queëru'. <sup>4</sup> Zí'atëlö ca benë' Dios yödzölió ni, gurö' cazë' rë'u para guéquiru' quez queë' tsözxón len Cristo, en gácaru' bönachi lá'ayi queë', en gácaru' idú dxi'a lahuë' Lë'. <sup>5</sup> Dios bucözë' zí'atëlö si' lu në'ë rë'u ca zxí'ini cazë' tsözxón len Jesucristo, tu' guyaza ladxë'ë gaca caní, en tu' naca le gú'uni quézinë' gunë'. <sup>6</sup> ¡Ral-la' cù'utica'siru'-në' Dios yöl-la' ba ni'a que le buzá' ladxë'ë queëru', yugu' le bennasë' queëru' tu' nácaru' tuz len Zxí'inë', Nu na' nadxf'inë'! <sup>7</sup> ¡Cristo böá'uë' rë'u cate' ni' gútië' uláz queëru' para gaca uniti lahuë' Dios rë'u ca naca dul-la' nabága'ru'! ¡Zxöntérö naca le buzá' ladxë'ë Dios queëru', <sup>8</sup> lë na' rúnnadë'ë Lë' queëru'! ¡Lu yöl-la' rácada' queë', en lu yöl-la' réajni'i queë' <sup>9</sup> benë' Dios le bucözë' queëru', ate' bulu'finë' rë'u lë na' bigachi', le buzóa cazë' zí'atëlö usudxinë' lu në'ë Cristo! <sup>10</sup> Lë na' buzóa cazë' Dios usudxinë' cate' izá'a dza, naca gunë' ga ilaca tuz, en ila'cuá' lu në'ë Cristo yúgu'të le dë, le nacuá' yehua' yubá, en le nacuá' yödzölió ni.

<sup>11</sup> Tu' nácaru' tuz len Cristo, Dios gurö' cazë' rë'u zí'atëlö para guequi queëru' le nequi queë' Xúziru' Dios, lë na' bucözë' queëru' ca naca le gú'uni quézinë' Dios, Nu run yúgu'të ca ré'ëni quézinë' Lë'. <sup>12</sup> Caní benë' Dios para cù'uru'-në' yöl-la' ba ca naca yöl-la' zxön queë', rë'u ni ruzzöni ládxi'ru'-në' Cristo zí'atëlö ca ia'zíca'rö bönachi. <sup>13</sup> Lësca' caní guca queëli'. Cate' biyónili' didza' idútë li, didza' dxi'a ca gaca uláru', guyéajlé'eli' Cristo, ate' Dios buzóë' queëli' le naca bë' nácali' queë', tu' guchízië' icja ládxi'do'oli' Dios Bö' Lá'ayi, Nu na' guzxí' lu në'ë Dios isööl-lë'ë queëru'. <sup>14</sup> Tu' zóalenë' Dios Bö' Lá'ayi rë'u, naca löza guequi queëru' le nequi queë' Xúziru' Dios cate' údxi huöá'uë' rë'u, rë'u na' chinéquiru' queë'. Caní naca para gaca yöl-la' ba que yöl-la' zxön queë'.

*Pablo rinábinë' Dios gunnë' queëru' yöl-la' réajni'i*

<sup>15</sup> Que lë ni na', cate' biyönda' ca réajlë'eli'-në' Xanru' Jesús, en ca nadxf'ili' yúgu'të bönachi queë' Dios, ga ridxitnë na'a dza <sup>16</sup> bití' ca' rusana' rea'-në' Dios: "Xclenu'", ca naca queëli'. Röjneda' libi'ili' cate' rulidza'-në' Dios. <sup>17</sup> Rinábida'-në' Dios queë' Xanru' Jesucristo, Dios na' náquië' Xúziru' nayépisétérë', rinábida'-në' isööl-lë'ë Dios Bö' Lá'ayi queëli', Bö' na' runna yöl-la' réajni'i queëru', en rulu'i rë'u ca naca cazë' Dios, para gaca idú ca núnbë'ëru'-në'. <sup>18</sup> Rinábida'-në' Dios uzéajni'inë' libi'ili' lu icja ládxi'do'oli' para gaca inózili' ca naca le runru' löza, lë na' bulidzë' libi'ili' para uzi'ili' xibé, en para inózili' ca naca yöl-la' tsahui' que yehua' yubá, le guequi quégaca nupa néquiguequi queë' Dios, <sup>19</sup> enca' para inózili' cate' zxön naca yöl-la' huáca queë', le rácalen rë'u ni réajlë'ëru' Lë'. Yöl-la' huáca zxön ni naca la' lëbisö na' bulu'e lahui Dios <sup>20</sup> cate' ni' busubanë' Cristo lu yöl-la' guti, en benë' ga gurö'ë cuita lë'ë Lë cazë' ga nayépisétérë' ni' yehua' yubá. <sup>21</sup> Rinná bë'enë' nupa ni' ta'nná bë', en nupa ni' dë lu në'eguequi, en nupa ni' nadéli'gaca yöl-la' huáca, en nupa ni' nácagaca xan. Cristo nayépisétérë' ca yúgu'të nupa nadéli'gaca

yöl-la' unná bë' yödzölió ni, en lu yödzölió si' za'. <sup>22</sup> Dios budödë' lu në'ë Cristo yúgu'të le dë para inná bë'enë' le, en buzöe' Lë' quégaca bönnachi queë' para gáquië' Xanru' lu yúgu'të le nequi queéru'. <sup>23</sup> Yugu' bönnachi queë' Cristo nácagaca ca idútë le naca cazë', ate' raquië' Lë' idú lu le naca cazë' na'. Run cazë' Lë' ga raca idú yúgu'të le dë.

## 2

*Nuláru' tu' nadxi'inë' Dios rë'u*

<sup>1</sup> Dios chibennë' yöl-la' na'bán idú queéli', sal-la' gúcali' zí'atëlö ca bönni' nátigaca tu' nözi dul-la' nabágä'li', en ni'a que dö' biá'ali'. <sup>2</sup> Dza ni' benli' lëbisö ca tun bönnachi biti' nácagaca tsahui' nacuá' yödzölió ni, en benli' ca gú'uni tu' xihui', nu rinná bë' lu bö'ös, en rugún dxin nupa biti' túngaca ca rnna xtídzë'ë Dios. <sup>3</sup> Lësca' caní gúcaru' yúgu'tëru' rë'u. Benru' ca guzësö ládxí'ru', en ca guyaza ládxí'ru' lu yöl-la' bönnachisö queéru'. Que lë ni na' gubágä'ru' dul-la' lahuë' Dios le nun ga gunë' rë'u xíguia' ca gunë' quéguequi ia'zíca'rö bönnachi. <sup>4-5</sup> Ni'irö cate' ni' nácaru' ca bönni' nátigaca tu' nözi dul-la' gubágä'ru', Dios busubanë' rë'u lu yöl-la' guti tsözxón len Cristo tu' buéchi' ládxë'ë rë'u, en bidxf'ide'enë' rë'u. Nuláli' tu' zoa le buzá' ládxë'ë Dios queéli'. <sup>6</sup> Dios busubanë' rë'u tsözxón len Cristo para gunë' ga cö'örü' tsözxón len Lë' ga ni' rinná bë'ë yehua' yubá. <sup>7</sup> Caní benë' Dios, en bulu'íinë' bönnachi si' zá'gaca ca naca yöl-la' tsahui' que le buzá' ládxë'ë queéru', tu' budödë' Jesucristo ni'a queéru', le naca bë' ca nadxi'ide'enë' rë'u. <sup>8</sup> Nuláli' tu' zoa le buzá' ládxë'ë Dios queéli' tu' réajle'ëli' Cristo. Busölé' libf'ili', calëga tu' nacuá' le naca dxí'a benli' libf'ili', pero tu' naca le runsë' Dios. <sup>9</sup> Cuntu nu gaca gun ba zxön cuini tu' nulá, tu' cabí nulá nu na' tu' nacuá' le naca dxí'a nun nu na'. <sup>10</sup> Le nácaru' naca le nun cazë' Dios. Tu' nácaru' tuz len Jesucristo, bucu'ë rë'u para gunru' le nácagaca dxí'a, le bucözë' zí'atëlö gunru'.

*Rö'ö dxi icja ládxí'do'oru' lahuë' Dios ni'a que le benë' Cristo*

<sup>11</sup> Guli'tsöjnë ca gúcali' zí'atëlö. Gúcali' bönnachi izá'a, en que lë ni na' yugu' bönni' judío, bönni' na' ta'chúguië' lu xipéla'gaquië' le naca bë' dá'gaquië' Dios, en nazí' lágäquië' bönni' narugu lu xipéla'gaquië', ta'nné' nácali' libf'ili' bönni' biti' narugu lu xipéla'gaquië'. <sup>12</sup> Dza ni' nubíga'li' ga zoë' Cristo. Gúcali' bönni' zi'tu' lógaca bönnachi Israel, en biti' buzf'ili' xibé didza' benë' tsutsu Dios, en guzxí' lu në'ë bi gata' quégaca bönnachi queë'. Guzóali' yödzölió ni, biti' zoa le runli' löza, en biti' núnbë'ënili'-në' Dios. <sup>13</sup> ¡Na'a, nácali' tuz len Jesucristo! ¡Zí'atëlö nubíga'li' libf'ili' zi'tu' ga zoë' Dios, pero na'a nudxíguë'ë Dios libf'ili' gála'sö tu' gútië' Cristo uláz queéru'! <sup>14</sup> Lë cazë' Cristo runë' ga rö'ö dxi icja ládxí'do'oru' lahuë' Dios. Lë' benë' ga yugu' bönni' judío, en yugu' bönni' zi'tu' bulu'huöáquië' tuz bönnachi, en busúluë' yöl-la' rilé le guléaj légaquië' choplö ca tu zö'ö zxön. <sup>15</sup> Lë ni benë' Cristo cate' gútië' uláz queéru', en gudúë' yugu' xibá, en yugu' le rinná bë' nazúajgaca lu xibá quégaca bönnachi judío, ate' chopa cö' bönnachi na', bunë' tuz bönnachi cubi, nupa nácagaca tuz len Lë cazë'. Caní benë', en gulequi dxíë' yöl-la' rilé na'. <sup>16</sup> Cate' gútië' Cristo lë'e yaga cruz, busúluë' yöl-la' rilé na', ate' chopa cö' bönnachi na', bunë' légaquië' ca tuz bönnachi, en gulequi dxíë' icja ládxí'do'gaquië' lahuë' Dios.

<sup>17</sup> Caní guca, bulu'i lahuë' Cristo, en benë' libán que didza' dxí'a ca ribequi dxíë' yúgu'të bönnachi, libf'ili' na' nácali' bönnachi izá'a, en zóali' zi'tu' ga zoë' Dios, enca' bönnachi judío nacuá' gála'sö. <sup>18</sup> Na'a, ni'a que le benë' Cristo, gaca ibíga'ru' lahuë' Xúziru' Dios, tu' zóalenë' Lë cazë' Dios Bö' Lá'ayi rë'u, sal-la' nácaru' bönnachi judío o bönnachi izá'a.

<sup>19</sup> Que lë ni na', libf'ili', bönnachi izá'a, bíti'rö nácali' ca bönnachi zi'tu' zóali' tu luyú biti' nequi queéli', pero nabábalenli' bönnachi queë' Dios. ¡Chinácali' ca bi'i queë' cazë' Dios!

<sup>20</sup> Libf'ili' nácali' ca tu yu'u zoa tsaz. Nácali' ca yugu' guiój zxóagaca lahui xilibi zö'ö, le bulu'cu'ë yugu' bönni' gubáz queë' Cristo, en yugu' bönni' gulu'ë didza' uláz queë' Dios, ate' Lë cazë' Jesucristo náquië' ca guiój lo que xilibi zö'ö na'. <sup>21</sup> Idútë yu'u na' le nácali'

libí'i cázali' riyasa lahui xilibi zö'ö na' naca cazé' Cristo, en nacuá' tu'lapa yugu' guío' que, para gaca tu yudo' lá'ayi le naca tuz len Xanru'. <sup>22</sup> Libí'i cázali' nácali' tuz len Cristo Nu buzúa libí'ili' para gácali' ca tu yu'u ga na' yu'ë Dios, tu' dzágue' Dios Bö' Lá'ayi libí'ili'.

## 3

*Náquië' Pablo huen libán que didza' dxi'a lógaca bönachi izá'a*

<sup>1</sup> Que lë ni na', neda', Pablo, yu'a lidxi guíë tu' runa' libán queë' Jesucristo para uzí'ili' xibé', libí'ili', bönachi izá'a. <sup>2</sup> Réquida' chinöz quézili' ca bené' Dios, budödë' lu na'a dxin runa' para uzí'ili' xibé le ruzá' ládxë' queëru'. <sup>3</sup> Dios bulu'e lahui le bigachi' queë', en buzéajni'iné' neda' ca naca. Ca naca lë ni chibuzúaja' láti'do' queéli' lu guichi. <sup>4</sup> Cate' ulábalí' lë ni, gúnbë'ëli' le réajni'ida' ca naca le bigachi' ca naca queë' Cristo. <sup>5</sup> Dza ni'te cuntu nu buzéajni'iné' Dios ca naca le bigachi' na', pero na'a, lu në'ë Dios Bö' Lá'ayi, chibulu'ë lahui Dios ca naca, tu' bulu'ë' yugu' bönni' gubáz lá'ayi queë', en yugu' bönni' tu'ë didza' uláz queë'. <sup>6</sup> Caní rnna lë na' bigachi': "Ni'a que didza' dxi'a ila'deli' bönachi izá'a tsözxöñ len bönachi judío le nequi queë' Dios, ate' ulu'huóáquië' ca tuz bönachi, en ulu'zi'ë xibé tsözxöñ len légaquië' le guzxi' lu në'ë Dios unödzjë' quégaquië' tu' dá'gaquië' Jesucristo." <sup>7</sup> Dios buzá' ládxë'ë quia' le benné' quia'. Lu yöl-la' huáca zxöñ queë' bené' neda' huen libán que didza' dxi'a queë'. <sup>8</sup> Nacra' cá'asö ca yúgu'të bönachi queë' Dios, pero Lé' buzá' ládxë'ë quia' gaca' huen libán lógaca bönachi izá'a que didza' dxi'a ca naca yöl-la' tsahui' queë' Cristo, le nazáca'da'. <sup>9</sup> Dios budödë' lu na'a guna' ga iléquibe'e yúgu'të bönachi ca naca le buzúa cazé' Dios dza ni'te, lë na' naca tu le bigachi' queë' Dios, Nu ben yúgu'të le rilé'eru'. <sup>10</sup> Caní guca, para iléquibe'e yúgu'të nupa ta'nná bë', en nupa dë lu në'eguequi ni' yehua' yubá, idú ca naca yöl-la' réajni'i queë' Dios cate' ila'lé'e ca nácagaca bönachi queë' Cristo. <sup>11</sup> Dios bené' lë ni, busudxinë' lë na' buzúa cazé' dza ni'te, le bené' lu në'ë Xanru' Jesucristo. <sup>12</sup> Tu' nácaru' tuz len Cristo, nazí'iru' lataj ibíga'ru' idú ladxi'ru' lahuë' Dios, tu' réajlé'ëru' Lé'. <sup>13</sup> Que lë ni na' ráta'yua' loli' biti' gaca chopá ládxí'li' tu' nözi le rigu'i rizáca'a neda' para gácalena' libí'ili', le naca tu le uzí'ili' xibé.

*Ca naca yöl-la' nadxi'i queë' Cristo*

<sup>14</sup> ¡Que lë ni na', ruzechu zxiba' lahuë' Xuzë' Xanru' Jesucristo! <sup>15</sup> Ca lë', nazí'i ca' lágaca yúgu'të bönachi queë', nupa nacuá' yehua' yubá, en nupa nacuá' yödzölió ni. <sup>16</sup> Rinábida'-në' Xúziru' Dios, lu yöl-la' zxöñ queë', le nazáca'da', gunné' queéli' yöl-la' huáca queë' Dios Bö' Lá'ayi, en guné' ga gálali' lu icja ládxí'do'oli'. <sup>17</sup> Rinábida'-në' Cristo soë' icja ládxí'do'oli' tu' réajlé'ëli' Lé'. Rinábida'-në' guné' ga sóali' tsaz lu yöl-la' nadxi'i queë', en biti' tséaj bö' icja ládxí'do'oli' ca nadxi'ili'-në', <sup>18</sup> para gaca tséajni'ili' tsözxöñ len yúgu'të bönachi queë' Cristo ca naca yöl-la' nadxi'i queë', tsca ga ridxín n'ilö, en ná'alö, en cadxi'ilö, en xitsá'alö. <sup>19</sup> Rinábida'-në' Dios guné' ga gúnbë'ëli' yöl-la' nadxi'i na', le cabí gaca gúnbë'ëru' idú ca naca, para sóalen libí'ili' idú le naca cazé' Dios.

<sup>20</sup> ¡Na'a, yöl-la' ba Dios, Nu gaca gúnterö ca gaca inábaru' o ca gaca sa' ládxí'ru', uguné' dxin yöl-la' huáca queë' lu icja ládxí'do'oru'! <sup>21</sup> ¡Gácatica'sö queë' Dios yöl-la' ba lógaca bönachi queë' Cristo, en lahuë' Lé' cazé' Jesucristo, na'a dza, en yúgu'të dza zá'gaca! ¡Ca' gaca!

## 4

*Dios Bö' Lá'ayi nunë' re'ü tuz*

<sup>1</sup> Na'a, neda' ráta'yua' loli', yu'a lidxi guíë ni tu' runa' libán queë' Cristo, rinábida' libí'ili' gunli' idú ca ral-la' ilún nupa bulidzë' Dios para ilequi queë', ca na' bulidzë' ca' libí'ili'. <sup>2</sup> Guli'gaca nöxaj ladxi', en dxi'i ladxi'. Guli'cöz zxöñ ladxi'. Guli'gü' ladxi' luzá'ali' tuli' ia'tuli' lu yöl-la' nadxi'i queéli'. <sup>3</sup> Guli'gü' ladxi' gácatica'sili' tuz ca na' chinunë' Dios Bö' Lá'ayi libí'ili', gunli' caní lu yöl-la' riböza tsáhui'do' queéli' le rutsaga libí'ili'.

<sup>4</sup> Tuz naca idútë le naca cazë' Cristo le nadzágaru' rë'u.

Tuzë' náquië' Dios Bö' Lá'ayi dzáguië' rë'u.

Tuz naca le runru' löza, lë na' bulidzë' rë'u Dios para uzí'iru' xibé.

<sup>5</sup> Tuzë' náquië' Xanru'.

Tuz le réajlë'érü'.

Tuz le bidílaru' nisa.

<sup>6</sup> Tuzë' náquië' Dios Nu naca Xúziru' yúgu'tëru'.

Lë' rinná bë'enë' yúgu'tëru'.

Rugunë' dxin yúgu'tëru'.

Riböza cazë' Lë' lu icja ládzi'do'oru' yúgu'tëru'.

<sup>7</sup> Tu turu' nazí'iru' tu yöl-la' huáca queë' Dios tsca naca le bennë' Cristo que queéru'.

<sup>8</sup> Naca caní ca ná' nazúaj lu guichi lá'ayi le rnna:

Buëpë' yehua' yubá, guché'ë zián böñachi gula'dzúngaca.

Gudísië' quégaca böñachi le runódzjasë' quégaquië'.

<sup>9</sup> ¿Bizxi rë'ëni inná lë na' rnna: buëpë'? Rusëdi rë'u bötje' zí'alö, en bidxinë' yödzölió cadxí'ilö ni. <sup>10</sup> Nu na' bötaj naca Bönni' na' buëpë' xitsá'terö ni' yehua' yubá para budzé'ë yúgu'të len le naca cazë' Lë'. <sup>11</sup> Cristo caz bennë' que queéru' yugu' yöl-la' huáca queë': Bé' lataj bal-lë' bönni' iláquië' gubáz queë'.

Benë' ga tu'ë didza' uláz queë' Dios ia'bal-lë' bönni'.

Gusól-lë'ë ia'bal-lë' tsójéngäquië' libán que didza' dxi'a.

Bucu'ë ia'bal-lë' para ilún chi'ë böñachi queë'.

Bucu'ë ia'bal-lë' para ulu'sédinë' böñachi queë'.

<sup>12</sup> Cristo caz bupé'ë böñachi queë' caní para gaca ilún xichinë', para ilún ga ilaca idú nupa nácagaca ca idútë le naca cazë' Lë'. <sup>13</sup> Caní gaca ga idxintë dza huöácaru' tuz yúgu'tëru' ca réajlë'érü' Cristo, en ca núnbë'ëru'-në' Zxi'inë' Dios. Gácaru' nál-la, en huöácaru' idú ca náquië' Lë cazë' Cristo. <sup>14</sup> Bíti'rö gácaru' ca yugu' bï'ido', ca nácagaca nupa na' tu'tsa'të ca túngaca, en nácagaca ca tu le naché' lu yegu, o ca tu le röjchë' bíti'tës bö' recja, tu' ta'zí' lu né'eguequi bíti'tës didza' nu rusëdi léguequi, nu na' rizi' ye'e léguequi len yöl-la' sina' que, en run ga ta'chixi ta'nigui. <sup>15</sup> Na'a, rë'u ni, tu' nadxfí'iru' luzá'aru', ral-la' gü'iru' didza' le naca idútë li para gaca huöácaru' idú ca náquië' Cristo, en gácaru' tuz len Lë', Nu naca Xani idú le naca cazë', le nácaru' rë'u. <sup>16</sup> Cristo caz runë' ga rutsaga dxi'a idútë le naca cazë', le nácaru' rë'u, ate' idútë le naca cazë' na' naguela' tsözxón ni'a que lë na' run tuz idútë le naca cazë'. Cate' tu turu' runru' xichinru', rë'u na' dzágaru' le naca cazë', idútë rizxón, en raca idú, ca na' zeaj rácarö idú ca nadxfí'iru' luzá'aru'.

### *Yöl-la' na'bán cubi náparu' tu' nácaru' tuz len Cristo*

<sup>17</sup> Uláz queë' Xanru' rea' libf'ili' lë ni, en rigu'a le lu ná'ali', rnnía': Bíti'rö gunli' ca tun nupa biti' núnbë'gaquië' Dios, nupa na' tun ca ta'za'sö ládzi'guequi, <sup>18</sup> en nachul-la nanítigaca icja ládzi'do'guequi. Tu' cabí nőzguequinë' le nácatë, en nazídigaquië', biti' nazí'gaquië' yöl-la' na'bán na' runné' Dios queéru'. <sup>19</sup> Biti' ca' tu'tu'iñë'. Nudödi cuíngäquië' lu le ruá' dö'. Idú ládzi'gaquië' tunë' yúgu'të le cabí naca tsahui'. <sup>20</sup> Nupa ni' bulu'sedi libf'ili' ca naca queë' Cristo, biti' ca' bulu'sedi libf'ili' gunli' ca tun böñachi caní.

<sup>21</sup> Le naca idútë li biyónili' ca naca queë' Cristo, en le nácali' queë' tu'sédinë' libf'ili' le naca idútë li na' zóalen Jesús. <sup>22</sup> Guli'mná be'e yöl-la' böñachisö queéli' le gúcali' zí'alö, lë na' riniti ni'a que yöl-la' rizé ladxi' queéli' le ruá' dö' le guzxi' ye'e libf'ili'. <sup>23</sup> Ral-la' huöácali' cubi lu icja ládzi'do'oli', en lu bö' naca cázali'. <sup>24</sup> Ral-la' sì'ili' yöl-la' böñachi cubi le nunë' Dios ca naca cazë' Lë', le rulu'i cuini ni'a que le naca dxi'a, en le naca tsahui' runli', en run ga gaca gunli' caní.

<sup>25</sup> Que lë ni na', bítí'rö si' yé'ëli'. Yúgu'tëru' ral-la' güí'ilenru' luzá'aru' didza' le nácatë, tu' dzágaru' yúgu'tëru' idútë le naca cazë' Cristo.

<sup>26</sup> Channö hualélí', bití' ral-la' gunli' dul-la'. Bití' ileli' xidzé. <sup>27</sup> Bití' bi gunli' le güí'i lataj tu' xihui' ucúl-la libí'ili'.

<sup>28</sup> Nu bönni' ribanë' ral-la' usanë' yöl-la' gubán queë', en tsázië' huen dxin para gata' queë' bi unödzje' quégaca nupa ta'yadzaj.

<sup>29</sup> Bití' güí'ili' didza' xihui', pero guli'güí' didza' dxí'a, yugu' le ilácalen nu yönì, en ilún ga gaca dxí'a que nu na'. <sup>30</sup> Bití' usuhu'ini'lì' Dios Bö' Lá'ayi, tu' naca bë' néquili' queë' Dios tu' zóalenë' Dios Bö' Lá'ayi libí'ili', ate' idxín dza údxí usöle' libí'ili' lu dul-la'.

<sup>31</sup> Guli'cúa ladaj libí'ili'  
yöl-la' ruzxë'e, en yöl-la' ridzá'a,  
en yöl-la' rilé, en yöl-la' ridil-la didza',  
en yöl-la' rutsaga yudxi,  
en yúgu'të yöl-la' bití' rilé'e luzá'ali' dxí'a.

<sup>32</sup> Ral-la' gácali' dxí'i ladxi',  
en huéchi' ládxí'li' luzá'ali' tuli' ia'tuli',  
en uniti loli' luzá'ali' tuli' ia'tuli',  
ca na' benë' Dios, buniti lahuë' libí'ili' tu' nácali' tuz len Cristo.

## 5

*Ca ral-la' ilaca nupa nácagaca ca bi'i queë' cazë' Dios*

<sup>1</sup> Tu' nácali' ca bi'i queë' cazë' Dios, ate' nadxf'inë' libí'ili', guli'güí' ladxi' gácali' ca náquië' Lë'. <sup>2</sup> Ca naca yúgu'të le runli':

Ral-la' idxí'ili' luzá'ali' ca na' benë' Cristo.  
Bidxí'inë' rë'u, en budödi cuinë' lu yöl-la' guti uláz queëru'.

Ben cuinë' ca böa' bédxico' rútiru'-ba' lahuë' Dios tu' nøzi dul-la' nabága'ru'.  
Gúquië' ca' ca tu le rilá' zxixi le raza ládxë'ë Dios le rigú'uru' lu bucugu lá'ayi queë'.

<sup>3</sup> Tu' nácali' queë' Dios,  
bití' ca' gunli' le ruá' dö',  
en bití' gunli' le cabí ral-la' gunli',  
en bití' uhuídi'li'.  
Ní'irö cuntu nu gaca bi inné queëli'.

<sup>4</sup> Bití' güí'ili' didza' xihui',  
o didza' canóz, o didza' cá'asö,  
yugu' le cabí ral-la' gunli',  
pero nácarö dxí'a guiéli'-në' Dios: "Xclenu'."

<sup>5</sup> Chinöz quézili' nitúé' bönni' runë' le ruá' dö' bití' ca' tsázië' ga rinná bë'ë Cristo tsözxón len Dios, o nu bönni' runë' le cabí ral-la' gunë', o nu bönni' ruhuídi'në'. Nu na' ruhuidi' naca ca nu reaj ladxi' budó' guiój budó' yaga. <sup>6</sup> Bití' güí'ili' lataj nu si' ye'e libí'ili' len didza' bití' nácatë. Tu' nøzi dul-la' caní Dios gunë' xíguia' nupa bití' túngaca ca rnna xtídzë'ë.

<sup>7</sup> Bití' ca' gunli' tuz böñachi caní.

<sup>8</sup> Zí'atëlö guzóali' ga naca chul-la que dul-la', pero na'a zóali' lu bení', tu' nácali' tuz len Xanru'. Guli'gaca ca böñachi ta'dá lu bení', <sup>9</sup> tu' run bení' na' ga gácaru' dxí'i ladxi', en ga güí'iru' didza' le naca idútë li, en ga gácaru' tsahui'. <sup>10</sup> Guli'güí' ladxi' inózili' le raza ládxë'ë Xanru'. <sup>11</sup> Bití' gútsa'li' nupa tun le ruá' dö', lë na' tunë' ga naca chul-la que dul-la', pero buli'béaj ga liná' yugu' lë na' tunë'. <sup>12</sup> Utu'iru' güí'iru' didza' ca naca le tun böñachi na' bagáchi'sö. <sup>13</sup> Cate' bi ubéajru' ga liná', gaca bë' yúgu'të tsca nácagaca, tu' gun le naca bení' ga gaca bë' yúgu'të. <sup>14</sup> Que lë ni na' nazúaj lu guichi lë na' rnna: Bubán, lí' na' rasiu'.

Guyasa ladaj nupa nátigaca.  
Cristo uzení'ë quiu'.

<sup>15</sup> Buli'yú cuinli' ca runli'. Biti' gácali' nupa biti' ta'yéajni'ini, pero guli'gaca bönachi ta'yéajni'i. <sup>16</sup> Guli'sí' xibé lataj dë queéli' tu' chizóaru' dza biti' raca dxi'a queéru'. <sup>17</sup> Biti' gácali' bönni' biti' bi nőzguequiné'. Guli'gü' ladxi' tséajni'ili' le ré'ënë' Xanru' gunli'.

<sup>18</sup> Biti' súdxili', tu' gun yöl-la' rizudxi ga nítili' tsaz.

Guli'gü'ida' lataj inná bé'enë' Dios Bö' Lá'ayi lib'ili'.

<sup>19</sup> Guli'gü'ilen luzá'ali' didza' tuli' ia'tuli',

ugunli' dxin yugu' le rul-la légaca salmo,

en yugu' le rul-la yöl-la' ba Dios,

en yugu' le rul-la nagu'ë Dios Bö' Lá'ayi icja ládxi'do'oru'.

Idú ládxi'ru' ral-la' gúl-larú' queë',

le cú'uru'-në' Dios yöl-la' ba.

<sup>20</sup> Guli'gún dxin Lë' Xanru' Jesucristo,

en guli'guíëtica'së' Xúziru' Dios: "Xclenu'" ca naca yúgu'të.

*Ca ral-la' gunru' quégaca di'a dza queéru'*

<sup>21</sup> Guli'gún ca rnna xtidza' luzá'ali' tuli' ia'tuli' para caní gunli'-në' Dios zxön.

<sup>22</sup> Libí'ili', yugu' nigula, guli'gún ca rnna xtídza'gaquië' bönni' que queéli', ca na' ral-la' gunli' ca rnna xtídzë'ë Xanru'. <sup>23</sup> Caní ral-la' gunli', tu' rinná bé'enë' bönni' nigula queë' ca na' runë' Cristo, rinná bé'enë' bönachi queë'. Cristo náquië' ca' Nu rusólá bönachi queë', nupa na' dzágagaca le naca cazë' Lë'. <sup>24</sup> Ca na' tun bönachi queë' Cristo ca rnna xtídzë'ë, lësca' caní ral-la' ilunnu nigula ca rnna xtídza'gaquië' bönni' que queégacanu ca naca yúgu'të le raca.

<sup>25</sup> Libí'ili', yugu' bönni', ral-la' idxí'ili'-nu nigula que queéli' ca na' Cristo nadxi'inë' bönachi queë', en budödi cuinë', gútië' uláz quégäquië'. <sup>26</sup> Gútië' Cristo para bubéajë' quez queë' Dios bönachi queë' na', ate' nayárigaca tu lu nisa le naca xtídzë'ë. <sup>27</sup> Gútië' uláz quégäquië' para gaca usudxinë' légaquië' lahuë' Dios, nácagaquië' ca tu lari' lachi, biti' nuá' bösaj le né'aj, en biti' naxú'una, en biti' zoa nitú le run ditaj le, pero runë' ga ilácagaquië' idú dxi'a, cuntu nu gaca bi inné quégäquië'. <sup>28</sup> Ral-la' idxí'ili'-nu nigula que queéli' ca na' nadxi'i cuinli'. Nu bönni' nadxi'inë'-nu nigula queë', nadxi'i cuinë'. <sup>29</sup> Cuntu nu bönni' runi zi' cuinë', pero rugahuë', en run chi'i cuinë', ca runë' ca' Cristo, ca rúnlenë' bönachi queë', <sup>30</sup> nupa dzágagaca idútë le naca cazë'.

¡Rë'u ni dzágaru' le naca cazë' Lë'!

¡Néquiniru' xipélë'ë, en dxita queë'!

<sup>31</sup> Lësca' caní nazúaj lu guichi lá'ayi le rnna: "Que lë ni na' tu bönni' ral-la' ucá'anë' xuz xiné'ë para tsöjsóalenë'-nu nigula queë', ate' irópatë' ulu'huöáquië' tuz." <sup>32</sup> Lë na' nazúaj lu guichi ni rulu'i lahui tu le naca idútë li, ate' neda' réquida' ru'i didza' ca' ca naca queë' Cristo, en quégaca bönachi queë' na'. <sup>33</sup> Lësca' ru'i didza' ca naca queéli'. Yúgu'tëli' libí'ili', bönni', ral-la' idxí'ili'-nu nigula que queéli' ca na' nadxi'i cuinli', ate' yugu' nigula ral-la' ilunnu bal bönni' que queégacanu.

6

<sup>1</sup> Libí'ili', yugu' bí'ido', ral-la' gunli' ca rnna xtídza'gaquië' xuz xiná'ali' para caní gunli' ca rnna xtídzë'ë Xanru'. Ral-la' gunli' le naca tsahui'. <sup>2</sup> Xibá zí'alö na' benë' Dios le naché' tu le guzxí' lu né'ë gunë', naca lë na' rnna: "Ben bal xuz xinó'o, <sup>3</sup> ate' gaca dxi'a quiu', ate' xidzé su' ibanu' yödzölió ni."

<sup>4</sup> Libí'ili', yugu' xuz, biti' gun leli' zxi'inili', pero buli'xón légacabi', en guli'sína' légacabi', en buli'sédi légacabi' ca raza ládxë'ë Xanru'.

<sup>5</sup> Libí'ili', núlöli' nácali' bönni' nadó'ogaca, guli'gún ca rnna xtídza'gaquië' xanli' luyú ni idú ládxi'li', gunli' légaquië' bal lu yöl-la' radxi queéli', en gunli' xichíngäquië' ca ral-la' gunli' xichinë' Cristo. <sup>6</sup> Guli'gún xichíngäquië', calégasö cate' ni' tu'yúë' libí'ili' para

urúajli' dxi'a lógaquië', pero idú ládxí'li' guli'gún xichíngaqüië' ca raza ládxë'ë Dios, ca na' ral-la' gunli' xichinë' Cristo. <sup>7</sup> Idú ládxí'li' guli'gún xichíngaqüië', ate' caní gaca, gunli' xichinë' Xanru', en calégasö xichíngaca böñachi. <sup>8</sup> Nöz quézili' ca guné' Xanru'. Ubi'ë que queéru' tsca naca le dxi'a runru' sal-la' nadzanru', o sal-la' nácaru' bönni' nadó'ogaquië'.

<sup>9</sup> Libí'ili', nacuá' queéli' bönni' nadó'ogaca, guli'gún dxi'a caní quégaca huen dxin queéli' na', en biti' uzéli' ba nadx légaquië'. Guli'tsöjné ca naca queéli', yú'uli' lu në'ë Xanru' zoë' yehua' yubá la' ca nácatë quégaca queéli', ate' Lë' biti' rutsé'ë ca runé' que que böñachi.

*Dios runnë' queéru' le tun chi'i rë'u*

<sup>10</sup> Na'a, böchi' luzá'ado', guli'gaca tsutsu tu' nácali' tuz len Xanru', en zóalen libí'ili' yöl-la' huáca zxön queé'. <sup>11</sup> Guli'gún chi'i cuinli', ugunli' dxin yugu' le runnë' Dios queéru', le tun chi'i rë'u, para gaca sóali' tsutsu cate' gué'eni si' bë' tu' xihui' libí'ili'. <sup>12</sup> Biti' ridíl-lalenru' böñachi néquigueequini bëla', en dxita, pero ridíl-lalenru' yöl-la' unná bë' quégaca bö' xihui' ta'dá lu bö'ös, en dzágagaca nupa ta'nná bë', en nupa nadéli'gaca yöl-la' unná bë', en nupa dë lu ná'agaca, nupa nacuá' yödzölió ni ga naca chul-la que dul-la'.

<sup>13</sup> Que lë ni na':

Guli'sí' yúgu'të le runnë' queéru' Dios le tun chi'i rë'u,  
para cate' idxín queéru' dza ni' ilaca le nácatë gaca xihui',  
gaca guá' ilenli',  
en cate' údxí gunli' caní, ugá'anali' tsutsu.

<sup>14</sup> Guli'sóa tsutsu.

Guli'sí' le naca idútë li,  
le gaca queéli' ca tu guídi guga' lë'ëli'.  
Guli'gaca tsahui' tu' gun chi'i libí'ili' le naca tsahui'  
ca run tu lari' yödx run chi'i luchu'ë bönni' rejë' gudil-la.  
<sup>15</sup> Guli'sóa sina' para gunli' libán que didza' dxi'a  
le ribequi dxi icja ládxí'do'oru' lahuë' Dios,  
ca na' ruzóa cuinë' sina',  
en ridé'ë xiráchuë' tu bönni' rejë' gudil-la.

<sup>16</sup> Le naca lo, yöl-la' réajlé' queéli' Cristo  
gaca queéli' ca tu le naca tsutsu uzéli' loli',  
para cabí gál-la' yugu' le usán tu' xihui' libí'ili',  
le nácatë gaca ca yaga túchi'do' zoa guí' láhuilöguequi.

<sup>17</sup> Yöl-la' rusólá gaca queéli' ca tu lu'u guíé le gun chi'i ícjali'.  
Xtídzë'ë Dios gaca queéli' ca tu guíé tuchi'  
le runnë' Dios Bö' Lá'ayi queéru',  
para util-lalenru' le naca xihui'.

<sup>18</sup> Guli'gún yúgu'të lë ni,  
en buli'lidzë' Dios inábili'-në' gácalenë' libí'ili'.  
Buli'lídzatica'së' Dios zóalenë' Dios Bö' Lá'ayi libí'ili'.

Para gunli' caní ral-la' usubán ládxí'li' en cabí huóaj ládxí'li',  
inábili'-në' Dios gácalenë' nupa néquiguequi queé'.

<sup>19</sup> Buli'lidzë' Dios, inábili'-në' gácalenë' ca' neda', en gunnë' quia' didza' cate' ral-la' gu'a didza', en gunë' ga gaca' rugu ladxi' cate' guna' libán para uzéajni'ida' böñachi ca naca le bigachi' que didza' dxi'a. <sup>20</sup> Dios budödë' lu na'a didza' dxi'a na' para guna' libán que, ate' tu' bena' caní yu'a lidxi guíé ni. Buli'lidzë' Dios channö, inábili'-në' gunë' ga gaca' rugu ladxi' para guna' libán que didza' dxi'a ca ral-la' guna'.

<sup>21</sup> Tíquico, bóchi'ru' na' nadxi'iru'-në', en runé' xichinë' Xanru' idú ládxë'ë, quíxjöi'inë' libi'ili' idú ca raca quia', en ca runa' neda' ni. <sup>22</sup> Que lë ni na', isõl-la'a-në' queéli', ate' ulu'iinë' libi'ili' ca raca queétu', ate' caní utipë' ládxil'i'.

<sup>23</sup> Rinábida'-në' Xúziru' Dios, enca' Xanru' Jesucristo gunë' ga soa dxí icja ládxí'do'oli', en gata' queéli' yöl-la' nadxi'i le dzaga yöl-la' réajlé' queéli' Cristo, yúgu'téli' na' néquili' queë'. <sup>24</sup> Le ruzá' ládxë'ë Dios queéru' gaca queéli', yúgu'téli' na' nadxi'ili'-në' Xanru' Jesucristo, naca idú yöl-la' nadxi'i queéli' Lë'. ¡Ca' gaca!

## DIDZA' GUSÖL-LË'Ë PABLO YÖDZÖ FILIPOS

### *Pablo rugapë' Dios bönachi queë' Cristo nacuá' Filipos*

<sup>1</sup> Neda', Pablo, enca' bi'i Timoteo, nactu' huen dxin queë' Jesucristo. Rugapa' Dios libi'ili', réajlë'eli' Cristo, en libi'ili', dë lu ná'ali' xichinë' Cristo, en libi'ili', run chí'ili' bönachi queë' Cristo. Zóali' Filipos, en néquili' queë' Dios, en nácali' tuz len Jesucristo. <sup>2</sup> Rinábida'-në' Xúziru' Dios, enca' Xanru' Jesucristo gunnë' queéli' le ruzá' ládxë'ë queéru', en gunë' ga soa dxi icja ládxí'do'oli'.

### *Pablo rinábinë' Dios bi gunë' quégaca bönachi ta'yéajlé' Cristo*

<sup>3</sup> Rea'-në' Dios: "Xclenu'", cate' rizá' ládex'a' queéli'. <sup>4</sup> Cate' rulidza'-në' Dios, en rinábida'-në' gácalenë' libi'ili', rudzeja ládex'a' <sup>5</sup> tu' röjneda' ca bénlenli' neda' tsözxón dxin que didza' dxi'a. Gusí loli' runli' dxin na' dza ni' si' biyónili', en runli' le ga ridxintë na'a dza. <sup>6</sup> Dios gusí lahué' runé' tu le naca dxi'a lu icja ládxí'do'oli'. Ruzxöni ládex'a' Lë' gúntica'së' caní ga idxintë dza huödë' Jesucristo. <sup>7</sup> Ca na' rizá' ládex'a' queéli' naca ca ral-la' guna' tu' nadxi'ide'eda' libi'ili'. Yúgu'téli' ruzí'ili' xibé tsözxón len neda' le ruzá' ládxë'ë Dios queéru', tsanni ni yu'a lidxi guíë, en lësca' caní benli' cate' ni' bë'a didza', cate' na' bena' libán que didza' dxi'a le bena' ga bidxín queéli' tsaz. <sup>8</sup> Nözinë' Dios ca nadxi'ide'eda' libi'ili'. Naca ca na' nadxi'ide'ené' Lë cazë' Jesucristo rë'u. <sup>9</sup> Rinábida'-në' Dios gunë' ga idxí'iröli' luzá'ali', en gáta'da' queéli' yöl-la' rácada', en yöl-la' réajni'i idú <sup>10</sup> para gaca cöli' le nácatérö dxi'a. Channö gaca caní queéli', gácali' idú dxi'a, ate' cuntu nu gaca bi inné' queéli' dza ni' huödë' Cristo. <sup>11</sup> Le nácali' naca bë' le naca dxi'a runé' Cristo lu icja ládxí'do'oli' para ilá' lahui yöl-la' zxön queë' Dios, en gaca queë' yöl-la' ba.

### *Zóaru' nabanru' para gácaru' ca náquië' Cristo*

<sup>12</sup> Böchi' luzá'ado', ré'ënda' inózili' lë ni: Yúgu'té le guca quia' gulácalen neda' para guzxéqui'röda' bena' libán que didza' dxi'a. <sup>13</sup> Caní guca, yúgu'té ni'a ná'agaquië' bönni' yúlahui', en ia'zíca'rë' bönni' ni nözguequinë' yu'a lidxi guíë ni tu' runa' xichinë' Cristo. <sup>14</sup> Tu' yu'a neda' lidxi guíë ni ben ga látu'biqui' yúgu'té böchi'ru' nácagacarë' rugu ladxi', ate' tu'zxöni ládxí'gaquië' Xanru', en bíti'rö tádxinë' tuné' libán que xtídzë'ë Dios.

<sup>15</sup> Le nácatë bal-lë' tuné' libán queë' Cristo tu' tu'zxé'enë' neda', en ta'dil-lë', pero ia'bal-lë' tuné' libán queë' idú ládxí'gaquië'. <sup>16</sup> Yugu' bönni' tu'zxé'enë' na' tuné' libán queë' Cristo lu yöl-la' run ba zxön cuíngaqüië', en caléga idú ládxí'gaquië'. Té'ënnë' ulu'saca' zi'ë neda' tsanni ni yu'a lidxi guíë. <sup>17</sup> Yugu' bönni' idú ládxí'gaquië' na', lu yöl-la' nadxi'i quégäquië' tuné' libán queë', tu' nözguequinë' Dios caz budödë' lu na'a dxin runa', runa' libán que didza' dxi'a. <sup>18</sup> Biti' run lë na' ga rö'a böninga. Rudzéjada' tu' raca libán queë' Cristo nácati'tés, sal-la' tuné' libán idú ládxí'gaquië' o biti' tuné' le caní.

Na'a, rudzéjaröda' <sup>19</sup> tu' chinózida' ulá' lu le raca quia', yu'a lidxi guíë ni, tu' rulídzali'-në' Dios, en tu' rácalenë' Dios Bö' Lá'ayi neda'. Náquië' Bö' risö'l-lë'ë Jesucristo queéru'. <sup>20</sup> Caní ré'ënda', en ruzxöni ládex'a-në' Dios, gunë' ga biti' utu'ida', en gunë' ga gaca gu'a didza' lu yöl-la' rugu ladxi', ate' lu na'a neda' gácatica'sö yöl-la' ba queë' Cristo na'a dza, en yugu' dza zá'gaca, sal-la' gun bayudxi gátitea', o soa' ibana'. <sup>21</sup> Ca runi neda', channö zoa' nabana', naca para gaca' ca náquië' Cristo, en channö gátia', naca tu le uzí'ira' xibé. <sup>22</sup> Channö huáca guna' dxin le gácalen didza' dxi'a queë' Cristo channö sóasa' ibana', biti' nözda' bízxilö ral-la' cöa'. <sup>23</sup> Naca böninga cöa'. Ré'ënda' gátitea' para tsöjsóalentea'-në' Cristo, tu' gácatérö dxi'a quia', <sup>24</sup> pero runrö bayudxi sóasa' ibana' para séqui'da' gácalena' libi'ili'. <sup>25</sup> Tu' chinózida' naca caní, nözda' ca' ugá'analena' libi'ili' para gácalena' libi'ili' para gácarö idú ca réajlë'eli' Cristo, ate' udzéjaröli' tu' réajlë'eli'

Lë'. <sup>26</sup> Caní naca, udusóalena' libí'ili' leyúbölö, le gun ga tsaz ládzi'li'-në' Jesucristo ni'a que le gunë', gácalenë' neda'.

<sup>27</sup> Guli'gü'sö ladxi' gácali' ca sa'yéaj didza' dxi'a queë' Cristo. Caní gaca, channö uduyúa' libí'ili' o channö soa' zi'tu', huayónida' nácali' tsutsu, en nácali' tuz, runli' tsözxón dxin que le réajlé'ëru' le za' queëru' ni'a que didza' dxi'a. <sup>28</sup> Biti' gü'ili' nupa biti' ta'lé'e libí'ili' dxi'a lataj ilún gadxi libí'ili'. Lë ni ulu'i légaquië' ila'nítie', pero uláli' libí'ili', le gaca bë' rácalenë' Dios caz libí'ili'. <sup>29</sup> Dios ru'ë libí'ili' lataj gunli' xichinë' Cristo, calégasö ca réajlé'ëli' Lë', pero lësca' ca rigu'i rizáca'li' cate' runli' xichinë'. <sup>30</sup> Na'a, gaca gunli' neda' tsözxón gü'ili' ládzi'ru' gunru' libán que didza' dxi'a. Bilé'e quézili' ca gudi'i guzxáca'a cate' bena' caní zí'alö, ate' riyónili' ca rigu'i rizáca'a ca' na'a.

## 2

*Gúquië' Cristo nöxaj ladxi', ate' bidéli' në' yöl-la' zxön*

<sup>1</sup> Cristo runë' ga rutipa ládzi'li', en lu yöl-la' nadxi'i queë' ruhuéchi' ládxë'ë libí'ili', en runë' ga nácali' tuz len Dios Bö' Lá'ayi, en ga nadxi'ili' luzá'ali', en ga ruhuéchi' ládzi'li' luzá'ali' tulí' ia'tuli'.

<sup>2</sup> Na'a guli'gún ga udzéjarö ládxa'a. Para gunli' caní, ral-la' gácali' tuz len luzá'ali', en gaca lébisö ca nadxi'ili' luzá'ali' tulí' ia'tuli'. Lësca' caní ral-la' gácali' tuz lu bö' naca cázali', en ca rizá' ládzi'li'. <sup>3</sup> Ca naca le runli', biti' bi ral-la' gunli' lu yöl-la' rudul-li' queëli', o para gun ba zxön cuinli', pero dxí'ado' ral-la' gunli' yúgu'të, en cabí guéquili' nadéli'röli' libí'ili' ca luzá'ali'. <sup>4</sup> Guli'gü' ladxi' gaca dxi'a ca' que luzá'ali', en caléga queézili'.

<sup>5</sup> Ral-la' gácali' nöxaj ladxi' ca na' gúquië' Jesucristo nöxaj ladxi'. <sup>6</sup> Lë' naca cazë' lébisö ca náquië' Dios caz, pero biti' gúquinë' ral-la' gunë' bayudxi ugá'anë' lébisö ca na' náquië' Dios. <sup>7</sup> Bucá'ana cazë' yúgu'të le napë', en ben cuinli' ca tu bönni' nadó'o. Guljë' ca talaj böñachi, en gúquië' idú böñachi. <sup>8</sup> Cate' ni' náquië' bönni', gúquië' nöxaj ladxi', en benë' ca rnna xtídzë'ë Dios, en gútië'. Gudé'ë lë'e yaga cruz ca na' raca queë' nu bönni' nabágue'ë dul-la'. <sup>9</sup> Que lë ni na' Dios buchisë' Lë', en benë' ga náquië' lo ni' yehua' yubá, en benë' ga lë' tu le nácatérö lo ca yúgu'të lágaca böñachi. <sup>10</sup> Caní benë' Dios para cate' ila'yöni ca na' lë' Jesús, ulu'zechu zxibigaca yúgu'të nupa nacuá' yehua' yubá, en lu yödzölió, en lu lataj chul-la. <sup>11</sup> Yúgu'të' ila'guíxjö'ë yálajdo' Jesucristo náquië' Xanru' para gaca yöl-la' ba queë' Xúziru' Dios.

*Ral-la' gácaru' ca tu le ta'gú'u bení' yödzölió ni*

<sup>12</sup> Que lë ni na', böchi' luzá'ado', ca na' benli' ca rnna xtídz'a'a cate' ni' zóalena' libí'ili', runrö bayudxi gunli' ca rnna xtídz'a'a na'a, tsanni ni zoa' zi'tu' ga zóali'. Guli'gún xichinë' Xanru' ga idxintë dza údxí usölé' libí'ili'. Guli'gún caní lu yöl-la' radxi queëli' Lë', en lu yöl-la' rizxizi. <sup>13</sup> Lë cazë' Dios runë' dxin lu icja ládzi'do'oli'. Runë' ga rë'ënili' gunli' le raza ládxë'ë Lë', en runë' ca' ga séqui'li' gunli' lë na'.

<sup>14</sup> Guli'gún yúgu'të le ral-la' gunli', en biti' bi innëli' que, en biti' til-la dídza'li'.

<sup>15</sup> Caní ral-la' gunli', para cabí gaca nu bi innë queëli', pero caní gácali' ca zxí'ini cazë' Dios, nácali' idú dxi'a yödzölió ga ni zóali' ladaj böñachi biti' nácagaca tsahui', en nucá'anagaca Dios. Libí'ili' rigú'uli' bení' lágagaquië' ca na' ta'gú'u bení' böläj lúzxiba cate' ni naca chul-la, <sup>16</sup> cate' ruí'ili' lógaquië' didza' ibániguequinë'. Channö caní gunli', huáca udzéjade'eda' ni'a que le naca cázali' dza huödë' Cristo, tu' inözda' biti' guca nítisö guzóa böñadxi gátia', en caléga nítisö bena' dxin. <sup>17</sup> Yöl-la' réajlé' queëli' Cristo naca tu le raza ládxë'ë Dios. Sal-la' gun bayudxi gátia' para gaca idú yöl-la' réajlé' queëli' Lë', udzéjada', en uzí'lena' xibé tsözxón yúgu'teli'. <sup>18</sup> Lësca' caní ral-la' udzéjali' libí'ili', en uzí'lenli' tsözxón neda' xibé.

*Ca tunbi' bi'i Timoteo, en bi'i Epafroditó*

<sup>19</sup> Channö caní ré'ënë' Xanru' Jesúz, runa' löza isól-la'tea'-bi' bi'i Timoteo ga zóali', ate' ní'irö udzéjada' cate' huódabi' ududíxjö'i' ibi' neda' cátexe raca queéli'. <sup>20</sup> Túzibi' lëbi' rizá' ládxib' ca na' rizá' ládx'a' neda', en ruí'ida' ládxib' lib'ili'. <sup>21</sup> Yúgu'té bönni' ia'zíca'rö, le naca quégacasë' tu'i ládxib'gaquië'. Biti' tu'i ládxib'gaquië' xichinë' Cristo. <sup>22</sup> Nöz quézili' ca benbi' bi'i Timoteo, ca na' burúajbi' dxi'a. Bénlenbi' neda' tsözxön dxin que didza' dxi'a, ate' nácabi' quia' ca tubi' bi'i bönni' rúnlenbi'-në' tsözxön xúzibi' dxin. <sup>23</sup> Isól-la'a-bi' bi'i Timoteo ga zóali' cate' inözda' nacxi gaca quia' ni <sup>24</sup> sal-la' ruzxöni ládx'a-a-në' Xanru' gunë' ga uduyútea' lib'ili'.

<sup>25</sup> Lësca' réquida' run bayudxi isól-la'a-bi' bi'i bôchi'ru' Epafroditó ga zóali'. Bi'i ni bénlenbi' neda' tsözxön dxin queébi' Cristo, ate' gudfl-lalentu' tu' xihui'. Lib'ili' cázali' gusól-la'lí'-bi' ga zoa' para gácalenbi' neda'. <sup>26</sup> Lë cázabi' ré'ënibi' uduyúbi' lib'ili', en ruí'ida' ládxib' lib'ili' tu' biyónili' ben bayá' queébi'. <sup>27</sup> Le nácatë gü'ibí', en guqui gátibi', pero buéchi' ládxé'ë-bi' Dios, en calégasö lëbi', pero buéchi' ládxé'ë ca' neda', para cabí isébirö ládx'a' ca na' risébi ládx'a' na'a. <sup>28</sup> Que lë ni na', gú'uniröda' isól-la'a-bi' queébi' para gaca udzéjali' leyúbölö cate' ulé'eli'-bi', en bíti'rö isébi ládx'a' neda'. <sup>29</sup> Guli'sí' lu ná'ali' lëbi' lu yöl-la' rudzeja queébi', tu' nácabi' bi'i bôchi'ru' réajlë'ëbi' Cristo. Guli'gún bal yúgu'té bönachi nácagaca ca nácabi' lëbi', <sup>30</sup> tu' guzóa bönadxi queébi' gátibi' tu' benbi' xichinë' Cristo, en tu' gúcalenbi' neda' uláz queébi'.

### 3

*Le naca idú tsahui'*

<sup>1</sup> Na'a, bôchi' luzá'ado', buli'dzeja tu' nácali' tuz len Xanru'! Biti' rupizzaj neda' uzúaja' queébi' leyúbölö lë na' buzúaja' queébi' zí'alö, tu' gácalen lë ni lib'ili'. <sup>2</sup> Guli'gún chí'i cuinli' lógaca nupa ni' tuá' dö'. Nácagaca ca yugu' bô'cu' sínia', nupa na' tun bayudxi irugu lu xipéla'gaquië' bönni' le naca bë' nazí' lu ná'gaquië' xtídzé'ë Dios. <sup>3</sup> Rë'u nadéli'ru' lë na' naca idútë li, le naca bë' nazí' lu ná'aru' le runné' queéru' Dios. Tu' réajlë'ëru' Dios, zóalenë' Dios Bö' Lá'ayi rë'u, ate' rudzéjaro' tu' nácaru' tuz len Jesucristo. Biti' ca' ruzxöni ládxib'ru' tu le rumru' rácasö queéru'. <sup>4</sup> La'tu' ruzxöni ládxib'ru' lë ni, lësca' neda' chinadéli'da' bi uzxöni ládx'a'. Channö zoë' nu bönni' réquinë' ulé' tu' nacuá' le nunë', neda' nadéli'röda' ca bönni' na':

<sup>5</sup> Gurugu lu xipéla'a lë na' naca bë' cate' ni' gúquida' xunu' dza.

Gulja' ladaj di'a dza quégaca bönachi Israel.

Nababa' zxí'ini xi'söë' Benjamín.

Xuz xiná'a nácagaquië' idú bönachi hebreo.

Guca' bönni' yudo' fariseo ca na' bena' ca rinná bë' xibá queébi' Dios.

<sup>6</sup> Bë'da' ládx'a' xibá na' ga bidxitë gudxía ládx'a' bönachi queébi' Cristo.

Tsca gaca gáquië' tsahui' tu bönni' tu' runë' ca rinná bë' xibá na', cuntu nu bi guca inné quia'.

<sup>7</sup> Na'a, yúgu'té lë na' bena' zxön zí'alö, nuzáo' tsölä'alö tu' néquida' queébi' Cristo.

<sup>8</sup> Calégasö yugu' lë na', pero nuzáo' ca' tsölä'alö yúgu'té le dë, para gaca gúnbe'eda'-në' Xanru' Jesucristo, le nácatérö lesaca' ca yúgu'té lë na'. Para gúnbe'eda' Lë' gurú'una' ní'ilö yúgu'té, en réquida' naca ca bëbu, para uzi'a xibé' Cristo, <sup>9</sup> en para gaca' tuz len Lë'. Nuhuöáca' tsahui', caléga tu' runa' ca rinná bë' xibá na', pero Dios caz bunë' neda' tsahui' tu' réajlë'ëa Cristo, ca na' ruúnë' tsahui' yúgu'té nupa ta'yéajlë' Lë'. <sup>10</sup> Ré'ënisdida' gúnbe'eda'-në' Cristo, en sóalen yöl-la' huáca queébi' Dios neda', lë na' busubán Cristo lu yöl-la' guti, ate' guna' Lë' tsözxön, qui'i saca'a ca na' gudi'i guzxáquë'ë Lë', en soa' sina' gátia' ca gútië' Lë', <sup>11</sup> tu' runa' löza Dios, usubanë' ca' neda' lu yöl-la' guti.

*Le runru' para idxinru' xilátjaru'*

<sup>12</sup> Biti' rnnia' chinadéli'da' yúgu'të lë ni gunnë' quia', en biti' réquida' chinaca' idú tsahui'. Na'a, runa' bayudxi idéli'da' yúgu'të lë na', tu' chibidéli'në' Jesucristo neda'.

<sup>13</sup> Böchi' luzá'ado', biti' ca' nadéli'da' yugu' lë ni, pero tuz le runa' bayudxi. Ruzál-la ládxa'a le chibidéli'da', ate' runa' bayudxi idéli'da' le za'. <sup>14</sup> Runa' ca rune' tu bönni' rixítidë' para idxinë' xilatjë' para idéli'në' tu le uzi'ë xibé. Caní runa' para idéli'da' lë na' bulidzë' Dios rë'u para gata' queéru' ni' yehua' yubá tu' nácaru' tuz len Jesucristo.

<sup>15</sup> Caní ral-la' gunru' yúgu'tëru' rë'u, naca idú ca réajlë'ëru' Cristo. Channö réquili' bál-lali' ral-la' gunli' tu le yúbölö, rinábida'-në' Dios uzéajni'inë' lib'ili'. <sup>16</sup> Na'a, ca naca lë na' bidéli'ru', ral-la' gúntica'siru' caní.

<sup>17</sup> Böchi' luzá'ado', guli'gún ca na' runa' neda'. Chibulu'itu' lib'ili' ca ral-la' gunli'. Buli'yú ca tun nupa na' tun ca na' bentu' netu'. <sup>18</sup> Chigudxi caza' lib'ili' zián luzuí, ate' rea' lib'ili' leyúbölö len yöl-la' ribödxi quia', rnnia': Le tunë' zián bönni' run ga nácagaquië' ca nupa biti' ta'lé'e Cristo dxi'a, tu' tu'zóë' tsölä'alo le ben cazë' Lë' lë'e yaga cruz. <sup>19</sup> Yugu' bönni' tunë' caní, tsójáquië' lu gu' gacula, tu' naca le ta'zësö ládxi'gaquië' dios quégaquië', ate' tun ba zxön cuíngäquië' ni'a que lë na' ral-la' gun ga ulu'tui'inë'. Tui'ládxi'së le dë yödzöli ni, <sup>20</sup> pero rë'u ni ru'i ládxi'ru' le dë yehua' yubá ga nabábaru', en ribózaru' dza huödë' Xanru' Jesucristo, Nu rusólá rë'u, urúajë' yehua' yubá na'. <sup>21</sup> Lë' utsë'ë idútë le naca cázaru', le riniti caz, en gunë' ga huöáca ca naca idútë le naca cazë' Lë', le sóatica'sö. Caní gunë' len yöl-la' huáca zxön queë' le ugunë' dxin para inná bé'enë' yúgu'të.

## 4

*Ral-la' udzéjalentica'siru'-në' Xanru'*

<sup>1</sup> Que lë ni na', böchi' luzá'ado', guli'gaca tsutsu ca réajlë'ëli'-në' Xanru'. Nadxf'ide'eda' lib'ili', en ré'ënda' uduyúa' lib'ili'. Runli' ga rudzéjada', en nácali' ca tu le ruzi'a xibé.

<sup>2</sup> Lib'ili', Evodia, en Síntique, ráta'yua' lolí' gácali' tuz ca ral-la' ilaca nupa néquiguequi queë' Xanru'. <sup>3</sup> Na'a, böcha'a idú, ré'ënda' gácalenu' irópanu ni, tu' gulúnlenヌ neda' dxin, cate' bentu' libán que didza' dxi'a. Lësca' bulu'dzáguië' Clemente, en ia'zíca'rë' luzá'a na' netu'. Chinazúajgaca lágaquië' yehua' yubá ga na' nazúajgaca lágaca nupa chinadéli'gaca yöl-la' na'bán idú.

<sup>4</sup> ¡Buli'dzéjalentica'sö-në' Xanru'!

Leyúbölö, rnnia': ¡Buli'dzeja!

<sup>5</sup> ¡Guli'gaca dxi'i ladxi' len yúgu'të böñachi!

¡Chizóa huödë' Xanru'!

<sup>6</sup> Biti' ubi ugu'ili', pero guli'nabi-në' Dios le riquínili', en guli'guíë': "Xclenu'" ca naca yúgu'të lë na' rinábali'. <sup>7</sup> Dios gunë' ga gaca queéli' le cuéqui dxi icja ládxi'do'oli', lë na' nadödirö bë' ca le gaca ila'yéajni'i böñachi. Lë na' ribequi dxi icja ládxi'do'oru' gun chi'i icja ládxi'do'oli', en le rizá' ládxi'li' tu' nácali' tuz len Jesucristo.

*Ral-la' sa' ládxi'ru' le nácagaca dxi'a*

<sup>8</sup> Ga ruúdxitë, böchi' luzá'ado', guli'sá' ládxi'li':

Yúgu'të le naca dxi'a, en le naca bica' ba,  
en le naca idútë li, en le naca idú,  
en le naca tsahui', en le naca ba'a,  
en le naca lachi, en le ral-la' gunru' bal.

<sup>9</sup> Guli'gún ca na' busédida' lib'ili', lë na' guzxi' lu ná'ali' tsca na' bë'lena' lib'ili' didza', en tsca na' bëna' ga ni' zóali'. Dios, Nu runna queéru' le ribequi dxi icja ládxi'do'oru' sóalenë' lib'ili'.

*Le tsahui' gulunë' yugu' bönni' Filípos queë' Pablo*

<sup>10</sup> Rudzéjalenda'-në' Xanru' tu' ru'i ládxí'li' neda' leyúbölö. Biti' rnnía' gul-la ládxí'li' neda', pero biti' guta' queéli' lataj gácalenli' neda' zí'alö. <sup>11</sup> Lësca' caní, biti' rnnía' caní tu' zoa bi riyadzaj quia', tu' nazëda' tsaza ládxa'a le dësö quia'. <sup>12</sup> Chigudöda' lu yöl-la' yechi', en lu yöl-la' tsahui'. Nazëda' soa' nácati'tës, sal-la' nóljada' o nabila riduna', en sal-la' dëda' quia' o zoa bi riyadzaj quia'. <sup>13</sup> Yúgu'të huazéqui'da' tu' rutipë' Cristo ládxa'a. <sup>14</sup> Benli' dxi'a cate' ni' gúcalenli' neda', en butípali' ládxa'a cate' gudí'i guzxáca'a.

<sup>15</sup> Libí'ili', bönni' Filipos, nöz quézili' ca guca quia' dza ni' cate' buzá'a luyú Macedonia, para yøjena' libán que didza' dxi'a. Tsca nacuá' bönachi queë' Cristo, cúnturö nu gúcalen neda', pero libí'isili' gúcalenli' neda'. Gusől-la'li' quia' bi bunődzjali', tu' guzxi' lu ná'alí' libán bena' neda'. <sup>16</sup> Tsanni ni' guzóa' yödzö Tesalónica, tu chopa luzuí gusől-la'li' quia' le bunődzjali' cate' ni' biyadzaj quia'. <sup>17</sup> Biti' ru'i ládxa'a bi si'a, pero ré'ënda' gáta'rö queéli' le uzí'ili' xibé yehua' yubá. <sup>18</sup> Rea' libí'ili': Chiguzxi'a yúgu'të lë na' gusől-la'li' quia', ate' gudőditë bë' tsca le biyádzjada'. Ben ga naca caní lë na' gusől-la'li' lu ná'abi' bi'i Epafrodit. Lë na' bunődzjali' naca ca tu le rilá' zxixi le ridxintë lahuë' Dios, en ca tu le rigú'uru' lahuë' Dios le raza ládxë'ë. <sup>19</sup> Dios gunné' queéli' yúgu'të le riyadzaj queéli', tsca naca yöl-la' tsahui' rö'ö yehua' yubá, tu' nácali' tuz len Jesucristo. <sup>20</sup> ¡Gácatica'sö queë' Xúziru' Dios yöl-la' ba! ¡Ca' gaca!

*Yugu' bönachi queë' Cristo tu'gapa Dios luzé'eguequi*

<sup>21</sup> Uláz quia' neda', guli'gapa Dios nupa ni' néquiguequi queë' Dios tu' nácagaca tuz len Jesucristo. Tu'gapë' Dios libí'ili' böchi' luzá'aru' núngaquië' neda' tsözxón ni. <sup>22</sup> Lësca' yúgu'të nupa ni néquiguequi queë' Dios, tu'gapa Dios libí'ili', en lësca' caní, yugu' bönni' huen dxin nacu'ë lidxë' bönni' rinná bë'ë idú luyú Roma tu'gapë' Dios libí'ili'.

<sup>23</sup> Rinábida'-në' Xanru' Jesucristo uzá' ládxë'ë queéli' yúgu'teli'. ¡Ca' gaca!

## DIDZA' GUSÖL-LË'Ë PABLO YÖDZÖ COLOSAS

*Pablo rugapë' Dios böñachi queë' Cristo nacu'ë Colosas*

<sup>1</sup> Neda', Pablo, naca' gubáz queë' Jesucristo tu' ré'ené' Dios caní, ate' dzágabi' bi'i bóchi'ru' Timoteo neda'. <sup>2</sup> Rugapa' Dios lib'ili', zóali' Colosas. Nácali' bóchi'tu' réajlë'ëli' Cristo, en nácali' quez queë' Dios. Rinábida'-në' Xúziru' Dios uzá' ládxë'ë queéli', en gunë' ga soa dxi icja ládxí'do'oli'.

*Pablo rulidzë' Dios, en ré' Lë': "Xclenu"*

<sup>3</sup> Rética'stu'-në' Dios, Xuzë' Xanru' Jesucristo: "Xclenu'" cate' rulidztu'-në' Dios, en rinábitu'-në' bi gunë' queéli' <sup>4</sup> tu' biyóntu' didza' ca réajlë'ëli' Jesucristo, en ca nadxí'ili' yúgu'té nupa néquiguequi quez queë' Dios. <sup>5</sup> Caní runli' tu' runli' löza le nuzoë' Xanru' queéli' ni' yehua' yubá, lë na' biyónili' que cate' bë'lentu' lib'ili' didza', le naca löza sí'ili' ni'a que didza' dxi'a. <sup>6</sup> Didza' dxi'a na' bidxín queéli' ca ridxín ca' idútë yödzölió. Run dxin, en raca libán que, idútë yödzölió, la' tuz ca raca ga zóali', dza ni'te ga ridxitnë na'a dza, cate' ni' biyónili', en bénbë'ëli' idútë le ruzá' ládxë'ë queéru' Dios. <sup>7</sup> Epafras, bönni' nadxí'ru'-në', busédinë' lib'ili' lë ni. Lë' rúnlenë' netu' tsözxón dxin, en rácalenë' lib'ili'. Náquië' huen dxin idú queë' Cristo. <sup>8</sup> Bönni' ni gudíxjöi'inë' netu' ca nadxí'ili' luzá'ali', ate' runë' Dios Bö' Lá'ayi ga gaca gunli' caní.

<sup>9</sup> Que lë ni na' netu' ca', dza ni'te ga ridxitnë na'a dza, tu' réquibe'etu' lë ni, biti' ca' rizóa dxitu' rulidztu'-në' Dios, en rinábitu'-në' gácalenë' lib'ili', en gunë' ga gúnbë'ëli' idú le ré'ení quézinë' Lë', en gunnë' queéli' yúgu'té yöl-la' rácada', en yöl-la' réajni'i le rigu'ë Dios Bö' Lá'ayi ré'u. <sup>10</sup> Caní rinábitu'-në' para gaca gunli' ca ral-la' ilún nupa néquiguequi queë' Xanru', gunli' yúgu'té le raza ládxë'ë Lë', en séqui'li' gunli' yúgu'té le naca dxi'a, en gácarö idú ca númerë'ëli'-në' Dios. <sup>11</sup> Rinábitu'-në' utipë' ládxí'li', en gunnë' queéli' yöl-la' huáca idú queë', para gaca guá' ilenli' yúgu'té, en cözali' zxön ladxi', en udzeja ládxí'li'. <sup>12</sup> Lu yöl-la' rudzeja queéli' guli'guíë' Dios Xuz: "Xclenu'", tu' budödë' lu ná'aru' gata' queéru' lataj lu bení' queë', en gunru' tsözxón nupa néquiguequi quez queë'. <sup>13</sup> Dios Xuz na' busölé' ré'u lu na' nu rinná bë' lataj chul-la, en budödë' ré'u ga na' rinná bë'ë Zxi'ini cazë', Nu nadxí' inë'. <sup>14</sup> Zxi' inë' na' böá'uë' ré'u, tu' gútië' uláz queéru', ate' buniti lahuë' ré'u ca naca dul-la' gubága'ru'.

*Nuhöácaru' tuz len Dios tu' gútië' Cristo uláz queéru'*

<sup>15</sup> Cristo náquië' tuz ca náquië' Dios caz, Nu biti' gaca ilé'eru'. Zoa cazë' Lë' zí'atélö ca yúgu'té le benë' Dios. <sup>16</sup> Lu në'ë Cristo benë' Dios yúgu'té le dë, le nacuá' lúzxiba, en le nacuá' luyú, yugu' le rilé'eru', en yugu' le cabí gaca ilé'eru', lë na' nácacaca lataj lo, en yugu' yöl-la' unná bë', en le nápagaca yöl-la' zxön, en yugu' yöl-la' huáca que yehua' yubá, en que luyú ni. Yúgu'té benë' Dios lu në'ë Cristo para uzi'ë xibé Lë'. <sup>17</sup> Cristo zoa cazë' zí'alö ca yúgu'té le dë, ate' yúgu'té nacuá'tica'sö ni'a queë' Lë'. <sup>18</sup> Cristo náquië' Xángaca böñachi queë', en runödzjë' quégaquie' yöl-la' na'bán. Náquië' ca' Nu gusí lo bubán tsaz lu yöl-la' guti. Zí'alö Lë' bubané' tsaz lu yöl-la' guti para tsépisétë're' ca yúgu'té le dë. <sup>19</sup> Caní guca, tu' guyaza ládxë'ë Dios Xuz sóalen Cristo idútë le naca cazë' Lë'. <sup>20</sup> Ni'a que le benë' Cristo, Dios benë' ga gaca ulu'huöáca tuz len Lë' yúgu'té le dë, le nacuá' luyú, en le nacuá' lúzxiba. Bunë' léguequi tuz len Lë' tu' bulaljë' Cristo xichönë' cate' gútië' lë'e yaga cruz.

<sup>21</sup> Lib'ili', zí'atélö nulá'alenli'-në' Dios, en gúcali' ca yugu' bönni' biti' ta'lé'ené' Dios dxi'a lu icja ládxí'do'oli' ni'a que dö' biá'ali', pero na'a chibunë' lib'ili' tuz len Lë'. <sup>22</sup> Caní guca, tu' budödi cuinë' Cristo, en gútië' uláz queéli' para gaca usudxinë' lib'ili' lahuë'

Dios, nácali' quez queé', en idú dxi'a, ate' cuntu nu bi gaca inné queéli'. <sup>23</sup> Caní gaca channö ugá'anali' tsutsu ca réajlé'eli' Cristo. Gácali' ca tu yu'u zxoa ga rë' xilibi zö'ö que, en biti' tseaj bö' ládxi'do'oli' ca runli' löza didza' dxi'a biyónili', lë na' raca libán que idútë yödzölió le bené' Dios zxan lúzxiba. Dios buzóe' neda', Pablo, para gaca' huen dxin que didza' dxi'a na'.

### *Dxin budödë' Dios lu në'ë Pablo*

<sup>24</sup> Rudzéjada' na'a ca naca le rigui'i rizáca'a para gácalena' libí'ili', en ruúdxi rizá'a lu idútë le naca' le rigui'i rizáca'lena' tsözxón Cristo uláz que idú le naca cazé' Lë', le naca bönachi queé'. <sup>25</sup> Dios bené' ga naca' huen dxin quégaca bönachi queé' Cristo, ate' runa' xichiné' Dios, le budödë' lu na'a guna' para gácalena' libí'ili', quíxjö'a idú ca naca xtídzë'ë Dios. <sup>26</sup> Ruzéajni'ida' bönachi le nagachi', lë na' bigachi' dza ni'te, ate' cuntu nu benbë' le, pero na'a Dios chibulu'inë' bönachi néquiguequi quez queé' ca naca que. <sup>27</sup> Dios gú'uni quéziné' guné' ga ilúnbe'e yugu' yöl-la' tsahui' idú que le nagachi' ni, lë na' ta'yöni bönachi izá'a. Caní rnna lë na' bigachi': "Cristo náquië' tuz len libí'ili', en náquië' le naca löza idéli'li' tsazli' lu bení' queé'".

<sup>28</sup> Runtu' libán queé' Cristo, en rusá'atu' ládxi'gaca yúgu'të bönachi, ate' ruséditu' lęguequi idútë yöl-la' réajni'i, para gaca usudxintu' yúgu'të bönachi lahuë' Dios, naca idú ládxi'gaca tu' nácabaca tuz len Jesucristo. <sup>29</sup> Para gaca caní runa' dxin, en rui'i ládxa'a údxi guna' lë ni, rugúna' dxin yöl-la' huáca idú na' runnë' Cristo quia'.

## 2

<sup>1</sup> Ré'ënda' inózili' ruí'ida' ládxa'a runa' le gácalen libí'ili', enca' le gácalen bönachi yödzö Laodicea, en le gácalen ca' yúgu'të nupa biti' ila'lé'eni neda'. <sup>2</sup> Runa' caní para ila'dipa ládxi'gaquië', en iláquië' tuz lu yöl-la' nadxf'i, en ulu'zi'ë xibé yúgu'të yöl-la' tsahui' que yöl-la' run löza idú le runna yöl-la' réajni'i queéru'. Caní raca para ilúnbe'e le bigachi' queé' Dios Xuz, lë na' naca cazé' Cristo. <sup>3</sup> Lu në'ë Cristo ruzí'iru' xibé yúgu'të yöl-la' tsahui' que yöl-la' rácada', en yöl-la' réajni'i. <sup>4</sup> Lë ni rea' libí'ili', para cabí gaca nu si' ye'e libí'ili', nu gü'i didza' tséajlé'ëru' le cabí nácatë. <sup>5</sup> Sal-la' zoa' zi'tu' ga zóali' lu idútë le naca', lu bö' naca caza' zóalena' libí'ili', en rudzéjada' tu' rile'eda' rö'ö xibá queéli', en nácali' tsutsu ca réajlé'eli' Cristo.

<sup>6</sup> Que lë ni na', ca na' guzxi' lu ná'alí' Xanru' Jesucristo, lësca' caní ral-la' gunli' yúgu'të le gunli', dzáguië' Lë' libí'ili'. <sup>7</sup> Ca na' nun ga rë' luí yaga, enca' ca na' nayás zö'ö lu xilibi zö'ö, guli'sóalen Cristo. Guli'sóa tsutsu ca réajlé'eli' Lë', ca na' chinazédali'. Guli'guíetica'sé' Dios: "Xclenu'."

### *Le cubi nácaru' tu' dzágaru'-në' Cristo*

<sup>8</sup> Guli'gún chi'i cuinli' para cabí gü'i'ili' lataj nu si' ye'e libí'ili', nu ugún dxin yöl-la' réajni'i quégaca bönachi, en yugu' didza' ta'nna'sé' nácabaca idútë li, ca naca le ta'lébi tun bönachi, en ca naca le tu'sedi bönachi le naca que yödzölió ni, en calëga le naca xtídzë'ë Cristo.

<sup>9</sup> Idútë le naca cazé' Dios zóalen Cristo sal-la' böáquië' bönachi, <sup>10</sup> ate' libí'ili' nápalí' idútë le náquië' Dios tu' dzágali'-në' Cristo, Nu rinná be'e yúgu'të nupa ta'nná bë', en yugu' bönni' dë lu ná'agaquië'. <sup>11</sup> Narugu lu xipéla'gaquië' bönni' judío le rulu'i dá'gaquië' Dios, pero libí'ili', tu' dzágali' Cristo, zóalen libí'ili' le rulu'i néquili' queé' Dios, le cabí néquini lu ni'a lu ná'agaca bönachi. Yugu' bönni' judío tu'güë' tu guídido', pero libí'ili', nadúa idútë yöl-la' bönachi queéli' le bénlenli' dul-la'. Caní naca queéli' tu' benli' tsözxón Cristo cate' gútië' lë'e yaga cruz. <sup>12</sup> Cate' bidílali' nisa guca ca bigáchi'lenli'-në' Cristo tsözxón yero ba, en bubánlenli'-në' tsözxón tu' guyéajlé'eli' Dios, len yöl-la' huáca queé' busubanë' Cristo lu yöl-la' guti. <sup>13</sup> Zí'atélö gúcali' ca nupa chinátigaca tu' nözi dul-la' gubága'li', en biti' guzóalen libí'ili' le rulu'i néquili' queé' Dios, pero na'a Dios nuné' ga nabánlenli'-në' tsözxón Cristo, en buniti lahuë' libí'ili' ca naca yúgu'të dul-la' gubága'li'.

<sup>14</sup> Dios busúluë' yugu' le nabága'ru' le nazúa jgaca lu xibá queé', lë na' tu' zegui rë'u didza'. Bugúë' lë na' nabága'ru', en budé'ë le lë'e yaga cruz ca tu le nabáguë'ë Cristo. <sup>15</sup> Cate' gútië' Cristo lë'e yaga cruz, bugúë' yöl-la' huáca unná bë' quégaca bö' xihui' unná bë', en quégaca bö' xihui' dë lu né'eguequi yöl-la' huáca, tu' bulu'e lahui le nácagaca bö' xihui' na', en bugúë' idutë le guta' lu né'eguequi.

### Ral-la' gü'i ládxi'ru' le naca que yehua' yubá

<sup>16</sup> Que lë ni na', biti' gü'i lili' lataj nu uzegui lib'i lili' didza' ca naca le rë'aj ráguli', o tu' cabí runli' zxön yugu' dza laní, o tu' cabí runli' zxön beo' si' ruzé, o tu' cabí runli' zxön yugu' dza lá'ayi quégaca bönachi. <sup>17</sup> Yúgu'të lë ni naca ca tu bixín que le ral-la' gaca, ate' le rulu'i yúgu'të lë ni náquië' Cristo caz. <sup>18</sup> Biti' gü'i lili' lataj nu gun ga unítili' le ral-la' s'i lili', nu ronda' bayudxi ga ilaca nöxa j ládxi' gaca bönachi, en ilún zxön yugu' gubáz lá'ayi. Tu'gutsa' cuíngaqüi' le cabí bila'lé'enë', en tun ba zxön cuíngaqüi' ca naca le dzö'ösö ícjagaqüi' lu yöl-la' bönáchisö quégagaqüi'. <sup>19</sup> Nu run caní biti' da' Cristo. Náquië' Xanru', en ruzóë' tsutsu idútë le naca cazë', le nácaru' rë'u. Rugahuë' le, en runë' ga naca tuz ni'a que le zeaj lu dxita lu bin, ate' rizxón idútë le naca cazë' ca ré'ënë' Dios uxönë' le.

<sup>20</sup> Lib'i lili' chinátilenli'-në' Cristo para cabirö ila'nná be'e xibá que yödzölió lib'i lili'. ¿Bizx que runli' tsca ni nácali' que yödzölió, en runli' ca ta'nná bë' xibá que? <sup>21</sup> Caní ta'nná yugu' xibá que yödzölió ni:

Biti' quítjanu' lë ni.

Biti' gagu' lë na'.

Biti' canu' ia'tú le dë.

<sup>22</sup> Yúgu'të lë ni ila'niti cate' chibugunru' léguequi dxin. Caní nácagaca le ta'nná bë' bönachi, en yugu' xibá nazi' lu né'eguequi. <sup>23</sup> Le nácatë, yugu' xibá ni, téqui bönachi nápagaca yöl-la' réajni'i. Tun ga tu'lui'i cuínguequi ca bönachi yudo', en ga tu'lui'i cuínguequi nöxa j ladxí', en ga tu'saca' zí'gaca idútë le zeaj naca caz, pero xibá ni biti' ca' tácalen rë'u para gaca inná bë'eru' yugu' le rizé ládxi'ru' lu yöl-la' bönáchisö queéru'.

### 3

<sup>1</sup> Na'a, channö nubánlenli'-në' Cristo, guli'gü'i ladxi' le nácagaca que yehua' yubá ga ni' rö'ë Cristo cuita lë'ë ibëla Dios, ga náquië' lo. <sup>2</sup> Guli'sá' ladxi' le taca xitsá'alö, en calëga le taca luyú ni. <sup>3</sup> Naca queéli' tsca chinátili', ate' yöl-la' na'bán queéli' rapa chi'ë Cristo ga ni' zoa cazë' Dios. <sup>4</sup> Cristo nabánili' lib'i lili'. Cate' ului'i lahuë' Lë', ní'irö ului'i loli' ca' lib'i lili' tsözxón len Lë' lu beni' queé'.

### Yöl-la' na'bán gula, en yöl-la' na'bán cubi

<sup>5</sup> Que lë ni na', guli'gún ga ila'niti le nacuá'len lib'i lili' que yödzölió ni:

Yugu' le ruá' dö', en le nácagaca xihui',  
en yugu' le rizé ládxi'li' le ruá' dö',  
en yugu' le rizé ládxi'li' le naca xihui',  
en yöl-la' ruhuidi'.

Yöl-la' ruhuidi' naca lëbi ca nu reaj ladxi' budó' guiój budó' yaga, tu' cabí reaj ladxi' Dios nu ruhuidi'. <sup>6</sup> Tun bönachi yugu' le caní, ate' gunë' Dios xíguia' yúgu'të nupa biti' túngaca ca rnna xtídzë'ë. <sup>7</sup> Yugu' dul-la' caní benli' ca' lib'i lili' cate' ni' nadódili' lu né'eguequi. <sup>8</sup> Na'a, bíti'rö gunli' yugu' lë ni:  
Bíti'rö idzá'ali', en bíti'rö leli'.

Bíti'rö nu gunli' zí', en bíti'rö inné xihui'li'.

Bíti'rö innali' le ruá' dö'.

<sup>9</sup> Biti' si' ye'eli' luzá'ali' tuli' ia'tuli' tu' chinucá'anali' le gúcali' zí'alö, en yugu' le benli' zí'alö. <sup>10</sup> Chinácali' bönachi cubi, ate' tu tu dza ricúbili', ruhuöácaröli' ca naca Nu na' bun lib'i lili', para gúnbë'eli' Lë' idú ca náquië' Lë'. <sup>11</sup> Tu' chidzágaru'-në' Cristo:

Bíti'rö nácaru' bönni' zi'tu', en bönni' judío.  
 Bíti'rö nácaru' bönni' narugu lu xipéla'gaquië' le naca bë' nu da' Dios, en bönni' biti' narugu lu xipéla'gaquië' lë na' naca bë'.  
 Bíti'rö nácaru' bönni' ta'yéajni'inë', en bönni' biti' ta'yéajni'inë'.  
 Bíti'rö nácaru' bönni' nadó'ogaquië', en bönni' biti' nadó'ogaquië'.  
 Na'a, Cristo náquië' yúgu'të le nácagaca lesaca', en dzáguië' yúgu'tëru'.  
<sup>12</sup> Dios nadxi'inë' libi'ili', en guröö' libi'ili' para guéquili' quez queë'. Que lë ni na', ral-la':  
 Gü'i ládx'i'li' luzá'ali', en gácali' dxi'i ladxi',  
 en nöxaj ladxi', en cuidi' ladxi',  
 en cözali' zxön ladxi'.  
<sup>13</sup> Channö raca didza' bizxaj tuli' len ia'tuli', guli'guá' ilén luzá'ali' tuli' ia'tuli', en buli'niti lo luzá'ali' tuli' ia'tuli' ca na' benë' Cristo, buniti lahuë' libi'ili'. <sup>14</sup> Le nazáca'térö ca yúgu'të lë ni, ral-la' idx'i'li' yúgu'të böñachi, tu' naca yöl-la' nadxi'i le run ga nácaru' tuz, en ga nácaru' idú. <sup>15</sup> Guli'güí' lataj le ribequi dxi icja ládx'i'do'oru' inná bë' lu icja ládx'i'do'oli', lë na' runne' Dios queëru'. Que lë ni na' bulidzë' libi'ili', para gácali' tuz lu idútë le naca cazë' Cristo. Guli'guíë' Dios: "Xclenu".

<sup>16</sup> Guli'sí' lu ná'ali' xtídzë'ë Cristo le gaca queëli' tu yöl-la' tsahui' zxön. Tu' zóalen libi'ili' yöl-la' réajni'i queë' Dios, buli'sedi, en buli'zéjni'i luzá'ali' tuli' ia'tuli'. Idú ládx'i'li' guli'gul-la yugu' salmo queë' Dios, en yugu' le rul-la yöl-la' ba, en yugu' le rul-la lá'ayi, ate' guiéli'-në' Dios: "Xclenu". <sup>17</sup> Yúgu'të le runli', le naca didza' ru'ili' o le naca dxin runli', guli'gún yúgu'të lu Lë' Xanru' Jesús, en guiéli'-në' Dios Xuz: "Xclenu", dzáguië' Cristo libi'ili'.

*Le ral-la' gunru' que luzá'aru' tu' néquiru' queë' Cristo*

<sup>18</sup> Libi'ili', nigula nutsaga ná'alenli' bönni' queëli',  
 guli'gún ca rnna xtídz'a'gaquië' bönni' que queëli'  
 ca ral-la' gunli', tu' néquili' queë' Xanru'.

<sup>19</sup> Libi'ili', bönni' nutsaga ná'alenli' nigula queëli',  
 guli'dxi'i nigula que queëli',  
 en biti' uzéli' bach légacanu.

<sup>20</sup> Libi'ili', bi'i ra'bán,  
 guli'gún ca rnna yúgu'të xtídz'a'gaquië' xuz xiná'ali'.  
 Lë ni raza ládxë'ë Xanru'.

<sup>21</sup> Libi'ili', nülöli' nácali' xúzgaca bíido',  
 biti' tödi bë' usína'li' zx'i'nilili',  
 para cabí huóaj ládx'i'gacabi'.

<sup>22</sup> Libi'ili', nülöli' nácali' bönni' nadó'ogaquië',  
 guli'gún ca rnna yúgu'të xtídz'a'gaquië' xanli' luyú ni.  
 Calégasö gunli' caní cate' tu'yúë' libi'ili'  
 ca na' tun nupa té'ëni ilún ga ila'yaza ládx'i'gaca böñachi,  
 pero idú ládx'i'li' guli'gún xichíngacä' queëli'  
 ca ral-la' ilún nupa tadxi Dios.

<sup>23</sup> Ca naca yúgu'të le runli', guli'gún idú ládx'i'li',  
 gaca ca runli' xichinë' Xanru',  
 en calégasö ca runli' xichíngaca böñachi.

<sup>24</sup> Chinöz quézili' ubi'ë Xanru' queëli',  
 gunnë' queëli' le chinupé'ë Dios quégaca nupa nácagaca zx'i'ini cazë'.  
 Caní gaca, tu' runli' xichinë' Xanru' Jesucristo.

<sup>25</sup> Nu ruá' dö', ubi'ë Xanru' que nu na' ca naca dö' ruá' nu na', tu' cabí utsé'ë Dios ca ral-la' ubi'ë que queégaca böñachi.

## 4

<sup>1</sup> Lib'ili', núlóli' nácali' xángaca bönachi,  
guli'gún le naca tsahui', en le naca dxí'a  
ca rugunli' dxin yugu' bönni' huen dxin queéli'.  
Guli'tsöjné zoa ca' Xanli' yehua' yubá.

<sup>2</sup> Lib'ili', yúgu'téli',  
buli'lídzatica'sé' Dios.  
Buli'subán ládxí'li' ulídzali'-në' Dios,  
en guli'guié': "Xclenu'."

<sup>3</sup> La' ná'asö cate' rulídzali'-në' Dios, guli'nabi-në' ca' gácalenë' netu', en gunnë' netu'  
lataj quíxjö'ötu' xtídzë'ë Xanru', para gaca uzéajni'itu' bönachi le bigachi' ca naca queé'  
Cristo. Tu' runa' caní nadzuna' lidxi guíe ni. <sup>4</sup> Guli'nabi-në' ca' Dios, gunnë' neda' lataj  
usalaj lá'ana' le bigachi' na' ca ral-la' guna'.

<sup>5</sup> Lu yöl-la' réajni'i queéli', guli'gún le runli' lógaca nupa biti' ta'yéajlé' Cristo.  
Guli'gunda' dxin yugu' dza uzá' ládxë'ë Dios queéli', gunli' xichinë'. <sup>6</sup> Ral-la' güíili' didza'  
ca raza ládxë'ë Dios, en ca ral-la' gun nupa néquiguequi queé'. Ral-la' inózili' ca' naca ral-  
la' ubíili' didza', bi guiéli' tu tu bönachi.

*Yugu' bönachi queé' Cristo tu'gapa Dios luzé'eguequi*

<sup>7</sup> Tíquico quíxjö'i'inë' libi'ili' le raca quia' ni. Náquié' bóchi'ru' nadxf'iru'-në'. Náquié'  
ca' huen dxin idú queé' Xanru', en rúnlenë' neda' tsözxón dxin queé' Xanru'. <sup>8</sup> Que lë  
ni na' risól-la'a-në' ga zóali', para uzéajni'inë' libi'ili' le raca quia', en utipé' ládxí'li'.  
<sup>9</sup> Onésimo, bóchi'ru' na' nabábalenë' libi'ili' sa'yéajlenë' lë' tsözxón. Náquié' ca' bóchi'ru'  
nadxf'iru'-në', en réajlé'ë Xanru'. Chopé' ni ulu'siyönnë' libi'ili' yúgu'té le raca ni.

<sup>10</sup> Aristarco, bönni' na' yú'ulenë' neda' tsözxón lidxi guíe rugapé' Dios libi'ili'. Bi'i  
Marcos, bi'i bönni' queénu nigula zanë' Bernabé rugápabi' Dios ca' libi'ili'. Chigudxa'  
libi'ili' bi gunli' queébi' bi'i Marcos na'. Channö huídabi' ga zóali', guli'gún-bi' bal.  
<sup>11</sup> Bönni' ni lë' Jesús, en zoa ia'tú lë' Justo lëscá' rugapé' Dios libi'ili'. Nacuá' zián bönachi  
judío ta'yéajlé' Cristo, pero tsónnasë' ni ladaj bönachi judío tunë' dxin que le rinná bë'ë  
Dios tsözxón len neda', en tu'hu' zxöndë'ë neda'. <sup>12</sup> Epafras, bönni' ni nababë' ca' libi'ili'  
rugapé' Dios libi'ili'. Náquié' huen dxin queé' Cristo, en idú ládxë'ë rulidzë' Dios, en  
ráta'yutica'sé' lahuë' gácalenë' libi'ili' para gácali' idú ladxi', en sóali' ca' sina' gunli'  
yúgu'té le ré'ëni quézinë' Dios. <sup>13</sup> Runa' ba nalí queé' Epafras na', ru'ida' ládxë'ë libi'ili'  
enca' nupa nacuá' yödzö Laodicea, en nupa nacuá' yödzö Hierápolis. <sup>14</sup> Demas, enca'  
Lucas tu'gapé' Dios libi'ili'. Náquié' Lucas bönni' na' ruúnë' bönachi, ate' nadxf'iru'-në'.

<sup>15</sup> Guli'gapa Dios bóchi'ru' nacu'ë Laodicea, enca' Ninfas, en bönachi queé' Cristo  
nacuá' lídxinu Ninfas na'. <sup>16</sup> Cate' údxi ulábali' guichi ni ga ni' zóali', guli'gún ga ulu'laba  
le bönachi queé' Cristo nacuá' Laodicea. Buli'laba ca' libi'ili' guichi na' ila'söl-la' bönachi  
Laodicea na' queéli'. <sup>17</sup> Guli'guié' Arquipo: "Bë' ládxu'u gunu' dxin na' budödë' Xanru' lu  
no'o."

<sup>18</sup> Neda', Pablo, ruzúaj caza' lu guichi dídz'a'do' ni, rmnía': Rugapa' Dios libi'ili'.  
Guli'tsöjné ca raca quia' nadzuna' lidxi guíe ni. Rinábida'-në' Dios uzá' ládxë'ë queéli'  
le naca dxí'a. ¡Ca' gaca!

## DIDZA' ZÍ'ALÖ GUSÖL-LË'Ë PABLO YÖDZÖ TESALÓNICA

*Pablo rugapë' Dios böñachi queë' Cristo nacuá' Tesalónica*

<sup>1</sup> Neda', Pablo, rugapa' Dios libí'ili', zóali' Tesalónica. Néquili' queë' Cristo, ate' nácali' tuz len Dios, enca' len Xanru' Jesucristo. Dzágagaquië' neda' Silvano, en bi'i Timoteo. Rinábida'-në' Xúziru' Dios, enca' Xanru' Jesucristo uzá' ládxë'ë queéli', en gunë' ga soa dxi icja ládxí'do'oli'.

*Yugu' le taca bë' ta'yéajlé' böñachi Tesalónica Dios*

<sup>2</sup> Rética'stu'-në' Dios: "Xclenu'" cate' röjnetu' ca naca queéli' yúgu'téli'. Röjnética'stu' libí'ili', bi rinábitu'-në' Dios ni'a queéli' cate' rulidztu'-në'. <sup>3</sup> Röjnética'stu' lahuë' Xúziru' Dios ca naca le runli' tu' réajlé'ëli' Cristo, en ca naca dxin runli' tu' nadxí'ili'-në', en ca na' nácatica'sili' tsutsu tu' runli' löza Xanru' Jesucristo. <sup>4</sup> Böchi' luzá'atu', Dios nadxf'inë' libí'ili', ate' nöztu' gurö' cazë' Lë' libí'ili'. <sup>5</sup> Caní naca, tu' bidxín queéli' didza' dxi'a runtu' libán que, caléga len dídza'sö, pero lësca' len yöl-la' huáca bidxín queéli', ate' Dios Bö' Lá'ayi benë' tsutsu le, ate' idú ládxí'li' benli' löza le. Nöz quézili' ca gúcatu' ga zóali' tu' nadxí'itu' libí'ili'.

<sup>6</sup> Libí'ili' butsá' cuinli', ate' runli' ca runtu' netu', enca' ca benë' Xanru', tu' guzxí' lu ná'ali' xtídzë'ë, ate' sal-la' gudí'i guzxáca'da'ali', budzéjali' tu' zóalenë' Dios Bö' Lá'ayi libí'ili'. <sup>7</sup> Caní naca, chinácali' tu le naca bë' lögaca yúgu'té böñachi ta'yéajlé' Cristo nacuá' luyú Macedonia, en luyú Acaya. <sup>8</sup> Caní naca, tu' guzé xtídzë'ë Xanru' ni'a queéli'. Calégasö luyú Macedonia, en luyú Acaya, pero lësca' yúgu'té lataj guzé didza' ca réajlé'ëli' Dios. Caní naca, biti' bi run bayudxi innatu', <sup>9</sup> tu' ta'guixjö' la' léguequisö böñachi ni' queétu' ca benli' netu' bal, en ca na' butsá' cuinli'. Bucá'anali' yugu' budó' guiój budó' yaga, en böácali' queë' Dios para gunli' xichinë' Dios ban, Nu naca idú Dios. <sup>10</sup> Na'a, ribőzali' dza huödë' Zxí'inë' Dios, irúajë' yehua' yubá. Dios busubanë' Lë' lu yöl-la' guti. Nu ni naca Jesús, Nu rusólá rë'u lu dul-la', para cabí soa le gun ga ichúguië' Dios queéru' dza si' za'.

## 2

*Xichinë' Dios benë' Pablo yödzö Tesalónica*

<sup>1</sup> Böchi' luzá'atu', nöz quézili' biti' guca nítisö dxin queë' Dios bentu' cate' ni' bidxintu' ga zóali'. <sup>2</sup> Nözili' ca guca queétu' lu yödzö Filipos, ca na' gudí'i guzxáca'tu', ate' guluá' dö' böñachi ni' queétu'. Ní'irö cate' bidxintu' ga zóali' gúcatu' rugu ladxi' tu' guzóalenë' Dios queéru' netu', ate' bentu' libán loli' que didza' dxi'a le budödë' Dios lu na'tu'. Caní bentu' sal-la' gula'dá'baga'da' böñachi ládzali' netu'. <sup>3</sup> Cate' ni' guchízatu' icja nágali' xtídzë'ë Dios, bë'etu' didza', caléga tu' nazi'i ye'e netu', en caléga tu' bi guzé ládxí'tu' le dë queéli', en biti' guzxi' yé'etu' libí'ili'. <sup>4</sup> Tu' nuzxöni ládxë'ë Dios netu', budödë' lu na'tu' guntu' libán que didza' dxi'a queë', ate' canísö ru'itu' didza'. <sup>5</sup> Nöz quézili' catu caz bë'lentu' libí'ili' didza' le gun zxön libí'ili', en biti' guléaj tsahui' cuintu' ca run nu bi rizé ladxi' le dë queéli'. Nöz quézinë' Dios naca caní. <sup>6</sup> Biti' gudíljatu' yöl-la' ba le naca que yödzöliö ni, lë na' cú'uli' libí'ili' netu', en caléga le ila'gú'u böñachi netu'. Sal-la' dë lu na'tu' inná bë'etu' libí'ili' tu' nácatu' gubáz nasö'l-lë'ë Cristo <sup>7</sup> guzóalentu' libí'ili' dxi'i ládxí'do', en bentu' ca runnu xiná'agacabi' bí'i hué'enido', run chí' inu légacabi' dxi'i ládxí'do'. <sup>8</sup> Caní guca, bidxf'ide'etu' libí'ili', ga bidxintë gú'unitu' udödítu' lu ná'ali', calégasö didza' dxi'a queë' Dios, pero lá'tu'biqu' udödi caztu' yöl-la' na'bán queétu', tu' nadxí'ide'etu' libí'ili'. <sup>9</sup> Röjneli', böchi' luzá'atu', ca na' guca cate' ni' bentu' libán loli' que didza' dxi'a queë'

Dios, ca béntica'stu' dxin zi'i, ate' rëla, en të dza bentu' dxin para cabí usaca' zí'itu' nituli' libí'ili'.

<sup>10</sup> Libí'ili' na' réajlë'eli' Cristo, huáca gunli' ba nalí, ate' nőzinë' Dios ca na' gudálentu' libí'ili' idú ca raza ládxë'ë Dios, en idú dxí'ado', en ca na' cuntu nu gaca bi inné que.

<sup>11</sup> Lësca' caní nőzili' ca bentu' ca runë' tu bönni' quégacabi' zxí'inë', guchízatu' icja nágali', en butípatu' láxi'li' tu tulí'. <sup>12</sup> Busá'atu' láxi'li' gunli' ca ral-la' gun nu nequi queë' Dios. Lë cazë' bulidzë' libí'ili' para gaca tsú'uli' ga na' rinná bë'ë Lë' lu bení' queë'.

<sup>13</sup> Que lë ni na' ca', rética'stu'-në' Dios: "Xclenu'." Caní runtu' tu' guzxí' lu ná'ali' xtídzë'ë Dios le biyónili' bë'ëtu' didza', calëga ca xtidza' bönáchisö, pero ca le nácaté naca, xtídzë'ë Dios naca. Xtídzë'ëna' run dxin lu icja láxi'do'oli' libí'ili', réajlë'eli' Cristo.

<sup>14</sup> Böchi' luzá'atu', raca queéli' ca raca quégaca bönachi queë' Dios, nupa néquiguequi queë' Jesucristo luyú Judea. Caní naca tu' chigudí'i guzxáca'da'ali' lu ná'agaca bönachi uládz queéli', lébisö ca na' gula'guí'i gula'záquië' légaquië' lu ná'agaca bönachi uládz quégäquië', nupa ni' nácagaca bönni' judío. <sup>15</sup> Yugu' bönni' judío na' gulútië' Xanru' Jesús, en gulútië' ca' yugu' bönni' gulu'ë didza' uláz queë' Dios. Gula'bía láxi'gaquië', en bulu'lágue' ca' netu'. Biti' tunë' le raza ládxë'ë Dios, tu' cabí ta'lé'enë' dxí'a yúgu'të bönachi izá'a. <sup>16</sup> Tu'záguë'ë ca' xinöztu', para cabí guntu' libán lógaca bönachi izá'a na' biti' nabábagaca légaquië', tu' ruí'ilentu' léguequi didza' para ulu'lágaca. Caní raca, tu'zántica'së' dul-la' nabága'gaquië', en chinabága'gaquië' xíguia' le run ga ichúguië' Dios quégäquië'.

### Pablo re'ënë' tsöjyúë' böchi'ru' nacu'ë Tesalónica

<sup>17</sup> Na'a, böchi' luzá'atu', ruhuí'initu' ca runë' tu bönni' uzëbi tu' nulá'alento' libí'ili' tu chí'ido', pero sal-la' biti' rilé'etu' libí'ili', biti' nál-la láxi'tu' libí'ili'. Que lë ni na', ruí'i láxi'rötu' ulé'etu' lolí', tu' rizéda' láxi'tu' guntu' caní. <sup>18</sup> Que lë ni na' ca' gú'unitu' guídatu' ga zóali', ate' neda', Pablo, le nácaté bë' ládx'a' guída' chopá tsonna luzuí, pero Satanás, tu' xihui', buzaga' xinöztu'. <sup>19</sup> ¿Bizxi caz naca le run ga runtu' löza, o le run ga rudzéjatu', o le ral-la' idéli'tu', le uzi'itu' xibé lahuë' Xanru' Jesucristo cate' huödë'? ¿Naru' cabí libí'i cázali' na'? <sup>20</sup> Libí'i cázali' nácali' le run ga nácatu' bica' ba, en le run ga rudzéjatu'.

### 3

<sup>1</sup> Que lë ni na', cate' bíti'rö guca guá' ilento', ben xtídzatú' ugá'anatu' chópatu' lu yödzö Atenas, <sup>2</sup> ate' gusól-la'tu'-bi' bi'i böchi'ru', Timoteo ga zóali'. Nácabi' bi'i huen dxin queë' Dios, en rúnlenbi' neda' tsözxöön libán que didza' dxí'a queë' Cristo. Gusól-la'tu'-bi' ga zóali' para cuéquibi' libí'ili' tsutsu, en ichízabi' icja nágali' ca ral-la' tséajlë'eli' Cristo, <sup>3</sup> para cabí soa nu gaca chopá ladxi' ni'a que le tu'saca' zi' bönachi ni netu'. Nöz quészili' zóaru' yödzöli' ni para guá' ilenru' le caní. <sup>4</sup> Lësca' cate' ni' guzóalentu' libí'ili', busiyöntu' libí'ili' ca chizóa gaca le ulu'saca' zi' rë'u, le gaca ca na' chiguca queétu', ate' nöz quészili' lë na'. <sup>5</sup> Que lë ni na', cate' bíti'rö guca guá' ilena', gusól-la'a-bi' bi'i Timoteo ga zóali', para ujudíxjöi'ibi' neda' ca naca queéli' ca réajlë'eli'-në' Cristo, en channö cabí gulú'u tu' xihui' libí'ili' nöza dul-la', nu na' rigú'u bönachi nöza dul-la', en channö cabí böáca nítisö dxin na' bentu' ga zóali'.

<sup>6</sup> Cate' buzá'abi' bi'i Timoteo ga zóali', en budxinbi' ga zóatu', busiyönbí' netu' le naca dxí'a. Bé'ëbi' didza' ca na' réajlë'eli' Cristo, en ca na' nadxf'igacali'-në' yugu' böchi' luzá'aru', en ca na', lu yöl-la' dxí'i ladxi' queéli' röjnética'sili' netu', enca' ca na' raca láxi'li' ulé'eli' netu', ca na' netu' raca láxi'tu' ca' ulé'etu' libí'ili'. <sup>7</sup> Que lë ni na', böchi' luzá'atu', cate' ni' gudi'i guzxáca'tu' yúgu'të lë ni, en zián le guca queétu', bidxín didza' queétu' le buí'i zxön netu' cate' biyónitu' ca réajlë'eli'-në' Cristo. <sup>8</sup> Na'a, nuhuöáca láxi'tu' tu' riýómitu' rö'öli' tsutsu ca réajlë'eli'-në' Xanru'. <sup>9</sup> ¿Nacxi caz gaca guíétu'-në' Dios: "Xclenu'" ca ral-la' guntu' ni'a que yúgu'të le run ga rudzeja láxi'tu' lahuë' Dios

queéru' ni'a que le nácali' libí'ili'? <sup>10</sup> Bayudxi rulidztu'-në' Dios, en rinábitu'-në' rëla, en të dza para gaca ulé'etu' libí'ili', en usá'atu' le riyadzaj queéli' ca naca le réajlë'eli'-në' Cristo.

<sup>11</sup> Na'a rinábitu'-në' Xúziru' Dios, enca' Xanru' Jesucristo, cu'ë netu' nöza ga idxintu' ga zóali'. <sup>12</sup> Lësca' rinábitu'-në' Xanru' gunë' ga gala, en gaca idú ca nadxf'ili' luzá'ali' tuli' ia'tuli', en ca nadxf'ili' yúgu'të bönachi, ca na' netu' nadxf'itu' ca' libí'ili'. <sup>13</sup> Rinábitu'-në' gunë' ga gaca tsutsu, en idú dxi'a icja ládxido'oli' lahué' Xúziru' Dios ca sa'yéaj le naca lá'ayi, ate' gunë' caní ga idxinrö dza huödë' Xanru' Jesucristo, dzágagaca bönachi lá'ayi queé' Lë'.

## 4

*Le runru' le raza ládxë'ë Dios*

<sup>1</sup> Ia'stú, böchi' luzá'atu', ni'a queé' Xanru' Jesús ráta'yutu' loli', en richízatu' icja nágali' para gunli' ca naca le chinazédali' lu na'tu' ca ral-la' gunli' le raza ládxë'ë Dios. Ca na' chirunli', ca' ral-la' gúntica'sili'.

<sup>2</sup> Chinóz quézili' yugu' le Gunná bë'etu' libí'ili' uláz queé' Xanru' Jesús. <sup>3</sup> Le ré'ënë' Dios naca gácali' idú dxi'a, en bíti'rö gunli' le cabí naca tsahui', <sup>4</sup> en inózili' tu tuli' nacxi ral-la' sóalenli'-nu nigula que queéli' idú ca sa'yéaj le naca lá'ayi, en gunli' légacanu bal. <sup>5</sup> Biti' ral-la' sóalenli'-nu nigula queéli' lu yöl-la' rizé ladxi' le ruá' dö', ca na' tun bönachi biti' nabábagaca Dios, en biti' núnbë'gaca Dios. <sup>6</sup> Ca nácagaca lë ni, cuntu nu ral-la' tödi bë', en cabí si' ye'e böchi' luzë'e bagáchi'sö, tu' ichúguié' Lë cazë' Xanru' quégaca yúgu'të nupa tun le caní, gunë' ca na' chigúxditu' libí'ili', en bentu' ba nalí que loli'. <sup>7</sup> Dios bulidzë' rë'u, calëga para gunru' le ruá' dö', pero para gácaru' idú dxi'a. <sup>8</sup> Caní naca, nu ruzúa tsölä'alö lë ni, calëga bönáchisö ruzúa tsölä'alö, pero Dios caz ruzúa tsölä'alö, tu' gusól-lë'ë Lë cazë' Dios Bö' Lá'ayi queéru', Nu rui'i caní didza'.

<sup>9</sup> Biti' run bayudxi uzúaja' queéli' lu guichi ca ral-la' idxí'igacali'-në' böchi' luzá'ali', tu' chinazédali' la' libí'isili' lu në'ë Dios idxí'ili' luzá'ali' tuli' ia'tuli'. <sup>10</sup> Le nácatë nadxf'igacali'-në' yúgu'të böchi' luzá'aru' nacu'ë luyú Macedonia. Na'a, ráta'yutu' loli', böchi' luzá'atu', para idxí'igacaröli'-në' ca' yúgu'të böchi' luzá'ali'. <sup>11</sup> Ráta'yutu' loli' ca', gü'i ládxí'li' cózali' dxí'ado', en gunli' yugu' le dë lu ná'asili', en gunli' dxin len na'a cuinli' ca na' chigunná bë'etu' libí'ili'. <sup>12</sup> Gunná bë'etu' libí'ili' caní para gaca gunli' le naca dxí'ado' lögaca nupa biti' nabábagaca libí'ili', en caní gaca, biti' bi yadzaj queéli'.

*Ca gaca cate' huödë' Xanru' Jesucristo*

<sup>13</sup> Lësca', böchi' luzá'atu', ré'ënitu' inózili' ca raca quégaca nupa chinatigaca, para cabí hui'ini' ca tun ia'zica'rö bönachi biti' zoa le tun löza. <sup>14</sup> Channö réajlë'ëru' gútië' Jesús, en bubanë', lësca' caní ral-la' uzxöni ládxí'ru'-në' Dios gunë' ga huödalengaca tsözxón Jesús nupa ni' chigulati, en gula'yéajlë' Lë'.

<sup>15</sup> Que lë ni na' riguixjöi'itu' libí'ili' xtídzë'ë Xanru' le rnna caní: "Rë'u ni zóaru' nabanru', en ugá'anaru' ga idxinrö dza huödë' Xanru' Jesucristo, biti' tsöjtságaru'-në' Cristo zí'alö ca nupa chigulati." <sup>16</sup> Caní gaca, tu' huötje' Lë cazë' Xanru', en irúajé' yehua' yubá, ate' yön chi'ë, len yöl-la' unná bë' ulidzë', ate' yön ca' chi'ë gubáz lá'ayi lo, ate' yön ca' luzu ucödxë' Dios, ate' ulu'bán nupa na' chigulati, en gula'yéajlë' Cristo. <sup>17</sup> Ni'irö rë'u ni zóaru' nabanru', en nagá'anaru' luyú ni, uchisë' rë'u tsözxón len léguequi lu böaj lúzxiba para tsöjtságaru'-në' Xanru' lu bö'ös. Caní gaca, sóalentica'siru'-në' Xanru'. <sup>18</sup> Que lë ni na', guli'hui' zxön luzá'ali' tuli' ia'tuli' ca nácagaca didza' ni.

## 5

<sup>1</sup> Na'a, ca naca dza na', o rëla na' cate' ilaca lë ni, biti' run bayudxi uzúaja' queéli' lu guichi, böchi' luzá'atu'. <sup>2</sup> Libí'ili' chinóz quézili' dxí'a ca gaca dza cate' huödë' Xanru'. Idxinë' tsálido'os ca ridxinë' gubán chi'i dzö'ölö. <sup>3</sup> Cate' ila'nná bönachi: "Raca dxi'a

queéru', en biti' bi gaca queéru'", ní'irö la' idxintë le usuniti léguequi, lë na' idxín quéguequi ca na' ridxín le rigui'i rizáca'nu nigula na' chizóa sóabi' bñido' queénu, ate' cuntu nu nutsa' ladaj bönnachi yödzölió ni nu ulá cate' gaca lë na' gaca dza na'. <sup>4</sup> Na'a, böchi' luzá'atu', biti' zóali' chul-la niti, en que lë ni na' biti' idxín dza ni' queéli' bagáchi'sö ca ridxinë' bönni' gubán. <sup>5</sup> Yúgu'téli' nácali' bönnachi que bení', en que lahui' dza. Biti' nácaru' bönnachi que chi'i dzö'ölö, en calëga que le naca chul-la. <sup>6</sup> Que lë ni na', biti' ral-la' tödi yëla loru' ca raca quégaca nupa biti' nabábagaca rë'u, pero ral-la' usubán ládxí'ru', en cözaru' ba'a ládxí'do'. <sup>7</sup> Nupa tasi, chi'i dzö'ölö tasi, en nupa ta'zudxi, chi'i dzö'ölö ca' ta'zudxi. <sup>8</sup> Na'a, rë'u ni, nácaru' que lahui' dza, en ral-la' cözaru' ba'a ládxí'do', tu' chinácuru' zxaru' le run chi'i rë'u, le naca yöl-la' réajlé' queéru' Dios, en yöl-la' nadxí'i, ate' le runru' löza uláru' naca ca tu lu'u guíe le run chi'i ícjaru'. <sup>9</sup> Caní naca, tu' nuzóë' Dios rë'u ni, calëga para idxinru' ga ichúguië' queéru', pero para uláru' tu' ruzxöni ládxí'ru'-në' Xanru' Jesucristo, <sup>10</sup> tu' gútië' Jesús uláz queéru' para sóaru' ibanru' tsözxön len Lë' cate' huödë', sal-la' chinátiwu' o sóaru' ibanru' dza ni'. <sup>11</sup> Que lë ni na' ral-la' utípali' ládxí'il' tulí' ia'tuli', en gunli' tsutsu tulí' ia'tuli' ca na' chirunli'.

*Pablo richízië' icja nágagaquië' böchi' luzé'ë ta'yéajlé'ë Cristo*

<sup>12</sup> Ráta'yutu' loli', böchi' luzá'atu', gúnbe'ëli' nupa tun xichinë' Xanru' ga zóali', nupa na' ta'nná be'e libí'ili' uláz queë' Xanru', en tu'sá' ládxí'il'. <sup>13</sup> Ráta'yutu' loli' ca', gunli' légaquië' bal lu yöl-la' nadxí'i queéli', tu' tunë' dxin na'. Guli'cöza dxí'ado' tulí' len ia'tuli'.

<sup>14</sup> Lësca' caní richízatu' icja nágali', böchi' luzá'atu', para usá'ali' ládxí'gaca nupa biti' túngaca dxin, en utípali' ládxí'gaca nupa tu'huöaj ládxí'guequi, en gácalenli' nupa biti' naca tsutsu ca ta'yéajlé' Cristo, en gácali' nöoxaj ladxi' lögaca yúgu'të bönnachi.

<sup>15</sup> Guli'gún chi'i cuinli' para cabí uzi' lëbi luzá'ali', en cabí guá'ali' dö' que nu ruá' dö' queéli', pero guli'güi' ládxí'il' gúntica'sili' le naca dxí'a que luzá'ali' tulí' ia'tuli', en quégaca yúgu'të bönnachi.

<sup>16</sup> Buli'dzéjatica'sö,

<sup>17</sup> en buli'lídzatica'së' Dios,

<sup>18</sup> en guli'guíe' Lë': "Xclenu'."

Caní ral-la' gunli' ni'a que yúgu'të le raca queéli', tu' nácagaca lë ni le rë'ënë' Dios gunli' tu' nácali' queë' Jesucristo.

<sup>19</sup> Biti' uzóa dxili' le rulídzatica'së' Dios Bö' Lá'ayi libí'ili'.

<sup>20</sup> Biti' uzóali' tsölá'alo xtídzë'ë bönni' ru'ë didza' uláz queë' Dios.

<sup>21</sup> Guli'sí' bë' yúgu'të, en guli'sí' lu ná'ali' le naca dxí'a.

<sup>22</sup> Biti' bi gútsa'li' le ruá' dö'.

<sup>23</sup> Lë cazë' Dios, Nu run ga zoa dxí icja ládxí'do'oru', gunë' ga gácali' idú dxí'a, en gun chi'ë bö' naca cázali', en icja ládxí'do'oli', en idútë le nácali', ate' cuntu nu gaca bi inné queéli' dza ni' huödë' Xanru' Jesucristo. <sup>24</sup> Runë' Dios ca rnnë', Bönni' na' bulidzë' libí'ili'. Lë cazë' gunë' yugu' lë ni.

*Pablo rigu'ë yugu' böchi' luzé'ë lu në'ë Dios*

<sup>25</sup> Böchi' luzá'atu', buli'lídzë' Dios, en inábili'-në' gácalenë' netu'.

<sup>26</sup> Buli'gapa Dios yúgu'të böchi' luzá'aru', en unída'li' légaquië' lu yöl-la' nadxí'i queéli'.

<sup>27</sup> Ni'a queë' Xanru' Dios ruchi'a libí'ili' ulábali' guichi ni lögaca yúgu'të böchi' luzá'aru' nabábagäquië' Cristo.

<sup>28</sup> Rinábida'-në' Xanru' Jesucristo uzá' ládxë'ë queéli' le nácagaca dxí'a queë'. ¡Ca' gaca!

## DIDZA' BUROPI GUSÖL-LË'Ë PABLO YÖDZÖ TESALÓNICA

*Pablo rugapë' Dios bönachi queë' Cristo nacuá' Tesalónica*

<sup>1</sup> Neda', Pablo, rugapa' Dios libí'ili', zóali' Tesalónica. Nácali' queë' Xúziru' Dios, enca' queë' Xanru' Jesucristo. Silvano, en bi'i Timoteo dzágagaquië' neda'. <sup>2</sup> Rinábitu' Xúziru' Dios, en Xanru' Jesucristo, uzá' ládxë'ë queéli', en gunë' ga soa dxi icja ládxí'do'oli'.

*Dios ichúguië' quégaca bönachi dul-la' ila'nítigaca cate' huödë' Cristo*

<sup>3</sup> Ral-la' guíetica'stu'-në' Dios: "Xclenu'" ca naca queéli', böchi' luzá'atu', ate' naca dxi'a guntu' caní, tu' zeaj rácarö idú ca réajlë'ëli'-në' Dios. Lësca' caní, ca nadxí'ili' luzá'ali' tulí' ia'tulí' zeaj rácarö idú. <sup>4</sup> Que lë ni na', len yöl-la' rudzeja riguíxjö'ötü' ca naca queéli' lögaca bönachi queë' Dios ni, tu' ribózali' zxön ladxi', en réajlë'ëli' Dios sal-la' ta'bíada' ládxí'gaca bönachi libí'ili', en rigu'i rizáca'da'ali', pero ruá' rilenli' yúgu'tté.

<sup>5</sup> Yugu' lë ni taca bë' naca tsahui' ca ruchi'a rusöröö' Dios bönachi. Ru'ë lataj rigu'i rizáca'li' na'a, para gácali' lesaca' tsázali' ga ni' rinná bë'ë Lë'.

<sup>6</sup> Naca tsahui' ca gunë' Dios, ubi'ë quégaca nupa tu'saca' zi' libí'ili', gunë' ga ila'gu'i ila'zaca' nupa na'. <sup>7</sup> Ia'stú, libí'ili' rigu'i rizáca'li' na'a, ate' ubi'ë Dios queéli', gunë' ga uzí' ládxí'li' tsözxón len netu', dza ni' ilá' lahuë' Xanru' Jesucristo, cate' irúajé' yehua' yubá. Yugu' gubáz lá'ayi ni'a në'ë ilunë' Lë' tsözxón, en ulu'lu'ë lahuë' yöl-la' huáca zxön queë'. <sup>8</sup> Ilá' lahuë' Cristo dza ni' ca tu guí' zxön cate' ni' gunë' zi' nupa biti' núnbe'gaca Dios, en biti' túngaca ca rnna didza' dxi'a queë' Xanru' Jesucristo. <sup>9</sup> Yugu' bönni' caní, uzí' lëbë' légaquië', ate' tsaz tsöjtsázagaquië' lu guí' gabilia. Ila'cuité' tsaz lahuë' Xanru', ga nalá'gaca yöl-la' zxön queë', en yöl-la' huáca queë'. <sup>10</sup> Caní gaca dza ni' cate' huödë' para gaca queë' yöl-la' ba ni'a que le nácagaca bönachi lá'ayi queë', ate' ulu'bani ni'a que le benë' ga nácagaca yúgu'tté nupa ta'yéajlë' Lë'. Caní gaca ca' queéli' tu' guyéajlë'ëli' le bentu' ba nalí que loli' ca naca queë' Jesús.

<sup>11</sup> Que lë ni na' ca', rulídzatica'stu'-në' Dios queéru', en rinábitu'-në' gácalenë' libí'ili', en gunë' ga gácali' lesaca' idéli'li' lë na' bulidzé' libí'ili' para uzí'ili' xibé. Lësca' rinábitu'-në' gunë' ga gaca idú yúgu'tté le ruí'i ládxí'li' gunli' le naca dxi'a, en yúgu'tté dxin runli' lu yöl-la' réajlë' queéli' Lë'. Len yöl-la' huáca queë' Dios huáca gunli' lë ni. <sup>12</sup> Caní gaca, gaca yöl-la' ba que Lë' Xanru' Jesucristo ni'a que le runli', ate' gácali' libí'ili' bica' ba ni'a que le gunë' Lë', gaca ca naca le buzá' ládxë'ë queéli' Dios queéru', enca' Xanru' Jesucristo.

## 2

*Ulu'i lahuë' Bönni' Xihui'*

<sup>1</sup> Na'a, ca naca que dza huödë' Xanru' Jesucristo, en ca gaca, udutubë' rë'u queë' Lë', ráta'yutu' loli', böchi' luzá'atu', <sup>2</sup> para cabí gü'ili' lataj nu gun chixi libí'ili' ca nácagaca le guzxi' lu ná'ali'. Biti' cuéqui böniga icja ládxí'do'oli' ni'a que bi ta'nné' bönni' ta'zí' yé'ë, ta'nné' zóalenë' Dios Bö' Lá'ayi légaquië', o ni'a que bi didza' tuí'i bönachi, o ni'a que bi nazúaj tu lu guichi ta'nné' netu' gusöl-la'tu', le rnna: "Chigudödi dza huödë' Xanru'."

<sup>3</sup> Biti' ca' gü'ili' lataj nu si' ye'e libí'ili', tu' cabí idxín dza ni' huödë' Jesús channö cabí ila'lá' lahuë' zí'alo zián nupa ila'dá'baga' Dios, ate' ilá' lahuë' Bönni' Xihui', bönni' na' ralla' tsázië' lu guí' gabilia. <sup>4</sup> Bönni' ni uzáguë'ë, ate' lu yöl-la' run ba zxön cuinë' tá'baguë'ë yúgu'tté le nequi queë' Dios, o le tun zxön bönachi lu yöl-la' run Dios bal quéguequi. Gunë' bönni' na' caní ga idxintë cö'ë ca Dios caz lu yudo' ga naca xilatje' Dios, en gun cuinë' ca Dios.

<sup>5</sup> ¿Naru' cabí röjneli' busiyönda' libí'ili' yugu' lë ni cate' ni' zóalena' libí'ili'? <sup>6</sup> Na'a, núnbe'ëli' Nu ruzaga' xinözë' Bönni' Xihui' na', para cabí ilá' lahuë' zí'alo ga idxinrö dza queë'. <sup>7</sup> Chirún dxin le nagachi' que le naca xihui', pero ná'atë zoa Nu ruzaga' xinözë'

Bönni' Xihui' na' ga idxinrō dza ucuíta cuini Nu na' ruzaga' xinözë'. <sup>8</sup> Ní'irö ilá' lahuë' Bönni' Xihui' na', ate' Xanru' Jesucristo ucul-lë' lë' len bö' irúaj ru'ë, en usunítië' lë' len le tsépi yösa bení' que dza huödë'. <sup>9</sup> Cate' idxiné' Bönni' Xihui' na', len yöl-la' huáca que Satanás tu' xihui' ilá' lahuë'. Len yöl-la' huáca que le cabí nácatë, gunë' yúgu'të yöl-la' huáca zxön, en yúgu'të le ilaca bë', en yúgu'të le ilún ga ulu'bani bönnachi. <sup>10</sup> Len yöl-la' huáca que le cabí nácatë, gunë' caní lógaca nupa ila'niti tu' cabí gula'zí' lu né'eguequi idú ládzi'guequi le naca idútë li, para ulu'láguequi. <sup>11</sup> Que lë ni na' Dios gu'ë lataj idxín quéguequi tu nu run yöl-la' huáca, nu si' ye'e léguequi para ila'yéajlë' le cabí nácatë. <sup>12</sup> Caní gaca para ila'baga' xíguia' yúgu'të nupa biti' gula'yéajlë' le naca idútë li, pero gula'yaza ládzi'gaca le cabí naca tsahui'.

### *Nupa guró cazë' Dios para ulu'lágaca*

<sup>13</sup> Böchi' luzá'atu', libi'ili' na' nadxi'iné' Xanru' libi'ili', ral-la' güiéctica'stu'-në' Dios: "Xclenu'" ni'a que le naca queéli', tu' chiguró cazë' Dios libi'ili' dza ni'te para uláli' ni'a que le runé' Dios Bö' Lá'ayi, para gácali' idú tsahui' tu' réajlë'ëli' le naca idútë li. <sup>14</sup> Para gaca caní queéli', Dios caz bulidzë' libi'ili', para idéli'ili' gunli' tsözxón Xanru' Jesucristo lu bení' queë'. Caní gaca ni'a que didza' dxi'a runtu' libán que.

<sup>15</sup> Que lë ni na', böchi' luzá'atu', guli'soa tsutsu, en guli'gún chi'i didza' na' nazédali', le bë'lentu' libi'ili', en buzúajtu' queéli' lu guichi. <sup>16-17</sup> Rinábitu'-në' Xanru' Jesucristo, en Xúziru' Dios, utipë' ládzi'li', en gunë' ga gácali' tsutsu ca naca yúgu'të le naca tsahui' runli', en yúgu'të didza' dxi'a ru'ili'. Lë cazë' nadxi'iné' rë'u, en bennë' queéru' le ruhui' zxöntica'sö rë'u, en le naca dxi'a runru' löza, yugu' lë na' buzá' ládxë'ë Dios queéru'.

## 3

### *Le ral-la' inábiru'-në' Dios*

<sup>1</sup> Ia'stú, böchi' luzá'atu', buli'lidzë' Dios, en inábili'-në' gácalenë' netu', runtu' libán ni, para së xtídzë'ë Xanru', ate' ilún le bal bönnachi, para gaca ni ca na' guca ga ni' zóali' libi'ili'. <sup>2</sup> Inábili'-në' ca' para ulatu' lu ná'agaquië' bönni' xihui' tuá' dö', tu' cabí ta'yéajlë' yúgu'të bönnachi Dios. <sup>3</sup> Na'a, tu' runé' Xanru' ca rnne', gunë' ga gácali' tsutsu, en gun chi'ë libi'ili', para cabí idzunli' lu na' tu' xihui'. <sup>4</sup> Ruzxöni ládzi'tu'-në' Xanru' ca naca queéli', gunli' yugu' lë ni si' gunábitu' libi'ili', ca na' chirunli'. <sup>5</sup> Rinábitu'-në' Xanru' usé'ë ládzi'li' para idxí'ili'-në' Dios, en cözali' zxön ladxi' ca na' benë' Cristo.

### *Ca run bayudxi gunru' dxin*

<sup>6</sup> Ni'a que Lë' Xanru' Jesucristo ruchi'atu' libi'ili', böchi' luzá'atu', icuítali' ga nacu'ë böchi' luzá'aru' ta'dasë' ca', en biti' tuné' ca naca xibá buséeditu' libi'ili'. <sup>7</sup> Nöz quézili' ral-la' gunli' ca runtu' netu'. Biti' gudásitu' ca' netu' ga ni' zóali'. <sup>8</sup> Biti' gudágusötu' le béniali' queétu', pero lu yöl-la' ruúbi rugui'i, en lu yöl-la' ricuidi' bentu' dxin rëla, en te dza para cabí usaca' zí'itu' nituli' libi'ili'. <sup>9</sup> Caní bentu' para gácatu' lolí' ca tu le rulu'i libi'ili' ca ral-la' gunli', sal-la' dë lu na'tu' inábatu' bi gunli' queétu'. <sup>10</sup> Lësca' cate' ni' guzóalentu' libi'ili', buchí'atu' libi'ili' caní, le rnna: "Channö cabí rë'ënë' nu bönni' gunë' dxin, biti' güí'ili' le gahuë'." <sup>11</sup> Canísö rnнатu' tu' riyóñitu' nútsa'gaquië' ládjali' yugu' bönni' ta'dasë' ca', biti' bi dxin tuné', pero ta'dasë' ca' bi tun bi ta'nnë'. <sup>12</sup> Ni'a queë' Xanru' Jesucristo ruchi'atu' yugu' bönni' tuné' caní, en richízatu' icja nágagaquië' ilunë' dxin lu yöl-la' riböza dxí'ado', para gaca ilahuë' le nequi quégacasë'.

<sup>13</sup> Na'a, böchi' luzá'atu', biti' soa dxili', gúntica'sili' le naca dxí'a. <sup>14</sup> Channö nútítës bönni' biti' gunë' ca rnna xtídzä'tu', le ruzúajtu' lu guichi ni, guli'gún ga gaca bë'ë bönni' na', en biti' gunli' tsözxón lë' para utu'iné'. <sup>15</sup> Biti' ral-la' ilé'eli'-në' ca tu bönni' biti' rile'enë' libi'ili' dxí'a, pero guli'sá' ládxë'ë ca böchi' cázali'.

*Pablo rigu'ë lu né'ë Dios yugu' böchi'ru' nacu'ë Tesalónica*

<sup>16</sup> Rinábitu'-në' Xanru' gúntica'së' ga cuía dxi icja ládxi'do'oli' ca naca yúgu'të le runli', en sóalenë' yúgu'tëli'. Lë cazë' runë' ga rö'ö dxi icja ládxi'do'oru'.

<sup>17</sup> Neda', Pablo, len na' caza' ruzúaja' lu guichi ni le rugapa' Dios libíili', ate' naca tu le naca bë' yúgu'të guichi risöl-la'a. Canísö ruzúaja' lu guichi. <sup>18</sup> ¡Le ruzá' ládxë'ë Xanru' Jesucristo queéru' gaca queéli' yúgu'tëli! ¡Ca' gaca!

## DIDZA' ZÍ' ALÖ GUSÖL-LË'Ë PABLO QUEÉBI' BI'I TIMOTEO

*Pablo rugapë' Dios bi'i Timoteo*

<sup>1</sup> Neda', Pablo, naca' gubáz nasól-lé'ë Jesucristo. Caní naca' tu' caní gunná bë'ë Dios, Nu rusólá rë'u, enca' tu' gunná bë'ë caní Xanru' Jesucristo, Nu na' runru' löza. <sup>2</sup> Rugapa' Dios li', bóch'a'ado' Timoteo. Nacu' ca zxí'ini caza' tu' benru' tsözxón xichinë' Dios. Rinábida'-në' Xúziru' Dios, enca' Xanru' Jesucristo uzá' ládxë'ë quiu', en huéchi' ládxë'ë li', en gunë' ga soa dxi icja ládxí'do'o.

*Pablo rusé'ë ládxí'bi' Timoteo ca naca xibá cabí naca idú*

<sup>3</sup> Ráta'yua' lo' na'a gunu' ca na' gúta'yua' lo' cate' ni' guyija' luyú Macedonia, para ugá'anu' lu yödzö Éfeso, en inná bë'enu' bal-lë' bönni' ni' cabí ulu'sédinë' tu xibá yúbölö,

<sup>4</sup> en cabí ilunë' zxön yugu' didza' ridasö, en lágaca ziántérö cö' xuz xtó'ogaca böñachi, yugu' le tun ga tuí'i ládxí'gaca böñachi le nácagaca nítisö. Yugu' le caní biti' tun tsutsu böñachi queë' Dios ca naca le ta'yéajlë' Lë'.

<sup>5</sup> Le ré'ëni gun lë ni rea' li', naca para ila'dxi'i böñachi luzé'eguequi, naca idú ládxí'gaca, en gaca dxi'a le ta' zá' ládxí'gaca, en gaca idú le ta'yéajlë' Dios. <sup>6</sup> Ca nácagaca lë ni, biti' bulu'rúajë' bal-lë' bönni' dxi'a, pero gula'guélë'ë tu nöza yúbölö, en tunë' bal yugu' le biti' nácatë. <sup>7</sup> Té'ënnë' ulu'sédinë' böñachi ca naca le rinná bë' xibá queë' Dios, sal-la' biti' ta'yéajni'inë' lë na' tu'sédinë', en biti' ta'yéajni'inë' le ta' nnë' nácatë.

<sup>8</sup> Rë'u nöziru' naca dxi'a xibá gunná bë'ë Dios, channö nu rugún le dxin ca ral-la' gun.

<sup>9</sup> Lë ni nöziru': Dios gudixjë' xibá queë', calëga para inná be'e böñachi tsahui', pero para inná be'e böñachi caní:

Nupa ta'dá'baga' le rinná bë' xibá na'.

Nupa biti' túngaca ca rinná bë' xibá na'.

Nupa tu'cá'ana Dios cá'asö.

Nupa tun le naca xihui'.

Nupa biti' túngaca Dios zxön.

Nupa tu'cá'ana le nequi queë' Dios cá'asö.

Nupa tuti xuz xiná'aguequi.

Nupa tuti böñachi.

<sup>10</sup> Nupa tun le ruá' dö'.

Yugu' bönni' nacuá'lenë' la' löjödxi bönni'gaquië'.

Nupa ta'bán yugu' bífido'.

Nupa ta'zí' yë'.

Nupa tun tsutsu xtídza'guequi, ta'nná le cabí nácatë.

Nupa ta'dá'baga yugu' xibá tsahui'.

<sup>11</sup> Nöziru' naca caní tu' bidxín queéru' didza' dxi'a buzá' ládxë'ë Dios queéru'. Lë' náquië' lá'ayi, en budödë' lu na'a didza' dxi'a na' runa' libán que.

*Pablo rë' Cristo: "Xclenu'" tu' buéchi' ládxë'ë lë'*

<sup>12</sup> Rea'-në' Xanru' Jesucristo, Nu rutipa ládx'a'a, "Xclenu'" tu' buzxöni ládxë'ë neda', en buzóë' neda' guna' xichinë'. <sup>13</sup> Caní benë' sal-la' zí'alö neda' gunnë zí'a queë', en gudxía' lädxa'a böñachi queë', en zián le bi'a dö' quéguequi, pero Cristo buéchi' ládxë'ë neda', tu' bena' caní lu yöl-la' biti' réajni'i quia' cate' ni' biti' réajlë'ënida' Lë'. <sup>14</sup> Na'a, zxóntérö naca le buzá' ládxë'ë quia' Xanru' Jesucristo, lë na' run ga réajlë'ëru' Lë', enca' ga nadxf'iru'në'.

<sup>15</sup> Didza' idútë li lë ni, en le naca lesaca' ila'zí' lu ná'agaca yúgu'të böñachi, le rnna: Lë cazë' Jesucristo bidé' yödzölió ni para busölé' böñachi dul-la', ate' busölé' neda' sal-la' nácar'a bönni' dul-la' ca yúgu'të böñachi. <sup>16</sup> Que lë ni na' buéchi' ládxë'ë neda', ate' bulu'e

lahui Jesucristo ni'a quia' neda', bönni' dul-la', ca naca yöl-la' zxön ladxi' idú queë', para gaca' tu le rulu'i lögaca nupa ila'yéajlé' Lë', en gata' quéguequi yöl-la' na'bán idú. <sup>17</sup> Na'a rnnía': ¡Yöl-la' ba Dios, Nu rinná béisica'sö, Nu catu caz údxí que, en Nu biti' gaca ilé'eru', la's dui Dios Nu nözi caz yúgu'té! ¡Queë' Lë' gácatica'sö yöl-la' run bal, en yöl-la' ba, na'a dza, en yúgu'té dza zá'gaca! ¡Ca' gaca!

<sup>18</sup> Zxí'ina'do' Timoteo, rudöda' lu no'o xibá ni para gunu' xichinë' Dios ca runë' tu bönni' idú ládxé'ë rejé' gudil-la, en para uzi'u xibé yugu' le gula'guíxjö' zí'alö nupa ni' gului'i didza' uláz queë' Dios ca gaca quiu'. <sup>19</sup> Len yöl-la' réajlé' quiu' Cristo ral-la' gunu' caní, naca idú dxí'a icja ládxí'do'o. Chigula'chixi gula'nigui bal-la bönnachi, nupa bulu'zóa tsölá'alö le réajlé'ëru' Cristo. <sup>20</sup> Caní gulunë' Himeneo, en Alejandro, nupa na' busana' lu na' Satanás tu' xihui' para ila'zédë' ca ral-la' ilunë', para cabirö ila'nné zi'ë que le nequi queë' Dios.

## 2

*Le rusedi rë'u ulídzaru'-në' Dios*

<sup>1</sup> Que lë ni na' le naca lo le richízia' icja nágagaca bönnachi naca ca ral-la' ulídzaru'-në' Dios, en ca ral-la' gáta'yuru' lahuë', en ca ral-la' inábiru'-në' gunnë' bi riquíniru', en ca ral-la' guiéru'-në': "Xclenu'." Yugu' lë ni ral-la' gunru' uláz quéguequi yúgu'té bönnachi. <sup>2</sup> Lësca' caní ral-la' gunru' uláz quégaca nupa ta'nná bë', en quégaca yúgu'té nupa nácagaca lo. Caní ral-la' gunru' para gaca dxí'a queëru', en gata' queëru' yöl-la' riböza tsáhui'do'. Ral-la' gunru' caní lu yöl-la' réajlé' queëru' Dios, en lu yöl-la' ba'a ladxi' queëru'. <sup>3</sup> Lë ni naca dxí'a, en le raza ládxé'ë Dios, Nu rusölá rë'u. <sup>4</sup> Dios caz rë'ënë' ulu'lágaca yúgu'té bönnachi, en rë'ënë' ilúnbbë'e le naca idútë li. <sup>5</sup> Tuzë' náquië' Dios, en tuzë' bönni' ruúnë' dzaga Dios, en bönnachi. Nu ni naca Jesucristo, Nu gulaj bönnachi. <sup>6</sup> Lë cazë' budödi cuinë' lu yöl-la' guti, le benë' tu' nözi dul-la' nabága'gaca yúgu'té bönnachi. Dios benë' ba nalí queë' cate' bidxín dza queë' gútië'. <sup>7</sup> Ca naca lë ni, Dios buzóe' neda' para guna' libán que, en gaca' gubáz nasö'l-lë'ë Cristo, para usédigacada' bönnachi izá'a ca naca le réajlé'ëru' Cristo, en ca naca le naca idútë li. Rilfteda', en biti' ca' rizí' yë'a.

<sup>8</sup> Na'a, rë'ënda' ulu'lidzë' bönni' Dios, en iláta'yuë' lahuë' gáti'tés, nácagaquië' idú dxí'a, en cabí ila'lenë' luzá'agaquië', en cabí ila'dil-la dídz'a'gaquië'. <sup>9</sup> Lësca' caní, rë'ënda' ilácunu nigula le naca ba'a. Le naca lachi le ral-la' ulu'lui'nu lahuí naca yöl-la' nöxa j ladxi', en le naca idú ladxi', en caléga le tu'pá'asinu icja lögacanu len oro, en yugu' bugá, en lari' nazáca'da'. <sup>10</sup> Yugu' le dxí'a tunnu ulu'lui' i lahuí le nácagacanu ca na' run le tacunu le naca ba'a. Caní ral-la' ilunnu nigula núnbë'gacanu Dios. <sup>11</sup> Ral-la' ila'cuá'anu yugu' nigula dxisö cate' nu rusedi légacanu, en ila'cuá'anu nöxa j. <sup>12</sup> Biti' runna' yugu' nigula lataj ulu'sédinu, en caléga ila'nná bë'enu yugu' bönni'. Ral-la' ila'cuá'anu dxisö ga nudúbigaca bönnachi queë' Cristo. <sup>13</sup> Caní ral-la' gaca, tu' buzóe' Dios zí'alö Adán, ate' gudödi na' buzóe'-nu Eva. <sup>14</sup> Adán na', biti' guzxi' ye'e tu' xihui' lë', pero nigula queë', guzxi' ye'e lënu. Caní guca, gudítsjanu xibá queë' Dios, <sup>15</sup> pero ulanu nu nigula ruzóanu-bi' bí'ido' channö gúntica'sinu ca röjlöz le réajlé'ëru' Dios, en yöl-la' nadxi'i, en channö gácanu idú dxí'a, en idú ladxi'.

## 3

*Ca ral-la' ilácagaquië' bönni' tapa chi'ë bönnachi queë' Cristo*

<sup>1</sup> Didza' idútë li lë ni rnna: Channö ru'i ládxé'ë nu bönni' gáquië' nu gapa chi'i bönnachi queë' Cristo, dxin dxí'a rizé' ládxé'ë. <sup>2</sup> Nu bönni' rapa chi'ë bönnachi queë' Cristo run bayudxi gáquië':

Tu bönni' cuntu nu gaca bi inné queë'.

Zoa túzinu nigula queë'.

Ral-la' gáquië' ban ladxi', en idú ladxi', en nöxa j ladxi'.

Ral-la' gu'ë ga ila'cu'ë bôchi'ru' ta'dxinë' lidxë'.  
Ral-la' gáquië' bönni' nazéqui'de'enë' usédinë' bönachi.

<sup>3</sup> Biti' gáquië' bönni' re'jé', en caléga bönni' sínia'.

Biti' gaquië' bönni' rizé ládxi'sé' si'ë dumí.

Ral-la' gáquië' bönni' dxi'i ladxi', en zxön ladxi'.

Biti' gáquië' bönni' ruhuídí né'.

<sup>4</sup> Ral-la' gáquië' bönni' rinná bë'enë' dxi'a bönachi nacuá' lidxë'.

Ral-la' ilunbi' zxí'inë' ca rnna xtídzë' lu yöl-la' run bal xúzgacabi'.

<sup>5</sup> Naru' huácatsö tu bönni' gapa chi'ë bönachi queë' Dios channö cabí raca inná bë'enë' dxi'a bönachi nacuá' lidxë'? <sup>6</sup> Biti' ral-la' gáquië' tu bönni' si' gusí lahuë' té'ë Cristo, para cabí tödi bë' gun ba zxön cuinë', en biti' gaca queë' ca na' guca que tu' xihui', nu ben ba zxön cuini, ate' Dios guchúguië' que tsöjgá'ana lataj chul-la. <sup>7</sup> Lësca' ral-la' gáquië' bönni' ta'nná dxi'a queë' nupa cabí nabábagaca bönachi queë' Cristo, para cabí soa nu uzóa lë' tsölá'alö, en para cabí idzunë' lu yalaj que tu' xihui'.

### *Ca ral-la' iláquië' bönni' tácalenë' bönachi queë' Cristo*

<sup>8</sup> Lësca' caní ral-la' iláquië' bönni' tácalenë' bönachi queë' Cristo:

Ral-la' iláquië' bönni' idú ládxi'gaquië'.

Biti' iláquië' bönni' tu'rixë' didza'.

Biti' iláquië' bönni' té'ajé'.

Biti' iláquië' bönni' ta'zé ládxi'sé' dumí.

<sup>9</sup> Ral-la' gaca ilapa chi'ë idútë le réajlë'ëru' Cristo.

Ral-la' ilaca idú dxi'a icja ládxi'do'gaquië'.

<sup>10</sup> Yugu' bönni' ni ral-la' si' bë'ëli' légaquië' zí'alö, ate' ní'irö gata' lu ná'agaquië' ilácalenë' bönachi queë' Cristo, channö cabí zoa nu gaca bi inné quégaquië'. <sup>11</sup> Lësca' caní, nigula que queégaquië' ral-la' ila'cuá'anu idú ládxi'gacanu, en cabí ilácanu unné que luzé'e. Ral-la' ilácanu zxön ladxi', en ilácanu li ladxi' lu yúgu'té le tunnu. <sup>12</sup> Yugu' bönni' ilácalenë' bönachi queë' Cristo ral-la' soa túzinu nigula que queégaquië'. Lësca' ral-la' ila'nná bë'enë' dxi'a zxí'inigaquië', enca' bönachi ulidxi que queégaquië'. <sup>13</sup> Run bayudxi gaca caní, tu' ta'déli'në' lataj ga ilún bal bönachi xtídzä'gaquië', channö tunë' dxi'a dxin tunë' tácalenë' bönachi queë' Cristo, ate' ilácarë' rugu ladxi' para ilu'ë didza' ca naca le réajlë'ëru' Jesucristo.

### *Le bigachi' que le reaj ládxi'ru'-në' Dios*

<sup>14</sup> Yugu' didza' ni ruzúaja' quiu' lu guichi, sal-la' runa' löza uduyútea' li'. <sup>15</sup> Channö huadzéda', ruzúaja' quiu' didza' ni para inózinu' naca ral-la' gunu' lógaca bönachi nacuá' lidxë' Dios, nupa nácagaca bönachi queë' Dios ban, en nácagaca tsutsu, en ta'guíxjö' dxi'a le naca idútë li. Nácagaca ca yugu' ya'zxón, en le nunída'gaca zö'ö, le nácagaca tsutsu, en ta'zón yu'u. <sup>16</sup> Le nácatë, zxínterö naca le bigachi' que le reaj ládxi'ru'-në' Dios, ca na' nazúaj lu guichi le rnna:

Dios bulu'i lahuë', gúquië' bönachi.

Guca bë' náquië' tsahui' tu' guzóalenë' Dios Bö' Lá'ayi Lë'.

Gulácalenë' gubáz lá'ayi queë' Dios Lë'.

Guca libán queë' lógaca bönachi izá'a.

Gula'yéajlé' bönachi yödzölió Lë'.

Dios buchisë' Lë' xitsá' ga nayépisétërë'.

### *Nupa ulu'huóaj ládxi'gaca ca naca le réajlë'ëru'-në' Cristo*

<sup>1</sup> Yálajdo' riguíxjö'ë Dios Bö' Lá'ayi, rnnë': Dza tsöjsétëgaca, ila'dá'baga' bal-la bönachi Cristo. Ulu'huóaj ládxi'gaquië' ca naca le réajlë'ëru' Cristo. Ulu'zé nágagaquië'

xtídza'gaca bönachi nacuá'len bö' ta'zí' yé' léguequi, ate' ulu'zé nágagaquië' yugu' xibá quéguequi bö' xihui'. <sup>2</sup> Ulu'zé nágagaquië' xtídza'gaca bönachi tu'lui'isö tsahui' cuínguequi. Yugu' bönachi na' tu'i didza' le cabí nácatë, en chinazidi ládxí'do'guequi, para cabí uxösa léguequi. <sup>3</sup> Caní naca, tu'záguë'ë xinózguequi nupa té'ëni ulu'tsaga ná'agaca, en ta'nná bé'enë' bönachi para cabí ilágugaca le nagu'ë Dios para uzi'iru' xibé, lë na' huáca ilágugaca nupa ta'yéajlë' Dios, nupa na' chinúnbe'ë gaca le naca idútë li, en té' Dios: "Xclenu'" cate' tahuë' le. <sup>4</sup> Dxi'a naca yúgu'té le benë' Dios, en biti' bi ral-la' uzóaru' tsölá'alö channö ráguru' le, en réru'-në' Dios: "Xclenu'." <sup>5</sup> Rusedi xtídzë'ë Dios rë'u, Lë' únë' dxi'a yúgu'té le gáguru' channö ulídzaru'-në' Dios, en inábiru'-në' gun lá'ayë' lë na' gáguru'.

### *Ca rurúajë' dxi'a huen dxin queë' Jesucristo*

<sup>6</sup> Channö usédinu' yugu' böchi' luzá'aru' yugu' didza' ni, urúaju' dxi'a, en gacu' huen dxin dxi'a queë' Jesucristo, en gaca bë' nazédu' dxi'a ca naca didza' que le réajlë'ëru'-në' Cristo, en ca naca xibá dxi'a rapa chi'u. <sup>7</sup> Gurú'una yugu' didza' ridasö que yödzölió ca naca didza' tu'i inu yugu' nigula gula. Béntica'sö le gun ga gacu' tsutsu para gunu' ca ré'ënë' Dios. <sup>8</sup> Láti'do'os uzi'u xibé gunu' le gun ga gácarö nál-la ni'a no'o, pero idú uzi'u xibé gunu' ca ré'ënë' Dios. Cate' runru' caní, lë ni run ga runru' löza sóaru' ibanru' yödzölió ni, enca' sóaru' ibanru' dza zá'gaca, tödi uzá'aru' yödzölió ni. <sup>9</sup> Didza' idútë li lë ni, en le naca lesaca' ila'zí' lu ná'agaca yúgu'té bönachi. <sup>10</sup> Que lë ni na', rusáca'da' zi' cuinru' runru' dxin, tu' runru' löza Dios ban. Cristo gútië' para usölé' yúgu'té bönachi. Tu'zí' xibé le benë' nupa na' ta'yéajlë' Lë'.

<sup>11</sup> Gunná be'e, en busedi bönachi ilún yugu' lë ni. <sup>12</sup> Cuntu nu ral-la' uzóaru' li' tsölá'alö tu' nacu' bi'i ra'bán, pero ral-la' gunu' le ulu'i nupa ta'yéajlë' Dios ral-la' ilún ca runu' li'. Caní ulu'i inu' légaquië':

Len didza' ru'u, en len le runu'.

Ca nadxi'inu' luzó'o, en ca ru'u lataj zóalenë' Dios Bö' Lá'ayi li'.

Ca runu' ca rnno', en ca nacu' idú tsahui'.

<sup>13</sup> Tsanni za'a idxina' quiu', bë'tica'sö ladxi' ulabu' guichi lá'ayi lógaca bönachi nacuá' ga ni' zu'. Guchiza icja nágagaquië' lë ni, en busedi légaquië'. <sup>14</sup> Biti' udödu' cá'asö le buzá' ládxë'ë Dios quiu', lë na' bennë' quiu' ca na' gula'nná nupa ni' gului'i didza' uláz queë' Dios, cate' ni' bönni' gula tapa chi'ë bönachi queë' Cristo gula'xoa ná'agaquië' li', en bulu'lidzë' Dios.

<sup>15</sup> Béntica'sö yugu' lë ni. Bé'tica'sö ládxu'u gunu' caní, para ila'lé'e yúgu'té bönachi ca na' zeaj ridéli'nu' le nequi queë' Cristo. <sup>16</sup> Gudapa chi'i cuinu', en gudapa chi'i xibá rusédiru'. Béntica'sö yugu' lë ni, ate' channö gunu' caní, uló' li', en ulu'lágaca ca' nupa ila'yöni li'.

### 5

### *Ca ral-la' gunbi' Timoteo ni'a quégaca bönachi queë' Cristo*

<sup>1</sup> Biti' uzenu' bach yugu' bönni' gula, pero guchiza icja nágagaquië' didza', tsca nácagaquië' xuz cazu'.

Guchiza icja nágagacabi' bi'i bönni' ra'bán didza', tsca nácagacabi' bi'i böchi' cazu'.

<sup>2</sup> Guchiza icja nágagacanu nigula gula didza', tsca nácagacanu xiná' cazu'.

Guchiza icja nágagacabi' bi'i nigula ra'bán didza', tsca nácagacabi' bi'i zan cazu', ca na' röjlöz le naca idú dxi'a.

<sup>3</sup> Ben bal yugu' nigula ba guti bönni' que queégacanu, nácagacanu túzinu. <sup>4</sup> Channö zóanu tu nigula caní nacuá'abi' bi'i queénu o zxfini xi'sóanu, ral-la' ila'zédabi' ilunbi' ca ré'ënë' Dios, para ilácalenbi' zí'alö bönachi nacuá' lídxigacabi', en ulu'bíibi' quégagaquië' xuz xiná'agacabi'. Lë ni naca dxi'a, en le raza ládxë'ë Dios. <sup>5</sup> Na'a, nigula na' nagá'anamu túzinu, runnu löza Dios, ate' rëla, en te dza rinábatica'sinu lahuë' Dios, en rulídzanu

Lë' ni'a quégaca böñachi queë', <sup>6</sup> pero nigula túzinu na' runnu ca naca le rizé ládxí'nu nácanu ca tu nigula chinátinu cate' ni zóanu nabannu. <sup>7</sup> Lësca' caní, gunná be'e böñachi nacuá' ga ni' zu', para ilún ca sa'yéaj yugu' lë ni, para ilaca böñachi cuntu nu gaca bi inné quéguequi. <sup>8</sup> Channö zoa nu bönni' cabí rugahuë' yugu' di'a dza queë', en le nácarö lo, channö cabí rugahuë' böñachi nacuá' lidxë', chigudá'baguë' le réajlë'ér' Cristo, en nácarë' xihui' ca nu cabí réajlë' Dios.

<sup>9</sup> Túzinu nigula zoanu túzinu caní chiyú'urönu ca tsónnalalaj iz huáca ibábanu nupa gácalenli', channö cabí bucá'anamu-në' bönni' queënu para sóalennu-në' ia'túë' bönni'.

<sup>10</sup> Run bayudxi soa nu gun ba nalí queënu ca nácatagaca le dxí'a runnu.

Gácalenli'-nu channö buscúlunu-bi' yugu' b'ido',

en channö rui'inu ga ila'cuá' bóchi'ru' zá'gaquië' yödzö zi'tu',

en channö rui'inu le ilé'aj ilágugaca böñachi queë' Dios,

en channö rácalennu nupa ta'guí'i ta'zaca',

en channö rúntica'sinu yúgu'të le naca dxí'a.

<sup>11</sup> Yugu' nigula túzinu bití' yu'igacanu tsónnalalaj iz, bití' ibábagacanu nupa gácalenli', tu' ilunnu ca ta'zösö ládxí'gacanu, en ila'dá'baga'nu Cristo, en ilé'ënин ulu'tsaga ná'agacanu leyúbölö. <sup>12</sup> Caní gaca, ila'bága'nu dul-la' tu' tu'zóanu tsölá'alö le gula'yéajlë'enu Cristo zí'alö. <sup>13</sup> Lësca' ilácanu nigula xöhuëdi, en nigula ta'dasö ca', en calégasö ilácanu xöhuëdi, pero lësca' ilácanu nigula unné que luzé'e, en tsöjgútsa'gacanu ga yúbölö, en ila'nnanu le cabí nácatë. <sup>14</sup> Que lë ni na', ré'ënda' ulu'tsaga ná'gacanu leyúbölö nigula túzinu caní yú'ugacanu iz cuidí', en ulu'scúlanu-bi' yugu' b'ido', en ila'nná bë'enu bì'i nacuá'abi' yu'u que queëgacanu, para cabí ilu'inu nu ridá'baga' rë'u lataj bi inné queëru', rë'u na' réajlë'ér' Cristo. <sup>15</sup> Caní ral-la' gaca, tu' chibulu'bíga'nu bál-lagacacnu, ate' tunnu ca ré'ëni Satanás tu' xihui'.

<sup>16</sup> Channö nútí'tés bönni' o nigula nu réajlë' Cristo, nacuá'anu nigula túzinu lídxigaca nupa na', ral-la' ilácalen légacanu, para cabí ulu'saca' zí' böñachi queë' Cristo. Caní gaca, böñachi queë' Cristo na' gaca ilácalen yugu' nigula nagá'anagacanu túzinu.

<sup>17</sup> Benrö bal yugu' bönni' gula tapa chi'ë böñachi queë' Cristo, yugu' bönni' na' ta'nná bë'ë dxí'a, en bëntérö ca' bal yugu' bönni' gula na' tunë' dxin, tunë' libán, en tu'sédinë' böñachi. <sup>18</sup> Nazúaj lu guichi lá'ayi le rnna: "Bití' cu'u du ruá'aba' bëdxí na' rul'biba' zxoa' xtila." Rnna ca': "Náquië' lesaca' nu bönni' huen dxin si'ë lazxjé'."

<sup>19</sup> Bití' si' lu no'o didza' rui'i nu ruzegui didza' tu bönni' gula rapa chi'ë böñachi queë' Cristo, channö cabí nacuá' chopa tsonna nupa tun ba nalí que le benë'. <sup>20</sup> Nupa túntica'sö dul-la', busidxi léguequi lögaca yúgu'të böñachi queë' Cristo para iladxi ia'zíca'rö böñachi ni' Dios. <sup>21</sup> Ni'a queë' Xanru' Dios, en Xanru' Jesucristo, en ni'a quégaequië' gubáz lá'ayi rö queë', rinná bë'eda' li' gunu' ca ta'nná didza' ni. Tuz ca ral-la' uchi'a usöröö' yúgu'të böñachi, en bití' gunu' bal tuzë' bönni'. <sup>22</sup> Cuntu nu bönni' ixóatë no'o, cabí gunu' ga gáquië' huen dxin queë' Cristo, para cabí ibágu'u le runë' channö gunë' bönni' na' dul-la'.

<sup>23</sup> Bítí'rö guí'ju' nísasö. Tu' rúntica'sö bayá' lë'u ral-la' guí'ju' láti'do' xisi uva nal-la para cö' dxí'a lë'u.

<sup>24</sup> Yugu' dul-la' quéguequi bal-la böñachi ila'lá' lahui zí'alö cate' si' ila'dxín ga uchi'a usöröö' Dios léguequi, ate' tödi ni' ila'lá' lahui dul-la' nabága'gaca ia'zíca'rö böñachi.

<sup>25</sup> Lësca' caní, ila'lá' lahui dxin dxí'a núngaca böñachi, ate' channö cabí nalá'gaca lahui, cuntu nu bönni' gaca ucáchë'ë tsaz dxin na' nunë'.

xichíngaquië' tu' ta'yéajlë'ë Cristo, bönni' ni' tu'zi'ë xibé dxin dxi'a na', tu' nadxí'inë' Lë cazë' légaquië'. Ca naca lë ni, busëdi bönachi nacuá' ni', en guchiza le icja nágagaquië'.

### *Le reaj ládxí'ru'-në' Dios le ruzí'iru' xibé*

<sup>3</sup> Channö zoa nu bönni' rusédinë' xibá yúbölö, en biti' rusédinë' yugu' didza' dxi'a queë' Xanru' Jesucristo, ca naca xibá na' rusedi rë'u ca ral-la' gunru' ca ré'ënë' Dios, <sup>4</sup> bönni' ni run ba zxön cuinë', en biti' bi nőzinë'. Didza' biti' naca dxi'a rizé ládxë'ë ca nácagaca didza' böniga, en didza' bizxaj, yugu' le tun ga tu'zxé'e bönachi luzé'eguequi, en ta'díllalen luzé'eguequi didza'. Lësca' tun didza' caní ga ta'nné zi' bönachi que luzé'eguequi, en ta'zá' ládxí'gaca que luzé'eguequi le cabí nácatë. <sup>5</sup> Lësca' caní tun ga ta'díllatica'sé' didza' bönni' biti' ta'yéajni'inë', nupa biti' nazí' lu né'eguequi le naca idútë li. Téquini huáca ila'zí' dumí zián channö ilúngaca tsözxón nupa ta'yéaj ládxí'gaca Dios. Gucuítä ga nacuá' bönachi caní. <sup>6</sup> Zxön naca le ruzí'iru' xibé cate' len yöl-la' riböza zxön ladxi' reaj ládxí'ru'-në' Dios. <sup>7</sup> Biti' bi nuá'aru' cate' ridxinru' yödzölió, en lësca' caní, biti' bi uá'aru' cate' uzá'aru' yödzölió ni. <sup>8</sup> Que lë ni na', channö dësö queëru' le gáguru', en le gácuru', ral-la' udzéjaru'. <sup>9</sup> Yugu' bönni' té'ënnë' gata' quégaquië' yöl-la' tsahui', gaca quégaquië' le si' bë' légaquië' le xihui', ate' ila'yu'ë lu yalaj que tu' xihui', ate' lu yöl-la' biti' bi nözi quégaquië' zián le ila'zé ládxí'gaquië', le ilún ditaj légaquië'. Yugu' lë ni ulu'suniti légaquië', en ilún ga ila'nítië' tsaz. <sup>10</sup> Tu' ta'zé ládxí'gaca bönachi dumí, lë ni run ga tun yúgu'të le cabí naca tsahui'. Bal-lë' bönni', tu' ta'zé ládxí'gaquië' le, bulu'cá'anë' le gula'yéajlë'ë Cristo, en chiraca quégaquië' zián le tu'saca' zi' légaquië'.

### *Nu run dxin queë' Cristo naca ca tu bönni' rejë' gudil-la*

<sup>11</sup> Na'a, bönni' queë' Dios, gucuítä ga raca le caní.

Bé'tica'sö ládxu'u gunu' le naca tsahui', en le ré'ënë' Dios.

Guyéajlë'tica'sé' Cristo, en bidxf'i yugu' luzó'o.

Bé' ladxi' gacu' zxön ladxi', en nöxaj ladxi'.

<sup>12</sup> Ca runé' tu bönni' idú ládxë'ë rejë' gudil-la,

ben dxin que le réajlë'ëru' Cristo, ate' beni quiu' yöl-la' na'bán idú.

Para gaca caní bulidzë' Dios li'. Dxi'a guca le gunnó' yalaj lulu ca réajlë'u Cristo, lë na' gunnó' lögaca zián nupa tun ba nalí que didza' bë'u. <sup>13-14</sup> Ni'a queë' Xanru' Dios, Nu na' nabánigaca yúgu'të le nacuá', enca' ni'a queë' Jesucristo, Nu ben ba nalí le naca dxi'a le gunnë' yálajdo' lahuë' Poncio Pilato, rinná bë'eda' li' gun chi'u yugu' lë na' gunná bë'enë' Cristo rë'u. Ral-la' gacu' idú tsahui', en biti' bi gunu' le gü'i lataj nu bi inné quiu', ga idxintë dza ni' ului'i lahuë' Xanru' Jesucristo. <sup>15</sup> Cate' idxín dza na' huödë' Jesús, Dios ulu'ë lahuí Lë'.

¡Dios náquië' lá'ayi!

¡Tuzë' Lë' dë lu né'ë yöl-la' unná bë',

en rinná bë'enë' yúgu'të nupa ta'nná bë',

en náquië' ca' Xángaca yúgu'të nupa nácagaca xan!

<sup>16</sup> ¡Tuzë' Lë' zóatica'sé'!

¡Zoë' lu beni' ga biti' gaca nu idxín rácasö que!

¡Catu caz nu bilé'e Lë', en biti' gaca nu ilé'e Lë'!

¡Queë' Lë' gácatica'sö le run Lë' bal, en yöl-la' unná bë'!

¡Ca' gaca!

<sup>17</sup> Gunná be'e yugu' bönni' dë quégaquië' yöl-la' tsahui' dza ni zóaru' na'a, para cabí ilún ba zxön cuíngaquië', en para cabí ulu'zxöni ládxí'gaquië' yöl-la' tsahui' na' biti' naca löza. ¡Ral-la' ilunë' löza Dios ban, Nu rúnnada' queëru' yúgu'të le ruzí'iru' xibé! <sup>18</sup> Gunná be'e légaquië' ilunë' le naca dxi'a, para ila'yanda' dxin dxi'a tunë', lë na' naca tu yöl-la' tsahui' idú. Ral-la' bi ulu'nödzjë' quégaca bönachi yechi', en ilu'i ládxí'gaquië' léguequi.

<sup>19</sup> Channö ilunë' caní, ulu'tubë' yöl-la' tsahui' na' naca idú, le ulu'zi'ë xibé dza si' za', en ila'déli'në' yöl-la' na'bán idú.

*Le gulu'ë Pablo lu ná'abi' bi'i Timoteo*

<sup>20</sup> Bócha'ado' Timoteo, ben chi'i le nadödi lu no'o. Gucuíta ga nacuá' nupa tu'i didza' cá'asö, en yugu' didza' biti' nazaca', en yugu' didza' bizxaj, yugu' didza' na' tu'i nupa ta'nnasö tábada', ate' nazí' yé'eguequi ca naca lë na' tun. <sup>21</sup> Bal-la bönachi gula'zi' lu né'eguequi yugu' didza' caní, ate' gula'chixi gula'nigui ca naca le réajlë'ér' Cristo.

Rinábida'-në' Dios uzá' ládxë'ë quiu' le nácagaca dxi'a queë'.

¡Ca' gaca!

## DIDZA' BUROPI GUSÓL-LË'Ë PABLO QUEÉBI' BI'I TIMOTEO

### *Pablo rugapé' Dios bi'i Timoteo*

<sup>1</sup> Neda', Pablo, naca' gubáz nasól-lë'ë Cristo. Caní naca' tu' ré'ënë' Dios gaca' caní, para caní gaca le guzxí' lu né'ë, gunnë' queéru' yöl-la' na'bán idú, le ruzá' ládxé'ë Jesucristo queéru'. <sup>2</sup> Rugapa' Dios li', bóch'a'ado' Timoteo. Nacu' ca zxí'ini caza' tu' benru' tu zxön xichinë' Cristo, ate' nadxi'ida' li'. Rinábida'-né' Xúziru' Dios, enca' Xanru' Jesucristo, uzá' ládxé'ë quiu', en huéchi' ládxé'ë li', en gunë' ga cö' dxi icja ládxí'do'o.

### *Timoteo ral-la' gunbi' ba nalí queé' Jesucristo*

<sup>3</sup> Rea'-né' Dios: "Xclenu'" ca naca quiu' cate' rulidza'-né' Dios. Biti' rizóa dxía' rinaba' ni'a quiu' rëla, en te dza lahuë' Dios, Nu na' runa' xichinë' idú ládex'a' ca na' gulunë' xuz xtá'ahua'. <sup>4</sup> Cate' röjneda' ca na' gurödxu', rizé ládex'a' ulé'eda' li', para gaca udzéjada' idú ládex'a'. <sup>5</sup> Rea'-né' Dios: "Xclenu'" tu' zoa le run ga röjneda' ca réajlë'u Cristo idú ládxu'u. Lësca' caní, gula'yéajlë'ënu xinó'o gula Loida, enca' xinó'o Eunice Lë' zí'alö ca li', ate' runa' löza, lësca' caní réajlë'u Lë' na'a.

<sup>6</sup> Tu' naca caní, rusá'a ládxu'u para usubanu' le bennë' Dios quiu', lë na' bidxín quiu' cate' ni' guxóa na'a li', en bulidza'-né' Dios. <sup>7</sup> Bö' na' bennë' Dios queéru' biti' naca tu bö' le gun ga gádxiru', pero bennë' queéru' Bö' Lá'ayi Nu run ga náparu' yöl-la' huáca, en run ga nadxi'iru' luzá'aru', en run ca' ga rinná be'e cuinru'. <sup>8</sup> Que lë ni na', biti' utu' inu' gunu' ba nalí queé' Xanru', en biti' utu' inu' ca raca quia' neda' ni, nadzuna' lidxi guíë tu' runa' xichinë', pero ben tsözxón nupa ta'gu'i ta'zaca' tu' tun libán que didza' dxi'a. Dios gunnë' yöl-la' huáca quiu' para gunu' caní. <sup>9</sup> Dios caz busölé' ré'u, en bulidzé' ré'u para gácaru' idú dxi'a. Biti' bulidzé' ré'u tu' zoa le dxi'a benru', pero bulidzé' ré'u tu' gú'uni quézinë' Lë', en tu' ruzá' ládxé'ë caní queéru'. Dza ni'te buzóë' caní queéru' zí'atëlö ca guta' yödzölió ni, tu' néquiru' queé' Jesucristo. <sup>10</sup> Na'a, chibului'i lahu le ruzá' ládxé'ë Dios queéru', tu' bului'i lahuë' Jesucristo Nu rusólá ré'u. Bugüé' yöl-la' guti, en bulu'e lahu yöl-la' na'bán idú na', le cabí ca' initi. Caní naca ca rnna didza' dxi'a.

<sup>11</sup> Cristo buzóë' neda' para guna' libán que didza' dxi'a na', en para gaca' gubáz queé' para usédigacada' bönachi izá'a. <sup>12</sup> Que lë ni na' rigu'i rizáca'a ca' yugu' le raca quia' ni, pero biti' rutu'ida', tu' núnbë'a Nu na' réajlë'a. Runa' löza Lë', napë' yöl-la' huáca gapa chi'ë le budöda' lu né'ë ga idxintë dza ni' huödë'.

<sup>13</sup> Didza' dxi'a na' biyönnu' bena' libán que ral-la' gaca quiu' tu le rulu'i ca ral-la' usédinu' bönachi ca réajlë'ëru' Jesucristo, en ca nadxi'iru' Lë'. <sup>14</sup> Ben chi'i le naca dxi'a na' nadödi lu no'o, ate' gaca gunu' caní len yöl-la' huáca queé' Dios Bö' Lá'ayi, Nu zóalen ré'u.

<sup>15</sup> Chinóz quézinu' ca na' gulunë' zian bönni' ta'yéajlë'ë Cristo nacu'ë luyú Asia bulu'béaj ládex'a'gaquië' neda'. Figelo, en Hermógenes nabábaguacië' bönni' ni.

<sup>16-17</sup> Rinábida'-né' Xanru' Dios huéchi' ládxé'ë bönachi nacuá' lidxé' Onesíforo, tu' butipë' ládex'a' bönni' ni zián luzuú. Cate' bidxinë' Roma, idú ládxé'ë buguiljë' neda', ate' budzölinë' neda'. Biti' butu' inë' ni'a quia' neda' tu' nadzuna' lidxi guíë ni, nága'a du guíë.

<sup>18</sup> Rinábida'-né' Xanru' huéchi' ládxé'ë lë' dza ni' idxinë' lahuë' Dios. Chinóz quézinu' ca na' gúcalenë' bönni' ni ré'u, cate' ni' guzóaru' yödzö Éfeso.

<sup>1</sup> Na'a, zxí'ina'do', butipa ládxu'u ca naca le ruzá' ládxé'ë Jesucristo quiu'. <sup>2</sup> Didza' biyönnu' bë'a lögaca zián nupa tun ba nalí que, didza' ni budödi lu ná'agaquië' bönni' tuné' ca ta'nné', bönni' gaca ulu'sédiné' ca' ia'bal-la bönnachi.

<sup>3</sup> Ral-la' guá' ilenu' le ulu'saca' lí' zi' ca na' ruá' rilén nu naca bönni' queë' Jesucristo idú ládxé'ë rejé' gudil-la. <sup>4</sup> Nu bönni' rejé' gudil-la, biti' ca' gútsë'ë yugu' le tun bönnachi yödzölió ni, para tsaza ládxé'ë bönni' na' nuzóë' lë' gáquië' bönni' queë' rejé' gudil-la. <sup>5</sup> Lësca' caní, nu nutsa' lu huitaj, biti' bi ideli' channö cabí run ca ral-la' gun. <sup>6</sup> Nu bönni' gúz gú'una runé' dxin, zí'alö lë' uzi'ë xibé lë na' razé'. <sup>7</sup> Busá' ládxu'u lë ni rea' li', ate' Xanru' caz guné' ga tséajni'inu' yúgu'té.

<sup>8</sup> Yöjné ca guca queë' Jesucristo. Guljé', en gúquië' zxí'ini xi'sóë' David, en gudödi gútië', bubanë' lu yöl-la' guti. Caní rnna didza' dxi'a runa' libán que. <sup>9</sup> Tu' runa' libán que didza' dxi'a, rigui'i rizáca'a le raca quia', ga ridxitnë nág'a lidxi guié ni, ca raca queë' tu bönni' huía' dö', pero biti' ca' nág'a tē xtídzé'ë Dios. <sup>10</sup> Que lë ni na' ruá' riléna' yúgu'té lë ni tu' nadxí'ida' nupa guróë' Dios, para ulu'lé' ca' légaquië'. Jesucristo caz runé' ga ulu'lágaca bönnachi na' para ila'cuá' lu bení' idú queë'. <sup>11</sup> Catéz naca lë ni rnna:

Channö nátilenru' Lë', sóalenru'-në' ca' ibanru'.

<sup>12</sup> Channö guá' ilenru' le qui'i sáca'ru', inná bë'lenru' ca' Lë'.

Channö ridá'baga'ru' Lë', Lë' tá'baguë'ë ca' rë'u.

<sup>13</sup> Sal-la' biti' runru' ca rnnaru', Lë' rúntica'së' ca rnnë'.

Lë' biti' gaca tá'baguë'ë le náquië'.

### Nu bönni' huen dxin queë' Cristo rurúaje' dxi'a

<sup>14</sup> Busá' ládxí'gaca nupa nacuá' ga ni' zu' ca naca lë ni, ate' ni'a queë' Xanru' Dios gunná be'e légaquië' para cabí ila'dil-la dídzé'ë ca nácagaca didza' cabí nazáca'gaca. Yugu' didza' caní tun ga ila'niti nupa tú'zé nagui léguequi. <sup>15</sup> Bé'tica'só ládxu'u urúaju' dxi'a lahuë' Dios para gacu' ca tu bönni' huen dxin biti' rutu'fínë' ca naca dxin nuné'. Dxi'ado' ral-la' ugunu' dxin didza' idútë li. <sup>16</sup> Na'a, gucuítä ga nacuá' nupa tu'i didza' biti' nazaca', en didza' cá'asö, tu' tun didza' caní ga ilunré' le cabí ré'ënë' Dios. <sup>17</sup> Ila'zé' didza' tu'ë ca rizxón huë' nudzu' le ridídu' rilá. Himeneo, en Fileto nabábagaquië' nupa tu'i didza' caní. <sup>18</sup> Iropë' ni gula'chixi gula'níguiné' ca naca le naca idútë li, tu' ta'nné' chigudödi dza ral-la' ulu'bán nupa chinátigaca, ate' gula'béquië' baróli bal-la bönnachi ga ridxitnë bíti'rö ta'yéajlë' Cristo. <sup>19</sup> Le benë' tsutsu Dios zóatica'sö, en dë tu le naca bë', le rnna: "Núnbeë'ë Dios nupa néquiguequi queë'." Rnna ca': "Guli'cuítä ga raca le ruá' dö', yúgu'téli' libí'ili' néquili' queë' Cristo."

<sup>20</sup> Tu lu yu'u zxön yú'ugaca le néquini, calégasö oro, en plata, pero lësca' le néquini yaga, en yu. Bal-la tu'gún bönnachi léguequi dxin ga liná', ate' ia'bal-la tu'gún léguequi dxin ga biti' naca liná'. <sup>21</sup> Para gácaru' ca naca lë na' tu'gún bönnachi dxin ga liná', en para gaca gunru' le naca dxi'a, en gácaru' lesaca' uguné' Xanru' rë'u dxin, ral-la' ucuítaru' ga raca le ruá' dö'. Channö gunru' caní, gácaru' lesaca' gunru' yúgu'té dxin dxi'a.

<sup>22</sup> Gurú'una le tun ga nu së ladxi' le ruá' dö' ca raca quégaquië' bönni' ra'bando'. Bë' ladxi' gacu' tsahui'. Ben le run ga réajlë'u Cristo, en le run ga nadxí'inu' yugu' luzó'o, en le run ga ribözü' dxi'ado'. Ca nácagaca lë ni, ben tsözxón nupa tu'lidza Xanru', naca idú dxi'a icja ládxí'do'guequi. <sup>23</sup> Na'a, gurú'una yugu' didza' cá'asö, en didza' biti' nazaca', tu' chinöz quézinu' tun didza' caní ga ta'dil-la didza' bönnachi. <sup>24</sup> Bönni' huen dxin queë' Xanru' biti' ral-la' tíl-lalené' bönnachi didza', pero ral-la' gáquië' nöxa jadxi' lögaca yúgu'té bönnachi. Ral-la' gaca usédinë' bönnachi, en gáquië' ca' zxön ladxi'. <sup>25</sup> Lu yöl-la' nöxa jadxi' ral-la' uzéajni'inë' nupa ta'dá'baga' le runé' libán que. Channö guné' caní, nadxi ca' Dios gu'ë légaquië' lataj ulu'bí'i ládxí'gaquië' para ilúnbeë'ë le naca idútë li. <sup>26</sup> Caní ulu'lé' lu yalaj que tu' xihui' ga nadzúngaqüie', ate' ulu'huöáquië' tsahui' para ilunë' ca ré'ënë' Dios.

*Ca ilaca bönachi dza tsöjsétëgaca*

<sup>1</sup> Lësca' ral-la' inőzinu' lë ni: Dza tsöjsétëgaca ilaca dza ila'gui'i ila'zaca' bönachi.  
<sup>2</sup> Yugu' dza ni' ila'cu'ë bönni' ilácagaquië' caní:  
 Ila'dxí'i la' cuíngacasë', en ulu'huídi'në'.  
 Ilún ba zxön cuíngaquië', en ulu'lui'i cuíngaquië' zxön.  
 Ila'nné zi'ë que le naca lá'ayi.  
 Ila'dá'baguë'ë xuz xiná'agaquië'.  
 Ilácagaquië' bönni' cabí ta'yaza ládx'i'gaquië'.  
 Biti' iluné' ca ré'ënë' Dios.  
<sup>3</sup> Biti' ila'dxí'iné' ca ral-la' iluné'.  
 Ilácagaquië' zidzaj ladxi'.  
 Ila'nné' que luzá'agaquië'.  
 Biti' ila'nná be'e cuíngaquië'.  
 Ilácagaquië' bönni' dza'a.  
 Biti' ila'lé'enë' dxi'a le naca dxi'a.  
<sup>4</sup> Ilácagaquië' hueti luzé'e, en biti' ila'dzáguië' dxi'a.  
 Ulu'lui'i cuíngaquië' ca bönni' nayépisëgaquië'.  
 Ila'dxí'iné' le ila'yázasö ládx'i'gaquië', en caléga Dios.  
<sup>5</sup> Ulu'lui'i cuíngaquië' ca bönni' núnbë'gaquië' Dios.  
 Ila'dá'baguë'ë le ruzá' ládxë'ë Dios queéru'.

Gucuíta ga nacuá' bönachi caní. <sup>6</sup> Lësca' caní, lu yöl-la' banísä quégaquië' ila'yazë' gapa naca lu yu'u, en ila'zí' yé'enë' yugu' nigula biti' bi nőzguequinu para ila'zí' lu ná'agacanu le ulu'sédinë'. Ila'bága'nu nigula na' dul-la' zián, en ilu'i ládx'i'gacanu yugu' le ila'zësö ládx'i'gacanu le cabí nazaca'. <sup>7</sup> Ila'yónitica'sinu nigula ni didza' ilún libán que bönachi, pero biti' ca' ila'déli'nu ila'yéajni'ininu le naca idútë li. <sup>8</sup> Ca na' guláquië' Janes, en Jambres, bönni' ni' gula'dá'baguë'ë Moisés, lësca' caní ilácagaquië' bönni' ni, ila'dá'baguë'ë le naca idútë li. Ilácagaquië' chul-la niti, en ila'chíxiné' ca naca le réajlé'ëru' Cristo. <sup>9</sup> Biti' ila'déli'rönë', pero gaca bë' nácagaquië' bönni' biti' bi nőzguequinë' lógaca yúgu'të bönachi, ate' gaca quégaquië' ca na' guca quégaquië' Janes, en Jambres na'.

*Le rigü'ë Pablo lu ná'abi' bi'i Timoteo*

<sup>10</sup> Nöz quézinu' ca naca le rusédida' bönachi, en ca runa'. Nőzinu' ca' le rui'i ládx'a' guna', en ca réajlé'a Cristo, en ca naca' nöxaj ladxi', en ca nadxf'ida' luzá'a, en ca riböza' zxön ladxi'. <sup>11</sup> Nőzinu' ca' yugu' le gula'bía ládx'i'gaca bönachi neda', en yugu' le gudi'i guzxáca'a, le gulaca quia' lu yödzö Antioquía, en lu yödzö Iconio, enca' lu yödzö Listra. Yugu' le gula'bía ládx'i'gaca bönachi ni' neda' biá' guléna', ate' Xanru' Jesús busólë' neda' lu yúgu'të lë na'. <sup>12</sup> Yúgu'të nupa té'ëni ilaca idú dxi'a tu' néquiguequi queé' Jesucristo, lësca' ila'gui'i ila'záquië' yugu' le ila'bía ládx'i'gaca bönachi légaquië'.

<sup>13</sup> Na'a, bönni' tuá' dö', en bönni' ta'zí' yé'ë ilácarë' xihui'. Ila'zí' yé'enë' bönachi, ate' ila'zí' yé'ë bönachi ca' légaquië'.

<sup>14</sup> Na'a, ben chi'i yugu' le buzëdu', en le guzxi' lu no'o, tu' nunbë' cazu' nupa bulu'sedi li'. <sup>15</sup> Ga gudela' nacu' bñido' núnbë'u le nazúajgaca lu guichi lá'ayi, le huáca ulu'zéajni'ide'e li' para uló' tu' réajlé'u Jesucristo. <sup>16</sup> Yúgu'të le nazúajgaca lu guichi lá'ayi guchízië' Dios icja ládx'i'do'gaca bönachi queé', nupa na' bulu'zúaj lu guichi didza' na' bë'ë Dios. Lë na' nazúaj lu guichi nácada' lesaca' usedi rë'u, en ubéaj ga liná' le runru', en ugú'u rë'u tu nöza, en usedi rë'u para gácaru' tsahui'. <sup>17</sup> Caní run, para gaca sina' nu naca queé' Dios, en gácada' gun yúgu'të le naca dxi'a.

## 4

<sup>1-2</sup> Ni'a queë' Xanru' Dios, enca' Xanru' Jesucristo, rinná bë'eda' li' gunu' libán que xtídzë'ë Xanru'. Lë cazë' uchi'a usöröö' nupa ni nabángaca, en nupa chinátigaca, dza ni' huödë' idinná bë'ë. Bë' ladxi' gunu' lë ni channö raca dxí'a quiu' o biti' raca dxí'a. Lu yöl-la' zxön ladxi', guléaj ga liná' le tun böñachi. Busá' ládxí'gaquië', en guchiza icja nágagaquië' ca naca lë na' rusédiru'. <sup>3</sup> Caní ral-la' gunu' tu' idxín dza cate' biti' ulu'zë' nágagaquië' xibá tsahui', pero ilé'ënинë' ila'yönnë' le ta'dánisinë'. Ca ta'zësö ládxí'gaquië' ulu'tubë' quégaquië' nupa ulu'sedi légaquië'. <sup>4</sup> Ulu'cá'anë' le naca idútë li, en ila'zí' lu ná'agaquië' yugu' didza' ridasö. <sup>5</sup> Na'a, ral-la' gacu' zxön ladxi' lu yúgu'të le runu'. Biá' gulén le ulu'saca' li' zí'. Ben libán que didza' dxí'a. Idú ládxu'u ben dxin le budödë' Cristo lu no'o' gunu'.

<sup>6</sup> Ca naca quia' neda', nudödi cuina' lu në'ë Dios, ate' chizóa ilútië' neda' tu' runa' xichinë', ate' dza uzá'a yödzölió ni chizóa idxín. <sup>7</sup> Ca runë' tu bönni' idú ládxë'ë rejë' gudil-la, lësca' caní bena' neda' dxin, en chibudxi bena' le budödë' Cristo lu na'a guna', tu' bena' idú ca sa'yéaj le réajlé'ëru' Cristo. <sup>8</sup> Ia'stú, naca löza quia' idéli'da' le ral-la' ila'zí' nupa nácagaca tsahui', le gunnë' Xanru' quia' dza ni', ate' tsahui' naca ca ruchi'a rusöröö' rë'u. Calégasö quia' neda' gunnë' le, pero lësca' gunnë' le quégaca yúgu'të nupa ta'dxí'i Lë', en idú ládxí'guequi ta'böza dza huödë'.

*Le buzájë' lu guichi Pablo gunbi' Timoteo*

<sup>9</sup> Bë' ladxi' guídateo' ga ni zoa' <sup>10</sup> tu' guléaj ládxë'ë Demas neda', tu' nadxí'inë' le ruzi'ë xibé yödzölió ni, ate' guyijé' yödzö Tesalónica. Crescente guyijé' luyú Galacia, ate' bi'i Tito guyéajbi' luyú Dalmacia, tu' caní ben bayudxi ilunë'. <sup>11</sup> Tuzë' Lucas zóalenë' neda'. Guché'ë-bi' bi'i Marcos para guídalenbi' li' tsözxón, tu' nácabi' gúnlenbi' neda' tsözxón xichinë' Cristo. <sup>12</sup> Gusól-la'a-bi' bi'i Tíquico lu yödzö Éfeso. <sup>13</sup> Cate' guídu', biá' quia' lari' guitsa' na' bucá'ana' lu yödzö Troas lu yu'u lidxë' Carpo, en biá' ca' quia' yugu' guichi, en le naca lo, biá' quia' yugu' guichi néquigueequini guídi.

<sup>14</sup> Alejandro, bönni' gubëdxí guíie, zián le bi'ë dö' quia'. Lë cazë' Xanru' ubi'ë queë' ca nácagaca le benë' bönni' ni quia'. <sup>15</sup> Ben chi'i cuinu' queë' bönni' ni, tu' ridá'baga'dë'ë didza' runru' libán que.

<sup>16</sup> Cate' le zí'alö luzuí bidxina' lógaquië' bönni' yúlahui', cuntu nu gúcalen neda', pero bulu'béaj ládxí'gaca yúgu'të böñachi neda'. Biti' ré'ënda' uzí' lëbë' Dios légaquië'. <sup>17</sup> Guzáalenë' Xanru' neda', en butipë' ládx'a para údxí guna' libán que xtídzë'ë para ila'yöni yúgu'të böñachi izá'a le. Caní guca, busölé' Xanru' neda', ate' guca quia' tsca burúaja' lu ruá'aba' bëdxí guixi'. <sup>18</sup> Lë cazë' Xanru' usölé' neda' lu yúgu'të le cabí raca dxí'a, en gun chi'ë neda' ga idxíntea' ga rinná bë'ë Lë' ni' yehua' yubá. ¡Gácatica'sö queë' yöl-la' ba yúgu'të dza zá'gaca! ¡Ca' gaca!

*Pablo rugapë' Dios böñachi queë' Cristo*

<sup>19</sup> Bugapa Dios Priscila, en Aquilo, enca' böñachi nacuá' lidxë' Onesíforo. <sup>20</sup> Bugá'anë' Erasto lu yödzö Corinto, ate' bucá'ana'-në' Trófimo luyú Mileto tu' ré'enë'. <sup>21</sup> Bë' ladxi' guídu' ga zoa' zí'alö cate' idxín beo' ziaga. Eubulo, en Pudente, en Lino, en Claudia, en yúgu'të böchi' luzá'aru' ni tu'gapë' Dios li'.

<sup>22</sup> Rinábida'-në' Xanru' Jesucristo sóalenë' li'. ¡Gácalen li' le ruzá' ládxë'ë Dios quiu'! ¡Ca' gaca!

## DIDZA' GUSÖL-LË'Ë PABLO QUEËBI' BI'I TITO

### *Pablo rugapë' Dios bi'i Tito*

<sup>1</sup> Neda', Pablo, naca' huen dxin queë' Dios, en gubáz nasól-lé'ë Jesucristo. Gusöl-lé'ë neda' para guna' ga ila'yéajlë' böñachi chiguró cazë' Dios, para ulu'únbë' le naca idútë li ca ral-la' gun nu nunbë' Dios. <sup>2</sup> Caní naca' tu' runa' löza uzi'a xibé yöl-la' na'bán idú le guzxi' lu né'ë Dios gunnë' queéru' dza ni'te, cate' si' gusí lo rata' yúgu'të le dë, ate' run cazë' Lë' le nazi' lu né'ë gunë'. <sup>3</sup> Cate' bidxín dza que, Dios bulu'e lahui xtídzë'ë, le gulu'ë lu na'a guna' libán que. Caní gunná bë'enë' Dios, Nu busölá rë'u, neda'. <sup>4</sup> Rugapa' Dios li', bö'cha'ado' Tito. Nacu' idú zxí'ini caza' tu' naca lébisö ca réajlë'ëru' Cristo. Rinábida'-né' Dios Xuz, en Xanru' Jesucristo Nu busölá rë'u, uzá' ládxë'ë quiu', en huéchi' ládxë'ë li', en gunë' ga soa dxi icja ládxí'do'o.

### *Dxin queë' Cristo runbi' bi'i Tito luyú Creta*

<sup>5</sup> Que lë ni na' bucá'ana' li' luyú Creta, para usó'o le riyadzaj quégaca böñachi queë' Cristo nacuá' ni', para ilácagaca idú böñachi queë' Cristo, en para ucú'u bönni' gula yúgu'të yödzö para ilún chi'ë böñachi queë' Cristo nacuá' tu tu yödzö ni', ca na' chigunná bë'eda' li' gunu'. <sup>6</sup> Nu bönni' gula rapa chi'ë böñachi queë' Cristo ral-la' gáquië': Bönni' cuntu nu bi gaca inné queë'.

Zoa túzinu nigula queë'.

Yugu' zxí'inë' ral-la' ila'yéajlë'ëbi' Cristo.

Biti' soa nu gaca inné quégacabi' ta'dá dzágasibi' ca', o ta'dá'baga'bi' xuz xiná'agacabi'.

<sup>7</sup> Nu bönni' rapa chi'ë böñachi queë' Cristo run bayudxi:

Biti' runë' le gü'i lataj nu bi inné queë' ca runë' xichinë' Dios.

Biti' gáquië' bönni' zidi o bönni' icja dza'a, o bönni' re'je', o bönni' ribízxjanë', o bönni' rizé ládxí'sé' dumí.

<sup>8</sup> Ral-la' gu'ë ga ila'cu'ë böchí'ru' ta'dxinë' lidxe'.

Ral-la' së ládxë'ë gunë' le naca dxi'a.

Ral-la' gáquië' bönni' réajni'i, en bönni' tsahui'.

Ral-la' gádxinë' Dios, en inná be'e cuinë'.

<sup>9</sup> Ral-la' gun chi'ë didza' idútë li ca chinazëdë', para gaca ichízië' icja nágagaca böñachi ca sa'yéaj xibá dxi'a, en para gaca usayje' rú'agaca böñachi ta'nné que.

<sup>10</sup> Caní ral-la' gáquië' tu' ta'dá'baguë'ë zián bönni', en tu'ë didza' biti' nazaca', en ta'zí' yé'enë' böñachi. Zián bönni' tunë' caní nácagaquië' judío. <sup>11</sup> Yugu' bönni' ni, run bayudxi gunu' ga tsayaj ruá'agaquië', tu' tunë' ga ta'chixi ta'nigui yúgu'të böñachi nacuá' yu'u gapa ta'yázië', en tu'sédinë' le cabí ral-la' ulu'sédinë'. Caní tunë' para ila'zí'isë' dumí.

<sup>12</sup> Tuë' bönni' gubábë' böñachi Creta ga na' zu', bönni' na' bë'ë didza' uláz que yudo' quégäquië', gunnë': "Ta'zí' yé'tica'së' bönni' Creta, en nácagaquië' ca bö'a guí'a sínia'. Nácagaquië' bönni' huágulë'ë xöhuëdi." <sup>13</sup> Didza' ni benë' ba nalí quégäquië' naca idútë li. Que lë ni na' gudil-la légaquië' para gaca idú ca ta'yéajlë'ë Cristo, <sup>14</sup> en para cabí ulu'zé nágagaquië' yugu' didza' ridasö quégäquië' bönni' judío, en biti' ilunë' ca ta'nná bë' böñachi nucá'anagaca le naca idútë li.

<sup>15</sup> Yúgu'të naca dxi'a quégaca nupa nácagaca dxi'a, pero quégaca nupa nácagaca xihui', en biti' ta'yéajlë', biti' bi naca dxi'a, pero nácagaca xihui' ga ridxitë le ta'bequi ícjaguequi, en le ta'zá' ládxí'gaca. <sup>16</sup> Ta'nné' núnbë'gaquië' Dios, pero le túngaquië' biti'

röjlöz le ta'nné' tu' nácagaquië' bönni' tu'd'iné' Dios. Ta'dá'baguë'ë xtídzë'ë, en biti' ca' gaca ilunë' le naca dxi'a.

## 2

*Xibá dxi'a le ral-la' usédiru'*

<sup>1</sup> Na'a, ral-la' gu'u didza' le röjlöz xibá dxi'a.

<sup>2</sup> Busedi yugu' bönni' gula:

Biti' ral-la' ilé'ajë'.

Ral-la' iláquië' ba'a ladxi', en bönni' ta'yéajni'iné'.

Ral-la' gaca idú ca ta'yéajlé'ë Cristo.

Ral-la' ila'dxi'iné' luzá'agaquië', en ila'bözë' zxön ladxi'.

<sup>3</sup> Busedi yugu' nigula gula:

Ilunnu le raza ládxë'ë Dios.

Cabí ila'nnénu que luzá'agacanu, en cabí ilé'ajnu.

Ral-la' ulu'sédinu le naca dxi'a.

<sup>4</sup> Ral-la' ulu'sédinu' nigula ni' yú'ugacanu iz cuidi'

para ila'dxi'nu bönni' que queégacanu, enca' zxí'inigacanu.

<sup>5</sup> Ral-la' ilácanu nigula ta'yéajni'inu, en nigula dxi'a ladxi'.

Ral-la' ilún chf'nu le dë lídxigacanu, en ilácanu dxi'a.

Ral-la' ilunnu bal bönni' que queégacanu.

Ral-la' cabí bi ilunnu le gü'i lataj nu inné zi' que xtídzë'ë Dios.

<sup>6</sup> Busedi yugu' bönni' ni' nacu'ë iz cuidi':

Ral-la' ilácagaquië' bönni' ta'yéajni'iné'.

<sup>7</sup> Ral-la' góntica'su' le naca dxi'a,

ulu'i'nu'bönachi caní ca ral-la' ilúngaca.

Ca rusédinu' ral-la' ulu'i nacu' idú ladxi', en ba'a ladxi'.

<sup>8</sup> Ral-la' usédinu' didza' dxi'a le cabí gaca nu bi inné que.

Caní gunu' ga utu'iné' bönni' ridá'baguë'ë,

en biti' gaca bi inné' queéli' runli' le ruá' dö'.

<sup>9</sup> Busedi bóchi'ru' ni' ta'yéajlé'ë Cristo, en nadó'ogaquië':

Ral-la' ila'cu'ë nöxaj lógaquië' xángaquië'.

Ral-la' ilunë' yúgu'të le ila'yaza ládxí'gaquië' xángaquië'.

Biti' ral-la' tá'baga'gaquië' le ta'nná bë'ë.

<sup>10</sup> Biti' bi ulu'cáchi'lanë'.

Ral-la' ulu'lui'i cuíngaquië' tsahui' ca naca yúgu'të le tunë'.

Caní ulu'i lo naca dxi'a xibá queë' Dios, Nu busólá rë'u.

<sup>11</sup> Cristo, bönni' na' buzá' ládxë'ë Dios queéru' chibulu'i lahuë' lógaca yúgu'të bönnachi para ulu'lágaca. <sup>12</sup> Lë' rusédinë' rë'u ucá'anaru' le cabí raza ládxë'ë Dios, en cabí së ládxí'ru' le naca que yödzölió ni, pero cójzaru' zxön ladxi', en gácaru' tsahui' dza ni zóaru' na'a, en gunru' ca ré'eni quéziné' Dios. <sup>13</sup> Ral-la' cójzaru' le runru' löza le gun ga gácaru' bica' ba, lë na' gaca dza ni' cate' ulu'i lahuë' Jesucristo lu bení' idú queë'. Náquië' Dios zxön, Nu rusólá rë'u. <sup>14</sup> Lë cazé' budödi cuiné' uláz queéru', para böá'uë' rë'u lu yúgu'të le naca xihui', ate' ruúnë' rë'u tsahui' para gácaru' bönnachi queë', en gü'i ládxí'ru' gunru' le naca dxi'a.

<sup>15</sup> Yugu' lë ni bë' didza', en guchiza icja nágagaca bönnachi ni', ate' len yöl-la' unná bë' gudil-la léguequi. Béntica'sö caní, para cabí si' lataj nu ucá'ana cá'asö xtídzu'u.

## 3

*Le ral-la' ilún bönnachi ta'yéajlé'ë Cristo*

<sup>1</sup> Busá' ládxí'gaquië' bóchi'ru' ni' ilunë' ca ta'nné' bönni' dë lu ná'agaquië', en bönni' yúlahui', para ilunë' ca rnna xtídzä'gaquië'. Ral-la' ila'cu'ë sina' ilunë' le naca dxi'a. <sup>2</sup> Biti'

bi le ruá' dö' ral-la' ila'nné' que luzá'agaquië', en biti' ila'díl-lalenë' légaquië' didza', pero ral-la' ilácagaquië' nöxaj ladxi', en idú ladxi' lógaca yúgu'té böñachi.

<sup>3</sup> Lésca' rë'u, zí'aló gúcaru' yugu' bönni' biti' ta'yéajni'iné', en gudá'baga'ru' Dios. Gudaru' nanítiru', en gúcaru' ca nupa nadó'ogaca, tu' benru' le guzé ládxí'ru' le ruá' dö', en ia'bal-la le guyaza ládxí'ru'. Benru' ca' le ruá' dö', en buzxé'eru' luzá'aru'. Biti' bila'lé'e böñachi rë'u dxi'a, ate' rë'u biti' bilé'eru' dxi'a luzá'aru' turu' ia'turu'. <sup>4</sup> Ní'irö bulu'e lahui Dios, Nu rusólá rë'u. Naca bë' náquië' idú dxi'a, en nadxí'iné' yúgu'té böñachi, <sup>5</sup> tu' busólé'rë'u, caléga tu' zoa bi le naca dxi'a benru' rë'u, pero tu' buéchi' ládxé'ë rë'u. Buné' rë'u dxi'a, en benë' ga nácaru' böñachi cubi. Dios Bö' Lá'ayi rucubë' rë'u. <sup>6</sup> Dios gusól-lé'ë Dios Bö' Lá'ayi queéru' tu' néquiru' queë' Jesucristo, Nu rusólá rë'u. <sup>7</sup> Buzá' ládxé'ë queéru', en buné' rë'u tsahui' para gata' yöl-la' na'bán idú queéru', le runru' löza gunnë' queéru'.

<sup>8</sup> Didza' idútë li lë ni nuzúaja' lu guichi. Ré'ënda' usédide'enu' yugu' bönni' ni' yugu' lë ni para ilui'i ládxí'gaquië' ilúntica'sé' le naca dxi'a tu' ta'yéajlë'ë Dios. Lë ni naca dxi'a, en náncada' lesaca' ila'zí' lu ná'agaca yúgu'té böñachi. <sup>9</sup> Na'a, biti' gu'u lataj nu gü'i didza' le cabí nazaca', o nu gü'i ladxi' ca nácgaca lágaca ziántérö cö' xuz xtó'ogaca böñachi, o nu tsöjgutsa' yugu' didza' bizxaj, en yugu' le ridil-la didza' ca naca que xibá queë' Moisés, tu' cabí bi nazáca'gaca le caní, ate' cuntu nu uzí' xibé didza' caní.

<sup>10</sup> Channö zoa nu bönni' ni', rubéajé' choplö böñachi queë' Cristo, tödi usó'o ládxé'ë tu ia'tú luzuí, bubéajé' bönni' na'. <sup>11</sup> Nöz quézinu' chiböáquië' caní nu bönni' biti' náquië' tsahui', en runë' dul-la'. Chinabáguë'ë xíguia' ni'a que lë na' runë'.

### *Le buzúajë' Pablo lu guichi le gunbi' bi'i Tito*

<sup>12</sup> Cate' isól-la'a-në' Artemas o Tíquico ga zu', bë' ladxi' guídu' ga ni zoa' lu yödzö Nicópolis, tu' chinuna' quia' ugá'ana' ni yugu' beo' ziaga. <sup>13</sup> Zenas, bönni' na' rudödë' didza' ca rinná bë' böñachi yúlahui', enca' Apolos, ila'dxinë' ga ni' zóali'. Bugú'u légaquië' nöza lu yöl-la' rácalen, para cabí bi yadzaj quégaquië'. <sup>14</sup> Busedi yugu' böchi' luzá'aru' ilúntica'sé' le naca dxi'a, en bi ulu'nödzjë' quégaca nupa bi riyadzaj quéguequi, para gaca bë' caní le nácgagaquië' queë' Cristo.

### *Pablo rugapë' Dios böñachi queë' Cristo*

<sup>15</sup> Yúgu'té nupa nacuá'len neda' tu'gapa Dios li'. Bugapa Dios nupa ni' nadxí'igaca rë'u tu' ta'yéajlë'ë Dios. Le ruzá' ládxé'ë Dios queéru' gácalen yúgu'téli'. ¡Ca' gaca!

## DIDZA' GUSÖL-LË'Ë PABLO QUEË' FILEMÓN

### *Pablo rugapë' Dios Filemón*

<sup>1</sup> Neda', Pablo, dzágabi' neda' bi'i bōchi'ru' Timoteo. Nadzuna' lidxi guíe tu' runa' xichinë' Jesucristo. Rugapa' Dios li', Filemón. Nacu' bönni' nadxf'itu', en runu' xichinë' Cristo ca runtu' netu'. <sup>2</sup> Rugapa' Dios Apia, nigula quiu'. Nácanu zanru' réajlë'ënu Cristo. Rugapa' Dios ca' zxif'iu', Arquipo. Nácabi' queë' Jesucristo ca tu bönni' rejë' gudil-la, tu' runbi' xichinë' Lë' ca runtu' netu'. Lësca' rugapa' Dios bönachi queë' Cristo tu'dubë' lu yu'u lidxi'. <sup>3</sup> Rinábida'-në' Xúziru' Dios, enca' Xanru' Jesucristo, uzá' ladxë'ë queéli', en gunë' ga soa dxi icja ladxì'do'oli'.

### *Ca runë' Filemón tu' réajlë'ë Cristo*

<sup>4</sup> Rética'sa'-në' Dios queëru' "Xclenu'", en röjnética'sida' li' cate' rulidza'-në'. <sup>5</sup> Caní runa' tu' ridxín quia' didza' ca nadxf'iu'-në' Xanru' Jesús, en réajlë'u Lë', en nadxf'iu' ca' yúgu'të bönachi rõ queë'. <sup>6</sup> Rinábida'-në' Dios gunë' ga gunda' dxin libán runu' ca naca le réajlë'u Cristo, para ulu'zí' xibé nupa nacuá' ni' yúgu'të le naca dxi'a, le ruzá' ladxë'ë Jesucristo queëru'. <sup>7</sup> Rudzéjada', en ruzí' zxöna' tu' nadxf'iu' yugu' bōchi'ru', en benu' li', bōcha'a, ga bulu'huöáca ladxì'gaca bönachi ta'yéajlë' Cristo.

### *Filemón ral-la' uniti lahuë'-bi' Onésimo, bi'i nadó'o queë'*

<sup>8</sup> Que lë ni na', sal-la' dë lu na'a tu' naca' gubáz nasööl-lë'ë Cristo inná bë'eda' li' ca ral-la' gunu', <sup>9</sup> ráta'yua' lo' len yöl-la' nadxf'i, neda' ni chinaca' bönni' gula, en yu'a lidxi guíe tu' runa' xichinë' Jesucristo. <sup>10</sup> Ráta'yua' lo' uláz queëbi' Onésimo, bi'i na' bena' ga böácabi' queë' Cristo, en que lë ni na' nácabi' ca zxif'ini caza' ga ni nadzuna' lidxi guíe.

<sup>11</sup> Bi'i ni, zí'alo biti' gúcabi' lesaca' quiu', pero na'a nácabi' lesaca' quiu' li', enca' quia' neda'. <sup>12</sup> Bi'i ni rusööl-la'a-bi' ga zu'. Ben bal läbi' ca neda' caz runu' bal, tu' nadxf'ida'-bi'. <sup>13</sup> Gú'unida' ugá'analenbi' neda' ni, para uláz quiu' gunbi' xichina' tsanni ni yu'a lidxi guíe tu' runa' libán que didza' dxi'a, <sup>14</sup> pero biti' bi rë'ënda' guna' le cabí naca didza' quiu', para cabí guna' bayudxi gácalenu' neda', pero huáca gácalenu' neda' tu' rë'ëni quézinu' ca'. <sup>15</sup> Nadxi ca' que lë ni na' buzá'abi' Onésimo ga zu' tu chí'ido' para udxinbi' tsaz ga zu'. <sup>16</sup> Na'a, bíti'rö gácabi' quiu' ca tu bi'i nadó'o, pero gácabi' quiu' ca bi'i bōchi' cazu', tu' nácabi' bi'i bōchi'ru' réajlë'ëbi' Cristo, en nadxf'iru' bi'. Nácabi' caní quia' neda', ate' ral-la' gácaröbi' ca' caní quiu', calégasö ca bōchi' luzó'o, pero lësca' ca bi'i bōchu'u réajlë'ëbi' Xanru' Jesucristo.

<sup>17</sup> Que lë ni na', channö nunu' neda' tuz, ben läbi' bal ca neda' caz runu' bal. <sup>18</sup> Channö bi xíguia' benbi' quiu' o channö bi rál-la'bi' quiu', gunnätëz neda' ral-la'a. <sup>19</sup> Neda', Pablo, len na'a caza' ruzúaja' quiu' lu guichi lë ni: Neda' caz quizxja' bi rál-la'bi', en caléga guía' li': Lësca' ral-lu'u quia' yúgu'të le dë quiu' tu' bena' neda' ga napu' yöl-la' na'bán idú. <sup>20</sup> Ca' gaca, bōcha'a. Channö dë le uzi'a xibó' tu' néquiru' queë' Xanru', ben lë na' chigúta'yua' lo' tu' naca' bōchu'u réajlë'a Cristo, ate' caní gunu' ga huöáca ladxì'a.

<sup>21</sup> Ruzúaja' quiu' lu guichi ni, tu' ruzxöni ladxì'a li', gunu' ca rnna xtídza'a, en nözda' gunu' ia'lati' ca lë na' chigúta'yua' lo'. <sup>22</sup> Lësca' rinaba' lo' upó'o quia' ga soa' lu yu'u lidxi', tu' runa' löza urúaja' lidxi guíe ni, ate' guída' ga zóali' tu' rulídzali'-në' Dios, en rinábali' lahuë' ni'a quia' neda'.

### *Pablo ruzúaje' lu guichi le rugapa Dios Filemón*

<sup>23</sup> Epafras, bönni' yú'ulenë' neda' tsözxöön lidxi guíe ni tu' runë' xichinë' Jesucristo, rugapë' Dios li'. <sup>24</sup> Lësca' tu'gapë' Dios li' Marcos, en Aristarco, en Demas, en Lucas, yugu' bönni' ni túnlenë' neda' tsözxöön dxin queë' Cristo.

<sup>25</sup> Rinábida'-në' Xanru' Jesucristo uzá' ládxë'ë queéli'. ¡Ca' gaca!

## DIDZA' RUZÉAJNI'I YUGU' BÖNACHI HEBREO

*Dios bē'lenë' rē'u didza' lu ru'ë Zxi'ini cazë'*

<sup>1</sup> Zián luzuí, en zián ca benë' Dios, bē'lenë' xuz xtó'oru' didza' dza ni'te lu ruá'agaquië' bönni' gulu'ë didza' uláz queë'. <sup>2</sup> Na'a, ga ruúdxi xtídzë'ë, dza ni zóaru' na'a, Dios bē'lenë' rē'u didza' lu ru'ë Zxi'ini cazë'. Dios buzóë' Lë' para guequi queë' Zxi'inë' yúgu'të le nequi queë' Lë', ate' lu në'ë Zxi'inë' na', Dios benë' yödzölió ni. <sup>3</sup> Zxi'inë' na' náquië' ca tu le rului'i lahui yöl-la' zxön queë' Dios, en ca náquië' Zxi'inë' rului'i lahui idú le náquië' Dios caz. Run cazë' ga nacuá'tica'sö yúgu'të, rugunë' dxin didza' ru'ë, en yöl-la' huáca queë'. Cate' budxi benë' le ruún rē'u dxí a que le naca dul-la' nabága' ru', yójchö'ë cuita lë'ë ibëla Dios, Nu rö'ö rinná bë' xitsá'térö.

*Zxi'inë' Dios nayépisétérë' ca yugu' gubáz lá'ayi*

<sup>4</sup> Zxi'inë' Dios nayépisétérë' ca yugu' gubáz lá'ayi queë' Dios, tu' nácatérö lo le lë', lë na' Dios gulu'ë Lë' tu' náquië' Zxi'ini cazë', ca lágaquië' gubáz lá'ayi queë' na'. <sup>5</sup> Dios catu caz gudxë' tuë' gubáz lá'ayi queë' ca na' gudxë' Zxi'inë': Gunné': Zxi'ina' nacu'. Buzóá' Li' na'a.

Catu caz bë'ë didza' queë' tuë' gubáz lá'ayi ca na' bë'ë didza' ca naca queë' Zxi'inë'. Gunné': Naca' Xuzé', ate' Lë' náquië' Zxi'ina'.

<sup>6</sup> Lësca' caní, cate' Dios buzóë' Bi'i que cazë' lu yödzölió ni, gunné': Yúgu'të gubáz lá'ayi queë' Dios ila'yéaj ládxi'gaquië' Lë'.

<sup>7</sup> Ca nácagaquië' gubáz lá'ayi queë', rnna:  
Lë' runë' ga nácagaquië' gubáz lá'ayi queë' ca bö' recja,  
ate' gubáz lá'ayi huen dxin queë', runë' ga nácagaquië' ca guí'.

<sup>8</sup> Na'a, ca naca cazë' Zxi'inë', rmnë':  
Ga rö'u rinná bë'u, inná bë'tica'su', Dios.  
Tsahui' naca ca rinná bë'u.

<sup>9</sup> Nadxi'nu' le naca tsahui', en caléga le ruá' dö'.  
Que lë ni na' Dios budödë' lu no'o yöl-la' unná bë',  
en benë' ga ruzí'itëru' Li' xibé yöl-la' unná bë'  
ca le tu'zí'i xibé luzó'o.

<sup>10</sup> Lësca' caní rmnë':  
Li', Xan, cate' gusí lo, benu' yödzölió,  
ate' len ná'asu' buzú' lúzziba.

<sup>11</sup> Huadödi quéguequi, pero Li', tsaz id' u.  
Yúgu'të itébigaca ca ritébi lari',  
<sup>12</sup> en ca lari' utubu' léguequi, en utsó'o léguequi,  
pero Li', catu caz utsá' cuinu'  
en catu caz igulu'.

<sup>13</sup> Dios catu caz gudxë' tuë' gubáz lá'ayi queë' ca gudxë' Zxi'inë', gunné':  
Guró'ö cuita lë'a ibëla  
cate' gunra' ga ulu'zechu zxibigaca lo'  
nupa biti' ta'lé'e Li' dxí'a.

<sup>14</sup> Yúgu'të gubáz lá'ayi queë' Dios nácagaquië' bö' huen dxin queë' Dios, ate' nasö'l-lë'ë  
légaquië' para ilácalenë' nupa ni nulágaca.

<sup>1</sup> Que lë ni na', ral-la' güí'i ládxí'röru' le chibiyóniru', para cabí gaca chopá ládxí'ru'.  
<sup>2</sup> Guca bë' naca idútë li didza' na', le bidxín dza ni'te lu ná'agaquie' gubáz lá'ayi queë' Dios, ate' yúgu'të nupa gula'dödi bë' ca rnna didza' na', en biti' gulún ca rnna, Dios benë' léguequi xíguia' ca na' röjlöz le gulúngaca. <sup>3</sup> Lësca' caní biti' ca' uláru' rë'u lu xíguia' na' channö ucá'anaru' cá'asö yöl-la' rusólá ni, le benë' Lë cazé' Xanru' libán que zí'alö, ate' nupa bila'yöni Lë' bulu'lui'i rë'u naca idútë li. <sup>4</sup> Lësca' caní Dios caz benë' tsözxón légaquie' ba nalí, tu' benë' le nácagaca bë', en le tun ga rubániru', en yugu' yöl-la' huáca zxön. Gudísië' ca' yugu' le runödzjé' Dios Bö' Lá'ayi quégäquie' tsca gú'uni quéziné' Dios.

### Dios benë' ga böáquie' Jesús idú ca nácaru' rë'u

<sup>5</sup> Dios biti' budödë' yödzölió si' za' lu ná'agaquie' gubáz lá'ayi que yehua' yubá queë', lë na' ruí'ru' didza' que. <sup>6</sup> Na'a, ca naca lë ni, nazúaj lu guichi lá'ayi didza' bë' nu run ba nalí le rnna:

Dios, rubánide'eda' tu' ruí'i ládxu'u böñachi.

Rubánide'eda' tu' rácalenu' léguequi.

<sup>7</sup> Ia'láti'sö cá'asö ca yugu' gubáz lá'ayi que yehua' yubá quiu' benu' böñachi.

Buzú' quéguequi yöl-la' zxön, en yöl-la' run bal,

en budödu' yúgu'të le benu' Li' lu né'eguequi.

<sup>8</sup> Yúgu'të budödu' lu né'eguequi para ila'nná be'e le.

Nazúaj lu guichi lá'ayi lë na' rnna: "Budödu' lu né'eguequi yúgu'të." Biti' bi bucá'anë' le cabí budödë' lu né'eguequi, pero ga ridxitnë na'a dza, biti' rilé'eru' yu'u lu né'eguequi yúgu'të. <sup>9</sup> Réquibe'eru' le guca queë' Jesús. Tu chí'isö, Dios benë' ga böáquie' ia'láti'sö cuidi' ca yugu' gubáz lá'ayi que yehua' yubá queë'. Guljé' böñachi para gútië', ate' gudí'i guzxáquie' Jesús lu yöl-la' guti uláz quégaca yúgu'të böñachi, tu' buzá' ládxé'ë Dios queëru' caní. Tu' benë' Jesús caní, Dios benë' ga rata' queëru' yöl-la' zxön, en yöl-la' run bal.

<sup>10</sup> Dios benë' yúgu'të le rilé'eru', en runë' ga nacuá'tica'sö. Dios benë' ca ral-la' gunë' cate' benë' ga naca bë' náquië' Cristo idú tsahui' ni'a que le gudí'i guzxáquie'ë. Caní benë' Dios queë' Cristo, Nu bideli' yöl-la' rusólá para gaca iché'ë böñachi zián yehua' yubá queë'. <sup>11</sup> Cristo ruúnë' tsahui' böñachi para ilequi quez queë' Dios. Tuzë' náquië' Xúzguequi nupa na' ruúnë' Cristo tsahui', en Xuz cazé'. Que lë ni na', biti' ca' rutu'inë' Zxf'inë' Dios cate' rnnë' nácagaquie' böchi' luzé'ë. <sup>12</sup> Ca naca lë ni nazúaj lu guichi lá'ayi le rnna:

Usiyönda' böchi' luzá'a ca nacu' Li', Dios.

Gatsaj láhui'lö böñachi tu'dubi quiu',

gul-la' yöl-la' ba quiu'.

<sup>13</sup> Lësca' caní rnnë':

Uzxöni ládex'a-a-në' Dios.

Ga yúbölö nazúaj le rnnë':

¡Buli'yútsöca' nedá', en yugu' zxí'inë',

nupa na' Dios bennë' quia'!

<sup>14</sup> Que lë ni na', tu' néquiguequinë' bëla' en rön yugu' zxí'inë' na', lësca' caní Cristo ben cuinë' ca nácagaquie'. Guljé' bëla' en rön. Caní guljé' para guca gútië', en caní guca busunítië' yöl-la' huáca unná bë' que tu' xihui', nu na' dë lu né'e guti böñachi. <sup>15</sup> Caní benë' Cristo para guca busanë' yúgu'të nupa gulaca ca bönni' nadó'ogaquie' tsanni ni nacuá' nabángaca, tu' guladxi yöl-la' guti. <sup>16</sup> Naca bë' biti' benë' caní para gácalenë' yugu' gubáz lá'ayi que yehua' yubá queë' Dios, pero para gúcalenë' yugu' zxí'ini xi'sóë' Abraham. <sup>17</sup> Que lë ni na', ben bayudxi böáquie' Cristo idú ca nácagaquie' böchi' luzé'ë na', para gáquië' lahuë' Dios tu bixúz lo, tu bixúzi runë' ca rnnë', en ruhuéchi' ládxé'ë böñachi, enca' para gunë' le gun ga gata' lu né'e ugüé' dul-la' nabága'gaca böñachi.

<sup>18</sup> Na'a, tu' gudí'i guzxáquie'ë Lë cazé' Cristo, ate' guzxí' bë' tu' xihui' Lë', que lë ni na' napë' yöl-la' huáca gácalenë' nupa ni, rizí' bë' tu' xihui' léguequi.

*Jesús nayépisétérë' ca Moisés*

<sup>1</sup> Que lë ni na', böchi' luzá'ado', libí'ili' na' nácali' quee' Dios tu' bulidzë' Dios libí'ili', buli'yú dxi'a ca náquië' Jesucristo. Náquië' gubáz nasól-lé'ë Dios, enca' bixúz lo que le nazi' lu ná'aru'. <sup>2</sup> Jesús ni runë' ca rnna xtídzë'ë Dios, Nu na' buzóa Lé' xilatjë', ca na' benë' ca' Moisés, benë' ca rnna xtídzë'ë Dios lógaca yúgu'të bönnachi quee' Dios. <sup>3</sup> Nayépisétérë' Jesús ca Moisés, para gaca quee' yöl-la' ba, ca na' nácarë' lo bönni' nequi quee' tu yu'u ca naca huen dxin zoë' lu yu'u na'. <sup>4</sup> Yúgu'të yu'u, zoa nu ben le, pero Dios náquië' Nu ben yúgu'të le rile' eru'. <sup>5</sup> Le nácatë Moisés benë' ca rnna xtídzë'ë Dios lógaca bönnachi quee' Dios, pero gúquië' ca tu bönni' huen dxin, ate' benë' ba nalí que didza' ralla' gu'ë Dios, <sup>6</sup> pero Cristo runë' ca rnna xtídzë'ë Dios, en náquië' Zxi'ini cazë', ate' nacuá' lu në'ë bönnachi quee' Dios. Rë'u ni, nácaru' bönnachi na' quee' Dios channö gácaru' tsutsu ga idxinrö dza údxi. Ral-la' gácaru' tsutsu ca ridipa ládzi'ru', enca' ca rudzéjalenru' lë na' runru' löza.

*Dë lataj ga ulu'zí' ládzi'gaca bönnachi quee' Dios*

<sup>7</sup> Que lë ni na', nazúaj lu guichi ca rnné' Dios Bö' Lá'ayi le rnna:

Na'a, channö riyónili' didza' ru'ë Dios,  
<sup>8</sup> biti' gácali' zidi lu icja ládzi'do'oli'  
 ca na' gulaca nupa ni' gula'dá'baga' Dios  
 cate' ni' gula'zí' bë' Lé' lu lataj cá'asö.

<sup>9</sup> Gula'zí' bë'ë xuz xtó'oli' neda' ni'  
 sal-la' bila'lé'enë' le bena' idú ca choá' iz.

<sup>10</sup> Que lë ni na' guléda' bönnachi dza ni', en gunnía':  
 "Ta'chíxitica'sinë' ca ta'zá' ládzi'gaquië'.

Biti' té'ënnë' ila'nózinë' le ré'ënda' ilunë'."

<sup>11</sup> Que lë ni na' guléda' légaquië', en bena' tsutsu xtídz'a', gunnía':

"Biti' ila'yázië' ga ulu'zí' ládzi'gaquië' tsözxön len neda'."

<sup>12</sup> Guli'gún chi'i cuinli', böchi' luzá'ado', para cabí gácali' nituli' libí'ili' tu bönni' xihui' cabí réajlé'ë, en para cabí usanli'-në' Dios ban. <sup>13</sup> Na'a, buli'zéajni'i tuli' ia'tuli' yúgu'të dza, tsanni ni naca dza ni zóaru' na'a, para cabí si' ye'e le naca xihui' libí'ili', en para cabí gácali' nituli' libí'ili' zidi lu icja ládzi'do'oli'. <sup>14</sup> Yúgu'tëru' gunru' tsözxön Cristo channö gácaru' tsutsu ga idxinrö dza údxi, ca na' gusí lo ridipa ládzi'ru'.

<sup>15</sup> Caní ral-la' gunru' tsanni ni rnna:

Na'a, channö riyónili' chi'ë Dios,  
 biti' gácali' zidi lu icja ládzi'do'oli',  
 ca na' gulaca nupa ni' gula'dá'baga' Dios.

<sup>16</sup> ¿Nupxi na' bila'yöni xtídzë'ë Dios, en gula'dá'baga' Lé'? Gulún caní yúgu'të nupa ni' bubéaje' Moisés léguequi luyú Egipto. <sup>17</sup> ¿Nupxi na' gulénë' Dios idú ca choá' iz? Gulaca nupa ni' gulún dul-la', ate' gulati lu lataj cá'asö. <sup>18</sup> ¿Nupxi ni' benë' tsutsu xtídzë'ë Dios, gunné' biti' ila'yaza ga ulu'zí' ládzi'guequi tsözxön len Lé'? Gulaca nupa ni' biti' gulún ca rnna xtídzë'ë Dios. <sup>19</sup> Na'a, réquibe' eru' biti' guca ila'yázië' tu' cabí gula'yéajlé'ë Dios.

<sup>1</sup> Na'a, tsanni ni nagá'ana le guzxí' lu në'ë Dios queéru' para gaca tsú'uru' lataj quee' ga uzi' ládzi'ru', ral-la' gádxiru' para cabí unítiru' lataj tsú'uru' ni'. <sup>2</sup> Biyönru' rë'u didza' dxi'a ca na' bila'yönnë' légaquië', pero légaquië' biti' bulu'zi'ë xibé didza' na' bila'yönnë', tu' cabí gula'yéajlé'ë Dios cate' bila'yönnë' le. <sup>3</sup> Rë'u ni réajlé'ëru' Dios, en tsú'uru' lataj quee' ga uzi' ládzi'ru'. Raca ca na' gunné' Dios:

Que lë ni na' guléda' légaquië'  
 en bena' tsutsu xtídz'a', gunnía':  
 Biti' tsú'ugaquië' ga ulu'zí' ládzi'lenë' neda'.

Dë lataj tsú'uru' rë'u ga uzí' ládxí'lenru'-në' Dios, sal-la' budxi benë' Dios xichinë' dza ni'te cate' ni' benë' yödzölio ni, en chiruzí' ládxé'ë. <sup>4</sup> Nazúaj lu guichi lá'ayi ga rui'i didza' ca naca que dza igadxi, le rnna: "Buzí' ládxé'ë Dios dza igadxi yugu' lu dxin benë'." <sup>5</sup> Ga yúbölö rnna: "Biti' tsú'ugaquië' ga ulu'zí' ládxí'lenë' neda'." <sup>6</sup> Nupa ni' bila'yöni zí'alö didza' dxí'a, biti' guyú'ugaca ni' tu' cabí gulún ca rnna xtídzé'ë Dios. Que lë ni na', ral-la' tsú'ugaca bönachi yúbölö ni'. <sup>7</sup> Que lë ni na' ca', Dios bulu'e tu dza yúbölö, gunné': "Na'a dza." Caní naca, cate' chigudödi iz zián, bë'ë didza' Dios lu ru'ë David, ca na' nazúaj lu guichi lá'ayi le rnna:

Na'a dza, channö riyónili' didza' ru'ë Dios,  
biti' gácali' zidi lu icja ládxí'do'oli'.

<sup>8</sup> La'tu' benë' Josué ga bulu'zí' ládxí'gaquië' cate' gula'yu'ë lu xiyúgaquië', biti' bë'ë Dios didza' gudödi ni' que ia'turö dza cate' nu uzí' ládxí'len Lë'. <sup>9</sup> Que lë ni na', nagá'ana quégaca bönachi queë' Dios lataj ila'déli'në' ga ulu'zí' ládxí'gaquië'. <sup>10</sup> Nupa tsú'ugaca ga ulu'zí' ládxí'lengaca Dios, ulu'zí' ládxí'gaquië' lu dxin tunë', ca na' buzí' ládxé'ë Dios yugu' lu dxin benë' Lë'. <sup>11</sup> Que lë ni na', ral-la' gür'i ládxí'ru' tsú'uru' ga ni' uzí' ládxí'lenru'-në' Dios. Biti' ral-la' tá'baga'ru' xtídzé'ë ca na' gulún nupa ni' biti' gula'yéajlé' Dios, en biti' gula'yu'ë ni'.

<sup>12</sup> Xtídzé'ë Dios naca ban caz, en napa caz yöl-la' huáca. Richúgurö ga rë' ca guíë tuchi' natuchi' iropa ru'i. Richugu ridxín ga ta'dzaga bö' naca cázaru', en le zoa lu icja ládxí'do'oru', enca' röxa'j ga ridxitintë lu dxita lu bin. Run ga naca bë' le ribequi ícjaru', en le rizá' ládxí'ru'. <sup>13</sup> Biti' bi gaca ucáchi'ru' ga biti' gaca ilé'enë' Dios le. Yúgu'té le nun cazë' Dios nalá' lahuí, en narúaj ga liná' lahué' Dios. Lahué' Lë' run bayudxi quíxjö'örü' le nunru'.

### *Jesús náquië' bixúz lo, Nu nácatérö zxön*

<sup>14</sup> Zoa queéru' tu bixúz lo, nácatérö' zxön, Nu na' gudödi ni' yehua' yubá, Jesús, Zxi'inë' Dios. Que lë ni na' ral-la' ugá'anaru' tsutsu ca naca le nazi' lu ná'aru'. <sup>15</sup> Zoa queéru' tu bixúz lo, Nu gaca huéchi' ladxi' rë'u ca nácagaca le raca queéru', tu' guzxí' bë' tu' xihui' Lë' cazë' idútë ca na' rizi' bë' tu' xihui' na' rë'u, pero biti' bi dul-la' benë' Lë'. <sup>16</sup> Que lë ni na', idú ládxí'ru' ral-la' ibiga'ru' gala' ga rö'ë rinná bë'ë Dios, Bönni' ruzá' ladxe'ë queéru', en inábaru' lahué' huéchi' ládxé'ë rë'u, en uzá' ládxé'ë queéru', para gácalenë' rë'u cate' bi raca queéru'.

## 5

<sup>1</sup> Dios ribö' cazë' núti'tës bixúz lo ladaj bönachi, en ruzóë' lë' para gunë' yugu' le runë' lahué' Dios uláz quégaca bönachi, en cu'ë lahué' Dios yugu' le tu'nödzaj bönachi, en yugu' bö' bëdxi tútigaquië'-ba' lu bucugu lá'ayi tu' nözi dul-la' nabága'gaquië'. <sup>2</sup> Bixúz lo na', tu' raca queë' lóbisö ca raca quégaca bönachi, gaca gáquië' zxön ladxi' len nupa nácagaca yugu' bönni' canóz, en nupa ta'chixi ta'nigui. <sup>3</sup> Que lë ni na', tu' náquië' bixúz lo na' bönáchisö, ral-la' cu'ë lahué' Dios bö' bëdxi na' tútigaquië'-ba' lu bucugu lá'ayi ni'a que dul-la' nabaga' cazë', ca na' runë' ca' ni'a que dul-la' nabága' gaca bönachi.

<sup>4</sup> Cuntu nu gaca gun cuini bixúz lo, pero Dios rulidzë' nu ral-la' gaca bixúz lo, ca na' bulidzë' Aarón. <sup>5</sup> Lësca' caní guca queë' Cristo. Biti' ben cuinë' bixúz lo, pero Dios buzóë' Lë' ca bixúz lo. Ca naca lë ni, Dios gudxé' Lë':

Li' nacu' Zxi'ina'.  
Buzoa' Li' na'a.

<sup>6</sup> Lësca' caní gudxé' Lë' le nazúaj ga yúbölö, gunné':  
Li' nácatica'su' bixúz,  
ca na' gúquië' Melquisedec bixúz.

<sup>7</sup> Cristo, cate' ni' zoa cazë' yödzölio ni, bulidzë' Dios, en gúta'yuë' lahué'. Gurödxí'ë, en gurödxé' lahué' Dios, Bönni' guca usólë' Lë' lu yöl-la' guti, ate' Dios biyönnë' Lë' tu'

gúdxinë' Lë' idú ládxë'ë. <sup>8</sup> Sal-la' gúquië' Zxi'inë' Dios, bizéðë' gunë' ca rnna xtídzë'ë Dios tu' gulaca queë' yugu' le gud'i guzxáquë'ë. <sup>9</sup> Cate' chigúquië' Cristo idú ca ral-la' gáquië' tu bixúz lo, Dios benë' Lë' Bönni' rusölë' tsaz yúgu'të nupa tun ca rnna xtídzë'ë. <sup>10</sup> Ni'irö Dios buzóë' Lë' para gáquië' bixúz lo ca na' gúquië' Melquisedec na' bixúz lo.

*Zoa bönadxi queéru' huóaj ládxí'ru', en tá'baga'ru'-në' Cristo*

<sup>11</sup> Ca naca lë ni, zián le ral-la' gü'ilentu' lib'iili' didza', le naca böniga quíxjöi'itu' lib'iili', tu' cabí réajni'inili'. <sup>12</sup> Chigudödi dza ral-la' gaca usédili' bönachi xtídzë'ë Dios, tu' chibiyónili' xidzé, pero riquínili' nu quíxjöi' lib'iili' leyúbölö yugu' le cabí naca böniga nazí' lu në'e nu si' réajlë'. Nagá'anali' ca yugu' bi'i hué'ënido' ta'quínibi' nidxi', en calëga la' huagu tsutsu. <sup>13</sup> Yúgu'të bönni' naquníguequinë' nu usedi légaquië' lë na' biti' naca böniga, nácagaquië' ca yugu' bi'ido' té'ajbi' nidxi'. Biti' nazédagaquië' ca sa'yéaj le naca tsahui'. <sup>14</sup> La' huagu tsutsu tu'zí' xibé nupa chinál-lágaca, nupa na' gaca iléquibe' le naca dxí'a, en le cabí naca dxí'a, tu' nugúngagaquië' dxin yöl-la' réajni'i quégagaquië'.

## 6

<sup>1</sup> Que lë ni na', biti' ral-la' usédatica'siru' yugu' xibá buzédaru' cate' si' gusí lo riyóniru' ca naca queë' Cristo. Ral-la' tsöjnöröru' para gácaru' idú bönachi queë' Cristo. Biti' naquíni usédaru' leyúbölö yugu' xibá biti' naca böniga:

ca ral-la' ubí'i ládxí'ru',  
en ca bítí'rö gunru' le ruá' dö',  
en ca ral-la' tséajlë'ëru'-në' Dios,

<sup>2</sup> en ca naca xibá que le ridílaru' nisa,  
en ca rixóa ná'aru' bönachi ta'yéajlë' Cristo,  
en ca ral-la' ulu'bán nupa nátigaca,  
en ca gunë' Dios, ichúguië' quégaca bönachi tuá' dö'.

<sup>3</sup> Caní gunru' channö gunnë' Dios rë'u lataj.

<sup>4-6</sup> ¿Naru' huácatsö gunru' ga ulu'bí'i ládxí'gaca leyúbölö nupa tu'huóaj ladxi', en ta'dá'baga' Dios? Channö bidxín quéguequi bení' queë' Dios, en bulu'zí' xibé le runödzjë' Dios zoë' yehua' yubá, en gulaca tuz len Dios Bö' Lá'ayi, en channö bulu'zí' xibé didza' dxí'a queë' Dios en yöl-la' huáca que dza si' za', en channö ní'irö tu'huóaj ladxi', en ta'dá'baga' Dios, biti' ca' gaca nu gun ga ulu'bí'i ládxí'gaca leyúbölö, tu' gaca tsca ulu'dá' leyúbölö Zxi'inë' Dios lë'e yaga cruz en ilún tsca ulu'titaj Lë'lahui' lógaca bönachi. <sup>7</sup> Nupa tun caní nácagaca ca yu na' ruzí' xibé nisa guiój le ribixi láhuilö zián luzuí. Channö yu na' runödzaj le tu'zí' xibé nupa tá'ana yu na', raza ládxë'ë Dios le, <sup>8</sup> pero channö ruzóasö yu na' lubá yötsí', en bësigá', naca ditaj, en nabía dö', en naca para nu uzegui le.

*Le runru' löza le run ga nácaru' tsutsu*

<sup>9</sup> Sal-la' ruí'itu' caní didza', lib'iili' na' nadxi'itu', réquitu' ruzí'ili' xibé le nácagacarö dxí'a, le tu'zí' xibé nupa nulágaca. <sup>10</sup> Dios náquië' tsahui', en biti' gal-la ládxë'ë dxin tsahui' benli', en yugu' le benli' tu' nadxi'ili' Lë'. Gúcalenli' nupa néquiguequi quez queë' Dios, en runli' xichínguequi. <sup>11</sup> Na'a, ré'ënitu' gü'i ládxí'li' luzá'ali' tu ia'tuli', en gunli' caní ga idxinrö dza údxi, para gata' idú queéli' lë na' runli' löza. <sup>12</sup> Ré'ënitu' cabí gácali' xöhuëdi, pero gunli' ca tun nupa ta'yéajlë' Dios, en ta'böza zxön ladxi', para idéli'li' yugu' le guzxi' lu në'ë Dios gunnë' queéru'.

<sup>13</sup> Caní gaca, tu' benë' tsutsu Dios xtídzë'ë cate' guzxi' lu në'ë bi gunnë' queë' Abraham. Tu' cabí zoa nu nácarö lo ca Dios, que lë ni na' buzetaj cuinë', cate' ni' benë' tsutsu xtídzë'ë. <sup>14</sup> Caní gunnë' Dios: "Le nácatë guna' ga gaca dxí'a quiu', en guna' ga ila'yánda'abi' zxí'ini xi'sú'." <sup>15</sup> Gulözë' Abraham zxön ladxi', ate' bidéli'në' le guzxi' lu në'ë Dios gunnë' queë'. <sup>16</sup> Cate' tu bönni' runë' tsutsu xtídzë'ë, ruzötje' nu nácatérö lo ca lë', ate' lë ni ruzóa dxisö yúgu'të didza' bizzaj, tu' nunë' tsutsu xtídzë'ë. <sup>17</sup> Que lë ni

na' Dios benë' tsutsu le guzxí' lu në'ë gunë', en buzötaj cuinë', tu' gú'unnë' ulu'íñinë' nupa ulu'zí' xibé le guzxí' lu në'ë unödzjé' quéguequi, nácada' löza, en tsaz naca le nuzóá lahuë' gunë'. <sup>18</sup> Le guzxí' lu në'ë Dios, en le benë' tsutsu, chopa ni catu caz idzá' gaca, en ca naca quégaca chopa ni, biti' gaca si' yé'ë Dios. Caní benë' Dios para gácada' löza queéru' tu le huë tsahui' rë'u. Ruzxöni ládxi'ru' Lë' idéli'ru' lë na' runru' löza le gunnë' sí'iru'. <sup>19</sup> Lë na' runru' löza ruzóatica'sö tsutsu icja ládxi'do'oru', en naca ca tu du guié ruzóá dxisö barco. Lë na' runru' löza run chi'ë Cristo ni'a queéru' ga ni' zoë' Dios yehua' yubá, le nadxín lu lataj lá'ayi na' zoa cúczi'lö lari' nala' lu yudo' rö'ö yehua' yubá. <sup>20</sup> Guyázië' Jesús uláz queéru' ca Nu röjnörü loru' ga ni' zoë' Dios, ate' Dios nuzóë' Lë' náquië' tsaz bixúz lo ca na' gúquië' Melquisedec bixúz lo.

## 7

*Jesús náquië' bixúz lo ca gúquië' Melquisedec*

<sup>1</sup> Melquisedec gúquië' bönni' na' gunná bë'ë lu yödzö Salem, enca' bixúz queë' Dios, nayépisétérë'. Cate' suzé'ë Abraham, söhuójé' gudödi guca gudil-la cate' bucul-lë' yugu' bönni' ta'nná bë'ë, birúajé' Melquisedec na', yöjtságuië' Abraham, en gunábinë' Dios gun lá'ayë' Abraham. <sup>2</sup> Abraham bë'ë queë' tu cö' tu' chi cö' que yúgu'të le bidéli'në' lu gudil-la na'. Ca lë' Melquisedec na' rnna lu didza' xidza': "Bönni' Unná Bé' Tsahui'", en náquië' ca' Bönni' unná bë' que yödzö Salem, le rnna lu didza' xidza': "Bönni' Unná Bé' Ribequi Dxíe'." <sup>3</sup> Biti' zoa lu guichi le rnna gula'cu'ë xuz xiné'ë, o xuz xtá'ahuë', en biti' nazúaj dza guljé' o dza gútië', pero náquië' ca náquië' Zxi'inë' Dios tu' náquië' tsaz bixúz lo.

<sup>4</sup> Buli'yútsöca' na'a, ca na' gúquië' zxön Melquisedec na', tu' lë cazë' xúziru' Abraham bë'ë queë' tu cö' tu' chi cö' que le ta'zí' bönachi Israel, sal-la' nácagaca di'a dza quégäquië', tu' nácagaquië' yúgu'të' zxí'ini xi'sóë' Leví, nupa nácagaca bixúz, ila'zí'ë tu cö' tu' chi cö' que le ta'zí' bönachi Israel, sal-la' nácagaca di'a dza quégäquië', tu' nácagaquië' yúgu'të' zxí'ini xi'sóë' Abraham. <sup>5</sup> Melquisedec na' biti' náquië' di'a dza quégäquië', pero guzxí'ë tu cö' tu' chi cö' lu në'ë Abraham, nu na' bideli' yugu' le guzxí' lu në'ë Dios gunnë' queë'. Lësca' Melquisedec na' gunábinë' Dios gun lá'ayë' Abraham, <sup>6</sup> ate' cuntu nu gaca tá'baga' lë na' rnna: Nu nadéli'rö lahuë' Dios rinábini Dios gun lá'ayë' nu nacuídí'rö. <sup>7</sup> Na'a, dza ni zóaru' na'a, nupa ta'zí' tu cö' tu' chi cö' lu ná'agaca bönachi nácagaca ca' bönachi tati caz, pero Melquisedec na', zoa le run ba nalí queë' le rnna zoë' nabanë'. <sup>8</sup> Na'a, huáca innaru' queë' Leví, en quégaca zxí'ini xi'sóë', nupa na' ta'zí' tu cö' tu' chi cö' lu ná'agaca bönachi, lësca' gula'guízxjé' tu cö' tu' chi cö' cate' ni' Melquisedec na' guzxí'ë tu cö' tu' chi cö' lu në'ë Abraham, xuz gula gudödi quégäquië'. <sup>9</sup> Caní naca, tu' huáca innaru' Abraham ni' nu'ë lë'ë Leví, en yugu' zxí'ini xi'sóë' cate' ni' yöjtságuië' Melquisedec lë', tu' cabí náljaniguequinë'.

<sup>10</sup> Ta'zí' bönachi Israel xibá gunná bë'ë Moisés lu ná'agaca bixúz, nupa nácagaca zxí'ini xi'sóë' Leví ga nababë' ca' Aarón, bixúz lo. Na'a, la'tu' guca ulu'huoáca bönachi idú tsahui' lahuë' Dios tu' tun ca rinná bë' xibá queë' Moisés, biti' ben bayudxi soa ia'tué' bixúz ca gúquië' Melquisedec, en calëga ca gúquië' Aarón. <sup>11</sup> Channö rutsé'ë Dios ca ral-la' gáquië' bixúz, run bayudxi utsé'ë ca' ca naca xibá queë'. <sup>12</sup> Xanru', Nu na' nazúaj lu guichi ca naca queë' yugu' lë ni, nababë' ia'turö cö' zxí'ini xi'sóë' Israel ca le nababë' Leví na', ate' que cö' zxí'ini xi'sóë' ga nababë' Xanru', cuntu nu guca bixúz lahuë' Dios. <sup>13</sup> Naca caní tu' naca bë' guljé' Xanru' lu cö' di'a dza queë' Judá, ate' Moisés biti' bë'ë didza' queë' Judá na' cate' bë'ë didza' quégaca nupa ral-la' ilaca bixúz.

<sup>14</sup> Nácatérö bë' lë ni ni'a que le raca na'a. Ca na' gúquië' Melquisedec bixúz, chibulu'i lahuë' ia'turë' bixúz, Jesús. <sup>15</sup> Bönni' ni, biti' gúquië' bixúz tu' rinná bë' xibá ca ral-la' ilaca di'a dza queë', pero náquië' bixúz tu' napé' yöl-la' huáca que yöl-la' na'bán le catu caz údxi. <sup>16</sup> Nazúaj lu guichi lá'ayi le run ba nalí queë' le rnna:

Tsaz nacu' bixúz  
ca na' gúquië' Melquisedec bixúz.

<sup>18</sup> Na'a, nadúa xibá gula ni', tu' cabí gudapa yöl-la' huáca unná bë', en biti' bi guca gun.  
<sup>19</sup> Xibá queë' Moisés na' biti' guca un böñachi idú tsahui'. Na'a, chiguyú'u tu le runru' löza le nácarö dxi'a, le run ga gaca ibíga'rú' gala' ga zoë' Dios.

<sup>20</sup> Cate' benë' Dios ga náquië' Jesús bixúz, benë' tsutsu xtídzë'ë. <sup>21</sup> Dios biti' benë' tsutsu xtídzë'ë cate' bucu'ë böñachi ni' ca bixúz, pero cate' benë' ga náquië' Jesús bixúz, benë' tsutsu xtídzë'ë, gunné':

Bena' tsutsu xtídz'a' neda', Xanu', gunnía':  
 "Biti' uts'a' ca guna'.

Tsaz nacu' bixúz  
 ca na' gúquië' Melquisedec bixúz."

<sup>22</sup> Que lë ni na', Cristo náquië' Nu run ga naca löza didza' rucá'ana tsahui' le nácarö dxi'a ca lë na' guca zí'alö. <sup>23</sup> Yugu' bixúz ni' guláquië' bönni' zián, tu' cabí guca ulu'gá'anë' yödzölió ni tu' gulátië', <sup>24</sup> pero tu' zóatica'së' Jesús, tsaz náquië' bixúz, en biti' gaca nu huöáza xilatjë' para gaca bixúz. <sup>25</sup> Que lë ni na', tsaz gaca usölé' nupa ta'biga' gala' ga zoë' Dios, nupa tu'gún dxin Lë', tu' zóatica'së' nabanë', en rnnë' dxi'a uláz quégaquië' lahuë' Dios.

<sup>26</sup> Ben bayudxi soa tu bixúz lo caní queëru'. Náquië' lá'ayi, en idú tsahui', en biti' náquië' tsözxón böñachi dul-la', pero nayépisëtëre' ca yúgu'të le nacuá' ni' yehua' yubá. <sup>27</sup> Jesús ni, biti' náquië' ca yugu' bixúz lo yödzölió ni, tu' ben bayudxi gula'gu'ë rön lahuë' Dios yugu' dza, ate' gulútië'-ba' bö'a' bëdxi lahuë' Lë' tu' nözi dul-la' nabága'gaca cazë', ate' gudödi ni' guluné' caní tu' nözi dul-la' nabága'gaca böñachi. Na'a, Jesús, tsaz gulu'ë rön lahuë' Dios, cate' ni' budödi cuiné' lahuë' Dios, en bulaljë' xichöñ cazë' tu' nözi dul-la' nabága'gaca yúgu'të böñachi. <sup>28</sup> Lu xibá queë' Moisés böñachi biti' nácagaca idú dxi'a nácagaca bixúz, pero gudödi bidxín xibá queë' Moisés, Dios benë' tsutsu xtídzë'ë, cate' benë' ga náquië' Zxf'ini cazë' bixúz lo, tu' náquië' idú tsahui' ca ral-la' gáquië' bixúz.

## 8

*Jesús náquië' Bixúz Lo queëru'*

<sup>1</sup> Na'a, ca rnna lë na' si' gunnía', naca caní: Zoa queëru' tu Bixúz Lo caní. Gurö'ë cuita lë'ë ibëla Dios, ate' rö'ë, rinná bë'ë yehua' yubá ni'. <sup>2</sup> Lë' runë' dxin ca Bixúz Lo lu lataj nácatérö lá'ayi, le naca yudo' le naca idútë, lë na' buchise' Xanru', en calëga böñachi. <sup>3</sup> Dios rucu'ë yúgu'të bixúz lo para ila'gu'ë yugu' le tu'nödzaj böñachi, enca' xichöngacaba' bö'a' bëdxi lahuë' Dios. Que lë ni na' ben bayudxi soa bi gulu'ë Cristo lahuë' Dios. <sup>4</sup> La'tu' zoë' luyú ni, biti' ca' gáquië' bixúz, tu' nacuá'tica'së' bixúz ni, nupa ta'gú'u yugu' le tu'nödzaj böñachi lahuë' Dios ca rinná bë' xibá queë' Moisés. <sup>5</sup> Yugu' bixúz ni tunë' dxin que tu le rulu'isö, en le naca ca tu bixín que lë na' rö'ö yehua' yubá. Caní naca, tu' gúdxdidë'ë Dios Moisés cate' si' uchisë' yú'udo' na' néquini guídi, gunné': "Buyútsöca', ben yúgu'të idú ca naca lë na' bulu'ida' li' lu guí'a ni'." <sup>6</sup> Na'a, Bixúz Lo queëru' ni runë' dxin que le nácatérö lesaca', ate' ni'a que le benë' Lë' zoa tu didza' rucá'ana tsahui' queëru' le nácatérö lesaca', en le rui'i didza' que le nácatérö lesaca' guzxi' lu né'ë Dios gata' queëru'.

<sup>7</sup> La'tu' gudapa didza' na' rucá'ana tsahui' le guzóa zí'alö idútë yöl-la' huáca, biti' ben bayudxi soa didza' buropi ni rucá'ana tsahui'. <sup>8</sup> Na'a, Dios rulu'ë biti' gulaca böñachi ni' idú dxi'a cate' bë'ë didza' ca na' nazúaj lu guichi lá'ayi, gunné':

Buli'yútsöca', gunné' Xanru': Zá'gaca dza cate' uzóa' tu didza' cubi ucá'ana tsahui', le gúnlena' böñachi Israel, en böñachi Judá.

<sup>9</sup> Biti' gaca ca guca didza' rucá'ana tsahui' na', lë na' bénlena' xuz xtó'ogaquië', dza ni' gudéla'a ná'agaquië', en bubéaja' légaquië' luyú Egipto.

Tu' bulu'cá'ané' didza' quia' rucá'ana tsahui',  
neda' bucá'ana' légaquië', rnnë' Xanru'.

<sup>10</sup> Que lë ni na', caní gaca didza' ucá'ana tsahui'  
gúnlena' bönachi Israel  
tödi yugu' dza ni', rnnë' Xanru'.  
Uchízia' icja ládx'i do'gaquië' xibá quia'  
en uzúaja' le lu icja ládx'i do'gaquië'.  
Ní'irö gaca' Dios quégäquië'  
ate' légaquië' iláquië' bönachi quia'.

<sup>11</sup> Biti' gun bayudxi nu usedi luzé'e, inná:  
Bénbë'ë Xanru', tu' ilúnbë'ë yúgu'té' neda',  
ga isí lo nu naca cá'asö, ga idxintë nu naca lo.

<sup>12</sup> Huéchi' ládxa'a légaquië',  
en uniti lahua' le cabí naca tsahui' gulunë',  
en bíti'rö tsöjneda' dul-la' nabága'gaquië'.

<sup>13</sup> Cate' ni' ru'ë Dios didza' que tu didza' cubi rucá'ana tsahui', naca tu' chibigula lë na'  
guzóa zí'alö, ate' chizóa idúa lë na' nagula, en chinaca gulasi.

## 9

*Lataj lá'ayi dë luyú, en lataj lá'ayi dë yehua' yubá*

<sup>1</sup> Na'a, didza' rucá'ana tsahui' na' guzóa zí'alö, dzágagaca xibá le ca ral-la' ila'yéaj ládx'i'gaca bönachi Dios, en lataj lá'ayi bidzága le guca que luyú ni. <sup>2</sup> Caní naca lataj lá'ayi na' néquini guídi. Lu lataj na' dë láhuilö, nazí'i le Lataj Lá'ayi, gula'cuá' le nuá' guí', en bucugu lá'ayi ga ni' gula'gu'ë yugu' ýota xtildo' lahuë' Dios. <sup>3</sup> Cúdzi'lö le buropi lari' nal-la' lu yu'u na' zoa lataj ni' nazí'i le, Lataj Idú Lá'ayi, <sup>4</sup> ate' lu lataj ni' gula'cuá' tu bucugu néquini oro ga na' bulu'zegui'ë nöri, enca' tu guí'ina ga yu'u didza' rucá'ana tsahui', en nacu guí'ina na' oro. Lu guí'ina na' gula'cuá' zxíga'do' na' néquini oro, le nadzá' ýota xtildo' na' nazí'i le maná, enca' xuyaga queë' Aarón, lë na' bubö' ni'a në'e, enca' yugu' guiój blaga na', nazúaj láhuilöguequi didza' rucá'ana tsahui'. <sup>5-6</sup> Lahui guí'ina na' gula'cuá' chopá gubáz lá'ayi néquiguequini oro, léga'ca querubín que lataj ga bulu'i lahuë' Dios, ate' bulu'zxóa xíliquequi láhuilö lataj ga ni' gulü'ë bixúz lo rön tu' nözi dul-la'. Caní bulu'cu'ë yugu' lë ni. Biti' dë lataj uzúaja' na'a idútë ca nácagaca lë ni.

Ta'yázatica'së' yugu' bixúz lu lataj zoa láhuilö, ga na' tunë' dxin quégäquië' que le ta'yéaj ládx'i'gaquië' Dios. <sup>7</sup> Tuzé' bixúz lo guyázië' lu lataj buropi ni' tu luzuísö tu iz, en bi'ë rön le gulü'ë lahuë' Dios tu' nözi dul-la' nabaga' cazë', enca' tu' nözi dul-la' nabága'gaca bönachi, dul-la' gulunë' le cabí guléquibe'enë'. <sup>8</sup> Caní ruzéajni'inë' Dios Bö' Lá'ayi rë'u, biti' ca' guca idxinru' lahuë' Dios caz tsanni ni' tu'gunë' dxin lataj lá'ayi na' zoa láhuilö lu yu'u lá'ayi na' néquini guídi, lë na' bidzága didza' rucá'ana tsahui' le guzóa zí'alö. <sup>9</sup> Yugu' lë ni naca tu le rului'isö que le raca na'a dza. Yugu' le gula'gu'ë lahuë' Dios, en rön quégacaba' böa' bëdxí na' gulútië'-ba' lahuë' Dios biti' guca ulu'ún idú dxi'a icja ládx'i' do'gaquië' bönni' ni' gula'yéaj ládx'i'gaquië' Dios caní. <sup>10</sup> Yugu' lë ni bulu'i lahui quégacasö le gulë'aj gulahuë', en ca ral-la' ila'guíbi cuíngaquië', en quégaca xibá ca ral-la' gaca que idú ca zeaj naca cazë'. Yugu' lë ni buzóë' Dios quégäquië' ga bidxintë dza ral-la' utsé'ë yúgu'té'.

<sup>11</sup> Na'a, chibudulu'i lahuë' Cristo, en náquië' Bixúz Lo que le naca idú dxi'a, le bilá' lahui ni'a que le benë' Lë'. Lataj lá'ayi ga na' guyázië' Lë' nácarö lo, en nácarö idú, en biti' néquini lu ni'a lu ná'agaca bönachi, en biti' naca que luyú ni. <sup>12</sup> Na'a, chiguyázië' Cristo lu lataj lá'ayi na', calëga len xichóngacaba' bëdxido', en xichóngacaba' chivo, pero len rön queë' cazë'. Guyázië' lu lataj idú lá'ayi tu luzuísö, ate' caní guca, benë' ga nuláru' tsaz.

<sup>13</sup> Le nácatë xichóngacaba' bëdxí, en chivo, en dö queë'ba' bëdxido'bulu'zegui'ë-ba', yugu' le gula'gu'ë lu ícjagaca nupa nabága'gaca dul-la', guca ulu'gúa dul-la' na' nabága'gaca

bönachi para ulu'ún légaquië' dxi'a idú ca zeaj naca cazë' ca naca que yöl-la' yudo' quégaquië'. <sup>14</sup> Na'a, gúnterö ca' xichönë' Cristo, tu' budödi cuinë' queë' Dios, en gúquië' idú tsahui', ate' zóalenë' Dios Bö' Lá'ayi Lë', Nu zóatica'sö. Na'a, xichönë' Cristo ruún idú dxi'a icja ládxi'do'oru' lu yugu' le gubága'ru' le tun ga nu gati, para gaca gunru' xichinë' Dios ban.

<sup>15</sup> Que lë ni na' náquië' Jesucristo Nu ben tsutsu didza' cubi rucá'ana tsahui', tu' gútië' Lë', en bugúi' dul-la' gula'baga' bönnachi cate' ni' zoa didza' gula rucá'ana tsahui'. Gútië' ca' para gaca ila'zi'ë lë na' guzxí' lu né'e Dios unödzjë' quégaquië' bönni' bulidzë', le zóatica'sö. <sup>16</sup> Cate' ratië' nu bönni', en nucá'anë' tu didza' ca ral-la' ila'guisië' le nequi queë', run bayudxi gaca bë' chinátië' bönni' na' para gaca ilunë' ca rnna didza' na' nucá'anë'. <sup>17</sup> Cate' chinátië' bönni' na', gaca ilunë' ca rnna didza' na', pero tsanni ni zoë' nabanë', biti' ca' gaca ilunë' ca rnna didza' na'. <sup>18</sup> Que lë ni na', didza' na' rucá'ana tsahui' le guzóa zí'alö guca lesaca' tu' bidzága rön didza' na', le rulu'i'sö zoa nu guti. <sup>19</sup> Cate' ni' gudíxjöi'inë' Moisés bönnachi ni' ca nácagaca yúgu'të xibá queë' Dios, gudélë'ë rön quégacaba' bédxico', en quégacaba' chivo, le nutsi' nisa, ate' len tu guíxi'do' nazí'i le hisopo, en lítsa'ba'bö'cu' zxila' le né'aj xiná, buchéaje' rön, en nisa na' lahuí guichi ga na' nazúaj xibá na', enca' láhuigaca bönnachi. <sup>20</sup> Ní'irö gudxë' légaquië': "Lë ni naca rön le run tsutsu didza' rucá'ana tsahui' le Gunná bë'enë' Dios rë'u para gunru' ca rnna." <sup>21</sup> Lësca' caní buchéaje' Moisés rön na' lu lataj lá'ayi néquini guídi, en lahuí yúgu'të le tu'gunë' dxin para ila'yéaj ládxi'gaquië' Dios. <sup>22</sup> Ca na' rinná bë' xibá na', látu'biqu' yúgu'të ral-la' un dxi'a rön léguequi, ate' channö cabí tu'laljë' rön, biti' udúa dul-la'.

### Xichönë' Jesucristo rugúa dul-la'

<sup>23</sup> Caní naca, ben bayudxi guzóa le bun dxi'a yudo' luyú ni le naca tu le rulu'i'sö ca naca lë na' rö'ö yehua' yubá, pero ca naca lë na' rö'ö yehua' yubá, ben bayudxi soa le un dxi'a nupa ila'yaza le, le nácarö lesaca' ca xichöngacaba' böa' bédxico' caní. <sup>24</sup> Biti' guyázië' Cristo lataj lá'ayi néquini lu ni'a lu ná'agaca bönnachi, lë na' naca tu le rulu'i'sö ca naca le naca idú, pero guyázië' yehua' yubá caz para gaca ulu'i lahuë' na' lahuë' Dios uláz queéru'. <sup>25</sup> Bixúz lo zoë' luyú ni razië' lataj nácatérö lá'ayi tu tu iz len rön quégacaba' böa' bédxi, pero biti' run bayudxi tsázië' Cristo zián luzuí para udödi cuinë' lahuë' Dios. <sup>26</sup> La'tu' guca caní, gun bayudxi qui'i sáquë'ë Cristo, en gátië' zián luzuí dza ni'te cate' guta' yödzölió ga ridxitné na'a dza, pero na'a cate' naca dza údxí, tsaz bulu'i lahuë' tu luzuísö, en budödi cuinë' lahuë' Dios, cate' gútië' para bugúë' dul-la' nabága'ru'. <sup>27</sup> Ca na' run bayudxi ilátigaca bönnachi tu luzuísö ate' tödi ni' uchi'a usöröë' Dios léguequi, <sup>28</sup> lësca' caní, gútië' Cristo tu luzuísö, cate' budödi cuinë' lahuë' Dios para bugúë' dul-la' nabága'gaca bönnachi zián. Na'a, ulu'i lahuë' le buropi luzuí, calëga para ugúë' dul-la', pero para usölë' tsaz nupa ta'böza Lë'.

## 10

<sup>1</sup> Xibá na' Gunná bë'ë Moisés guca tu le rulu'i'sö ca zeaj naca le tsahui' si' zá'gaca, en biti' guca idú ca nácagaca. Que lë ni na', xibá na' queë' Moisés biti' guca un idú tsahui' nupa ni' bila'dxín lahuë' Dios, en biá'gaca rön quégacaba' böa' bédxico', lë na' gula'gú'utica'së' lahuë' Dios yugu' iz. <sup>2</sup> La'tu' guca un légaquië' idú tsahui', biti' gula'gú'utica'së' rön ni' lahuë' Dios, tu' cabirö iléquibe'enë' bönni' guca caní quégaquië' nabága'gaquië' dul-la' channö chibulu'huöáquië' idú tsahui'. <sup>3</sup> Rön ni' gula'gú'ë lahuë' Dios yugu' iz busá' ládxi'gaquië' nabága'gaquië' dul-la'. <sup>4</sup> Caní guca, tu' cabí guca xichöngacaba' bédxi, en chivo ugúa dul-la'.

<sup>5</sup> Que lë ni na', cate' bidxinë' Cristo yödzölió ni, gudxë' Dios ca na' nazúaj lu guichi lá'ayi le rnna:

Biti' ré'ënu' nu cu'u rön quégacaba' böa' bédxi lo'  
pero benu' ga naca' bönnachisö.

<sup>6</sup> Biti' raza ládxu'u nu uzegui'-ba' böa' bëdxi lo',  
o nu cu'u xichóngacaba' lo' tu' nözi dul-la'.

<sup>7</sup> Ní'irö gunnía': Ni zoa' para guna' ca ré'ënu' Li', Dios.  
Naca ca na' nazúaj lu guichi lá'ayi ca gaca quia'.

<sup>8</sup> Lë na' nazúaj zí'alö rnna: "Biti' ré'ënë' Dios nu cu'u rön quégacaba' böa' bëdxi lahuë'." Didza' ni rulu'i rë'u bíti'rö raza ládxë'ë Dios lë ni sal-la' lu xibá queë' Moisés rinná bë'enë' Dios nu gun caní. <sup>9</sup> Gudödi ni' rnna: "Ni zoa' para guna' ca ré'ënu' Li', Dios." Didza' ni rulu'i rë'u rugüë' Dios lë na' gula'gu'ë lahuë' zí'alö, en ruzóë' xilataj le gulu'ë Zxí'ini cazë' lahuë'. <sup>10</sup> Na'a, Dios ruúnë' rë'u idú tsahui' tu' benë' Cristo ca ré'ënë' Dios cate' ni' budödi cuinë' lahuë' Dios uláz queéru', en gútië' tu luzuísö.

<sup>11</sup> Le nácatë yúgu'té bixúz luyú ni zuíguequinë' yugu' dza, en tunë' xichíngaqüië', en la' tuz ca tunë', ta'gu'ë lahuë' Dios zián luzuí xichóngacaba' böa' bëdxi, yugu' le cabí gaca ulu'gúa dul-la'. <sup>12</sup> Na'a, Cristo, tu le gulu'ë tsaz lahuë' Dios tu luzuísö tu' nözi dul-la', ate' ní'irö yójchö'ë cuita lë'ë ibëla Dios. <sup>13</sup> Ribözë' ni' dza gunë' Dios ga ulu'zechu zxíbigaca lahuë' nupa biti' ta'lé'e Lë' dxí'a. <sup>14</sup> Ni'a que tuz le gulu'ë lahuë' Dios, tsaz benë' ga nácagaca idú tsahui' nupa na' bunë' dxí'a, en bubéajé' léguequi quez queë' Dios. <sup>15</sup> Lësca' caní Dios Bö' Lá'ayi runë' ba nalí loru', tu' gunné' zí'alö lë na' nazúaj lu guichi le rnna:

<sup>16</sup> Caní gaca didza' ucá'ana tsahui' gúnlena' légaquië'  
tödi yugu' dza ni', rnnë' Xanru'.  
Uchízia' icja ládxí'do'gaquië' xibá quia',  
en uzúaja' le lu icja ládxí'do'gaquië'.

<sup>17</sup> Gudödi na' gunné':  
Bíti'rö tsöjneda' dul-la' nabágagaquië'  
en dö' biá'gaquië'.

<sup>18</sup> Que lë ni na', channö chinadúa dul-la', bíti'rö run bayudxi nu bi cu'u lahuë' Dios tu' nözi dul-la'.

### *Huáca ibíga'ru' gala' ga zoë' Dios*

<sup>19</sup> Na'a, yugu' böchi' luzá'ado', idú ládxí'ru' gaca idxinru' lahuë' Dios caz, ni'a que xichönë' Jesucristo. <sup>20</sup> Tséajlenru' tu nöza cubi, en idú tsahui' le nuzóë' Cristo, le ridxín cùdzi'lö lari' na' busayaj ga nu riyaza lataj idú lá'ayi na', o huáca innaru', nöza na' gusaljë' Cristo ni'a queéru' tu' budödë' idútë le naca cazë'. <sup>21</sup> Jesús náquië' queéru' tu bixúz nayépisétérë', en rinná bë'enë' bönachi queë' Dios. <sup>22</sup> Que lë ni na' huáca ibíga'ru' gala' ga zoë' Dios idú ládxí'ru', en lu yöl-la' run löza queéru', tu' réajlé'ëru' Cristo, tu' chibunë' dxí'a icja ládxí'do'oru', para cabí uxösa ládxí'do'oru' rë'u, ate' gudibé' idútë le naca cázaru' len le naca tu nisa nácatérö idú. <sup>23</sup> Ral-la' gácaru' tsutsu, en cabí gaca chopá ládxí'ru' ca naca le runru' löza que le nazí' lu ná'aru', le guzxí' lu né'ë Dios gunné' queéru', ate' Lë' runë' ca rnnë'. <sup>24</sup> Ral-la' utipa ládxí'ru' turu' ia'turu', para gunru' ga idxí'iröru' luzá'aru', en gúnröru' ca' le naca tsahui'. <sup>25</sup> Bal-la bönachi bíti'rö tu'dubi len rë'u. Biti' ral-la' gunru' ca tun bönachi na', pero ral-la' utipa ládxí'ru' turu' ia'turu', en gúnröru' caní tu' rilé'ëru' chizóa idxín dza huödë' Xanru'.

<sup>26</sup> Channö zéajlenru' runru' dul-la' tödi núnbe'ëru' le naca idútë li, biti' ca' nagá'ana bi gaca cí'uru' lahuë' Dios le ugúa dul-la'. <sup>27</sup> Yugu' bönni' tunë' caní, lu yöl-la' radxi ridzöbi quégaquië' ta'bözë' dza ichúguië' Dios quégaquië' ila'yázië' lu guí' gabilia, lë na' uzéguitica'sö nupa ta'dá'baga' Dios. <sup>28</sup> Cate' nu bönni' buzóë' xibá queë' Moisés tsölá'alö, gulútië' lë' channö chopá tsonna bönachi gulún ba nalí que le benë', ate' cuntu nu buéchi' ladxi' bönni' na'. <sup>29</sup> Na'a, nu bönni' uzóë' tsölá'alö Zxí'inë' Dios, en uzóë' tsölá'alö ca' xichönë' le run tsutsu didza' rucá'ana tsahui', le ruún rë'u dxí'a, ibága'rë' ca' xíguia'. Nu bönni' gunë' caní ucá'anë' cá'asö Dios Bö' Lá'ayi, Nu ruzá' ladxi' queéru' le riquíniru'.

<sup>30</sup> Caní gaca, tu' núnbe'ëru'-në' Dios, Nu gunná: "Quia' neda' nequi yöl-la' ruzí' lëbi. Neda'

ubi'a quégaca bönachi, rnnë' Xanru'." Lësca' caní gunné': "Xanru' uchi'a usöröö' bönachi queë'." <sup>31</sup> Ral-la' gadxi idzöbi nu ral-la' si' xíguia' lu në'ë Dios ban.

<sup>32</sup> Guli'tsöjnë yugu' dza chigula'dödi cate' ni' si' bidxín queéli' bení', ate' biá' gulenli' zián le bulu'saca' zí'ë libí'ilí'. <sup>33</sup> Bulu'lidza ditaj bönachi libí'ilí', en bulu'dxía libí'ilí' dö' lahui' lögaca bönachi, ate' benli' tsözxón ca' nupa gula'gui'i gula'zaca' caní. <sup>34</sup> Caní guca, tu' buéchi' ládxí'li' nupa nadzungaca lidxi guíe, en lu yöl-la' rudzeja queéli' biá' gulenli' nupa gula'béaj lídxili' yugu' le guta' queéli'. Caní benli' tu' nözili' nequi queéli' le nácarö dxi'a, en le zóatica'sö ni' yehua' yubá. <sup>35</sup> Na'a, biti' ucá'anali' lé na' runli' löza, le naché' tu le zxön ubi'ë Dios queéli'. <sup>36</sup> Run bayudxi cőzali' zxön ladxi', para cate' chibenli' ca ré'ënë' Dios, sí'ilí' le guzxí' lu në'ë gunné' queéli', ca na' nazúaj lu guichi lá'ayi, ca gunné' Dios le rnna:

<sup>37</sup> Ia'tú chí'ido'osö idxinë' Bönni' na' ral-la' guídë'.

Biti' ca' tsenë'.

<sup>38</sup> Ní'irö nu naca tsahui' lahuá' neda', ulá nu na' tu' réajlë' neda'.

Channö huóaj ladxi', en tá'baga' neda', bítí'rö tsaz ládx'a' nu na'.

<sup>39</sup> Na'a, rë'u ni, biti' nácaru' ca nupa tu'huóaj ladxi', en ta'dá'baga' Dios, en ila'niti, pero réajlë'ëru' Cristo, en nadéli'ru' yöl-la' rusólá.

## 11

### *Ca naca yöl-la' réajlë' queéru' Dios*

<sup>1</sup> Na'a, tu' réajlë'ëru' Dios, naca löza queéru' sí'iru' le runru' löza, ate' naca bë' zoa le cabí gaca ilé' eru'. <sup>2</sup> Caní gula'yéajlë'ë xuz xtó'oru' Dios, ate' que lé ni na' nazúaj lu guichi lá'ayi ca guca quégacië' le rnna: Bulu'rúajé' tsahui' lahué' Dios.

<sup>3</sup> Tu' réajlë'ëru' Dios, réquibe' eru' benë' Lë' yödzölió ni len didza' bë'ësë'. Lësca' caní, cate' benë' Dios yúgu'të le rilé' eru', bugunë' dxin le cabí nalá'.

<sup>4</sup> Tu' guyéajlë'ë Abel Dios, gulu'ë rön queéba' böa' bédxido' lahué' Dios, tu le nácatérö lesaca' ca le gulu'ë Caín lahué' Dios, en que lé ni na' Dios benë' ba nalí queë' Abel na', gunné' náquië' tsahui', en benë' bal lé na' gulu'ë lahué'. Sal-la' chinátië' Abel na', ga ridxitë na'a dza, naca tsca ru'ë didza', tu' guyéajlë'ë Dios.

<sup>5</sup> Tu' guyéajlë'ë Enoc Dios, gudödë' ni' yehua' yubá, en biti' ca' gútië', ate' bítí'rö nu budzöli' lé', tu' buché'ë Dios lé', ate' nazúaj lu guichi lá'ayi ca naca queë' le rnna: "Zí'alö ca buché'ë Dios lé', benë' Enoc le raza ládxë'ë Dios." <sup>6</sup> Na'a, channö cabí réajlë'ëru' Dios, biti' gaca gunru' le raza ládxë'ë Lë', ate' para ibíga'ru' gala' ga zoë' Dios, run bayudxi tséajlë'ëru' zoa cazë' Lë', en rubi'ë que nu ruñ'i ladxi' Lë'.

<sup>7</sup> Cate' ni' Dios buzáejni'inë' Noé ca ral-la' ilaca le cabí rilé'eninë' Noé na', tu' guyéajlë'ë Noé Dios, benë' ca rnna xtídzë'ë Dios. Bupé'ë barco zxön na' nazí'i le Arca, ate' lé'e barco na' bulu'lá bönachi di'a dza queë' Noé. Tu' guyéajlë'ë Noé Dios, benë' ga naca bë' narugu quégaca bönachi yödzölió ilátigaca, ate' bidéli' në' gúquië' tsahui' lahué' Dios, le ta'deli' nupa ta'yéajlë' Lë'.

<sup>8</sup> Cate' ni' Dios bulidzë' Abraham, tu' guyéajlë'ë Abraham Lë', benë' ca rnna xtídzë'ë Dios, en buzé'ë ladzë' para tsejë' lataj ni' ral-la' si'ë ca tu le guequi tsaz queë', ate' birúajë' ladzë' sal-la' biti' nözine' gazxi na' ral-la' tsejë'. <sup>9</sup> Tu' guyéajlë'ë Abraham Dios, gúquië' ca tu bönni' zí'tu', en guzóë' luyú na' Dios guzxí' lu në'ë unödzjë' queë'. Guzóë' lu yu'u guídido', en lëbisö ca gulunë' Isaac, en Jacob, zxí'ini xi'sóë' Abraham, nupa ni' guzxí' lu në'ë Dios unödzjë' quéguequi lé na' guzxí' lu në'ë unödzjë' queë' Abraham. <sup>10</sup> Caní benë' Abraham, tu' benë' löza idéli' në' yödzö na' rö'ö tsaz xilibi zö'ö que, le nuzóë' Dios xilibi zö'ö que, ate' gulu'ë le ga na' zoë' Lë' cazë'.

<sup>11</sup> Lësca' caní Sara, sal-la' chinácanu nigula huödx, guyéajlë'ënu Dios, ate' Lë' bë'ë queénu yöl-la' huáca buzóanu-bi' b'ido'. Buzóanu-bi' bi'i bönni'do' sal-la' chigudödi izi queénu, tu' guyéajlë'ënu Dios gunë' ca rnna xtídzë'ë na' guzxi' lu né'ë queénu. <sup>12</sup> Que lë ni na', sal-la' chibigúladë'ë Abraham, gula'cuá'abi' ziánteröbi' zxí'ini xi'sóë'. Gula'cuá'abi' tsca rö'öba' bölaj lúzxiba, en tsca rö'ö yuzxi tu ra' nisa zxön, cuntu nu gaca ulaba légacabi'.

<sup>13</sup> Yugu'të bönni' ni gulátië', en biti' gula'zi'ë lë na' guzxi' lu né'ë Dios unödzjë' quégacuïë', pero gula'yéajlë'ë Dios, ate' zí'tu' zí'tu'sö bila'lé'enë' lë na' ral-la' ila'zi'ë. Gula'yéajlë'ë Dios, en gulunë' ba nalí que lë ni. Caní guca, bulu'lu'ë nácagaquïë' ca bönni' zí'tu', en bönni' ta'dazë' yödzölió ni. <sup>14</sup> Yugu' bönni' tu'ë caní didza', tu'lu'ë ta'guiljë' tu lataj le gaca ládzagaquïë'. <sup>15</sup> La'tu' gula'zá' ládxí'gaquïë' caní que luyú ga ni' bila'rúajë', le nácatë ulu'dzölinë' nacxi huóajgaquïë' ni', <sup>16</sup> pero gula'zá' ládxí'gaquïë' que luyú na' nácarö dxi'a, le rö' yehua' yubá. Que lë ni na' biti' rutu'inë' Dios cate' ta'nné' náquië' Dios quégacuïë', tu' chinupé'ë tu yödzö quégacuïë'.

<sup>17</sup> Tu' guyéajlë'ë Abraham Dios, cate' guzxi' bë'ë Dios lë', budödë'-bi' bi'i Isaac queë' lahuë' Dios ca na' tu'dödë'-ba' yugu' böa' bëdxi tútigaquïë'-ba' lahuë' Dios. Guzóë' sina' Abraham gútië'-bi' bi'i bönni' zí'alö queë' na' lahuë' Dios sal-la' nácabí' bi'i na' guzxi' lu né'ë Dios unödzjë' queë'. <sup>18</sup> Caní benë' sal-la' gudxë' Dios lë', gunnë': "Lu ná'abi' bi'i Isaac quiu' ichísagaca'-bi' zxí'ini xi'sú'." <sup>19</sup> Caní benë' Abraham, tu' gúquibe'enë' napë' Dios yöl-la' huáca usubanë'-bi' lu yöl-la' guti, ate' ca tu lugá'a luséqui', huáca innaru' buzi'ë-bi' lu yöl-la' guti sal-la' biti' guti cázabi'.

<sup>20</sup> Tu' guyéajlë'ë Isaac Dios, gunábinë' Dios gun lá'ayë'-bi' bi'i Jacob, enca' bi'i Esaú ca zeaj naca le ulu'zí'ibi' xibé dza si' za'. <sup>21</sup> Tu' guyéajlë'ë Jacob Dios, cate' ni' chizóa gátië' gunábinë' Dios gun lá'ayë'-bi' tu tubi' zxí'inë' José, ate' guyéaj ládxë'ë Dios, ni' nayéchuë' lu xiyaga queë'. <sup>22</sup> Tu' guyéajlë'ë José Dios, cate' ni' chizóa gátië', bë'ë didza' que dza na' ila'rúajë' zxí'ini xi'sóë' Israel luyú Egipto, ate' gunná bë'ë ca ral-la' ilu'ë dxita queë' luyú ga na' tsöjcu'ë'.

<sup>23</sup> Tu' gula'yéajlë'ë Dios, cate' gúljabi' b'ido' Moisés, xuz xiná'abi' bulu'cáchë'ë-bi' idú ca tsonna beo', tu' bila'lé'enë' nácabí' bi'i bönni'do' na' lachi, en biti' guládxinë' bönni' rinná bë'enë' böñachi Egipto, bönni' na' gunná bë'ë ilútië'-bi' yugu' bi'i bönni'do' na'.

<sup>24</sup> Tu' guyéajlë'ëbi' Moisés Dios, cate' guzxonbi', biti'rö bë'ëbi' lataj nu uzóa lëbi' bi'i bönni' queénu nigula zxí'inë' Faraón, bönni' na' rinná bë'enë' böñachi Egipto. <sup>25</sup> Caní benbi' tu' gúquibi' nácarö dxi'a nu usaca' zi' lëbi' tsözxön len böñachi queë' Dios ca uzí'ibi' xibé tu chí'isö yugu' le tu'zi' xibé nupa tun dul-la'. <sup>26</sup> Gúquibi' nácarö lesaca' nu ulidza ditaj lëbi', ca na' gaca ca' queë' Cristo, ca idéli'bi' yugu' yöl-la' tsahui' quégaca böñachi Egipto, tu' guzá' ládxí'bi' ca naca le ubi'ë Dios queëbi'. <sup>27</sup> Gudödi ni', tu' guyéajlë'ë Moisés Dios, birúajë' luyú Egipto, en biti' gúdxinë' yöl-la' rilé queë' bönni' rinná bë'enë' böñachi Egipto, ate' biá' gulénë' ca run nu rilé'ë Dios, Nu na' biti' gaca ilé'eru'.

<sup>28</sup> Tu' guyéajlë'ë Moisés Dios, benë' Laní Pascua ca gunná bë'enë' Dios lë', en buchéajë' rön ra' yu'u lídxigaquïë', para cabí guti zxí'inigaquïë' nu na' ral-la' usuniti yugu' bi'i bönni' zí'alö quégaca böñachi Egipto. <sup>29</sup> Tu' gula'yéajlë'ë yugu' bönni' Israel Dios, gula'dödë' luyú bidxi gatsaj láhui'lö nísado' nazi'i le Nisa Xiná. Cate' gulé'ënnë' ila'dödë' ca' bönni' Egipto ni', gula'yépini' nisa, en gulátigaquïë' lu Nisa Xiná na'.

<sup>30</sup> Tu' gula'yéajlë'ë bönni' Israel Dios, cate' budxi gula'dödë' idú gásibi'ilö yödzö Jericó yugu' dza idú gadxi dza, bila'guínnaj yugu' zö'ö gulún chi'i yödzö na'. <sup>31</sup> Tu' guyéajlë'ënu Rahab Dios, nigula ruí'nu lataj böñachi, biti' gútinu tsözxön len böñachi Jericó na' biti' gulún ca rnna xtídzë'ë Dios, tu' bennu bal bönni' Israel na' buduyúlangaquïë' le rácaleñ böñachi Jericó.

<sup>32</sup> ¿Bízzirö ral-la' innía'? Riyadzaj lataj uzúaja' ca gulunë' Gedeón, en Barac, en Sansón, en Jefté, en David, en Samuel, enca' yugu' bönni' gulu'ë didza' uláz queë' Dios.

<sup>33</sup> Tu' gula'yéajlë'ë Dios, bulu'zötjë' zián yödzö zxön.  
Gulunë' le naca tsahui', ate' gula'déli'në'  
le guzxí lu né'ë Dios unödzjë' quégäquië'.  
Bulu'sayjë' ruá'agacaba' bëdxi guixi'.

<sup>34</sup> Bulu'lé' yugu' lu guí' zxön.  
Bila'rúajé' lu ná'agaca nupa gulé'ëni iluti légaquië' len guíë tuchi'.  
Dios bunë' légaquië' tsutsu cate' ni' gula'cuídi'në'.  
Bulu'huöáquië' ca' tsutsu lu gudil-la.  
Bulu'láguië' bönni' guizxi yu röjáquië' gudil-la quégäquië' bönni' zi'tu'.

<sup>35</sup> Yugu' nigula dza ni' bulu'zí' inu bi'i queégacanu nubángacabi' lu yöl-la' guti.  
Ia'bal-lë' bönni' ni' gulátië' lu ná'agaquië' bönni' ni' bulu'saca' zi'ë légaquië', en tu' cabí gulé'ënnë' ulu'cá'anë' Dios, biti' gula'zi'ë lataj nu usán légaquië'. Caní gulunë' para ila'déli'në' yöl-la' rubán lu yöl-la' guti, lë na' guléquinë' nazáca'rö. <sup>36</sup> Ia'bal-lë' biá' guléngäquië' yöl-la' rutitaj, en xíguia' que gubá'ayi, ate' gula'dzunë' lidxi guíë, nágä'gaquië' du guíë. <sup>37</sup> Bulu'ladxi' böñachi bal-lë' guiój, en gula'chözë' ia'bal-lë'. Gula'zí' bë'ë légaquië', en gulútigaca ziángaquië' len guíë tuchi'. Gula'dödë' ná'alö ní'ilö, nácugaquië' guídi zxágacaba' bö'cu' zxila', en chivo. Guláquië' yechi', en gula'guí'i gula'záqué'ë, ate' bulu'dxía böñachi légaquië' dö'. <sup>38</sup> Caní guláquië' bönni' na', ate' biti' gulaca böñachi yödzolió ni lesaca' ulu'zí' xibégaquië'. Gula'dasë' lu lataj cá'asö, en yugu' lu guí'a, ate' gula'cuá'asë' yugu' zxan buloaj, en yugu' yero luyú. <sup>39</sup> Yúgu'té' bulu'rúajé' tsahui' lahuë' Dios tu' gula'yéajlë'ë Lé', sal-la' biti' gula'zi'ë luyú ni le guzxí' lu né'ë Dios unödzjë' quégäquië'. <sup>40</sup> Caní guca, tu' nupé'ë Dios ni'a queéru' tu le nácarö dxi'a para cate' únë' légaquië' idú dxi'a, rë'u ni gunru' légaquië' tsözxón.

## 12

### Ral-la' uyuru'-në' Cristo

<sup>1</sup> Que lë ni na', lësca' rë'u, tu' nacuá' idú gásibi'ilö ga ni zóaru' ziánterö nupa tun ba nalí ca ta'yéajlë' Dios, ral-la' ucá'anaru' yúgu'té le ruá' dö' le naca ca tu le naca zi'i nuá'aru', enca' yúgu'té dul-la' nazöngaca rë'u, ate' lu yöl-la' riböza zxön ladxi' queéru', ral-la' gunru' xichinë' Dios, le naca tsca xítiru' lu huitaj le zoa loru'. <sup>2</sup> Ral-la' uyuru'-në' Jesúś, Nu na' run ga gaca tséajlë'ëru' Dios, en Nu run ga raca idú yöl-la' réajlë' queéru' Lé'. Jesúś gudi'i guzxáquë'ë lë'e yaga cruz, en biá' gulénë' yöl-la' rutu'i que, tu' gú'unnë' idéli'në' yöl-la' rudzeja na' uzi'ë xibé, ate' yöjchö'ë cuita lë'ë ibëla Dios, ga ni' rö'ë rinná bë'ë.

<sup>3</sup> Buli'yúë' Jesúś, ca na' gudi'i guzxáquë'ë le bulu'saca' zi'ë bönni' dul-la' Lé', para cabí icuídili', en para cabí gaca chopá ládxilí'. <sup>4</sup> Ga ridxitnë na'a dza, biti' bi biá' gulenli' ga idxintë nu gun libí'ili' huë' tu' ridá'baga'li' le naca dul-la'. <sup>5</sup> Nadxi ca' chizá' ral-la ládxilí' lë na' ruzéajni'inë' Dios libí'ili'. Nácali' ca yugu' zxí'ini cazë', ca na' nazúaj lu guichi le rnne':

Zxí'ina', biti' uzú' tsölä'alö le gunë' Xanru',  
cate' usëdi uzéajni'inë' li',  
en biti' huöaj ládxu'u cate' uni'inië' li'.

<sup>6</sup> Xanru' runí'inië' nu nadxí'inië',  
en rusédi ruzéajni'inë' yúgu'té nupa ta'zí' lu né'e ilaca zxí'ini cazë'.

<sup>7</sup> Ral-la' guá' ilenli' le uni'inië' Dios libí'ili', tu' runë' Dios caní queéli' tsca nácali' zxí'ini cazë'. Biti' ca' zóabi' tubi' bí'ido' biti' uni'inië'-bi' xúzibi'. <sup>8</sup> Na'a, channö cabí runí'inië' Dios libí'ili' ca na' runë' quégaca yúgu'té zxí'ini cazë', ní'irö nácali' ca yugu' bi'i lan, en biti' nácali' idú zxí'inië' Dios. <sup>9</sup> Ia'stú, cate' ni' nácaru' bí'ido', gula'cu'ë xuz xiná'aru' luyú ni, bulu'ní'inië' rë'u, pero runru' légaquië' bal. Ca' naca, ral-la' gúnröru' ca rnna xtídzë'ë Xúziru' zoë' yehua' yubá para sóaru' ibanru' tsaz. <sup>10</sup> Yugu' xuz xiná'aru', tu chí'isö bulu'ní'inië' rë'u tsca le guléquisinë' naca dxi'a, pero cate' runí'inië' Dios rë'u, naca

para gaca tu le uzí'iru' xibé, para gácaru' idú lá'ayi ca naca cazé' Lë'. <sup>11</sup> Le nácaté biti' nalá' lahui na'a le uzí'iru' xibé que le runí'iné' rë'u, pero run ga ruhu'íniru'. Channö güí'iru' lataj usédi rë'u le runí'iné' rë'u, gun ga cözaru' dxí'ado', en ga gácaru' tsahui'.

*Soa böñadxi queéru' channö cabí uzé nágaru' chi'ë Dios*

<sup>12</sup> Que lë ni na' buli'ún tsutsu ná'ali' le röjxéqui'guequi, enca' zxíbili' le ta'zxizi, en idipa ládxí'li' para gunli' le naca dxi'a. <sup>13</sup> Guli'sóa nöza tsahui', para cabí gunli' ga ucá'ana nu ricuidi' ladxi' nöza na', pero guli'gún ga huöáca ladxi' nu na'.

<sup>14</sup> Guli'güí' ládxí'li' cözalenli' dxi'a yúgu'té böñachi, en gácali' tsahui' lahuë' Dios, tu' channö cabí gunli' caní, biti' gaca ilé'eli'-në' Xanru'. <sup>15</sup> Guli'gún chi'i cuinli' para cabí soa nu ucá'ana le ruzá' ládxé'ë Dios queéru', en para cabí soa nu gaca ca tu guixi' silá', para cabí utsá' libí'ili', en cabí gun ga cabí gácali' tsahui' zianli' libí'ili'. <sup>16</sup> Guli'gún chi'i cuinli' para cabí gun nu dzaga libí'ili' le ruá' dö', o le cabí naca tsahui', ca na' benë' Esaú, zxí'iné' Isáac. Esaú na' béti'ë le ral-la' gata' lu né'ë tu' náquië' bi'i bönni' huaca queë' xuzé' para guzxi'ë tu le do' gudahuë'. <sup>17</sup> Chinóz quézili' ca na' guca queë' Esaú gudödi ni' cate' gú'unné' idéli'në' le inabë' xuzé' lahuë' Dios para gaca le tsahui' queë'. Buéchi' ládxé'ë xuzé' lë', pero biti' guta' lataj ubí'i ládxé'ë Esaú na' sal-la' gudilaj ládxé'ë le len yöl-la' ribödxi queë'.

<sup>18</sup> Ca raca queéli' biti' naca ca guca quégaquië' bönni' Israel. Légaquië' gula'biguë'ë gala' ga zoa tu guí'a le gaca nu can, ate' guyegui guí'a ni', en böáca chul-la lahui' dza tu' guró'ö böaj gasaj, en guyécjada' bö'. <sup>19</sup> Bila'yönné' ta'bödxi lúzuba' böa', enca' chi'ë Dios Nu bë' didza'. Cate' bila'yönné' lë ni, guláta'yuë' lahuë' Moisés para cabirö güí'ilené' Dios légaquië' didza'. <sup>20</sup> Caní guluné' tu' cabí guca guá' iléngäquië' lë na' gunná bë'ené' Dios légaquië', gunné': "Channö tsöjlíbiba' tuba' böa' guíxí' do'os guí'a ni, ral-la' ulu'ládxé'ëba' guiój, o ulu'dödë'-ba' yaga tuchi'." <sup>21</sup> Lë na' bila'lé'ené' ben gádxida' légaquië', ate' Moisés gunné': "Radxi ridzóbida', en rizxízida'a."

<sup>22</sup> Na'a, libí'ili' ral-la' gádxitéröli' tu' ribíga'li' gala' tu lu guí'a nazí'i le Sión, en ga zoa yödzö queë' Dios ban, le nazi'i le Jerusalén que yehua' yubá, ga na' nacu'ë gubáz lá'ayi guizxi yu queë' Dios. <sup>23</sup> Ribíga'li' gala' ga ni' nudúbigaca zxí'ini cazé' Dios lahuë' Lë', nupa na' nazúajgaca láguequi lu guichi ni' yehua' yubá, enca' ga zoë' Dios Nu ruchi'a rusöröë' yúgu'té böñachi, en ga na' nacuá' yugu' bö' gulaca cazé' yugu' bönni' tsahui', tu' buné' Dios légaquië' tsahui'. <sup>24</sup> Ribíga'li' ca' ga zoë' Jesús, Nu ben tsutsu didza' cubi na' rucá'ana tsahui', enca' ga nagu'ë Jesús rön queë' le run ga runiti lahuë' Dios rë'u, rön na' run le nácarö dxi'a ca le ben xichönë' Abel, lë na' ben ga guchúguië' Dios queébi' bi'i bóchë'ë.

<sup>25</sup> Que lë ni na', guli'gún chi'i cuinli' para cabí tá'baga'li' Nu na' ru'i didza'. Biti' ca' bulu'lá nupa ni' gula'dá'baga' nu na' bulidza légaquië' luyú ni. Nácatérö löza biti' ca' uláru' rë'u channö tá'baga'ru' Nu na' rulidza rë'u, zoë' yehua' yubá. <sup>26</sup> Dza ni' guzxizi luyú ni tu' biyón chi'ë Dios, pero na'a chiguzzí' lu né'ë, gunné': "Ia'tú luzuísö, en calégasö luyú uxízia', pero lúzhiba ca' uxízia'." <sup>27</sup> Cate' ni' rnnë': "Ia'tú luzuísö", lë ni rulu'i rë'u ral-la' udúa yugu' le gaca ila'zxízi, lë na' rö'ö yödzölió ni, ate' ulu'gá'ana le cabí gaca ila'zxízi, lë na' rö' yehua' yubá. <sup>28</sup> Que lë ni na', tu' ral-la' idéli'ru' tu lataj ga inná bë'ëru', le cabí izxizi, ral-la' guíeru'-në' Dios: "Xclenu'", ate' lu yöl-la' ba'a ladxi', en lu yöl-la' radxi Lë' tseaj ládxí'ru' Lë' ca na' raza ládxé'ë Lë', <sup>29</sup> tu' náquië' Dios queéru' ca tu guí' le rusuniti le cabí naca idú tsahui'.

*Le ral-la' gunru' le raza ládxé'ë Dios*

<sup>1</sup> Ral-la' idxí'itica'sili' luzá'ali' tuli' ia'tuli'. <sup>2</sup> Guli'tsöjné ral-la' uzóali' lídxili' nu idxín ga zóali'. Cate' gulún caní bal-la böñachi, bulu'cuá' lídxiguequi gubáz lá'ayi que yehua' yubá queë' Dios, sal-la' biti' guléquibe'e nácagaquië' gubáz lá'ayi.

<sup>3</sup> Guli'tsöjné nupa nadzúngaca lidxi guíë tsca nunli' légaquië' tsözxón, nadzunli' ca' lidxi guíë. Guli'gü' ládzi'li' yugu' bönni' ta'bía ládzi'gaca bönachi légaquië', tsca libi'ili' rigu'i rizáca'lenli' légaquië' tsözxón.

<sup>4</sup> Ral-la' gunli' bal yöl-la' nutsaga na', ate' tu tuë' bönni' ral-la' sóalenë'-nu nigula queë' lu yöl-la' ba'a ladxi' queë', tu' ichúguië' Dios quégaca nupa tun le ruá' dö', en nupa ta'guítasaj xibá que yöl-la' nutsaga na'.

<sup>5</sup> Biti' bi uhuídilí', pero guli'tsaza ládzi'li' tsca le dë queéli' na'a, tu' chigunné' Dios: "Catu caz ucá'ana'li', en biti' ca' ubéaj ládx'a'li'." <sup>6</sup> Caní naca, huáca innaru' idú ládzi'ru' lë na' rnna: Xanru' náquië' Nu rácalen neda'.

Biti' ca' gádxida' bi gun bönachi quia'.

<sup>7</sup> Guli'tsöjné yugu' bönni' tu'yúë' libi'ili', nupa na' tu'sédinë' libi'ili' xtídzë'ë Dios. Buli'yú ca nadéli'gaquië', en guli'gún ca tunë' lu yöl-la' réajlë' quégacië' Dios.

<sup>8</sup> Lébisö ca náquië' Jesucristo, néaje, en na'a, en cá'tica'sö. <sup>9</sup> Biti' gü'ili' lataj yugu' xibá izá'a, en xibá nadzá' iché'gaca libi'ili' nöza yübölö. Naca dxi'a gunli' tsutsu icja ládzi'do'oli' ca naca le ruzá' ládxë'ë Dios queéli', en caléga ca nácagaca xibá que le rë'aj ráguru', lë na' biti' ulu'zí' xibé nupa tu'i ládzi'gaca léguequi.

<sup>10</sup> Zoa queéru' tu bucugu lá'ayi, le cabí ulu'zí' xibé nupa tun dxin que didza' rucá'ana tsahui' na' bilá' zí'alö. <sup>11</sup> Bixúz lo que yu'u lá'ayi na' gulu'ë xichóngacaba' böa' bëdxi lu lataj idú lá'ayi tu' nözi dul-la', pero bulu'zéguë bëla' cá'asö quégacaba' ga naca ní'ilö ra' yödzö. <sup>12</sup> Lësca' caní gudi'i guzxáquë'ë Jesúz ní'ilö ra' yödzö para bunë' bönachi dxi'a len rön queë cazá'. <sup>13</sup> Tsöjtá'aru'-në' Jesúz, sal-la' ila'béaj bönachi rë'u lu yödzö, en sí'iru' tsözxón len Lë' lë na' bulu'lidza ditaj bönachi Lë'. <sup>14</sup> Biti' zoa tu yödzö queéru' yödzölió ni le soa tsaz, pero riguúljaru' lë na' si' za'. <sup>15</sup> Que lë ni na', ral-la' cù'utica'siru'-në' Dios yöl-la' ba, uguru' dxin Lë' Jesucristo. Yöl-la' ba na' naca ca tu le rigú'uru' lahuë' Dios. Len ruá'a cuinru' guiéru'-në' Dios: "Xclenu'" ni'a que le náquië' Lë'. <sup>16</sup> Biti' gal-la ládzi'li' gunli' le naca dxi'a, en gácalenli' luzá'ali' tuli' ia'tuli', tu' naca lë ni ca tu le rigú'uru' lahuë' Dios le raza ládxë'ë Lë'.

<sup>17</sup> Guli'gún ca rnna xtídfa'gaquië' böchi'ru' tu'yúë' libi'ili', en guli'gü' lataj ila'nná bë'enë' libi'ili', tu' tapa chi'ë bö' naca cázali', ca tunë' yugu' bönni' ral-la' ila'guíxjö'ë lahuë' Dios le núnquäquië'. Guli'gún caní para ilunë' dxin na' lu yöl-la' rudzeja quégacië', en caléga lu yöl-la' risëbi ladxi' quégacië', tu' cabí uzí'ili' xibé dxin na' ilunë' lu yöl-la' risëbi ladxi' quégacië'.

<sup>18</sup> Buli'lidzë' Dios, inábili'-në' gácalenë' netu', tu' runtu' löza soa dxi icja ládzi'do'otu', para cabí uxösa netu', ate' ru'i ládzi'tu' gúntica'situ' le naca dxi'a. <sup>19</sup> Le nácarö lo, ráta'yua' loli' inábili'-në' Dios ugu'ë neda' tu nöza para udxina' ga zóali' bayóntë.

### Dios uzá' ládxë'ë queéru' le gácalen rë'u

<sup>20</sup> Na'a, rinábitu'-në' Dios, Nu run le rucá'ana rë'u tsahui', en Nu busubán Xanru' Jesucristo lu yöl-la' guti, Nu na' naca Bönni' Lo Uyú Bó'cu' Zxila', tu' bulaljë' rön queë' le run tsutsu didza' rucá'ana tsahui', le zoa tsaz, <sup>21</sup> rinábitu'-në' gunë' ga gácali' idú tsahui', para gaca gunli' yúgu'të dxin dxi'a, en gunli' ca rë'ënë' Lë', ate' gunë' queéli' le raza ládxë'ë Lë', tu' néquili' queë' Jesucristo. ¡Queë' Cristo gácatica'sö yöl-la' ba! ¡Ca' gaca!

<sup>22</sup> Ráta'yua' loli', böchi' luzá'ado', gü'i ládzi'li' didza' ni ruzéajni' libi'ili', tu' naca láti'-do'os lë ni ruzúaja' queéli'. <sup>23</sup> Ral-la' inózili' chiburúajbi' bi'i Timoteo, bi'i böchi'ru'do', lidxi guíë, ate' channö idxíntëbi' ga zoa' ni, gunbi' neda' tsözxón uduyútu' libi'ili'.

<sup>24</sup> Buli'gapa Dios böchi'ru' tu'yúë' libi'ili', enca' yúgu'të bönachi rö queë' Dios. Tu'gapa Dios libi'ili' bönachi ta'yéajlë' Cristo nacuá' luyú Italia.

<sup>25</sup> ¡Dios uzá' ládxë'ë queéli' yúgu'tëli'! ¡Ca' gaca!

## LE BUZÚAJÉ' LU GUICH SANTIAGO

*Santiago rugapé' Dios bönni' judío ta'dé'ë Cristo*

<sup>1</sup> Neda', Jacobo, naca' huen dxin queë' Dios, enca' queë' Xanru' Jesucristo. Rugapa' Dios libí'ili', nácali' idxinnu cō' di'a dza quégaca bönachi Israel, násilasili' idú yödzölió ni.

*Yöl-la' réajni'i le runné' Dios queéru'*

<sup>2</sup> Böchi' luzá'ado', cate' gaca bi gaca queéli' le si' bë' libí'ili', ral-la' udzéjali' idú ládxí'li' <sup>3</sup> tu' nöz quézili', cate' bi raca queéli' le rizi' bë' libí'ili' ca réajlë'ëli' Cristo, lë ni rusedi libí'ili' cözali' zxön ladxi'. <sup>4</sup> Guli'gü' ládxí'li' gaca idú yöl-la' zxön ladxi' queéli', para údxi gácali' bönni' ta'yéajni'inë', en biti' bi yadzaj queéli' ca nácagaca lë ni.

<sup>5</sup> Channö zoa ladaj libí'ili' nu biti' réajni'iní, nu na' ral-la' inabi-në' Dios, ate' Dios caz gunnë' yöl-la' réajni'i que, tu' runödzjë' yödxì yana' quégaca yúgu'të bönachi, en biti' ca' réqui quézinë' gunnë' queéru'. <sup>6</sup> Na'a, nu bi rinabi-në' Dios, run bayudxi tséajlë' Lë', en cabí gaca chopä ladxi'. Nu raca chopä ladxi', raca que ca raca que bidxina' que nísado' cate' rutá bö' le, ruzéaj bö' le nilö ná'alo. <sup>7</sup> Nu naca caní biti' ral-la' gun löza si' bi unödzjë' Xanru'. <sup>8</sup> Bönni' na' reaj bö' ládxí'da'ahuë' biti' ridzölinë' nácalö gunë'.

<sup>9</sup> Channö zoë' tu bönni' böchi'ru' réajlë'ë Cristo, en náquië' cå'asö yödzölió ni, ral-la' udzéjanë' tu' chinadéli'në' tu lataj lo lahuë' Dios. <sup>10</sup> Bönni' böchi'ru' na' rilé'enë' yöl-la' tsahui' queë' ral-la' udzéjanë' cate' runë' Dios ga bítirö ruzxöni ládxë'ë lë na' dë queë'. Nu ruzxöni ladxi' yöl-la' tsahui' que, gaca que nu na' ca raca que xiyija guíxi'do', la' ridóditë que. <sup>11</sup> Caní naca, tu' gaca que nu na' ca raca que xiyija guíxi'do' na' cate' rilén gubidza, en rudzá'ada', la' ribídxitë guixi' na', en riguínnaj xiyija, en riniti yöl-la' lachi que. Lësca' caní gaca queë' bönni' rilé'enë' yöl-la' tsahui' queë', inítië' tsanni ni runë' dxin riguiljë' yöl-la' tsahui' na'.

*Le ta'zí' bë' rë'u*

<sup>12</sup> Bica' ba bönni' böchi'ru' na' ruá' rilenë' le rizi' bë' le'. Cate' chiburúajé' tsahui', idéli'në' yöl-la' na'bán idú, ca na' rideli' nu nutsa' lu huitaj, nu rideli' tu bregui' zin. Bönni' böchi'ru' na' náquië' bica' ba tu' idéli'në' yöl-la' na'bán idú na' guzxí' lu në'ë Dios unödzjë' quégaca nupa nadxfí'iguequi Lë'. <sup>13</sup> Cate' bi raca queéru' le run ga gué'ëniru' gunru' le ruá' dö', biti' ral-la' innaru': "Dios rizi' bë'ë rë'u len le naca xihui'." Dios biti' rizi' bë'ë nu bönni' len le cabí naca dxí'a. <sup>14</sup> Na'a, channö nu bi raca que le rizi' bë' le len le cabí naca dxí'a, naca tu' rizé ládxí'ru' le ruá' dö', ate' lë ni ben ga gú'uni gun le ruá' dö'. <sup>15</sup> Lë na' rizé ládxí'ru' le ruá' dö' run ga gunru' dul-la', en cate' chibudxi benru' dul-la' na', la' dul-la' na'asö rusubaga' rë'u xíguia' gátiru'.

<sup>16</sup> Böchi' luzá'ado', biti' si' ye'e la' cuínsili'. <sup>17</sup> Yúgu'të le naca dxí'a, en yúgu'të le naca idú le ruzí'iru' xibé, zá'gaca saca' xitsá'alo, en ta'rúaj ga zoë' Xúziru' Dios, Nu ben yugu' le ta'yépi yosa lízxiba, yugu' le tu'tsá' cuínguequi, pero Lë' biti' rutsá' cuinë', en biti' rutsé'ë ca runë', rúnñatica'së' queéru' le naca tsahui'. <sup>18</sup> Ca ré'ëni quézinë' Dios, benë' ga nácaru' bönachi cubi queë'. Bugunë' dxin didza' queë' le naca idútë li, para gácaru' ca tu gulapa zí'alo queë' ladaj yúgu'të nupa na' guró' cazë' Dios.

*Le reaj ládxí'ru'-në' Dios le naca li ladxi'*

<sup>19</sup> Que lë ni na' rea' libí'ili', böchi' luzá'ado', yúgu'tëli' ral-la' sóali' sina' yónili', pero biti' ral-la' innétezili', en biti' ilétezili'. <sup>20</sup> Nu na' riletëz biti' run le naca tsahui' lahuë' Dios, <sup>21</sup> Que lë ni na', guli'cá'ana yúgu'të le ruá' dö', en yúgu'të le zián le cabí naca tsahui', ate'

lu yöl-la' nöxaj ladxi' guli'sí' lu ná'ali' didza' na' chinayaza icja ládxi'do'oli', tu' huáca gun didza' ni ga uláli'.

<sup>22</sup> Na'a, guli'gún ca rnna didza' ni, en cabí yónisili', tu' channö yónisili' didza' ni, si' yé'eli' la' cuínsili'. <sup>23</sup> Nu riyónisö didza' ni, en biti' run ca rnna, nu ni naca ca tu bönni' ruyúë' lahuë' tu lu guíë dxili, <sup>24</sup> tu' ruyú cuinë', en söhuójë', ate' la' ral-latë ládxë'ë ca rinë'ë. <sup>25</sup> Na'a, nu bönni' biti' ral-la ládxë'ë le riyönnë', pero ruí'i ládxë'ë xibá queë' Dios le naca idú li, en le gaca gun ga uláru', ate' ugá'anë' tsutsu, en gúntica'së' ca rinná bë' xibá na', gaquië' bica' ba ca naca yúgu'të le runë'.

<sup>26</sup> Channö nu bönni' ladaj libí'ili' réquinë' naca dxí'a ca reaj ládxë'ë Dios, pero biti' rapa chi'ë lúdxë'ë para cabí innësë' ca', bönni' ni rizi' yé'enë' la' cuinsë', ate' biti' raza ládxë'ë Dios ca reaj ládxë'ë bönni' na' Lë'. <sup>27</sup> Le reaj ládxi'ru'-në' Dios, le naca idú, en le naca dxí'a, naca gácalenru' yugu' bi'i uzébido', enca' yugu' nigula nagá'anamu túzinu, cate' ta'gui'i ta'zaca' nupa na', en cabí gútsa'ru' le cabí naca tsahui' le raca yödzölió ni.

## 2

### *Tuz ca ral-la' gunru' bönnachi bal*

<sup>1</sup> Böchi' luzá'ado', channö réajlë'ëli' Xanru' Jesucristo, Nu nácatërö lo, biti' ral-la' utsá'ali' ca gunli' bal tu tu bönnachi. <sup>2</sup> Channö tsázië' tu bönni' ga na' nudúbili', en nagu'ë xibón në'ë le néquini oro, en nácuë' lari' nazáca'da', ate' tsázië' ca' tu bönni' yéchi'do', nácuë' lari' cá'asö, <sup>3</sup> channö gunli' bal bönni' na' nácuë' lari' nazáca'da', en guiéli'-në': "Guró'olen rë'u ga ni naca dxí'a", pero guiéli' bönni' yéchi'do' na': "Ná'asö guzuí", o guiéli'-në': "Gurö'i lu yu ni." <sup>4</sup> Channö caní runli', rutsá'ali' ca runli' bal tu tu luzá'ali', en run cuinli' ca nu ruchi'a rusörö luzé'e, biti' naca dxí'a ca rizá' ládxi'li'.

<sup>5</sup> Böchi' luzá'ado', buli'zé nágali' lé ni. Dios guró cazé' yugu' bönni', sal-la' téquiguequi bönnachi yödzölió ni nácagaquië' cá'asö, para ila'déli'në' yöl-la' tsahui' lahuë' Lë' tu' ta'yéajlë'ë Cristo, en gata' quégaquië' lataj ga ni' rinná bë'ë Lë'. Gata' quégaquië' lé na' guzxí' lu në'ë Dios unödzjë' quégaca nupa ta'dxf'i Lë'. <sup>6</sup> Libí'ili' rucá'analí' cá'asö bönnachi yechi' ca', en runli' bal yugu' bönni' dë yöl-la' tsahui' quégaquië', ate' bönni' na' dë yöl-la' tsahui' quégaquië' tu'saca' zi'ë libí'ili', tu' tu'gunë' libí'ili' dxin. Lësca' tu'dödë' libí'ili' lu ná'agaquië' bönni' yúlahui'. <sup>7</sup> Yugu' bönni' na' dë yöl-la' tsahui' quégaquië' ta'nné zi'ë ca' que Lë' Jesucristo le nazáca'térö, en ca naca Lë' nazi'i lali': "Nupa Dá'gaca Cristo."

<sup>8</sup> Runli' dxí'a channö runli' idú ca rinná bë' xibá lo, le nazúaj lu guichi, en rnna caní: "Ral-la' idxí'nu' luzó'o ca nadxi'i cuinu'." <sup>9</sup> Na'a, channö rutsá'ali' ca runli' bal tu tu bönnachi, runli' dul-la', en nabága'lí' xíguia' lu xibá queë' Dios, tu' riguítjsali' xibá na'. <sup>10</sup> Channö runë' tu bönni' idú ca rinná bë' xibá queë' Dios, pero channö ichíxinë' ca naca tuz le rinná bë' xibá na', chinabáguë'ë xíguia' que idútë le rinná bë' xibá na'. <sup>11</sup> Lë cazé' Dios gunné': "Biti' gunu' dul-la' le riguitsaj xibá que yöl-la' nutsaga na'", en gunné' ca': "Biti' gútiu' bönnachi." Na'a, channö cabí runu' dul-la' le riguitsaj xibá que yöl-la' nutsaga na', pero rútiu' bönnachi, nabágu'u xíguia' que idútë xibá queë' Dios. <sup>12</sup> Ca innali', en ca gunli', ral-la' gunli' ca ral-la' ilún nupa uchi'a usöröö' Dios légaquië' ca rinná bë' xibá na', le run ga uláru'. <sup>13</sup> Nupa cabí tu'huechi' ládxi'gaca luzé'eguequi, uchi'a usöröö' Dios léguequi, ate' cuntu nu huéchi' ladxi' léguequi, pero nupa na' tu'huechi' ládxi'gaca luzé'eguequi ulu'rúaj dxí'a cate' uchi'a usöröö' Dios léguequi.

### *Le ral-la' gunru' tu' réajlë'ëru' Cristo*

<sup>14</sup> Böchi' luzá'ado', biti' bi uzi'ë xibé tu bönni' innasë': "Réajlë'a Cristo", pero biti' runë' le naca tsahui'. Biti' gaca ulé' bönni' na' channö innasë' réajlë'ë Cristo.

<sup>15</sup> Channö nacu'ë böchi' luzá'aru' ta'yéajlë'ë Cristo, en biti' dë le ilácuë', en caléga le ilahuë', <sup>16</sup> ate' channö tu nu dzaga libí'ili' guiésö légaquië': "Böaj lídxili' tsáhui'do'. Chibölaj budzé'eli'", pero channö cabí unödzaj quégaquië' lé na' ta'yádzjanë', biti' ca'

gúcalen légaquië'. <sup>17</sup> Lësca' caní raca que nu bönni' rññasë' réajlë'ë Cristo. Channö cabí runë' le naca bë' naca idú ca réajlë'ë Lë', biti' naca lesaca' yöl-la' réajlë' queë'.

<sup>18</sup> Nadxi ca' guié' tu bönni' luzé'ë: "Li' réajlë'ësu' Cristo, ate' neda' runa' le naca tsahui'. Biti' gaca ulu'i inu' neda' réajlë'u Cristo channö cabí zoa le naca tsahui' runu'. Neda' ulu'i da' li' réajlë'a Cristo ni'a que le naca tsahui' runa'." <sup>19</sup> Li' réajlë'u tuzé' náquië' Dios. Naca dxi'a ca runu'. Lësca' caní ta'yéajlë' yugu' bö' xihui', en ta'zxizi tádxida' Lë'. <sup>20</sup> Li', bönni' biti' bi nözinë'. Ral-la' inözi quézinu' channö zoa nu rññasö réajlë' Cristo, pero biti' run le naca tsahui', biti' naca lesaca' yöl-la' réajlë' Lë' que nu na'. <sup>21</sup> Naca bë' burúajjé' xúziru' Abraham tsahui' lahuë' Dios ni'a que lë na' benë', cate' ni' gulu'ë-bi' bi'i Isaac queë' lahuë' Dios. Gulu'ë-bi' ca na' tun bönnachi ta'gú'u le tu'zegui' lahuë' Dios, sal-la' biti' buzégui'ë-bi'. <sup>22</sup> Na'a gaca inózili' ca guca queë' Abraham. Lë na' benë' guca bë' guyéajlë'ë Dios. Ca' naca, guca bë' naca idú ca guyéajlë'ë Dios ni'a que lë na' benë'. <sup>23</sup> Caní guca lë na' nazúaj lu guichi lá'ayi le rnna: "Abraham guyéajlë'ë Dios, ate' Dios bilé'enë' lë na' benë' ca tu le ben ga böáquië' Abraham tsahui'." Que lë ni na' guzxi'i lë': "Luzé'ë Dios."

<sup>24</sup> Na'a, rilé'e quézili' naca bë' rurúajjé' tu bönni' dxi'a ni'a que le runë', en calégasö tu' réajlë'ë Dios. <sup>25</sup> Lësca' caní guca queënu' Rahab, nigula bë'ënu' bönnachi lataj. Lësca' naca bë' burúajnu dxi'a tu' zoa tu le tsahui' bennu, lë na' bennu cate' ni' bennu bönni' tu'yulan bal, en gúcalennu légaquië' para bulu'guélë'ë yöjhuójgaquië' nöza yúbölö. <sup>26</sup> Ca na' raca que idútë le naca cázaru' channö cabí yu'u bö', chinati, lësca' caní naca que le réajlë'ëru' Cristo channö cabí nalá' yöl-la' run que, biti' naca lesaca'.

### 3

#### *Yugu' le rnna lúdxí'ru'*

<sup>1</sup> Böchi' luzá'ado', biti' guntëz zián cuinli' bönni' tu'sédinë' bönnachi, tu' chinöz quézili' zí'térö uchi'a usöröö' Dios rë'u, nülöru' rusédiru' bönnachi. <sup>2</sup> Yúgu'tëru' runru' zián le richixi riníguiru'. Channö cabí richixi riníguinë' tu bönni' ca naca didza' ru'ë, bönni' ni náquië' idú tsahui', en raca inná be'e cuinë' ca naca yúgu'të le runë'. <sup>3</sup> Cate' rigú'uru' guíë ruá'agacaba' böa' para gunru' ga ilunba' ca ré'éniru', gaca inná bë'eru' légacaba' lu idútë le tunba'. <sup>4</sup> Buli'yú ca' ca raca quéguequi barco. Sal-la' zxöntérö naca tu barco, en récjada' bö' ruzéaj le, cuídi'do'os naca né'e xiágui barco na' le ruzecaj rudxi'i barco para tseaj gáti'tës ga gué'ënnë' bönni' rusé'ë le. <sup>5</sup> Lësca' caní naca lúdxí'ru'. Sal-la' cuídi'do'os naca, ziántérö le rnna lúdxí'ru' na'. Buli'yútsöca' ca run guí'. Sal-la' guí'do'os ribibiru', tu guí'a sibi huayégui. <sup>6</sup> Lësca' lúdxí'ru' na' naca ca tu guí'. Yúgu'të le ruá' dö' raca yödzöliö ni rnna lúdxí'ru', en tu' dzaga lúdxí'ru' na' idútë le naca cázaru', que lë ni na' run ga raca xihui' idútë le nácaru'. Le rnna lúdxí'ru' ribequi guí', le ruzegui' rë'u ca naca yúgu'të le runru', ate' tu' rnna caní lúdxí'ru' na', naca que tsca chinaguéla'të guí' le nabequi' tu' xihui'. <sup>7</sup> Yúgu'tëba' böa' guixi' ta'daba' luyú, en yugu' böa' zoa xíligacaba', en yugu' böa' tá'ayöj lë'ëba' lu yu, enca' yúgu'tëba' böa' dzö'öba' lu nísado', huáca ila'nná be'e bönnachi luyú ni légacaba', <sup>8</sup> pero cuntu nu bönni' gaca inná bë'enë' lúdxë'ë, tu' rnna lúdxí'ru' le ruá' dö', en biti' gaca nu uzaga' xinözi. Ziántérö le rnna lúdxí'ru' le naca ca tu le naché' yöl-la' guti. <sup>9</sup> Len la' lúdxí'ru' ná'asö rulidza tsáhui'ru'-në' Dios Xuz, en rulidza dítjaru' ca' yugu' bönni', ate' benë' Dios légaquië' ca naca cazë' Lë'. <sup>10</sup> Caní naca, len la' ruá'asiru' na' rulidza tsáhui'ru' bönnachi, en rulidza dítjaru' bönnachi. Böchi' luzá'ado', biti' ral-la' gaca caní. <sup>11</sup> Biti' ca' ta'lén nisa siziá', en nisa zöna' la' tuzi ga ta'lén. <sup>12</sup> Böchi' luzá'ado', tu yaga higo biti' gaca cuía le ribía yaga olivo, ate' tu lubá uva biti' gaca cuía le ribía yaga higo na'. Lësca' caní, nitú ga rilén nisa biti' gaca ila'lén nisa siziá', en nisa siziá'.

#### *Yöl-la' réajni'i le naca idú*

<sup>13</sup> Channö zoë' tu bönni' ladjali' rácadë'ë, en réajni'de'enë', lu yöl-la' nöxa jadxi' queë' ral-la' ulu'ë náquië' caní ni'a que le naca tsahui' runë'. <sup>14</sup> Na'a, channö ruzxé'eli' luzá'ali',

en runli' dxin para ila'gú'u bönachi lib'ili' yöl-la' ba, biti' ral-la' gun ba zxön cuinli' ca naca yöl-la' réajni'i queéli'. Nu run caní rizi' yë', en ridá'baga' le naca idútë li. <sup>15</sup> Yöl-la' réajni'i caní biti' naca le runödziej' Dios, pero que yödzölió ni naca, enca' quégaca bönachi yödzölió ni, en que tu' xihui'. <sup>16</sup> Yugu' bönni' tu'zxé'enë' luzá'agaquië', en té'ënnë' ila'gú'u bönachi légaquië' yöl-la' ba, lësca' ta'dil-la dídzë'ë, en tunë' yúgu'të le ruá' dö'.

<sup>17</sup> Yugu' bönni' nápagaquië' yöl-la' réajni'i na' runödziej' Dios:

Tunë' le naca idú tsahui', en ta'bözé' dxí'ado'.

Nácagaquië' zxön ladxi', en nöxañ ladxi'.

Tu'huechi' ládxí'gaquië' bönachi,

en tunë' le naca dxí'a.

Tuz ca tu'chi'a tu'söröë' luzá'agaquië',

en biti' ta'béaj bë'ë luzá'agaquië'.

<sup>18</sup> Nupa tuí'i ládxí'gaca ila'bequi dxí le raca, ta'böza dxí'ado', para gaca ca' dxí'a idútë le zeaj naca caz.

#### 4

##### *Nupa tun zxön le nacuá' yödzölió*

<sup>1</sup> ¿Bizz que na' ridíl-lali', en raca didza' bizxaj queéli'? Raca caní queéli' tu' rizé ládxí'li' zián le rizé ládxí'li' tu tuli', en que lë ni na' ridíl-lalenli' luzá'ali'. <sup>2</sup> Zián le ruhuídi'li', en tu' cabí rizi'ili' le, que lë ni na' rútili' bönachi. Ruzxé'eli' le dë que luzá'ali', en tu' cabí ridéli'li' le, que lë ni na' rizóa ribó'oli', en ridíl-lali'. Biti' rata' queéli' le ré'ënili', tu' cabí rinábili'-në' Dios lë na'. <sup>3</sup> Sal-la' zoa bi rinábali', biti' bi rizi'ili', tu' cabí naca dxí'a ca rinábali', tu' ré'ënili' lë na' rinábali' para ugunli' le dxin ca raza ládxí'sili'. <sup>4</sup> Lib'ili', bönachi nusanli'-në' Dios, ¿narú' cabí nözili' channö runli' zxön le nacuá' yödzölió ni, chinuhüöácali' ca nu biti' rilé'e Dios dxí'a? Núti'tés nu ré'ëni gun zxön le nacuá' yödzölió ni, nahuöáca ca nu biti' rilé'e Dios dxí'a. <sup>5</sup> Biti' rnnañ ca' le nazúaj lu guichi lá'ayi le rnna: "Dios risööl-lë'ë Dios Bö' Lá'ayi queéru', Nu zóalen rë'u, ate' Lë' nadxí'inë' rë'u, en rudúli'në' rë'u channö rusanru'-në'." <sup>6</sup> Na'a, zxóntérö le ruzá' ládxé'ë Dios queéru', tu' nazúaj lu guichi lá'ayi le rnna: "Dios ruzágue'ë xinózguequi nupa tun ba zxön cuínguequi, pero ruzá' ládxé'ë quégaca nupa nácagaca nöxañ ladxi'." <sup>7</sup> Que lë ni na', guli'sóa nöxañ ladxi' lahuë' Dios. Guli'nná be'e tu' xihui', ate' uxunnaj ga zóali'. <sup>8</sup> Guli'gü' ládxí'li' sóalenli'-në' Dios, ate' Lë' idisóalen' lib'ili'. Lib'ili', bönachi dul-la', guli'gaca tsahui', en bíti'rö gunli' dul-la'. Lib'ili', nülöli' reaj bö' ládxí'do'oli', en chopá le nadxí'ili', guli'gún dxí'a icja ládxí'do'oli'. <sup>9</sup> Guli'sëbi ládxí'li', en buli'hui'ini, en guli'cödxí. Na'a ruzzídxí, pero ral-la' cödxí. Rudzéjali', pero ral-la' hui'ini'. <sup>10</sup> Guli'gaca nöxañ ladxi' lahuë' Xanru', ate' Lë' gunë' ga tsépiséli'.

##### *Biti' ral-la' ichugu bë'ëru' le run luzá'aru'*

<sup>11</sup> Böchi' luzá'ado', biti' innéli' que luzá'ali' tuli' ia'tuli'. Nu bönni' rinné' que böchi' luzé'ë, en rilaga yudxé' le runé', bönni' ni rinné' que xibá queé' Dios, en ruchi'a rusöröë' le rinná bë' xibá na'. Na'a, channö ruchi'a rusörö' le rinná bë' xibá na', run cuinu' nu ruchi'a rusöröë' le, en biti' runu' ca rinná bë' xibá na'. <sup>12</sup> Na'a, tuzé' náquië' Dios, Nu ben xibá na', en náquië' ca' Nu ruchi'a rusöröë' le runru'. Lë cazé' gaca usölé' bönachi o usunítië' bönachi na'. Na'a, ¿núzxitië run cuinu', rilaga yudxu' luzó'o?

##### *Biti' gaca gunru' löza le gaca cuixó' huidzaj*

<sup>13</sup> Na'a, buli'zé' nágali', nülöli' rnnañ: "Cuxó' huidzaj tséajtu' yödzö ni', ate' sóatu' ni' tu iz, en zián le gá'utu', en úti'tu', ate' caní gáta'da' dumí queétu'." <sup>14</sup> Biti' nözili' bizxi gaca cuixó' huidzaj. ¿Nacxi caz naca queéru', tsca zóaru' yödzölió ni? Nácaru' ca böchila le nalá' tu chí'ido'osö, en la' rinítitë. <sup>15</sup> Que lë ni na', caní ral-la' innali': "Channö gué'ënnë"

Xanru', sóaru' ibanru', en tu ia'tú le gunru'." <sup>16</sup> Na'a, libí'ili', lu yöl-la' run ba zxön queéli' rigú'uli' yöl-la' ba la' cuínsili'. Yúgu'të le caní le runli' zeaj naca le ruá' dö'. <sup>17</sup> Channö nőziru' le naca dxi'a le ral-la' gunru', en biti' gunru' lë na', runru' dul-la'.

## 5

*Santiago rusé'ë ládxi'gaquië' bönni' dë yöl-la' tsahui' quégäquië'*

<sup>1</sup> Libí'ili', bönni' rilé'eli' yöl-la' tsahui', guli'cödxi, en guli'cödxi'a, tu' si' za' dza ilé'eli' yöl-la' yechi'. <sup>2</sup> Chinaca ditaj yöl-la' tsahui' queéli', ate' chinutóögacaba' le ráculi' bóljado' que. <sup>3</sup> Chinaca que dumí oro, en dumí plata queéli' ca naca que guíë nazón yöni que, ate' yöni que na' naca ca tu le ruzegui libí'ili' didza', ate' gaca queéli' ca tu gui' le usuniti libí'ili'. Caní gaca queéli', tu' busó' butúbili' queézili' yöl-la' tsahui' dza ni zóaru' chiröjsétëgaca. <sup>4</sup> ¡Buli'yútsöca! Yugu' bönni' huen dxin gula'lapé' yöla queéli' chita'naba yúdxiné' lázxjagaquië', tu' cabí riguízxjanili' légaquië', ate' lë na' ta'nabé' bönni' huen dxin na' chibidxín didza' na' lahué' Xanru', ate' Lë' rinná bé'ené' ni'a né'ë guizzi yu. <sup>5</sup> Benli' ga buné'eli', en güí'i gudágutica'sili' le rnناسö queéli' lu yödzölió ni. Buxón cuinli', pero chizóa idxín dza údxi queéli'. Gaca queéli' ca raca queéba' bëdxi renni', chibú'u dza gútiru'-ba'. <sup>6</sup> Richúguli' quégäquië' bönni' tsahui', en rútili' légaquië', ate' légaquië' biti' ta'dá'bagüë'ë libí'ili' cate' rútili' légaquië'.

*Cózaru' zxön ladxi', en ulídzaru'-në' Dios*

<sup>7</sup> Na'a, böchi' luzá'ado', guli'cöza zxön ladxi' ga idxinxrö dza huödë' Xanru'. Buli'yú ca runé' tu bönni' guz gú'una. Lu yöl-la' riböza zxön ladxi' ribözë' guiójsiu', en guiój cusu lin, ate' tödi ni' ulapé', en utubé' yöz zián. <sup>8</sup> Lësca' caní, libí'ili' na' réajlë'eli' Cristo, guli'cöza zxön ladxi', en buli'tipa ládxi'li', tu' chizá' gala' dza huödë' Xanru'. <sup>9</sup> Böchi' luzá'ado', biti' innéli' que luzá'ali' tulí' ia'tulí', para cabí ibága'li' xíguia'. ¡Buli'yútsöca! ¡Chirudzaga lo udxiné' Xanru', ate' uchi'a usöröö' le runli'! <sup>10</sup> Böchi' luzá'ado', buli'yú ca guca quégäquië' bönni' gulu'ë didza' uláz queé' Xanru'. Nácagaquië' ca tu le rulu'i rë'u ca ral-la' qui'i sáca'ru', en cózaru' zxön ladxi'. <sup>11</sup> Na'a, nucuá'aru' légaquië' ca yugu' bönni' guláquië' bica' ba, nupa ni' gula'guí'i gula'zaca'. Chibiyónili' ca bené' Job. Gulözë' zxön ladxi' sal-la' gudi'i guzxáca'dë'ë, ate' nőzili' ca' ca bené' Xanru' queé' ga búdxitë. Ruhuéchi'da' ládxë'ë Xanru' rë'u, en rui'i ládxë'ë rë'u.

<sup>12</sup> Böchi' luzá'ado', le nácatérö lo naca lë ni rea' libí'ili': ¡Biti' uzójtali' Nu zoa yehua' yubá, en biti' uzójtali' le nacuá' luyú ni, en biti' uzójtali' bíti'tës bi run tsutsu xtídza'li'! Cate' innali' "Ön" ral-la' innásili' "Ön." Cate' innali' "Biti" ral-la' innásili' "Biti." Caní ral-la' gunli', para cabí ibága'li' xíguia' lahué' Dios.

<sup>13</sup> Channö rigu'i rizáca' nu dzaga libí'ili', ral-la' ulidza Dios nu na'. Channö zoa nu rudzeja, ral-la' gul-la yöl-la' ba nu na'. <sup>14</sup> Channö re'e nu dzaga libí'ili', ral-la' ulidza bönni' gula tapa chi'ë böñachi queé' Cristo, para ulu'lidzë' Dios, en ila'nábiné' Lë' únë' bönni' huë' na'. Ral-la' ila'gu'ë lë' le za, en ulu'gunë' dxin Lë' Xanru'. <sup>15</sup> Cate' ulu'lidzë' Dios, en ta'yéajlë'ë gunë' Cristo ga huöáquië' bönni' huë' na', ní'irö gunë' Xanru' ga huöásä uzóë', en channö bené' dul-la' bönni' huë' na', Xanru' uniti lahué' lë'. <sup>16</sup> Que lë ni na', guli'xóalépi dul-la' nabága'li' tulí' ia'tulí', en guli'naba que luzá'ali' tulí' ia'tulí' lahué' Dios para únë' libí'ili', para urúaj yödzöhué' na' ré'eli'. Le rulidzë' tu bönni' tsahui' Dios, le runé' idú ládxë'ë, nácada' lesaca'. <sup>17</sup> Elías, bönni' ni' bë'ë didza' uláz queé' Dios, gúquië' tu bönni' yödzölió ca nácaru' rë'u, pero cate' bulidzë' Dios, en gunábiné' Lë' para cabí galaj guíój, idú tsonna iz yu' xopa beo' biti' gulaj guíój luyú ni. <sup>18</sup> Gudödi ni' bulidzë' Dios leyübölö, ate' böálaj guíój, ate' bunödzaj le gulazë' yugu' bönni' dza ni'.

<sup>19</sup> Böchi' luzá'ado', lë ni ral-la' inózili'. Channö núnbe' nu bönni' dzáguië' libí'ili' le naca idútë li, en richixi riníguiné', ate' zoa nu gun ga ubí'i ládxë'ë bönni' na' richixi riníguiné',

<sup>20</sup> nu na' gun ga ubí'i ládxé'ë bönni' dul-la' na' gudé' ga yúbölö, usölé' bönni' dul-la' na'  
lu yöl-la' guti, en gunë' ga uniti lahuë' Dios dul-la' zián nabáguë'ë bönni' na'. ¡Ca' gaca!

## DÍDZA'DO' ZÍ'ALÖ BUZÚAJË' PEDRO

*Pedro rugapë' Dios nupa ta'dá' Cristo*

<sup>1</sup> Neda', Pedro, naca' gubáz nasól-lë'ë Jesucristo. Ruzúaja' queéli' lu guichi ni, libí'ili' násilasili' zi'tu' gapa dë ládzali', zóali' luyú Ponto, en luyú Galacia, en luyú Capadocia, en luyú Asia, en luyú Bitinia. <sup>2</sup> Guró' cazé' Xúziru' Dios libí'ili' ca na' bucözé' dza ni'te, para guéquili' quez queé' lu né'ë Dios Bö' Lá'ayi, en gunli' ca rnna xtídzé'ë Cristo, en gácali' idú tsahui' ni'a que xichönë' Cristo. Rinábida'-në' Dios uzá' ládxé'ë queéli', en guné' ga soa dxi icja láxzi'do'oli'.

*Le rúntica'siru' löza*

<sup>3</sup> ¡Yöl-la' ba Dios, Xuzé' Xanru' Jesucristo! ¡Lu yöl-la' ruhuéchi' ladxi' zxön queé' bucubé' yöl-la' na'bán queéru' tu' busubané' Jesucristo lu yöl-la' guti! ¡Lë ni run ga rúntica'siru' löza, <sup>4</sup> en gun ga idéli'ru' lë na' rapa chi'ë Dios queéru' yehua' yubá! Lë na' rapa chi'ë Dios, le unödzjé' quégaca bönachi queé', biti' initi, en biti' itébi, en biti' igula. <sup>5</sup> Tu' réajlë'ëli' Lë', lu yöl-la' huáca zxön queé', Dios gun chi'ë libí'ili' cate' idxinxrö dza ni' uzí'ili' xibé yöl-la' rusólá idú na' chinupé'ë queéru', en ulu'ë lahuí dza údxi.

<sup>6</sup> Que lë ni na' rudzéjade'eli', sal-la' na'a ral-la' qui'i sáca'li' tu chí'ido' tu' taca zián le ta'zí' bë' libí'ili'. <sup>7</sup> Tu' ruá' rilenli' yugu' lë na' ta'zí' bë' libí'ili', naca bë' naca idú ca réajlë'ëli' Cristo. Lësca' caní rizí' bë'ëru' oro, le initi, cate' ruchi'aru' le lu gui'. Que lë ni na', cate' chinazí' bë' yöl-la' réajlë' queéli' Cristo, le nácarö lesaca' ca oro, gaca queéli' yöl-la' zxön, en yöl-la' run bal dza ni' ulu'ë lahué' Jesucristo.

<sup>8</sup> Libí'ili' nadxí'ili'-në' Cristo sal-la' catu caz bilé'eli' Lë'. Réajlë'ëli' Lë' sal-la' biti' rile'eli'-në' na'a, ate' rudzéjali'. Yöl-la' rudzeja zxön queéli' le cabí gaca quíxjö'örü' tsca naca, naca idútë li. <sup>9</sup> Caní naca, tu' ridéli'li' yöl-la' rusólá que bö' naca cázali', le rata' queéli' tu' réajlë'ëli'-në' Cristo.

<sup>10</sup> Dza ni'te yugu' bönni' gulu'ë didza' uláz queé' Dios bulu'sëdë' dxí'ado' ca naca yöl-la' rusólá na' dë queéru' na'a, ate' gulu'ë didza' ca naca le ruzá' ládxé'ë Dios queéru'. <sup>11</sup> Bö' Lá'ayi dzáguië' Cristo buzéajni'iné' zi'atélö bönni' na' gulu'ë didza' uláz queé' Dios, en bulu'iné' légaquië' ca ral-la' qui'i sáquë'ë Cristo, enca' ca gaca queé' yöl-la' zxön tödi na'. Que lë ni na' gulu'i láxzi'gaquië' ila'nózinë' bátaxi gaca lë ni, en nuzxi na' gaca que lë na' bulu'iné' Bö' dzáguië' Cristo légaquië'. <sup>12</sup> Dios bulu'iné' bönni' na' gulu'ë didza' uláz queé' biti' naca tu le ila'lé'ené' légaquië', pero rë'u ni rilé'eru' lë na' gulu'ë didza' que, ate' libí'ili' riyonili' na'a ca naca que. Yugu' bönni' tunë' libán que didza' dxí'a tu'ë didza' que lë ni, ate' zóalen yöl-la' huáca queé' Dios Bö' Lá'ayi légaquië', Nu na' risö'l-lë'ë Dios zoë' yehua' yubá queéru', ate' té'ennë' gubáz lá'ayi queé' Dios ila'nózinë' ca naca lë na' gulu'ë didza' que dza ni'te.

*Dios rulidzé' rë'u para gácaru' lá'ayi*

<sup>13</sup> Que lë ni na', guli'sóa ban ladxi', en guli'cázatica'sö bá'ado'. Idú láxzi'li' buli'zxöni láxzi'li' lë na' uzá' ládxé'ë queéli' Dios dza ni' ulu'ë lahué' Jesucristo. <sup>14</sup> Guli'gún ca rnna xtídzé'ë Dios, en biti' güí'ili' lataj yugu' le rizé' láxzi'li' ila'chë' libí'ili' ga yúbölö, ca na' benli' dza ni' biti' núnbe'ënili'-në' Dios. <sup>15</sup> Ral-la' gácali' lá'ayi ca naca yúgu'të le runli', ca na' náquië' lá'ayi Dios, en bulidzé' libí'ili' para guéquili' queé'. <sup>16</sup> Lësca' caní nazúaj lu guichi lá'ayi, ca na' gunné' Dios le rnna: "Guli'gaca lá'ayi, tu' naca' neda' lá'ayi."

<sup>17</sup> Rëli'-në': "Xuztu" cate' rulidzali'-në' Dios, ate' Lë', lébisö ca ruchi'a rusöröë' yúgu'të bönachi tsca naca le núngeaca tu tu bönachi na'. Que lë ni na' ral-la' gádxili' Lë' tsanni ni zóali' yödzölió ni, le cabí naca idú ládzali'. <sup>18</sup> Dios busölé' libí'ili' lu lë na' gúcali' dza ni'

cate' benli' ca nácagaca le cá'asö bulu'dödë' xuz xtó'oli' loli'. Nöz quézili' böá'uë' libí'ili', caléga len tu le initia ca naca oro, en plata, <sup>19</sup> pero len xichönë' Jesucristo le nácatérö lesaca', tu' budödi cuinë', en gúquië' ca tuba' bö'cu' zxila' nácabá' idú dxí'a, böa'do' tutié'-ba' lahuë' Dios para ugúa dul-la'. <sup>20</sup> Dios guró' cazë' Cristo zí'atélö ca benë' yödzölió ni, ate' dza ni zóaru' na'a benë' ga bulu'i lahuë' para uzf'ili' xibé'. <sup>21</sup> Ni'a que le benë' Cristo réajlé'ëli'-në' Dios, busubanë' Lé' lu yöl-la' guti, en benë' ga náquië' lo. Caní naca, réajlé'ëli'-në' Dios, en ruzxöni ládxí'li' Lé'.

<sup>22</sup> Na'a, chinún cuinli' dxí'a tu' runli' ca rnna le naca idútë li, en naca idú ca nadxí'ili' yugu' böchi' luzá'ali' ta'yéajlé'ë Cristo. Que lë ni na', idú ládxí'li' ral-la' idxí'ili' luzá'ali' tuli' ia'tuli'. <sup>23</sup> Chiböáljali' leyúbölö, caléga tu' nuzóagaca böñachi tati caz libí'ili', pero nuzóá Nu zoa caz libí'ili', en náljalenli' xtídzë'ë Dios, le naca ban, en le zóatica'sö. <sup>24</sup> Caní naca, tu' nazúaj lu guichi lá'ayi le rnna:

Yúgu'të böñachi nácagaca ca naca guixi'.  
Yöl-la' lachi quéguequi naca ca xiyija guixi' na'.  
Ribidxi guixi' na', en riguinnaj xiyija,  
<sup>25</sup> pero xtídzë'ë Dios zóatica'sö.

Didza' ni bidxín queéli' lu didza' dxí'a.

## 2

<sup>1</sup> Que lë ni na', guli'cá'ana yúgu'të le ruá' dö'. Bíti'rö si' yé'ëli', en biti' ubéaj dxí'a cuinli' lógaca böñachi. Bíti'rö uzzé'ëli', en biti' innëli' que luzá'ali'. <sup>2</sup> Ral-la' së ládxí'li' le naca queé' Dios Bö' Lá'ayi para gálali' ca na' tunbi' bi'i hué'ënido', ta'zé ládxí'bi' nidxi'. Caní ral-la' gunli' ga idxinxrö dza uláli', <sup>3</sup> channö réquibe'ëli' náquië' Xanru' dxí'i ladxi'.

### *Cristo náquië' ca tu guiój naca ban*

<sup>4</sup> Guli'bíga' ga zoë' Xanru'. Náquië' ca tu guiój naca ban. Náquië' ca tu guiój bulu'cá'ana böñachi cá'asö pero naca tu le guró' cazë' Dios le nazáca'térö. <sup>5</sup> Lësca' caní, libí'ili' nácali' ca yugu' guiój nabángaca. Guli'gü' Dios lataj ugunë' libí'ili' dxin, ate' gunë' ga gácali' ca tu yudo' ga soë' Dios Bö' Lá'ayi. Lu yudo' na' gácali' ca bixúz néquiguequinë' quez queé' Dios, ate' lu né'ë Jesucristo gaca udódili' yugu' le runné' Dios Bö' Lá'ayi queéli' lahuë' Dios, lë na' raza ládxë'ë Dios. <sup>6</sup> Que lë ni na' nazúaj ca' lu guichi lá'ayi le rnna:  
Rigu'a lu zö'ö yödzö Sión tu guiój lo squin zö'ö,  
le guró' caza' nedä', en naca lesaca'.  
Nu réajlé' Lé', biti' ichixi inigui.

<sup>7</sup> Naca guiój ni queéli' libí'ili' na' réajlé'ëli' Cristo tu le nazáca'da', pero quégaca nupa biti' ta'yéajlé' Cristo, naca ca na' nazúaj lu guichi lá'ayi le rnna:  
Guiój na' bulu'zö'ë bönni' tu'cu'ë zö'ö tsölá'alö,  
tu' guléquinë' naca cá'asö,  
guiój ni chinaca guiój lo squin zö'ö.

<sup>8</sup> Lësca' caní nazúaj lu guichi lá'ayi le rnna:  
Guiój ni gun ga tsöjchégü'gaca böñachi,  
en gun ga tsöjtsö'ögaca.  
Le nácatë yöjchégü'gaquië' bönni' biti' ta'yéajlé'ëë Cristo, tu' gula'chíxinë' cate' bu-lu'zö'ë xtídzë'ë Dios tsölá'alö. Dios bucu'ë légaquië' para ilunë' caní.

### *Nupa néquiguequi quez queé' Dios*

<sup>9</sup> Libí'ili' nácali' böñachi guró' cazë' Dios. Yúgu'tëli' nácali' bixúz queé' Bönni' Unná Bé' Lá'ayi. Nácali' ca tu yödzö nequi quez queé' Dios. Nácali' böñachi que cazë' Dios. Caní nácali' para gaca gunli' libán que le zxön benë' Dios, Bönni' na' bulidzë' libí'ili' para birúajli' ga naca chul-la que dul-la', en guyázali' lu beni' idú queé'.

<sup>10</sup> Zí'atélö biti' gúcali' böñachi queé' Dios,

pero na'a chinácali' bönachi queë'.  
 Zí'atëlö cuntu nu buéchi' ladxi' lib'i'ili',  
 pero na'a Dios caz ruhuéchi' ládxë'ë lib'i'ili'.

*Zóaru' nabanru' para gunru' ca ré'ënë' Dios*

<sup>11</sup> Böchi' luzá'ado', nácali' ca bönachi zi'tu', en ridásili' yödzölió ni. Que lë ni na', ráta'yua' loli', biti' gü'i'ili' lataj ila'nná be'e le rizësö ládx'i'li' lib'i'ili', yugu' le ta'díl-lalen bö' naca cázali'. <sup>12</sup> Guli'gún le naca dxi'a lógaca bönachi biti' núnbë'gaquië' Dios. Caní gaca, channö ulu'zegui lib'i'ili' didza', en ila'nná tútili' bönachi, gaca ila'lé'e bönachi yugu' le dxi'a runli', ate' dza huödë' Xanru' ila'gu'ë Dios yöl-la' ba ni'a que le naca cázali'.

<sup>13</sup> Tu' néquili' queë' Xanru', guli'gún bal yúgu'të bönni' ta'nná bë'ë, bönni' na' nucuá'agaca bönachi légaquië', sal-la' náquië' bönni' rinná bë'enë' idútë yödzölió, tu' náquië' bönni' lo unná bë', <sup>14</sup> o channö náquië' bönni' rinná bë'enë' tu yödzö, nu na' nuzöë' bönni' lo unná bë' na' para gunë' xíguia' nupa tua' dö', en gunë' bal nupa tun le naca dxi'a. <sup>15</sup> Caní ré'ënë' Dios gunli' para ila'bö' dxifë' yugu' bönni' biti' bi nőzguequinë', en biti' núnbë'gaquië' Lë', cate' ila'lé'enë' le naca dxi'a na' runli'.

<sup>16</sup> Guli'gaca ca yugu' bönni' nazángaquië', pero biti' ugunli' dxin yöl-la' nazán queëli' para gunli' le ruá' dö'.

Guli'gaca ca yugu' bönni' nadó'ogaquië' queë' Dios.

<sup>17</sup> Guli'gún bal yúgu'të bönachi.

Guli'dxif'i yugu' böchi' luzá'ali'.

Guli'gadxi-në' Dios.

Guli'gún bal bönni' na' rinná bë'enë' idútë yödzölió.

*Le gud'i guzxáquë'ë Cristo ruzéajni'i rë'u ca ral-la' gunru'*

<sup>18</sup> Núloli' nácali' bönni' nadó'ogaca, guli'gadxi bönni' xanli', en guli'gún légaquië' bal, calégasö gunli' bal yugu' bönni' xanli' na' nácagaquië' tsahui', en tu'i ládx'i'gaquië' lib'i'ili', pero guli'gún bal ca' yugu' bönni' xanli' na' tu'saca' zi'ë lib'i'ili' lu dxin runli' quégaquië'. <sup>19</sup> Channö quí'i sáca'li', en biti' bi nabága'li', ate' guá' ilenli' lë na' tu' réquili' naca ca ré'ënë' Dios, urúajli' tsahui' lahuë' Dios. <sup>20</sup> Na'a, channö ruá'ali' dö', ate' yugu' bönni' yúlahui' ilunë' lib'i'ili' xíguia', ¿nacxi caz uzf'ili' xibé sal-la' len yöl-la' riböza zxön ladxi' queëli' guá' ilenli' lë na' gaca queëli'? Channö ribözali' zxön ladxi', en ruá' rilenli' le rigu'i rizáca'li', ate' benli' le naca dxi'a, ní'irö urúajli' dxi'a lahuë' Dios. <sup>21</sup> Dios bulidzë' lib'i'ili' para quí'i sáca'li' caní, tu' gud'i' guzxáquë'ë Lë' cazë' Cristo uláz queëli', en buzóe' queëli' tu le rulu'i lib'i'ili' ca ral-la' gunli', para quí'i sáca'li' ca na' gud'i' guzxáquë'ë Lë'.

<sup>22</sup> Cristo biti' bi dul-la' benë', en catu caz guzxi' yë'ë.

<sup>23</sup> Cate' bulu'dídza' yúdxinë' Lë',

biti' butsagui yúdxinë' légaquië'.

Cate' bulu'saca' zi'ë Lë',

biti' buzenë' légaquië' le bach,

pero budödi cuinë' lu né'ë Dios,

Nu na' ruchi'a rusöröö' le runru' ca sa'yéaj.

<sup>24</sup> Lë' cazë' Cristo guzxi'ë dul-la' queëru' lu idú le naca cazë' cate' ni' gútië' lë'e yaga cruz, para gácaru' ca yugu' bönni' nati, para cabirö gunru' dul-la', pero sóaru' ibanru' para gunru' le naca dxi'a. Lë' gúquië' huë' uláz queëru' para huöácaru' rë'u dxi'a. <sup>25</sup> Gúcali' ca yugu' bö'cu' zxila' nanítigacaba', pero na'a budxinli' queë' Cristo, Nu ruyú lib'i'ili', en rapa chi'ë bö' naca cázali'. Náquië' queëli' ca tu' bönni' uyú bö'cu' zxila'.

<sup>1-2</sup> Lësca' caní, libí'ili' nigula, ral-la' gunli' bal bönni' que queéli', en channö cabí ta'yéajlé'ë xtídzé'ë Cristo, ila'yéajlé'ë Lë' cate' ila'lé'ené le naca dxi'a runli', en ca na' nácali' ba'a ladxi', en runli' légaquië' bal, sal-la' biti' bi didza' ruí'ilenli' légaquië' ca naca queé' Cristo. <sup>3</sup> Yöl-la' lachi queéli' biti' naca le zoa láhuisö, tsca rupá'ali' ícjali', en tsca nácagaca le néquini oro nusi' cuinli', en lari' nazáca'da' náculi'. <sup>4</sup> Yöl-la' lachi queéli' ral-la' gaca le yu'u icja ládxi'do'oli'. Yöl-la' lachi le ridiá'tica'sö naca yöl-la' nöxaj ladxi', en yöl-la' ba'a ladxi', le nazáca'da'gaca lahuë' Dios. <sup>5</sup> Lësca' caní guca yöl-la' lachi quégacanu nigula gula'yéaj ládxi'nu Dios, nigula na' gula'cuá'anu dza ni'te. Bulu'zxöni ládxi'nu Dios, en gulunnu bal bönni' que queégacanu. <sup>6</sup> Caní bennu Sara, tu' bennu ca rnna xtídzé'ë Abraham, bönni' queénu, en bulídzanu lë', gunnánu: "Xan." Libí'ili' ca' gunli' ca bennu Sara na' channö gunli' le naca dxi'a, en biti' bi gádxili'.

<sup>7</sup> Lësca' caní, libí'ili', bönni', ral-la' güí'i ládxi'li' nigula que queéli'. Guli'gún légacanu bal, calégasö tu' nóta'gacanu ca yöl-la' nál-la queéli', pero lësca' tu' nadéli'gacanu yöl-la' na'bán na' runnë' Dios queéru', lébisö ca nadéli'li' libí'ili'. Guli'gún caní para cabí uzaga' tu' xihui' xinózili' cate' ulídzali'-në' Dios.

### *Huagu'i huazáca'ru' sal-la' gunru' le naca dxi'a*

<sup>8</sup> Ga ruúdxitë, guli'gaca tuz tuli' len ia'tuli' yúgu'téli', en guli'güí' ládxi'li' luzá'ali' tuli' ia'tuli'. Guli'gaca dxi'i ladxi', en zxön ladxi'. <sup>9</sup> Biti' ubí'ili', cabí guá'ali' dö' que nu ruá' dö' queéli', en biti' utsaga yúdxili' nu rutsaga yudxi libí'ili', pero caní ubí'ili', inábili'-në' Dios gunë' ga gaca bica' ba nu na', tu' bulidzé' Dios libí'ili' para gácali' bica' ba. <sup>10</sup> Caní naca le nazúaj lu guichi lá'ayi le rnna:

Nu bönni' ré'ënë' uzi'ë xibé yöl-la' na'bán queé', en cioè' dxí'ado', ral-la' ucá'anë' didza' xihui', en cabirö si' yé'ë.

<sup>11</sup> Ral-la' ucá'anë' le ruá' dö', en gunë' le naca dxi'a.

Ral-la' güí'i ládxë'ë cioè' zxön ladxi', en gúntica'së' caní,

<sup>12</sup> Xanru' rapa chi'ë yugu' bönni' tsahui'

en ruzé' náguië' le tu'lidzé' Lë',

pero ruzáguë'ë xinózguequi nupa tua' dö'.

<sup>13</sup> ¿Nuzxi caz guá' dö' queéli' channö ruí'i ládxi'li' gúntica'sili' le naca tsahui'? <sup>14</sup> Sal-la' qui'i sáca'li' cate' runli' le naca tsahui', gácali' bica' ba. Cuntu nu gádxili', en biti' ubi uguí'ili' <sup>15</sup> pero buli'zxöni ládxi'li'-në' Cristo, en güí'ili' Lë' lataj inná bé'ené' lu icja ládxi'do'oli'. Guli'soa síná' quíxjöi'ili' yúgu'té nupa ila'nabi libí'ili' bizx que runli' löza Cristo, en gunli' lë ni lu yöl-la' nöxaj ladxi' queéli', en lu yöl-la' run bal nupa na'.

<sup>16</sup> Guli'gúntica'sö le naca dxi'a lahuë' Dios, en channö nacuá' nupa ta'nné xihui' que le naca tsahui' runli' tu' réajlé'ëli' Cristo, ní'irö ulu'tui'i tu' nözi le ta'nné queéli'. <sup>17</sup> Channö qui'i sáca'li', dxí'arö gaca channö naca tu' runli' le naca dxi'a, en caléga tu' ruá'ali' dö', channö Dios ré'ënë' qui'i sáca'li' caní.

<sup>18</sup> Lë' cazé' Cristo gudi'i guzxáquë'ë, en gútië' uláz queéru' para bugüë' dul-la' nabága'ru'. Lë' náquië' dxi'a, pero gútië' ni'a queéru', yugu' bönni' dul-la'. Caní benë' para bunë' rë'u tuz len Dios. Lu yöl-la' bönachi queé' gútië' pero lu bö' naca cazé' ni zoë' nabanë' lu le cubi le naca cazé'. <sup>19</sup> Lu bö' naca cazé' guyije' yöjenë' libán lógaca bö' nadzungaca. <sup>20</sup> Bö' ni gulaca cazé' yugu' bönni', dza ni'te gula'dá'baguë'ë xtídzé'ë Dios, dza ni' zoë' Noé, cate' ni' gulözé' Dios lu yöl-la' riböza zxön ladxi' queé', en biti' busiúdxë' légaquië', tsanni ni' benë' Noé barco zxön na'. Lë'e barco na' bulu'lá nabábasö bönachi lu nisa. Gulaca xunu' bönachi, bönni', en nigula. <sup>21</sup> Nisa ni' naca tu le rului'i ca naca nisa ga na' ridílaru' nisa, le naca bë' nuláru' lu yöl-la' guti tu' bubanë' Jesucristo lu yöl-la' guti. Lë na' ridílaru' nisa biti' naca tu le run dxi'a le nácaru' láhuisö, pero rului'i ruí'i ládxi'ru' gaca dxi'a icja ládxi'do'oru' lahuë' Dios. <sup>22</sup> Jesucristo bubenë' yehua' yubá, ga na' yöjchö'ë

cuita lë'ë ibëla Dios, en rinná bë'enë' yugu' gubáz lá'ayi, en nupa ni' ta'nná bë', en nupa nadéli'gaca yöl-la' zxön.

## 4

*Ral-la' ugunru' dxin yöl-la' huáca queë' Dios para gunru' xichinë' Cristo*

<sup>1</sup> Que lë ni na', ca na' gud'i guzxáquë'ë Cristo lu le naca cazë', lësca' lib'iili' ral-la' soa cözalí' qu'i sáca'li'. Nu na' rigu'i rizáca'a tu' da' le naca tsahui' chibucá'ana dul-la'. <sup>2</sup> Na'a isí lo, ral-la' gúntica'sili' ca ré'enë' Dios, en calëga ca rizësö ládx'i'li' lu yöl-la' böñachi queéli'. <sup>3</sup> Tsca'ti' gaz le chibenli' chibenli'. Bíti'rö gunli' ca na' tun nupa biti' núnbe'gaca Dios. Dza ni'te benli' yugu' le cabí ral-la' gunli'. Guzé ládx'i'li' le ruá' dö'. Guzúdxili'. Gudödi bë' gü'i gudáguli', en guyéaj ládx'i'li' budó' guiój budó' yaga, le rigútinë' Dios. <sup>4</sup> Na'a, tu'báninë' bönni' tunë' caní tu' cabirö runli' tsözxöñ légaquië' cate' tunë' le ruá' dö' caní, en que lë ni na' tu'tsaga yúdxinë' lib'iili'. <sup>5</sup> Légaquië' run bayudxi ulu'lui'i cuíngaquië' lahuë' Dios, ate' Lé' chizóa uchi'a usöröö' nupa nabángaca, en nupa chinátigaca. <sup>6</sup> Que lë ni na' guca libán que didza' dxi'a lögaca nupa chinátigaca, nupa na' Dios buchi'a busöröö' léguequi cate' ni' gula'cuá' yödzölió ni, ca na' ruchi'a rusöröö' yúgu'të böñachi. Guca libán löguequi para ila'cuá' lu yöl-la' na'bán lu bö' nácagaca caz, ca na' zoa cazë' Dios lu yöl-la' na'bán.

<sup>7</sup> Chizóa idxín dza údxi que yúgu'të le dë. Que lë ni na', guli'gaca ba'a ladxi', en buli'subán ládx'i'li' para gaca ulídzali'-në' Dios. <sup>8</sup> Tu' runtë bayudxi, guli'dxi'i luzá'ali' tuli' ia'tuli', ate' channö dzágali' lu yöl-la' nadxi'i, gácali' sina' uniti loli' yugu' luzá'ali' tua' dö' queéli'. <sup>9</sup> Guli'gü' lataj ila'cuá' böchi' luzá'ali' lídxili', en biti' innëli' quégäquië'. <sup>10</sup> Ral-la' ugunli' dxí'ado' dxin yugu' le buzá' ládxë'ë Dios queéli', en gácalenli' luzá'ali' tuli' ia'tuli'. <sup>11</sup> Nu bönni' runë' ba nalí, ral-la' gunë' ba nalí que xtídzë'ë Dios, ate' nu bönni' runë' xichinë' Cristo, ral-la' ugunë' dxin yöl-la' huáca na' runnë' Dios queë', ate' ni'a que yúgu'të le runli', gaca yöl-la' ba queë' Dios ni'a que le nunë' Jesucristo. ¡Gácatica'sö queë' Dios yöl-la' ba, en yöl-la' unná bë! ¡Ca' gaca!

*Le ila'gu'i ila'zaca' böñachi ta'yéajlë' Cristo*

<sup>12</sup> Böchi' luzá'ado', biti' ubánili' tu' nözi le ta'zí' bë'da' lib'iili'. Biti' naca tu le cabí núnbe'gaca böñachi. <sup>13</sup> Guli'dzéjade'e tu' dë lataj queéli' gunli'-në' tsözxöñ Cristo lu le rigu'i rizáquë'ë Lé' ni'a que böñachi queë' para gaca udzéjali' ca' dza na' huödë' Cristo, cate' ilé'eli' yöl-la' zxön queë'. <sup>14</sup> Channö tu'dzaga yudxi böñachi lib'iili' tu' dá'ali' Cristo, bica' ba lib'iili', tu' naca bë' zóalenë' Dios Bö' Lá'ayi lib'iili', Nu na' za' yehua' yubá. Böñachi yödzölió ni tu'dzaga yudxi Lé', pero lib'iili' runli'-në' bal. <sup>15</sup> Channö rigu'i rizáquë'ë nu bönni' dzágüi' lib'iili', ral-la' gaca caní tu' dë'ë Cristo, en calëga tu' rútië' böñachi, o ribanë', o ru'ë dö', o tu' yöjgútsë'ë ga yúbölö. <sup>16</sup> Na'a, channö nülöli' rigu'i rizáca'li' tu' dá'ali' Cristo, biti' ral-la' utu'ili', pero guli'cu'ë Dios yöl-la' ba tu' nazi' lali' böñachi queë' Cristo.

<sup>17</sup> Chibidxín dza isí lahuë' Dios uchi'a usöröö' böñachi rö queë'. Channö zí'alö uchi'a usöröö' rë'u, ¿nácxitëro gaca quégaca nupa biti' túngaca ca rnna didza' dxi'a queë' Dios?

<sup>18</sup> Channö naca böñiga ulu'lágaca nupa tun le naca dxi'a, ¿nácxitëro gaca quégaca nupa ta'dá'baga' Dios, en tun dul-la'? <sup>19</sup> Caní naca, yugu' bönni' ni ta'gu'i ta'zaquë'ë tu' ré'enë' Dios gaca caní, ral-la' ilúntica'së' le naca tsahui', en ulu'dödë' bö' nácagaca cazë' lu në'ë Dios, tu' ben cazë' Lé' légaquië', en runë' ca rnna xtídzë'ë.

## 5

*Pedro ruzéajni'inë' nupa ta'yéajlë' Cristo*

<sup>1</sup> Na'a, ruzéajni'ida' lib'iili', bönni' gula tapa ch'iili' nupa néquiguequi queë' Cristo, tu' naca' neda' ca' bönni' gula ca nácali' lib'iili', en bilé'eda' le gud'i guzxáquë'ë Cristo, ate'

guna' ca' tsözxón libí'ili', uzi'iru' xibé yöl-la' zxön na' ilá' lahui. <sup>2</sup> Guli'gaca ca bönni' tu'yúe' bö'cu' zxila', gun chí'ili' bönachi na' Dios gulu'ë lu ná'ali'. Guli'gún caní idú ládxi'li' ca ré'énë' Dios, en calëga tu' run bayudxi queéli', o tu' rizé ládxi'li' dumí. Guli'gún xichinli' tu ré'énisili', <sup>3</sup> en calëga tu' ré'énili' inná bë'esili' nupa na' nagu'ë lu ná'ali'. Guli'gü' ládxi'li' gácali' tu le rului'i ca ral-la' ilaca nupa na' run chí'ili'. <sup>4</sup> Caní naca, cate' ulu'i lahuë' Cristo, bönni' lo uyú bö'cu' zxila', idéli'li' tu le uzi'ili' xibé le catu caz initi.

<sup>5</sup> Lësca' caní, bi'i cui'di', guli'gún ca ta'nné' yugu' bönni' gula. Yúgu'tëli' ral-la' gunli' bal luzá'ali', tuli' ia'tuli', lu yöl-la' nöxaj ladxi' queéli', tu' nazúaj lu guichi lá'ayi le rnna: Dios ruzágue'ë xinözguequi nupa tun ba zxön cuínguequi pero rácalenë' nupa nácagaca nöxaj ladxi'.

<sup>6</sup> Guli'soa nöxaj ladxi' lu né'ë Dios, ate' Lë' uchisë' libí'ili' cate' izá'a dza. <sup>7</sup> Guli'cú'u yúgu'të le run ga ruúbi rugu'ili' lu né'ë Dios, tu' ru'ili' ládxë'ë libí'ili'.

<sup>8</sup> Guli'gaca ba'a ladxi', en buli'subán ládxi'li', tu' zoa tu' xihui', nu biti' rilé'e libí'ili' dxi'a, ridá idú gásibi'ilö, en naca ca tuba' bëdxi guixi' ribödxi'aba', riguiljba' nu gáguba'.

<sup>9</sup> Guli'gaca tsutsu ca réajlé'ëli' Cristo, en guli'zág'a' xinöza tu' xihui', tu' nőzili' ta'gu'i ta'záquë'ë böchi' luzá'ali' idútë yödzölió ni ca na' rigu'i rizáca'li' libí'ili'. <sup>10</sup> N'irö cate' chigud'i guzxáca'li' tu chí'isö, Dios gunë' ga gácali' idú tsahui', en ga gácali' tsutsu, en ga gálali', en ga sóali' tsaz. Lë cazë' Dios ruzá' ládxë'ë queéru' yúgu'të le ruzí'iru' xibé, en bulidzë' rë'u para uzi'iru' xibé yöl-la' zxön queë' le zóatica'sö tu' nácaru' tuz len Jesucristo. <sup>11</sup> ¡Gácatica'sö yöl-la' ba, en yöl-la' unná bë' queë' Lë! ¡Ca' gaca!

#### Pedro ruzenë' didza' nupa ta'dá' Cristo

<sup>12</sup> Dídfa' do' ni ruzúaja' queéli' lu guichi lu né'ë Silvano. Réquida' náquië' böchi'ru' idú ladxi'. Ré'ënda' utipa' ládxi'li', en runa' ba nalí lolí', le nácatë lë ni naca le ruzá' ládxë'ë queéru' Dios. ¡Guli'gaca tsutsu tu' ruzí'ili' xibé lë nil!

<sup>13</sup> Yugu' bönachi queë' Cristo nacuá' Babilonia tu'gapa Dios libí'ili'. Dios gurö' cazë' lëguequi ca na' guröë' libí'ili'. Lësca' bi'i Marcos rugápabi' Dios libí'ili'. Nácabi' ca zxí'ini caza'. <sup>14</sup> Guli'gapa Dios luzá'ali' tuli' ia'tuli', en lu yöl-la' nadxi'i queéli' luzá'ali' unída'li' luzá'ali' tuli' ia'tuli'.

Rinábida'-në' Dios gunë' ga soa dxi icja ládxi'do'oli', yúgu'tëli' na' néquili' queë' Jesucristo. ¡Ca' gaca!

## DÍDZA'DO' BUROPI BUZÚAJË' PEDRO

### *Pedro rugapë' Dios nupa ta'dá' Cristo*

<sup>1</sup> Neda', Simón Pedro, naca' huen dxin queë' Jesucristo, en gubáz nasól-lë'ë Lë'. Rugapa' Dios libí'ili', réajlë'ëli'-në' Jesús. Lébisö ca nazáca'gaca yöl-la' réajlë' queëli' Lë', en yöl-la' réajlë' queëtu' Lë'. Dios benë' ga réajlë'ëli' Lë' tu' naca cazë' tsahui', en tu' náquië' ca' Xanru' Jesucristo, Nu na' rusólá rë'u, tsahui'. <sup>2</sup> Rinábida'-në' Dios gunë' ga gata' queëli' idútë le ruzá' ládxë'ë queëru', en gunë' ga soa dxi icja ládx'i'do'oli' tu' núnbe'ëli'-në' Dios, enca' Xanru' Jesús.

### *Le nácagaca nupa ta'yéajlë' Cristo*

<sup>3</sup> Lu yöl-la' huáca zxön queë', Dios chibennë' queëru' yúgu'të le riquíniru' para gata' queëru' yöl-la' na'bán idú, en para gácaru' ba'a ladxi', tu' núnbe'ëru' Nu na' bulidza rë'u para gata' queëru' yöl-la' zxön queë', en le naca tsahui' queë'. <sup>4</sup> Tu' runë' caní, benë' ga gaca uzí'iru' xibé yugu' le zxön, en le naca tsahui' guzxí' lu në'ë gunnë' queëru', ate' tu' naca caní nuláru' lu le ruá' dö' raca yödzölió ni tu' ta'zé ládx'i'gaca bönachi le cabí naca tsahui'. Nuláru' para gácaru' ca náquië' Lë' cazë' Dios. <sup>5</sup> Que lë ni na':

Channö réajlë'ëli' Cristo,

guli'güí' ládx'i'li' gácali' dxi'i ladxi'.

Channö chinácali' dxi'i ladxi',

guli'güí' ládx'i'li' gata' ca' queëli' yöl-la' rácada'.

<sup>6</sup> Channö nápali' yöl-la' rácada',

guli'güí' ládx'i'li' inná be'e cuinli'.

Channö rinná be'e cuinli',

guli'cöza zxön ladxi'.

Channö ribözali' zxön ladxi',

guli'sóa ba'a ladxi'.

<sup>7</sup> Channö zóali' ba'a ladxi',

guli'dxf'i'luzá'ali'.

Channö nadxf'i'li' luzá'ali',

guli'dxf'i'ca' yúgu'të bönachi.

<sup>8</sup> Channö caní runli', en zeaj rácarö idú ca runli' caní, lë ni gun ga biti' gaca nítisö yöl-la' réajlë' queëli' Lë', ate' tseaj gácarö idú ca núnbe'ëli'-në' Xanru' Jesucristo. <sup>9</sup> Nu bönni' biti' rui'i ládxë'ë gunë' caní, náquië' ca tu bönni' nachul-la nanítië', tu' chizá' ral-la ládxë'ë bunë' Cristo lë' tsahui', en bugüé' yugu' dul-la' gubágue'ë zí'atëlö. <sup>10</sup> Que lë ni na', böchi' luzá'ado', ral-la' güí'itérö ládx'i'li' guéquibe'eli' bulidzë' Dios libí'ili', en guró' cazë' libí'ili'. Channö gunli' caní, biti' ca' ichixi iníguili'. <sup>11</sup> Caní gaca, idú ládxë'ë Dios gunnasë' queëli' lataj tsázali' ga inná bë'tica'sé' Xanru' Jesucristo, Nu rusólá rë'u.

<sup>12</sup> Que lë ni na' güntica'sa' ga tsöjnëli' yugu' lë ni sal-la' chinöz quézili' le, en rugunli' dxin le naca idútë li na' chiguzxí' lu ná'ali'. <sup>13</sup> Runi neda' ral-la' usubana' ládx'i'li' ca nácagaca lë ni tsanni ni zoa' nabana'. <sup>14</sup> Ral-la' guna' caní tu' nözda' si' gátia'. Xanru' Jesucristo chigudxi cazë' neda' gaca caní quia'. <sup>15</sup> Que lë ni na' ru'ida' ládx'a' guna' ga tsöjnética'sili' yugu' lë ni tödi gátia'.

### *Nupa bila'lé'e yöl-la' zxön queë' Cristo*

<sup>16</sup> Biti' bë'lentu' libí'ili' tu didza' ridasö lu yöl-la' sina' queëtu', cate' buzéajni'itu' libí'ili' ca ral-la' idxín dza huödë' Xanru' Jesucristo, napë' yöl-la' unná bë' zxön. Netu' bilé'e quézitu' yöl-la' zxön queë'. <sup>17</sup> Bilé'etu' Lë' cate' Xúziru' Dios benë' Lë' bal, en bë'ë Lë' yöl-la' zxön, ate' biyón chi'ë Dios, le birúaj lataj bení' queë', cate' gunné': "Bönni' ni náquië'

Zx'i'na'. Nadxi'ida' Lë', en raza ládex'a' Lë'." <sup>18</sup> Netu' biyőn quézitu' chi'ë na' le birúaj yehua' yubá cate' ni' guzóalentu'-në' Xanru' lu guí'a lá'ayi na'.

<sup>19</sup> Lë na' guca, naca bë'da' zeaj nácatë didza' gulu'ë yugu' bönni' uláz queë' Dios, ate' ral-la' gü'i ládex'i'li' didza' na', tu' naca ca tu guí' ruzen' tu ga naca chul-la ga idxintë dza uzen' lu icja ládex'i'oli' Nu na' naca ca bólaj hui sila queéru'. <sup>20</sup> Lë ni runda' bayudxi tséajni'ili': Cuntu nu bönni', rácasö queë' biti' gaca tséajni'inë' didza' bë'ë tu bönni' uláz queë' Dios. <sup>21</sup> Yugu' didza' gulu'ë yugu' bönni' uláz queë' Dios biti' ca' gulu'ë tu' gulé'ëni quézinë', pero gulu'ë didza' uláz queë' Dios le guchízië' Dios Bö' Lá'ayi icja ládex'i'do'gaquië'.

## 2

*Ca nácagaca nupa tu'sédinë' le cabí nácatë*

<sup>1</sup> Yugu' bönni' ta'zí' yë'ë gula'cuá'lenë' bönachi Israel, en gula'nné' nácagaquië' bönni' tu'ë didza' uláz queë' Dios. Lësca' caní yugu' bönni' ila'zí' yë'ë ila'cuá'lenë' lib'i'li', en ulu'sédinë' lib'i'li' le cabí nácatë. Lu yöl-la' sina' quégacäi' ulu'sédinë' lib'i'li' xibá quégacäi' le gun ga soa bönadxi queéli' ucá'anali' le naca idútë li. Ila'dá'baguë'ë ca' Xanru', Nu busólá rë'u. Le ilunë' gun ga usunítië' Dios légaquië'. <sup>2</sup> Zianli' lib'i'li' gunli' légaquië' tsözxón lu le ruá' dö' ilunë', ate' tu' gunli' bál-lali' caní ila'nné xihui' bönachi que didza' dxi'a le naca idútë li. <sup>3</sup> Lu yöl-la' ruhuidi' quégacäi' ulu'sédinë' lib'i'li' le cabí nácatë, para gata' quégacäi' dumí queéli'. Chinarugu quégacäi' bönni' ni, ate' naca löza ila'nítie' tsaz.

<sup>4</sup> Dios biti' buniti lahuë' yugu' gubáz lá'ayi queë' na' gulunë' dul-la', pero gurú'unë' légaquië' lataj chul-la. Nágagaquië' du guíë ga naca chul-la na', ga na' ta'bözë' dza usiúdxë' Dios légaquië'. <sup>5</sup> Lësca' caní, biti' buniti lahuë' bönachi gula'cuá' dza ni'te cate' gusól-lë'ë nisa guiój le busuniti yödzölió le beti bönachi nácagaca xihui', pero busólë' Noé lu nisa na', bönni' ni' benë' libán que le naca tsahui'. Dios busólë' ca' ia'gadxi di'a dza queë' Noé na' lu nisa. <sup>6</sup> Lësca' caní, Dios guchúguië' quégacäi' bönachi gula'cuá' yödzö Sodoma, en yödzö Gomorra. Busunítië' léguequi lu guí', ate' bulu'huóaca dö. Le guca quéguequi naca tu le rulu'i le run gadxi nupa tua' dö'. <sup>7</sup> Cate' busunítië' yugu' yödzö na', Dios busólë' Lot, tu bönni' tsahui', lu guí' na'. Bu' inida' ládxë'ë Lot cate' bilé'enë' le xihui' gulún bönachi tuá' dö' na'. <sup>8</sup> Caní guca, tu' guzóalenë' bönni' tsahui' na' léguequi, ate' bilé'enë', en biyönnë' le ruá' dö' na' gulúngaca, ate' tu' gúquië' tsahui' gusébi ládxë'ë yúgu'të dza ni'a que yugu' le cabí naca tsahui' gulúngaca. <sup>9</sup> Caní naca, Xanru' nőzinë' usólë' nupa na' tadxi Lë' lu na' nu run ga tsázagaca bönachi nöza dul-la', pero nucózë' xíguia' gunë' nupa biti' nácagaca tsahui' ga idxinrö dza ichúguië' quéguequi ila'nítie' tsaz.

<sup>10</sup> Ichúguda'arö quégacäi' bönni' ni tunë' yugu' le ta'zé ládxë'ë le ruá' dö', en ta'dá'baguë'ë yöl-la' unná bë' queë' Xanru'. Nácagaquië' rugu ladxi', en zidi ladxi'. Biti' tádxinë' tu'lidza ditje' gubáz lá'ayi ta'dé' lu bení'. <sup>11</sup> Gubáz lá'ayi na' nápagacatérë' yöl-la' unná bë', en yöl-la' huáca ca yugu' bönni' na', pero gubáz lá'ayi na' biti' tu'huázxjanë' nu ulu'zéguë' didza' lahuë' Xanru'.

<sup>12</sup> Yugu' bönni' ni nácagaquië' ca bö'a' guixi', biti' bi ta'yéajni'iba', pero náljagacaba' para nu sön légacaba', en guti légacaba'. Ta'nné xihuë'ë que le cabí ta'yéajni'inë', ate' ila'nítie' tsaz ca raca quégacaba' bö'a' guixi' na'. <sup>13</sup> Dios ubi'ë quégacäi' le ila'guí'i ila'záquë'ë, tu' bulu'saca' zi'ë bönachi. Téquinë' naca xibágaquië' tu'zi'ë xibé le raca na'a dza. Nácagaquië' ca tu huë' nudzu', en tu le run ditaj cate' ni' tahuë' tsözxón len lib'i'li', ate' tu'dzéjanë' tu' ta'zí' yé'enë' lib'i'li'.

<sup>14</sup> Lu yöl-la' rizé' ladxi' quégacäi' le ruá' dö' tu'yúë'-nu yugu' nigula. Biti' nacu'ë dxisö túngaquië' dul-la'. Túngaquië' ga ta'chixi ta'nigui nupa biti' nácagaca tsutsu ca ta'yéajlë' Cristo. Ta'guíljatica'sé' yugu' le tu'huídi'në'. Dios chinuchúguië' quégacäi' ilátigaquië'. <sup>15</sup> Bulu'cá'anë' le naca idútë li, ate' nachul-la nanítigaquië'. Tunë' ca benë'

Balaam, zxí'iné' Beor, bönni' ni' bidxi'iné' dumí, ate' bené' le ruá' dö' tu' nazxjé'. <sup>16</sup> Dios buzené' le bach Balaam na' tu' bené' le ruá' dö' na'. Tuba' búrrodo' bélénba' lë' didza' ca na' tuí'i didza' bönachi, ate' buzágaba' xinözé' Balaam ga na' sa' yéajé' lu yöl-la' ridá'baga' queé'.

<sup>17</sup> Nácagaquié' bönni' ni ca tu buduá' chibuí'i nisa que, enca' ca tu böaj le riché' bö' budunu'. Chinabá'a xilátjagaquié' lataj chul-la. <sup>18</sup> Caní nácagaquié' tu' tu'ë didza' yugu' le zxön lu yöl-la' biti' bi nøzi quégagaquié', en tu'guné' dxin yugu' le ta'zé ládzi'gaca bönachi le ruá' dö', en tuné' ga ta'chixi ta'nigui nupa si' bulu'lá ladaj nupa nácagaca chul-la niti. <sup>19</sup> Té' bönachi ila'deli' yöl-la' rusólá, pero légaca cazé' nadzúngaquié', en tuné' bayudxi le ruá' dö'. Nadzúngaquié' yúgu'té bönni' lu na' bi rinná be'e icja ládzi'do'gaquié'. <sup>20</sup> Channö bulu'lé' lu le cabí naca tsahui' nacuá' yödzölió ni tu' gulúnbë'ë Xanru' Jesucristo, Nu rusólá rë'u, ate' ní'irö ta'röli le cabí naca tsahui' na' légaquié' leyübölö, en ta'nná be'e légaquié', le nácaté nabága'gacatérë' xíguia' ga röjetë ca le gula'báguë'ë zí'alö. <sup>21</sup> Dxi'arö gaca quégagaquié' la'tu' catu caz ilúnbbë'ë Nu ruzóá rë'u nøza tsahui' ca le gaca quégagaquié' channö gulúnbë'ë Lë', ate' ní'irö bulu'cá'ané' xibá lá'ayi bë'ë Dios quégagaquié'. <sup>22</sup> Chibudxín quégagaquié' didza' na' rnna:

Ruhuécjaba' bö'cu', ruhuöáguba' le si' gúbabá'.

Ruyázaba' cuchi na' si' gudíbiru'-ba' lu guna'.

### 3

#### *Naca löza huödë' Xanru'*

<sup>1</sup> Didza' ni naca le buropi ruzúaja' queéli' lu guichi, böchi' luzá'ado'. Lu irópaté guichi na' rui'i ládx'a' usubana' ládzi'li' ca nácagaca lë ni. <sup>2</sup> Guli'tsöjné yugu' didza' gulu'ë bönni' queé' Dios zí'atëlö, ca gulu'ë didza' uláz queé'. Guli'tsöjné ca' xibá na' Xanru', Nu rusólá rë'u, gunná bé'ené' rë'u, lë na' bulu'sédiné' bönni' gubáz nasól-lë'ë Lë' lib'ili'.

<sup>3</sup> Ral-la' tsöjnélí' lë ni naca lo. Dza tsöjsétégaca ulu'lui'i lahué' bönni' iluné' le ta'zé ládxë'ë le ruá' dö'. <sup>4</sup> Ulu'titjé', ila'nné': "¿Gazxi caz lë na' guzxí' lu né'ë Cristo? Gunné': Huöda' leyübölö. Dza ni'te cate' gulátië' xuz xtó'oru', yúgu'té raca tuz ca guca cate' gusí lo rata' yödzölió ga ridxitné na'a dza." <sup>5</sup> Tu'zóé' tsölä'alö le guca dza ni'te. Bë'ë didza' Dios, ate' gulata' lúzxiba, en luyú. Birúaj luyú na' lu nisa ate' zoa gatsaj láhui'lö nisa. <sup>6</sup> Len nisa ca' busunítië' Dios yödzölió dza ni'te cate' ni' gusól-lë'ë nisa guiój le beti yugu' bönachi dul-la'. <sup>7</sup> Lúzxiba, en yödzölió ni le nacuá' na'a dza, Dios nucu'ë léguequi ga idxinrö dza usunítië' léguequi lu guí'. Caní gaca tu' gunné' caní Dios caz. Uzégu'ë léguequi dza ni' ichúguié' quégaca bönachi biti' nácagaca tsahui' gátigaca.

<sup>8</sup> Biti' gal-la ládzi'li' lë ni, böchi' luzá'ado'. Tu dza naca queé' Xanru' ca zián gayuá' iz, ate' zián gayuá' iz nácagaca queé' ca tu dza. <sup>9</sup> Biti' ridzené' Xanru' guné' le guzxí' lu né'ë guné'. Téquiguequi bal-la bönachi ridzené', pero ribözé' zxön ladxi', en ruá' rilené' rë'u tu' cabí ré'ëné' initi nitú bönachi, pero ré'ëné' ulu'bí'i ládzi'gaca yúgu'té bönachi.

<sup>10</sup> Tsálido'os idxn dza huödë' Xanru' ca ridxiné' tu bönni' gubán chi'i dzö'ölö. Lu dza na' huadödi que lúzxiba len tu bö zxön. Ila'niti yúgu'té le nacuá' lu guí' zxön. Ila'yegui yödzölió ni, en le nacuá' yödzölió ni.

<sup>11</sup> Channö caní gaca, ila'niti yúgu'té lë ni, ¿bizxi caz ral-la' gunli'? Ral-la' gácali' ba'a ladxi', en udödi cuinli' lu né'ë Dios. <sup>12</sup> Ral-la' códali' dza huödë' Xanru', en gü'i ládzi'li' gunli' ga idxinrö bayón dza ni' cate' initi lúzxiba, ate' ila'niti yúgu'té le nacuá' ni lu guí'. <sup>13</sup> Caní gaca, pero rë'u ribözaru' le guzxí' lu né'ë Dios. Guné' tu lúzxiba cubi, en tu luyú cubi ga ni' soa le naca tsahui'.

<sup>14</sup> Que lë ni na', böchi' luzá'ado', tsanni ni ribözali' yugu' lë ni, guli'gü'i ládzi'li' gácali' idú tsahui' lahué' Dios, ate' gunli' ga cuntu nu bi gaca inné' queéli', en códali' dx'ado' cate' idxinrö dza ni'. <sup>15</sup> Ral-la' inözili' ribözé' Dios zxön ladxi' para gata' quégaca bönachi lataj ulu'lágaca, ca na' gunné' ca' böchi'ru' Pablo. Buzúaje' queéli' lu guichi, zóalen lë' yöl-la'

réajni'i na' bë'ë Xanru' queë'. <sup>16</sup> Yúgu'të lu guichi ruzúajé', ru'ë didza' ca nácagaca lë ni, sal-la' nútsa'gaca ca' léguequi yugu' didza' nácagaca böniña tséajni'iru'. Yugu' didza' caní tu'chíxinë' bönni' biti' nözguequinë', en bönni' biti' naca idú ládzi'gaquië'. Lësca' caní tunë' quégaca ia'bal-la didza' nazúajgaca lu guichi lá'ayi, le gun ga usunítië' Dios légaquië'.

<sup>17</sup> Chinóz quézili' lë ni, böchi' luzá'ado'. Que lë ni na' guli'gún chi'i cuinli', para cabí ila'zi' ye'e böñachi biti' nácagaca tsahui' lib'ili', en para cabí ilún ga tseaj bö' icja ládzi'do'oli' ca réajlë'eli' Cristo. <sup>18</sup> Guli'güü' ládzi'li' gácarö idú ca núnbe'eli'-në' Xanru' Jesucristo, Nu rusölá rë'u, ate' ruzf'ili' xibé'. ¡Yöl-la' ba Lë' na'a dza, en yúgu'të dza zá'gaca! ¡Ca' gaca!

## DÍDZA'DO' ZÍ'ALÖ BUZÚAJË' JUAN

### *Didza' nabániru'*

<sup>1</sup> Rusiyöntu' lib'iili' ca naca queë' Bönni' na' zoa cazë' dza ni'te, le biyónitu' bë'ë didza', en le bilé'etu' ca naca queë', en le buyutu' benë' Bönni' na'. Gudantu' Lë'. Bönni' ni náquië' Jesús, lë' ca' Didza' Nabánigaca Bönachi. <sup>2</sup> Bönni' na' nabánigaca bönachi bulu'i lahuë', ate' bilé'etu' Lë'. Runtu' ba nalí queë', en ruluf'itu' lib'iili' ca naca queë' Bönni' na' nabániru'. Bönni' ni guzóalenë' Dios Xuz, en chibudulu'i lahuë' ga zóaru'. <sup>3</sup> Le bilé'etu', en le biyónitu' rusiyöntu' lib'iili' para gácali' ca' lib'iili' tuz len netu'. Le nácatë naca yöl-la' tuz queéru' len Dios Xuz, enca' len Jesucristo Zxf'inë' Dios. <sup>4</sup> Ruzúajtu' queéli' lu guichi lë ni para gaca udzéjaru' idú ládxi'ru'.

### *Dios náquië' beni'*

<sup>5</sup> Lë ni naca didza' biyónitu' bë'lenë' Jesús netu', ate' le rusiyöntu' lib'iili'. Caní rnna: Dios náquië' beni', ate' nitú le naca chul-la que dul-la' biti' zóalen Lë'. <sup>6</sup> Channö innaru': "Nácaru' tuz len Dios", pero channö runru' le naca chul-la que dul-la', lë ni naca bë' rizi' yé'ëru', en biti' runru' le naca idútë li. <sup>7</sup> Na'a, channö runru' le naca tsahui', en ridaru' lu beni' ca na' Lë' náquië' tsahui', en zoë' lu beni', nácaru' tuz turu' len ia'turu', ate' xichönë' Jesucristo, Zxf'inë' Dios ruún rë'u dxi'a, en rugúa yúgu'të dul-la' nabága'ru'.

<sup>8</sup> Channö rnna: "Biti' bi dul-la' runru'", rizi' yé'ëru' la' cuínsiru', en biti' nazí' lu ná'aru' le naca idútë li. <sup>9</sup> Channö ixóalépiru' lahuë' Dios dul-la' nabága'ru', Lë' runë' ca rnne', en náquië' tsahui'. Uniti lahuë' dul-la' nabága'ru', en únë' rë'u tsahui', ugüë' yúgu'të le ruá' dö' dzaga rë'u. <sup>10</sup> Channö innaru': "Biti' bi dul-la' nabága'ru'", naca ca innaru': "Dios rizi' yé'ë", ate' biti' runru' ca rnna xtídzë'ë.

## 2

### *Cristo náquië' Nu rudödi xtídzä'ru' lahuë' Dios*

<sup>1</sup> Lib'iili', zxí'ina'do', ruzúaja' queéli' lu guichi lë ni, para cabí gunli' dul-la'. Na'a, channö nútiti'nes nu gun dul-la', zoa nu rudödi xtídzä'ru' lahuë' Dios Xuz, Lë' Jesucristo, Nu naca tsahui'. <sup>2</sup> Naca cazë' Bönni' budödi cuinë', en gútië' para bugüë' dul-la' nabága'ru' lahuë' Dios. Calégasö gútië' para bugüë' dul-la' nabága'ru' rë'u, pero gútië' ca' para bugüë' dul-la' nabága'gaca bönachi idútë yödzölio.

<sup>3</sup> Channö runru' ca naca le gunná bë'enë' rë'u, nőziru' chinúnbë'ëru' Lë'. <sup>4</sup> Nu rnna: "Neda' núnbë'a-në' Dios" pero biti' run ca rinná bë' xibá queë', nu ni rizi' yë', en biti' run le naca idútë li. <sup>5</sup> Nu run ca rnna xtídzë'ë Dios, le nácatë nadxi'i nu ni Dios ca ral-la' gun. Channö runru' caní, nőziru' néquiru' queë' Dios. <sup>6</sup> Lësca' caní, nu rnna: "Neda' néquida' queë' Cristo", ral-la' gaca nu na' ca na' gúquië' Cristo cate' gudé' yödzölio ni.

### *Tu xibá cubi*

<sup>7</sup> Böchi' luzá'ado', ruzúaja' queéli' lu guichi xibá ni. Biti' naca tu xibá cubi, pero xibá gula na', le zóalen lib'iili' dza ni'te. Xibá gula na' naca didza' biyónili' dza ni'te. <sup>8</sup> Lësca' naca ca ruzúaja' queéli' lu guichi tu xibá cubi, lë na' le nácatë benë' Jesús ca rnna, ate' runli' ca' lib'iili' ca rnna, tu' chiridödi que le naca chul-la que dul-la', ate' beni' idú chiruzení'.

<sup>9</sup> Nu rnna: "Zoa' lu beni'", pero biti' rilé'e dxi'a böchi' luzé'e, nu ni ni run le naca chul-la que dul-la'. <sup>10</sup> Nu nadxi'i böchi' luzé'e zoa lu beni', ate' le run ga nu ichixi inigui biti' zóalen nu na'. <sup>11</sup> Le naca chul-la que dul-la' run ga nu biti' rilé'e dxi'a böchi' luzé'e, en ga ridá nu na' ga chul-la. Biti' nözi ga zeaj, tu' run le naca chul-la na' ga nachul-la naniti nu na'.

<sup>12</sup> Ruzúaja' queéli' lu guichi, zxí'ina'do', tu' chibunít lahuë' Dios dul-la' nabága'li', tu' runë' le guzxí' lu në'ë gunë'. <sup>13</sup> Ruzúaja' queéli' lu guichi, libí'ili' nácali' xuz, tu' núnbe'ëli' Nu na' zoa caz dza ni'te. Ruzúaja' queéli' lu guichi, bi'i ra'bán, tu' chibucúl-lali' tu' xihui'.

<sup>14</sup> Chibuzúaja' queéli' lu guichi, zxí'ina'do', tu' núnbe'ëli'-në' Dios Xuz. Chibuzúaja' queéli' lu guichi, libí'ili' nácali' xuz, tu' núnbe'ëli' Nu na' zoa caz dza ni'te. Chibuzúaja' queéli' lu guichi, bi'i ra'bán, tu' nácali' bi'i nál-la, en nazi' lu ná'ali' xtídzë'ë Dios, en chibucúl-lali' tu' xihui'.

<sup>15</sup> Bití' idxí'sili' yödzölió ni, en caléga le dë yödzölió ni. Channö zoa nu nadxí'i yödzölió, bití' nadxí'i Dios Xuz. <sup>16</sup> Caní naca, tu' naca le tun böñachi yödzölió ni le cabí ré'ënë' Dios Xuz, pero naca le té'ëni böñachi yödzölió ni.

Tunë' le riyaza ladxi' yöl-la' böñachisö quégäquië'.

Tunë' le ruá' dö' le ridani guioj lógaquië'.

Tun ba zxön cuíngäquië' ni'a que le dë quégäquië'.

Caní nácagaca le ruá' dö' tunë'. <sup>17</sup> Huadödi que yödzölió ni, enca' que le ta'zé ládxi'gaca böñachi, pero nu run ca ré'ënë' Dios sóatica'sö.

### *Nu rui'i didza' idútë li, en nu rizi' yë'*

<sup>18</sup> Zxí'ina'do', chizóaru' dza údxi, en ca na' chibiyónili' huidë' bönni' ridá'báguë'ë Cristo, lësca' na'a chigusí lo nacu'ë zián bönni' ta'dá'baguë'ë Cristo. Que lë ni na' nőziru' chizóaru' dza údxi. <sup>19</sup> Bila'rúajé' bönni' caní lágjaru', pero bití' guláquië' tuz len rë'u. La'tu' guláquië' tuz len rë'u, ila'cuá'lentica'së' rë'u. Na'a, bila'rúajé' para gaca bë' bití' nácagaquië' yúgu'té' tuz len rë'u.

<sup>20</sup> Na'a, Bö' Lá'ayi nagú'u Nu naca lá'ayi rë'u, chizóalen libí'ili', ate' nöz quézili' yúgu'té.

<sup>21</sup> Buzúaja' queéli' lu guichi, tu' chinózili' le naca idútë li, en caléga tu' cabí nőzili' le. Nőzili' ca' bití' ca' rizi' yë' nu nözi le naca idútë li.

<sup>22</sup> ¿Nuzxi caz na' nu rizi' yë'? ¿Naru' cabí naca nu na' ridá'baga' náquië' Jesús Nu gusól-lë'ë Dios? Naca nu ni bönni' ridá'baguë'ë Cristo, tu' ridá'baguë'ë náquië' Dios Xuzé' Jesús, en ridá'baguë'ë ca' náquië' Jesús Zxí'inë' Dios. <sup>23</sup> Núti'tës nu ridá'baga' Dios Zxí'ini, bití' ca' zóalenë' Dios Xuz nu na'. Núti'tës nu rnna yálajdo' Jesús náquië' Zxí'inë' Dios, lësca' zóalenë' Dios Xuz nu na'.

<sup>24</sup> Na'a, guli'gü' lataj le biyónili' dza ni'te ugá'analentica'sö libí'ili'. Channö le biyónili' dza ni'te ugá'analentica'sö libí'ili', lësca' libí'ili' ugá'analentica'sili'-në' Dios Zxí'ini, enca' len Dios Xuz. <sup>25</sup> Le guzxí' lu në'ë Dios naca lë ni: Gunné' gunné' yöl-la' na'bán idú queéru'.

<sup>26</sup> Chibuzúaja' queéli' lu guichi lë ni ca naca quégaca nupa ta'zí' ye'e libí'ili'. <sup>27</sup> Na'a, zóalenë' Dios Bö' Lá'ayi libí'ili'. Cristo gusól-lë'ë Lë' queéli', ate' Lë' cazë' zóalentica'së' libí'ili'. Que lë ni na' bití' riquínili' nu usedi libí'ili', tu' chizóalen Nu na' libí'ili', en rusedi libí'ili'. Didza' idútë li ru'ë Lë', en bití' rizi' yë'ë. Ca na' chinazédali', guli'sóalentica'së' Cristo.

<sup>28</sup> Na'a, zxí'ina'do', guli'sóalentica'së' Cristo para cate' ulu'i lahuë' Lë', gácaru' rugu ladxi', en bití' utu'iru' sóaru' lahuë' Lë' cate' huödë'. <sup>29</sup> Channö nőzili' náquië' Dios tsahui', ral-la' inózili' ca' yúgu'té nupa tun le naca tsahui' nácagaca zxí'inë' Dios.

### *Nupa nácagaca zxí'inë' Dios*

<sup>1</sup> Buli'yú ca nadxí'ide'enë' Dios Xuz rë'u, benë' ga nazi'i laru' zxí'inë' Dios caz. Que lë ni na' böñachi yödzölió ni bití' ca' núnbe'gaca le nácaru', tu' cabí gulúnbe' Jesús. <sup>2</sup> Böchi' luzá'ado', na'a chinácaru' zxí'inë' Dios, en bití' naca bë'eni le ral-la' gácaru'. Nőziru' cate' ulu'i lahuë' Jesús, gácaru' ca náquië' Lë', ate' ilé'eru'-në' catëz náquië' Lë'. <sup>3</sup> Núti'tës nu run löza gaca ca náquië' Jesús, rui'i ladxi' nu na' gaca dxi'a ca na' náquië' Jesús dxi'a.

<sup>4</sup> Núti'tës nu run dul-la' riguitsaj xibá queë' Dios, tu' naca dul-la' le riguitsaj xibá.  
<sup>5</sup> Nőzili' bulu'i lahuë' Jesús para bugüë' dul-la' nabága'ru', en biti' bi dul-la' runë' Lë'.  
<sup>6</sup> Núti'tës nu dzaga Lë' biti' run dul-la'. Núti'tës nu run dul-la' catu caz bilé'e Jesús, en biti' núnbe'e Lë'. <sup>7</sup> Zxi'ina'do', guli'gún chi'i cuinli' para cabí nu si' ye'e libí'ili'. Nu run le naca tsahui', naca tsahui' nu na' ca na' náquië' Jesús tsahui'. <sup>8</sup> Nu rúntica'sö dul-la' nequi que tu' xihui', tu' run dul-la' tu' xihui' dza ni'te. Que lë ni na' buduluf'i lahuë' Zxi'inë' Dios, para usunítië' yugu' le nun tu' xihui'.

<sup>9</sup> Núti'tës nu naca zxí'inë' Dios biti' rúntica'sö dul-la', tu' zóalentica'sö le guzxi' lu në'ë Dios Xuz nu na'. <sup>10</sup> Caní naca bë' nupa nácagaca zxí'inë' Dios, en nupa nácagaca zxí'ini tu' xihui'. Núti'tës nu biti' run le naca tsahui', en biti' nadxi'i böchi' luzë'e biti' nequi queë' Dios.

### Ral-la' idxí'iru' yugu' böchi'ru' ta'yéajlé'ë Cristo

<sup>11</sup> Lë ni naca didza' biyónili' dza ni'te, le rnna: Ral-la' idxí'iru' luzá'aru' turu' ia'turu'.  
<sup>12</sup> Biti' ral-la' gunru' ca na' benë' Caín. Gúquië' Caín que tu' xihui', ate' bëtië'-bi' bi'i böchë'ë. ¿Bizx que bëtië'-bi' bi'i böchë'ë? Bëtië'-bi' tu' gulaca le benë' Caín na' le ruá' dö', pero le benbi' bi'i böchë'ë, gulaca tsahui'.

<sup>13</sup> Bócha'ado', biti' ubánili' channö cabí ta'lé'e bönachi yödzölió ni libí'ili' dxi'a. <sup>14</sup> Nőziru' chigudödiru' lu yöl-la' guti, en chidé yöl-la' na'bán idú queëru' tu' nadxi'iru' yugu' böchi'ru'. Nu biti' nadxi'i böchi' luzë'e, chinati caz nu na'. <sup>15</sup> Núti'tës nu biti' rilé'e dxi'a böchi' luzë'e, naca huëti bönachi nu na', ate' nőzili' nu ruti bönachi biti' dë yöl-la' na'bán idú que. <sup>16</sup> Caní núnbe'ëru' yöl-la' nadxi'i le naca idú. Naca ca budödë' Jesús yöl-la' na'bán queë', en gútië' uláz queëru'. Lësca' caní rë'u ral-la' udödiru' yöl-la' na'bán queëru', para gácalenru' yugu' böchi'ru'. <sup>17</sup> Na'a, núti'tës nu dë yöl-la' tsahui' que, lë na' dë yödzölió ni, ate' rilé'e böchi' luzë'e, bi riyadzaj queë', en biti' ruhuéchi' ladxi' lë', bi unödzaj queë', ¿naru' nadxi'itsö nu na' Dios? <sup>18</sup> Libí'ili', zxí'ina'do', ral-la' idxí'iru' luzá'aru', calëga len dídza'sö o lu yöl-la' rinnësö queëru', pero idú ládxi'ru', enca' len idútë yöl-la' run queëru' ral-la' idxí'iru' luzá'aru'.

### Le runru' löza lahuë' Dios

<sup>19-20</sup> Channö caní nadxi'iru' yugu' böchi' luzá'aru', nőziru' néquiru' que Nu na' naca idútë li, ate' lahuë' Dios huáca cö' dxi icja ládxi'do'oru' channö ruxösa ládxi'do'oru' rë'u, tu' rácada'arë' Dios ca ládxi'do'oru', ate' Lë' nőzinë' yúgu'të. <sup>21</sup> Böchi' luzá'ado', channö cabí ruxösa ládxi'do'oru' rë'u, dë le runru' löza lahuë' Dios <sup>22</sup> tu' nőziru' gunnë' queëru' bítitës bi inábaru' lahuë'. Caní naca, tu' runru' ca rinná bë' xibá queë', en le raza ládxë'ë Lë'. <sup>23</sup> Lë ni naca xibá queë', para tséajlé'ëru'-në' Jesucristo, Zxi'inë' Dios, en idxí'iru' luzá'aru' ca na' chigunná bë'enë' rë'u. <sup>24</sup> Zóalen Dios nu run ca rinná bë' xibá queë', ate' Dios caz zóalenë' nu na'. Caní nőziru' dzágatica'së' Lë' rë'u, tu' chigusól-lë'ë Dios Bö' Lá'ayi queëru'.

### Le naca bë' zóalenë' Dios Bö' Lá'ayi rë'u

<sup>1</sup> Böchi' luzá'ado', biti' tséajlé'ëli' núti'tës bönni' rinnë' zóalenë' Dios Bö' Lá'ayi lë', pero guli'sí' bë' bönni' na', channö zóalenë' Dios Bö' Lá'ayi lë', tu' ta'dé' zián bönni' ta'zí' yë'ë yödzölió ni. Ta'nné' tu'ë didza' uláz queë' Dios. <sup>2</sup> Caní gúnbe'ëli'-në' nu bönni' zóalenë' Dios Bö' Lá'ayi lë'. Nequi queë' Dios bönni' na' rinnë' yálajdo' ca bidë' Jesucristo, Nu gusól-lë'ë Dios, rinnë' guca cazë' bönachi. <sup>3</sup> Lësca' caní, biti' nequi queë' Dios nu bönni' biti' rinnë' yalaj lulu ca bidë' Jesucristo, rinnë' biti' guca cazë' bönachi. Bönni' ni néquinë' que nu na' ridá'baga' Cristo, bönni' na' chibiyónili' ral-la' guídë', ate' na'a chiridé' yödzölió ni.

<sup>4</sup> Zxi'ina'do', néquili' queé' Dios, en chibucúl-lali' nupa na' ta'zí' yé', tu' náparö Nu na' zóalen libí'ili' yöl-la' huáca unná bë' ca nu na' ridá yödzölió ni. <sup>5</sup> Légaquié' nácagaquié' böñachi yödzölió. Que lë ni na' tu'ë didza' que le naca que yödzölió, ate' böñachi yödzölió ni tu'zé nágagaca légaquié'. <sup>6</sup> Néquiru' rë'u queé' Dios. Nu nunbë' Dios ruzé nagui rë'u. Nu biti' nequi queé' Dios biti' ruzé nagui rë'u. Caní núnbë'ëru' nu na' yu'u le Bö' ru'i didza' le naca idútë li, enca' nu na' yu'u le tu bö' rizí' yé'.

### Náljalen Dios yöl-la' nadxí'i

<sup>7</sup> Böchi' luzá'ado', ral-la' idxí'iru' luzá'aru', tu' náljalen Dios yöl-la' nadxí'i, ate' núti'tës nu nadxí'i luzé'e náljalen ca' Dios, en núnbe'e Dios. <sup>8</sup> Nu biti' nadxí'i luzé'e, biti' núnbe'e Dios, tu' náljalen Dios yöl-la' nadxí'i. <sup>9</sup> Caní bulu'e lahui Dios ca nadxí'inë' rë'u, gusól-lë'ë la's dui Zxi'ini cazë' yödzölió ni, para gata' yöl-la' na'bán idú queéru' ni'a queé' Lë'. <sup>10</sup> Caní naca bë' yöl-la' nadxí'i idú, calëga ca nadxí'iru'-në' Dios, pero ca na' Lë' bidxí'inë' rë'u, en gusól-lë'ë Zxi'ini cazë' para gútié', en caní bugüé' dul-la' nabága'ru'.

<sup>11</sup> Böchi' luzá'ado', channö caní bidxí'ide'enë' Dios rë'u, lësca' rë'u ral-la' idxí'iru' luzá'aru'. <sup>12</sup> Catu caz nu bilé'e Dios, pero channö nadxí'iru' luzá'aru', Dios zóalenë' rë'u, ate' naca bë' nadxí'iru'-në' Dios idú ládxí'ru'. <sup>13</sup> Nôziru' zóalenru'-në' Dios, ate' Lë' zóalenë' rë'u, tu' guchízié' Dios Bö' Lá'ayi rë'u. <sup>14</sup> Netu' bilé'etu' le benë' Dios Xuz, en runtu' ba nalí que. Lë' gusól-lë'ë Zxi'ini cazë' Nu rusólá böñachi yödzölió. <sup>15</sup> Nu bönni' rnnë' yálaçdo' náquié' Jesús Zxi'inë' Dios, Dios zóalen cazë' bönni' na', ate' lë' zóalenë' Dios.

<sup>16</sup> Rë'u ni nôziru', en réajlë'ëru' nadxí'inë' Dios rë'u. Yöl-la' nadxí'i náljalen Dios, ate' nu bönni' nadxí'inë' luzé'e, zóalenë' bönni' na' Dios, ate' Dios zóalenë' lë'. <sup>17</sup> Caní run dxin yöl-la' nadxí'i lu icja ládxí'do'oru', run ga bíti'rö rádxiru' dza ichúguié' Dios quégaca böñachi ilátigaca. Ca náquié' Jesús, nácaru' ca' rë'u yödzölió ni. <sup>18</sup> Channö nadxí'iru'-në' Dios, biti' bi gádxiru'. Cate' nadxí'iru'-në' Dios idú ládxí'ru', runë' ga biti' rádxiru'. Nu radxi, rigui'i rizáca'a. Nu na' radxi, biti' nadxí'i Dios idú ladxi'.

<sup>19</sup> Rë'u ni nadxí'iru'-në' Dios, tu' zí'alö bidxí'i quézinë' Lë' rë'u. <sup>20</sup> Channö nu inná: "Neda' nadxí'ida'-në' Dios", pero biti' rile'e dxi'a böchi' luzé'e, nu ni rizi' yé'. Nu biti' nadxí'i böchi' luzé'e nu rilé'e caz, ¿nacxi caz gaca idxí'i Dios, en catu caz bilé'e Lë'? <sup>21</sup> Caní gunná bë'enë' Jesús rë'u. Gunné': Nu nadxí'i Dios, ral-la' idxí'i ca' böchi' luzé'e.

## 5

### Ca gaca idéli'ru' lu le raca queéru' yödzölió ni

<sup>1</sup> Núti'tës bönni' réajlë'ë Jesús náquié' Cristo, náquié' zxi'inë' Dios, ate' núti'tës bönni' nadxí'inë' Dios Nu buzoá lë', ral-la' idxí'inë' ca' luzé'e nu naca bi'i queé' Dios. <sup>2</sup> Caní réquibe'eru' nadxí'iru' yugu' bi'i queé' Dios. Naca caní channö nadxí'iru'-në' Dios, en runru' ca rinná bë'enë' rë'u. <sup>3</sup> Caní naca bë' nadxí'iru'-në' Dios. Naca caní channö runru' ca rinná bë'enë' rë'u, ate' lë na' rinná bë'enë' rë'u biti' naca böñiga. <sup>4</sup> Núti'tës bönni' náquié' bi'i queé' Dios ridéli'në' lu le raca yödzölió ni. Chibidéli'ru' lu le raca yödzölió tu' réajlë'ëru'-në' Dios. <sup>5</sup> ¿Nuzxi na' rideli' lu le raca yödzölió? Run caní nu réajlë' náquié' Jesús Zxi'inë' Dios.

### Dios Bö' Lá'ayi runë' ba nalí queé' Cristo

<sup>6</sup> Caní blë'ë Jesucristo. Bidë' bidilë' nisa, en bulaljë' xichönë'. Calégasö bidilë' nisa, pero lësca' bulaljë' xichönë'. Dios Bö' Lá'ayi náquié' Nu run ba nalí queé', tu' naca idútë li didza' ru'ë Dios Bö' Lá'ayi. <sup>7</sup> Tsonna nupa tun ba nalí queé' Jesús yehua' yubá ni', Dios Xuz, en Dios Zxi'ini, lë' ca' Didza', en Dios Bö' Lá'ayi. Yonné' ni nácagaquié' tuz. <sup>8</sup> Lësca' caní, tsonna le tun ba nalí queé' luyú ni, ca na' zóalenë' Dios Bö' Lá'ayi Lë', en le bidilë' Jesús nisa, en rön ni' bulaljë' lë'e yaga cruz, ate' yonna ni, tuz ca ta'nná. <sup>9</sup> Channö si' lu na'aru' le tun ba nalí böñachi, le runë' ba nalí Dios nácatérö lesaca'. Lë na' benë' ba nalí Dios naca le benë' ba nalí queé' Jesús, gunnë' náquié' Zxi'ini cazë'. <sup>10</sup> Nu réajlë' Zxi'inë'

Dios, nazi' lu næ'e le nuné'e ba nalí Dios. Nu cabí réajlë' Dios, naca ca rnna nu na': Dios rizi' yé'e. Caní naca, tu' cabí guyéajlë' le bené'e ba nalí Dios queé'e Zxí'iné'. <sup>11</sup> Lë ni naca le bené'e ba nalí Dios. Gunné'e chibenné'e yöl-la' na'bán idú queéru', ate' Zxí'iné'e na' náquië'e. Nu nabániru' caní. <sup>12</sup> Nu bönni' zóalenë'e Zxí'iné'e Dios lë', dë yöl-la' na'bán idú queé'e. Nu bönni' biti' zóalenë'e Zxí'iné'e Dios lë', biti' dë yöl-la' na'bán idú queé'e.

*Ca nőziru' dë yöl-la' na'bán idú queéru'*

<sup>13</sup> Lib'ili' na' réajlë'ëli'-në'e Zxí'iné'e Dios, ruzúaja' queéli' lu guichi lë ni para inőzili' chidé yöl-la' na'bán idú queéli', en para gaca idú ca réajlë'ëli'-në'e Zxí'iné'e Dios.

<sup>14</sup> Lë ni naca le ruzxöni ládxi'ru' Lë'. Channö bi inábiru' Lë' ca ré'ënë'e Lë', Lë' riyönnë'rë'u. <sup>15</sup> Channö nőziru' riyönnë'rë'u ca naca bi rinábiru' Lë', nőziru' ca' ideli' quéziru' lë na' rinábaru'.

<sup>16</sup> Channö ilé'eru' böchi' luzá'aru' runé'e dul-la' le cabí naché'e yöl-la' guti, ral-la' inábaru' queé'e lahuë'e Dios, ate' Lë' unödzje' yöl-la' na'bán queé'e. Caní rnnía': Ral-la' inábali' quégaca nupa tun dul-la' le cabí naché'e yöl-la' guti. Dë dul-la' le naché'e yöl-la' guti. Biti' rnnía' inábali' que nu run dul-la' caní. <sup>17</sup> Yúgu'të le cabí naca tsahui' naca dul-la', pero dë dul-la' le cabí naché'e yöl-la' guti. <sup>18</sup> Nőziru' biti' rúntica'sö dul-la' nu naca zxí'iné'e Dios, tu' rapa chi'ë Zxí'ini cazë'e Dios nu na', ate' tu' xihui' biti' sequi' bi gun que.

<sup>19</sup> Nőziru' yú'uru' lu næ'e Dios, ate' yúgu'të bönachi tu'i ládxi'gaca le dë yödzölió ni yú'ugaca lu na' tu' xihui'.

<sup>20</sup> Na'a, nőziru' chibidé'e Zxí'iné'e Dios, en benné'e yöl-la' réajni'i queéru', para gúnbe'ëru' Nu na' naca idútë li. Zóalenru' Nu na' naca idútë li tu' zóalenru'-në'e Jesucristo, Zxí'iné'e Dios. Nu ni naca Dios idú, en Nu runna yöl-la' na'bán idú queéru'. <sup>21</sup> Zxí'ina'do', guli'gún chi'i cuinli' para cabí tseaj ládxi'li' yugu' budó' guiój budó' yaga. ¡Ca' gaca!

## DÍDZA'DO' BUROPI BUZÚAJË' JUAN

*Núnbë'ëru' le naca idútë li, en yöl-la' nadxi'i*

<sup>1</sup> Neda', bönni' gula run chi'a bönachi queë' Cristo, rugapa' li' Dios, nigula rö queë' Dios, tsözxón len yúgu'të zxi' inu'. Nadxi'ida' libi'ili' tu' núnbë'ëru' le naca idútë li, en calégasö neda', pero lësca' yúgu'të nupa chinúnbë'gaca le naca idútë li ta'dxi'i libi'ili'. <sup>2</sup> Nadxi'itu' libi'ili' tu' núnbë'ëru' le naca idútë li, le zóalentica'sö rë'u. <sup>3</sup> Rinábida'-në' Dios Xuz, en Xanru' Jesucristo, Zxi'ini cazë' Dios, uzá' ládxë'ë queéli', en huéchi' ládxë'ë libi'ili', en gunë' ga soa dxi icja láxi'do'oli' tu' núnbë'ëli' le naca idútë li, en nadxi'ili' luzá'ali'.

<sup>4</sup> Budzéjade'eda' cate' biyönda' tunbi' zxi' inu' ca naca le naca idútë li, tu' tunbi' ca na' gunná bë'enë' Dios Xuz rë'u. <sup>5</sup> Na'a, ráta'yua' lo', nigúlado', gunu' ca rinná bë' xibá queë' Cristo. Biti' ruzúaja' quiu' lu guichi tu xibá cubi. Ruzúaja' la' lébisö lë na' gunná bë'enë' rë'u dza ni'te. Gunné' ral-la' idxi'iru' luzá'aru'. <sup>6</sup> Caní naca bë' nadxi'iru'-në' Dios. Naca caní channö runru' ca rnna le gunná bë'enë' rë'u. Lë na' gunná bë'enë' rë'u naca para idxi'iru' luzá'aru' ca na' chibiyónili' dza ni'te.

*Nupa te'ëni ila'zí' ye'e rë'u*

<sup>7</sup> Lë ni riguíxjöi'ida' libi'ili', tu' chita'dá zián nupa ta'zí' ye' yödzölió ni, nupa na' biti' ta'zí' lu né'eguequi ca bidë' Jesucristo, gúquië' idú bönachi. Nu na' run caní, naca nu rizi' ye', en nu ridá'baga' Cristo. <sup>8</sup> Guli'gún chi'i cuinli' para cabí initi le nadéli'li' tu' guzxf' lu na'li' Cristo, pero guli'güi' láxi'li' idéli'li' idútë le ral-la' sí'ili' lu né'ë Dios.

<sup>9</sup> Núti'tës nu riguela' nøza yúbölö, en rucá'ana xtídzë'ë Cristo, biti' zóalenë' Dios nu na'. Nu dá'tica'sö xtídzë'ë Cristo, zóalenë' Dios Xuz, enca' Zxi'inë' nu na'. <sup>10</sup> Channö nútì'tës nu za' ga zóali', en rusedi xibá yúbölö, biti' ulébili' nu na' lídxili', en biti' guiéli' le: "Guyú'u len netu'." <sup>11</sup> Nu rë le: "Guyú'u len netu'", run tsözxón nu na' ca naca le ruá' dö' run nu na'.

*Runë' Juan löza idxinë' ga nacu'ë böchi' luzë'ë*

<sup>12</sup> Sal-la' le zián ral-la' uzúaja' queéli' lu guichi, biti' ré'ënda' uzúaja' yúgu'të lu guichi. Runa' löza guída' ga zóali', ate' güi'iru' didza' ruá'a cuinru', para gaca udzéjaru' idú láxi'ru'.

<sup>13</sup> Zxi'ininu nigula zxilu', nigula rö queë' Dios, tu'gápabi' Dios li'. ¡Ca' gaca!

## DÍDZA'DO' BUNNI BUZÚAJË' JUAN

### *Le naca tsahui' runë' bönni' lë' Gayo*

<sup>1</sup> Neda', bönni' gula run chi'a bönachi queë' Cristo, rugapa' Dios li', Gayo dxi'i ladxi'. Nadxi'ida' li' tu' núnbë'ëru' le naca idútë li.

<sup>2</sup> Bócha'ado', rinábida'-në' Dios gunë' ga gaca dxi'a quiu' lu yúgu'té le runu', en su' ca' dxi'a, ca na' raca dxi'a que bö' naca cazu'. <sup>3</sup> Rudzéjada' tu' ta'dxinë' yugu' bōchi'ru' ga zoa', en tunë' ba nalí quiu', ta'nné' nacu' li ladxi', en runu' ca naca le naca idútë li. <sup>4</sup> Biti' bi dë le runrö ga rudzéjada' ca lë ni, riyönda' tun nupa nácagaca ca bi'i que caza' ca rnna le naca idútë li.

<sup>5</sup> Bócha'ado', runu' le naca tsahui', rácalenu' bōchi'ru', en runu' ca' le nácarö lesaca', rácalenu' bōchi'ru' biti' núnbe'enu' légaquië'. <sup>6</sup> Yugu' bōchi'ru' ni tunë' ba nalí quiu' lógaca bönachi queë' Cristo ni, ta'guíxjö'ë ca na' nadxf'iniu' légaquië'. Runu' le naca dxi'a, rugú'u légaquië' nöza, en rácalenu' légaquië' ca na' sa'yéaj gunu' quégaca nupa tun xichinë' Dios, para ulu'ú'ë nöza. <sup>7</sup> Légaquië' bila'rúaje' ni tu' nadxf'igaquië' Jesús, en biti' bi ta'zi'ë lu ná'agaca bönachi biti' ta'dá' Cristo. <sup>8</sup> Que lë ni na' ral-la' gunru' bal bönachi tun caní, para gúnlenru' légaquië' dxin que le naca idútë li.

### *Le cabí naca tsahui' runë' Diótrefes*

<sup>9</sup> Chibuzúaja' lu guichi le uzéajni'i bönachi queë' Cristo ni', pero Diótrefes, bönni' ni' raza ládxë'ë gáquië' lo ládjagaquië', biti' runë' netu' bal. <sup>10</sup> Que lë ni na', channö huida' ga zóali', usá'a ládzi'li' cate' udúbili' ca nácagaca le runë'. Rizi' quídzë'ë netu', en rnnë' queétu' le cabí nácatë. Biti' rizxón ládxë'ë tsa lë nissö, pero lësca' biti' runë' bal bōchi'ru' ta'dxinë' ni', ate' ruzágue'ë xinózguequi nupa ni' té'ëni ilún légaquië' bal, en rubéajë' nupa na' ladaj bönachi queë' Cristo.

<sup>11</sup> Bócha'ado', biti' gunu' ca tun nupa tua' dö', pero ca tun nupa tun le naca tsahui' gunu'. Nu run le naca tsahui' nequi queë' Dios, pero nu ruá' dö' catu caz benbë' Dios.

### *Le naca tsahui' runë' Demetrio*

<sup>12</sup> Yúgu'té bōchi'ru' tunë' ba nalí queë' Demetrio, ate' naca bë' runë' le naca idútë li. Lësca' netu' runtu' ba nalí queë', ate' nőzili' nácatë lë ni runtu' ba nalí queë'.

### *Le rinabë' Juan lahuë' Dios*

<sup>13</sup> Ziánrö ca' le gú'unida' uzúaja' quiu' lu guichi, pero biti' ré'ënda' uzúaja' le lu guíchisö. <sup>14</sup> Na'a, runa' löza ilé'eteda' li', ate' güí'iru' didza' ruá'a cuinru'.

<sup>15</sup> Rinábida'-në' Dios gunë' ga soa dxi icja ládzi'do'o. Nupa ni ta'dxi'i rë'u tu'gapa Dios li'. Lësca' li', bugapa Dios tu tu nupa ni' ta'dxi'i rë'u. ¡Ca' gaca!

## DÍDZA'DO' BUZÚAJË' JUDAS

*Judas rugapë' Dios nupa nulidzë' Dios*

<sup>1</sup> Neda', Judas, tsaz naca' huen dxin queë' Jesucristo, en naca' ca' böchë'ë Jacobo. Rugapa' Dios libí'ili', nulidzë' Dios Xuz libí'ili', en nadxi'inë' libí'ili', en rapa chi'ë libí'ili' tu' nácali' tuz len Jesucristo. <sup>2</sup> Ré'ënda' inózili' ca ruhuéchi'da' ládxë'ë Dios libí'ili', en nadxi'ide'enë' libí'ili', enca' ruzoadë'ë dxi icja láxi'do'oli'.

*Nupa tu'sedi le cabí nácatë*

<sup>3</sup> Libí'ili', böchi' luzá'ado', gúcada' ládex'a' uzúaja' queëli' lu guichi ca naca yöl-la' rusólá nadéli'ru', pero run bayudxi uchízia' icja nágali' para idú láxi'li' tíl-lalenli' nupa ta'dá'baga' le réajlé'ëru'-në' Dios, lë na' budödë' Dios tsaz lu ná'agaca nupa néquiguequi quez queë' para ulu'zé didza' que lógaca yúgu'të bönachi. <sup>4</sup> Caní run bayudxi guna' tu' bagáchi'sö chigula'yázalenë' bal-lë' bónni' rë'u, Dios buzóe' quégaquië' dza ni'te ichúguië' quégaquië' ila'nítie' tsaz. Biti' ta'yéaj láxi'gaquië' Dios bónni' caní. Tu' zoa le ruzá' ládxë'ë Dios queëru', téquinë' huáca ilunë' le ruá' dö'. Ta'dá'baguë'ë Xanru' Jesucristo. Tuzé' Lë' rinná bé'enë' rë'u.

<sup>5</sup> Chinóz quézili' lë ni, pero ré'ënda' usá'a láxi'li' ca benë' Xanru' Dios. Sal-la' busölë' bönachi Israel cate' bubéajë' léguequi luyú Egipto, gudödi ni' busunítië' nupa bítsa'gaca ládjaguequi, en biti' gula'yéajlé' Lë'. <sup>6</sup> Lësca' caní, yugu' gubáz lá'ayi queë' Dios, nupa ni' biti' gulún xichíngaqüië', pero bulu'cá'anë' xilátjagaquië', Dios busayje' légaquië' tu lataj chul-la. Nágagaquië' tsaz ni' ga idxinrö dza usiúdxë' Dios yödzöli' ni. <sup>7</sup> Lësca' caní guca quégaca yödzö Sodoma, en yödzö Gomorra, enca' yugu' yödzö dzágagaca léguequi. Ca na' gulunë' gubáz lá'ayi na', gula'dá'baguë'ë Dios, lësca' caní gulunë' bónni' yugu' lu yödzö na'. Bulu'dödi cuíngaqüië' para gulunë' le ruá' dö', en le gula'zësö láxi'gaquië' le tun ga nu rutu'i. Na'a, tu' busaca' zi'ë Dios légaquië' lu guí' le cabirö ulu, lë na' guca quégaquië' naca tu le run gadxi yúgu'tëru', para cabí gunru' la' lëbisò.

<sup>8</sup> Sal-la' gulaca lë ni, la' canísö tunë' bónni' ni, bónni' röjácalenë' yëla ta'nénë'. Tun dítjanë' idútë le naca cazë'. Ta'dá'baguë'ë le rinná bé'enë' Dios rë'u, en ta'nné zi'ë quégaca nupa ta'nná bë' yehua' yubá. <sup>9</sup> Miguel caz, gubáz lá'ayi lo, cate' gudíl-lalenë' tu' xihui' para gaca u'ë idú le naca cazë' Moisés, biti' burúguinë' udxië' dö' tu' xihui' na', pero gudxë' le: "Xanru' uzenë' li' bach." <sup>10</sup> Yugu' bónni' ni ta'nné zi'ë quégaca le runë' Dios, yugu' le biti' ta'yéajni'inë', ate' yugu' le ta'yéajni'inë' rácasdö quégaquië' ca na' tunba'böa' guixi' biti' ta'yéajni'iba', lë ni tu'gunë' dxin, en caní tu'dxía dö' cuíngaqüië'.

<sup>11</sup> Bica' bayechi' légaquië' tu' chigulunë' dul-la' ca na' benë' Caín, ate' lu yöl-la' ruhuidi' quégaquië' chigula'chixi gula'níguinë' ca na' guchixi guníguinë' Balaam para si'ë dumí, ate' chinarugu quégaquië' ilátië' ca na' gútië' Coré cate' gudá'baguë' Moisés. <sup>12</sup> Yugu' bónni' ni tágulenë' tsözxón libí'ili' cate' ráguli' yugu' güí'i huagu lu yöl-la' nadxi'i queëli'. Tunë' ga ta'chixi ta'nigui nupa dzágagaca libí'ili', tu' té'aj tagu lizë'. Nácagaquië' ca yugu' bónni' ral-la' ulu'gágugaquië'-ba' bö'cu' zxila', pero la' cuíngacasë' tu'gahuë'. Nácagaquië' ca böaj lúzxiba biti' naché'gaca nisa, ate' ruá' bö' léguequi ná'alö ní'ilö. Nácagaquië' ca ca yugu' yaga chibidxín dza bi ila'bía, pero biti' bi ta'bía. Nácagaquië' ca ca yugu' yaga chigula'bidxi idú luí, en chinaládzu'gaca. <sup>13</sup> Nácagaquië' ca' ca nísado' cate' riyasa ridxía, ate' ribó' bidxina' que, lë na' rulu'i ca naca yöl-la' stu' tunë'. Nácagaquië' ca yugu' bólaj lúzxiba nucá'anagacaba' xinózgacaba'. Dios chinunë' quégaquië' ila'yázië' tsaz lataj chul-la.

<sup>14</sup> Ca naca quégaquië' bë'ë ca' didza' Enoc uláz queë' Dios. Enoc na' gúquië' tu bónni' gubábalenë' le igadxi cö' zxí'ini xi'sóë' Adán. Gunné': "Buli'yútsöca', zë'ë Xanru', ate'

dzágagaca Lë' zián gayuá' bönachi néquiguequi quez queë'. <sup>15</sup> Zë'ë para gunë' xíguia' yúgu'të bönachi, en ichúguië' quégaca yúgu'të nupa tua' dö' ila'niti tsaz." Caní gunë' tu' nözi yúgu'të didza' zi' gula'nné' bönni' dul-la' na' queë' Lë'. <sup>16</sup> Yugu' bönni' caní ta'nné' queë', en ta'zí' quídzë'ë, en tunë' ca naca le ta'zësö láxci'gaquie'. Tu'ë didza' lu yöl-la' run ba zxön cuíngaqüie', en para ulu'zi'ë xibéguequi, tu'ë didza' le ta'gú'u bönachi yöl-la' zxön.

*Judas ruse'ë* láxci'gaca nupa ta'yéajlé' Cristo

<sup>17</sup> Na'a, böchi' luzá'ado', guli'tsöjné yugu' didza' gulu'ë bönni' gubáz queë' Xanru' Jesucristo dza ni'te. <sup>18</sup> Yugu' bönni' na' gulé' libí'ili': "Yugu' dza tsöjsétégaca ulu'lui'i lógaquie' bönni' ulu'titjë' le naca lá'ayi, en ilunë' ca naca le ta'zësö láxci'gaquie' le ruá' dö'." <sup>19</sup> Yugu' bönni' ni tunë' ga irúajli' choplö. Tu'ë didza' lu yöl-la' bönáchisö quégaquie', en biti' zóalenë' Dios Bö' Lá'ayi légaquie'.

<sup>20</sup> Na'a, böchi' luzá'ado', guli'soa tsutsu lu yöl-la' réajlé' queéli' Dios le naca idú lá'ayi. Buli'lidzë' Dios, ugunli' dxin yöl-la' huáca queë' Dios Bö' Lá'ayi. <sup>21</sup> Buli'gá'analenë' Dios, Nu nadxi'i rë'u, en guli'cöza dza ni' ulu'i lahuë' Xanru' Jesucristo, Nu ruhuéchi' ládxë'ë rë'u para gata' yöl-la' na'bán idú queéru'.

<sup>22</sup> Guli'gún ga ila'dipa láxci'gaca nupa raca chopá láxci'gaca. <sup>23</sup> Guli'gún ga ulu'lé', le gaca tsca ubéajli' légaquie' lu guí'. Lu yöl-la' radxi queéli' buli'huéchi' láxci'li' ia'zíca'rö bönachi. Guli'gún chi'i cuinli', para cabí gunli' tsözxön légaquie', en cabí gútsa'li' le ruá' dö' tunë'.

*Le rigú'uru' Dios yöl-la' zxön*

<sup>24-25</sup> Dios la's dui, Nu nözi caz yúgu'të, en Nu busólá rë'u ni'a que le benë' Xanru' Jesucristo, napë' yöl-la' huáca gun chi'ë libí'ili', para cabí ichixi iníguili', en usudxinë' libí'ili' lahuë' Lë' ga zoë' lu bení' idú. Gunë' ga gácali' idú tsahui', en ga udzéjade'eli'. ¡Gaca caz queë' Dios yöl-la' ba, en yöl-la' zxön, en yöl-la' naca lo, en yöl-la' unná bë', na'a dza, en yúgu'të dza zá'gaca! ¡Ca' gaca!

## LE BULUÍ'INÉ' DIOS JUAN Apocalipsis

### *Le bulu'e lahui Dios ca naca queë' Jesucristo*

<sup>1</sup> Lë ni naca le bulu'e lahui Jesucristo, le bë'ë Lë' lataj Dios ulu'iné' yugu' huen dxin queë' ca naca le run bayudxi ilácatë. Jesucristo gusól-lë'ë tuë' gubáz lá'ayi queë', nu na' buzéajni'i neda', Juan, huen dxin queë' Cristo. Gubáz lá'ayi na' bulu'iné' neda' ca naca lë ni. <sup>2</sup> Neda', Juan, ruzúaja' lu guichi ni le naca idútë li ca naca yúgu'të le bilé'eda', en runa' ba nalí que xtídzë'ë Dios, en que le benë' ba nalí Jesucristo.

<sup>3</sup> Bica' ba nu ulaba didza' ni, ate' bica' bágaca nupa ulu'zé nágagaca nu na' ulaba xtídzë'ë Dios ni, en ilún ca rnna lë ni nazúaj lu guichi, tu' chizóa gaca.

### *Juan ruzúajé' le uzéajni'i gadxi cö' böñachi queë' Crito*

<sup>4</sup> Neda', Juan, ruzúaja' lu guichi didza' ni le uzéajni'i gadxi cö' böñachi queë' Cristo nacuá' luyú Asia. Dios, Bönni' zoa cazé', en guzóatica'sé', en ral-la' huödë', rinábida'-në' uzá' ládxë'ë queéli', en gunë' ga cö'ö dxi icja ládxí'do'oli', ate' dzágagaca gadxi bö' Lë' nacuá' lahuë' Lë' ga ni' rö'ë rinná bë'ë. <sup>5</sup> Dzáguië' ca' Jesucristo Lë'. Jesús ni runë' ca rnnë', en runë' ba nalí queë' Dios. Zí'alö Lë' bubanë' tsaz lu yöl-la' guti, en rinná bë'enë' bönni' ta'nná bë'ë yödzölió ni. Lë' nadxí'iné' rë'u, en gudibë' rë'u, tu' bugüë' dul-la' nabága'ru' len xichönë' le bulaljé' lë'e yaga cruz, cate' gútië' uláz queéru'. <sup>6</sup> Jesucristo benë' ga rinná bë'ëru', en ga nácaru' yugu' bixúz, para cú'uru'-në' Dios, Xuzë' Jesús, yöl-la' ba. ¡Yöl-la' ba Lë', en gácatica'sö queë' yöl-la' unná bë'! ¡Ca' gaca!

<sup>7</sup> ¡Buli'yútsöca! ¡Zé'ë Cristo lu böaj lúzxiba! ¡Illa'lé'e Lë' yúgu'të böñachi, enca' nupa ni' gulún Lë' huë', en bétigaca Lë'! ¡Illa'bödxi yechi' yúgu'të böñachi yödzölió ni cate' ila'lé'e Lë'! ¡La'tu' gácaté caní! ¡Ca' gaca!

<sup>8</sup> Caní rnnë' Lë': "Neda' naca' Bönni' zoë' zí'alö, enca' Bönni' röjsétië' ca naca le risí lo, en le ruúdxitë." Caní rnnë' Xanru', Bönni' napa cazé' yöl-la' huáca. ¡Zoa cazé' Lë', en guzóatica'sé', en si' ulé'ë!

### *Rilé'enë' Juan yöl-la' zxön queë' Jesucristo*

<sup>9</sup> Neda', Juan, naca' böchi' luzá'ali', en tsözxón rigu'i rizáca'lena' lib'ili', en tsözxón len lib'ili' ruzi'a xibé le rinná bë'ë Dios, en nadéli'da' yöl-la' riböza zxön ladxi' na' runnë' Jesucristo queéru'. Nadzuna' tu luyú bidxi ni gatsaj láhui'lö nísado', nazí'i le Patmos. Nadzuna' tu' bena' libán que xtídzë'ë Dios, en tu' bena' ba nalí queë' Jesucristo. <sup>10</sup> Lu dza lá'ayi queë' Xanru', guzóalenë' Dios Bö' Lá'ayi neda', ate' biyönda' cídzu'la' chi'ë tu bönni' rulidzë' zidzaj. Biyón chi'ë ca ribödxi lúzuba' böa' bëdxi. <sup>11</sup> Bönni' ni gudxë' neda': "Neda' naca' Bönni' zoë' zí'alö, en Bönni' röjsétië' ca naca le risí lo, en le ruúdxitë. Buzúaj lu guichi le riyönnu', en rilé'enu', ate' gusól-la' le quéguequi gadxi cö' böñachi quia' nacuá' luyú Asia, nupa nacuá':

Lu yödzö Éfeso,  
lu yödzö Esmirna,  
lu yödzö Pérgamo,  
lu yödzö Tiatira,  
lu yödzö Sardis,  
lu yödzö Filadelfia,  
lu yödzö Laodicea."

<sup>12</sup> Buécja' para ilé'eda' Bönni' na' rulidzë' neda'. Cate' buécja', bilé'eda' gadxi le nuá'gaca guí' le néquigueequini oro. <sup>13</sup> Ladaj gadxi le nuá'gaca guí' na' bilé'eda' tu Bönni'

riné'ë ca tu bönni'. Nácué' tu lari' tunna le ridxín xini'ë, en luchu'ë nasíe' tu le néquini oro. <sup>14</sup> Chiguichido'os naca guitsa' icjé' ca naca zxila' o ca riná' bögui', ate' rëpi yösa bení' guiój lahué' ca guí'. <sup>15</sup> Répi yösa bení' ni'ë ca guíe bronce dxílido', le nudzé'eda' lu guí' ca bo' yalaj. Zidzaj biyón chi'ë ca riyón tu yegu zxön. <sup>16</sup> Lu në'ë ibëla zxóagacaba' gadxi bölaj bení', ate' rirúaj didza' ru'ë le naca ca tu guíe tuchi' natuchi' iropa la'a. Répi yösa bení' lahué' ca gubidza cate' rudzá'a.

<sup>17</sup> Cate' bilé'eda' Lë' gudzö'a xini'ë ca tu bönni' nati. Ní'irö Lë' guxóa në'ë neda' len në'ë ibëla, en gudxe' neda': "Biti' gádxinu'. Neda' naca' Bönni' zoë' zí'alö, en röjsétië'. <sup>18</sup> Naca' Nu nabán caz. Gútia', ate' na'a zóatíca'sa' nabana'. Dë lu na'a inná bë'eda' yöl-la' guti, en lataj ga nacuá' nupa nátigaca. <sup>19</sup> Buzúaj lu guichi lë na' chibilé'enu', en le raca na'a, enca' le ral-la' gaca tödi na'a. <sup>20</sup> Lë ni naca le nagachi' ca naca quégacaba' gadxi bölaj bení' na' bilé'enu' zxóagacaba' lu na'a ibëla, en ca naca gadxi le nuá'gaca guí' le néquiguequini oro. Gadxi bölaj bení' na' sa'yéajgacaba' gadxi gubáz quégaca gadxi cö' bönachi quia', ate' gadxi le nuá'gaca guí' na' sa'yéajgacaba' gadxi cö' bönachi quia' na'."

## 2

*Didza' gusól-lë'ë yödzö Éfeso*

<sup>1</sup> Gunné' ca' Bönni' na': "Buzúaj lu guichi didza' ni isól-lu'u queë' gubáz quia' zóalené' bönachi quia' lu yödzö Éfeso. Caní uzúaju' lu guichi: Ru'ë didza' Bönni' na' zxóagacaba' gadxi bölaj bení' lu në'ë ibëla, en ridé' gatsaj láhui'lö gadxi le nuá'gaca guí' na' néquiguequini oro. <sup>2</sup> Caní rnnía': Neda' nöz quészida' yugu' le runli', en ca rúnda'ali' dxin. Nözda' ribózali' zxön ladxi', en biti' gaca guá' ilenli' nupa tua' dö'. Nözda' chiguzzí' bë'eli' nupa ta'nná nácagaca gubáz quia' pero biti' ca' nácagaca, ate' na'a nözili' ta'zí' yë'.

<sup>3</sup> Ribózali' zxön ladxi', en chigudi'i guzxáca'li' tu' dá'ali' neda', pero biti' gúcuidi' ládxi'li'.

<sup>4</sup> Na'a, dë tu le ruzegui libí'ili' didza': Bítirö nadxfí'ili' neda' ca na' bidxfí'ili' neda' zí'alö.

<sup>5</sup> Que lë ni na', guli'tsöjné ca na' benli' zí'alö, lë na' busanli', ate' na'a, buli'bí'i ládxi'li', en guli'gún ca na' benli' zí'alö. Channö cabí ubí'i ládxi'li', guídatia' queéli', ate' ugúa' le nuá' guí' queéli' xilataj. <sup>6</sup> Na'a, zoa tu le rácalen libí'ili'. Biti' rilé'eli' dxí'a le tuné' bönni' nicolaíta, nupa na' ta' yéaj ládxi'gaca budó' guiój budó' yaga, en tun le ruá' dö', lë na' lësca' biti' rilé'eda' dxí'a. <sup>7</sup> Nu riyóni ral-la' uzé nagui lë ni rnné' Dios Bö' Lá'ayi, ruí'ilené' yugu' cö' bönachi quia' neda', Cristo, didza', rnné': Nupa ila'deli' lu le raca yödzölió, guna' ga ilágugaca le ribía yaga da' gatsaj láhui'lö luyú lachi queë' Dios, le gun ga ila'cuá'tica'sö nabán."

*Didza' gusól-lë'ë yödzö Esmirna*

<sup>8</sup> Gunné' ca': "Lësca' caní, buzúaj lu guichi didza' ni isól-lu'u queë' gubáz quia' zóalené' bönachi quia' lu yödzö Esmirna. Caní uzúaju' lu guichi: Ru'ë didza' Bönni' na' zoë' zí'alö, en náquië' ca' Nu röjsete, Bönni' na' gútië', en bubané' tsaz. <sup>9</sup> Caní rnnía': Neda' nöz quészida' le runli', en ca rigu'i rizáca'li'. Nözda' nácali' yechi', pero le nácaté rilé'eli' yöl-la' tsahui' le naca idú. Nözda' ca' ca ta'nné queéli' nupa ni' ta'nná nácagaca bönachi judío, pero biti' ca' nácagaca caní. Nupa ni ta'dá' Satanás, tu' xihui'. <sup>10</sup> Biti' ca' gádxili' le ral-la' qui'i sáca'li'. Tu' xihui' na' gun ga idzunli' bál-lali' libí'ili' lidxi guíé. Caní si' bë' libí'ili', ate' qui'i sáca'li' idú ca chi dza. Guli'tséajlé' neda' ga idxinté dza gátili', ate' neda' gunna' yöl-la' na'bán idú queéli'. <sup>11</sup> Nu riyóni ral-la' uzé nagui lë ni rnné' Dios Bö' Lá'ayi, ruí'ilené' didza' yugu' cö' bönachi quia' neda', Cristo, rnné': Nupa ila'deli' lu le raca yödzölió, biti' bi gun yöl-la' guti quéguequi, lë na' gaca le buropi luzuí quégaca nupa ila'cuá'tica'sö lu guí' gabila."

*Didza' gusól-lë'ë yödzö Pérgamo*

<sup>12</sup> Gunné' ca': "Lësca' caní buzúaj lu guichi didza' ni isól-lu'u queë' gubáz quia' zóalené' bönachi quia' lu yödzö Pérgamo. Caní uzúaju' lu guichi: Ru'ë didza' Bönni' na' nu'ë guíé

tuchi' na' natuchi' iropa la'a. <sup>13</sup> Neda' nöz quézida' le runli'. Nözd'a' ca' zóali' ga ni' rinná bë' Satanás, tu' xihui', pero ni ruzxöni ládx'i'li' neda'. Biti' ca' nusanli' ca réajlë'ëli' neda'. Biti' busanli' le yugu' dza ni' cate' gulútie' Antipas, bönni' ni' bénatica'së' ba nalí quia', en gútie' ga ni' zoa Satanás, tu' xihui'. <sup>14</sup> Na'a, dë tu chopa le tu'zegui libí'ili' didza': Nacuá'len libí'ili' bal-la bönnachi lu yödzö Pérgamo, nazí' lu né'eguequi xibá queé' Balaam, bönni' ni' busédinë' Balac benë' ga gula'chixi gula'nigui bönnachi Israel, ate' gulahuë'-ba' yugu' böa' bëdxido' gulútigaquië'-ba' lögaca budó' guiój budó' yaga, en gulunë' le ruá' dö'. <sup>15</sup> Lësca' caní nacuá'len libí'ili' nupa ni' nazí' lu né'eguequi xibá quégaca bönnachi nicolaíta, lä' na' biti' rilé'eda' neda' dxi'a. <sup>16</sup> Que lä' ni na', buli'bí' i ládx'i'li' na'a. Channö cabí ubí' i ládx'i'li', guídatea' ga zóali', en tñl-lalena' légaquië' len didza' rirúaj ruá'a, le naca ca tu guié tuchi'. <sup>17</sup> Nu riyöni ral-la' uzé nagui lä' ni rnnë' Dios Bö' Lá'ayi, ru'ilenë' yugu' cö' bönnachi quia' neda', Cristo, didza', rnnë': Nupa ila'deli' lu le raca yödzölió, guna' ga ilágugaca yöta maná nagachi'. Unödzja' ca' tu guiój chiguichido' quégagaquië', ate' lu guiój na' nazúaj tu la cubi, cuntu nu nimbë' le, pero núpasö na' ila'zí'i le, ilúnbe'e la na'."

### *Didza' gusól-lë'ë yödzö Tiatira*

<sup>18</sup> Gunné' ca': "Lësca' caní, buzúaj lu guichi didza' ni isól-lu'u queé' gubáz quia' zóalenë' bönnachi quia' lu yödzö Tiatira. Caní uzúaju' lu guichi: Ru'ë didza' Zxí'inë' Dios, Bönni' na' dxía guiój lahuë' nácagaca ca guí', ate' ni'ë nácagaca ca guíë bronce dxílido'. <sup>19</sup> Caní rnnë': Neda' nöz quézida' le runli'. Nözd'a' ca nadx'i'li' neda', en ca réajlë'ëli' neda'. Nözd'a' ca' ca runli' xichina' lu yöl-la' riböza zxön ladxi' queéli'. Nözd'a' nácarö idú ca runli' yugu' lä' ni ca benli' zí'alö. <sup>20</sup> Nacuá' tu chopa le tu'zegui libí'ili' didza': Ru'ili'-nu lataj nigula na'lén Jezabel, rnnnanu ru'ínu didza' uláz queé' Dios, ate' ni'a que le rusédinu rizí' yé'enu bönni' tuné' xichina'. Rusédinu légaquië' le run ga tuné' le ruá' dö', en tahuë'-ba' böa' bëdxido' ta'gu'ë légaçaba' lögaca budó' guiój budó' yaga. <sup>21</sup> Neda' bë'a-nu lataj ubí' i ládx'i'nu, pero biti' rë'ënini ucá'anamu le ruá' dö' na' runnu. <sup>22</sup> Que lä' ni na' chú'una'-nu tu le gáti'nu ga na' qui'i sáca'nu lu xihuë'ënu tsözxöñ len nupa gulún tsözxöñ len lén le ruá' dö'. Caní guna' na'a channö cabí ulu'bí' i ládx'i'guequi para cabirö ilún dul-la' na'. <sup>23</sup> Guna' ga ilátibi' zxí'ininu. Caní gaca, iléquibe'e yúgu'të cö' bönnachi quia' ruyúa' le ta'bequi ícjaguequi, en le ta'zá' ládx'i'gaca bönnachi, ate' ubi'a queéli' tsca naca le runli'. <sup>24</sup> Ia'zíca'li' zóali' yödzö Tiatira, núloli' biti' nazí' lu ná'ali' lä' na' rusédinu, en biti' nazédali' lä' na' ta'nná bönnachi ni' naca le nayéajni'i idú, pero le nácatë naca xtidza' Satanás, tu' xihui', rea' libí'ili': Biti' usubága'a libí'ili' ia'tú le ral-la' gunli'. <sup>25</sup> Na'a, lä' na' chinazí' lu ná'ali', guli'gún chi'i ga idxintë dza huöda'. <sup>26</sup> Bönni' ni' ila'deli'në' lu le raca yödzölió, en ilunë' ca rë'ëndä' neda' ga údxitë, neda' guna' ga ila'nná bë'enë' bönnachi idütë yödzölió. <sup>27</sup> Ca na' budödë' Xuza' Dios yöl-la' unná bë' lu na'a, neda' ca' guna' ga ila'nná bë'enë' yugu' yödzö, ate' gata' lu ná'agaquië' tu xiyaga guíë, ate' ulu'zxuzxjë' bönnachi na' ca nu ruzxuzxaj zxiga' yó'öna néquini yu. <sup>28</sup> Gu'a ca' le naca ca bólaj hui sila quégagaquië'. <sup>29</sup> Nu riyöni ral-la' uzé nagui lä' ni rnnë' Dios Bö' Lá'ayi, ru'ilenë' yugu' cö' bönnachi quia' neda', Cristo, didza'."

### 3

### *Didza' gusól-lë'ë yödzö Sardis*

<sup>1</sup> Gunné' ca': "Lësca' caní buzúaj lu guichi didza' ni isól-lu'u queé' gubáz quia' zóalenë' bönnachi quia' lu yödzö Sardis. Caní uzúaju' lu guichi: Ru'ë didza' Bönni' na' nacuá'len Lë' gadxi bö' na', ate' zxóagacaba' gadxi bólaj bení' lu né'ë ibëla, rnnë': Neda' nöz quézida' le ruá' dö' runli', en nözd'a' chinati cázali' sal-la' téquiguequi bönnachi zóali' nabanli'. <sup>2</sup> Buli'subán ládx'i'li'. Guli'gún tsutsu le nacuá'len libí'ili', le chizóa ilátigaca, tu' réquibe'eda' le runli' biti' naca idú tsahui' lahuë' Dios. <sup>3</sup> Guli'tsöjnë na'a xibá na' biyónili' le guzxí' lu ná'ali'. Guli'gún ca rnna xtídzë'ë Dios, en buli'bí' i ládx'i'li'. Channö cabí usubán ládx'i'li', guída' ga zóali' tsálido'os ca na' ridxinë' tsálido'os gubán, en biti'

inózili' bizxi dza na' guída' ga zóali'. <sup>4</sup> Nacuá'len bal-la bönachi libí'ili' lu yödzö Sardis, nupa biti' nácagaca xihui'. Ila'dalen nupa ni neda', nácugaca lari' chiguichido'os le rulu'i nuhuoácagaca idú tsahui', en nácagaca lesaca' gaca caní quéguequi. <sup>5</sup> Nupa ila'deli' lu le raca yödzölió ugácua' léguequi lari' chiguichido'os, en biti' usúluá' láguequi chinazúajgaca lu guichi ga nazúajgaca lágaca nupa nadéli'gaca yöl-la' na'bán idú. Si' lu na'a nupa ni lahué' Xuza' Dios, enca' lógaquié' gubáz lá ayi queë'. <sup>6</sup> Nu riyöni ral-la' uzé nagui lë ni rnnë' Dios Bö' Lá'ayi, ruí'ilenë' yugu' cö' bönachi quia' neda', Cristo, didza'."

### *Didza' gusól-lë'ë yödzö Filadelfia*

<sup>7</sup> Gunné' ca': "Lësca' caní buzúaj lu guichi didza' ni isól-lu'u queë' gubáz quia' zóalené' bönachi quia' lu yödzö Filadelfia. Caní uzúaju' lu guichi: Ru'ë didza' Bönni' na' náquié' lá'ayi, en ru'ë didza' idútë li, en dë lu në'ë zxi'ini guíë queë' David, bönni' gunná bë'ë. Bönni' na' ru'ë didza' risálaje' ga nu riyaza, ate' cuntu nu gaca usayaj le, en rusayjé' ga nu riyaza, ate' cuntu nu gaca isalaj le. <sup>8</sup> Bönni' ni rnnë': Neda' nöz quézida' le runli'. Nözda' nápali' láti'do'os yöl-la' huáca, pero runli' ca rnna xtídfa'a, en biti' rutu'ili' rnnali' néquili' quia'. Que lë ni na' nuzoa' lolí' tu ga nu tsaz le nayalaj, ate' cuntu nu gaca usayaj le. <sup>9</sup> Buli'yútsöca', ta'dé' bönni' ni' Satanás, tu' xihui', en ta'zi' yë'ë, ta'nné' nácagaquié' bönachi judío ta'yéaj ládxí'gaca Dios, pero biti' nácagaquié' caní, guna' ga ila'dxiné' lolí', en ulu'zechu zxíbigaquié' xiní'ali'. Ní'irö iléquibe'enë' nadxí'ida' libí'ili'. <sup>10</sup> Tu' benli' ca rnna xtídfa'a, en gulózali' zxön ladxi', gun chi'a libí'ili' dza na' ila'gu'i ila'zaca' yúgu'të bönachi lu yödzölió ni, lë na' gaca para si' bë' léguequi. <sup>11</sup> ¡Si' guída'! Que lë ni na' guli'gún chi'i le nápali', para cabí gaca nu gun ga cabí sí'ili' lë na' ral-la' gunna' queéli'. <sup>12</sup> Núloli' ni' idéla'li' lu le raca yödzölió, neda' guna' ga gácali' tsutsu ca nácagaca ya'zxón, ate' sóali' yudo' ga na' zoë' Dios, en catu caz irúajli' ni'. Udá'a libí'ili' ca lë' Dios quia', enca' ca lë yödzö queë' Dios le naca Jerusalén cubi, le huötaj irúaj yehua' yubá lu në'ë Dios. Lësca' udá'a libí'ili' La' cubi. <sup>13</sup> Nu riyöni ral-la' uzé nagui lë ni rnnë' Dios Bö' Lá'ayi, ruí'ilenë' yugu' cö' bönachi quia' neda', Cristo, didza'."

### *Didza' gusól-lë'ë yödzö Laodicea*

<sup>14</sup> Gunné' ca': "Lësca' caní buzúaj lu guichi didza' ni isól-lu'u queë' gubáz quia' zóalené' bönachi quia' lu yödzö Laodicea. Caní uzúaju' lu guichi: Ru'ë didza' Bönni' na' zoë' tsaz, Bönni' runé' ca rnne', en ru'ë didza' idútë li ca runé' ba nalí, en náquié' ca' Bönni' na' gulén lu në'ë yúgu'të le bené' Dios. <sup>15</sup> Caní rnne': Neda' nöz quézida' le runli'. Ca runli' naca ca nisa biti' naca ziaga, tu' cabí rucá'anali' tsaz neda', en biti' naca ca nisa zögui', tu' cabí dá'ali' neda' idú ládxí'li'. Dxí'arö gaca la' gácali' ca nisa ziaga o ca nisa zögui'. <sup>16</sup> Na'a, tu' nácali' ca nisa nati yúlasö, en biti' nácali' ca nisa ziaga, en biti' nácali' ca nisa zögui', chú'una' libí'ili' ca run nu ruhuébi nisa nati yula na'. <sup>17</sup> Libí'ili' rnali' rilé'eli' yöl-la' tsahui' queéli', en raca dxí'a queéli', en biti' bi riyadzaj queéli', pero biti' réquibe'eli' le nácali'. ¡Bayechi' nácali'! ¡Nácali' xizí'! ¡Nácali' yechi', en lo chul-la, en ridali' xiguídisö! <sup>18</sup> Que lë ni na', neda' ruzéajni'ida' libí'ili' gá'uli' le naca ca oro lu na'a neda' le nuna' dxí'a lu guí', para gata' yöl-la' tsahui' idú queéli'. Ral-la' gá'uli' ca' lari' chiguichi quia' le gáculi' para igachi' yöl-la' xiguídidö queéli' le run ga nu rutu'i. Ral-la' gá'uli' ca' quia' le gun ga ulu'huoácäa guiój loli' para gaca ilé'eli' le naca quia'. <sup>19</sup> Neda' ruzeda' bach, en run zi'a yúgu'të nupa nadxí'ida' channö cabí tun le naca dxí'a. Que lë ni na', buli'bí' ládxí'li', en guli'gún xichina' idú ládxí'li'. <sup>20</sup> Buli'yútsöca', neda' caz zuína' ga nu riyaza, en rulidza'. Channö núti'tés nu yöni chi'a, en isalaj quia', tsázia', en gágulena' nu na', ate' nu na' gágulen neda'. <sup>21</sup> Núloli' idéli'li' lu le raca yödzölió, neda' guna' ga cö'öli' tsözxón len neda' ga na' rö'a rinná bë'a, ca na' bené' ca' Xuza' quia' neda'. Bidéli'da' neda' lu le guca quia', ate' guró'lena' Xuza' tsözxón ga na' rö'ë rinná bë'ë. <sup>22</sup> Nu riyöni, ral-la' uzé nagui lë ni rnnë' Dios Bö' Lá'ayi, ruí'ilenë' didza' yugu' cö' bönachi quia' neda', Cristo."

*Yöl-la' ba ta'gu'ë Dios yehua' yubá*

<sup>1</sup> Gudödi gulaca yugu' lë ni, buyúa', en bilé'eda' tu ga nu riyaza le nayalaj yehua' yubá. Biyónida' ca' chi'ë bönni' na' biyónida' zí'alö, ate' bulidza zidzaj ca ribödxi lúzuba' böa' bëdxi. Chi'i ni bulidza neda', gunná: "Gudá xitsá'alö ni, ate' neda' ulu'ida' li' le run bayudxi ilaca tödi ni."

<sup>2</sup> La' ní'isö guzóalenë' Dios Bö' Lá'ayi neda', ate' bilé'eda' yehua' yubá ni' tu lataj ga Nu rö'ö rinná bë', en bilé'eda' ca' Nu na' rö'ö lataj na'. <sup>3</sup> Rëpi yösa bení' Nu na' rö'ö lataj na', ca na' rëpi yösa bení' guiój jaspe, en guiój cornalina, yugu' guiój nazáca'da'. Idú gásibi'ilö lataj na' zoa biguita' le naca lachi ca naca guiój esmeralda, le répida' yösa bení'. <sup>4</sup> Idú gásibi'ilö lataj na' nacuá' ca' ia'tapa uruá' lataj gapa ta'bó' nupa ta'nná bë', ate' yugu' lataj na' rö'ögaquië' tapa uru'ë bönni' gula, nácugaquië' lari' chiguichido'os, en dxíagaca ícjagaquië' le néquigueequini oro. <sup>5</sup> Ta'rúaj yösa, en guziú' rinné lu lataj lo ga ni' rö'ö Nu na', ate' bö zxön ru'u. Lahui' lo lataj na' tu'zení' gadxi le ta'gú'u bení', le nácagaca gadxi bö' dzágagaca Dios. <sup>6</sup> Ca dódilö lahui lataj ni dë tu ca naca tu nísado' le rëpi yösa bení' ca guiój jara.

Nacuá' tapa nupa nabángaca cuiti lataj na', tsölá'a huéaj, ate' zián guiój lógaca dxíagaca zaca' cúczi'löguequi, en láhuilöguequi. <sup>7</sup> Tu nu nutsa' ladaj tapa ni nalá' ca nácaba' bëdxi guixi'. Nu na' buropi nalá' ca nácaba' bëdxi, ate' nu na' bunni nalá' lahui ca naca lo bönni', ate' nu budapi nalá' ca nácaba' bisiá' ruzuba'. <sup>8</sup> Idápaté nupa ni, nacuá' xopa xíligaca que queéguequi, ate' idá'alöguequi, en lé'elöguequi xíliguequi dxíada'gaca zián guiój löguequi. Rëla, en te že biti' ta'cuá' dxisö, ta'nná:

¡Lá'ayi! ¡Lá'ayi! ¡Lá'ayi náquië' Xanru' Dios!

¡Napa cazé' yöl-la' huáca!

¡Guzóa cazé' Lë', en zoa cazé', en chizóa ulé'!

<sup>9</sup> Nupa na' nabángaca ta'gú'u yöl-la' ba Nu na' rö'ö rinná bë', en zóatica'sö nabán. Tun bal Nu na', en të Nu na': "Xclenu'." Bátati'tës tun idapa na' caní, <sup>10</sup> tu'tsaga lógaca tapa uru'ë bönni' gula na' lu yu lahui' lo Nu na', en ta'yéaj ládxí'gaca Nu na' zóatica'sö, en tu'cu'ë le néquigueequini oro dxía ícjagaquië' lahui' lo lataj ga ni' rö'ö rinná bë' Nu na', ta'nné:

<sup>11</sup> ¡Xantu' Dios, nacu' lesaca'

cú'utu' Li' yöl-la' ba, en guntu' Li' bal,  
en gata' quiu' yöl-la' unná bë' tu' benu' yúgu'të le dë!  
¡Ca ré'ëni quézinu' nacuá', en gula'sí lo nacuá'!

*Tu guichi, en Bönni' náquië' Bö'cu' Zxíla'do'*

<sup>1</sup> Ní'irö bilé'eda' tu guichi lu na' ibëla Nu na' rö'ö lataj lo. Guichi na' naca tu guichi nudubi, en dá'gaca didza' lé'elö, en láhuilö. Naguela' guichi na' gadxi le nusáyajgaca le.

<sup>2</sup> Bilé'eda'-në' tuë' gubáz lá'ayi lo, ate' bë'ë zidzaj didza', gunnë': "¿Nuzxi naca lesaca' uladzu' le naguélala'gaca guichi ni, en usalaj le?"

<sup>3</sup> Cuntu nu guca usalaj guichi na', en biti' guca nu uyú le, caléga nu zoa yehua' yubá, en caléga nu zoa luyú, en caléga nu zoa zxánilö luyú. <sup>4</sup> Ní'irö gurödxa' tu' cabí bidzöli nu naca lesaca' usalaj guichi na', en biti' bidzöli nu naca lesaca' ulaba le, en cuntu nu naca lesaca' uyú le. <sup>5</sup> Ní'irö tuë' bönni' gula ni' gudxë' neda', gunnë': "Biti' ciòdxu'. Bönni' na' náquië' ca bëdxi guixi', en nabábalenë' zxí'ini xi'sóë' Judá, en náquië' ca' zxí'ini xi'sóë' David, chibidéli'në' lu yúgu'të le raca, en séqui'në' uládzü'ë le naguélala'gaca guichi ni, en usálajë' le."

<sup>6</sup> Ní'irö bilé'eda'-në' Bönni' náquië' Bö'cu' Zxíla'do', zuínë' lahui' lo lataj lo na' zoa gatsaj láhui'lö nupa na' nabángaca, en gatsaj láhui'lë' ca' yugu' bönni' gula na'. Dxíë' huë' ca naca que tu bö'cu' zxila' zoa nu bëti lëba' lahuë' Dios, nacuá' gadxi lúzuba', en gadxi guiój loba', le tu'lui'i ca nácagaca gadxi bö' na' dzágagaca Dios, nasól-lë'ë léguequi idútë yödzölió. <sup>7</sup> Gudödë' Bönni' náquië' Bö'cu' Zxíla'do', en gudélë'ë guichi na' lu na' ibëla Nu na' rö'ö lataj lo na'. <sup>8</sup> Cate' chigudélë'ë guichi na', bulu'zóa zxíbiguequi idapa nupa na' nabángaca, en idapa uru'ë bönni' gula na' lahuë' Bönni' na' náquië' Bö'cu' Zxíla'do'. Tu tuë' bönni' gula na' zóngaquië' le rul-la nazí'i le arpa, en nuá'agaquië' ca' yugu' zxíga'do' néquiguequini oro, yugu' le yúdzugaca yalaj, lë na' rulu'i yöl-la' rulidza Dios quégaca bönachi queë'. <sup>9</sup> Tul-lë' tu le rul-la yöl-la' ba, le naca cubi, le rnna caní:

Nacu' lesaca' quél'u guichi na',  
en uládzu'u le naguél'a'gaca le,  
tu' bë'u lataj yugu' bönni' gulútië' Li',  
ate' len xichönu' böá'uu' bönachi para ilequi queë' Dios,  
nupa nácagaca bönachi izá'a nacuá' idútë yödzölió,  
bönachi tuí'i yúgu'të didza' yúbölö,  
en nabábagaca yúgu'të yödzö,  
en yúgu'të luyú nacuá' idútë yödzölió.

<sup>10</sup> Benu' ga nácagaquië' bönni' ta'nná bë'ë  
en ga nácagaquië' bixúz queë' Dios queéru'.  
Benu' ga ta'nná bë'ë lu yu yödzölió.

<sup>11</sup> Ní'irö buyúa', en biyönda' chi'igaquië' gubáz lá'ayi zián. Zián gáyu'ë, en gáyu'ë nacu'ë. Nacu'ë idú gásibi'ilö lataj lo na' tsözxón len nupa na' nabángaca, enca' yugu' bönni' gula na'. <sup>12</sup> Tu'ë zidzaj didza' yúgu'të, ta'nné':  
¡Bönni' na' náquië' Bö'cu' Zxíla'do' gulútie',  
náquië' lesaca' gata' yöl-la' unná bë' lu në'ë,  
en yöl-la' tsahui', en yöl-la' réajni'i, en yöl-la' huáca!  
¡Náquië' lesaca' gunru'-në' bal, en tseaj ládzi'ru' Lë',  
en cù'uru'-në' yöl-la' ba!

<sup>13</sup> Ní'irö biyönda' tul-la yúgu'të le benë' Dios yehua' yubá, en lu yu yödzölió, en zxánilö luyú, en lu nísado'. Tul-la yúgu'të le nacuá' yugu' lataj na', ta'nná:  
¡Yöl-la' ba Nu na' rö'ö lataj lo,  
enca' Bönni' na' náquië' Bö'cu' Zxíla'do'!  
¡Gúntica'siru'-në' bal  
en cù'utica'siru'-në' yöl-la' ba,  
ate' inná bë'tica'së' Lë'!

<sup>14</sup> Idápatë nupa na' nabángaca ta'nná: "¡Ca' gaca!"  
Ní'irö idapa uru'ë bönni' gula na' bulu'tsaga lógaquië' lu yu, en gula'yéaj ládzi'gaquië'  
Nu na' zóatica'sö.

## 6

*Yugu' le naguél'a'gaca guichi*

<sup>1</sup> Ní'irö bilé'eda'-në' Bönni' náquië' Bö'cu' Zxíla'do', ate' buládzu'ë tu le naguela' guichi na', ate' biyönda' tu nu nutsa' ladaj idapa na' nabángaca, ate' biyón chi'i ca guziú' rinné, gunná: "¡Gudá uyú!"

<sup>2</sup> Buyúa', en bilé'eda'-ba' tuba' böa' chiguichi, ate' nu na' dxía lëba' zön tu uxiti' yaga. Gulu'ë lë' tu le néquini oro udxíë' icjë', ate' birúajë' ca tu nu nácatérö lo para idéli'në' lu gudil-la.

<sup>3</sup> Cate' buládzu'ë le buropi le naguela' guichi na', biyönda' nu buropi na' nabán, ate' gunná: "¡Gudá uyú!"

<sup>4</sup> Ní'irö birúajba' ia'tuba' böa', nácaba' xiná. Bulu'dödë' lu në'e nu na' dxía lëba' yöl-la' huáca unná bë' tsöjtúa yöl-la' riböza dxi'a tsáhui'do' quégaca bönachi, en gun ga iluti luzé'eguequi. Bulu'nödzjé' queë' tu guíë tuchi' zxön.

<sup>5</sup> Cate' buládzü'ë le bunni le naguela' guichi na', biyönda' nu bunni na' nabán, ate' gunná: "¡Gudá uyú!"

Buyúa', en bilé'eda'-ba' tuba' böa' gasaj, ate' nu na' dxía lëba' zön tu zxigóns. <sup>6</sup> Biyönda' ru'i didza' tu chi'i gatsaj láhui'lö tapa na' nabángaca, ate' gunná: "Chopa guíë zxoa' xtila len lazzaj que tu dza huen dxin tu' gaca gubín, en xopa guíë zxoa' cebada len lazzaj que tu dza huen dxin, pero biti' gunu' ga yadzaj le naca za, en biti' bi gunu' que xisi uva nal-la."

<sup>7</sup> Cate' buládzü'ë le budapi le naguela' guichi na', biyönda' ru'i didza' nu budapi na' nabán, ate' gunná: "¡Gudá uyú!"

<sup>8</sup> Buyúa', en bilé'eda'-ba' tuba' böa' gulaj, ate' nu na' dxía lëba' nazí'i le Yöl-la' Guti, ate' zéajlen nu na' nu nazí'i le Lataj Chul-la. Bulu'dödë' lu në'e nu na' inná be'e gatsaj tu gatsaj bönachi nacuá' yödzölió para guti léguequi len guíë tuchi', en len yöl-la' ridún, en len yugu' yödzöhüé', en len yugu' böa' guixi' sínia' dzö'öba' luyú.

<sup>9</sup> Cate' buládzü'ë le guyu' le naguela' guichi na', bilé'eda' zxan bucugu yehua' yubá ni' yugu' bö' gulaca cazé' bönni' ni' gulútië' légaquië' tu' gulunë' libán que xtídzë'ë Dios, en tu' gulunë' ba nalí queë'. <sup>10</sup> Gului'i zidzaj didza' yugu' bö' ni, gula'nná: "¡Xantu' Lá'ayi, runu' ca rnno! ¿Bátaxi caz uchi'a usöröu' queëtu', en uzí'i lëbu' yugu' bönni' nacu'ë yödzölió tu' gulútië' netu'?"

<sup>11</sup> Bulu'nödzjé' quéguequi yugu' lari' chiguichido'os ilácuë', en gulé' léguequi: "Ral-la' uzí' ládzi'li' ia'tú chí'ido'osö, ga idxinrö dza ila'dxín yúgu'të luzá'ali' huen dxin queë' Cristo ni, yugu' bönni' na' ral-la' iluti bönachi légaquië' ca' ca na' bétigaca libí'ili'."

<sup>12</sup> Cate' buládzü'ë le buzxopi le naguela' guichi na', buyúa', en bilé'eda' gudödida' budó' zxu' luyú. Böáca gasaj gubidza, en guca ca tu lari' guitsa' gasaj, ate' böáca beo' xiná ca naca rön. <sup>13</sup> Gula'guínnaj böläj lúzxiba lu yu, le guca ca raca que yaga higo, cate' ta'guínnaj le ribía cate' rutá le bö' budunu'. <sup>14</sup> Gudödi que lúzxiba, ate' guca que ca raca que tu guichi cate' nu rutubi le. Bulu'tsá' xilátjagaca yúgu'të guí'ado', enca' yúgu'të gapa zoa luyú bidxi lu nísado'. <sup>15</sup> Ní'irö yugu' bönni' ta'nná bë'ë luyú, en yugu' bönni' lo, en yugu' bönni' ta'lé'enë' yöl-la' tsahui', en yugu' bönni' ta'nná bë'enë' bönni' rójáquië' gudil-la, en yugu' bönni' dë lu ná'agaquië', en yúgu'të nupa nadö'ogaca, en yúgu'të nupa biti' nadö'ogaca bulu'cachi' lógaquië' gapa naca zxan bulóaj, en gapa naca lë'e guiój lu guí'ado'. <sup>16</sup> Gulé' yugu' guí'ado' na', en yugu' lë'e guiój na': "Guli'dubága' netu', en buli'cachi' netu', para cabí ilé'e Nu na' rö'ö lataj lo ni' netu', en para cabí ideli' yöl-la' rilé queë' Bönni' na' náquië' Bö'cu' Zxíla'do' netu'. <sup>17</sup> Chibidxín dza ulu'i lahui yöl-la' rilé quégaequië', ate' ¿nuzxi caz sequi' guá' ilén le?"

## 7

*Tu gayuá' yu' tapa-un milë' bönni'*

<sup>1</sup> Gudödi gulaca yugu' lë ni bilé'eda' tapa gubáz lá'ayi zuíguequinë' idapa la'a yödzölió. Tu'zágue'ë xinózgaca idapa bö' recja tsölä'a huéaj luyú, para cabí tsecja bö' luyú yödzölió, en para cabí tsecja lu nísado', en para cabí utá yaga. <sup>2</sup> Bilé'eda' ca' ia'tué' gubáz lá'ayi zë'ë rirúajë' ga rilén gubidza. Nu'ë tu le udé'ë nupa nácagaca queë' Dios ban le gaca bë' léguequi. Bë'ë zidzaj didza', en bulidzë' idapë' gubáz lá'ayi ni' nadödi lu ná'agaquië' yöl-la' huáca unná bë' ilún dítjanë' luyú, en nísado'. <sup>3</sup> Gudxe' légaquië': "Biti' gun dítjali' luyú, en nísado', en yugu' yaga cate' udá'arötü' tu le gaca bë' ra' xigágaquië' bönni' huen dxin queë' Dios queëru'."

<sup>4</sup> Biyönda' tsca nácagaquië' bönni' da' légaquië' lë na' naca bë'. Nácagaquië' idú tu gayuá' yu' tapa-un milë' ladaj yúgu'të cö' zxí'ini xi'sóë' Israel. <sup>5</sup> Yugu' bönni' na' da' légaquië' lë na' naca bë' nácagaquië':

Chinnu milë' di'a dza queë' Judá.  
 Chinnu milë' di'a dza queë' Rubén.  
 Chinnu milë' di'a dza queë' Gad.  
<sup>6</sup> Chinnu milë' di'a dza queë' Aser.  
 Chinnu milë' di'a dza queë' Neftalí.  
 Chinnu milë' di'a dza queë' Manasés.  
<sup>7</sup> Chinnu milë' di'a dza queë' Leví.  
 Chinnu milë' di'a dza queë' Isacar.  
<sup>8</sup> Chinnu milë' di'a dza queë' Zabulón.  
 Chinnu milë' di'a dza queë' José.  
 Chinnu milë' di'a dza queë' Benjamín.

### *Bönachi guizxi yu nácugaca lari' chiguichido'os*

<sup>9</sup> Gudödi guca lë ni buyúa', en bilé'egacada'bönachi zián, cuntu nu gaca ulaba léguequi. Nabábaguacié' yúgu'té yödzö tu'i didza' yúbölö idútë yödzölió. Zuíguequinë' ca dödilö lahui lataj lo, ga na' rö'ë ca' Bönni' na' náquië' Bö'cu' Zxíla'do', en nácugaquicié' lari' chiguichido'os, en zönguacié' zin. <sup>10</sup> Tu'ë zidzaj didza' yúgu'té', ta'nné':

¡Yöl-la' rusólá za' lu në'ë Dios queéru', rö'ë lataj lo ni,  
 en za' ca' lu në'ë Bönni' na' náquië' Bö'cu' Zxíla'do'!

<sup>11</sup> Zuíguequinë' yúgu'té gubáz lá'ayi idú gásibi'ilö lataj lo na', enca' idú gásibi'ilö ga nacu'ë bönni' gula, enca' idú gásibi'ilö ga nacuá' idapa na' nabángaca, ate' tu'tsaga lógaquicié' lu yu ca dödilö lahui lataj lo na', en ta'yéaj ládx'i'gaquicié' Dios, <sup>12</sup> ta'nné':

¡Ca' gaca! ¡Yöl-la' ba Li', Dios queétu'!  
 ¡Napu' yöl-la' zxön, en yöl-la' réajni'il!  
 ¡Rëtu' Li': "Xclenu'", en runtu' Li' bal!  
 ¡Napu' yöl-la' unná bë', en yöl-la' huáca!  
 ¡Gácatica'sö caní quiu', Dios queétu'!  
 ¡Ca' gaca!

<sup>13</sup> Ní'irö gunábinë' neda' tuë' bönni' gula na', gunné': "¿Nupxi na' nácugaca lari' chiguichido'os, en gapxi bönni' légaquicié'?"

<sup>14</sup> Neda' gudxa' lë': "Xan, lí' nöz quézinu'."

Lë' gudxe' neda': "Nupa ni gula'gu'i gula'záca'da'. Gula'guibë' lari' nácugaquicié', en bulu'ún léguequi chiguichido'os len xichönë' Bönni' na' náquië' Bö'cu' Zxíla'do'. <sup>15</sup> Que lë ni na' nacu'ë ca dödilö lahui lataj lo ga rö'ë rinná bë'ë Dios, en tunë' dxin lahuë' Lë' rëla, en té dza lu yudo' queë'. Nu na' rö'ë lataj lo ni gun chi'i légaquicié' tu' zóalentica'sö légaquicié'. <sup>16</sup> Bíti'rö ila'dunë', en bíti'rö ila'bidxë' nisa, en bíti'rö ila'yéguinë' gubidza, en bíti'rö iléquinë' xilá <sup>17</sup> tu' uyúë' Bönni' na' náquië' Bö'cu' Zxíla'do' légaquicié' ca nu uyú bö'cu' zxila'. Zoë' gatsaj láhui'lö lataj lo na'. Iché'ë légaquicié' gapa ralaj nisa le ru'i yöl-la' na'bán, ate' Dios uzxíë' lógaquicié' nisa ta'bödxë'."

### *Le igadxi le naguela' guichi*

<sup>1</sup> Cate'buládzu'ë le igadxi le naguela' guichi na', guró'ë dxí yehua' yubá idú gatsaj hora.  
<sup>2</sup> Ní'irö bilé'egacada'-në' gadxi gubáz lá'ayi na' zuíguequinë' lahuë' Dios, ate' bulu'dödë' lu ná'agaquicié' gadxi lúzuba' bö'a' bëdxi. <sup>3</sup> Ní'irö bidë' ia'túë' gubáz lá'ayi, nu'ë tu zxíga'do' néquini oro, en guzuínë' ra' bucugu yehua' yubá ni'. Gulú'udë'ë yalaj lu në'ë para ugutsë' le len yöl-la' rulidza Dios le gulún yúgu'té bönnachi queë' Cristo, en uzégu'ië' le lu bucugu na' néquini oro, le zoa lahui lo lataj lo na'. <sup>4</sup> Gurén dzön que yalaj na' zoa lu në'ë gubáz lá'ayi na', en guca tuz len yöl-la' rulidza Dios le gulún bönnachi queë' Cristo, ate' bidixín ga na' rö'ë Dios. <sup>5</sup> Ní'irö gubáz lá'ayi na' bulié' zxíga'do' na' len bo' yalaj dxía lu bucugu na',

ate' gurú'unë' le luyú. Gunné guziú', ate' bö zidzaj biyón. Guyépi yösa, en gudödi budó' zxu'.

### *Tu'cödxé' lúzuba' böa' bëdxi*

<sup>6</sup> Ní'irö igádxíté' gubáz lá'ayi na' zöngaquië' gadxi lúzuba' böa' bëdxi na' gula'cu'ë sina' ulu'cödxé' léguequi.

<sup>7</sup> Bucödxé' gubáz lá'ayi zí'alö lúzuba' böa' bëdxi, ate' guró'ö guiój bögui' yöla sunna, en guí' nutsf'i rön, ate' bulu'huöxaj luyú. Guyegui tu cö' tsa tu tsonna cö' le dë luyú ni, ate' guyegui ca' tu cö' tsa tu tsonna cö' yaga. Guyegui ca' yúgu'të guixi' ya'a.

<sup>8</sup> Bucödxé' gubáz lá'ayi buropi na' lúzuba' böa' bëdxi, ate' gubixi tu le naca ca tu guí'a zxön régui lu nísado', ate' ia'láti'do'os ca gatsaj tu gatsaj nísado' na' böáca rön. <sup>9</sup> Guti tu cö' tsa tu tsonna cö' le nabángaca dzö'ö lu nisa zxön na', ate' guca ditaj tu cö' tsa tu tsonna cö' le ta'dödi láhui'lö nisa na'.

<sup>10</sup> Bucödxé' gubáz lá'ayi bunni lúzuba' böa' bëdxi, ate' böxaj tu böläj lúzxiba, le régui ca tu guí' yöri gapa dë nisa yegu, enca' gapa ralaj nisa, ate' guca caní que ia'láti'do'os ca gatsaj tu gatsaj nisa na' rö'ö luyú. <sup>11</sup> Böläj ni lëba' Ajenjo, le naca tu le silá', ate' böáca silá' ia'láti'do'os ca gatsaj tu gatsaj nisa gapa na' dë nisa, en guca ca naca le silá' na', ate' gulati böñachi zián ni'a que nisa na' böáca silá'.

<sup>12</sup> Bucödxé' gubáz lá'ayi budapi lúzuba' böa' bëdxi, ate' böáca chul-la ia'láti'do'os ca gatsaj tu gatsaj gubidza, en lësca' caní guca que beo', ate' böáca chul-la tu cö' tsa tu tsonna cö' böläj. Caní guca, biti' buzení' gubidza ia'láti'do'os ca gatsaj tu gatsaj dza, en biti' bulu'zení' böläj, en beo' ia'láti'do'os ca gatsaj tu gatsaj rëla.

<sup>13</sup> Ní'irö buyúa', en biyönda' ru'ë zidzaj didza' tuë' gubáz lá'ayi ridödë' gatsaj láhui'lö lúzxiba, en rnnë': "¡Bica' bayechi' libí'ili! ¡Bica' bayechi' libí'ili! ¡Bica' bayechi' libí'ili' zóali' luyú ni cate' ulu'cödxé' ia'tsonné' gubáz lá'ayi na' lúzuba' böa' bëdxi!"

## 9

<sup>1</sup> Bucödxé' gubáz lá'ayi guyu' lúzuba' böa' bëdxi, ate' bilé'eda' nu naca ca tu böläj lúzxiba böxaj luyú, ate' bulu'nödzje' nu na' zxí'ini guíë que lataj chul-la. <sup>2</sup> Gusalje' lataj chul-la na', ate' gurén dzön que lataj chul-la, le guca ca dzön rirúaj ga tu'zégui'ë bulá'do', ate' gula'chul-la gubidza, en lúzxiba ni'a que dzön na'. <sup>3</sup> Lu dzön na' bila'rúajba' böchi'zu, yugu' le gula'zxóasiba' luyú, ate' Dios bë'ë légacaba' lataj iládu'ba' böñachi ca tunba' xöjnö' dzö'öba' luyú. <sup>4</sup> Gunná bë'enë' légacaba' biti' ilún dítjaba' guixi' rö'ö luyú, en biti' ilún dítjaba' yugu' le naca ya'a, en caléga yugu' yaga, pero gácasö iládu'ba' böñachi na' biti' da' lë na' naca bë' nu nequi queë' Dios ra' xigágaquië'. <sup>5</sup> Biti' bë'ë légacaba' lataj ilútiba' légaquië', pero ulu'saca' zí'isiba' légaquië' idú ca gayu' beo'. Riláda' ga tádu'ba' ca na' rilá ga rádu'ba' xöjnö'. <sup>6</sup> Yugu' dza na' ilé'ënë' yugu' bönni' iluti cuíngaquië', pero biti' ila'zéqui'në'. Ilé'ënë' ilátië', pero ucuíta cuini yöl-la' guti.

<sup>7</sup> Nalá'gacaba' böchi'zu na' ca nácagacaba' böa' nácugacaba' le néquiguequini guíë, para tsöjácaba' gudil-la. Dxíagaca ícjagacaba' le nácagaca ca tu le néquini oro. Naca lögacaba' ca naca lögaca böñachi. <sup>8</sup> Naca guitsa' ícjagacaba' ca naca guitsa' ícjanu nigula. Nácagaca láyi'gacaba' ca nácagaca láyi'ba' bëdxi guixi'. <sup>9</sup> Nácugaca luchú'ugacaba' le néquini guíë. Ta'gú'u bö xíligacaba' ca na' ta'gú'u bö carreta ná'ayöjgacaba' böa' ta'xíti'ba' lu gudil-la. <sup>10</sup> Nácagaca xibángacaba' ca naca xibángacaba' xöjnö', zoa lí'igacaba'. Lu xibángacaba' na' zoa le tu'dí'iniba', para ilunba' zi' böñachi idú ca gayu' beo'. <sup>11</sup> Zoa nu rinná be'e légacaba', nu na' naca gubáz xihui' que lataj chul-la. Gubáz ni nazí'i le lu didza' hebreo: Abadón, le rnna lu didza' griego: Apolión, en lu didza' xidza': Nu Rusuniti.

<sup>12</sup> Chigudödi tu le rusuniti böñachi, le za' zí'alö, pero zá'gaca ia'chopa le ulu'suniti böñachi.

<sup>13</sup> Bucödxé' gubáz lá'ayi buzxopi lúzuba' böa' bëdxi, ate' biyönda' tu chi'i rui'i didza' gatsaj láhui'lö tapa le nácagaca ca lúzuba' bëdxi dá'gaca tapa squin bucugu na' néquini oro, le rö' lahuë' Dios. <sup>14</sup> Chi'i ni rui'ilen didza' gubáz lá'ayi buzxopi na' si' bucödxé'

lúzuba' böa' bëdxi, en rnna: "Busedxi idápatë' gubáz xihui' na' nágagaca ra' yegu Eufrates."

<sup>15</sup> Ní'irö bulu'sedxë' tapa gubáz xihui' na', chinucözë' Dios lèguequi para la' ná'asö, le naca dza na', en beo' na', en izi na', para ilútigaca tu cö' tsa tu tsonna cö' bönachi nacuá' yödzölió. <sup>16</sup> Biyönda' tsca nácagaquië' bönni' rójáquië' gudil-la dxíagaquië'-ba' böa', en dzágagaquië' tapa gubáz xihui' na'. Nácagaquië' idú chopá gayuá' mil milé'.

<sup>17</sup> Bilé'egacada'-ba' böa' na' ca tu lu bixín, ate' nupa ta'bía légacaba' nacu luchú'uguequi le naca gui'do'os, en ya'a ca lúzxiba, en gulaj. Nácagaca ícjagacaba' böa' na' ca ícjaba' bëdxi guixi', ate' lu ruá'agacaba' ta'rúaj guí', en dzön, en tu le ruzéguí'da', nazf'i le azufre. <sup>18</sup> Yugu' lë na' ta'rúaj ruá'agacaba' bëtigaca tu cö' tsa tu tsonna cö' bönachi nacuá' luyú, lë na' nácagaca guí', en dzön, en lë na' ruzéguí'da'. <sup>19</sup> Yugu' le tu'df'iniba' böa' na' ta'rúaj ruá'agacaba', en dzö'ö lu xibángacaba', tu' nácagaca xibángacaba' ca yugu' bëla zoa ícjagacaba' le tu'df'iniba'.

<sup>20</sup> Ia'zíca'rö bönachi, nupa biti' gulati lu chopá ni tu'suniti, biti' bulu'bí'i ládxí'guequi para cabirö ilúngaca ca na'túngaca, en biti' bulu'sán ta'yéaj ládxí'guequi yugu' bö' xihui', en yugu' budó' guiój budó' yaga, yugu' budó' na' biti' ta'lé'e, en biti' ta'yöni, en biti' gaca sá'gaca. <sup>21</sup> Biti' bulu'bí'i ládxí'guequi para cabirö iluti bönachi, en caléga para cabirö ilúngaca yöl-la' gudzá' quéguequi, en le ruá' dö' túngaca, en yöl-la' ribán quéguequi.

## 10

### *Gubáz lá'ayi, nuá' lu në'ë tu guíchido'*

<sup>1</sup> Ní'irö bilé'eda'-në' ia'túe' gubáz lá'ayi nál-la, bötje' birúajë' yehua' yubá, nácuë' böaj lúzxiba, en zoa ca tu biguita' ícjälë'. Rëpi yösa bení' lahuë' ca run gubidza, ate' nácagaca ni'ë ca ya'zxón ta'yegui. <sup>2</sup> Zoa lu në'ë tu guíchido' nayalaj, ate' tu ni'ë ibëla nulibë' lu nísado', en ia'tú ni'ë yöggöla nulibë' luyú bidxi. <sup>3</sup> Ní'irö bë'ë zidzaj didza', ate' biyón chii'ë ca riyón cate' ribödxi'aba' bëdxi guixi', en cate' budxi bë'ë zidzaj didza' na', bila'yöni ch'igaca gadxi guziú'. <sup>4</sup> Cate' budxi bila'yöni ch'igaca guziú' na', neda' si' uzúaja' lu guichi, pero biyönda' nu rui'i didza' yehua' yubá, rë neda': "Bucáchi'sö didza' ni gulu'i gadxi guziú' na'. Biti' uzúaju' didza' na' lu guichi."

<sup>5</sup> Ní'irö gubáz lá'ayi na' bilé'eda'-në' zuínë' lu nísado', en luyú bidxi, guchisa në'ë ibëla zaca' lúzxibalö, <sup>6</sup> ate' ben tsutsu xtídzë'ë ni'a que Nu na' zoa caz, Nu na' ben yehua' yubá, en le nacuá' ni', enca' yödzölió, en le nacuá' ni', enca' nísado', en le nacuá' ni', ate' gunnë': "¡Bíti'rö tse! <sup>7</sup> Cate' ucödxë' gubáz lá'ayi igadxi lúzuba' böa' bëdxi, usudxinë' Dios le nagachi' queë', lë na' bulu'ñinë' yugu' huen dxin queë', bönni' ni' gulu'ë didza' uláz queë'."

<sup>8</sup> Ní'irö chi'i na' biyönda' rirúaj yehua' yubá bë'len neda' didza' leyúbölö. Gunná: "Guyéaj, yöjxi' guíchido' nayalaj na' zönë' gubáz lá'ayi na' nulibë' lu nísado', en luyú bidxi."

<sup>9</sup> Guyija' ga na' zoë' gubáz lá'ayi na', en gunábida'-në' gunnë' guíchido' na' quia'. Gubáz lá'ayi na' gudxë' neda', gunnë': "¡Guzxi', gudagu! Lu ru'u gaca zxixi ca naca bidxína'do' queëba' buz, pero lë'u huóáca silá'."

<sup>10</sup> Guzxi'a guíchido' na' zönë', en gudahua' le. Lu ruá'a guca zxixi ca naca bidxína'do' na', pero cate' budxi gudahua' le, böáca silá' lë'a. <sup>11</sup> Ní'irö gudxë' neda': "Ral-la' gu'u didza' leyúbölö uláz queë' Dios lógaca zián cö' bönachi izá'a, en gapa nacuá' yúgu'të yödzö, en gapa tu'i zián didza' yúbölö, en lógaca zián bönni' unná bë'."

## 11

### *Chopë' bönni' tunë' ba nalí*

<sup>1</sup> Ní'irö bidxín nu benna tu gui quia' le naca ca tu yaga ribixi, en gudxi neda': "Guyasa, en burixi yudo' queë' Dios. Burixi ca' bucugu lá'ayi que, en bulaba nupa nacuá' ni' ta'yéaj

ládxí'gaca Dios. <sup>2</sup> Bucá'ana ca' lö'a que yudo' na' dë ní'ilö, en biti' urixu' le, tu' nadödi lu na'agaca bönachi izá'a, ate' ulu'libi ulu'léaj yödzö lá'ayi na' idú ca chopa-un beo'."

<sup>3</sup> Gudxë' ca' neda': "Isól-la'a chopë' bönni' ilunë' ba nalí quia', ate' ilu'ë didza' uláz quia' idú ca chinnu gayuá' yu' tsónnalalaj dza, nácugaquië' lari' le naca bödzádzado'." <sup>4</sup> Chopë' bönni' ni tunë' ba nalí, nácagaquië' chopa yaga olivo na' nazúaj lu guichi lá'ayi ca naca quégaquië', en nácagaquië' ca' chopa le nuá'gaca guí' na' nacuá' lahuë' Dios, Xani yödzölió. <sup>5</sup> Channö gué'ëni nu guá' dö' quégaquië', irúaj guí' ruá'agaquië' le usuniti nu na' ré'ëni guá' dö' quégaquië', en guti nu na', enca' nupa ta'dá'baga' légaquië'. <sup>6</sup> Chopë' ni dë lu ná'agaquië' ulu'zágue'ë xinöza nisa guiój lúzxiba, para cabí galaj guiój tsca dza na' ralla' ilu'ë didza' uláz queë' Dios, ate' dë lu ná'agaquië' ca' ilunë' ga huöáca nisa rön, en ilunë' ga gatsaj yödzöhué' yödzölió. Ilunë' caní bálati'tés luzuí ilé'ënnë'. <sup>7</sup> Cate' údxi ilunë' ba nalí, irúajba' böa' sínia' lataj chul-la, en tél-lalenba' légaquië', en ucúl-laba' légaquië', en gútiba' légaquië'. <sup>8</sup> Le gulaca cazé' ila'túlusö ca' la' nöza lu yödzö zxön, ga ni' gudé'ë ca' Xanru' lë'e yaga cruz, en ca rucúdu'ru' didza', nazí'i le ca' Sodoma, enca' Egipto. <sup>9</sup> Idú ca tsonna dza yu' gatsaj bönachi yúgu'të yödzö, en yúgu'të bönachi izá'a, en bönachi tu'i zián didza' yúbölö, en bönachi yúgu'të luyú, ila'lé'eni le gulaca cazé', en biti' ilu' lataj nu ucache' légaquië' yero ba. <sup>10</sup> Ulu'dzéjade'e nupa nacuá' yödzölió tu' gulátië', ate' lu yöl-la' rudzeja quéguequi ila'sól-la' le ulu'nödzaj quégaca luzé'eguequi, tu' bulu'saca' zi'ë chopë' ni gulu'ë didza' uláz queë' Dios bönachi nacuá' yödzölió.

<sup>11</sup> Ní'irö cate' chibizá'a tsonna dza yu' gatsaj na', Dios busubanë' légaquië', ate' gula'yasë' gulazuínë', ate' guladxi gula'dzöbi yúgu'të nupa bila'lé'e légaquië'. <sup>12</sup> Ní'irö bë' zidzaj didza' tu chi'i yehua' yubá, en gudxi légaquië': "Guli'cuén ni."

Gula'benë' lu böaj lúzxiba zaca' yehua' yubálö, ate' nupa na' gula'dá'baga' légaquië' bila'lé'e légaquië'. <sup>13</sup> La' ní'isö gudödida' budö' zxu', ate' biguinnaj tu cö' tsa tu chi cö' yugu' yu'u dzö'ö lu yödzö na', ate' lu budö' zxu' na', gulati tsónnalalaj yu' chi gayuá' bönachi. Guladxi gula'dzöbi nupa ni' nagá'anagaca, ate' gula'gú'u yöl-la' ba Dios zoë' yehua' yubá.

<sup>14</sup> Chigudödi le buropi le rusuniti bönachi, ate' chizóa idxín le bunni le usuniti léguequi.

### Rucödxë' gubáz lá'ayi igadxi lúzuba' böa' bëdxi

<sup>15</sup> Bucödxë' gubáz lá'ayi igadxi lúzuba' böa' bëdxi, ate' gului'i zidzaj didza' yugu' chi'i yehua' yubá, ta'nná:

Gapa ta'nná bë' bönachi yödzölió  
nadödigaca lu në'ë Xanru' Dios,  
en lu në'ë Cristo.  
Lë' inná bë'tica'së'.

<sup>16</sup> Ní'irö idapa uru'ë bönni' gula na' rö'ögaquië' gapa na' ta'nná bë'ë lahuë' Dios, bulu'tsaga lógaquië' lu yu, en ta'yéaj ládxí'gaquië' Dios. <sup>17</sup> Ta'nnë':

¡Xantu' Dios, napa cazu' yöl-la' huáca!  
¡Guzáo cazu', en zoa cazu', en ral-la' guída cazu'!  
¡Xclenu', tu' chibugunu' dxin yöl-la' huáca zxön quiu',  
en risí lo' rinná bë'u!

<sup>18</sup> ¡Gula'lé bönachi yugu' yödzö  
pero chibidxín dza gunu' léguequi xíguia'!  
¡Naca dza uchi'a usöröu' nupa chinátigaca!  
¡Ubi'u quégaequië' huen dxin quiu',  
yugu' bönni' gulu'ë didza' uláz quiu',  
nupa néquiguequi quez quiu', en gulún bal Lo',  
nupa nácagaca cá'asö, en nupa nácagaca lo!  
¡Chibidxín dza usunítiu' nupa bulu'suniti yödzölió!

<sup>19</sup> Ní'irö guyalaj yudo' queé' Dios rö'ö yehua' yubá, ate' bilá' lahui guí'ina lá'ayi ga yu'u didza' rucá'ana tsahui' le nuné' Dios. Guyëpi yösa, en gulú'u bö zidzaj, en gunnë guziú' luyú. Gudödi budó' zxu', en gurö'ö guiój bögui' yöla sunna.

## 12

*Tunu nigula, en tuba' bëla zxön xitsini'*

<sup>1</sup> Ní'irö bilá' lahui yehua' yubá tu le naca bë'da', bulu'i lonu tu nigula nácunu le naca ca gubidza, en zoa zxan ní'anu beo'. Dxía ícjanu tu le néquini oro ga dxíagacaba' chinnu bólaj bení'. <sup>2</sup> Nigula ni chizóa soa bí'ido' queénu, en ribö'dxinu tu' rúdia' lé'enu. Rigu'i rizáca'nu ruzóanu bí'ido' queénu. <sup>3</sup> Ní'irö ia'tú le naca bë' bilá' lahui yehua' yubá. Bulu'i loba' tuba' bëla zxön xitsini'. Nácaba' xiná gui'is, ate' dxíagaca gadxi ícjaba', en chi lúzuba', ate' dxía tu le néquini oro tu tu ícjaba' na'. <sup>4</sup> Len xibamba' gú'uyöjba' tu cö' tsa tu tsonna cö' bólaj lúzxiba, en gurú'unaba' légacaba' luyú. Guzuíba' bëla zxön xitsini' na' lonu nigula na' chizóa sóabi' bí'ido' queénu. Zóaba' sina' gáguba'-bi' bí'ido' queénu na' ca gáljabí' na'. <sup>5</sup> Buzóanu-bi' tubi' bi'i bónni'do' ral-la' inná bë'ebi' yúgu'të yödzö len tu xiyaga guíë. La' bucuítaté'ë-bi' Dios bí'ido' queénu na', en buchisë'-bi' ga ni' zoa cazé' Lé', rö'ë lataj lo ga na' rinná bë'ë. <sup>6</sup> Buzxúnajnu nigula na', zéajnu lu lataj cá'asö, ga ni' chinupé'ë Dios lataj queénu. Ulu'gahuë'-nu ni' idú ca chinnu gayuá' yu' tsónnalalaj dza.

<sup>7</sup> Gudödi gulaca lé ni, gúcada' gudil-la yehua' yubá. Gubáz lá'ayi lo lé' Miguel, en yugu' gubáz lá'ayi dá'gaquië' lé' gula'díl-lalenë'-ba' bëla zxön xitsini' na'. Gula'dil-la bëla zxön na', en yugu' gubáz xihui' dá'gaca lëba' <sup>8</sup> pero biti' bila'deli' lu gudil-la na'. Que lé ni na' bítí'rö bidzöli xilátjagaca yehua' yubá. <sup>9</sup> Caní guca, gula'rú'unë'-ba' bëla zxön xitsini' na' ní'ilö. Nácaba' bëla na' zóaba' dza ni'te, lëba' tu' xihui'. Gula'rú'unë' tu' xihui' yödzölió, dzágagaca le gubáz xihui' na' dá'gaca le.

<sup>10</sup> Ní'irö biyönda' tu chi'i ruí'i zidzaj didza' yehua' yubá, rnna: "Na'a chibidxín dza nulu'ë lahui yöl-la' rusólá nuné' Dios, en yöl-la' huáca queé', en le rinná bë'ë, enca' le rinná bë'ë Cristo, tu' chigula'rú'unë' ní'ilö nu na' buzegui yugu' böchi' luzá'aru' didza'. Rëla, en té dza buzegui légaquië' didza' lahuë' Dios queéru'. <sup>11</sup> Yugu' böchi' luzá'aru' ni bulu'cul-lë' nu na', tu' bulu'gunë' dxin xichönë' Bönni' na' náquië' Bö'cu' Zxíla'do' queé' Dios, en tu' bulu'gunë' dxin didza' na' gulunë' ba nalí queé'. Biti' gului'i ládxí'gaquië' yöl-la' na'bán quégäquië', pero gulátië'. <sup>12</sup> Que lé ni na' gaca yöl-la' rudzeja yehua' yubá. ¡Buli'dzeja libí'ili', zóali' ni! ¡Bica' bayechi' libí'ili' zóali' yödzölió, en lu nísado', tu' chibötaj tu' xihui', en bidxín ga zóali! Riléde'e tu' xihui' na' tu' chiréquibe'e ia'tú chí'isö' dë lataj que."

<sup>13</sup> Cate' gúquibe'eba' bëla zxön xitsini' na' chigula'rú'unë'-ba' luyú, ní'irö yöjsóa régu'ba'-nu nigula na' buzóanu bi'i bónni'do' na' queénu. <sup>14</sup> Ní'irö Dios bë'ë-nu nigula na' chopa xlliba' bisiá' nácagaca zxön para gaca sunu, en icuítanu ga na' zóaba' bëla zxön xitsini' na', en idxinnu xilátjanu lu lataj cá'asö. Ni' ulu'gahuë'-nu idú tsonna iz yu' gatsaj. <sup>15</sup> Bëla zxön xitsini' na' gúbabá' nisa zile zaca' cúdzu'lönü, le guca ca tu nisa yegu, en gú'uniba' gua'të nigula na'. <sup>16</sup> Ní'irö luyú gúcalen nigula na'. Guyalaj luyú na', en gü'i nisa yegu na' gúbabá' bëla zxön xitsini' na'. <sup>17</sup> Ní'irö bëla zxön xitsini' na' guléde'eba'-nu nigula na', ate' guyéajba' yöjtl-lalenba' nupa nagá'anagaca queénu di'a dza queénu, nupa na' tun ca rnna le gunná bë'ë Dios, en nazí' lu né'eguequi le nuné' Jesucristo ba nalí.

## 13

*Chópaba' böa' sínia'*

<sup>1</sup> Guzuída' lu yuzxi ra' nísado', en bilé'eda' ribenba' rirúajba' lu nísado' tuba' böa' sínia' dxíagaca gadxi ícjaba', en chi lúzuba'. Dxíagaca lúzuba' chi le néquini oro, ate' láhuigaca ícjaba' da' tu la le naca xihui' le cabí rilé'e Dios dxi'a. <sup>2</sup> Böa' sínia' na' bilé'eda'-ba' riná'aba' ca nácaba' tu bédxito', nacuá' ní'aba' ca nácagaca ní'aba' oso, ate' ruá'aba' naca ca naca

ruá'aba' bëdxi guixi'. Bëla zxön xitsini' na' budödiba' lu na'aba' böa' sínia' ni yöl-la' huáca queéba', enca' xilátjaba' ga rinná bë'ëba', en yöl-la' unná bë' zxön queéba'. <sup>3</sup> Dxía huë' tu ícjaba' böa' sínia' na', le naca le guti lëba', pero buniti huë' na', ate' bulu'bani yúgu'të bönachi yödzölió, en yöjdá'gaca böa' sínia' na'. <sup>4</sup> Gula'yéaj ládzi'gaquië'-ba' bëla zxön xitsini' na', tu' budödiba' yöl-la' unná bë' queéba' lu ná'aba' böa' sínia' na'. Gula'yéaj ládzi'gaquië'-ba' böa' sínia' na', en gula'nné: "¿Nuzxi caz naca zxön ca naca zxön böa' sínia' na', en nuzxi caz sequi' tíl-lalen lëba'?"

<sup>5</sup> Guta' lu ná'aba' böa' sínia' na' bë'ëba' didza' ba zxön, en didza' xihui' le rinnëba' queé' Dios. Idú ca chopá-un beo' guta' lu ná'aba' yöl-la' unná bë'. <sup>6</sup> Gusí loba' rinnëba' queé' Dios, en rinné xihui'ba' que Lë' Dios, en que lataj lá'ayi queé', en quégaca nupa nacuá' yehua' yubá. <sup>7</sup> Guta' lu ná'aba' gudíl-lalenba' nupa néquiguequi quez queé' Dios, en bucúl-laba' légaquië'. Guta' ca' lu ná'aba' gunná bë'eba' yúgu'të bönachi izá'a, bönachi yúgu'të yödzö, en bönachi tuí'yúgu'të didza' yúbölö, en bönachi idútë yödzölió. <sup>8</sup> Yúgu'të bönachi nacuá' yödzölió gula'yéaj ládzi'gaca böa' sínia' na', nupa na' biti' nazúajgaca láguequi lu guichi que yöl-la' na'bán, guichi na' buzúajé' Bönni' na' náquié' Bö'cu' Zxíla'do' queé' Dios cate' si' guta' yödzölió. Buzóazazé' Dios gútié' Bönni' na' ni'a quégaca bönachi queé'.

<sup>9</sup> Channö nu riyöni, ral-la' uzé nagui. <sup>10</sup> Nupa nucu'ë Dios idzúngaca, ral-la' idzúngaca, ate' nupa nucu'ë Dios para nu guti léguequi len guié tuchi', len guié tuchi' ilátigaca. Que lë ni na', ral-la' ila'böza zxön ladxi' nupa néquiguequi queé' Dios, en ta'yéajlë' Lë'.

<sup>11</sup> Gudödi na' bilé'eda'-ba' ia'tuba' böa' sínia' gurenba' birúajba' lu yu. Dxíagaca chopá lúzuba' ca naca lúzuba' bö'cu' zxila', en ruí'iba' didza' ca ná' ruí'iba' didza' bëla zxön xitsini' na'. <sup>12</sup> Dë lu ná'aba' böa' sínia' ni yúgu'të yöl-la' unná bë' queéba' böa' sínia' bidxinba' zí'alö, cate' dzágaba' lëba'. Runba' böa' sínia' buropi ni ga ta'yéaj ládzi'gaca yúgu'të bönachi nacuá' yödzölió böa' sínia' zí'alö na', böa' na' buniti huë' le guti lëba'.

<sup>13</sup> Böa' buropi na' runba' ca' le nácagaca bë' ga ridxitë runba' ga ruhuóxaj guí' le za' lúzxiba, en ruhuóxaj luyú lógaca yúgu'të bönachi. <sup>14</sup> Rizí' yé'eba' bönachi nacuá' yödzölió len le nácagaca bë' dë lu ná'aba' runba' loba' böa' sínia' zí'alö na'. Rinná bë'eba' bönachi nacuá' yödzölió ilunë' tu budó' ca nácaba' böa' sínia' na' gúcaba' huë' que guié tuchi', ate' nabanba'.

<sup>15</sup> Dë lu ná'aba' runba' ga soa ibán budó' na' naca ca nácaba' böa' sínia' zí'alö na', en gü'i didza' budó' ni, en gun ga nu guti yúgu'të nupa biti' ila'yéaj ládzi'gaca le.

<sup>16</sup> Benba' ga gudá' yúgu'të bönachi tu le naca bë' dá'gaca lëba', nupa nácagaca ca'asö, en nupa nácagaca lo, nupa ta'lé'e yöl-la' tsahui', en nupa nácagaca yechi', nupa biti' nadó'ogaca, en nupa nadó'ogaca. Budá'aba' le lu ná'agaca ibëla o ra' xigágaca bönachi na'. <sup>17</sup> Cuntu nu gaca bi ga'u o bi guti' channö cabí da' nu na' lë na' naca bë', o channö cabí da' nu na' laba' böa' sínia' na', o le nabábaba' nuá'aba'. <sup>18</sup> Na'a riquínnu' yöl-la' réajni'i. Nu napa yöl-la' réajni'i ral-la' ulábatëz tsca le nabábaba' nuá'aba' böa' sínia' na', le naca ca le nababë' tu bönni', ate' le nabábaba' na' naca xopa gayuá' yu' tsónnalalaj yu' xopa.

## 14

### *Le tul-lë' tu gayuá' yu' tapa-un milë' bönni'*

<sup>1</sup> Gudödi ni' buyúa', en bilé'eda'-në' Bönni' na' náquié' Bö'cu' Zxíla'do' zuínë' lu guí'ado' nazí'i le Sión. Nacuá'lenë' Lë' tu gayuá' yu' tapa-un milë' bönni', da' ra' xigágacië' Lë' Bönni' na' náquié' Bö'cu' Zxíla'do', enca' Lë' Xuzë'. <sup>2</sup> Ní'irö biyönda' tu le rigú'u bö yehua' yubá, le rinné zidzaj ca rinné tu yegu zxön, en ca rinné guziú'. Biyönda' le riyón cate' ta'guínnië' lë'e tu le rul-la zë zián du que. <sup>3</sup> Tul-lë' tu le rul-la cubi, nacu'ë ca dödilö lahui lataj lo ni', enca' ca dödilö lahui ga na' nacuá' idapa nupa na' nabángaca len yugu' bönni' gula na'. Cúnturö nu gaca gul-la le rul-la ni, pero légarasë' tu gayuá' yu' tapa-un milë' bönni' ni, bönni' na' böa' uë' Cristo légaquië' ladaj bönachi yödzölió. <sup>4</sup> Nácagaquië' bönni' ni idú ladxi'. Biti' gula'cuá'lenë' nigula, tu' nácagaquië' idú bönni' ra'bán. Sójácalenë'

Bönni' na' náquië' Bö'cu' Zxíla'do' gáti'tés ga sa'yéajé'. Cristo caz böá'uë légaquië' lágagaca bönachi, ate' nátagaca nupa bulu'dödi cuíngaqüië' zí'alö queë' Dios, enca' queë' Bönni' na' náquië' Bö'cu' Zxíla'do'. <sup>5</sup> Catu caz gula'zí' yé'ë, ate' cuntu nu gaca bi inné quégäquië' ga na' nacu'ë ca dödilö lahui lataj lo ga rö'ë Dios.

### *Didza' röjuá'gaquië' tsonna gubáz lá'ayi*

<sup>6</sup> Ní'irö bilé'eda' ia'túë' gubáz lá'ayi, ridödë' lu bö'ös lúzxiba, en röju'ë didza' dxí'a zóatica'sö para gunë' libán que lögaca nupa nacuá' yödzölió, bönachi idútë luyú, yúgu'të bönachi izá'a, en bönachi tu'i yúgu'të didza' izá'a, en bönachi yúgu'të yödzö. <sup>7</sup> Ru'ë zidzaj didza', rnnë': "¡Guli'gádxí Dios, en guli'cu'ë yöl-la' ba tu' chizóa uchi'a usöröö' bönachi! ¡Guli'tséaj ládxé'ë Dios, nunë' lúzxiba, en luyú, en nísado', en gapa ralaj nisa!"

<sup>8</sup> Ia'túë' gubáz lá'ayi söjnáhuë' gubáz lá'ayi ni, en rnnë': "¡Chibudxi que yödzö Babilonia! ¡Chibudxi que yödzö zxön na! Caní guca que, tu' gulún nupa nacuá' ni' ga gula'zí' lu ná'agaquië' bönni' yúgu'të yödzö ilunë' ca nátagaca le ta'zé ládxí'gaquië' le ruá' dö'."

<sup>9</sup> Ia'túë' gubáz lá'ayi söjnáhuë' gubáz lá'ayi buropi ni, en ru'ë zidzaj didza', rnnë': "¡Channö nu tseaj ladxi'-ba' böa' sínia' na', enca' budó' queë'ba', en gü'i lataj ta' ra' xigué o lu në'e le naca bë' da' lëba', <sup>10</sup> gunë' Dios nu ni xíguia' lu yöl-la' rilé queë'! ¡Qui'i saca' nu na' lu guí', en lu lë na' ruzégui'da', lögaca gubáz lá'ayi, en lahuë' Bönni' na' náquië' Bö'cu' Zxíla'do'! <sup>11</sup> Cuéntica'sö dzön que guí' ga ni' qui'i saca' nu na'. Rëla, en te dza qui'i saca', ate' catu caz gata' lataj ulu'zí' ládxí'gaca nupa ila'yéaj ládxí'gaca-ba' böa' sínia' na', en budó' queë'ba'. Biti' ulu'zí' ládxí'gaca nupa ilui'i lataj ta' laba' láguequi. <sup>12</sup> Que lë ni na' nupa na' néquiguequi queë' Dios, en tun ca rnna le gunná bë'ë, en ta'yéajlë' Jesús, ral-la' ila'böza zxön ladxi'."

<sup>13</sup> Ní'irö biyönda' chi'i nu rui'i didza' yehua' yubá, en rë neda': "Buzúaj lu guichi lë ni: ¡Bica' bágaca nupa ilátigaca na'a si lo, nupa na' ta'yéajlë' Xanru'!"

Dios Bö' Lá'ayi rnnë': "¡Ca' gaca! ¡Ulu'zí' ládxí'gaquië' lu dxin gulunë', en ulu'zí'ë xibé ca sa'yéaj le gulunë'!"

### *Tu'zí'ë le rulá' luyú*

<sup>14</sup> Ní'irö buyúa', en bilé'eda' tu böaj lúzxiba chiguichido'os, ate' lu böaj na' rö'ë tu bönni' náquië' ca náquië' Bönni' Guljë' Bönachi, ate' dxía icjë' tu le néquini oro, ate' zöne' tu guíë tuchi' lu në'ë. <sup>15</sup> Birúajë' tuë' gubáz lá'ayi lu yudo' rö'ö yehua' yubá, ate' bë'ë zidzaj didza', en gudxë' Nu na' rö'ö lu böaj na', gunné': "¡Bugún dxin guíë tuchi' quiu', en guchugu zxoa' xtila, tu' chibidxín dza nu uzí' le! ¡Chinabídx do que le dë yödzölió!"

<sup>16</sup> Ní'irö Nu na' rö'ö lu böaj na' bugún dxin guíë tuchi' idútë yödzölió, ate' buzi'ë le rulá' luyú.

<sup>17</sup> Ní'irö birúajë' tu gubáz lá'ayi lu yudo' zoa yehua' yubá. Nu'ë ca' tu guíë tuchi'. <sup>18</sup> Birúajë' ia'túë' gubáz lá'ayi ra' bucugu ni', dë lu në'ë inná bë'enë' guí', ate' bë'ë zidzaj didza', en bulidzë' gubáz lá'ayi zí'alö na' nu'ë guíë tuchi', gunné': "¡Bugún dxin guíë tuchi' quiu', en butubi tu'xoa huéaj le ta'bía lubá uva rö'gaca yödzölió, tu' chiná le ta'bía lubá uva!"

<sup>19</sup> Ní'irö gubáz lá'ayi ni bugunë' dxin guíë tuchi' idútë yödzölió, en butubë' le ta'bía lubá uva rö'gaca luyú, ate' yöjchú'unë' le ta'bía lubá uva na' lu yero zxön ga izí xisi. Yugu' lë ni rulu'i ca gunë' Dios, gunë' xíguia' bönachi nacuá' yödzölió. <sup>20</sup> Bulu'libë' le ta'bía lubá uva na' lu lerui zoa ní'ilö ra' yödzö, ate' lu lerui na' birúaj rön, en gurén ga bidxintë ruá'agacaba' böa', en gudödi rön na' idú tsca gaca sá'aru' idú chinnu dza.

<sup>1</sup> Bilé'eda' ia'tú le nácdada' bë' yehua' yubá, le run ga nu rubani. Bila'rúajé' gadxi gubáz lá'ayi, nuá'agaquie' gadxi yödzöhué' röjsétegaca, le ugunë' dxin Dios, údxi gunë' xíguia' böñachi yödzölió.

<sup>2</sup> Bilé'eda' ca' tu le naca ca tu nísado' le rëpi yösa bení' ca guioj jara le nutsí'i guí'. Nupa na' bulu'xicja lu böa' sínia' na', en lu budó' queéba', en lu laba', zuígaca lu lë na' naca ca tu nísado', en nuá'agaquie' le tul-la, yugu' le bë'ë Dios quégacu' <sup>3</sup> Tul-lë' le rul-la na' bil-lë' Moisés, bönni' huen dxin queé' Dios. Naca tu le rul-la queé' Bönni' na' náquié' Bö'cu' Zxíla'do'. Ta'nné':

¡Li', Xantu' Dios, zxóntérö nacu' Li'!

¡Zxóntérö naca yúgu'të le benu',  
le tun ga rubánitu!

¡Li' rinná bë'enu' yugu' yödzö!

¡Idú dxí'ado', en idú tsahui' naca ca bi runu'!

<sup>4</sup> ¿Nuzxi caz cabí gadxi Li', Xantu'?

¿Nuzxi caz cabí cu'u Li' yöl-la' ba?

¡Tuzu' Li' nacu' lá'ayi!

¡Illa'dxín böñachi yúgu'të yödzö,  
en ila'yéaj ládxí'guequi Li'

tu' ta'lé'e naca tsahui' yúgu'të le runu'!

<sup>5</sup> Gudödi guca lë ni, buyúa', en bilé'eda' guyalaj yudo' yehua' yubá ga ni' dë lataj lá'ayi que le naca bë' zóalenë' Dios böñachi queé'. <sup>6</sup> Bila'rúajé' gadxi gubáz lá'ayi lu lataj lá'ayi na', nuá'agaquie' gadxi yödzöhué' na'. Nácugaquie' lari' nazáca'da' le rëpi yösa bení', en núga'gaca luchú'ugaquie' le néquiguequini oro. <sup>7</sup> Ní'irö tu nu nutsa' ladaj idapa nupa na' nabángaca, bë' que queégaquie' gadxi gubáz lá'ayi na' gadxi zxíga'do' néquiguequini oro, en yúdzugaca le rulu'i yöl-la' rilé queé' Dios, Bönni' zoa cazé'. <sup>8</sup> Lu lataj lá'ayi na' bidzá'a dzön, tu' zoa ni' yöl-la' bení', en yöl-la' huáca zxön queé' Dios. Cuntu nu sequí' tsaza lu lataj lá'ayi na' cate' gátsjarö gadxi yödzöhué' na' nuá'agaquie' gadxi gubáz lá'ayi na'.

## 16

### Yugu' zxíga'do' yúdzugaca le rulu'i yöl-la' rilé queé' Dios

<sup>1</sup> Ní'irö biyönda' chi'i nu rui'i zidzaj didza' lataj lá'ayi na', en rë gadxi gubáz lá'ayi na', rnna: "¡Guli'tséaj! ¡Guli'tsöjlálaj gadxi zxíga'do' na' lu yödzölió, le yúdzugaca lë na' rulu'i yöl-la' rilé queé' Dios!"

<sup>2</sup> Guyijé' gubáz lá'ayi zí'alö, en yöjlaljé' le yudzu zxíga'do' na' zönë' lu yödzölió. Lë na' yudzu zxíga'do' na' ben ga gutsaj yudzu' ya'a le riláda' idútë le naca caz nupa na' da' léguequi le naca bë' d'gaca böa' sínia' na', enca' nupa na' ta'yéaj ládxí'gaca budó' queéba'.

<sup>3</sup> Ní'irö guyijé' gubáz lá'ayi buropi, en yöjlaljé' le yudzu zxíga'do' na' zönë' lu nísado', ate' nisa na' böáca rön ca naca rön queé' tu bönni' nati, ate' gulati yúgu'të nupa nabángaca nacuá' lu nísado' na'.

<sup>4</sup> Guyijé' gubáz lá'ayi bunni, en yöjlaljé' le yudzu zxíga'do' na' zönë' gapa dë yegu, en gapa ralaj nisa, ate' gapa dë nisa na' bulu'huóáca rön. <sup>5</sup> Ní'irö biyönda' ru'ë didza' gubáz lá'ayi na' dë lu né'ë rinná bë'ené' nisa na', rnne': "¡Xantu' Dios Lá'ayi! ¡Zoa cazu', en guzóa cazu'! ¡Tsahui' nacu' tu' richugu' caní quégaca böñachi <sup>6</sup> tu' bulu'laljé' rön quégaca nupa néquiguequi quez quiu', en quégaca nupa gului'i didza' uláz quiu'! ¡Na'a, Li' runu' ga ilé'ajé' rön, tu' caní ral-la' gaca quégacu'ie'!"

<sup>7</sup> Ní'irö biyönda' rui'i didza' tu nu zoa ra' bucugu yehua' yubá ni', rnna: "¡Ca' gaca, Xantu' Dios, napa cazu' yöl-la' unná bë'! ¡Idútë li, en tsahui' naca ca richugu' quégaca böñachi!"

<sup>8</sup> Guyijé' gubáz lá'ayi budapi na', en yöjlaljé' le yudzu zxíga'do' na' zönë' lu gubidza, ate' gubidza na', bë'ë Dios le lataj uzégui'da' bönachi len gui' que. <sup>9</sup> Gula'yégui'da' yúgu'të bönachi tu ruzégui'da' gubidza, pero biti' bulu'bí'i ládxí'gaca, en biti' gula'gú'u Dios yöl-la' ba. Gula'nné zi'i queë' Dios, Bönni' dë lu në'ë inná bë'enë' yugu' lë ni tu'saca' zi' bönachi.

<sup>10</sup> Guyijé' gubáz lá'ayi guyu' na', en yöjlaljé' le yudzu zxíga'do' zönë' lu xilataj bö'a sínia' ga na' rinná bë'ëba', ate' guró'ö chul-la gapa rinná bë'ëba'. Ní'irö, tu' gula'gui'i gula'zaca' bönachi, guláguya'a lúdxí'guequi, <sup>11</sup> pero biti' bulu'bí'i ládxí'gaca para cabirö ilúngaca le ruá' dö' tunë'. Gula'nné zi'i queë' Dios zoë' yehua' yubá tu' ta'gui'i ta'zaca', en tu' dxíagaca yudzu' ya'a na'.

<sup>12</sup> Guyijé' gubáz lá'ayi buzxopi na', en yöjlaljé' le yudzu zxíga'do' na' zönë' lu yegu zxön nazí'i le Eufrates, ate' gubidxi nisa yegu na' para ibá'a nøza ga ila'dödi nupa ta'nná bë', nupa ila'rúaj zaca' ga rilén gubidza.

<sup>13</sup> Ní'irö bilé'eda' bëla zxön xitsiní' na', en bö'a sínia' na', en bönni' ru'ë didza' uláz quégacaba'. Bila'rúaj tsonna bö' xihui' tun ditaj bönachi lu ruá'agaca nupa na'. Nalá'gaca ca nalá'gacaba' buludzu. <sup>14</sup> Nácagaca yonna bö' ni bö' que tu' xihui', bö' na' tun le nácagaca bë' le ilún ga ulu'bani bönachi. Yójaca bö' xihui' na' idú yödzölió, en yöjtúbigaca nupa ta'nná bë', para tsójáquië' lu gudil-la na' gaca lu dza zxön queë' Dios, Bönni' napa cazé' yöl-la' unná bë'. <sup>15</sup> Caní rnne' Dios: "¡Bulí' yútsöca! Guída' tsálido' os ca ridxinë' tu bönni' gubán. Bica' ba nu zoa ban ladxi', en run chi'i le nacu nu na', en rúntica'sö dxi'a, para cabí gun bayudxi ta xiguídisö, en para cabí utu'i nu na' lahui' lögaca bönachi." <sup>16</sup> Yugu' bö' xihui' na' bulu'tubi yugu' bönni' ta'nná bë'ë, ate' bulu'dubë' tu lataj nazí'i le lu didza' hebreo: Armagedón.

<sup>17</sup> Guyijé' gubáz lá'ayi igadxi na', en yöjlaljé' le yudzu zxíga'do' na' zönë' lu bö'ös, ate' bë' zidzaj didza' tu nu zoa lu lataj lá'ayi zoa yehua' yubá ga dë'lataj lo na', rnna: "Chinaca."

<sup>18</sup> Ní'irö guyëpi yösa, en guró'öda' bö, en gunnë' guziú'. Gudóídida' budó' zxu', le gudóídida'rö ca gudödi tsanni ni nacuá' bönachi yödzölió. <sup>19</sup> Birúaj tsonna cő'ölö yödzö zxön na', ate' gula'guínnaj yödzö nacuá' yödzölió. Yójnenë' Dios le naca xihui' gulún bönachi yödzö zxön na' nazí'i le Babilonia, ate' lu yöl-la' rilé queë' benë' xíguia' nupa nacuá' ni'. <sup>20</sup> Bila'gachi' yugu' luyú bidxi dzö'ö lu nísado', ate' bíti'rö gula'lá' yugu' gu'ado'. <sup>21</sup> Böxaj ca' guiój bögui' yöla sunna, le za' lúzziba, en yöjsóa ícjagaca bönachi, ate' nál-li' tu tu guiój bögui' na' ca tu gayuá' guíë, ate' yúgu'të bönachi gula'nné xihui' queë' Dios tu' nøzi guiój bögui' na' tu' bulu'sáca'da' zi'i léguequi.

## 17

### Dios richúguië' queënu nigula udá dzaga

<sup>1</sup> Ní'irö bidxinë' tuë' gubáz lá'ayi ga zoa', nababë' gadxi gubáz lá'ayi na' gula'zönë' gadxi zxíga'do' na' néquiguequini oro. Bé'lenë' neda' didza', gunnë': "Gudá ni, ate' ulu'ida' li' ca gunë' Dios, gunë'-nu xíguia' nigula udá dzaga na', rö'önü lu nísado' zián. <sup>2</sup> Gula'cua'len lënu nupa ta'nná bë' luyú yödzölió, en gulún le ruá' dö', ate' gula'zudxi nupa nacuá' yödzölió ni, tu' gulunlen lënu le biti' naca dxi'a."

<sup>3</sup> Dios Bö' Lá'ayi guzóalenë' neda', ate' gubáz lá'ayi na' guché'ë neda' tu lu lataj cá'asö, ate' bilé'eda' -nu tu nigula ni' dxíanu cídzu'ba' tuba' bö'a sínia', nácaba' xiná gu'ido'os. Dxíagaca gadxi ícjaba', en chi lúzuba', en dá'gaca ca' lëba' le ta'nné xihui' queë' Dios.

<sup>4</sup> Nigula na' dxíanu lëba' nácunu lari' xiná chul-la, en lari' xiná gu'ido'os. Nazí'i biquitaj queënu le néquiguequini oro, en yugu' guiój nazaca', en yugu' bugá. Lu ná'anu rö'önü tu zxíga'do' néquini oro, en yudzu le nácagaca xihui', en le ruá' dö' runnu. <sup>5</sup> Ra' xigánu dá'gaca ca lënu, le tu'luf'i tu le nagachi', en ta'nná caní: "Yödzö Babilonia Le Naca Lo", en "Xiná'agacanu Nigula Udá Dzaga", en "Xiná'agaca Le Xihui' Dzö'ö Yödzölió."

<sup>6</sup> Gúquibe'eda' nazúdxinu nigula na' tu' bennu ga gulaj rön quégaca nupa néquiguequi

queë' Dios, en quégaca nupa na' zoa nu bëti léguequi tu' gulún ba nalí queë' Jesús. Cate' bilé'eda'-nu, bubánide'eda'. <sup>7</sup> Gudxé' gubáz lá'ayi na' neda', gunné': "¿Bizx que rubáninu'? Uzéajni'ida' li' lë na' nagachi', le rulu'i ca naca nigula ni, enca' le rulu'i ca naca böa' sínia' na' dxianu-ba', böa' na' dxíagaca gadxi ícjaba', en chi lúzuba'. <sup>8</sup> Böa' sínia' na' bilé'enu' guzóaba' zí'alö, pero biti' zóaba' na'a. Böa' ni chizóa irúajba' lataj chul-la, ate' tséajba' ga nítiba' tsaz. Ulu'bánide'e nupa nacuá' luyú cabí nazúajgaca láguequi lu guichi que yöl-la' na'bán, le buzúaje' Dios dza ni'te quez cate' si' gata' yödzölió. Cate' ila'lé'eni böa' sínia' na' guzóaba' zí'atëlö, pero biti' zóaba' na'a, ulu'bani tu' nubanba'.

<sup>9</sup> 'Lë ni naca tu le uzéajni'i nu gaca tséajni'i: Gadxi ícjaba' na' tu'lui'i gadxi gu'ado' gapa ró'önü nigula na'. <sup>10</sup> Lësca' caní gadxi ícjaba' na' tu'lui'i gadxé' bönni' ta'nná bë'ë. Gáyu'ë bönni' ni chigudödi quégaquië'. Tuë' bönni' ni rinná bë'ë na'a, ate' ia'túe' biti' ridxíninë', pero cate' guídë', inná bë'ë tu chí'ido'osö. <sup>11</sup> Böa' sínia' na' guzóaba', pero biti' zóaba' na'a, rulu'i tu bönni' izxunu', inná bë'ë. Nunë' tsözxón bönni' gadxi na', ate' tödi ni nítië' tsaz.

<sup>12</sup> 'Chi lúzuba' na' bilé'enu' tu'lui'i chí' bë'ë. Biti' ta'zí'ininë' yöl-la' unná bë', pero ila'zi'ë yöl-la' unná bë' tu chí'ido'osö, en ila'nná bë'ë tsözxón len böa' sínia' na'.

<sup>13</sup> Chi' bënni' ni, lëbisö nácagaquië', ate' ulu'dödë' yöl-la' unná bë' quégaquië', en le nazí' lu ná'agaquië' lu ná'aba' böa' sínia' na'. <sup>14</sup> Ila'díl-lalenë' Bënni' na' náquië' Bö'cu' Zxíla'do', pero Lë' ucul-lë' légaquië', tu' náquië' Xángaca yúgu'të nupa nácagaca xan, en náquië' Bënni' rinná bë'enë' yúgu'të nupa ta'nná bë'. Nupa nacuá'len Lë', bulidzé' Dios léguequi, en guröë' léguequi, ate' tsaz dá'gaca Lë'."

<sup>15</sup> Gubáz lá'ayi na' gudxé' ca' neda', gunné': "Yugu' nísado' na' bilé'enu' gapa ni' ró'önü nigula udá dzaga na', tu'lui'i bönachi yugu' yödzö, en yugu' bönachi izá'a, en bönachi tu'i yugu' didza' yúbölö, en bönachi yugu' luyú. <sup>16</sup> Chi lúzuba' böa' sínia' na' bilé'enu', en tu'lui'i chí' bënni', biti' ila'lé'enë'-nu nigula udá dzaga na' dxí'a, ate' ulu'cá'anë'-nu cá'asö, en xiguídisö. Ilahuë' xipéla'nu, en ulu'zégui'ë'-nu len guí'. <sup>17</sup> Dios uchízië' icja ládxí'do'gaquië' chí' bënni' na' le gun ga ilunë' ca ré'ëni quézinë' Lë', ate' ilácagaquië' tuz, en ulu'dödë' yöl-la' unná bë' quégaquië' lu ná'aba' böa' sínia' na' para gaca ca rnna xtídzë'ë. <sup>18</sup> Nigula na' bilé'enu'-nu rulu'i yödzö zxön na' rinná be'e nupa ta'nná bë' yödzölió ni."

## 18

### Riguinnaj yödzö Babilonia

<sup>1</sup> Gudödi na' bilé'eda'-nië' ia'túe' gubáz lá'ayi ruhuötje' rirúajje' yehua' yubá, en dë lu né'ë yöl-la' unná bë' zxön, ate' guyépi yösa bení' luyú ni'a que yöl-la' bení' queë' gubáz lá'ayi na'. <sup>2</sup> Bë'ë zidzaj didza' gubáz lá'ayi na', gunné':

¡Chibiguínnaj! ¡Chibiguínnaj Babilonia, yödzö zxön na'!

¡Chiböáca xilataj tu' xihui', en xilátjagaca bö' xihui' tun ditaj bönachi!

¡Yugu' biguínni xitsini', en yugu' biguínni xihui' tu'zóaba' xilátajgacaba' ni'!

<sup>3</sup> Caní guca que yödzö na' ni'a que le gulún bönachi nacuá' ni'.

Gulunë' ga gulún bönachi yúgu'të yödzö ca nácagaca le ta'zësö ladxi' le ruá' dö'.

Nupa ta'nná bë' luyú yödzölió gulunlen légaquië' le ruá' dö',

ate' guta' yöl-la' tsahui' quégaquië' bënni' to'o tuti' nacu'ë yödzölió

tu' guyánda' yugu' le nazaca' gula'zé ladxi' bönachi ni'.

<sup>4</sup> Ní'irö biyönda' ruí'i didza' ia'tú nu zoa yehua' yubá, rnna:

Guli'rúaj lu yödzö na', lib'ili' néquili' quia'

para cabí gunli' dul-la' tsözxón len légaquië',

en para cabí quí'i sáca'li' le gaca quégaquië'.

<sup>5</sup> Nayánda' dul-la' nabága'gaquië',

en chinayasa nadxín caz lúzziba,

pero Dios röjnenë' le ruá' dö' núnquaquië'.

<sup>6</sup> Buli'bí'i quégaquië' ca na' gulunë' queéli'.

Buli'bí'i quégaquië' chopa cö' tsca le gulunë'.

Buli'bí'i quégaquië' chopa cö' tsca le naca xihui' gulunë' queéli'.

<sup>7</sup> Guli'gún ga ila'guí'i ila'záquië', en ila'bödxi yéchë'ë  
tsca guca yöl-la' ba, en yöl-la' zxön guluí'i cuíngaquië'.

Ta'zá' ládxi'gaquië', ta'nné:

Ró'ötu' ni, rinná bë'ëtu'.

Biti' nácatu' uzëbi, en catu caz cödxi yéchi'tu'.

<sup>8</sup> Que lë ni na', tu dzasö ila'dxín quégaquië' le ila'guí'i ila'záquië',  
yöl-la' guti, en yöl-la' ribödxi yechi', en yöl-la' ridún.

Iléguië' lu guí', tu' napa cazé' yöl-la' huáca zxön Xanru' Dios.

Lë cazé' usiúdxé' quégaquië'.

<sup>9</sup> Ni'irö gunné: "Ila'bödxi nupa ta'nná bë' luyú yödzölió, en gulún le ruá' dö' tsözxón len légaquië', en bulu'zí' xibé le nequi quégaquië'. Ila'bödxé', en ila'bödxi yéchë'ë cate' ila'lé'ené' dzön que yödzö zxön na' régui. <sup>10</sup> Zi'tu' zí'tu'sö ila'cu'ë tu' iládxinë' ca gaca xíguia' le gaca que yödzö na', ate' ila'nné: ¡Bica' bayechi' Babilonia, yödzö zxön ni, le gúcada' lo! ¡Tu dzasö guca xíguia' que!"

<sup>11</sup> Ni'irö gunné: "Ila'bödxé' ca' bönni' to'o tuti' nacu'ë yödzölió, en ila'bödxi yéchë'ë ni'a que yödzö na' tu' cabirö soa nu ga'u bi ilúti'ë ni'." <sup>12</sup> Cúnturö nu ga'u ni':

Le néquiguequini oro, en plata,

en yugu' guiój zaca', en yugu' bugá,

en yugu' lari' nazáca'da', en lari' xiná chul-la,

en lari' dxí'ado', en lari' xiná guí'ido'os,

en yugu' yaga rilá' zxixi,

en le néquiguequini dxita nazáca'da',

en le néquiguequini yaga nazáca'da',

en le néquiguequini guíë cobre,

en le néquiguequini guíë,

en le néquiguequini guiój jara.

<sup>13</sup> Cúnturö nu ga'u ni':

Canel, en yugu' le rilá' zxixi, en yalaj,

en le rilá' zxixi que mirra, en que yöj olíbano,

en xisi uva nál-la, en le naca za,

en yiözja dxí'ado', en zxoa' xtila,

en yugu' búrrodo', en yugu' bö'cu' zxila',

en yugu' böa', en yugu' carreta,

en yugu' bönni' huen dxin, en ia'bal-la böñachi.

<sup>14</sup> Nupa na' to'o tuti' ilé légaquië', ila'nná:

Nadúagaca le guzé' ládxi'lí'.

Chigudödi quégaca yöl-la' tsahui',

en le nácagaca lachi queéli',

ate' bíti'rö idzólili' léguequi.

<sup>15</sup> Ni'irö gunné: "Ila'bödxé' bönni' to'o tuti' na', tu' guta' quégaquië' yöl-la' tsahui' tu' gulúti'ë lu yödzö na', ate' ila'cu'ë zí'tu' zí'tu'sö tu' iládxinë' ca gaca xíguia' le gaca que yödzö na', en ila'bödxi yéchë'ë." <sup>16</sup> Ila'nné:

¡Bica' bayechi' yödzö ni guca zxön!

Guca ca tu nigula nácunu lari' nazáca'da',

en lari' xiná chul-la, en lari' xiná guí'ido'os,

en nazí'i biquitaj queénu le néquiguequini oro

en le néquigueequini guiój zaca', en yugu' bugá.

<sup>17</sup> Tu dzasö guniti yöl-la' tsahui' que yödzö ni.

Ní'irö gunné': "Yúgu'té bönni' xan barco, en nupa nacuá' lë'egaca barco na', en nupa tu'sá' yugu' barco na', en nupa tun dxin lu nísado', ila'cu'ë zi'tu' zi'tu'sö." <sup>18</sup> Cate' ila'lé'enë' dzön que yödzö na' régui, ila'bödxé', en ila'nné': "¿Bízxilö yödzö guca zxön ca naca yödzö ni?"

<sup>19</sup> Ní'irö gunné':

Ulu'dxíe' bëchtö ícjagaquié'.

Ila'bödxé', en ila'bödxí yeché'ë, ila'nné'.

¡Bica' bayechi' yödzö ni guca zxön!

Yöl-la' tsahui' que yödzö ni ben ga guta' yöl-la' tsahui'  
quégaca yúgu'té nupa nácagaca xan barco lu nísado'.

Tu dzasö guniti yödzö ni.

<sup>20</sup> Buli'dzeja ca gaca que yödzö ni, libí'ili' zóali' yehua' yubá,  
enca' libí'ili' néquili' queë' Dios,  
libí'ili', bönni' gubáz queë',  
en libí'ili', bönni' rui'ili' didza' uláz queë'.

Buli'dzeja, tu' chiguchúguië' Dios que yödzö ni  
ni'a que bi gulún queéli' nupa nacuá' lu yödzö ni.

<sup>21</sup> Ní'irö tuë' gubáz lá'ayi nál-la buchisë' tu guiój zxön le naca ca tu guichi riyëtu, ate' gurú'unë' le lu nísado', gunné':

La' canísö gaca que yödzö Babilonia,  
tu' iguínna yödzö na' guca lo,  
ate' bíti'rö nu udzöli le.

<sup>22</sup> Bíti'rö nu yöni lu yödzö na' nupa ta'guínni lë'e le rul-la,  
en caléga nupa tu'cödxi gui  
en caléga nupa tu'cödxi lúzuba' böa' bëdxí.

Bíti'rö udzöli bönni' huen dxin ni',  
en bíti'rö yöni bö rigú'u le rutu ni'.

<sup>23</sup> Bíti'rö uzení' nitú guí' lu yödzö na',  
en biti' yöni chi'ë bönni' rutsaga në'ë ni',  
en caléga chí'ibi' bi'i nigula rutsaga ná'abi'.

Caní gaca sal-la' nácalí' lo, libí'ili' rá'uli', en rúti'li' lu yödzö ni,  
en guzxí' yé'eli' bönachi idútë yödzölió len yöl-la' gudzá' queéli'.

<sup>24</sup> Lu yödzö ni gulaj xichóngaquië' bönni' gulu'ë didza' uláz queë' Dios,  
en xichóngaca nupa néquiguequi queë' Dios,  
enca' xichóngaca yúgu'té bönachi yödzölió,  
tu' bëtigaca nupa nacuá' yödzö ni léguequi.

## 19

<sup>1</sup> Gudödi lë ni biyönda' tu'i zidzaj didza' bönachi zián nacuá' yehua' yubá, ta'nná:  
¡Yöl-la' ba Dios! ¡Yöl-la' rusólá runé',

ate' yöl-la' zxön, en yöl-la' unná bë' napë' Dios queéru'!

<sup>2</sup> ¡Naca idútë li, en tsahui' ca rusiúdxé'!

¡Guchúguië' que yödzö na' naca ca tu nigula udá dzaga,  
en quégaca bönachi lu yödzö na' ila'niti tsaz!

¡Gulún ditaj bönachi yödzölió tu' nözi le ruá' dö' gulunë'!

¡Dios buzí' lëbë' légaquië'

tu' gulútië' yugu' huen dxin queë'!

<sup>3</sup> Leyúbölö gula'nné': "¡Yöl-la' ba Dios! ¡Cuéntica'sö dzön ga régui yödzö na'!"

<sup>4</sup> Idapa uru'ë bönni' gula ni' bulu'tsaga lógaquië' lu yu tsözxön len idapa nupa ni' nabángaca, en ta'yéaj ládzi'gaquië' Dios, Bönni' rö'ë lataj lo queë'. Gula'nné': "¡Ca' gaca! ¡Yöl-la' ba Dios!"

<sup>5</sup> Ní'irö biyönda' ru'i didza' tu nu zoa lataj lo na', rnna:  
¡Guli'cu'ë Dios queéru' yöl-la' ba  
yúgu'téli' runli' xichiné', libí'ili' na' rádxili' Lë',  
nácali' bönachi cá'asö, en bönachi lo!

*Laní que yöl-la' rutsaga na' queë' Bönni' náquië' Bö'cu' Zxila'do'*

<sup>6</sup> Biyönda' ca' nu ru'i zidzaj didza', le biyöñ ca riyöñ cate' tu'i didza' bönachi zián, en biyöñ ca' ca riyöñ ga ridödi tu yegu zxön, o ca riyöñ cate' rinné guziú', ate' rnna:  
¡Yöl-la' ba Dios tu' risí lahuë' rinná bë'ë!  
¡Napa cazé' yöl-la' huáca!

<sup>7</sup> ¡Ral-la' udzeja ládzi'ru', en uzi'iru' xibé',  
en cú'uru'-në' yöl-la' ba  
tu' chibidxín dza laní que yöl-la' rutsaga na'  
queë' Bönni' na' náquië' Bö'cu' Zxila'do'!  
¡Si' lu në'ë Cristo nupa néquiguequi queë'  
¡Chinabá'a queébi' bi'i utsaga ná'alenbi' Lë'!  
¡Nácabí' le rulu'i nupa na' néquiguequi queë'!  
<sup>8</sup> ¡Dios ru'ë-bi' lataj gácubi' lari' nazáca'da'  
le naca idú, en répi yosa bení'!

Lari' nazáca'da' na' rulu'i le naca tsahui' núngaca nupa néquiguequi queë' Dios.

<sup>9</sup> Ní'irö gubáz lá'ayi na' gudxë' neda', gunné': "Buzúaj lu guichi didza' ni: ¡Bica' bágaca nupa na' nulidzë' Dios légaquië' para ila'cu'ë laní que yöl-la' rutsaga na' queë' Bönni' náquië' Bö'cu' Zxila'do'!"

Gudxë' ca' neda': "¡Yugu' didza' idútë li ni ru'ë didza' Dios caz!"

<sup>10</sup> Buzóa zxiba' xini'ë gubáz lá'ayi na' para tseaj ládx'a a lë', pero gudxë' neda': "¡Biti' gunu' caní! Neda' ca' naca' huen dxin queë' Dios ca nacu' li', en ca nácagaquië' böchi' luzz'o nazi' lu ná'agaquië' le naca idútë li ca naca queë' Jesús. ¡Guyéaj ládxë'ë Dios!"

Nupa tu'i didza' uláz queë' Dios, tu'i didza' le naca idútë li ca naca queë' Jesús.

*Bönni' dxíe'-ba' böa' chiguichi*

<sup>11</sup> Ní'irö bilé'eda' nayalaj lúzxiba, ate' bulu'i loba' tuba' böa' chiguichi, ate' lë' Bönni' dxíe'-ba', Nu Run Ca Rnna, enca' Nu Rui' Didza' Le Nácaté. Caní lë' tu' ruchi'a rusöröë' ca

naca le naca idútë li, enca' caní tseje' gudil-la. <sup>12</sup> Répi yosa bení' guijo' lahuë', le nácagaca ca guí', en dxíagaca icje' zián le néquiguequini oro. Nazúaj lahuë' tu le lë', le cuntu nu nözi, pero tuzé' Lé' nöziné'. <sup>13</sup> Nácuë' tu lari' në'aj rón, en lë' ca' "Nu Naca Xtídzë'ë Dios."

<sup>14</sup> Röjnógaquië' Lé' ni'a në'ë guizxi yu nacu'ë yehua' yubá, dxíagaquië'-ba' böa' chiguichi, en nácagaquië' lari' nazáca'da', le naca chiguichido'os, en biti' naca bösaj. <sup>15</sup> Rirúaj ru'ë le naca ca tu guíe' tuchi' le gúniné' zi' bönachi yugu' yödzö. Inná bë'enë' légaquië' len tu xiyyaga guíe, en gunë' légaquië' xíguia', le gaca quégäquië' ca raca que le ribía lubá uva, zoa nu rulibi léguequi, tu' riléde'enë' Dios, Bönni' napa cazé' yöl-la' unná bë'. <sup>16</sup> Nazúaj lu lari' nácuë', enca' lu xigatsjë' ca lë', "Bönni' Rinná Bé'enë' Nupa Ta'nná Bë'", enca' "Bönni' Náquië' Xángaca Nupa Nácagaca Xan."

<sup>17</sup> Ní'irö bilé'eda'-në' tuë' gubáz lá'ayi zuínë' lu gubidza, ate' bë'ë zidzaj didza', en gudxë'-ba' böa' ta'daba' lúzxiba, rnne': "¡Guli'dá, buli'dubí ga ni gáguli' laní zxön queë' Dios!"

<sup>18</sup> Gáguli' xipéla'gaca nupa ta'nná bë', en xipéla'gaca nupa ta'nná be'e bönni' röjáquië' gudil-la, en xipéla'gaca nupa nál-lagaca, en xipéla'gacaba' böa', en xipéla'gaca nupa ta'bía légacaba', en xipéla'gaca yúgu'té bönachi, nupa biti' nadó'ogaca, en nupa nadó'ogaca, nupa nácagaca cá'asö, en nupa nácagaca lo."

<sup>19</sup> Ní'irö bilé'eda'-ba' böa' sínia' na', enca' yugu' bönni' ta'nná bë'ë yödzölió, en bönni' röjáquië' gudil-la guizxi yu quégäquië', nudúbigaquië' para ilúnlenë' gudil-la Bönni' dxíe'-ba' böa' chiguichi, dzágagaca Lë' ni'a në'ë guizxi yu. <sup>20</sup> Bidzunba' böa' sínia' na', enca' bönni' na' bë'ë didza' uláz queéba', bönni' na' benë' yugu' le nácada' bë' loba', en guzxí' yé'enë' nupa ni' guluf'i lataj nu uzúaj láhuiguequi lë na' naca bë' dá'gaca lëba', en gula'yéaj ládxí'gaca budó' queéba'. Böa' sínia' na', enca' bönni' na' bë'ë didza' uláz queéba', gula'rú'unë' léguequi nabángacasö ca' ga rö'ö guí' zxön le régulen lë na' ruzégui'da'. <sup>21</sup> Bönni' na' dxíe'-ba' böa' chiguich bétie' yúgu'të nupa na' gudá'gaca léguequi len guíë tuchi' na' rirúaj ru'ë, ate' bulu'huöljaba' yúgu'tëba' böa' na' ta'daba' lúzxiba, tu' guláguba' xipéla'guequi.

## 20

*Chi gayuá' iz*

<sup>1</sup> Gudödi lë ni bilé'eda' ruhuötje' tu gubáz lá'ayi, zë'ë yehua' yubá, en zönë' zxí'ini guíë que lataj chul-la, ate' nu'ë tu du guíë yödx. <sup>2</sup> Guzxónë'-ba' bëla zxön xitsini' na', nácabá' bëla guzóaba' dza ni'te, bëla na' lëba' Tu' Xihui', enca' Satanás, ate' béguë'ë-ba', en bucá'anë'-ba' caní chi gayuá' iz. <sup>3</sup> Yójchú'unë'-ba' lataj chul-la, en busayjé' lataj na', ate' budé'ë tu le riguela' le rusayaj lataj na' para cabirö si' yéeba' bönachi yugu' yödzö ga izá'arö chi gayuá' iz na', ate' tödi ni' ral-la' yédxiba' tu chí'ido'.

<sup>4</sup> Ní'irö bilé'eda' yugu' lataj gapa ta'bö' nupa ta'nná bë', ate' nupa bila'deli' ulu'chi'a ulu'sörö le raca ta'bö' yugu' lataj na'. Bilé'eda' ca' yugu' bö' gulaca caz bönachi bulu'rixé' yénguequi yugu' bönni' biti' nácagaquië' tsahui' tu' gulún ba nalí queë' Jesús, en tu' gulún libán que xtídzë'ë Dios. Yugu' bönachi ni biti' gula'yéaj ládxí'gaca böa' sínia' na', en budó' queéba', en biti' guluf'i lataj nu uzúaj ra' xigáguequi, o lu né'ëguequi lë na' naca bë' nu da' lëba'. Bulu'bán nupa ni lu yöl-la' guti, ate' gula'nná bë'len Cristo chi gayuá' iz, <sup>5</sup> pero ia'zíca'rö bönachi nátigaca biti' bulu'bán. Cate' izá'arö chi gayuá' iz na' ulu'bán. Yöl-la' rubán lu yöl-la' guti guca ni naca le raca zí'alö. <sup>6</sup> ¡Bica' ba, en bica' lá'ayi nupa ta'deli' yöl-la' rubán na' raca zí'alö! ¡Yöl-la' guti le raca burópilö biti' bi gaca gun quéguequi, pero ilácagaca bixúz queë' Dios, enca' queë' Cristo, ate' ila'nná bë'len Lë' chi gayuá' iz na'!

<sup>7</sup> Cate' izá'a chi gayuá' iz na', ulu'sanë' Satanás ga na' nadzún. <sup>8</sup> Urúaj Satanás, en tsöjzxí' ye'e bönachi yugu' yödzö nacuá' idapa la'a yödzölió. Si' ye'e ca' bönachi yödzö Gog, en yödzö Magog, ate' utubi léguequi lu gudil-la. Tsca nácagaca nupa ni, nácagaca ca naca yuzxi rö'ö tu ra' yegu zxön. <sup>9</sup> Guizxi yusö gula'dödë' idútë luyú, ate' gula'cu'ë lë'ajlö lataj ga na' nacuá' bönachi néquiguequi queë' Cristo, le naca yödzö na' nadxí'inë' Dios. Ní'irö benë' Dios ga böxaj guí' le birúaj yehua' yubá, le buzegui' légaquië'. <sup>10</sup> Tu' xihui' na' nazi' ye'e légaquië', yójchú'unagaquië' le ga rö'ö guí' zxön que lë na' ruzégui'da', ga na' chizóaba' böa' sínia' na', enca' bönni' na' bë'ë didza' uláz queéba'. Ila'guí'i ila'zaca' ni' rëla, en te dza yúgu'të iz zá'gaca.

*Ta'dxín bönachi lahuë' Dios ga rö'ë ruchi'a rusöröë'*

<sup>11</sup> Ní'irö bilé'eda' tu lataj lo chiguichi, en bilé'eda' ca' Nu rö'ö ruchi'a rusöröë' lataj na'. Lahui' lo Nu ni gula'nítitë yödzölió, en lúzxiba, ate' bíti'rö budzöli xilátjaguequi.

<sup>12</sup> Bilé'eda' ca' nupa chinátigaca, nupa nácagaca lo, en nupa nácagaca cá'asö, zuíguequinë' lahuë' Dios. Gula'yálaj guichi, en guyalaj ca' ia'tú guichi ga na' nazúajgaca lágaca nupa nadéli'gaca yöl-la' na'bán idú. Buchi'a busöröë' Dios nupa na' chinátigaca tsca naca le nazúaj yugu' lu guichi na', lë na' gulúngaca. <sup>13</sup> Lu nísado' bulu'rúaj nupa chinátigaca, nacuá' lu nísado'. Lu yöl-la' guti, en lu lataj chul-la bulu'rúaj nupa chinátigaca, gula'cu'ë gapa ni', ate' buchi'a busöröë' Dios tu tu tsca naca le gulúngaca. <sup>14</sup> Ní'irö yöjtsázagaca yöl-la' guti, en lataj chul-la ga ni' rö'ö guí' zxön le naca lataj que yöl-la' guti le raca

burópilö. <sup>15</sup> Nupa biti' nazúajgaca lu guichi quégaca nupa nadéli'gaca yöl-la' na'bán idú yöjtsázagaca lataj na'.

## 21

*Tu lízxiba cubi, en tu luyú cubi*

<sup>1</sup> Gudödi na' bilé'eda' tu lízxiba cubi, en tu luyú cubi, tu' chigudödi quégaca lízxiba na', en luyú na' gula'cuá' zí'alö. Bíti'rö dë nísado'. <sup>2</sup> Neda', Juan, bilé'eda' yödzö lá'ayi na', le naca Jerusalén cubi, ruhuötaj, rirúaj yehua' yubá ga zoë' Dios, en chinabá'a que ca nabá'a queébi' bi'i nigula chizóa utsaga ná'alenbi' tu bönni'. <sup>3</sup> Biyönda' rui'i didza' nu rnna yehua' yubá: "¡Buli'yútsöca'! ¡Ga zoë' Dios zóalen bönachi! ¡Sóalené' léguequi, ate' léguequi ilácagaca bönachi queé! ¡Dios caz sóalené' léguequi, en gáquië' Dios quéguequi!

<sup>4</sup> Dios uzxíe' nisa ribödxi zoa guiój lóguequi. Cúnturö nu gati, en cínturö nu cödxi, en cínturö nu cödxi yechi', en cínturö nu qui'i saca', tu' chigudödi quégaca lë na' gulaca zí'alö."

<sup>5</sup> Ní'irö Nu na' rö'ö lataj lo ni' gunná: "¡Buyútsöca'! ¡Yúgu'të ruúna' cubi!"

Gudxi ca' neda': "¡Buzúaj lu guichi lë ni, tu' naca idútë li didza' ni, en naca löza!"

<sup>6</sup> Ní'irö gudxi neda': "¡Chinaca caz! ¡Neda' naca' Nu zoa zí'atëlö, enca' Nu röjsete ca naca le risí lo, en le ruúdxitë! ¡Nu ribidxi nisa, neda' guna' ga gui'aj nisa na' runna yöl-la' na'bán! <sup>7</sup> Nupa ila'deli' lu le raca yödzölió, gaca quéguequi yúgu'të lë ni. Neda' gaca' Dios quéguequi, ate' léguequi ilácagaca zxí'ini caza', <sup>8</sup> pero nupa tadxi, en nupa biti' ta'yéajlë' neda', en nupa nácagaca xihui', en nupa tuti bönachi, en nupa tun le biti' naca tsahui', en nupa nácagaca udzá', en nupa ta'yéaj ládx'i'gaca budó' guiój budó' yaga, en yúgu'të nupa ta'zí' yë', chizúa riböza xilátjaguequi lu guí', ga ni' rö'ö guí' zxön que lë na' ruzégui'da', lë na' naca yöl-la' guti le raca burópilö."

*Yödzö Jerusalén le naca cubi*

<sup>9</sup> Ní'irö tué' gubáz lá'ayi nababé' gadxé' gubáz lá'ayi ni' gula'zoné' gadxi zxíga'do' yúdxugaca gadxi yödzöhué' yöjsétegaca, bidë' ga zoa'. Gudxé' neda': "¡Gudá ni! ¡Uluí'ida' li' bi'i nigula na' si' utsaga ná'alenbi' Bönni' na' náquië' Bö'cu' Zxíla'do'!"

<sup>10</sup> Guzálené' Dios Bö'Lá'ayi neda', ate' guché'ë gubáz lá'ayi na' neda' tu lu guí'a sibi, en bulu'iñé' neda' yödzö lá'ayi Jerusalén, ruhuötaj, rirúaj yehua' yubá ga zoë' Dios. <sup>11</sup> Yödzö ni répi yösa bení' tu' zóalen le yöl-la' bení' queé' Dios. Répi yösa bení' ca répi yösa bení' tu guiój nazáca'da' ca naca guiój guí'do'os nazí'i le jaspe. Naca yödzö na' yení'ido' ca naca guiój jara. <sup>12</sup> Zoa tu zö'ö zxön, en sibi idú gásibi'ilö yödzö na'. Lë'e zö'ö na' nacuá' chinnu gapa nu riyaza. Ra' gapa nu riyaza na' nacué' chinnu'ë gubáz lá'ayi tapa chi'é. Tu tu ga nu riyaza na' nazúaj tu tu lágaca idxinna cö' di'a dza zxí'ini xi'sóë' Israel. <sup>13</sup> Lë'e zö'ö le ruyú saca' ga rilén gubidza nacuá' tsonna gapa nu riyaza, en saca' ga za' bö' ziaga nacuá' tsonna gapa nu riyaza, en saca' tsöll'a ga ridödi gubidza beo' ziaga nacuá' tsonna gapa nu riyaza, en saca' ga ribía gubidza nacuá' ca' tsonna gapa nu riyaza. <sup>14</sup> Xzan zö'ö que yödzö na' nacuá' chinnu xilibi zö'ö, ate' lë'egaca xilibi zö'ö na' nazúajgaca lágaquië' idxínnutë' bönni' gubáz queé' Bönni' na' náquië' Bö'cu' Zxíla'do'.

<sup>15</sup> Gubáz lá'ayi na' rui'ilené' neda' didza' zöné' tu yaga urixi le néquini oro para urixé' tsca naca yödzö na', en tsca nácagaca gapa nu riyaza, en tsca naca zö'ö que. <sup>16</sup> Yödzö na', lédi'i nácagaca idapa la'a. Lédi'i naca yöl-la' tunna que, en yöl-la' blaga' que. Len yaga na' burixé' tsca naca yödzö na', naca idú tsca gaca nu sa' idú chinnu dza, ate' lédi'i naca yöl-la' tunna que, en yöl-la' xitsá' que, en yöl-la' bólaga' que. <sup>17</sup> Burixé' ca' yöl-la' yödx que zö'ö na', naca tu gayuá' yu' tapa-un dxita, tsca naca dxita que na' bönachi, lë na' ruríxiné' gubáz lá'ayi na'.

<sup>18</sup> Zö'ö na' néquini guiój jaspe, ate' yödzö na' néquini órotëz, le naca yení'ido' ca naca guiój jara. <sup>19</sup> Yugu' xilibi zö'ö que yödzö na' nazí'gaca biquitaj guiój nazáca'da'gaca.

Xilibi zö'ö zí'alö néquini guiój jaspe.

Le buropi néquini guiój zafiro.  
 Le bunni néquini guiój ágata.  
 Le budapi néquini guiój esmeralda.  
<sup>20</sup> Le guyu' néquini guiój ónice.  
 Le buzxopi néquini guiój cornalina.  
 Le igadxi néquini guiój crisólito.  
 Le izxunu' néquini guiój berilo.  
 Le igá néquini guiój topacio.  
 Le idxí néquini guiój crisoprasa.  
 Le idxinéaj néquini guiój jacinto.  
 Le idxinmu néquini guiój amatista.

<sup>21</sup> Chinnu gapa nu riyaza na' ta'yáyjani chinnu bugá. Tu tu ga nu riyaza na' riyáyjani tuz bugá. Luyú la' nöza lo que yödzö na' néquini órotëz, le naca yení'ido' ca naca guiój jara.

<sup>22</sup> Biti' bilé'eda' tu yudo' lu yödzö na', tu' náquië' Xanru' Dios yudo' que, napa cazë' idútë yöl-la' unná bë', en lësca' caní náquië' Bönni' náquië' Bö'cu' Zxíla'do', náquië' yudo' que yödzö na'. <sup>23</sup> Biti' run bayudxi tsení'gaca gubidza, en beo' lu yödzö na', tu' uzení' yöl-la' bení' queë' Dios lu yödzö na', ate' lësca' Bönni' náquië' Bö'cu' Zxíla'do' náquië' le uzení' ni'. <sup>24</sup> Bönachi yugu' yödzö, nupa nulágaca, ila'dá lu bení' que yödzö na', ate' yugu' bönni' ta'nná bë'ë yödzölió idiguá'agaquië' yöl-la' tsahui' quégäquië' lu yödzö na'. <sup>25</sup> Catu caz tsáyajgaca gapa nu riyaza lu yödzö na' lahui' dza, ate' lataj na' catu caz gaca rëla. <sup>26</sup> Bönachi yugu' yödzö idiguá'agaquië' ni' le nácagaca lesaca', en yöl-la' tsahui' quéguequi. <sup>27</sup> Tu le ruá' dö' biti' ca' tsaza ni', en calëga tu le naca xihui', en calëga nu rizi' yë', pero tsázagacasö ni' nupa nazúajgaca láguequi lu guichi queë' Bönni' náquië' Bö'cu' Zxíla'do', ga na' nazúajgaca lágaca nupa nadéli'gaca yöl-la' na'bán.

## 22

<sup>1</sup> Ní'irö gubáz lá'ayi na' bulu'inë' neda' tu yegu yení'ido', le naca nisa yegu le runna yöl-la' na'bán. Rëpi yösa bení' yegu na' ca rëpi yösa bení' guiój jara. Rirúaj yegu na' lu lataj lo ga rö'ë Dios, en ga rö'ë ca' Bönni' náquië' Bö'cu' Zxíla'do'. <sup>2</sup> Rizá' yegu ni gatsaj láhui'lö nöza lo que yödzö na'. Tsölá'a huéaj ra' yegu na' rö'ö tu yaga le runna yöl-la' na'bán, ate' ta'bía chinnu luzuí tu iz. Tu tu beo' ta'bía yaga na'. Xilágui'gaca yaga na' nácagaca le tu'ún bönachi yugu' yödzö. <sup>3</sup> Biti' soa ni' nitú le dxia dö'. Soa lu yödzö na' lataj lo ga rö'ë Dios, enca' ga rö'ë Bönni' náquië' Bö'cu' Zxíla'do', ate' yugu' huen dxin queë' ila'yéaj ládzi'gaquië' Lë'. <sup>4</sup> Ila'lé'enë' lahuë' Lë', ate' le nazí'i Lë' nazúaj ra' xigágaquië'. <sup>5</sup> Biti' gaca rëla ni', ate' nupa nacuá' ni' biti' ila'quínna tu le cu'u bení', en calëga bení' que gubidza, tu' gáquië' Xanru' Dios bení' quégäquië'. Nupa nacuá' ni' ila'nná bë'tica'sö.

### *Chizóa huödë' Cristo*

<sup>6</sup> Ní'irö gubáz lá'ayi na' gudxë' neda', gunné': "Didza' ni naca idútë li, en naca löza. Xanru' Dios, Nu ruchiza Bö'Lá'ayi icja ládxí'do'gaquië' yugu' bönni' tu'ë didza' uláz queë', chigusöl-lë'ë gubáz lá'ayi queë' para ulu'inë' yugu' huen dxin queë' le ral-la' gácatë. <sup>7</sup> Caní rnnë' Jesucristo: ¡Chizóa huöda'! ¡Bica' ba nu run ca rnna didza' ruá'a uláz queë' Dios, le nazúaj lu guichi nil!"

<sup>8</sup> Neda', Juan, biyönda', en bilé'eda' yugu' lë ni. Gudödi biyönda', en bilé'eda' yugu' lë ni, buzúa zxiba' xini'ë gubáz lá'ayi na' bulu'inë' neda' yugu' lë ni para guna' lë' zxön.

<sup>9</sup> Ní'irö lë' gudxë' neda': "Biti' gunu' caní, tu' naca' neda' huen dxin queë' Dios ca nacu' li', en ca nácagaquië' böchi' luzó'o na' tu'ë didza' uláz queë' Dios, enca' ca nácagaca yúgu'të nupa tun ca rnna le nazúaj lu guichi ni. ¡Ben zxön Dios!"

<sup>10</sup> Gudxë' ca' neda': "Biti' ucachu'u xtídzë'ë Dios ni, didza' ruá'a uláz queë', en nazúaj lu guichi ni, tu' chizóa ilaca yugu' lë ni. <sup>11</sup> Nu ruá' dö' guá'tica'sö dö'. Nu run le cabí naca

tsahui' gúntica'sö le cabí naca tsahui'. Nu run dxi'a, gúntica'sö dxi'a, ate' nu nequi quez queë' Dios, guéquitica'sö quez queë'." <sup>12</sup> Rnnë' Jesús: "¡Chizóa huöda! Nu'a lu na'a le nadéli'gaca bönachi, ate' ubi'a que queëguequi tsca naca le gulúngaca. <sup>13</sup> Neda' naca' Nu zoa zí'atëlö, enca' Nu röjsete, ca naca le risí lo, en le ruúdxítë. Naca' ca' Nu run ga risí lo, en Nu rusiúdxi."

<sup>14</sup> Ni'irö gunnë': "¡Bica' ba nupa nayari le nácugaca, en tun le naca dxi'a! ¡Nazí'guequi lataj ilahuë' le ribía yaga le runna yöl-la' na'bán, en gaca ila'yaza gapa nu riyaza lu yödzö na'! <sup>15</sup> Nupa nácagaca xihui', en nupa nácagaca udzá', en nupa tun le ruá' dö', en nupa tuti bönachi, en nupa ta'yéaj ládxí'gaca budó' guiój budó' yaga, en nupa ta'yaza ládxí'gaca ta'zí' yë' ila'cuá' ní'ilö ra' yödzö na'. <sup>16</sup> Neda', Jesús, gusól-la'a gubáz lá'ayi quia', ate' bulu'iñé' libí'ili' yugu' lë ni, libí'ili' na' dzágali' yugu' cö' bönachi quia'. Neda' naca' di'a dza queë' David, enca' zxí'ini xi'sóë'. Naca' ca' böläj hui sila."

<sup>17</sup> Tu'ë didza' Dios Bö' Lá'ayi, enca' bi'i nigula utsaga ná'alenbi'-në' Bönni' náquië' Bö'cu' Zxíla'do', ta'nné': "¡Gudá!"

Nu riyöni didza' ni ral-la' inná: "¡Gudá!"

¡Nu ribidxi nisa, en nu rizé ladxi' le, ral-la' guídi, en guí'aj nisa le runna yöl-la' na'bán!

<sup>18</sup> Neda', Juan, ruzéajni'ida' nupa ta'yöni didza' ni ruá'a uláz queë' Dios, en nazúaj lu guichi ni, rnnía': Channö nu udá' lë'e didza' ni, Dios ubi'ë que nu na'. Gunë' lë' xíguia' ca naca le nazúajgaca lu guichi ni. <sup>19</sup> Lësca' caní, channö nu cúa bíti'tës didza' ni ruá'a uláz queë' Dios, en nazúaj lu guichi ni, Dios ugüë' ca' xilataj nu na' lu guichi ga nazúajgaca lágaca nupa nadéli'gaca yöl-la' na'bán idú, enca' lu yödzö lá'ayi, ca na' nazúaj quéguequi lu guichi ni.

<sup>20</sup> Xanru', Nu run ba nalí quéguequi lë ni rnnë': "¡Ön! ¡Huödatea'!"

¡Ca' gaca! ¡Gudá, Xantu' Jesús!

<sup>21</sup> Rinábida'-në' Xanru' Jesucristo uzá' ládxë'ë queëli' yúgu'tëli'. ¡Ca' gaca!